

# Migabac Bible Portions



Portions of the Bible in the Migabac language of Papua New  
Guinea

**Migabac Bible Portions**  
**Portions of the Bible in the Migabac language of Papua New**  
**Guinea**  
**Sampela hap long Buk Baibel long tokples Migabac long**  
**Niugini**

copyright © 2010-2020 Wycliffe Bible Translators, Inc.

Language: Migabac

Translation by: Wycliffe Bible Translators

Audio recording © 2013 Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-02-20

---

PDF generated using Haiola and XeLaTeX on 21 Feb 2024 from source files dated 31 Aug 2023  
620e6058-116b-51e5-b20a-ab9e8b9bea5d

## Contents

Ruti . . . . .	1
Mataio . . . . .	8
Mareko . . . . .	79
Luka . . . . .	121
Yoane . . . . .	193
Salecebaicne . . . . .	243
Roma . . . . .	307
1 Korin . . . . .	340
2 Korin . . . . .	370
Galata . . . . .	390
Efesas . . . . .	401
Filipai . . . . .	412
Kolosi . . . . .	420
1 Tesalonika . . . . .	428
Tesalonika . . . . .	435
1 Timoti . . . . .	439
2 Timoti . . . . .	448
Titus . . . . .	455
Filemon . . . . .	459
Hibru . . . . .	461
Yakobos . . . . .	484
1 Pita . . . . .	492
2 Pita . . . . .	501
1 Yoane . . . . .	507
2 Yoane . . . . .	515
3 Yoane . . . . .	517
Yude . . . . .	519
Miyegengkeicne . . . . .	522

## Ruti

Abraham ye Israel aling yengele ngambongineng. Esecne benang Israelle ngic sugucne, wacnginec Moses nga Yosuwa, yeke homaiboc. Dameng iwa Israel ngic-ngigac yenge ngictau mikac. Ngic gocne yenge Israel ngic-ngigac damongebalu hudu-ngic sugucnengineng domaibong. Ilec mimocto-mimocto ngic wackegabeleng. Yengele siduc 'Hetman' Wapongte hibiwa fagac. Israel-ngic yengele himong wacine monic Yuda.

Aling monicka waengineng Moabi gaibong. Lot ye Abraham gbainele madec. Moabi ye Lotle madec. Dameng gocne Moabi aling yenge Israel aling losi aiyeleibong.

Aling yogolec kwelina Ruti fikewec. Ye kpapuc ngigac. Ye himong nga alingine hegilelu Israel himongka hikelu gawec. Wapong balaibelu yowaine ngagenale Wapong ye angackewec. Ailu madicne aicnolu damongkewec. Lobeina Ruti ye gholi bafuwame fikesawec fecgu ngamboine Tau Dawidi fikewec. Lobeina Yesu ye Tau Dawidile alingkacni fikewec. Yesu ye Rutile ngapang-ngilic-nguluc.

### *Elimelec nga Naomi yekele siduc*

#### *Yuda himong loloc fikewec*

<sup>1</sup> Yuda himong yogo mimocto-mimocto ngic yengi damongkelu balu gaibong, dameng yogowa nosinte loloc fikelu fawec. Aime Betelehem taon kpsicne Yuda himongka ngiyewec, iwacni ngic monic ngigac-madeckecineholec Moabi aling yengele himongka kwilic galu monickolec hefaliyenogale hikeibong. <sup>2</sup> Ngic ye wacine Elimelec nga ngigacine wacine Naomi ailu madeckecine waenginiec Malong nga Kiliung. Yenge yogo Efaratale alingkacni, Yuda himong Betelehem taonkacni Moabi himongka hikelu gaibong.

#### *Elimelec nga madeckecine homaibong*

<sup>3</sup> Gacgu Naomi ngaweine Elimelec homame madeckecine yengilangkac gaibong. <sup>4</sup> Gacgu madeckecine yeke ngigac Moabiocni bacepaiboc monic wacine Oropa nga monic wacine Ruti. Aime yenge iwa gacgubong hifanganeng 10 ingucne motowec. <sup>5</sup> Inguc gabong Malong nga Kiliung yeke homaiboc. Naomi ye ngawe-madeckecine mikac yeicnac gawec.

#### *Yuda himongka lileibong*

#### *Waponti Israel habu nosing bafacebawec*

<sup>6</sup> Inguc gacgume, Waponti Israel ngic-ngigacfocine Yuda gaibong nosing baficyebawec, yogolec siduc Moabi aling yengele himongka hikeme ngagelu, Naomi yengaukecine yenge momochac Yuda himongka hefaliyenogale efeckeibong. <sup>7</sup> Efeckeibelu yengaukecine yekeholec himong gaibong, yogo hegilelu yefe weleibong inguc yefe Yuda himongka hatamac hefaliyenogale hikeibong.

#### *Naomidi Ruti nga Oropa salecepawec*

<sup>8</sup> Yefewa hikelu Naomidi yengaukecine yanguc edocepwec, "Ngeke neng-gackecnginiec yekele macka hefaliyedabiec. Ailu na nga ngawekecnginiec homaiboc, nonge madicne damongnubaiboc, ingucneyac Waponti ngeke inguchac benang baficngepadaic. <sup>9</sup> Ailu Waponti nalic baficngupame

ngawekecnginec gbolicne bafuwacepalu bacepalu macnginac ngiye-domac madicne gadabiyec."

Inguc milu kokocepame yeke aukwelu hiyaiboc. <sup>10</sup> Hiyalu yanguc miiboc, "Miyac, noke gale alingfogcone ngengeholec hikelu gadabelete."

<sup>11</sup> Inguc miboc Naomidi yanguc edocepwec, "ngeke hefalie hikenic! Omale naholec monickolec gadabiyete? Na wenuc madec monickolec bacapebe sugulelu ngeke bacngepadabiyete? <sup>12</sup> Yengaukecne, ngeke macnginac hefalie hikedabiyec! Na ngigac dandanginedi ngic monickolec wenuc badacte? Ailu na ngagebe nalic aiaine aidaicka, na ngic gbolicne deboc yagowahac badaba i nalic, madec fikeboc ngeke bacngepadaboc? <sup>13</sup> Ailu ngeke monicka mi hikedaboc madec suguleboc nganicpalu wangecnginec nalic gadaboc? Ailu yengaukecne, inguchac miyac! Wapongti bawacnulu lobe-holenelewec, na ngekele ailu doic kwele-umackolec gagabac ngeke hikedabiyec."

<sup>14</sup> Inguc mime yeke monickolec aukwelu hiyaiboc. Aime Oropa ye yengauine gbagbangkelu hefalie hikewec. Nga Rutidi ine yengauine Naomi-holec hikenogale sanangne hobame Naomidi yanguc edowec, <sup>15</sup> "Nganic, balugone ye alingfocine nga wapongfocine yengela hefaliwegac. Ga ingucyac balugone balaibelu hefalielc."

<sup>16</sup> Mime Rutidi yanguc bafaliyeconwec, "Na ga hegilecgulu hefaliactedele bocyc mi hatae nelec. Hikedamecte, yogo na hikedacte nga gadamecte yogo na ingucyac iwahac gadacte. Ailu gale alingfoc yogo nale agofoc. Nga gale Wapong yogo nale Wapong. <sup>17</sup> Aime ga wenuwa homadamecte, yogowahac na homabe longnudaingte. Homacti sugu na galacni baicnudaicte. Na gaholec mi gadacte ilec ailu ameine Wapontacni umacineholec badacte." <sup>18</sup> Inguc milu ye hataelu sanangne Naomi inguchac nganiwec. Ilec ailu yowa hegilulu hikeloboc.

### *Betelehem ngic-ngigac yenge Ruti nga Naomi nganicyeapaibong*

<sup>19</sup> Hikecgu Betelehem taonka sulumeboc ngic-ngigac yenge sasawadi yekele kwatackelu olong baibong. Ailu mac-file ngigac yengi nganiclyepalu miibong, "Yogo Naomi hocne."

<sup>20</sup> Uwangagubong Naomidi yanguc miwec, "Nale wac Naomi hatacmac mi midaing. Kuc Fileine yedi ngageme nala doic kwele-umactowa fikewec, ilec ailu nale wac Mara wacnudabiyeng.\* <sup>21</sup> Na esecne mafaneholec gaiba. Nga yakucmac ine Wapongti bafaliyeconume wiyac mikac, ngani-motolu hefaliiegabac. Wapongti umac witina lolu monickolec Kuc Fileinedi lokwesacka locnuwec. Yogolec ngenge omale Naomi wacnugaing?"

<sup>22</sup> Dameng iwa Naomi nga yengauine Ruti yeke Moabi himong hegilelu Betelehem taonka padi ingucne bali wewe dameng fungke-fungkeina hefalielboc. Ruti ye ine Moabi alingkacni ngigac.

## 2

### *Rutidi Boasle bolewa galu yeicne bole bawec*

### *Rutidi nosing ba-habu ainale uwawec*

<sup>1</sup> Naomi ngaweine Elimelec, yele alingkacni ngic dungeineholec monic gawec, wacine Boas.

---

\* <sup>1:20:</sup> Mara wac yogolec fungine ye 'ngigac kwele-umackolec' nga Naomi wac yogolec fungine ye 'ngigac beliyegac'

<sup>2</sup> Aime Moabi ngigac Ruti yei Naomi edolu yanguc miwec, \* “Na Israel aling ngengele aibaba balaibelu bolewa nalic hikedacka, me? Iwa hikebe ngic monicti nalic midaicte nosing inguc wecaigaing, yogowacni noine monicmonic wa-fame ba-habu aidacte.”

Inguc mime Naomidi yanguc edowec, “Yengaune, ga migic inguc ainong.”

#### *Rutidi bolewa hikelu nosing ba-habu aiwec*

<sup>3</sup> Inguc mime ye bole monic iwa lekwesilu webac aiibong lobenginang domame noine gocne wa-fawec, yogo ba-habu aiwec. Lobeina ngageme bole yogo Boasle bole aiwec. Boas ye ine Elimelecte alingkacni.

#### *Boasdi Rutile ago holewec*

<sup>4</sup> Dameng yogowahac Boas ye Betelehem taonkacni wawec. Walu webac aiibong nganicyebalu yanguc edocebawec, “Wapongti ngengeholec gadaic.”

Inguc mime yenge ameine yanguc bafaliyecnoibong, “Wapongti mosocgudaic.”

<sup>5</sup> Aime Boas ye webac aiibong yengele damong, yela lelu uwacnowec, “Ngigac-adu yogo male?”

<sup>6</sup> Inguc mime yanguc bafaliyecnowec, “Ngigac-adu ye Naomiholec Moabi aling himongkacni weleiboc. <sup>7</sup> Ailu ye yakucmac wele yanguc migac, ‘na nalic webac aigaing yengele lobewa galu noine gocne dodockacni wa-fame ba-habu aidaba, me?’ Inguc milu ubiyakte benang wele ba-habu aigac. Ailu mi ngiye-ngagegac. Yakucmac falewa kpisicnemac ngiye-ngagegac.”

<sup>8</sup> Inguc mime Boasdi Ruti edowec, “Adune, na edocgube ngagec! Ga noine ba-habu ainogale milu bole monicka mi hikedamec. Bole yagowa sugu nale bole-adufocne yengeholec gadamec. Bole yago mi hegiledamec.

<sup>9</sup> Ailu webac aidaingte yenge wenuwa gabong, yogo nganilu adufocne yenge balaibecebadamec. Nga ngic yenge mi basowalecgudabiyentele aka-yowa mibac. Ailu misale aigeleme nalic galu misa kufockacni balu nodamec. Yogo nale bole-madec yengi bawelebiyeng domagac.”

<sup>10</sup> Boasdi Ruti inguc micnrome Ruti ye keta badulu haicine himongka heluluckelu miwec, “Na wenuc haicfulu ngigacti gale dongowa fikebe emegona locnugic?”

<sup>11</sup> Inguc mime Boasdi miwec, “Ga ngawegone biyac homame gacgu yengaugoneholec yawa weleiboc. Aime yengaugone madickeng yogo siduc sasawa nala biyac kwesiwc. Ailu nenggac-mamacfogone nga mac-himonggone yogo hegilelu ngic mi ngagecnubagic, nongela kwilic wele gagic. <sup>12</sup> Yogolec ameine Wapongti badugeledaic. Ailu ga Wapong yele habalac bageina sangkelu gagic. Yogolec Anutu, Israelle Wapong yeicne sugulacni ameine sasawa gala weledaic.”

<sup>13</sup> Inguc mime Rutidi miwec, “Sugucnene Boas, ga kwele-madic ainelelu baficnu-gadamec. Ailu bamadicnulu yowa efecnemac kwelec kwekwegone edocnugic, yogo na sifu gale bole-adufoc yenge ingucne mi aidacte.”

<sup>14</sup> Gacgu nosing-dameng aime Boasdi Ruti edolu miwec, “Ga yawa wele bret gocne balu waing-hulung kpomuluckelu noc.”

Inguc mime Ruti ye bole ngic-nigigac ngiyeibong, yengeholec ngiyewec. Ngiyeme Boas ye bali noine lobong loboicne gocne lacnrome nowec. Nome gebeckeme toseine bawec. <sup>15</sup> Ngiyeme Ruti ye monickolec noine ba-habu

\* **2:2:** Aibaba yogo yanguc fagac, ‘Wok Pris’ 19:9-10 “Wapongti miwec, ‘Dameng iwa nosing webac ailu ba-habu ainoga, nosing ungguluna domagac me nosing monic-monic wa-fagac, Yogo mi badaing. Nosing hegilebong ngic-nigigac mafa mikac me aling monickacni nalic yengileng badaing.’”

ainale fangkewec. Fangkelu leemowa Boasdi bole-madecfocine edocebalu yanguc miwec, "Ye nalic hegilebong galu noine dodockacni hewacnginang monic-monic fagac, yogo banoga aime aka mi hedickedaing.<sup>16</sup> Ailu ngenge dodockacni benang yedi badaictele, noine monic-monic nebecine fulucke wickebong fame ye nganilu badaic. Bame ngic monicti ilec ailu ngage-sowac mi aidaic."

### *Ruti bole bawecete mingagec aiiboc*

<sup>17</sup> Boasdi inguc mime Ruti ye bolewa noine ba-habu gaemowa mac debolewec. Deboleme ba-habu aiwec yogo balu weme wame bawec, bali hucine yoglec umacie 12 kilo, ingucne aiwec. <sup>18</sup> Aime weme wame umacie balu delu taonka fewec. Feme nosing bocyc ac ba-habu aiwec, yogo yengauine edalime nganiwec. Nga nosing loboicne nolu gebeckeme balewec, yoglec toseine ingucyac witina lacnowec.

<sup>19</sup> Lacnomi yengauinedi uwacnowec, "Ga yakucmac wenuwa galu noine ba-habu bole basic? Ngic emeina locguyec, ye Waponte mosoc yela fadaic."

Inguc mime Ruti ye male bolewa galu bawec, yoglec siduc yengauine yanguc aicnowec, "Na yakucmac ngic monic waccine Boas, yele bolewa gagabac."

<sup>20</sup> Aime Naomidi yengauine edowec, "Wapong ye gagaing nga homaicne yengela pasi madicne banale tatakir mi aicaigac. Wapong yeicne mosoc sugudi ngic yela fadaic. Ailu ye nongele alingkacri ngic gocne amebabafcnonggeng gaibong. Yengelacni monic ye hocne aigac."<sup>†</sup>

<sup>21</sup> Inguc mime Moabi ngigac Rutidi miwec, "Ye na ingucyac yanguc edoc-nugac, 'Ga nale bole-babafocne yengeholec gadamec gacgu noba nosing ba-habu dameng iwa motodaicte.'

<sup>22</sup> Aime Naomidi yengauine Ruti yanguc edowec, "Yengaune ga yele bole-adufocineholec madicne benang gaengka wiyc monicti nalic mi basowalecgudaictele gadamec. Entacka bole monicka hikedamecte iwaine umac badamecte."

<sup>23</sup> Aime Ruti ye Boasle bole-adufocine yengeholec noine ba-habu gacgume bali nga wit ba-habu dameng motowec. Dameng iwa Ruti ye yengauinele macka ngiye-fac gawec.

## 3

### *Naomidi Ruti yefe milockecnowec*

#### *Naomidi Ruti nosing-wewe macka salewec*

<sup>1</sup> Hadeng monic Naomidi yanguc edowec, "Yengaune, na nalic ga yefe monic bafuwagelebe ngiye-ngiyegone madicne aidaicka. <sup>2</sup> Nga bole-adufoc yengeholec gagic, yengele damong Boas, ye nongele alingkacni aigac. Ye deboc yagowahac nosing-wewe macina bali hucine gbelongka wikelu gadaicte. <sup>3</sup> Ilec ailu ga nalic misa lowalu ngakpi-kpolucgcone madicne benang holelu socgone tokic lowalu nosing-wewe macka hikedamec. Inguc

<sup>†</sup> **2:20:** Israel ngic-ngigac yenge pasi yanguc aiibong. Wapong ye gieng neboc-neboc gaganginengsoc monic-monicka gumeme yenge ngiyelu bole baibong. Aime sifu ngic monic umacieholec gieng salelu fuliine balu bole nalic mi hole-duwec aidaicte. Lobeina ngic monicti alingine, ame-baba ngic wackegac, hatac fuli balu gieng badaicte. Yakuc ngic alingine umacieholec gieng hatac yele gieng fikeme bole hole-duwec aidaingte. Ame-baba ngicte aibaba monic yanguc aiibong. Entacka ngic homame ngigacine hufing gagac, ngic hae-gbaine me alingine ngigacine badaicte. Lobeina kogoc baboc ngic homaicne madecine wackeibong. Kogoc sugulemie ye ngic homaicnele gieng nga wiycine badaicte. Ilec ailu ame-baba ngic ye inguc bole bawec.

aiyengka, yei ine mi nganicgudaic. Ailu, nosing misa nowackeme motome hike wenuwa fadaicte,\* <sup>4</sup> Yogo ngani-ngagec aidamec. Ailu ga yogowa hikelu hemac higeina fadaicte, yogo baickelu emeina moc wa-fadamec. Aime ga oma bole badamecte, yogo yeuctiyac edocgudaicte.”

<sup>5</sup> Inguc mime Ruti ye yanguc bafaliyecnowec, “Ga edocnugic, yogo na nalic sasawa aidacte.”

### *Rutidi uwame Boas ye ame-baba ngic aibaba badaic*

<sup>6</sup> Inguc milu ye nosing-wewe macka hikelu yengauine edowec, yogolecsoc benang yanguc aiwec.

<sup>7</sup> Aime Boas ye nosing misa nowackelu kwele-madictowa ngagewec. Ngagelu ye nosing habu ngiyewec, yogolec nebocina hikelu wa gung fawec. Gung faemowa Ruti ye akikic hikelu higeina hemac baickelu fawec.

<sup>8</sup> Faemowa deboc hewacina ngic ye kwatackelu hefaliye nganime ngigac monic yele hige emeina fawec.

<sup>9</sup> Faemowa nganilu uwacnowec, “Ga ma?”

Inguc mime yei bafaliyelu miwec, “Na Ruti, gale kwelec-adu. Ga nale ame-baba ngic aigchte ailu hemacgone toseinedi na nalic hemacnunong.”<sup>†</sup>

### *Boas Ruti sawang-yowa edowec*

<sup>10</sup> Aime Boasdi miwec, “Adune, Waponte mosocti gala fanale. Yogolec ga ngic-madec feicne waicne gagabiyeng, ingucne yengela hikebe milu mi hikemec. Ilec yakucmac aibaba madicne aigamec yogodi yengaugone aibaba madicne esecne aicnoing ewaligac. <sup>11</sup> Ailu adune, ga hangoc mi aidamec. Ga wiyc sasawa edocnugic, yogo na nalic aidacte. Ailu nale ngic-ngigac taonka gagabiyeng yenge, gale pasi dondonne yogo biyac nganigagec aicaigabiyengte ailu inguc aidacte. <sup>12</sup> Aime na gale ame-baba, noine. Ailu ame-babagone monic haene sugucne gagac, yei ine na ewalicnugac. <sup>13</sup> Ga nalic deboc yago yawa fadamec. Aime ye saeme ame-baba ngic yefenonggeng fagac, yogo balaibelu angac ngagelu bacgunogale ngagelu nalic bacgudaic. Aime ye yefe yogo mi balaibelu nalic bacgudaictewa ingucne ine nani nalic bacgudacte. Yogo Wapongti ngageme migabac. Yogolec ga yawa faengka mac saena.”

### *Boasdi Ruti pasi madicne aicnowecte Naomi siduc bacnowec*

<sup>14</sup> Inguc edome Ruti ye Boasle higeina faemowa gacgu Boasdi yele ngageme ngigac monic yawa nosing-wewe macka kwesiyc, yogodi yengele ngage-ngagewa mi fikedaic. Mac sae-saele ngic yengi mi ngani-motobongka Ruti fangkewec.

<sup>15</sup> Aime Boas edowec, “Ga ngakpigone witina hemac hemoctolu bado-maengka!” Inguc mime ye hemacine hemoctolu badomame Boas ye bali hucine yogo 40 kilo, yogolecsoc balu umengkecnowec. Umengkecnuolus hefalie taonka hikewec.

<sup>16</sup> Aime Ruti ye yengauinela hike sulumeme yengauinedi uwacnowec, “Yengaune, wenuc fikegac?”

Mime ngicti Ruti wiyc sasawa aicnowec, <sup>17</sup> Yogolec siduc aicnolu taockelu edowec, “Ye bali umacine 40 kilo, yago yanguc milu nelegac, ‘Ga molegonia wiyc monic mi balu moc benang yengaugonela nalic mi hikedamecte.’”

\* <sup>3:3:</sup> Dameng iwa bole fileine ye mac ubieme nosingine emeina falu damongkewec. † <sup>3:9:</sup> Inguc mime uwawec, ‘na ngigacgone ingucne aidacte.’

<sup>18</sup> Aime Naomidi edowec, “Yengaune, ga wangec gacgu bole yogolec noine wenuc fikedaitce, yogo nganidamec. Ngic ye moc sugu benang nalic mi gadaictele ailu boleine balu gagac, bagacgu yakucmac noine fikedaitce.”

## 4

### *Boasdi Ruti balu damongkenale miwec*

#### *Boasdi ngic micne hefolecebawec*

<sup>1</sup> Aime Boas ye taonka felu taon nuina hike ngiyewec.\* Ngiyelu Rutile amebaba ngic, Boasdi Ruti ubiyac siducine edowec yogo, ngic ye hocne yogowa yefe wele kwesiwec. Wele kwesime Boasdi nganilu wacine wackelu miwec, “Nebecne, ga ya wele wangiyec!” Wackeme le-ngiyewec.

<sup>2</sup> Boasdi taonte ngic micne yengelaci ngic 10 hefolecebali miwec, “Yawa wele ngiyening!” Inguc mime yenge ingucyac lelu wangyeibong.

<sup>3</sup> Wangiyeebongka Boasdi Rutile amebaba ngic siduc yanguc aicnowec, “Naomidi Moabi aling himongkacni hefalie welelu Elimelecte bole giyeng yogo fuli baninte miwec. <sup>4</sup> Na mimi yogolec ngagelu miyegengkelu edocgugabac. Ga, yawa ngiyegabeleng nga habu nongele micne ngiyegabiyeng, yengele dongowa himong yogo fuli badamec. Ame-baba ngic yefenonggeng fagac. Yele amebaba ngic ingucne monic mi gagaing. Yogo ga molic-molic nga na gale lobewa gagabelec. Ilec yefe yogo balaibelu badamekte milu nalic ameine fuli badamec. Nga yefe yogo mi balaibelu badamekte milu, yogo nalic edocnung ngagebe.”

Inguc edome ngicti miwec, “Na nalic amebaba ngic yefenonggeng fagac, yogo balaibelu himong yogo ameine fuli badacte.”

<sup>5</sup> Inguc mime Boasdi taockelu miwec, “Ga Naomilacni himong fuli badamekte, dameng iwahac ngigacgone Ruti ingucyac balu bagadamekte. Ailu Ruti ye Moabi ngigac. Ngic homawec, yele hodac. Yogolec ga yefenonggeng fagac, yogo balaibelu Ruti ingucyac balu ngaweine homawec, yele wacine himong yogowa hole-gboliyelu mole-danoc yogo basanangkelu damongkelu bagadamec.”

<sup>6</sup> Yowa inguc mime yedi yanguc bafaliyecnowec, “Inguc aime na sifu amebaba ngic yefenonggeng, yogo nalic mi balaibedacte. Inguc ailu nanicne mole-danoc basowaledacka. Yogolec ga gageuc yogo ameine fuli banong. Nani badackalesoc ameine na mi aidacte.”

<sup>7</sup> (Dameng iwa Israel-ngic yenge wiyac gocne fuli baba aibong mimipang yanguc sanangkewec, Ngic yogo ye mimipang micnolu basanangkenale suine nebocene hemoctolu lacnowec. Inguc aibong fuli baba yogo sanangkewec.)

<sup>8</sup> Ailu amebaba ngicti Boas yanguc edowec, “Yogo ga fuli badamec!” Milu hige ebecine hemoctowec.

<sup>9</sup> Inguc aime Boasdi micnecocene nga ngic-ngigac ngiyeibong yanguc edoccebawec, “Ngenge na widecnubongka na yakucmac Naomilacni Elimelec, Killiong nga Malong, yengele wiyac sasawa yogo fuli badacte. <sup>10</sup> Iwacnihac na ingucyac Moabi ngigac Ruti, Malong hodacine ye babe nale ngigac aidacte. Ailu na ngic homawec, yele wac hole-gboliyelu mole-danoc gadaictele ailu wacine yele mackacni me ngesa-ngamboine siduc mi miyac aidacte. Yogolec yakucmac ngenge na widecnugabieng.”

---

\* **4:1:** Ngic sugucne nga micne yenge taon nuina wele-ngiyelu yowa-umac nga awa bole bacaigaing.

<sup>11</sup> Inguc milu ngic-ngigac nga micne taon nuina ngyieibong, uwayeleme yenge saswadi miibong, "Nonge widecgugabeleng. Wapong yeuc ngageme Resel nga Lea yeke Israel habu basugulecubaibocte yakucmac gagabeleng. Yakucmac Wapong yeuc Ruti ngagecnome yeke ingucne aidaic. Ngigac yago baefekeme macgona ofedaicte. Ga Efarata alingkacni ngic sugucne ailu Betelehem taonka gaengka wac-siducgone suguledaic. <sup>12</sup> Aime Wapong ye ngigac-adu yogowacni gale gbolifocgone bafuwageledaic. Bafuwageleme gbolifocgone yogo Peresle gboli ingucne fikedaing. Peres ye Tamar nga Yuda yekele madec."

### *Wapongti ngageme Ruti kogockolec aiwec*

<sup>13</sup> Inguc mibong Boas ye Ruti bame ngigacine aime gaiboc. Aime Wapongti Ruti kogockolec aidaictele ngagecnome ye madeckolec aiwec. <sup>14</sup> Madec fikeme ngigac yenge Naomi edoibong, "Nongileng Wapong mitengkenang! Ye yakucmac pasi ingucne gala bame ame-baba ngicgone fikegac, yogo mi miyac aidaicte. Israel aling himongka yele wacine sugule-hikedaic. <sup>15</sup> Yengaungone ye madec yogo bagacte ailu ga sugucne aidamecte, dameng yogowa yedi misa-welec ngicgone ailu damonggulu gadaicte. Aime yengaungone ye gale angac sugucne ngagedaicte, yogo gale madecfocgone 7 gadabong midec yengele angac ingucne mi fikedec."

<sup>16</sup> Inguc mibong Naomi ye kogoc yogo ba-tabu aicnolu damongkelu gawec. <sup>17</sup> Gacgume yele mac emeinacni ngigac habu gaibong yenge miibong, "Naomi ye madec monic bangiyegac." Inguc milu yenge wacine Obede wackeibong. Aime gacgu ye Yesile mamac aiwec. Aime Yesi ye Dawidle mamac aiwec.

### *Dawid ngesa-ngambofocine yengele wac*

<sup>18</sup> Peresle ngesa-ngambofocine yengele wac-aling yanguc fagac:

Peres yelacni Hesoron fikewec.

<sup>19</sup> Hesorontacni Ram fikewec.

Ramtacri Aminadap fikewec.

<sup>20</sup> Aminadaplacni Nasong fikewec.

Nasontacni Salamong fikewec.

<sup>21</sup> Salamontacni Boas fikewec.

Boaslacni Obede fikewec.

<sup>22</sup> Obedelacni Yesi fikewec.

Aime Yesi ye Dawidle mamac.

## Mataiodi Yesule Siduc Madicne Kwelengkewec

### *Mimi-yegeng yowa*

Mataio ye Yuda ngic monic, yele wac monic yogo Liwai. Ye Roma yengele gamangte bole balu takes-baba ngic aiwec. Dameng iwa Yuda ngic-nigac yenge Roma yengi damongebaninge takicebame gaibong. Illec ailu takes-baba ngic yengele momoc takicebawec. Mataio ye takes-baba bole bagacgume Yesudi wackeme yele mic-tengteng aiwec.

Yesu ye homame hifa 30 ngama ingucne motome, Mataiodi Yuda ngic-nigac yengela hibi yago kwelengkeyelewec. Yesu ye Mesia, yogo mime yegengkenale Wapongte Hibi Esecna yowa fagac, yogo balu kwelengkewec. Ailu Yesu ye Yuda ngic-nigac yengele ngictau, yogo yegengkenale kwelengkewec.

Dameng iwa ngic yeicne siduc kwelengkelu “na” mi lolu gawec. Ye yeicne siduc kwelengkelu “ye” lolu gawec. Mataio ye aibaba yogo bafaliyelu siducine kwelina kwelengkelu “ye” lowec fagac.

### *Yowa yago hibi nebocina fagac*

1:1–2:23 Yesu fikewecte siduc

3:1–12 Yoane misa-lowacti bole bawec

3:13–4:11 Yesu misa lowame Aleng Sugucnenginengti lokwesacka lowec

4:12–18:35 Yesudi Galili iwa lolickelu siduc mime yegengkewec

19:1–20:34 Yesu ye Galili hegilelu Yerusalem hikenogale hikelu gawec

21:1–27:66 Sonda monic moto-motoina Yesu homawec

28:1–20 Yesu ye homackacni gboliye fangkelu ngic-nigac yengela fikeme nganiibong

### *Yesule ngesa-ngambofocine*

#### *Luk 3:23–38*

<sup>1</sup> Yesu Kristolacni fikesawec ailu fike-ofeibong, yogolec yanguc kwelengkebong. Yesu ye Dawidile fikesaweckacni, Dawidi ye Abrahamte fikesawecacni.

<sup>2</sup> Abraham ye Aisakle mamac,

Aisak ye Yakobole mamac nga

Yakobolacni Yuda nga ngic hae-gbafocine.

<sup>3</sup> Yudale madeckecine Peres nga Sera fikeiboc, yekele nenggacnginec Tama.

Aime Peres ye Hesorongte mamac nga

Hesorong ye Ramte mamac.

<sup>4</sup> Ramti Aminadapte mamac,

Aminadapti Nasongte mamac nga

Nasonti Salmonte mamac.

<sup>5</sup> Salmon ye Boasle mamac nga nenggacine Rahap.

Boas ye Obedele mamac nga nenggacine, yogo Ruti.

Aime Obede ye Yesile mamac.

<sup>6</sup> Yesidi ngictau Dawidile mamac.

Dawidi ye esecne gacgu Uriale ngigac\* bawec. Balu madecine Solomon bafuwawec.

---

**1:1:** 1Ngsi 17:11; Fike 22:18    **1:3:** Fike 38:29-30; Rut 4:18-22    **1:5:** Rut 4:13-22    \* **1:6:** Uriale ngigac, yele wac Batseba.

**7** Solomon ye Rehoboamte mamaç,  
Rehoboam ye Abiyale mamaç nga  
Abiya ye Asale mamaç.

**8** Asa ye Yehosafatte mamaç,  
Yehosafat ye Yehoramte mamaç nga  
Yehoram ye Usiale mamaç.

**9** Usia ye Yotamte mamaç,  
Yotam ye Ahasile mamaç nga  
Ahasi ye Hesekiale mamaç.

**10** Hesekia ye Manasele mamaç,  
Manase ye Amonte mamaç nga  
Amon ye Yosiale mamaç.

**11** Yosia yelacni Yekonia nga gbafocine fikeibong. Babilon yengi Israel  
ngic-ngigac witicebalu bacebalu Babilon taonka hikeibong, dameng iwa  
yenge fikeibong.

**12** Babilon hikeibong lobeina  
Yekonia yelacni Sialtiel fikewec.  
Nga Sialtiel ye Serubabelle mamaç.

**13** Serubabel ye Abiutte mamaç,  
Abiut ye Eliakimte mamaç nga  
Eliakim ye Asorle mamaç.

**14** Asor ye Sadokte mamaç,  
Sadok ye Akimte mamaç nga  
Akim ye Eliutte mamaç.

**15** Eliut ye Eleasale mamaç,  
Eleasa ye Matante mamaç nga  
Matan ye Yakobole mamaç.

**16** Yakobo ye Yosefele mamaç. Aime Yosefe ye Mariale ngawe aiwec. Nga  
Maria yelacni Yesu madec fikeme ye Mesia wackeibong.

**17** Aime yengele fikesawecngineng Abrahamtacni fike-ofecgubong Daw-  
idi fikeme alecine 14 aiwec. Nga Dawidilacni fikesawecngineng fike-  
ofecgubong alecine 14 aiyemewa Babilon bacebalu hikeibong. Aime iwacni  
gaofebong alecine 14 aiyemewa Mesia fikewec.

### *Yesu fikewec*

#### *Luk 2:1-7*

**18** Yago Yesu Kristole fike-fikele siduc. Maria ye Yesule nenggac. Ye ngic  
monic, wacine Yosefe, yeholec bingecka gaiboc. Nga Maria ye Yosefeholec  
monic fa-fangkec mi aiyebocka Tili Asulacni madec gobeeewec. **19** Aime  
ngaweine Yosefedii inguc ngagelu ngic dondonne gawecte ngic-ngigac  
yengele haicka ngigac-bingecine yowa aicnome game-game aidaickale,  
ngageme nalic mi aime yeicnakac akikic lome hikenale ngagewec.

**20** Ngagelu ye ilec ngage-ngage bole balu gawec. Hei, Sugucnele angelo  
monicti gungka fikecnolu yanguc edowec, “Yosefe, Dawidile fikesawec-  
acni, ga ngigac-bingecgone Maria banogale mi hangocgudaic. Kogoc yele  
gobewa ngiyegac, yogo Tili Asulacni. **21** Mariadi madec yogo badaicte, yedi  
galu ngic-ngigacfocine bikickacni bamoctocebame wasecne aidaingte. Ilec  
ailu yele wacine Yesu wackedamec.”

**22** Aime esecne Sugucnedi yowa yogo Wapongte siduc-mimi ngic yela lome  
miwec, yogo hocne fikenale inguc fikewec.

<sup>23</sup> "Ngagegaing, ngigac-neleweng ngickolec mi faicnedi madec monic gob-eelu bame yele wacine Emanuel midaingte." (Yes 7:14)

Wac yogolec fungine yanguc: Wapongti nongilengkolec gagac.

<sup>24</sup> Aime Yosefe ye gungkacni fangkelu Sugucnele angelodi yowa edowec, yogo balaibe hikelu Maria bame macina feiboc. <sup>25</sup> Felu ngigacineholec mi faebocka madec fikewec. Fikeme Yosefedti madec yogo wacine Yesu wackewec.

## 2

### *Yesu fikeme ngage-ngage ngic yengi ibu locnoibong*

<sup>1</sup> Yesu ye Betelehem taonka fikewec, Yudeya himongka, dameng iwa Herodedi ngictau gawec. Gacgume ngage-ngage ngic gocne himong wenac ofe-ofeinacni Yerusalem kwesiibong. <sup>2</sup> Kwesilu yanguc miibong, "Yuda ngic-nigac ngengele ngictau fikeyec, ye wenuwa fagac? Nonge wenac ofe-ofeina ngiyelu yele asocmeng ofeme nganilu ye ketadi holecnolu afeenangte kwasigabeleng."

<sup>3</sup> Inguc mibong ngictau Herodedi yowa yogo ngagelu kwele-umac bawec. Aime ngic-nigac Yerusalem gaibong, yenge inguchac aiibong. <sup>4</sup> Aime yedi Yuda ngic-nigac yengele depec-baba ngic micne nga Wapongte yefe-yowale wewedu ngicfocngineng sasawa kpaducebalu mi-uwac aiyelewec, "Mesia wenuwa fikenale miicne?"

<sup>5</sup> Uwayeleme miibong, "Yogo Betelehem Yudeya himongka. Ilec aili Wapongte siduc-mimi ngicti yanguc biyachac kwelengkewec fagac,

<sup>6</sup> 'Yuda himongka Betelehem habu-macka micne monic fikelu Israel ngic-nigacfcine lama ingucne damongebadaicte. Ilec aili mac yogo Yuda ngic-nigac yengele taon gocne, yengele wamicne miyac, Betelehem ye wac-bingecineholec.' " (Mika 5:2)

<sup>7</sup> Inguc edobong Herodedi wenac ofe-ofeinacni ngage-ngage ngic yenge sangke-sangke hefocebalu asocmeng ma damengka fikewec, yogolec dameng dondonne ngagenale mi-uwac aiyeleme edoibong. <sup>8</sup> Edobong yedi yanguc milu salecebawec, "Ngenge Betelehem taonka hikelu kogoc wenuwa fagac, yogo basackegacgu bafuwalu kwesi edocnubong nanidihac hikelu ketadi holecnolu afeedacte."

<sup>9-10</sup> Ngictau ye inguc mime yenge yogo ngagelu yefewa hikeibong. Hei, asocmeng wenac ofe-ofeina nganiibong, yogohac hatacmac fikeme nganilu beliyebenangkeibong. Aime asocmengti molickeyeleme hikegacgu kogoc fawec, mac yogolec feina holelu ngiyewec. <sup>11</sup> Ngiyeme yenge macka felu kogoc nga nenggacine Maria nganicapeabong. Nganicepalu ketadi holecnolu ngosockelu afeeibong. Aili hiyenginangkocni kwele-madicte wiyc, yogo gol nga hasoc hole-holele nepa hoine madicne aili tokic hoine madicne wacine mira, yogo lacnoibong. <sup>12</sup> Aili Herodela yefe mi hefaliye hikenigte Wapongti gungka aka-yowa milu edocebawec. Edocebame yenge yefe monic balaibelu himongnginang hefaliye hikeibong.

### *Herodele hangoc Yesu balu Isip hikeiboc*

<sup>13</sup> Hefaliyelu hikeibong Sugucnele angelo monicti Yosefe gungka fikecnolu yanguc edowec, "Ga fangkelu kogoc nenggacineholec bacepang hangoc

Isip himongka hikelu gadaing. Herode ye kogoc yogo bafuwalu we-homanale migacte ngenge hike gaebongka nani gacgu edocngebabe hat-acmac kwsidaing.” <sup>14</sup> Inguc mime Yosefe ye deboc iwahac fangkelu kogoc nenggacineholec bacepame Isip himongka hikeibong. <sup>15</sup> Hikelu iwa gacgubong Herode homawec. Aime esecne Sugucnedi yeicne siduc-mimi ngic yele micka lolu yanguc miwec,

“Isip himongkacni madecne wackebe kwesiwec.”

(Hos 11:1)

Dameng iwa yowa yogo noine fikewec.

### *Madec wecebacyackewec*

<sup>16</sup> Aime ngage-ngage ngic yenge Herode kwsackelu yele yowa hegileibong, ye inguc ngagelu aalic sugucne ngagewec. Ngagelu Betelehem nga mac-himong yogolec emewa faibong, iwa hudu-baba ngic salecebawec. Salecebame yengi hikelu ngic-ngigac mac iwacni yengele madecfocngineng hifanganeng yaeckang ailu kogoc gblolicne fikeibong, yenge sasawa we-cebabong homayackeibong. Yogo ngage-ngage ngic yengelacni dameng ngagewecte, yogo aiyelewec. <sup>17</sup> Inguc aime siduc-mimi ngic Yeremiyadi yowa yanguc miwec, yogolec noine fikewec.

<sup>18</sup> “Rama habu-macka hisonggong nga kwele-sowac sugucne fikegac. Yogo

Resel\* kogofocine homagaing, yengele hiyagac. Ye kogofocine monic mi gagaing. Ilec bakolockeningte mi aicnogac.” (Yer 31:15)

### *Israel himongka hefaliye hikeibong*

<sup>19</sup> Aime Yosefe ye Isip himongka ngiyemewa Herode homawec. Hei, Sugucnele angelo monicti gungka fikecnolu yanguc edowec, <sup>20</sup> “Madec yogo wehomanogale miibong, ngic yogo yenge biyac homaibong. Ilec ga fangkelu madec nenggacineholec bacepaengka ngenge Israel himongka hatacmac hikening.”

<sup>21</sup> Inguc mime Yosefe ye efeckelu fangke madec nenggacineholec bacepame Isip himong hegilelu Israel himongka hefaliye hikeibong. <sup>22</sup> Hikelu ngageme, “Akelaosdi mamacline Herodele mac balu Yudeya himong, yogolec ngictau aiwec.” Yosefe ye yowa-siduc yogo ngagelu iwa ganogale hangockewec. Ailu ye gungka sawang-yowa ngagewecte Galili prowins iwa hikeibong. <sup>23</sup> Hikelu taon monic wacine Nasaret, iwa gaibong. Aime esecne Wapongte siduc-mimi ngic yengi yowa yanguc miibong, “Ye Nasaret ngic, inguc midaingte.” Yogo noine fikenale inguc aiwec.

## 3

### *Yoane boleine fungkewec*

*Mrk 1:2-8; Luk 3:1-18; Yoa 1:19-28*

<sup>1</sup> Dameng iwa Yoane misa-lowacti Yudeya himong kisiwa misaine mikacka hikelu ngic-ngigac Wapongte yowa edocebalu weduyeletu <sup>2</sup> miwec, “Honocmenge ngani-damongti\* biyac bangkalegacte ngenge kwelengineng hefaliyen.” <sup>3</sup> Aime Wapongte siduc-mimi ngic Yesaiyadi Yoanele yanguc kwelengkewec,

---

\* **2:18:** Resel ye Yakobole ngigac. Ye Israel yengele ngambo. Dameng iwa Israel ngigac yenge Resel ingucne hiyaibong.   **2:23:** Luk 2:39; Yes 11:1; 53:2; Yoa 1:45   **3:2:** Israel ngic-ngigac yenge Wapongte wac alang bacnolu mi wackeibong. Ilec ailu Mataiodi Wapongte ngagelu “Honocmeng” kwelengkewec. Ilec “Wapongte ngani-damong” nga “Honocmengte ngani-damong” yekele fungine yogo wiyac moniyang aigabiye.   **3:2:** Mat 4:17; Mrk 1:15

"Himong kisiwa misaine mikacka wawac monic yanguc fikegac, 'Ngenge Sugucnele yefe wesackelu hole-wenengkening.'"  
(Yes 40:3)

<sup>4</sup> Aime ye ngakpiine kamel dowiecinedi baicne, yogo holelu umbikaine monic sic socinedi baicne, yogodi hewacina hefelu gawec. Ailu ye ipowa nga hasente begec misaine nolu gawec.<sup>†</sup>

<sup>5</sup> Aime Yerusalem ngic-ngigac nga Yudeya himongkacni ailu Yodan misa emeina himong falewecka, iwacni yenge sasawadi macnono yela hikeibong. <sup>6</sup> Hikelu bikicngineng mifickebong yedi Yodan misawa domalu misa lowayelewec. <sup>7</sup> Aime Farisaio nga Sadyusi yenge homacnedi misa lowanogale hikebong Yoanedi nganicebalu yanguc edocebabewec, "Hema gbolifocene, madi ung-yowa yanguc edocngebawec, ngenge Wapongti aalicine badungelenale aidaicte, yogolec hangoc hikedaingte?" <sup>8</sup> Ilec ngenge kwele-hefaliyete silicka pasi noine bafuwadabiyeng. <sup>9</sup> Ailu gageicnele yanguc mi ngagedamec, 'Abraham ye ngambone aigacte wasecne aidacte.'<sup>‡</sup> Wapong ye posa yago nalic mime Abraham ngambofocene fikedaingte, yogo noine edocngebabac.

<sup>10</sup> "Naka yoc fungina biyac loicne fagac. Aime yoc gocne noine madicne mi aicaigaing, yogo sasawa weyackelu dacka wickedaingte. <sup>11</sup> Na kwele-hefaliyete misa lowangelegabac. Nga ngic nale lobewa kwesidaicte, yedibac Tili Asu nga dac lowangeledaicte. Ailu yele tapilidi nale tapili ewaligac. Na waweweine ingucnedi yele hige-ebec hemoctocnobe nalic mi madickedaicte. <sup>12</sup> Ye moleina yafole fok balu welelu wit yafoineholec baic-baице sobengka fame yogo filalu yafoine baickedaicte. Baickelu noine bakpaduc ailu nosing-macina lulu, yafoine pelengkelu dac pisic-pisicine mikac, iwa wickeme lobedaicte."

*Yoanedi Yesu misa lowacnowec  
 Mrk 1:9-11; Luk 3:21-22*

<sup>13</sup> Dameng iwa Yesu ye Galili prowinswacni Yodan misawa hikelu Yoanedi misa lowacononale edowec. <sup>14</sup> Edome Yoane ye yogo ngageme nalic mi aime yanguc miwec, "Gagi na nalic lowaneleengka madickedaicte. Aime ga nala kwesilu nani lowagelebele migic."

<sup>15</sup> Inguc mime Yesudi yanguc miwec, "**Ga yowa yogo hegileng, pasi dondonne sasawa noine fikenale yakumac edocgugabac, inguc aiyengka madickedaicte.**" Inguc mime nalic milu yowaine balaibewec.

<sup>16</sup> Aime Yesu ye misa lowalu misawacni ofeemewa honocmeng angkewec. Angkeme Wapongte Asudi tudiling nangole silic ingucne ailu yela wame nganiwec. <sup>17</sup> Hei, honocmengkacni mic-yowa monic yanguc fikeme ngagewec, "Yogo nale madec, kwelenedi yele angac ngagegabac, na ye ngani-angac aicnogabac."

## 4

*Yesu lokwesacka lowec  
 Mrk 1:12-13; Luk 4:1-13*

<sup>1</sup> Aime Aleng Sugucnenginengti Yesu lokwesacka lonale Asudi mengockeme himong kisiwa misaine mikacka hikewec. <sup>2</sup> Hikeme Yesu ye iwa deboc

<sup>†</sup> 3:4: Ngakpiine nga umbikaine yogo Elaiyale ngakpi nga umbika ingucne. Siducine 2 Ngictau 1:8 yogowa fagac. <sup>3:7:</sup> Mat 12:34; 23:33    <sup>‡</sup> 3:9: Abraham ngambofocene sasawadi gaga-sanang baaingte inguc ngagesiibong. <sup>3:9:</sup> Yoa 8:33,39; Rom 4:12    <sup>3:10:</sup> Mat 7:19; Luk 13:6-9    <sup>3:11:</sup> Yoa 1:26-27,33; Sale 1:5    <sup>3:16:</sup> Yoa 1:32    <sup>3:17:</sup> Mige 2:7; Yes 42:1; Mat 12:18; 17:5; Luk 9:35

<sup>4:1:</sup> Hib 2:18; 4:15

hadeng 40 nosing-sawe galu nosingte homawec. <sup>3</sup> Inguc aime Lokwesac Ngicti yela kwesilu miwec, “Ga Wapongte Madec noine gagicka posa yago miyengka bafaliyelu bret aina!”

<sup>4</sup> Inguc mime Yesudi yowa ameine bafaliyecnolu yanguc edowec, “**Yowa yanguc kwelengkeicne fagac,**  
**‘Ngicti nosingka sugu mi ganoga, miyac. Ye Wapongte mickacni yowa ofecaigac, yogo sasawa balu ganoga.’”** (Yef8:3)

<sup>5</sup> Inguc mime Aleng Sugucnenginengti Yesu mengockeme taon gbagbacna\* hikelu Ibu-mac feina wilinibenang, iwa lome domawec. Domame edolu yanguc micnowec, <sup>6</sup> “Ga Wapongte Madec noine gagicka gageuctihac yawacni wintackelu haunong. Yowa yanguc kwelengkeicne fagac, ‘Ye gale aili angelofocine bole-yowa yeleme yengi molengineng feina sesegubong, posa monicti higegone nalic mi helockedaiete.’” (Mige 9:11-12)

<sup>7</sup> Inguc mime Yesudi yanguc edowec, “**Ailu hatacmac yowa yanguc kwelengkeicne fagac,**  
**‘Ga Sugucne Waponggone lokwesacka mi lonong.’”** (Yef6:16)

<sup>8</sup> Inguc mime Aleng Sugucnenginengti Yesu hatacmac mengockeme tiki sugucne monicka fewec. Felu himongtowa himong gamangnginengkolec nga tapili nga hibi-angocene haicine monic-monics, yogo edalilu <sup>9</sup> miwec, “Ngagegic, ga ngosockelu ketadi holenelelu afenuengka, wiycasasawa yago geledacte.”

<sup>10</sup> Inguc mime Yesudi yanguc edowec, “**Satang, ga baickenong. Yowa yanguc kwelengkeicne fagac,**  
**‘Ga Sugucne Waponggone, ye moniyang sugu afeelu kwelec kwecnodamec.’”** (Yef 6:13)

<sup>11</sup> Inguc mime Aleng Sugucnengineng ye hegilelu hikeme angelo yengi kwesilu Yesu bafickelu gaibong.

*Yesu bolein molickelu bawec*

*Mrk 1:14-15; Luk 4:14-15*

<sup>12</sup> Ngic yenge yowa yogo miibong, “Yengi Yoane muc-macka lobong ngiye-gac.” Yesu ye yogo ngagelu Galili prowinswa Nasaret taonka hefaliye hikewec. <sup>13</sup> Hikelu Nasaret hegilelu Sebulun nga Nafatali yekele himong Galili lifuc meicina, Kapeneam taonka hikelu gawec. <sup>14</sup> Aime Wapongte siduc-mimi ngic Yesaiyadi yanguc miwec, yogolec noine fikewec,

<sup>15</sup> “Yodan misa nebocina yefe lifucka hikegac, Sebulun nga Nafatali himong iwa Israel yengele alingkacni miyac, yengi Galili prowinswa gagaing.

<sup>16</sup> Ngic-ngigac yogo yenge kundungka gagaing, yenge angoc sugucne nganiibong. Aime ngic-ngigac himongka homacte bagewa gaibong, yengele hewacka angocene fikewec.” (Yes 9:1-2)

Yowa yogo noine ainale ye Kapeneam taonka ngiye-fangkec aili gawec.

<sup>17</sup> Dameng iwa Yesudi ngic-ngigac yowa yanguc edocebalu weduyelelu gawec, “**Honocmenge ngani-damongti biyac bangkalegacte ngenge kwe-lengineng hefaliyena.”**

*Mic-tengteng wacebewec*

*Mrk 1:16-20; Luk 5:1-11*

\* **4:2:** Wah 34:28    **4:5:** Ibu-mac Yerusalem iwa domawecete taon gbagbacne wackebong. **4:12:**  
Mat 14:3; Mrk 6:17; Luk 3:19-20    **4:17:** Mat 3:2; 10:7

**18** Hadeng monicka Yesu ye Galili lifuc mecina haulu dingong balaibelu hikecgua hae-gba yaeckang nganicepame ufcnginec lifucka wickelu domai-boc. Yogo Salmon, wacine monic Pita wackelu gaibong nga gbaine Endru. Yeke misa-sic baba ngic gaiboc. **19** Yeke nganicepale yanguc edocepwec, “**Ngeke wele na balaibecnunic.** Ngic yengi misa-sic bacaigaing, **ngeke silicine yogo ingucnebac ngic-baba bole banicte wedungetedacte.**” **20** Inguc mime yeke iwahac ufcnginec hegilelu Yesu balaibeiboc.

**21** Aime iwacni lelu hatacmac hae-gba yaeckang, Sebedi madeckecine, Yakobos nga gbaine Yoane nganicepawec. Nganicepame yeke mamacniginec Sebediholec gombawa ufcngineng bamadickelu gaebongka wacepawec. **22** Wacepame yeke dameng iwahac mamacniginec nga gomba hegilelu ye balaibeiboc.

### *Siduc Madicne edocebawec*

*Luk 6:17-19*

**23** Yesu ye Galili iwa himongsoc lolickelu kpakpaduc macnginang felu wewedu bole balu ngani-damongte Siduc Madicne edocebalu weduyelelu gawec. Ailu ye ngic-ngigac huc haicina monic monicti bacebame tapiling-neng waince yenge sasawa bamadicebayackewec. **24** Inguc aime yele siducti hikelu Siria prowins sasawa saweyackewec. Saweme ngic-ngigac madicne yenge huc haicina monic monicti ngic-ngigac basowalecebaicne nga doic ngagecaigaing. Ailu ngic alengkolec nga gocone homa-gbolic aicaigaing, ailu ngic-ngigac hige-molengineng homaicne, yenge sasawa Yesula bacebalu hikeyackebong yedi bamadicebawec. **25** Aime Galili prowinswacni nga Dekapolis, iwacni ailu Yerusalem taonkacni nga Yudeya himong ailu Yodan nebocinacni ngic-ngigac habutowadi ye balaibeibong.

## 5

### *Ngic-ngigac kwele-angackolec*

*Luk 6:20-23*

**1-2** Yesu ye ngic-ngigac habutowa nganicebalu kupicka felu ngyewec. Ngiyeme mic-tengtengfocene yenge yela lebong yedi yowa yanguc milu weduyelewec,

**3** **“Ngic-ngigac asule babaficte homalu gacaigaing, yenge kwele-angackolec.** I yangucte, honocmenge ngani-damong yogo yengele hocne.

**4** **Ngic-ngigac kwele-umackolec gacaigaing, yenge kwele-angackolec.** I yangucte, Wapongti yenge hocne basanangebanowagac.

**5** **Nga ngic-ngigac bawacnagulu gacaigaing, yenge kwele-angackolec.**

I yangucte, himongtowadi\* yengele mole-damoc aidaicte.

**6** **Ngic-ngigac nosing nga misale homacaigaing, silicine ingucnebac yefe dondonne gagale homacaigaing, yenge kwele-angackolec.**

I yangucte, Wapongti yenge yogo gumecebame gebecebadaicte.

**7** **Ngic-ngigac agofocngineng yengele kwele-sowac ngagecaigaing, yenge kwele-angackolec.**

I yangucte, Wapongti ingucnebac yengele kwele-sowac ngagedaicte.

**8** **Ngic-ngigac kwelengineng gbagbacne gacaigaing, yenge kwele-angackolec.** I yangucte, yenge Wapongt nganidaingte.

**4:23:** Mat 9:35; Mrk 1:39; Sale 10:38    **4:24:** Mrk 6:55    **4:25:** Mrk 3:7-8    **5:3:** Yes 57:15    **5:4:**

Yes 61:2-3; Miye 7:17    \* **5:5:** Hibi Esecne iwa Wapongti Abraham himong mipangkelu lacnodaiete. Yesule damengka Israel ngic-ngigac yenge gaga madicne himongka damongkeningte wangec gaibong.

**5:5:** Mige 37:11    **5:6:** Yes 55:1-2

<sup>9</sup> Ngic-ngigac hudu nga ngaba babong mogungkecaigac, yenge kwele-angackolec.

I yangucte, Wapongti yeicne adu-madecfocine wacebadaicte.

<sup>10</sup> Ngic-ngigac aibaba dondonne aiyebongka weyebic aiyelecaigaing, yenge kwele-angackolec.

I yangucte, honocmengte ngani-damong yogo yengele.

<sup>11</sup> "Nga ngenge nale alingka gagaingte ailu ngic-ngigac yengi misofoc nga weyebic aingeletu kwesac ailu ngengele ngagelu yowa sowacne haicine monicmonic aingeledaingte. Yenge inguc aingeledaingte, ngenge kwele-angackolec. <sup>12</sup> Fulingineng sugucne honocmenga lowec fagac. Ngenge ilec kwele-madic ngagelu beliyedaing. I yangucte, ngic-ngigac yenge esecne Wapongte siduc-mimi ngic weyebic aiyeleibong, ngenge aibaba ingucnerahc aingeledaingte.

*Kiwech hifa*

*Mrk 9:50; Luk 14:34-35*

<sup>13</sup> "Ngenge kiwech nosingka haume angacineholec aicaigac, ngenge himongka ngic-ngigac kiwech ingucnerahc aigaing. Aime kiwech yogodi angacine miyac aidaictewa, ngenge wenuc aibong hatacmac angacineholec nalic aidaicte. Kiwech ingucne, yogo bolein mikac aigac. Yogo moc himongka wickebeng ngic yengi higedi edesocebadaingte.

<sup>14</sup> "Aime ngenge himontowa himong yagolec angoc. Taon monic ye kupicka ngiyegac, yogo nalic mi sangkedaicte. <sup>15</sup> Nga monicti hifa kwendangkelu pakec bageina nalic mi lome ngiyedaicte. Ye hifa yogo mac ngiye-ngiyeina lome ngiyeme ngic-ngigac mac kwelina ngiyegaing, yenge bacebame angoleyackedaingte. <sup>16</sup> Aime ngengele angocti silicine ingucnerahc ailu ngic-ngigac bacebame angoledaingte. Angolelu ngengele aibaba madicne nganilu Mamacngineng honocmenga gagac, yele wac bafedaingte.

*Wapongte yefe-yowa Mosesdi kwelengkewec, nga Wapongte siduc-mimi ngic yengele yowa*

<sup>17</sup> "Ngenge yanguc mi ngagedaing, na Wapongte yefe-yowa Mosesdi kwelengkewec, nga Wapongte siduc-mimi ngic yengele yowa wenogale waiba. Ngagegaing, na yowa wenogale mi waiba, miyac. Mic-yowaine yogo noine fikenale waiba. <sup>18</sup> Foinac, Wapongte yefe-yowale sisine me kapucine monicti nalic mi miyac aidaicte. Famehac yowa kwelengkeicne fagac, yogo sasawadi noineholec aiyackebong himong nga sawa motodabiyete, yogo noine edocngebabac. <sup>19</sup> Ilec ailu yanguc aigac. Monic ye ung-yowa iwacni wiyan kpisine monic baikedaicte, ailu agofocine ingucnerahc ainingte weduyeledaicte, ye hocne honocmengte ngani-damongte aling yengelaci ngic waweweinebenang wackenoga. Nga monic ye ung-yowa balaibelu agofocine balaibeningte weduyeledaicte, ye honocmengte ngani-damongka ngic-ngigac yengele feicne wackenoga. <sup>20</sup> Na yanguc edocngebabe ngaging, Wapongte yefe-yowale wewedu ngic nga Farisaio yenge aibaba dondonne aicaigaing. Aime entacka ngengele aibaba dondonnedi yengele mi ewalidaictewa, ngenge honocmengte ngani-damongka nalic mi fedaingte.

*Ngaba nga ngic-wewe aibaba*

*Luk 12:57-59*

**5:10:** 1Pi 3:14    **5:11:** 1Pi 4:14    **5:12:** 2Ngsi 36:16; Sale 7:52    **5:14:** Yoa 8:12; 9:5    **5:15:**

Mrk 4:21; Luk 8:16; 11:33    **5:16:** Efs 5:8-9; 1Pi 2:12    **5:17:** Rom 3:31    **5:18:** Luk 16:17; 21:33

**5:19:** Yak 2:10

21 "Ngampafocnonggeng edocebame ngenge yanguc ngageibong,  
'Ga ngic-ngigac mi wehomacebadamec.'

(Wah 20:13)

Aime 'monic ye ngic wehomadaicte, ye yowawa domadaicte.' 22 Na yanguc sugu edocngebabe, monic ye ngic hae-gbainele aalic ngagecaigac ye momoc yowawa domanowagac. Nga monic ye ngic hae-gbainele yanguc midaicte, 'Ga ngic acfititicgone mikac,' ye Yuda ngic-ngigac yengele Tutumangtowawa yowawa lonowagaing. Nga monic ye ngic hae-gbainele yanguc midaicte, 'Ga ngage-ngagegonge mikac, ga kapainebenang,' inguc midaicte ye dac-sanangka wickebong haunowagac.

23-24 "Ga ilec ailu kwele-madicte ibu Wapongte lonogale milu yanguc aidamec. Alatawa hikelu ngic hae-gbagone gale ngaba aicaigac, yogo ngagesilu ga depecgone alatawa hegileng ngiyedaic. Ailu hikelu agogoneholec kwoya miboc madickedaic. Madickeme kwele-moniyang fikemebac kwesi kwele-madicte ibu lodamec.

25 "Aime ngabagonedi yowawa locgudaickale, ngeke momoc yefewa hikelu yeholec yowa mifcnagulu ngaba hegiledabiye. Ga inguc mi aidamectewa, ngabagonedi ngage-wosaec ngic yela locgume yedi lebenic yengele molewa locgume muc-macka locgudaingte. 26 Foinac, ga muc-macka ngiyecgu ngabagonele tofa sasawa bucbuchac baducnoyackelu wadamecte, yogo noire edocgugabac.

### *Selo-boic yefe*

*Mat 19:9; Mrk 10:11-12; Luk 16:18*

27 "Aime yowa yanguc biyac edocebaicne ngageibong,

(Wah 20:14)

'Ga selo-boic aibaba mi aidamec.'

28 Na yanguc sugu edocngebabe, ngic monicti ngigac monic nganilu ngani-angac aidaicte, ye kweleinedi selo-boic aibaba yogo biyac aigac ingucne aidaicte. 29 Ailu dongegone folewpecti aigeleme bikic ba-fuwadamectewa, ga dongegone kwofutuckelu wickeengka hikedaic. Gacgu socgone bucbuchac dac-sanangka wickedaickale, socgone tofaine miyac aime gaengka yogodibac madickedaicte. 30 Nga mole-folegonedi aigeleme bikic bafuwadamectewa, ga yogo helockelu wickeengka hikedaic. Gacgu socgone bucbuchac dac-sanangka hikedameckale, socgone tofaine miyac aime gaengka yogodibac madickedaicte.

31 "Esecne yanguc milu gaibong,

'Ngic monicti ngigacine hegilenale ngagelu, ye hibi kwelengkelu lacnodaic.'

(Yef 24:1-4)

32 Na yanguc sugu edocngebabe, ngic monic ye ngigacine selo-boic aibaba mi aiyemewa ye moc hegiledaicte, ye selo-boic ngigac ainogale aidaicte.<sup>†</sup> Nga ngicti inguc aime ngigacine ngawe-ngigacte yefe ewalilu gadaicte. Ailu ngic ye ngic monicti ngigac hegileicne badaicte, ye ngawe-ngigacte yefe ewalilu selo-boic aibaba aidaicte.

### *Mimi sanangne minoga*

33 "Aime ngampafocnonggeng inguchac edocebame ngenge yanguc ngageibong, 'Ga dodofic yowa hefeicne yogo mi baickedamec. Ailu yowagone Sugcnele haicka miyengka sanangkewec, yogo balaibedamec.'

34 Na yanguc sugu edocngebabe, ngenge yowangineng sanangkenale wiyac

5:21: Yef 5:17    5:22: 1Yoa 3:15    5:23-24: Mrk 11:25    5:27: Yef 5:18    5:29: Mat 18:9;  
Mrk 9:47    5:30: Mat 18:8; Mrk 9:43    5:31: Mrk 10:4    † 5:32: Wapongte haicka ngigac ye  
ngaweinoholec gagachac. Ilec ailu ngic monicti yele ngigac badaicte ye selo-boic aibaba aidaicte.  
5:33: Wah 20:7; Dep 19:12; Him 30:2; Yef 23:21

monic wackelu mi mibong sanangkedaic. Honocmeng yogo Wapongte mac ngiye-ngiye. Ilec aihu ngenge honocmeng wackelu yowangineng mi mibong sanangkedaic.<sup>35</sup> Nga himong, yogo yele hige ede-edé. Ilec ngenge yowangineng mibong sanangkenale himong mi wackedabiyeng. Aihu ngenge Yerusalem wacka inguchac yowangineng mibong sanangkenale mi wackedabiyeng, yogo Ngictautowa, yele taon.<sup>36</sup> Aime ga hodoc-dowecgone kwalac-kwalac moniyang hakic me saec-saec banogalesoc mi aidamecte. Hodocgone wackelu mimipang sanangne mimi, yogo inguchac hegiledamec.<sup>37</sup> Ngenge yowangineng sasawa yanguc sugu midaing, 'Foinac' yogo foinac. Nga 'miyac' yogo miyac. Yowangineng yago ewalilu taockelu midaingte, yogo Kindololo fileine yelacni weledaict.

### *Kwele-angacka damongngebanogale aibaba*

Luk 6:29-30

<sup>38</sup> "Ngenge yowa monic yanguc biyac ngageibong,  
'Monicti monicte donge hucine basowaleme, yele donge ingucnebac ba-sowalenoga. Nga monicti monicte sofi hedume, yele sofi ingucnebac hedunoga.'

(Wah 21:24; Dep 24:20; Yef 19:21)

<sup>39</sup> Na yanguc sugu edocngebabe, ngic-ngigac sowacne aingelebong ngenge ameine monic mi baduyeledaing. Monicti munggunggone folewepec wedaictewa, ga munggunggone kanawapec ingucnebac sungkecnodamec.

<sup>40</sup> Nga monicti ngakpigone kwelina banogale yowa lodaictewa, ga ngakpigone feina ingucnebac hegilecnodamec.<sup>41</sup> Nga monicti yoinggulu aigeleme mafaine tengkeengka yefe kilomitaine moniyangtesoc yeholec hikenogale edocgudaictewa, ga kilomaitaine yaeckangtesoc yeholec hikedamec.<sup>42</sup> Aihu monicti wiyc monic lacnopte uwageleme, ga yogo lacnodamec. Nga monicti galacni wiyc monic tofa ainogale milu uwageleme, ga wiycgone yogo mi sebiledamec.

### *Ngabafocgone kwele-angac ngageyeledamec*

Luk 6:27-28; 6:32-36

<sup>43</sup> "Yowa monic yanguc fagac, ngenge yogo esecne biyachac ngageibong, 'Ngic-ngigac gale emewa gagaing, yengele kwelegonedi ago aiyelelu angac ngageyelelu gadamec.'

(Dep 19:18)

Aihu 'ga ngabagone kweledi wickedamec.' Ngage-ngage ingucne mi ngagedaing.<sup>44</sup> Na yanguc sugu edocngebabe, ngenge ngabafocngineng kweledi angac ngageyeledabiyeng. Aihu ngic-ngigac weyebic aingele-caigaing, yengele milockedaiing.<sup>45</sup> Ngenge inguc aihu Mamacngineng honocmengka gagac, yele adu-madecfocine aidaingte. Ye wenacine bole-yowa lacname yogodi ngic madicne nga sowacne yengele aihu ofecaigac. Aihu ye ngic dondonne nga ngic aibaba dondonne mi aicaigaing, yenge momochac mac yelecaigac.<sup>46</sup> Aihu ngic-ngigac yengi ngenge kweledi angac ngagengelebong, ngengi yenge ingucnebac kweledi angac ngageyeledabiyengtewa, aibaba yogolec fuline nalic mi badaingte. Takes-baba ngic<sup>‡</sup> yenge yogo ingucnebac aicaigaing.<sup>47</sup> Ngenge ngic hae-gbafoengineng yenge aneng-baneng aiyeledaingt, yogodi aibaba feicne miyac. Ngic-ngigac aling Wapong mi

**5:34:** Yes 66:1; Yak 5:12; Mat 23:22    **5:35:** Mige 48:2; Yes 66:1    **5:44:** Wah 23:4-5; Luk 23:34; Sale 7:60; Rom 12:14,20    **‡ 5:46:** Takes yogo gamang yengi fuli gocne taockebong bacaigaing. Dameng iwa Roma yengi Israel damongebalu takes balu gaibong. Takes-baba ngic yenge Roma gamangte takes-bole babong Israel ngic-ngigac yenge takicebawec.

ngagegaing, yenge inguchac yogo aicaigaing.<sup>48</sup> Ilec ailu ngenge ngabafoc-  
ngineng kweledi angac ngageyeledaing. Honocmeng Mamacngineng ye  
dondonne gagacte ailu ngenge yele silic ingucnehac dondone gadabiyeng.”

## 6

### *Mole-bafic ainagunoga*

<sup>1</sup> “Ngenge ngic-ngigac yengi nganicngebalu mitengngebaningte yengele haicka aibaba dondone mi ailu gadaing, miyac. Ngenge inguc ailubac honocmeng Mamacngineng yelacni aibaba dondonnele fuline monic mi bidaingte. Inguc fikedaickale, ngani-motolu gadabiyeng. <sup>2</sup> Ngic kwesacine gocne yenge ngic-ngigac waweweine kwele-madicte wiyc yelenogale kpak-paduc macka me yefe sugucna kpeng uctowaineholecti fitobong ngic-ngigac yengi wacngineng bafedaingte. Foinac, ngic ingucne yenge fulingineng bucbuchac biyac baibong, yogo noine edocngebagabac. Ngenge inguc mi aidaing. <sup>3</sup> Ga ngic-ngigac waweweine kwele-madicte wiyc monic yelenogale ngagegic, yogo monicti mi ngagegeledaic. <sup>4</sup> Ilec ailu ga kwele-madicte wiyc yeledamekte, yogo sangke-sangke faemewa Mamacgone wiyc sangke-sangke nganicaigac, yedi hocne fuline geledaice.

### *Mimilocte yowa*

*Luk 11:2-4*

<sup>5</sup> “Aime ngic kwesacine yengi milockenogale milu aicaigaing, yenge kpakpaduc macka nga yefe kweyasicina milockelu domabong ngic yengi nganicebalu mitengngebaningte aiyelecaigac. Foinac, yenge fulingineng bucbuchac biyac baibong, yogo noine edocngebagabac. Ngenge yenge ingucne mi aidaing. <sup>6</sup> Ga milockenogale milu, ibac macgone kweline kpisina felu nugone holelu Mamacgone mi nganiyengka gagac, ye milockedamec. Inguc aiyengka Mamacgone aibaba sangke-sangke ngani-ngagec aicaigac, yedi fuline geledaice.

<sup>7</sup> “Ailu ngenge milockenogale milu, ngic-ngigac aling Wapong mi ngagegaing, yengi milockecaigaing, ngenge yenge ingucne mi milockedaina, miyac. Yenge mimiloc dalicne ngage-wosaec mikac moc milockecaigaing. Ailu yowangineng homacne wafecaigaingte ailu ngagebong mimilocngineng noineholec aicaigac. <sup>8</sup> Ilec ngenge yenge ingucne mi aidaing. Ngenge mi milockeebongka Mamacngineng ye ngenge oma wiyacte kpungke-caigaing, yogo ye biyac ngagecaigac.

<sup>9</sup> “Inguc aime ngenge yanguc milu milockedaina.

‘Honocmeng Mamacnonggeng, ga wacgone gbagbacne fadaic.

<sup>10</sup> Aime ngani-damonggone welenoledaic.

Honocmengka gale angac nga ngage-ngage balaibebong fagac, silicine ingucnehac himongka nongela fikedaic.

<sup>11</sup> Ga yakumac nosing socnonggeng noledamec.

<sup>12</sup> Aime nonge ngic yengele bikic hegilegabeleng, silicine ingucnehac ga nongele bikicte ameine hegilenolenong.

<sup>13</sup> Ga lokwesacka mi locnubadamec.

Ailu Kindololo fileine yelacni baicnubadamec.\*

**5:48:** Dep 19:2; Yef 18:13    **6:1:** Mat 23:5    **6:5:** Mat 23:5; Luk 18:10-14    **6:7:** 1Ngt 18:26-29

**6:8:** Mat 6:32    **6:10:** Luk 22:42    **6:12:** Mat 18:21-35    \* **6:13:** Hibi esecne Mataiodi kwelengkewec, yogo nganilu iwacni kwelengkebong kwelengkebong ofewec, yengelacni gocne yowa yanguc fagac, “Ailu ngani-damonggone, nga tapiligone, ailu wac feicne galafafeginowagac. Yogo foinac.”    **6:13:** Luk 22:40; Yak 1:13; Yoa 17:15; 2Tes 3:3; 2Tim 4:18

<sup>14</sup> "Ngenge ngic-ngigac kindololo aingelebong, ngenge yengele bikic hegiledaingtewa, honocmeng Mamacnginengti ngengele bikic inguchac hegiledaictie. <sup>15</sup> Nga ngenge ngic yengele bikic mi hegiledaingtewa, ibac honocmeng Mamacnginengti ngengele bikic inguchac mi hegiledaictie.

### *Nosing-sawe gaga*

<sup>16</sup> "Aime kwesac-ngic yengi nosing-sawe gacaigaing, dameng iwa ngicti nganicebaningte haic-mesungineng sowalecaigac. Foinac, ngic ingucne yenge fulingineng bucbuchac biyac baibong, yogo noine edocngebabac. Ngenge yenge ingucne mi aidaing. <sup>17</sup> Ga nosing-sawe galu hodocgona heloc hosolu haic-mesugone suweyackedamec. <sup>18</sup> Inguc aiyengka ngic yenge ga nosing-sawe gagac, yogo mi ngage-motobong Mamacgome mi nganiyengka gagac, yedi sugu ngagedaictie. Ailu Mamac aibabagone sangke-sangke nganicaigac, yedi sugu fuline geledaictie.

### *Honocmengte wiyc madicne*

Luk 12:33-34

<sup>19</sup> "Himongka une-kwadacdangti wiycngineng madicne hilockecaigac. Nga hufengti wiycngineng bacaigac. Ailu hise ngic yengi mac heuckelu wiycngineng bacaigaing. Ilec ngenge himongka wiycngineng madicne bakpaduc mi aidaing. <sup>20</sup> Ngenge wiycngineng madicne honocmengka bakpaduc aidaing. Yogoga une-kwadacdangti wiycngineng mi hilockedaaingte. Nga wiycngineng hufengti mi badaictie. Ailu hise ngic yengi iwa nalic mi heuckelu wiyc badaingte. <sup>21</sup> Ga wiycngone madicne bakpaduc aicaigic, iwa kwele-angacgone ingucne hac fadaictie.

### *Socnonggengte angoc*

Luk 11:34-36

<sup>22</sup> "Donge yogo socte hifa aigac. Aime dongegonedi madicne fadaictewa, socgome sasawa bame angoleyackedaictie. <sup>23</sup> Aime ga donge-heloc me donge-sowac me dongegonedi sowaledaictewa, socgome sasawa kundung kwedaictie. Ailu angoc gala fagac, yogodi kundung kweme kundung suguc-nebenang fikegeledaictie.

### *Wapong me moneng-mafa*

Luk 16:13

<sup>24</sup> "Monicti ngic sugucne yaeckang yekele kwele nalic mi kwelu gadaictie, miyac. Ye monicti angac ngagelu monic lobe holecnodaictie, me monicti wetackelu monic hegiledaictie. Ngenge Wapong nga moneng-mafa yekele kwele momochac nalic mi kwedaingte.

### *Ngageboc nga mimedec*

Luk 12:22-31

<sup>25</sup> "Ilec ailu yanguc edocngebabe, ngenge noba-nosingte milu gagangi-nengte mi medecngebadaic, 'Nonge oma nosing misa nolu ganoga?' Me socnginengti ngagelu, 'Oma ngakpi-kpoluc holelu ganoga?' Ngagegaing, gagadi nosing ewaligac, ailu socti ngakpi-kpoluc ewaligac. <sup>26</sup> Ngenge sawawa nango nganicebaning. Yenge hole-duwenoc me luwangka nosing monic mi loctaigaingte Mamacngineng honocmengka gagac, yedi nosing moc yelecaigac. Ailu ngenge wosaelu ngagedaing, ngengi Wapongte haicka nango yengele feicne aigaing. <sup>27</sup> Aime ngengelacni monicti mimedec ailu

game yogodi gaga-damengngine kpisicnemac hatacmac nalic mi bame dali-wedaicti, miyac.

<sup>28</sup> “Aime ngenge omale medecngebame yanguc micaigaing, ‘Nongileng ngakpi-kpoluc wenuwacni balu ganoga?’ Ngenge daling mac-sobengka moc siyeckecaigaing nganicebaning. Yenge muc mi yumulu boletowa mi balu sifu sugulecaigaing. <sup>29</sup> Aime ngictau Solomon ye esecne ngakpine hibine madicne madicne holelu gawec, yele hibi-angoctowadi daling yengele hibi keleng angacine mi ewaliwec, yogo noine edocngebabac. <sup>30</sup> Aime daling aliline kpanggewa moc siyeckecaigaing, yogo yakucte sugu fikegaing. Nga saemebac helockelu dacka wickedaingte. Aime Wapongti dalingbenang ingucne ngakpi holeyeledaictewa, ye ngic-ngigac ngage-ngaigesingngineng kpisicnemac fagac, ngenge inguchac ngakpi-kpolucngineng taockelu ngeledaicte.

<sup>31</sup> “Ilec ailu ngenge yogo milu mi medecngebadaic, ‘Nongileng nosing misa wenuwacni nodabelengte me ngakpi-kpoluc wenuwacni holenoga?’

<sup>32</sup> Ngic-ngaigac aling Wapong mi ngagegaing, yenge socte wiycasasawadi baningte ngage-ngaingeneng iwa lobong fadaicte. Aime Honocmeng Macmacnginengti ngenge socte wiycakpungkecaigaing, yogo biyac ngagedaicte.

<sup>33</sup> Ilec ngenge molic-molicbenang Wapongte ngani-damong nga yele pasi dondonne bafuwanogale bole sugucne hac badabiyeng. Ngenge inguc ai-bong yedi socte wiycakpungkecaigaing, yogo biyac ngagedaicte. <sup>34</sup> Inguc ailu ngenge saemele milu mi medecngebadaic. Saeme yogo yeuctihac damongkedaicte. Deboc hadengsoc ye yeuctihac umacinele silicina umacine bidaicte, yogodibac andoine aidaicte.”

## 7

### *Ngenge ngage-wosaec mi aiyeledaing*

*Luk 6:37-38; 6:41-42*

<sup>1</sup> “Ngenge ngic-ngaigac yengele aibaba ngage-wosaec mi aiyeledaing. Inguc aidaingtewa, Wapongti inguchac ngengele aibaba ngage-wosaec mi ain-geledaicte. <sup>2</sup> I yanguete, ngenge ngic-ngaigac ngage-wosaec aiyeledaingte, silicac ingucne hac Wapongti ngenge ngage-wosaec aidaicte. Ailu ngenge wiycak umacine wosaelu ngic-ngaigac yelecaigaing, aime umacine silicine ingucne hac wosaelu ameine ngeledaicte.

<sup>3</sup> “Ga wenukte ngic hae-gbagonele dongewa gochakic fagac, yogo nganicaigic. Nga geicne dongewa yoc hewacine fagac, yogobac mi nganimotogic, me? Aibaba ingucnedi mi madickegac. <sup>4</sup> Ngagegic, gageicne dongewa yoc hewacine faemewa ngic hae-gbagonele yanguc milu gagic, ‘Ga nalic ngageengka dongegona gochakic ngiyegac, yogo baickebe.’

<sup>5</sup> Kwesac-ngaigac, gageicne dongewa yoc hewacine fagac, yogo baickelubac ngic hae-gbagonele dongewa gochakic ngiyegac, yogo nalic ngani-motolu baickedamecte.

<sup>6</sup> “Ngenge Wapongte wiycak monic gbagbacne yogo ngic-ngaigac wonongkolec aibabangineng hoda ingucne mi yeledaing. Inguc yeleborg yenge hefaliyelu hicngebadaingte. Ailu kwanangngineng yogo bec yengela mi wickedaingte. Inguc aibong yenge inguchac gacgu yogo higenginengti edesockedainigte.

### *Ngenge milockelu gadabiyeng*

*Luk 11:9-13*

<sup>7</sup> "Ngenge milockening, aime yedi wiyc ngeledaicte. Nga basackening, ailu bafuwadaingte. Nga nuwa holening, aime ye nu laliyedaicte. <sup>8</sup> I yanguete, monic ye milockelu gagac, yedi wiyc badaicte. Nga monic ye basackelu gagac, yedi wiyc bafuwadaicte. Ailu nuwa holelu gagac, ye nu laliyecnodaicte.

<sup>9</sup> "Ngengelacni ngic monicte madecti nosingte mamacine uwacnome ye posa nalic mi lacnodaicte. <sup>10</sup> Me misa-sicte uwacnome hema sowacne nalic mi lacnodaicte. <sup>11</sup> Ngenge ngic aibabangineng sowacneholec gacaigaing. Ailu sifu adu-madecfocngineng kwele-madicte wiyc madicne yelenogale ngage-motogaing. Ilec ngenge yanguc ngagedaing, Honocmeng Mamacngi-nengte aibabadi ngengele aibaba madicne yogo ewaliyackegac. Ngenge yela wiyc monicte uwacnobong yedi taockelu wiyc madicne ngeledaicte.

<sup>12</sup> "Ngic-ngigac yengi oma aibaba aingelenogale ngagesicaigabiyyeng, wiyc ngagesicaigabiyyeng, yogo ngengi aiyeledabiyyeng. Yogodi hocne Wapongte yefe-yowa Mosesdi kwelengkewec, nga Wapongte siduc-mimi ngicte yowa fungine aigac.

*Yefe yaeckang  
Luk 13:24*

<sup>13</sup> "Ngenge nu kpisicna felu hikedaing. I yanguete, sowacnele yefe yogo nuine sugucne, ailu yefe yogo sugucne. Aime ngic-ngigac homacnedi yefe yogo balaibe hikecgú kpasoliyelu sowaledaingte. <sup>14</sup> Nga gagale yefe yoglec nuine kpisicne ailu yefe yogo doicineholec. Aime ngic-ngigac efecnemacti iwa hikecgú gaga noine bafuwadaingte.

*Siduc-mimi ngic kwesacine  
Luk 6:43-44; 13:25-27*

<sup>15</sup> "Siduc-mimi ngic kwesacine yengi basowalecngebadaingkale, ngenge yengele ngani-motolu gadabiyyeng. Yenge socnginengti lama soc nga kwelenginengtibac kate-hoda, ailu yenge kindololo aingelelu basowalecngebaningte kwesidaingte. <sup>16</sup> Aime noine fikeme, ngenge yogo nganilu ngagecebadaingte. Ngic-ngigac yogo yenge muc somangineholec iwacni waing noine nalic mi bidaingte. Ailu tambong-tambongkacni fik noine nalic mi bidaingte, yogo ngagedaing. <sup>17</sup> Aime yoc madicne sasawa, yengelacni noine madicne fikedaicte. Nga yoc sowacne iwacni noine sowacne fikedaicte. <sup>18</sup> Aime yoc madicnacni noine sowacne nalic mi fikedaicte. Nga yoc sowacnacni noine madicne nalic mi fikedaicte. <sup>19</sup> Yoc monic noine madicne mi fikedaictewa, yogo welockelu dacka wickedaingte. <sup>20</sup> Inguc ailu ngenge siduc-mimi ngic kwesacine yengele aibaba nalic nganilu ngage-motocebadaingte.

<sup>21</sup> "Ngic-ngigac yenge 'Sugucnene, Sugucnene,' inguc micaigaing, yengelacni gocnedi honocmengte ngani-damongka nalic mi fedaingte. Mamacne honocmengka gagac, ngic-ngigac yele angac nga ngage-ngage balabelu gacaigaing, yengi sugu iwa fedaingte. <sup>22</sup> Aime dameng iwa ngic-ngigac homacnedi yanguc edocnudaingte, 'Sugucne, Sugucne, nonge gale wacka siduc-yowa miibeng, ailu aleng yebicebaibeng, ailu pasi damuine-holec homacne baibeng. Ilec ga ngagenolec.' <sup>23</sup> Inguc mibong yangucbenang

mibe yegengkeme edocebadacte, 'Na ngenge mi ngagecngebagabac. Yefewa wewe ngic, ngenge nale haicka baickening.'

*Mac-baba ngic*

*Luk 6:47-49*

<sup>24</sup> "Monic ye yowane yago ngagelu balaibecaigac, ye ngic fiticne, ye ngic macine fapacladeng feina bawec, ye ingucne. <sup>25</sup> Ye macinele fungine fapacladeng feina sanangne domame mac-gbelongkolec kweme lumongti kwesilu mac yogo mi kwelu wembalackewec. <sup>26</sup> Aime monic ye yowane yago ngagelu mi balaibedaict, ye ngic ngagec-ngageine mikac aihu ngic macine dingong feina bawec, ye ingucne. <sup>27</sup> Mac kweme lumong nga gbelong sugucnedi kwesilu mac yogo wembalackeme fuwangkelu wawewec."

<sup>28-29</sup> Yesu ye yowa yogo mime motowec. Aime yedi yowa weduyelewec, yogi ngic bolele hibi bacaigaing, yengele silic ingucne bole-yowa tapiliheolec weduyelewec. Aihu Wapongte yefe-yowale wewedu ngic yengi hibiwacni nganilu micaigaing, yenge ingucne mi miwec. Ilec aihu ngic-nigac habutowa yenge yowa weduyeleme ngagelu kwatackeibong.

## 8

*Ngic waic-sanangkolec*

*Mrk 1:40-44; Luk 5:12-14*

<sup>1</sup> Yesu kuplic hegilelu wame ngic-nigigac habutowa sugucnebenangti ye balaibeibong. <sup>2</sup> Balaibelu wabong ngic monic waic-sanangkolecti kwesilu ketadi holecnolu afeelu miwec, "Sugucne, ga ngageng angacgugacka, na nalic bamadicnung gbagbackedacte."

<sup>3</sup> Inguc mime Yesudi moleine sungkelu ngic bauwalu yanguc edowec, "**Madickeete angacnugac.**" Inguc mime iwahac socine madickeme hucine miyac aiwec. <sup>4</sup> Aime Yesudi yanguc edolu mimackewec, "**Ngagegic, socgonia pasi fikegac, yogolec monic mi edodamec.** **Ga depec-baba ngic yela hikelu socgone gbagbacne aigac, yogo edaliyengka, Mosesdi ibule miwec, yogolec silicina balaibelu lacnodamec!** **Ga inguc lacnoengka yenge ibugone nganilubac ngage-motodaingte.**"

*Hudu-baba ngic micne*

*Luk 7:1-10*

<sup>5</sup> Aime Yesu Kapeneam taonka feme Roma yengele hudu-baba ngic yengele damong monicti kwesilu Yesudi bafickenale dogbac aicnolu yanguc miwec.\* <sup>6</sup> "Sugucnene, bole-madecne ye hige-moleine homaicne aihu ye macka doic ngagelu falu gagac."

<sup>7</sup> Inguc mime Yesudi yanguc edowec, "**Na nalic fulu bamadickedacte.**"

<sup>8</sup> Inguc mime hudu-baba ngic yengele damongti yowaine bafaliyelu yanguc micnowec, "Sugucnene, na oma ngic madicnele macne kwelina fudamecte. Ga yowadi sugu miyengka bole-madecne madickena. <sup>9</sup> I yangucte, na ngic tapilinginengkolec yengele bagewa gagabac. Aime nale bagewa hudu-baba ngicfocne gagabiyeng. Yengelacni monicte 'hikec' mibe ye hikedacte. Nga yengelacni monicte 'welec' mibe ye weledacte. Nga kwelec kwekwe ngic monicte 'bole yogo banong' mibe ye yogo badaict. Na ngagegabac, ga tapiligungholec gagic."

\* **7:23:** Mige 6:8; 2Tim 2:19    **7:28-29:** Mrk 1:22; Luk 4:32    **8:4:** Dep 14:1-32; Mat 9:30; Luk 17:14

\* **8:5:** Hudu-baba ngic micne yogo, yele bagewa hudu-baba ngic 100 ingucne gaibong. Yenge Roma himongkaaci kwesiibong.

<sup>10</sup> Inguc mime Yesu ye yogo ngagelu kwatackewec. Ailu ngic-ngigac balaibeibong, yenge yanguc edocebewec, “*Foinac, Israel himongka ngic-ngigac ngage-ngagesingngineng sanangne yangucne monic mi nganiibawa, ngic yago yela nganigabac, yogo noine edocngebabac.*”<sup>11</sup> Ilec yanguc edocngebabec, wenac ofe-ofeinacni nga hau-hauinacni ngic-ngigac homacnedi kwestilu Abraham nga Aisak aliu Yakobo yengeholec honocmenge nganidamongka yenge momoc ngiyelu noba-nosing nodaingte.<sup>12</sup> Aime Wapongti molic-molic yeicne ngani-damongte aling yogo Israel ngic-ngigac yengele miwec, yengebac lobewa kundungte dacka wicebabong haudaingte. Haulu iwa hiyalu micngineng hisalangkelu gadaingte.”

<sup>13</sup> Inguc milu hudu-baba ngic yengele damong yanguc edowec, “*Ga hikenong, ngagesingkegic, yogo noine fikegeledaicte.*” Aime hadeng dameng iwahac bole-madecine yogo hige-moleine homaicne madickewec.

### *Pita sefengngine*

*Mrk 1:29-31; Luk 4:38-39*

<sup>14</sup> Aime Yesu ye Pitale macka felu Pita sefengngine ye soc-dac aicnome fame nganiwec.<sup>15</sup> Nganilu moleina balu oiyame sefengngine hucine miyac aime fangkelu nosingka baficebewec.

### *Ngic-ngigac homacne bamadicebewec*

*Mrk 1:32-34; Luk 4:40-41*

<sup>16</sup> Aweleme iwahac ngic-ngigac alengkolec homacne bacebalu Yesula kwesibong. Kwesibong, yedi yowa milu aleng yebicebalu huckolec sasawa bamadicebewec.<sup>17</sup> Siduc-mimi ngic Yesaiyadi esecne yanguc miwec, “Yedi nongileng huc sasawa baickeme madickeibeng.”<sup>18</sup> (*Yes 53:4*)  
Yogowa noine fikewec.

### *Yesu balaibenoga*

*Luk 9:57-60*

<sup>18</sup> Ngic-ngigac habutowadi Yesu hewalingkelu domabong ye yogo nganicebalu mic-tengtengfocine yanguc edocebewec, “Nongileng lifuc nebocina hikenang.”<sup>19</sup> Inguc miyemewa Wapongte yefe-yowale wedeungic monicti kwesilu yanguc edowec, “Wewedu, ga iwa me iwa hikedamectesoc na balaibecgulu gaholec hikenogale ngagegabac.”

<sup>20</sup> Inguc mime Yesudi bafaliyelu yanguc edowec, “*Kate-hoda yenge himong kwelina macfafanganengkolec. Nga sawawa nango yenge selengningkolec. Nga Ngicte Madec yebac macfafaine mikac, inguc gacaigac.*”

<sup>21</sup> Mime mic-tengtengfocine yengelacni monicti yanguc miwec, “*Sugucne, ngageneleengka hikelu mamaacne homame longkelubac ga balaibecgudacte.*”

<sup>22</sup> Inguc mime Yesudi yanguc miwec, “*Ga homaicne hegilecebaengka yenge yengungthiac longnaguning. Nga ga wele na balaibecnuc.*”

### *Gbelonti yowa ngagewec*

*Mrk 4:36-41; Luk 8:22-25*

<sup>23</sup> Yesu gombawa feme mic-tengtengfocine yenge momoc gombawa felu hikibong.<sup>24</sup> Hei, gbelong tapiliineholec weme dibongti gomba kwelina haunogale aiwec. Aime dameng iwa Yesu ye gung fawec.<sup>25</sup> Fame mic-tengtengfocine yenge Yesula lelu yeuckelu yanguc miibong, “*Sugucne, nonge haulu homadabelengkale ailu, baficnubac!*”

**26** Inguc mibong yedi yanguc edocebawec, “**Ngenge ngagesingngineng kpisicnemac fagac, ngenge hangoc mi aining.**” Inguc milu gbelong nga lifuc ngelengkelu kpatatalayetelu edocepame, gbelong miyac aime lifuc ye kalong kwelu moc fawec.

**27** Fame ngic yenge kwatackelu uwanaguibong, “Ye oma ngic, aime gbelong nga misa lifuc yeke yowa ngagegabiyeck?”

### *Ngic yaeckang yekele aleng*

*Mrk 5:1-17; Luk 8:26-37*

**28** Aime yenge lifuc nebocina Gadara ngic-ngigac yengele himongka hike sulumebong ngic yaeckang alengngineckolec dongesiwacni kwesiiboc. Yeke odolecaigaic. Ilec ailu ngic-ngigac yenge inguc yefe mi hikelu gaibong.

**29** Hei, yeke iwa domalu aukwelu yanguc miiboc, “Wapongte Madec, nokela wenuc ainogale ngagegic? Damengnonggeng mi weleemewa ga doicka mi locnupadamec.”

**30** Aime ediyec neboc bec-habu sugucne monic yenge sulukwelu gaibong. Gaebongka **31** aleng yengi yanguc milu Yesu dogbac aicnolu miibong, “Ga yebicnubanogale milu, bec-habu yengela salecnubang hikedabeleng.”

**32** Inguc mibong yedi yanguc edocebawec, “**Ngenge baickelu iwa hiken-ing.**” Hei, yenge baickelu bec-habu yengela hauibong. Haubong bec yenge sasawadi fegengkacni gasackelu lifucka haulu misa nolu homay-ackeibong.

**33** Homabong bec-damong yenge yogo nganilu hangoc hike taonka galu pasi fikewec, yogolec siduc sasawa milu edocebaibong. Ailu ngic alengkolec yekela pasi fikewec, yogolec siduc momochac edocebaibong.

**34** Edocebabong taon yogolec ngic-ngigac sasawadi Yesu nganinogale hike nganilu, ye yengele mac-himongngineng yogo hegilelu hikenale dogbac aicnolu edoibong.

## 9

### *Ngic hige-moleine homaicne*

*Mrk 2:1-12; Luk 5:17-26*

**1** Yesu ye gombawa felu lifuc falockelu yeicnac taonka hikewec. **2** Hikeme yenge ngic monic hige-moleine homaicne dembengka lolu tengkelu kwe-siibong. Kwsibong Yesudi ngage-**ngagesingngineng** nganilu ngic-puling yanguc edowec, “**Madecne, ga kwelegone madickena, bikicgone yogo biyac hegilegelegabac.**”

**3** Inguc mime Wapongte yefe-yowale wewedu ngic gocne yengungti hac yanguc ngagesiibong, “Ngic yago ye Wapong fecnogac!”

**4** Inguc ngagebong Yesudi ngage-**ngagengineng** nganilu yanguc miwec, “**Ngenge omale kwelenginang ngage-ngage sowacne ngagesigaing?**” **5** Weni yogodi efecne aigac? Yele yanguc minoga, ‘Bikicgone biyac hegilegelegabac’ me yanguc minoga, ‘Ga fangkelu hike.’ **6** Ngicte Madec ye himongka bikic hegilenale bole-yowa tapiliineholec facnogac, ngengi yogo ngageningte ailu yanguc mibe.” Ye inguc milu ngic-puling yanguc edowec, “**Na edocgugabac, ga fangkelu dembenggone balu macgona hike.**” **7** Inguc mime ngic ye fangkelu macina hikewec. **8** Hikeme ngic-**ngigac** habutowa domaibong, yenge yogo nganilu kwatackelu milu medecebawec. Wapongti bikic hegile-hegilele bole-yowa tapiliineholec ingucne ngic-**ngigac** yeleme, yenge yogo nganilu Wapong wacine bafeibong.

*Yesudi Mataio wackewec  
Mrk 2:13-17; Luk 5:27-32*

<sup>9</sup> Yesu ye iwacni falocke hikelu takes-baba ngic\* monic, waccine Mataio, ye takes-baba macka ngiyeme nganilu yanguc edowec, “**Ga wele na balaibec-nuc!**” Inguc mime ye fangkelu balaibelu hikewec.

<sup>10</sup> Aime Yesu ye Mataiole macka felu nosing nolu ngiyeemewa takes-baba ngic nga bikic-baba ngic bocyaicti kwesilu Yesu nga mic-tengtengfocine yengeholec ngiyelu nosing momoc noibong. <sup>11</sup> Nolu ngiyebong Farisaio yenge yogo nganilu Yesu mic-tengtengfocine yanguc uwayeelibong, “Wewedungineng ye omale takes-baba nga bikic-baba yengeholec nosing nogac?”

<sup>12</sup> Inguc mibong Yesudi ngagelu yanguc edocebawec, “**Ngic-ngigac hucngi-neng mikac gagaing, yenge dotalé mi aiyelecaigac.** Nga hucnginengkolec, yengibac dotalé aiyelecaigac. <sup>13</sup> Ngenge hikelu yowa yanguc fagac, yogolec ngage-ngage baning,

‘Na depec bacaigaing, yogolec mi ainelegac. Ngic-ngigac kwele-sowac aiy-elecaigaing, yogolec ainelegac.’ *(Hos 6:6)*

I yangukte, na ngic-ngigac dondonne wacebabe nala weleningte mi waiba, miyac. Nabac bikic-baba ngic wacebabe nala weleningte waiba.”

*Nosing-sawe gaga*

*Mrk 2:18-22; Luk 5:33-39*

<sup>14</sup> Dameng iwa Yoanele mic-tengtengfocine yengi kwesilu uwacnoibong, “Nonge nga Farisaio, dameng homacne nosing-sawe gacaigabeleng. Nga galé mic-tengtengfogone yenge omale nosing-sawe mi gacaigaing?”

<sup>15</sup> Inguc mibong Yesudi yanguc edocebawec, “**Baba-tumangte ngicti agofocine yengeholec ngiyeme yenge kwele-sowackolec nalic gadaingte, me?** Yogo miyac. Gacgu dameng monicka ngic yengi baba-tumangte ngic agofocine yengelacni baickedaingte, dameng yogowabac nosing-sawe gadaingte.

<sup>16</sup> “Monicti ngakpi esecna kpoluc sindacine gblolicne monic lolu mi gbododaicte, miyac. Ye gblolicne inguc lodaictewa, gblolicnedi esecne fuluckeme sulackelu yefine suguledaicte. <sup>17</sup> Ailu monicti waing gblolicne bokong sic socine esecnedi baicne, iwa nalic mi kweme haudaicte, miyac. Waing gblolicnedi siwinelu bokong esecne kwouckeme yeke momochac sowaledabiyepte. Ilec ailu waing gblolicne yogodi bokong gblolicna socne kweme haudaicte.<sup>†</sup> Ilec waing gblolicne kwebong bokong gblolicne monicka sic socinedi baicne iwa haume yeke momoc nalic ngiyedabiyepte.”

*Adu monic bagbolyewec ailu ngigac monic bamadickewec*

*Mrk 5:22-43; Luk 8:41-56*

<sup>18</sup> Yesu ye yowa yogo edocebalu ngiyeme damong monicti yela kwesilu ketadi holecnolu afeelu miwec, “Na adune yakumac homagac. Gagi welelu molegone feina loengka gbloliyena.” <sup>19</sup> Inguc mime Yesu ye fangkelu yeholec hikeme mic-tengtengfocine inguchac fangkelu ye balaibelu hikeibong.

<sup>20-21</sup> Hikeebongka ngigac monic lobenginang balaibecebalu hikewec. Hei, ye sac-dale aicnome gaemewa hifa 12 biyachac aiwec. Inguc aiwecte ailu

\* <sup>9:9:</sup> Takesle funginele siduc Mataio 5:46 iwa fagac.      <sup>9:11:</sup> Luk 15:2      <sup>9:13:</sup> Mat 12:7

<sup>9:14:</sup> Luk 18:12      <sup>† 9:17:</sup> Bokong sic socinedi baicne, ye umec sucine ingucne nosing hatac lobebeng sulumedaicte. Yowa yanguc yegengkegac, Ngic-ngigac yenge Yesule yowa gblolicne balaibenogale yefe-yowa esecneholec hatac atang mi bacepadabiyepong.

kwesilu yanguc ngagewec, "Na Yesule ngakpi sugu oiyalu madickedacte." Inguc ngagelu ngakpi daleinele muc susucine oiyawec.

<sup>22</sup> Oiyame Yesu ye hefaliye nganilu yanguc edowec, "**Ngigac, ga kwelegone madickena. Ngage-ngagesinggonedi bamadicgugac.**" Inguc miyemewa ngigac ye iwashac madickewec.

<sup>23</sup> Aime Yesu ye gacgu ngic micne yele macka hike feme hisonggong gee holebong ngic-ngigac habutowa hendolongngineng ngagelu <sup>24</sup> yanguc edocebawec, "**Ngenge yagowacni baickening. Adu ye mi homagac, ye gung fagac.**" Inguc mime yenge gouwecnoibong. <sup>25</sup> Gouwecnolu baickelu wabong, Yesu ye adu fawec, iwa felu adu moleina bame gboliyelu fangkewec. <sup>26</sup> Aime siduc yogodi himong yogo saweyackewec.

### *Ngic yaeckang dongenginec pisickeicne*

<sup>27</sup> Yesu ye mac yogo hegilelu hikeenewabac ngic donge-pisic yaeckangti Yesu balaibelu aukwelu wackelu yanguc miiboc, "Dawidile fikesaweckacni, ga nokele kwelegone sowalena!"<sup>‡</sup>

<sup>28</sup> Ye macka feme donge-pisic yaeckang yeke yela leboc yedi yanguc uwayetewec, "**Na bamadicngepanogale aigabac, ngeke yogo ngagesingnu-gabiyc, me?**"

Inguc mime yeki miiboc, "Oc, Sugucne, noke ngagesinggubabelec."

<sup>29</sup> Inguc miboc dongenginec bauwalu yanguc miwec, "**Ngage-ngagesingnginecte noine fikengetena.**" <sup>30</sup> Inguc mime dongenginec hilaihoc. Aime wiyc fikeyetewec, yogo ngic monic mi edonicte mimacepawec. <sup>31</sup> Aime yeke hikelu siducine yogo miboc suguleme macsoc ngageyackebong.

### *Ngic yowaine mikac*

<sup>32</sup> Aime yeke hikkebocka ngic-ngigac yenge ngic monic yowaine mikac ailu alengkolec Yesula balu kwesiibong. <sup>33</sup> Kwesibong Yesudi aleng yebiyeme ngic yowaine mikac gawec, ye yowa miwec. Mime ngic-ngigac habutowadi yogo ngagelu kwatackelu yanguc miibong, "Israel himongka pasi ingucne esecne monic mi fikeme nganiibeng."

<sup>34</sup> Inguc mibong Farisaio yengi miibong, "Ye aleng yengele micnele tapiliwa bole balu ngic-ngigac yengelacni aleng yebicebacaigac."

### *Lama-damongngine mikac*

<sup>35</sup> Yesu ye taon nga mac-aling sasawa lolickelu kpakpaduc macnginang felu wewedu bole balu ngani-damongte Siduc Madicne edocebalu we-duyelelu gawec. Ailu ye ngic-ngigac huc haicine monic monicti bacebame tapilingineng waince yenge sasawa bamadicebayackewec. <sup>36</sup> Aime ngic-ngigac habutowa yenge mimedec nga tapili-wawa ailu lama yengi damong mikac gacaigaing, yogo ingucne gaibong. Ilec ailu Yesudi nganic-balu kweleine sowaleme <sup>37</sup> mic-tengtengfocine yanguc edocebewec, "**Ngic-ngigac yenge nosing noine ingucne homacnedi houwelu fagaing. Aime bole-ncifti sugu efecnemac gagaing.**" <sup>38</sup> Ilec ailu ngenge Sugucne nosing fileine milockelu yanguc edodabiyeng, '**Ga bole-ngic salecebang yengi hikelu nosing noine bakpaduc aidabiyeng.**'"

**9:20-21:** Mat 14:36    <sup>‡</sup> **9:27:** 2 Samuel 7:12-16 Waponti Dawidiholec yowa yanguc milu hefewec.

Ngic monic gale alingkacnidji dameng moto-motoine mikac gale mac ngiye-ngiyewa ngiyedacite. Yogolec yenge Yesu Dawidile ngambo miibong. **9:27:** Mat 20:29-34    **9:30:** Mat 8:4    **9:33:** Mrk 2:12    **9:34:** Mat 12:24; Mrk 3:22; Luk 11:15    **9:35:** Mat 4:23; Mrk 1:39    **9:36:** Mat 14:14; Luk 22:17; 1Ngt 22:17; Sek 10:2; Mrk 6:34    **9:37:** Luk 10:2

**10**

*Yesu mic-tengtengfocene  
Mrk 3:13-19; Luk 6:12-16*

<sup>1</sup> Yesudi mic-tengtengfocene 12 wacebame weleyackeibong. Welebong ngic-ngigac yengelacni aleng wonongkolec yebicebaningte bole-yowa tapili-ineholec yelewec. Ailu huc haicine monic-monik ailu ngic-ngigac tapiling-neng waicne sasawa bamadicebaningte bole-yowa tapiliineholec yelewec.

<sup>2</sup> Ngic 12 yogo yenge Salecebaicne, yengele wacngineng yanguc:

Molic-molic Saimon, ailu wacine monic Pita. Nga  
ngic hae-gbaine Endru. Ailu  
Yakobos, ye Sebedi madecine, nga  
gbaine Yoane. Ailu

<sup>3</sup> Filip nga  
Batalomeu. Ailu

Tomas nga  
Mataio, ye takes-baba ngic. Ailu  
Yakobos, ye Alfaius madecine. Nga  
Tadeus ailu

<sup>4</sup> Saimon, ye ngic-habu gocne wacngineng Selot wackeibong.\* Ailu  
Yudas Iskariot, yedi gacgu Yesu mudockeme badaingte.

*Bole-yowa milu yelewec  
Mrk 6:7-13; Luk 9:1-5*

<sup>5</sup> Yesudi mic-tengtengfocene 12 yogo hocne salecebalu yowa yanguc milu sanangne edocebawec, “*Ngenge hikelu Israel yengele alingkacni miyac, yengele himongka ailu Samaria ngic-ngigac yengele taonka mi hikedaing, miyac.*”

<sup>6</sup> Israel habu yengela ngic-ngigac lama sangkeicne, ingucne gagaing, ngenge yengela hikedaing. <sup>7</sup> *Ngenge hikelu yanguc edocebalu weduyeledaing. Honocmenge ngani-damong yogo biyac bangkalecnubagac.*”

<sup>8</sup> Ailu huckolec ngic-ngigac bamadicebadaing. Ailu ngic-ngigac homaicne bagboliyecebadaing. Ailu ngic-ngigac waic-sanangti bacebaicne yenge bamadicebadaing. Ailu aleng yebicebadaing. Wiyac ameine mikac baibong yogo ameine mikachac yeledaing.

<sup>9</sup> “*Ngenge gol moneng nga siliwa ailu moneng sasacnedi baicne, yogo anggbangka mi umengkedaing.*” <sup>10</sup> *Ngenge bole balu gabong bole yogolec ailu nosing nga wiyatngineng ngic-ngigac yengi bafuwadaingte, aibaba yodegi madickedaicte. Ilec ngenge yefe hikenogale, hiye me ngakpi yaeckang me hige-ebec me yasu monic mi balu hikedaing.*

<sup>11</sup> “*Ailu ngenge taon me mac-aling monicka hikedaingte, iwa ngic madicne monic bafuwabong yeholec ngiyeningte silic ingucne mime ngenge yeholec ngyie-fangkec aidaing. Aibong motome taon hegilelu hikedaing.*” <sup>12</sup> *Ngenge mac yogolec kwelina felu wenac-madic yowa kwele-mogungkolec midaing.*

<sup>13</sup> *Inguc mibong golowacfocngineng yenge kwele-mogung ngagelu mengocngebadaingtewa, kwele-mogungti golowacfocngineng yengela fadaicte. Nga golowacfocngineng yenge kwele-mogung mi ngagedaingtewa, kwele-mogung yogo ngengilang hatacmac hefaliyengeledaicte.*” <sup>14</sup> *Nga monicti mi hefolecngebalu yowanganineng mi ngagedaicte, ngenge mac me taon yogo hegilelu higenginangkocni lube webong wame hikedaing.* Taonte

**10:1:** Mrk 6:7; Luk 9:1      \* **10:4:** Dameng iwa Roma ngic-ngigac yengi Israel ngic-ngigac damon-gebaibong. Israel ngic-ngigac yengele habu nebcine wacine Selot yenguntihac damongnaguningte ailu gaibong. **10:6:** Yer 50:6    **10:7:** Mat 3:2; 4:17; Luk 10:9,11    **10:10:** Luk 10:4,7; 1Kor 9:14

**10:12:** Luk 10:5-6

ngic-ngigac yenge inguc nganilu wowosaele sawang-yowa ngagedaingte.  
 15 Foinac, gacgu wowosae damengka taon yoglec ngic-ngigac yengele umacti Sodom nga Gomora taon, yekele ngic-ngigac yengele umac ewalidaicte, yogo noine edocngebabac.

### *Umac kwasidaicte*

*Mrk 13:9-13; Luk 21:12-17; 12:2-9*

<sup>16</sup> “Ngagegabiyeng, ngenge lamadi kate-hoda yengele hewacka gacaigainga, nga silincine yoglecsoc salecngebabac. Ilec hema yenge ngage-  
 nge-motocnginengkolec ngabale hangoc hikcaigaing, ngenge yenge ingucnehab gadabiyeng. Ailu tudiling nango yenge sowacnengineng mikac,  
 ngenge yenge ingucnehab gadabiyeng. <sup>17</sup> Ngenge ngic yengele ngani-  
 motolu gadabiyeng. Yenge yowawa locngebadaingte. Ailu kpakpaduc  
 macnginang muc-hududi wecngebadaingte. <sup>18</sup> Ailu ngic-ngigac yengi nale  
 ailu bacngeba hikelu gawana nga ngictau yengele haicka locngebadaingte.  
 Inguc aibong ngengi yenge nga Israel yengele alingkacni miyac, ngic  
 yogo yenge momoc nale Siduc Madicne mibong yegengkelu hikedaicte.  
<sup>19</sup> Ailu ngic-ngigac yengele haicka locngebabong yowawa domadaingte, iwa  
 ngenge ‘Oma yowa minoga?’ me ‘Wenuc minoga?’ milu, ngageboc monic  
 mi aidabiyeng. Tili Asudi dameng yogowahac yowa micnginang lodaicte,  
 yogo midaing. <sup>20</sup> Ngenge dameng iwa ngengung-yowa mi midaingte, miyac.  
 Mamaacnginengte Asudi yowa micnginang lome yowa yogo midaingte.

<sup>21</sup> “Dameng iwa haedi gbaine ngic micne yengele molewa lome yengi homacka lodaingte. Aime mamaac monicti madecinele ingucnehab aidaicte. Aime adu-madec yengi nenggac-mamacfocngineng yowa kwekwe aiyelelu ngic gocne yengele molewa locebabong homacka locebadaingte. <sup>22</sup> Aime ngic-ngigac sasawa yenge nale wacte ailu ngenge kweledi wicngebadaingte. Aime monic ye sanangnehab gacgume damengine motodaicte, ye wasecne aidaicte. <sup>23</sup> Ngenge taon monicka gaebongka ngic-ngigac yengi weyebic aingelebong, ngenge taon yogo hegilelu monicka hikedaing. Foinac, ngenge Israel himongka taon sasawa falegac, iwa bolene mi bayackeebongka Ngicte Madec kwsidaicte, yogo noine edocngebabac.

### *Ngage-wosaec ainoga*

<sup>24</sup> “Hibi-mac madec monicti weweduinele feicne mi aidaicte. Nga kwele  
 kwekwe ngic monic ye sugucneinele feicne mi aidaicte, miyac. <sup>25</sup> Hibi-mac  
 madec ye weweduinele silic ingucnehab aidaic. Nga kwele kwekwe ngic  
 ye sugucneinele silic ingucnehab aidaic, yogodi nalic aidaicte. Aime mac  
 fileine nale wac Belsebul wackeibong. Ilec ailu golowacfocne ngengela wac  
 sowacne ingucne homacnehab wacngebadaingte.

<sup>26</sup> “Wiyac monic ebecineholec fagac, yogo gacgu yegengkedaicte. Nga  
 wiyc sangke-sangke fagac, yogo ngageyackedaingte. Ilec ngenge yengele  
 mi hangocngebadaic. <sup>27</sup> Na kundungka yowa edocngebabac, ngengi  
 yowa yogo angocina domalu midaing. Ailu yowa sangicka hedecnginang  
 mimiine yogo, ngengi mac feina domalu yogo sugucnehab edocebabong  
 ngageyackedaing. <sup>28</sup> Gocne yengi socngineng wehomalu ilucngineng nalic  
 mi wehomadaingte, ngenge yengele mi hangocngebadaic. Wapongti soc nga  
 iluc yeke momochac dac-sanangka wicepadaicte, ngenge yele sugu hangoc-  
 gebadaic. <sup>29</sup> Ngic-ngigac yengi nango hakic yaeckang lobong peni sasacne

**10:14:** Luk 10:10-12; Sale 13:51    **10:15:** Mat 11:24; Yud 7    **10:16:** Luk 10:3; Rom 16:19    **10:17:**

Mrk 13:9-11; Luk 21:12-15    **10:20:** Luk 12:11-12    **10:21:** Mika 7:6; Mat 10:35; Mrk 13:12; Luk

21:16    **10:24:** Luk 6:40; Yoa 13:16; 15:20    **10:25:** Mat 9:34; 12:24; Mrk 3:22; Luk 11:15    **10:26:**

Mrk 4:22; Luk 8:17    **10:28:** Yak 4:12

moniyangti fuli bacaigaing. Aime nango yengelacni monicti himongka waweme ngengele Mamacti yogo biyac ngagedaict. <sup>30</sup> Nga ngengele hodoc-dowecngineng edomeng, yogo inguchac wafelu ngagegac. <sup>31</sup> Ngengi Wapongte haicka nango gogoc homacne yengele feicne aigaing. Ilec ailu ngenge mi hangocngebadaic.

<sup>32</sup> “Monic ye ngic-ngigac yengele haicka nale mime yegengkedaict, ‘Na yele aling.’ Aime nani yele inguchac Mamacne honocmengka gagac, yele haicka yanguc mibe yegengkedaict, ‘Ye nale ngic.’ <sup>33</sup> Nga monic ye ngic-ngigac yengele haicka nale wac bisockedadaict, nani Mamacne honocmengka gagac, yele haicka ngic yele wac inguchac bisockedadaict.

*Kwele-mogung bafuwanaale mi wawec*

*Luk 12:51-53; 14:26-27; Mrk 9:41*

<sup>34</sup> “Na himongka kwele-mogung bafuwanaogale waiba,’ Ngenge nale inguc mi ngagedaing, miyac. Na kwele-mogung bafuwanaogale mi waiba, na hudule waiba.

<sup>35</sup> ‘Madec ye mamackolec ngaba ainagudabiyece. Nga adu ye nenggacine-holec ngaba ainagudabiyece. Nga ngigac ye yengauineholec ngaba ainagudabiyece, inguc fikenale waiba. <sup>36</sup> Monic ye macinabenang ngic-ngigac alingfocene gagaing, yengi hocne ngaba aicnodaingte.’ (*Mika 7:6*)

<sup>37</sup> “Monic ye nenggac-mamackecine kweledi angac ngageyetelu nale angac efecnemac ngagecaigac, ye nale alingka gagalesoc mi aidaict. Nga monic ye madecine me aduine kweledi angac ngageyetelu nale angac efecnemac ngagecaigac, ye nale alingka gagalesoc mi aidaict. <sup>38</sup> Monic ye malicpongine<sup>†</sup> tengkelu na mi balaibecnudaict, ye nale alingka gagalesoc mi aidaict. <sup>39</sup> Monic ye yeuctihac gagaine bafuwalu sebiledaict, ye gagaine sangkecnodaict. Nga monic ye nale ailu gagaine hegiledaict, yebac gagaine bafuwadaict.

<sup>40</sup> “Monicti hefolecngebagac, ye na inguchac hefolecnuagac. Ailu na hefolecnuagac, ye Wapong na salecnuwec, ye inguchac hefolegac. <sup>41</sup> Nga monic ye Wapongte siduc-mimi ngic monic nganilu ngic yogo ye Wapongte siduc-mimi ngic gagac, inguc ngagelu ye sebiledaict, ye Wapongte siduc-mimi ngicte fuli ingucnehad badaict. Ailu monicti ngic ye dondonne gagacte ailu ngic yogo sebiledaict, ye ngic-ngigac dondonne yengele fuli ingucnehad badaict. <sup>42</sup> Foinac, monicti madec kpiscine monic nganilu nale mic-tengteng aigac inguc ngagelu misa mogung lacname nodaitewa, ye gagcu wiyac yogolec fuline badaict, yogo noine edocngebagabac.”

## 11

<sup>1</sup> Yesu ye mic-tengtengfocene 12 yowa inguc weduyeleme motome mac-alng yogo hegile hikewec. Hikelu mac-himong yogo yengele taonnginang-soc Siduc Madicne edocebalu weduyelenale hikelu gawec.

*Yoane misa-lowacte mic-tengtengfocene*

*Luk 7:18-35*

<sup>2</sup> Aime Yoane ye muc-macka ngiyelu Kristodi bole bawec, yogolec siduc ngagewec. Inguc ngagelu mic-tengtengfocene Yesula salecebame hikelu

**10:31:** Mat 6:26    **10:33:** Mrk 8:38; Luk 9:26; 2Tim 2:12    <sup>†</sup> **10:38:** Roma gamang yenge kindololo ngic mimoctocababong yengileng malicpong tengkelu hikebong malicpongka wehomacebabaianga. Ilec ailu “malicpong tengkenogale” yowa yogo bole doicinoholec inguc ngagelu micaigaing.    **10:38:** Mat 16:24-25; Mrk 8:34-35; Luk 9:23-24; 17:33; Yoa 12:25    **10:40:** Mrk 9:37; Luk 10:16; Yoa 13:20

<sup>3</sup> uwacnoibong, "Ngic kwesinolenogale miicne, yogo ga, me nonge ngic monicte wangec gadabelengte?"

<sup>4</sup> Inguc mibong yedi yanguc miwec, "Ngenge hikelu wiyc ngani-ngagec aigaing, yogolec siduc Yoane edocnodbabiyeng! <sup>5</sup> Ngic-ngigac donge-psic yenge dongengineng hilagaing. Nga hige-sowac yenge yefe hikegaing. Ailu ngic-ngigac waic-sanangkolec yenge socngineng madickeme gagaing. Hedec-fong yenge yowa ngagelu gagaing. Nga homaicne yenge gboliye fangkelu gagaing. Ailu ngic waweweine yenge Siduc Madicne ngagebong yegengkeyeleme gagaing. <sup>6</sup> Aime monicti nale ngagelu kweleine mi wadaicte, ye kwele-angackolec."

### *Yoane misa-lowacte fungine*

<sup>7</sup> Aime Yoanele mic-tengtengfocine yenge hikeebongka Yesudi Yoanele fungine milu habu sugucne yanguc edocebaawec, "Ngenge himong kisiwa misaine mikacka oma wiyc nganinogale hikeibong? Ngic monic komba ingucne gbelontgi weme lec-welec aiwec, ngenge yogo nganinogale hikeibong, me? Yogo miyac. <sup>8</sup> Aime ngenge oma wiyc nganinogale hikeibong? Ngic monic ngakpi-kpolucine hibiineholec, me? Yogo miyac. Ngagegaing, ngic ngakpi-kpolucngineng hibine madicne holecaigaing, yenge ngictau yengele macka sugu gacaigaing. <sup>9</sup> Ngenge Wapongte siduc-mimi ngic monic nganinogale hikeibong, me? Ye hocne Wapongte siduc-mimi ngic gocne sa-sawa ewalicebagac, inguc hocne edocngebabac. <sup>10</sup> Yoanele hocne yanguc kwelengkeicne fagac,

'Ngagegeic, na mic-yowa mimine salebe yedi molickegelelu yefegone ba-madickegeledaicie.' (Mal 3:1)

<sup>11</sup> Foinac, ngic-ngigackacni fike-ofeibong, yengelacni monicti Yoane misalowac nalic mi ewalidaicte, miyac, yogo noine edocngebabac. Nga monicti honocmenge ngani-damongte kwelina waweweine gagac, yedibac Yoanele feicne aigac. <sup>12</sup> Aime Yoane misa-lowacte bole molickeweckacni ofegacgu yakumac aigac, ngic-ngigac yenge honocmenge ngani-damong banogale bole sanangne bacaigaing. <sup>13</sup> Wapongte siduc-mimi ngic sasawa nga Wapongte yefe-yowa Mosesdi kwelengkewec, yogo yenge siduc-yowa milu ofecgubong Yoanelia kwsiwec. <sup>14</sup> Aime ngenge yowa yago balu se-bilenogale ngagegaingka yanguc migabac, Elaiya kwesinale miibong, yogo ye hocne. <sup>15</sup> Monic ye hedeckolecti yowa yago aneng ngagedaic.

<sup>16</sup> "Aime ngic-ngigac aling yanguctihac gagaing, yenge aibabangineng yanguc. Adu-madec yengi sobengka ngiyelu agofocngineng yanguc waceba-caigaing, <sup>17</sup> 'Nonge kpeng fitobeng ngenge gee mi weibong. Nga kwele-sowac gee holebeng, ngenge monic mi hiyaibong.' <sup>18</sup> I yangucte, Yoanedii kwesilu nosing nga waing misa mi nome yenge yogo nganilu yanguc miibong, 'Ye alengkolec.' <sup>19</sup> Nga Ngicte Madecti kwesilu nosing nga waing misa nomebac yenge ye nganilu yanguc micaigaing, 'Nganigaing, ye nosing nga waing misa efec mi nocaigac. Ailu ye takes-baba ngic nga bikic-baba ngic yengele agongineng.' Aime yele boledibac Wapongte ngage-ngage-motoc yogo dondonne fikekac aidaicte."

### *Kwele mi hefaliyegaingte yowa* *Luk 10:13-15*

<sup>20</sup> Yesudi mac-aling gocna pasi damuineholec homacne bame ngic-ngigac homacnedi nganilu kwele-hefaliyec mi aidaingkale, ye misofoc aiyelelu yanguc edocebwec, <sup>21</sup> “Korasin nga Besaida ngic-ngigac, mee, ngenge medeckengebadaic. Ngengela pasi damuineholec homacne biyac fikewec. Pasi ingucne Tair nga Saidon taonka fikedec midec, ngic-ngigac yenge bikicnginengte aili kwele-sowacte ngakpi wambac biyac holedabong. Aili defe lowalu kwele-hefaliyec aidabong. <sup>22</sup> Na yanguc edocngebabe, wowosae damengka ngengele umacti Tair nga Saidon yekele ngic-ngigac yengele umac ewalidaicte. <sup>23</sup> Nga Kapeneam ngic-ngigac, ngenge honocmengka fedaingte, inguc ngagecaigabiyyo, yogo miyachenang. Ngenge Wangemacka balu wicngebame haudaingte. Pasi damuineholec ngengela fikewec, yogodi Sodom taonka fikedec midec, Sodom ye dameng yanguctihac fadechac. <sup>24</sup> Na yanguc edocngebabe, wowosae damengka ngengele umacti Sodom ngic-ngigac yengele umac ewalidaicte.”\*

*Mamac nga Madec ngagecepanoga  
Luk 10:21-22*

<sup>25</sup> Dameng iwa Yesudi yanguc miwec, “Mamac, ga honocmeng nga himong fileine. Ngic-ngigac aling ngage-ngage-motochnengkolec gacaigaing, gagi yenge wiyacgonge sasawa yago mi nganiningte balu sangkeing. Aili adu-madec-gogoc kpisicne ingucne, yenge sugu wiyac yogo baengka yegengkeyelewec. Ilec mitenggubac. <sup>26</sup> Oc, Mamac, ga yogo ngagelu kwelegone madickegac. <sup>27</sup> Mamacnedi wiyac sasawa neleme na yogo damongkelu gagabac. Aime monicti Madec nalic mi ngagegac, Mamacti sugu ngagegac. Ingucnehab monicti Mamac nalic mi ngagegac, Madecti sugu ye ngagegac. Aili Madecti ngic-ngigac bawosaebalu edalicebagac, yengi sugu Mamac ngagegaing.

*Ngiye-ngagec banoga*

<sup>28</sup> “Ngic-ngigac boletowa balu tapilingineng waicne gacaigaing. Nga umac homacne balu gacaigaing, ngenge nala weleyackebong nani ngiye-ngagec ngeledacte. <sup>29</sup> Ngenge kwesilu nale bole yogo teng ingucne bafangke tengkelu ngage-ngage nalacni baning. Na kwele-mogung aili bawacnagulu gagabac. Inguc aili kwele-ilucnengniti ngiye-ngagec bafuwadaicte. <sup>30</sup> Nale teng yogo nalic tengkenoga, aime teng bageina wiyac hefeicne yogo efecne.”

## 12

*Sabatle Sugucne  
Mrk 2:23-28; Luk 6:1-5*

<sup>1</sup> Dameng iwa Yesudi Sabat damengka wit bole hewacina yefe balaibelu leme, mic-tengtengfocene yenge nosingte homalu wit noine moniyang moniyang banoc aibong. <sup>2</sup> Inguc aibong Farisaio yenge yogo nganilu yanguc edoibong, “Nganinong, mic-tengtengfocgone yenge Sabat damengka aibaba mi aiaiine, yogo aigaing.”

<sup>3</sup> Inguc mibong Yesudi yanguc edocebwec, “Dawidi nga bole-ngicfocene yenge nosingte homalu aibaba aibong, ngenge yogo wafe-ngagec mi

**11:21:** Yes 23; Esek 26:1-28:26; Yol 3:4-8; Amo 1:9-10; Sek 9:2-4    **11:23:** Yes 14:13-15; File 19:24-28

\* **11:24:** Korasin nga Besaida aili Kapeneam taon, yenge Israel ngic-ngigac yengele mac. Tair nga Saidon aili Sodom taon, yenge Israel yengele alingkaci miyac.    **11:24:** Mat 10:15; Luk 10:12

**11:25:** 1Kor 1:26-29    **11:27:** Mat 28:18; Yoa 3:35; 17:2; Filp 2:9; Yoa 1:18; 10:15    **11:28:** Yer 31:25    **11:30:** 1Yoa 5:3    **12:1:** Yef 23:25    **12:2:** Wah 20:10

aicaigaing, me? <sup>4</sup> Ye Wapongte Ibu-macka felu bret Wapongte ibu loicne, yogo balu bole-ngicfocine yengeholec noibong. Nga bret yogo depec-baba ngic yengi sugu nalic nodaingte, ngicbenang yengibac miyac. Aimebac Waponti yengele mi ngage-sowalewec. <sup>5</sup> Depec-baba ngic yenge inguchac Sabat damengka Ibu-macka hole balu Sabatka ngye-ngagetecte aibaba yogo hegilelu bikic mi bafuwadaingte. Wapongte yefe-yowawa fagac, ngenge yogo wafelu ngagecaigaing. <sup>6</sup> Na yowa yanguc edocngebabe, wiyac yagodi\* Wapongte Ibu-mac ewaligac. <sup>7</sup> Aime yowa yanguc kwelengkeicne fagac, ‘Na depec bacajgaing, yogolec mi ainelegac. Ngic-ngigac kwele-sowac aiy-elecaigaing, yogolec ainelegac.’ (Hos 6:6)

Ngenge yowa yogo ngage-motodabongka midec, ngenge ngic bikicngineng mikac, ngage-wosaec aiyelelu mi mimoctocebadabong. <sup>8</sup> Ngicte Madec ye Sabatle Sugucne gagac hocne, ye aibaba madicne nga sowacnele nalic midaicte.”

#### *Ngic mole-sowac bamadickewec*

*Mrk 3:1-6; Luk 6:6-11*

<sup>9</sup> Aime ye hegilelu iwacni hikelu kpakpaduc macnginang fewec. <sup>10</sup> Hei, ngic monic moleine neboc homaicne, ye iwa ngiyewec. Ngiyeme ngic yenge Yesudi wenuc mime ngagelu yowawa lonogale uwacnoibong, “Sabat damengka ngic nalic bamadicebanoga, me miyac?”

<sup>11</sup> Inguc mibong yedi yanguc edocebewec, “Ngengelacni monicti lamaire monic Sabat damengka long monicka haudaicte ingucne, ye biyac hikelu lamaire fuluckeme ofedaicte. <sup>12</sup> Aime ngic ngengibac wiyac feicne aihu lama ewalicebayackegaing. Ilec Sabat damengka aibaba madicne yogolec aka monic mi fagac.”

<sup>13</sup> Inguc milu ngic yogolec yanguc micnowec, “Ga molegone sungkec.” Inguc micname ye moleine sungkelu madickeme moleine nebocine ingucne aiwec. <sup>14</sup> Aime Farisaio yenge wahikelu yengilangkac kpaducke ngiyelu Yesu wehomanogale yowa milu hefeibong.

#### *Wapongte angac madecine*

<sup>15</sup> Inguc aibong Yesu ye kwelengineng ngageyelelu iwhac mac yogo hegilelu hikewec. Hikeme ngic-ngigac homacnedi balaibelu hikebong, yedi ngic-ngigac huenginengkolec sasawa bamadicebewec. <sup>16</sup> Bamadicebalu ngic-ngigac yengi yeicne fungine mibong yegengkedaickale aihu, aka-yowa edocebalu mimacebewec. <sup>17</sup> Siduc-mimi ngic Yesaiyadi yowa biyachac miwec, yogo noine aidaicte,

<sup>18</sup> “Ngagegaing, na bole-madecne bawosaeiba. Aihu kwelena yele angac ngagelu kwele-ilucndi yele beliyegac. Aime Asune yele feiwa lobe yedi nale mimocto-mimoctole pasi dondonne himongne himongne ngic-ngigac sasawa, yengela mime yegengkeyedaicte. <sup>19</sup> Aihu ye ngaba mi aidaicte. Nga ye tapiliineholec mi aukwedaicte. Ngic-ngigac yenge mac-sobengka domalu yele yowa-malacte ucine nalic mi ngagedaingte. <sup>20</sup> Aihu ye komba pelecne monic biyac sowaleicne, yogo mi baduyackedaicte. Aihu hifa monic ucine hasockolec hobanogale aigac, yogo mi bahobadaicte. Inguc aihu gacgu ye mimocto-mimocole

**12:4:** 1Sm 21:1-6; Dep 24:5-9    **12:5:** Him 28:9-10    \* **12:6:** Yesu ye yeicnele ngagelu “wiyac yagodi” miwec.    **12:6:** Mat 12:41-42    **12:7:** Mat 9:13    **12:10:** Luk 14:3    **12:11:** Luk 14:5  
**12:14:** Yoa 5:16,18    **12:16:** Mat 8:4; Mrk 3:12    **12:18:** Yes 42:1-4; Mat 3:17

pasi dondonne damongkelu game pasi yogodi aibaba sowacne ewalidaicte. <sup>21</sup> Aime himongne himongne ngic-ngigac sasawa, yenge ngage-ngagengineng yele wacka lolu wangec gadaingte." (*Yes 42:1-4*)

*Alengkolec bole bacaigac, me?*

*Mrk 3:20-30; Luk 11:14-23; 12:10*

<sup>22</sup> Yenge ngic monic alengkolec ailu donegeine pisickeicne ailu yowaine mikac, ye Yesula balu hikeibong. Hikebong yedi ngic yogo bamadickeme yowa miwec, ailu donegeine hilawec. <sup>23</sup> Inguc aime habu domaibong, yenge yogo nganilu kwatackelu yanguc miibong, "Ngic yogo ye Mesia mecne Dawidile fikesaweckacni."

<sup>24</sup> Inguc mibong Farisaio yenge yogo ngagelu yanguc miibong, "Aleng yebicebacaigac, yogo aleng yengele micne Belsebul, yele tapiliwa bole balu ngic-ngigac yengelacni aleng yebicebacaigac."

<sup>25</sup> Inguc mibong Yesudi ngage-ngagenginang biyac ngagelu yanguc miwec, "Himong monicti ngic-ngigac yenge ngaba ainagulu siyeckedaingtewa, himong yogo kisi kwedaicte. Nga taon me golowac monicti siyeckelu ngaba ainagudaingtewa, taon me golowac yogo gildaingte. <sup>26</sup> Aime Satang yeuctihac yebicnagudaicte, ye siyeckelu habu yaekang aime yele ngani-damong sanangne nalic mi fadaicte. Ilec na yele tapiliwa aleng mi yebicebagabac. <sup>27</sup> Nani Belsebul yele tapiliwa aleng yebicebadaba midec, ngengileng madecfocngineng yenge inguchac yele tapiliwa aleng yebicebadabong. Inguc aime ngenge madecfocnginengtihac ngengele yowa wosaelu mimoctodaingte. <sup>28</sup> Aime nani Wapongte Asuholec aleng yebicebagabacka, ibac Wapongte ngani-damongti ngengela biyac weleyec fagac.

<sup>29</sup> "Ngic monicti ngic tapiliineholec, yele macka felu woc-wiyacine nalic mi ewalilu badaicte, miyac. Ye ngic tapiliineholec yogo muti dodoxkelubac macine kwelina felu woc-wiyacine fagac, yogo nalic bayackedaicte."†

<sup>30</sup> "Inguc aime yanguc edocngebabe ngagening, monic ye nale ago miyac ye na lobenugac. Nga monicti naholec bakpaduc bole mi bacaigac, yedi nale wiyc basowaleme singsalolong kwenale bole bacaigac. <sup>31</sup> Ilec yanguc edocngebabe, ngic monic ye bikic haicine monic-monic aicaigac, ailu misulec aiyelecaigac, yele sowacne yogo nalic hegiledaicte. Nga monicti Asu misulec aicnodaicte.‡ yele sowacne nalic mi hegiledaicte, miyac. <sup>32</sup> Aime monic ye Ngicte Madecte wac milu sulelu yowa midaicte, yele sowacne nalic hegiledaicte. Nga monic ye Tili Asule wac milu sulelu yowa midaicte, yele sowacne nalic mi hegiledaicte, miyac. Yogo dameng yanguctihac gagabeleng me dameng lobewa kwesidaicte, iwa ingucfafeginowagac."

*Yoc madicne*

*Luk 6:43-45*

<sup>33</sup> "Yoc monic madicne mibong, iwacni noine madicne fikedaicte. Nga yoc sowacne mibong, iwacni noine sowacne fikedaicte. Foinac, yoc haicine monic monic yenge noinenginengti funginengineng bayegengkecaigac. <sup>34</sup> Ngenge hema gblifocene. Aime wiyc kwelenginang wakelu fagac, yogo hocne micnginengti mibong yegengkedaicte. Ngic kindololoholec yedi yowa madicne mimilesoc mi aigac. <sup>35</sup> Ngic madicne ye ngage-ngage madicne

---

**12:24:** Mat 9:34; 10:25      **12:28:** Sale 10:38; 1Yoa 3:8      **† 12:29:** Ngic monic yogo Yesu yeicnele miwec. Nga Aleng Sugucnengineng ye ngic tapiliineholec ingucne.      **12:30:** Mrk 9:40; Luk 9:50      **‡ 12:31:** Asule wac milu sulegac, yogo yanguc, ngicti Asule aibaba yogo mime Aleng Sugucnenginengte aibaba ingucne aigac. Farisaio yengi inguc miibong.      **12:31:** Hib 6:4-6      **12:33:** Mat 7:16-20      **12:34:** Mat 3:7; 15:18; Luk 3:7; 6:45

facnogac, iwacni wiyc madicne bame fikecaigac. Nga ngic kindololoholec, yedi ngage-ngage sowacne iwacni wiyc sowacne bame fikecaigac.<sup>36</sup> Na yanguc edocngebabe, ngenge yowangineng sasawa kosa-balasa micaigaing, yowangineng yogodihac wowosae damengka wosae cngebame yowa noine midaingte.<sup>37</sup> Yowagonele silicka wosaelu dondonne wacgudaicte. Ailu yowagonele silicka wosaelu umac geledaicte.”

*Pasile maainele Yesu uwacnoibong  
Mrk 8:11-12; Luk 11:29-32*

<sup>38</sup> Inguc mime Wapongte yefe-yowale wewedu ngic nga Farisaio gocne yengi yanguc miibong, “Wewedu, ga pasile maa monic edalicnubacte ainolegac.”

<sup>39</sup> Inguc mibong yedi yanguc edocebwec, “Ngic-ngigac aling yanguctihac gagaing, ngenge sowacne nga selo-boic aling ingucne ailu, pasile maa monic nganinogale uwalu gagaing. Aimebac ngenge pasile maa monic mi ngeleicne, miyac. Siduc-mimi ngic Yona, yela pasile maa fikewec, ngenge yogo sugu nganidaingte.<sup>40</sup> Yona ye deboc hadeng habackang kiwec-sic sugucnele gobe kwelina fawec, ingucne hac Ngicte Madecti himong kwelina deboc hadeng habackang fadaicte, ngenge yogo sugu nganidaingte.<sup>41</sup> Aime Niniwe taon sugucnele ngic yengi Yonale yowa ngagelu kwele-hefaliyec aiibong. Aime ngagegaing, yakumac monicti<sup>§</sup> Yona ewaligac. Ilec ailu ngic-ngigac aling yanguctihac gagaing, ngenge wowosae damengka Niniwe ngic-ngigac yengeholec fangkelu domae bongka aibabangineng wosaelu ngengele sowacne mimoctodaingte.<sup>42</sup> Aime Seba himongte ngigac-taudi Solomonte ngage-ngage-motoc banogale himong mecin sautkacnipec kweisiwec. Aime ngagegaing, yakumac monicti<sup>\*\*</sup> Solomon ewaligac. Ilec ailu ngigac-taudi wowosae damengka ngic-ngigac aling yanguctihac gagaing, ngengeholec fangke domalu aibabangineng wosaelu ngengele sowacne mimoctodaicte.

*Aleng wonongkolec hefaliyedaicte  
Luk 11:24-26*

<sup>43</sup> “Aleng wonongkolec yedi ngickacni ofelu himong misaine mikac, iwa hikelu ye mac ngiye-ngiyeine basackelu lolickelu gacaigac. Gacgu mac ngiye-ngiyeine monic mi bafuwatu,<sup>44</sup> yeuctihac yanguc migac, ‘Macne esecne ngiyelu hegileiba, iwa hatacmac hefaliyelu hikenogale ngagegabac.’ Inguc milu hikelu mac yogo nganigac. Aime mac yogo biyac pelengkelu bamickeicne. Ailu fileine mikac moc domagac. Domame aleng wonongkolec ye yogo nganilu<sup>45</sup> hatacmac hikelu aleng 7 mengocebame kwsigaing. Aleng yogo yengi ye ewalilu sowacnebenang aigaing, yenge bacebame hikelu mac iwa gagaing. Inguc aibong ngic ye molic-molic sowacne gawec, ye yogo ewalilu sowacnebenang gagac. Aime ngic-ngigac yanguctihac galu sowacne aigaing, ngengela aibaba ingucne hac fikedaicte.”

*Yesu nenggac gba focine  
Mrk 3:31-35; Luk 8:19-21*

<sup>46</sup> Yesu ye ngic-ngigac yowa edocebalu domaemewa nenggac gba focine yenge kwsilu mac lobina domalu yeholec yowa mingagec ainingte mibong

**12:38:** Mat 16:1; Luk 11:16; Yoa 6:30    **12:39:** Mat 16:4; Mrk 8:12    **12:40:** Yoa 1:17    **§ 12:41:**

Yesu ye yeicnele ngagelu “Yakumac monicti Yona ewaligac,” miwec.    **12:41:** Yoa 3:5    **\*\* 12:42:**

Yesu ye yeicnele ngagelu “Yakumac monicti Solomon ewaligac,” miwec.    **12:42:** 1Ngt 10:1-13

**12:45:** 2Pi 2:20

fewec. <sup>47</sup> Yowa lobong feme monicti ngagelu edowec, "Ngagegec, nenggac gbafocgone yenge gaholec yowa mingagec ainingte lobina domagaing."

<sup>48</sup> Inguc mime Yesudi ye edolu miwec, "**Weni yogo yengi nale nenggac gbafocne?**" <sup>49</sup> Inguc milu mic-tengtengfocene domaibong, yengela moleine sungkelu yanguc miwec, "**Ngagegaing, ngic-ngigac yago yengi nale nenggac gbafocne aigaing.** <sup>50</sup> I yangucte, ngic-ngigac Mamacne honocmengka gagac, yele angac nga ngage-ngage balaibecaigaing, yengi hocne nale nenggac-focne nga ngic hae-gbafocne aigaing."

## 13

*Wasec wicke-wickele nangeng yowa*

*Mrk 4:1-9; Luk 8:4-8*

<sup>1</sup> Hadeng iwashac Yesu ye mackacni walu lifuc mecina hikelu ngiyewec. <sup>2</sup> Ngiyeme habutowa sugucnebenangti yela hikebong, ye gombawa felu ngiyeme ngic-ngigac habutowadi lifuc mecina domaibong. <sup>3</sup> Domabong yedi nangeng yowa homacne edocebalu yanguc miwec, "**Ngagegaing, wasec wicke-wicke ngic monicti huc-wasec wickenale bolewa hikewec.** <sup>4</sup> Hikelu wasec wickeme, wasec gocne yengi walu yefewa holeibong, yogo nango yengi kwesilu nowackeibong. <sup>5</sup> Nga gocneci posa tolowa holeibong, iwa himong efecnemac fawecte, wasec yogo kwac biyac kwodulu ofeibong. <sup>6</sup> Ofebong godocngineng mi hauibongte ailu, wenacti ofelu kweme ululuwelu homaibong. <sup>7</sup> Nga wasec gocneci kpinding kwelina holeibong. Holelu kwac kwodubong kpindingti sugulelu hole-homacebawec. <sup>8</sup> Nga wasec gocneci himong guwecineholecka holelu noine madicne aiibong. Monicte hucine yogo 100, nga monicte 60, nga monicte 30, inguc aiibong. <sup>9</sup> Monic ye hedekolecti yowa yago aneng ngagedaic."

*Nangeng yowa hole-holele fungine*

*Mrk 4:10-12; Luk 8:9-10*

<sup>10</sup> Aime mic-tengteng yengi yela hikelu uwacnoibong, "Ga wenukte yowa nangengngine milu edocebacaigic?"

<sup>11</sup> Inguc uwacnobong Yesudi yowangineng bafaliyelu yanguc edocebawec, "**Honocmenge ngani-damongte ngage-ngage sangkeicne, yogo ngengi** sugu ngageningte biyac ngeleicne. Nga yenge monic mi yelewec.

<sup>12</sup> Ngic monic ngage-ngage gocne facnogac, ye ngage-ngage homacne hat-acmac lacname balu gadaite. Aime monic ye ngage-ngage mikac, yelacni ngage-ngage kUSICNE balu gagac, yogo ewalidaite.

<sup>13</sup> Yenge dongenginengti wiyac monic nganilu nalic mi ngari-motogaing. Nga hedecnginengti yowa monic ngagelu, sifu nalic mi ngage-motogaing. Ilec ailu nangeng yowa edocebacaigabac. <sup>14</sup> Aime siduc-mimi ngic Yesaiyadi yowa miwec, yogo yengela noine fikegac,

'Ngic-ngigac hedecti ngagecaigaing, yenge yogo ngagelu nalic mi ngage-motodaingte.'

Ailu dongedi nganicaigaing, yenge yogo nganilu nalic mi ngani-motodaingte.

<sup>15</sup> Ngic-ngigac aling yago yenge kwelengineng fongkecaigac. Nga hedecnginengti yowa ngageningte hedecngineng fongkecaigac. Ailu dongenginengti wiyac nganinogale kundung kwecaigac.

Yenge dongenginengti wiyc monic nganidaingkale, nga hedecnginengti ngagedaingkale ailu, ngage-ngagenginengti wiyc monic ngage-motodaingkale.

Ilec yogo yenge kweleining wenucka hefaliyeme bamadicebadaba.' (Yes 6:9-10)

**16** Aime dongedi ngani-motolu hedecti ngage-motocaigaing, ngenge kweleangackolec. **17** Foinac, Wapongte siduc-mimi ngic nga ngic aibabangineng dondonne homacnedi esecne gaibong, ngengi yenge wiyc nganicaigaing, yogo nganinogale angac ngagelu sifu mi nganiibong. Ailu ngenge yowa hedecnginengti ngagecaigaing, yenge yogo hedecti ngageningte aiyelewec, yogo inguchac mi ngageibong, yogo noine edocngebabac."

*Wasec wicke-wickele fungine  
Mrk 4:13-20; Luk 8:11-15*

**18** "Aime ngic wasec wickewec, yoglec nangeng yowale fungine mibe ngenge ngagening. **19** Wasec yefewa holeibong, yogo monicti ngani-damongte yowa hedecinedi ngagelu mi ngage-motodaicte. Ailu Kindololo fileinedi kwesilu yowa yogo wasec ingucne kweleina duweicne, yogo biyac baickeyelecaigac. Yogo wit wasecne yefewa holeibong, silic ingucne aigac. **20** Nga wasec posa tolowa holeibong, yogo monicti ngani-damongte yowa ngagelu kweleina biyac belyelu sebilelu badaicte, ye ingucne. **21** Sebileme yogodi kweleina godoc mi baicnele dameng kpisicnemac fame, Wapongte yowale ailu umac me weyebic aicnobong ye wawedaicte. **22** Nga wasec kpindingka holeibong, yogo monic ye ngani-damongte yowa ngagelu gadaicte, ye ingucne. Ye yowa ngagelu socte gagale ngageboc nga moneng-mafale lokwesac yogodi suguleu yowa yogo hole-homame noine monic mi fikedaicte. **23** Nga wasec himong guwcineholecka holeibong, yogo monic ye ngani-damongte yowa ngagelu ngage-motodaicte, ye ingucne. Ngic ingucne yelacni gocnedi noine 100 nga gocnedi 60 nga gocnedi 30, inguc bafuwadaicte."

*Ngaba-nigicti wiyc monic wickedaitce*

**24** Yesudi nangeng yowa monic holelu yanguc edocebwec, "Honocmenkte ngani-damongte yogo silicine yanguc, monicti boleina hikelu wit hucine madicne wickewec. **25** Ngic ye wickeme fame macka hikeme ngic-nigigac sasawa yenge debocka gung fayackeebongka ngic yele ngabadi kwesilu kpinding sowacne inguchac wit bole hewacina wickelu hikewec. **26** Aime wit yogo kwodu ofelu noine fikeemewa kpinding sowacne inguchac kwodulu ofewec.

**27** "Inguc aime kwelec kwekwe yengi kwesilu bole fileine yanguc edoibong, 'Sugucnenonggeng, ga bolewa wasec madicne wickeing. Aime kpinding sowacne yogo wenuwacni ofegac?'

**28** "Inguc mibong yedi yanguc edocebwec, 'Ngaba ngic monicti yogo aigac.'

"Inguc mime miibong, 'Nonge hikelu kpinding sowacne yogo fuluckelu wickedabelengte, nonge inguc ainangte ngagegeic, me?'

**29** "Inguc mibong yedi yanguc edocebwec, 'Miyac, ngenge kpinding fuluckegabeleng milu wit momochac fuluckedaingkale ailu, hegilening. **30** Wit nga kpinding yekilec momochac suguleboc noine babale dameng kwesime noine welu babale ngicti yanguc edocebadacte, "Ngenge molickelu kpinding

sowacne fuluckelu dodocebalu dacka wickebong lobedaic. Aime wit sugu bakpaduc ailu nosing-macna lobong ngiyedaic.” ”

*Mastet hucinele nangeng yowa*

*Mrk 4:30-32; Luk 13:18-19*

<sup>31</sup> Yesudi nangeng yowa monic holelu yanguc edocebawec, “Honocmenge ngani-damong yogo mastet hucine ingucne. Ngic monicti hikelu boleina yogo duwewec. <sup>32</sup> Mastet hucine, yogo wasec sasawa yengele kpisicneng-neng. Ailu ye sugulelu nosing-bolewa mendang ewalicebalu yoc bangkacie ingucne ailu domame sawawa nango yengi kwesilu mangngina yafo holelu ngiyecaigaing.”

*Nangeng yowa yiswa holelu miwec*

*Luk 13:20-21; Mrk 4:33-34*

<sup>33</sup> Aime Yesudi nangeng yowa monic holelu yanguc edocebawec, “Honocmenge ngani-damong yogo yis ingucne. Ngigac monicti flawa umacine 20 kilo balu yisholec lalickelu bame atang aiboc sugulewec.”

<sup>34</sup> Yesu ye yowa miwec, yogo nangeng yowawa sugu holelu ngicngigac habutowa edocebalu gawec, ye moc monic mi edocebalu gawec.

<sup>35</sup> Wapongte siduc-mimi ngic monicti yowa yanguc miwec, “Na nangeng yowa migabac, yogo micnacni wanale aigac. Aime himong fi-keemewa wiyac sangke-sangke fawec, yogolec yowa midacte.” (*Mige 78:2*)

Yowa yogo noine fikenale Yesudi nangeng yowawa sugu holelu yowa edocebalu gawec.

*Kpindingte nangeng yowale fungine*

<sup>36</sup> Aime ye ngic-ngigac habutowa locebalu macka feme mic-tengtengfocine yenge yela felu miibong, “Ga nangeng yowawa kpinding sowacne bolewa ofewec migic, yogolec fungine miyengka yegengkeme ngagenang.”

<sup>37</sup> Inguc mibong yedi ameine bafaliyelu yanguc edocebawec, “Ngicte Madecti wasec madicne wickelu gagac. <sup>38</sup> Aime nosing-bole yogo himontowa himong falegac. Nga hucine madicne yogo Wapongte ngani-damongte adu-madecfocine. Nga kpinding sowacne yogo Kindololo fileinele adu-madecfocine. <sup>39</sup> Aime ngaba-ngicti wasec bolewa wickewec, yogo Aleng Sugucnengineng. Nga noine babale dameng, yogo dameng moto-motoine, yogolec dameng. Bole-ngic yogo angelo. <sup>40</sup> Yengi kpinding sowacne fuluckelu dacka wickebong lobedaicte, dameng moto-motoina ingucne fikedaicte. <sup>41</sup> Dameng iwa Ngicte Madecti angelofocine salecebame yengi yele ngani-damongkacni okac ingucne kwopocebadaingte. I yangucte, bikicka wawecaigaing, ailu yefe-yowa wewe ngic, yogo sasawa kpaducebayackelu <sup>42</sup> dac sugucna wicebabong haudaingte. Iwa haulu ngic-ngigac yenge hiyalu micngineng hisalangkelu gadaingte. <sup>43</sup> Aime ngic-ngigac donne yenge Mamaenginengte ngani-damongka wenac-dongeine ingucne angolelo gadaingte. Monic ye hedeckolecti yowa yago aneng ngagedaic.”

*Moneng nga kwanang yekele nangeng yowa*

<sup>44</sup> Yesudi hatacmac taockelu yanguc miwec, “Honocmenge ngani-damong yogo moneng-mafa ingucne. Ngic yengi moneng-mafa bolewa sangkeibong. Sangkebong ngic monicti iwa hikelu yogo bafuwalu hatacmac balu iwhahac

sangkewec. Sangkelu belic-belicka hikelu wiycine sasawa salelu moneng balu hikelu bole yogo fuli bawec.

<sup>45</sup> “Ailu hatacmac yanguc, honocmenge ngani-damong yogo kwanang madicne ingucne. Monicti kwanang basackelu gawec. <sup>46</sup> Basackegacgu kwanang monic fuline sugucnebenang nganiwec. Nganilu hike woc-wiyacine sasawa salelu moneng bawec. Balu kwesi yogodi kwanang yogo fuli bawec.

### *Nangeng yowa ufucka holelu miwec*

<sup>47</sup> “Na hatacmac mibe ngagening. Honocmenge ngani-damong yogo ufc ingucne. Ngic yenge ufc lifucka wickebong haulu kiwec-sic silicine haicinc monic-moninc bacebawec. <sup>48</sup> Wickebong lifucte sicti ufc wakelu ofowalu mecin fame fuluckebong ofewec. Ofeme ngic yenge sic nonoine yogo wosaelu duwacka loibong. Nga mi nonoine, yogo wickeibong. <sup>49</sup> Dameng moto-motoine iwa pasi ingucne hac fikedaicte. Angelo yengi gacgu ngic-nigic aling bikickolec gagaing, yenge inguchac ngic-nigic dondonne yenge hewackacni baicebalu <sup>50</sup> dac sugucna wicebabong haudaingte. Haulu yenge iwa hiyalu micngineng hisalangkelu gadaingte.”

<sup>51</sup> Yesudi inguc milu uwayelewec, “Ngenge yowa yogo sasawa ngage-motogaing, me?”

Inguc mime miibong, “Oc, ngaegabeleng.”

<sup>52</sup> Inguc mibong yanguc edocebawec, “Ilec Wapongte yefe-yowale wedewu ngic monic ye honocmenge ngani-damongte mic-tengteng aigac, ye hocne mac monicte fileine aigac. Yedi luwangkacni woc-wiyac madicne esecne nga gbolicne balu wacaigac.”

### *Yesu lobe-yowa aicnoibong*

*Mrk 6:1-6; Luk 4:16-30*

<sup>53</sup> Yesu ye nangeng yowa yogo milu mac-himong yogo hegilelu <sup>54</sup> yeicne mac-himongningina hikewec. Hikelu kpakpaduc macka felu yowa edocebalu weduyeleme ngic-nigic ngyiebong, yenge mimedec ailu yanguc miibong, “Ngic yago ye ngage-ngage-motoc nga pasi damuineholec yogo wenuwacni baweckacni balu gagac? <sup>55</sup> Ye mac-baba ngic yele madec hocne. Nga nenggacine wacine Maria ailu ye Yakobos nga Yosefe nga Saimon ailu Yude yengele haengineng. <sup>56</sup> Ailu sengfocene sasawa yenge nongilengkolec gagaing. Aime ye ngage-ngage yogo wenuwacni bawec?” <sup>57</sup> Yenge inguc milu lobe-yowa aicnolu ye hegileibong.

Inguc aibong Yesudi yanguc edocebawec, “Ngic-nigic yenge Wapongte siduc-mimi ngic yele alang bacaigaing. Aime macfocene nga golowacfocene, yengi sugu yele alang mi bacaigaing.” <sup>58</sup> Aime ngic-nigic yenge mi ngagesingkeibongte ailu, yedi iwa pasi damuineholec homacne mi bawec.

## 14

### *Yoane misa-lowac weibong*

*Mrk 6:14-29; Luk 3:19-20; 9:7-9*

<sup>1</sup> Dameng iwa Yesule siducti ngictau Herode, yele hedecka haume <sup>2</sup> ye ngagelu bole-ngicfocene edocebawec, “Yoane misa-lowacti homackacni gboldiye fangkelu gagac, ye Yesu. Ilec ailu tapili facnogacte pasi damuineholec balu gagac.”

<sup>3-4</sup> I yangucte, Herodedi Yesule siduc mi ngagelu esecne gbaine Filipite ngigac Herodias ye hise balu gawec. Aibaba yoglec ailu Yoanedi Herode yanguc edowec, "Ga ngigac yogo balu yeholec gagic, yogo yefe monic mi fagac." Inguc mime Herodedi Yoane balu hefalu muc-macka lolu <sup>5</sup> wehomanogale ngagesiwec. Aime ngic-ngigac yenge ye Wapongte siduc-mimi ngic, inguc ngagebongte ailu hangocebawec.

<sup>6</sup> Aime Herodele fike-fike dameng kwesime, ngic-ngigac yenge yela habu balu ngyieebongka Herodias aduinedi yengele hewacka fangkelu gee wewec. Weme Herodedi ngani-angac aicnolu <sup>7</sup> Wapongte wacka yowa sanangkenale yanguc mipangkewec, aduine ye wiyac monicte aicname yogo nalic lacnodaict. <sup>8</sup> Mipangkeme adu ye nenggacinedi ngage-ngage lacname Herode yanguc edowec, "Ga Yoane misa-lowacte hodoc welockebong pelewa lolu baweletu neledamec."\* <sup>9</sup> Inguc mime ngictaudi ngagelu kwele-umac ngagewec. Ailu ngic ngyieibong, yengele haicka yowa biyac mime sanangkewec. Ilec ailu aduinele yowa ngagewec, Yoanele hodoc yogo lacnonale mipangkelu <sup>10</sup> hudu-baba ngic monic saleme lelu Yoane mucmacka ngyiewec, ye ubeine welockewec. <sup>11</sup> Welockelu hodocine pelewa lolu baweletu aduine lacname adudi nenggacinela balewec. <sup>12</sup> Aime Yoane mic-tengtengfocine yenge hikelu kponggbongine bahikelu longkeibong. Longkeibong motome hikelu Yesu siduc yogo edoibong.

### *Nosing gumecebawec*

*Mrk 6:31-44; Luk 9:10-17; Yoa 6:1-13*

<sup>13</sup> Edobong Yesu ye siduc yogo ngagelu mac-himong yogo hegilelu gombawa felu mic-tengtengfocine yengeholec mac-himong monic ngic mikacka, iwa yeicnac ganale hikewec. Aime ngic-ngigac habutowadi yenge yogo biyac ngagelu taonngineng hegilelu hige-yefe balaibelu hikeibong. <sup>14</sup> Hikebong Yesu ye gombawacni walu ngic-ngigac habutowa inguc nganicebalu kweleine sowaleme ngic-ngigac hucnginengkolec bamadicebawec.

<sup>15</sup> Bamadicebalu gacgume mac aweleme mic-tengtengfocine yengi yela lelu yanguc miibong, "Himong yago ngic mikac, aime wenac haume mac biyac awelegac. Ilec ailu ga ngic-ngigac habutowa yago salecebang mac-alng gocna hikening. Yenge hikelu yengung nosing fuli banoc aining."

<sup>16</sup> Inguc mibong yedi yanguc edocebawec, "**Yenge hike-hikelesoc mi aigaing, ngenge ngengung nosing yelebong noning.**"

<sup>17</sup> Inguc mime yengi miibong, "Nonge bret 5 nga misa-sic yaeckang sugu balu gagabeleng."

<sup>18</sup> Inguc mibong yedi yanguc miwec, "**Ngenge nosing yogo nala baweling.**" <sup>19</sup> Yesu ye inguc milu ngic-ngigac habutowa kpindingka wangiyeningte edocebawec. Edocebalu bret 5 ailu misa-sic yaeckang, yogo balu dongeine hilame honocmengka feme Wapong kwele-madic micnowec. Micnolu bret yogo bauckelu mic-tengtengfocine yeleme yengi balu ngic-ngigac habutowa yelebong noibong. <sup>20</sup> Aime yenge sasawadi nogebec ailu nosing tofaine notiwa aibong ngyiewec, yogo kpaduckebong haulu damba 12 wakewec. <sup>21</sup> Ngic-ngigac nosing noibong, yogo yengelacni ngic yengele dzalengineng yogo 5 taosen ngama ingucne. Nga ngigac adu-madec noibong, yengele dzalengineng yogo monic mi wafeibong.

---

**14:3-4:** Dep 18:16; 20:21; Luk 13:19-20    **14:5:** Mat 21:26    \* **14:8:** Herodias ye Yoane homanale ngagewete ailu hodocine nganilu ngagewec, Yoane ye homawec.    **14:19:** Mat 15:35-39; Mrk 8:6-10

*Lifuc feina hikewec  
Mrk 6:45-52; Yoa 6:16-21*

<sup>22</sup> Damba wakeme Yesu ye mic-tengtengfocine salecebame yenge gombawa felu misa lifuc nebocina molickelu hikeibong. Hikebong ye yeicnac galu ngic-ngigac habutowa locebame hikeyackeibong. <sup>23</sup> Hikeebongka ye milockenale kupicka feme mac deboleme yeicnac ngiyewec. <sup>24</sup> Ngiyeme yenge gombawa biyac lifuc hewacina hikeebongka gbelong sugucnedi yenge hikedaingtewa, yefe kwesilu dibongti gomba welu bafangkeme fec-wac aiwec.

<sup>25</sup> Inguc aime mac biyac saenogale aiyemewa Yesu ye lifuc feina edela edela mic-tengtengfocine yengela hikewec. <sup>26</sup> Ye lifuc feina edela edela hikeme mic-tengtengfocine yenge nganilu yanguc miibong, “Ilucti welegac.” Inguc milu hangocebame aukweibong.

<sup>27</sup> Aukwebong Yesudi ngagelu iwashac yanguc edocebawec, “**Nani wele-gabac.**<sup>†</sup> Ngenge ngageboc mikac sanangne domadaing. Ngenge mi hangoc-ngebana.”

*Pita misa feina hikewec*

<sup>28</sup> Inguc mime Pitadi hefaliyelu miwec, “Sugucne, gageicne welegic inguc-nehar, na misa feina edela edela gala fubele minelec.”

<sup>29</sup> Inguc mime Yesudi miwec, “**Ga welec.**”

Inguc mime Pita ye gombawacni walu misa feina edela edela Yesula lewec. <sup>30</sup> Leemewa dibong gbelong sugucne weme nganilu hangockewec. Inguc aime misawa haunogale ailu hangockeme aukwelu miwec, “Sugucne, ga baficnunong.”

<sup>31</sup> Inguc mime Yesu ye moleine biyac sungkelu Pitale mole balu bafangkelu yanguc edowec, “**Ga ngage-ngagesinggone kpisicnemac, ga omale ngageboc aigic?**” Inguc micnowec.

<sup>32</sup> Micnome yeke gombawa feebocka iwashac gbelong miyac aiwec. <sup>33</sup> Aime gombawa ngiyeibong, yenge Yesu afeelu yanguc miibong, “Foinac, ga Wapongte Madec.”

*Ngic-ngigac hucnginengkolec  
Mrk 6:53-56*

<sup>34</sup> Aime yenge lifuc falockelu Genesaret himongka hike sulumeibong. <sup>35</sup> Iwa hikebong himong yogolec ngic yengi Yesu biyac ngani-motolu yowa lobong hikeyackeme yenge ngic-ngigac hucnginengkolec yela bacebalu kwesiibong. <sup>36</sup> Kwesilu hucnginengkolec yenge ngakpi daleinele muc susucine sugu oiyaningte dogbac ailu micnoibong. Aime oiyaibong, yenge sasawadi madickeibong.

## 15

*Oma yowa balaibenoga?  
Mrk 7:1-23*

<sup>1</sup> Aime Farisaio nga Wapongte yefe-yowale wewedu ngic yenge Yerusalemkocni Yesula kwesilu miibong, <sup>2</sup> “Mic-tengtengfocgonge yenge molengineng mi suwelu nosing moc banoc aicaigaing. Aime yenge omale ngesa-ngambofocnonggeng yengele yefe-yowa yogo hegilecaigaing?”

<sup>14:23:</sup> Luk 6:12; 9:28    <sup>14:26:</sup> Luk 24:37    <sup>† 14:27:</sup> Grik yowawa yogolec fungine “Na gagabachac.” Yogo Wapongte wac monic, Wapongte angelodi Moses edowec.    <sup>14:31:</sup> Mat 8:26; Mrk 4:39    <sup>14:36:</sup> Mat 9:20-21

<sup>3</sup> Inguc mibong Yesudi yanguc miwec, “Ngenge omale ngengileng yefeyowangineng balaibelu Wapongte ung-yowa hegilecaigaing?” <sup>4</sup> Wapongti yanguc migac,

‘Ga nenggac-mamackecgone alang bayetedamec.’ <sup>(Wah 20:12; Yef 5:16)</sup>  
Aime ‘Monic ye nenggacine me mamacinele sawec-yowa midaictewa, ye webong homadaic.’ <sup>(Wah 21:17; Dep 20:9)</sup>

<sup>5</sup> Ngengebac yanguc micaigaing, ‘Monicti nenggacine me mamacine edolu yanguc midaicte, “Na wiyc gocne gelenogale ngagelu migabac, yogo biyac Wapongte ibu lacnobele miiba.”’ <sup>6</sup> Ye inguc milu nenggac-mamackecine alang mi bayetedaicte. Inguc ailu ngenge yefe-yowangineng balaibepong Wapongte yowa yogo someckeyackegac. <sup>7</sup> Kwesac-ngic, ngengele hocne Asudi siduc-mimi ngic Yesaiya edome siduc-yowa noinebenang yanguc kwelengkewec,

<sup>8</sup> Ngic-ngigac habu yago yenge micnginengti sugu alang bacnucaigaing. Nga kwelenginengtibac na hegilecnuaigaing. <sup>9</sup> Aime yenge ngic-ngigac weduyelecaigaing, yogo ngicte yefe-yowa sugu edocebalu weduyelecaigaing. Ailu moc afenubong nganibe noine mikac aicaigac.’” <sup>(Yes 29:13)</sup>

<sup>10</sup> Aime Yesudi ngic-ngigac habu wacebame kwesibong yanguc edocebawec, “Ngenge hedec kwelu ngage-motoning. <sup>11</sup> Nosing nga wiyc ingucne yogodi ngic kweleina haume wonongkolec nalic mi aidaicte, miyac. Nga wiyc kwelenonggangkocni micka yefe ofecaigac, yogodi hocne ngic kweleina bame wonongkolec aidaicte.”

<sup>12</sup> Aime mic-tengtengfocene yengi yela kwesilu edolu miibong, “Farisaio yenge yowa yogo ngagelu yowa heesicne migac, ga yogo ngagegic, me?”

<sup>13</sup> Inguc edobong yedi Farisaio yengele yanguc miwec, “Honocmeng Mamacnedi woc-wiyc monic mi duwewec, yogo godocine fuluckedaicte.

<sup>14</sup> Ilec ngenge hegilecebadaing. Yenge yengung donge-pisic ailu donge-pisic yengele feicne gagaing. Aime donge-pisic monicti donge-pisic agoine mengockeme yekilec momochac longka haudabiyecte.”

<sup>15</sup> Mime Pitadi yanguc uwacnowec, “Yowa nangengngine holelu micic ilec fungine miyengka ngagenang.”

<sup>16</sup> Inguc mime Yesudi yanguc milu edowec, “Ngenge ngage-ngage-motocngineng mikac ingucne gagaing, me? <sup>17</sup> Nosing me wiyc monic lobinaci gobe kwelina haulu hamacka haucaigac. Ngenge yogo mi ngage-motogaing, me? <sup>18</sup> Nga ngic kwelewasni ofecaigac, yodibac ngic bame wonongkolec aicaigac. <sup>19</sup> Kwelewasni ngage-ngage yangucti ofecaigac. Ngage-ngage wasacne, nga ngic-wewe, ailu ngawe-ngigac bahegilec, nga selo-boic aibaba. Ailu hise aibaba, nga kwesac-yowawa loceba-loceba, ailu misulec aibaba. <sup>20</sup> Aibaba yogodi ngic-ngigac basowaleme wonongkolec aicaigaing. Aime ngenge molengineng mi suwelu nosing moc nocaigaing, aibaba yogodi ngic kwelewa wonongkolec nalic mi aidaicte.”

### *Kenan ngigac monic*

*Mrk 7:24-30*

<sup>21</sup> Yesu ye Genesaret himong hegilelu Tair nga Saidon himong, iwa hikewec. <sup>22</sup> Hikeemewa iwacni Kenan yengele alingkacni\* ngigac monicti kwesilu Yesu wacke-wasic aicnolu micnowec, “Sugucne, Dawidile fike-saweckacni, ga nale kwelegone sowalena, alengti adune basowalecaigac.”

<sup>23</sup> Mime Yesudi yele yowa ameine monic mi bafaliyecnome mic-tengtengfocine yengi kwesilu kpafengkelu yanguc miibong, "Ngigac ye lobenonggang homacnehac wackegacte saleengka hikena."

<sup>24</sup> Inguc micnobong yedi yowa yanguc bafaliyewec, "Na Israel ngic-ngigac yengelaci lama sangkeicne gagaing, yengele aihu salecnume waiba."

<sup>25</sup> Aime ngigac yogo kwesilu Yesu ketadi holecnolu afeelu miwec, "Sugucne, ga baficnunong."

<sup>26</sup> Inguc mime yanguc edowec, "Adu-madec yengele nosing ewalicebalu hoda yengela wickedabelengte,<sup>†</sup> yogo mi madickedaicte."

<sup>27</sup> Inguc mime ngigac yedi sanangnehac miwec, "Sugucnene, yogo nalic migic. Aime hoda yengebac filefocngineng yengi nosing nobong kapucine tebo bageina wacaigac, yogo nocaigaing."

<sup>28</sup> Inguc mime Yesudi bafaliyelu ngigac yogo yanguc edowec, "Ngigac, ngage-ngagesinggone yogo feicnebenang. Ngage-ngagegona ngagesigic, yogo hocne fikegelena." Inguc mime dameng iwahac aduine madickewec.

#### *Ngic-ngigac homacne bamadicebawec*

<sup>29</sup> Aime Yesu ye mac-himong yogo hegilelu, Galili lifuc mecina hikelu kupicka felu iwa ngiyewec. <sup>30</sup> Ngiyeme ngic-ngigac habutowa suguc-nebenangti kwesiibong. Kwesilu huckolec ngic-ngigac, yenge hige-sowac nga pulingine, aihu donge-pisic nga yowangineng mikac, aihu ngic-ngigac homacne yela ingucnehac bacebalu kwesiibong. Kwesilu Yesule emewa locebabong yedi bamadicebawec. <sup>31</sup> Bamadicebame ngic-ngigac yowangineng mikac, yenge yowa miibong. Nga pulingine yenge madickeibong. Aihu hige-sowac yenge lec-welec aiibong. Nga donge-pisic yenge donge hilaibong. Inguc aibong ngic-ngigac yenge yogo nganilu kwatackelu Israel yengele Wapong waccine bafeibong.

#### *Ngic 4 taosen nosing gumecebaibong* *Mrk 8:1-10*

<sup>32</sup> Aime Yesudi mic-tengtengfocine wacebame welebong yanguc edoce-bawec, "Ngic-ngigac habutowa yago yenge nosingngineng mikac hadeng habackang biyac naholec gaebongka yengele kwelene sowalegac. Yenge yefe hikegacgu nosingte homalu donge lolic aiyeledaickale, nalic mi salec-badacte."

<sup>33</sup> Inguc mime mic-tengtengfocine yengi bafaliyelu yanguc edoibong, "Nongileng mac yago himong kisiwa misaine mikacka gagabeleng. Ilec nosing wenuwacni baebengka ngic-ngigac habutowa sugucne yago yelebeng nobong gebecebadaicte?"

<sup>34</sup> Inguc mibong Yesudi yanguc uwayelewec, "Ngenge bret edomeng balu gagaing?"

Uwayeleme miibong, "Bret 7 nga misa-sic gogoc kpisticne gocne."

<sup>35</sup> Mibong Yesudi ngic-ngigac habu himongka walu ngiyeningte edoce-bawec. <sup>36</sup> Edocebame walu ngiyebong ye bret nga misa-sic balu Wapong kwele-madic micnolu bauckewec. Aihu mic-tengtengfocine yeleme yengi botoc balu ngic-ngigac habu yelebong noibong. <sup>37</sup> Yenge yogo nobong gebecebame, nosing tofaine ngiyewec, yogo balu kpaduckebong damba 7 aiwec. <sup>38</sup> Aime nosing noibong, ngic yogo yengele dzalengineng 4 taosen. Nga ngigac adu-madec noibong yengele dzalengineng yogo mi wafeibong.

**39** Aime Yesu ye ngic-ngigac habutowa salecebame hikebong ye gombawa felu Magadan himongka hikewec.

## 16

### *Pasile Yesu uwacnoibong*

*Mrk 8:11-13; Luk 12:54-56*

**1** Farisaio nga Sadyusi yenge Yesula hikelu yeicne tapiliine lokwesacka loningte ngageibong. Inguc ngagelu yedi pasile maa monic honocmengkacni bame fikeme edalicebanale uwacnoibong.

**2** Uwacnobong Yesudi yowangineng bafaliyelu yanguc edocebawec, “**Mac aweleme ngenge yanguc micaigaing, ‘Mac-himong sasacne aigacte saeme dameng madicne aidaitc.’** **3** Aime ubiyacte fangkelu micaigaing, ‘**Mac-himong sasacne ailu kundung kwegacte mac-gbelong kwesidaicte.**’ Ngenge sawawa maaine fikecaigac, yogo madicne hocne wosaecaigaing. Aime dameng yagolecte maa fikecaigac ngenge yogo nganilu sifu mi ngagemotocaigaing. **4** Ngic-ngigac aling yanguctihac gagaing, ngenge sowacne nga selo-boic aling ingucne ailu, ngenge pasile maa monic nganinogale uwalu gagaing. Aimebac ngenge pasile maa monic mi ngeleinie, miyac. Yonala pasile maa fikewec, ngenge yogo sugu nganidaingte.” Inguc milu hegilecebalu hikewec.

### *Farisaio yengele yis*

*Mrk 8:14-21*

**5** Yesu mic-tengtengfocene yengeholec lifuc nebocina hikebong. Hikenogale bret ngicebame moc hikebong. **6** Hike sulumelu Yesudi yanguc edocebawec, “**Ngenge Farisaio nga Sadyusi yengele yisle ngani-motolu gadabiyeng.**”

**7** Mime mic-tengtengfocene yenge yenguntihac mingagec ailu yanguc miibong, “Nongileng bret mi balu kwsigabeleng. Ilec ailu inguc migac.”

**8** Inguc mibong ye kwelenginang biyac ngage-motolu yanguc miwec, “**Ngic ngenge ngage-ngagesingngineng kpisicnemac, ngenge omale ngengileng bret mi balu kwsigaigte mingagec aigaing?**” **9** Ngenge ngage-ngagemotocngineng mikac. Bret 5 sugudi ngic 5 taosen andoebame damba edomeng umengkebong wakewec, ngenge yogo ngigecngebagac, me? **10** Ailu bret 7 sugudi ngic 4 taosen andoebame damba edomeng umengkebong wakewec, pasi yogo ingucne ngagesidaing. **11** Omale ngenge mi ngagemotogaing? Na bretbenangte mi migabac. Ngenge Farisaio nga Sadyusi yengele yis, yoglec ngani-motolu ganingte migabac.” **12** Inguc edocebame yenge bretle yis ilec mi miwec, yogo biyac ngage-motoibong. Yenge Farisaio nga Sadyusi yengele wewedu-yowa, yoglec ngani-motolu ganingte miwec.

### *Yesule fungine mime yegengkewec*

*Mrk 8:27-30; Luk 9:18-21*

**13** Yesu ye Filipai himongka Sesarea taon bangkalelu mic-tengtengfocene yanguc uwayelewec, “**Ngic-ngigac yenge Ngicte Madec yele ma micaigaing?**”

**14** Inguc mime yengi miibong, “Gocne yengi Yoane misa-lowac micaigaing. Nga gocne yengi Wapongte siduc-mimi ngic wacine Elaiya micaigaing. Nga gocne yengibac Yeremiya me Wapongte siduc-mimi ngic monic esecne wackelu micaigaing.”

**15** Inguc mibong yanguc miwec, “Aime ngenge ngengung nale ma mi-caigaing?”

**16** Uwayeleme Saimon Pitadi miwec, “Ga Mesia, Wapong gagaineholec yele Madec.”

**17** Inguc mime Yesudi yanguc edowec, “Saimon, Yonale madec, yowa yogo ngic mimiawaci mi migic. Ilec ga kwele-angackolec gadamec. Mamacne honocmengka gagac, yedi hocne yogo bayegengkelu edocguwecte migic.

**18** Aime na inguchac edocgube ngagenong, ga Pita. Aime posa yagolec feiwa\* na habune locebabe basuguledaict. Aime yogo sanangnehac domame Wangec-mac yogolec tapiliinedi nalic mi bawadaict.

**19** “Na honocmengte ngani-damongte tapili yogo ki ingucne gelebe gagi himongka wiyc sasawa hefedamecte, yogo honocmengka inguchac hefe-icne fadaict. Nga ga wiyc himongka lukedamecte, yogo honocmengka inguchac lukedaict.” **20** Inguc milu mic-tengtengfocine yenge Yesu ye yeicne Mesia, yogolec ngic monic mi edocebaningte mimacebawec.

### *Homackacni gboliyelu fangkedaict*

*Mrk 8:31-9:1; Luk 9:22-27*

**21** Dameng iwa molickelu Yesudi mic-tengtengfocine yanguc edocebawec, “Na Yerusalem hikebe Yuda ngic-nigigac yengele damongfocngineng nga depec-baba ngic micne ailu Wapongte yefe-yowale wewedu ngic yengi doicka locnulu wehomacnudaingte. Aime hadeng habackang aiyemewa hatacmac gboliyelu fangkedaict.” Aibaba inguc fikenale miwec.

**22** Inguc edocebame Pitadi Yesu mecina mengocke lelu yekilackac domalu mikpatalac aicnolu miwec, “Sugucne, miyac! Wapongti baficgume wiyc yogo gala nalic mi fikedaict.”

**23** Inguc mime Yesudi hefaliyelu Pita yanguc edowec, “Satang, ga lobena wele-hikec. Ga okac ingucne kwopocnuengka wawecnunale ngagelu migic. Ga wiyc ngagesigic, yogo Wapontacni miyac, yogo ngic ngage-ngage aigac.”

### *Yesu balaibenogale yefe*

**24** Inguc milu mic-tengtengfocine yanguc edocebawec, “Monic ye na balaibecnunogale ngagegacka, ye yeicne soc-kweleinele angac bawalu umacte malicpongine bafangke tengkelu balaibecnudaic. **25** Monic ye yeicne gagaine sebilenale ngagelu boleine badaict, ye gagaine yogo sangkecndaict. Nga monic ye nale ailu gagaine hegiledaict, yebac gagaine bafuwardaict. **26** Ilec monicti himongtowa yagolec wiyc sasawa bafuwanale ailu gagaine wickeme sangkedaict, wiyc yogo yengi ngic yogo nalic bafickedaingte, me? Yogo miyac! Me monicti gagaine hatacmac bafuwanale wenuc lacname bafuwanodaict? Yefe monic mi fagac. **27** Aime Ngicte Madecti Mamactacni tapili nga hibi-angocineholecti angelofocine yengeholec kwesilu ngic-nigigac sasawa aibabangineng aicaigaing, yogolec silicina ameine baduyeledaict. **28** Foinac, ngic-nigigac yago domagaing, ngengelacni gocne mi homaebongkahac, Ngicte Madec ye ngani-damongineholec kwesime dongenginengti nganidaingte, yogo noine edocngebagabac.”

**16:16:** Yoa 6:69    **16:17:** Gal 1:15-16    \* **16:18:** Pita wac yogo Grik yowawa fungine yogo posa kpiscne monic. Yesu ye yeicnele ngagelu “posa yagolec” inguc miwec. “Posa yagolec” yogo Grik yowawa fungine yogo posa lapane sugucne.    **16:18:** Yoa 1:42; Efs 2:20    **16:19:** Mat 18:18; Yoa 20:23    **16:24:** Mat 10:38; Luk 14:27    **16:25:** Mat 10:39; Luk 17:33; Yoa 12:25    **16:26:** Mat 4:8-9    **16:27:** Mat 25:31; Mige 62:12; Ynn 24:12; Rom 2:6; Miye 22:12

# 17

*Ngicte Madecte ngani-damong  
Mrk 9:2-13; Luk 9:28-36*

<sup>1</sup> Hadeng 6 motome Yesudi Pita nga Yakobos ailu gbaine Yoane mengocbame tiki dalicne monicka felu yengilangkac gaibong. <sup>2</sup> Iwa galu dongingenengti nganiyebongka Yesule socti hefaliyelu angocenebenang aiwec. Aime haic-mesuine yogo wenac-dongeine ingucne aiwec. Nga ngakpi-kpolucine yogo kwalacne ailu angoc fikecaigac, ingucne hac aiwec. <sup>3</sup> Hei, inguc aime iwahac Moses nga Elaiya yeke fikelu yeholec mingagec aiboc nganicepaibong.

<sup>4</sup> Aime Pitadi Yesu yanguc edowec, “Sugucne, nongileng yagowa gabeng madickegacte ga ngageengka nalic aime fale habackang banang. Gale monic naga Mosesle monic ailu Elaiyale monic.”

<sup>5</sup> Hei, Pitadi inguc edome iwahac kaguwa monic angoceneholecti walu somecebawec. Somecebame kaguwa kwelinacni yowa-malac monic yanguc wackelu miwec, “Yogo nale Madec, kwelenedi yele angac ngagegabac. Na ye ngani-angac aicnogabac. Ngenge yele yowa ngagedaing!”

<sup>6</sup> Aime mic-tengteng yenge yogo ngagelu hangocebame himongka wafalu haic-mesungineng sangkeibong. <sup>7</sup> Inguc aibong Yesudi yengela lelu yucebalu yanguc edocebawec, “**Ngenge fangkening, hangoc mi aining.**” <sup>8</sup> Inguc mime yenge dongengeneng hilalu ngic monic mi nganiibong, yenge Yesu yeicnac domame nganiibong.

<sup>9</sup> Aime tikiwacni waluhac Yesudi mimacebalu yanguc miwec, “**Ngenge wiyc nganigaing, yoglec siduc ngic-ngigac monic mi edocebadaing. Gacgu Ngicte Madec homackacni gboliyelu fangkedaicte, dameng yogowabac midaing.**”

<sup>10</sup> Inguc mime mic-tengtengfocine yengi yanguc uwacnoibong, “Wapongte yefe-yowale wewedu ngic yenge wenukte Elaiyadi molickelu kwesime Mesia lobeina kwesinale micaigaing?”

<sup>11</sup> Inguc mibong yedi yanguc edocebawec, “**Elaiyadi molicke kwesilu wiyc sasawa bame madickedaicte hocne.**” <sup>12</sup> Na yanguc edocngebabe ngagening, Elaiya ye biyachac kwesime yenge mi ngani-motolu yengileng angac balaibelu aibaba sowacne haicine monic-monic aicnolu gaibong. Ailu yenge **Ngicte Madec inguchac doicka lobong doic ngagedaicte.**” <sup>13</sup> Inguc mime mic-tengteng yenge biyac ngage-motoibong, Yogo Yoane misa-lowacte miwec.

*Madec alengkolec bamadickewec  
Mrk 9:14-29; Luk 9:37-42*

<sup>14</sup> Aime yenge tikiwacni walu habu sugucne yengela hike sulumebong ngic monicti Yesula kwesilu ketadi holecnolu yanguc miwec, <sup>15</sup> “Sugucne, ga madecnele kwelegone sowalena. Ye kwele-sifuc damengngine kwesime doic sugucne ngagelu dameng homacne dacka nga misawa haucaigac. <sup>16</sup> Aime madecne mic-tengtengfocone yengela bahikebe yengi ye bamadickenogale ngagebong kpungkeme hegilegabiyyeng.”

<sup>17</sup> Inguc mime Yesudi bafaliyelu yanguc edowec, “**Dameng yagolec ngic-ngigac aling yago, ngenge ngage-ngagesingngineng mikacbenang, ailu ngenge aibabangineng kosa-balasaine.** Na dameng dalicne ngage-ngagesing mikac ngic-ngigac ngengeholec hatacmac ganogale takicnugac. Ngenge

**madec yogo bawelening.**" <sup>18</sup> Inguc mime bawelebong Yesudi aleng kpatalacnome ye madec yogo hegilelu hikewec. Hikeme dameng iwahac madec yogo madickewec.

<sup>19</sup> Inguc aime mic-tengtengfocine yenge Yesula kwesilu yengilangkac niyelu yanguc uwacnoibong, "Nonge wenukte aleng yogo yebiyenangte aibibiyegebeleng?"

<sup>20</sup> Uwacnobong Yesudi bafaliyelu yanguc edocebawec, "Foinac, ngenge ngage-*ngagesingngineng kpisicnemac fagacte kpungkelu hegilegabieng*. Ngenge ngage-*ngagesingngineng kpisicne mastet hucine\** ingucne fangeledecka midec, ngenge kupic yago nalic micnodaingte, 'Kupic, ga yagowacni fangkelu edi hiked.' Inguc mibong ye hikedaitce. Ailu ngenge wiyac monicte nalic mi kauc badaingte, yogo noine edocngebagabac. <sup>21</sup> [Aleng ingucne yebicebanogale nosing-sawe galu mimilocti sugu yebiyedaingte.]†"

*Yesudi yeicne homanale hatacmac miwec*

*Mrk 9:30-32; Luk 9:43-45*

<sup>22</sup> Yesu nga mic-tengtengfocine yenge yengilangkac Galili prowinswa kpaduckelu gaebongka yedi yanguc edocebawec, "Monicti Ngicte Madec balu ngic yengele molewa lodaicte, yogolec dameng bangkalegac. <sup>23</sup> Lome yengi ye balu wehomadaingte. Wehomabong hadeng habackang aiyemewa homackacni hatacmac gboliyelu fangkedaicte." Inguc mime yenge yogolec kwele-umac sugucne ngageibong.

*Ibu-macte takes*

<sup>24</sup> Aime Yesu nga mic-tengtengfocine yenge Kapeneam taonka hike sulumebong, Wapongte Ibu-mac yogolec takes-baba ngic yengi kwesilu Pita uwacnoibong, "Ngengele wewedu ye Ibu-macte takes locaigac, me?"

<sup>25</sup> Inguc mibong Pitadi miwec, "Oc, locaigac."

Inguc milu macka felu yowa mi mime Yesudi yanguc uwacnowec, "Simon, ga wenuc ngagegic, himongne himongne ngictaufocngineng, yenge takes malacni bacaigaing? Yenge yengileng ngic-*ngigacfocngineng*, yengelacni bacaigaing, me ngic-*ngigac gocne himong monic damongkelu gagaing*, yengelacni bacaigaing?"

<sup>26</sup> Uwacnome miwec, "Yenge ngic-*ngigac gocne himong monic baibong, yengelacni bacaigaing*."

Inguc mime Yesudi yanguc miwec, "Ilec ailu yengileng ngic-*ngigacfocngineng yenge takes mi lolu moc gadaingte*. <sup>27</sup> Aime Ibu-mac yogo nale. Ilec ailu Ibu-macte takes mi lonogale ngagegabac. Aime yenge ngagesowac mi ainingte ngagegabac. Ilec ga lifuc mecina hikelu misa-sic babale hawic monic wickedamec. Wickelu misa-sic molickelu fuluckedamecete, yogolec mic bauckelu moneng monic bafuwadamecete. Bafuwalu moneng yogo balu nokilec wacka takes-baba ngic yeledamec."

## 18

*Madi sugucne aigac?*

*Mrk 9:33-37; Luk 9:46-48*

**17:19:** Mat 10:1

\* **17:20:** Mastet hucine yogo homong hucine ingucne kpisicnebenang. <sup>17:20:</sup>

Mat 21:21; Mrk 11:23; Luk 17:6; 1Kor 13:2 † **17:21:** Hibi esecne Mataio kwelengkewec, yogo nganilu iwacni kwelengkebong kwelengkebong ofewec, yengelacni gocne 17:21 iwa mi fagac. Ngic-*ngigac yenge hibi kwelengkeicne yogo wosaelu nganibong Mataiodi mi kwelengkewec mecne*. <sup>17:22:</sup>

Mat 16:21 **17:24:** Wah 30:13; 38:26

<sup>1</sup> Dameng iwa mic-tengteng yenge Yesula kwesilu uwacnoibong, "Honocmenge ngani-damong, yogolec alingka madi feicne gagac?"

<sup>2</sup> Inguc uwacnobong Yesudi madec hakic monic wackewec. Wackeme weleme ye hewacnginang lome domame <sup>3</sup> yanguc miwec, "Foinac, ngenge kwelengineng mi bafaliye daingte ailu adu-madec yago yenge ingucne mi aidaingtewa, honocmenge ngani-damongka nalic mi fedaingte, yogo noine edocngebabac. <sup>4</sup> Ilec ailu monic ye bawacnagulu madec yangucne yele silic gadaicte, ye honocmenge ngani-damongka sugucne gadaicte. <sup>5</sup> Nga monic ye madec yangucne nale wacka hefolecnugac."

### *Lokwesacti ngage-ngage basowalecaigac*

*Mrk 9:33-37; Luk 9:46-48*

<sup>6</sup> "Entacka gocne yengi ngic monic balu balinga sugucne ubeec-nolu kiwec gbolongna wickebong haudaitewa, yele umacine efeckedaicte. Aime adu-madec kpisicne monicti na ngagesingnulu game, ngic yogodi adu-madec ingucne aicname bikic bafuwadaitewa, Waponti ye ameine baducnodaicte, yogo umactowaineholec. <sup>7</sup> Mee, ngenge medecngebadaic. Himongtowa himong yagolec ngic-ngigac, okac ingucne kwopcngebame bikicka wawecaigaing. Ngic monic ye agoine aicname ngage-ngagesingine wagac, mee ye medeckedaic. <sup>8</sup> Ga higegone me molegone monicti aigeleme bikic bafuwadamectewa, ga yogo helockelu wickeengka hikedaic. Ga hige-molegone sasawa bucblach gacgu dac-sanang moto-motoine mikac, iwa wicgubong haudameckale, hige-sowac me hige-mole-sofong galu gaga-sanangka feengka madickedaicte. <sup>9</sup> Me ga dongegone monicti sowacne aigeleme bikic bafuwadamectewa, ga dongegone baickelu wickeengka hikedaic. Ga dongegone yaeckanghac ngiyeboc dac-sanangka wicgubong haudameckale, dongegone nebocinedi sugu ngiyeme galu gaga-sanangka feengka madickedaicte.

<sup>10</sup> "Ngenge adu-madec kpisicne, yengelacni monic kweledi mi wickedaiing. Na yanguc edocngebabe ngagening, angelo yenge honocmenga galu adu-madec nganicebaicaigaing, yenge damengsoc Mamaac honocmenga gagac, yele haicka gacaigaing. <sup>11</sup> [Aime Ngicte Madec ye ngic-ngigac sangkeicne, yenge bikickacni kpaducebalu bacebanale wawec.]<sup>\*</sup>

### *Lama sangkeicnele nangeng yowa*

*Luk 15:3-7*

<sup>12</sup> "Ngic monic ye lama focine 100 bacebalu game, iwacni monic sangkeme ye wenuc aidaicte? Ye lama focine 99 kupicka hegilecebame domabong hikelu sangkeicne, yogo hocne basackedaicte. <sup>13</sup> Basackegacgu bafuwalu beliyedaicte. Foinac, 99 sasawadi mi sangkeibong, yengele efecnemac beliyedaicte. Nga monic sangkeicne, yelebac beliyebenangkedaicte, yogo noine edocngebabac. <sup>14</sup> Aime Mamaacngineng honocmenga gagac, ye ingucne hac adu-madec kpisicne ingucne, yengelacni monicti mi sangkenale ngagelu gagac."

### *Sowacne bamadickenoga*

**18:1:** Luk 22:24    **18:3:** Mat 19:14; Mrk 10:15; Luk 18:17    **18:5:** Mat 10:40; Luk 10:16; Yoa

13:20    **18:8:** Mat 5:29-30    **18:10:** Hib 1:14    \* **18:11:** Hibi esecne Mataio kwelengkewec, yogo nganilu iwacni kwelengkewec kwelengkewec ofewec, yengelacni gocne 18:11 iwa mi fagac. Ngic-ngigac yenge hibi yogo kwelengkeicne yogo wosaelu nganibong Mataiodi mi kwelengkewec mecene.    **18:11:** Luk 19:10

15 "Ngic hae-gbagone monicti gala bikic bafuwadaictewa, ga hikelu yeholec ngekilackac ngiyelu sowacne hewacnginac fagac, yogo mifuwacn-odamec. Aime ye yowagone ngagedaictewa, hatacmac gale ago aidaicte.

16 Nga ye yowagone mi ngagedaictewa, ga ngic moniyang me yaeckang bacepaengka hatac kjesilu ngengilangkac umac yogo mibong madickenale mingagec aidabiyeng. Inguc ailu ngic yaeckang me habackangti yowa sasawa mibong sanangkedaicte.

17 "Aime ye yowangineng mi ngagedaictewa, ngenge hikelu Yesule habu edocebadaing. Edocebabong ye habu yengele yowa inguchac hegiledaictewa, ibac ngagedaing, ngic yogo ye Wapong mi ngagegac ailu takes-baba ngic, yenge ingucne aidaic.

18 "Foinac, ngenge himongka wiyc sasawa hefedaingte, yogo honocmengka inguchac hefeicne fadaicte. Nga ngenge himongka wiyc lukey-ackedaingte, yogo honocmengka inguchac lukedaingte, yogo noine edocngebagabac. 19-20 I yangucte, himong yagowa ngic-ngigac yaeckang me habackangti nale wacka kpaduckelu ngijedaingtewa, na hewacnginang gadacte. Illec ngengelacni yaeckangti kwele-moniyang ailu wiyc monicti me monicti uwadabiyectewa, Mamacne honocmengka gagac, ye ngageyetelu wiyc yogo yetedaicte, yogo noine edocngebagabac."

### *Sowacne hegilenoga*

21 Aime Pitadi Yesulu welelu yanguc uwacnowec, "Sugucne, ngic haegbanedi nala bikic bafuwadaictewa, dameng edomeng sowacneine hegile-nobele ngagegic? Alecine 7 andoine aigac, me?"

22 Inguc mime Yesudu bafaliyu yanguc edowec, "Alecine 7 miyac, alecine 70 domalu fegac, yogolec migabac.

23 "Aime honocmengte ngani-damong yogo ngictau monic ngic homacne yengele sugucnengineng, ye ingucne gawec. Aime yedi kwelec kwekwe ngic yengi yela monengneng ameine baduningte damengnengineng lowec.

24 Lome kwesibong amengineng wowosae bole bawec. Molickelu ngic monic ye talant moneng sugucne ameine 10 taosen, yogolecsoc facnowec, ngic yogo yela baweleibong.<sup>†</sup> 25 Aime ye ameine yogo badunale ngageme kpungkeme, sugucnedi mime ngic yeicne nga ngigac adu-madefcocene yenge ngic monicta salecebame ngic yedi fuli bacebadaicte. Ailu wiyc acine sasawa momoc saleyackelu, yogodi moneng balu ameine yogo badume miyac ainale miwec.

26 "Inguc mime kwelec kwekwe ngic ye yogo ngagelu sugucneinele haicka ketadi holecnolu miwec, 'Sugucnene, ga nale kwelegone sowaleme wangcne gaengka amegone badugeledacte.'<sup>‡</sup> 27 Inguc mime sugucnedi yele kweleine sowaleme ameine hegilewec. Ye umacine baickelu saleme hikewec.

28 "Aime kwelec kwekwe ngic ye lobina hauwec. Haulubac kwelec kwekwe ngic agoine monic yela tofa moneng<sup>‡</sup> 100 facnowec, ye bafuwawec. Bafuwalu ye hobalu ubeine bauckenale balu miwec, 'Nale tofa gala fagac, yogo ameine biyac badunelec.'

29 "Inguc mime kwelec kwekwe ngic agoinedi yogo ngagelu yele haicka ketadi holecnolu dogbac aicnolu yanguc miwec, 'Folo mi ainelec. Ga

**18:15:** Luk 17:3; Gal 6:1    **18:16:** Yef 19:15; Yoa 8:17    **18:18:** Mat 16:19; Yoa 20:23    **18:19-20:** Mrk 11:24; Yoa 15:7    **18:22:** Luk 17:4    <sup>†</sup> **18:24:** Grik yowawa moneng yogo wacine talant. Talant moneng moniyang yogo hifa 15te bole-fuli.    <sup>‡</sup> **18:28:** Denarius yogo Roma yengele moneng monicti wacine. Yesule damengka denarius moniyang yogo hadeng moniyangte fuli ailu gawec.

nale kwelegone sowaleme wangec gaengka tofagone yogo ameine lobewa badugeledacte.'

<sup>30</sup> "Inguc mime agoinedi yele yowale takickeme tofainele ameine yogo baduyackelubac wanale balu muc-macka lome ngiyewec. <sup>31</sup> Ngiyeme kwelec kwekwe ngic agofocngineng gocne yenge aibaba yogo nganilu kwe-lengineng homacne sowaleme ngagebong nalic mi aiwec. Aime yenge hikelu aibaba fikewec, yogo sasawa sugucnengineng edoibong.

<sup>32</sup> "Edobong sugucnenginengti kwelec kwekwe ngic yogo micname weleme edolu miwec, 'Ga kwelec kwekwe ngic sowacnebenang. Ga nani dogbac aigelebe ketadi holeneleengka tofagone sasawa hegileiba. <sup>33</sup> Ailu na gale kwelene sowaleme tofagone hegileiba, ga ingucne hac kwelec kwekwe ngic agogonele kwelegone inguchac sowaleme tofagonele ameine hegiledengtesoc.' <sup>34</sup> Inguc milu sugucne nedidi aalic ngagelu ngaba aicnolu mucmac damong yengele molewa lowec. Lome kwelec kwekwe ngic yogo ye tofaine yogo sasawa ameine baduyackelubac wanale micnowec.

<sup>35</sup> "Aime ngenge sasawadi ngic hae-gbafoengineng yengele sowacne kwe-lenginengtibenang mi hegiledaingtewa, Mamacne honocmengka gagac, yedi silicine ingucne hac ngenge aingeledaict."

## 19

*Ngawe-ngigac gocnedi hegilecnaguicaigaing*

*Mrk 10:1-12; Luk 16:18*

<sup>1</sup> Yesu ye yowa yogo miyackeme motome Galili prowins hegilelu Yudeya himongka Yodan misa nebocina hikewec. <sup>2</sup> Hikeme ngic-*ngigac* habu sugucnebenangti ye balaibepong yedi ngic-*ngigac* huenginengkolec iwa hamadicebewec.

<sup>3</sup> Aime Farisaio yenge yela kwesilu kwesackeningte yanguc uwacnoibong, "Ngic monic ye ngigacine wiyc kpisicnele hegilenale, yogolec yefe fagac, me?"\*

<sup>4</sup> Inguc mibong Yesudi bafaliyelu yanguc edocebawec, "Mime Fike-fike fileinedi molickelu mime

'Ngic nga ngigac fikeiboc, inguc bafuwacepawec.' *(Fike 1:27; 5:2)*

Ngenge yogo wafe-*ngagec* aicaigaing. <sup>5</sup> Ye bafuwacepalu yanguc miwec, 'Ilec ailu ngic ye nenggac-mamackecine hegilecepalu ngigacineholec wetackelu yeholec soc moniyang aidabiyecte.' *(Fike 2:24)*

<sup>6</sup> Inguc aidabiyectewa, yeke hatacmac yaeckang mi aigaic, yeke soc moniyang aigaic. Ilec ailu Waponti wetacepawec, yogo ngicti mi wetockedai."

<sup>7</sup> Inguc mime yanguc miibong, "Aime wenukte Mosesdi ung-yowa yanguc nolewec? Ngic monicti ngigac hegilenogale hibi kwelengkelu ngigac lac nome ngigac ye ngic yogo hegilelu hikedai."

<sup>8</sup> Inguc mibong Yesudi yanguc miwec, "Ngenge ngic kweleengineng fongke-icne. Ilec ailu Mosesdi ngigacfoengineng hegilecebaningte aka mi lowec. Aime molickelu ofeicne iwa yefe ingucne monic mi fawec. <sup>9</sup> Na yanguc

**18:34:** Mat 5:25-26    **18:35:** Mat 6:15; Mrk 11:25; Efs 4:32; Kol 3:13    \* **19:3:** Yuda ngic-*ngigac* gocne yenge ngagebong ngigac ye selo-boic aibaba aiwec, yogo sugu ye nalic ngigac hegiledaict. Nga Yuda ngic-*ngigac* gocne yenge ngagebong ngigac ye wiyc kpisicnele aiwec, yogo nalic ngigac hegiledaict. Ilec ailu Farisaio yenge uuwa yogo lokwesacka loibong.    **19:5:** Efs 5:31    **19:7:** Yef 24:1-4; Mat 5:31

**edocngebabe, ngic monicti ngigacine selo-boic aibaba mi aiyemewa ye moc hegilelu ngigac monic badaicte, ngic yogo ye selo-boic aibaba aidaicte.”**

<sup>10</sup> Inguc mime ngagelu mic-tengtengfocene yengi yanguc miibong, “Ilec ailu ngawe-ngigac mu ailu adu-madechac domalu momoc mi ganoga, yogodibac madickedaicte.”

<sup>11</sup> Inguc mibong Yesudi yanguc edocebawec, “**Ngengele yowa ngic gocne mi balaibedaingte. Waponti ngic inguc baficebame yengi sugu ngawenigic mi aidaingte.** <sup>12</sup> Ngic gocne yenge nenggac kwelewacni hufing fikeibong. Nga gocne yenge ngicti aibaba aiyelebong hufing aiibong. Nga ngic gocne yenge honocmenkte ngani-damongte ailu hufing ingucne gacaigainga. Ngic monic ye yowa yogo ngagelu banogale nalic ye yowa yogo badaic.”

*Adu-madec mimi-madic milu edocebawec  
Mrk 10:13-16; Luk 18:15-17*

<sup>13</sup> Aime ngic-ngigac yenge adu-madecfocngineng kpisicne Yesula bacebalu hikebong, yedi moledi adu-madec feinginang lolu milockenale ngageibong. Inguc aibong mic-tengtengfocene yengi ngelengkelu edocebaibong.

<sup>14</sup> Aime Yesudi yanguc miwec, “**Adu-madec kpisicne yenge nala nalic kwesining. Ngenge aka mi holeyelening. Honocmenkte ngani-damong yogo adu-madec kpisicne yangucne yengele.**” <sup>15</sup> Inguc milu moleine feinginang lolu mimi-madic milu edocebame motome ye mac-himong yogo hegilelu monicka hikewec.

*Ngic moneng-mafatowaineholec  
Mrk 10:17-31; Luk 18:18-30*

<sup>16</sup> Aime ngic monicti Yesula kwesilu miwec, “Wewedu, na aibaba madicne wenuc ailu gaga-sanang badacte?”

<sup>17</sup> Inguc mime yedi yanguc miwec, “**Ga omale aibaba madicnele uwanelegic? Wapong moniyangti sugu madicne gagac. Aime ga gaga-sanangka fenogale milu Wapongte ung-yowa balaibedamec.**”

<sup>18</sup> Inguc mime yanguc miwec, “**Ung-yowa weni yogo balaibenogale** **magic?**”

Inguc mime Yesudi yanguc miwec,

“**Ga ngic-ngigac mi wehomacebadamec. Ailu selo-boic aibaba mi aidamec. Nga hise mi badamec. Ailu micka lolo mi aidamec.** <sup>19</sup> **Ga nenggac-mamackecgone alang bayetedamec.**” *(Wah 20:12-16; Yef 5:16-20)*

**‘Ailu gageicne aigelecaigac, silicine ingucne hac ngic-ngigac gale emewa gagaing, yengele kwelegonedi ago aiyelelu angac ngageyelelu gadamec.’”** *(Dep 19:18)*

<sup>20</sup> Inguc mime soc-gboli madec yedi miwec, “Na yogo sasawa balaibecaigabac. Aime oma wiyacka kpungkegabac?”

<sup>21</sup> Mime Yesudi yanguc edowec, “**Ga ngic dondonnebenang ganogale ngagegicka ingucne, yanguc ainong, ga hikelu wiyacgone sasawa saleyack-elu moneng balu ngic-ngigac waweweine gagaing, yogo yeledamec.** Inguc aiyengka wiyac madicne honocmengka fikegeledaicte. Aime welelu na balaibecnudamec.”

<sup>22</sup> Inguc mime soc-gboli madec yogo ye moneng nga woc-wiyacine bocycac facnowecte, yowa yogo ngagelu kweleine umaleme hikewec.

*Honocmenkte ngani-damong nga himongte moneng-mafa*

<sup>23</sup> Hikeme Yesudi mic-tengtengfocine yanguc edocebwec, "Foinac, monic moneng nga woc-wiyaccineholec ye honocmengte ngani-damong kwelina fenogale aidaicte, yogo boleine sugucnehas, yogo noine edocngebagabac. <sup>24</sup> Ailu hatacmac edocngebabe, kameldi bungic yefina fedaiete, yogo boleine sugucne. Nga moneng nga woc-wiyackolec yedi Wapongte ngani-damongka fenogale aidaicte, yogodibac bolewtaine sugucnehas."

<sup>25</sup> Inguc mime mic-tengteng yenge yowa yogo ngagelu kwatackelu medecebame yanguc miibong, "Inguc aime madi nalic wasecne aidaicte?"

<sup>26</sup> Inguc mibong Yesudi dongeine yengela hilalu yanguc miwec, "Ngicngigac yengileng aibabanginengte ailu yogowa aibibiyelu hegiledaingte. Nga Wapontibac wiycasasawa yogo nalic aidaicte."

<sup>27</sup> Inguc mime Pitadi yanguc miwec, "Ngagegic, nonge woc-wiyacnonggeng sasawa hegilelu ga balaibecgulu gagabeleng. Ilec nonge oma wiyc badabelengte?"

<sup>28</sup> Inguc mime Yesudi yanguc edocebwec, "Foinac, gacgu wiyc sasawa gbolicne fikedaiete, dameng iwa Ngicte Madec ye honocmengte tapili nga hibi-angocineholecti ngictaule ngiye-ngiyea ngiyedaicte. Aime ngic balabecnucaigaing, ngenge inguchac ngictaule ngiye-ngiye 12 iwa ngiyelu Israel yengele ngambofocngineng 12 fagaing, yengele aibabangineng wosaelu mimoctodaingte, yogo noine edocngebabac. <sup>29</sup> Aime ngic-ngigac nale wacte ailu macfocngineng me ngic hae-gbafovngineng me sengfocngineng me nenggac-mamacfocngineng me adu-madecfocngineng me himongngi-neng hegileibong. Wiyc yoglec ameine ngenge sasawadi 100 hatacmac badaingte. Ailu Suguclnedi gaga-sanang yeledaicte. <sup>30</sup> Ngic molic-molic gacaigaing, yengelacni homacnedi lobeine aidaingte. Nga lobeine gacaigaing, yengelacni homacnedi molic-molic aidaingte."

## 20

### *Waing bole-babale ngic*

<sup>1</sup> "Honocmenkte ngani-damong yogo ngic monic mac-himongngineholec, silicinc yoglecsoc. Ye 6 kilok ubiyakte hikelu waing bolewa bole baningte ngic bacebwec. <sup>2</sup> Bacebame bole-ngic yenge hadeng moniyangte moneng moniyang baningte mingagec ailu kwele-moniyang aibong. Aime salecebame bolewa hikeibong.

<sup>3</sup> "Aime 9 kilok aiyemewa waing bolele fileinedi ngic gocne maket sobengka moc domabong nganicebalu <sup>4</sup> yanguc edocebwec, 'Ngenge inguchac nale waing bolewa hikelu bole babong, bolele moneng yoglec silicina negedacte.' <sup>5</sup> Inguc mime yenge waing bolewa hikeibong.

"Aime ye 12 kilok nga 3 kilok aiyemewa aibaba ihac aiwec. <sup>6</sup> Aime 5 kilok aime ye hatacmac hikelu ngic gocne inguchac moc domabong bafuwace-baluyanguc edocebwec, 'Ngenge omale moc domabong mac awelenogale aigac?'

<sup>7</sup> "Inguc mime yanguc miibong, 'Monicti bole-yowa monic mi nolegac.'

"Inguc mibong yanguc edocebwec, 'Ngenge inguchac hikelu nale waing bolewa bole badaing.'

<sup>8</sup> "Mac aweleme bole fileinedi bole-damong yanguc edowec, 'Ga bole-madec wacebaengka welebong bolele fuli yelenong. Ailu ngic lobe kwe-sigaing, yenge molickelu yeledamec, hikegacgu molic-molic kwsigaing yengela motodaicte.'

<sup>9</sup> "Inguc mime bole-damongti ngic 5 kilok aiyemewa kwesiibong, yenge molickelu hadeng moniyangte moneng moniyang, inguc yelewec. <sup>10</sup> Yeleme ngic molickelu kwesiibong yengi yanguc ngageibong, 'Ye moneng sugucnehat felu noledaite,' inguc ngageibong. Aime bole-damongti molic-molic ngic moneng yelewec, silicine ingucnehat ngic lobe kwesiibong, yogo yelewec. <sup>11</sup> Yeleme yenge moneng yogo silicine nganilu ngagebong nalic mi aime, waing hole fileine <sup>12</sup> yanguc edoibong, 'Ngic yago yenge lobebenang kwestilu mac aweleme bole bagaing. Nga nongibac ubiyactebenang kwestilu doic-bole umacineholec wenacka domalu balu gabeng mac awelegac. Aime ga yengeholec momochac moneng silicine moniyang nolegic.'

<sup>13</sup> "Inguc mibong yedi yengelacni monic yanguc edowec, 'Agone, na sowacne monic mi bafuwagabac. Ngagegic, nokilec molickelu moneng moniyang yoglecsoc mipangkelu kwele-moniyang aigabelec. <sup>14</sup> Ga ilec monenggone balu hikenong. Aime na angacnedi bole-madec lobe kwsigaing, yenge fuli sockahac yelenogale ngagegabac. <sup>15</sup> Aime na aibaba madicne aibe, yoglec hasowac aigic, me?' Naneicne monengti inguc me inguc ainogale ngagelu, yogo nalic aidachte.'

<sup>16</sup> "Silicine ingucnehat lobe yengi molic-molic aidaingte. Nga molic-molic yengi lobeine aidaingte."

*Yesudi homanogaleedocebame alecine habackang aiwec  
Mrk 10:32-34; Luk 18:31-33*

<sup>17</sup> Yesu nga mic-tengtengfocene 12 yenge Yerusalem fenogale hikelu yefewa yengilangkac mengoceba-lelu yanguc edocebawec, <sup>18</sup> "Ngagegaing, nongileng Yerusalem hikegabeleng. Hikelu fenoga iwa ngic yengi Ngicte Madec balu depec-baba ngic micne nga Wapongte yefe-yowale wewedu ngic, yengele molewa lodaingte. Lobong yengi ye homanale mimoctodaingte. <sup>19</sup> Mimoctobong ye Israel yengele alingkacni miyac, yengele molewa lodaingte. Lobong yengi ye yowa kwekwe aicnolu muc-hududi welu malicpongka webong homadaicte. Aime hadeng habackang aiyemewa homackacni hatacmac gboliyelu fangkedaicte."

*Honocmenge ngyiye-ngiye  
Mrk 10:35-45*

<sup>20</sup> Aime Sebedi madeckecine yeke nenggacnginecti bacepame Yesula kwestilu. Kwestilu nenggacnginecti Yesu ketadi holecnolu miwec, "Na wiyc monicte nalic uwageledakte, me?"

<sup>21</sup> Inguc mime, Yesudi miwec, "**Ga oma wiyacte aigelegac?**"

Mime yanguc miwec, "Madeckecne yago yeke ngani-damonggona monicti folegonia nga monicti kanagona ngyedabiyecte. Yoglec milocgugabacte aihomayetedamec."

<sup>22</sup> Inguc mime Yesudi yanguc miwec, "**Ngenge wiyac uwagaing, yoglec fungine mi ngage-motogaing.** Aime na doicte kwenoc kap iwa nonogale aigabac, ngeke yogo momoc monicte migabiyc, me?"

Mime yeki miiboc, "Oc, nalic nodabelecte."

<sup>23</sup> Yeke inguc miboc Yesudi yanguc edocepwec, "Na doicte kwenoc kap iwa nodacte, ngeke ihac nodabiyecte. Aimebac madi folena me kanana ngyedabiecte, yoglec noinebac nani nalic mi mimoctodacte. Mamacnedi mac ngyiye-ngiye yogo ngic weni yogo yekele biyachac bamockewec, yeki sugu iwa ngyedabiyecte."

### *Micnedi kwelec ganoga*

<sup>24</sup> Aime mic-tengtengfocine 10 yenge yowa yogo ngagelu, ngic hae-gba yekele kwele-dac ngageyeteibong. <sup>25</sup> Ngagebong Yesudi mic-tengtengfocine 12 wacebame lebong yanguc edocebaawec, “Israel yengele alingkacni miyac, yengele micnefocngineng yenge ngic-ngigac yengele ngagebong wawaine aicaigac. Ailu yengileng ngagebong feicne aigac. Aime sugucnefocngineng yenge tapili fayelegacte ngic-ngigacfocngineng yenge yowangineng bal-aibecaigaing, ngenge yogo ngagegaing. <sup>26-28</sup> Aime aibaba ingucne ngengele hewacka monic mi fikedaic, miyac. Ngic-ngigac yengi Ngipte Madec bafickening mi wawec, miyac. Yebac yenge baficebalu ngic-ngigac homacne yengele ailu gagaine hegilelu fuli bacebanale wawec. Ingucne hac ngengelacni monicti feicne ganogale ngagelu, ye ngengele hewacka mole-baficngineng gadaic. Aime ngengele hewackacni monicti molic-molic ainogale aicname, ye sasawa ngengele kwelec kwekwe gadaic.”

### *Donge-pisic bamadicepawec*

*Mrk 10:46-52; Luk 18:35-43*

<sup>29</sup> Yesu nga mic-tengtengfocine yenge Yeriko taon hegilelu hikebong, ngic-nigic habu sugucnebenangti balaibecebaibong. <sup>30</sup> Hei, yefe mecinia ngic-donge-pisic yaeckangti ngiyeiboc. Ngiyeboc ngic-nigic yengi miibong, “Yesu kwesilu hikegac.”

Inguc mibong yeke yogo ngagelu aukwelu yanguc miiboc, “Sugucne, Dawidile fikesaweckacni, ga nokele kwelegone sowalena.”

<sup>31</sup> Inguc wackeboc ngic-nigic habutowa yengi yeke waickelu ngiyenictie kpatalayeteibong. Aime yeke hatacmac sanangne hac wackeboc, “Sugucne, Dawidile fikesaweckacni, ga nokele kwelegone sowalena.”

<sup>32</sup> Wackeboc Yesudi domalu wacepalu yanguc miwec, “**Ngeke nani oma wiyc aingetebele ngagegabiye?**”

<sup>33</sup> Mime yeki yanguc miiboc, “Sugucne, noke dongenonggac hilanacte ngagegabec.”

<sup>34</sup> Inguc miboc Yesu ye kweleine sowaleme moledi dongenginec bauwame yeke iwashac dongenginec hilalu ye balaibeiboc.

## 21

### *Donggi feina ngyiwewec*

*Mrk 11:11; Luk 19:28-40; Yoa 12:12-19*

<sup>1</sup> Yesu nga mic-tengtengfocine yenge hikcgu Yerusalem bangkalelu Betfage mac-himongka Oliwa kupic ngyiwewec, iwa hike sulumeibong. Ailu Yesudi mic-tengtengkecine yaekang yanguc milu salecepawec, <sup>2</sup> “**Ngeke dondonne hikelu mac-alung yefe molic-molicka ngyegac, iwa donggi monic biyachac witickeicne nganidabiyecte.** Ye madecineholec witickeicne domagac. Ngeke hikelu donggi yogo bafuwalu mucine lukelu nala balu kwesinic.

<sup>3</sup> Aime ngeke inguc aiyebocka monicti nganicngepalu uwanganetedaictewa, ngeke yanguc edodabiyec, ‘Sugucnedi donggi yekeholec bole banogale migac.’ Inguc miboc ye donggi nenggac-madec hegilecepame ngekeholec kwesidabiyecte.”

<sup>4</sup> Siduc-mimi ngicti yowa monic yanguc miwec, yogo noine ainale inguc fikewec, yedi yowa yanguc miwec,

**5** “Ga Sion adu-madecfocine yanguc edocebac, ‘Nganining, ngictaungineng welegac. Ye donggi welegac, ye donggi madecinele feiwa ngiyegac ailu ye wocene mikac ingucne welegac.’” *(Sek 9.9)*

**6** Aime mic-tengteng yeke hikelu Yesudi edocepwec, yogo hocne aiiboc. **7** Inguc ailu donggi madecineholec bacepalu kjesi ngakpinginec dalicne hemoctolu donggi nenggac-madec yekele feinginac lumackeiboc. Lumackeboc Yesu ye yogolec feiwa ngiyewec. **8** Ngiyeme ngic-ngigac habutowa domaibong, yenge ngakpingineng dalicne hemoctolu yefewa lumackeibong. Nga gocne yenge yoc mangngine hekengngineholec welockelu yefewa lumackeibong. **9** Aime ngic-ngigac habutowadi molickelu hikeibong nga lobeina balaibeibong, yengi aukwelu yanguc miibong,

“Asec, Dawidile fikesaweckacni, Ngic Sugucnele wacka welegac, ye mimi-madicineholec.” *(Mige 118:26)*

Sawawa wilini wocene feicne mitengkegaing, asec.”

**10** Yesu ye Yerusalem feme taonka ngic-ngigac sasawa yenge kwatackelu lec-welec ailu yanguc miibong, “Yogo madi?”

**11** Inguc mibong ngic-ngigac habutowa yengi edocebalu yanguc miibong, “Yogo Yesu, siduc-mimi ngic hocne ye Galili prowins iwa Nasaret taon fagac iwacni.”

*Lanac-ganac ailu gabong yebicebawec  
Mrk 11:15-19; Luk 19:45-48; Yoa 2:13-22*

**12** Aime Yesu ye Wapongte Ibu-macte oda kwelina fewec. Felu ngic wiyc salelu gaibong, yenge yogowacni yebicebawec. Ye ngic monengngineng lanac-ganac aiibong, yengele tebo bafaliywec. Ailu tudiling nango saleibong, yengele mac ngiye-ngiye bafaliyelu **13** yanguc edocebawec, “**Yowa yanguc kwelengkeicne fagac,**

‘Nale Ibu-mac yagodi mimilocte mac, wocene inguc wackenoga.’” *(Yes 56:7)*

Aime ngengibac yogo bafaliyebong,

‘Hise-baba ngic yengele sangke-sangke mac aigac.’” *(Yer 7:11)*

**14** Aime Ibu-macte oda sugucne kwelina ngic donge-pisic ailu hige-sowac yenge yela kwsibong yedi bamadicebawec. **15** Ye pasi tapiliineholec inguc bawec aime adu-madec yenge Ibu-mac kwelina wackelu yanguc miibong, “Asec, Dawidile fikesaweckacni.”

Inguc wackebong depec-baba ngic micne nga Wapongte yefe-yowale wewedu ngic yenge yogo nganilu aalic ngagelu **16** Yesula lelu yanguc miibong, “Yenge yowa migaiing, yogo ngagegec, me?”

Inguc mibong yedi yanguc miwec, “**Ngagegabac, ailu ngenge yowa yogo hocne wafe-ngagec mi aicaigaing, me?** Yowa yanguc kwelengkeicne fagac, ‘**Ga adu-madec kpiscine nga kogoc amuckacni gagaing bole-yowa yeleng yengi gale wac sugucne mitengkedaingte.**’” *(Mige 8:2)*

**17** Inguc milu yenge hegilecebalu taon hegilelu Betani himongka hikelu debocka iwa gawec.

*Fik yoc yowa edowec  
Mrk 11:12-14; 11:20-24*

**18** Aime Yesu ye ubiyakte Yerusalem taonka hikenale hefaliye hikelu nosingte homalu **19** yefe mecina donge hilalu fik yoc monic nganiwec. Nganilu ngageme noineholec ingucne aime fungina lelu nganime hekengngine sugu aime, yoc yogo yanguc edowec, “**Yoc, ga noine hatacmac mi aidamec.**” Inguc mime fik yoc iwashac homanale ululuwewec.

<sup>20</sup> Ululuweme mic-tengtengfocine yengi yogo nganilu kwatackelu uwac-nobong, "Fik yoc yogo wenuc ailu biyacbenang ululuwegac?"

<sup>21</sup> Inguc milu uwacnobong Yesudi yanguc edocebawec, "Foinac, ngenge ngage-ngagesingnginengkolec galu ngageboc mi aidaingtewa, yocka pasi bagabac, pasi yogo nalic badaingte, yogo noine edocngebabac. Ailu yogo sugu miyac, ngenge kuplic yagolec inguchac yanguc nalic midaingte, 'Kupic, ga baickelu geuctihac kiwecka haunong.' Ngenge inguc edobong, kuplic ye inguc hocne aidaicte. <sup>22</sup> Ailu ngenge wiyac monicte ngagesingkelu mimilocnginang lolu uwadaingte, ngenge yogo sasawa badaingte."

### *Yesule bole-hibi*

*Mrk 11:27-33; Luk 20:1-8*

<sup>23</sup> Yesu ye inguc milu taonka hikelu Ibu-macka felu wewedu bole bawec. Bame depec-baba ngic micnefocngineng nga Yuda ngic-ngigac yengele damongfocngineng, yengi yela kwesilu yanguc uwacnoibong, "Ga oma tapiliwa bole yogo bagamec? Ailu madi bole-yowa tapiliineholec yogo gelewec?"

<sup>24</sup> Inguc uwacnobong yedi yowangineng bafaliyelu yanguc edocebawec, "Na yowa monic uwangelebe ameine edocnudaingtewa, na bole-yowa tapiliineholecte fungine ingucnehac edocngebadacte. <sup>25</sup> Yoanedi misalowac bole balu gawec, bole-yowa tapiliineholec yogo wenuwacni, yogo honocmengkacni me ngickacni?"

Inguc mime yenge yengilangkac mingagec ailu yanguc miibong, "Nongileng wenuc midabelengte? 'Yogo honocmengkacni' inguc midabelengtewa, ye yanguc uwanoledaictie, 'Inguc ngagelubac ngenge omale ye mi ngagesingkeibong?'" <sup>26</sup> Me 'ngickacni,' inguc midabelengtewa, ngic-ngigac sasawa yenge Yoane ye Wapongte siduc-mimi ngic noine, inguc ngagegaing, yogo minogale yengele hangocnubadaic."

<sup>27</sup> Ilec yengi bafaliyelu Yesu yanguc edoibong, "Yogo mi ngagegabeleng."

Inguc mibong Yesudi yanguc edocebawec, "Inguc migainte, na inguchac male bole-yowa tapiliineholec bole balu gagabac, yogo nalic mi edocngebadacte."

### *Madec yaeckangte nangeng yowa*

<sup>28</sup> Milu taockelu depec-baba ngic micnefocngineng nga Yuda ngic-ngigac micnefocngineng yowa yanguc milu edocebawec, "Ngagegaing, ngic monic ye madeckecine yekeholec gaibong. Aime ye molic-molic madecinela hikelu yanguc edowec, 'Madecne, ga yakumac waing bolewa hikelu bole badamec.'

<sup>29</sup> "Inguc edome madecinedi bafaliyelu yanguc miwec, 'Na takicnugac,' inguc miwec. Ailu hatacmac kweleine hefaliyeme bolewa hikewec.

<sup>30</sup> "Aime mamac ye hikelu madecine kpisicne ye inguchac edome madecine kpisicnedi miwec, 'Mamac, na nalic hikedacte.' Inguc milu gacgu kpaoma ailu bolewa monic mi hikewec.

<sup>31</sup> "Ilec ngenge wenuc ngagegaing, madec yekelacni madi mamacinele angac balaibelu boleine bawec?"

Micnengnengti inguc uwayelete miibong, "Molic-molic madecine yedi."

Mibong Yesudi yanguc edocebawec, "Foinac, takes-baba ngic nga yefengigac yengi molickengelelu Wapongte ngani-damongka fedaingte. <sup>32</sup> Yoane ye yefe dondonne balaibelu ngengela kwesime ngengi ye mi ngagesingkeibong. Aime takes-baba ngic nga yefe-ngigac yengi ye ngagesingkeibong.

Ngengebac yogo nganiibong. Ailu sifu kwelengineng mi hefaliyeibong, ailu mi ngagesingkeibong.”

*Waing bolele damong sowacne*

*Mrk 12:1-12; Luk 20:9-19*

<sup>33</sup> “Na nangeng yowa monic holelu mibe ngagening. Ngic monic mac-himongngineholec ye waing bole gbolicne monic duwelu oda hefewec. Hefelu waing hesoc-hesocete long faliwec. Falilu damong yengele doneg hila-hilale mac-dale monic bawec. Inguc bame motome waing bole damongkeningte ngic gocne bafuwacebalu yengeholec yowa milu hefewec. Ailu yeicnebac himong dalicka hikewec. <sup>34</sup> Hikelu gacgume waing noine babale dameng weleme, ye kwelec kwekwefocene salecebame bole-damong yengelacni yeicne noine banogale hikeibong.

<sup>35</sup> “Hikebong bole-damong yengi waing fileinele kwelec kwekwefocene bacebalu monic dobo welu monic wehomaibong. Nga monic posadi holeibong. <sup>36</sup> Inguc aibong bole fileinedi kwelec kwekwefocene homacne hatac-mac salecebame hikebong, bole-damong yengi aibaba ingucne hac aiyelei-bong. <sup>37</sup> Aime yogolec lobeinabac, bole fileinedi yanguc ngagelu yeicne madecine salewec, ‘Yenge madecnebenangbac alang bacnodaingte.’

<sup>38</sup> “Inguc milu saleme hikeme bole-damong yengi madecine nganilu mingagec ailu yanguc miibong, ‘Yedi gacgu bole yago bame yeicne aidaicte. Ilec ngenge kwesibong wehomalu yele himong nga mole-damoc sasawa baebengka nongileng aidaic.’ <sup>39</sup> Inguc milu bole fileinele madecbenang yogo fuluckelu wickebong waing bole lobina haume balu wehomaibong.

<sup>40</sup> “Aime bole fileine ye hatacmac kwesilu bole-damong yengele wenuc aiyeledaict?”

<sup>41</sup> Inguc mime depec-baba ngic micnefocngineng nga Yuda ngic-ngigac micnefocngineng, yengi miibong, “Bole fileine ye kwesilu damong sowacne basowalecebalu wehomacebadaitc. Ailu waing bole yogo bole-damong gocne yengele molewa lodaicte. Lome yengi bole yogo damongkelu noine baba damengka fileine nebocene lacnodaingte.”

<sup>42</sup> Inguc mibong Yesudi yanguc miwec, “Wapongte hibiwa yowa yanguc kwelengkeicne fagac,

‘Mac-baba ngic yenge posa monic sowacne milu wickeibong. Aime posa yogodi macte posa-bosing sanangne ailu domadaicte. Sugcne yeuctihac pasi yogo bame ngicti ngani-angac aidabelengte.’ *(Mige 118:22-23)*

Ngenge hibi yogo wafe-ngagec mi aicaigaing, me?

<sup>43</sup> “Ilec ailu yanguc edocngebabe, Wapongti ngani-damong ngengelacni baickelu aling monic yeledaict. Aime yenge ngani-damongte bole balu noine bafuwadaingte. <sup>44</sup> Aime monic ye posa yogolec feiwa wawedaicte, ye socine lokeyackedaict. Nga posa yogodi monicte feiwa wawedaicte, yogo fasosockeme kapuc kwedaicte.”

<sup>45</sup> Aime Yesu ye nangeng yowa miwec, yogo depec-baba ngic micne nga Farisaio yengele miwec, yogo biyac ngage-motoibong. <sup>46</sup> Ailu yenge ye banogale yefe basackeibong. Aime ngic-ngigac yengi ye Wapongte siduc-mimi ngic miibongte hangocebame aibibiyelu hegileibong.

## 22

*Ngictau madecinele baba-tumang*

*Luk 14:16-24*

<sup>1</sup> Yesudi nangeng yowa monic taockelu holelu yanguc edocebawec,  
<sup>2</sup> "Honocmenkte ngani-damong yogo ngictau monic ingucne, ye madecinele  
 baba-tumang damengka noba-nosing sugucne bamockewec. <sup>3</sup> Ailu ngictau  
 ye kwelec kwekwegefocene salecebame yenge ngic-ngigac baba-tumangte ailu  
 molic-molic biyachac wacebawec, yogo yengi kwesiningte kwelec salece-  
 bame hikeibong. Hikebong ngic-ngigac yenge takicebame hegileibong.

<sup>4</sup> "Hegilebong ngictau ye kwelec kwekwegefocene gocne hatacmac yanguc  
 milu salecebawec, 'Ngenge biyac hikelu ngic nganicebalu edocebaning,  
 "Ngagegaing, bulumakane ngicne ailu sic helocineholec yogo biyac welobec  
 ailu nosing sugucne bamockegabac. Na wiycasasawane biyac bamock-  
 egabac. Ilec ailu ngenge biyac kwesining."

<sup>5</sup> "Inguc mime hikelu edocebabong, yenge yowa yogo hatacmac hikeme  
 ngagelu takicebame hegilelu lec-welec aiibong. Monic ye boleina hikewec.  
 Nga monic ye moneng-mafa boleina hikewec. <sup>6</sup> Nga ngic-ngigac nebocene  
 yenge ngictaula kwelec kwekwegefocene ngaba aiyelelu wehomacebaibong.  
<sup>7</sup> Inguc aibong ngictau ye yogo ngagelu aalickeme hudu-baba ngicfocene  
 salecebame hikelu ngic yogo wehomacebalu taonngineng hifaebong lobe-  
 wec.

<sup>8</sup> "Ailu kwelec kwekwegefocene yanguc edocebawec, 'Baba-tumangte nos-  
 ing yogo biyac bamockeicne. Nga ngic wacebaicne yenge aling sowacne  
 ingucnedi nala kwesidaingtesoc mi aigac. <sup>9</sup> Ilec ngenge yefe sosocka hike  
 domalu ngic-ngigac nganicebalu yenge edocebabong baba-tumangte macka  
 kwesidaing.' <sup>10</sup> Inguc mime kwelec kwekwe ngic yenge yefewa hikelu  
 ngic-ngigac madicne nga sowacne nganicebalu yenge momoc mengocebalu  
 kwesibong baba-tumangte nosing-mac yogo wakeibong.

<sup>11</sup> "Aime ngic-ngigac yenge kwesilu ngiyebong ngictaudi nganicebanale  
 welelu ngic monic nganime baba-tumangte ngakpi mi holelu ngiyewec.  
<sup>12</sup> Ngiyeme ye nganilu yanguc edowec, 'Agone, ga wenuc baba-tumangte  
 ngakpi mi holelu ofe-ngiyegic?'

"Inguc mime ngic ye yowaine mikac waickelu ngiyeme <sup>13</sup> ngictaudi  
 bole-ngicfocene yengele yanguc miwec, 'Ngenge hige-moleine dodockelu  
 lobina kundungka wickebong hauna. Iwa haulu hiyalu micine hisalangkelu  
 gadaicte.'

<sup>14</sup> "Ngic-ngigac wacebaicne, yenge homacne. Nga bawosaecebaicne, yen-  
 gibac efecnemac."

*Takesle uwacnoibong*

*Mrk 12:13-17; Luk 20:20-26*

<sup>15</sup> Aime Farisaio yenge hikelu yowa wenuc milu Yesu kwersackebeng  
 yowa gocne lilome banang milu ilec mingagec aiibong. <sup>16</sup> Inguc ailu mic-  
 tengtengfocngineng nga Herodele aling yenge Yesula salecebabong hikelu  
 yanguc miibong, "Wewedu, ga yowa noine milu gagic, yogo ngagegabeleng.  
 Ailu Wapongte yefe noina ngic-ngigac edocebalu weduyelelu gagic. Ailu  
 ngic feicne me waince yengele mi ngagesicaagic. Ga ngic-ngigac aling  
 wiycac sockahac aiyelecaagic. <sup>17</sup> Ilec wenuc ngagegic, ngage-ngage weni  
 yogodi nalic aigac, nongileng ngictau Sisa takes lacnodabelengte, me mi  
 lacnodabelengte, yogolec yefe dondonne wenuc fagac?"

<sup>18</sup> Inguc mibong, Yesu ye ngabawa-silic miibong, yogo biyac ngagelu yanguc edocebawec, “*Kwesac-ngic, ngenge omale lokwesacka locnugabieng?*

<sup>19</sup> *Ngenge takes locaigaing, iwacni moneng monic bafuwalu edalicnubong nganibe.*” Inguc mime yenge moneng monic bafuwalu edalicnubong nganibe. <sup>20</sup> Edalibong ye yogo nganilu yanguc uwayelewec, “*Iluc nga hibi yago male?*”

<sup>21</sup> Uwayeleme miibong, “Yogo Sisale.”

Inguc mibong yedi yanguc edocebawec, “*Ilec ngenge Sisale wiyac, yogo Sisa lacnodaing. Nga Wapongte wiyac, yogo Wapong lacnodaing!*”

<sup>22</sup> Inguc edocebame yenge kwatackelu hegilelu hikeibong.

### *Homackacni gboliyelu fangke-fangke*

*Mrk 12:18-27; Luk 20:27-40*

<sup>23</sup> Sadyusi aling yenge homackacni gboliyelu fangke-fangkele yefe yogo monic mi fagac, inguc micaigaing. Yengelacni ngic gocnedi hadeng iwahac Sunila kwesilu yanguc uwacnoibong, <sup>24</sup> “Wewedu, Mosesdi yanguc miwec, ‘Ngic monicti ngigac badaicte ailu ye gboliine mikac gacgu homame gbainedi haeinele hosec badaicte. Inguc balu gboli kwefickele haele wac-bingec bafangkelu gadaicte.’” (*Yef 25:5-6*)

<sup>25</sup> Dameng monicka hae-gba 7 yenge nongeholec gaibong. Aime haengineng molic-molicti ngigac monic balu gboli mikac moc gacgu homame, gbainedi yele hosec hatac bawec. <sup>26</sup> Balu ye ingucnehab homame, gbaine yogo nga yele bagewa gbaocine 5 gaibong, yengela aibaba ingucnehab fikeme yenge sasawadi homayackeibong. <sup>27</sup> Homayackebong ngigac ye inguchac gacgu homawec. <sup>28</sup> Homame ngic 7 yenge ngigac yogohac baibongte ailu, gacgu homackacni gboliyelu fangkedaingte, dameng iwa ngigac yogo ye male ngigacbenang aidaicte?”

<sup>29</sup> Inguc mibong Yesudi bafaliyelu yanguc edocebawec, “*Ngenge yowa Wapongte hibiwa fagac, nga Wapongte tapili, yogo mi ngage-motogaing. Ilec ailu yowa mibong lilogac.*” <sup>30</sup> *Homackacni gboliyelu fangke-fangke damengka ngic-ngigac yenge mi banagudaingte.* Aime mamaç monicti ‘Na adune ngic lacnodacte,’ yogo nalic mi midaicte. Honocmenge angelo yenge ngawe-ngigac mi banagucaigainga, yenge ingucnehab ngawe-ngigac mi banagudaingte. <sup>31</sup> Aime homackacni gboliyelu fangke-fangkele milu Waponti yanguc biyachac Wapongte yefe-yowawa edowec,

<sup>32</sup> ‘*Na Abraham nga Aisak ailu Yakobo, yengele Wapong gagabachac.*’ (*Wah 3:6*)

*Ngenge yowa yogo wafe-ngagec mi aicaigaing, me? Ailu ye ngic homaicne yengele Wapong miyac. Ye ngic gblincne gagaing, yengele Wapong.”*

<sup>33</sup> Aime ngic-ngigac habutowa yenge yowa weduyelewec, yogolec kwat-ackeibong.

### *Wapongte ung-yowa*

*Mrk 12:28-31; Luk 10:25-28*

<sup>34</sup> Aime Farisaio yenge yowa yanguc ngageibong, “Yesudi Sadyusi yengele yowa bafaliyeme yowangineng mikac aime moc domaibong.”

Yenge yowa yogo ngagelu kpaduckelu domaibong. <sup>35</sup> Domabong yengele hewackacni Wapongte yefe-yowale ngage-ngage ngic monicti Yesu lokwesacka lolu yanguc uwacnowec, <sup>36</sup> “Wewedu, yefe-yowale kwelina ung-yowa weni yogodi noinebenang aigac?”

<sup>37</sup> Inguc uwacname yanguc edowec,

**“Ga kwelegone nga ilucgone ailu ngage-ngagegogne bucbuchac Sugcne Waponggonele angac ngagelu gadamec.”** (Yef 6:4-5)

**38** Yogodi ung-yowale molic-molic yowa nga yowa sugcne aigac. **39** Aime monic yanguc fagac,

‘Gageicne aigelecaigac, silicine ingucne hac ngic-ngigac gale emewa gagaing, yengele kwelegonedi ago aiyelulu angac ngageyelelu gadamec.’ (Dep 19:18)

**40** Yefe-yowale hibi nga siduc-mimi ngicte hibi sasawa yengele fungine, ung-yowa yaekang yago yeki aigaic.”

*Yesudi Mesiale uwayelewec  
Mrk 12:35-37; Luk 20:41-44*

**41** Aime Farisaio yenge kpaduckelu ngiyeebongka Yesudi yanguc uwayelewec, **42** “**Ngenge Mesiale fungine wenuc ngagegaing, ye male fikesaweckacni?**”

Uwayeleme bafaliyu yangu edoibong, “Ye Dawidile fikesaweckacni.”

**43** Inguc mibong Yesudi yanguc miwec, “**Inguc aime Tili Asudi wenucte Dawidile micka yowa lome Mesiale miwec, ‘Nale Sugcne,’** milu yanguc miwec,

**44** ‘**Sugcnedi nale Sugcne\*** edowec, “**Ga folenapec ngiyeengka ngabafogone higegonele bagewa locebabe gadaingte.**”’ (Mige 110:1)

Inguc miwec. **45** Ailu Dawidi yeuctihac Mesia ‘**Nale Sugcne**’ wackewec. Aime Mesia ye wenucka Dawidile fikesaweckacni aigac? Ye Dawidile Sugcne.” **46** Inguc mime yenge Yesule yowa ameine bafaliyenogale aibibiyebong. Aime gaibong, dameng iwa hatacmac uwacnoningte hangocebame hegilebong.

## 23

*Farisaio nga Sadyusi  
Mrk 12:38-39; Luk 11:43; 11:46; 20:45-46*

**1** Yesudi ngic-ngigac habutowa nga mic-tengtengfocine yanguc edoce-bawec, **2** “**Wapongte yefe-yowale wewedu ngic nga Farisaio yenge Mosesle mac balu ngyecaigaing.** **3** Ilec yengi yowa edocngebagaing, ngenge yogo sasawa ngagelu balaibedaing. Aime yenge aibaba aicaigaing yogo, ngenge silic ingucne hac mi aidaing. Yenge yowa edocngebacaigaing, yogo yengileng mi balaibecaigaing. **4** Yenge yefe-yowale mimi umacnebenang yogo dodock-elu ngic ngengele elecka lobong umaledaite. Aime yengilengbac mimi yogo baefewelu baficngebanogale molenginengti bafangkeningte mi aiyelcaigac.

**5** “**Yenge ngicti aibabangineng sasawa nganicebaningte Wapongte yowa gocne kwelengkelu katapa gogocnginang lobong haume meinginang me molenginang bayegengkelu hefecaigaing.** Ailu ngakpingineng dalicne

**22:39:** Mat 7:12    **22:40:** Rom 13:10; Gal 5:14    **22:42:** Yoa 7:42    \* **22:44:** Miti Geewa Hibru yowawa Sugcnele wac yaekangti fagaic. Molic-molic Hibru yowawa wacin yogo “Yawe” fagaic. Nga yogolec lobeina, “Sugcne” inguc fagaic. Mataio iwa Grik yowawa Sugcnele wac moniyang sugu bafaliyeicne fagaic. “Nale Sugcne” yogo Mesia.    **22:44:** Mat 26:64    **23:3:** Mal 2:7-8

dalimungineholec, aibaba yogo sugucnebenang ailu gaibong.\* <sup>6</sup> Yenge noba-nosing nonone damengka nga kpakpaduc mac iwa molic-molic ngiyeniyewa ngiyenogale aiyelecaigac. <sup>7</sup> Ailu sobeng sugucna ngic-ngigac yengi 'O Sugucne, wenac-madic,' nga 'Wewedu,' inguc milu wacebaningte homac-nebenang aiyelecaigac.

<sup>8</sup> Aime ngenge wewedungineng moniyangti sugu gagac. Ailu ngenge sasawa ngic hae-gba aigaing. Ilec ngengele ngagelu monicti 'Wewedu,' inguc mi wacngebadaic. <sup>9</sup> Mamacngineng moniyangti sugu honocmengka gagacte ailu, ngenge himongka ngic monicti 'Mamacnonggeng,' inguc mi midaing. <sup>10</sup> Aime sugucnenonggeng Mesia moniyangti sugu gagacte ailu monicti 'Sugucnene,' inguc mi wacngebadaic. <sup>11</sup> Aime sugucnenonggeng gagac, ye ngengele mole-bafic gadaicte. <sup>12</sup> Monic ye yeicne ngageme feicne aicaigac, ye wacine bawadaicte. Nga monic ye yeicne ngageme wawaine aicaigac, ye wacine bafedaicte.

*Aibaba sowacnele edocebawec  
Mrk 12:40; Luk 11:39-52; 20:47*

<sup>13</sup> "Wapongte yefe-yowale wewedu ngic nga Farisaio, mee, ngenge medecngebadaic. Ngenge honocmengte ngani-damongte nu yogo habu yengele haicka holecaigaing. Ngenge iwa fenogale liloquaigaing. Aime habu yengi fenogale aiyebongkabac, aka inguchac holeyelecaigaing. Ngenge kwesac-aibabangineng ingucne bagagaing. <sup>14</sup> [Wapongte yefe-yowale wewedu ngic nga Farisaio, mee, ngenge medecngebadaic. Ngenge ngigac-hosec yengele macngineng ewalicebabong moc gagaing. Ailu ngic-ngigac yengi ngage-madickengelingte ngenge mimiloc dalicnehac milockecaigaing. Ngenge kwesac-aibaba ingucne aicaigabiengte ameine sugucne hac ngeledaicte.]<sup>†</sup>

<sup>15</sup> "Wapongte yefe-yowale wewedu ngic nga Farisaio, mee, ngenge medecngebadaic. Ngenge ngic moniyang sugu mic-heloc yowa aiconningte himongne himongne nga kiwec falockelu hikequaigaing. Aime ye ngengela wele taockeme baefewebong, ye ngengileng ingucne dac-sanangte adu-madec ailu ngenge ewalicngebalo haudaicte. Ngenge kwesac-aibabangineng ingucne bagagaing.

<sup>16</sup> "Yefe baba ngic yenge donge-pisic aigaing, ngenge yenge ingucne. Mee, ngenge medecngebadaic. Ngenge yowangineng mibong sanangkenale yanguc micaigaing. 'Monicti Wapongte Ibu-mac wackecaigac, yogo yowa kpisicne micaigaing.' Nga monicti Ibu-mac kwelina wiyc goldi baicne ngiyegac, yogo wackecaigac. Ilec ye yowaine nalic mi hegiledaicte.' <sup>17</sup> Ibu-macka wiyc goldi baicne ngiyegacte gbagbacne aidaicte, yogo wiyc feicne. Nga wiyc goldi baicne yeicnac yogo wiyc omane. Ngenge donge-pisic aime ngage-ngagengineng mi ileckeicne. <sup>18</sup> Ailu ngenge yowangineng mibong sanangkenale yanguc micaigaing. 'Monic ye alata wackecaigac, yogo yowa kpisicne. Nga monicti ibu alata feina biyac loicne, yogo wackecaigac, ibac yowaine yogo nalic mi hegiledaicte.' <sup>19</sup> Alatawa ibu ngiyegacte gbagbacne

\* **23:5:** Yuda ngic-ngigac yenge katapa gogoc kpisicne sic socinedi baicne iwa Wapongte hibi-wacni alingngine kwelengkeicne iwa emungkelu mesunginang me meinginang bakatackelu gaibong. Aibaba yoglec fungine Yefe-yowa 6:1-10 iwa kwelengkeicne fagac. Aime dalimunginele aibaba yoglec fungine Himong kisiwa 15:38-41, iwa kwelengkeicne fagac. **23:5:** Mat 6:1; Wah 13:9

**23:11:** Mat 20:26; Mrk 9:35; Luk 22:26    **23:12:** Yop 22:29; Ynn 29:23; Luk 14:11; 18:14    <sup>†</sup> **23:14:** Hibi esecne Mataio kwelengkewec, yogo nganilu iwacni kwelengkebong kwelengkebong ofewec, yengelacni gocne 23:14 iwa mi fagac. Ngic-ngigac yenge hibi kwelengkeicne yogo wosaelu nganibong Mataiodi mi kwelengkewec mecne.    **23:16:** Mat 15:14

aidaicte hocne, yogodi wiyc feicne nga ibu yeicnac yogo wiyc omane. Ngenge donge-pisic aling.

<sup>20</sup> "Monic ye alata wackelu yowaine mime sanangkedaicte, ye alata nga ibu alata feina fayackegac, yogo momochac wackeme yowainedi bayackededaicte. <sup>21</sup> Nga monic ye Ibu-mac wackelu yowaine mime sanangkedaicte, ibac Ibu-mac yeicne ailu Wapong iwa gagac, ye momochac wackeme yowainedi bayackededaicte. <sup>22</sup> Aime monic ye honocmeng wackelu yowaine mime sanangkedaicte, ye Wapongte mac ngiye-ngiye nga Wapong yeicne iwa ngiyegac, ye momochac wackeme yowainedi bayackededaicte.

<sup>23</sup> "Wapongte yefe-yowale wewedu ngic nga Farisaio, mee, ngenge medecngebadaic. Ngenge kwesac-aibabangineng ingucne aicaigaing. Ngenge yefe-yowa feicne hegilelu yefe-yowa kpiscne sugu balaibecaigaing. Ngenge lomboc nga gime ailu mendangngineng sasawa yogowacni 10kacni moniyang botoc balu Wapong lacnoagaing, yogo yefe-yowa kpiscne aicaigaing. Ailu aibaba dondonne nga kwele-sowac ailu ngage-ngagesingngineng bucbuchac balu gaga, yogobac kpaoma ailu hegilegaing. Ngenge aibabangineng madicne yogo nalic balaibegabiyyeng. Ailu tofaine migabac, yogo inguchac mi hegiledaing. <sup>24</sup> Ngenge ngic-ngigac yefe edalicebaningte bole yogo bacaigaing, ngenge donge-pisic ingucne aicaigaing. Aime hulungnginang gisic hakic kpiscne, yogobac nganilu baikkecaigaing. Nga kamelbac hulungka fame mi nganilu gbokecaigaing.

<sup>25</sup> "Wapongte yefe-yowale wewedu ngic nga Farisaio, mee, ngenge medecngebadaic. Ngenge kwesac-aibabangineng yangucne balu gagaing. Ngenge pele nga kapngineng lobine sugu suwecaigaing. Ailu ngengileng kwelengineng kwelina ngani-angac nga bonec nono homacne fagac, yogo ngengung mi damongkecaigaing. <sup>26</sup> Ga pele nga kap kweline suweengkabac lobeine ingucne hac kwalackedaicte. Farisaio, ngenge donge-pisic.

<sup>27</sup> "Wapongte yefe-yowale wewedu ngic nga Farisaio, ngenge kwesac-  
ngic! Mee, ngenge medecngebadaic. Ngenge yanguc ngagegaing, dongesi  
yogo homaicne wonongkolec aime luwedie wakeicne fagac, yogo hibineholec  
ainale ngenge dongesi penti lowacnoagaing. Aime ngenge kwelenginang  
nga socnginang silicngineng ingucne ailu gagaing. <sup>28</sup> Ngenge socnginengti  
ngic-ngigac haicka dondonne ingucne aigac. Nga kwelenginang, ibac kwe-  
sacti wakeyackeicne ailu kwesac-aibabangineng ingucne balu gagaingte  
ngenge yefe-yowa wecaigaing.

### Ameine banoga

<sup>29</sup> "Wapongte yefe-yowale wewedu ngic nga Farisaio, mee, ngenge  
medecngebadaic. Ngenge soc-baba ailu kwesac-aibabangineng bagagaing.  
Ngenge Wapongte siduc-mimi ngic yengele dongesiwa simeng bayelelu  
ngic dondonne yengele simeng hibineholec ainale hatacmac hole-gboliyel  
bamadickecaigaing. <sup>30</sup> Bamadickelu yanguc micaigaing, 'Nonge ngambo-  
focnonggeng yengele damengka gadabeng midec, Wapongte siduc-mimi  
ngic nalic mi wehomacebadabeng. Ailu sacngineng wanale aibaba  
ingucne yengeholec mi aidabeng.' <sup>31</sup> Ngenge ingucne bagalu funginengineng  
mibong yegengkegac, 'Ngic Wapongte siduc-mimi ngic wehomaceaibong,  
nongileng ngic yogo yengele madecfocngineng.' <sup>32</sup> Ngenge inguc milu  
ngambofocngineng yengele bikic basugulelu gagaing.

<sup>33</sup> "Ngenge ngengung hema ailu hemale gbolifocene, ngenge yowawa ameine mimoctolu dac-sanangka haudaingkale, wenuc aidaingte?"  
<sup>34</sup> Ngagegaing, nani Wapongte siduc-mimi ngic nga ngage-ngage ngic ailu Wapongte yefe-yowale wewedu ngic salecebabe kwesidaingte. Aime ngenge galu yengelacni gocne wehomacebadaingte. Nga gocne malicpongka wecebadaingte. Ailu gocne kpakpaduc macnginang muc-hududi wecebalu ngaba aiyelelu taon monickaci welu yebicebabong monicka hikedaingte. <sup>35</sup> Ngenge inguc bagacgu ngic dondonne wecebayackebong sacngineng himongka wayackewec, yogolec ameine bucbuchac ngengela fadaicte. Yogo Abel wehmaibong, yele sackacni molickelu ofegacgu Berekiale madec Sekariya, yele sacka ofegac. Ngenge ye Wapongte Ibu-mac nga alata hewacnginac wehmaibong.<sup>‡</sup> <sup>36</sup> Foinac, aibaba sasawa ilec ameine, yogo ngic-ngigac aling yanguctihac gagaing, ngengela fikedaicte, yogo noine edocngebabac.

### *Yerusalemte yowa*

*Luk 13:34-35; 19:41-44*

<sup>37</sup> "O, Yerusalem, Yerusalem, ga siduc-mimi ngic wehomacebayackeing. Nga ngic gala salecebaicne, yenge posadi holecebaing. Kokolec neng-gacined adu-madecfocene kwegecine bageina ekongebacaigac, na dameng homacne adu-madecfogone ingucnehat kpaducebanogale ngageiba. Aime ngengibac yogolec takicngebawec. <sup>38</sup> Ngagegaing, ngengileng mac fale yogo ngic mikac ailu mac kisi kwedaicte. <sup>39</sup> Na yanguc edocngebabe ngagening, yanguctihac molickelu ngenge hatacmac mi nganicnudaingte. Aime gafecgu yanguc midaingte,  
 'Sugcnele wacka ngic welegac, ye mimi-madicineholec.' (Mige 118:26)  
 Inguc midaingte, dameng iwa ngenge hatacmac nganicnudaingte."

## 24

### *Dameng moto-motoine*

*Mrk 13:1-13; Luk 21:5-19*

<sup>1</sup> Yesu ye Wapongte Ibu-mackacni lobina wame mic-tengtengfocene yenge yela weleibong. Welelu Ibu-macte kwelina mac fawec, yogo edalibong <sup>2</sup>yedi yanguc edocebawec, "Wiyac yogo yakumac nganiyackegaing, yogo lobewa yanguc fikedaicte. Aling monic yengi kwesilu yogo sasawa hembalackebong hikeyackedaicte. Foinac, hikeyackeme posa monicti monicte feiwa mi hegilebong ngiyedaicte, yogo noine edocngebabac."

<sup>3</sup> Inguc milu Yesu ye Oliwa kupicka hikelu ngiyeme mic-tengtengfocene yengiflangkac yela hikelu yanguc uwacnoibong, "Ga Ibu-macte yowa migic, yogo ma damengka fikedaicte? Ailu dameng moto-motoina geicne kwesi-kwesile damengka maagone wenuc fikedaicte? Ilec edocnubanong."

<sup>4</sup> Inguc mibong Yesudi bafaliyu yanguc miwec, "Monicti kwesacngabadaickale, ngenge ngani-motolu gadabiyeng. <sup>5</sup> I yangucte, ngic bocyac yengi kwesilu nale wac wackelu midaingte, 'Na Mesia.' Inguc milu ngic-ngigac bocyac kwele basifuc aiyeledaingte. <sup>6</sup> Ailu hudu sugcnele siducti himong bangacka, nga himong dalickacni kwesime ngenge yogo ngagelu

<sup>23:33:</sup> Mat 3:7; 12:34; Luk 3:7    <sup>‡ 23:35:</sup> Kein ye molickelu gbaine Abel wehomawec, siducine Fike-fike 4:1-10 iwa fagac. Ngictau Yowasi, yedi siduc-mimi ngic Sekariya wehomawec, siducine 2 Ngictaule siduc 24:17-27 iwa fagac. Yuda yengele Wapongte hibi moto-motoina 2 Ngictaule siduc fagac. Yogolec Yesudi yanguc miwec, "Abel yele sackacni molickelu ofegacgu Berekiale madec Sekariya, yele sacka ofegac."    <sup>23:38:</sup> 1Ngt 9:7-8; Yer 22:5    <sup>24:3:</sup> Luk 19:44    <sup>24:5:</sup> Mat 24:23-24; 1Yoa 2:18

mi kwatackedaing. Foinac, aibaba ingucne fikedaicte. Aime dameng motoinebac yogowahac biyac mi kwsidaicte.<sup>7</sup> Himong gocne yengi himong monickacni gocne yengeholec hudu wenagulu gadaingte. Ailu ngictau monicte alingti ngictau monicte aling yengeholec ngaba ainagudaingte. Aime nosingte loloc-dameng fikelu hikedaingte. Ailu memeya yenge himongne himongne badaingte.<sup>8</sup> Aime aibaba ingucne, yogo wiyc gblincne fikenogale aiymewa, ngigac molickelu gado hicaigac, ingucne hac aidaicte.

<sup>9</sup> “Inguc fikeme ngic-ngigac yengi ngenge ngabafocngineng yengele molewa longebadaingte. Longebabong ngaba yengi weyebic aingelulu wehomacngebadaingte. Aime himongne himongne ngic-ngigac sasawa yengi nale wacte ailu kweledi wicngebadaingte.<sup>10</sup> Nga ngic-ngigac homacne yenge ngage-sowac ailu hegilecnulu yengungtihac agofocngineng ngaba yengele molewa locebadaingte. Ailu kweledi wicebadaingte.<sup>11</sup> Nga siduc-mimi ngic kwsacine homacnedi fikelu ngic-ngigac homacne kwe-sacebadaingte.<sup>12</sup> Yefe-yowa weweles aibaba yogo suguledaicte. Aime ngic-ngigac homacne yenge kwele-angacka agofocngineng yengele angac ngagelu gagale aibaba yogo miyac aidaicte.<sup>13</sup> Nga monic ye sanangne hac gacgume damengine motodaicte, ye wasecne aidaicte.<sup>14</sup> Aime ngic-ngigac yenge ngani-damongte Siduc Madicne yogo himong sasawa iwa hikelu edocebalu weduyelebong, yowa yogodi saweme ngic-ngigac yenge yogo ngageyackebong, dameng motodaicte.

### *Wiyac sowacnebenang fikedaicte*

*Mrk 13:14-23; Luk 21:20-24*

<sup>15</sup> “Siduc-mimi ngic Danieldi yowa monic esecnebenang miwec, yogo wiyc monic sowacnebenang memenguine aigac, yogodi ngyielyu wiyc gbagbacne basowaleme wonongkolec ailu mac-bala ingucne aidaicte. Wiyac sowacne yogodi Ibu-mac kweline gbagbacne iwa domalu Ibu-mac basowaleme ngenge nganidaingte.” Monic ye yowa yago wafedaicte, ye yogo ngage-motodaic.<sup>16</sup> “Aibaba yogo fikeme ngic-ngigac Yudeya himongka gagaing, ngenge hangoc hikelu tikiwa fedaing.<sup>17</sup> Ailu monic ye mac feina ngyedaitcowa, ye haulu wiyc monic banogale mac kwelina mi fedaic. Ye momoc hangoc hikedaic.<sup>18</sup> Nga monic ye nosing-bolewa domadaictewa, ye ngakpi dalicne banogale macka mi hefaliyu hikedaic. Ye momoc hangoc hikedaic.<sup>19</sup> Dameng iwa ngigac gobeholec gagaing nga nenggac kogoc amuc gumecebalu gagaing, mee, yenge medecebadaic.<sup>20</sup> Aime ngenge hikenogale dameng yogo tilo damengka me Sabat damengka mi fikenale milockedaina.<sup>21</sup> Dameng iwa doic sugucne hac silicine monicbenang fikedaicte. Doic ingucne himong molickelu fikeweckacni ofegacgu yanguctihac monic mi fikewec. Ailu lobewa inguchac hatacmac nalic mi fikedaicte.<sup>22</sup> Aime entacka hadeng yogodi mi babangkaledaicte, monicti wasecne nalic mi aidec. Ngic-ngigac bawosaecebaicne, ngengele ailu dameng yogo bame bangkaledaicte.

### *Mesia kwesacine*

<sup>23</sup> “Dameng iwa yowa yanguc fikedaicte, ‘Nganining, Mesia yawa fikegac,’ me ‘Ye ediwa fikegac.’ Ngic-ngigac inguc mibong ngenge mi ngagesingkedaing.<sup>24</sup> I yangucte, ngic fikelu kwesac ailu midaingte, ‘Na Mesia.’ Yenge nga siduc-mimi ngic kwesacine yenge fikelu ngic-ngigac

kwele basifuc aiyeledaingte. Ailu ngic-ngigac kwsacebalu pasile maa sugucne nga pasi mi ngani-nganiine badaingte. Ailu yenge yefe monic bafuwadaingtewa, ngic-ngigac bawosaecebaicne inguchac kwsacka bacebadaingte, aime yefe ingucne monic mi fagac.<sup>25</sup> Ngagegaing, na aibaba yogo mi fikeemewa yogo biyac edocngebabac.

<sup>26</sup> “Ngic-ngigac gocne yengi yanguc midaingte, ‘Nganining, ye himong kisiwa misaine mikacka gagac.’ Inguc mibong ngenge iwa mi hikedaing. Me yanguc midaingte, ‘Ye mac kweline kpisicne yawa ngiyegac.’ Inguc mibong ngenge yogo mi ngagesingkedaing.<sup>27</sup> Pilatacti wenac ofe-ofeinacni bame wenac hau-hauina angolecaigac. Aime Ngicte Madec ye kwsidaicte, dameng iwa silicine ingucne hac fikedaicte.<sup>28</sup> Aoc-aoc nango yenge sic kpeleckeicne fagaing, yenge iwa tumanecaigaing. Ngicte Madec kwsinogale aidaicte, dameng iwa wiyac ingucne hocne nganidaingte.

*Ngicte Madec hatacmac kwsidaicte  
Mrk 13:24-27; Luk 21:25-28*

<sup>29</sup> “Aime doic dameng motome, ‘Wenac-dongeine kundung kweme tamacne angocene mi angoledaicte. Aime asocmeng yenge sawawacni motolu wabong sawawa wiyac sasawa yengele tapili yogo teng-teng kwedaingte.’ (Yes 13:10; 34:4)

<sup>30</sup> “Dameng iwa Ngicte Madecte kwsesi-kwesi damengte maa sawa hewacka fikeme himong fengnginang fengnginangsoc ngic-ngigac sasawa yenge yogo nganilu hisonggong aidaingte. Inguc aibong Ngicte Madec ye honocmenge kaguwa kwelina tapili nga hibi-angoctowaineholecti kwsime nganidaingte.<sup>31</sup> Aime kpeng ucine sugucne hiyaemewa, ye angelofocine salecebame yengi hikedaingte. Hikelu honocmeng nga himong mecine neboc nga neboc motogac, iwa hikelu yeuctihac ngic-ngigac bawosaecebawec, yenge kpaducebadaingte.

*Fikyoc nganilu ngage-ngage banoga  
Mrk 13:28-31; Luk 21:29-33*

<sup>32</sup> “Fik yocete fungine nganilu ngenge yogo ngage-motodaing. Mangngina gidecine ofeme hekengngine foseme ngic ngenge yanguc ngagecaigaing, wenac dameng aigac.<sup>33</sup> Aime ngenge wiyac sasawa migabac, yogo fikeme nganilu inguchac yanguc ngagedaing, Ngicte Madec damengngine biyac bangkale kwsilu nu lobina domagac.

<sup>34</sup> “Foinac, ngic-ngigac aling yanguctihac gagaing, ngenge mi homae-bongkahac, wiyac sasawa yogo fikedaicte, yogo noine edocngebabac.<sup>35</sup> Fikeme himong nga sawa yeke gacgu miyac aidabiyecte. Nga nale yowabac mi miyac aidaicte.

*Damengne mi ngagegaing  
Mrk 13:32-37; Luk 17:26-30,34-36*

<sup>36</sup> “Aibaba yogo ma damengka ailu hadeng edomengka fikedaicte, yogo monicti nalic mi ngagedaicte. Honocmenge angelo yenge yogo mi ngagedaingte. Ailu Madec ye inguchac mi ngagedaicte. Mamacti sugu dameng yogo ngagegac.

**24:24:** Yef 13:1-3; 2Tim 2:8-9; Miye 13:13-14      **24:26:** Luk 17:23-24      **24:27:** Mat 24:37-39

**24:28:** Luk 17:37      **24:29:** Esek 32:7; Yol 2:10,31; 2Pi 3:10; Miye 6:12-13      **24:30:** Sek 12:10; Miye 1:7; Dan 7:13      **24:31:** 1Kor 15:52; 1Tim 4:16      **24:34:** Mat 16:28      **24:35:** Mat 5:18      **24:36:** Sale 1:7; 1Tim 5:1-2

<sup>37</sup> "Noale damengka aibaba fikewec, Ngicte Madec ye kwsime aibaba silicine ingucne hac fikedaiete. <sup>38</sup> Mac tunggbaung mi weleemewa ngicnigigac yenge nosing misa noibong. Ailu ngic yenge ngigac bacebailong. Nga mamac yenge yanguc miibong, 'Na adune ngic lacnodacte.' Inguc ailu gaebongka Noa ye wagewe fewec. <sup>39</sup> Feme yenge mi ngagelu gaebongka mac kweme tunggbaungti kwesilu bacebayackewec. Ngicte Madecte kwesi-kwesi damengka aibaba ingucne hac aidaingte. <sup>40</sup> Dameng iwa ngic yaekang yeke nosing-bolewa gaebocka, yekelacni monic balu monic hegileme bolewa gadaicte. <sup>41</sup> Nga ngigac yaekang yeke flawa masinkga lalickelu gaebocka, yekelacni monic balu monic hegileme domadaicte.

### *Deboc-gholi ganoga*

<sup>42</sup> "Sugucnengineng ma hadengka kwesidaicte, ngenge yogo mi ngagegaing. Ilec ailu ngenge deboc-gholi gadabiyeng. <sup>43</sup> Hise-baba ngic ye mac heuckelu fecaigac. Aime mac fileine monic ye hise ngic ma damengka kwesidaicte, yogo ngagedaictewa, ye deboc-gholi nalic galu macine da-mongkelu hise ngic yogo aka holecnodaicte. <sup>44</sup> Ilec ngenge inguchac efeck-elu gadabiyeng. Ngicte Madecte dameng yogo ngenge mi ngageebongka kwesidaicte.

### *Kwelec kwekwe madicne*

*Luk 12:42-46*

<sup>45</sup> "Kwelec kwekwe monicti ngage-ngage-motockolec galu sugucneinele yowa balaibecaigac. Aime sugucneinedi ye kwelec kwekwe ngic agofocene yengele damong ailu nosing damengka botoc balu yelenale micnodaicte. <sup>46</sup> Ye bole yogo bayackeme sugucneine kwesilu nganime nalic aidaictewa, sugucneine ye kweleine angackedaicte. <sup>47</sup> Foinac, na yanguc edocngebabé, ye sugucneinedi wiyacine sasawa damongkenale micnodaicte. Ilec ailu ngenge silicine yogolecsoc gadabiyeng.

<sup>48</sup> "Nga kwelec kwekwe ngic sowacne, yebac yeuctihac yanguc ngagesidaicte, 'Na sugucnene dameng dalicne gacguhac kwesidaicte.' <sup>49</sup> Inguc milu kwelec kwekwe ngic ye agofocene wecebalu ngic gocne yengeholec nosing nga misa sanangne nodaiete. <sup>50</sup> Inguc ailu kwelec kwekwe ngic ye sugucneinele hadeng yogo mi ngageemewa sugucneine kwesidaicte. <sup>51</sup> Kwesilu kwelec kwekwe ngic yogo weloc-kwalockelu ngic kwsesacine yengeholec lodaicte. Aime yenge iwa hiyalu micngineng hisalangkelu gadaingte."

## 25

### *Ngigac-neleweng 10*

<sup>1</sup> "Honocmenge ngani-damong yogo ngigac-neleweng 10 ingucne. Yenge hifanganeng balu baba-tumangte ngic yeholec yefewa bafuwacnagunogale hikeibong. <sup>2</sup> Yengelacni ngigac-neleweng 5 yenge ngage-ngaengineng mikac, nga 5 yenge ngage-ngaengineng kolec. <sup>3</sup> Ngigac-neleweng ngage-ngaengineng mikac yenge hifanganeng balu hifale misa monic mi baibong. <sup>4</sup> Nga ngage-ngaengineng kolec, yenge hifanganeng balu hifale misangineng kilungka kwebong haume baibong. <sup>5</sup> Aime baba-tumangte ngic yedi biyac mi kwsime, ngigac-neleweng yenge sasawadi dongengineng gungte aime gung faibong.

<sup>6</sup> “Faebongka deboc hewacina wawac monic yanguc fikewec, ‘Ngagegaing, baba-tumangte ngic yogo welegac, ngenge hikelu ye bafuwalu mengockelu kwesining.’

<sup>7</sup> “Inguc fikeme ngigac-neleweng 10 yenge gungkacni gboliye fangkelu hifarineng bamadickeibong. <sup>8</sup> Ailu ngigac-neleweng ngage-ngagengineng mikac yengi ngage-ngageholec yengele miibong, ‘Hifanonggeng pisickenogale aigacte ngengi misa monic kwenolebong hauna.’

<sup>9</sup> “Inguc mibong ngigac-neleweng ngage-ngageholec, yengi bafaliyeyelelu yanguc edocebaibong, ‘Misa yagodi nongilengsoc mi aidaicte. Ilec ngenge misa salecaigaing, yengela hikelu fuli baning.’

<sup>10</sup> “Inguc mibong, yenge misa fuli banogale hikeebongka baba-tumangte ngic yogo kwesiwec. Kwesime ngigac-neleweng biyac efeckeicne, yengi yeholec baba-tumangte macka feibong. Felu nu wickebong holeme iwa noba-nosing no-angac ailu ngiyeibong.

<sup>11</sup> “Ngiyeebongka lobeina ngigac-neleweng agofocngineng nebocene yenge kwesilu yanguc miibong, ‘Sugucne, Sugucne, nu laliyenoleengka funang.’

<sup>12</sup> “Inguc mibong, yedi yanguc edocebawec, ‘Foinac, na mi ngagecngebagabac.’

<sup>13</sup> “Ngenge nale kwesi-kwesi dameng nga hadeng mi ngagegaing. Ilec ailu ngenge deboc-gboli gadabiyeng.

### *Moneng-damong habackang*

*Luk 19:11-27*

<sup>14</sup> “Aime Honocmenkte ngani-damong yogo ngic monicti himong monicka hikewec, yogo ingucne. Ye hikenale kwelec kwekwefocine wacebalu moneng-mafaine yengele molewa lome damongkebong hikenale ngagewec.

<sup>15</sup> Ye moneng damongkedaingte, yogolec tapili nga aibabanginengte silicka yanguc heuckelu yelewec. Ngic monic ye talant moneng 5 nga monic ye talant yaeckang, nga monic ye talant moniyang,\* moneng inguc yelelu hikewec. <sup>16</sup> Hikeme ngic talant 5 bawec, ye iwashac galu moneng bole balu talant 5 hatacmac taockelu bafuwawec. <sup>17</sup> Aime ngic talant yaeckang bawec, ye inguchac galu talant bole balu yaeckang hatacmac taockelu bafuwawec. <sup>18</sup> Nga ngic talant moniyang bawec, yedibac gacgu sugucnene moneng lacnowec, yogo balu himong falilu longka longkelu sangkewec.

<sup>19</sup> “Aime sugucnengineng dameng dalicne gacgu hatacmac hefaliye kwe-silu moneng yelewec, yogolec ameine banogale wacebawec. <sup>20</sup> Wacebame ngic talant 5 bawec, ye talant 5 monic momoc taockelu bahikelu miwec, ‘Sugucnene, ga talant’ 5 neleng damongkeiba. Aime na moneng bole balu 5 hatacmac taockelu bafuwaiba.’

“Inguc mime <sup>21</sup> sugucnedi yanguc edowec, ‘Kwelec kwekwefocine ngic madic-nebenang, ga aibabagone dondonne ailu yowa balaibeing. Aime ga yowa balaibelu wiyac kpisicnemac yogo madicne damongkeingte ailu, wiyac homacnebenang damongebacte locgudacte. Weleengka naholec belic-belicka gadabelete.’

<sup>22</sup> “Aime ngic talant yaeckang bawec, ye inguchac welelu miwec, ‘Sugucnene, ga talant yaeckang neleing. Aime na moneng bole balu talant yaeckang hatacmac taockelu bafuwaiba.’

---

<sup>25:11:</sup> Luk 13:25-27    <sup>25:12:</sup> Mat 7:23    <sup>25:13:</sup> Mat 24:42    \* <sup>25:15:</sup> Grik yowawa moneng yogo wacine talant. Moneng moniyang yogo hifa 15te bole-fuli.    <sup>25:15:</sup> Rom 12:6    <sup>25:21:</sup> Mat 24:45-47; Luk 16:10

"Inguc mime <sup>23</sup> sugucneinedi yanguc edowec, 'Kwelec kwekwe ngic madicnebenang. Ga aibabagone dondonne ailu yowa ngage-ngagedgeone madicne. Aime ga yowa balaibelu wiyc kpisicnemac yogo madicne damongkeingte ailu, wiyc homacnebenang damongkecete locgudacte. Weleengka naholec belic-belicka gadabelecte.'

<sup>24</sup> "Aime ngic talant moniyang bawec, ye inguchac welelu miwec, 'Sugucnene, ga ngic dacine, inguc ngagegabac. Ailu bolewa ngic gocne wiyc hole-duwec aibong ga noine kpaduckecaigic. Ailu gocne wasecne wickebong ga sifu noine bacaigic. <sup>25</sup> Ilec ailu gale hangocnume hikelu talantgone himongka longkebe fawec, yogo hatacmac bafaliyegabac.'

<sup>26</sup> "Inguc mime sugucneinedi yowaine ameine yanguc bafaliyecnowec, 'Ga kwelec kwekwe ngic sowacne ailu oyongngine. Na bolewa hole-duwec mi ailu noine kpaduckecaigabac. Ailu wasecne mi wickelu sifu noine bacaigabac, ga yogo biyac ngagegic. <sup>27</sup> Ga inguc ngagelu talantne bengka loengka ngiyedec. Ngiyeme na hefaliyelu talantne yogo neboceneholec badaba.

<sup>28</sup> 'Ilec ngenge yelacni talant ewalilu ngic talant 10 balu gagac, ye lacnon-ing. <sup>29</sup> Monic ye wiyc gocne balu gagac, ye hatacmac lacnobong homacne aidaicte. Nga monic ye wiyc mi balu gagac, yelacni wiyc kpisicne balu gagac, yogo ewalidaicte. <sup>30</sup> Kwelec kwekwe ngic boleine sowacne yogo, ngenge ye balu lobina kundungka wickebong haudaicte. Ye iwa haulu yengeholec iwa galu hiyalu micngineng hisalangkelu gadaingte.'

### *Wowosae dameng*

<sup>31</sup> "Gacgu Ngic Madec ye tapili nga hibi-angoceneholecti angelo sasawa yengeholec kwesidaingte, dameng iwa ye ngictaule ngiye-ngiyewa wacine feicneholecti iwa felu ngiyedaicte. <sup>32</sup> Ailu ye himongne himongne ngic-nigigac sasawa mime kwesilu yele haicka kpaduckedaingte. Kpaduckebong damongti lama nga noning baucebacaigac, ye dameng iwa ingucnehab baucebadaicte. <sup>33</sup> Lama yenge folewapec locebadaicte, nga noningtibac kanawapec locebadaicte.

<sup>34</sup> "Inguc ailu ngictaudi ngic-nigigac folewapec yanguc edocebadaicte, 'Ngic-nigigac Mamacnele mimi-madicineholec, ngenge yawa welening. Ngenge yele mole-damoc nga mac-himongngineng baning, yogo biyachac himong molickelu fikeweckacni ofegac, iwa ngengele ngagelu loicne. <sup>35</sup> Na nosingte homabre ngenge nosingt neleibong. Nga misale aineleme misa neleibong noiba. Ailu kwilic kwesilu gabe, ngengi ngani-damong aineleibong. <sup>36</sup> Na ngakpi-kpolucte basackelu kpungkelu gabe, ngengi ngakpi-kpoluc neleibong. Ailu huc fabe ngengi kwesilu damongnuibong. Ailu muc-macka ngyiebe ngengi yugucnulu nganicnuibong.'

<sup>37</sup> "Inguc mime ngic-nigigac dondonne yengi yowa bafaliyelu yanguc edoingte, 'Sugucne, ga ma damengka nosingte homalu gaengka nganicgulu gumecguibeng, me ma damengka misale aigeleme gumecguibeng?' <sup>38</sup> Me ma damengka kwilic kwesilu gaengka ngani-damong aigeleibeng, me ngakpi-kpolucte basackelu kpungkeengka geleibeng? <sup>39</sup> Me ma damengka hucka me muc-macka ngyieengka yugucgulu nganicguibeng?"

<sup>40</sup> "Inguc mibong ngictaudi yanguc edocebadaicte, 'Foinac, ngenge gbafocne kpisicne yengelacni moniyang sugu kwele-madicka aicnoibong, yogo na hocne aineleibong, yogo noine edocngebabagac.'

<sup>41</sup> “Inguc milu kanawapec domadaingte, yenge yowa yanguc edocebadaicte, ‘Ngic-ngigac ngenge Wapongte aalicte bagewa gagaing, ngenge hegilecnulu dac-sanang moto-motoine mikac, iwa hikelu gadabiyeng. Yogo Aleng Sugucnengineng ye nga angelofocine, yengele aihu dac-sanang lowec yogo lobelu fagac. <sup>42</sup> Na nosingte homabe ngenge nosing monic mi neleibong. Nga misale aineleme ngenge misa monic mi neleibong noiba. <sup>43</sup> Aihu na kwilic kwestilu gabe ngenge ngani-damong monic mi aineleibong. Aihu ngakpi-kpoluc mikac gabe monic mi neleibong. Na huc aineleme nga mucmacka ngiyebe ngenge mi yugucnulu nganicnuibong.’

<sup>44</sup> “Inguc edocebame yengi yanguc midaingte, ‘Sugucne, ga ma damengka nosing misagone mikac me ngakpi-kpoluc mikac me kwilic kwestilu gaengka nonge nganicgulu kpaoma aibeng? Me mac wenuwa huc-macka me mucmacka ngiyeengka nganicgulu kpaoma aigeleibeng?’

<sup>45</sup> “Inguc mibong yedi yanguc edocebadaicte, ‘Foinac, ngenge gbafocne kpisicne yengelacni moniyang sugu kwele-madicka mi aicnoibong, yogo na aineleibong ingucne aigac, yogo noine edocngebabac.’

<sup>46</sup> “Aime yenge bikicte ameine baningte doic dameng moto-motoine mikac iwa hikedaitingte. Aime aling dondonne yenge gaga-sanangka fedaitingte.”

## 26

### *Yesu wenogale mingagec aiibong*

*Mrk 14:1-2; Luk 22:1-2; Yoa 11:45-53*

<sup>1</sup> Yesu ye yowa yogo sasawa miyackeme motome mic-tengtengfocine yanguc edocebawec, <sup>2</sup> “Hadeng yaeckang faemewa Ewalicebaicnele hombang aime, iwashac ngic yenge Ngicte Madec malicpongka wehomanogale mipangkelu saledaitingte.”

<sup>3</sup> Aime depec-baba ngic micne nga Yuda ngic-ngigac yengele damongfocngineng, yengi Ibu-macte damong sugucne waccine Kaifas, yele macka feibong. <sup>4</sup> Felu Yesu sangke-sangke balu webong homanale yowa milu hefelu <sup>5</sup> yanguc miibong, “Ngic-ngigac yengele hewacka ngaba nga hendolong sugucne fikedaickale aihu, ye hombang damengka mi badabeleng.”

### *Yesu sandadi lowacnowec*

*Mrk 14:3-9; Yoa 12:1-8*

<sup>6</sup> Aime Yesu ye Betani macka gawec, iwa ngic monic esecne waicsanangkolec, waccine Saimon, yele macka nosing nolu ngiyewec. <sup>7</sup> Nolu ngiyeme ngigac monicti Yesula hikelu, kilung monic alabastros posadi baicne, yoglec kwelina sanda hoine madicne yogo fuline feicnebenang. Yogodi hodocina sotiyewec.

<sup>8</sup> Sotiyeme mic-tengteng yenge yogo nganilu sanda fuline sugucnedi baicnele aihu, yowa heesicne milu yanguc miibong, “Ye omale wiyc fuline feicne inguc kwondongkegac? <sup>9</sup> Yogo salelu moneng sugucne balu ngic-ngigac waweweine yelebeng madickedec.”

<sup>10</sup> Inguc mibong Yesudi yogo ngagelu yanguc edocebawec, “**Ngenge omale ngigac yele inguc milu kwele-umac bafuwagaing?** Ye aibaba madicnebenang ainelegac. <sup>11</sup> Ngic waweweine yenge damengsoc ngengeholec gadaitingte. Nga nani sugu ngengeholec damengsoc mi gadacte. <sup>12</sup> Na

homabe longnudaingte. Ilec ailu ye nalic nale soc biyac baefecnulu sot-ingkenelegac. <sup>13</sup> Foinac, ngic-ngigac yenge Siduc Madicne himongsoc ngic-ngigac edocebalu weduyeledaingte, dameng iwa ngigac yagodi aibaba aigac, yogolec siduc inguchac milu ngagebong fadaicte, yogo noine edocngebagabac."

*Yudasdi Yesu banogale mipangkewec  
Mrk 14:10-11; Luk 22:3-6*

<sup>14</sup> Aime mic-tengtengfocene 12 yengelacni monic wacine Yudas Iskariot, yedi depec-baba ngic micne yengela hikelu <sup>15</sup> yanguc uwayelewec, "Na Yesu molenginang lobe ngenge moneng edomeng nelenogale ngagegaing?" Inguc uwayeleme yengi siliwa moneng 30 wafelu lacnoibong. <sup>16</sup> Lacnobong, Yudas ye hikelu Yesu dameng monicka mudockelu balu yengele molewa lonale, yogolec donge hilalu wangec gawec.

*Wahikeicnele nosing  
Mrk 14:12-21; Luk 22:7-14; 22:21-23; Yoa 13:21-30*

<sup>17</sup> Gacgu bret yis mikacte hombang iwa molickelu ngiyenogale mic-tengteng yenge Yesula hikelu yanguc uwacnoibong, "Nonge mac wenuwa hikelu Ewalicebaicnele hombangte lama madecineholec nosing bamockelu lobelu nonangte ngagegic?"\*

<sup>18</sup> Inguc mibong Yesudi yanguc miwec, "Ngenge taonka hikelu ngic monic biyac bawosaebac, ye nganilu yanguc edodablyeng. 'Wewedunonggengti gale yanguc migac, "Damengne bangkalegacte na nga mic-tengtengfocene nonge gaholec Ewalicebaicnele hombangte lama madecineholec nosing nonogale ngagegabac.'"'" <sup>19</sup> Aime Yesu ye mic-tengtengfocene yowa edocebewec, yogo balaibelu Ewalicebaicnele hombangte lama madecineholec nosing lobelu bamockeibong.

<sup>20</sup> Aime mac deboleme, Yesu ye mic-tengtengfocene 12 yengeholec nosing nolu ngiyeli <sup>21</sup> yanguc edocebewec, "Foinac, ngengelacni monicti ngaba yengele molewa locnudaicte, yogo noine edocngebagabac."

<sup>22</sup> Inguc mime mic-tengteng yenge kwelengineng homacne sowaleme yengelacni moniyang moniyangti yanguc uwacnoibong, "Sugucne, ga yogo nale migic, me?"

<sup>23</sup> Uwacnobong yedi yanguc miwec, "Ngic naholec pelewa bret kpomuluckelu ngiyegac, yedi hocne mudocnume bacnudaingte. <sup>24</sup> Ngicte Madec ye hegilecngebalu hikedaitce, yogo nale ngagelu biyachac kwelengkeicne fagac. Ngic ye Ngicte Madec mudockeme badaingte, ye ameine baducnodaicte. Mee, ye medeckedaic. Ye nenggacinele gobe kwelinacni mi fikedec, yogodibac madicne aidec."

<sup>25</sup> Inguc mime Yudas ye Yesu mudockenale ngagewec, yedi inguchac yanguc uwacnowec, "Wewedu, ga yogo nale migic, me?"

Inguc mime Yesudi yanguc edowec, "Gageuc hocne mificnagugic."

*Debocka tiwa noibong*

*Mrk 14:22-26; Luk 22:15-20; 1Kor 11:23-25*

<sup>26</sup> Aime yenge nolu ngiyeebongka, Yesudi bret monic balu Wapong kwele-madic micnolu bret yogo bauckelu mic-tengtengfocene yanguc milu yelewec, "Ngenge yago balu noning, yogo soc-biucone."

---

**26:15:** Sek 11:12; Yoa 11:57    **26:17:** Wah 12; Yef 16:1-8    \* **26:17:** Dameng iwa yis mi fawec. Yenge flawa esecne misaineholecti hoineholec biyac aicne, yogo flawa gblonicheholec lalickebong flawa sugulecaigac. Yogodi yis ingucne ailu gawec.    **26:23:** Mige 41:9

<sup>27</sup> Inguc milu kap monic balu Wapong kwele-madic micnolu milockelu yanguc milu yelewec, "Yago sacne, ngenge sasawadi balu noning." <sup>28</sup> Nale sac yogodi dodoxic gbolicne, yogo ngic-ngigac bocyac yengele bikic miyac aime madickeningte ailu sotingkeicne. <sup>29</sup> Na edocngebabe ngagening, waing noinele misaine hatacmac mi nolu gaebewa, Mamacnele ngani-damongka nonileng momoc yefe gbolicnele alingka felu nodabelengte."

<sup>30</sup> Aime yenge Wapongte gee holeibong. Holelu taon hegilelu Oliwa kupicka feibong.

#### *Umacte yowa edocebawec*

*Mrk 14:27-31; Luk 22:31-34; Yoa 13:36-38*

<sup>31</sup> Yefewa hikelu Yesudi yanguc edocebawec, "Deboc yagowa ngenge sasawadi na hegilecndaingte. Aibaba yogolec yanguc kwelengkeicne fagac, 'Na damonggineng webe lama habu yenge singsalolong kwedaingte.' (Sek 13:7)

<sup>32</sup> Aime na homackacni gboliye fangkelubac molickengelelu Galili prawnswa hikedacte."

<sup>33</sup> Inguc mime Pitadi yanguc edowec, "Gocne yenge sasawadi gale inguc milu hegilecgudaingte. Nga nani sugubac nalic mi hegilecgudacte."

<sup>34</sup> Inguc mime yanguc edowec, "Foinac, deboc yagowa kokolec ngicne mi hiyaemewa, gagi bisocnung alecine habackang aidaite, yogo noine edocgugabac."

<sup>35</sup> Inguc mime yedi miwec, "Na gaholec homadactewa, ga nalic mi bisocgudacte." Inguc mime mic-tengtengfocine yenge sasawadi inguchac miibong.

#### *Getsemane bolewa*

*Mrk 14:32-42; Luk 22:39-46*

<sup>36</sup> Aime Yesu ye mic-tengtengfocine yengeholec hikecgu bole himong monic wacie Getsemane, iwa hikeibong. Hike sulumelu yedi mic-tengtengfocine yanguc edocebawec, "Ngenge yawa ngiyeebongka na edi lelu milockedacte." <sup>37</sup> Inguc milu Pita nga Sebedi madeckecine yaeckang bacebame leibong. Lelu Yesu ye kweleine umalebenangkeme kwelesowac ngagel <sup>38</sup> yanguc edocebawec, "Kwele-ilucnedi umale-benangkeme homanogale ainelegac. Ilec ailu ngenge naholec yagowa deboc-gboli galu nganidaing."

<sup>39</sup> Inguc milu lelu himongka wafalu haic-mesuine helulucke ngiyelu yanguc milockewec, "Mamacne, ga ngageng nalic aigacka, ga doicte kap yago baickenong. Ailu nale angacti mi sanangkedaic, miyac. Gale angac nga ngage-ngage yogodi sanangkedaic."

<sup>40</sup> Ye inguc milockeme motome hefaliyu mic-tengtengfocine yengela welelu nganicebame yenge gung faibong. Fabong Pita yeuckelu yanguc edowec, "Ngenge nalic naholec deboc-gboli kpisicnemac ngiyedabongka, me?" <sup>41</sup> Ngenge lokwesacka felu wawedaingkale, deboc-gboli galu milockening! Asunginengti efeckelegac. Nga socnginengtibac umalelegac."

<sup>42</sup> Ailu ye hatacmac lelu yanguc milockewec, "Mamacne, yefe monic mi fagacte kap yago nobele miingte, nalic yogo nobe gale ngage-ngage sanangkedaic."

<sup>43</sup> Inguc milockelu wele nganicebame yenge hatacmac gung faibong. I yangucte, yenge dongenginengti gungte aime gung faibong. Faebongka

nganicebalu <sup>44</sup> hatacmac hegilecebalu lelu milockeme alecine habackang aime yowa molickelu miwec, ingucnehabac milu milockewec.

<sup>45</sup> Milockelu mic-tengteng yengela hefaliye welelu yanguc edocebawec, “Ngenge gung falu gagainghac, me? Ngagegaing, dameng bangkalegac, ngic yenge Ngicte Madec mudockelu bikic-baba yengele molewa lodaingte. <sup>46</sup> Ngagegaing, mudoc ngic welegacte ailu ngenge fangkebong yengela hikenang.”

### *Yesu baibong*

*Mrk 14:43-50; Luk 22:47-53; Yoa 18:3-12*

<sup>47-48</sup> Yudas, ye mudoc ngic, yedi molickelu aibaba ainogale depec-baba ngic micne nga Yuda ngic-ngigac yengele damongfocngineng yengeholec yowa hefelu miwec. Milu maaine yanguc biyac edocebawec, “Na ngic muduckedacte, ngenge ye hocne hobalu badabiyeng.” Aime yengi ngic-habu yogo salecebabong hudu-babale fitec nga gbalucnginengkolec hikenang.

Yesu ye inguc milu domaemewa, mic-tengtengfocine 12 yengelacni monic wacine Yudas, ye kwesime ngic-habutowa sugucne mengocebalu molick-eyelete kwesibong. <sup>49</sup> Kwesilu ye iwahac Yesula lewec. Lelu “Ohec, wewedu” milu muduckewec.<sup>†</sup>

<sup>50</sup> Inguc aicname Yesudi yanguc edowec, “**Agone, ga kwesilu hole banogale ngagegic, yogo banong.**”

Mime yenge welelu Yesu moleine neboc nga neboc sanangnehabac baibong. <sup>51</sup> Hei, ngic Yesuholec gaibong, yengelacni monicti hudu-babale fitec balu fuluckelu kwelec kwekwe ngic monic hedecine neboc wekwackeme wawec. Ngic yogo ye depec-baba ngic yengele damong sugucne, yele kwelec kwekwe ngic.

<sup>52</sup> Wekwackeme wame Yesudi yanguc edowec, “Monic ye fitecti hudu badaicte, ye ameine homalu badaicte, gacgu yogo fikedaickale, hudu-babale fitecgone macina hatacmac loenga hauna. <sup>53</sup> Nale babafiete yefe monic mi fagac, yogo ngagelu inguc aidabong. Aime na Mamacne yakumachac sanangne edodaba, ye angelo habutowa, 72 taosen inguc, nalic salecebame walu baficnudabong. <sup>54</sup> Aime baficnudaingtewa ingucne, Wapongte hibiwa aibaba yago fikenale kwelengkeicne fagac, yogo noine mi fikedaicte.”

<sup>55</sup> Inguc milu ngic-habu yanguc edocebawec, “Na hadengsoc ngengeholec galu Ibu-macka yowa edocngebalu wedungeleiba. Aime ngenge dameng yowgabac mi bacnuibong. Aime yakumachac kindololo ngic bacebacaigaing, ngenge silicine ingucnehabac hudu-babale fitec, nga gbaluc balu bacnuningte kwesigaing. <sup>56</sup> Aimebac siduc-mimi ngic yengi Wapongte hibiwa yowa kwellengkeibong fagac, yogo sasawa noine fikeyackedaic. I yangukte, ngenge kindololo ngic ingucne bacnugagaing.”

Inguc mime mic-tengtengfocine sasawadi Yesu hegilelu hangoc hikenang.

### *Yesu tutumangka bahikeibong*

*Mrk 14:53-65; Luk 22:54-55,63-71; Yoa 18:13-14,19-24*

<sup>57</sup> Aime Wapongte yefe-yowale wewedu ngic nga Yuda ngic-ngigac yengele damongfocngineng yenge depec-baba ngic yengele damong sugucne

**26:46:** Yoa 14:31    <sup>†</sup> **26:49:** Yuda ngic-ngigac yenge yefewa agongineng bafuwalu munggungka muduncaguicaigaing, yogo Yuda ngic-ngigac yengele aibaba.    **26:51:** Yoa 18:26    **26:52:** Fike 9:6; Miye 13:10    **26:55:** Luk 19:47; 21:37

Kaifas, yele macka biyac kpaduckelu ngiyeibong. Ngiyeibong iwa Yesu men-gockelu hikeibong.<sup>58</sup> Aime Pita ye lobenginang dadalisuchac Yesu balaibelu hikewec. Hike sulumelu, Yesule yowa mimoctodaingte, yogo ngagenale depec-baba ngic yengele damong sugucne yele macte oda kwelina felu mac-damong yengeholec ngiyewec.

<sup>59</sup> Aime depec-baba ngic micne, nga Yuda ngic-ngigac yengele Tutumang-towale memba sasawa yenge yowa mingagec ailu hefeibong. Ailu Yesudi pasi sowacne wenuc aiwec, yogolec yowa milu hefeibong. Ailu yowa noine mikac aime wehomanogale ngagebong kpungkewec.<sup>60</sup> Inguc aibong ngic homacnedi kwesilu kwsackelu kpokpolic yowa gocne mibong, yogodi Yesu homacka lololesoc mi aime basackelu gaibong. Gacgu ngic yaeckang yeki fikelu kpolickelu yanguc miiboc,<sup>61</sup> “Yesudi yanguc miwec, ‘Na Wapongte Ibu-mac hembalackelu hadeng habackang aiyemewa hatacmac badacte, na tapiline yogolecsoc fagac.’”

<sup>62</sup> Inguc miboc depec-baba ngic yengele damong sugucnedi fangkelu Yesu yanguc uwacnowec, “Ga yowa migaic, yogolec nebocene monic mi bafaliyedamecte, me?”<sup>63</sup> Inguc mime Yesu ye waickelu domawec.

Domame depec-baba ngic yengele damong sugucnedi hatac edowec, “Wapong gaga fileine, yele haicka uwagelebe ga yowa noine minong. Ga Mesia, Wapongte madec me miyac, yogo edocnubac.”

<sup>64</sup> Inguc mime yedi bafaliyelu yanguc edowec, “I hocne gageuc migic. Aime yanguc edocngebabe, yakumac nga galu fenowagaing iwa, Ngenge Ngicite Madec ye Tapilitowa fileine, yele foleinapec ngiyelu honoc-mengte kaguwa kwelina kwesime nganidaingte.” (*Mige 110:1; Dan 7:13-14*)

<sup>65</sup> Inguc mime depec-baba ngic yengele damong sugucne ye ngageme Wapong fecnowecte aalickeme ngakpi daleine basulackelu yanguc miwec, “Ngenge yowaine sowacne ngagegaing. Ye Wapong fecnogacte, monicti sowacneine nganiwec, nongileng ngic ingucne hatac mi basackedabelengte.

<sup>66</sup> Ngenge yowa yogo ngagelu wenuc migaina?”

Mime yengi bafaliyelu yanguc miibong, “Ye homadaicte hocne.”

<sup>67</sup> Inguc milu yenge Yesu haic-mesuina sofockelu moledi wepatangkeibong. Aime gocne yengi moledi kingkpung holelu<sup>68</sup> yanguc miibong, “Ga Mesia aigicka, madi wecgugac, yogolec siduc-yowa minong!”

### *Yesu bisockewec*

*Mrk 14:66-72; Luk 22:56-62; Yoa 18:15-18,25-27*

<sup>69</sup> Inguc ailu gabong Pita ye oda kwelina mac-sobengka ngiyewec. Ngiyeme kwelec-adu monicti yela lelu miwec, “Ga Galili ngic hocne Yesu-holec gaing.”

<sup>70</sup> Mime ye ngic-ngigac sasawa ngiyeibong, yengele haicka bisockelu miwec, “Ga yowa migic, yogo mi ngage-motogabac.”

<sup>71</sup> Inguc milu odale nuwa leemewa kwelec-adu monicti nganilu ngic-ngigac iwa domaibong, yenge yanguc edocebawec, “Ngic yogo ye Yesu Nasaret-hocni, yeholec hocne gaing.”

<sup>72</sup> Edocebame Pita ye Wapongte wacka hatacmac bisockelu yanguc miwec, “Na ngic yogo mi ngagegabac.”

<sup>73</sup> Inguc milu domaemewa ngic yenge Pitala lelu miibong, “Nonge malac-gone ngagegabeleng, ga foinac yengele alingkacni.”

<sup>74</sup> Edobong ye yeuctihac sanangkelu yowa yanguc miwec, “Na ngic yogo mi ngagegabac. Na yowa kwasacngebagabacka Wapongte aalictie bagewa gadac.”

Inguc mime iwahac kokolec ngicne hiyawec. <sup>75</sup> Aime Yesudi yowa biyachac edowec, yogo ngagesiwec, “**Kokolec ngicne mi hiyaemewa, gagi biyac na bisocnung alecine habackang aidaicte.**” Pita ye yowa yogo ngagesilu oda lobina haulu kwele-sowac sugucne ngagelu hii sugucne hac hiyawec.

## 27

### *Yesu Pailatla bahikeibong*

*Mrk 15:1; Luk 23:1-2; Yoa 18:28-32*

<sup>1</sup> Mac saeme depec-baba ngic micne nga Yuda ngic-ngigac yengele da-mongfocngineng yengele kwele-moniyang ailu Yesu homanale mipangkeibong. <sup>2</sup> Mipangkelu Yesu moleine dodockelu Yudeya himongte gawana Pailat, yela bahikelu yele molewa loibong.

### *Yudas mucnaguwec*

*Sale 1:18-19*

<sup>3</sup> Aime Yesu homanale mimoctobong, Yudas mudoc ngic ye yogo nganilu miwec, “Na omale aibaba inguc aibac?” Inguc milu kweleine hefaliyeme siliwa moneng 30 lacoibong, yogo depec-baba ngic micne nga Yuda ngic-ngigac yengele damongfocngineng yengele hatacmac yelenale bahikewec.

<sup>4</sup> Bahikelu yanguc edocebwec, “Ngagegaing, nani bikic balu kwesac aibe ngic sowacneine mikac, yogo webong homadaicte.”\*

Inguc mime yengi yanguc miibong, “Yogo nongelete umac miyac, yogo gale umac.”

<sup>5</sup> Yenge inguc milu moneng yogo hegilebong, ye bahikelu Ibu-macka wickeme feme hegile hikelu mucnagulu homawec.

<sup>6</sup> Aime depec-baba ngic micne yengi siliwa moneng yogo kpaduckelu miibong, “Moneng yagodi sac fuli bawec. Ilec ailu moneng yago Ibu-macte katapawa mi lonoga, yogolec yefe monic mi fagac.” <sup>7</sup> Inguc milu yenge yowa hefelu moneng yogodi kwilic-ngic yengele dongesi fikenale hebec kudi-baba ngic, yengele bole himong monic fuli baibong. <sup>8</sup> Aime himong yogolec wacine Sac-himong molickelu wackeibong. Aime yogo yakumac fagachac. <sup>9-10</sup> Siduc-mimi ngic Yeremiyadi yowa yanguc miwec, yogo noineholec aiwec, “Aibaba yanguc fikenale Sugucnedi edocnuwec, ‘Israel madecfocine yenge ngic yele fuli loibong, “Yogo siliwa moneng 30 yogolecsoc,” inguc miibong. Aime yenge moneng yogo balu yogodi hebec kudi-baba ngic yengele bole himong monic fuli baibong.’ ”†

### *Yesu homanale mipangkewec*

*Mrk 15:2-15; Luk 23:3-5,13-25; Yoa 18:33; 19:16*

<sup>11</sup> Aime yenge Yesu bahikelu gawanale haicka lobong domame yedi yanguc uwacnowec, “Ga Yuda ngic-ngigac yengele ngictau, me?”

Inguc mime Yesudi bafaliyelu yanguc edowec, “**Yogo hocne gageuc migic.**”

<sup>12</sup> Aime depec-baba ngic micne nga Yuda ngic-ngigac yengele damongfocngineng yengi domalu yele sowacne miibong, yowa yogolec ameine monic mi bafaliyewec. <sup>13</sup> Inguc aime Pailatdi yanguc uwacnowec, “Yenge yowawa

<sup>\*</sup> **26:75:** Mat 26:34    <sup>\*</sup> **27:4:** Yefe-yowa 27:25 iwa yanguc migac, ngic monicti moneng bame, monic webong homame sacine hetingkedaicte, ye Wapongte aalictie bagewa gadaicte.    **27:5:** Sale 1:18-19; Mat 26:14-15    <sup>†</sup> **27:9-10:** Mataiodi Yeremiyah 32:6-9 nga Sekariya 11:12-13 kpatulecepalu migac.

**27:9-10:** Sek 11:12-13    **27:12:** Yes 53:7

locgulu yowa homacnebenang migain, ga yogo mi ngagegic, me?" <sup>14</sup> Mime ye yowa monic mi bafaliyeme gawana ye kwatacke-benangkewec.

<sup>15</sup> Aime gawana ye Ewalicebaicnele hombangte damengsoc yanguc ailu gawec. Ngic monic muc-macka ngiyeme, Yuda ngic-habu yengi yele wac wackebong, ye ngic yogo lukecnolu muc-mackacni hegileme wahike-caigac, inguc ailu gawec. <sup>16</sup> Dameng iwa kindololo ngic monic muc-macka ngiyewec, wacine Barabas, yenge aibabaine ngagecnogaing. <sup>17</sup> Aime ngic-nigic kpaduckeyackelu domaebongka Pailatdi yanguc uwayelewec, "Ma ngic lukengellebele ngagegaing, Barabas, me Yesu, wacine monic Mesia wackecaigaing?" <sup>18</sup> Aime Yuda ngic micne yenge Yesu moc hasowac aicnolu yele molewa lonogale bahikeibong, yogo ngageyelelu inguc miwec.

<sup>19</sup> Aime Pailat ye mimocto-mimoctole damengka mac ngiye-ngiyeina ngiy-eemewa ngigacinedi yela yowa yanguc lome hikewec, "Ga ngic dondonne yele yowa monic mi midamec, ga hegiledamec. Na debocka falu gungka nganilu yele ailu kwele-umac sugucne bagabac."

<sup>20</sup> Aime depec-baba ngic micne nga Yuda ngic-nigic yengele damongfoc-ningeng yenge ngic-nigic habu kpafengebabong yenge Barabas lukeyele-nae miibong. Nga Yesubac wehomanogale miibong.

<sup>21</sup> Aime gawanadi yanguc uwayelewec, "Ngic yaeckang domagabiye, yekelacni ma ngic lukecnobele ngagegaing?"

Inguc mime yenge yogo ngagelu yanguc miibong, "Barabas!"

<sup>22</sup> Inguc mibong yanguc uwayelewec, "Inguc aime Yesu, wacine monic Mesia wackecaigaing, yele wenuc aidacte?"

Inguc uwayeleme yenge sasawadi yanguc miibong, "Ga ye malicpongka weng homana!"

<sup>23</sup> Inguc mibong Pailatdi hatacmac uwayelewec, "Aime ye oma sowacne aiwec?"

Inguc mime yengi hatacmac dacineholec aukwelu wackelu miibong, "Ye malicpongka weng homana!"

<sup>24</sup> Inguc milu domabong Pailat ye nganilu yowa dononne minogale kpungkewec. Aime yenge sanangnehac wackelu domabong hendolong sugucne fikewec. Fikeme ye misa balu ngic-nigic habutowa yengele haicka domalu moleine suwelu yanguc miwec, "Ngic yagolec sacte bikic, yogo nala mi fadaicte, yogo ngengela fadaic."

<sup>25</sup> Inguc mime ngic-nigic yenge sasawadi yowaine bafaliyelu yanguc miibong, "Yele sacte bikic yogo nonge nga adu-madecfocnonggeng nongela fadaicte."

<sup>26</sup> Aime Pailat ye Barabas lukecnome yengela hauwec. Aime yengi Yesu socine muc-hududi welubac, malicpongka weninge hudu-baba ngic yengele molewa lolu hegileyelewec.

### *Aibaba sowacne aicnoibong*

*Mrk 15:16-20; Yoa 19:2-3*

<sup>27</sup> Aime gawanale hudu-baba ngicfocine yengi Yesu gawana nga hudu-baba ngic yengele macte oda kwelina baleibong. Lebong hudu-baba ngic sasawadi kpaduckeibong. <sup>28</sup> Kpaduckeyackelu Yesu yeicne ngakpiine hemoc-tocnolu ngictaule ngakpi dalicne ingucne monic sasacne holecnobong hauwec. <sup>29</sup> Haume ngictaule duu ingucne muc-somang monic patiyelu hingoc ingucne hodocina holecnobong hauwec. Haume ngictaule yasu ingucne monic lacnobong mole-foleinedi balu domawec. Inguc ailu haicina

ketadi holecnolu midelec aicnolu yanguc miibong, "Ohec, Yuda ngic-ngigac yengele ngictau." <sup>30</sup> Ailu yenge sofockelu yasu ewalilu yasu yogodihac hodocina weibong. <sup>31</sup> Welu misulec aicnobong motome, yengileng ngakpi dalicne hemoctocnolu yeicne ngakpiine hatacmac holecnobong haume mal-icpongka wenogale mengockelu hikieibong.

*Yesu malicpongka weibong*

*Mrk 15:21-32; Luk 23:26-43; Yoa 19:17-27*

<sup>32</sup> Bahikelu yefewa ngic monic bafuwaibong, wacine Saimon, ye Sairini taonkacni, yedi Yesule malicpong tengkenale dogbac aicnobong tengkeme hikieibong. <sup>33</sup> Hikegacgu himong bulilicine monic, wacine Goligata wackelu gaibong, yoglec fungine Hodoc-luwe, iwa hike sulumeibong. <sup>34</sup> Hike sulumelu waing misa wiyac monic hobecineholecti lalickeicne, yogo doic tapiliine bawanane gumeibong, ye wiyac yogo nongagec ailu hegilewec. <sup>35</sup> Aime yenge ye malicpongka webong domame ngakpi-kpolucine loling monic ailu lanac-ganac aiiibong.

<sup>36</sup> Inguc ailu damong ngiyeibong. <sup>37</sup> Aime ye domame yowawa loibong, yoglec fungine tafe kpisicna malicpong hodocina loibong, yogo yanguc kwelengkelu loibong, "Yago Yesu, Yuda ngic-ngigac yengele ngictau."

<sup>38</sup> Ailu yenge kindololo ngic yaeckang, monic foleinapec nga monic kanainapec yeholec malicpongka momoc wecepaibong. <sup>39</sup> Aime ngic-ngigac iwa lec-welec aiiibong, yenge Yesu misulec aicnolu hodocngineng dudalingkelu <sup>40</sup> yanguc miibong, "Kwele-sowac aigelegabeleng, gageicne Ibumac hembalackelu hadeng habackangte kwelina hatacmac banogale miing. Ailu Wapongte madec gagickabac gageuctihac baficnagulu malicpongkaci fotockelu wanong!"

<sup>41</sup> Aime depec-baba ngic micnefocngineng, nga Wapongte yefe-yowale wewedu ngic ailu Yuda ngic-ngigac yengele damongfocngineng, yengi inguchac misulec aicnoibong. <sup>42</sup> Ailu yanguc micnoibong, "Ye ngic-ngigac gocone bafacebaaicgac. Nga yeicnebac nalic mi baficnagudaite. Ye Israel nongileng ngictau gadecka, yakumac malicpongkaci wana. Inguc aime ngagesingkedabelengte! <sup>43</sup> Ye yanguc milu Wapong ngagepangkecaigac, 'Na Wapongte madec,' inguc micaigac. Ilec Wapongti yele angackecaigackabac yakuc malicpongkaci bamoctona." <sup>44</sup> Aime kindololo ngic yeholec momoc wecepaibong, yeki yowa silicine ingucnehac yowa kwekwe aicnoiboc.

*Yesu homawec*

*Mrk 15:33-41; Luk 23:44-49; Yoa 19:28-30*

<sup>45</sup> Aime wenac hewac-hewac 12 kilok aiyemewa, mac kundung kweme kundungti himong someckelu falu game 3 kilok mac awelewec. <sup>46</sup> Aime 3 kilok aiyemewa Yesudi malac sugucnehac aukwelu yanguc miwec,

**"Eli, Eli lema sabaktani."** Ilec fungine yanguc, **Wapongne Wapongne, ga omale hegilecnugic?** *(Mige 22:1)*

<sup>47</sup> Aime ngic-ngigac domaibong, yengelacni gocnedi yowa yogo ngagelu yanguc miibong, "Ye Wapongte siduc-mimi ngic wacine Elaiya wacke-wasic aicnogac."

<sup>48</sup> Inguc wackeme monicti ngagelu dacineholec gasacke hikelu spans<sup>‡</sup> monic balu waing hobecineholecka kpomuluckelu kpingka lolu Yesule

micka lome fewec. <sup>49</sup> Aime gocnedibac misulec ailu yanguc miibong, "Ngenge yogo hegilebong, Elaiya foinac kwesilu bafickeme nganinang."

<sup>50</sup> Aime Yesu ye hatacmac malac sugucne hac wackeme asuine ofeme homawec.

<sup>51</sup> Hei, iwashac Ibu-macte kpoluc sugucne<sup>§</sup> yogo hewacka yefe wilengkacni fockelu wame yaeckang aiiboc. Ailu memeya sugucne bame fegengka posa sugucne sugucne siyeckeibong. <sup>52</sup> Aime dongesi fayackewec, yogo angkeme ngic-ngigac gbagbacne esecne homaibong, yengelacni homacnedi sockolec gboliyelu fangkeibong. <sup>53</sup> (Fangkelu wangec ailu gabong, Yesu ye dongesiwacni gboliyelu fangkeme, yenge yele lobewa dongesi hegilelu taon gbagbacne, iwa hikelu ngic-ngigac homacne fikeyeleibong.)

<sup>54</sup> Aime hudu-baba ngic yengele damong nga hudu-baba ngicfocene Yesule damong domaibong, yenge memeya nga wiyc fikewec, yogo nganilu damuebawec. Damuebame weleckelu yanguc miibong, "Foinac, ngic yago ye Wapongte madec hocne."

<sup>55</sup> Aime ngigac homacnedi Galili prowinswacni Yesu kwelec kweecnonitoringte balaibelu kwesiibong. Ailu Yesu weibong, yenge iwa kwesi dadalisuc domalu wiyc ngani-ngagec aiibong. <sup>56</sup> Yengelacni ngigac gocne wacngi-neng yanguc, Maria wacine monic Magadalen. Ailu Maria monic, ye Yakobos nga Yosefe yekele nenggacnginec. Ailu Sebedi madeckecine yekele nenggacnginec, yenge ngigac habu yengeholec domaibong.

### *Yesu longkeibong*

*Mrk 15:42-47; Luk 23:50-55; Yoa 19:38-42*

<sup>57</sup> Aime Arimatea taonkacni ngic monic monengtowaineholec gawec, wacine Yosefe, ye Yesule mic-tengteng gawec. Ye mac aweleme <sup>58</sup> Pailatla hikelu Yesule kponggbong banogale uwacnowec. Uwacname Pailatdi kponggbong laconalone micnowec. <sup>59</sup> Lome Yosefe ye Yesule kponggbong yogo balu kpoluc gbagbacne monic madicnebenang, yogodi wabungkelu bahikewec. <sup>60</sup> Bahikelu yeicne dongesi gbolicne monic posa henebe gufuicna fawec, iwa Yesule kponggbong lolu posatowa monic kpalundungkeme dongesi yefine yogodi hedickeme domame hikewec. <sup>61</sup> Aime Maria Magadalen nga Maria agoine, yeki dongesi yefine yegena iwahaic nganilu ngiyeiboc.

### *Dongesi damongkeibong*

<sup>62</sup> Saeme Sabat aime depec-baba ngic micne nga Farisaio yenge kpaduckelu Pailatla hikelu <sup>63</sup> yanguc miibong, "Sugucnenonggeng, kwesac-ngic yogodi gbolicne gawecka, yowa monic miwec, nonge yogo ngagesigabeleng. Yogo edocgubeng ngagenong, 'Na homalu fabe hadeng habackang aiyemewa, Waponti homackacni hatacmac bagboliyecnume fangkedacte.'

<sup>64</sup> Gacgu mic-tengtengfocene yengi kwesilu kponggbongine hise bahikelu, yanguc midaingkale, 'Ye homackacni gboliyelu fangkeyec.' Ilec ga dongesi damongkeningte edocebaengka yenge hikelu hadeng habackang damongkedabieng. Esecne kwesac monic aiwec, yogo faemewa lobaina kwesac hatacmac aime suguledaickale, yoglec edocgugabeleng."

<sup>65</sup> Inguc mibong Pailatdi yanguc edocebawec, "Nalic, na hudu-baba ngic milu edocebabe ngenge momoc hikedaina. Yenge dongesi damongkeningte

<sup>27:48:</sup> Mige 69:21    § <sup>27:51:</sup> Kpoluc yogo mac gbagbacne, nga mac gbagbacnebenang, yekele hewacka loicne.    <sup>27:51:</sup> Wah 26:31-33; Hib 10:19-20    <sup>27:55:</sup> Luk 8:2-3    <sup>27:58:</sup> Yef 21:22-23

<sup>27:60:</sup> Yes 53:9    <sup>27:63:</sup> Mat 12:40; 16:21; Mrk 9:31; 10:33-34; Luk 9:22; 18:31-33; Yoa 2:19-21

tapili balu gagaing, yogolec silicina damongkedabiyengte.” <sup>66</sup> Inguc mime yenge hikelu dongesi nuine posadi baicne yogo mi baickeningte feina aka lobong fawec. Ailu hudu-baba ngic yengi damong domaningte edocebai-bong.

## 28

*Yesu ye dongesiwacni fangkewec  
Mrk 16:1-10; Luk 24:1-10; Yoa 20:1-18*

<sup>1</sup> Sabat dameng motome Sonda ubiyacte mac sae-saele Maria Magadalen ailu Maria agoine, yeke dongesi nganinogale hikeiboc.

<sup>2</sup> Hei, Sugcnele angelo monicti honocmengkacni wame memeya sugcne tapiliineholec bawec. Bame yedi dongesile posa-nu yogo igockelu kpalundungkeme hikeme feina felu ngiyewec. <sup>3</sup> Ailu ye haicine ngani-nganiine latac-latac, nga ngakpiine kwalacne kaguwa ingucne. <sup>4</sup> Aime dongesi damong yenge ye nganilu hangocebame dengdeng kwelu homanogale ailu faibong.

<sup>5</sup> Aime ngigac yeke hikeboc angelodi yanguc edocepwec, “Ngeke mi hangocngepana, ngeke Yesu malicpongka weibong, ye nganinogale kwe-sigabiyc, yogo na ngagegabac. <sup>6</sup> Aime yebac yawa mi fagac. Ye yowa edocngebawec, yogo hocne balaibelu gboliyu fangkegac. Ngeke ya welelu mapicine nganicnic. <sup>7</sup> Ngagegaic, ngeke yogo nganilu biyac hikelu mic-tengtengfocine yanguc edocebanic, ‘Yesu ye homackacni biyac gboliyu fangkegac. Ye molickengelelu Galili prowinswa hikegac, ngenge iwa hikelu bafuwadaingte.’ Yowa yogo yakumac hocne edocngebape ngagegabiyc.”

<sup>8</sup> Inguc aime yeke hangocepame dongesi hegilelu belic-belicka mic-tengtengfocine siduc edocebanogale biyac gasackelu hikeiboc. <sup>9</sup> Gasacke hikelu yefewa Yesu bafuwaboc yedi yanguc miwec, “**Wenac-madic.**” Inguc mime yeke emeina lelu ngosockelu higeina balu afeeiboc. <sup>10</sup> Aime Yesudi yanguc edocepwec, “**Ngeke mi hangocngepana. Ngeke hikelu ngic hae-gba focne\*** Galili prowinswa hikeninge edocebaboc, yenge iwa hikelu nganicnudaingte.”

### *Hudu-baba ngic yengele siduc*

<sup>11</sup> Aime ngigac yeke hikeebcka hudu-baba ngic gocne yenge dongesi damongkeibong, yengelacni gocnedi taonka felu wiyc fikewec, yogolec siduc depec-baba ngic micne edocebayackeibong. <sup>12</sup> Edocebabong yenge Yuda ngic-ngigac yengele damongfocngineng yengeholec mingagec ailu yowa hefeibong. Ailu yowa mipangkelu hudu-baba ngic dongesi damongkeibong, yengi yowa miningte moneng yogolecsoc yelelu <sup>13</sup> yanguc miibong, “Ngenge yowa yanguc milu edocebadaing. ‘Nonge debocka gung faebengka ye-icne mic-tengtengfocine yengi kwesilu kponggbongine hise balu hikegaing,’ ngenge inguc midaing. <sup>14</sup> Aime gawana ye yowa yogo ngagelu wiyc monic mi aingeledaite. Ilec ngenge mi hangocngebadaic. Nongi yeholec yowa nalic mingagec aidabelengte.” <sup>15</sup> Inguc milu edocebabong hudu-baba ngic yenge moneng yogo balu yowa edocebaibong, yogo mibong sugulewec. Aime kwesac-yowangineng yogodi Yuda ngic-ngigac yengela sawelu fawecti yakumac fagachac.

**28:6:** Mat 12:40; 16:21

\* **28:10:** Ngic yogo yenge Yesule mic-tengteng. Yesudi ngic hae-gba

wacebawecte golowacfocine aigaing. **28:10:** Mat 26:32

*Mic-tengteng bole badaing**Mrk 16:14-18; Luk 24:36-49; Yoa 20:19-23*

<sup>16</sup> Aime Yesu ye biyachac gbolicne gawecka mic-tengteng 11 yenge Galili prowinswa kuplic monic iwa hikeningte edocebawec, iwa feibong. <sup>17</sup> Felu yeicne nganilu mitengkelu afeeibong. Aime ngic moniyang moniyangti sugu kwelenginengti mi ngagepangkeibong. <sup>18</sup> Aime Yesudi haicnginang welelu yanguc edocebawec, “**Ngagegaing, himong nga honocmenkte boleyo tapiliineholec sasawa na biyachac neleyackewec.**” <sup>19</sup> Ilec ngenge hikelu ngic-ngigac himongne himongne sasawa bacebabong nale mic-tengtengfocne aidaing. Ailu ngenge Mamac nga Madec ailu Tili Asule wacka misa lowayeledabiyyeng. <sup>20</sup> Aime nani ung-yowa sasawa edocngebalu gaiba, ngenge yowa yogo sasawa balaibeyackeningte edocebalu weduyeledabiyyeng. Ailu ngagegaing, na hadengsoc hadengsoc ngengeholec gabe himongte dameng motodaicte.”

## Marekodi Yesule Siduc Madicne Kwelengkewec

### *Mimi-yegeng yowa*

Mareko wacine monic yogo Yoane. Aime ye Yesule mic-tengtengfocine 12 yengelaci miyac. Ye Banabasle madec, Yerusalem iwa sugulewec. Ilec Yesu ngani-ngagec aicnowec. Mareko 14:51-52 iwa yeicne siduc kwelengkewec mecne. Lobewa ye Pol nga Pita yekeholec bole balu gawec. Aime gocnedi hibi yago wafelu yanguc ngageibong, Pita ye Yesule siduc gocne edolu weducnowec.

Yesu ye homame hifa 25 ngama ingucne motome, Marekodi molickelu Yesule siduc yago kwelengkewec. Roma ngic-ngigac yenge yanguc milu gaibong, “Tapili yogo wiyc feicne aigac.” Ilec Mareko ye Roma ngic-ngigac yengele ngagelu Yesule aibaba tapiliineholec homacne kwelengkelu Yesule yowa gocne sugu kwelengkewec.

### *Yowa yago hibi nebocina fagac*

1:1-13 Molic-molic yowa: Yesu kwesiwec

1:14-8:21 Yesudi Galili iwa lolickelu bole bawec

8:22-10:52 Yesudi Yerusalem iwa hikegacgu bole bawec

11:1-14:42 Yesudi Yerusalem iwa bole balu weduyelewec

14:43-16:20 Yesu balu webong homawec, ailu gboliyelu fangkewec

### *Yoane misa-lowac*

*Mat 3:1-12; Luk 3:1-9; 3:15-17; Yoa 1:19-28*

<sup>1</sup> Yago Yesu Kristo Wapongte Madec, yele Siduc Madicne molickelu fikewec. <sup>2</sup> Yogolec siduc Wapongte siduc-mimi ngic Yesaiyadi yanguc kwelengkewec fagac,

“Ngagegic, na mic-yowa mimine salebe yedi molickegelelu yefegone bame madickegeledaite.” (*Mal 3:1*)

<sup>3</sup> “Aime himong kisiwa misaine mikacka yedi yanguc sanangne wackedaite, ‘Ngenge Sugucnele yefe wesackelu hole-wenengkening.’” (*Yes 40:3*)

<sup>4</sup> Yowa yogolec silicka Yoane kwesiwec. Kwesilu himong kisiwa misaine mikacka galu ngic-ngigac kwelengineng hefaliyeme bikicngineng miyac aime misa lowaningte edocebalu weduyelewec. <sup>5</sup> Aime ngic-ngigac yenge Yudeya himongkacni nga Yerusalem taonkacni sasawadi yela hikeibong. Hikelu bikicngineng mifickeybong yedi Yodan misawa domalu misa lowayelewec.

<sup>6</sup> Yoane ye ngakpiine kamel dowiecinedi baicne, yogo holelu umbikaine monic sic socinedi baicne, yogodi hewacina hefeli gawec. Ailu ye ipowa nga hasengte begec misaine nolu gawec. <sup>7</sup> Ye ngic-ngigac yowa yanguc edocebalu weduyelewec, “Ngic nale lobewa kwesidaite, yele tapiliidi nale tapili ewaligac. Na waweweine ingucnedi ngosockelu yele hige-ebecte mucine lukebe nalic mi madickedaite. <sup>8</sup> Na misa lowangelegabac. Nga yedibac kwesilu Tili Asudi lowangeledaite.”

*Yesu misa lowacnowec*

*Mat 3:13-17; 4:1-11; Luk 3:21-22; 4:1-13*

<sup>9</sup> Hadeng monic Yesu ye Nasaret taon Galili prowins yogo hegilelu Yodan misawa hike sulumewec. Hikeme Yoanedi misa lowacnowec. <sup>10</sup> Lowacnome Yesu ye misawacni ofeme, iwahac honocmeng angkeme Asudi tudiling nangole silic ingucne ailu yela wame nganiwec. <sup>11</sup> Nganime honocmengkacni mic-yowa monic yanguc fikeme ngagewec, “Ga nale madec, kwelenedi gale angac ngagegabac, na ga ngani-angac aigelegabac.”

<sup>12</sup> Aime iwahac Asudi Yesu saleme himong kisiwa misaine mikacka hikewec. <sup>13</sup> Hikelu hadeng 40 gaemewa Satang yedi lokwesacka lowec. Kwesackeme sanangne domalu kate-sic yengeholec gacgume angelo yengi bafickelu gaibong.

*Yesu ye boleine fungkelu bawec*

*Mat 4:12-22; Luk 4:14-15; 5:1-11*

<sup>14</sup> Ngic yengi Yoane muc-macka lobong ngiyeme, Yesu ye Galili prowinswa hikelu Wapongte Siduc Madicne edocebalu weduyelelu <sup>15</sup> yanguc miwec, “**Dameng biyac welegac. Wapongte ngani-damongti bangkalecngebagacte, ngenge kwelelengeng hefaliyeme Siduc Madicne ngagesingkening.**”

<sup>16</sup> Aime Yesu ye Galili lifuc mecina hikecgú, Saimon nga gbaine Endru nganicpame yeke ufcnginec wickelu domaiboc. Yeke misa-sic baba ngic gaiboc. <sup>17</sup> Nganicpalu Yesudi yanguc edocepwec, “**Ngeke wele na balaibec-nunic. Ngic yengi misa-sic bacaigaing, ngeke silicine yogo ingucne hac ngic-baba bole banicte wedungetedacte.**” <sup>18</sup> Inguc mime yeke iwahac ufcnginec hegilelu Yesu balaibeiboc.

<sup>19</sup> Ailu yenge iwa lelu Yesudi Sebedi madeckecine, Yakobos nga gbaine Yoane nganicpawec. Yeke gombawa ufcnginec bamadickelu ngiyeiboc.

<sup>20</sup> Ngiyeebocka yedi nganicpalu wacepame yeke ngageiboc. Ngagelu iwahac mamaenginec Sebedi nga bole-ngicfocene gombawa ngiyeibong, yenge hegilebalu Yesu balaibeiboc.

*Aleng wonongkolec yebiyewec*

*Luk 4:31-37*

<sup>21</sup> Aime yenge Kapeneam taonka hikelu sulumuibong. Hike sulumelu gabong Sabat dameng aime, Yesudi kpakpaduc macka felu Wapongte yowa weduyelewec. <sup>22</sup> Aime yedi yowa weduyelewec, yogo ngic bolele hibi bacaigaing, yengele silic ingucne bole-yowa tapiliineholec weduyelewec. Ailu Wapongte yefe-yowale wewedu ngic yenge hibiwacni nganilu micaigaing yenge ingucne mi miwec. Ilec ailu yenge yowa weduyeleme ngagelu kwat-akeibong.

<sup>23</sup> Aime dameng iwahac kpakpaduc macka ngic monic aleng wonongkolecni ngiyelu aukwelu yanguc miwec, <sup>24</sup> “Yesu Nasaret-hocni, ga nongela wenuc aingale ngagegic? Ga basowalecnubanogale kwesigic, me? Na ngagegabac, ga Wapongte bingec.”

<sup>25</sup> Inguc mime Yesudi aleng wonongkolec yowa sanangne aicnolu yanguc edowec, “**“Ga waickelu ngickacni ofelu hikenong!”**” <sup>26</sup> Inguc mime aleng wonongkolecni ngic kpenda-kpendaelu wepackelu tapiliineholec aukwelu ofelu hikewec.

<sup>27</sup> Hikeme ngic-ngigac sasawadi kwatackelu medecebame yengilangkac uwanaaguibong, "Yogo oma wiyc fikegac? Yogo wewedu gbolicne, ailu ye bole fileinele tapiliineholec wedunolegac. Aime aleng wonongkolec inguchac yowa edocebame yenge yowaine ngagelu balaibegaing!" <sup>28</sup> Aime siducinedi Galili prowinswa biyachenang hikelu saweyackewec.

*Pita sefengngine*  
*Mat 8:14-15; Luk 4:38-39*

<sup>29</sup> Aime yenge kpakpaduc mackacni waibong. Aime Yakobos nga Yoane yeke momoc Saimon nga Endru, yekele macka hikeibong. <sup>30</sup> Hikelu feibong, iwa Saimon sefengngine ye soc-dac aicnome fawec, yogolec Yesu edoibong. <sup>31</sup> Edobong Yesudi yela lelu moleina balu bafangkewec. Bafangkeme iwahac hucine miyac aiwec, aime yedi nosingka bafacebawec.

*Ngic-ngigac bocay bamadicebawec*  
*Mat 8:16-17; Luk 4:40-41*

<sup>32</sup> Inguc aime mac debolenogale aime, ngic-ngigac yengi ngic-ngigac huck-olec nga alengkolec sasawa bacebalu Yesula kwesiibong. <sup>33</sup> Aime taonka ngic-ngigac sasawa yenge mac nuina kpaduckeibong. <sup>34</sup> Kpaduckeebongka, Yesudi ngic-ngigac huc haicine monic-monicti basowalecebaicne yenge bamadicebalu aleng bocay yebicebawec. Aime aleng yebicebawec, yogo yenge yele fungine ngageibongte ailu, aleng yengi yele fungine midaingkale, mimacebawec.

*Wapongte yowa miwec*  
*Luk 4:42-44*

<sup>35</sup> Aime mac mi saemewa, Yesu ye ubiyactebenang fangkelu taon hegilelu mac monic ngic mikacka hikelu milockewec. <sup>36</sup> Milockeemewa, Saimon nga agofocene yenge ye basackelu <sup>37</sup> hike bafuwalu yanguc edoibong, "Ngic-ngigac sasawadi ga basacgugaing."

<sup>38</sup> Inguc mibong yanguc edocebawec, "**Taon gocne bangkacne ngiyehikegac, nongileng iwa hikelu na yowa edocebalu weduyeledacte. I yan-gucte, na bole yogo hocne banogale kwesiiba.**" <sup>39</sup> Inguc mime yenge Galili prowinswa lolickelu hikeibong. Hikelu kpakpaduc macnginangsoc yedi yowa edocebalu weduyelewec, ailu aleng yebicebawec.

*Ngic waic-sanangkolec*  
*Mat 8:1-4; Luk 5:12-16*

<sup>40</sup> Aime ngic waic-sanangkolec monicti yela kwesilu ketadi holelu dogbac aicnolu yanguc miwec, "Ga ngageng angacgugacka, na nalic bamadicnung gbagbackedacte."

<sup>41</sup> Inguc mime Yesudi yele kweleine sowaleme moleine sungkelu ngic bauwalu yanguc edowec, "**Madicekte angacnugac.**" <sup>42</sup> Mime iwahac waicina wisiyeme socine madickewec.

<sup>43</sup> Madickeme Yesudi ngic yogo mimackelu salelu yanguc miwec, <sup>44</sup> "**Ngagegic, socgona pasi fikegac, yogolec monic mi edodamec. Ga depec-baba ngic yela hikelu socgona gbagbacne aigac, yogo edaliyengka, Mosesdi ibule miwec, yogolec silicina balaibelu lacnodamec! Ga inguc lacnoengka yenge ibugone nganilubac ngage-motodaingte.**" <sup>45</sup> Inguc mime ye hikelu sifu siduc yogo milu edocebame sawewec. Ilec ailu habutowadi kwesi-kpaduckelu domadaingkale, Yesu ye taonka hatacmac yegena mi gawec.

Ye taon lobina himong kisiwa misaine mikacka sugu gacgume ngic-ngigac neboc nga nebockacni sifu ye ngagesilu kwesiyackeibong.

## 2

*Yesu ye bikic hegile-hegile ngic*

*Mat 9:1-8; Luk 5:17-26*

<sup>1</sup> Hadeng gocne motome, Yesu ye hatacmac Kapeneam taonka hikelu macka fewec. Feme ngic-ngigac bocyacti yogo ngagelu <sup>2</sup> macka wakelu nuine hedickebong, yedi Wapongte yowa edocebalu weduyelewec. <sup>3</sup> Aime ngic 4 yenge ngic monic hige-moleine homaicne tengkelu yela hikeibong. <sup>4</sup> Ngagebong, ngic-ngigac bocyacti kwedickelu domaibong. Ilec ailu emeina lonogale kpungkelu mac feina tengkelu feibong. Felu mac bubuine nebocene basulackebong kikungngine fikewec. Fikeme yenge Yesu domawecka iwa ngic-puling dembengkolec lobong hauwec. <sup>5</sup> Haume Yesudi ngagengagesingngineng nganilu ngic-puling yanguc edowec, “**Madecne, bikic-gone biyac hegilegelegabac.**”

<sup>6</sup> Inguc mime Wapongte yefe-yowale wewedu ngic gocne yenge iwa ngiyeibong, yengi kwelenginang yanguc ngageibong, <sup>7</sup> “Ngic yogo ye omale yowa inguc milu Wapong fecnogac! Wapong moniyangti sugu bikic nalic hegiledaicte.”

<sup>8</sup> Yenge inguc ngagebong, Yesudi kwelenginang nganilu yanguc edocebawec, “**Ngenge omale ngage-ngage ingucne kwelenginengti ngagesigaing?**

<sup>9</sup> Weni yogodi efecne aigac? Ngic-puling yele yanguc minoga, ‘Bikicgone biyac hegilegelegabac’, me yanguc minoga, ‘Ga fangkelu dembenggone balu hikec.’ <sup>10</sup> Aime Ngicte Madec, ye himongka bikic hegilenale bole-yowa tapiliineholec facnogac, ngengi yogo ngageningte ailu yanguc mibe.” Ye inguc milu ngic-puling yanguc edowec, <sup>11</sup> “**Na edocgugabac, ga fangkelu dembenggone balu macgona hikec.**” <sup>12</sup> Inguc mime iwahac ngic ye fangkelu dembengngine balu ngic-ngigac yengele haicka hikewec. Hikeme ngicngigac sasawadi yogo nganilu kwatackelu mimedec ailu Wapong wacine bafelu yanguc miibong, “Wiyac yago mi ngani-nganiine yogo yakumac fikeme nganigabeleng.”

*Yesudi Liwai wackewec*

*Mat 9:9-13; Luk 5:27-32*

<sup>13</sup> Aime Yesu ye mac iwacni walu lifuc mecina hikewec. Hikeme ngicngigac bocyacti yela hikebong wewedu bole bawec. <sup>14</sup> Aime hikelu Liwai Alfaiusles madec, ye takes-baba macka ngiyeme nganilu yanguc edowec, “**Ga wele na balaibecnuc!**” Inguc mime ye fangkelu balaibelu hikewec.

<sup>15</sup> Hikecgú Yesu ye Liwaile macka nosing nolu ngiyeme, takes-baba ngic nga bikic-baba ngic bocyacti Yesu nga mic-tengtengfocine yengeholec nosing momoc noibong. Ngic ingucne bocyacti yenge balaibecebalu gaibong. <sup>16</sup> Inguc aime Yesu ye takes-baba nga bikic-baba yengeholec ngiyelu nosing nowec. Nome Farisaio yengelacni Wapongte yefe-yowale wewedu ngic gocne, yenge yogo nganilu mic-tengtengfocine yanguc uwayeleibong, “Ye omale takes-baba nga bikic-baba yengeholec nosing nogac?”

<sup>17</sup> Inguc mibong Yesudi ngagelu yanguc edocebawec, “**Ngic-ngigac hucngi-neng mikac gagaing, yenge dotale mi aiyelecaigac. Nga hucnginengkolec, yengibac dotale aiyelecaigac.**” Aime na ngic-ngigac dondonne wacebabe

nala weleningte mi waiba, miyac. Nabac bikic-baba ngic wacebabe nala weleningte waiba."

*Nosing-sawe gaga*

*Mat 9:14-17; Luk 5:33-39*

<sup>18</sup> Yoane mic-tengtengfocene nga Farisaio yenge nosing-sawe gacaigaing, yengelacni gocnedi kwesilu Yesu yanguc uwacnoibong, "Yoane mic-tengtengfocene nga Farisaio yengele mic-tengtengfocene yenge nosing-sawe gacaigaing. Aime gale mic-tengtengfocgone yenge omale nosing-sawe mi gacaigaing?"

<sup>19</sup> Inguc uwacnobong Yesudi yanguc edocebawec, "Baba-tumangte ngicti agofocene yengeholec ngiyeme yenge nosing-sawe nalic gadaingte, me? Ye yengeholec ngiyedaiete iwa nosing-sawe nalic mi gadaingte. <sup>20</sup> Gacgu dameng monicka ngic yengi baba-tumangte ngic agofocene yengelacni baickedaingte, dameng yogowabac nosing-sawe gadaingte.

<sup>21</sup> "Monicti ngakpi esecna kpoluc sindacine gbolicne monic mi gbdododaicte. Inguc aldaictewa, suweme kpoluc susucine gbolicnedi esecne fuluckeme sulackelu yefine suguledaiete. <sup>22</sup> Aime monicti waing gbolicne bokong sic socine esecnedi baicne, iwa nalic mi kweme haudaicte, miyac. Waing gbolicnedi siwinelu bokong esecne kwouckeme yeke momochac sowaledabiyeete. Ilec ailu waing gbolicne yogodi bokong gbolicna socne kweme haudaicte."

*Sabatle Sugucne*

*Mat 12:1-8; Luk 6:1-5*

<sup>23</sup> Dameng monicka Sabat damengka Yesu ye wit bole hewacina yefe balaibelu leme, mic-tengtengfocene yenge wit noine moniyang moniyang bamoctolu baibong. <sup>24</sup> Bamoctobong Farisaio yengi yogo nganilu yanguc miibong, "Nganinong, yenge omale Sabat damengka aibaba mi aiaiine aigaing?"

<sup>25</sup> Inguc mibong Yesudi ngageme madicne mi aime yenge yanguc edocebawec, "Dawidi nga bole-ngicfocene yenge nosing mikac aime nosingte homalu aibaba aiibong, ngenge yogo wafe-ngagec mi aicaigaing, me?

<sup>26</sup> Abiatadi depec-baba ngic yengele damong sugucne gawec, dameng iwa Dawidi ye Wapongte Ibu-macka fewec. Felu bret Wapongte ibu loicne, yogo banolu bole-ngicfocene inguchac gumecebawec. Nga bret yogo depec-baba ngic yengi sugu nalic nodaingte, ngichenang yengibac miyac. Aimebac Wapongti yengele mi ngage-sowalewec."

<sup>27</sup> Inguc milu yanguc edocebawec, "Ngicti Sabatle ailu mi fikewec, Sabat ye ngic-ngigac ngengele ailu fikewec. <sup>28</sup> Ilec ailu Ngicte Madec ye Sabatle Sugucne gagac hocne, ye aibaba madicne nga sowacnele nalic midaicte."

### 3

*Ngic moleine homaicne*

*Mat 12:9-14; Luk 6:6-11*

<sup>1</sup> Yesu ye dameng monicka kpakpaduc macka hatacmac feme ngic monic moleine nebec homaicne, ye iwa ngiyewec. <sup>2</sup> Aime ngic gocne yenge Yesu yowawa lonogale ngagesiibong. Ailu ngic yogo Sabat damengka bmadickedaicte me miyac, yogolec nganibiyebong. <sup>3</sup> Nganibong Yesudi ngic moleine homaicne yanguc edowec, "Ga fangkelu nongele hewacka domac."

<sup>4</sup> Inguc milu yanguc uwayelewec, “**Sabat damengka aibaba weni yogo nalic ainoga, aibaba madicne me sowacne ainoga? Ailu homanogale aigaing, yengele agong holenoga me wehomanacebanoga?**” Inguc mime yenge moc uc mikac ngiyeibong.

<sup>5</sup> Yenge kwelengineng fongkewecte ailu uc mikac ngiyeibong, ngage-hobeelu kweleine aalickeme dongedi lengani-welengani ailu ngic yanguc micnowec, “**Ga molegone sungkec!**” Inguc mime ngic ye moleine sungkelu madickewec. <sup>6</sup> Madickeme Farisaio yenge dameng iwahac Herodele aling-focine yengela hikelu yefe monic bafuwalu ye balu wehomanogale yowa milu hefeibong.

### *Yesula kwesiibong*

*Luk 6:17-19*

<sup>7</sup> Aime Yesu nga mic-tengtengfocine yenge mac-himong yogo hegilelu Galili lifucka hikeebongka, Galili prowinswacni ngic-ngigac habu sugucnedi yenge balaibecebaibong. <sup>8</sup> Aime Yudeya himongkacni ngic-ngigac, nga Yerusalem taonkacni, ailu Idumea himongkacni, nga Yodan misa neboci-nacni, ailu Tair nga Saidon himongkacni, habutowa yogo yenge Yesudi pasasawa bawec, yogolec siduc ngagelu yela kwesiibong.

<sup>9</sup> Aime ngic-ngigac bocyacti kwesilu Yesu igockedaingkale ailu, mic-tengtengfocine yengi gomba balu yele wangec lobong fanale milu edoce-bawec. <sup>10</sup> I yangucte, ye ngic bocycam bamacicebawecte ailu huckolec yenge hikelu oiyaningte hepacnaguibong. <sup>11</sup> Aime aleng wonongkolec yengi Yesu nganilu ngosockelu aukwelu yanguc miibong, “**Ga hocne Wapongte madec.**”

<sup>12</sup> Inguc milu yeicne fungine mibong yegengkedaickale ailu, Yesudi mimacebawec.

### *Mic-tengtengfocine 12 bawosaecebawec*

*Mat 10:1-4; Luk 6:12-16*

<sup>13</sup> Aime ye kupicka felu mic-tengteng gocne kweleinedi yeicneholec ganinge ngagesiwec, yogo mime yela hikeibong. <sup>14-15</sup> Hikebong mic-tengtengfocine 12 bawosaecebalu Salecebaicne wac yelewec. Yeleme yenge yeholec galu ngic-ngigac yowa edocebalu weduyeleningte, nga aleng yebice-baninge bole-yowa tapiliineholec yelewec.

<sup>16</sup> Ngic 12 bawosaecebawec, yengele wacngineng yanguc:  
Saimon, wacine monic Pita wackewec. Ailu

<sup>17</sup> Sebedi madeckecine, Yakobos nga

gbaine Yoane, yekele wacnginec Boaneges yetewec. Wac yogolec fungine, gbululungte madec.

<sup>18-19</sup> Aime Endru nga

Filip. Ailu

Batolomeu nga

Mataio. Ailu

Tomas nga

Yakobos, yogo Alfaiusle madec. Ailu

Tadeus nga

Saimon, ye Selot wackeibong. Ailu

Yudas Iskariot, yedi gacgu Yesu mudockeme badaingte.

### *Belsebulholec bole bacraigac, me?*

*Mat 12:24-32; Luk 11:14-23; 12:10*

<sup>20</sup> Aime Yesu ye macka hikeme habutowadi kwesilu kpaduckeibong. Aime mic-tengtfocine yengeholec nosing nolu ngiyenogale sawaine monic mi fikeyelewec. <sup>21</sup> Aime ngic hae-gbafocine yenge inguc ngagelu yanguc miibong, "Ye kweleine sifuwegac." Inguc milu ye banogale hikeibong.

<sup>22</sup> Aime Wapongte yefe-yowale wewedu ngic Yerusalemkocni kwesiibong, yengi yanguc miibong, "Ye aleng yengele micne Belsebul, yele tapiliwa bole balu ngic-ngigac yengelaci aleng yebicebacaigac."

<sup>23</sup> Inguc mibong Yesudi wacebalu nangeng yowa monic yanguc milu edocebawec, "Satang yeuctihac wenuc yebicnagudaicte? <sup>24</sup> Nga himong monicte ngic-ngigac yenge ngaba ainagulu siyeckedaingtewa, himongte ngic-ngigac yenge nalic mi gagidaingte, miyac. <sup>25</sup> Aime golowac monicti siyeckelu ngaba ainagudaingtewa, golowac yogo gilodaingte. <sup>26</sup> Aime Satang yeuctihac siyeckelu yebicnagudaicte, ye inguchac nalic mi gadaicte. Ilec na yele tapiliwa aleng mi yebicebagabac.

<sup>27</sup> "Ngic monicti ngic tapiliineholec, yele macka felu woc-wiyacine nalic mi ewalilu badaicte, miyac. Ye ngic tapiliineholec yogo mucti dodockelubac macine kwelina felu woc-wiyacine fagac, yogo nalic bayackedaite.

<sup>28</sup> "Foinac, ngic-ngigac yenge bikic haicine monic-monic aicaigaing, nga misulec aiyelecaigaing. Bikic ingucne sasawa, hegile-hegileine yogo fagac, yogo noine edocngebabac. <sup>29</sup> Nga monicti Tili Asu misulec aicnodaitewa, yele sowacne nalic mi hegiledaicte. I yangucte, ye sowacneinele ameine yogo fafeginowagac."

<sup>30</sup> Aime yengi yanguc miibong, "Ye aleng wonongkolec." Inguc miibongte ailu ye yowa inguc edocebawec.

*Yesu nenggac gbafocine  
Mat 12:46-50; Luk 8:19-21*

<sup>31</sup> Aime Yesu nenggac gbafocine yenge mac lobina hike sulumelu ngic monic salelu yanguc miibong, "Ga Yesu microengka wana."

<sup>32</sup> Inguc mibong habu yenge Yesu hewalingke-ngiyelu yanguc edoibong, "Ngagegic, nenggac gbafocgone yenge lobina kwesi domalu ga basacgu-gaing."

<sup>33</sup> Inguc mibong yedi yanguc edocebawec, "Weni yogo yengi nale nenggac gbafocne?"

<sup>34</sup> Inguc milu lolicke-ngiyeibong, doneine yengela hilalu yanguc miwec, "Ngic-ngigac yago ngiyegaing, ngengi nale nenggac gbafocne aigaing.

<sup>35</sup> Aime ngic Wapongte angac nga ngage-ngage balaibecaigaing, yengi hocne nale nenggac-sengfocne nga ngic hae-gbafocne aigaing."

## 4

*Wasec wicke-wicke  
Mat 13:1-9; Luk 8:4-8*

<sup>1</sup> Yesu ye lifuc meicina hatacmac hikelu ngic-ngigac yowa edocebalu weduyeleme, ngic-ngigac bocyachenangti kpaduckelu yela kwesiibong. Inguc aibong ye gomba monicka felu iwa ngiyeme, ngic-ngigac himongka domabong mic-yowa edocebawec. <sup>2</sup> Ailu ye nangeng yowawa siduc bocyac weduyelelu yanguc miwec, <sup>3</sup> "Ngagegaing, wasec wicke-wicke ngic monicti buc-wasec wickenale bolewa hikewec. <sup>4</sup> Hikelu wasec wicke, wasec

gocne yengi walu yefewa holeibong, yogo nango yengi kwesilu nowackebong.<sup>5</sup> Nga gocnedi posa tolowa holeibong, iwa himong efecnemac fawete, wasec yogo kwac biyac kwodulu ofeibong.<sup>6</sup> Ofebong godocngineng mi hauibongte aihu, wenacti ofelu kweme ululuwelu homaibong.<sup>7</sup> Nga wasec gocnedi kpinding kwelina holeibong. Holelu kwac kwodubong kpindingti sugulelu holebong noine mikac aiibong.

<sup>8</sup> “Nga wasec gocnedi himong guwcineholecka holelu kwacine kwodulu noine madicne aiibong. Monicte hucine yogo 30, nga monicte 60, nga monicte 100, inguc aiibong.”<sup>9</sup> Yesu ye inguc milu yanguc edocebawec, “Monic ye hedeckolecti yowa yago aneng ngagedaic.”

### *Nangeng yowale fungine*

*Mat 13:10-17; Luk 8:9-10*

<sup>10</sup> Aime ngic-ngigac habutowa yenge hikebong, mic-tengtengfocene 12 nga ngic-ngigac gocne yeholec gacaigaing, yengi nangeng yowa yogolec funginele Yesu uwacnoibong.<sup>11</sup> Uwacnobong yedi yanguc edocebawec, “Wapongte ngani-damongte ngage-ngage sangkeicne, yogo ngengi ngageningte biyac ngeleicne. Aime ngic-ngigac Wapongte ngani-damongte lobina gagaing, yengebac nangeng yowa sugu ngagegaing.<sup>12</sup> Inguc aime ‘Yenge dongenginengti wiayac monic nganilu nalic mi ngani-motogaing. Nga hedecnginengti yowa monic ngagelu, sifu nalic mi ngage-motogaing. Illec aihu yenge kwelengineng hefaliyeme bikicngineng miyac aidaickale, bikicngineng nalic mi hegiledaigte.’”<sup>13</sup> (Yes 6:9-10)

### *Wasec wicke-wickele fungine*

*Mat 13:18-23; Luk 8:11-15*

<sup>13</sup> Aime Yesudi yanguc edocebawec, “Na nangeng yowa migabac, ngenge yogolec fungine mi ngage-motogaing, me? Aihu nangeng yowale fungine gocne hatacmac mibe yogo inguchac wenuc ngage-motodaingte?<sup>14</sup> Wasec wicke-wicke ngicti Wapongte yowa wickecaigac.<sup>15</sup> Wasec yefewa holeibong, yogo ngic gocne yenge yowaine ngagedaingte. Aime Satang yedi biyac kwesilu yowa kwelenginang wickeicne fagac, yogo yedi baickeyelecaigac.

<sup>16</sup> “Nga wasec posa tolowa holeibong, yogo ngic gocne Wapongte yowa ngagelu kwelenginang biyac beliyelu sebilelu badaingte.<sup>17</sup> Aihu yowa kwelenginang godocine mi baicnele dameng kpisicnemac fame, Wapongte yowale aihu umac me weyebic aiyelebong yenge wawedaingte.

<sup>18</sup> “Nga wasec kpindingka holeibong, yogo gocnedi Wapongte yowa ngagedaingte.<sup>19</sup> Ngagelu sokte gagale ngageboc, nga moneng-mafale lokwesac nga wiayac gocnele ngani-angac aicaigaing, yogodi kwelenginang haulu sugulelu yowa hole-homame noine monic mi fikedaicte.

<sup>20</sup> “Nga wasec gocne himong guwcineholecka holeibong, yogo ngic gocnedi Wapongte yowa ngagelu balu gabong noine fikedaicte. Gocnedi 30, nga gocnedi 60, nga gocnedi 100 bafuwadaingte.”

### *Hifa mac ngiye-ngiyeina lonoga*

*Luk 8:16-18*

<sup>21</sup> Inguc milu yanguc edocebawec, “Monicti hifa kwendangkelu pakec bageina lome someckecaigac, me? Me mac ngiye-ngiyeinele bagewa lome ngiyeaigac, me? Yogo miyac! Ye hifa yogo kwendangkelu mac ngiye-ngiyeina lome ngiyeaigac.<sup>22</sup> I yangucte, wiayac sangke-sangke fagac, yogo gacgu yegengkedaicte. Nga wiayac someckecne, yogo gacgu fikedaicte.

**23 Monic ye hedeckolecti yowa yago aneng ngagedaic.**

**24** Ailu Yesudi yanguc edocebwec, “*Ngenge yowa yago ngage-motodaing. Ngenge wiyc umacine wosaelu ngic-ngigac yelecaigaing, aime umacine silicine ingucne hac wosaelu ameine ngeledaictc. Aime ngage-ngage-motoc hatacmac taockelu ngeledaictc.* **25** I yangucte, monic ye wiyc gocne balu gagac, ye wiyc hatacmac lacnodaictc. Nga monic ye wiyc monic mi balu gagac, yelacni wiyc kpisicne balu gagac, yogo ewalidaictc.”

### *Wasec yogo noineholec*

**26** Ailu hatacmac yanguc miwec, “*Wapongte ngani-damongte silicine, yogo ngic monicti wasec wickecaigac, yogo ingucne.* **27** Wickelu deboc hadeng fac-fangkec aiyemewa, wasec yogo kwodulu ofecaigac. Aime yogo yefe wenucka ofegac, yogo ngic ye mi ngage-motocaigac. **28** Aime himong yeuctihac wiyc basuguleme ofelu hekengngine aicaigac. Ailu noine sugulelu houwecaigac. **29** Houweme noine babale dameng aime ye noine biyac welockelu badaictc.”

### *Wapongte ngani-damong nga mastet hucine*

*Mat 13:31-32,34-35; Luk 13:18-19*

**30** Yesudi hatacmac yanguc miwec, “*Nongileng Wapongte ngani-damongte silicine wenuc holelu nangeng yowa mibeng nalic aidaictc?* **31** *Wapongte ngani-damong yogo mastet hucine ingucne. Mastet hucine yogo wasec hucine sasawa yengele kpisicnengineng.* **32** Aime yogo himongka lobong ofelu sugulelu nosing-bolele mendang ewalicebalu mangngine sugucne hac aicaigac. Aime sawawa nango yengi kwesilu yogolec mangngina yafo holelu ngyeacaigac.”

**33** Yesu ye nangeng yowawa siduc ingucne bocyac milu ngic-ngigac ngage-nagengenengte silicina Sugucnele yowa edocebwec. **34** Ailu yowa miwec, yogo nangeng yowawa sugu holelu edocebalu gawec. Edocebalu mic-tengtengfocene sugu bacebame yengilangkac hikelu fungine milu edocebame yegengkeme ngagelu gaibong.

### *Gbelontgi yowa ngagewec*

*Mat 8:23-27; Luk 8:22-25*

**35** Aime mac aweleme Yesudi mic-tengtengfocene yanguc edocebwec, “*Nongileng lifuc nebocina hikenang.*” **36** Inguc mime yenge ngic-ngigac habutowa hegilecebalu Yesudi gombawa biyac felu ngyiewec, gomba iwa yenge ye mengockelu hikeibong. Hikeebongka gomba gocne inguchac balaibecebaibong. **37** Aime iwahac gbelong sugucne tapilineholec welu dibongti gomba kwelina haulu bamungkenogale aiwec. **38** Aime Yesu ye gomba haina hodoc-kpaling holelu gung fame, mic-tengtengfocene yengi yeuckelu yanguc miibong, “*Wewedu, nongileng haulu homadabelengkale, ga yogolec ngageboc mi aigic, me?*”

**39** Inguc mibong ye gungkacni fangkelu gbelong ngelengkelu kpatalacnolu lifuc yanguc edowec, “*Ga waickelu fanong!*” Inguc mime gbelong miyac aime lifuc yogo kalong kwelu moc fawec.

**40** Fame Yesudi mic-tengtengfocene yengele yanguc miwec, “*Ngenge omale hangoc aigaing, ngage-ngagesingngineng monic mi fagac, me?*”

**41** Inguc mime yenge hangoc ailu damuebame yengungtihac yanguc uwaganaguibong, “*Ye ma ngic, aime gbelong nga misa lifuc yeke yele yowa ngagegabiyeck?*”

## 5

*Aleng yebiyewec  
Mat 8:28-34; Luk 8:26-39*

<sup>1</sup> Aime lifuc falockelu Geresa ngic-ngigac yengele himong nebocina ediyec neboc hikeibong. <sup>2</sup> Hike sulumelu Yesu ye gombawacni wawec. Iwa ngic monic aleng wonongkolec gawec, yedi dongesiwacni kwesilu Yesu bafuwawec. <sup>3</sup> Ngic yogo ye dongesiwa\* ngiye-fac ailu gawec. Game ngic monicti ye hatac nalic mi witickedaicte. Yenge senti witickenogale aibibiyeibong. <sup>4</sup> Ngic yengi dameng bocyac hige-moleine senti witickebong, ye sen yogo welockeyackewec. Aime higeine aen sen sugucnedi witickeibong, yogo inguchac welockeyackewec. Aime ngic yenge ye balu damongkenogale aibibiyeibong.

<sup>5</sup> Ngic yogo ye deboc hadeng dongesiwa nga fegengka aukwelu yeuctihac socine posadi helockelu gawec. <sup>6</sup> Ailu ye dalickahac domalu Yesu nganilu gasacke hikelu ketadi holecnowec. <sup>7-8</sup> Holecnome Yesudi aleng wonongkolec yelacni yebiyeme ofelu hikenale edowec. Inguc edome ngic yedi dacine-holec aukwelu yanguc miwec, "Yesu Wapong Feicnetowale Madec, ga nala wenuc ainogale ngagegic? Na Wapongte haicka edocgugabac, ga doicka mi locnudamec."

<sup>9</sup> Inguc mime Yesudi yanguc uwacnowec, "**“Ga wacgone ma?”**"

Uwacname miwec, "Na wacne Habutowa. I yangucte, nonge bocyac."<sup>†</sup> <sup>10</sup> Ye inguc mime Yesudi yenge yebicebame himong yogo mi hegileningte dogbac ailu micnowec.

<sup>11</sup> Aime himong iwa bec habu sugucne monic fegengka yogowahac suluk-welu gaibong. <sup>12</sup> Gaebongka aleng yengi yanguc milu dogbac aicnoibong, "Ga salecnubaengka becka haunang." <sup>13</sup> Inguc mibong Yesudi ngageyelelu yebicebame yenge baickelu bec-habu yengela hauibong. Haubong bec yenge fegengkacni gasackelu lifucka haulu misa nolu homayackeibong. Aime bec homaibong, yengele dzalengineng yogo 2 taosen ingucne.

<sup>14</sup> Homabong bec-damong yenge hangoc hikelu taonka nga mac-gogocka ngic-ngigac gaibong, yengela hikelu pasi fikewec, yогоlec siduc edocebabong yenge yogo nganinogale kwesiibong. <sup>15</sup> Aime yenge Yesula kwesilu nganibong, ngic aleng habituhaholecti esecne gawec, ye ngage-ngageine dulungkeme ngage-motolu ngakpi-kpoluc holelu ngiyeme, yenge ye nganilu hangocebawec. <sup>16</sup> Aime ngic dongenginengti pasi fikeme nganibong, yengi ngic alengkolec, yela pasi ingucnehab fikewec, ailu bec yengele siduc yogo momoc ngic-ngigac edocebaibong.

<sup>17</sup> Aime yenge yowa yogo ngagebong motome, Yesu ye yengele mac-himongningeng yogo hegilelu hikenale dogbac aicnolu edoibong.

<sup>18</sup> Inguc edobong ye gombawa feme, ngic alengkolecti madickewec, yedi Yesuholec hikenale dogbac aicnolu edowec. <sup>19</sup> Edome Yesudi kpatalacnolu yanguc miwec, "**“Ga macgona hikelu Sugucnedi gale kweleine sowaleme wiyac sasawa aigelegac, yогоlec siduc agofocgone edocebadamec.”**" <sup>20</sup> Inguc mime ye hikelu Yesudi pasi sasawa yela bawec, yогоlec siduc Dekapolis<sup>‡</sup> himongka ngic-ngigac yowa-siduc yogo milu edocebawec. Edocebame yenge yogo ngagelu mimedec aibong.

---

\* **5:3:** Mac iwa henebe kwelina dongesi fawec. Ilec ye mac ingucne ngiye-fac ailu gawec.      **5:7-8:**  
Mrk 1:24    † **5:9:** "Wacne Legion" miwec. Legion yogo ami aling monic, dzalengineng 5 taosen me 6 taosen.    ‡ **5:20:** Dekapolis yогоlec fungine taon 10.

*Adu monic bagboliyewec  
Mat 9:18-26; Luk 8:40-56*

<sup>21</sup> Aime Yesu ye gombawa felu hatacmac lifuc falockelu kwesi domame, ngic-ngigac bocyahti yele yowa ngageningte hikelu kpaduckebong. <sup>22</sup> Kpaduckeebongka kpakpaduc macte damong monic, wacine Yairus, yedi kwesilu Yesule higewa wafalu <sup>23</sup> dogbac aicnolu yanguc miwec, "Adune homanogale aigac. Ga welelu molegone feina loengka madickelu gana." <sup>24</sup> Inguc edome ngagelu yeke hikeebocka, ngic-ngigac habutowadi hepagnagulu ye balaibeibong.

<sup>25</sup> Aime ngigac monic iwa domawec, ye sac-dale aicname gaemewa hifa 12 biyachac aiwec. <sup>26</sup> Ailu ye dota bocyahtengene hikelu madickenale doic ngagelu monengngine moc wickelu gawec. Aime socine monic mi madickewec, ye socine sowaleme gawehechac. <sup>27-28</sup> Aime ngigac yogo ye Yesule siduc ngagelu ngic-ngigac lobenginang yefe lelu yanguc ngagewec, "Na ngakpiine oiyalu madickedacte hocne." Inguc ngagelu Yesule ngakpi dalicne yogo oiyawec. <sup>29</sup> Oiyame iwahac sacine kelengkewec. Aime socine mogungkeme hucine miyac aiwec, yogo ngagenaguwec.

<sup>30</sup> Aime Yesu ye kweleina ngageme tapiliine tofaine falockewec. Ilec ailu habutowa yengela hefaliyu yanguc uwayelewec, "**Madi ngakpine oiyagac?**"

<sup>31</sup> Inguc mime mic-tengtengfocine yengi yanguc miibong, "Ngic-ngigac homacnedi hepacgugaing. Aime ga omale madi oiyacnugac milu uwagic?"

<sup>32</sup> Aime Yesudi ngigac oiyawec, ye ngani-motonogale lengani-welengani aiwec. <sup>33</sup> Aime ngigac ye handockeme dendengkeme, Yesule higewa wangiyelu fungineine sasawa mifickewec. I yanguete, socina pasi fikewec, yogo ngagewec. <sup>34</sup> Yogo mifickeme Yesudi yanguc edowec, "**Ngigac, ga ngage-nga gesinggonedi bamadicgugac. Ga socgone madickegacte kwele-mogungkolec hikenong!**"

<sup>35</sup> Aime Yesu ye yowa milu domaemewa, ngic gocne yengi kpakpaduc macte damong yele mackacni kwesilu Yairus yanguc edoibong, "Adugone biyac homagac, ga wewedu hatacmac umac mi lacnoc!"

<sup>36</sup> Inguc mibong Yesu ye yengele yowa ngagelu kpakpaduc macte damong yanguc edowec, "**Ga kwele-umac mi ngagenong, ga ngage-nga gesingka sugu domanong.**"

<sup>37</sup> Inguc milu habu kpatalayeelu, Pita nga Yakobos ailu gbaine Yoane, yenge sugu bacebame hikeibong. <sup>38</sup> Hikelu kpakpaduc macte damong yele macka sulumelu nganime, hendolong sugucne ailu ngic-ngigac habu yenge kwele-sowac ailu hisonggong aiibong.

<sup>39</sup> Aime Yesu ye mac kwelina felu ngic-ngigac yanguc edocebawec, "**Ngenge omale hendolong ailu hisonggong aigaing? Adu ye mi homagac, ye gung fagac.**" <sup>40</sup> Inguc mime yenge gouwecnoibong.

Aime yedi ngic-ngigac sasawa yebicebame mac lobina hauyackebong. Haubong adu nenggac-mamackecine, nga mic-tengtengfocine habackang yenge sugu bacebame adu fawec, iwa leibong. <sup>41</sup> Lelu moleina balu yanguc edowec, "**Talita koumi!**" Yogolec fungine yanguc bafaliyeicne, "**Adu, na edocgugabac, fangkec.**" <sup>42</sup> Inguc mime adu ye yogowahac gboliyu fangkelu lec-welec aiwec. Aime yenge ye nganilu kwatackeibong. Adu yogo ye hifaine 12 aiwec. <sup>43</sup> Aime Yesudi pasi fikewec, yogo mi mibong yegengkenale sanangne mimacebalu adu nosing lacnoningte edocebawec.

**6***Macfocine yenge Yesu hegileibong  
Mat 13:53-58; Luk 4:16-30*

<sup>1</sup> Yesu ye himong yogo hegilelu yeicne mac-himongngina hikeme, mic-tengtengfocene yenge ye balaibeibong. <sup>2</sup> Aime Sabat dameng aime ye kpkakpaduc macka felu yowa edocebalu weduyeleleme ngic-ngigac ngagelu ngiyeibong, yenge mimedec ailu yanguc miibong, “Ngage-ngage-motoc yogo madi weducnowec? Ailu bole-yowa yogo madi lacnowecte moledi pasi damuineholec ingucne balu gagac? <sup>3</sup> Ye mac-baba ngic. Ye Mariale madec, nga Yakobos nga Yosefe, ailu Yude nga Saimon yengele haengineng, ailu sengfocene yenge nongilengkolec gacaigaing. Ye ngic yogo, me?” Yenge inguc milu lobe-yowa aicnolu ye hegileibong.

<sup>4</sup> Aime Yesudi yanguc edocebewec, “**Ngic-ngigac yenge Wapongte siduc-mimi ngic yele alang bacaigaing. Nga macfocine nga sac-tofafocene ailu golowacfocene, yengi sugu yele alang mi bacaigaing.**” <sup>5</sup> Aime ye pasi damuineholec monic yengela babalesoc mi aiwec. Ye ngic-ngigac huckolec efecne sugu moledi oiyacebame madickeibong. <sup>6</sup> Aime yenge ye mi ngagingkeibongte ye ngagelu kwatackewec. Ailu ye mac-aling falewecka, iwa lolicke hikelu yowa edocebalu weduyelewec.

*Bole-yowa yelewec**Mat 10:5-15; Luk 9:1-6*

<sup>7</sup> Yesudi mic-tengtengfocene 12 wacebame weleyackeibong. Welebong ngic-ngigac yengelacni aleng wonongkolec yebicebaningte bole-yowa tapili-inholec yelelo yaeckang yaeckang heucebalu salecebawec. <sup>8</sup> Ailu ye yanguc milu edocebewec, “**Ngenge yefele babafic monic mi balu hikedaing. Yasu sugu badabiyeng. Ngenge nosing me hiye mi balu hikedaing. Ailu moneng monic anggbangka mi umengkedaing.** <sup>9</sup> Ngenge hige-ebec sugu holedaing. Nga ngakpi yaeckang mi holelu hikedaing. I yangucte, mac hikedabiyengen iwa ngic-ngigac yengi baftngebadaingte.” <sup>10</sup> Inguc milu yanguc edocebewec, “**Ngenge hikecgu mac-aling monicka sulumebong ngic yengi mac kwelina bacngebalu febong, ngenge mac iwa sugu ngiye-fangkec aidaing. Aibong motome, mac-aling yogo hegilelu mac-himong monicka hikedaing.**

<sup>11</sup> “**Nga mac-himong monicka hikebong ngic yengi mi hefolecngebalu yowangineng mi ngagedaingtewa, ngenge higenginangkocni lube webong wame mac-himong yogo hegilelu hikedaing. Aime ngic yenge yogo nganilu Wapongti amengineng baduyeledaict, yogo ngage-motodaingte.**”

<sup>12</sup> Yesu ye inguc milu salecebame hikelu ngic-ngigac kwelengineng hefaliyeningte Wapongte yowa edocebalu weduyeleibong. <sup>13</sup> Ailu yenge aleng bociyac yebicebaibong. Ailu ngic-ngigac huckolec heloicti hosoyelelu bamadicebaibong.

*Yoane weibong**Mat 14:1-12; Luk 3:19-20; 9:7-9*

<sup>14</sup> Yesule siduc yogo himongne himongne sawelu hikeme ngictau Herodedi yowa yogo ngagewec. Gocnedi ngagelu yanguc miibong, “**Yoane misa-lowacti homackacni gholiye fangkelu gagac, ye Yesu. Ilec ailu tapili facnogacte pasi damuineholec balu gagac.**”

<sup>15</sup> Inguc mibong ngic gocne yengi ngagelu miibong, “**Yogo Wapongte siduc-mimi ngic wacine Elaiaya.**”

Nga gocnedi ngagelu miibong, "Ye Wapongte siduc-mimi ngic hocne. Siduc-mimi ngic esecne gaibong, yenge ingucne."

<sup>16</sup> Aime Herode ye yowa yogo ngagelu yanguc miwec, "Nani mibe Yoane ubeine welockeibong, yedi hocne gboliyelu gagac."

<sup>17-18</sup> I yangucte, esecne Herode ye gbaine Filipite ngigac wacine Herodias, ye hise balu gawec. Aibaba yoglec ailu Yoanedi Herode yanguc edowec, "Ga gbagonale ngigac balu gagic, yogo yefe monic mi fagac." Inguc mime Herodedi Herodiasle ngage-ngage balaibelu ngicfocineedocebame, Yoane balu hefelu muc-macka loibong. <sup>19-20</sup> Aime Herodias ye Yoanele aalic ngagewec. Ngageme, Herodedibac Yoanele hangockeme damongkenale aiwec. I yangucte, Yoane ye ngic dondonne ailu gbagbacne. Ilec Herode ye yogo ngage-motolu ngani-damong aicnolu gawec. Ailu ye yele yowa ngage-gacu ngageboc aicnolu sifu yowaine ngagenale aicnowec. Nga Herodias yedibac wehomanogale ngagewec, ailu ngageme kpungkewec.

<sup>21</sup> Gacgu Herodiasdi Yoane wenogale dameng miwec. Aime Herodele fike-fike dameng kwsime, ye ngic sugucne yele bagewa gaibong. Nga hudu-baba ngicfocine yengele damongfongineng, ailu Galili prawnswacni ngic micne, yenge kpaducebalu noba-nosing lobeyelewec. <sup>22</sup> Lobeyeleme ngiyeebongka, Herodiasle adudi kwesilu haicnginang gee wewec. Weme Herode nga ngic yeholec nosing noibong, yenge yogo nganilu angac ngageibong.

Ilec ailu ngictau Herodedi adule yanguc miwec, "Ga wiyc monicte ngagelu na milocnudamekte, yogo nalic geledacte." <sup>23</sup> Milu Wapongte wacka yowa sanangkenale yanguc mipangkewec, "Ga wiyc monicte miloc-nuyengka gele-benangkedacte. Ailu himong damongkegabac, yoglec nebocenele miyengka heuckelu geledacte."

<sup>24</sup> Inguc mime adu ye hikelu nenggacine yanguc uwacnowec, "Na oma wiyacte micnodacte?"

Mime nenggacinedi yanguc miwec, "Ga Yoane misa-lowacte hodocinele micnodamec."

<sup>25</sup> Inguc mime adu ye iwahac ngictau yela hikelu yanguc miwec, "Yoane misa-lowac yele hodoc yakumac hocne pelewa lolu nelecte ainelegac."

<sup>26</sup> Inguc mime ngictau ye kweleine umalewec. Aime ngic ngiyeibong, yengele haicka yowa biyac mime sanangkewec. Ilec ailu yogo hegilenogale ngageme nalic mi aiwec. <sup>27</sup> Aime ye yogowahac hudu-baba ngic monic saleme hikelu Yoane hodocine welocke balu kwesinale muc-macka hikewec. Hikelu Yoane ubeine welockelu <sup>28</sup> hodocine yogo pelewa lolu bakwesilu adu lacname, adu ye yogo bahikelu nenggacine lacnowec. <sup>29</sup> Aime Yoane mic-tengtengfocine yenge siduc yogo ngagelu hikelu kponggbongine bakwesilu longkeibong.

### *Nosing gumecebawec*

*Mat 14:13-21; Luk 9:10-17; Yoa 6:1-13*

<sup>30</sup> Salecebaicne yenge hatacmac Yesula kwesilu kpatuleibong. Kpatulelu bole sasawa baibong, ailu edocebalu weduyeleibong, yoglec siduc edoy-ackeibong. <sup>31</sup> Aime ngic-ngigac bocayc yenge lec-welec ailibongte ailu, yenge ngiye-ngagec nga nosing nonole sawainne monic mi fikewec. Ilec ailu Yesudi mic-tengtengfocine yanguc edocebawec, "**Ngenge welebong naholec himong kisiwa misaine mikacka hikelu nongilangkac wangec gadabeleng.**"

<sup>32</sup> Inguc mime yenge yengilangkac gombawa felu himong monic ngic mikacka hikeibong.

**6:17-18:** Dep 18:16      \* **6:25:** Herodias ye Yoane homanale ngagelu hodocine nganilu ngageme Yoane ye homawec.

**6:30:** Luk 10:17

<sup>33</sup> Hikeebongka ngic-ngigac bocyacti ngani-motocebalu, taon falewecka, yogowacni molickelu gasacke hikelu iwa sulumeibong. <sup>34</sup> Hike sulume-bong, Yesu ye gombawacni walu ngic-ngigac habutowa inguc nganicebalu kweleine yengele sowalewec. I yangucte, yenge lama yengi damong mikac gacaigaing, yogo ingucne gaibong. Inguc ngagelu yowa bocyac edocebalu weduyelewec.

<sup>35</sup> Weduyevelu game mac aweleme mic-tengtengfocene yengi yela lelu yanguc miibong, "Himong yago ngicine mikac, aime wenac haume mac biyac awelegac. <sup>36</sup> Ilec ailu ga ngic-ngigac salecebang mac-gogoc nga mac-alang falegac, iwa hikelu nosing fuli banoc aining."

<sup>37</sup> Inguc mibong yedi yanguc miwec, "**Ngengi nosing yelebong noning.**"

Inguc mime yengi yanguc miibong, "Nonge hikelu moneng 200<sup>†</sup> yoglec-socti nosing fuli balu yelebeng noningte migic, me?"

<sup>38</sup> Inguc mibong Yesudi yanguc uwayelewec, "**Ngengela bret edomengti fagac, ngenge lelu yogo nganining.**"

Inguc mime yenge yogo nganilu yanguc edoibong, "Bret 5 nga misa-sic yaekang balu gagabeleng."

<sup>39</sup> Inguc mibong yedi ngic-ngigac habu balu kpindingka walu ngiyeningte edocebahec. <sup>40</sup> Edocebame yenge wangyeibong, gocnedi 100, nga gocnedi 50, inguc habu balu kpindingka ngiyebong. <sup>41</sup> Ngiyeebongka Yesudi bret 5, nga misa-sic yaekang yogo bawec. Balu dongeine hilame honocmengka feme, Wapong kwele-madic micnolu bret bauckelu ngic-ngigac yelebong noningte mic-tengtengfocene yelewec. Yelelu misa-sic inguchac bauckelu botoc balu yeleme bayackeibong. <sup>42</sup> Balu ngic-ngigac sasawadi nogebec ailu <sup>43</sup> bret nga misa-sic tofaine notiwa aibong ngiyewec, yogo kpaduckebong haulu damba 12 wakewec. <sup>44</sup> Ngic nosing noibong, yogo yengele dzalengi-neng 5 taosen.

### *Lifuc feina edela hikewec*

*Mat 14:22-33; Yoa 6:16-21*

<sup>45</sup> Nowackebong motome, Yesu ye ngic-ngigac locebanogale domalu mic-tengtengfocene salecebame yenge molickelu gombawa felu Besaida taonka hikeibong. <sup>46</sup> Hikeebongka ye ngic-ngigac locebame hikebong milockenale kupicka fewec. <sup>47</sup> Aime mac deboleme mic-tengtengfocene yenge lifuc hewacina hikebong, Yesu yeicnac himongka gawec. <sup>48</sup> Game mic-tengtengfocene yenge hikeebongka mac biyac saenogale aiyemewa gbelongti wecebame yenge puli wenogale aibibiyeibong. Inguc aibong Yesu ye nganicebalu yengela haic lifuc feina edela edela hikelu ewalicebanogale aiwec.

<sup>49-50</sup> Ye lifuc feina edela edela hikeme, yengi ye nganilu ilucti welegac, inguc ngagelu hangocebame aukweibong.

Aime yedi iwahac yanguc edocebahec, "**Nani welegabac. Ngenge ngageboc mikac sanangne domadaing. Ngenge mi hangocngebana.**" <sup>51</sup> Inguc milu gombawa felu yengeholec ngiyeme, gbelong miyac aiwec. Aime yenge kwatacke-benangkelu mimedec aiibong. <sup>52</sup> I yangucte, yenge kwelengineng hefeicnehac fawecte ailu, nosingka pasi fikewec, yogo mi ngage-motoibong.

### *Ngic-ngigac bamadicebawec*

*Mat 14:34-36*

**6:34:** Him 27:17; Mat 9:36    **6:35:** Mrk 8:1-9    <sup>†</sup> **6:37:** Moneng wacine denarius. Aime denarius

200 yogo bulumaka 6lesoc fulingineng ingucne aigac.    **6:46:** Luk 5:16    **6:49-50:** Luk 24:37

**6:51:** Mrk 4:39

<sup>53</sup> Aime yenge lifuc falockelu Genesaret himongka hike sulumelu gom-bangineng hefebong fawec. <sup>54</sup> Fame gombawacni wabong ngic-ngigac yenge Yesu biyac ngani-motoibong. <sup>55</sup> Ngani-motolu macsoc gasacke hikelu ngic-ngigac huckolec dembengka locebalu, “Ye iwa me iwa gagac,” inguc milu iwa bacebalu kwesiyackeibong. <sup>56</sup> Yesu ye taonka nga mac-alingka ailu mac-gogocka hikeme, ngic-ngigac yengi ngic-ngigac huckolec bacebalu maket sobengka locebaibong. Ailu huckolec yengi Yesule ngakpi susucinele mucine oiyaningte dogbac ailu micnoibong. Aime oiyaibong, yenge sa-sawadi madickelbong.

## 7

### *Wapongte mimipang yowadi yefe-yowa ewaligac Mat 15:1-9*

<sup>1</sup> Yerusalemkocni Farisaio nga Wapongte yefe-yowale wewedu ngic gocne yengi Yesula kjesilu kpatulelu gaibong. <sup>2</sup> Gabong iwa Yesu mic-tengtengfocene gocne yengi molengineng mi suwelu nosing moc banoc aibong nganicebaibong. <sup>3</sup> I yangucte, Farisaio nga Yuda ngic-ngigac sa-sawadi ngesa-ngambofocngineng yengele yefe-yowa balaibelu molengineng suwelubac nosing noicaigaing.\* <sup>4</sup> Ailu yenge maket sobengkacni kjesilu misa mi lowagaingka, ibac nosing moc mi balu noicaigaing. Ailu pasi gocne ingucne momochac aicaigaing. Yenge kap nga pele ailu benggu inguchac suwebong bgagbacne aicaigac.

<sup>5</sup> Inguc aime Farisaio nga Wapongte yefe-yowale wewedu ngic yengi Yesu yanguc uwacnoibong, “Mic-tengtengfocgone yenge molengineng mi suwelu nosing moc banoc aicaigaing. Aime yenge omale ngesa-ngambofocnonggeng yengele yefe-yowa yogo mi balaibegaing?”

<sup>6</sup> Inguc mibong yedi yanguc edocebawec, “*Siduc-mimi ngic Yesaiyadi ngic kwesacine ngengele hocne siduc-yowa noinebenang yanguc kwelengkewec, ‘Ngic-ngigac habu yago yenge micnginengti sugu alang bacnucaigaing. Nga kwelenginengtibac na hegilecnuaigaing. 7 Yenge ngic-ngigac yowa weduyelegeaigaing, yogo ngic ngage-ngagewa yefe-yowa yogo edoce-balau weduyelegeaigaing. Ailu na moc afenubong afec-afecngineng yogo nganibe noine mikac aicaigac.’* (Yes 29:13)

<sup>8</sup> Ngenge Wapongte ung-yowa hegilelu ngic yengele yefe-yowa balaibecaigaing.”

<sup>9</sup> Ailu hatamac yanguc edocebawec, “*Ngenge ngengileng yefe-yowa balaibeningte ailu, Wapongte ung-yowa baicke-benangkegaing. Yogolec ngage-madickegaing, me?*” <sup>10</sup> Mosesdi yowa monic yanguc miwec,

‘*Ga nenggac-mamackecgone alang bayetedamec.*’ (Wah 20:12; Yef 5:16) Aime

‘*Monic ye nenggacine me mamaciele sawec-yowa midaictewa, ye webong homadaic.*’” (Wah 21:17; Dep 20:9)

<sup>11</sup> “*Ngengebac yanguc micaigaing, ‘Monicti nenggacine me mamacie edolu yanguc midaicte, ‘Na wiyac gocne gelenogale ngagelu migabac, yogo biyac Wapongte ibu lacnobele miiba.’*”† <sup>12</sup> Inguc milu ngic ye nenggacine

\* <sup>7:2:</sup> Luk 11:38    <sup>7:3:</sup> Yenge molengineng wonongkolec mi ngagelu aibaba inguc aiibong. Yenge ngesa-ngambonginengte aibaba balaibenogale inguc suweibong. Yenge yanguc ngageibong, yenge aibaba yogo madicne balaibegaingka, Wapongte haicka bgagbacne aidainte.    <sup>7:4:</sup> Mat 23:25

† <sup>7:11:</sup> Ibu yogo Hibru yowawa yefe Korban.

me mamacine bafickenale kpatalacnodaingte. <sup>13</sup> Yefe iwa ngenge yefewangineng balaibelu Wapongte yowa yogo someckecaigaing, aibaba gocne ingucne bocyac aicaigaing.”

*Oma wiyacti ngic kwelewa haume wonongkolec aidaicte?  
Mat 15:10-20*

<sup>14</sup> Yesu ye inguc milu ngic-ngigac habu hatacmac wacebame kwesibong yanguc edocebwec, “Ngenge hedec kwelu ngage-motoning. <sup>15</sup> Nosing nga wiyac ingucne yogodi ngic kweleina haume wonongkolec nalic mi aidaicte, miyac. Ngic kwelewacni ngage-ngageine offeaigac, yogodibac ngic kweleine bame wonongkolec aidaicte. <sup>16</sup> [Monic ye hedeckolecti yowa yago aneng ngagedaic.]”‡

<sup>17</sup> Ye inguc milu ngic-ngigac hegilecebalu macka feme, mic-tengtengfocene yengi nangeng yowa holelu miwec, yoglec uwacnobong yanguc edocebwec, <sup>18</sup> “Ngenge momoc ngage-ngage-motocngineng mikac, me? Nosing me wiyac monic lobinacni gobe kwelina haucaigac, yogodi ngic bame wonongkolec nalic mi aidaicte. Ngenge yogo mi ngage-motogaing, me? <sup>19</sup> Wiyac yogodi kwelewa mi haucaigac, yogo gobe kwelina sugu haulu hamacka haucaigac.” Yesu ye inguc milu nosing sasawa nonogale nalic miyackewec.

<sup>20</sup> Ailu taockelu yanguc miwec, “Nga ngic kwelewacni offeaigac, ygodibac ngic bame wonongkolec aicaigac. <sup>21</sup> Aime ngic-ngigac kwelewacni ngage-ngage yangucti offeaigac. Ngage-ngage sowacne, nga selo-boic aibaba ailu hise aibaba, nga ngic-wewe. <sup>22</sup> Ailu ngawe-ngigac bahegilec, nga hane aibaba, ailu aibaba sowacne gocne. Nga kwesac-aibaba, ailu aibaba kosaine, nga hasowac ailu misulec. Nga soc bafefe, ailu kwele-fong. <sup>23</sup> Aibaba yogo sasawa yenge ngic-ngigac kwelewacni ofelu basowalece-bame wonongkolec aicaigaing.”

*Grik ngigacti Yesu ngagesingkewec  
Mat 15:21-28*

<sup>24</sup> Aime Yesu ye mac-aling yogo hegilelu fangke hikewec. Hikelu Tair nga Saidon himongka hike sulumelu mac monicka fewec. Feme taon yowacni ngic-ngigac yengi yogo mi ngageningte ngagewec. Ailu ye sangkelu ngiyenale kpungkewec. <sup>25-26</sup> Aime Fonisia himongkacni Grik ngigac monicti kwesiwec. Kwesilu Yesule higewa wangiyelu, aduinela aleng wonongkolec yebiyenale micnolu gawec. <sup>27</sup> Micname Yesudi yanguc edowec, “Adu-madec yenge nosing molic-molic nolu gebecebadaic. Adu-madec yengele nosing ewalicebalu hoda yengela wickedabelengte, yogo mi madickedaicte.”§

<sup>28</sup> Inguc mime ngigac yedi bafaliyelu yanguc edowec, “Sugucne, yogo ngagegabac. Ailu hoda yenge sifu adu-madec yengi nosing nobong kapucine tebo bageina wacaigac, yogo nocaiagaing.”

<sup>29</sup> Inguc mime Yesudi yanguc edowec, “Ga yowa inguc migicte hikec, aleng ye adugone biyac hegilegac.”

<sup>30</sup> Inguc mime ngigac ye macina hikelu nganime aleng ye aduine biyac hegilelu hikeme, adu yogo ye mapicina waickelu fawec.

**7:15:** Sale 10:14-15    ‡ **7:16:** Hibi esecne Mareko kwelengkewec, yogo nganilu iwacni kwelengkebong kwelengkebong ofewec, yengelacni gocne 7:16 iwa mi fagac. Ngic-ngigac yenge hibi kwelengkeicne yogo wosaelu nganibong Marekodi mi kwelengkewec mecne. § **7:27:** Yesudi Israel ngic-ngigac yengele ngagelu adu-madec miwec. Nga Israel yengele alingkacni miyac yengele ngagelu hoda miwec. Ailu nosing yogo babafictie silic ingucne. Grik ngigacte ngage-ngagesing esoickelu yowa ingucne miwec.

### *Ngic hedec-fong*

<sup>31</sup> Yesu ye Tair himongkacni hefaliyelu Saidon taon falockelu Dekapolis himongka yefe hikelu Galili lifucka hikewec. <sup>32</sup> Hike sulumelu nganime, ngic-ngigac yenge ngic monic hedec-fong nga yowaine yegena mi micaigac, ye bakwesilu Yesudi moledi bauwanale dogbac aicnoibong.

<sup>33</sup> Inguc mibong ngagelu ye ngic-ngigac habu yenge hegilecebalu ngic yogo bame yekilackac lobenginang lelu lome domawec. Domame gbongnginedi hedecina lolu moleine sofockelu beluine oiyawec. <sup>34</sup> Oiyalu honocmengka hilame feme asuine fuluckelu miwec, “**Effata!**” Yogolet fungine yanguc hilameyeicne, “**“Ga dulungkec!”** <sup>35</sup> Inguc mime ngic hedecine yogowahac dulungkewec. Aime beluine hatacmac hefaliyeme yowa dondonne miwec.

<sup>36</sup> Inguc milu Yesudi pasi fikewec, yogolet ngic-ngigac yengi mi mibong sawenale sanangnephacbenang milu mimacebawec. Mime yenge pasi fikewec yogolet siduc hatacmac mibong saweyackewec. <sup>37</sup> Inguc mibong ngic-ngigac yengi pasi yogolet bocyaebenang weleckelu mimedec aihu yanguc miibong, “Ye wiycasasawa balu gagac, yogo madicke-benangkegac. Ye ngic-ngigac hedec-fong yengele hedec bame dulungkeme yowa ngagegaing. Aihu yowangineng mikac, yengi yowa kwegaing.”

## 8

### *Ngic-ngigac 4 taosen nosing gumecebawec*

*Mat 15:32-39*

<sup>1</sup> Dameng iwa ngic-ngigac habutowadi hatacmac Yesula kwesilu kpaduckeibong. Aime nosing mikac aime Yesudi mic-tengtengfocine wacebame welebong yanguc edocebawec, <sup>2</sup> “**Ngic-ngigac yago yenge nosingngi-neng mikac hadeng habackang biyac naholec gaebongka yengele kwelene sowalegac.** <sup>3</sup> Gocne yenge mac-himong dalickacni kwesiibong. Aime nosing mikacte salecebabe macnginang hikegacgu yefewa donge lolic aiyeledaickale, migabac.”

<sup>4</sup> Inguc mime mic-tengtengfocine yengi yanguc miibong, “Nongileng himong kisiwa misaine mikacka gagabeleng. Ilec nosing wenuwacni baebengka habutowa yago yelebeng nobong gebecebadaicte?”

<sup>5</sup> Inguc mibong Yesudi yanguc uwayelewec, “**Ngenge bret edomeng balu gagaing?**”

Mime yengi “bret 7” miibong.

<sup>6</sup> Inguc mibong ngagelu Yesudi ngic-ngigac habu himongka walu ngiyen-ingte edocebawec. Edocebalu bret 7 balu Wapong kwele-madic micnolu bauckelu mic-tengtengfocine yeleme yengi ngic-ngigac habuwa yeleibong.

<sup>7</sup> Aihu ye misa-sic gogoc kpusicne gocne balu gaibong, yogo inguchac Wapong kwele-madic micnolu yeleningte edocebawec. <sup>8</sup> Edocebame yelebong yenge yogo nobong gebecebame, nosing tofaine ngiyewec, yogo balu kpaducke-bong damba 7 aiwec. <sup>9</sup> Aime ngic-ngigac 4 taosen ngama ingucne yengi iwa ngiyeibong. Yenge nosing nobong motome salecebame hikeibong.

<sup>10</sup> Hikebong Yesu ye yogowacni mic-tengtengfocine yengeholec gombawa felu Damanuta himongka hikeibong.

### *Aibaba fulune*

*Mat 16:1-4*

<sup>11</sup> Farisaio yenge kwesilu Yesuholec yowangineng fec-wac aiwec. Yenge tapiliine lokwesacka lolu pasile maa monic honocmengkacni bame nganiningte micnoibong. <sup>12</sup> Inguc mibong asuinedi ngageme umaleme yanguc miwec, “Ngic-ngigac aling yanguctihac gagaing, ngenge omale pasile maa nganinogale milu gagaing? Foinac, ngic-ngigac aling yago ngengela pasile maaine monic nalic mi fikengeledaice, yogo noine edocngebagabac.” <sup>13</sup> Inguc milu ngic yogo hegilecebalu gombawa hatacmac felu lifuc nebocina hikeibong.

### *Wasec sowacne*

*Mat 16:5-12*

<sup>14</sup> Dameng iwa mic-tengtengfocene yenge bret ngigecebame moniyang sugu gombawa ngiyeme hikeibong. <sup>15</sup> Aime Yesudi sawang-yowa milu yangucedocebawec, “Ngenge Herode nga Farisaio yengele yisle\* nganimotolu gadabiyeng.”

<sup>16</sup> Inguc mime yengungthiac mingagec ailu yanguc miibong, “Nongileng bretnonggeng mikac. Ilec ailu inguc migac.”

<sup>17</sup> Inguc mibong ye kwelenginang biyac ngage-motolu yangucedocebawec, “Ngenge omale bret mi balu kwesigaingte mingagec aigaing? Ngenge kwelengineng fongkeicnele ailu wiyac monic mi ngage-motogaing, me? <sup>18-19</sup> Ngenge dongengenengti wiyac mi nganicaigaing, me? Ailu hedecnengti yowa mi ngagecaigaing, me? Na bret 5 bauckelu ngic 5 taosen gumecebabe tofaine ngiyewec, yogo kpaduckebong damba edomeng wakewec, yogo ngigecngebawec, me?”

Uwayeleme yengi “damba 12” miibong.

<sup>20</sup> “Aime hatacmac bret 7 bauckelu ngic-ngigac 4 taosen gumecebabe tofaine ngiyeme kpaduckebong damba edomeng wakewec?”

Uwame yengi “damba 7” miibong.

<sup>21</sup> Inguc mibong yedi yangucedocebawec, “Ngenge yakumac inguchac mi ngage-motogainghac, me? Yis yogo nosingte mi migabac.”

### *Donge-pisic monic donegeine bamadickewec*

<sup>22</sup> Aime yenge Besaida himongka hike sulumebong, ngic-ngigac yengi ngic donege-pisic monic Yesula bakwesilu moleinedi bauwanale dogbac aicnoibong. <sup>23</sup> Inguc aibong ye donege-pisic moleina balu mac-aling fagaing yogo hegilecebalu lobina mengocke hikelu donegeina sofockelu moleinedi feina lolu yanguc uwacnowec, “Ga wiyac monic nganigic, me?”

<sup>24</sup> Uwacnome ngic donege-pisic ye donege hilalu yanguc miwec, “Ngic yenge ngani-nganiningineng yoc ingucne nganicebabe lec-welec aigaing.”

<sup>25</sup> Inguc mime Yesudi donege feina moleine hatacmac lome madickeme donege hilalu wiyac sasawa madicne nganiwec. <sup>26</sup> Nganime yanguc edolu salewec, “Ga macgona hikelu mac-alingka yefe mi fedamec.”

### *Yesule fungine mime yegengkewec*

*Mat 16:13-20; Luk 9:18-21*

<sup>27</sup> Aime Yesu ye mic-tengtengfocene yengeholec Filipai himongka Sesarea taon emeina mac-aling falewecka iwa hikeibong. Yefewa hikelu yedi mic-tengtengfocene yanguc uwayelewec, “Ngic-ngigac yengi nale ma mi-caigaing?”

<sup>8:12:</sup> Mat 12:39; Luk 11:29

<sup>\* 8:15:</sup> Yis yogo flawawa sawelu basugulecaigac. Yengele ngage-ngage nga aibaba saweme ngic-ngigac balaibecaigaing, Yesudi yogo nganilu nangeng yowa holelu yis miwec.

<sup>8:15:</sup> Luk 12:1

<sup>8:17:</sup> Mrk 6:52

<sup>8:18-19:</sup> Mrk 6:41-44

<sup>28</sup> Inguc mime yengi yanguc miibong, “Gocne yengi Yoane misa-lowac micaigaing. Nga gocne yengi Wapongte siduc-mimi ngic wacine Elaiya micaigaing. Nga gocne yengibac Wapongte siduc-mimi ngic monic esecne wackelu micaigaing.”

<sup>29</sup> Inguc mibong yanguc uwayelewec, “Aime ngenge ngengung nale ma micaigaing?”

Uwayeleme Pitadi yanguc miwec, “Ga Mesia.”

<sup>30</sup> Inguc mime yedi wac yogo ngic monic mi edocebaningte mimacebawec.

### *Yesu homackacni gboliyelu fangkedaicte*

*Mat 16:21-28; Luk 9:22-27*

<sup>31</sup> Aime Yesudi yanguc edocebalu weduyelewec, “Ngicte Madec ye doic homacne ngagedaicte. Aime Yuda ngic-nigigac yengele damongfocngineng, nga depec-baba ngic micne, ailu Wapongte yefe-yowale wewedu ngic, yengi ye kweledi wickelu webong homadaicte. Homame hadeng habackang motome, hatacmac gboliyelu fangkedaicte.” <sup>32</sup> Yowa yogo yegenabenang edocebame, Pitadi Yesu mecinna mengocke lelu yekilackac domalu kpatalacnowec.

<sup>33</sup> Kpatalacnome Yesudi hefaliyelu donegeine mic-tengteng yengela hilalu Pita kpatalacnolu yanguc edowec, “Satang, ga lobena wele-hikec. Ga wiyc ngagesigic, yogo Wapongtacni miyac, yogo ngic ngage-ngage aigac.”

### *Yesu balaibenogale yefe*

<sup>34</sup> Yesudi habu nga mic-tengtengfocene wacebame welebong yanguc edocebawec, “Monic ye na balaibecnunogale ngagegacka, ye yeicne soc-kweleinle angac bawalu umacte malicpongine bafangke tengkelu balaibec-nudaic. <sup>35</sup> I yangucte, monic ye yeicne gagaine sebilenale ngagelu boleine badaicte, ye gagaine yogo sangkecnodaicte. Nga monic ye nale ailu nga Siduc Madicnele ailu gagaine hegiledaicte, yebac gagaine fikecnodaicte.

<sup>36</sup> Ilec monicti himongtowa yagolec wiyc sasawa bafuhanale ailu gagaine wickeme sangkedaicte, wiyc yogo yengi ngic yogo nalic bafickedaingte, me? Yogo miyac! <sup>37</sup> Me monicti gagaine hatacmac bafuhanale wenuc lacnome bafuwanacnodaicte? Yefe monic mi fagac. <sup>38</sup> I yangucte, dameng yagolec ngic-nigigac yenge bikicnginkolec nga selo-boic alingkolec. Aime yengele kwelinacni monicti nale ngageme gameineholec aidaicte. Ailu nale yowale ngageme gameineholec aidaicte, yela yanguc fikedaicte. Ngicte Madecti Mamaccinele tapili nga hibi-angocineholec, ailu Wapong yeicne angelo yengeholec kwesidaicte. Dameng iwa yedi ngic yagolec inguchac ngageme gameineholec aidaicte.”

## 9

<sup>1</sup> Aime Yesudi hatacmac taockelu yanguc edocebawec, “Foinac, ngic-nigigac yago domagaing, ngengelacni gocne yenge mi homaebongkahac, Wapongte ngani-damong tapiliineholec fikelu yegengkeme nganidaingte, yogo noine edocngebagabac.”

### *Yesule tapili nga wac feicne*

*Mat 17:1-13; Luk 9:28-36*

<sup>2</sup> Aime hadeng 6 motome Yesudi Pita nga Yakobos ailu Yoane mengoce-bame tiki dalicne monicka felu yengilangkac gaibong. Felu dongenginang

socene hefaliyeme ngani-nganiine monicbenang aiwec. <sup>3</sup> Ngakpiine dalicne yogo angolelu kwalacnebenang angocineholec aiwec. Himongtowawa monicti ngakpi kwalac-ingucue nalic mi bafuwadaite. <sup>4</sup> Aime iwahac Moses nga Elaiya yeke fikelu Yesuholec yowa mingagec aiboc nganicpeaibong. <sup>5</sup> Inguc aibong Pitadi Yesu yanguc edowec, "Wewedu, nongileng yagowa gabeng madickegacte fale habackang banang. Gale monic, nga Mosesle monic, ailu Elaiyale monic." <sup>6</sup> Yenge bocyacbenang hangocebawecte, Pitadi moc milu yowa madicne micronale, ngageme kpungkewec.

<sup>7</sup> Iwa domabong kaguwa monicti kwesilu somecebame, kaguwa kwelinacl yowa-malac monic yanguc fikewec, "Yogo nale Madec, kwelenedi yele angac ngagegabac. Ngenge yele yowa ngagedaing!" <sup>8</sup> Yowa motome yogowahac yenge donege hilalu nganibong, Yesudi sugu yengeholec domame nganiibong. Nga ngic monic mi nganiibong.

<sup>9</sup> Aime yenge tikiwacni wabong Yesudi mimacebalu yanguc miwec, "Ngenge wiyc nganigaing, yoglec siduc ngic mi edocebadaing. Gacgu Ngicte Madec homackacni gboliyelu fangkedaite, dameng yogowabac midaing."

<sup>10</sup> Inguc edocebame mic-tengteng yenge yowaine balaibelu yengungti-hac yanguc uwanaguibong, "Homackacni gboliyelu fangke-fangke, yoglec fungine wenuc?" <sup>11</sup> Yengi yanguc milu uwacnoibong, "Wapongte yefe-yowale wewedu ngic yenge wenucte Elaiyadi hatacmac molickelu kwesime Mesia lobeina kwesinale micaigaing?"

<sup>12</sup> Inguc mibong yedi yanguc edocebewec, "Elaiyadi hocne kwesilu wiyc sasawa bame madickedaite. Aime Wapongte hibiwa yowa yanguc kwe-lengkeicne fagac, 'Ngicte Madec ye doic bocyac ngageme misulec aicnodaingte.' Ilec wenuc ngagesigaing?" <sup>13</sup> Ailubac yanguc edocngebab, Elaiye biyachac hatacmac kwesiwec,\* aime ngic yenge angacngineng balaibelu aibaba sowacne haicine monic-monic aicnolu gaibong, yogo yele hocne kwe-lengkeicne fagac."

### *Madec monictacni aleng yebiyewec Mat 17:14-21; Luk 9:37-43*

<sup>14</sup> Yenge tikiwacni wabong mic-tengtengfocine gocne yengi yengela lelu nganibong, yenge Wapongte yefe-yowale wewedu ngic yengeholec yowangineng fec-wac aiwec. Fec-wac aiyemewa habu sugucnedi ngagelu lolickelu domaibong. <sup>15</sup> Domalu yenge Yesu nganilu kwatackelu biyac yela gasacke lelu wenac-madic micnoibong.

<sup>16</sup> Inguc aibong Yesudi yanguc uwayelewec, "Ngenge omale yowangineng fec-wac aigac?"

<sup>17</sup> Inguc mime habu yengelacni ngic monicti yanguc miwec, "Wewedu, aleng monic yowaine mikacti madecne micine badickeme gala balu kwe-sigabac. <sup>18</sup> Aime alengti dameng bocyac ye balu wepackeme himongka wawecaigac. Inguc aicname ye hige-moleine linggangkeme micinacni so-fololok ofelu micine hedickecaigac. Aime mic-tengtengfocgone yengi aleng yebiyeningte edocebab, yenge ngagebong kpungkeme hegilegabiyeng."

<sup>19</sup> Inguc mime Yesudi bafaliyelu yanguc edowec, "Dameng yagolec ngic-nigac aling yago, ngenge ngage-ngagesingngineng mikacbenang. Na dameng dalicne ngage-ngagesing mikac ngic-nigac ngengeholec hatacmac ganogale takicnugac. Ngenge madec yogo bawelening." <sup>20</sup> Inguc mime

yenge madec yogo balu lebong alengti Yesu nganilu madec yogo wepackeme himongka wawelu hefac-tafalic ailu fawec. Wawelu fame micinaci sofololoc ofewec.

**21** Ofeme Yesudi mamacine yanguc uwacnowec, “*Wiyac yago ma damengka fungkecnowec?*”

Inguc mime mamacinedi yanguc miwec, “Yogo gegecne gaweckahac fikecnowec.” **22** Fikecnome alengti dameng bocyac madec wehomanale dacka nga misawa wepackeme haucaigac. Aime ga nalic baficnupanogale ngagegick-abac sifu kwelegone sowaleme baficnupanong.”

**23** Inguc mime Yesudi yanguc edowec, “*Yogo nalic aibele migic, me? Monic ye ngagesingkeme, yela wiyac sasawa nalic fikedaiite.*”

**24** Inguc mime yogowahac madec mamacinedi aukwelu yanguc miwec, “Na ngagesinggube ngage-ngagesingnedi songtolegacte gagi baficnunong.”

**25** Inguc mime habudi Yesula gasackelu hikebong ye nganicebalu aleng wonongkolec kpatalacnolu yanguc micnowec, “*Aleng, ga hedec-fong ailu yowagone mikac. Na edocgugabac, ga madec yogo hegilelu ofe hikedamec. Ailu hatacmac hefaliyu yela mi haudamec.*”

**26** Inguc mime alengti dacineholec tapiliwabenang aukwelu edepackeme wafame ofelu hikeme, madec ye homaicne ingucne fawec. Fame ngic yenge yogo nganilu biyac homagac miibong. **27** Inguc mibong Yesudi moleina bame hatacmac fangkewec.

**28** Aime Yesu ye macka feme mic-tengtengfocine yenge yengilangkac yeholec ngiyelu yanguc uwacnoibong, “Nonge wenukte aleng yogo yebiyenangte aibibiyegabeleng?”

**29** Inguc mibong yedi yanguc edocebawec, “*Aleng ingucne mimilocti sugu nalic yebiyedaingte.*”

### *Yeicne homacte hatacmac miwec*

*Mat 17:22-23; Luk 9:43-45*

**30-31** Yesu nga mic-tengtengfocine yenge mac yogo hegilelu Galili prowins falockelu hikeibong. Aime ye iwa hikelu mic-tengtengfocine weduyelewete yanguc ngagewec, “*Yawa gagabeleng, yogo ngic-ngigac mi ngagedaing.*” Inguc ngagelu weduyelewete yanguc edocebawec, “*Monicti Ngicte Madec balu ngic yengele molewa lodaicte, yogolec dameng bangkalegac. Lome yengi ye balu wehomadaingte. Wehomabong hadeng habackang motome, homack-acni hatacmac gboliyu fangkedaicte.*” **32** Inguc mime yenge yogo mi ngage-motolu yowa yogolec funginele hatacmac uwacnoningte hangocebawec.

### *Micne gaga*

*Mat 18:1-5; Luk 9:46-48*

**33** Aime Yesu ye Kapeneam taonka hike sulumelu macka felu mic-tengtengfocine yanguc uwayelewec, “*Ngenge yefewa oma wiyacte mingagec aibiyeng?*” **34** Inguc uwayeleme yenge waickelu ngiyeibong. I yangucte, yenge yefewa yengelacni madi feicne gagac, yogolec mingagec aibong.

**35** Yesu ye ngiyelu mic-tengtengfocine 12 wacebame welebong yanguc edocebawec, “*Monic ye micne ganogale ngagelu, ye agofocine sasawa, yengele lobewa galu yengele mole-bafic aidaic.*”

<sup>36</sup> Inguc milu madec hakic monic balu yengele hewacka lolu moleine elecina lolu yanguc edocebawec, <sup>37</sup> “Monic ye madec yangucne nale wacka ye hefolegac, ye na hefolecnugac. Nga monic ye na hefolecnugac, ye na sugu mi hefolecnugac, miyac. Ye Wapong na salecnuwec, ye inguchac hefolegac.”

*Aka mi holedaing*

*Luk 9:49-50*

<sup>38</sup> Aime Yoanedi Yesu yanguc edowec, “Wewedu, ngic monic ye gale wacka aleng yebicebame nganibeleng. Ailu ye nongilengkolec mi gagacte kpatalacnobeleng.”

<sup>39</sup> Inguc mime Yesudi yanguc miwec, “Monicti nale wacka bole monic pasi damuineholec badaicte, ye nale wac biyac mi suledaicte. Ilec ngenge mi kpatalacnodaing. <sup>40</sup> I yangucte, monic ye nongileng ngaba mi aigac, yedi agononggeng aigac. <sup>41</sup> Foinac, monic ye ngageme ngenge Kristole aling gagaing, yogolet ailu misa negeleme nodaingte, ye wiyc yogolet fuline badaicte, yogo noine edocngebabac.”

*Lokwesac haicine monic-monic*

*Mat 18:6-9; Luk 17:1-2*

<sup>42</sup> “Entacka gocene yengi ngic monic balu balinga sugucne ubeina ubeechnolu kiwecka wickebong haudaitewa, yele umacine efeckedaicte. Aime adu-madec kpisicne monicti na ngagesingnulu game, ngic yogodi adu-madec ingucne aicnome bikic bafuwadaictewa, Wapongti ye ameine budsondaicte, yogo umactowaineholec. <sup>43</sup> Aime molegone monicti sowacne aigeleme bikic bafuwadamectewa, ga yogo helockelu wickeengka hikedaic. Molegone yaeckangkolec galu dac-sanang pisic-pisicne mikac, iwa haudameckale, ga mole-sofong galu gaga-sanangka feengka madickedaicte.

<sup>44</sup> [‘Dacka haulu umbengngineng mi homadaicte. Ailu dac yogo mi pisickedaicte.’]<sup>†</sup>

<sup>45</sup> Ailu higegone monicti sowacne aigeleme bikic bafuwadamectewa, yogo welockelu wickeengka hikedaic. Higegone yaeckangkolec galu dac-sanangka haudameckale, higegone moniyang sugu galu Wapongte ngani-damongte kwelina feengka madickedaicte.

<sup>46</sup> [‘Dacka haulu umbengngineng mi homadaicte. Ailu dac yogo mi pisickedaicte.’]

<sup>47</sup> Me dongegone monicti sowacne aigeleme bikic bafuwadamectewa, ga yogo bamotolu wickeengka hikedaic. Gacgu dongegone yaeckangkolec galu dac-sanangka haudameckale, dongegone moniyang sugu galu Wapongte ngani-damongte kwelina feengka madickedaicte.

<sup>48</sup> ‘Dacka haulu umbengngineng mi homadaicte. Ailu dac yogo mi pisickedaicte.’ *(Yes 66:24)*

<sup>49</sup> “Ngic-nigic kiwec holelu noacaing, ingucne hac ngic-nigic sasawa lokwesacka felu dac ingucne sowacnengineng lobeyackeme noinengineng sugu gadaingte. <sup>50</sup> Kiwec yogo wiyc madicte. Aime yogodi angacine miyac aidaicte, ngenge wenuc aibong hatacmac angacineholec nalic aidaicte? Yogo nalic mi aidaicte. Ngenge kiwec angacine ingucne ngagengage madicne kwelenginang fame kwele-moniyang ainagudabieng.”

**9:37:** Mat 10:40    **9:40:** Mat 12:30; Luk 11:23    **9:41:** Mat 10:42    **9:43:** Mat 5:30    <sup>†</sup> **9:44:**

Hibi esecne Mareko kwelengkewec, yogo yakuc mi fagac. Aime esecne hibi yogo nganilu iwaci kwelengkewong kwelengkewong ofewec, yengelacni gocene 9:44 nga 9:46 iwa mi fagac. Ilec ngic-nigic yengi hibi kwelengkeicne yogo wosaelu nganibong Marekodi 9:48 iwa sugu kwelengkewec, 9:44 nga 9:46 yogo miyac mecne.    **9:47:** Mat 5:29    **9:50:** Mat 5:13; Luk 14:34

## 10

*Ngawe-ngigac gocnedi hegilecnagucaigaing  
Mat 19:1-12; Luk 16:18*

<sup>1</sup> Yesu ye himong yogo hegilelu, Yudeya himongka Yodan misa nebocina hikewec. Hikeme ngic-ngigac habutowadi yela hatacmac hikelu kpatuleibong. Kpatulebong ye aibabaine balaibelu yowa edocebalu weduyelewec.

<sup>2</sup> Aime Farisaio gocne yengi ye kwesackeningte ngagelu yanguc uwacnoibong, “Ngic monic ye ngigacine nalic hegiledaicte, yogolec yefe fagac me miyac?”

<sup>3</sup> Inguc mibong yedi yanguc edocebwec, “**Mosesdi yogolec ung-yowa wenuc ngelewec?**”

<sup>4</sup> Mime yengi yanguc miibong, “Mosesdi yanguc nalic ainangte miwec, ‘Ngic monic ye ngigac hegilenogale milu, ye hibi lacnolu hegileme hikedaic.’” (*Yef 24:1-4*)

<sup>5</sup> Inguc mibong Yesudi yanguc edocebwec, “**Ngenge ngic kweleng-neng fongkeicne.** Ilec ailu Mosesdi ung-yowa yogo kwelengkenelewec.

<sup>6</sup> **Ailu molic-molicka Wapongti ngic nga ngigac silic ganicte, inguc bafuwacepwec.** (*Fike 1:27; 5:2*)

<sup>7</sup> **Ilec ailu ngic ye nenggac-mamackecine hegilecepalu ngigacineholec wetackelu** <sup>8</sup> **yeholec soc moniyang aidabiyeete.** Inguc aigacte yeke hatacmac yaeckang mi aigaic, yeke soc moniyang aigaic.” (*Fike 2:24*)

<sup>9</sup> **Ilec ailu Wapongti wetacepwec, yogo ngicti mi welockedaiac.”**

<sup>10</sup> Aime yenge macka hatacmac felu mic-tengtengfocene yengi yogolec uwacnobong, <sup>11</sup> Yesudi yanguc edocebwec, “**Ngic monic ye ngigacine hegilelu ngigac monic bagac, ye selo-boic aibaba ailu ngigacine eseune kwele-umac lacnogac.** <sup>12</sup> Aime ngigac monicti ngawaine hegilelu ngic monic bagac, ye selo-boic aibaba aigac.”

*Adu-madec mimi-madic milu edocebwec*

*Mat 19:13-15; Luk 18:15-17*

<sup>13</sup> Ngic-ngigac gocne yenge Yesudi adu-madecfocngineng moledi oiyacebanale yela bacebalu kwesiibong. Kwesibong mic-tengtengfocene yengi ngelengkelu edocebaibong. <sup>14</sup> Inguc aibong Yesu ye yogo nganilu kweledac ngageyelalu yanguc edocebwec, “**Adu-madec kpisicne yenge nala nalic kwesining, ngenge aka mi holeyelening.** Wapongte ngani-damong yogo adu-madec kpisicne yangucne yengele. <sup>15</sup> Foinac, adu-madec kpisicne yenge Wapongte ngani-damong hefolecaigaing. Aime monic ye yenge ingucne mi aidaictewa, ye iwa nalic mi fedaicte, yogo noine edocngebabac.”

<sup>16</sup> Inguc milu adu-madecfocngineng bacebalu moleinedi feinginang lolu mimi-madic milu edocebwec.

*Moneng ngic monic*

*Mat 19:16-30; Luk 18:18-30*

<sup>17</sup> Yesu ye hikenogale hikeme, ngic monicti yela gasacke hikelu yele haicka ketadi holelu yanguc uwacnowec, “Wewedu madicne, na wenuc aibe Wapongti baficnume gaga-sanang badakte?”

<sup>18</sup> Inguc mime Yesudi yanguc edowec, “**Ga omale madicne wacnugic? Wapong moniyangti sugu madicne gagac.** <sup>19</sup> Ga ung-yowa biyac ngageing,

**'Ga ngic-ngigac mi wehomacebadamec. Selo-boic aibaba mi aidamec.  
Hise mi badamec. Micka lolo mi aidamec. Ngic yengele wiyc  
monic mi ewalicebadamec. Nenggac-mamackecgone yeke alang  
bayetedamec.'**" (Wah 20:12-16; Yef 5:16-20)

**20** Inguc mime yedi bafaliyelu yanguc edowec, "Wewedu, ga ngic, yogo  
sasawa na soc-gboliha galu balaibelu aiibadi aicaigabachac."

**21** Inguc mime Yesudi yela donge hilalu kweledi yele angac ngagelu  
yanguc edowec, "**“Ga wiyc moniyangte sugu aibibiyegic. Ga hikelu woc  
wiycgone sasawa fagac, yogo salelu moneng balu ngic-ngigac waweweine  
gagaing, yogo yeledamec.** Inguc aiyengka wiyc madicne honocmengka  
fikegeledaicte. Aime welelu na balaibecnudamec!"

**22** Inguc mime ngic ye moneng nga woc-wiycine bocyac facnowecte,  
ngagelu kweleine umaleme hikewec.

**23** Hikeme Yesu ye mic-tengtengfocene nganicebalu yanguc edocebawec,  
"**“Ngic-ngigac moneng nga woc-wiycnginengkolec yenge Wapongte ngani  
damong kwelina fenogale aidaingte, yogo boleine sugucnehat.”**

**24** Inguc mime mic-tengteng yenge yowa yogo ngagelu kwatackeibong.\*  
Aime hatacmac yanguc edocebawec, "**“Madecfocne ngagegaing, monic ye  
Wapongte ngani-damong kwelina fenogale aidaicte, yogo boleine sugucne  
hat.”** **25** Kameldi bungic yefina fedaicte, yogo boleine sugucne. Nga moneng  
nga woc-wiycakolec yedi **Wapongte ngani-damongka fenogale aidaicte, yo  
godibac boletowaine sugucnehat.”**

**26** Inguc mime yenge kwatackelu medecebame yanguc miibong, "Inguc  
aime madi nalic wasecne aidaicte?"

**27** Inguc mibong Yesudi dongeine yengela hilalu yanguc miwec, "**“Ngic  
ngigac yengileng aibabanginengte aihu yogowa aibibiyelu hegiledaingte.  
Nga Wapontibac wiyc sasawa yogo nalic aidaicte. Aihu wiyc monicte  
ngageme mi kpungkedaicte.”**

**28** Inguc mime Pitadi yanguc miwec, "Ngagegic, nonge woc  
wiycnonggeng sasawa hegilelu ga balaibecgulu gagabeleng."

**29** Inguc mime Yesudi yanguc miwec, "**Foinac, na noine edocngebabac.  
Monic ye macine, me hae-gbaine nga yeme-kwaine, me nenggac-mamacine,  
me adu-madecfocene, me mac boleine, yogo nale nga Siduc Madicnele aihu  
hegilewec,**"<sup>30</sup> **ye ameinele mi kpungkegac. Aihu ye wiyc hegilewec, yolec  
ameine 100 hatacmac badaicte.** Ngic-ngigac yenge dameng yagowahac  
ameine yogo mac nga hae-gba aihu yeme-kwa, aihu nenggac-nasi, nga adu  
madecfocene aihu mac boleine lacnodaingte. Aime Yesu balaibecaigacte  
ngaba aicnolu weyebic aicnoebongka wiyc balu gadaicte. Aime lobewa  
himong silicine monicti kwsidaicte, iwa Sugucnedi gaga-sanang inguchac  
lacnodaicte. **31** Aime ngic molic-molic gacaigaing, yengelacni homacnedi  
lobeine aidaingte. Nga lobeine gacaigaing, yengelacni homacnedi molic-  
molic aidaingte."

### *Homale mime alecine habackang aiwec*

*Mat 20:17-19; Luk 18:31-34*

**32** Aime yenge Yerusalem yefewa hikelu Yesu ye molickeme mic-  
tengtengfocene yenge ye balaibelu hikewec. Hikelu Yerusalem iwa  
Yesu badaingkale kwatackeibong. Aime gocne ye balaibeibong, yenge

\* **10:24:** Dameng iwa ngic-ngigac yanguc ngageibong, Wapongti ngic nganime madickewec, ye  
woc-wiycine lacnowec. Ilec ngic woc-wiycineholec aigac, ye Wapongte haicka ngic madicne aigac,  
yenge inguc ngageibong. **10:31:** Mat 20:16; Luk 13:30

hangcebawec. Aime Yesudi mic-tengtengfocine 12 yengilangkac mengocea-lelu wiyac fikecnodeaite, yogolec yowa yanguc edocebawec,  
<sup>33</sup> "Ngagegaing, nongileng Yerusalem hikgabeleng. Hikelu fenoga iwa ngic yengi Ngicte Madec balu depec-baba ngic micne, nga Wapongete yefe-yowale wewedu ngic, yengele molewa lobong, yengi ye homanale mimoctodaingte. Mimoctobong ye Israel yengele alingkacni miyac, yengele molewa lodaingte.  
<sup>34</sup> Lobong, yengi yowa kwekwae aincnolu sofockelu muc-hududi welu wehomadaingte. Aime hadeng habackang aimebac ye hatacmac gboliyelu fangkedaite."

*Honocmengte ngiye-ngiye*

*Mat 20:28*

<sup>35</sup> Aime Sebedi madeckecine, Yakobos nga Yoane, yeki Yesula lelu yanguc miiboc, "Wewedu, noke wiyac monicte uwagabelec yogo ainotecte ngagegabec."

<sup>36</sup> Inguc miboc uwayetewec, "Na oma wiyac aingetebele ngagegabiyc?"

<sup>37</sup> Uwayeteme yanguc miiboc, "Gacgu wac feicnegona ngiyeengka nokelacni monicti folegonapac nga monicti kanagonapac ngiyedabelecte, yogolec mipangkenotec."

<sup>38</sup> Inguc miboc, Yesudi yanguc edocepwec, "Ngeke wiyac uwagabiyc, yogolec fungine mi ngage-motogabiyc. Na doicte kwenoc kap iwa nodacte, ngeke yogo inguchac momoc nonicte migabiyc, me? Ailu doicka locnudaingte, yogowa ngekeholec momochac iwa locnubadabiengte, me?"

<sup>39</sup> Inguc mime yeki yanguc miiboc, "Oc, nalic aidabelecte."

Inguc miboc Yesudi yanguc edocepwec, "Na kwenoc kap iwa nodacte, yogo ngeke inguchac nodabiyecte. Nga doicka locnudaingte, yogowa inguchac ngekeholec momochac locnubadabiengte.  
<sup>40</sup> Aimebac madi folena me kanana ngiyedaite, yogolec noinebac nani nalic mi mimoctodacte. Mac ngiye-ngiye yogo ngic weni yogo yekele bamockeicne fagac, yeki sugu iwa ngiyedabiyecte."

<sup>41</sup> Aime mic-tengtengfocine 10 yengi yogo ngagelu, Yoane nga Yakobos yekele kwele-dac ngageyeteibong. <sup>42</sup> Inguc ngagebong Yesudi wacebame welebong yanguc edocebawec, "Israel yengele alingkacni miyac yengele micnefocngineng wacebaicne gagaing, yenge ngic-ngigac yengele ngagebong wawaine aicaigac. Ailu yengileng ngagebong feicne aigac. Aime sugucnefocngineng yenge tapili fayelegacte ngic-ngigacfocngineng yenge yowanganeng balaibecaigaing, ngenge yogo ngagegaing.  
<sup>43</sup> Aime ngengela aibaba ingucne mi fikedaic, miyac. Ngengelacni monicti feicne ganogale ngagelu, ye ngengele hewacka mole-baficngineng gadaic.  
<sup>44</sup> Ailu ngengele hewackacni monicti molic-molic ainogale aincname, ye sasawa yengele kwele kwekwae gadaic.  
<sup>45</sup> I yangute, ngic-ngigac yengi Ngicte Madec bafickeningte mi wawec, miyac. Yebac yenge baficebalu ngic-ngigac homacne yengele ailu gagaine hegilelu fuli bacebanale wawec."

*Batimeus*

*Mat 20:29-34; Luk 18:35-43*

<sup>46</sup> Yesu nga mic-tengtengfocine yenge Yeriko taonka hike sulumeibong. Iwa hikbong ngic-ngigac habutowa yenge momoc hatacmac Yeriko taon hegilalu hikbong. Hikbong ngic donge-pisic monic wacine Batimeus, yogolec fungine Timeusle madec, ye yefe mecina ngiyelu woc-wiyacte

milocebalu gawec. <sup>47</sup> Milocebalu game yengi yowa yanguc miibong, "Yesu Nasaret-hocni, yedi kwesilu hikegac."

Ye yogo ngagelu sanangnehac aukwelu yanguc miwec, "Yesu, Dawidile fikesaweckacni, ga nale kwelegone sowalena."

<sup>48</sup> Ye sanangnehac inguc wackeme ngic-ngigac bocyac yengi ye waickelu ngiyenale kpatalacnoibong. Aime ye sanangnehac hatacmac wackewec, "Dawidile fikesaweckacni, ga nale kwelegone sowalena."

<sup>49</sup> Wackeme Yesu ye domalu yanguc miwec, "**Ngenge ye wackebong nala welena.**"

Inguc mime ngic yengi ngic donge-pisic wackelu miibong, "Ye wacgugac, ga kwelegone madickeme fangkelu lenong." <sup>50</sup> Inguc mibong ngic ye ngakpi daleine wickeme ngiyeme biyac fangkelu Yesula lewec.

<sup>51</sup> Leme Yesudi yanguc uwacnowec, "**Na oma wiyc aigelebele ngagegic?**"

Inguc mime ngic donge-pisicti yanguc miwec, "Wewedu, dongene hilanogale ngagegabac."

<sup>52</sup> Inguc mime Yesudi yanguc edowec, "**Ngage-ngagesinggonedi bamadicgugacte nalic hikenong!**" Inguc mime ye yogowahac dongeine hilalu Yesu balaibelu yengeholec yefe hikeibong.

## 11

*Donggi feina ngiyewec*

*Mat 21:1-11; Luk 19:28-40; Yoa 12:12-19*

<sup>1</sup> Aime yenge hikegacgu Yerusalem taon bangkalelu Oliwa kupicka Betfage nga Betani mac-himong ngiyeibocka iwa hikelu sulumeibong. Hike sulumelu Yesudi mic-tengtengkecine yaeckang salecepalu <sup>2</sup> yanguc miwec, "Ngeke dondonne hikelu mac-aling yefe molic-molicka ngiyegac, iwa felu donggi madecine monic ngicti feina mi ngiyecine. Donggi yogo witickebong domagac, ngeke yogo bafuwalu mucine lukelu balu kwesinic. <sup>3</sup> Lukeboc entacka monicti yanguc uwantedaite, 'Ngeke wenuc ainicte aigaic?' Inguc uwame yanguć edodabiye, 'Sugucne ye yagodi bole banogale migac. Bole motome yenge donggi yogo biyac balu kwesidaingte.'

<sup>4</sup> Inguc mime yeke hikelu donggi madecine yefewa mac nuina mucti witickeicne domawec, yogo nganilu lukeiboc. <sup>5</sup> Lukeboc ngic gocne iwa domabong, yengi nganicpalu yanguc miibong, "Ngeke donggi madecine wenuc ainicte lukegaic?" <sup>6</sup> Inguc mibong yeke Yesudi yowa edocepwec, yogo edocebaboc, yenge yowa yogo ngagelu yeke hegilecepabong hikeiboc. <sup>7</sup> Hikelu donggi Yesula balelu ngakpinginac dalicne hemoctolu donggi madecinele feiwa lumackeboc Yesu ye yogolec feina ngiyewec. <sup>8</sup> Ngiyeme ngic-ngigac bocyacti ngakpingineng dalicne hemoctolu yefewa lumackebong. Nga gocnedi bole mecinaci yoc mangngine welockelu yefewa lumackebong.

<sup>9</sup> Aime ngic-ngigac molickelu hikeibong nga lobeina balaibeibong, yengi aukwelu yanguc miibong.

"Asec, ngic Sugucnele wacka welegac, ye mimi-madicineholec. *(Mige 118:26)*

<sup>10</sup> Ngambononggeng Dawidile ngani-damong welegac, yogo mimi-madicineholec. Sawawa wilini wacine feicne mitengkegaing, asec."

<sup>11</sup> Yesu ye Yerusalem inguc felu, Wapongte Ibu-macka fewec. Felu ngangagec aiyackeme motome mac aweleme, mic-tengtengfocine 12 bacebame Betani macka hikeibong.

*Fik yoc sawekewec**Mat 21:18-19*

<sup>12</sup> Mac saeme yenge Betani mac hegile walu Yesu nosingte homawec. <sup>13</sup> Homalu dalicka hilalu fik yoc monic hekengngine sabaineholec nganiwec. Nganilu ngageme noineholec ingucne aime yoc fungina hikelu hekengngine sugu nganiwec. Fik noinele dameng mi aiwecte inguc aiwec. <sup>14</sup> Aime ye noine basackelu yoc yanguc edowec, “**Monicti gale noinegone hatacmac mi nodaic.**” Inguc mime mic-tengtengfocene yenge yowa yogo ngageibong.

*Woc-wiyac salelu gabong yebicebawec**Mat 21:12-17; Luk 19:45-48; Yoa 2:13-22*

<sup>15</sup> Yesu ye Yerusalem hike sulumelu Wapongte Ibu-macte oda kwelina fewec. Felu ngic wiwayc salelu gaibong, yenge yogowacni yebicebawec. Ye ngic monengngineng lanac-ganac aibong, yengele tebo bafaliywec. Ailu tudiling nango saleibong, yengele mac ngiye-ngiye bafaliywec. <sup>16</sup> Ailu Wapongte Ibu-mac kwelina wiwayc ingucne mi bafeningte kpatalayelewec.

<sup>17</sup> Kpatalayelelu weduyelelu yanguc edocebawec, “**Yowa yanguc kwelengkeicne fagac,** ‘**Nale Ibu-mac yogo himongne himongne ngic-ngigac sasawa yengele mimilocte mac, waccine inguc wackenoga.**’” (*Yes 56:7*)

**Aime ngengibac yogo bafaliyebong,  
‘Hise-baba ngic yengele sangke-sangke mac aigac.’”**

*(Yer 7:11)*

<sup>18</sup> Inguc mime habu sasawadi yele weweduinele ngagebong wiwayc feicne aiwec. Ilec ailu depec-baba ngic micne, nga Wapongte yefe-yowale wewedu ngic yengi yele hangocebawec. Aime yele yowa yogo ngagelu ye wehomanogale yefe basackebong. <sup>19</sup> Aime mac aweleme Yesu nga mic-tengtengfocene yenge taon hegilelu hikeibong.

*Fik yoc yowa edowec**Mat 21:20-22*

<sup>20</sup> Mac saeme yenge yefewa hikelu nganibong, fik yoc hekengngine nga godocine yogo ululuwelu domawec. <sup>21</sup> Domame Pita ye yogo nganilu ngagesilu Yesu yanguc edowec, “**Wewedu ga nganic, ga fik yoc sawekemec, yogo biyac homanogale ululuwelu domagac.**”

<sup>22</sup> Inguc mime Yesudi yanguc edowec, “**Ngenge Wapong ngagesingkedaing,** <sup>23</sup> **Foinac, monic ye kweleina ngageboc mikac galu wiwayc monicte me monicte milu yoglec noine fikenale ngagesingkedaictewa, ye kupic edi fangkelu kiwecka haunale mime yogo fikedaictte, yogo noine edocngebabac.** <sup>24</sup> Na ilec ailu yanguc edocngebabe, ngenge wiwayc yoglec me yoglec ngagesilu badabelengte, inguc ngagelu ngagesingkelu milockebong, wiwayc yogo fikengeledaictte.

<sup>25</sup> “**Aime ngenge domalu milockecaigaing, dameng iwa monicte ngaba me wiwayc ingucne balu gagaingka bikicine yogo hegiledaing. Inguc aibong honocmeng MamaCnginengti ngengele bikic inguchac hegiledaictte.** <sup>26</sup> [Nga ngenge ngic yengele bikic mi hegiledaingtewabac, honocmeng MamaCnginengti ngengele bikic inguchac mi hegiledaictte.]”\*

**11:13:** Luk 13:6    **11:17:** Yes 56:7; Yer 7:11    **11:18:** Mrk 14:1    **11:23:** Mat 17:20    **11:24:**

Mat 7:7    **11:25:** Mat 6:14-15    \* **11:26:** Hibi esecne Mareko kwelengkewec, yogo nganilu iwacni kwelengkebong kwelengkebong ofewec, yengelacni gocne 11:26 iwa mi fagac. Ngic-ngigac yenge hibi kwelengkeicne yogo wosaelu nganibong Marekodi mi kwelengkewec mecene.

*Wapongti Yesu bole-yowa micnowec*

*Mat 21:23-27; Luk 20:1-8*

<sup>27</sup> Yesu mic-tengtengfocine yengeholec hefaliyelu Yerusalem feibong. Felu Yesu ye Wapongte Ibu-mac kwelina lolickeemewa, depec-baba ngic micne, nga Wapongte yefe-yowale wewedu ngic, ailu Yuda ngic-ngigac yengele damongfocngineng, yenge yela kwesilu yanguc uwacnoibong, <sup>28</sup> “Ga oma bole-yowa tapiliineholec yago bagamec? Ailu madi bole yogo banogale bole-yowa tapiliineholec gelewec?”

<sup>29</sup> Inguc mibong Yesudi yanguc edocebwec, “Na yowa monic uwangelebe ameine edocnubong, na inguchac bole-yowa tapiliineholecte fungine yogo edocngebadaecte. <sup>30</sup> Yoanedi misa-lowac bole balu gawec, bole-yowa tapiliineholec yogo honocmengkacni me ngickacni, ngenge yogo edocnubong ngagebe.”

<sup>31</sup> Inguc mime yenge yengilangkac mingagec ailu yanguc miibong, “Nongileng wenuc midabelengte? ‘Yogo honocmengkacni’ inguc midabelengte, ye yanguc uwanoledaict, ‘Inguc ngagelubac ngenge omale ye mi nagesingkeibong?’ <sup>32</sup> Me ‘ngickacni’ midabelengtewabac wenuc aidabelengte?” I yangucte, ngic-ngigac sasawa yenge Yoanedi ye Wapongte siduc-mimi ngic noine, inguc ngagegaing. Aime ngic micne yenge ngic-ngigac habu yengele ailu hangocebawec.

<sup>33</sup> Ilec yengi bafaliyelu Yesu yanguc edoibong, “Yogo mi ngagegabeleng.”

Inguc mibong Yesudi yanguc edocebwec, “**Inguc migainte, na inguchac male bole-yowa tapiliineholec balu gagabac, yogo nalic mi edocngebadaecte.**”

## 12

*Waing bolele damong*

*Mat 21:33-46; Luk 20:9-19*

<sup>1</sup> Yesudi hatacmac nangeng yowa holelu yanguc edocebwec, “**Ngic monicti waing bole gbolicne monic duwelu oda hefewec. Hefelu waing hesoc-hesocte long faliwec.** Falilu damong yengele donge hila-hilale mac-dale monic bawec. Inguc bame motome waing bole damongkeningte ngic gocne bafuwacebalu, yengeholec yowa milu hefewec. Ailu yeicnebac himong dalicka hikewec. <sup>2</sup> Hikelu gaemewa waing noine babale dameng aiwec. Aime noine nebcine banogale kwelec kwekwe ngic monic saleme bole-damong yengela hikewec. <sup>3</sup> Hikeme bole-damong yengi kwelec kwekwe ngic yogo nganilu balu dobo welu mocbenang salebong hikewec. <sup>4</sup> Hikeme bole fileinedi kwelec kwekwe ngic monic hatacmac yengela saleme hikeme, yengi ye hodocina welu misofoc aicnoibong.

<sup>5</sup> “**Inguc aicnobong, bole fileine ye sanangkelu hatacmac kwelec kwekwe ngic monic saleme yengela hikeme, ye wehomaibong. Wehomabong, bole fileine ye kwelec kwekwe ngic bocyac salecebame hikeibong.** Hikebong bole-damong yengi kwelec kwekwe gocne dobo wecebaibong, nga gocnebac wehomacebaibong.

<sup>6</sup> “**Motome, bole fileine ye madecine moniyang gawecte, kweleinedi yele angac ngagewec, ye yanguc ngagelu salewec, ‘Yenge madecnebenangbac alang bacnodaingte.’**

<sup>7</sup> “**Inguc ngagelu saleme bole-damong yengi madecine nganilu mingagec ailu yanguc miibong, ‘Yedi gacgu bole yago bame yeicne bingec aidaict.** Ilec ngenge kwesibong wehomabeng, yele himong nga mole-damoc yago

nongileng aidaic.' <sup>8</sup> Yenge inguc milu bole fileinele madechenang yogo balu wehomalu, kponggbongine yogo waing bole lobina wickebong haulu fawec.

<sup>9</sup> "Aime bole fileine ye wenuc aidaicte? Ye kwesilu waing bolele damong yogo wehomacebadacite. Ailu waing boleine yogo bole-damong aling gocne yengele molewa lodaicte.

<sup>10</sup> "Wapongte hibiwa yowa yanguc kwelengkeicne fagac, 'Mac-baba ngic yengi posa monic sowacne milu wickeibong. Aime posa yogodi macte posa-bosing sanangne ailu domadaicte. <sup>11</sup> Aime pasi yogo Sugucne yeuctihac bame ngicti ngani-angac aigabeleng.' (Mige 118:22-23)

**Ngenge yowa yogo wafe-ngagec mi aicaigaing, me?"**

<sup>12</sup> Aime Yesu ye micne yengele ngagelu nangeng yowa yogo holelu miwec, yenge yogo biyac ngage-motoibong. Ailu yenge ye banogale yefe basackeibong. I yangucte, yenge ngic-ngigac yengele hangocebaawecete ailu hegilelu hikeibong.

### *Takesle yowa*

*Mat 22:15-22; Luk 20:20-26*

<sup>13</sup> Ngic micne yengi Yesu kwesackebong yowa lilome balu yowawa lonogale ngagelu yanguc aibibong. Yenge Farisaio nga Herodele alingkacni ngic gocne salecebabong yela hikeibong. <sup>14</sup> Hikelu yengi Yesu yanguc uwacnoibong. "Wewedu, ga yowa noine milu ngic feicne me waicne yengele mi ngagesicaagic. Ga ngic-ngigac aling wiycac sockahac aiyelecaagic, yogo ngagegabeleng. Aime ga Wapongte yefe noina ngic-ngigac edocebalu weduyelelu gagic. Inguc aime nongileng ngictau Sisa takes lacnodabelengte, me mi lacnodabelengte, yoglec yefe dondonne wenuc fagac? Nongileng ngictau Sisa takes nalic lacnodabelengte, me miyac?"

<sup>15</sup> Inguc mibong Yesudi kwesac-aibabangineng ngage-motolu yanguc edocebaawec, "Ngenge omale lokwesacka locnugabiyyeng? Ngenge moneng monic bafuwalu edalicnubong nganibe." <sup>16</sup> Inguc mime yenge moneng monic lacnobong ye yogo nganilu yanguc uwayelewec, "Iluc nga hibi yago male?"

Uwayeleme miibong, "Yogo Sisale."

<sup>17</sup> Inguc mibong Yesudi yanguc edocebaawec, "Ilec ngenge Sisale wiycac, yogo Sisa lacnodaing. Nga Wapongte wiycac, yogo Wapong lacnodaing!" Inguc edocebame ngagelu kwatackeibong.

### *Homackacni gboliyelu fangke-fangke*

*Mat 22:23-33; Luk 20:27-40*

<sup>18</sup> Sadyusi aling yenge homackacni gboliyelu fangke-fangke yogo mi fagac, inguc micaigaing. Aime yengelacni ngic gocne yengi Yesula kwesilu yanguc uwacnoibong, <sup>19</sup> "Wewedu, Mosesdi yefe-yowa monic yanguc kwelelengkenolewec. 'Ngic monic ye ngigac balu gboli monic mi kwefickelu moc gacgu homadaictewa, ngigac yegaemewa gbainedi haeinele hosec yogo balu gboli kwefickeme haeinele wac bafangkediac.'

<sup>20</sup> "Dameng monicka hae-gba 7 yenge gaibong. Aime haengineng molic-molicti ngigac monic balu gboli mikac moc gacgu homawec. <sup>21</sup> Homame gbainedi ngigac yogohac balu ye inguchac gboli mikac gacgu homawec. Homame gbaine monicti aibaba yogohac aiwec. <sup>22</sup> Aime ngic hae-gba 7 yenge ngigac yogohac balu gbolifocngineng mikac gacgu homayackeibong. Homayackebong lobebac hosecngineng ye galu homawec. <sup>23</sup> Homame

ngic 7 yenge ngigac yogohac baibongte ailu, gacgu homackacni gboliyelu fangkedaingte, dameng iwa ngigac yogo ye male ngigacbenang aidaicte?"

<sup>24</sup> Inguc mibong Yesudi bafaliyelu yanguc edocebewec, "Ngenge yowa Wapongte hibiwa fagac, nga Wapongte tapili, yogo mi ngage-motogaing. Ilec ailu yowa mibong lilogac. <sup>25</sup> Gacgu homaibong yenge homackacni gboliyelu fangkedaingte, dameng iwa ngic-ngigac yenge mi banagudaingte. Aime mamac monicti 'Na adune ngic lacnodacte,' yogo nalic mi midaicte. Honocmenge angelo yenge ngawe-ngigac mi banagucaigaing, yenge ingucne hac ngawe-ngigac mi banagudaingte. <sup>26</sup> Aime homackacni gboliyelu fangke-fangke migabac, ngenge yowa yogo Mosesle hibiwa wafe-ngagec mi aicaigaing, me? Mosesdi yoc kpisicna dac-ubilang fikeme nganilu iwa leme Wapongti yanguc edowec.

'Na Abraham nga Aisak ailu Yakobo, yengele Wapong gagabachac.' (Wah 3:6)

<sup>27</sup> Ailu ye ngic homaicne yengele Wapong miyac. Ye ngic gboldicne gagaing, yengele Wapong.\* Ngenge yefe bocyachenang lilolu gagaing."

### *Ung-yowa feicne*

*Mat 22:34-40; Luk 10:25-28*

<sup>28</sup> Aime Yesu yowa milu uwacnobong yedi ameine madicne bafaliyeyelewec. Aime Wapongte yefe-yowale wewedu ngic yengelacni monicti yogo nganilu Yesula welelu yanguc uwacnowec, "Ung-yowa weni yogodi molic-molicine aigac?"

<sup>29</sup> Inguc uwacnome Yesudi yanguc miwec, "Ung-yowale molic-molic yogo yanguc fagac, Israel ngic-ngigac, ngenge ngagening, Sugucne Wapongnonggeng ye moniyanti sugu Sugucne gagac. <sup>30</sup> Aime ga kwelegone, nga ilucgone, ailu ngage-ngagegone, nga tapiligone sasawa, yogo bucbuchac Sugucne Waponggonele kwelegonedi angac ngagecnolu gadamec." (Yef 6:4-5)

<sup>31</sup> Ailu monic yanguc, 'Gageicne aigelecaigac, silicine ingucne hac ngic-ngigac gale emewa gagaing, yengele kwelegonedi ago aiyelelu angac ngageyelelu gadamec.' (Dep 19:18)

**Ung-yowa monicti yogo yeke mi ewalicepagac."**

<sup>32</sup> Inguc mime Wapongte yefe-yowale wewedu ngic yedi bafaliyelu yanguc edowec, "Wewedu, ga noinebenang migic. Wapong ye moniyang sugu, monicti ye ingucne mi gagac. <sup>33</sup> Aime kwelegone sasawa, nga ngage-ngagegone bucbuchac, ailu tapiligone sasawa yele kwelegonedi angac ngagecnodamec. Ailu geicne aigelecaigac, silicine ingucne hac ngic-ngigac gaholec emegona gagaing, yengele kwelegonedi ago aiyelelu angac ngageyelelu gadamec. Wiyac yogodi hocne Wapongte hasoc hole-hole, nga depec haicina monicmonic yogo ewaligac."

<sup>34</sup> Ngic yogo ye madicnebenang bafaliyeme, Yesudi ngagelu yanguc edowec, "**Ga Wapongte ngani-damong yogo emeina gagamec.**" Inguc mime yenge Yesu hatacmac uwacnoningte hangocebame hegileibong.

### *Yesudi Mesiale uwayelewec*

*Mat 22:41-46; Luk 20:41-44*

\* **12:27:** Abraham, Aisak, nga Yakobo homabong dameng dalicne leemewa Moses fikewec. Ilec ailu Yesule yowa yago yegena edalicnubagac, Mosesle damengka ngic yenge biyac gboliyelu gagaing.

**12:28:** Luk 10:25-28    **12:32:** Yes 45:21    **12:33:** Yef 4:35; 1Sm 15:22; Hos 6:6

<sup>35</sup> Yesudi Wapongte Ibu-macka yowa weduyelelu yanguc uwayelewec, “Wapongte yefe-yowale wewedu ngic yenge Mesia ye Dawidile fikesaweck-acni inguc omale micaigaing? <sup>36</sup> Dawidi ye Tili Asudi baefekeme yeuctihac yanguc miwec,

‘Sugucnedi nale Sugucne<sup>†</sup> yanguc edowec, “Ga folenapec ngiyeengka ngabafocgone yenge higegone bageina locebadacte.”’ (*Mige 110:1*)

<sup>37</sup> Dawidi yeuctihac Mesia ‘Nale Sugucne’ wackewec. Aime Mesia ye wenucka Dawidile fikesaweckacni aigac? Ye Dawidile Sugucne.”

Inguc mime ngic-ngigac habutowa yenge yowaine ngage-angac aiibong.

*Wapongte yefe-yowale wewedu ngic yengele miwec*

*Mat 23:1-36; Luk 11:37-54; 20:45-47*

<sup>38</sup> Inguc aibong Yesu ye taockelu yowa yanguc edocebalu weduyelewec, “Ngenge Wapongte yefe-yowale wewedu ngic yengele ngani-motolu gad-abiyeng. Yenge angacnginente ngakpi dalicne holelu gabong, ngic-ngigac yengi wenac-madic edocebaningte, sobeng sugucna hike-kwesic aicaigaing.

<sup>39</sup> Ailu kpakpaduc macka nga noba-nosing nonole damengka molic-molic ngiye-ngiyewa ngiyenogale angacebacaigac. <sup>40</sup> Ailu yenge ngigac-hosec yengele mac ewalicebacaigaing. Ailu ngage-madicebaningte mimiloc dal-icne hac milockecaigaing. Yenge kwesac-aibaba ingucne aicaigabiyengte ameine sugucne hac badaingte.”

*Ngigac-hosecte ibu*

*Luk 21:1-4*

<sup>41</sup> Aime Yesu ye Ibu-macte ibu katapa nebocina ngiyelu nganime, ngic-  
ngigac bocyacti moneng iwa lobong haume, ngic-  
ngigac bocyacti moneng  
woc-wiyakolec kwesilu moneng bocyac lobong hauwec. <sup>42</sup> Haume ngigac-  
hosec monic waweweine ye inguchac kwesilu moneng hakic kpisicne sasac-  
nehac yaeckang lome hauwec.

<sup>43</sup> Lome Yesudi mic-tengtengfocine wacebame welebong yanguc  
edocebawec, “Foinac, ngigac-hosec waweweine yagodi moneng logac,  
yagodi ngic-  
ngigac sasawa ibu logabiyyeng, yenge ewalicebagac, yogo  
noine edocngebabac. <sup>44</sup> I yangucte, ngic-  
ngigac sasawa, yenge woc-  
wiyatowangineng wakelu fagac, yogowacni ibungineng logabiyyeng. Nga  
ngigac yebac wiyac facnogac, yogo hocne sasawa loyackelu mocbenang  
gagac.”

## 13

*Wapongte Ibu-mac sowaledaице*

*Mat 24:1-2; Luk 21:5-6*

<sup>1</sup> Aime Yesu ye Wapongte Ibu-mackacni walu leemewa, mic-  
tengtengfocine yengelacni monicti yanguc edowec, “Wewedu, Ibu-macte  
posa madicne madicne nga macine madicne falegac, yogo nganic.”

<sup>2</sup> Inguc mime Yesudi yanguc edowec, “Mac sugucne sugucne ngiyeagaing  
yogo nganicebagic, yogo gacgu dameng monic kwesidaице, yogowa ngic  
yengi yogo sasawa hemballackebong hikeyackedaице. Hikeyackeme posa  
monicti monicte feiwa mi hegilebong ngiyedaице.”

<sup>†</sup> **12:36:** Miti Geewa Hibru yowawa Sugucnele wac yaeckangti fagaic. Molic-molic Hibru yowawa  
wacine yogo “Yawe” fagac. Nga yogo lebeina, “Sugucne” inguc fagac. Mareko iwa Grik yowawa  
Sugucnele wac moniyang sugu bafaliyeicne fagac. “Nale Sugucne” yogo Mesia. **12:43:** 2Kor 8:12

**13:2:** Luk 19:44

*Umac haicine monic-monic  
Mat 24:3-14; Luk 21:7-19*

<sup>3</sup> Yesu ye Oliwa kupicka ngiyelu dongeine Wapongte Ibu-macka nganilu ngiyewec. Ngiyeme Pita nga Yakobos ailu Yoane nga Endru, yengi sugu yeholec galu yanguc uwacnoibong, <sup>4</sup> “Ga Ibu-macte yowa migic, yogo ma damengka fikedaicte? Ailu dameng iwa maaine wenuc fikemebac, yowa sasawa yogolec noine yegengkedaicte? Ilec edocnubanong.”

<sup>5</sup> Inguc mibong Yesudi yangucedocebahec, “**Monicti kwesacngbadaickale, ngenge ngani-motolu gadabiyeng.** <sup>6</sup> I yangucte, ngic bocyac yengi kwesilu nale wac wackelu yanguc midaingte, ‘Na Mesia.’ Inguc milu ngic-ngigac bocyac kwele basifuc aiyeledaingte.

<sup>7</sup> “Hudu sugucnele siducti himong bangkacka, nga himong dalickacni kwesime ngenge yogo ngagelu mi kwatackedaingte. Foinac, aibaba ingucne fikedaicte. Aime dameng moto-motoinebac yogowahac biyac mi kwesidaicte. <sup>8</sup> Himong gocne yengi himong monickacni gocne yengeholec hudu wenagulu gadaingte. Ailu ngictau monicte alingti ngictau monicte aling yengeholec ngaba ainagudaingte. Aime memeya yenge himongne himongne badaingte. Ailu nosingte loloc-dameng fikelu hikedaingte. Aime aibaba ingucne, yogo wiyc gblolicne fikenogale aiyemewa, ngigac molick-elu gado hicaiac, ingucnehac aidaicte. <sup>9</sup> Ilec ngenge ngengungtihac damongnagulu gadabiyeng. Ngic yengi yowawa locngebadaingte. Ailu kpakpaduc macka muc-hududi wecnggebadaingte. Ailu yenge nale ailu ngictau nga gawana yengela yowawa locngebabong, ngenge iwa domalu nale Siduc Madicne mibong yegengkelu hikedaicte.

<sup>10</sup> “Molickelu ngenge Siduc Madicne edocebalu weduyelebong himongne himongne sasawa hikeme ngic-ngigac ngageyackedaingte. <sup>11</sup> Aime ngenge bacngebalu ngic gocne yengele molewa locngebabong yowawa domadaingte, ngenge dameng iwa, ‘Yowa wenuc minoga?’ milu ngageboc monic mi aidabiyeng. Tili Asudi dameng yogowahac yowa micnginang lodaicte yogo midaing. Ngenge dameng iwa ngengung-yowa mi midaingte, miyac. Yogo Tili Asulacni midaingte. <sup>12</sup> Aime haedi gbaime ngic micne yengele molewa lome yengi homacka lodaingte. Aime mama mac monicti madecinele ingucnehac aidaicte. Aime adu-madec yengi nenggamacmacfocngineng yowa kwekwe aiyelelu ngic gocne yengele molewa locebabong homacka locebadaingte. <sup>13</sup> Aime ngic-ngigac sasawa yenge nale wacte ailu ngenge kweledi wicnggebadaingte. Aime monic ye sanangnehac gacgume damengine motodaicte, ye wasecne aidaicte.”

*Wiyac sowacnebenang  
Mat 24:15-28; Luk 21:20-24*

<sup>14</sup> Aime monic ye yowa yago wafedaicte, ye yogo ngage-motodaic. “**Wiyac monic sowacnebenang memenguine aigac, yogodi ngiyelu wiyc gbagbacne\* basowaleme wonongkolec ailu mac-bala ingucne aidaicte.** Wiyc sowacne yogodi Ibu-mac kweline gbagbacne iwa domalu Ibu-mac basowaleme ngenge nganidaingte. Aibaba yogo fikeme ngic-ngigac Yudeya himongka gagaing, ngenge hangoc hikelu tikiwa fedaing. <sup>15</sup> Aime monic ye mac feina ngiyedaicte, ye haulu wiyc monic banogale mac kwelina mi fedaic. Ye momoc hangoc hikedaic. <sup>16</sup> Nga monic ye nosing-bolewa domadaictewa, ye ngakpi dalicne banogale macka mi hefaliyelu hikedaic.

\* **13:9:** Mat 10:17-20

**13:11:** Luk 12:11-12

**13:12:** Mat 10:21

**13:13:** Mat 10:22; Yoa 15:21

\* **13:14:** Yogo mac gbagbacne. (Daniel 9:27; 11:31; 12:11-13)

**13:15:** Luk 17:31

Ye momoc hangoc hikedaic. <sup>17</sup> Ailu dameng iwa ngigac gobeholec gagaing, nga nenggac kogoc amuc gumecebalu gagaing, mee, yenge medecebadaic.

<sup>18-19</sup> “Dameng iwa doic sugucne hac silicine monicbenang fikedaitc. Waponti molickelu himong sasawa bafuwawec, yogowacnihac ofecgu yakumac gagabeleng, dameng yoglec kwelina doic sugucne hac ingucne monic mi fikewec. Ailu lobewe hatacmac nalic mi fikedaitc. Ilec ailu ngenge wiyac yogo tilo-gbelong damengka mi fikenale milockedadaing. <sup>20</sup> Sugucnedi dameng yogo mi bangkale nale mideckabac, monicti wasecne nalic mi aidec. Ngic-ngigac bawosaecebaicne, yengele ailu dameng yogo biyac welockeme bangkalelu fagac.

### *Mesia kwesacine*

<sup>21</sup> “Dameng iwa yowa yanguc fikedaitc, ‘Nganining, Mesia yawa fikegac,’ me, ‘Ye ediwa fikegac.’ Ngic-ngigac inguc mibong ngenge mi ngagisingkedaing. <sup>22</sup> I yangukte, ngic fikelu kwesac ailu midaingte, ‘Na Mesia.’ Yenge nga siduc-mimi ngic kwesacine yenge fikelu ngic-ngigac kwele basifuc aiyeledaingte. Ailu ngic-ngigac kwesacebalu pasile maa nga pasi mi ngani-nganiine badaingte. Ailu yenge yefe monic bafuwadaingtewa, ngic-ngigac bawosaecebaicne inguchac kwesacka bacebadaingte, aime yefe ingucne monic mi fagac. <sup>23</sup> Aibaba sasawa yogo mi fikeemewa yogo biyac edocngebabac. Ngenge yogo ngagelu ngani-motolu gadabiyeng.

### *Ngicte Madec yegengkedaicte*

*Mat 24:29-31; Luk 21:25-28*

<sup>24</sup> “Aime doic yogo motodaicte, dameng iwa  
‘Wenac-dongeine kundung kweme, tamacne angocine mi angoledaitc.

<sup>25</sup> Aime asocmeng yenge sawawacni motolu wabong sawawa wiyac  
sasawa yengele tapili yogo teng-teng kwedaingte.’ (*Yes 13:10; 34:4*)

<sup>26</sup> Dameng iwa yenge Ngicte Madec nganibong ye tapili nga hibi-  
angoctowaineholecti kaguwa kwelina kwsidaicte. <sup>27</sup> Kwsilu angelofocine  
salecebame himong nga honocmeng mecin neboc nga neboc motogac, iwa  
hikelu yeuctihac ngic-ngigac bawosaecebaicne, yenge kpaducebadaingte.

### *Fik yoc nganilu ngage-ngage banoga*

*Mat 24:32-35; Luk 21:29-33*

<sup>28</sup> “Fik yoc fungine nganilu ngenge yogo ngage-motodaing. Mangngina  
gidecine ofeme hekengngine foseme ngic ngenge yanguc ngagecaigaing,  
wenac dameng aigac. <sup>29</sup> Aime ngenge wiyac migabac, yogo fikeme nganilu  
inguchac yanguc ngagedaing. Ngicte Madec damengngine biyac bangkale  
kwesilu nu lobina domagac. <sup>30</sup> Foinac, ngic-ngigac aling yanguctihac  
gagaing, ngenge mi homaebongkahac, wiyac sasawa yogo fikedaitc, yogo  
noine edocngebabac. <sup>31</sup> Foinac, himong nga sawa yeke gacgu miyac  
aidabiyecte. Nga nale yowabac mi miyac aidaitc.

### *Yesule kwesi-kwesi dameng*

*Mat 24:36-44*

<sup>32</sup> “Aime aibaba yogo ma damengka ailu hadeng edomengka fikedaitc,  
yogo monicti nalic mi ngagedaitc. Honocmengte angelo yenge yogo mi  
ngagedaingte. Ailu Madec ye inguchac mi ngagedaitc. Mamacti sugu  
dameng yogo ngagegac. <sup>33</sup> Ngenge dameng mi ngagegaingte damong balu  
deboc-gboli gadabiyeng.

<sup>34</sup> "Yogowa aibaba ingucne fikedaicte, ngic monic ye macine hegilelu himong monicka hikenale ngagewec. Inguc ailu ye kwelec kwekwefocine macka wiyac damongkeningte bole-yowa heuckelu edocebawec. Ailu nu damong ye nuwa donge hilalu deboc-gboli domanale edowec. <sup>35</sup> Mac fileine ye deboleme me deboc hewacina, me mac sae-saele, me ubiyacte hefaliyu kwesidaicte, yogo ngenge mi ngagegaing. Ilec ailu ngenge deboc-gboli gadabiyeng. <sup>36</sup> Ngenge gung faebongka kwesilu nganicngebadaickale, <sup>37</sup> yowa yago ngenge nga ngic-ngigac sasawa edocngebagabac. Ngenge yogo ngagelu deboc-gboli gadabiyeng."

## 14

*Yesu wenogale yowa hefeibong*

*Mat 26:1-5; Luk 22:1-2; Yoa 11:45-53*

<sup>1</sup> Ewalicebaicnele hombang, aime bret yis mikac noacaigaing, yogolec hombangte hadeng yaeckang fawec. Faemewa depec-baba ngic micne, nga Wapongte yefe-yowale wewedu ngic, yenge Yesu sangke-sangke balu webong homanale yefe basackeibong. <sup>2</sup> Basackelu yanguc miibong, "Ngic-ngigac yenge ngaba nga hendolong sugucne aidaingkale ailu, ye hombang damengka mi badabeleng."

*Sanda hoineholecti sotiyeme Yesu hodocina wawec*

*Mat 26:6-13; Yoa 12:1-8*

<sup>3</sup> Aime Yesu ye Betani macka gawec, iwa ngic monic esecne waicsanangkolec, wacine Saimon, yele macka nosing nolu ngiyewec. Nolu ngiyeme, ngigac monicti alabastos kilung\* monic sanda hoine madicneholec yogo bawelewec. Daling wacine narda yogolec misainedi baicne, ailu fuline feicnebenang. Ngigac ye yogo hocne kilungkolec baweletu kilung ubeine balockelu Yesu hodocina sotiyewec. <sup>4</sup> Sotiyeme ngic gocne iwa ngiyeibong, yengi yogo nganilu miwa-heduc ailu yanguc minaguibong, "Ye omale wiyac fuline feicne inguc kwondongkegac? <sup>5</sup> Sanda hoine madicne ingucnedi hifa moniyangte bole-fuli,<sup>†</sup> yagodi salelu moneng sugucnebac balu ngic-ngigac waweweine yelebeng madickedec." Inguc milu ngigac yowa dacineholec aicnoibong.

<sup>6</sup> Inguc aibong Yesudi yowangineng ngagelu yanguc edocebawec, "Ngenge omale ngigac yele inguc milu kwele-umac bafuwagaing? Ngenge aibaba yogo hegilening. Ye aibaba madicnebenang ainelegac. <sup>7</sup> Ngic waweweine yenge damengsoc ngengeholec gabong, ngengi yenge baficebanogale aingelete nalic baficebalu gadaing. Nga nanibac ngengeholec damengsoc mi gadacte. <sup>8</sup> Ngigac yagodi socne sanda hoineholecti sotingkeneleme, kponggbongne longkedaingte. Ilec ailu ye molickelu baefecnugac. Ye bole banale ngagewec, yogo bagac. <sup>9</sup> Foinac, ngic-ngigac yenge Siduc Madicne himongsoc ngic-ngigac edocebalu weduyeledaingte, dameng iwa ngigac yagodi aibaba aigac, yogolec siduc inguchac milu ngagebong fadaicte, yogo noine edocngebagabac."

*Yesu mudockenogale ngagewec*

*Mat 26:14-16; Luk 22:3-6*

<sup>10</sup> Aime mic-tengtengfocine 12 yengelacni monic wacine Yudas Iskariot, yedi Yesu baningte milu depec-baba ngic micne yengela hikewec. <sup>11</sup> Hikeme

<sup>13:35:</sup> Luk 12:38   \* <sup>14:3:</sup> Alabastos kilung yogo posadi baicne, ailu ubeine dalicne nga tapaine mikac.   <sup>14:3:</sup> Luk 7:37-38   † <sup>14:5:</sup> Ye 300 denarius miwec.   <sup>14:7:</sup> Yef 15:11   <sup>14:8:</sup> Yoa 19:40

yenge beliyelu moneng lacnoningte mipangkeibong. Inguc mibong Yudas ye dameng madicne monicka Yesu mudockelu balu yengele molewa lonale, yogolec donge hilalu wangec gawec.

### *Ewalicebaicnele nosing*

*Mat 26:17-25; Luk 22:7-14,21-23; Yoa 13:21-30*

<sup>12</sup> Bret yis mikacte hombang iwa molickelu Ewalicebaicnele hombangte lama madecine welu lobecaigaing. Dameng iwa Yesu mic-tengtengfocine yengi Yesu yanguc uwacnoibong, "Nonge mac wenuwa hikelu Ewalicebaicnele hombangte lama madecine bamockelu lobelu nonangte ngagegic?"

<sup>13</sup> Inguc uwacnobong yedi mic-tengteng yaeckang yanguc milu salecepawec, "Ngeke taonka felu ngic monic misa-hebecine tengkelu weledaict. Weleme yeholec luwelu ye balaibedabiye. <sup>14</sup> Balaibe hikelu ye mac fedaict, ngeke mac yogowa fedabiye. Felu mac fileine yanguc edodabiye, 'Wewedudi yanguc uwagelegac, "Mac kweline monic wenuwa mimoctoengka na mic-tengtengfocne yengeholec Ewalicebaicnele hombangte lama madecine nodabelengte?"' <sup>15</sup> Inguc miboc yedi mac sawawa kweline sugucne monic, iwa wiyac biyac bamockeicne fayackegac, yogo edalicngepame ngeke iwa wiyac sasawa yogo bamockedabiye."

<sup>16</sup> Inguc mime mic-tengteng yeke mac hegilelu taonka feiboc. Felu Yesudi edocepawec, silic yogohac bafuwayackelu Ewalicebaicnele hombangte lama madecineholec nosing lobelu bamockeiboc.

<sup>17</sup> Aime mac deboleme, Yesu ye mic-tengtengfocine 12 yengeholec hikeibong. <sup>18</sup> Hike sulumelu nosing nongiyelu Yesudi yanguc miwec, "Foinac, ngengelacni monicti na ngaba yengele molewa locnudaict, ye hocne nahelec nosing nogac, yogo noine edocngebabac."

<sup>19</sup> Inguc mime mic-tengteng yenge ngagebong umaleme, filesoc filesoc yanguc uwacnoibong, "Ga yogo nale migic, me?" <sup>20</sup> Inguc mibong yedi yanguc miwec, "Yogo mic-tengtengfocne 12 ngen-gelacni monicti, ailu ye naholec pelewa bret kpomuluckelu ngiyegac.

<sup>21</sup> Ngicte Madec ye hegilecngebalu hikedaike, yogo nale ngagelu biyachac kwelengkeicne fagac. Ngic ye Ngicte Madec mudockeme badaingte, ye ameine baducnodaict. Mee, ye medeckedaic. Ye nenggacinele gobe kweli-nacni mi fikedec, yogodibac madicne aidec."

### *Tiwa noiibong*

*Mat 26:26-30; Luk 22:15-20; 1Kor 11:23-25*

<sup>22</sup> Aime nolu ngiyeebongka, Yesudi bret monic balu Wapong kwele-madic micnolu bret yogo bauckelu mic-tengtengfocine yanguc milu yelewec, "Ngenge yago balu noning, yogo soc-biucne." <sup>23</sup> Inguc milu kap monic balu Wapong kwele-madic micnolu yeleme yenge sasawadi noiibong. <sup>24</sup> Nobong yanguc edocebawec, "Nale sac yogodi dodofic gbolicne, yogo ngic-ngigac bocayac baifacebanale ailu sotingekeicne. <sup>25</sup> Foinac, na waing noinele misaine hatacmac mi nolu gaebewa, Wapongte ngani-damongte kwelina waing gbolicne nodacte, yogo noine edocngebabac." <sup>26</sup> Aime yenge Wapongetee holeibong. Holelu taon hegilelu Oliwa kupicka feibong.

### *Pitadi Yesu bisockedaike*

*Mat 26:31-35; Luk 22:31-34; Yoa 13:36-38*

<sup>27</sup> Felu Yesudi yanguc edocebawec, "Ngenge sasawadi nale ngage-sowac ailu hegilecnudaingte, yogolec yanguc biyachac kwelengkeicne fagac,

**'Na lama-damong webe, lama yenge sasawadi singsalolong kwedaingte.'**  
 (Sek 13:7)

**28 Aime na homackacni gboliye fangkelubac molickengelelu Galili prowin-swa hikedacte."**

**29 Inguc mime Pitadi yanguc miwec, "Ngic-ngigac sasawadi ngage-sowac ailu hegilecgudaingtewa, nanibac yogo nalic mi aidacte."**

**30 Inguc mime Yesudi yanguc edowec, "Foinac, yakumac debocka kokolec ngicne hiyame alecine yaeckang mi aiyemewa, gagi na biyac bisocnung dameng habackang aidaicte, yogo noine edocgugabac."**

**31 Inguc mime Pita ye sanangnehac yanguc miwec, "Na gaholec homadactewa, ga nalic mi bisocgudacte." Inguc mime mic-tengtengfocene yenge sasawadi inguchac miibong.**

#### *Getsemane bolewa*

*Mat 26:36-46; Luk 22:39-46*

**32** Yesu nga mic-tengtengfocene yenge bole himong monic wacine Getsemane, iwa hikeibong. Hike sulumelu, yedi mic-tengtengfocene yanguc edocebwec, "Ngenge yawa ngiyeebongka na milockedacte." **33** Inguc milu ye Pita nga Yoane ailu Yakobos yenge sugu bacebame leibong. Lelu kweleine umalebenangkeme kwele-sowac ngagelu **34** yanguc edocebwec, "Kwele-ilucnedi umale-benangkeme homanogale ainelegac. Ilec ailu ngenge yagowa deboc-gboli galu nganidaing." **35** Inguc milu lelu himongka wafalu yanguc milockewec, "Ga ngageng nalic aigacka dameng yogodi ewalic-nudaic." **36** Inguc milockelu yanguc miwec, "O Mamac, Mamacne, wiycasasawa yogo nalic aidamecte. Ga doicte kap yago baickenong. Ailu nale angacti mi sanangkedaic, miyac. Gale angac nga ngage-ngage yogodi sanangkedaic."

**37** Inguc milockeme motome, hefaliyelu mic-tengtengfocene yengela welelu nganicebame yenge gung faibong. Fabong Pita yeuckelu yanguc edowec, "Saimon, ga gung falu gagic. Ga nalic deboc-gboli kpisicnemac ngiyedengka, me?" **38** Ailu lokwesacka felu wawedaingkale, ngenge deboc-gboli galu milockening. Asunginengti efeckegec. Nga socnginengtibac umalegac."

**39** Ye inguc milu hatacmac lelu mimiloc yogohac milockewec. **40** Milockelu wele nganicebame yenge hatacmac gung faibong. I yangucte, yenge don-genginengti gungte aime gung faibong. Aime ye yowa mime yenge ameine bafaliyenogale kpungkeibong.

**41** Aime ye hefaliye weleme alecine habackang aime nganicebalu yanguc miwec, "Ngenge gung falu gagainghac, me? Yakumac motogac, aime dameng biyac welegac. Ngagegaing, ngic yenge Ngicte Madec mudockelu bikic-baba yengele molewa lodaingte." **42** Ngagegaing, mudoc ngic welegacte ailu ngenge fangkebong yengela hikenang!"

#### *Yesu baibong*

*Mat 26:47-56; Luk 22:47-53; Yoa 18:3-12*

**43** Aime Yesu ye inguc milu domaemewa, mic-tengtengfocene 12 yengelacni monic, wacine Yudas, ye kwesime habu sugucnedi hudu-babale fitec nga gbalucnginengkolec ye balaibeibong. Ailu yenge depec-baba ngic micne, nga Wapongte yefe-yowale wewedu ngic, ailu Yuda ngic-ngigac yengele damongfocngineng salecebabong, yengela kwesiibong.

<sup>44</sup> Aime mudoc ngicti maaine yanguc biyac milu edocebawec, "Na ngic muduckedacte, ngenge ye hocne hobalu badabiyeng. Balu damongkelu hikedaing." <sup>45</sup> Kwesibong Yudas ye kwesilu Yesula biyac lewec. Lelu "Wewedu" milu muduckewec. <sup>46</sup> Muduckeme yenge Yesu moleine neboc nga neboc sanangnehac baibong. <sup>47</sup> Babong mic-tengteng yengelacni monictibac hudu-babale fitec fuluckelu kwelec kwekwe ngic monic hedecine neboc wekwackeme wawec. Ngic yogo ye depec-baba ngic yengele damong sugucne, yele kwelec kwekwe ngic.

<sup>48-49</sup> Welockeme Yesudi yanguc edocebawec, "Na hadengsoc ngengeholec galu Ibu-macka yowa edocngebalu wedungeleiba. Aime ngenge dameng yogowabac mi bacnuibong. Aime yakumachac kindololo ngic bacebacainaing, ngenge silicine ingucne hac hudu-babale fitec, nga gbaluc balu bacnuningte kwesigaing. Aimebac Wapongte hibiwa yowa kwelengkeicne fagac, yogo sasawa noine fikeyackedaic. I yangucte, ngenge kindololo ngic ingucne bacnugaing."

<sup>50</sup> Yesu ye inguc mime yeicne alingfocine yenge sasawadi ye hegilelu hangoc hikeibong.

<sup>51</sup> Aime soc-gboli madec monic ye kpoluc madicnebenang monic, yogo sugu kwelu ye momoc Yesu balaibelu hikeme baibong. <sup>52</sup> Babong, ye kpolucine gbelengkelu wame senggangti hangoc hikewec.

### *Yesu ngic sugucnele macka balu hikeibong*

*Mat 26:57-68; Luk 22:54-55,63-71; Yoa 18:13-14,19-24*

<sup>53</sup> Aime yenge Yesu balu depec-baba ngic yengele damong sugucne yela balu hikeibong. Balu hikebong depec-baba ngic micne sasawa nga damongfocngineng, ailu Wapongte yefe-yowale wewedu ngic, yenge kpatulelu kwesibong. <sup>54</sup> Aime Pita ye lobenginang dadalisuchac Yesu balaibelu hikewec. Hikelu depec-baba ngic yengele damong sugucne yele macte oda kwelina fewec. Felu iwa mac-damong yengeholec dac folalu ngiyewec.

<sup>55</sup> Aime depec-baba ngic micne, nga Yuda ngic-ngigac yengele Tutumang-towale memba sasawa yenge yowa mingagec ailu hefeibong. Ailu Yesudi pasi sowacne wenuc aiwec, yogolec yowa milu hefeibong. Ailu yowa noine mikac aime wehomanogale ngagebong kpungkewec. <sup>56</sup> Aime ngic bocyacti yele socka kwesac ailu yowa milbong. Aime kwesac-yowanginengti moniyanghac mi aiwec.

<sup>57</sup> Aime ngic gocne yengi yengele haicka felu domalu kwesac-yowa yanguc milu kpoliceibong, <sup>58</sup> "Ye yowa monic yanguc mime ngageibeng. 'Na Ibumac yago ngicti moledi baicne, yogo hemballackelu hadeng habackangte kwelina, ngicti moledi mi baicne yogo badacte.'" <sup>59</sup> Aime kpopkolic yowangineng yogo inguchac silicine moniyanghac mi aiwec.

<sup>60</sup> Aime depec-baba ngic yengele damong sugucnedi fangkelu hewacngi-nang domalu Yesu yanguc uwacnowec, "Ga yowa migaina, yogolec nebocene monic mi bafaliyedamekte, me?" <sup>61</sup> Inguc mime Yesu ye waickelu domawec, ailu yowa ameine monic mi bafaliyewec.

Aime depec-baba ngic yengele damong sugucnedi hatacmac uwacnowec, "Ga Mesia, Wapong mimitehingeholecte madec, me?"

<sup>62</sup> Inguc mime Yesudi yanguc miwec, "**Na gagabachac.**"<sup>‡</sup> Aime ngenge Ngipte Madec ye Tapilitowa fileine, yele mole-foleinapec ngiyelu honocmenge kaguwa kwelina kwesime nganidaingte."

**63-64** Inguc mime depec-baba ngic yengele damong sugucne ye ngageme Wapong fecnowecete aalickeme ngakpi daleine basulackelu yanguc miwec, “Ye Wapong fecnolu mime biyac ngagegaing. Ilec wenuc ainoga? Ye inguc mime monicti sowacneine nganiwec, nongileng ngic ingucne hatac mi basackedabelengte.” Inguc mime yenge sasawadi ye bikickolec milu homanake mimoctoibong.

**65** Inguc mimoctobong ngic gocne yengi sofockelu donegene kpolucti ebeckelu moledi kingkpung holelu yanguc miibong, “Madi wecgugac, ga siduc-yowa yogo minong!” Mibong damong yengi balu weibong.

### *Yesu bisockewec*

*Mat 26:69-75; Luk 22:56-62; Yoa 18:15-18,25-27*

**66** Aime Pita ye oda kwelina mac-sobengka ngiyeme, depec-baba ngic yengele damong sugucnele kwelec-adu monic ye iwa welewec. **67** Welelu nganime Pita ye dac folalu ngiyeme, donegene yela hilalu yanguc miwec, “Ga inguchac Yesu Nasaret-hocni, yeholec gaing.”

**68** Inguc mime Pita ye bisockelu miwec, “Ye mi ngagegabac. Ailu yowa migic, yogo mi ngage-motogabac.” Inguc milu oda nuinele mecina leme kokolec ngicne hiyawec.

**69** Hiyame kwelec-adu ye Pita nganilu hatacmac ngic emeina domaibong, yenge edocebalu miwec, “Yengelacni ngic monic yago.” **70** Inguc mime Pita ye hatacmac bisockewec.

Aime dameng mi daliweme ngic iwa domaibong, yengi hatacmac yanguc miibong, “Foinac, monicngineng ga hocne. Ga Galili prowinswacni.”

**71** Inguc mibong ye yeuctihac sanangkelu yowa yanguc miwec, “Ngenge ngic migaina, ye mi ngagegabac. Na yowa kwesacngebagabacka Wapongte aalicte bagewa gadac.”

**72** Inguc mime yogowahac kokolec ngicne hiyame yaeckang aiwec. Aime Pita ye Yesudi yowa biyachac edowec, yogo ngagesiwec, “**Kokolec ngicne hiyame alecine yaeckang mi aiyemewa, gagi biyac na bisocnung alecine habackang aidaicte.**” Pita ye yowa yogo ngagesilu kwele-sowac sugucnehac ailu hiyawec.

## 15

### *Yesu Pailatla bahikeibong*

*Mat 27:1-2,11-14; Luk 23:1-5; Yoa 18:28-38*

**1** Ubiactebenang depec-baba ngic micne, nga Yuda ngic-ngigac yengele damongfocngineng, ailu Wapongte yefe-yowale wewedu ngic, nga Yuda ngic-ngigac yengele Tutumangtowale memba sasawa, yenge yowa hefeibong. Hefelu Yesu moleine dodockelu Pailatla bahikelu yele molewa loibong.

**2** Balu hikebong Pailatdi Yesu yanguc uwacnowec, “Ga Yuda ngic-ngigac yengele ngictau, me?”

Inguc mime bafaliyelu yanguc edowec, “**Yogo hocne gageuc migic.**”

**3** Aime depec-baba ngic micne yenge Yesu yowawa lolu fungineine bocyac miibong. **4** Inguc mibong Pailatdi hatacmac uwacnowec, “Yenge gale yowa bocyacbenang migaina, yogo ngagelu ameine monic mi bafaliyegic, me?”

**5** Inguc mime Yesu ye ameine hatacmac mi bafaliyecnome, Pailat ye kwat-ackewec.

*Yesu wehomaningte mimoctoibong  
Mat 27:15-26; Luk 23:13-25; Yoa 18:38; 19:16*

<sup>6</sup> Aime Ewalicebaicnele hombangte damengsoc yanguc ailu gawec. Ngic monic muc-macka ngiyeme, Yuda ngic-ngigac yengi yele wac wackebong. Pailat ye ngic yogo lukecnolu muc-mackacni hegileme wahikecaigac, inguc ailu gawec. <sup>7</sup> Aime ngic gocne esecne ngic-ngigac kwele fangke-fangke aibaba, ailu ngic gocne wehomacebabong muc-macka locebaibong, yengelacni ngic monic wacine Barabas. <sup>8-10</sup> Aime depec-baba ngic micne yenge Yesu moc hasowac aicnolu Pailatle molewa lonogale bahikeibong, ye yogo biyac ngagewec. Inguc ngagelu habutowa yenge kwesilu Pailat ye aibaba ailu gawec, yogo ingucne hac ainale uwacnoibong. Uwacnobong yedi ameine yanguc bafaliyu uwayelewec, “Yuda ngic-ngigac ngengele ngictau lukengelebele ngagegaing, me?”

<sup>11</sup> Inguc mime depec-baba ngic micne yengi habu kpafengebabong, yenge Yesu hegilelu Barabas lukecnionale miibong.

<sup>12</sup> Inguc mibong Pailat ye hatacmac bafaliyu yanguc uwayelewec, “Aime na Yuda ngic-ngigac ngengele ngictau migaina, yele wenuc aidacte?”

<sup>13</sup> Uwayeleme yengi aukwelu wackelu miibong, “Ga ye malicpongka weng homana.”

<sup>14</sup> Inguc mibong Pailatdi hatacmac uwayelewec, “Aime ye oma sowacne aiwec?”

Inguc mime yengi hatacmac dacineholec aukwelu wackelu miibong, “Ye malicpongka weng homana!”

<sup>15</sup> Inguc mibong Pailat ye habu yengele ngage-ngage balaibenogale ngagelu, Barabas lukecnome yengela hauwec. Aime yengi Yesu socine muc-hududi welubac, malicpongka weninge hudu-baba ngic yengele molewa lolu hegileyelewec.

*Mife-miwa aicnoibong  
Mat 27:27-31; Yoa 19:2-3*

<sup>16</sup> Aime hudu-baba ngic yenge Yesu balu gamang yengele macte oda kwelina felu mibong, hudu-baba ngic sasawadi kpaduckeibong.

<sup>17</sup> Kpaduckeyackelu misulec aicnoningte ngictaule ngakpi dalicne ingucne monic mondo-sasac holecnobong hauwec. Haume ngictaule duu ingucne muc-somang monic patiyelu hingoc ingucne hodocina holecnobong hauwec. <sup>18</sup> Haume alang bacno-bacnole silic ingucne ailu wackelu yanguc edoibong, “Ohec, Yuda ngic-ngigac yengele ngictau.” <sup>19</sup> Milu yasalci hodocina welu sofockelu higeina ketadi holecnolu milockeibong.

<sup>20</sup> Ailu yenge misulec aicnobong motome, ngakpi dalicne mondo-sasac yogo hemoctocnolu yeicne ngakpiine hatacmac holecnobong haume, malicpongka wenogale balu lobina hikeibong.

*Malicpongka weibong  
Mat 27:32-44; Luk 23:26-43; Yoa 19:17-27*

<sup>21</sup> Aime Sairini taonkacni ngic monic wacine Saimon, ye Aleksanda nga Rufus yekele mamaqnginec, ye nosing-bolewatna yefewa welewec. Weleemewa hudu-baba ngic yengi Yesule malicpong tengkenale dogbac aicnobong tengkeme hikeibong. <sup>22</sup> Hikebong yenge himong bulilicne monic wacine Goligata, yogolec fungine Hodoc-luwe, iwa Yesu balu hikeibong.

<sup>23</sup> Bahikelu marasing monic waccine mira,\* yogo waingkolec lalickelu lacnoi-bong. Aime ye yogo hegilewec.

<sup>24</sup> Aime yenge ye malicpongka welu ngakpi-kpolucine botoc balu woci-wiyacine badaingte, yogolec loling aiibong. <sup>25</sup> Yenge ubiyakte 9 kilok Yesu malicpongka weibong. <sup>26</sup> Welu ye yowawa loibong, yogolec fungine tafe kpisicna yanguc kwelengkeibong, "Yuda ngic-ngigac yengele ngictau." <sup>27</sup> Ailu yenge kindololo ngic yaeckang, monic soleinapec nga monic kanainapec yeholec malicpongka momoc wecepaibong. <sup>28</sup> [Ingc aibong yowa Wapongte hibiwa kwelengkeicne fagac yogo noine fikewec, "Ye bikic-baba yengele alingngineng, inguc ngageibong."]† (Yes 53:12)

<sup>29</sup> Aime ngic-ngigac iwa lec-welec aiibong, yenge Yesu misulec aicnolu hodocngineng dudalingkelu yanguc miibong, "Kwele-sowac aigelegabeleng, gageicne Ibu-mac hembalackelu hadeng habackangte kwelina hatacmac banogale miing. <sup>30</sup> Gageuctihac baficnagulu malicpongkacni fotockelu wanong!"

<sup>31</sup> Aime depec-baba ngic micne, nga Wapongte yefe-yowale wewedu ngic, yenge inguchac ye misulec aicnolu mingagec ailu yanguc miibong, "Ye ngic-ngigac gocne baficebacraig. Nga yeicnebac nalic mi baficnagudaicte. <sup>32</sup> Ye Mesia, Israel nongileng ngictau gadecka, yakumac malicpongkacni wana. Inguc nganilu ngagesingkedabeleng." Aime ngic yaeckang malicpongka inguchac wecepaibong, yeke inguchac yowa kwekwe aicnoiboc.

### *Yesu homawec*

*Mat 27:45-56; Luk 23:44-49; Yoa 19:28-30*

<sup>33</sup> Wenac hewac-hewac 12 kilok aiyemewa, mac kundung kweme kundutti himong someckelu falu game 3 kilok mac awelewec. <sup>34</sup> Aime dameng iwa Yesu ye malac sugucnebac wackelu yanguc miwec,

"Eloi, Eloi, lema sabaktani." Yogolec fungine yanguc bafaliyeicne, "Wapongne Wapongne, ga omale hegilecnugic?" (Mige 22:1)

<sup>35</sup> Ye inguc wackeme ngic-ngigac emeina domaibong, yengelacni gocnedi yowa yogo ngagelu yanguc miibong, "Ngagegaing, ye Wapongte siduc-mimi ngic waccine Elaiya wacke-wasic aicnogac."

<sup>36</sup> Inguc mibong monicti gasacke lelu spans‡ monic balu waing hobecine-holecka kpomuluckelu kpingka lolu Yesule micka lome feme yanguc miwec, "Wangee domalu ngaminang, Elaiyadi kwesilu bamoctodaicte me miyac!"

<sup>37</sup> Inguc mime domabong, Yesu ye malac sugucnebac hatacmac wackeme asuine ofewec. <sup>38</sup> Ofeme Ibu-macte kpoluc sugucne§ yogo hewacka yefe wilengkacni fouckelu wame yaeckang aiiboc.

<sup>39</sup> Aime hudu-baba ngic yengele damong ye Yesule haicka domawec. Ailu Yesudi wackewec ailu homawec, silicine inguc nganilu ngagelu yanguc miwec, "Foinac, ngic yago ye Wapongte madec hocne."

<sup>40</sup> Aime ngigac gocne yenge inguchac dalicka domalu pasi fikewec, yogo nganilubong. Yengele hewackacni Maria, waccine monic Magadalen. Nga Maria, ye Yakobos kpisicne nga Yosefe yekele nenggacnginec. Ailu Salome,

---

\* **15:23:** Mira yogo yoc monic, sopinedi wiyc ac bacyac bacaigaing. Monic yogodihac waingkolec lalickelu nobong socka doic weme wadaicte.   **15:24:** Mige 22:18   † **15:28:** Hibi esecne Mareko kwelengkewec, yogo nganilu iwacni kwelengkeibong kwelengkeibong ofewec, yengelacni gocne 15:28 iwa mi fagac. Ngic-ngigac yenge hibi kwelengkeicne yogo wosaelu nganibong Marekodi mi kwelengkewec meicne.   **15:29:** Mige 22:7; 109:25; Mrk 14:58   ‡ **15:36:** Spans yogo materes ingucne misa kpomuluckecaigaing.   **15:36:** Mige 69:21   § **15:38:** Kpoluc yogo mac gbagnacne, nga mac gbagnacnebenang, yekele hewacka loicne.

yenge yengilangkac domaibong. <sup>41</sup> Yesu ye Galili prowinswa game ngigac yogo yengi hocne ye balaibelu mole-bafic aicnolu gaibong. Ailu ngigac gocne bocayac, yenge Yerusalem iwa yeholec hikelu ye nganilu gaibong.

### *Yesu longkeibong*

*Mat 27:57-61; Luk 23:50-55; Yoa 19:38-42*

<sup>42</sup> Mac biyac aweleme, hombangte wiyac bamockenogale dameng bangkale weleme, Sabatle dameng bangkalewec. <sup>43</sup> Bangkaleme ngic monic wacine Yosefe, Arimateahocni, ye iwa kwestiwec. Ngic ye wactowaineholec, Yuda ngic-ngigac yengele Tutumangtowa, yoglec memba monic. Ailu ye Wapongte ngani-damongte wangec gawec. Yedi hangoc mikac Pailatla hikelu Yesule kponggbong banogale uwacnowec. <sup>44</sup> Uwacnome Pailat ye Yesu biyac homagac, yogo ngagelu kwatackelu hudu-baba ngic yengele damong wackelu Yesu biyac homagac me miyac, yoglec uwacnowec. <sup>45</sup> Uwacnome Yesu biyac homagac mime, Yesule kponggbong yogo Yosefedii banale micnowec.

<sup>46</sup> Micname Yosefe ye kpoluc madicnebenang monic fuli balu Yesule kponggbong malicpongakni bamoctolu kpolucti wabungkelu dongesiwa balu hikewec. Dongesi yogo posa henebe gufuijn fawec, iwa kponggbong lolu posatowa monic kpalundungkeme yefine hedickewec. <sup>47</sup> Aime Maria Magadalen, nga Maria Yosefe nenggacine, yeke Yesule kponggbong lowec, mac yogo nganiihoc.

## 16

### *Yesu homackacni gboliyelu fangkewec*

*Mat 28:1-8; Luk 24:1-12; Yoa 20:1-10*

<sup>1</sup> Sabat dameng motome, iwa Maria Magadalen, nga Maria Yakobosle nenggac ailu Salome, yenge hikelu Yesule kponggbong heloc hoineholecti hosocnoningte fuli baibong. <sup>2</sup> Fuli balu Sonda ubiyakte mac saeme molick-elu dongesiwa hikeebongka wenac ofewec. <sup>3</sup> Aime yenge hikelu yengungti-hac mingagec ailu yanguc miibong, "Madi henebe yefina posa yogo igockelu kpalundungkenoledaictie?"

<sup>4</sup> Inguc milu donge hilalu nganibong posatowa yogobac biyac igockelu kpalundungkeicne domawec. Ailu posa yogo sugucnebenang. <sup>5</sup> Nganilu dongesiwa felu nganibong, madec monic ngakpiine dalicne kwalac-kwalac holewec, yedi foletapiec ngiyeme nganilu kwatackelu medecebawec.

<sup>6</sup> Inguc aibong yedi yanguc edocebawec, "Ngenge mi hangocngebana. Yesu Nasaret-hocni malicpongka weibong, ngenge ye nganinogale kwesigaing. Aimebac ye biyac gboliyelu fangkegac, yawa mi fagac. Lobong fawecka, mac fafaine yogo nganining. <sup>7</sup> Ngenge hikelu mic-tengtengfocine nga Pita yanguc edocebaning, 'Ye molickengelelu Galili prowinswa hikegac. Aime ngenge iwa hikelu ye bafuwadaing, yogo yeuctihac biyachac edocngebawec, inguc fikegac.'"

<sup>8</sup> Inguc edocebame yenge kwatackelu dengdengebame dongesiwacni walu hikeibong. Ailu yenge hangocebame ngic monic mi edocebaibong.

### *Maria Magadalen fikecnowec*

*Mat 28:9-10; Yoa 20:11-18*

<sup>9</sup> [Yesu ye Sondawa fangkewec, dameng iwa molickelu Maria Magadalen fikecnowec. Ye esecne aleng 7 yelacni yebicebawec, ngigac yogo hocne fikecnowec. <sup>10</sup> Fikeyeteme Maria ye hikelu agofocine yeholec momoc gaibong, yenge kwele-sowac ngagelu hiyalu gaebongka yanguc edocebaawec, <sup>11</sup> “Yesu biyac fangkelu gagac, na nganigabac.” Inguc mime yenge yele yowa mi ngagesingkeibong.

*Mic-tengteng yaeckang fikeyetewec  
Luk 24:13-35*

<sup>12</sup> Aime yogolec lobeina mic-tengteng yaeckang yeke mac monicka hikenogale hikeebocka, ye ngani-nganiine monic ailu fikeyetewec. <sup>13</sup> Fikeyeteme yeke hefaliye hikelu agofocnginec gocne edocebaiboc. Aime yenge yekele yowa mi ngagesingkeibong.

*Bole baningte milu edocebaawec  
Mat 28:16-20; Luk 24:36-49; Yoa 20:19-23*

<sup>14</sup> Aime mic-tengtengfocine 11 yenge nosing nolu ngiyeebongka, Yesu ye yengela fikewec. Aime ye gboliyelu fangkeme gocne yengi nganilu edocebaibong, yogo mi ngagesingkeibong. Aime kwelengineng fongkewecte ailu ngaba silicka yowa edocebaawec.

<sup>15</sup> Edocebalu yowa yanguc miwec, **“Ngenge himongsoc hikelu ngic-ngigac sasawa yenge Siduc Madicne edocebalu weduyeledaing.”**

<sup>16</sup> “Aime monic ngagesingkelu misa lowadaictebac, Wapongti ye bikick-acni bamoctome wasecne aidaicte. Nga monic ye mi ngagesingkedaicte, yebac mimoctodaicte. <sup>17</sup> Aime ngagesingkedaingte, yengela pasile maaine yanguc fikedaicte, yenge nale wacka aleng yebicebadaingte ailu yowa gbolicne midaingte. <sup>18</sup> Yenge hema moledi balu mi sowaledaingte. Ailu homacte marasing nodaingtewa, yogodi mi basowalecebadaicte. Ailu yenge ngic-ngigac huckolec yengela mole lobong, yenge madickedaingte.”

*Honocmengka fewec  
Luk 24:50-53; Sale 1:9-11*

<sup>19</sup> Sugucne Yesu ye yowa inguc milu edocebame motome, Wapongti bame honocmengka fewec. Aime yele mole-foleinapec ngiyelu gagac. <sup>20</sup> Aime mic-tengteng yenge neboc nga nebocka hikelu Siduc Madicne ngic-ngigac edocebalu weduyeleibong. Aime Sugucnedi yengeholec game yenge bole babong pasile maaine fikewec, yogodi yowaine basanangkewec.]\*

---

**16:14:** 1Kor 15:5    **16:15:** Sale 1:8    **16:16:** Sale 2:38    **16:17:** Sale 2:4; 8:7    **16:18:** Luk

10:19; Sale 28:3-6    **16:19:** Sale 1:9-11; 2:33-34    **16:20:** Sale 14:3; Hib 2:3-4 \* **16:20:** Hibi esecne Mareko kwelengkewec, yogo nganilu iwacni kwelengkebong kwelengkebong ofewec, yengelaci gocne 16:9-20 iwa mi fagac. Ngic-ngigac yenge hibi kwelengkeicne yogo wosaelu nganibong Marekodi mi kwelengkewec mecene.

## **Lukadi Yesule Siduc Madicne Kwelengkewec**

### *Mimi-yegeng yowa*

Luka ye Grik ngic monic, ye Yesule mic-tengteng miyac. Ye dota bole balu gawec. Ye dongemedi Yesu mi nganiwec. Ye ngic-nigigac Yesu ngani-ngagec aicnoibong, yenge uwayeleme Yesule siduc edolu weducnoibong.

Yesu homalu homackacni gboliyelu fangkeme hifa 30 ngama ingucne motome, Lukadi hibi yago kwelengkewec. Grik ngic-nigigac yenge gaga dondonne yogolec ngagebong wiyac feicne aiwec. Ilec ye Grik ngic-nigigac yengele ngagelu Yesule siduc alingkelu Yesu ye ngic dondonnebenang, siduc ingucne kwelengkeyelewec. Yogolec lobeina ye Salecebaicne Yengele Siduc momoc kwelengkeyelewec.

### *Yowa yago hibi nebocina fagac*

1:1-4 Molic-molic yowa

1:5-2:52 Yoane misa-lowac nga Yesu yeke fikeiboc

3:1-20 Yoane misa-lowac ye bole bawec

3:21-4:13 Yesu misa lowame Aleng Sugucnenginengti kwesacka lowec

4:14-9:50 Yesudi Galili iwa lolickelu bole bawec

9:51-19:27 Yesudi Yerusalem hikenale hikelu bole bawec

19:28-23:56 Yesudi Yerusalem iwa bole balu weduyelewec

22:47-24:53 Yesu balu webong homalu fangkewec

### *Lukadi Yesule siduc Tiofilusle kwelengkewec*

<sup>1-3</sup> Tiofilus sugucnene, hewacnonggang wiyac noine fikewec, yogo kwelengkegelegabac. Ngic-nigigac yenge funginacnihac ofelu dongenginang wiyac fikewec, yogo nganilu yenge Siduc Madicnele kweleci kwekwe aibong. Yenge wiyac fikewec, yogolec siduc edocnubaibong. Aime homacnedi yogo nganilu molickelu kwelengkeibong. Na yogolec ailu siduc edocnubaibong, ailu kwelengkeibong, yogo wosaelu funginacnihac fike-ofewec yogo yegena alingkelu kwelengkegelebe nalic ainale ngagesiiba. <sup>4</sup> Ga yowa yago wafelu, yowa wedugeleibong, yogolec noine aigac, yogo nalic ngagedamekte.

### *Angelo monicti Sekariya fikecnowec*

<sup>5</sup> Abiyale bole alingkacni depec-baba ngic monic gawec, wacine Sekariya. Ye Yudeya himongte ngictau monic Herode, yele damengka gawec. Yele ngigacine, wacine Elisabet, ye Aronte fikesawec, iwacni. <sup>6</sup> Aime ngic-nigigac yogo yeke Wapongte haicka dondonnebenang gaiboc. Ailu Suguacnele ungyowa nga yefe-yowa sasawa balaibelu sowacnenginec mikac gbagbacne gaiboc. <sup>7</sup> Ailu yeke hufing. Ilec Elisabet ye gboli mikac game yeke gacgu ngic-nigigac dandang aiboc.

<sup>8</sup> Aime dameng hewac iwa Sekariya ye Wapongte haicka bole alingfocine yengeholec bole baibong. <sup>9</sup> Dameng iwa yenge aibabangineng balaibelu madi hasoc hoine madicne yogo holengale wacngineng kwelengke-lolu

baibong. Balu nganibong, Sekariyale wac fikewec.\* Hasoc hoine madicne yogo holenogale damengngine kwesime, ye Ibu-mac kwelina fewec. <sup>10</sup> Feme ngic-ngigac habutowadi Ibu-mac yogolec lobeina Wapong milockelu domai-bong.

<sup>11</sup> Inguc aibong Sugucnele angelo monicti hasoc hole-holele alata iwa, Sekariya fikecnolu alata foleinapec iwa domame, <sup>12</sup> ye yogo nganilu kwat-ackelu hangoc sugucne aiwec. <sup>13</sup> Inguc aime angelodi yanguc edowec, "Sekariya, ga mi hangocguna! Wapongti mimilocgone biyac ngagegeleyec. Ilec ailiu ngigacgone Elisabet ye madec monic gobeeulu bageledaicte. Aime gboligone ye wacine Yoane wackedamec! <sup>14</sup> Madecgonedi gale kwele-madic nga belic-belic aidaicte. Aime ngic-ngigac homacnedi ye fikenale ailiu inguchac beliyedaingte. <sup>15</sup> I yangucte, yedi Sugucnele haicka sugucne aidaicte. Ailiu waing nga misa sanangne monic mi nodaic. Ye nenggacte gobe kwelina ngiyeemewa, Tili Asudi biyac kweleine wake-icnele ailiu, <sup>16</sup> Israel ngic-ngigacfocene bocyac mengocebame yenge kwe-lengineng Sugucne Wapongngineng, yela hefaliyedaingte. <sup>17</sup> Ailu madec ye mamac mengocebame kwe lengineng hefaliyeme adu-madecfocngineng yengele angac ngagedaingte. Ailu yowa kwekwe ngic yenge ngage-ngage dondonne ba fuwayelenale bole badaicte. Ailu yedi Sugucnele haicka gacgu Elaiyale aibaba nga tapiliwa ingucne bagidaicte. Inguc bagacgu ngic-ngigac baeceebame yenge Sugucnele haicka efeckelu yele ngic-ngigacfocene ailiu gadaingte."

<sup>18</sup> Inguc mime Sekariyadi angelo yanguc edowec, "Naneicne ngic dandan-gngine. Nga ngigacne inguchac, ye hifaine bocyac biyac aiicne. Aime gale yowa wenucka ngagebec noine aidaicte?"

<sup>19</sup> Mime angelodi yanguc miwec, "Na Gabrieldi, Wapongte haicka domacaigabac. Ailu ye yeuctihac ga yowa edocgubele salecnume welelu Siduc Madicne yago milu edocgube yegengkegac. <sup>20</sup> Ngagegic, yowa migabac, yogolec damengngine kwesime wiyac noine fikedaicte. Ga yowane mi ngag-singkegamede, yowagone mikac aidamekte. Aime gacgu wiyac migabac yogo, damengngine kwesi fikeme, hadeng yogowabac ga yowagoneholec hatacmac aidamekte."

<sup>21</sup> Aime ngic-ngigac aling yenge Sekariyale wangec domabong ye Ibu-macka dameng dalicnebenang domame ngageboc aibong. <sup>22</sup> Inguc aibong, ye lobina walu yowaine mikac aime, yowa edocebanale aibibiyeme yenge biyac ngage-motoibong, "O, ye Ibu-macka felu yowa gung-didicka ingucne nganigac." Iwa domalu yowa monic mi milu moledi sugu sosoc aiwec.

<sup>23</sup> Aime Sekariyale depec-babale bole-dameng motome, ye walu macina hefaliye hikewec. <sup>24</sup> Hikeme dameng mi daliweme, ngigacne Elisabet ye gobeholec ailiu tamacne 5 sangke-sangke galu yanguc ngagewec, <sup>25</sup> "Yago Sugucnele aibaba monic, yedi nale ngagesilu dameng yagowahac gamene basawelenale, aibaba yago ainelegac. Ilec ngic-ngigac yenge na yowa kwekwe hatacmac mi aineledaingte."

### *Angelo monicti Maria fikecnowec*

<sup>26</sup> Aime Elisabet ye tamacneine 6 aime, Wapongti angelo monic wacine Gabriel, ye saleme taon monic wacine Nasaret, Galili prowins iwa hikewec.

---

\* **1:9:** Wahikeicne 30:1-8 hasoc hole-holele alatale yowa fagac. Yoc yogo goldi someckeicne. Adeceneine yogo 50 cm ingucne, nga feina dalicneine yogo 90 cm ingucne. Depec-baba ngic monic ye ubiyakte nga awelemesoc hasoc hoine madicne lobeme Wapongta felu gawec, yogo ye sic me nosingti depec mi lobelu gawec. **1:15:** Him 6:3    **1:17:** Mal 3:1; 4:5-6; Mat 17:11-13    **1:19:** Dan 8:16; 9:21

**27** Hikelu ngigac-neleweng monic ngickolec mi faicne, wacine Maria, ye fikecnowec. Aime Maria ye ngic monic, wacine Yosefe, yeholec bingeka gaiboc. Aime Yosefe ye Dawidile fikesawreckacni. **28** Aime angelodi Mariale yanguc miwec, “Asec, Sugucnedi gaholec gagac. Ailu kwele-madicinedi gala fagac!”

**29** Inguc mime Maria ye yogo ngagelu ngageboc sugucne aiwec, “Angelodi omale inguc edocnugac,” yogo ngagelu dabiyelu ngage-ngage bole bocyac bwec.

**30** Ngage-ngage bole badomame, angelodi yanguc edowec, “Maria, Wapongti gale ngageme madickecaigacte mi hangocguna. **31** Ailu ngagegic, ga gboli monic gobeelu badamekte. Ga madec yele wacine Yesu wackedamec! **32** Madec yogo ye feicne aidaicte. Ye Wapong Feicnetowanonggeng yele madec, yele wacine inguc wackedaingte. Aime Wapong Sugucnedi ye ngamboine Ngictau Dawidile bole ingucnehab lacname iwa damongkedaicte. **33** Damongkelu yedi Yakobole gbolifocene yengele ngictau ailu damengngine fafa-sanang fagidaicte. Ailu mac-himongine damongkelu, miyac-miyacie mikac gaginowagac.”

**34** Mime Mariadi angelo yanguc edowec, “Ngickolec monic mi facaigabac. Aime yogo wenucka fikenelenale migic?”

**35** Inguc uwacname miwec, “Tili Asudi gala wame Wapong Feicnetowale tapilidi gale folalac ailu somecgudaicte. Ilec ailu gboligone gbagbacnebenang fikedaicte, yele wacine Wapongte Madec wackedaingte. **36** Ngagegic, gale aling moniyang Elisabet, ye ngigac-dandangngine ailu sifu ye madec gobeewec. Ye hufing gacaigac mibong, ye gobeholec aime tamacneine 6 biyac aigac. **37** I yangucte, Wapongte aibaba yogo kpungke-kpungkeine mikac.”

**38** Inguc mime Mariadi miwec, “Ngagegic, na Sugucnele kwelec-adu. Ilec yowa migic, yogo nalic fikeneledaic.” Mime, angelo ye hegilelu hefaliye likewec.

### *Mariadi Elisabet nganinogale bikewec*

**39** Dameng mi daliweme Maria ye efekkelu taon monic Yuda yengele sifec himongka fawec, iwa biyac bikewec. **40** Hikegacgu Sekariyale macka fewec. Felu Elisabet wenac-madic micnowec. **41** Micname Elisabet Mariale yowa ngageme, gboli gobeina ngiyewec, yogodi kwatackelu uc fific aiwec. Aime Tili Asudi Elisabetla wakeme, **42** ye sugucnehab aukwelu miwec, “Ngigac hewacnonggang gagic, ga mimi-madicgoneholec. Nga gboli gobegona ngiyegac, ye mimi-madicineholec. **43** Nale Sugucnele nenggacinedi nala kwesime aibaba yago fikenelegac, yogo wiyac sugucne. **44** Ngagegic, wenac-madic yowagone miyengka hedecnedi ngagebe, gboli gobena ngiyegac, ye beliyelu uc fific aigac. **45** Ngigac, ga, Sugucnedi yowa edocguwec, yogo noine fikedaicte, inguc ngagesingkeing, ngigac ingucne ga kwele-angackolec.”

### *Maria ye Wapong mitengkewec*

**46-48** Mime Mariadi miwec, “Wapong, ga nganicnulu ngageng na kwelec-adugone wawainebenang ailu gaiba. Ilec ailu kwele-ilucnedi Sugucne asec-asec aigelebe, Asunedi Wapong, asabane gale ailu angackeme beliyegac.”

Ngic-ngigac fikesawec ainowagaing, yengi ngagenelelu, 'ye kwele-angackolec' inguc minowagaing.

<sup>49</sup> Sugucne Tapilitowa Fileinedi aibaba sugucnebenang ainelewec. Aime yele wacine gbagbacnebenang.

<sup>50</sup> Fikesaweckacni fikesawec, yele alang bacnocaigaing, yele kwele-sowacti yengele feiwa fagidaite.

<sup>51</sup> Aime yenge yengileng kwele ngage-ngagengeneng yogo ngagebong feicne aigac, yengela pasi tapiliineholec balu moleine sungkelu bagi-locebame singsalolong kwecaigaing.

<sup>52</sup> Ailu yedi damong ngic bolenginangkocni baicebawec.

Nga ngic-ngigac wawaine gaibong, yenge bafangebawec.

<sup>53</sup> Aime ngic nosingte homalu gagaing, yenge yeicne wiyc macne yelelu bawakeyelewec.

Ailu mafatowanginengkolec, yengebac molenginang wiyc monic mi lolu moc salecebame hikibong.

<sup>54-55</sup> Wapong ye ngambononggeng Abrahamtacni fikesawec aiofeibong.

Nga aifenowagaingte yowaine edocebawec, yogo mi ngigekewec.

Ye bole-ngicfocine Israel yengele kwele-sowac ailu baficebawec."

<sup>56</sup> Milu Maria ye tamacne habackang inguc Elisabetkolec gacgu hatacmac macina hefaliye hikewec.

### *Yoane fikewec*

<sup>57</sup> Hikeme Elisabet ye gboli fike-fike damengngine bangkaleme madec fikewec. <sup>58</sup> Fikeme macfocine nga yeicne alingfocine yengi Sugucnedi kwele-sowac aicnowec, yogo ngagelu yeholec momoc beliyeibong.

<sup>59</sup> Aime hadeng 8 aiyemewa yenge madec yogo soc tofaine helockeningte welelu yele wacine Sekariya, mamacinele wase baningte inguc miibong.

<sup>60</sup> Inguc mibong nenggacine Elisabet yedi kpatalalu miwec, "Miyac, yele wacine Yoane wackenoga."

<sup>61</sup> Mime yengi yangc miibong, "Gale alingfogone yengelacni wac ingucne monic mi wackeibong fagac." <sup>62</sup> Inguc milu moledi sosoc ailu mamacie uwacnoibong, madec wacine ma wackenoga.

<sup>63</sup> Uwacnobong Sekariyadi hibi kweleng-kwelengte tafe, yogo moledi sosoc aiyeleme lacnobong yanguc kwelengkewec, "Madec yele wacine Yoane." Inguc kwelengkeme yenge sasawadi ngageboc aiibong. <sup>64</sup> Aime dameng iwahac Sekariya beluine hefaliyeme ye hatacmac yowa mimi ailu Wapong mitengkelu gawec. <sup>65</sup> Game macfocine yenge sasawadi hangocabawec. Aime ngic-ngigac Yudeya sifec himongka gaibong, yenge aibaba fikewec, yogolec mingagec ailu gaibong. <sup>66</sup> Aime Sugucnele tapilidi gboli-holec gawecte ailu ngic-ngigac yenge siduc yogo ngagelu, yenge yowa yogo ngage-ngagengenang lolu yanguc ngagelu uwayeibong, "Gboli yogodi gacgu wenuc ainowagac?"

### *Sekariyadi siduc-yowa miwec*

<sup>67</sup> Aime Tili Asudi gboli mamacie Sekariyale kwelewa wakeme, yedi siduc-yowa yanguc miwec,

<sup>68</sup> "Sugucne Israel yengele Wapong yedi ngic-ngigacfocine nongileng wele fuli bacnubawec.

Ilec ye mitengkenang.

- 69-70** Ailu ye esecnebenang Wapongte siduc-mimile bingec yengele micka yowa lolu miwec, yogo balaibelu bole-ngicine Dawidi, yele fike-saweckacni Asa-baba ngic sanangne fikewec.
- 71** Fikeme yedi ngabafocnonggeng gagaing, nga kweledi wicnubacaigaing, yengele molewacni bamoctocnubadaicte.
- 72-73** Aime Wapongti ngambononggeng Abrahamta mimipang sanangne miwec, yogo ngagesilu dodoifcnonggeng gbagbacne balaibelu ngambofocnonggengte kwele-sowac aiyelecaigac.
- 74-75** Nonge ngabafocnonggeng yengele molewacni baicnubadaicte. Ailu gaga-damengnonggeng fagacsoc hangoc mikac yele haicka gbagbacne nga dondonne ailu afeelu kwelec kwekwe gadabelengte.
- 76** Aime nale gboli, gagi molickelu Sugucnele yefe bamadickelu yefe hole-wenengkecte yanguc wacgudaingte, ga Wapong Feicnetowanonggeng yele siduc-mimi ngic.
- 77** Ga ngage-ngage yanguc weduyeledamete, yele ngic-ngigacfocene aibaba bikicnginengkolec hegilelu, Asa bacebame wasecne aidaingte.
- 78** Aime Wapongnonggeng, angacine nga kwele-sowac feicnebenang ainole-caigac, inguc fikedaicte.
- Aime yele angactowainele tapilidi wenac ingucne nongilang wadaicte.
- 79** Walu kundung kwelina nga homacte folalacka gagaing, yenge bacebame angoledaingte.
- Ailu nongileng kwele-mogungte yefewa ganangte damongnubalu yefe yogo edalicnubadaicte.”
- 80** Aime madec ye socine suguleme, kwele ngage-ngageine sanangkewec. Ailu himong kisawa misaine mikacka gacgu Israel ngic-ngigac yengele haicka fikelu yegengkenale damengnginele wangec gawec.

## 2

*Yesu madec fikewec*  
*Mat 1:18-25*

**1-2** Aime Roma himongte ngictau monic, wacine Sisa Agustus, yedi himongne himongne wac-alingsgineng kwelengkeningte yowa lome hikey-ackewec.\* Dameng iwa ngic monic, wacine Kvirinius, yedi Siria himongte gawana galu molic-molic boleine wac-aling bawec. **3** Aime ngic-ngigac sasawadi wac-alingsgineng kwelengkeningte macngineng fawecsoc hikey-ackebong.

**4** Aime Yosefe ye Nasaret taon Galili prowins iwa gawec. Ye Dawidile fikesaweckacni. Ilec ailu hegilelu Yudeya himong Dawidile taon kpisicne, wacine Betelehem, iwa hikewec. **5** Hikeme ngigac-bingeccine Maria ye gobeholec aiwec. Ailu yeke momoc wacnginec wac-alinkwa kwelengkeningte hikeiboc. **6** Yeke iwa hike sulumeboc kogoc fike-fike dameng kwe-siwec. **7** Kwesime molic-molic madecnginec fikewec. Aime mac ngiye-nyiye sawaine monic mi fawecte, Mariadi kpolucti ebeckelu lama-bulumaka yengele duwacka iwa lome haulu fawec.

*Angelodi lama-damong siduc edocebawec*

<sup>8</sup> Aime deboleme lama-damong gocne yenge Betelehem kpanggewa lamafoengineng damongebalu gaibong. <sup>9</sup> Inguc gacgubong Sugucnele angelo monicti iwa fikeyelewec. Fikeme Sugucnele tapili nga hibi-angocti baangolecebame yenge hangoc sugucne ailibong. <sup>10-11</sup> Aime yedi yanguc edocebewec, “Ngenge hangoc mi aining! Ngagegaing, yakumacbenang ngengele aihu Dawidile taon kpisicna Mesia Sugucne fikegac, ye bikicte ameinele Asa-baba ngic. Ngic-ngigac sasawadi yele aihu beliye-benangkedaingte, na Siduc Madicne yogo mibe yegengkenelegac. <sup>12</sup> Gboli yogo ngenge wenuc bafuwaningte maa yago ngelegabac, ngenge hikelu lama-bulumaka yengele duwacka kogoc monic kpolucti ebeckicne fame bafuwadaingte.”

<sup>13</sup> Ye inguc milu domaemewa iwashac honocmengte angelo habu sugucne, yenge fikelu yeholec domalu Wapong mitengkelu yanguc miibong,

<sup>14</sup> “Wapong, wac feicne, wileng honocmengka fadaic.

Aime himongka yengela kwele-mogung fadaic.

Wapongti ngic kwele-efec aiyelegac.”

<sup>15</sup> Aime angelo yenge honocmengka hefaliye febong, lama-damong yenge yengilangkac mingagec aihu miibong. “Betelehem taonka wiyc yogo fikeme Sugucnedi edocnubagac, ilec biyac hikelu yogo nganinang.”

<sup>16</sup> Inguc milu yenge biyac hikelu Maria nga Yosefe aihu gbolinginec duwac kwelina fawec, yogo biyac bafuwacebalu nganicebaibong. <sup>17</sup> Nganicebalu angelodi gboli yele yowa miwec, yogo edocebabong ngageyackeibong. <sup>18</sup> Aime lama-damong yenge siduc miibong, yogo ngic-ngigac sasawadi ngagelu mimedec aiyackeibong. <sup>19</sup> Mariadibac aibaba fikecnolu gawec, yogo kweleina lolu ngagesilu gawec. <sup>20</sup> Aime angelodi lama-damong edocebewec, yogo sasawa noine nganilu ngageibongte aihu, yenge hefaliyu Wapong wacine bafelu mitengkelu hikeibong.

### *Yesu madec wac lacnoibong*

<sup>21</sup> Aime hadeng 8 motome yenge kogoc soc tofaine helockingte damengngine kwesime ye wacine Yesu wackeibong. Wac yogo ye nenggacine mi gobeeemewa angelodi biyachac wackewec.

### *Simeon nga Anna yeke Yesu madec Ibu-macka nganiiboc*

<sup>22</sup> Gacgu Wapongte yefe-yowa Mosesdi kwelengkewec, yogo balaibelu suwe-suwe damengngineng yogo motome yenge kogockahac Sugucnele haicka fikenale Yerusalem bafeiboc. <sup>23</sup> Yogolec Sugucnele yefe-yowawa yanguc kwelengkeicne fagac, “Molic-molic madec fikedaingtesoc, yenge Sugucne yeicne sugu aidaingte.” <sup>24</sup> Aime yeke suwe-suwe dameng iwa depekte sic alingkacni tudiling nango yaeckang, me gomoc-gomoc madecine yaekang locepanoga, yogo Sugucnele yefe-yowawa fagac, yeke yogo balaibelu bahikeiboc.

<sup>25</sup> Hei, dameng iwa ngic monic Yerusalem gawec, wacine Simeon. Ye ngic dondonne, aihu ye Wapong alang bacnolu Tili Asuholec gawec. Ye Israel ngic-ngigac yengela mibasanang aiyelenale wangec gawec. <sup>26</sup> Aihu ye mi homame Sugucnele Mesia fikeme nganinogale Tili Asudi esecne biyachac mifikecnowec. <sup>27</sup> Aime Yesule nenggac-mamac yekele yefe-yowa fawec, yogo balaibelu gbolinginec Ibu-macka bafeiboc. Bafeboc Asudi Simeon kweleina biyac wakeme Ibu-mac kwelina fewec. <sup>28</sup> Felu kogoc moleina hoba-domalu yedi Wapong mitengkelu yanguc miwec,

**29-30** "Sugucnene, na kwelec kwekwegone, dongenedi Asa-baba ngicgone nganibele miing, yogo biyac nganigabac.  
 Ilec ga ngageng nalic aime kwele-mogungkolec gagane hegilelu hikedacte.  
**31** Aime ngic-ngigac sasawadi ye nganiyebongka ga yefe yogo biyac bamacidkeing.  
**32** Gboli yago yedi Israel yengele alingkacni miyac, yenge bacebame yegengkebong yogodi angocngineng aidaicte.  
 Alu Israel ngic-ngigacfocgone yenge wac feicne yeledamecte."

**33** Mime gboli yogo nenggac-mamacine yeke yele yowa yogo ngagelu mimedec aiihoc. **34** Inguc aime Simeonti mimi-madic milu edocebaawec. Alu gboli yogo nenggacine Maria yowa yanguc edowec, "Ngagegeic, Israel ngic-ngigac homacnedi madec yago yele ailu wawedaingte. Nga homacnedibac yele ailu fangkelu domadaingte, aibaba inguc fikenale Wapongti mimoctowec. Nga bocyac yengi maaine nganilu ngaba ailu yowa kwekwe aidaingte. **35** Inguc aime ngic-ngigac bocyac yengele ngage-ngage sangkelu fawec, yogo yegenia fikedaicte. Aime Maria, ga doicti kwelegona hudule fitec ingucnedi helockeddaingte."

**36** Aime Wapongte siduc-mimi ngigac monic gawec, wacine Anna, ye inguchac Ibu-macka gawec. Ye Fanuel aduine. Alu ye Asele fikesaweckacni. Ye ngic balu yeholec hifa 7 gacgume ngaweine homawec. **37** Homame ye hosec gacgume hifaine 84 aiwec. Alu ye Ibu-mac mi hegilelu deboc hadeng nosing-sawe galu milockelu Wapong afeelu kwelec kwekwe gawec. **38** Gacgu dameng yogowahac Annadi Maria ngama yengele emewa wele domalu Wapong mitengkewec. Jerusalem ngic-ngigac yenge fuli bacebanale wangec gaibong, gboli yogolec siduc yenge milu edocebame yegengkewec.

### *Nasaret hefaliye hikeibong*

**39** Aime Yosefe nga Maria yeke Sugucnele yefe-yowadi migac, yogo sasawa balaibelu aiyackeboc motome, yenge Galili prowinswa hefaliyel Nasaret taonnginang hikelu gaibong. **40** Gacgu madec yogo suguleme Wapongte kwele-madicti yela fame, ye tapili nga ngage-ngage-motoc wakeicne fikecnowec.

### *Yesu ye madec hakicti Ibu-macka fewec*

**41** Aime Yesule nenggac-mamac yeke Ewalicebaicnele hombang ngagesilu hifasoc Jerusalem iwa hikelu gaiboc. **42** Alu yenge hombangte aibaba balabelu, Yesu ye hifaine 12 aiyemewa yenge momoc hombangte hikeibong. **43** Hikelu iwa gacgubong hombang dameng yogo motome yeke hefaliye weleebocka, Yesu ye Jerusalem iwa ngiyewec. Aimebac nenggac-mamacine yeke mi ngagelu welelu **44** yanguc ngageiboc, "Ye ngic-ngigac habu yengeholec yefewa gagac." Inguc ngagelu yeke hadeng moniyang yefewa hikelu Yesu monic mi bafuwaihoc. Inguc aime yeki ye basackelu agofocngineng nga alingfocngineng yengela lolick hikelu basackeiboc. **45** Basackelu monic mi bafuwaihoc, yeke hatacmac hefaliyelu Jerusalem taonka basackenite hatac hikeiboc. **46** Hike basackeboc hadeng habackang motome, Ibu-mac kwelina felu Yesu bafuwaihoc. Bafuwaboc ye Ibu-mac kwelina wewedu yengele hewacka ngiye ngageyelel mi-uwac aiyelewec. **47** Aime Yesudi ngage-ngageholec ngic-ngigac sasawa yowangineng ameine bafaliywecete, yenge mimedec ailu yanguc ngageibong, yogo wiyc feicne aigac. **48** Aime

nenggac-mamac yeke ye nganilu kwatackelu nenggacinedi yanguc edowec, "Madec, ga omale aibaba ingucne ainotegic? Aime mamacgoneholec noke gale ngageboc ailu ga basacgulu gagabelec."

**49** Inguc mime yedi yanguc edocepwec, "**Ngeke omale basacnugabiyc?** **Na mamacone macka gagabac, yogo mi ngagegabiyc, me?**" **50** Inguc mime yeke yowa yogolec dabiyeboc.

**51** Ailu ye nenggac-mamacine yekeholec hatac hefaliyelu Nasaret macka hikelu yowanginec balaibelu gawec. Game nenggacinedi aibaba sasawa fikewec, yogo ngage-ngageina lolu gawec. **52** Aime Yesule ngage-ngagemotoc nga socine sugule-sanangkeme, Wapong nga ngic-ngigac yenge momoc ngage-madickecnobong.

### 3

*Yoanediboleine fungkewec  
Mat 3:1-12; Mrk 1:2-8; Yoa 1:19-28*

**1** Ngictau Sisa Tiberias, ye hifa 15 dameng inguc biyac gawec. Dameng iwa ngic monic, wacine Pontius Pailat, yedi Yudeya himongte gawana gawec. Gaemewa Herode ye Galilile damong gawec. Nga gbaine, wacine Filip, yedi Ituraia nga Trakoniti himongte damong gawec. Nga Lisania ye Abilenele damong, inguc gaibong. **2** Inguc gaebongka Annas nga Kaifas yeke depec-baba ngic yengele damong sugucne gaiboc. Dameng yogowahac Sekariyale madec Yoane, ye himong kisiwa misaine mikacka gacgume Wapongte yowadi yela kwesiwec. **3** Kxesime Yoane ye Yodan misa nebock nga nebocka himong falegac, iwa lolickewec. Ailu kwelengineng hefaliyeme bikicngineng miyac aime misa lowaningte edocebalu weduyelewec. **4** Yowa yogo Wapongte siduc-mimi ngic Yesaiyadi miwec, yele hibiwa yanguc kwe-lengkeicne fagac,

"Himong kisiwa misaine mikacka wawac monic yanguc fikegac, 'Suguc-nele yefe wesackelu hole-wenengkening. **5** Lumo sasawa someckeyackening. Nga tiki nga kuplic sasawa yogo hole-wenengkening. Ailu yefe adec adec bamadickebong dondonne aidaic. Nga yefe hauc-ofecineholec hemusungkening. **6** Aime Wapongti aibaba yogo balu bikicte amenonggeng baickedaicte, yogo ngic-ngigac sasawadi nganiyackedaingte.'"

(*Yes 40:3-5*)

**7** Inguc aime ngic-ngigac homacnedi Yoanela hikelu misa lowayelenale edobong, Yoanediboleine yanguc miwec, "Hema gblifocene, madi ung-yowa yanguc edocngebawec, ngenge Wapongti aalicine badungelenale aidaicte, yogolet hangoc hikedaingte? **8** Ilec ngenge kwele-hefaliyete silicka pasi noine bafuwadabiyeng. Ailu yanguctihac gageicnele yanguc mi ngagedamec, 'Abraham ye ngambone aigacte wasecne aidacte.' Wapong ye posa yago nalic mime Abraham ngambofocene fikedaingte, yogo noine edocngebabac.\* **9** Aime naka yoc fungina biyac loicne fagac. Aime yoc gocne noine madicne mi aicaigaing, yogo sasawa weyackelu dacka wickedaingte."

**10** Inguc mime ngic-ngigac yengi uwacnoibong, "Inguc aime nonge wenuc aidabelengte?"

**11** Mibong yowangineng bafaliyelu yanguc edocebwec, "Monicti ngakpiine yaekang balu gagac, ye monicne hemoctolu monic ngakpiine mikac

**2:51:** Luk 2:19    **2:52:** 1Sm 2:26; Ynn 3:4    **3:3:** Sale 13:24    **3:7:** Mat 12:34; 23:33

\* **3:8:** Bocyc yengi yanguc ngagelu gaibong, "Abraham ye ngambononggeng, ilec gaga-sanang badabelengte." Aime Yesudi yanguc edocebwec, "Yogo nalic mi aigac." **3:8:** Yoa 8:33,39    **3:9:** Mat 7:19

gagac, ye bafickedaic. Nga monic ye noba-nosingkolec gagac, ye aibaba yogohac aidaic."

<sup>12</sup> Mime takes-baba gocne yengi inguchac welelu misa lowayelenale mibong, "Wewedu, nonge wenuc aidabelengte?"

<sup>13</sup> Mibong yanguc edocebwec, "Ngenge moneng baningte edocngebaicne, moneng yogolec silicina badaing. Moneng ewalilu mi badaing."

<sup>14</sup> Mime hudu-baba ngic gocne yengi inguchac Yoane uwacnoibong, "Aime nonge wenuc aidabelengte?"

Mibong yanguc miwec, "Ngenge ngaba aibaba me kwsacka ailu migbedicka monickacni moneng mi badaing. Ngenge bolenginengte fuli ba-caigaing, yogo sugu ngagebong andoine aidaic."

<sup>15</sup> Aime ngic-ngigac yenge Mesiale wangec gaibongte ailu "Yoane ye hocne Mesia mecne," kwelenginang inguc ngageibong. <sup>16</sup> Inguc ngageibongte Yoanedi yowangineng yanguc bafaliyewec, "Na misa lowangelegabac. Ngic nale lobewa kwsidaicte, yedibac Tili Asu nga dac lowangeledaicte. Ailu yele tapilidi nale tapili ewaligac, na waweweine ingucnedi yele hige-ebechte mucine lukebe nalic mi madickedaicte. <sup>17</sup> Ye moleina yafole fok balu welelu wit yafoineholec baic-baictre sobengka fame, yogo filalu yafoine baickedaicte. Baickelu noine bakpaduc ailu nosing-macina lolu, yafoine pelengkelu dac pisic-pisicine mikac, iwa wickeme lobedaicte." <sup>18</sup> Yoane ye yowa silicine ingucne bocyac milu ngic-ngigac yowa sanangne milu Siduc Madicne edocebalu gawec.

### *Herodedi Yoane muc-macka lowec*

<sup>19</sup> Aime ngictau Herodedi gbainele ngigac waccine Herodias, hise balu aibaba sowacne gocne bocyac aicnolu gawec. Aime Yoanedi aibaba sowacne yogolec Herode ngelengkelu edowec. <sup>20</sup> Edome Herodedi aibaba sowacne hafacmac taockelu, Yoane ngaba aicnolu muc-macka lowec.

### *Yoane ye muc-macka mi feluhac Yesu misa lowacnowec*

*Mat 3:13-17; Mrk 1:9-11*

<sup>21</sup> Aime ngic-ngigac sasawadi misa lowaebongka, Yesu ye inguchac misa lowawec. Lowalu Wapong milockelu domaemewa, honocmeng angkeme

<sup>22</sup> Tili Asudi tudiling nangole silic ingucne ailu Yesula wawec. Wame honocmengkacni mic-yowa monic yanguc fikeme ngagewec, "Ga nale madec, kwelenedi gale angac ngagegabac, na ga ngani-angac aigelegabac."

### *Yesu ngesa-ngambofocene yengele wac-aling*

*Mat 1:1-17*

<sup>23</sup> Yesu ye hifaine 30 aiyemewa boleine fungkewec. Aime ngic-ngigac yengi yanguc ngageibong, ye Yosefele madec. Nga

Yosefe ye Helile madec nga

<sup>24</sup> Heli ye Mataitle madec.

Matat ye Liwaille madec nga

Liwai ye Melkile madec.

Melki ye Yanaile madec nga

Yanai ye Yosefele madec.

<sup>25</sup> Yosefe ye Matatiale madec nga

Matatia ye Amosle madec.

Amos ye Nahumte madec nga

Nahum ye Esilile madec.

Esili ye Nagaile madec nga  
**26** Nagai ye Mahatale madec.  
 Mahata ye Matatiale madec nga  
 Matatia ye Semengte madec.  
 Semeng ye Yosekle madec nga  
 Yosek ye Yodale madec.  
**27** Yoda ye Yonangte madec nga  
 Yonang ye Resale madec.  
 Resa ye Serubabelle madec nga  
 Serubabel ye Sialtielle madec.  
 Sialtiel ye Nerile madec nga  
**28** Neri ye Melkile madec.  
 Melki ye Adile madec nga  
 Adi ye Kosamte madec.  
 Kosam ye Elimadamté madec nga  
 Elimadam ye Erile madec.  
**29** Eri ye Yosuwale madec nga  
 Yosuwa ye Eliesale madec.  
 Eliesa ye Yorimte madec nga  
 Yorim ye Matatale madec.  
 Matata ye Liwaile madec nga  
**30** Liwai ye Simeonte madec.  
 Simeon ye Yudale madec nga  
 Yuda ye Yosefele madec.  
 Yosefe ye Yonamte madec nga  
 Yonam ye Eliakimte madec.  
**31** Eliakim ye Meleale madec nga  
 Melea ye Menale madec.  
 Mena ye Matatale madec nga  
 Matata ye Natante madec.  
 Natan ye Dawidile madec nga  
**32** Dawidi ye Yesile madec.  
 Yesi ye Obedele madec nga  
 Obede ye Boasle madec.  
 Boas ye Salmonte madec nga  
 Salmon ye Nasongte madec.  
**33** Nasong ye Aminadapte madec nga  
 Aminadap ye Adaminte madec.  
 Adamin ye Ramte madec nga  
 Ram ye Hesorongte madec.  
 Hesorong ye Peresle madec nga  
 Peres ye Yudale madec.  
**34** Yuda ye Yakobole madec nga  
 Yakobo ye Aisakle madec.  
 Aisak ye Abrahamte madec nga  
 Abraham ye Terale madec.  
 Tera ye Nahorle madec nga  
**35** Nahor ye Serukle madec.  
 Seruk ye Reule madec nga  
 Reu ye Pelekle madec.  
 Pelek ye Eberile madec nga  
 Eberi ye Selale madec.

**36** Sela ye Kainante madec nga  
Kainan ye Arpaksatle madec.  
Arpaksat ye Siemte madec nga  
Siem ye Noale madec.  
Noa ye Lamekte madec, nga  
**37** Lamek ye Metuselale madec.  
Metusela ye Enokte madec nga  
Enok ye Yaretle madec.  
Yaret ye Mahalalelle madec nga  
Mahalalel ye Kenante madec.  
**38** Kenan ye Enosile madec nga  
Enosi ye Setle madec.  
Setdi Adamte madec nga  
Adam yedi Wapongte madec.

## 4

*Aleng Sugucnenginengti Yesu lokwesacka lowec  
Mat 4:1-11; Mrk 1:12-13*

**1** Aime Tili Asudi Yesu kweleine bawakeme Yodan misawacni hefaliye ofeemewa, yedi himong kisiwa misaine mikacka mengockeme hikeiboc.  
**2** Yesu ye iwa hikegacgume hadeng 40le kwelina, Aleng Sugucnenginengti iwa lokwesacka lowec. Dameng iwa Yesu ye nosing mikac game hadeng 40 motome ye nosingte homawec.

**3** Nosingtge homame Aleng Sugucnenginengti yanguc edowec, “Ga Wapongte Madec noine gagicka posa yago miyengka bafaliyelu bret aina!”

**4** Inguc mime Yesudi bafaliyecnolu yanguc miwec, “**Hibiwa yowa yanguc kwelengkeicne fagac,**  
**‘Ngicti nosingka sugu mi gadaicte.’”** *(Yef8:3)*

**5** Mime yedi Yesu himong hewac monicka mengocke fewec. Felu himontowa himong gamangnginengkolec edaliwec, yogo folo-folo bapilackeme nganiwec. **6** Nganime yanguc miwec, “Himong yagolec wac feicne nga boleyowa tapiliineholec sasawa damongkenogale esecne neleibong. Aime na monic me monic yogo lacnobele bole-yowa tapiliineholec fanelegac. **7** Ilec na ketadi holenelelu afenuengka, yogo sasawa hegilebe gale aiyackenale angacnugac.”

**8** Inguc mime Yesudi bafaliyelu yanguc edowec, “**Hibiwa yowa yanguc kwelengkeicne fagac,**  
**‘Sugucne Waponggone, ye moniyang sugu afeelu kwelec kweecnodamec!’”** *(Yef6:13)*

**9** Mime yedi hatamac mengockeme Yerusalem hikelu Ibu-mac feina wilinibenang, iwa lome domawec. Domame edolu yanguc miicnowec, “Ga Wapongte Madec noine gagicka gageuctihac yagowacni wintackelu haunong! **10** Yowa yanguc kwelengkeicne fagac,  
‘Ye gale aihu angelofocine bole-yowa yeleme yengi ga damonggudaingte.

**11** Aihu yengi molengineng feina sesegubong, posa monicti higegone nalic mi helockedaiete.” *(Mige 9:11-12)*

**12** Inguc mime Yesudi yanguc miwec, “Yowa yanguc miicne fagac,  
‘Ga Sugucne Waponggone lokwesacka milonong!’”\* *(Yef6:16)*

**3:36:** Fike 11:10-26    **3:38:** Fike 4:25-26    \* **4:12:** Entacka Yesudi Aleng Sugucnenginengte yowa balaibedec, Yesu ye Wapong lokwesacka lodec.    **4:12:** 1Kor 10:9

**13** Mime Aleng Sugucnenginengti lokwesac sasawa aibibiyeme motome, hegile hikelu dameng monicte wangec gawec.

*Nasaret yenge Yesule takicebawec  
Mat 4:12-17; 13:53-58; Mrk 1:14-15; 6:1-6*

**14** Aime Tili Asule tapilidi Yesula wakeicne fame, ye Galili prowinswa hatacmac hefaliye hikeme, mac-gogoc falegac sasawadi siducine ngageyack-eibong. **15** Aime yedi kpakpaduc macnginang felu weduyeleme ngic-ngigac sasawadi wacine bafeibong.

**16** Aime Yesu ye nosugulec macine Nasaret, iwa hatac hikewec. Hikelu, kpakpaduc macka fecaigac, aibaba yogo balaibelu Sabat damengka iwa fewec. Felu Wapongte hibi wafenale domame, **17** yengi Wapongte siduc-mimi ngic Yesaiyale hibi kpadidiweicne yogo lacnoibong. Lacnobong bafilemu hibiwa Mesiale yowa yanguc fawec, yogo bafuwawec.

**18** *“Waweweine yenge Siduc Madicne mibe yegengkeyelenale Sugucnedi bawosaecnume, yele Asudi naholec gagac.”*

**Ailu** mucka gagaing, yenge mucngineng mikac aidaingte. Nga donge-pisicti donge hilaningte edocebabele yedi salecnuwec.

Salecnume kwesi umackolec gagaing, yenge umacngineng ewalicebalu baickedacte.

**19** *Ailu Sugucnelaci dameng madicne welengelegac, yogo inguchac edoce-balu weduyeledacte.”* **(Yes 61:1-2)**

**20** Yesu ye hibi yogo wafelu hatacmac kpadidiwelu hibi-damong lacnolu wangiyewec. Wangiyeme kpakpaduc macka ngic-ngigac ngiyeibong, yenge sasawadi dongengineng ye nganiibong. **21** Nganibong yedi yanguc edocebawec, *“Wapongte hibiwa wafebe ngagegaing, yogolec noine yakumac fikengelegac.”*

**22** Aime yele mickacni yowa miwec, yogodi kwele-efec nga yowa tapili-inholec aiwecte ailu, ngic-ngigac sasawadi yele ngage-madickeleu mimedec ailu yele uwaganuibong, “Ngic yago ye Yosefele madecti inguc migac!”

**23** Inguc mibong edocebalu miwec, *“Yowa monic yanguc micaigaing. Aime ngenge yogo biyac edocnunogale yanguc migain, ‘Dota, gageuc bā-madicnaguc!’* Ailu hatacmac yanguc edocnunogale aigaing, *‘Ga Kapeneam macka bole baengka siducgone ngagecaigabeleng, yogo himonggona yawa inguchac baengka nganinang!’*†

**24** Milu hatacmac yanguc taockelu miwec, *“Foinac, Wapongte siduc-mimi ngic monic, ye yeicne himongka hikeme ngic-ngigac yengi ye nalic mi hefoledaingte, yogo noine edocngebagabac.* **25** Aime yowa noine yanguc edocngebabé, Elaiya gawec, dameng iwa Israel himongka ngigac-hosec homacnedi gaibong. Gacgubong Wapongti ngageme mac mi kwewec. Aime hifa habackang, nga tamacne 6 himong iwa loloc fikewec. **26** Fikeme Wapongti Elaiya saleme Israel ngigac yengela mi hikewec. Aime Sarepat mačka Saidon himongka ngigac-hosec monic gawec, yelabac saleme hikewec. **27** Nga Wapongte siduc-mimi ngic Elisadi Israel himongka gawec, dameng iwa ngic-ngigac homacnedi waic-sanangkolec gaibong, yengelacni

**4:13:** Hib 2:18; 4:15    **4:22:** Luk 3:23; Yoa 6:42    † **4:23:** Yenge yanguc ngageibong, Yesu ye pasi mac monicka balu gawec, aime Yesayadi kwelengkewec, yogo nganidaingtewa, yenge yanguc ngagedaingte, Yesu ye Mesia.    **4:24:** Yoa 4:44    **4:25:** 1Ngt 17:1,7    **4:26:** 1Ngt 17:8-16

monicti mi madickewec. Aime Siriahocni ngic monic wacine Naman, yedi sugubac madickewec, yogo foinacbenang.”<sup>‡</sup>

<sup>28</sup> Aime ngic-ngigac sasawa kpakpaduc macka ngiyeibong, yenge yogo ngagelu kwelengineng aalic <sup>29</sup> fikeme Yesu igockelu baickelu taon lobina haubong. Haulu macngineng kupicka ngiyewecka dengge monic domawec, iwa hikelu wickebong haunale ngagelu mengocke hikeibong. <sup>30</sup> Hikebong, yebac ngic-ngigac hewacnginang kwegi-locebalu hikewec.

*Yesudi aleng wonongkolec yebiyewec*

*Mrk 1:21-28*

<sup>31</sup> Yesu ye Galili prowinsle taon monic, wacine Kapeneam, iwa haulu Sabat damengka ngic-ngigac Wapongte yowa weduyelewec. <sup>32</sup> Weduyelewec, yogo ngic bolele hibi bacaigaing, yengele silic ingucne bole-yowa tapiliineholec weduyelewec. Ilec ailu yenge yowa weduyeleme ngagelu kwatackeibong.

<sup>33</sup> Aime kpakpaduc macka ngic monic gawec. Ye aleng wonongkolecti kweleina ngiyeme gawec, yedi yowa tapiliineholec aukwelu miwec, <sup>34</sup> “Aa, Yesu Nasaret-hocni, ga nongela wenuc ainogale ngagegic? Ga basowalec-nabanogale kwesigic, me? Na ngagegabac, ga Wapongte bingec.”

<sup>35</sup> Inguc mime Yesu ye aleng yowa sanangne aicnolu yanguc edowec, “**“Ga waickelu ngickacni ofelu hikenong!”**” Inguc mime aleng ye ngic wepackeme hewacnginang waweme, yelacni ofelu hikewec. Ailu ye ngic yogo monic mi basowalewec.

<sup>36</sup> Aime ngic-ngigac sasawadi yogo nganilu mimedec ailu, mingagec ailu yanguc miibong, “Ye oma yowa balu gagac? Ngic yago ye bole-yowa sasawa tapiliineholec nga wac sugucneholec gagac, yedi aleng wonongkolec mic-yowainedi yebicebame ofelu hikegaing.” <sup>37</sup> Inguc fikeme siducinedi himong iwa macsoc nebock a ngabe hikelu saweyackewec.

*Yesudi ngic-ngigac bamadicebawec*

*Mat 8:14-17; Mrk 1:29-34*

<sup>38</sup> Aime Yesu ye kpakpaduc mackacni walu Saimonte macka hikewec. Aime Saimon sefengngine ye soc-dac sugucne aicname fawec. Fame Yesudi ye bamadickenale micnoibong. <sup>39</sup> Micnobong Yesu ye domalu ngigac fame nganilu, soc-dac yowa sanangne edolu kpatalacname, hucine miyac aiwec. Aime ye dameng yogowahac fangkelu nosingka baficebawec.

<sup>40</sup> Aime wenac-dongeine haunale aiyemewa, ngic-ngigac sasawadi agofcngineng huc haicine monic-monicti bacebaicne, yenge bacebalu Yesula kwesiibong. Kwesibong, Yesudi moleine hucnginengkolec sasawa fenginang lolu bamadicebayackewec. <sup>41</sup> Bamadicebame aleng yenge ngic-ngigac bocayac yengelacni ofelu yanguc wackeibong, “**“Ga Wapongte Madec.”**” Aime ye Mesia, yogo ngageibongte ailu yenge yowa yogo midaingkale, mimacebawec.

<sup>42</sup> Aime mac saeme, Yesu ye taon hegilelu mac monic ngic mikacka hikewec. Hikeme, ngic-ngigac yenge ye basackeibong. Basackelu ba-fuwabong, yengeholec game mac monicka mi hikenale kpatalacnoibong.

<sup>43</sup> Inguc mibong yanguc edocebawec, “**“Mac-himong gocne ngiye-hikegac, iwa inguchac hikelu Wapongte ngani-damongte Siduc Madicne mibe yegengkeyledaite. I yangucte, Wapongti yoglec hocne salecnuwec.”**

<sup>‡ 4:27:</sup> Elaiya nga Elisa yekele damengka Israel ngic-ngigac yenge yanguc ngagenaguibong, “Nonge Wapongte aling.” Ailu yenge sifu Wapongte yowa mi balaibeibong. Ilec ailu Wapong te aling monic baficepawec. <sup>4:27:</sup> 2Ngt 5:1-14    <sup>4:32:</sup> Mat 7:28-29    <sup>4:41:</sup> Mat 8:29; Mrk 3:11-12

**44** Inguc milu Yudeya himongka kpakpaduc macngineng falewec, iwa hikelu Wapongte yowa edocebalu weduyeletu gawec.

## 5

*Yesu ye molickelu mic-tengtengfocine bacebawec  
Mat 4:18-22; Mrk 1:16-20*

<sup>1</sup> Dameng monicka Yesu ye lifuc, wacine Genesaret, mecina domaemewa ngic-ngigac yenge kwesilu Wapongte yowa ngagelu igocnagulu hewalingkebong, ye hewacnginang domawec. <sup>2</sup> Domalu donge hilalu nganime gomba yaekang lifuc mecina domaiboc. Aime misa-sic baba ngic yenge gombangineng lobong fame ufcngineng suwelu gaibong. <sup>3</sup> Aime Yesu ye gomba monic, yogo Saimonte gomba, iwa fengiyelu Saimon micname yedi gomba kpisicnemac igockeme lifucka feme, ngic-ngigac edocebalu weduyelewec.

<sup>4</sup> Weduyelete motome Saimon yanguc edowec, “**Misa-sic banogale lifucka misa gbolongne fagacka, iwa hikelu ufcngineng wickelu misa-sic baning.**”

<sup>5</sup> Inguc mime Saimonti yowaine bafaliyecnolu yanguc miwec, “Sugucnene, nonge awecnac debocka doic-bole balu gabeng mac saeme sic monic mi bagabeleng. Aime gagi migic sifu hikelu ufc wickedacte.”

<sup>6</sup> Mime yenge ufcngineng iwahac wickelu sic homacnebenang baibong. Babong ufcngineng wakelu lokenogale aiwec. <sup>7</sup> Inguc aime yenge agofocngineng gomba monicka ngiyeibong, yenge moleiyac holeyelebong welelu baficebaibong. Baficebalu sic gomba yaekangka lobong wakelu gomba yeke misawa haunicte aiiboc.

<sup>8</sup> Saimon Pita ye aibaba yogo nganilu Yesule higewa ketadi holelu alang bacnolu yanguc miwec, “Sugucne, na bikickolec aigabacte ga hegilecnulu hikec!” <sup>9</sup> Inguc mime Saimonkolec gaibong, yenge sic homacnebenang baibongte ailiu mimedec aiibong, yoglec ailiu inguc miwec. <sup>10</sup> Aime Sebedi madekecine, Yakobos nga Yoane, yeke Saimonkolec misawa sic baiboc, yogo nganilu mimedec aiiboc.

Aime Yesudi Saimon edolu yanguc miwec, “**Ga mi hangocguna! Ga misawa sic babadi, yakumac ngic-baba bole badamecte.**” <sup>11</sup> Aime yenge gombangineng balu mecina lolu wiycasasawa hegilelu Yesu balaibeibong.

*Yesudi ngic monic waic-sanangkolec bamadickeewec  
Mat 8:1-4; Mrk 1:40-45*

<sup>12</sup> Aime Yesu ye taon monicka gacgume ngic monic waic-sanangti socine wakeme sowale-benangkeicne, ye iwa gawec. Galu Yesu nganilu ketadi holecnolu haicne himongka heluluckelu dogbac aicnolu miwec, “Sugucne, ga ngageng angacgugacka, na nalic bamadicnung gbagbackedacte.”\*

<sup>13</sup> Inguc mime Yesudi moleine sungkelu ngic bauwalu yanguc edowec, <sup>†</sup> “**Madikekte angacnugac.**” Inguc mime iwahac ngic yela waic-sanang fawec, yogo miyac aiwec.

<sup>14</sup> Miyac aime Yesudi mimackelu miwec, “**Ga socgona pasi fikegac, yoglec monic mi edodamec. Ga depec-baba ngic yela hikelu socgona gbagbacne aigac, yogo edaliyengka, Mosesdi ibule miwec, yoglec silicina balaibelu**

**4:44:** Mat 4:23      **5:1:** Mat 13:1-2; Mrk 3:9-10      **5:5:** Yoa 21:3-8      **5:11:** Mat 19:27

\* **5:12:** Monic waic-sanangkolec, ye socine wonongkolec milu gaibong. Ngichomacnedi huc ingucne gagu badaingkale, waic-sanangkolec yenge taon lobina gaibong. Yogo Wapongte yefe-yowawa kwelengkeicne fagac.      † **5:13:** Ngic monic ye ngic waic-sanangkolec oiyalu ye wonongkolec aidaiacte.

lacnodamec! Ga inguc lacnoengka yenge ibugone nganilubac ngage-motodaingte."

<sup>15</sup> Aime Yesule siducti sugulelu sawelu hikeme, ngic-ngigac habutowa homacnedi yenge yele yowa ngageningte, ailu yedi ngic-ngigac huckolec bamadicebanale kwsiiibong. <sup>16</sup> Inguc aibong Yesu ye dameng homacne hegilecebalu himong kisiwa misaine mikacka hikelu Wapong milockelu gawec.

*Yesudi ngic monic hige-moleine homaicne bamadickebac  
Mat 9:1-8; Mrk 2:1-12*

<sup>17</sup> Gacgu dameng monicka Yesu ye Wapongte yowa edocebalu weduyelewec. Weduyeleme Farisaio nga Wapongte yefe-yowale wewedu ngic gocne Galili nga Yudeya mac-aling sasawa ailu Yerusalem taon, iwanai kwsilu ngiyeibong. Aime Sugucnele tapilidi Yesula fawecte huckolec bamadicebawec. <sup>18</sup> Inguc fawecte ngic gocne yengi ngic monic hige-moleine homaicne dembengka lolu tengkelu hikeibong. Hikelu mac kwelina Yesule haicka loningte ngageibong. <sup>19</sup> Ngagebong, ngic-ngigac bocyaicti kwedickelu domaibong. Ilec ailu yenge ye Yesule haicka loningte yefe basackelu ngic yogo mac feina tengke feibong. Felu mac bubuine nebocina basulumelu, iwa yefe ngic hewacnginang Yesule emewa dembengkolec lobong hauwec.<sup>‡</sup>

<sup>20</sup> Haume Yesudi ngage-ngagesingngineng nganilu yanguc edowec, "Ngic ga, bikicgone biyac hegilegelegabac."

<sup>21</sup> Inguc mime Wapongte yefe-yowale wewedu ngic nga Farisaio yenge yengilangkac yanguc ngageibong, "Ngic yogo ma ngicti Wapong fecnogac? Wapong moniyangi sugu bikic nalic hegiledaict."

<sup>22</sup> Yesu ye kwelenginang ngagesiibong, yogo nganilu yanguc edocebwec, "Ngenge omale ngage-ngage ingucne kwelenginang inguc ngagesigaing?"

<sup>23</sup> Weni yogodi efecne aigac? Yele yanguc minoga, 'Bikicgone biyac hegilegel-egabac', me yanguc minoga, 'Ga fangkelu hikec.' <sup>24</sup> Aime Ngicte Madec ye himongka bikic hegilenale hole-yowa tapiliineholec facnogac, ngengi yogo ngageningte ailu yanguc mibe." Ye inguc milu ngic-puling yanguc edowec, "Na edocgugabac, ga fangkelu dembengone balu macgona hikec."

<sup>25</sup> Mime iwahac ngic ye ngic-ngigac sasawa yengele haicka fangkelu dembengine facaigac, yogo balu Wapong wacine bafelu macina hikewec.

<sup>26</sup> Hikeme ngic-ngigac sasawadi yogo nganilu kwatackelu mimedec ailu Wapong wacine bafeibong. Ailu yanguc miibong, "Nonge aibaba ingucne mi ngani-nganiine yakumac donganonggengti nganigabeleng."

*Yesudi Liwai wackewec  
Mat 9:9-13; Mrk 2:13-17*

<sup>27</sup> Inguc mibong Yesu ye iwanai walu hike takes-baba ngic monic, wacine Liwai, ye takes-baba macka ngiyeme nganilu yanguc edowec, "Ga wele na balaibecnuc!" <sup>28</sup> Inguc mime ye fangkelu wiyc sasawa hegilelu Yesu balaibelu hikewec.

<sup>29</sup> Aime Liwai ye Yesule ailu macina nosing sugucne lobeme takes-baba ngic nga ngic-ngigac homacnedi yengeholec ngiyelu nosing noibong.

<sup>30</sup> Inguc aibong Farisaio nga yengele Wapongte yefe-yowale wewedu ngic yenge ngagebong nalic mi aime, Yesu mic-tengtengfocene yengele yowa kwelu yanguc miibong, "Ngenge omale takes-baba nga bikic-baba yengeholec nosing misa nogaing?"

**5:14:** Dep 14:1-32    **‡ 5:19:** Dameng iwa mac feina ye wenengine. Aime litu mac feina domame fec-wac ailu gaibong.    **5:20:** Luk 7:48; Yes 43:25    **5:24:** Yoa 5:8    **5:30:** Luk 15:1-2

<sup>31</sup> Mibong Yesudi yanguc miwec, “Ngic-ngigac hucngineng mikac gagaing, yenge dotala mi aiyelecaigac. Nga hucnginengkolec, yengibac dotala aiyelecaigac. <sup>32</sup> Aime na ngic-ngigac dondonne wacebabe nala weleningte mi waiba, miyac. Nabac bikic-baba ngic wacebabe kwelengineng hefaliyenale waiba.”

*Yesudi nosing-sawe ganogale nangeng yowa miwec  
Mat 9:14-17; Mrk 2:18-22*

<sup>33</sup> Aime ngic-ngigac gocne yengi Yesu yanguc uwacnoibong, “Yoane mic-tengtengfocine nga Farisaio yengele mic-tengtengfocngineng yenge dameng homacne nosing-sawe galu mimiloc bole bacaigaing. Nga gale mic-tengtengfocone yengebac nosing misa nocaigaing.”

<sup>34</sup> Inguc mibong Yesudi yanguc edocebwec, “Baba-tumangte ngicti agofocine yengeholec ngiyeme yenge nosing-sawe nalic gadaingte, me? Yogo miyac. <sup>35</sup> Aime Gacgu dameng monicka ngic yengi baba-tumangte ngic agofocine yengelacni baickedaingte, dameng yogowabac nosing-sawe gadaingte.”

<sup>36</sup> Yesu ye taockelu nangeng yowa yanguc edocebwec, “Monicti ngakpi gbolicnacni sindacine helocke balu esecna nalic mi lolu ggododaicte. Inguc aidaictewa, ngakpi gbolicne sowaledaicte. Aime gbolicne nga esecne wetulecepame nalic mi aidaicte. <sup>37</sup> Me monicti waing gbolicne bokong sic socine esecnedi baincne, iwa nalic mi kweme haudaicte, miyac. Waing gbolicnedi siwinelu bokong esecne kwouckeme yeke momochac sowaledabiyeete. <sup>38</sup> Ilec ailu waing gbolicne yogodi bokong gbolicna socne kweme haudaicte. <sup>39</sup> Aime monicti waing esecne biyachac nowec, yedi waing gbolicne nonale angac nalic mi ngagedaicte. Yanguc sugu midaicte, ‘Waing esecne, yogo madicnebenang.’ ”

## 6

*Yesudi Sabatle yowa miwec  
Mat 12:1-8; Mrk 2:23-28*

<sup>1</sup> Yesu ye Sabat dameng monicka wit bole hewacina yefe balaibelu leme, mic-tengtengfocine yenge wit noine bamoctolu socine litolu noibong. <sup>2</sup> Nobong Farisaio gocne yengi nganicebalu yanguc uwayeleibong, “Ngenge omale Sabat damengka aibaba mi aiaiine yogo aigaing?”

<sup>3</sup> Uwayelebong Yesudi yanguc edocebwec, “Dawidi nga bole-ngicfocine yenge nosingte homalu aibaba aibong, ngenge yogo wafe-ngagec mi aicaigaing, me? <sup>4</sup> Ye Wapongte Ibu-macka fewec. Felu bret Wapongte ibu loicne, yogo banolu bole-ngicfocine inguchac gumecebawec. Nga bret yogo depec-baba ngic yengi sugu nalic nodaingte, ngicbenang yengibac miyac. Aimebac Wapongti yengele mi ngage-sowalewec.”

<sup>5</sup> Milu yanguc edocebwec, “Ngicte Madec ye Sabatle Sugucne gagac hocne, ye aibaba madicne nga sowacnele nalic midaicte.”

*Yesu Sabat damengka ngic monic moleine homaicne bamadickewec  
Mat 12:9-14; Mrk 3:1-6*

<sup>6</sup> Aime Sabat dameng monicka Yesu ye kpakpaduc macka felu Wapongte yowa weduyelewec, iwa ngic monic mole-folein homaicnedi yengeholec ngiyewec. <sup>7</sup> Aime Wapongte yefe-yowale wewedu ngic nga Farisaio, yenge

---

<sup>5:34:</sup> Yoa 3:29    <sup>§ 5:37:</sup> Bokong sic socine esecnedi baincne ye umec sucine ingucne nosing hatac lobebeng sulumedaicte.    <sup>6:1:</sup> Yef 23:25    <sup>6:2:</sup> Yoa 5:10    <sup>6:3:</sup> 1Sm 21:1-6    <sup>6:4:</sup> Dep 24:5-9

Yesu yowawa lonogale ngagesiibong. Ailu ngic yogo Sabat damengka bamadickedaite me miyac, yogolec nganibiyebong.<sup>8</sup> Aime Yesudi ngagengeneng nganilu ngic moleine homaicne yanguc edowec, “**Ga fangkelu nongele hewacka domac!**” Inguc mime ngic ye fangkelu hewacnginang domaemewa,<sup>9</sup> Yesudi yanguc edocebawec, “**Yowa monic uwangelebe, Sabat damengka aibaba weni yogo nalic ainoga, aibaba madicne me sowacne ainoga?**” Ailu homanogale aigaing, yengele agong holenoga me basowalecebanoga?”

<sup>10</sup> Inguc milu dongedi lengani-welengani ailu ngic yanguc micnowec, “**Ga molegone sungkecl!**” Inguc mime ngic ye moleine sungkelu madickewec.<sup>11</sup> Madickeme yenge aalic sugucnebenang ngagelu yengungtiac Yesu wenuc aicnoningte mingagec aibong.

*Yesudi mic-tengtengfocine 12 bawosacebawec  
Mat 10:1-4; Mrk 3:13-19*

<sup>12</sup> Yesu ye dameng iwa milockenale kupicka felu debocka yeicnac Wapong milockelu gawec.<sup>13</sup> Gacgu mac saeme mic-tengteng habutowa wacebame hikebong. Hikebong yengele kwelinacni mic-tengtengfocine 12 bawosacebalu waengineng Salecebaicne wacebawec. Aime Salecebaicne yengele waengineng yanguc:

14 Saimon, wacine monic Pita wackewec. Nga  
ngic hae-gbaine Endru. Ailu

Yakobos nga

Yoane. Ailu

Filip nga

Batolomeu. Ailu

15 Mataio nga

Tomas. Ailu

Alfaiusle madec Yakobos. Nga

Saimon, ye Selot wackeibong.\*

16 Ailu Yakobos madecine Yudas. Nga

Yudas Iskariot, yedi gacgu Yesu mudockeme badaingte.

*Yesudi ngic-ngigac homacne bamadicebawec  
Mat 4:24-25; Mrk 3:7-12*

<sup>17</sup> Aime Yesu ye kupicka mic-tengtengfocine 12 yengeholec walu himong wenengngine monicka mic-tengteng alingfocine homacne yengeholec domawec. Aime ngic-ngigac homacnedi Yudeya himong neboc nga nebockacni, nga Yerusalemkocni ailu Tair nga Saidon kiwecnginacpec mac-himong falegac, iwacni kwesiibong.<sup>18</sup> Kwasilu Yesule yowa ngageningte, nga yedi hucngineng bamadicebanale kwesiibong. Ailu aleng wonongkolec ngic yenge inguchac momoc kwesilu madickeibong.<sup>19</sup> Aime yele tapilidi yengela falockeme ngic-ngigac sasawadi madickeibong. Yogolec ailu yenge sasawadi ye oiyaningte ngageibong.

*Yesudi ngic kwele-sowackolec yengele miwec  
Mat 5:1-12*

<sup>20</sup> Inguc aibong Yesu ye dongeine mic-tengtengfocine yengela hilalu miwec,

“Waweweine gagaing, ngenge kwele-angackolec.

I yangukte, Wapongte ngani-damong yogo ngengele hocne.

<sup>21</sup> Nga yakumac nosingte homagaing, ngenge kwele-angackolec.

\* **6:15:** Selot aling yenge Israel ngic-ngigac Roma yengele muckacni bamoctoceanoga.

I yangukte, ngenge gacgu nosing nolu gebecngebadaicte.  
 Ailu hii kwele-sowackolec yakumac gagaing, ngenge kwele-angackolec.

I yangukte, ngenge gacgu gouwedaingte.  
<sup>22</sup> Nga Ngicte Madeckolec gagaingte ailu kweledi wicngebala misofoc ain-geledaingte.

Ailu lobina locngebala wac sowacne wacngebadaingte, yogo ngenge kwele-angackolec.

<sup>23</sup> "Ngagegaing, fulingineng sugucne honocmengka lowec fagac. Ilec ngenge dameng iwa kwele-madic ngagelu wintacke fec-wac ailu beliyedaing. I yangukte, yengele ngambofocngineng yengi esecne Wapongte siduc-mimi ngic yengela aibaba yogohac aiyeleibong."

### *Yesudi moneng-mafaholec gagaing yengele miwec*

<sup>24</sup> "Nga moneng-mafaholec gagabiyeng, mee, ngenge medecngebadaic.

I yangukte, ngenge wiyc angacineholec ngengilangkac biyac babong motowec.

<sup>25</sup> Nosing nogebec yakumac aicaigaing, mee, ngenge medecngebadaic.

I yangukte, ngenge gacgu nosingte homadaingte.

Nga yakumac gouwelu gagabiyeng, mee, ngenge medecngebadaic.

I yangukte, ngenge gacgu kwele-sowac ngagelu hiyadaingte.

<sup>26</sup> Ailu ngic-ngigac yengi ngengele madicne milu gagaing, mee, ngenge medecngebadaic.

I yangukte, yengele ngambofocngineng esecne siduc-mimi ngic kwesacine inguchac yengele madicne milu gaibong.

### *Ngabafocgone yengele angac ngagedamec*

*Mat 5:38-48*

<sup>27</sup> "Ailu yowanele hedec kwecaigaing, ngengebac yanguc edocngebagabac, ngenge ngabafocngineng kweledi angac ngageyeledabieng. Ailu kweledi wicngebacaigaing, yenge aibaba madicne aiyelelu gadaing. <sup>28</sup> Ailu sawec-yowa edocngebacaigaing, yenge mimi-madic milu edocebalu gadabieng. Ailu basowalecngebacaigaing, yengele ailu milockelu gadabieng.

<sup>29</sup> Aime monicti munggunggone neboc wedaictewa, ga nebocgone ingucnehab sungkecnodamec.† Nga monicti ngakpigone feina badaictewa, ga ngakpigone kwelina ingucnehab hegilecnodamec. <sup>30</sup> Aime gala wiyc monicté uwagelebong, yenge wiyc yogo yeledamec. Ailu monicti geicne wiyc ewalicgulu badaictewa, hatacmac bafaliyegelenale mi micnodamec.

<sup>31</sup> Ngic-ngigac yengi oma aibaba aingelenogale ngagesicaigabieng, wiyc ngagesicaigabieng, yogo ngengi aiyeledabieng.

<sup>32</sup> "Ailu ngic-ngigac yengi ngenge kweledi angac ngagengelebong, ngengi yenge ingucnehab kweledi angac ngageyeledabiengtewa, ngengele kwele-madic yowa homacne mi minoga. Bikic-baba aling yenge kweledi angac ngagecaigaing, yenge inguchac kweledi angac ngageyeledaing. <sup>33</sup> Nga aibaba madicne aingelegecaigaing, yenge aibaba madicne aiyeledaingtewa, ngengele kwele-madic yowa mi minoga. Bikic-baba aling yenge inguchac yogo aicaigaing. <sup>34</sup> Ailu yanguc ngagening, ngengelacni tofa aibong ameine badaingtewa, ngengele kwele-madic yowa mi minoga. Ngic bikicnginengkolec yenge inguchac bikickolec agofovngineng wiycngineng ameineholec yelecaigaing. Ailu ngagebong amengineng yogo hatac bafaliyedaingte. <sup>35</sup> Ailu ngenge ngabafocngineng yengele kweledi angac

ngagelu aibaba madicne aiyelaedaing. Ailu amengineng hegilebong, yengela fadaic, badungelingte mi ngagesidaing. Inguc aidaingtewa, aibaba madicnele fulingineng sugucne fadaicte. Aime Mamacngineng Wapong Feicnetowanonggeng yele adu-madecfocine aidaingte. Ye ngic-ngigac kpaomaine nga wac sowacneholec ailu ngic kindololoholec aibaba madicne aiyelecaigac. <sup>36</sup> Ngenge Mamacnginengti kwele-sowac aingelecaigac, silicine ingucnehac ngengi yenge kwele-sowac aiyelegadaing.

*Yesudi ngage-wosaecte yowa miwec*  
*Mat 7:1-5*

<sup>37</sup> “Ngenge ngic-ngigac yengele aibaba ngage-wosaec mi aiyelaedaing. Inguc aidaingtewa, Wapongti inguchac ngage-wosaec mi aingeledaict. Ailu ngenge ngic-ngigac ngage-wosaec aiyelelu umacngineng mi mimoctodaing. Inguc aidaingtewa, Wapongti ngenge inguchac wosaecngebalu umacngineng mi mimoctodaict. Ngenge sowacnengineng hegiledaing, aime ye inguchac ngengele sowacne hegiledaict. <sup>38</sup> Ngenge wiyacngineng balu ngic-ngigac yeledaing. Inguc aidaingtewa, Sugucnedi wiyacngineng ameine kweme haume kpndaelu kpung kwedaict. Ailu hatacmac kweme wakelu sottingkelu nebocene tabunginang wame badaingte. I yangucte, ngenge wiyac umacine wosaelu ngic-ngigac yelecaigaing, aime umacine silicine ingucnehac wosaelu ameine ngeledaict.”

<sup>39</sup> Aime Yesudi hatacmac nangeng yowa yanguc edocebawec, “Donge-pisic monicti donge-pisic agoine monic nalic mengockedaict, me? I miyac, yogo yekilec momochac longka haudabiyete. <sup>40</sup> Nga hibi-mac madec monicti weweduinele feicne mi aidaict. Wewedu ye madecfocine weduyeleyackeme motome yele silic ingucnehac aiyackedaingte.

<sup>41</sup> “Aime ga wenucte ngic hae-gbagonele dongewa gochakic fagac, yogo nganicaigic. Nga geicne dongewa yoc hewacine fagac, yogobac mi nganimotogic, me? Aibaba ingucnedi mi madickegac. <sup>42</sup> Gageicne dongewa yoc hewacine faemewa mi ngani-motolubac, ngic hae-gbagonele yanguc milu gagic, ‘Ngic hae-gba, ga nalic ngageengka dongegona gochakic ngiyegac, yogo baickebe.’ Kwasac-ngic, gageicne dongewa yoc hewacine fagac, yogo baickelubac ngic hae-gbagonele dongewa gochakic ngiyegac, yogo nalic ngani-motolu baickedamecte.

*Yesudi ngic nongileng fungine yocka soc holelu miwec*  
*Mat 7:16-20; 12:33-35*

<sup>43</sup> “Yoc monic madicnacni noine sowacne nalic mi fikedaict, me yoc sowacnacni noine madicne nalic mi fikedaict. <sup>44</sup> Aime yoc haicne monic monic yenge noinenginengti funginengineng bayegengkecaigac. Ngenge muc somangineholec iwacni fik noine nalic mi badaingte. Ailu waing noine yogo tambong-tambongkacni nalic mi badaingte. <sup>45</sup> Ngic madicne yele kwelewa wiyac madicne facnogac, iwacni wiyac madicne bame fikecaigac. Nga ngic kindololoholec, yele kwelewa wiyac sowacne facnogac, iwacni wiyac sowacne bame fikecaigac. I yangucte, wiyac kwele ngage-ngageina wakelu fagac, yogo hocne micti mime yegengedaict.

*Yesudi ngage-ngagesingte yowa miwec*  
*Mat 7:24-27*

<sup>46</sup> “Ngenge omale ‘Sugucnene, Sugucnene,’ wacnucaigaing, ailu sifu yowane hegilelu mi balaibecnucaigaing?” <sup>47</sup> Aime monicti welelu yowane

ngagelu yogo balaibedaictewa, ye ngic weningucne, yogo edalicngebadachte. <sup>48</sup> Aime ngic monic ye mac banale milu himong falime fapacladeng fikeme yogolec kwelina bosingngine wickeme hauwec, ngic yogo ye ingucne. Ye mac sanangne bawecte mac lumongtowa kjesilu mi basowalewec. <sup>49</sup> Aime monic ye yowane ngagelu mi balaibedaictewa, ye ngic monic ye mac banale milu bosingngine himong pelecne iwa falime hauwec, ye ingucne. Aime mac kweme misa suguelu lumongti kjesilu mac yogo kweme fuwangke walu kwososockewec.”

## 7

*Yesudi hudu-baba ngic yengele damongte kwelec kwekwe bamadickeewec  
Mat 8:5-13*

<sup>1</sup> Aime Yesu ye yowa yogo ngic-ngigac edocebayackeme ngagebong motome, Kapeneam macka hikewec. <sup>2</sup> Iwa hikeme hudu-baba ngic yengele damong monicte kwelec kwekweinedi homanogale ailu fawec. Ye ngic madicne, sugucneine alang bacnoaigac.\*

<sup>3-4</sup> Inguc aime hudu-baba ngic yengele damongti Yesule siduc ngagewec. Ngagelu Yuda ngic-ngigac yengele damongfocngineng gocne Yesula salecebame hikelu yanguc edoibong, “Ga hudu-baba ngic yengele damongte kwelec kwekweine monic bamadickeacte. Ilec biyac welec. Damong yogo ye ngic madicne, ga nalic welelu ye bafickenong! <sup>5</sup> Ye ngic-ngigac aling nongileng angac ngagecaigac. Ailu yedi molickeyeleme kpakpaduc macnonggeng baibong.”

<sup>6-7</sup> Edobong Yesu ye yengeholec hikelu mac bangkaleme, hudu-baba ngic yengele damonti agofocine gocne salecebame yanguc edoninge hikeibong, “Sugucnene, damenggone homacne mi hegilenong. Ailu na oma ngic madicnele macne kwelina fudamecte, na ingucnedi gala nalic mi fudacte. Ilec ga iwa domalu yowa sugu miyengka bole-madecne madickena. <sup>8</sup> Iyangucte, na ngic tapilinginengkolec yengele bagewa gagabac. Aime nale bagewa hudu-baba ngicfocne gagabiyeng. Yengelacni monicte ‘hikec’ mibe ye hikedacte. Nga yengelacni monicte ‘welec’ mibe ye weledaict. Nga kwelec kwekwe ngic monicte ‘bole yogo banong’ mibe ye yogo badaict. Na ngagegabac, ga tapilgoneholec gagic.”

<sup>9</sup> Inguc mime Yesu ye yogo ngagelu kwatackewec. Ailu hefaliyelu habu ye balaibeibong, yenge yanguc edocebawec, “Na yanguc edocngebab, Israel himongka ngic-ngigac ngage-ngagesingngineng sanangne yangucne monic mi nganiibawa, ngic yago yela nganigabac.” <sup>10</sup> Aime ngic salecebawec, yenge damongte macka hefaliye hikelu nganibong kwelec kwekweine ye hucine miyac aiwec.

*Yesudi ngigac-hosec monicte madec homaicne bagboliyewec*

<sup>11</sup> Aime Yesu ye mac monic, wacine Nain, iwa hikeme mic-tengtengfocine nga ngic-ngigac homacnedi ye balaibeibong. <sup>12</sup> Balaibe hikelu taonte odale nu sugucna domame, madec monic homawec, yele kponggbong tengkelu waibong. Madec yogo ye ngigac-hosec monicte madec moniyang sugu. Aime ngic-ngigac homacnedi ye balaibelu taonkacni waibong. <sup>13</sup> Inguc wabong Sugucne ye ngigac yogo nganilu kweleine sowaleme yanguc miwec, “**Ga mi hiyanong!**”

---

\* <sup>7:2:</sup> Hudu-baba ngic yengele damong yele bagewa hudu-baba ngic 100 ingucti gaibong. Hudu-baba ngic nga damongngineng yenge himong monickacni.

**14** Inguc milu lelu katapa yogo oiyame madec tengkeibong, yenge hegilelu domabong Yesudi miwec, “**Madec, edocgugabac, ga fangkec!**” **15** Mime madec homaicnedi fangkelu yowa miwec. Aime Yesudi madec yogo hatacmac nenggacine lacnowec.

**16** Lacnome ngic-ngigac yenge yogo nganilu kwatackelu homacne hang-ocebame, Wapong waccine bafelu yanguc miibong, “Wapongti siduc-mimi ngic sugucne monicti nongilang fikelu gagac.” Aime “Wapongti ngic-ngigacfocine nongileng yugucnubalu gagac.” **17** Aime siduc yogodi Yudeya himongka nga mac-gogoc emeina ngiyeibong, iwa hikeme sasawadi siduc yogo ngageyackeibong.

*Yoanedi mic-tengtengkecine yaeckang Yesula salecepawec  
Mat 11:19*

**18-19** Aime Yoanele mic-tengtengfocine yenge siduc yogo edobong, Yoanedi mic-tengtengkecine yaeckang wacepame weleiboc. Weleboc yeke Sugucnela hikelu yanguc milu uwacnonicte salecepawec, † “Ngic kwesinolenogale miicne, yogo ga, me nonge ngic monicte wangec gadabelengte?”

**20** Inguc milu salecepame yeke Yesula hike sulumelu yanguc milu uwacnoiboc, “Ngic kwesinolenogale miicne, yogo ga, me nonge ngic monicte wangec gadabelengte? Yoane misa-lowacti yogo uwagelelu ngagenogale gala salecnupagac.”

**21** Aime dameng iwahac Yesu ye ngic-ngigac hucnginengkolec nga tapiliwawa, ailu alengkolec aling homacne bamadicebawec. Ailu donge-pisic homacne bamadicebame dongengineng hilaibong. **22** Ilec edocepalu yanguc miwec, “**Ngeke hikelu wiyc ngani-ngagec aigabiye, yoglec siduc Yoane edodabiye!** Ngic-ngigac donge-pisic yenge dongengineng hilagaing. Nga hige-sowac yenge yefe hikegaing. Ailu ngic-ngigac waic-sanangkolec yenge socngineng madickeme gagaing. Hedec-fong yenge yowa ngagelu gagaing. Nga homaicne yenge gholiye fangkelu gagaing. Ailu ngic waweweine yenge Siduc Madicne ngagebong yegengkeyeleme gagaing. **23** Aime monicti nale ngagelu kweleine mi wadaicte, ye kwele-angackolec.”

*Yesudi Yoanele fungine mime yegengkeyelewec*

**24** Aime Yoanele mic-tengtengkecine yeke hikeebocka, Yesudi Yoanele fungine milu habu sugucne yanguc edocebawec, “**Ngenge himong kisiwa misaine mikacka oma wiyc nganinogale hikeibong?** Ngic monic komba ingucne gbelongti weme lec-welec aiwec, ngenge yogo nganinogale hikeibong, me? Yogo miyac. **25** Aime ngenge oma wiyc nganinogale hikeibong? Ngic monic ngakpi-kpolucine hibineholec, me? Yogo miyac. Ngagegaing, ngic ngakpi-kpolucngineng hibine madicne holecaigaing, nga himongte angacka gagaing, yenge ngictau yengele macka sugu gacaigaing. **26** Ngenge Wapongte siduc-mimi ngic monic nganinogale hikeibong, me? Ye hocne Wapongte siduc-mimi ngic gocne sasawa ewalicebagac, inguc hocne edocngebagabac.

**27** Yele hocne hibiwa yanguc kwelengkeicne fagac,

‘**Ngagegic, na mic-yowa mimine salebe yedi molickegelelu yefegone bamanidckegeledaicte.**’ *(Mal 3:1)*

**28** Na yanguc edocngebabe, ngic-ngigackacni fike-ofeibong, yengelacni monicti Yoane nalic mi ewalidairte, miyac. Nga monicti Wapongte nganic-damongte kwelina waweweine gagac, yedibac Yoanele feicne aigac.”

<sup>29</sup> Aime ngic-ngigac sasawa yenge yogo ngagelu, takes-baba yengeholec momoc, esecne Yoanela hikelu misa lowaibongte aili yanguc miibong, "Wapong ye yowa noine nga dondonnele fileine," inguc miibong. <sup>30</sup> Aime Farisaio aili Wapongete yefe-yowale ngage-ngage ngic, yengibac Wapongeti yefe esecne milu edocebawec, yogo lobe holecnolu Yoanela hikelu misa monic mi lowaibong.

<sup>31</sup> Aime Yesudi miwec, "Ngic-ngigac aling yanguctihac gagaing, yenge aibabangineng yanguc." <sup>32</sup> Adu-madec yengi sobengka ngyielu, yengungti-hac yanguc milu wacnagucaigaing, 'Nonge kpeng fitobeng ngenge gee mi weibong. Nga kwele-sowac gee holebeng, ngenge monic mi hiyaibong.' <sup>33</sup> I yangucte, Yoane misa-lowacti kwesilu bret nga waing misa monic mi nome ngenge yogo nganilu yanguc miibong, 'Ye alengkolec.' <sup>34</sup> Nga Ngicte Madecti kwesilu nosing nga waing misa nomebac ngenge ye nganilu yanguc micaigaing, 'Nganigaing, ye nosing nga waing misa efec mi nocaigac. Aili ye takes-baba ngic nga bikic-baba ngic yengele agongineng.' <sup>35</sup> Aime Wapongete ngage-ngage-motocine yogo noine aigac. Ilec adu-madecfocine yengele aibabadi Wapong yeicne bayengkedaicte."

### *Bikic-baba ngigac monicti Yesule hige suwewec*

<sup>36</sup> Farisaio ngic monic, wacine Saimon, ye Yesuholec nosing nonale macina micname yele macka feme ngyieiboc. <sup>37</sup> Aime gocne yengi yanguc miibong, "Yesu ye Saimonte macka ngyiegac." Inguc mibong bikic-baba ngigac monic ye taon iwa gawec, yedi ngagelu kilung monic, wacine alabastros posadi baicne, yogo sanda hoine madicneholec yogo bawelewec. <sup>38</sup> Baweletu Yesu lobainahaic, higeina domalu hiyame donge-misainedi walu Yesule higewa holeme, ye hodoc-dowecinele susucinedi suwecnolu higeine muduckewec. Aili sanda hoine madicne yogodi higeine hosocnowec.

<sup>39</sup> Inguc aime Farisaio ngic Yesu wackewec, yedi nganilu yeicnac yanguc ngagewec, "Ngigac welegac, ye bikickolec. Ilec aili ngic yago ye Wapongete siduc-mimi ngic noine aigacka, ye bikic-baba ngigacti bauwalu aibaba aigac, yogo nalic ngagedecka."

<sup>40</sup> Inguc ngageme Yesudi yanguc edowec, "Saimon, yowa monic edocguno-gale ngagegabac."

Inguc mime miwec, "Oc, wewedu, minong."

<sup>41</sup> Mime yanguc edowec, "Ngic yaeckang yeke moneng-damong monic yelacni tofa aiiboc, monicti moneng 500 nga monicti moneng 50 inguc baiboc." <sup>42</sup> Aime yeke ameine yogo baduconicte aibibiyelu gaebocka, ye amenginec hegilewec. Hegileme yekelacni weni yogodi moneng-damongte angac homacnehac felu ngagedaicte?"

<sup>43</sup> Uwacnome Saimonti ameine bafaliyu yanguc edowec, "Moneng homacne hegilecnowec, yedi, inguc ngagegabac."

Mime Yesudi miwec, "Ngage-wosaec aili yowa noine migic."

<sup>44</sup> Aime ngigacta haic hefaliyu Saimon yanguc edowec, "Ga ngigac yago nganic! Na macgona ofebe higenale misa monic mi nelegic. Yedibac donge-misainedi higene suwelu yeicne hodoc-susucinedi higene bakelengkegac.

<sup>45</sup> Aime na macgona ofebe, wenac-madicte mi muducnugic. Nga yedibac ofegabac, iwacnihac higena muduckegac. <sup>46</sup> Aili hodocne heloicti monic

<sup>7:29:</sup> Luk 3:12    <sup>7:30:</sup> Mat 21:32    <sup>7:34:</sup> Luk 15:2    <sup>7:37:</sup> Mat 26:7; Mrk 14:3; Yoa 12:3

<sup>‡ 7:41:</sup> Moneng yogo Grik yowawa wacine "denarius". Ngic yenge hadeng moniyangte hole babong, denarius moneng moniyang yelelu gaibong.

mi hosonelegic. Yedibac higene sanda hoineholecti kwenelegac. § 47 Ilec edocgube ngagec. Ye angacine homacne edalicnugacte bikicine homacne-hac hegilecnobe miyac aiyackegac. Monic ye bikicine kpisicnemac hegilec-noicne, yedibac, angac kpisicnemac facnogac."

<sup>48</sup> Inguc milu ngigac yanguc edowec, "Bikicgone yogo biyac hegilegelegac." <sup>49</sup> Mime ngic-ngigac gocne yeholec ngiyeibong, yenge yengungtihac mingagec ailu yanguc miibong, "Yago ma ngic? Ye bikicngineng inguchac hegileyelegac."

<sup>50</sup> Aime Yesudi ngigac yanguc edowec, "Ngage-ngagesinggonele ailu bikicgone baickebe wasecne aigamec. Kwele-mogungkolec hike!"

## 8

### *Ngigac homacnedi Yesu balaibeibong*

<sup>1</sup> Inguc aime Yesu ye taon nga mac-alingka lolicke hikelu, Wapongte ngani-damongte Siduc Madicne mime yegengkeyeleme gawec. Aime mic-tengtengfocine 12, <sup>2-3</sup> ailu ngigac gocne alengkolec nga huenginengkolec bamadicebawec, yenge yeholec momoc hikibong. Aime ngigac yenge monengngineng Yesu nga mic-tengtengfocine baficebalu gaibong. Ngigac homacnedi inguc aiibong, yengelacni monic wacine Maria, wacine monic Magadalen, yelacni aleng <sup>7</sup> yebiyewec. Nga monic Yoana, ngaweine Kusa, ye Herodele moneng-damong, ailu monic wacine Susana.

### *Wasec wicke-wickele nangeng yowa*

*Mat 13:1-9; Mrk 4:1-9*

<sup>4</sup> Aime ngic-ngigac yenge taon falewecsoc, iwacni Yesula welelu habu sugucne aiibong, yedi nangeng yowa yanguc edocebawec, <sup>5</sup> "Wasec wicke-wicke ngic monicti huc-wasec wickenale bolewa hikewec. Hikelu wasec wickeme wasec gocnedi walu yefewa holebong ngic yengi feina edeibong. Ailu nango yengi kwesilu nowackeibong. <sup>6</sup> Nga gocnedi posa tolowa holeibong. Holelu wasec yogo kwac kwodubong himong misaine mikac aiwecte ululuwelu homaibong. <sup>7</sup> Nga wasec gocnedi kpinding kwelina holeibong. Holelu kwac kwodubong kpindingti sugulelu hole-homacebawec. <sup>8</sup> Nga wasec gocnedi himong guwecineholecka holelu kwacine kwodulu noine madicne aiibong. Monicte hucine yogo 100 aiibong."

Inguc milu sugucnehaec yanguc wackelu edocebawec, "Monic ye hedec-olecti yowa yago aneng ngagedaic."

### *Yesudi nangeng yowale fungine edocebawec*

*Mat 13:10-23; Mrk 4:10-20*

<sup>9</sup> Mime mic-tengtengfocine yenge nangeng yowale fungine yogolec uwac-nobong <sup>10</sup> yanguc edocebawec, "Wapongte ngani-damongte ngage-ngage sangkeicne, yogo ngengi sugu ngageningte biyac ngeleicne."

'Aimebac ngic-ngigac gocne yenge dongenginengti wiyac monic nganilu nalic mi ngani-motogaing.'

Nga hedecnginengti yowa monic ngagelu, sifu nalic mi ngage-motogaing.' (Yes 6:9)

Ilec ailu nangeng yowa edocebacaigabac.

<sup>11</sup> "Nangeng yowale fungine yogo yanguc, wasec yogo Wapongte yowa.

<sup>12</sup> Aime wasec yefewa holeibong, yogo gocne yenge yowaine ngagedaingte. Ngagebong Aleng Sugucnenginengti welelu yengi Sugucne ngagesingkelu

§ 7:46: Israel ngic-ngigac yenge yanguc ngageibong, ngigac aibaba ingucne aiwec, yogo aibaba madicne. 7:50: Luk 8:48; 18:42 8:2-3: Mat 27:55-56; Mrk 15:40-41; Luk 23:49

wasecne mi ainingte yowa yogo kwelenginangkocni baickeyelecaigac. <sup>13</sup> Wasec posa tolowa holeibong, yogo ngic gocnedi Wapongte yowa ngagelu kwelenginang biyac beliyelu sebilelu badaingte. Ailu kwelenginang godocine monic mi baicnele, dameng kpisicnemac ngagesingkebong lokwesac dameng kwsime yenge wawedaingte. <sup>14</sup> Aime wasec kpindingka holeibong, yogo gocnedi Wapongte yowa ngagedaingte. Yenge socte gagale ngageboc, nga moneng-mafale lokwesacka galu himongte ngani-angac ailu gadaingte. Yogodi yowa hole-homacebame noinengineng madicne mi aidaingte. <sup>15</sup> Aime wasec himong guwecineholecka holeibong, yogodibac ngic gocne yenge Wapongte yowa ngagelu kwelenginang lolu yefe donne nga madicne balu gadaingte. Inguc bagacgu tatakic mikac noine bafuwadaingte.

*Hifa kwendangkelu mi someckenoga*  
Mrk 4:21-25

<sup>16</sup> “Aime monicti hifa kwendangkelu hebecti hemackelu mi heluluckedaiete, me mac ngiye-ngiyeinele bagewa lome mi ngiyedaiete. Yogo miyac, ye ngiye-ngiyeina lome ngiyeme ngic-ngigac macka ofedaingte, yenge hifa angocene yogo nganiyackedaingte. <sup>17</sup> Aime wiycasasawa sangkesangke fagac, yogo yegengkedaingte. Nga wiycasabecineholec fagac, yogo gacgu ngageyackedaingte. Yogo sangkeicne mi fagidaicte. <sup>18</sup> Aime monic ye ngage-ngage gocne facnogac, ye ngage-ngage hatamac lacnodaicte. Nga monic ye ngage-ngage mi facnogac, yelacni ngage-ngage facnogac ingucne ngagesigac, yogo ewalidaicte. Ilec ailu ngenge yowa ngagegabiyyeng, yogo ngagelu ngage-motolu gadabiyeng.”

*Yesule nenggac gbafocine*  
Mat 12:46-50; Mrk 3:31-35

<sup>19</sup> Aime Yesule nenggac gbafocine yenge yela hikebong, ngic-ngigac homacnedi hedicebongte ailu nalic mi nganiibong. <sup>20</sup> Inguc aibong goce yengi Yesula yanguc mibong fewec, “Nenggac gbafocgone yenge kwesilu nganicguningte lobina domagaing.”

<sup>21</sup> Mibong Yesudi yanguc miwec, “Wapongte yowa ngagelu balaibecaigaing, yengi nenggac gbafocne aigaing.”

*Dibong gbelong yeki Yesule yowa ngageiboc*  
Mat 8:23-27; Mrk 4:35-41

<sup>22</sup> Dameng monicka Yesu ye mic-tengtengfocine yengeholec gombawa felu yanguc edocebawec, “**Nongileng lifuc nebocina hikenang.**” Inguc mime iwa hikeebongka, <sup>23</sup> Yesu ye gung fame gbelong sugucne welelu misa lifucka fewec. Aime dibontgi gomba kwelina haulu bamungkenogale aime yenge haunogale aiibong. <sup>24</sup> Aime mic-tengtengfocine yenge Yesula lelu yeuckelu yanguc miibong, “Sugucne, Sugucne, nongileng misawa haulu homanogale aigabeleng!”

Mibong Yesudi fangkelu gbelong nga dibong ngelengkelu kpatalayetelu edocepame, gbelong miyac aime lifuc ye kalong kwelu fewec. <sup>25</sup> Fame mic-tengtengfocine yengele miwec, “**Ngenge ngage-ngagesingngineng mikac mecene.**”

Aime mic-tengteng yenge hangocebame kwatackeibong. Ailu yengungti-hac ngani-welec ailu miibong, “Ye oma ngic, aime ye gbelong nga dibong yowa edocepame yele yowa ngagegabiye.”

*Yesudi ngic monictacni aleng yebicebawec*

*Mat 8:28-34; Mrk 5:1-20*

<sup>26</sup> Aime Yesu nga mic-tengtengfocine yenge lifuc falockelu Gerasa ngic-nigigac yengele himongka hikeibong.\* Himong yogo Galili lifuc nebocina. <sup>27</sup> Hike sulumebong, Yesu ye gombawacni walu taon yogowacni ngic monic alengfocineholec bafuwawec. Ngic yogo ye dameng dalicne biyachac senggang galu macka aneng mi ngiyelu dongesiwa ngiye-fac ailu gawec. <sup>28-29</sup> Game dameng dalicne aicnome ngic yengi balu senti hige-moleine hefelu damongkebong ngiyelu, ye sen welockeme aleng wonongkolecti mengockelu himong kisiwa misaine mikacka hikelu gawec. Aime Yesudi ngic yelacni aleng yebiyeme ofelu hikenale sanangne edowec. Inguc edome ngic yedi Yesu nganilu dacineholec aukwelu Yesule emewa wafalu yanguc wackewec, “Yesu, Wapong Feicnetowale Madec, ga nala wenuc ainogale ngagegic? Na yowa milu wasicgugabac, ga doicka mi locnudamec!”

<sup>30</sup> Aime Yesudi yanguc uwacnowec, “**“Ga wacgone ma?”**

Uwacname miwec, “Na wacne Habutowa.” Aleng homacnedi yele kwelewa haulu gaibongte ailu yedi wacine inguc miwec. <sup>31</sup> Aime yenge Yesu dogbac ailu yanguc micnoibong, “Ga long sugucnebenang iwa salecnubang mi haunang!”

<sup>32</sup> Mime himong iwa bec-habu sugucnedi fegengka sulukwelu gaibong. Gaebongka aleng yenge yebicebame becka hauningte Yesu dogbac aicnobong, yedi inguc ainingte ngageyelewec. <sup>33</sup> Ailu yenge yebicebame baickelu bec-habu yengela haubong bec yenge fegengkacni gasackelu lifucka haulu misa nolu homayackebong.

<sup>34</sup> Homabong bec-damong yenge aibaba fikewec, yogo nganilu hangoc hikelu taonka nga mac-gogocka hikelu pasi fikewec, yogolec siduc milu edocebaibong. <sup>35</sup> Edocebabong ngic-nigigac yenge yogo ngagelu aibaba fikewec, yogo nganiningte Yesula kwesiibong. Kjesilu ngic alengkolec gawec, ye nganibong, yedi ngage-motolu ngakpi-kpoluc holelu Yesule higewa ngiyewec. Inguc ngiyeme yenge nganilu hangocebawec. <sup>36</sup> Ailu ngic dongenginengti pasi fikeme nganibong, yengi ngic alengfocineholec gawecti wenucka madickewec, siduc yogo ngic-nigigac edocebaibong. <sup>37</sup> Edocebabong Gerasa ngic-nigigac yengele himong filefocine sasawadi homacnebenang hangocebawec. Ilec ailu Yesu ye himong yogo hegilenale edoibong. Edobong Yesudi hefaliyelu hikenale gombawa feme <sup>38</sup> ngic aleng yebiyecnowec, yedi Yesuholec hikenale dogbac aicnolu edowec. Edome Yesudi salelu yanguc edowec, <sup>39</sup> “**“Ga macgona hefaliye hikelu Waponti pasi sugucne aigelegac, yogo miyengka yegengkena.”**” Inguc mime ngic ye hikelu Yesudi yela pasi sasawa bawec, yogo taonka ngic-nigigac sasawa milu edocebayackewec.

*Yesudi ngigac yaeckang bamadicepawec*

*Mat 9:18-26; Mrk 5:21-43*

<sup>40</sup> Yesu ye lifuc nebocinacni kwesiyemewa, ngic-nigigac yenge yele wangec gaibongte ailu ye hefoleibong. <sup>41-42</sup> Aime kpakpaduc macte damong monic, wacine Yairus, ye welewec. Ye aduine moniyang sugu, hifaine 12 aiyemewa homanogale aiwekte ailu ngic ye welelu Yesule higewa wafalu macina hikenogale dogbac aicnowec. Aicnome yenge hikeebongka, ngic-nigigac habu sugucnedi hewalingkelu feine feine hikeibong.

\* **8:26:** Gerasa yenge Israel ngic-nigigac miyac.

<sup>43</sup> Aime ngigac monic ye sac-dale aicnome gaemewa hifa 12 biyachac aiwec. Inguc aimebac monicti ye bamadickenale yefe mi bafuwawec.  
<sup>44</sup> Ye habu yengele hewacka Yesule lobewa yefe lelu ngakpi daleinele muc susucine oiyawec. Oiyame iwahac sacine kelengkeme <sup>45</sup> Yesudi yanguc uwawec, “**Madi oiyacnugac?**”

Mime yenge “mi ngagegabeleng” mibong Pitadi yanguc edowec, “Sugucne, ngic-ngigac homacnedi wabunggulu hedicgugaing!”

<sup>46</sup> Mime Yesudi yanguc miwec, “**Monicti oiyacnume tapili monicta leme ngagegabac.**”

<sup>47</sup> Inguc mime ngigac ye biyac ngagewec, “Na bafuwacnugac hocne.” Inguc ngagelu sangke-sangke hikenogale aibibiyelu dengdengkeme welelu Yesule higewa wangiyewec. Ailu Yesu oiyawec, nga wenucka biyacbenang madickewec, yogo ngic-ngigac yengele haicka mime yegengkewec.  
<sup>48</sup> Miyackeme Yesudi yele yanguc miwec, “**Ngigac, ngage-ngagesinggonedi bamadicgugac. Ga kwele-mogunkolec hikenong!**”

<sup>49</sup> Aime Yesu ye yowa milu domaemewa kpakpaduc macte damong, yele mackacni ngic monicti yowa yanguc bawelewec, “Adugone biyac homagac, ga wewedu hatacmac umac mi lacnoci!”

<sup>50</sup> Mibong Yesudi yogo ngagelu Yairus edolu yanguc miwec, “**Ga kweleumac mi ngagenong! Ga ngage-ngagesingka sugu domaengka ye gagaine hatacmac kwesidaicte.**”

<sup>51</sup> Inguc milu macka lekjesilu monicti macka mi fenigte kpatalayelewec. Kpatalayelelu Pita nga Yoane ailu Yakobos nga adu nenggac-mamackecine, yengi sugu fenigte miwec. <sup>52</sup> Aime ngic-ngigac nebocene yenge adule hisonggong aibong Yesudi yanguc edocebewec, “**Ngenge hii hegileneng. Adu ye mi homagac, ye gung fagac.**”

<sup>53</sup> Inguc mime yenge adu ye biyac homawec, inguc ngageibongte ailu gouwecnoibong. <sup>54</sup> Aime Yesudibac adule molewa balu wackelu miwec, “**Adu, ga fangkec!**” <sup>55</sup> Inguc mime asuine hatacmac hefaliye weleme iwhac gboliyelu fangkelu ngiyeme, Yesudi nosing lacnoningte edocebewec.  
<sup>56</sup> Edocebame nenggac-mamackecine yeke kwatackelu ngani-angac aiiboc. Aime Yesudi ngic monic mi edonite mimacepwec.

## 9

*Yesudi mic-tengtengfocine 12 bole baningte salecebawec*

*Mat 10:5-15; Mrk 6:7-13*

<sup>1</sup> Aime Yesu ye mic-tengtengfocine 12 wacebame weleyackebong. Welebong ngic-ngigac yengelaci aleng sasawa yebicebaningte, nga huc haicine monic monicti bacebaicne yogo bamadicebaningte bole-yowa nga tapili sasawa yelewec. <sup>2</sup> Yelelu Wapongte ngani-damongte yowa edocebaningte, nga huckolec bamadicebaningte <sup>3</sup> yanguc edocebalu salecebawec, “**Ngenge yefele wiyac monic mi balu hikedaing. I yanguete, hiye nga nosing ailu yasu me moneng monic mi badaing. Me ngakpi yaeckang mi balu hikedaing.**

<sup>4</sup> Nga mac monicka hike sulumbong, yenge mac holengelebong ngenge mac yogowahac sugu ngiye-fangkec aidaiing. Aibong motome taon monicka hikedaing. <sup>5</sup> Nga taon monicte ngic-ngigac yenge mi hefolecngebabong, ngenge taon yogo hegilelu higenginangkocni lube webong wadaic. Aime ngic yenge yogo nganilu Wapongti amengineng baduyeledaicte, *yogo ngage-motodaingte.*” <sup>6</sup> Mime yenge mac-aling falegac, iwa lolicke hikelu Siduc Madicne mibong yegengkeme galu huc-doickolec bamadicebalu gaibong.

*Herodedi Yesule fungine ngagenale aiwec  
Mat 14:1-2; Mrk 6:14-16*

<sup>7</sup> Inguc aime ngictau Herode yedi wiycasasawa fikewec, yogolec Yesule siduc ngageme gocne yenge yanguc miibong, "Yoane misa-lowacti homackaci gholiye fangkelu gagac." Inguc miibongte ailu ngagelu medeckewec. <sup>8</sup> Mibong gocnedi yanguc miibong, "Elaiyadi fikelu gagac." Nga gocne yengi miibong, "Wapongte siduc-mimi ngic esecne gaibong, yengelacni monicti welegac." <sup>9</sup> Aime Herodedi yanguc miwec, "Nani mibe Yoane ubeine wellockeibong. Nga yagobac ma ngicte siduc ngagegabac." Milu Yesu nganiniale milu gawec.

*Yesudi ngic 5 taosen nosing gumecebawec  
Mat 14:13-21; Mrk 6:30-44; Yoa 6:1-13*

<sup>10</sup> Aime salecebaicne yenge hefaliye hikelu bole baibong, yogolec siduc Yesu edoynackebong. Edobong motome, yedi mic-tengtengfocine 12 yenge sugu bacebalu mengocebame yengilangkac ngiyenogale taon monic, wacine Besaida, iwahaic hikeibong. <sup>11</sup> Hikebong habutowa yenge yogo ngagelu ye balaibeibong. Balaibeibong, yedi mac holeyelelu Wapongte ngani-damongte mime yegengkeme huckolec yenge bamadicebawec.

<sup>12</sup> Mac aweleme mic-tengtengfocine 12 yengi Yesula lelu yanguc miibong, "Himong yago ngicine mikacka gaebengka mac awelegac. Ilec ailu habu salecebang mac-gogoc nga mac-aling falegac, iwa hikelu nosing bafuwa nolu iwa fadaing."

<sup>13</sup> Mibong yanguc miwec, "**Ngengi nosing yelebong noning!**"

Mime yanguc miibong, "Nonge bret 5 nga misa-sic yaeckang sugu balu gagabeleng. Nga yenge habu sugucnehas, ilec nonge nosing fuli nalic mi badabeleng." <sup>14</sup> Ngic yogo yengele dzalengineng 5 taosen ngama ingucti gaibong. Ilec ailu inguc milbong.

Mibong Yesudi mic-tengtengfocine edocebalu yanguc miwec, "**Ngenge ngic-nigac edocebabong, yenge habu 50 habu 50 inguc kpaduckelu ngiyening.**" <sup>15</sup> Mime mic-tengteng yenge ngic-nigac inguc ainingte edocebabong sasawadi wangyeibong. <sup>16</sup> Wangyeibong Yesudi bret 5 nga misa-sic yaeckang, yogo balu dongeine hilame honocmengka feme Wapong kwele-madic micronlu bauckewec. Bauckelu ngic-nigac botoc balu yeleningte, mic-tengtengfocine yelewec. <sup>17</sup> Yeleme yengi botoc balu ngic-nigac yelebong sasawadi nogebec aibong. Aibong nosing tofaine notiwa aibong ngiyewec, yogo kpaduckebong haulu damba 12 wakewec.

*Pitadi Yesule fungine mime yegengkeyelewec  
Mat 16:13-19; Mrk 8:27-29*

<sup>18</sup> Yesu ye dameng monicka yeicnakac Wapong milockelu gaemewa mic-tengtengfocine yeholec gaibong. Gabong yenge uwayelewec, "**Ngic-nigac yenge nale ma micaigaing?**"

<sup>19</sup> Mime miibong, "Gocne yengi Yoane misa-lowac micaigaing. Nga gocne yengi Wapongte siduc-mimi ngic wacine Elaiya micaigaing. Aime gocne yengibac Wapongte siduc-mimi ngic monic esecne, yedi gholiye fangkelu gagac micaigaing."

<sup>20</sup> Inguc mibong miwec, "**Aime ngenge ngengung nale ma micaigaing?**"

Uwayeleme Pitadi miwec, "Ga Mesia Wapongtacni." <sup>21</sup> Mime, yenge yowa yogo ngic monic mi edocebaningte mimacebawec.

*Yesu homalu homackacni hatacmac gboliyelu fangkenale edocebawec  
Mat 16:20-28; Mrk 8:30-9:1*

<sup>22</sup> I yanguete miwec, “Ngicte Madec ye doic homacne ngagedaict. Aime Yuda ngic-ngigac yengele damongfocngineng nga depec-baba ngic micne, ailu Wapongte yefe-yowale wewedu ngic, yenge ye kweledi wickelu webong homadaict. Aime homame hadeng habackang aiyemewa hatacmac gboliyelu fangkedaict.”

*Yesudi yeicne balaibenogale yowa miwec*

<sup>23</sup> Ailu yenge sasawa yanguc edocebawec, “Monic ye na balaibecnunogale ngagegacka, ye yeicne soc-kweleinele angac bawalu hadengsoc umacte malicpongine bafangke tengkelu balaibecnudaic. <sup>24</sup> Monic ye yeicne gagaine sebilenele ngagelu boleinela bidaict, ye gagaine yogo sangkecnodaict. Nga monic ye nale ailu gagaine hegiledaict, yebac gagaine fikecnodaict. <sup>25</sup> Ilec monicti himontowa yagolec wiyac sasawa bafuwanaile ailu gagaine wickeme sangkedaict, wiyac yogo yengi ngic yogo nalic bafickedaingte, me? Yogo miyac! <sup>26</sup> Aime monicti nale ngageme gameineholec aidaict, ailu nale yowale ngageme gameineholec aidaictewa, yela yanguc fikedaict. Ngicte Madec ye yeicne tapili nga hibi-angocineholec, ailu Mamac nga yeicne angelo yengele tapili nga hibi-angocnginengkolec kwesidaingte. Dameng iwa yedi ngic yogolec inguchac ngageme gameineholec aidaict. <sup>27</sup> Nga ngic-ngigac yago domagaing, ngengelacni gocne yenge mi homaebongkahac Wapongte ngani-damong weleme nganidaingte, yogo noinebenang edocngebagabac.”

*Yesule soc hefaliyelu haic monic aiwec*

*Mat 17:1-13; Mrk 9:2-13*

<sup>28</sup> Aime yowa miwec, yogolec Sonda moniyang ingucne motoemewa, Yesudi Pita nga Yakobos ailu Yoane mengocebame milockeningte tikiwa feibong. <sup>29</sup> Felu milockeemewa haic-mesuinedi hefaliyelu silicine monic aime ngakpiine angolelu pilatac ingucnebenang aiwec. <sup>30</sup> Hei, inguc aiyemewa iwahac ngic yaeckang, Moses nga Elaiya, yeke fikelu yeholec mingagec aiiboc. <sup>31</sup> Yeke tapili nga hibi-angockolecti fikelu, Yesudi Yerusalem hikelu gagaine bamoctolu hegilecebalu fedaict, yogolec mingagec aiibong. <sup>32</sup> Aime Pita nga agokecine, yenge gung-kwomoc faibong. Faibongkacni gboliye fangkelu Yesu tapili nga hibi-angocineholec ailu ngic yaeckang yeholec domaboc nganicebaibong. <sup>33</sup> Aime ngic yaeckang yeke Yesu hegilelu hikeebocka Pitadi Yesu yanguc edowec, “Sugucnene, nongileng yagowa gabeng madickegacte fale habackang banang. Gale monic, Mosesle monic, nga Elaiyale monic.” Ye wiyac monic mi ngagelu moc miwec.

<sup>34</sup> Yowa milu domaemewa kaguwa monicti fikelu walu somecebame hangocbame kaguwa kwelina domaibong. <sup>35</sup> Domaebongka kaguwa kwelinacni yowa-malac monic yanguc wackelu miwec, “Yogo nale Madec bawosaeicne. Ngenge yele yowa ngagedaing!” <sup>36</sup> Mime malac miyac aime yenge donge hilalu Yesu yeicnakac domame nganibong. Nganilu mic-tengteng yenge yowa mikac ailu domaibong. Aime dameng iwa wiyac nganibong, yogolec ngic monic mi edoibong.

*Yesudi madec monic alengkolec bamadickewec*

*Mat 17:14-21; Mrk 9:14-29*

<sup>37</sup> Mac saeme Yesudi mic-tengtengfocene habackang yengeholec tiki-wacni hauebongka habu sugucnedi bafuwacebaibong. <sup>38</sup> Aime habu yengele hewackacni ngic monicti Yesu wackelu miwec, “Wewedu, ga welelu madecne nganic, na madecne moniyang sugu. <sup>39</sup> Aleng monicti madecne bame ye aukweme alengti balu wepackelu socine bakuctungkelu bame micinacni sofololoc ofecaigac. Ailu aleng yogodi madec basowale-benangkelu dameng moniyang moniyang sugu hegilecaigac. <sup>40</sup> Aime mic-tengtengfogone yengi aleng yebiyingte edocebabe, yenge ngagebong kpungkeme hegilegabiyeng.”

<sup>41</sup> Inguc mime Yesudi bafaliyu yanguc edowec, “Dameng yagolec ngic-nigic aling yago, ngenge ngage-ngagesingngineng mikacbenang, ailu ngenge aibabangineng kosa-balasaine. Na dameng dalicne ngage-ngagesing mikac ngic-nigic ngengeholec hatacmac ganogale takicnugac. Ga madec-gone bawelec!”

<sup>42</sup> Mime madec yogo emeina balu leemewa, aleng wonongkolecti madec wepackeme himongka wawelu socine teng-teng kweme, Yesudi aleng kpatalacnolu madec bamadickelu mamaccine hatacmac lacnowec.

### *Yesu weningte fungine yeuctihac miwec Mat 17:22-23; Mrk 9:30-32*

<sup>43</sup> Lac nome ngic-nigic yenge Wapong tapilitowaine ingucne nganilu ngani-welec ailu ngagebong wiyac feicne aiwec. Ailu yenge Yesule bole sasa-sawa nganilu ngani-welec aiibong. Inguc aiyebongka ye mic-tengtengfocene yanguc edocebawec, <sup>44</sup> “Ngenge hedec lolu yowa yago aneng ngagening! Monicti Ngicte Madec balu ngic yengele molewa lodaicte, yagolec dameng bangkalegac.” <sup>45</sup> Mime mic-tengtengfocene yenge yowa yogo mi ngage-motioningte kwele nga ngage-ngagengineng fongkewec. Fongkeme yenge Yesule yowa mi ngage-motolu yowa yagolec funginele hatacmac uwacnon-ingte hangocebawec.

### *Feicne gagale yowa*

<sup>46</sup> Aime mic-tengteng yengelacni madi feicne aidaicte, yagolec yengungti-hac yowangineng fec-wac aiwec. <sup>47</sup> Inguc aibong Yesudi kwele ngage-ngagenginang fawec, yogo biyac nganiwec. Inguc nganilu madec hakic monic balu yeicneholec lome domame <sup>48</sup> yanguc edocebawec, “Monic ye madec yangucne nale wacka hefolegac, ye na inguchac hefolecnuagac. Nga na hefolecnugac, ye Wapong na salecnuwec, ye inguchac hefolegac. Ilec ailu ngengele hewackacni monic ye bawacnagulu gadaicte, yedibac feicne aigac.”

<sup>49</sup> Inguc mime Yoanedi yanguc miwec, “Sugucne, ngic monic ye gale wacka aleng yebicebame nganibeleng. Ailu ye nongilengkolec mi gagacte kpatalacnobeleng.”

<sup>50</sup> Mime yedi yanguc miwec, “Monic ye nongileng ngaba mi aigac, yedi agonoggeng aigac. Ilec ailu mi kpatalacnodaing.”

### *Yesu ye Yerusalem fenogale hikewec*

<sup>51</sup> Yesu ye honocmenga fenogale damengngine bangkale weleme, ye ngage-ngageine Yerusalem iwa lolu hikewec. <sup>52</sup> Hikeme ye ngic gocne sale-cebame yenge molickelu noba-nosing nga mac fale bamockeningte Samaria

yengele mac-alig monicka hikelu sulumeibong.\* <sup>53</sup> Hike sulumelu Yesu ye Yerusalem hikedaitc, inguc ngageibongte Yesu hekecnobong. <sup>54</sup> Inguc aibong mic-tengtengkicine, Yakobos nga Yoane, yeke yogo nganilu yanguc miboc, "Sugucne, nalic mibeng honocmengkacni dac walu ngic yago lobecbayackena, yogo nalic aidabelengte, me?"

<sup>55</sup> Miboc Yesudi hefaliyelu ngelengkeyetelu yanguc edocepwec, ["Ngeke kwelenginac fikegac, yogolec fungine mi ngage-motogaic. <sup>56</sup> Ngicte Madec ye ngic mi basowalecebanogale kwesiwec. Ye bacebame wasecne ainingte kwesiwec."]† Inguc ailu mic-tengtengfocene yengeholec mac-alig monicka hikeibong.

*Yesu balaibe-balaibebe yefe  
Mat 8:19-22*

<sup>57</sup> Yefewa hikelu ngic monicti edolu yanguc miwec, "Ga iwa me iwa hikedamectesoc na balaibecgulu gaholec hikenogale ngagegabac."

<sup>58</sup> Mime Yesudi bafaliyelu yanguc edowec, "Kate-hoda yenge himong kwelina macfafanginengkolec. Nga sawawa nango yenge selengngi-nengkolec. Nga Ngicte Madec yebac macfafainemikac, inguc gacaigac."

<sup>59</sup> Milu ngic monic yanguc edowec, "Ga welelu na balaibecnuc!"

Mime ngic yedi miwec, "Sugucne, ngageneleengka hikelu mamaacne homame longkelubac ga balaibecgudacte."

<sup>60</sup> Inguc mime bafaliyelu yanguc edowec, "Ga homaicne hegilecebaengka yenge yengungtiac longnaguning. Nga gabac hikelu Wapongte nganidamongte yowa miyengka yegengkena."

<sup>61</sup> Mime monicti yanguc miwec, "Sugucne, balaibecgunogale ngagegabac. Aimebac na hikelu alingfocene edocebalubac weledacte, yogo nalic, me?"

<sup>62</sup> Mime Yesudi yanguc edowec, "Monic ye ngage-ngageine biyac salelubac hefaliye-nganic aidaite, ngic ingucnedi Wapongte ngani-damongtesoc mi aigac."

## 10

*Yesudi ngic 72 salecebawec*

<sup>1</sup> Yogo motome Sugucne ye ngic 72\* bawosaecebalu yaeckang yaeckang heucebame, yengileng taon nga mac-kpisicna hikenogale ngagesiwe. Taon iwa yenge molic-molic salecebalu yanguc edocebame hikeibong, <sup>2</sup> "Ngicngigac yenge nosing noine ingucne homacnedi houwelu fagaing. Aime bole-nci sugu efecnemac gagaing. Ilec ailu ngenge Sugucne nosing fileine millockelu yanguc edodabiyyeng, 'Ga bole-nci salecebang yengi hikelu nosing noine bakpaduc aidabiyyeng.' <sup>3</sup> Ngagegabiyyeng, ngenge lama madecinedi kate-hoda yengele hewacka gacaigaing, na silicine yogolecsoc salecngebagabac. Ngenge yakumac iwa hikedaitc! <sup>4</sup> Ngenge moneng-ebec me hiye

---

\* **9:52:** Samaria ngic-ngigac yenge Gerasim kupicka Wapong mitengkelu gaibong. Nga Israel ngic-ngigac yenge Yerusalem iwa Wapong mitengkelu gaibong. Ilec ailu Samaria ngic-ngigac yenge Israel ngic-ngigac yengeholec ngyi-domac mi ailu gaibong. **9:54:** 2Ngt 1:9-16 † **9:56:** Hibi esecne Lukadi kwelengkewec, yogo nganilu iwacni kwelengkebong kwelengkebong ofewec, yengelacni gocne hewacine 55-56 iwa nebocine mi fagac. Ngic-ngigac yenge hibi kwelengkeicne yogo wosaelu nganibong Lukadi mi kwelengkewec meacne. **9:61:** 1Ngt 19:20 \* **10:1:** Hibi esecne Lukadi kwelengkewec, yogo nganilu iwacni kwelengkebong kwelengkebong ofewec, yengelacni gocne 70 inguc fagac, nga gocne 72 inguc fagac. 10:17 iwa dzale yaeckang ingucnedi fagaic. **10:1:** Mrk 6:7 **10:3:** Mat 10:16

nga hige-ebec mi balu hikedaing. Ailu yefewa ngic monic bafuwalu wenac-madic yowa mi midaing.

**5** “Nga mac iwa me iwa fenogale ngenge felu ‘Kwele-mogung ngengela fadaic!’ Inguc milu fedaing. **6** Inguc mibong kwele-mogung ngic monic iwa ngiyedaictewa, ngengele kwele-mogungti yela fadaicte. Nga mi ngiyedaictewa, kwele-mogung yogo hatacmac ngengilang hefaliyengeledaite. **7** Bole-ngic yenge bolenginengte bole-fulingineng bafuwadaingte, yogodi madickedaicte. Ilec mac ngeledaicte, iwahac ngiyeebungka nosing nga misa ngeledaicte, yogo nodaing. Mac-boneng monic mi hikedaing.

**8** “Ailu taon monicka hikebong mac holengelelu, ngenge wiyc monic noningte ngelebong, yogo nodaing. **9** Nga taon iwa huçnginengkolec yenge bamadicebalu ngic-ñigac yanguc edocebadaing, ‘Wapongte nganidamontgi ngengela biyac bangkalegac.’ **10** Aime taon monicka febong yenge mi hefolecngebabong, ngenge mac yefenginang lelu yanguc edocebadaing, **11** ‘Ngengele macnginengte lubedi higenonggeng bakatackeme, nonge yogo inguchac webeng wagac. Inguc aime yogodi sowacnengineng edalicngebadaicte. Ailu ngenge sifu yanguc ngagedaing! Wapongte nganidamontgi yawa biyac bangkalegac.’ **12** Aime yanguc edocngebabe, wowosae damengka taon yoglec ngic-ñigac yengele umacti Sodom ngic-ñigac yengele umac ewalidaicte.†

*Kwele mi hefaliyegaing, yengele yowa  
Mat 11:20-24*

**13** “Korasin nga Besaida ngic-ñigac, mee, ngenge medecngebadaic. Ngen-gela pasi damuineholec homacne biyac fikewec. Pasi ingucne Tair nga Saidon taonka fikedec midec,‡ ngic-ñigac yenge bikicnginengte ailu kwelesowacte ngakpi wambac biyac holedabong. Ailu defe lowa ngiyelu kwelefaliyec aidabong. **14** Aime wowosae damengka ngengele umacti Tair nga Saidon ngic-ñigac yengele umac ewalidaicte. **15** Ailu Kapeneam ngic-ñigac, ngenge honocmengka fedaingte, inguc ngagecaigabiyyeng, yogo miyacbenang. Ngenge Wangec-macka balu wicngebame haudaingte.

**16** “Na salecngebabe, monicti hedecine ngengela logac, ye hedecine nala logac. Nga ngenge lobe holengelegac, ye na lobe holenelegac. Ailu Wapong na salecnuwec, ye inguchac lobe holecnogac.”

*Ngic 72 salecebawec yenge hefaliye kwesiibong*

**17** Aime ngic 72 yenge belic-belicka hefaliyelu miibong, “Sugucne, nonge wacgone wackebeng aleng yenge inguchac yowanonggeng ngagelu hikegabiyyeng.”

**18** Mibong Yesudi bafaliyelu yanguc edocebawec, “Satangti pilatac ingucne honocmengkacni walu holeme nganiiba. **19** Aime ngenge hema nga wame-wame fenginang edesocebadaingte. Ailu ngabangineng nga yele alingfocine sasawa yenge ngengele bagewa gadaingte. Bole-yowa tapiliineholec yogo

**10:4:** Mat 10:7-14; Mrk 6:8-11; Luk 9:3-5

**10:7:** 1Kor 9:6-14; 1Tim 5:18

**10:8:** 1Kor 10:27

**10:11:** Sale 13:51; 18:6 † **10:12:** Sodom taon siducine Fike-fike 19 iwa fagac. Monicti Wapongte yowa mi edocebawec. Ilec lobewa ameine efecnemac badaingte. **10:12:** Fike 19:24-25; Mat 10:15; 11:24 ‡ **10:13:** Tair nga Saidon taon yekye Israel alingkacni miyac. Basowalecepaiacnele siducnginec Yesaiya 23 iwa fagac. Yenge aibaba sowacne bocayc ailu gaibong. **10:16:** Mat 10:40; Luk 9:48; Yoa 5:23 **10:18:** Yoa 12:31; Miye 12:8-9

biyac ngeleiba, yogo balu gagaing, inguc ngagedaing. Aime wiyc monicti nalic mi basowalecngbedaite. <sup>20</sup> Nga alengti yowangineng ngagelu hikegabiyeng, yogolec bocyc mi beliyedaing. Wac-alingsgineng honocmenga kwelelengkeicne fagac, yogolecbac homacnebenang beliyedaing.”

*Yesudi Wapong mitengkewec*

*Mat 11:25-27; 13:16-17*

<sup>21</sup> Aime dameng iwahac Tili Asudi Yesu aicnome belic-belicte angacti bawakeme yowa yanguc miwec, “Mamac, ga honocmeng nga himong fileine. Ngic-ngigac aling ngage-ngage-motocnginenggakolec gacaigaing, gagi yenge wiycgone sasawa yago mi nganiningte balu sangkeing. Ailu adu-madec-gogoc kpisicne ingucne, yenge sugu wiyc yogo baengka yegengkeyelewec. Ilec mitenggugabac. Oc, Mamac, ga yogo ngagelu kwele-gone madickegac.

<sup>22</sup> “Mamacnedi wiyc sasawa neleme na yogo damongkelu gagabac. Aime monicti Madecte fungine nalic mi ngagegac, Mamacti sugu ngagegac. Ingucne hac monicti Mamacte fungine nalic mi ngagegac, Madecti sugu ye ngagegac. Ailu Madecti ngic-ngigac bawosaecebalu edalicebagac, yengi sugu Mamac ngagegaing.”

<sup>23</sup> Aime Yesu ye mic-tengtengfocine yengela hefaliyelu yengele sugu yan-guc milu edocebawec, “Ngenge aibaba fike-ofegac dongenginengti ngani-gaing, ngenge kwele-angackolec. <sup>24</sup> Wapongte siduc-mimi ngic nga ngic-tau homacnedi esecne gaibong, ngengi yenge wiyc nganicaigaing, yogo nganinogale angac ngagelu sifu mi nganiiibong. Ailu ngenge yowa hedec-niginengti ngagecaigaing, yenge yogo hedecti ngageningte aiyelewec, yogo inguchac mi ngageibong. Yogo edocngebagabac.”

*Samaria ngicti ngic monic bafickewec*

<sup>25</sup> Hei, Wapongte yefe-yowale ngage-ngage ngic monicti welelu Yesu lokwesacka lonale ngagelu yanguc uwacnowec, “Wewedu, na wenuc aibe Wapongti baficnume gaga-sanang badacte?”

<sup>26</sup> Inguc mime Yesudi bafaliyelu yanguc edowec, “*Yefe-yowale hibiwa kwelelengkeicne fagac, ga hibi yogowa wenuc wafe-ngagec aicaigic?*”

<sup>27</sup> Mime ngic yedi bafaliyelu yanguc edowec,  
“Ga kwelegone, ilucgone nga tapiligone ailu ngage-ngagegonge sasawa bucbuchac Sugucne Wapong ago aicnolu angac ngagecnolu gadamec!”  
*(Yef 6:5)*

Ailu,  
‘Gageicne aigelecaigac, silicine ingucne hac ngic-ngigac gale emewa gagaing, yenge kwelegonedi ago aiyelelu angac ngageyelelu gadamec!’ *(Dep 19:18)*

<sup>28</sup> Mime Yesudi yanguc edowec, “*Yowa dondonne milu bafaliyenelegic. Ga inguc ailu, gaga badamete.*”

<sup>29</sup> Aime Yesule haicka ngic yeuctihac dondonne ainale uwacnolu miwec, “Aime monic nale emewa gagac, yogo mabenang?”

<sup>30</sup> Uwacname Yesudi bafaliyelu yanguc edowec, “*Ngic monicti Yerusalemkocni Yeriko taonka haunale hauwec. Haume hise ngic yengi balu ngakpi-kpolucine hemoctoibong. Hemoctolu webong homanogale aime wickebong fame hikeibong.*

<sup>31</sup> "Faemewa depec-baba ngic monicti inguc yefe haulu ngic fawec, ye nganilu kwegegengkelu nebocina yefe hikewec. <sup>32</sup> Hikeme Liwai ngic monicti inguchac iwa hauwec. Haulu ngic yogo nganime fame ye inguchac kwegegengkelu nebocina yefe hikewec. <sup>33</sup> Aime Samaria ngic monicti yefe yogohac balaibelu haulu ngic fawec, ye nganilu yele kweleine sowaleme, <sup>34</sup> yela lelu heloc nga waing misaine kweme waic sackolecka haume ebeckewec. Ebeckelu yeicne donggi feina lolu yowa-macka bahikelu nganidamong aicnowec.

<sup>35</sup> "Aime mac saeme siliwa moneng yaeckang yowa-mac damong lacnolu yanguc edowec, "Ga ngic yago ngani-damong aicnolu gadamec! Na hatacam hefaliyelu moneng gocne wickedamete, yogolec ameine geledacte."

<sup>36</sup> Inguc milu Yesudi Wapongte yefe-yowale ngage-ngage ngic yanguc uwacnowec, "Ga wenuc ngagegic? Hise ngic yengele molewa sowalewec, ngic habackang yengelacni weni yogodi yele emewa galu aibaba madicne aicnowec?"

<sup>37</sup> Inguc uwacnome yedi bafaliyelu miwec, "Yele kwele-sowac ngagelu bafickewec, yedi."§

Inguc mime, Yesudi yanguc edowec, "Ga hikelu ye aiwec, ingucnehac idamec!"

### *Yesudi Mata nga Maria yugucyepawec*

<sup>38</sup> Aime Yesu nga mic-tengtengfocene yenge hikegacgu mac-alng monicka sulumeibong. Aime ngigac monic wacine Mata, yedi Yesu macina fenale hefolewec. <sup>39</sup> Hefoleme Mata kwaine monic, wacine Maria, yedi Sugucnele higewa wangiyelu yowaine ngagewec. <sup>40</sup> Ngageemewa Matadibac lec-welec ailu yekeholec mi ngiyewec. Ailu wele domalu Yesu yanguc edowec, "Sugucne, ga nale ngageboc mi aigic. Na neicnac ngani-damong bole banogale aigabac. Kwane hegilecnugac, ye edoengka baficnuna."

<sup>41</sup> Mime Sugucnedi bafaliyelu yanguc edowec, "Mata, Mata, ga wiyc homacnele ngageboc ailu umac basic. <sup>42</sup> Ga wiyc moniyang sugu yogobac baengka madickedaite. Maria ye wiyc madicne wosaelu balu gagac, yogo monicti yelacni nalic mi baickedaite."

## 11

### *Mimilocete yefe*

*Mat 6:9-15; 7:7-11*

<sup>1</sup> Yesu ye dameng monicka hikelu hewacine monicka milockewec. Milockeme motome mic-tengtengfocene yengelacni monicti yanguc miwec, "Sugucne, Yoane ye mic-tengtengfocene wenuc milockeningte weduyelewec. Ga inguchac wedunolenong!"

<sup>2</sup> Mime Yesudi miwec, "Ngenge yanguc milu milockedaina.  
'Mamac, ga wacgone gbagbacne fadaic.

Aime ngani-damonggone weleonoledaic.

<sup>3</sup> Ga hadengsoc nosing socnonggeng noledamec.

<sup>4</sup> Nonge ngic yengele bikic hegilegabeleng.

Ilec gagi inguchac bikicnonggeng hegilenolenong.

Ja lokwesacka mi locnubadamec.'"

### *Sanangke galu milockenoga*

---

§ **10:37:** Israel ngic-ngigac yenge Samaria ngic-ngigac yengele takicebawec. Ilec wacngineng mi wackecaigaing.   **10:39:** Yoa 11:1; 12:2-3   **10:42:** Mat 6:33

<sup>5</sup> Milu yanguc edocebawec, "Ngengelacni monicti deboc hewacina agoine monicte macka lelu yanguc midaicte, 'Agone, ga bret ebec habackang baficnunong. Ameine lobewa geledacte. <sup>6</sup> Na agone monicti debocka yefe dalickacni kwesilu macna welegac, aime nosingne mikac. Aime oma gumenogale kpungkegabac.'

<sup>7</sup> 'Ye inguc mime agoine mac kwelina ngyielu midaicte, 'Ga umac mi nelenong! Adu-madecfocene yenge naholec gung fabong nunonggeng biyac holegabac. Ilec nalic mi fangkelu bageledacte.' <sup>8</sup> Na yanguc edocngebabe, ye agoinele ailu bret mi lacnodaickale milu, ye dogbac ailu uwacnodaicte. Inguc aime ye fangkelu bret lacnodaicte.

<sup>9</sup> "Ilec ailu yanguc migabac, milockening, aime yedi wiyac ngeledaicte. Nga basackening, ailu bafuwadaingte. Nga nuwa holening, aime ye nu laliyedaicte. <sup>10</sup> I yangucte, monic ye milockelu gagac, yedi wiyac badaicte. Nga monic ye basackelu gagac, yedi wiyac bafuwadaicte. Ailu nuwa holelu gagac, ye nu laliyecnodaicte.

<sup>11</sup> "Aime ngengele hewackacni mamac monicte madecinedi misa-sicte uwacnome, hema sowacne nalic mi lacnodaicte. <sup>12</sup> Nga kokolec hucinele uwacnome, wame-wame nalic mi lacnodaicte. <sup>13</sup> Ngenge ngic aibabangineng sowacneholec gacaigaing. Ailu sifu adu-madecfocngineng kwele-madicte wiyac madicne yelenogale ngage-motogaing. Ilec ngenge yan-guc ngagedaing, Honocmeng Marnacnginengte albabadi ngengele aibaba madicne yogo ewaliyackegac. Ngenge yela Tili Asule uwacnobong yedi taockelu Tili Asu neleyedaicte."

*Yesu ye male tapiliwa aleng yebicebacaigac?*

*Mat 12:22-30; Mrk 3:20-27*

<sup>14</sup> Aime Yesu ye dameng monicka aleng monic yowaine mikac, yogo ngickacni yebiyewec. Yebiyeme aleng ngickacni ofelu hikeme ngic yowaine mikac gawec, yedi yowa mime ngic-ngigac yenge ngagelu kwatackeibong.

<sup>15</sup> Aime ngic-ngigac gocne yengibac yanguc miibong, "Ye aleng yengele micne Belsebul, yele tapiliwa bole balu ngic-ngigac yengelacni aleng yebice-bacaigac." <sup>16</sup> Aime gocne yengibac Yesu tapiliine lokwesacka loningte ngagelu pasile maa monic honocmengkacni banale edoibong.

<sup>17</sup> Edobong Yesudi ngage-ngagenginang biyac ngagelu yanguc edocebawec, "Himong monicte ngic-ngigac yenge ngaba ainagulu siyeckedaingtewa, himong yogo kisi kwedaicte. Ailu golowac monicti siyeckelu ngaba ainagudaingfewa, yenge wawebong miyac aidaicte.

<sup>18</sup> Nga Satang yeuctihac siyeckedaictewa, ye habu yaeckang aime yele ngani-damong sanangne nalic mi fadaicte. Aime ngengibac sifu nale migaiing, 'Ye Belsebuldi aicname yele tapiliwa aleng yebicebacaigac, yogodi nalic mi aigac.' <sup>19</sup> Nani Belsebul yele tapiliwa aleng yebicebadabong. Inguc aime ngenge madecfocnginengtiac ngengele yowa wosaelu mimoctodaingte. <sup>20</sup> Aime nani Wapongte tapiliholec aleng yebicebagabacka, ibac Wapongte ngani-damongti ngengela biyac weleyec fagac.

<sup>21</sup> "Ngic tapiliineholec monicti hudule woc-wiyacine balu macinele damong gaemewa woc-wiyacine madicne fadaicte. <sup>22</sup> Aime ngic monic tapiliholecti hatacmac yela welelu yeholec wenagulu ewalidaictewa, yedi ngic yele hudule woc-wiyac ewaliyackedaicte. Ewalime mac fileinedi hudule

wiyacte tapiliwa sanangne gawec, yogo miyac aime ngic tapiliine sugucnedi yele woc-wiyacine hise balu heuckelu ngic-ngigac gocne yeledaite.

<sup>23</sup> “Inguc aime monic ye nale ago miyac ye na lobenugac. Nga monicti naholec bakpaduc bole mi bacaigac, yedi nale wiyc basowaleme singsalolong kwenale bole bacaigac.

*Aleng hatacmac hefaliyecaigac*  
Mat 12:43-45

<sup>24</sup> “Aleng wonongkolec yedi ngickacni ofelu himong misaine mikac, iwa hikelu ye mac ngiye-ngiyeine basackelu lolickelu gacaigac. Gacgu mac ngiye-ngiyeine monic mi bafuwalu, yeuctihac yanguc migac, ‘Macne esecne ngiyelu hegileiba, iwa hatacmac hefaliyelu hikenogale ngagegabac.’ <sup>25</sup> Inguc milu hikelu mac yogo biyac pelengkelu hamadickeicne nganigac. <sup>26</sup> Nganilu hatacmac hikelu aleng <sup>7</sup> mengocebame kwasigaing. Aleng yogo yengi ye ewalilu sowacnebenang aigaing, yenge bacebame hikelu mac iwa gagaing. Inguc aibong ngic ye molic-molic sowacne gawec, ye yogo ewalilu sowacnebenang gagac.”

*Aling weni yenge kwele-angackolec aigaing*

<sup>27</sup> Yesu ye yowa inguc miyemewa ngigac monicti habu yengele hewack-acni wackelu miwec, “Ngigac bacgulu kogocka damongguwec, ye kwele-angackolec.”

<sup>28</sup> Inguc wackeme Yesudi yogolec ailu yanguc miwec, “Wapongte yowa ngagelu balaibecaigaing, yengebac kwele-angackolec.”

*Pasile maaine monic fikeme nganidaingte*  
Mat 12:38-42; Mrk 8:12

<sup>29</sup> Aime ngic-ngigac habu sugucne yenge homacne hac welelu fabong, Yesudi yowa taockelu yanguc miwec, “Ngic-ngigac aling yanguctihac gagaing, ngenge aling sowacnebenang. Ngenge pasile maa nganinogale uwalu gagaing. Aimebac ngenge pasile maa monic mi negeleicne, miyac. Yonala pasile maa fikewec, ngenge yogo sugu nganidaingte. <sup>30</sup> I yangucte, Yonala maa fikewec, yogo Niniwe taonte ngic-ngigac yengi nganiibong. Yonala fikewec, silicine ingucne hac Ngicte Madecta fikeme nganidaingte. <sup>31</sup> Aime Seba himongte ngigac-taudi Solomonete ngage-ngagemotoc banogale himong mecin sautkacnipec kwesiwec. Aime ngage-gaing, yakumac monicti Solomon ewaligac. Ilec ailu ngigac-taudi wowosae damengka ngic-ngigac aling yanguctihac gagaing, ngengeholec fangke domalu aibabangineng wosaelu ngengele sowacne mimoctodaite. <sup>32</sup> Aime Niniwe taon sugucnele ngic yengi Yonale yowa ngagelu kwele-hefaliyec aibong. Aime ngagegaing, yakumac monicti Yona ewaligac. Ilec ailu ngic-ngigac aling yanguctihac gagaing, ngenge wowosae damengka Niniwe ngic-ngigac yengeholec fangkelu domaebongka aibabangineng wosaelu ngengele sowacne mimoctodaingte.

*Socnginengte angoc*  
Mat 5:15; 6:22-23

<sup>33</sup> “Monicti hifa kwendangkelu sangke-sangke me pakec bageina nalic mi lodaite. Ye hifa yogo mac ngiye-ngiyeina lome ngiyeme angocina ngic-ngigac yenge ofelu angocine nganidaingte. <sup>34</sup> Aime dongegonedi socgonele

hifa aigac. Aime dongegonedi madicne fame socgone sasawa bame angeleyackegac. Nga ga donge-heloc me donge-sowac balu gadamekte, me dongegone sowaledaictewabac, soc-kwelegone kundung kweyectedaict. <sup>35</sup> Ilec ailu ga angogcone fagac, yogo kundung kwedaikale ailu, damongkelu balu gadamec! <sup>36</sup> Aime soc-kwelegonedi kundung mikac angockolec sasawa fadaictewa, socgone angociti sawelu fadaicte. Yogo hifa monic angoc-towaineheolecti bacgume angolecaigac, yogo ingucne.”

*Yesu ye Farisaio nga yefe-yowale wewedu ngic yengele fungine miwec  
Mat 23:1-36; Mrk 12:38-40; Luk 20:45-47*

<sup>37</sup> Aime Yesu ye yowa mime Farisaio monicti yeholec nosing nonale micname yele macka feme ngiyeiboc. <sup>38</sup> Ngiyelu ye moleine mi suwelu nosing moc nonogale aime, Farisaio yedi yogo nganilu kwatackemebac, <sup>39</sup> Sugucnedi yanguc edowec, “Farisaio, ngenge pele nga kapngineng lobine sugu suwecaigaing. Ailu ngengebac kwelenginengti ngani-angac aibong aibaba sowacne ngengela wakeicne fagac. <sup>40</sup> Ngenge kapaine! Lobine wiyc bawec, yedi kwelinele inguchac bawec. <sup>41</sup> Ngenge ilec ailu waweweine kweledi doficebalu yeledaing! Ngagegaing, inguc aibong wiycngineng sasawa gbagbacne aidaicte.

<sup>42</sup> “Mee, Farisaio, ngenge medecngebadaic. Ngenge lomboc nga gime ailu mendangngineng sasawa yogowacni 10kacni moniyang botoc balu Wapong lacnoicaigaing. Ailu aibaba dondonne nga Wapong ago balu angac ngagec-nolu gaga, yogobac kpaoma ailu hegilecaigaing. Ngenge aibabangineng madicne yogo nalic balaibegabiyyeng. Ailu tofaine migabac, yogo inguchac mi hegiledaing.

<sup>43</sup> “Mee, Farisaio, ngenge medecngebadaic. Ngenge kpakpaduc macka molic-molic ngiye-ngiyeva ngiyenogale aingelegecaigac. Nga sobeng sugucna wenac-madic mingeleningte angac ngagecaigaing.

<sup>44</sup> “Mee, ngenge medecngebadaic. Dongesi maaine mikac ngic yenge mi ngagelu moc sugu feina lec-welec aicaigaing, ngenge dongesi yogo ingucne gagaing.”

<sup>45</sup> Inguc mime Wapongte yefe-yowale ngage-ngage ngic yengelacni monicti yanguc edowec, “Wewedu, ga inguc milu nonge inguchac misowalec-nubagic.”

<sup>46</sup> Mime Yesudi yowa ameine bafaliyu yanguc edowec, “Wapongte yefe-yowale ngage-ngage ngic, mee, ngenge medecngebadaic! Ngenge ngic yengele lobenginang mafa ngicti babalesoc miyac, yogo locaigaing. Aime ngengileng umacngineng efecne aidaicte, wiyc monic baficebaningte mole monic mi yelegecaigaing.\*

<sup>47</sup> “Mee, ngenge medecngebadaic. Ngambofocngineng yenge Wapongte siduc-mimi ngic esecne wehomacebabong homaibong, yogo yengele dongesiwa simeng bayelecaigaing. <sup>48</sup> Yengi Wapongte siduc-mimi ngic wehomacebabong. Ailu ngengi dongsingineng bacaigaing, yogo ailu yanguc mibong yegengkegac, ‘Nonge aibabanonggang kwele-moniyang gagabeleng.’ <sup>49</sup> Ngengele ailu Wapong ngage-ngage-motocineholecti biyachac miwec, ‘Wapongte siduc-mimi ngic nga salecebaicne, yengela salecebabe kwesidaingte. Aime yengi gocne wehomacebadaingte. Nga gocne welu yebicebadaingte.’ <sup>50</sup> Ilec ailu himong funginacnihac ofegacgu Wapongte siduc-mimi ngic wehomacebabong sacngineng wawec. Aime yogolec ameine ngic-ngigac aling yanguctihac gagaing, ngengelacnid

\* **11:46:** Yefe-yowa gocne taockelu weduyeleibong, yogo mafa ingucne hac.

baduyeledaingte. <sup>51</sup> Ameine yogo Abel wehomabong yele sackacni molick-elu ofegacgu Sekariyale sacka ofegac. Yengi alata nga Ibu-mac kweline hewacnginac Sekariya wehomaibong. Oc, ngic-ngigac aling yanguctihac gagaing, ngenge sac yogolec ameine yogo baduyackedaing, yogo edocngebagabac.<sup>†</sup>

<sup>52</sup> "Wapongte yefe-yowale ngage-ngage ngic, mee, ngenge medecngebadaic. Ngenge Wapong ngagecononingte ki, yogo baickeibong.<sup>‡</sup> Ailu ngenge ngengileng iwa mi feibong. Aime ngic-ngigac yenge fenogale aiybongk-abac, aka biyac locaigaing."

<sup>53</sup> Aime Yesu ye hegilelu lobina hauwec. Haume Wapongte yefe-yowale wewedu ngic nga Farisaio, yengi yele ngage-sowalelu uuwa haicine monic-monie uwacnoibong. <sup>54</sup> Aime yowaine gocne lilome banang milu yele damong balu gaibong.

## 12

*Wiyac sangkeicne yegengkenale yowa*

*Mat 10:26-27*

<sup>1</sup> Aime ngic-ngigac homacnebenang, 10 taosen ngama ingucnedi kpaduckelu yengungtihac feine feine domaibong. Inguc aibong Yesudi mic-tengtengfocene yengele sugu ngagelu molickelu yanguc miwec, "Ngenge Farisaio yengele kwesac-aibabangineng yogolec ngaru-motolu gadabyieng, yogo yisdi bret bame sawecaigac ingucne. <sup>2</sup> Aime wiyc sangkelu fagac, yogo ngagey-ackedaingte. <sup>3</sup> Ilec ailu ngenge kundungka yowa sasawa micaigaing, yogo angocina ngagedaingte. Nga mac kwelina hedecnginang sangicka migainaing, yogo mac feina domalu edocebalu weduyeledaingte.

*Ngic yengele hangoc mi aidait*

*Mat 10:28-31*

<sup>4</sup> "Ailu agofocne, ngagegaing, gocne yengi socngineng wehomalu hat-acmac basowalecngebaningte tapili basackecaigaing, ngenge yengele mi hangocngebadaic, yogo edocngebagabac! <sup>5</sup> Ngenge monictebac hangocngebadaic! Waponti wehomacngebala dac-sanangka wicngebame hauningte bole-yowa tapilineholec balu gagac, oc, yelebac hangocngebadaic, yogo edocngebagabac! <sup>6</sup> Ailu nango hakic 5 maketka lobong peni sasacne yaekangti fuli bacaigaing, Waponti nango yogo yengelaci monic nalic mi ngigeckedaicte. <sup>7</sup> Ailu ngengele hodoc-dowecngineng edomeng, yogo inguchac wafelu ngagegac. Ngensi Wapongte haicka nango gogoc homacne yengele feicne aigaing. Ilec ailu ngenge mi hangocngebadaic.

*Yesule mibong yegengkedaic*

*Mat 10:32-33; 12:32; 10:19-20*

<sup>8</sup> "Monicti ngic-ngigac yengele haicka nale mime yegengkedaicte, 'Na yele aling.' Aime Ngicte Madecti Wapongte angelofocene yengele haicka yele inguchac yanguc mime yegengkedaicte, 'ye nale ngic.' <sup>9</sup> Nga monic ye ngic-ngigac yengele haicka nale wac bisockedaiete, nani Wapongte angelofocene yengele haicka ngic yele wac inguchac bisockedacte. <sup>10</sup> Ailu monic ye Ngicte Madecte wac milu sulelu yowa midaicte, yele bikic nalic hegiledaicte. Nga monicti Tili Asu misulec aicnodaictewa, yele bikic nalic mi hegiledaicte,

<sup>†</sup> **11:51:** Aling yago yenge Yesule damengka gaibong. <sup>‡</sup> **11:52:** Ki yogo Wapongte yefe-yowa. Yenge yefe-yowa gocne hedickeibong. **12:2:** Luk 8:17 **12:7:** Luk 12:24; Sale 27:34

miyac. <sup>11</sup> Ailu ngic yengi bacngebalu kpakpaduc macka nga gamangte damong nga ngic sugucne gocne, yengele haicka locngebadaaingte. Aime ngenge dameng iwahac, ‘Ameine wenuc bafaliyenoga?’ me ‘Oma yowa minoga?’ milu yogolec ngageboc mi aidabiyeng! <sup>12</sup> I yangucte, Tili Asudi dameng yogowahac yowa midaingte, yogo micnginang lodaicte.”

### *Moneng-mafaholec ngic yengele yowa*

<sup>13</sup> Aime ngic-ngigac habu yengele hewackacni ngic monicti Yesu yanguc micnowec, “Wewedu, haene ye mamacte mole-damoc yeicnac balu gagac. Ilec micnoengka nebocene botoc balu nelena.”

<sup>14</sup> Mime Yesudi bafaliyelu yanguc edowec, “Ngic, ngekele woc-wiyac botoc banogale damong, me ngage-wosaecte ngic monicti mi locnuwec.” <sup>15</sup> Inguc milu taockelu yengele yanguc miwec, “Ngagelu gadaing! Ngenge hane aibaba haicine monic-monic mi ainingte gagangineng damongkedabieng. Moneng-mafatowa yogodi gagangineng mi basanangkedaic!”

<sup>16</sup> Milu nangeng yowa monic yanguc edocebawec, “Ngic monic moneng-mafatowaholecti boleina nosing noine homacne aiwec. <sup>17</sup> Aime nosingngine mac wenuwa lonogale ngage-bibiyelu <sup>18</sup> yanguc ainale ngagewec, ‘Nosingmacne kpisicne gocne domagac, yogo hembalackelu sugucnehab badacte. Balu nosing nga wiycne madicne sasawa kpaduckelu iwahac kpatulecebadacte.’ <sup>19</sup> Kpatulebe motome neicne kwelena yanguc ngagedacte, ‘Hifa homacnelesoc wiyc madicne kpaduckegabac. Ilec gagane baefekkelu bagabac, ailu belic-belicka gadacte.’

<sup>20</sup> “Mime Wapongti yele yanguc miwec, ‘Ga ngic-kapa, deboc yagowahac ga ilugone ewaligube homadamecte. Aime wiycgonge bakpaduc ailu gagic, yogo gocne yengi badaingte.’”

<sup>21</sup> Milu Yesudi hatacmac taockelu yanguc miwec, “Monic ye yeicnele ailu himongte wiyc madicne bakpaduc aidaicte, ye Wapongte haickabac wiyc madicne mikac gagac, yele gaga yogolecsoc aidaicte.”

### *Mimedec mi ainingte yowa*

*Mat 6:25-34*

<sup>22</sup> Ilec ailu Yesudi mic-tengtengfocine yanguc edocebawec, “Na yanguc edocngebab, ngenge noba-nosingte milu gaganginengte mi medecngebadaic, ‘Nonge oma nosing nolu ganoga?’ Me socnginengte ngagelu, ‘Oma ngakpi-kpoluc holelu ganoga?’ <sup>23</sup> Ngagegaing, gagadi nosing ewaligac, ailu socti ngakpi-kpoluc ewaligac. <sup>24</sup> Ngenge aoc-aoc nganicebaning! Yenge holeduwenoc me luwang mi fayelegacte, Wapongti sifu nosing moc yelecaigac. Aime Wapongte haicka ngenge nango yengele feicne aigaing. <sup>25</sup> Aime ngengelacni monicti mimedec ailu game yogodi gaga-damengngine kpisicnemac hatacmac nalic mi bame daliwedaicte, miyac. <sup>26</sup> Ngenge wiyc kpisicne ingucnele aibibiyelu tofaine gocnele inguchac ngageboc mi ailu gadaing!

<sup>27</sup> “Ngenge daling moc siyeckecaigaing nganicebaning! Yenge muc mi yumulu boletowa mi balu sifu sugulecaigaing. Aime ngictau Solomon ye esecne ngakpiine hibine madicne holelu gawec, yele hibi-angoctowadi sifu daling yengele hibi keleng angacine mi ewaliwec, yogo edocngebagabac. <sup>28</sup> Aime daling aliline kpanggewa moc siyeckecaigaing, yogo yakucte sugu fikegaing. Nga saemebac helockelu dacka wickedaingte. Aime Wapongti dalingbenang ingucne ngakpi holeyeledaictewa, ye ngic-ngigac

ngage-ngagesingngineng kpisicnemac fagac, ngenge inguchac ngakpi-kpolucngineng taockelu ngeledaite.

<sup>29</sup> "Ilec ngenge, 'oma nosing nonoga nga misa wenuwacni fila nolu ganogale' micaigaing, ngenge mimedec yogo hegileda! <sup>30</sup> Ngic-ngigac aling Wapong mi ngagegaing, yenge socte wiycasasawadi baningte ngage-ngagengineng iwa lobong fadaite. Aime Mamaenginengti ngenge socte wiycakpungkecaigaing, yogo biyac ngagedaite. <sup>31</sup> Ngenge Wapongte nganidamong bafuwanganole bole sugucne hac badabiyeng. Ngenge inguc aibong yedi socte wiycak yogo hocne ingucne hac taockelu ngeledaite.

### *Wiyac madicne honocmengka balu ganoga*

*Mat 6:19-21*

<sup>32</sup> "Habu-hakic, Mamaengineng ye ngani-damongngine ngelenale ngageme madickecaigacte, ngenge mi hangocngebadaic! <sup>33</sup> Ngenge mafanganeng salebong ngic-ngigac yengi fuli bayackebong moneng yogo balu waweweine gagaing, kwele-madicka wiycak yoleda. Ilec aihu ngene moneng-ebec nalic mi lokenale bafuwadaing. Yogo wiycangineng madicne tapiliine mi wanale honocmengka kpaduckedadaing. Iwa hise ngicti mi weledaingte, nga unedi mi basowaledaingte. <sup>34</sup> Ngenge wiycangineng madicne bakpaduc aicaigaing, iwa kwele-angacngineng ingucne hac fadaite.

### *Ngicte Madec kwesidaite*

*Mat 24:42-44*

<sup>35</sup> "Ngenge kpolucngineng sanangne kwelu hifanganeng kwendangkelu efeckelu gadaing. <sup>36</sup> Ngic sugucne ye baba-tumang mackacni welelu nuwa holedaite. Holeme kwelec kwekwefocene yengi yele wangec gacgu nu biyac laliyedaingte, ngenge efeckelu ingucne hac gadaing. <sup>37</sup> Aime sugucnenginengti welelu kwelec kwekwefocene yenge deboc-gboli gabong bafuwacebadaite, yenge kwele-angackolec. Foinac, ye yengele kwelec kwenale yeuctihac kpolucine bangkacne kwelu 'ngiyeebongka' mime ngiyebong nosing bawelelu yeleme nodaingte, yogo noine edocngebagabac. <sup>38</sup> Ye deboc hewac-hewac me mac sae-saele deboc-gboli gabong welelu nganice-badaite, kwelec kwekwe yogo yenge kwele-angackolec.

<sup>39</sup> "Aime hise-baba ngic ye mac heuckelu fecraigac. Aime mac fileine monic ye hise ngic ma damengka kwesidaite, yogo ngagedaictewa, ye macine damongkelu hise ngic yogo aka holecnodaite. <sup>40</sup> Ilec ngenge inguchac efeckelu gadabiyeng. Ngicte Madecte dameng yogo ngenge mi ngageebongka kwesidaite."

### *Bole-madec madicne ingucne gadabiyeng*

*Mat 24:45-51*

<sup>41</sup> Aime Pitadi miwec, "Sugucne, nangeng yowa migamec, yogo nongele me sasawa yengele micig?"

<sup>42</sup> Inguc mime Sugucnedi yowaine bafaliyelu yanguc edowec, "Mac-damong madicne monicti ngage-ngage-motockolec galu sugucneinele yowa balaibecaigac. Aime sugucneinedi ye kwelec kwekwe ngic agofocene yengele damong aihu nosing damengka botoc balu yelenale micnodaite. <sup>43</sup> Ye bole yogo bayackeme sugucneine kwesilu nganime nalic aidaictewa, sugucneine ye kweleine angackedaite. <sup>44</sup> Foinac, na yanguc edocngebabe, ye sugucneinedi wiycacne sasawa damongkenale micnodaite. Ilec aihu ngenge

silicine yogolecsoc gadabiyeng. <sup>45</sup> Aime bole-ngic, yebac yeuctihac yanguc ngagesidaicte, 'Na sugucnene dameng dalicne gacguhac kwesidaicte.' Inguc milu bole-ngic ye agofocene wecebalu nosing nga misa sanangne nolu kwelesifuc aidaicte. <sup>46</sup> Inguc ailu kwelec kwekwe ngic ye sugucneinele hadeng yogo mi ngageemewa sugucnene kwesidaicte. Kwesi'l u kwelec kwekwe ngic yogo weloc-kwallocelu ngage-ngagesing mikac yengeholec lodaicte.

<sup>47</sup> "Aime kwelec kwekwe monic ye sugucneinele yowa ngagelu mi efeck-elu gadaiete, ye hudu sugucnephac wedaicte. <sup>48</sup> Nga kwelec kwekwe monic ye sugucneinele bole-yowa mi ngagelu hudu hii-hiile aibaba gocne aidaicte, ye hudu efecnemac wedaicte. Ilec monic ye wiycac sugucne lacname balu game fikedaicte, ye micnoma sugucnephac lacnodaicte. Nga wiycac homacne damongkenale bole-yowa lacname damongkedaicte, ye uwacname wiycac sugucnephachbenang lacname damongkedaicte.

### *Kwele-moniyang mi fikedaicte Mat 10:34-36*

<sup>49</sup> "Na himongka dac habune habune fitobe lobenale waiba. Aime dac yogo biyac lobeme kwelene madickedaicte. <sup>50</sup> Aime molickelu doicti somecnudaicte. Ailu yogo ngagebe kwelenedi umaleme gacgu bolene yogo motome kwelene madickedaicte. <sup>51</sup> Na himongka kwele-mogung bafuwanogale waiba, ngenge inguc ngagegaing, me? Yogo miyacbenang, na heucebanogale waiba, yogo edocngebagabac. <sup>52</sup> I yangucte, yakumac nga galu fenoga, iwa mac kwelina ngic-ningac 5 yenge siyeckelu gadaingte. Habackang yengi yaekang yekeholec ngaba aidabiyengte. Nga yaekang yeki habackang yengeholec ngaba-ngainga ainagudaingte. <sup>53</sup> Aime mamacti siyeckelu madeckolec ngaba aidaicte. Nga madecti mamackolec ngaba aidaicte. Ailu nenggac ye aduineholec ngaba aidaicte. Nga adudi nenggacineholec ngaba ainagudabiyepte. Nga yengau ye yengauineholec siyeckelu ngaba ainagudabiyepte."

### *Dameng ngani-wosaecte miwec Mat 16:2-3*

<sup>54</sup> Aime Yesudi inguchac habu sugucne yengele yanguc miwec, "Ngenge wenac hau-hauina kaguwa monic nganilu yanguc biyac micaigaing, 'Mac sugucne kwedaicte.' Inguc mibong mac kwecaigac. <sup>55</sup> Nga gbelong laiwapec weme nganilu yanguc micaigaing, 'Himong dacine aidaicte.' Mibong inguc aicaigac. <sup>56</sup> Kwesac-ningc, ngenge himongka nga sawawa wiycac fikecaigac, yogo nganilu wosaecaigaing. Aime yakumac dameng gagabeleng, ngenge yogo nganilu sifu mi ngage-motocaigaing.

### *Yowa wosaenoga Mat 5:25-26*

<sup>57</sup> "Ngenge omale aibaba weni yogodi dondonne aigac, yogo ngengung mi wosaecaigaing? <sup>58</sup> Ngabagone monicti yowawa locgunale bacgume ngeke momoc yefewa hikelu, ga iwashac ngabagoneholec yowanginac miboc madickenale bole badamec! Inguc mi aidamectewa, ngabagonedi ngage-wosaec ngic yela locgume yedi lebe-ningc yengele molewa locgume mucmacka locgudaingte. <sup>59</sup> Na yanguc edocgugabac, ga muc-macka ngiyecgu ngabagonele tofa sawawa bucbuchac baducnoyackelu wadamecte."

## 13

### *Bikic hegilelu kwele-hefaliyec ainoga*

<sup>1</sup> Dameng iwahac ngic gocne yengi Yesu siduc yanguc edocnoibong, “Galili ngic gocne yengi depecnginengte sic lobelu Wapong hasoc holecnolu gai-bong. Gabong Pailat yedi mime ngicfocene yengi hikelu Galili ngic we-homacebalu sacngineng yogo depecnginengte sic sacineholec kpatulebong atang aiwec.”

<sup>2</sup> Mibong Yesudi yanguc uwayelewec, “Ngic homaibong, yengele bikicti Galili ngic-ngigac sasawa, yengele bikic ewaligac inguc fikeyelegac, ngenge inguc ngagesigaing, me? <sup>3</sup> Yogo miyabbenang! Aime yanguc edocnge-babe, ngengebac kwelengineng mi hefaliyedaingte, ngenge sasawadi yenge homaibong, ingucnehad homayackedaingte. <sup>4</sup> Nga Siloam mac-daledi heli-yelu ngic-ngigac 18 feinginang walu wehomacebawec. Ilec ngenge wenuc ngagegaing, yengele bikite umacti Yerusalem ngic-ngigac sasawa gagaing, yengele ewaligac, me? <sup>5</sup> Yogo miyabbenang! Aime yanguc edocnge-babe, ngenge kwelengineng mi hefaliyedaingtewa, ngenge sasawadi yenge homaibong, ingucnehad homayackedaingte.”

### *Fikyocci noine monic mi aiwec, yoglec nangeng yowa*

<sup>6</sup> Aime Yesudi nangeng yowa monic yanguc edocebawec, “Ngic monic ye fik yoc monic waing bole kwelina duweme domawec. Aime ye hikecgwu noine basackelu <sup>7</sup> waing bolele damongt i miwec, ‘Yoc yoglec noine basackelu gabe hifa habackang biyac aigac. Ailu ye omale moc domalu himong helocene nowackegac? Ilec ga yoc yogo welockelu wickedamec!’

<sup>8</sup> “Mime waing bolele damongti miwec, ‘Sugucnene, hegileng hifa yago inguchac domaemewa fungina heuckelu himong gocne helockolec lodacte. <sup>9</sup> Inguc aibebac lobewa noine madicne aidaicte mecne. Nga noine mi aidaictewabac, ga nalic helockelu wickedamec!’”

### *Sabat damengka Yesudi ngigac lobe-ngosoc bamadickewec*

<sup>10</sup> Aime Sabat dameng monicka Yesu ye kpakpaduc mac monicka felu wewedu bole bawec. <sup>11</sup> Hei, ngigac monic iwahac ngiyewec, ye hucte aleng monicti lobeina bakatackeme ye lobe-ngosoc gacgume hifaine 18 biyac aiwec. Aime lobeine nalic mi bame dondongkedaicte. <sup>12</sup> Aime Yesudi ye nganilu wackeme yela weleme yanguc miwec, “**Ngigac, ngagegic, hugone baickebe miyac aigac.**” <sup>13</sup> Milu moleine feina loemewa ngigac ye lobeine biyac dondongkeme fangke domalu Wapong wacine bafewec.

<sup>14</sup> Aime kpakpaduc macte damong yedibac Yesudi Sabat damengka huc bole bawecte aalic ngagelu ngic-ngigac edocebalu yanguc miwec, “Hadeng 6 fagac, iwa bole banoga. Ilec ngenge dameng iwa kjesibong bamadicngebadaic. Nga Sabat damengkabac miyac.”

<sup>15</sup> Mime Sugucnedi yowaine bafaliyelu yanguc edowec, “**Kwesac-ngic, ngenge sasawa bulumaka nga donggifocngineng misa yelenogale Sabat damengka lukecebacaigaing. Lukecebala macnginangkocni walu bacebalu hikecaigaing, yogo madicne.**” <sup>16</sup> Aime ngigac yago Abrahamte gholiwacni, ye Satangti hifa 18 biyachac hefeme gacgume Sabat damengka lukanogale aigabac, yogo ngagebong mi madickegac, me?”

<sup>17</sup> Aime Yesudi ngabafocine ameine inguc bafaliyeyeleme yenge gameebawec. Aime ngic-ngigac nebocene yengebac pasi feicne sasawa bame nganiibong, yogolec belyiebong.

*Mastet hucinele nangeng yowa miwec*

*Mat 13:31-32; Mrk 4:30-32*

<sup>18</sup> Aime Yesudi miwec, “Na oma wiyacka nangeng yowa mibe ngenge Wapongte ngani-damongte silicine nalic ngage-motodaingte? <sup>19</sup> Yogo mastet hucine ingucne.\* Ngic monicti mastet hucine balu boleina duweme, yogodi sugulelu yoc bangkacne aime sawawa nango yengi kwesilu mangngina yafo holelu ngiyeibong.”

*Yiswa nangeng yowa miwec*

*Mat 13:33*

<sup>20</sup> Inguc milu Yesudi hatacmac yanguc miwec, “Wapongte ngani-damong, yogo oma wiyacka yefe soc holebe ngagening? <sup>21</sup> Yogo yis ingucne, aime ngigac monicti flawa umacine 20 kilo balu yisholec lalickelu bame atang alboc sugulewec.”

*Nu kpisicnele yowa*

*Mat 7:13-14,21-23*

<sup>22</sup> Aime Yesu ye taonka nga mac-alingga lolickelu ngic-ngigac yengela wedewu bole balu Jerusalem hikenogale hikewec. <sup>23</sup> Hikeemewa ngic-ngigac gocne yengi uwacnolu yanguc miibong, “Sugucne, ngic-ngigac efec-nemac yengi sugu wasecne aidaingte, me?”

Mibong Yesudi bafaliyelu yanguc edocebwec, <sup>24</sup> “Ngic-ngigac homacne yenge Wapongte ngani-damongka fenogale aibibiyedaingte, yogo edocngebagabac. Ilec ailu ngenge nu kpisicna fenogale bole sanangne badabiyeng! <sup>25</sup> Aime mac filenedi fangkelu nu holeme ngenge lobina domalu nuwa holelu midaingte, ‘Sugucne, nu laliyenoleengka funang!’

“Mibong bafaliyengelelu yanguc midaicte, ‘Ngenge wenuwacni? Na mi ngagecngébagabac!’

<sup>26</sup> “Inguc mime ngengi midaingte, ‘Nonge gaholec nosing misa noibeng. Ailu gagi nongele yefewa domalu yowa edocnubalu wedunoleing.’

<sup>27</sup> “Mibong, yedi hatacmac edocngebadaicte, ‘Ngenge wenuwacni? Na mi ngagecngébagabac! Ngenge aibaba sowacne aicaigaing. Ilec ngenge nale haicka baickening!’

<sup>28</sup> “Aime Abraham, Aisak nga Yakobo ailu Wapongte siduc-mimi ngic sasawa Wapongte ngani-damongka ngiyebong nganicbadaingte. Dameng iwa ngengebab lobina wicngebabong haudaingte. Ngenge iwa hiyalu mic-ninng hisalangkelu gadaingte. <sup>29</sup> Aime wenac ofe-ofeinacni nga hau-huinacni, nga not ailu sautkacni ngic-ngigac yenge kwesilu Wapongte ngani-damongka ngiyelel noba-nosing nodaingte. <sup>30</sup> Ngagegaing, gocne yakumac lobeine gacaigaing, yengi molic-molic aidaingte. Nga molic-molic gacaigaing, yengibac lobeine aidaingte.”

*Yesudi Yerusalemte kwele-sowac aiwec*

*Mat 23:37-39*

<sup>31</sup> Dameng iwahac Farisaio gocne yengi welelu Yesu yanguc milu edoibong, “Herodedi ga wehomacgunogale migac. Ilec ga himong yago hegilelu hikenong!”

---

\* **13:19:** Mastet hucine yogo kpisicnelebang. **13:25:** Mat 25:10-12 **13:27:** Mige 6:8 **13:28:** Mat 8:11-12 **13:29:** Mige 10:7:3 **13:30:** Mat 19:30

<sup>32</sup> Inguc mibong Yesudi bafaliyelu yanguc edocebawec, “Ngenge hikelu kate-hoda *yogo* yanguc edoning, ‘Ngagegic, yakumac nga saeme aleng yebicebalu huckolec bamadicebadacte. Nga fangkelu bolene motodaicte.’<sup>†</sup>

<sup>33</sup> Aime Wapongte siduc-mimi ngic, yenge himong gocna nalic mi wehomacebadaingte, yenge Yerusalem iwa sugu wehomacebadaingte, inguc fagac. Ilec aili yakumac nga saeme aili fangkelu hikedacte.

<sup>34</sup> “O, Yerusalem, Yerusalem, ga siduc-mimi ngic wehomacebayackeing. Nga ngic gala salecebaicne, yenge posadi holecebaing. Kokolec nenggacinedi adu-madecfocine kwegecine bageina ekongebacaigac, na dameng homacne adu-madecfocgane ingucnehab kpaducebanogale ngageiba. Aime ngengibac yoglec takicngebawec.<sup>‡</sup> <sup>35</sup> Ngagegaing, ngengileng mac fale *yogo* ngic mikac aili mac kisi kwedaicte. Na yanguc edocngebabe ngaging, yanguctihac molickelu ngenge hatacmac mi nganicnudaingte. Aime gafecgu yanguc midaingte,

‘Sugucnele wacka ngic welegac, ye mimi-madicineholec.’ (Mige 118:26)  
Inguc midaingte, dameng iwa ngenge hatacmac nganicnudaingte.”

## 14

### *Sabat damengka Yesudi ngic soc bokungkolec bamadickewec*

<sup>1</sup> Yesu ye Sabat dameng monicka Farisaio yengele micne monicte macka nosing nonale feme Farisaio yenge ye aibabaine ngani-ngagec aili ngiyeibong. <sup>2</sup> Hei, iwashac ngic monic socine bokungkolec aili siwineicne, ye welelu Yesule haicka domawec. <sup>3</sup> Aime Yesudi Wapongte yefe-yowale ngage-ngage ngic nga Farisaio yanguc uwayelewec, “**Sabat damengka ngic bamadicebanogale yefe monic fagac me miyac?**” <sup>4</sup> Mime yenge ameine monic mi bafaliyeibong. Ilec aili Yesudi ngic yogo moledi balu bamadickelu saleme hikeme <sup>5</sup> yanguc edocebawec, “**Ngengelacni monicte madec me bulumaka monic Sabat damengka misa long monicka edetantangkelu haume, ye sifu biyac hikelu fuluckeme ofedaicte.**” <sup>6</sup> Inguc mime yenge yowa yoglec ameine bafaliyenogale aibibiyeibong.

### *Ngic monic ye bawacnagudai*

<sup>7</sup> Aime iwashac ngic gocne wacebame, yenge ngiye-ngiye molic-molicka wosaelu iwa ngiyeibong. Ngiybong Yesudi nganicbalu yowa nan-gengngine yanguc milu edocebawec, <sup>8</sup> “**Hatacmac baba-tumangte nosingka wacgume, ga nosingte mac ngiye-ngiye molic-molicka iwa biyac mi ngiyedamec.** Gacgu wacngebagac, ngengelacni ngic sugucne monic weledaicte. <sup>9</sup> Weleme ngic wacngepagac, yedi welelu yanguc edocgudaicte, ‘Ga baicke-waengka ngic yagodi ngiyena.’ Inguc mime gamegume ngiye-ngiye moto-motoinabenang hike ngiyedamecte. <sup>10</sup> Wacgume ga hikelubac, ngiye-ngiye moto-motoina ngiyedamec. Aime ye wele nganicgulu yanguc midaicte, ‘Agone, ga ngiye-ngiye molic-molicka felu ngiyecl! Inguc mime ngic-ngigac biyac ngiyeagaing, yengele haicka yedi wac feicne geledaicte. <sup>11</sup> I yangucte, monic ye yeicne ngageme feicne aicaigac, ye wacine bawadaicte. Nga monic ye yeicne ngageme wawaine aicaigac, ye wacine bafedaicte.”

<sup>12</sup> Aime Yesu ye ngic wackewec, yele yowa monic inguchac yanguc miwec, “**Ga wenacka me aweleme nosing nonole aling gocne wacebanogale**

<sup>†</sup> **13:32:** Dameng gocna yowa yogo hadeng habackangte miyac. Yogo soc holelu hadeng gocnele miwec. <sup>‡</sup> **13:34:** Adu-madec yogo yenge Yerusalem ngic-ngigac. **14:3:** Luk 6:9    **14:5:** Mat 12:11; Luk 13:15    **14:8:** Ynn 25:6-7    **14:11:** Mat 23:12; Luk 18:14

ngagegic. Dameng iwahac agofocgone, me ngic hae-gba, me alingfocgone me moneng-mafanganengkolec gale emewa gagaing, yenge mi wacebadamec. I yangucte, yenge gacgu ameine hatacmac badugelebong, yogo mi madickedaiete. <sup>13</sup> Ga wacebanogale noba-nosing bamockedamecte, dameng iwa ngic waweweine nga pulingngine ailu hige-sowac nga dongepisic wacebadamec! <sup>14</sup> Yenge ameine nalic mi badugeledaingte. Ilec ailu ga kwele-angacka gadamecte. Aime nosing yogolec ameine, ngic-ngigac dondonne homaibong, yenge gboliyelu fangkedaingte, dameng iwa hocne ameine badamecte.”

*Yesudi nosingte tutumangka hike-hikele nangeng yowa miwec  
Mat 22:1-10*

<sup>15</sup> Inguc mime yenge nosing nongiyelu yowaine ngagelu yengelacni monicti Yesu yanguc edowec, “Monic ye Wapongte ngani-damongka felu nosing nolu ngiyedaiete, ye kwele-angackolec.”

<sup>16</sup> Inguc mime Yesudi ameine bafaliyelu yanguc edowec, “Ngic monicti noba-nosing sugucne bamockenale ngagelu ngic-ngigac homacne yengele yowa lolu wacebawec. <sup>17</sup> Wacebame nosing nonole dameng weleme, ye kw-elec kwekweine saleme yedi ngic-ngigac molic-molic biyachac wacebawec, yenge edocebanale hikelu miwec, ‘Ngenge kwesining, wiycasasawa biyac bamockeicne ngiyegac.’

<sup>18</sup> “Inguc mime ngic-ngigac sasawadi migbedic ailu ngic molic-molic yedi yanguc miwec, ‘Na himong monic fuli babac, yogo hikelu nganinogale ngagegabac. Ilec ailu ngageng mi sowalena.’

<sup>19</sup> “Aime monicti miwec, ‘Na bafalo 10 bolele ailu fuli bacebabac, yogo hikelu bolewa esoicebanogale ngagegabac. Ilec ailu ngageng mi sowalena.’

<sup>20</sup> “Inguc mime monicti miwec, ‘Na ngigac babac. Ilec ailu nalic mi fudacte.’

<sup>21</sup> “Aime kwelec kwekwe ye hikelu yowa yogo sasawa sugucneine edowec. Edome sugucneinedi aalic ngagelu kwelec kwekwe yanguc edowec, ‘Ga taon yefeina nga yefe-gogocka biyac hikenong. Hikelu ngic-ngigac waweweine nga pulingngine ailu donge-pisic nga hige-sowac, yenge mengocebalu kwesinong.’

<sup>22</sup> “Inguc mime kwelec kwekwedi hikelu yowa miwec, ingucnehad ailu hefaliyelu yanguc edowec, ‘Sugucnene, ga migic, yogo biyac aiyackegabac. Aime mac kwelinabac sawaine fagachac.’

<sup>23</sup> “Inguc mime sugucneinedi miwec, ‘Ga yefe sugucna nga macte yefe gogoc fayackegac, iwa hikenong. Hikelu ngic-ngigac nganicebaengka kwesiningte sanangnehac milu mengocebang kwesilu, yengi macne kwe-line yago wakening. <sup>24</sup> Ngic esecne wacebabe hegileibong, yengelacni monicti nosingne lobeicne yogo nalic mi nolu ngagedaiete, yogo edocngebagabac.’”

*Yesu balaibenogale yowa  
Mat 10:37-38*

<sup>25</sup> Yesu hikeme ngic-ngigac habutowadi ye balaibelu hikeibong. Hikeibong hefaliye nganicebalu yanguc miwec, <sup>26</sup> “Monic ye wele balaibecnunogale ngagesigac, ye yeicne nenggac-mamac, nga ngigac adu-madecfocene, ailu ngic hae-gba nga sengfocene, ailu yeicne gagaine inguchac lobe mi holedaictewa, ye nale mic-tengteng nalic mi aidaicte. <sup>27</sup> Ailu monic ye

malicpongine tengkelu na mi balaibecnudaicte, ye nale mic-tengteng nalic mi aidaicte.

<sup>28</sup> "Ngengelacni monicti donge hila-hilale mac-dale monic banogale ngagegac, ye mac nalic bayackedaicte me miyac. Ye waicke ngiyelu mofick-elu woc-wiyac fuline wafelu alingkedaictewa, madickedaicte. <sup>29</sup> Aime ye molickelu inguc mi ailu moc fungine sugu fungkelu badaicte. Aime mac tofaine mi badickedaictewa, ngic-ngigac yenge yogo nganilu tapiliine bawadaingte. <sup>30</sup> Ailu yanguc midaingte, 'Ngic yogo ye mac banogale ailu tapiliine monic mi fawecte, mac bole mi bamoctowec.'

<sup>31</sup> "Me ngictau monicti ngicfocene 10 taosen moc bacebame hikelu ngictau monic ye ngicfocene 20 taosen welebong, yengeholec wenagudaingte, yogo mi madickedaicte. Ye wangiyelu yanguc ngage-wosaec aidaicte, nale ngicfocene 10 taosen, yenge ngabafocne kwsidaingte nalic wecebadaingte me miyac. <sup>32</sup> Yogo nalic mi aidaictewa, yenge dalickahac gaebongka yedi kwelec ngic gocne kwele-moniyang wenuc fikenale salecebame hikedaingte. <sup>33</sup> Ilec ngengelacni monicti yeicne wiyc sasawa mi hegiledaictewa, ye nale mic-tengteng nalic mi aidaicte.

<sup>34</sup> "Kiwc yogo wiyc madicne. Aime yogodi angacine miyac aidaictewa, ngenge wenuc aibong hatacmac angacineholec nalic aidaicte? <sup>35</sup> Kiwc ingucnedi nosing feina lobeng angacine mi aidaicte. Ailu himong helocine nosing-bolewa fadaicte, yogodi kpatuleebengka silicine ingucnehab mi aidaicte. Yogo moc wickecaigaing. Monic ye hedeckolecti yowa yago aneng ngagedaic."

## 15

### Lama sangkeicnele nangeng yowa

Mat 18:12-14

<sup>1</sup> Takes-baba ngic nga bikic-baba sasawa yenge Yesule yowa ngagenogale yele emewa hikeyackebong. <sup>2</sup> Ailu Farisaio nga Wapongte yefe-yowale wewedu ngic yenge yowa kwelu damengsoc yanguc milu gaibong, "Ngic yago ye bikic-baba sebicebalu yengeholec nosing nocaigac."

<sup>3</sup> Inguc mibong Yesudi nangeng yowa monic holelu yanguc edocebwec,

<sup>4</sup> "Ngengelacni monic ye lamafocene 100 bacebalu game, iwacni monic sangkeme ye wenuc aidaicte? Ye lama 99 hegilecebame himong kisiwa misaine mikacka domabong, hikelu lama moniyang yogo basackegacgu bafuwadaicte. <sup>5</sup> Bafuwalu beliyelu aticina lolu atickelu hikedaicte. <sup>6</sup> Hikelu macina sulumewec. Sulumelu ngic agofocene ailu soc tofafocene emeina gagaing, yenge wacebalu yanguc edocebadaicte, 'Na lamane sangkewec, yogo bafuwagabakte, ngenge kwsibong naholec beliyanang.' <sup>7</sup> Aime yanguc edocngebabe, pasi ingucne ngic bikickolec moniyangti sugu kwele-hefaliyec aime, belic-belic silicine ingucnehab honocmengka fikedaicte. Nga ngic-ngigac 99 yenge dondone biyachac galu kwele-hefaliyekte yefe mi ngagelu gagaing, yengele ailu belic-belic ingucne mi fikedaicte.

### Moneng sangkeicnele nangeng yowa

<sup>8</sup> "Me ngigac monic ye siliwa monengngine 10 bagacgume monicinе sangkedaictewa, ye wenuc aidaicte? Ye hifaine kwendangkelu mac pelengkelu sanangnehac basackegacgu bafuwadaicte. <sup>9</sup> Bafuwalu ngigac

agofocine ailu soc tofafocine emeina gagaing, yenge wacebalu yanguc edocebadaicte, 'Na monengne wickebe sangkewec, yogo bafuwagabac. Ilec ailu ngenge kwsibong naholec beliyenang.' <sup>10</sup> Aime yanguc edocngebabe, ngic bikickolec monicti kweleine hefaliyeme, Wapongte angelo yenge yengungti-hac silicine ingucnehad beliyedaingte."

### *Madec sangkeicnele nangeng yowa*

<sup>11</sup> Yesudi yowa taockelu yanguc miwec, "Ngic monic ye madeckecine yaekkang gaiboc. <sup>12</sup> Aime madecine kpisicnedi mamacine yanguc edowec, 'Mamac, ga moneng-mafa gocne heuckelu nale nebocene neleng naneuc balu gadacte.' Inguc mime mamacnginecti woc-wiyacine heuckelu madeckecine yetewec.

<sup>13</sup> "Yeteme dameng mi daliweme madec dicine ye moneng-mafaine kpaduckeyackelu balu himong dalicka hikewec. Hikelu iwa himongte gagawa moneng-mafatowaine balu gawec, yogo wickeyackewec. <sup>14</sup> Wickeyackeme miyac aime himong iwa loloc fikeme ye nosing nga wiyc sasawale kpungkewec. <sup>15</sup> Kpungkelu himong yogolec fileine monic yela hikeme bolemadec bame yedi becine damongkenale bec-odawa saleme lewec.\* <sup>16</sup> Lelu bec yengi nosing socine noibong, yogo nonale aicnowec. Aime monicti nosing monic mi gumelu gaibong.

<sup>17</sup> "Inguc aime ye yeuctihac gagaine ngani-motolu miwec, 'Mamacte bolemadecfocine yenge nosing nogebec aicaigaing. Aime nanibac yawa nosingte homalu homanogale aigabac. <sup>18</sup> Ilec na fangkelu mamacnela hikelu yanguc edodacte, 'Mamac, na honocmenge aling yenge ailu gale haicka momoc bikic bafuwaiba. <sup>19</sup> Ilec hatacmac madecgone wacnudaingte, yogodi mi madickedaicte. Ga sifu bacnun bole-madecfogone yengelacni monic ingucne ailu gadac,' 'inguc ngagelu hikewec.

<sup>20</sup> "Aime madec ye dalickahac leemewa mamacinedi biyac ngani-motolu yele kweleine sowalewec. Sowaleme yela gasacke hike hobalu mimuduc aicnowec. <sup>21</sup> Aicnome madecinedi yanguc miwec, 'Mamac, na honocmenge aling yenge ailu gale haicka momoc bikic bafuwaiba. Ilec madecgone hatacmac wacnudaingte, yogodi mi madickedaicte.'

<sup>22</sup> "Aimebac mamaciti kwelec kwelefocine yanguc biyac edocebwec, 'Ngenge biyacbenang hikelu ngakpi dalicne madicnebenang balu kwesi holecnobong hauna. Ailu gbongte ling holecnolu hige-ebec higeina holecnobong hauna. <sup>23</sup> Ngenge hikelu bulumaka madecine buweicnehad, yogo bawelebong welu nongileng momoc no-angac ainang. <sup>24</sup> Madecne yago ye biyac homawec, inguc ngageibeng. Aimebac ye gagaine hatacmac bafuwagac. Ye sangkeweckaci hatacmac bafuwagabeleng.' Inguc mime yenge noangac aibong.

<sup>25</sup> "Inguc aibong madecine sugucnedi nosing-bolewa gacgu, iwacni kwe-silu mac bangkalewec. Ailu gee holelu webong fawecte ucine ngagelu <sup>26</sup> bole-ngic monic wackeme weleme uwacnowec, 'Yogo omale inguc fikegac?'

<sup>27</sup> "Inguc mime bole-ngicti ameine bafaliyelu yanguc edowec, 'Gbagone wesipilic mikac gacgu macka hatacmac madicne hefaliyegacte ailu, mamaconedi mime bulumaka madecine buweicnehad wegabeleng.'

---

\* **15:15:** Israel aling yenge bec yogo ngagebong wonongkolec aicaigac. Ilec ailu bec mi damongkelu nocaigabiyeng. **15:18:** Mige 51:4    **15:24:** Efs 2:1,5

28 "Inguc mime haeine ye aalic ngagelu macka female mi aicnome lobina domawec. Domame mamacinedi walu macka female dogbac aicnome, 29 haeinedi mamacine yanguc edowec, 'Ngagegic, na hifa edomeng gale kweleac bole bagalu ung-yowagone monic mi hegileiba. Inguc balu gabe agofocne yengeholec noning madecine monic nonogale mi noleing, miyac. 30 Aime madecgone yogo ye woc-wiyacgone yefe-nigigackolec galu wickey-ackelu kwesime, gagibac yele ailu bulumaka madecine buweicne sugucne-hac wegic.'

31 "Inguc mime mamacinedi miwec, 'Madecne, ga damengsoc naholec gacaigic. Nga nale wiyac sasawa yogo gale hocne. 32 Aime nongileng yaku-mac beliyelu no-angac aidabeleng. Gbagone yogo ye biyac homawec, inguc ngageibeng. Aimebac ye hatacmac gagaine bafuwagac. Ye sangkeweckacni hatacmac bafuwagabelengte, inguc ainang.' "

## 16

### *Yesudi ame badu-badule yowa miwec*

1 Yesudi mic-tengtengfocine yowa yanguc edocebwec, "Ngic monic moneng-mafaholec yedi moneng-damong ngic monic bawec. Bame ye yeholec galu yele moneng-mafa damongkelu gawec. Damongkelu game gocne yengi yele yanguc milu edoibong, 'Moneng-damonggone yogo ye moneng-mafagone mi damongkelu kosa locaigac.'

2 "Inguc aime yedi moneng-damongngine wackeme weleme yanguc edowec, 'Ga aibabagone sowacne mibong ngagecaigabac. Ilec moneng-damong hatacmac nalic mi gadamecte. Ga ilec moneng-mafale nga bolegonele siduc sasawa kwelengkelu nelec.'

3 "Inguc mime moneng-damong yeuctihac yanguc ngagewec, 'Ngic sugucnedi moneng-damong bole nalacni baickedaict. Aime na mac bole-babale lokawedacte. Ailu tapiline mi fagacte, milockenoc ngic ainogale gamenugac. Ilec wenuc aidacte? 4 O, yakumac ngagegabac. Bolewacni baicnubong miyac aidacte. Ilec gocne yengi macnnginang wacnuningte aibaba monic aidacte.'

5 "Inguc ngagelu ngic sasawa sugucnele ame balu gaibong, yenge filesoc filesoc wacebewec. Wacebame ngic molic-molic fewec, ye uwacnowec, 'Ga sugucnene yelacni tofa edomeng aiing?'

6 "Inguc mime bafaliyelu yanguc edowec, 'Oliwa helocine dram 100.' \*

"Inguc mime yanguc edowec, 'Ga tofale hibigone biyac balu wangiyelu dram 50 sugu kwelengkec.'

7 "Milu ngic monic uwacnowec, 'Nga ga tofa edomeng aiing?'

"Uwame bafaliyecnolu miwec, 'Wit be 800, yogolecsoc.' †

"Inguc mime edolu miwec, 'Ga tofale hibigone balu 640 sugu kwelengkec.'

8 "Inguc aigacgu moneng-damong sowacne ye ngage-wosaec ailu aiwecte, moneng-mafa fileinedi mitengkewec. Ilec himongte aling yengi angocete aling ewalicebalu umacne hac baficnaguicaigaing.‡

### *Yesudi moneng-mafale yowa miwec*

9 "Na yanguc edocngebababac, moneng-mafa yogo dondonne miyac, ngenge wiyac yogo balu ngic baficebabong agofocngineng fikedaing. Inguc

\* 16:6: Dram monic ye 35 lita ngama ingucne. † 16:7: Be yogo ye kofi be ingucne. ‡ 16:8: Himongte aling yenge Wapongte yefe mi balaibecaigaing. Nga angocete aling yenge Wapongte ngani-damongka gacaigaing.

aibong moneng-mafale dameng miyac aidaicte, iwa fafa-sanang macka bacngedabadaingte.

<sup>10</sup> “Monic ye wiyc kpisicnemac madicne damongkecaigac, ye wiyc sugucne inguchac nalic damongkelu gadaicte. Nga monic ye kwesac ailiu wiyc kpisicnemac dondonne mi damongkecaigac, ye kwesac ailiu wiyc sugucne inguchac dondonne nalic mi damongkedaicte. <sup>11</sup> Aime ngenge yowa mi balaibelu himongte moneng-mafa sowale-sowaleine dondonne mi damongkedaingtewa, monicti wiyc noine dondonne damongkeningte molenginang nalic mi lodaicte. <sup>12</sup> Ailiu ngenge yowa mi balaibelu ngic monicte moneng-mafa madicne mi damongkedaingtewa, ye ngenge wiyc mimoctolu ngelenale ngage-lilickedaicte.

<sup>13</sup> “Kwelec kwelemoniyangti ngic sugucne yaeckang yekele kwelec nalic mi kwelu gadaicte, miyac. Ye monicte angac ngagelu monic lobe holecnodaicte, me monicta wetackelu monic hegiledaicte. Ngenge Wapong nga moneng-mafa yekele momochac nalic mi kwedaingte.”

#### *Yesudi Farisaio ngic yengele miwec*

<sup>14</sup> Yesudi yowa yogo mime Farisaio yenge hiye-monengte angac sugucne fayelewecte ailiu, yogo ngagelu midelec aicnoibong. <sup>15</sup> Aibong Yesudi yanguc edocebawec, “Ngic yengi dondonne wacngebaninge, ngenge yogo yengele haicka aibaba dondonne aicaigaing. Aime Wapontibac wiyc kweleng-inang fagac, yogo ngageyackegac. I yangucte, ngic yenge wiyc monicte ngagebong feicne aicaigac, yogo Waponti nganime aibaba sowacnebenang memenguine aigac.

<sup>16</sup> “Wapongte yefe-yowa Mosesdi kwelengkewec, ailiu Wapongte siduc-mimi ngic yengele yowadi mibong yegengkeme ofecgu Yoane fikewec, dameng iwa motogac. Aime iwacni ofecgu ngic-nigic yenge Wapongte ngani-damong mibong yegengkegac. Mibong yegengkeme ngic-nigic yenge sanangkelu iwa fegaing. <sup>17</sup> Himong nga sawa baickeboc miyac aidaicte, yogo doicinoholec. Nga Wapongte yefe-yowa yogowacni sisine tofaine nalic mi miyac aidaicte, miyacbenang. <sup>18</sup> Ngic monic ye ngigacine hegilelu ngigac monic badaicte, ye selo-boic aibaba aidaicte. Nga monic ye ngigac hegileicne bidaicte, ye inguchac selo-boic aibaba aidaicte.”

#### *Lasaros nga mafa-ngic yekele nangeng yowa*

<sup>19</sup> Aime Yesudi hatacmac yanguc miwec, “Moneng-mafaholec ngic monic gawec, ye gic-ngakpiine kpoluc madicnedi baicne. Ailiu ngakpiine feina hibine mondo-sasac, madicne holewec. Holelu hadengsoc nobanosingtowaholec nogebec ailiu angac feina gawec. <sup>20</sup> Aime yele mac-yefewa, oda lobina ngic monic waweweine gawec, wacine Lasaros. Ye socine waicti wakeyackeicne, aime ngic yengi iwashac lobong falu gawec. <sup>21</sup> Fame ngic moneng-mafaholec yele tebowacni nosing kapucine walu gawec, ye yogo nonogale ailiu gawec. Aime hoda yengi kwesilu waicne nobolickelu galborg.

<sup>22</sup> “Gacgu ngic waweweine ye homame angelo yengi ye bahikelu Abrahamte emewa lobong gawec. Game ngic moneng-mafaholec ye inguchac homame longkeibong. <sup>23</sup> Longkebong ye Wangec-macka galu iwa doic sugucne ngagewec. Inguc ngagecgu donge hilalu nganime Abraham dallickabenang ngiyewec. Ailiu Lasaros nganime yele emewa ngiyewec. <sup>24</sup> Inguc nganilu wackelu micnowec, ‘Abraham ngambone, na yawa dac kwelina

doic sugucne ngagegabac. Ilec ailu ga nale kwelegone sowaleme, Lasaros saleengka hikelu mole-gbongngine susucinedi misawa kpomulucke welelu beluna lome mogungkena.'

<sup>25</sup> "Inguc mime Abrahamtibac yanguc miwec, 'Ngambone, ga wiyc monic ngagesigamec. Ga himongka gaengka ngic-ngigac yengi woc-wiyac madicne madicne gelebong balu gaengka, Lasarosbac wiyc sowacne sugu lacnoibong. Yakumac Lasaros yagowa basanangkegaing. Aime gabac doic ngagegic. <sup>26</sup> Ailu hatacmac taockelu migabac, hewacnonggang lumotowa loicne fagac. Inguc aime monicti yawacni falockelu gala fudacite, me iwacni yawa wele-wele, yogo aibibiyenoga.'

<sup>27</sup> "Inguc mime moneng-mafaholecti yanguc milu edowec, 'Mamac, inguc aime ga Lasaros mimiloc saleengka mamacte macka hikena. <sup>28</sup> Na ngic hae-gbafoce 5 iwhac gagaing, yenge doic yagowahac weledaingkale, ye hikelu sawang-yowa milu edocebadaic.'

<sup>29</sup> "Inguc mime Abrahamtibac yanguc miwec, 'Yenge Moses nga Wapongte siduc-mimi ngic yengele yowa ngagegacu ngagesingkedaing.'

<sup>30</sup> "Inguc mime moneng-mafaholec gawecti miwec, 'Abraham ngambone, yogo miyac. Monicti homackacni gboliyelu hike edocebamebac kwele-hefaliyec aidaingte.'

<sup>31</sup> "Inguc mime Abrahamtibac yanguc miwec, 'Yenge Moses nga Wapongte siduc-mimi ngic yengele yowa ngagelu takicebadactewa, monicti homack-acni gboliyelu mime yenge yogo inguchac nalic mi balaibedaingte.'"

## 17

### Bikicte yowa

Mat 18:6-7,21-22; Mrk 9:42

<sup>1</sup> Aime Yesudi mic-tengtengfocine yengele yanguc miwec, "Ngic-nigic okac ingucne kwopocebame **bikicka wawecaigaing**, yogodi himongka fikedaiete. Nga monicti ngic-nigic agofocine lokwesac ingucne aiyeledaiete, mee, ye medeckedaic. <sup>2</sup> Entacka gocne yengi ngic monic balu balinga sugucne ubeina ubeecnolu kiwecka wickebong haudaictewa, yele umacine efeckedaicte. Aime ngic yogodi adu-madec kpisicne monic aicname bikic bafuwadaictewa, Waponti ye ameine baducnodaicte, yogo umactowaineholec. <sup>3</sup> Ngenge ngengileng damongnagulu gadabiyeng. Ngic hae-gbagone monicti bikic bafuwadaickale, ga ngelengkelu micnodamec. Nga ye kweleine hefaliyeme, bikicine hegiledamec. <sup>4</sup> Aime ye hadeng moniyangte kwelina alecine 7 ngama ga basowalecgudaicte. Ailu dameng 7 inguchac gala hatacmac hefaliye welelu yanguc midaicte, 'Bikic yogo aibacte kwelene hefaliyegac.' Inguc midaictewa, bikicine hegiledamec."

### Ngage-ngagesingte yowa

<sup>5</sup> Aime Salecebaicne yenge Sugucnele miibong, "Ga ngage-ngagesingnonggang basugulenolec."

<sup>6</sup> Inguc mibong Sugucnedi bafaliyelu yanguc edocebawec, "Ngage-ngagesingngineng kpisicne mastet hucine ingucne fangeledecka midec, ngenge yoc monic noineholec<sup>\*</sup> yogo ye yeuctihac godocine fuluckelu kiwecka haulu domanale edodaingte. Aime ye yowangineng ngagelu nalic haulu domadaicte.

<sup>7</sup> “Aime ngengelacni monicti kwelec kwekweine bame bolewa himong heuckelu gadaicte, me lama-bulumaka damongkedaicte, yedi bolewacni kwesilu macka ofedaicte. Ofeme sugucneinedi wangiyeli nosing nonale mi midaicte. <sup>8</sup> Yebac yanguc sugu edodaicte, ‘Ga ngakpigone holelu nosingne bamockelu damongnulu wangec domac. Wangec domaengka na nobe motome ga nosing misa nalic nodamecte.’ <sup>9</sup> Sugucneinedi kwelec kwekwe bole-yowa inguc lacname, ye yowaine ngagelu bole bayackedaicte, yogolec kwele-madic yowa mi edodaicte. <sup>10</sup> Ngenge inguchac wiyc ainingte edocngebaicne, yogo bamoctoyackelu yanguc midaing, ‘Nonge kwelec kwekwe sugu ailu bolenonggeng moc bagabeleng.’”

*Ngic waic-sanangkolec 10 yenge madickeibong*

<sup>11</sup> Yesu inguc milu Yerusalem hikenogale yefe balaibelu Samaria nga Galili hewacnginac hikewec. <sup>12</sup> Hikelu mac-aling monicka felu ngic 10 waic-sanangginengkolec yefewa wabong bafuwacebawec. Aime yenge dadal-isuc edi domalu <sup>13</sup> wackelu miibong, “Yesu, Sugucne, ga nongele kwelegone sowalena.”

<sup>14</sup> Inguc mibong Yesudi nganicebalu yanguc edocebawec, “**Ngenge hikelu depec-baba ngic fikeyelelu socngineng edalicebaning.**” Mime yenge yefewa hikeebongka socngineng madickebawec.

<sup>15</sup> Aime madickeibong, yengelacni monicti socine madickeeme nganilu hefaliye wele dacineholec aukwelu Wapong wacine bafewec. <sup>16</sup> Bafelu Yesule higewa haic-mesuinedi heluluckelu wawe falu yele kwele-madic yowa miwec. Nga ngic yogo ye Samaria ngic.

<sup>17</sup> Ye inguc aime Yesudi yanguc uwacnowec, “**Na ngagebe ngic 10 yenge madickegaing.** Aime ngic 9 yenge weni? <sup>18</sup> Ngic yago ye aling monickacni, yengele hewackacni yedi sugu Wapongte wac bafenale hefaliye kwesigac. Nga gocne yenge nalic inguchac aibong madickedec.” <sup>19</sup> Milu Yesudi yele yanguc miwec, “**Ga fangkelu hikenong, ngage-ngagesinggonedi bamadicgugac.**”

*Farisaio yenge Wapongte ngani-damongte Yesu uwacnoibong*

*Mat 24:23-28,37-41*

<sup>20</sup> Farisaio gocne yengi Wapongte ngani-damong ma damengka kwsidaicte, yogolec Yesu uwacnobong bafaliyelu yanguc edocebawec, “**Wapongte ngani-damong kwsime ngenge yogo dongedi nalic mi nganidaingte.** <sup>21</sup> Ailu yanguc nalic mi midaingte, ‘Ngenge nganining, ye ya, me ngenge nganining, ye edi.’ Ngagegaing, Wapongte ngani-damong yogo hewacnginang fagac.”

<sup>22</sup> Inguc milu mic-tengtengfocene yengele yanguc miwec, “**Gacgu dameng monic kwsime ngenge Ngicte Madecte hadeng moniyang sugu nganiningte aingeledaicte.** Ailu nalic mi nganidaingte. <sup>23</sup> Aime ngic-ngigac yengi yengele yanguc midaingte, ‘Ngenge nganining, ye edi,’ me ‘Ngenge nganining, ye ya.’ Inguc mibong mi balaibecebadaiing. Ailu iwa biyac mi hikedaiing. <sup>24</sup> I yangucte, sawawa pilatac bame angocti nebockacni nebocka hikecaigac, Ngicte Madecte kwsesi-kwesi damengka silicine ingucnehac fikelu yegengkedaicte. <sup>25</sup> Molickelubac ngic-ngigac aling yanguctihac gagaing, yengi ye lobe holecnobong, doic homacne ngagedaicte.

<sup>26</sup> “**Noale damengka aibaba fikewec, Ngicte Madecte kwsesi-kwesi damengka aibaba silicine ingucnehac fikedaicte.** <sup>27</sup> Ngic-ngigac yenge

nosing misa noibong. Ailu ngic yenge ngigac bacebaibong. Nga mamac yenge yanguc miibong, 'Na adune ngic lacnodacte.' Inguc ailu gaebongka, Noa wagewa feme misa suggulewiyac sasawa somekeyackeme sowalelu miyac aiyackewec.<sup>28</sup> AimeLotile damengka aibaba ingucnehab fikewec. Ngic-ngigac yenge nosing misa nolu woc-wiyac fuli balu salelu bole holeduwec ailu mac balu gaibong.<sup>29</sup> Aime hadeng monicka inguc ailu gaebong Loti ye Sodom taon hegilewec. Hegileme hadeng iwashac Wapongti ngageme honocmengkacni dac nga salfa-posa yenge mac ingucnedi walu wiyac sasawa lobeyackeme miyac aiyackewec.<sup>†</sup> <sup>30</sup> Aime Ngicte Madec fikelu yegegkenale damengngina aibaba ingucnehab aidaingte.

<sup>31</sup> "Dameng iwa monic ye mac feina ngiyedaictewa, ye haulu woc-wiyacine banogale mac kwelina mi fedaic. Ye hangoc hikedaic. Nga monic ye nosing-bolewa domadaictewa, ye wiyc monic banogale macka mi hefaliyelu hikedaic. Ye momoc hangoc hikedaic.<sup>32</sup> Loti ngigacinela aibaba fikewec, ngenge yogo ngagesidaing.<sup>33</sup> Monic ye gagaine sebilenale bole balu gadaicte, ye gagaine yogo sangkecnodaicte. Nga monic ye gagaine hegiledaicte, ye gagaine fikecnodaicte.<sup>34</sup> Aime yanguc edocngebabe, deboc yogowahac ngic-ngigac yaeckang yeke mapic moniyang feina faebocka, yekelacni monic balu monicbac hegileme fadaicte.<sup>35</sup> Nga ngigac yaeckang yeke momochac flawa masingka lalickelu gaebocka, yekelacni monic balu monic hegileme domadaicte.<sup>36</sup> [Nga ngic yaeckang yeke nosing-bolewa hikeboc, yekelacni monic balu monicbac hegileme bolewa gadaicte.]"<sup>‡</sup>

<sup>37</sup> Inguc mime mic-tengtengfocine yengi yanguc uwacnoibong, "Sugucne, aibaba yogo wenuwa fikedaicte?"

Uwacnobong Yesudi bafaliyelu yanguc edocebawec, "Aoc-aoc nango yenge sic kpeleckiecin fagaing, yenge iwa tumanecaigaing."<sup>§</sup>

## 18

### *Ngigac monic ngage-wosaec ngicti bafickenogale miwec*

<sup>1</sup> Mic-tengteng yenge damengsoc tatakic mikac mimiloc bole balu ganingte Yesudi nangeng yowa monic yanguc holelu edocebawec,<sup>2</sup> "Yowa ngage-wosaec ngic monic ye taon monicka gawec. Ye Wapongte hangoc mi ailu gawec. Nga ngic-ngigac yengele alang-baba monic mi ailu gawec."<sup>3</sup> Aime taon yogowahac ngigac-hosec monic gawec, ye damengsoc yela kwesilu yanguc milu gawec, 'Ngabafocne yengi basowalecnunogale ailu gagaingte, nala yowa dondonne milu baficnudamec.'

<sup>4</sup> "Ngigac ye inguc milu game ngage-wosaecti bafickenale yowaine mi ngageluf gawec. Aimebac lobeina ngigac yele takickeme ngage-wosaec ngic yeuctihac yanguc ngagewec, 'Na Wapongte hangoc mi ailu gagabac. Nga ngic yengele alang-baba monic mi ngagegabac.'<sup>5</sup> Aime ngigac-hosec yago ye damengsoc nala kwesilu hataenelelu gagac. Ilec ailu yowaine bamadickebe. Inguc mi aidactewa, ye damengsoc kwesime takicnu-benangkedaicte."

**17:28:** Fike 18:20; 19:25      <sup>†</sup> **17:29:** Salfa-posa yogo posa monic dagec-dagec. Dacka lobeme dacie ucineholec aicaigac.      **17:31:** Mat 24:17-18      **17:32:** Fike 19:26      **17:33:** Luk 9:24

<sup>‡</sup> **17:36:** Hibi esecne Lukadi kwelengkewec, yogo nganilu iwacni kwelengkebong kwelengkebong ofewec, yengelacni gocne hewacine 36 yogowa mi fagac. Ngic-ngigac yenge hibi kwelengkeicne yogo wosaelu nganibong Lukadi mi kwelengkewec mecnne.      <sup>§</sup> **17:37:** Nangeng yowa yogolec fungine yanguc, wiyc mi sangkedaicte, yogo fikelu yegegkedaicte.      **18:1:** Kol 4:2; 1Tim 5:17

<sup>6</sup> Aime Sugucnedi yanguc miwec, “Ngenge yowa ngage-wosaec ngic yedi aibaba dondonne mi balaibewec, yedi yowa miwec, yogo ngagesidaing.<sup>7</sup> Wapongti ngic-ngigacfocine bawosaecngebawec, ngengele ailu ngage-yaec mi aigac. Ngenge deboc hadeng ye baficngebanaile hinginengti yela hikeme ye ngengele ailu aibaba dondonna hocne baficngebadaicte. <sup>8</sup> Ailu yanguc edocngebab, dameng mi daliweme aibaba dondonne fikengelenale bole biyac badaicte. Aime Ngicte Madecti kwesidaicte, iwa ngic-ngigac ye ngagessingkegaing, ngic-ngigac yogo bafuwacebadacte, yenge homacne gagaing me miyac.”

### *Takes-baba nga Farisaio yekele siduc*

<sup>9</sup> Ngic gocne yenge yengileng dondonne ngagepangnagulu gocne lobe holeyelelu gagaing. Aime Yesudi yengele ngagelu nangeng yowa monic holelu yanguc miwec, <sup>10</sup> “Ngic yaeckang, Farisaio monic nga takes-baba monic, yeke Wapong milockenogale Ibu-macka feiboc. <sup>11</sup> Felu Farisaiodi domalu yeicnele kweleina ngagelu yanguc milu milockewec, ‘Wapong, na ngic gocne, hise ngic nga aibaba sowacne me selo-boic aicaigaing, yenge ingucne miyac. Ailu takes-baba ngic edi, na ye ingucne miyac. Illec kwele-madic edocgugabac. <sup>12</sup> Ailu Sondasoc hadeng yaeckang nosing-sawe gacaigabac. Ailu wiyac sasawa balu gagabac, yogo 10kacni botoc balu moniyang gelecaigabac.’

<sup>13</sup> “Aime takes-baba ngic yedi Farisaio nebocina dadalicne edi domawec. Domalu honocmengka hilame fenale aibibiyelubac, ngosockelu mondacina welu yanguc sugu milu milockewec,\* ‘Wapong, na bikic-baba, ga nale kwelegone sowalena.’

<sup>14</sup> “Aime yanguc edocngebab, takes-baba ngic yedi aibabaine inguc ailu miwete Wapongte haicka ye ngic dondonne ailu macina hikewec. Nga Farisaio yebac miyac. Monic ye yeicnele ngageme feicne aicaigac, ye wacine bawadacite. Nga monic ye yeicnele ngageme wawaine aicaigac, ye wacine bafedaicte.”

### *Yesudi adu-madec yengele miwec*

*Mat 19:13-15; Mrk 10:13-16*

<sup>15</sup> Ngic-ngigac gocne yenge Yesudi sabacfocngineng moledi oiyacebanale yela bacebalu kwesibong. Kwesibong mic-tengtengfocine yengi nganicebalubac ngelengkelu edocebaibong. <sup>16</sup> Edocebabong Yesudibac adu-madec wacebame welebong mic-tengtengfocine yanguc edocebaewec, “Adu-madec kpisicne yenge nala nalic kwesining, ngenge aka mi holeyeling. Wapongte ngani-damong yogo adu-madec kpisicne yangucne yengele. <sup>17</sup> Foinac, adu-madec kpisicne yenge Wapongte ngani-damong hefolecaigaing. Aime monic ye yenge ingucne mi aidaictewa, ye iwa nalic mi fedaicte, yogo noine edocngebagabac.”

### *Ngic mafaholecti Yesuholec yowa miwec*

*Mat 19:16-30; Mrk 10:17-31*

<sup>18</sup> Ngic micne monicti Yesu uwacnowec, “Wewedu madicne, na wenuc aibe Wapongti baficnume gaga-sanang badacte?”

<sup>19</sup> Inguc mime Yesudi bafaliyelu yanguc edowec, “Ga omale madicne wacnugic? Wapong moniyangti sugu madicne gagac. <sup>20</sup> Ga ung-yowa yago biyac ngageing,

**18:12:** Yes 58:2-3; Mat 23:23

\* **18:13:** Ngic ye kwele-sowac ailu mondacina wewec.

**18:13:**

'Ga selo-boic aibaba mi aidamec.  
Ngic-ngigac mi wehomacebadamec.  
Hise mi badamec.  
Micka lolo mi aidamec.

**Ailu nenggac-mamackecgone yeke alang bayetedamec.' "** (Wah 20:12-16;  
Yef5:16-20)

<sup>21</sup> Inguc mime ngic yedi bafaliyelu yanguc miwec, "Ga migic, na yogo  
sasawa soc-gboliha galu balaibelu aibabdi aicaigabachac."

<sup>22</sup> Inguc mime Yesudi yogo ngagelu yanguc edowec, "Ga wiyc moniyangte  
sugu aibibiyegic. Ga hikelu woc-wiyacgone sasawa fagac, yogo salelu  
moneng balu ngic-ngigac waweweine gagaing, yogo yeledamec. Inguc  
aiyengka wiyc madicne honocmengka fikegeledaict. Aime welelu na  
balaibecnudamec."

<sup>23</sup> Inguc mime ngic ye moneng nga woc-wiyacine bocyac facnowecte,  
yowa yogo ngagelu kweleine umale-benangkeme hikewec.

<sup>24</sup> Yesudi ngic ye nganime kwele-umac bame yanguc miwec, "Ngic-ngigac  
moneng nga woc-wiyacnginengkolec yenge Wapongte ngani-damong  
kwelina fenogale aidaingte, yogo boleine sugucnehat. <sup>25</sup> I yangucte,  
Kameldi bungic yefina fedaict, yogo boleine sugucne. Nga moneng  
nga woc-wiyackolec yedi Wapongte ngani-damongka fenogale aidaict,  
yogodibac boletowaine sugucnehat."

<sup>26</sup> Inguc mime ngic-ngigac yenge yowa yogo ngagelu uwacnoibong, "Inguc  
aime madi nalic wasecne aidaicte?"

<sup>27</sup> Inguc mibong Yesudi yanguc miwec, "Ngic-ngigac yengileng aibabangi-  
nenge ailu yogowa aibibiyelu hegilecaigaing, yogo Wapongtibac nalic  
aidaicte."

<sup>28</sup> Inguc mime Pitadi yanguc miwec, "Ngagegic, nonge woc-  
wiycnonggeng sasawa hegilelu ga balaibecgulu gagabeleng."

<sup>29-30</sup> Inguc mime Yesudi yanguc miwec, "Foinac, monic ye Wapongte  
ngani-damongte ailu macine me ngigacine me adu-madecfocene nga  
ngic hae-gbafocene ailu nenggac-mamac hegilecebalu gagac, yela yanguc  
fikedaict. Ye molic-molic mac, nga ngic hae-gbafocene yengeholec gawec,  
yogo ewalilu dameng yagowa hatacmac homacnehat badaict. Aime  
motome himong silicne monicti kwesidaict, iwa Sugucnedi gaga-sanang  
ingucnehat lacnodaict, yogo noine edocngebagabac."

*Yesu yeicne homalu fangkenale miwec  
Mat 20:17-19; Mrk 10:32-34*

<sup>31</sup> Aime Yesudi mic-tengtengfocene 12 yenge sugu mengocea lelu yan-  
guc edocebawec, "Ngagegaing, nongileng Yerusalem hikegabeleng. Hikelu  
fenoga iwa Wapongte siduc-mimi ngic yengi molickelu Ngicte Madecte  
yowa, hibinginang kwelengkeibong, yoglec noine fikedaict. <sup>32</sup> Aime ngic  
yengi ye balu Israel yengele alingkacni miyac, yengele molewa lobong  
yengi yowa kwekwe nga mife-miwa aicnolu sofockedaaingte. <sup>33</sup> Ailu yengi  
muc-hududi welu wehomadaingte. Aime hadeng habackang aiyemewa,  
hatacmac gboliyelu fangkedaict."

<sup>34</sup> Inguc mime mic-tengteng yenge yowa yogo ngagelu monic mi ngage-  
motoibong. Yowa yoglec fungine yogo yengela sangke-sangke fame Yesudi  
yowa miwec, yogo monic mi ngage-motoibong.

*Yesudi donge-kpisic ngic monic bamadickewec  
Mat 20:29-34; Mrk 10:46-52*

<sup>35</sup> Yesu Yeriko taon bangkaleme, ngic donge-pisic monicti yefe mecina ngiyelu woc-wiyakte milocebalu gawec. <sup>36</sup> Ailu ngageme ngic-ngigac habutuwadi ewalilu lec-welec aibong uwawec, “Yogo wenuc aigaing?”

<sup>37</sup> Uwame yanguc edoibong, “Yesu Nasaret-hocni, yedi welelu hikegac.”

<sup>38</sup> Inguc mibong yedi aukwelu wackelu yanguc miwec, “Yesu, Dawidile fikesaweckacni, ga nale kwelegone sowalena.”

<sup>39</sup> Inguc wackeme ngic-ngigac haicina hikebong, yengi ye waickelu ngiyenele kpatalacnoibong. Aime ye sanangnehac hatacmac wackewec, “Dawidile fikesaweckacni, ga nale kwelegone sowalena.”

<sup>40</sup> Wackeme Yesudi domalu donge-pisic yela baleningteedocebame yenge emeina balebong Yesudi yanguc uwacnowec, <sup>41</sup> **“Na oma wiyc aigelebele ngagegeic?”**

Mime bafaliyelu yanguc edowec, “Sugcne, dongene hilanogale ngagebabac.”

<sup>42</sup> Inguc mime Yesudi yanguc edowec, **“Ngage-ngagesinggonedi bamadicgugacte, ga yakumac dongegone hilanong.”** <sup>43</sup> Inguc mime ngic ye yogowahac doneine hilalu Yesu balaibelu Wapong wacine bafeme, ngic-ngigac sasawa yenge yogo nganilu Wapong mitengkeibong.

## 19

*Sakiasdi Yesu nganinogale aiwec*

<sup>1</sup> Yesu Yeriko falockelu leemewa <sup>2</sup> takes-baba ngic yengele micne monic moneng-mafatowaineholec, wacine Sakias, ye iwahac gawec. <sup>3</sup> Yedi Yesu ye ngic weningucne milu nganinogale ngagewec. Ailu ye ngic bangkacnele ailu, ngic-ngigac homacne yengele hewacka domalu Yesu nalic mi nganiwec.

<sup>4</sup> Inguc aime Yesudi yefe lenogale lewec, ye ngic-ngigac yengele hewackacni iwa molickelu gasacke lelu fik yoc monic domawec, yogowa felu doneg hilalu ngiyewec.

<sup>5</sup> Ngiyeme Yesu ye yogowa lelu doneine hilame feme yanguc edowec, **“Sakias, na yakumac macgona fulu ngiyenogale ngagegabac. Ga biyac wanong.”** <sup>6</sup> Inguc mime Sakiasdi yockacni biyac walu Yesu belic-belicka habalu mengockeme macina hikeiboc.

<sup>7</sup> Hikeboc ngic-ngigac sasawa yenge yogo nganilu ngagebong nalic mi aime yanguc miibong, “Yesu ye bikic-baba ngic yele macka omale hikegac?”

<sup>8</sup> Inguc mibong Sakiasdi iwahac domalu Sugcnele miwec, “Sugcne, ngagenong. Mafane balu gagabac, yogowacni nebocene ngic-ngigac waweweine yeledacte. Nga gocne kwesac aiyelelu wiyc baiba, yengele ameine 4 hatacmac balu yeledacte.”

<sup>9</sup> Inguc mime Yesudi yanguc miwec, **“Wapongti yakumac mac kweline yagolec filefocine bikicte ameine bacebame wasecne aigaing. Ngic yago ye inguchac Abrahamte fikesaweckacni.** <sup>10</sup> I yangucte, Ngicte Madec ye ngic-ngigac sangkeicne basacebalu kpaducebanale ailu, bikicte ameine bame wasecne ainingte wawec.”

*Kwelec kwekwe ngic 10 moneng baibong, yagolec nangengyowa  
Mat 25:14-30*

<sup>11</sup> Ye inguc milu hike Yerusalem taon bangkaleme, yenge yanguc ngageibong, "Waponzte ngani-damong yogo dongenonggang biyac yegengkedaicte."

Inguc ngageibongte ailu Yesudi yowa nangengngine monic holelu taock-elu yanguc edocebawec, <sup>12</sup> "Ngic monicti ngic sugucnele alingkacni fikelu, yedi yanguc ngagewec, 'Na himong dalicka hikebe, yengi ngictau wac nelebong hefaliyelu himong yagolec ngictau aidacte.' <sup>13</sup> Aime ye hikenogale milu kwelec kwekwefocine 10 wacebawec. Wacebalu moneng 10 wacine mina botoc balu filesoc filesoc yelelu miwec, 'Na hikeebewa ngenge moneng yagodi lanagulu moneng bole babong kwesilu noine nganidac.'\*

<sup>14</sup> "Aime ngic yele mac moniyangfocine, yengibac ye kweledi wickeibong. Inguc ailu ngic gocne yanguc milu edocebalu salecebabong hikeibong, 'Yedi nongele ngictau ganale angac mi ngagegabeleng.'

<sup>15</sup> "Aime ye iwa game yengi ngictau wac lacnobong gacgu hatacmac hefaliyelu himongngina kwesiwec. Kwesilu kwelec kwekwefocine moneng yelewec, yogo noine wenuc basuguleibong, yogo ngagenale wacebawec.

<sup>16</sup> "Wacebame kwelec kwekwe molic-molic yedi welelu miwec, 'Sugucne, na moneng neleing, yogo basugulelu moneng 10 hatacmac bafuwaiba.'

<sup>17</sup> "Inguc mime ngictaudi yanguc miwec, 'Ga kwelec kwekwe madicne ailu bole madicne baing. Ga yowa miiba, yogo balaibelu wiyc kUSICne madicne damongkeingte ailu, taon 10 damongebakte bole-yowa tapiliineholec gelebabac.'

<sup>18</sup> "Aime yogolec lobeina kwelec kwekwe monic yedi welelu miwec, 'Sugucne, moneng neleing, yogowacni moneng 5lesoc hatacmac basuguleiba.'

<sup>19</sup> "Inguc mime ngictaudi miwec, 'Ga taon 5 yogolec damong locgugabac.'

<sup>20</sup> "Aime kwelec kwekwe monicti welelu yanguc miwec, 'Sugucne, monenggone yogo kpoluc kwelina sangkebe ngiyewec, yago nganic. <sup>21</sup> Ga ngic dacine ailu gocne yengi kpakpaduc bolele moneng lobong sifu yengelacni bacaigic. Nga gocne bolewa hole-duwec aibong sifu yengelacni noine kpaduckecaigic. Ilec ailu gale hangocnume inguc aiiba.'

<sup>22</sup> "Inguc mime ngictaudi miwec, 'Ga kwelec kwekwe sowacnebenang, yowagone bafaliyebi yagodi hicgudaicte. Na ngic dacine ailu kpakpaduc bolele moneng mi lolu sifu bacaigabac. Nga bolewa hole-duwec mi ailu sifu noine kpaduckecaigabac, yogo biyac ngagegic. <sup>23</sup> Aime ga omale monengne yago moneng bengka mi loing? Inguc aidengkabac na hefaliyelu monengne yogo neboceneholec badaba.'

<sup>24</sup> "Inguc milu ngic-ngigac gocne iwahac domaibong, yengele yanguc miwec, 'Ngenge yelacni moneng ewalilu kwelec kwekwe monengngine 10 facnogac, ye lacnoning.'

<sup>25</sup> "Inguc mime yengi yanguc miibong, 'Sugucne, ye monengngine 10 biyac fagac.'

<sup>26</sup> "Inguc mibong bafaliyelu yanguc edocebawec, 'Ngic monic wiyc gocne facnogac, ye wiyc hatacmac lacnodaicte. Nga monic ye wiyc monic mi facnogac, ye wiyc fagac, yogo ewalidaicte, yogo edocngebababac. <sup>27</sup> Aime ngabafocne yago yenge nani ngictaungineng galu damongebabele takicebawec, ngenge ngic yogo yawa bacea kwesilu nale haicka wehomacebaning.'"

---

\* <sup>19:13:</sup> Mina moniyang yogo hadeng 100 yogolec bole-fuli.      <sup>19:17:</sup> Luk 16:10      <sup>19:26:</sup> Mat 13:12; Luk 8:18

*Yesudi ngictau ingucne ailu Yerusalem fewec  
Mat 21:1-11; Mrk 11:1-11; Yoa 12:12-19*

<sup>28</sup> Yesu yowa inguc mime motome ye molickelu Yerusalem fewec. <sup>29</sup> Felu kupic wacine Oliwa, yogolec emewa kwesilu Betfage nga Betani mac-himong bangkalewec. Bangkalelu mic-tengtengkecine yaeckang yanguc milu salecepawec, <sup>30</sup> “Ngeke dondonne hikelu mac-aling yefe molic-molicca ngiyegac, iwa felu donggi madecine monic feina mi ngyieicne. Donggi yogo witickebong domagac, ngeke yogo bafuwalu mucine lukelu balu kwesinic.” <sup>31</sup> Aime entacka monicti yanguc uwanganedaicte, ‘Ngeke wenuc ainicte lukegaic?’ Inguc uwame yanguc edodabiye, ‘Sugucne ye yagodi bole banogale migac.’”

<sup>32</sup> Yesudi inguc milu ngic salecepame hikelu ye miwec, yogo sasawa bafuwaiboc. <sup>33</sup> Bafuwalu donggi madecine lukeboc filefocine yengi yanguc uwayeteibong, “Ngeke donggi madecine wenuc ainicte lukegaic?”

<sup>34</sup> Inguc mibong yeki miiboc, “Sugucne ye yagodi bole banogale migac.”

<sup>35</sup> Inguc milu yeke donggi madecine yogo Yesula balu hikeboc. Ailu Yesudi felu ngyienale yeke ngakpinginiec dalicne hemoctolu donggi madecinele feiwa lumackelu Yesu female bafickeboc. <sup>36</sup> Bafickeboc ye felu ngyieme hikkeemewa, iwa ngic-nigic yenge ngakpingineng dalicne hemoctolu yefewa lumackeibong.

<sup>37</sup> Aime Yerusalem emeina Oliwa kupicte yefe haugac, iwa yele mic-tengtengfocine habu sugucne yenge pasi damuineholec nganilu gaibong. Ilec ailu kwele-madic ngagelu beliyelu uc sugucneholec Wapong mitengkelu yanguc miibong,

<sup>38</sup> “Ngictau Sugucnele wacka welegac, ye mimi-madicineholec. *(Mige 118:26)*

Honocmengka kwele-mogung fame sawawa wilini wacine feicne fadaic.”

<sup>39</sup> Wackelu mitengkebong Farisaio gocne habu yengele hewacka domabong, yengi Yesu yanguc uwacnoibong, “Wewedu, ga mic-tengtengfocone ngelengkeyelelu miyengka waickening.”

<sup>40</sup> Inguc mibong Yesudi bafaliyelu yanguc edocebaawec, “Na yanguc edoc-ngebabe, yenge waickebong posa yengi aukwedaingte.”

<sup>41</sup> Yesu Yerusalem bangkalelu taon yogo nganilu ngic-nigic yengele hiyalu <sup>42</sup> yanguc miwec, “Ngenge yanguctihac kwele-mogungkolec gan-ingte yefe ngani-motobong madickedecka. Aime yefe yogobac yakumac haicnginang mi yegengkelu sangke-sangke fagac.” <sup>43</sup> Ngengele dameng monic kwsidaicte, yogowa ngabafocngineng yenge neboc nga nebocka hewalingnebalu himong heuckelu habuwebong feme igocngebadaingte. <sup>44</sup> Igocngebala yengi basowalecngebadaingte. Ailu adu-madecfocngineng ngengele hewacka gagabiyeng, yenge wehomacebayackebong himongka fadaingte. Ailu ngengele kwelina mac nga odale posa monicti monicte feiwa mi hegilebong ngyiedaicte. I yangukte, Wapongti welegac, ngenge yogo mi ngani-motogaing.”

*Yesudi Ibu-macka wiyc salebong yebicebawec  
Mat 21:12-17; Mrk 11:15-19; Yoa 2:13-22*

<sup>45</sup> Ailu Yesudi Wapongte Ibu-macte oda kwelina felu ngic yengi wiyc salelu gaibong, yenge yebicebalu <sup>46</sup> yanguc edocebaawec, “Yowa yanguc kwelengkeicne fagac, ‘Nale Ibu-mac yagodi mimilocte mac, wacine inguc wackenoga.’ *(Yes 56:7)*

**Aime ngengibac yogo bafaliyebong,  
'Hise-baba yengele sangke-sangke mac aigac.'**

(Yer 7:11)

<sup>47</sup> Aime Yesudi hadengsoc Ibu-macka wewedu bole balu gawec. Gaemewa depec-baba ngic micne nga Wapongte yefe-yowale wewedu ngic, ailu habu yengele micnefocngineng yenge Yesu wehomanogale aibibiyelu gaibong.

<sup>48</sup> Aime ngic-ngigac yenge yele yowa ngagepangkelu gaibong. Ailu yowaine monic hegileningte mi ngageibong. Ilec ailu ngaba yenge ye baickeningte yefe monic mi bafuwaibong.

## 20

**Madi Yesu bole-yowa lacnowec**

**Mat 21:23-27; Mrk 11:27-33**

<sup>1</sup> Yesu ye dameng monicka Ibu-macka Siduc Madicne ngic-ngigac edoce-balu weduyelulu mime yegengkewec. Mime depec-baba ngic micne nga Wapongte yefe-yowale wewedu ngic, ailu Yuda ngic-ngigac yengele da-mongfocngineng yengi Yesula kwesilu <sup>2</sup> uwacnolu yanguc miibong, "Edoc-nubac, ga oma bole-yowa tapiliineholec yogo bagamec? Ailu madi bole-yowa tapiliineholec yogo gelewe?"

<sup>3</sup> Mibong bafaliyelu yanguc edocebawec, "Aime na inguchac uwangelebe edocnuning. <sup>4</sup> Yoanedi misa-lowac bole balu gawec, bole-yowa tapiliineholec yogo honocmengkacni me ngickacni?"

<sup>5</sup> Inguc mime yenge yengilangkac mingagec ailu yanguc miibong, "Nongileng wenuc midabelengte? 'Yogo honocmengkacni' inguc midabelengtewa, ye yanguc uwanoledaite, 'Inguc ngagelubac ngenge omale ye mi ngagesingkeibong?' <sup>6</sup> Me 'ngickacni' inguc midabelengtewa, ngic-ngigac yenge posadi wickelu holecnubabong homadabelengte. I yanguete, Yoane ye Wapongte siduc-mimi ngic, inguc kwelenginengti ngagepangkegaing."

<sup>7</sup> Ilec yengi bafaliyelu yanguc edoibong, "Nonge bole yogo wenuwacni welegac, yogo mi ngagegabeleng."

<sup>8</sup> Inguc mibong Yesudi yanguc edocebawec, "Inguc migainte, na inguchac male bole-yowa tapiliineholec balu gagabac, yogo nalic mi edocngebadacte."

**Waing bolele damong sowacne**

**Mat 21:33-46; Mrk 12:1-12**

<sup>9</sup> Inguc milu Yesudi yowa nangengngine ngic-ngigac yanguc edocebawec, "Ngic monicti waing bole gblonicne duwewec. Duweme motome ye waing bole damongkeningte ngic gocne bafuwacebalu yengeholec yowa milu hefewec. Ailu yeicnebac dameng dalicne himong monicka ganale hikewec.

<sup>10</sup> "Hikelu gacgume waing noine babale dameng weleme, kwelec kwekwem ngic monic saleme bole-damong yengela waing noine nebocene ye lacnon-tingte hikewec. Hikeme bole-damong yengi kwelec kwekwem yogo dobo welu mocbenang salebong hikewec. <sup>11</sup> Hikeme bole fileinedi inguc nganilu hatac-mac kwelec kwekwem monic salewec. Saleme hikeme bole-damong yengi ye inguchac dobo welu misofoc aicnolu mocbenang salebong hikewec. <sup>12</sup> Aime hatacmac kwelec kwekwem monic saleme hikeme alecine habackang aime, ye inguchac dobo webong sacine wame yebiyebong hikewec.

<sup>13</sup> "Inguc aime bole fileinedi miwec, 'Na wenuc aidacte? O, madec-nebenang kwelenedi angac ngagecnocaigabac, ye salebe hikeme ye alang bacnodaingte mecene.'

<sup>14</sup>“Milu saleme bole-damong yengi ye nganilu yengilangkac mingagec ailu yanguc miibong, ‘Yedi gacgu bole yago bame yeicne aidaicte. Nongileng ye wehomabeng yele himong nga mole-damoc yago nongileng aidaic.’ <sup>15</sup> Inguc milu bole fileinele madecbenang yogo balu fuluckelu wickebong waing bole lobina haume balu wehomaibong.”

“Aime bole fileine yedi bole-damong yenge wenuc aiyeledaicte? <sup>16</sup> Ye kwe-silu waing bolele damong wehomacebalu, waing bole yogo bole-damong aling gocne yengele molewa lodaicte.”

Mime yenge yogo ngagelu yanguc miibong, “Ingucbenang mi fikedaic.”

<sup>17</sup> Inguc mibong Yesudi nganicebalu yanguc miwec, “Fungine omale yan-guc kwelengkeicne fagac, yogo ngagedaing.

‘Mac-baba ngic yenge posa yogo hegilelu wickebong, posa yogodi mac unggulucinele posa-bosing sanangne aiwec domagac.’ (*Mige 118:22*)

<sup>18</sup> Ngic-ngigac sasawa yenge posa yogolec feiwa wawedaingte, yenge soc-nineng lokeyackedaicte. Nga posa yogodi yengele feiwa wawecebadaicte, yogo fasosocebame kapuc kwedaingte.”

<sup>19</sup> Aime Wapongte yefe-yowale wewedu ngic, nga depec-baba ngic micne, yenge Yesudi yengele ngagelu nangeng yowa yogo holelu miwec, yenge yogo biyac ngage-motoibong. Aime yenge ye biyac banogale yefe basackeibong. Ailubac ngic-ngigac yengele hangocebame aibibiyelu hegileibong.

### *Yesu takesle uwacnoibong*

*Mat 22:15-22; Mrk 12:13-17*

<sup>20</sup> Ilec yenge Yesu nganibiyelu ngicfocngineng salecebabong, yenge yowaine ngagegaing silic yela hikeibong. Hikelu oma yowa wenuc mime ngagelubac prowinsle gawana bole-yowa tapiliineholec yele molewa loningte ngageibong. <sup>21</sup> Ailu ngic yogo yenge Yesule miibong, “Wewedu, yowa migic nga wiyac wedunologic, yogo sasawa dondonne. Ailu Wapongte yefe noine, yogo sugu ngic-ngigac edocebalu weduyelegecaigic. Ailu feicne waicnele yowa mi micaigic, gale inguc ngagecaigabeleng. <sup>22</sup> Ilec edocnubac, nongileng ngictau Sisa takes lacnodabelengte, me mi lacnodabelengte, yogo-golec yefe dondonne wenuc fagac?”

<sup>23</sup> Inguc mibong Yesudi kwesacngineng ngani-motolu yanguc edoce-bawec, <sup>24</sup>“Ngenge moneng monic edalicnubong nganibe! Iluc nga hibi yago male?”

Uwayeleme miibong, “Yogo Sisale.”

<sup>25</sup> Inguc mibong yedi yanguc edocebawec, “Ilec ngenge Sisale wiyac, yogo Sisa lacnodaing. Nga Wapongte wiyac, yogo Wapong lacnodaing!”

<sup>26</sup> Inguc mime yenge kwatackelu ngic-ngigac yengele haicka micka lolo aicnolu ye banogale aibibiyebong yowangineng ameine inguc bafaliywec. Ilec kwatackelu yowa monic mi miibong.

### *Homackacni gboliyelu fangke-fangke yogolec uwacnoibong*

*Mat 22:23-33; Mrk 12:18-27*

<sup>27</sup> Aime Sadyusi yenge homackacni gboliyelu fangke-fangke monic mi fagac, inguc micaigaing, yengelacni gocnedi Yesula wele uwacnolu miibong,

<sup>28</sup>“Wewedu, Mosesdi yowa yanguc kwelengkenolewec.

‘Ngic monic ye ngigac balu gboliine mikac gacgu homame, ngic yele gbainedi haeinele hosec balu gboliholec ailu haeinele wac bafangkelu gadaicte.’

(*Yef 25:5-10*)

29 Dameng monicka hae-gba 7 gaibong. Aime haengineng molic-molicti ngigac balu gboli mikac moc gacgu homawec. <sup>30</sup> Homame gbainedi haeinele hosec balu <sup>31</sup> moc gacgu homawec. Aime gbanginecti hosec yogo balu inguchac gboli mikac gacgu homawec. Homame hae-gba 7 yenge ngigac yogohac balu gbolifocngineng mikac gacgu homayackebong. <sup>32</sup> Homayackebong ngigac ye inguchac homawec. <sup>33</sup> Homame ngic 7 yenge ngigac yogohac baibongte ailu, gacgu homackacni gboliyelu fangkedaingte, dameng iwa ngigac yogo ye male ngigachenang aidaicte?"

<sup>34</sup> Inguc mibong Yesudi bafaliyelu yanguc edocebewec, "Himong yagolec gaga damengka ngicti ngigac bagaing. Nga mama mac yenge migaiing 'Na adune ngic lacnodacte.' <sup>35</sup> Aime ngic-ngigac yenge homackacni gboliyelu fangke-fangke, nga gaga-sanang banogale aidaingte, dameng yogowa ngic-ngigac yenge mi banagudaingte. Aime mama mac monicti 'Na adune ngic lacnodacte,' yogo nalic mi midaicte. <sup>36</sup> Yenge Wapongte adu-madecfocene ailu angelo ingucne galu hatacmac nalic mi homadaingte. <sup>37</sup> Aime homackacni gboliyelu fangke-fangke fagac, yogo Mosesdi inguchac kwelengkelu mime yegengkeyelewec. I yangucte, yoc kpisicna dac-ubilang fikeme nganilu yogowa lelu Sugucnele yanguc miwec,

'Ga Abraham nga Aisak ailu Yakobo yengele Wapong gagichac.' (Wah 3:6)

<sup>38</sup> Ailu ye ngic homaicne yengele Wapong miyac. Ye ngic gabolicne gagaing, yengele Wapong. Yele ngage-ngagewa sasawadi gaganginengkolec aigaing."

<sup>39</sup> Aime Wapongte yefe-yowale wewedu ngic gocne yengi yanguc miibong, "Wewedu, yowa madicnebenang migic." <sup>40</sup> Aime yagolec lobeina hatacmac uwacnoningte hangocebame hegileibong.

*Yesu Dawidile gboli miibong  
Mat 22:41-46; Mrk 12:35-37*

<sup>41</sup> Inguc aime Yesudi miwec, "Ngenge yowa yanguc ngagesidaing, ailu yowa yanguc fagac, 'Mesia ye Dawidile fikesaweckacni.' <sup>42</sup> Aime Dawidi ye yeuctihac Miti Geewa yanguc miwec fagac,

'Sugucnedi nale Sugucne edowec,\* "Ga folenapec ngiyeengka <sup>43</sup> gacgu ngabafocgone locebabe higegone bageina muki ingucne aidaingte."' (Mige 110:1)

<sup>44</sup> Ilec Dawidi ye Mesia 'Nale Sugucne' wackewec. Aime Mesia ye wenucka Dawidile fikesaweckacni aigac? Ye Dawidile Sugucne."<sup>†</sup>

*Yesudi Wapongte yefe-yowale wewedu ngic yengele sawang-yowa miwec  
Mat 23:1-36; Mrk 12:38-40; Luk 11:37-54*

<sup>45</sup> Aime Yesu ye ngic-ngigac sasawa yengele haicka mic-tengtengfocene yanguc edocebewec, <sup>46</sup> "Ngenge Wapongte yefe-yowale wewedu ngic yengele ngani-motolu gadablyeng. Yenge angacnginengte ngakpi dalcne holelu gabong, ngic-ngigac yengi wenac-madic edocebaningte sobeng sugucna hike-kwesic aicaigaing. Ailu kpakpaduc macka nga noba-nosing nonole damengka molic-molic ngiye-ngiyewa ngiyenogale angacebacaaigac.

---

\* **20:42:** Miti Geewa Hibru yowawa Sugucnele wac yaeckangti fagaic. Molic-molic Hibru yowawa wacine yogo "Yawe" fagac. Nga yagolec lobeina, "Sugucne" inguc fagac. Luka iwa Grik yowawa Sugucnele wac moniyang sugu bafaliyeicne fagac. "Nale Sugucne" yogo Mesia. † **20:44:** Mesia ye Dawidile fikesaweckacni, ailu ye Sugucneine aigachac.

<sup>47</sup> Ailu yenge ngigac-hosec yengele mac ewalicebacaigaing. Ailu ngage-madicebaningte mimiloc dalicnehac milockecaigaing. Yenge kwesac-aibaba ingucne aicaigabiyengte ameine sugcnehac badaingte."

## 21

*Ngigac-hosec monicti ibu lowec*

*Mrk 12:41-44*

<sup>1</sup> Aime Yesu ye donge hilalu nganime moneng-mafaholec yenge ibungineng Ibu-macte katapawa lobong hauwec. <sup>2</sup> Haume ngigac-hosec waweweine monicti moneng hakic kpisicne sasacnehac yaeckang lome hauwec. Haume nganilu <sup>3</sup> yanguc miwec, "Ngigac-hosec waweweine yagodi moneng logac, yogodi ngic-ngigac sasawa ibu logabiyeng, yenge ewalicebagac, yogo noinebenang edocngebabac. <sup>4</sup> I yangukte, ngic-ngigac sasawa yenge woc-wiyactowangineng wakelu fagac, yogowacni ibungineng logabiyeng. Nga ngigac yebac wiyac facnogac, yogo hocne sasawa loyackelu mocbenang gagac."

*Ibu-mac sowaledaictie*

*Mat 24:1-2; Mrk 13:1-2*

<sup>5</sup> Aime gocne yenge Wapongte Ibu-mac hibine madicnedi baicne, yogo nganilu siduc miibong. I yangukte, ibu nga wiyac haicine monic monicti Ibu-macka Wapong kwele-madicka lacnolu gaibong, yogodi Ibu-mac hibine-holec ainale lesoine lolu gaibong. Inguc mibong Yesudi yanguc edocebwec, <sup>6</sup> "Mac yogo ngani-angac homacne aigaing. Dameng monic kwesidaictie, yogowa sasawa hembalackebong hikeyackedaictie. Hikeyackeme posa monicti monicte feiwa mi hegilebong ngiyedaictie."

*Yesu kwesinal yowa*

*Mat 24:3-14; Mrk 13:3-13*

<sup>7</sup> Inguc mime yengi uwacnoibong, "Wewedu, ga Ibu-macte yowa migic, yogo ma damengka fikedaictie? Ailu dameng iwa maaine wenuc fikemebac, yowa sasawa yoglec noine yegengkedaictie?"

<sup>8</sup> Inguc mibong Yesudi yanguc miwec, "Monicti kwesacngebadaickale, ngenge ngani-motolu gadabiyeng. I yangukte, ngic bocyac yengi kwesilu nale wac wackelu midaingte, 'Na Mesia,' ailu 'Dameng biyac bangkalegac.' Inguc mibong mi balaibebedaing! <sup>9</sup> Aime hudu sugcne fikedaictie. Nga ngic-ngigac aalic ngagelu hudu wedaingte, yoglec siduc ngagelu medecnge-bame hangoc mi aidaing! I yangukte, wiyac ingucne molickelu fikedaictie. Nga dameng moto-motoinebac yogowahac biyac mi miyac aidaictie, miyac."

<sup>10</sup> Ailu hatacmac taockelu yanguc miwec, "Himong gocne yengi himong monickacni gocne yengeholec hudu wenagulu gadaingte. Ailu ngictau monictie alingti ngictau monictie aling yengeholec ngaba ainagudaingte. <sup>11</sup> Aime memeya sugcne yenge himongne himongne badaingte. Ailu nosingte loloc-dameng fikelu hikedaingte. Ailu huc sugcne himong monicka nga monicka inguchac fikelu hikedaingte. Nga sawawa maa silicne haicine monic monic, hangoc-hangocine fikebong nganidaingte.

<sup>12</sup> "Aibaba ingucne mi fikeemewahac yenge nale wacte ailu weyebic aingelelu bacngebalu kpakpaduc macte damong yengele molewa locngebadaingte. Aime yengi muc-macka locngebadaingte. Ailu ngictau nga gawana yengela bacngebalu hikedaingte. <sup>13</sup> Inguc aibong ngenge dameng yogowahac niale Siduc Madicne mibong yegengkelu hikedaictie.

**14-15** Yogowa nani ngage-ngage-motoc ngelelu yowa micnginang lodacte. Inguc aibe ngabafocngineng yengele hewackacni yowa ngeledacte, yogo monicti nalic mi bawadaicte, me wedaicte. Ilec aihu ngenge yengele haicka yowa minang milu ngageboc monic mi aidabiyyeng. **16** Aime nenggac-mamac nga ngic hae-gbaafocngineng, aihu sac-tofafocngineng nga agofocngineng yengi ngaba yengele molewa locngebadaingte. Aihu ngengelacni gocne wehomacebadaingte. **17** Aime nale wacte aihu sasawadi kweidaingte wicngebabong **18** ngengele hodoc-dowecngineng monictibac nalic mi si-fuwedaicte.\* **19** Ngenge sanangnehac domadaingtewa, ngengileng gagangi-nengte gaga-sanang badaingte.

*Yerusalem sowaledaicte*

*Mat 24:15-21; Mrk 13:14-19*

**20** "Aime hudu-baba ngic-habu yenge Yerusalem hewalingkedaingte, dameng iwa yanguc biyac ngagedaingte, taon sowalenale dameng biyac welegac. **21-22** Dameng yogo ame badu-badule dameng, aime yowa sasawa kwelengkeicne fagac, yoglec noine fikedaicte. Ilec aihu Yudeya himongka gagaing, yenge dameng yogowa hikelu tikiwa fedaing. Nga Yerusalem kwelina gagaing, yenge hikelu lobina haudaing. Nga lobina gagaing, yenge Yerusalem kwelina mi fedaing! **23** Himong yagowa umac sugucne fikeme ngic-ngigac ngaba aalicideholec aiyeledaingte. Ilec aihu dameng iwa ngigac gobeholec gagaing, nga nenggac kogoc amuc gumecebalu gagaing, mee, yenge medecebadaic. **24** Aime ngaba yengi hudule fitecti ngic gocne wehomacebalu, gocne witicebalu himongne himongne ngic-ngigac sasawa yengela baceba hikelu locebadaingte. Aime Israel yengele alingkacni miyac yengi kwestilu Yerusalem higenginengti edesockelu gaebongka yengele dameng yogo motome hikedaingte.

*Ngicte Madec hatacmac kwesidaicte*

*Mat 24:29-31; Mrk 13:24-27*

**25** "Dameng iwa wenac nga tamacne aihu asocmeng yengela maa fikedaicte. Aime himongne himongne yenge kwele-umac balu dingongka domalu kiwec dibongte uc ngagelu ngageboc aihu kauc badaingte. **26** Aime sawawa wiyac sasawa yengele tapili yogo teng-teng kwedaingte. Ilec ngic-ngigac yenge umac yogodi himongka fikenale ngagelu ngageboc nga hangoc aihu homa-gbolic aidaingte. **27** Aime ngagedaingte, dameng iwa yenge Ngicte Madec ye tapili nga hibi-angoceneholecti kaguwa kwelina kwesime nganidaingte. **28** Aibaba yogo fikenale aiyemewa bikicte muckacni lukecngebabong feninge dameng bangkalegac. Ilec aihu fangkelu hodocngineng bafangkelu nganilu domadaing."

*Yesudi damengte yocka nangeng yowa holelu miwec*

*Mat 24:32-35; Mrk 13:28-31*

**29** Aime Yesu ye nangeng yowa monic yanguc edocebawec, "Ngenge fik yoc nga yoc sasawa nganilu ngagedaing†. **30** Yoc yenge hekengngineng fosedaingtewa, wenac dameng bangkalegac, inguc ngengung biyac ngagedaingte! **31** Ngenge wiyac sasawa migabac, yogo fikeme nganilu

**21:14-15:** Luk 12:11-12; Sale 6:10      **21:16:** Mat 10:21-22      \* **21:18:** Hodoc-dowec yogo gaganganeng ingucne, aime mi miyac aidaingte.      **21:21-22:** Hos 9:7; Yer 5:29; 46:10      **21:24:** Mige 79:1; Miye 11:2      **21:25:** Yes 13:10; Esek 32:7; Yol 2:31; Miye 6:12-13      **21:27:** Dan 7:13; Mat 26:64; Miye 1:7      † **21:29:** Yoc yago ingucne aigaing, sabung, kpong, fudeng, nga yomingsac.

inguchac yanguc ngagedaing, Wapongte ngani-damong biyac bangkalec-nubagac.

<sup>32</sup> “Foinac, ngic-ngigac aling yanguctihac gagaing, ngenge mi homae-bongkahac, wiycasasawa yogo fikedaicte, yogo noine edocngebabac.

<sup>33</sup> Aime himong nga sawa yeke gacgu miyac aidabiyepte. Nga nale yowabac mi miyac aidaicte.

<sup>34</sup> “Aime kwele-sifuc nga misa-nonole ailu himongte ngageboc yogodi bacngebame umaledaingkale, nga hadeng yogodi biyac fikengeledaickale, ngenge damong balu gadaing!” <sup>35</sup> I yangucte, subadi sic wecaigac, ingucne hac hadeng yogodi himongne himongne ngic-ngigac sasawa yengela fikedaicte. <sup>36</sup> Ilec ngenge damengsoc deboc-gboli galu mimiloc bole balu gadaing. Bagacgu wiycasasawa yogo fikenogale aigac, yogo ewalilu tapili balu Ngicte Madec, yele haicka sanangkelu domadaingte.”

<sup>37</sup> Aime dameng yogowahac Yesu ye hadengsoc Ibu-macka weweddu bole balu gawec. Balu gacgume mac aweleme kupic monic wacine Oliwa, iwa hikeme deboleme ngyielu gawec. <sup>38</sup> Aime mac saeme ngic-ngigac sasawa yenge Ibu-macka yele yowa hatacmac ngageningte hikelu gaibong.

## 22

*Yudasdi Yesu baningte mipangkewec*

*Mat 26:1-5,14-16; Mrk 14:1-2,10-11; Yoa 11:45-53*

<sup>1</sup> Hombang monic, bret yis mikac nocaigaing, wacine monic Ewalicebaic-nele hombang micaigaing, hombang yogo bangkalewec. <sup>2</sup> Aime depec-baba ngic micne nga Wapongte yefe-yowale weweddu ngic, yenge Yesu homacka lonogale yefe monic baifuwanogale ngagesilu ngic-ngigac yengele hangocbame aibibiyeibong. <sup>3</sup> Mic-tengtengfocene 12 yengelacni monic Yudas, wacine monic Iskariot, ye Satangti yele kwele ngage-ngageina hauwec. <sup>4</sup> Haume yedi hikelu depec-baba ngic micne nga Ibu-macte lebe-ngic yengele damong yengeholec ngyiewec. Ngyielu Yesu yefe wenuc balu yengele molewa lonale yowa mingagetc aiiibong. <sup>5</sup> Aime yenge beliyelu moneng gocne lacnoningte milu yowa hefeibong. <sup>6</sup> Yudasdi yengeholec kwelemoniyang aiwec. Ailu yefe wenuc baifuwalu habu yenge yeholec mi gae-hongka, ye sangke-sangke gawec. Galu Yesu yengele molewa lonale, yogolec donge hilalu wangec gawec.

*Ewalicebaicnele hombangte lama madecineholec nosing lobelu bamockeboc*

*Mat 26:17-25; Mrk 14:12-21; Yoa 13:21-30*

<sup>7</sup> Gaemewa bret yis mikacte hombang iwa Ewalicebaicnele hombangte lama madecine welu lobecaigaing, dameng yogo welewec. <sup>8</sup> Weleme Yesudi Pita nga Yoane yanguc milu salecepawec, “**Ngeke hikelu Ewalicebaicnele hombangte lama madecineholec nosing lobelu nonangte wiycabamockenic!**”

<sup>9</sup> Inguc mime uwacnolu miiboc, “Wenuwa bamockenacte ngagesigic?”

<sup>10</sup> Miboc bafaliyu yanguc edocepwec, “**Ngagegaic, ngeke hikelu taonka fedabiyepte, yogowa ngic monic misa-hebecine tengkelu weledaicte. Weleme yeholec luwelu ye balaibedabiye.**” Balaibe hikelu ye mac fedaicte, ngeke mac yogowa fedabiye.” <sup>11</sup> Felu mac fileine yanguc

**22:1:** Wah 12:1-27    **22:3:** Yoa 13:2,27    \* **22:10:** Dameng iwa misa kukuwec aigaing, yogo ngigac yengele bole. Ilec ngic ye bole ingucne bame yeke nalic nganidabiyeete.

edodabiyc, 'Wewedudi yanguc uwagelegac, "Mac kweline monic wenuwa mimoctoengka na mic-tengtengfocne yengeholec Ewalicebaicnele hombangte lama madecine nodabelengte?"' <sup>12</sup> Inguc miboc yedi mac sawawa kweline sugucne monic, iwa wiyc biyac bamockeicne fayackegac, yogo edalicngepame ngeke iwa wiyc sasawa yogo bamockedabiyec."

<sup>13</sup> Aime yeke hikelu Yesudi edocepawec, silic yogohac bafuwayackelu Ewalicebaicnele hombangte lama madecineholec nosing lobelu bamockeiboc.

*Ewalicebaicnele hombangte nosing noibong  
Mat 26:26-30; Mrk 14:22-26; 1Kor 11:23-25*

<sup>14</sup> Aime nosing-nono dameng weleme Yesudi Salecebaicne yengeholec nosing nonogale ngiyelu <sup>15-16</sup> yanguc edocebabawec, "Ewalicebaicnele hombangte nosing yago ngengeholec nonogale homacne ainelegac. Na nosing yago hatacmac mi nolu gaebewa Wapongte ngani-damong kwelina hombangte fungine fikedaiete, yogo nolubac doicka fedacte. Yogo noine edocngebabac."<sup>17</sup>

<sup>17-18</sup> Inguc milu kap monic balu Wapong kwele-madic micnolu miwec, "Na yanguc edocngebabac, na waing noinele misaine hatacmac mi nolu gaebewa, Wapongte ngani-damong weledaiete. Ilec ngenge wiyc yago balu ngengung lanagulu noning."

<sup>19</sup> Inguc milu bret monic balu Wapong kwele-madic micnolu bret yogo bauckelu yanguc milu yelewec, "Yago soc-biucne, yogo ngengele ailu loicne. Ngenge yogo nolu nale ngagesilu inguc nolu gadaing!"

<sup>20</sup> Nosing nobong motome, silicine ingucne hac ye kap balu yanguc miwec, "Kap yago sacnele dodofic gbolicne, yogo ngengele ailu sotingkeicne.

<sup>21-22</sup> "Nga Ngicte Madec ye Wapongti yefe micnowecka hikedaiete hocne. Ngagegaing, ngic mudockeme badaingte, ye nosing tebowa momoc ngiyegabeleng. Mee, ngic yogo yebac medeckedaic." <sup>23</sup> Inguc mime mic-tengtengfocne yengungtihac uwanaguibong, "Madibac nongileng hewack-acni aibaba yogo aidaite?"

*Madi feicne aigac*

<sup>24</sup> Aime mic-tengteng yenge yengileng hewackacni madi feicne gagac, yolec yowangineng fec-wac aiwec. <sup>25</sup> Aime Yesudi edocebalu yanguc miwec, "Israel yengele alingkacni miyac, yengele ngictaungineng yenge ngic-ngigac yengele ngagebong waicne aicaigac. Ailu yengileng ngagebong feicne aigac. Aime sugucne focngineng yenge tapili fayelegacte ngic-ngigacfocngineng yenge yowangineng balaibebong micaigaing, 'Nonge babaficngineng gagabeleng.'

<sup>26</sup> "Ngengibac inguc mi aidaing! Monic ye feicne aigac, ye waicne aidaic. Nga micnengineng gagac, yedi mole-baficngineng ingucne aidaic. <sup>27</sup> Madi feicne aigac? Nosing moc ngiyelu nodaicte, me bole-madec nosing holelu gagac? Nosing moc ngiyelu nodaicte, yedi ingucne. Aime nanibac ngengele hewacka bole-madec ingucne gagabac. <sup>28</sup> Aime na lokwesac kwelina gaebewa ngenge na mi hegilecnulu gaibong. <sup>29</sup> Mamacnedi ngani-damongte tapili molena lowec, ingucne hac nani ngani-damongte tapili molenginang lodacte. <sup>30</sup> Lobewa ngenge naholec galu ngani-damongte nosing nga misa nolu ngiyedaingte. Ngenge inguchac ngictaule bole balu Israel yengele

<sup>† 22:15-16:</sup> Yesu ye Ewalicebaicnele hombangte fungine, ye lama madecine ingucne. <sup>22:21-22:</sup> Mige 41:9; Yoa 13:21-22    <sup>22:24:</sup> Luk 9:46    <sup>22:25:</sup> Mat 20:25-27; Mrk 10:42-45    <sup>22:26:</sup> Mat 23:11; Mrk 9:35    <sup>22:27:</sup> Yoa 13:12-15

ngambofocngineng 12 fagaing, yengele aibabangineng wosaelu mimoctodaingte.

*Yesu ye Pitadi bisockenale mime yegengkewec*

*Mat 26:31-35; Mrk 14:27-31; Yoa 13:36-38*

<sup>31</sup> "Saimon, Saimon, ga ngagenong. Satang ye ngic yengi wit yafoine webong wanale kpendaecaigaing, silicine ingucne hac madicnacni bafaliyecngebame sowaleningte biyac alingkelu milockeneleyec. <sup>32</sup> Aime Saimon, nani gale ailu biyac mimiloc bole yanguc babac. Ga ngage-ngagesinggone wickeengka mi wadaic. Ailu ga kwelegone hefaliyeme nala hatacmac welelu ngic hae-gbafofcgonge basanangebadamec!"

<sup>33</sup> Aime Pitadi miwec, "Sugucne, gaholec muc-macka haunogale nga homanogale biyac efeckebac."

<sup>34</sup> Mime Yesudi edowec, "Pita, na yowa edocgube ngagec. Yakumac deboc yagowahac kokolec ngicne mi hiyaemewa, ga bisocnung alecine habackang aidaicte."

*Yesudi mic-tengtengfocene wiyc balu ganingte edocebaawec*

<sup>35</sup> Aime Yesudi edocebalu yanguc miwec, "Molic-molic salecngebabehikeibong, dameng iwa moneng-ebec me hiye me hige-ebec mi balu gaibong. Ailu wiyc monicte waweibong me?"

Mime yengi miibong, "Miyac."

<sup>36-37</sup> Mibong Yesudi miwec, "Hibiwa yanguc kwelengkeicne fagac, yogo nala noine fikedaicte, ilec edocngebabagabac. I yangucte,  
'Yengi ye yefe-yowa wewelete ngic micnoibong.' (Yes 53:12)

Nale ngagelu yowa miibong fagac, yogo yakumac noine fikeyackegac. Ilec ailu yakumacbac yanguc migabac, monic ye moneng-ebeckolec me niyeineholec gagac, ye yogo badaic. Ailu hudule fitec mikac gagac, ye ngakpiine sugucne salelu moneng balu yogodi hudule fitec fuli badaic."

<sup>38</sup> Mime mic-tengtengfocene yengi yanguc miibong, "Sugucne, nganic. Nonge hudule fitec yaekkang balu gagabeleng."

Mibong miwec, "Yogo andoine."

*Yesu ye Getsemane bolewa Wapong milockewec*

*Mat 26:36-46; Mrk 14:32-42*

<sup>39</sup> Milu Yesu ye inguc ailu gawec. Ailu mac hegilelu Oliwa kupicka hikeme mic-tengtengfocene balaibelu hikeibong. <sup>40</sup> Hike sulumebong edocebalu miwec, "Ngenge lokwesacka felu wawedaingkale, milockelu sanangkening!" <sup>41</sup> Inguc milu ye mic-tengtengfocene hegilecebalu sawaine kpisicnemac locea lelu ketadi holelu yanguc milu Wapong milockewec, <sup>42</sup> "Mamac, ga ngageng nalic aigacka, ga doicte kap yago baickenong. Ailu nale angacti mi sanangkedaic, miyac. Gale angac nga ngage-ngage yogodi sanangkedaic."‡ <sup>43</sup> [Inguc milockelu domame angelo monicti honocmengkaci walu basanangkewec. <sup>44</sup> Aime Yesu ye ngageme umalebenangkeme sanangrehac milockeme sengilangnginedi sac ingucne ailu himongka wawec.]§

<sup>45</sup> Milockeme motome fangkelu hefaliyelu mic-tengtengfocene yengela welelu nganicebame yengele kwele-sowac ailu gung faibong. <sup>46</sup> Fabong

**22:30:** Mat 19:28    **22:32:** Yoa 17:15    **22:35:** Luk 9:3; 10:4    ‡ **22:42:** Kap yogo nangeng yowa.

Yogo umac lobeina fikedaicte ingucne. § **22:44:** Hibi esecne Lukadi kwelengkewec, yogo nganilu iwacni kwelengkebong kwelengkebong ofewec, yengelaci gocone 43-44 iwa mi fagac. Ngic-ngigac yengele hibi kwelengkeicne yogo wosaelu nganibong Lukadi mi kwelengkewec mecene.

yanguc edocebawec, "Ngenge omale gung fagaing? Ngenge lokwesacka felu wawedaingkale, fangke milockelu sanangkening!"

*Ngaba yengi Yesu baibong*

*Mat 26:47-56; Mrk 14:43-50; Yoa 18:3-11*

<sup>47</sup> Aime Yesu ye inguc milu domaemewahac, ngic-habu gocne yengi yela kwesiibong. Aime mic-tengtengfocine 12 yengelacni monic, wacine Yudas, yedi molickeyelelu Yesu emeina muduckenale yela leme <sup>48</sup> Yesudi micnowec, "Yudas, ga Ngicte Madec muduckelu ngaba yengele molewa locnugic, me?"\*\*

<sup>49</sup> Mime Yesu mic-tengtengfocine habu balu domaibong, yenge aibaba sowacne yogo fikenogale aime nganilu uwacnolu miibong, "Sugucne, nonge hudule fitecti wecebanang, me?"

<sup>50</sup> Aime yengelacni monicti kwelec kwekwe ngic monic welu hedecine soleinapec wekwackeme wawec. Ngic yogo ye depec-baba ngic yengele damong sugucne, yele kwelec kwekwe ngic. <sup>51</sup> Wekwackemebac Yesudi miwec, "Ngenge aibaba yogo hegilening!" Inguc milu kwelec kwekwe ngic hedecine bauwalu bamadicewec.

<sup>52-53</sup> Aime Yesu banogale kwesiibong, yogo depec-baba ngic micne nga Ibumacte lebe-ngic micne, ailu Yuda ngic-ngigac yengele damongfocngineng, yengele yanguc miwec, "Na hadengsoc Ibu-macka ngengeholec gaiba. Aime ngenge dameng yogowabac mi bacnuibong. Aime yakumacbac kindololo ngic bacebacaigaing, ngenge silicine ingucnehabu hudu-babale fitec, nga gbaluc balu bacnuningte kwsigaing. Aime yakumacbac kundungte tapilidi ngengele dameng aigac."

*Pitadi Yesu bisockewec*

*Mat 26:57-58,69-75; Mrk 14:53-54,66-72; Yoa 18:12-18,25-27*

<sup>54</sup> Inguc aime yenge Yesu balu depec-baba ngic yengele damong sugucnele macka mengockelu hikeibong. Aime Pita ye lobenginang dadalisuchac balaibecebalu hikewec. <sup>55</sup> Hikeme ngic gocne yenge macte oda kwelina sobeng hewacina dac fitobong lobeme folalu ngiyebong, Pita yengeholec ngiyewec. <sup>56</sup> Aime kwelec-adu monicti Pita dacka ngiyeme, dongeine yela hilalu nganilu yanguc miwec, "Ngic yago ye Yesuholec gawec."

<sup>57</sup> Inguc mime Pitadi bisockelu miwec, "Ngigac, ga ngic migic yogo, na ye mi ngagegabac."

<sup>58</sup> Inguc mime dameng mi daliweme ngic monicti Pita nganilu miwec, "Ga hocne yengelacni monic."

Inguc mime Pitadi miwec, "Ngic, ga ngagegic, na miyac."

<sup>59</sup> Aime 60 minit ngama ingucne domaemewa, ngic monicti hatamac sanangkelu miwec, "Noinebenang, ngic yago ye Galili prowinswacni, ye hocne yele alingka gacaigac."

<sup>60</sup> Inguc mime Pitadi bafaliyelu yanguc edowec, "Ngic, ga migic, yogo na mi ngage-motogabac." Inguc miyemewa kokolec ngicne hiyawec. <sup>61</sup> Hiyame Sugucne ye hefaliyelu Pita nganiwec. Nganime, Pita ye Sugucnedi yowa biyachac edowec, yogo ngagesiwec, "Kokolec ngicne deboc yagowa mi hiyaemewa, gagi biyac na bisocnung alecine habackang aidaicte." <sup>62</sup> Aime Pita ye yowa yogo ngagesilu oda lobina haulu kwele-sowac sugucne ngagelu hii sugucnehabu hiyawec.

\*\* **22:48:** Israel yengele pasi ingucne, ngic agoine nganilu mikokoc ainagulu gaibong.

**22:54:**

*Damong yengi Yesu migoi aicnolu weibong  
Mat 26:67-68; Mrk 14:65*

<sup>63</sup> Ngic Yesu damong gaibong, yengi Yesu migoi aicnolu welu <sup>64</sup> dongeine kpolucti ebeckelu yanguc miibong, “Madi wecgugac, yogolec siduc-yowa minong!” <sup>65</sup> Milu yenge aibaba haicine monicmonic aicnolu misulec aicnobiaibong.

*Yesu ye Yuda ngic-ngigac yengele Tutumangtowawa domawec  
Mat 26:59-66; Mrk 14:55-64; Yoa 18:19-24*

<sup>66</sup> Aime mac saeme Yuda ngic-ngigac yengele damongfocngineng, yogo depec-baba ngic micne nga Wapongte yefe-yowale wewedu ngic, yenge momochac kpatuleibong. Aime Yuda ngic-ngigac yengele Tutumangtowawa Yesu balelu <sup>67</sup> yanguc uwacnoibong, “Ga edocnubanong. Ga Mesia, me?”

Mibong bafaliyelу yanguc edocebaawec, “**Na edocngebabe nalic mi ngagesingkedaingte.**” <sup>68</sup> **Nga uuwa uwangeledacte, ameine nalic mi bafaliyedaingte.** <sup>69</sup> Yakumac nga gafenowagabeleng, iwa Ngicte Madec ye **Wapong Tapilitowa fileine yele mole-foleinapec ngiyedaicte.**”

<sup>70</sup> Mime yengi miibong, “Inguc aime ga Wapongte Madec, me?”

Mibong yedi miwec, “**Yowa migaing, yogo noine. Na gagabachac.**”<sup>††</sup>

<sup>71</sup> Inguc mime yengi yanguc miibong, “Yeuctihac mibasanang ainagugac. Ilec monicti sowacneine nganiwec, nongileng ngic ingucne hatac mi basackedabelengte. Yeicne micti biyac mime ngagegabeleng.”

## 23

*Yesu Pailatla bahikeibong  
Mat 27:1-2,11-14; Mrk 15:1-5; Yoa 18:28-38*

<sup>1</sup> Milu kpatulelu ngiyeibong, yenge sasawadi fangkelu Yesu balu Pailatla bahikeibong. <sup>2</sup> Hikelu yowawa lobong domame kpolickelu yanguc miibong, “Ngic ya, ye ngic-ngigacfocnongeng yengela yefengineng basifuwelu takes Sisa lacnoningte kpatalayelegac. Ailu yeicnele yanguc micaigac ‘Na Mesia, ngictau monic,’ inguc micaigac.”

<sup>3</sup> Inguc mibong Pailatdi uwacnolu miwec, “Ga Yuda ngic-ngigac yengele ngictau, me?”

Mime bafaliyelу miwec, “**Yogo hocne gageuc micic.**”

<sup>4</sup> Aime Pailatdi depec-baba ngic micne nga habu yengele miwec, “Ngic yagodi mimipang yowa monic mi ewaliwec, sowacneine basackegabac.”

<sup>5</sup> Mime yengebac sanangkelu miibong, “Ye ngic-ngigac weduyeleme kwe-lengineng fangkecaigac. Yogo Galilihocnihac fungkelu aiyeleme kwesicgu Yudeya himongka sawelu Yerusalem iwa motogac.”

*Yesu Herodela bahikeibong*

<sup>6</sup> Inguc mibong Pailat ye yogo ngagelu yanguc uwayelewec, “Ngic yago Galilihocni, me?” <sup>7</sup> Ailu ye Yesule mac Herodedi himong yogo damongkegac, ye iwacni, inguc ngagewec. Ngagelu Herode ye dameng iwhahac Yerusalem gawecte Yesu saleme yela hikewec.

<sup>8</sup> Aime Herode ye Yesule siduc biyac ngagewecte Yesudi pasile maa gocne bame nganinogale wangec gawec. Inguc ngagelu dameng dalicne Yesu basackelu gawecte ailu, Yesu yela bahikeibong beliyewec. <sup>9</sup> Belyelu Yesu uuwa homacne uwacnowec. Aime yedibac uuwa ameine monic mi

**22:67:** Yoa 3:12    **22:69:** Mige 110:1; Sale 7:56    <sup>††</sup> **22:70:** “Na gagabachac” yogo Wapongte wac monic, Wahikeicne 3:14 iwa Moses edowec.    **23:7:** Luk 3:1

bafaliyecnowec. <sup>10</sup> Aime depec-baba ngic micne, nga Wapongte yefe-yowale wewedu ngic yengi wele domalu yele fungine sanangnehacbenang miibong. <sup>11</sup> Herode nga hudu-baba ngicfocine yenge ye lobe holecnolu migoi aicnolu ngakpi monic hibineholec holecnobong haume, Pailatla hatacmac salece-bame ye balu hikeibong. <sup>12</sup> Aime Herode nga Pailat yeke esecne ngabanga gaiboc, hadeng iwahac yeke ago-ago aiiboc.

*Pailatdi Yesu homanale mimoctowec*

*Mat 27:15-26; Mrk 15:6-15; Yoa 18:38-19:16*

<sup>13</sup> Aime Pailat ye depec-baba ngic micne nga damong gocne ailu ngicngigac wacebame weleyackeibong. <sup>14</sup> Welebong yanguc milu edocebawec, “Ngic yago ye ngic-ngigacfocnonggeng kwelengineng kwefangkecaigac, inguc milu bawelegabiyeng. Ngagegaing, wiyac nganilu yowawa logaing, yogo nani ngengele haicka uwacnobe miyac aigac. Aime sowacneine sackegabac. <sup>15</sup> Nga Herode ye inguchac ngagelu moc bafaliyeme balu wela-egaing. Inguc aime, ngic yagodi sowacne monic mi aiyecka nani homacka lololesoc mi aigac, yogo ngage-motodaing. <sup>16</sup> Inguc aime ye webating gocne aicnolu hegilebe hikenale ngagegabac.”

<sup>17</sup> [Ailu Ewalicebaicnele hombang damengka gawanadi ngic moniyang muc-mackacni lukecnocaigac, aibaba yogo fawec.]<sup>\*</sup> <sup>18</sup> Ilec ailu habutowa sasawadi aukwelu yanguc miibong, “Ye wehomalu Barabas lukenolec!” <sup>19</sup> Barabas ye molic-molic taonka ngic-ngigac yenge kwele fangke-fangke aibaba ailu ngic wehomawecete, muc-macka loibong.

<sup>20</sup> Nga Pailat yedibac Yesu lukecnome hikenale ngagelu ngic-ngigac yengela hatacmac sanangkelu miwec. <sup>21</sup> Mime yenge aukwelu miibong, “Malicpongka weng homana! Malicpongka weng homana!”

<sup>22</sup> Aukwebong dameng habackang aime, Pailatdi edocebalu miwec, “Ngic yago ye oma sowacne aiwec? Na sowacneine monic mi bafuwagabakte homacka lololesoc mi aigac. Inguc aime webating aicnolu hegilebe hikenale ngagegabac.”

<sup>23</sup> Mime yengi malicpongka homanale sanangkelu dacineholec aukwelu Pailatle yowa ewalilu hendolong bafuwaibong. Inguc aibong <sup>24</sup> Pailat ye yengele yowa ngageyelelu Yesu mimoctowec. <sup>25</sup> Ailu ngic ye kwele fangke-fangke aibaba aigacu ngic wehomame muc-macka lobong ngiyewec, ye lukecnoningte miibong. Inguc mibong ye lukecnolu Yesubac molenginang lome ngage-ngagengineng balaibeningte hegileyelewec.

*Yesu malicpongka weibong*

*Mat 27:32-44; Mrk 15:21-32; Yoa 19:17-27*

<sup>26</sup> Hegileme hudu-baba ngic yengi Yesu bahikelu nganibong ngic monic Sairini taonkacni, wacine Saimon, ye nosing-bolewatcni yefewa welewec. Weleemewa bafuwalu yedi Yesule malicpong tengkenale dogbac aicnobong tengkelu Yesu balaibewec.<sup>†</sup> <sup>27</sup> Aime ngic-ngigac habu sugucnedi balaibeibong, yengele hewackacni ngigac homacne yenge yele mihiyac ailu kwelesowac sugucne aiibong. <sup>28-30</sup> Inguc aibong Yesudi hefaliyelu yanguc edocebawec, “**Dameng monic weleme, iwa ngic-ngigac yenge yanguc midaingte,**

\* <sup>23:17:</sup> Hibi esecne Lukadi kwlengkewec, yogo nganilu iwacni kwlengkebong kwlengkebong ofewec, yengelacni gocne <sup>17</sup> iwa mi fagac. Ngic-ngigac yenge hibi kwlengkeicne yogo wosaelu nganibong Lukadi mi kwlengkewec mecne. † <sup>23:26:</sup> Ngic malicpongka wedaingte, ye malicpongine tengkelu wedaingte mac iwa hikedaiete. Yesu tapili mikac aime Saimonti baftikenale aicnobong tengkewec.

'Ngigac hufing nga kogoc mi baibong, ailu amuc mi gumecebaibong, yenge kwele-angackolec.'

'Dameng iwa ngic-ngigac yenge tikile midaingte, "Feinonggang walu famac-nubac!" Nga kupicte yanguc midaingte, "Syeckelu somecnubac!"' (Hos 10:8)

Ilec ailu Yerusalemkoci ngigac-adu, ngenge nale mi hiyaning! Ngenge ngengileng nga adu-madecfocngineng, yengele ailubac hiyaning! <sup>31</sup> Yoc sabaineholec domaemewa yela aibaba ingucne aigaing. Nga yoc ye biyac homaicne, ibac sowale-benangkedaingte."‡

<sup>32</sup> Aime kindololo ngic yaeckang yeke Yesuholec momochac wecepaningte bacepalu hikeibong. <sup>33</sup> Hikelu himong monic wacine Hodoc-luwe, iwa Yesu malicpongka weibong. Aime yeholec kindololo ngic yaeckang, monic foleinapet nga monic kanainapet yeholec wecepabong domaiboc. <sup>34</sup> Wecebabong Yesudi yanguc miwec, "Mamac, bole bagaing, yogo mingagemotolu aigaingte ailu, ga bikicngineng hegilenong!" Ailu yenge ngakpi-kpolucine loling monic ailu lanac-ganac aiibong.

<sup>35</sup> Ngic-ngigac yenge wiyc fikewec, yogo ngani domaibong. Domaebongka Yuda ngic-ngigac yengele damongfocngineng, yenge inguchac misulec aicnolu yanguc miibong, "Ye Wapongte Mesia bawosaecine aigacka, ye ngic-ngigac gocne baficebawec, ingucnehab yeicne baficnaguna."

<sup>36</sup> Aime hudu-baba ngic yenge inguchac midelec aicnolu yele emewa welelu waing hobecineholec Yesule micka lobong feme<sup>§</sup> <sup>37</sup> yanguc miibong, "Ga Yuda ngic-ngigac yengele ngictau gagickabac geicne baficnaguc!"

<sup>38</sup> Aime yele hodoc feina yowa yanguc kwelengkeicne domawec, "Yago Yuda ngic-ngigac yengele ngictau."

### *Kindololo ngic yaeckang Yesuholec wecepaibong*

<sup>39</sup> Nga kindololo ngic yaeckang yekelacni monic domawec, yedi Yesu misulec aicnolu miwec, "Ga Mesia aigicka geicne baficnagulu noke inguchac baficnupac!"

<sup>40</sup> Inguc mime agoinedi ngelengkelu yanguc miwec, "Ga ye ameine bagac ingucnehab bagamec, Wapongte mi hangocgugac, me?" <sup>41</sup> Nokilec kindololo ngicte ameine aibaba dondonne inguc ainotegaing. Nga ngic yago yebac sowacne monic mi bafuwawec." <sup>42</sup> Inguc milu Yesule miwec, "Yesu, ga ngani-damonggona hike sulumelu ngictaule bole balu na ngagesic-nudamec!"

<sup>43</sup> Mime Yesudi yanguc miwec, "Foinac, yakumac hocne naholec Wapongte mac madicnebenang iwa gadabelete, yogo noine edocgugabac."

### *Yesu homawec*

*Mat 27:45-56; Mrk 15:33-41; Yoa 19:28-30*

<sup>44</sup> Aime wenac hewac-hewac 12 kilok aime iwahac mac kundung kweme kundungti himong someckelu falu game 3 kilok mac awelewec. <sup>45</sup> Aime wenac-dongeine kundung kwewec, dameng iwahac Ibu-macte kpoluc sugucne \*\* yogo fouckeme yaeckang aiiboc. <sup>46</sup> Aime Yesudi malac sugucnehab wackelu miwec,

**23:28-30:** Luk 21:23; Miye 6:16 ‡ **23:31:** Ngic gocne yanguc ngagegaing, yoc sabaineholec yogo Yesu ingucne. Nga yoc homaicne, yogo Israel ngic-ngigac ingucne. Lobeina yengele umacti Yesule umac ewalidaite. **23:34:** Yes 53:12; Mige 22:18 **23:35:** Mige 22:7-8 § **23:36:** Bole-madec nga hudu-baba ngic yengi waing hobecineholec yogo noicaigaing. Ngictau yenge waing ingucne mi noicaigaing. **23:36:** Mige 69:21 \*\* **23:45:** Kpoluc yogo Kweline Gbagbacne, nga Kweline Gbagbacnebenang, yekele hewacka loicne. **23:45:** Luk 8:2-3

**"Mamac, asune molegona logabac!"**

(Mige 31:5)

Inguc mime asuine ofewec.

<sup>47</sup> Aime hudu-baba ngic yengele damongti inguc nganilu Wapong wacine bafelu yanguc miwec, "Ngic yago ye dondonne, yogo noine." <sup>48</sup> Aime ngic-nigigac sasawa yenge aibaba fikewec, yogo ngani-ngagec ainogale kwe-siibong. Kwesibong yenge aibaba yogo fikeme nganilu mondacngineng welu hiyalu macnginang hikeibong.<sup>††</sup> <sup>49</sup> Aime Yesu alingfocine sasawa nga ngigac gocne Yesu balaibelu Galilihocni kwesiibong, yengebac welelu dalicka domalu aibaba fikewec, yogo nganiiibong.

*Yesu henebewa lobong fawec*

*Mat 27:57-61; Mrk 15:42-47; Yoa 19:38-42*

<sup>50-51</sup> Aime Yuda himongka taon monic Arimatea iwacni ngic monic, wacine Yosefe. Ye Yuda ngic-nigigac yengele Tutumangtowa yogolec memba monic. Ye<sup>#</sup> ngic ulucne nga aibabaine dondonne aihu Wapongte nganidamongte wangec gawec. Aime ye agofocine yengi yowa miiibong nga aibaba aiiibong, yogolec ngageme mi madickewec. <sup>52</sup> Mi madickeme ye Pailatla hikelu Yesule kponggbong banale uwacnowec. <sup>53</sup> Uwacname nalic mime ye Yesule kponggbong bamoctolu kpoluc madicnebenang yogodi wabungkelu bahikelu dongesi monic gbolicne, iwa loibong. Dongesi yogo posa henebe gufuicna fawec. Aihu yogo gbolicne, ngic monic iwa mi longkeicne. <sup>54</sup> Aime hadeng yogo Sabatle efec-tafec dameng aime, Sabat dameng fungkenogale aiwec.

<sup>55</sup> Aime Galili prowinswacni ngigac gocne Yesu balaibelu gaibong, yenge Yosefe balaibelu dongesiwa hikelu Yesule kponggbong loibong, yogo nganigagec aiibong. <sup>56</sup> Aihu hatacmac hefaliyu macnginang hikelu kponggbong yogolec heloc hoine madicne bamockeibong. Aihu Sabatle ung-yowa fagac, yogo balaibelu bole mikac macka moc ngiyeibong.

## 24

*Yesu homackacni gboldiye fangkewec*

*Mat 28:1-10; Mrk 16:1-8; Yoa 20:1-10*

<sup>1</sup> Sonda ubiyacte mac sae-saele ngigac yenge heloc hoine madicne bamockeibong, yogo balu dongesiwa hikeibong. <sup>2</sup> Hikelu nganibong posatowa dongesi yefeine hedickeicne yogo biyac balu igockebong kpalundungkeicne. Aime dongesi nuine moc angkelu domame, <sup>3</sup> ngigac yenge dongesi kwelina felu Sugucne Yesule kponggbong basackeibong. <sup>4</sup> Aihu yenge oma wiyc fikegac, yogolec ngagebong kpungkeme domaibong. Hei, iwahac ngic yaekang ngakpinginec kwalacnebenang angocineholec, yeki welelu haicnginang fikelu domaiboc. <sup>5</sup> Domaboc ngigac yenge hangobame ngosockelu haicngineng himongka heluluckelu ngiyeebongka, ngic yaekang yeki yanguc edocebaiboc, "Ngenge ngic gagaineholec omale dongesiwa basackegaing?" <sup>6</sup> Ye hocne biyac gboldiye fangkegac, yawa mi fagac. Aime ye Galili hikkeebongka yowa edocngebawec, yogo ngagesidaing. <sup>7</sup> 'Ngicte Madec ye bikic-baba yengele molewa lobong, yengi balu malicpongka webong homadaite,' yogo fikenale miwec. 'Aime hadeng habackang aime, hatacmac gboldiye fangkedacte.' <sup>8</sup> Mime ngigac yenge yedi yowa yogo biyac miwec, yogo ngagesiibong.

†† 23:48: Israel ngic-nigigac yenge kwele-sowac aihu mondacka wecaigaing.

‡‡ 23:50-51:

Tutumangtowa iwa yowa hefelu Yesu wehomaibong.

23:56: Wah 20:10; Yef 5:14

24:6: Luk

<sup>9</sup> Ngagesilu dongesiwacni hatacmac hefaliye hikeibong. Hikelu salecebaicne 11, nga agofocngineng aibaba sasawa fikewec, yogo edocebayackebong. <sup>10</sup> Ngigac hikeibong, yenge wacngineng yanguc, Maria, wacine monic Magadalen, nga Yoana. Ailu Maria Yakobos nenggacine, ailu ngigac gocne yenge momoc hikeibong, yenge siduc yogohac salecebaicne edocebaibong. <sup>11</sup> Aime ngigac yenge yowa miibong, yogo yenge ngagebong sisifucine aime yowangineng mi ngagesingkeibong. <sup>12</sup> Inguc aime Pita ye sifu fangke gasackelu dongesiwa hikewec. Hikelu dongesiwa fakanelu nganime, kpoluc madicnebenang wabungkeibong, yogodi sugu ngiyewec. Ye inguc nganilu ngage-ngage bole balu hatacmac hefaliye hikewec.

*Mic-tengteng yaeckang yeke Emeus yefewa Yesu nganiiboc  
Mrk 16:12-13*

<sup>13</sup> Aime hadeng iwashac mic-tengteng yaeckang yeke mac-alng monic, wacine Emeus, iwa hikenogale hikeiboc. Mac-alng yogo Yerusalemkocni dalicneine 11 kilomita, ingucne ngiyewec. <sup>14</sup> Aime yeke aibaba sasawa fikewec, yogolec mingagec ailu hikeiboc. <sup>15</sup> Yeke yowa yogolec mingagec ailu ngage-ngage bole balu hikeebocka, Yesu yeicne hikelu yekela fikeyeteme yekeholec hikeibong. <sup>16</sup> Ailu donge basifuc aiyeteme yeke ye nalic mi nganimotoiboc.

<sup>17</sup> Inguc aime Yesudi uwayetelu miwec, “**Ngeke yefewa oma wiylacte ngekilackac mingagec aigaic?**”

Mime yeke kwele-sowac silic ailu waickelu domaiboc. <sup>18</sup> Domalu monic wacine Kleopas, yedi uwacnolu yanguc miwec, “Ga kwilic-ngic moniyangti sugu Yerusalem gaebengka, Sonda yagolec kwelina wiylac fike ofeyec, yogo mi ngagegic, me?”

<sup>19</sup> Mime yedi miwec, “**Oma wiylac fikeyec?**”

Inguc mime yeki edolu miiboc, “Yesu Nasaret-hocni yela wiylac fikeyec. Ye Wapongte siduc-mimi ngic monic. Ailu Wapongtnga ngic-ngigac yengele haicka yowa miwec, nga wiylac sasawa aiwec, yogo tapiliineholecbenang aiwec. <sup>20</sup> Aime depec-baba ngic micne nga micnefocnonggeng, yengi ye homanale milu gamang yengele molewa lobong, yengi malicpongka webong homawec. <sup>21</sup> Aime ye hocne Israel ngic-ngigac nonge muckacni lukec-nubanale wangec gaibeng. Aimebac wiylac fikewec, yogolec hadeng yamac habackang aigac. <sup>22-23</sup> Aime ngigac gocne nongele alingkacni, yenge yakumac ubiyactebenang dongesiwa hikelu kponggbongine basackegaing. Basackelu hefaliye welelu yanguc edocnubagaing, ‘Angelo yaeckang yeki fikenolelu yanguc migaic, “Yesu biyac gboliye fangkelu gagac!”’ Inguc edocnubabong kwatackegabeleng. <sup>24</sup> Nongelacni ngic gocne yengi dongesiwa hikelu ngigac yenge migaing, inguchenang bafuwagaing. Ailu yeicnebac mi nganigaing.”

<sup>25</sup> Miboc Yesudi yanguc edocepwec, “**Ngeke ngage-ngagenginec mikac, ailu kwelenginec mi fangkegac.** Aime Wapongte siduc-mimi ngic yengi esecne hac yowa sasawa miibong, yogo biyac mi ngagesingkecaigaic. <sup>26</sup> I yanguc fikenale miibong, ‘**Mesia ye doic ngageme motome wac-binge fericne nalic badaicte.**’” <sup>27</sup> Aime yeicne siduc Wapongte hibiwa kwelengkeicne fayackegac, yogolec fungine mime yegengkeyetewec. Siduc yogo Mosesle

hibiwacni molickelu hikecgu Wapongte siduc-mimi ngic sasawa yengi yele siduc kwelengkeibong.\*

<sup>28</sup> Aime mac-aling hikenogale hikeniboc, yogo bangkalelu Yesu ye mochac hikenogale silic ingucne aime, <sup>29</sup> yeki kpatalacnolu miiboc, "Mac aweleme kundung kwenale aigac, ga nokeholec hikenang!" Inguc miboc yekeholec macka felu ngiyeibong.

<sup>30</sup> Yesu ye yekeholec ngiyelu nosing nonogale bret balu Wapong kwele-madic micnolu bauckelu yetewec. <sup>31</sup> Yeteme dongenginec lokeme Yesu ngani-motoebocka, ye iwahac mime aockeme <sup>32</sup> yekilackac mingagec ailu miiboc, "Noinebenang, yefewa Wapongte hibile fungine edocnupalu wedunotelu mime yegengkeme kwelenonggecti fangke-benangkegac."

<sup>33</sup> Aime yeke fangkelu iwahac hefaliyelu hatacmac Yerusalem hikeniboc. Hikelu salecebaicne 11, agofocngineng yengeholec kpatulelu ngiyeebongka bafuwacebaiboc. <sup>34</sup> Bafuwacebaboc yengi edocepalu yanguc miibong, "Sugucne ye noine homackacni gboliyelu fangkegac, ye Saimon fikecnogachac!" <sup>35</sup> Mibong yeki yefewa yekela wiyc fikewec, ailu Yesudi bret bauckeme ngani-motoiboc, yogolec siduc edocebaiboc.

### *Yesudi alingfocene fikyelewec*

*Mat 28:16-20; Mrk 16:14-18; Yoa 20:19-23*

<sup>36</sup> Edocebaboc yenge yowa yogo ngagelu ngiyeebongka, Yesu yeicne hewacnginang domalu yanguc edocebawec, "**Kwele-mogung ngengela fana.**"

<sup>37</sup> Inguc mime yenge kwatackelu hangocebame yanguc ngageibong, "Ngic ilucine nganigabeleng."

<sup>38</sup> Inguc ngagebong miwec, "Ngenge omale mimedec ailu ngageboc aigaing?" <sup>39</sup> Ibac nameuc gagabac, ngenge hige-molene nganining. Iluc yengebac luwe-biuc mikac. Ilec wele oiyacnulu ngagening, nabac luwe-biuckolec."

<sup>40</sup> Inguc milu hige-moleine edalicebame <sup>41</sup> yenge kwatackeibong. Ailu beliyelu sifu mi ngagesingkeibong. Aime yedi uwayeletu yanguc miwec, "**Ngenge nosing monic lobong ngiyegac, me?**" <sup>42</sup> Mime yenge misa-sic lobeicnele nebocene lacnobong <sup>43</sup> balu dongenginang nowec.

<sup>44</sup> Nolu yanguc edocebawec, "Ngengeholec gaibawa yanguc biyac edocngebaiba. **Wiyac sasawa nale ngagelu Wapongte yefe-yowa Mosesdi kwelelengkewec,** nga Wapongte siduc-mimi ngic yengele hibiwa, ailu Miti geewa kwelengkeicne fagac, yogo sasawa noine fikedaic."

<sup>45</sup> Inguc milu yedi iwahac mime ngage-ngagengineng yegengkeme, Wapongte hibi ngage-motoibong. <sup>46</sup> Ailu yanguc taockelu miwec, "Ilec ailu yanguc kwelengkeicne fagac. Mesia ye doicka webong homame hadeng habackangka hatacmac gboliyelu fangkedaicte." <sup>47</sup> Aime yenge yele wacka kwelengineng hefaliyebong, bikic hegileyelenale yefe yogo Yerusalem mackacni fungkelu ngic-nigic himongne himongne sasawa yowa edocebalu weduyelebong hikedaicte. <sup>48</sup> Aime ngengela aibaba yogo hocne dongenginang fikegac, yogo mibong yegengkedaic. <sup>49</sup> Ngagegaing, Mamacnedi mipangkelu miwec, nani yogo salengelebe badaing. Ailu

---

\* **24:27:** Mosesle hibi yenge Wapongte hibi molic-molic yogo 5: Fike-fike, Wahikeicne, Depec-babale bole, Himong kisiwa, nga Yefe-yowa. **24:27:** Mige 22:1-21; Yes 53 **24:34:** 1Kor 15:4-5 **24:37:** Mat 14:26 **24:44:** Luk 9:22 **24:48:** Yoa 15:27; Sale 1:8

ngenge taon yago mi hegileebongka wilengkacni tapili ngeledaicte, yogo noine."

*Yesu honocmengka fewec*

*Mrk 16:19-20; Sale 1:9-12*

<sup>50</sup> Aime Yesu ye molickeyeleme taon hegilelu lobina mac-kpisicna hikelu iwa moleine bafangkelu mimi-madic milu edocebawec. <sup>51</sup> Inguc milu gaemewa, Wapongti bame honocmengka fewec. <sup>52</sup> Feme yenge afeelu beliyebenangkelu Yerusalem hatacmac hefaliye hikelu, <sup>53</sup> damengsoc Ibumacka galu Wapong mitengkelu gaibong.

## Yoanedi Yesule Siduc Madicne Kwelengkewec

### *Mimi-yegeng yowa*

Yesu homalu homackacni gboliyelu fangkeme hifa 50 ngama ingucne motome, Yoanedi hibi yago kwelengkewec. Yoane yogo ye Yesule mic-tengteng monic, ye Yoane misa-lowac miyac. Dameng iwa ngic ye kwelengkelu yeicnele “na” me “nonge” mi milu kwelengkewec. Ye ngic monic ingucne “ye” me “yenge” milu kwelengkewec. Yoane ye aibaba yogo balaibewec. Aime dameng gocna yeicne ngagelu “Yesudi mic-tengteng angac ngagecnoaigac” inguc kwelengkewec.

Mataio, Mareko, nga Luka, yenge molickelu Yesule siduc kwelengkeibong. Aime lobeina Yoanedi Yesule siduc kwelengkewec, yowa gocne mi kwelengkeibong, yogo kwelengkewec. Yesule fungine yegengkenale hibi yago kwelengkewec. Ailu 20:31 iwa hibi fungine yanguc kwelengkewec, “Yesu ye Mesia, ailu ye Wapongte Madec, ngenge yogo ngagesingkelu yele wacka gaga baningte hibi yago kwelengkeicne fagac.”

### *Yowa yago hibi nebocina fagac*

1:1-18 Molic-molic yowa: Yesu fungineinele siduc

1:19–10:42 Yesu yowaine nga aibabainedi yeicne fungine bayegengkewec

11:1–12:50 Homac nga gagale siduc, ailu Yesu ye ngictau nga kwelec kwekwe doicinoholec yogo bayegengkewec

13:1–20:31 Yesu yeicne malicpongka homalu gboliyelu fangkewec, yoglec fungine bayegengkewec

21:1–25 Yesudi mic-tengtengfocine hatac fikeyeleme Yoanedi yowa moto-motoine kwelengkewec

### *Wapongte Yowadi ngic fikewec*

<sup>1</sup> Esecne fungina molickelu, monic wacine Yowadi gawec. Nga Yowa ye Wapongkolec gawec. Ailu Yowa yeuctihac Wapong. <sup>2</sup> Ailu ye hocne esecne fungina molickelu Wapongkolec gawec. <sup>3</sup> Aime Waponti mime Yowadi wiyac sasawa kwefickeyackewec. Wiyac sasawa fikelu fayackegac, yogo yengungthiac monic mi fikeibong. <sup>4</sup> Yowa yela hocne gaga fawec. Aime gaga yogodi ngic-ngigac yengele Angoc ailu Wapongte yefe noine edalicebawec. <sup>5</sup> Aime Angohti kundung kweme angoleme, kundungti Angoc yogo someckenale aibibiyelu hegilewec.

### *Yesu ye Gaga nga Angocte fungine*

<sup>6</sup> Waponti ngic monic saleme kwesiwec, yele wacine Yoane. <sup>7</sup> Yedi Angoc yoglec mime yegengkeme, Angoc yogodi ngic-ngigac bacebame angolen-ingte kwesiwec. Ye kwesilu ngic-ngigac sasawadi Angoc yogo ngagesingken-tinge miwec. <sup>8</sup> Ye yeicnebac Angoc yogo miyac. Yebac Angoc yogo mime yegengkenale kwesiwec.

<sup>9</sup> Aime Angoc yogo noinebenang, ye himongka kwesilu ngic-ngigac sa-sawa bacebame angolecaigaing. <sup>10</sup> Wapong ye Angohti himong nga wiyac sasawa bayackeme, Angoc yogodi himongka game ngic-ngigac yenge ye mi ngani-motoibong. <sup>11</sup> Ye yeicne alingfocine yengela kwesime yengi mac mi

holecnoibong. <sup>12</sup> Aimebac ngic-ngigac mac holecnolu wacine ngagesingkeibong, yenge nalic Wapong adu-madecfocine ainingte miwec. <sup>13</sup> Yele adu-madec yogo yenge ngic sackacni, me socte angackacni me ngic monicte angackacni monic mu fikeibong, miyac. Yenge Wapong yeuctihac mime fikeibong.

<sup>14</sup> Aime Yowadi ngic soc-biuckolec ailu hewacnonggang gawec. Madec moniyang yedi hocne galu Mamactacni wac feicne balu gawec, wac feicne yogo hocne nganiibeng. Yogo kwele-madicte wiyc nga yowa noine wakey-ackeicne fagac.

### *Yoane ye Yesule yefe baba*

<sup>15</sup> Yoanedi yele fungine mime yegengkeme wackelu yanguc miwec, "Na yele hocne yanguc edocngebaiba, 'Ngic lobena kwesilu gagac, ye na mi fi-keebewa yedi biyachac gaweete na ewalicnugac.' " <sup>16-17</sup> Yefe-yowadi Mosesla kwesime baibeng. Nga kwele-madic ailu yowa noine yogobac Yesu Kristo-holec kwesiwec. Ailu ye kwele-madic bucbuchac facnogac, yogodi nonglang moto-motoine mikac kwesinolecaigac. <sup>18</sup> Monicti Wapong monic mi nganiwec, miyac. Madecine moniyang sugudi Mamacine emeina wetackelu gacaigac, ye Wapong. Yedi Mamacte fungine mime yegengkenolewec.

### *Yoane boleinle fungine*

*Mat 3:1-12; Mrk 1:7-8; Luk 3:15-17*

<sup>19</sup> Yuda ngic Yerusalem taonka gaibong, yengi depec-baba ngic nga Liwai aling gocne salecebabong Yoanelu hikelu yanguc uwacnoibong, "Ga ma ngic?"

<sup>20</sup> Uwacnobong, ye yeicne fungineine mi hesongkeyelewec. Ye edocebalu yanguc mime yegengkewec, "Na Mesia miyac." Yoane ye inguc mime yegengkewec.

<sup>21</sup> Inguc mime yengi hatacmac uwacnoibong, "Aime Elaiya hatac kwesidaicte, ga ye, me?"

Uwacnobong yedi miwec, "Na ye miyac."

Mime miibong, "Aime Wapongte siduc-mimi ngicbenang kwesinale micide, ga ye, me?"

Mibong "miyac" miwec.

<sup>22</sup> Inguc mime yanguc miibong, "Aime ga maa? Nonge ngic salecnuba-gaing, yengela yowa ameine wenuc bahikelu edocebadabelengte? Gageic-nele wenuc migic?"

<sup>23</sup> Inguc mibong Yoanedi yanguc edocebawec, "Himong kisiwa misaine mikacka yowa-malac monic fikegac, yogo nani hocne yanguc wackegabac, 'Ngenge Sugucnele yefe hole-wenengkening.' " *(Yes 40:3)*

Siduc-mimi ngic Yesaiyadi nale inguc miwec."

<sup>24</sup> Aime ngic hikeibong yengele alingkacni Farisaio gocne yengi <sup>25</sup> Yoane yanguc uwacnoibong, "Ga Mesia miyac, nga Elaiya miyac, ailu Wapongte siduc-mimi ngic miyac. Aime ga omale ngic-ngigac misa lowayelecaigic?"

<sup>26</sup> Inguc mibong Yoanedi bafaliyelu yanguc edocebawec, "Na misa lowan-gelecaigabac. Aimebac Yuda ngic-ngigac ngengele hewacka ngic monic gagac, ngenge ye mi ngagegaing. <sup>27</sup> Ye nale lobewa kwesilu gagac, ye feicne aigacte na waweweine ingucnedi yele hige-ebecte mucine lukebe

nalic mi madickedaicte.” <sup>28</sup> Yoane ye Betani macka Yodan misa nebocina misa lowayelelu gawec, iwa wiyc yogo fikewec.\*

### *Yesule fungine*

<sup>29</sup> Mac saeme Yoane ye domame Yesudi yela weleme nganilu ngic-ngigac yanguc edocebawec, “Nganining, yogo Wapongte lama madecine<sup>†</sup>, ye himongtowa yagolec ngic-ngigac sasawa yengele bikic baickedaicte. <sup>30</sup> Yele hocne ngagelu yanguc miiba, ‘Ngic monic lobena kwesilu gagac, ye na mi fikeebewa yedi biyachac gawecte na ewalcnugac. <sup>31</sup> Na ye mi ngage-motoiba. Aime Israel ngic-ngigac ngenge yedi yegengkenale na kwesilu misa lowangeleiba.’”

<sup>32</sup> Yoanediy yanguc mime yegengkewec, “Na Tili Asu nganibe, ye tudiling nangole silic ingucne honocmengkacni walu yele feiwa ngiyewec, yogo nganiiba. <sup>33</sup> Aime na ye mi ngage-motoebewa Wapongti salecnuwec, ye misa lowangelelebe, ailu yanguc edocnuwec, ‘Asudi walu ngic yela ngiyeme nganidamecte, yedibac Tili Asudi lowangeledaicte.’ <sup>34</sup> Na yogo hocne nganilu yanguc biyachac mibe yegengkewec, ngic yedi Wapongte Madec.”

### *Yesu mic-tengtengfocene*

<sup>35</sup> Aime mac saeme, Yoane ye mic-tengtengfocene yengelacni mic-tengteng yaeckang yekeholec mac iwa hatacmac domaibong. <sup>36</sup> Domaebongka Yesu hikeme nganilu mic-tengtengkocene yanguc edocepwec, “Nganinic, yogo Wapongte lama madecine.”

<sup>37</sup> Inguc mime ngagelu mic-tengtengkocene yeke Yesu balaibelu hikeiboc.

<sup>38</sup> Hikeboc Yesudi hefaliye nganicepalu yanguc uwayetewec, “**Ngeke oma wiyacte aingetegac?**”

Inguc uwayetemete miiboc, “Rabai,” (yogolec fungine wewedu bafaliye-icne) “ga mac wenuwa gagic?”

<sup>39</sup> Inguc miboc yanguc edocepwec, “**Ngeke welelu nganinic.**” Inguc mime yenge momoc hikelu mac gawec yogo nganiiboc. Aime hadeng iwa dameng 4 kilok biyac aiwechte ailu yeholec ngiyeiboc.

<sup>40</sup> Aime Yoanele yowa ngagelu Yesu balaibeiboc, yekelacni monic Endru, ye Saimon Pita gbaine. <sup>41</sup> Yedi Yesu nganilu hatacmac molickelu hefaliye hikelu haeine Saimon bafuwalu yanguc edowec, “Noke Mesia bafuwagab-elec.” (Mesia yogolec fungine Kristo bafaliyeicne.)

<sup>42</sup> Inguc milu Saimon mengockeme Yesula hikeboc, Yesudi ye nganilu yanguc miwec, “**Ga Saimon Yoane monicte madec, yogo noine. Aimebac gale wacgone gblolicne Kefas minoga.**” (Yogolec fungine posa, nga Grik yowawa Pita.)

<sup>43</sup> Mac saeme Yesu ye Galili prowinswa hikenogale ngagelu hikelu, ngic monic wacine Filip, ye bafuwalu yanguc edowec, “**Ga wele na balaibecnuc.**”

<sup>44</sup> Filip nga Endru ailu Pita yenge Besaida taonkacni.

<sup>45</sup> Aime Filip ye ngic monic wacine Natanael, ye bafuwalu yanguc edowec, “Mosesdi yefe-yowale hibiwa kwelengkewec, nga siduc-mimi ngic yengi inguchac kwelengkeibong, nonge ngic yogo bafuwagabeleng. Yogo Yesu hocne, Yosefele madec, Nasaret taonkacni.”

<sup>1:27:</sup> Yoa 1:15      \* <sup>1:28:</sup> Betani yogo mac yaeckang yekele wac. Monic Yerusalem emeina, nga monic Yodan emeina inguc faiboc.      <sup>† 1:29:</sup> Israel ngic-ngigac yenge bikicngineng miyac ainale lama madecine depec lobelui gaibong.      <sup>1:29:</sup> Yes 53:6-7; 1Pi 1:18-19      <sup>1:30:</sup> Yoa 1:15      <sup>1:32:</sup>

Mat 3:16      <sup>1:34:</sup> Mat 3:17      <sup>1:36:</sup> Yoa 1:29      <sup>1:40:</sup> Mat 4:18-20      <sup>1:42:</sup> Mat 16:18      <sup>1:45:</sup> Yef 18:18; Yes 7:14; 9:6; Yer 23:5; Esek 34:23

<sup>46</sup> Inguc mime Natanaeldi yanguc miwec, “Nasaret mac yogo mac omane. Aime mac iwa wiyc macne monic nalic fikedaicte, me?”

Inguc mime Filipdi miwec, “Ga welelu nganic.” Mime hikeiboc.

<sup>47</sup> Hikeboc Yesudi Natanael nganime yela leme yanguc miwec, “**Nganining, ngic yago Israel ngic noine, yela lokwesac nga kwesac-aibaba monic mi fagac.**”

<sup>48</sup> Inguc mime Natanaeldi yanguc uwacnowec, “Ga yefe wenucka ngagec-nugic?”

Inguc mime Yesudi yanguc edowec, “**Filip ye ga mi wacgume welegabiye, dameng iwa fik yoc fungina ga geicnac ngiyeengka biyac nganicgugabac.**”

<sup>49</sup> Inguc mime Natanaeldi yanguc edowec, “Wewedu, ga Wapongte Madec, Israel nongele Ngictau.”

<sup>50</sup> Inguc mime Yesudi bafaliyelu yanguc edowec, “**Ga fik yoc fungina ngiyeengka nganicgubac inguc edocgugabacte ngagesingnugic, me? Gacgu pasi yangucne hatacmac ewalilu sugucne hac fikeme nganidamecte.** <sup>51</sup> Foinac, honocmeng angkeme Ngicte Madec ye honocmengte liti ingucne aime, Wapongte angelofocine yela edelu fec-wac aibong nganicbadaingte, yogo noinebenang edocngebabac.”

## 2

### *Misadi waing aiwec*

<sup>1</sup> Hadeng yaeckang motome, Galili prowinswa Kana taonka baba-tumang fikewec. Aime Yesu nenggacine iwa hikeme, <sup>2</sup> Yesu nga mic-tengtengfocene yenge iwa momoc hikenigte wacebaibong. <sup>3</sup> Aime yenge waing misangineng miyac aime, nenggacinedi Yesu yanguc edowec, “Waing misangineng miyac aigac.”

<sup>4</sup> Inguc mime Yesudi yanguc edowec, “**Ngigac, ga wiyc migic, yogo nale miyac, nale dameng yakuhuc mi aigachac.**”

<sup>5</sup> Inguc mime nenggacinedi bole-ngic yanguc edocebwec, “Ye wiyc monic ainingte edocngebame ngenge yowaine sasawa balaibedabieng.”

<sup>6</sup> Aime Yuda ngic-ngigac yenge suwe-suwe aibabangineng balaibelu hebec misaineholec lobong ngiyeicaigac. Ilec aihu hebec posadi baicne 6 inguc iwa biyac ngiyeicne. Hebec moniyang moniyang yogo yenge 100 lita, ingucti ngiyeibong.

<sup>7</sup> Aime Yesudi bole-ngic yanguc edocebwec, “**Ngenge misa filalu hebecka kwebong haulu wakeyackena.**” Inguc mime yenge misa filalu kwebong haulu wakeyackewec.

<sup>8</sup> Kwebong haulu wakeme, yedi yanguc edocebwec, “**Ngenge yakumac misa yogo filalu nosing-damongta balening.**”

Inguc mime yenge filalu balu leibong. <sup>9</sup> Balu lebong misadi hefaliyelu waing misa aime, nosing-damonti waing misa nganilu wenuwacni bagaingte ngageme kpungkewec. Aime bole-ngic misa filalu baleibong, yengi sugu ngageibong. Inguc nganilu nosing-damonti molewa babacte ngic ye micname welewec. <sup>10</sup> Weleme edolu yanguc miwec, “Aibabanonggeng yanguc fagac, molickelu waing misa madicne ngic-ngigac gumecebabeng noicaigaing. Aihu kwelengineng sifuweme waing misa angacine kpiscinemac gumecebacaigabeleng. Aime gagibac waing misa madicne sangkeng fayec. Aime yakumacbac bafuwagic.”

<sup>11</sup> Yesu ye Galili prowinswa Kana taon iwa galu ngagesingkeningte pasile maaine yogo molickelu bawec. Balu yeicne wacine feicne inguc bayegengkeme mic-tengtengfocene yenge yogo nganilu ye ngagesingkeibong.

*Woc-wiyac salebong Yesudi yebicebawec  
Mat 21:12-13; Mrk 11:15-17; Luk 19:45-46*

<sup>12</sup> Gaebongka motome Yesu nga nenggac gbafocene ailu mic-tengtengfocene yenge momoc Kapeneam taonka haulu iwa hadeng gocne gaibong. <sup>13</sup> Gaebongka Yuda ngic-ngigac yengele Ewalicebaicnele hombangte dameng bangkale weleme, Yesu ye Yerusalem taonka fewec.

<sup>14</sup> Felu nganime ngic yenge Wapongte Ibu-macte oda kwelina depekte lama-bulumaka nga tudiling nango lolu saleibong. Nga gocne yenge ngiyelu himong monickacni yengele moneng yogo bafaliyu yengileng ibule moneng yelelu gabong nganicebawec. <sup>15</sup> Nganicebalu indulu monic mideckeicne balu yogodi ngic sasawa lama-bulumakafocnginengkolec Ibumackacni weyebic ayeleme hauibong. Hauyackebong ngic moneng lanaganac gaibong, yengele moneng sotiyewec, ailu tebongineng bafalyewec. <sup>16</sup> Bafaliyu ngic tudiling nango saleibong, yenge yanguc edocebawec, “**Ngenge wiyacngineng yogo baickening! Ngenge Mamacnele mac yago aibong woc-wiyac sale-salele mac mi aidaic.**”

<sup>17</sup> Aibaba yogo fikeme mic-tengtengfocene yenge yowa monic Wapongte hibiwa yanguc kwelengkeicne fawec, yogo ngagesiibong,

“Gale macte ailu sanangnehac dogbac ailu gadacte.” *(Mige 69:9)*

<sup>18</sup> Yesudi inguc aime Yuda ngic yengi bafaliyu yanguc edoibong, “Ga aibaba yogo aigamekte, pasile maaine weningucne baengka nganilu tapiligone fagac, inguc ngagedabelengte?”

<sup>19</sup> Inguc mibong Yesudi bafaliyu yanguc edocebawec, “**Ngenge ibu-mac yago hembalackebong, na hadeng habackangte kwelina yogo bafangkedacte.**”

<sup>20</sup> Inguc mime Yuda ngic yengi yanguc miibong, “Ngic yenge Ibu-mac yago hifa 46 inguc bagacgu badickeibong. Aime gagibac hadeng habackangte kwelina nalic bafangkedamekte migic, me?” <sup>21</sup> Yesubac yeicne sokte ibumacka nangeng yowa holelu miwec. <sup>22</sup> Gacgu Waponti homackacni bagboliyeme fangkeme, mic-tengtengfocene yenge Yesudi yowa inguc miwec, yogo ngagesiibong. Ngagesilu Wapongte hibiwa yowa kwelengkeicne fagac nga Yesule yowa momoc ngagesingkeibong.

<sup>23</sup> Aime Yesu ye Yerusalem iwa Ewalicebaicnele hombangte damengka iwa galu pasile maaine bame, ngic-ngigac bocyacti nganilu wacine ngagesingkeibong. <sup>24</sup> Aime Yesu yeuctihac ngic-ngigac ngage-ngagengineng ngani-motoyackewec. Ilec ailu yengele angac mi balaibewec. <sup>25</sup> I yangucte, ye yeuctihac ngic-ngigac yengele kwelewa wiyac sasawa fawec, yogo biyac ngagewecte ailu, ngic monicte fungine uwalu ngagenogale mi aiwec.

### 3

#### *Nikodemus*

<sup>1</sup> Farisaio ngic monic wacine Nikodemus, ye Yuda ngic-ngigac yengele ngic micne monic gawec. <sup>2</sup> Aime ye debocka Yesula kwesilu yanguc miwec,

“Wewedu, ga Wapongti salecgume wewedu bole balu gagic, yogo ngagegabeng. Ga pasile maaine bacaigic, bole ingucne monicti Wapong mikac galu nalic mi badaicte.”

<sup>3</sup> Inguc mime Yesudi bafaliyelu yanguc edowec, “Foinac, monic ye hatacmac gbolicne mi fikedaictewa, ye Wapongte ngani-damongte kwelina nalic mi gadaicte, yogo noinebenang edocgugabac.”

<sup>4</sup> Inguc mime Nikodemusdi miwec, “Ngic biyac suguleicnedi wenucka hatacmac fikedaicte? Ye nenggacinele gobe kwelina nalic mi fedaicte. Ailu hatacmac nalic mi fikedaicte.”

<sup>5</sup> Aime Yesudi bafaliyelu yanguc edowec, “Foinac, monic ye misa Asuholecka gbolicne mi fikedaicte, ye Wapongte ngani-damongka nalic mi fedaicte, yogo noinebenang edocgugabac. <sup>6</sup> Aime ngic soc-biuckcoleckacni fikedaicte, ye ngic soc-biuckcolec silichac. Nga Asuwacni fikedaicte, ye Asu silichac. <sup>7</sup> Ga hatac gbolicne fikete edocgube mi kwatackenong. <sup>8</sup> Gbelong ye yeicne angac balaibelu weme ucine ngagecaigic. Aime ye wenuwacni welecaigac ailu wenucka hikecaigac, yogo mi ngagegic. Ngic-nigigac Asuwa fikedaingte, yenge sasawadi silicngineng ingucnehat.”

<sup>9</sup> Inguc mime Nikodemusdi yanguc edowec, “Yowa sasawa migic, yogo yefe wenucka fikedaicte?”

<sup>10</sup> Inguc mime Yesudi bafaliyelu yanguc edowec, “Ga Israel ngic-nigigac yengele wewedudi wiyac yogo wenucka mi ngage-motogic, me? <sup>11</sup> Foinac, nonge ngagecaigabeleng, yogo micaigabeleng. Nga nganicaigabeleng, yogo mibeng yegengkecaigac, yogo noinebenang edocgugabac. Aime ngenge yowa yogo mi ngagepangkecaigaing. <sup>12</sup> Na himongte wiyacka gbolicne fikeningte yowa milu edocngebabe ngenge mi ngagesingkeibong. Aime honocmengte wiyacte edocngebabadetewa, ngenge yogo wenucka ngagesingkedaingte? <sup>13</sup> Monicti honocmengka mi fewec. Ngicte Madec honocmengkacni wawec, ye moniyangti sugu honocmengte wiyacte edocngebadaicte.

<sup>14</sup> “Mosesdi himong kisiwa misaine mikacka hema moledi baicne bafangkelu kpembengkeme domawec,\* ngic yenge aibaba silicine ingucnehat Ngicte Madec bafangkebong domadaicte. <sup>15</sup> Ilec ailu ngic-nigigac ye ngagesingkegaing, yenge sasawadi gaga-sanang badaingte.”

<sup>16</sup> I yangucte, Wapongti himontowale ngic-nigigac yengele kwele-angac sugucnehat ngagewecte ailu, Madecine moniyang sugu lome himongka wawec. Ilec monicti ye ngagesingkegac, ye mi homadaicte, ye gaga-sanang bagac. <sup>17</sup> Wapongti Madecine himontowale ngic-nigigac bikicngineng wosaelu mimoctonale mi saleme wawec, miyac. Ye himong ngic-nigigac yengele bikicte ameine bame wasecne ainingte himongka saleme wawec. <sup>18</sup> Aime monicti Madecine ngagesingkeme, ye yowawa mi logac. Nga monic ye Wapong Madecine moniyangte wac mi ngagesingkegacka, yebac yowawa biyachac mimoctowec.

<sup>19</sup> Yowa mimoctowecte fungine yogo yanguc, Angocti himongka kwesime, ngic-nigigac aibabangineng sowacnele ailu kundungte angac ngagelu Angoc

<sup>3:3:</sup> Mat 18:3; 1Pi 1:23      <sup>3:6:</sup> Yoa 1:13      \* <sup>3:14:</sup> Hemale siduc yogo Himong Kisiwa 21:6-9 iwa kwelengkeicne fagac. Hema hicebame ilucine kpembengkeicne yogo nganilu mi homalu gaibong.

<sup>3:14:</sup> Him 21:9; Yoa 8:28; 12:32      <sup>3:15:</sup> Yoa 20:31      <sup>3:16:</sup> Yoa 3:36; 10:28; Rom 5:8; 8:32; 1Yoa 4:9-10      <sup>3:17:</sup> Luk 19:10      <sup>3:18:</sup> Yoa 5:24

hegileibong. <sup>20</sup> Ngic-ngigac aibaba sowacne aicaigaing, yenge aibabangineng sowacne yegeni mi fikenale ailu, sasawadi Angoc lobe holecnolu Angocka mi kwasigaing. <sup>21</sup> Aime monic ye aibaba noine aicaigac, ye Wapongte tapiliwa boleina bacaigac, yogo yegengkenale Angocka kwasigac.

### *Yoanedi Yesule mine yegengkewec*

<sup>22</sup> Gacgu Yesu ye mic-tengtengfocene yengeholec Yudeya himongka hikelu iwa galu ngic-ngigac misa lowayelewec. <sup>23</sup> Dameng iwa Salim mac emeina mac monic wacine Ainon, iwa misa bocyac fawec. Ilec Yoane ye inguchac iwa game ngic-ngigac yenge yela hikebong, yedi inguchac misa lowayelelu gawec. <sup>24</sup> Aibaba yogo Yoane muc-macka mi loebongka fikewec.

<sup>25</sup> Aime Yoane mic-tengtengfocene nga Yuda ngic monic, yenge Yuda yengele suwe-suwe aibabanginengte ailu yowanginengti fec-wac aiwec. <sup>26</sup> Aime mic-tengteng yenge Yoanela lelu yanguc edoibong, "Wewedu, ngic gaholec Yodan nebocina game gagi yele fungine miyengka yegengkeme edocnubaing, ye hocne ngic-ngigac misa lowayeleme sasawadi yela hikey-ackegaing."

<sup>27</sup> Inguc mibong Yoanedi yanguc edocebawec, "Wapong honocmengka gagac, yedi ngic monic wiyc mi lacnodaictewa, ye yogo nalic mi badaicte.

<sup>28</sup> Na Mesia miyac. Nabac ye yefe molickecnobele Waponti bole-yowa yogo neleme kwsieiba. Yogolec hocne biyachac edocngebaiba. Aime ngenge ngageibong, yogo hocne mibong yegengkegac. <sup>29</sup> 'Ngic ye ngigac bingecineholec ye ngigac badaicte. Aime ngic agoinedi yele siduc ngagelu belyedaicte.' Aime na ingucnehas yakumac belic-belicti kwelene wakegac.

<sup>30</sup> Yele siducti suguleme naledi wadaic."

<sup>31</sup> Wilengkacni wawec, ye wiyc sasawale feicnetowangineng aigac. Aime ngic himongkacni fikeicnebac, ye himongkacni. Ilec ailu himongte yowa micaigac. Nga honocmengkacni wawecti wiyc sasawale feicne aiwec gagac. <sup>32</sup> Ailu ye wiyc wilini fagac, yogo ngani-ngagec ailu gawec, yogolec mime yegengkeme, monicti yele yowa mi sebilelu gagac. <sup>33</sup> Aime monic ye yowa yogo balu sebilegac, ye Waponti yowa noine micaigac, yogo mime sanangkegac.

<sup>34</sup> Waponti ngic salewec, ye Wapongte yowa migac. I yangucte, Waponti Tili Asu heuckelu nebocine sugu mi yelegac, miyac. <sup>35</sup> Mamac ye kweledi Madecinele angac ngagelu wiyc sasawa moleina lowec. <sup>36</sup> Ilec monic ye Wapongte Madec ngagesingkegac, ye gaga-sanangkolec gagac. Nga monicti Madecine lobe holecnogac, ye Wapongte aalicti yele feiwa feme gagac.

## 4

### *Samaria ngigac*

<sup>1</sup> Farisaio yenge Yesule siduc yanguc ngageibong, "Yedi mic-tengtengfocene bacebalu misa lowayelegac. Aime yele mic-tengtengfocene yengi Yoanele mic-tengtengfocene yengele dzale ewaligac." <sup>2-3</sup> Yesu ye yowa inguc ngagelu Yudeya himong hegilelu Galili prowinswa hatacmac hefaliye hikewec. Yudeya himong iwa Yesu yeuctihac ngic-ngigac misa mi lowayelewec, mic-tengtengfocene yengi sugu ngic-ngigac misa lowayeleibong.

<sup>4</sup> Iwa hikelu Samaria himong falockenogale ailu, <sup>5</sup> Samaria yengele mac monic wacine Sika, iwa hikewec. Sika mac yogo Yakobodi madecine Yosefele himong mimoctocnowec, yogolec emeina ngiyewec. <sup>6</sup> Aime Yesu ye Yakobole misa long monic faliicne ngiyewec, iwa yefe hikecgua tapiliine mikac aime misa long yogolec emeina walu ngiyewec. Dameng iwa 12 kilok ingucne aime ngiyewec.

<sup>7-8</sup> Ngiyeme mic-tengtengfocene yenge nosing fuli banogale macka hukeibong. Hikebong Samaria ngigac monic ye misa filanogale kwsime, Yesudi yanguc micnowec, “**Misa baweleng nobe.**”

<sup>9</sup> Inguc mime ngigac yedi miwec, “Ga Yuda ngicti wenucka Samaria ngigac nala misale migic?” Yuda ngic-ngigac yenge Samaria ngic-ngigac yengeholec nogumecngineng mi fawecte ngigac yedi inguc miwec.

<sup>10</sup> Inguc mime Yesudi yanguc edowec, “**Ga Wapongti wiyc gelenogale aigac, nga madi misale uwagelegac, ga yele fungine ngage-motolu uwacn-odengka, ibac yedi misa gagaineholec geledec.**”

<sup>11</sup> Inguc mime ngigac yedi miwec, “Sugucne, ga pakec mikac. Nga misa long yogo dalicne. Aime misa gagaineholec yogo wenuvacni filadamecte? <sup>12</sup> Ngambononggeng Yakobodi\* misa long yago nolewec. Ga ye ewaligic, me? Ye yeicne nga madecfocene ailu lama-bulumakafocene, yenge misa yagowacni nolu gaibong.”

<sup>13</sup> Inguc mime Yesudi bafaliyelu yanguc edowec, “**Ngic-ngigac misa yago noacaigaing, yenge sasawadi misale hatacmac aiyeledaite.**” <sup>14</sup> Aime monic ye nani misa lacnobe nodaicte, ye misale hatacmac mi aicnodaicte. Aime misa lacnodacte, yogodi yela misa dongeine ingucne fikelu gaga-sanang **bafuwacnodaicte.**”

<sup>15</sup> Inguc mime ngigac yedi miwec, “Sugucne, na misale hatacmac mi aineleme misa filanogale yagowa hatacmac mi kwsidac. Ilec ga misa yogo neleng nobe.”

<sup>16</sup> Inguc mime Yesudi bafaliyelu yanguc edowec, “**Ga hikelu ngawegone micnoengka kwesinic.**”

<sup>17</sup> Inguc mime ngigac yedi miwec, “Na ngawene mikac.”

Mime Yesudi yanguc edowec, “**Na ngawene mikac migic, ga yowa yogo noine migic.**” <sup>18</sup> **Ga ngic 5 biyachac bacebaing.** Aime ngic yanguctihac **baengka ngeke momoc gagabiyc, ye gale ngawe miyac. Yogo foinac migic.**”

<sup>19</sup> Inguc mime ngigac yedi miwec, “Sugucne, ga siduc-mimi ngic, yogo yakumac ngage-motogabac. <sup>20</sup> Ngambofocnonggeng yenge kupic yagowa Wapong afeelu gaibong. Aime Yuda ngengibac yanguc micaigaing, ‘Ngic-ngigac sasawadi Yerusalem iwa sugu Wapong afeedaing.’”

<sup>21</sup> Inguc mime Yesudi yanguc edowec, “**Ngigac, ga yowane ngagesingkec, dameng monic kwesidaicte, iwa ngic-ngigac ngenge kupic yagowa me Yerusalem iwa sugu Wapong hatacmac mi afeedaingte.**” <sup>22</sup> Ngenge yele fungine mi ngage-motolu moc afeecaigaing. Bikite ame baba nga wasecne ainogale tapili, yogo Yuda ngic-ngigac nongelacni fikewec. Aime Wapong ngage-motolu afeelu gagabeleng.

<sup>23</sup> “Dameng yogo kwesilu gagac, yogo biyac kwesigac. Yogowabac ngic-ngigac noine afecaigaing, yenge asuwa nga pasi noina Mamac afeedaingte.

\* **4:5:** Fike 33:19; Yos 24:32    **4:9:** Esr 4:1-5    **4:10:** Yoa 7:37-38; Miye 21:6    \* **4:12:** Yakobo ye Samaria ngic-ngigac nga Yuda ngic-ngigac, yengele ngambo aiwec.    **4:12:** Yoa 8:53    **4:14:** Yoa 6:35    **4:20:** Yef 12:5-14; Mige 122:1-5    **4:22:** 2Ngt 17:29-41; Yes 2:3; Rom 9:4-5

Mamacti ngic-ngigac aling ingucne yengele ngageme madickedaicte.  
<sup>24</sup> Wapong ye Asu. Ilec ailu ngic-ngigac afeenogale milu,asuwa nga pasi noina afeedabieng."

<sup>25</sup> Inguc mime ngigac yedi miwec, "Mesia, wacine monic Kristo mi-caigaing, ye fikenale miicne yogo ngagegabac. Yedi kwesilu wiycasasawa mime yegengkenoledaicte."

<sup>26</sup> Inguc mīme Yesudi yanguc edowec, "Yogo na hocne yowa edocgugabac."

### *Yesule nosing*

<sup>27</sup> Inguc milu domame, mic-tengtengfocene yenge mackacni hefaliye kwe-siibong. Kwesilu nganibong, Yesu ye ngigac yeholec yowa mingagec aiboc nganilu kwatackeibong. Aimebac monicti yanguc mi uwacnowec, "Ngigac, ga oma wiycate uwacnogic?" Me monicti Yesu yanguc mi uwacnowec "Ga ngigac yeholec oma wiycate migabiye?"

<sup>28</sup> Aime ngigac ye Yesule yowa ngagelu hebcine hegilelu macka hefaliye hikelu macfocene edocebalu yanguc miwec, <sup>29</sup> "Ngenge welelu nganining. Ngic monic nale aibaba esecne gaiba yogo ninic mifickenelegac. Ye Mesia mecene?" <sup>30</sup> Inguc mime yenge taon hegilelu Yesula kwesiningte kwesiibong.

<sup>31</sup> Kwiysiебongkahac mic-tengtengfocene yengi nosing nonale yanguc micnoibong, "Wewedu, ga nosing noc."

<sup>32</sup> Inguc micnobong yedi yanguc edocebaawec, "Nale nosing fagac, yogo ngenge mi ngagegaing."

<sup>33</sup> Inguc mime mic-tengtengfocene yengungtihac mingagec ailu yanguc miibong, "Monicti nosing bawelelu lacname nogac mecene."

<sup>34</sup> Inguc mibong Yesudi yanguc edocebaawec, "Salecnuwec, yele yowa bal-abelu boleine bagacgu bamoctodacte, yogodi nale nosing aigac. <sup>35</sup> Ngenge yanguc micaigaing, 'Nosing duwebeng tamacne 4 motome nosing noine aidaicte.' Na yowa monic edocngababe ngagening, ngenge dongengineng hilalu bolele nganining, nosing biyac noine ailu houwelu fagac. <sup>36</sup> Inguc aime nosing noine duwe-duwe ngic, nga noine baba ngic yeke momochac beliyedabiyeete. I yangucte, noine baba ngicti boleinle fuli balu gaga-sanangte noine inguchac balu kpaduckedaicte.

<sup>37</sup> "Aime, 'Monicti nosing duweme, monicti noine balu kpaduckedaicte.' Yowa inguc micaigaing, yogolec noine fikegac. <sup>38</sup> Ngic gocne yengi bole biyachac duweibong. Aime bole yogolec noine fikewec. Nga bole yogo ngengi mi duweibong. Aime nani bole iwa salecngebabehikelu noine balu kpaduckeibong. Ngenge yengele bole taockelu balu gagaing."

### *Samaria ngic-ngigac yengi Yesu ngagesingkeibong*

<sup>39</sup> Samaria ngigac yedi Yesule yanguc milu edocebaawec, "Ye nale aibaba esecne gaiba, yogo ninic mifickenelegac." Inguc miwecte ailu mac yowacni Samaria ngic-ngigac bocyacti Yesu ngagesingkeibong. <sup>40</sup> Ilec ailu Samaria ngic-ngigac yenge Yesula kwesilu yedi yengeholec hikelu ganale micnoibong. Aime ye hikelu hadeng yaeckang yengeholec gawec.

<sup>41</sup> Yesu ye iwa game ngic-ngigac bocyabenangti ye yowainele ailu ngagesingkelu <sup>42</sup> ngigac yanguc edoibong, "Nonge molickelu gale siducte ailu ngagesingkeibeng. Nga yakumacbac nongungtihac yele mickacni yowaine ngagelu ngagesingkegabeleng. Aime yedi hocne himongtowale ngic-ngigac sasawa nongileng Asa-baba ngic. Ye bikicte amenonggeng badaicte, yogo finac ngagegabeleng."

### *Kiyale madec bamadickewec*

<sup>43</sup> Aime hadeng yaekang motome, Yesu ye Samaria himong hegilelu Galili prowinswa hikewec. <sup>44</sup> Aime yeicnele biyac ngagelu yanguc miwec, “Wapongte siduc-mimi ngic monic ye yeicne himongka game, ngic-ngigac yenge ye alang mi bacnodaingte.” <sup>45</sup> Aime Galili ngic-ngigac yenge Ewalicebaicnele hombangte damengka Yerusalem taonka hikebong, Yesudi pasi sasawa bame nganiiibongte ailu ye Galili prowinswa hikeme, macfocine yenge ye hefoleibong.

<sup>46</sup> Aime Yesu ye Galili prowinswa Kana taonka misa bafaliyeme waing misa aiwec, iwa hatamac hefaliye hikewec. Hikeme iwa ngictaule kiya monic kwestiwec, yele madec Kapeneam taonka huc bame fawec. <sup>47</sup> Aime kiya ye Yesu Yudeya himongkacni hefaliyelu Galili prowinswa kwestilu gagac, inguc ngagelu yela hikelu madecine bame madickenale micnowec. Aime madec yogo ye biyac homanogale aiwec.

<sup>48</sup> Inguc mime Yesudi yanguc edowec, “**Ngenge pasile maaine nga pasi mi ngani-nganiine mi nganidabongka, nalic mi ngagesingkedabong.**”

<sup>49</sup> Inguc mime kiyadi miwec, “Sugcne, madecne homadaickale ga biyac wanong.”

<sup>50</sup> Inguc mime Yesudi yanguc edowec, “**Ga hikenong. Madecgone biyac madickelu gagac.**”

Inguc mime ngic ye Yesule yowa ngagesingkelu hefaliye hikewec.

<sup>51</sup> Hefaliye hikeemewa, kwelec kwekwefocene yengi kwestilu yefewa ba-fuwalu yanguc edoibong, “Madecgone biyac madickelu gagac.” <sup>52</sup> Inguc edobong, ye madickeyec, yogolec damengte uwayeleme yengi yanguc edoibong, “Awecnahac 1 kilok awelilicte, iwa socine mogungkeyec.”

<sup>53</sup> Inguc edobong mamacine ye ngagewec, “Yesu ye dameng yogowahacbenang salecnulu miyec, ‘Madecgone ye biyac madickelu gagac.’” Inguc ngagelu siduc edocebame ye nga golowacfocene yenge Yesu ngagesingkeibong. <sup>54</sup> Yesu ye Yudeya himongkacni hefaliyelu Galili prowinswa kwestilu, ngagesingkeningte pasile maaine iwa bame alecine yaeckang aiwec.

## 5

### *Betesda lifucka*

<sup>1</sup> Yogolec lobeina Yuda ngic-ngigac yengileng hombang monic kwestime Yesu ye Yerusalem fewec. <sup>2</sup> Felu Yerusalem taonka nu sugcne monic wacine Lamale nu, yogolec nebocene lifuc monic fawec. Yogo Hibru yowawa Betesda wackecaigaing, yogolec mecina dakec 5 faibong. <sup>3</sup> Aime dakec yogolec kwelina ngic-ngigac hucnginengkolec, yogo donge-pisic nga higesowac, ailu puling ingucne bocyahti falu gaibong. [Yenge misa yogodi uc fific ainale wangec facaigaing. <sup>4</sup> I yangucte, dameng gocna Sugcnele angelo monicti misa iwa kwesticaigac. Kwestime misa yogo uc fific aime, monic ye molickelu misawa haudaichte, ye hucine sasawa miyac aiyackedaichte.]\*

<sup>5</sup> Aime ngic-ngigac falu gaibong, yengele hewackacni ngic monic puling game hifaine 38 biyachac aiwec, ye iwa falu gawec. <sup>6</sup> Aime dameng

---

**4:44:** Mat 13:57    **4:45:** Yoa 2:23    **4:46:** Yoa 2:1-11    **4:47:** Mat 8:5-6    **4:48:** Yoa 2:18; 1Kor 1:22    **4:50:** Mat 8:13    **4:54:** Yoa 2:11    \* **5:4:** Hibi esecne Yoane kwelengkewec, yogo nganilu iwacni kwelengkebong kwelengkebong ofewec, yengelacni gocne 5:3b-4 iwa mi fagac. Ngic-ngigac yenge hibi kwelengkeicne yogo wosaelu nganibong Yoanedi mi kwelengkewec mecene.

dalicne iwa gawecte ailu Yesudi ye biyac nganilu ngagewecte ailu yanguc uwacnowec, “**Ga madickenogale aigelegac, me?**”

<sup>7</sup> Inguc mime puling yedi bafaliyelu yanguc edowec, “Sugucnene, misa uc fific aiamebac na ma ngicti baficnulu lifucka locnudaicte? Na haunogale aibe gocne yengi hepacnulu haucaigaing.”

<sup>8</sup> Inguc mime Yesudi yanguc edowec, “**Ga fangkelu dembenggone balu hikenong!**” <sup>9</sup> Inguc miyemewa ngic ye dameng yogowahac socine madickeme fangkelu dembengine balu hikewec.

Aime wiyac yogo Sabat damengka aiwec. <sup>10</sup> Aime Yuda ngic yenge ngic madickewec ye nganilu yanguc edoibong, “Yakumacbac dembenggone balu hiketic, bole yogo Sabat damengka baengka mi madickebac.”

<sup>11</sup> Inguc mibong bafaliyelu yanguc edocebawec, “Ngic bamadicnugac yedi salecnulu migac, “**Ga dembenggone balu hikenong.**””

<sup>12</sup> Inguc mime uwacnoibong, “Ma ngicti ‘dembenggone balu hikenong’ migac?” <sup>13</sup> Aime ngic madickewec ye ma ngicti bamadickebac, yogo mi ngagewec. I yangucte, ngic-habutowadi domaibongte ailu Yesu ye kweling-ingang hike sangkewec.

<sup>14</sup> Aime yogolec lobeina Yesudi ngic yogo Ibu-mac kwelina bafuwalu yanguc edowec, “**Ga socgone biyac madickebac. Aime umac monic sugucnehac flikegeledaickale ailu, bikic hatacmac mi bafuwadamec.**”

<sup>15</sup> Inguc mime ngic ye hikelu Yuda ngic edocebalu yanguc miwec, “Yesudi hocne na bamadicnugac.”

### *Yesulacni gaga*

<sup>16</sup> Yesu ye Sabat damengka bole ingucne balu gawecte ailu Yuda ngic yengi ngaba sanangnehac aicnolu gaibong. <sup>17</sup> Aime Yesudi bafaliyelu yanguc edocebawec, “**Mamacne ye babaficte boleine bacaijac, ailu yanguctihac balu gagachac. Ilec na inguchac bole balu gagabachac.**” <sup>18</sup> Inguc ailu Yesu ye Sabatle yefe-yowa fagac yogo mi balaibewec. Ailu yogo sugu miyac, ye taockelu Wapongte Mamacne milu ye Wapongt ingucnephac aiwec. Ilec ailu Yuda ngic yenge kweliginang aalic fikeme, Yesu wehomanogale aibong.

<sup>19</sup> Inguc aibong Yesudi bafaliyelu yanguc edocebawec, “**Foinac, Mamacti bole monic bame, Madec ye yogo nganilu yeuctihac bole yogo bagac. Ye ye-icne ngage-ngagewa bole mi badaicte, yogo noinebenang edocngebagabac. Mamac ye bole balu gagac, Madec ye bole silicine yogohac balu gagac.**” <sup>20</sup> I yangucte, Mamac ye Madecinele kwele-angac ngagecnolu bole balu gagac, yogo sasawa edalilu balu gagac. Aime bole sasawa bame nganicaigaing, yogolec feicne gocne sugucnephac edalime ye bole yogo bame, ngenge yogo nganilu medecngebadaicte. <sup>21</sup> Mamacti ngic-ngigac homackacni bag-boliyecebame fangkebong gaga yelecaigac, ingucnephac Madecti bawosae-cebanogale yeicne angacine balaibelu gaga yeledaicte. <sup>22-23</sup> Mamacti ngic-ngigac aibabangineng wosaelu mi mimoctodaicte, miyac. Ngic-ngigac sawadi Mamac alang bacnoacaigaing, ingucnephac Madec alang bacnoningte yedi mimocto-mimoctole bole yogo Madecinele molewa loyackewec. Aime monic ye Madecine alang mi bacnolu gagac, ye Mamacti Madecine salewec, ye inguchac alang mi bacnolu gagac.

<sup>24</sup> “**Foinac, monic ye nale yowa ngagelu Mamac salecnuwec, ye ngagasingkegac, ye gaga-sanang bagac. Ailu mimocto-mimoctole damengka yowawa mi fedaicte, yogo noinebenang edocngebagabac. Ye homac hegilelu**

gagawa biyachac fewec. <sup>25</sup> Foinac, ngic-ngigac kwelengineng homaicne, yenge Wapongte Madecte yowa-malac ngagelu gaga badaingte. Dameng yogo kwesidaicte. Nga yakumac biyac kwesipec, yogo noinebenang edoc-ngebagabac. <sup>26</sup> Mamac yeicna gaga fagac, silicine ingucnehab yedi Madec gaga lacnome, Madecta gaga ingucnehab fagac. <sup>27</sup> Aime Madecine ye Ngicte Madec. Ilec ailu Mamacti ngic-ngigac wosaecebalu mimoctocebanale bole-yowa tapiliineholec lacnowec.

<sup>28-29</sup> “Ngenge yowa yogolec mi medecngebadaic. I yanguchte, ngic-ngigac dingesiwa fagaing, yenge sasawadi dameng monic kwesime yowa-malacine ngagelu dingesiwaci gboliyelu fangkedaingte. Aibaba madicne aigacgu homaibong, yenge gaga banogale gboliyelu fangkedaingte. Nga aibaba sowacne aigacgu homaibong, yenge wosaecebalu mimoctocebanale fangkedaingte. <sup>30</sup> Na wiyc monic neicne kwelele nalic mi badacte, miyac. Na wiyc hedecnedi ngagelu ngagecaigabac, yogolec silicina aibabangineng wosaelu mimoctodacte. Naneicne angac mi balaibecaigabac, miyac. Salec-nuwec yele angac balaibecaigabac. Ilec ailu nale mimocto-mimoctole bole yogo dondonne aigac.

### *Yesule fungine mibong yegengkeylewec*

<sup>31</sup> “Naneuctihac funginene mibe yegengkedaictewa, yowane hatac mibe mi ngagedaingte, miyac. <sup>32</sup> Monicti nale fungine mime yegengkecaigac. Aime ngagebe yele yowa yogodi noinebenang aigac.

<sup>33</sup> “Aime ngenge ngic gocne salecebabong Yoanela hikebong, yedi yowa noine yogo mime yegengkewec. <sup>34</sup> Monicti nale siduc mime yegengkeme yowaine nalic mi ngagesidacte, miyac. Ngenge bikicte ameine babe wasecne ainingte Yoanele yowa edocngebabac. <sup>35</sup> Yoane ye silicine yangucne, hifa monicti lobeme angolecaigaing, ye silicine ingucnehab aiwec. Angoleme ngenge dameng bangkacnemac angoc yogolec beliyelu yele angocka gai-bong.

<sup>36</sup> “Wiyac nale fungine edalicngebabac, yogodi Yoanele yowa yogo ewali-gac. Aime Mamacti boleine balu bamoctobele nelewec. Aime bole balu gagabac, yogodi Mamacti salecnuwec yogo mime yegengkedaicte. <sup>37-38</sup> Ailu Mamac salecnuwec, yedi hocne funginene biyachac mime yegengkewec. Ye ngic saleme ngenge ye mi ngagesingkecaigaing. Ailu Mamacte yowa-malac mi ngagelu yeicne weningucone yogo mi nganibong. Aime yowainedi kwe-lenginang mi fagac. <sup>39</sup> Wapongte hibidi gaga-sanang bafuwangeledaict, ngenge inguc ngagesingkelu hibi yogo wafe-ngagec ailu gacaigaing. Hibi yogodi hocne nale fungine mime yegengkecaigac. <sup>40</sup> Aime ngengibac nala kwestilu gaga baningte mi aingelegac.

<sup>41</sup> “Na ngic-ngigac yenge nale wac feicne wacnugaing, yogo banogale mi ainelegac. <sup>42</sup> Aime ngenge Wapongte angac yogo kwelenginang mi fagac, yogo ngagegabac. <sup>43</sup> Aime na Mamacnele wacka kwesibe, ngenge na mi bacnulu sebicnugaing. Nga monicti yeicne wacka kwesidaictewa, ngenge ye biyac balu sebiledaingte.

<sup>44</sup> “Ngenge ngengungtihic wac feicneholec ainogale aibong, Wapong moniyang yelacni wac feicne kwesicaigac, yogolec mi aingelegacka, ngenge na wenucka ngagesingnugaing? <sup>45</sup> Nani gacgu ngenge Mamacte haicka yowawa locngebadaict, ngenge inguc mi ngagedaing. Ngenge Mosesdi baficngebanaale wangec gabong, aime sifu yedi yowawa locngebabac.

**46** Mosesdi nale ngagelu yowa kwelengkewec. Ilec ailu ngenge yogo ngagesingkedabongka, na inguchac ngagesingnudabong. **47** Ngenge Mosesle hibi mi ngagesingkegaingka, nani yowa migabac, yogo wenucka ngagesingkedaingte? Yogo naific mi ngagesingkedaingte.”

## 6

### *Nosing gumecebawec*

*Mat 14:13-21; Mrk 6:30-44; Luk 9:10-17*

**1** Yogolec lobeina Yesu ye Galili lifuc, yogolec waccine monic Tiberias, yogo falockelu nebocina edi fewec. **2** Ailu ye huckolec yengela pasile maaine bame, ngic-ngigac yenge yogo nganibongte ailu ngic-ngigac habutowadi ye balaibeibong. **3** Aime Yesu ye mic-tengtengfocene yengeholec kupicka felu ngiyeibong. **4** Aime Yuda ngic-ngigac yengele Ewalicebaicnele hombangte dameng bangkalewec.

**5** Aime Yesu ye donge hilalu nganime ngic-ngigac habutowadi yela kwesibong, nganicebalu Filip yanguc uwacnowec, “**Nongileng nosing wenuwacni fuli balu ngic-ngigac habutowa yago yelebeng nodaingte?**” **6** Ye pasi banale ngagelu Filip lokwesac aicnolu uwacnowec.

**7** Uwacnome Filipdi bafaliyecnolu yanguc miwec, “Entacka moneng 200\* yogolecscoti nosing fuli balu kpisic-kpisic heuckelu filesoc yelebeng yengelesoc mi aidaite!”

**8** Inguc mime mic-tengtengfocene yengele hewackacni Saimon Pita gbaine Endrudi miwec, **9** “Madec hakic monic yago domagac, ye bret 5 bali hucinedi flawa baince,<sup>†</sup> ailu misa-sic yaekang balu gagac. Aime yogodi habutowa yago wenucka yelebeng andoebadaicte?”

**10** Inguc mime Yesudi yanguc miwec, “**Ngenge ngic-ngigac edocebabong wangiyening.**” Inguc mime edocebabong kpinding fawec, iwa wangiyebong. Ngic ngiyeibong, yengele dzalengineng yogo 5 taosen ngama ingucne. **11** Ngiyebong Yesudi bret yogo balu Wapong kwele-madic micnolu, botoc balu ngic-ngigac iwa ngiyeibong, yenge yelewec. Yeleme motome misa-sic inguchac balu botoc balu yeleme angacnginengte balu noibong.

**12** Nobong gebecebame Yesudi mic-tengtengfocene yanguc edocebabec, “**Nosing tofaine notiwa aibong ngiyelel uowaedakaickale, ngenge yogo kpaduckeyackebong dambawa hauyackena.**” **13** Inguc mime yenge bret 5 nobong gebecebawec, yogolec tofaine kpaduckeyackebong haulu damba 12 wakewec.

**14** Wakeme, ngic-ngigac yenge yedi pasile maaine bawec, yogo nganilu yanguc miibong, “Foinac, ngic yago hocne siduc-mimi ngic himongka kwesinale miicne.” **15** Aime ngic-ngigac yenge kwesilu Yesu balu ngictaungineng lonogale mibong, Yesu ye biyac ngageyelelu yeicnac baickelu hatacmac kupicka fewec.

### *Lifuc feina edela edela hikewec*

*Mat 14:22-33; Mrk 6:45-52*

**16** Feme mac kundung kweme mic-tengtengfocene yenge misa lifuc mecina haubong. **17** Haubong mac kundung kwewec, dameng iwa Yesu ye yengeholec mi hikewec, yengilangkac gombawa felu misa lifuc falockelu Kape-neam hikenogale hikeibong. **18** Hikeebongka gbelong sugucnedi weme

\* 5:46: Sale 3:22    \* 6:7: Moneng waccine denarius. Aime denarius 200 yogo bulumaka 6 yengele fulingineng yogolecsoc aigac.    † 6:9: Bali flawa yogo wit flawa ingucne. Bali fuliine waicne, naga wit fuliine feicne.    6:15: Yoa 18:36

lifucka dibong sugucne hac fangkewec. <sup>19</sup> Aime yenge 5 me 6 kilomita yogolecsoc puli welu misa lifuc hewacina hikeibong. Hikeebongka Yesu ye lifuc feina edela edela hikelu gomba emeina leme, yenge ye nganilu hang-ocebaawec. <sup>20</sup> Inguc aibong Yesudi yanguc edocebaawec, “**Nani welegabac. Ngenge mi hangocngebana.**” <sup>21</sup> Inguc mime ngagelu yenge Yesu gombawa fenale ngageebongkabac, gombadi himong hikenogale ngageibong, iwa biyachabenang hike sulumeibong.

<sup>22</sup> Mac saeme ngic-ngigac habutowa yenge lifuc nebocina edi domalu yanguc miibong, “Awecnac gomba moniyangti sugu yago fame nganibeleng. Aime Yesu ye mic-tengtengfocene yengeholec gomba iwa mi feyec, mic-tengtengfocene yenge yengilangkac felu hikebiyeng.” <sup>23</sup> Inguc milu domaebongka, gomba gocke Tiberias taonkacni hikelu, Sugucnedi Wapong kwele-madic micnolu ngic-ngigac bret gumecebaawec, mac iwa bangkalelu kwesiibong. <sup>24</sup> Kwesibong yenge Yesu nga mic-tengtengfocene iwa mi nganicebaibongte ailu habutowadi Yesu basackelu gombawa felu Kapeneam taonka hikeibong.

### *Honocmengte nosing*

<sup>25</sup> Basackelu lifuc nebocina hikelu bafuwalu yanguc uwacnoibong, “Wewedu, ga ma damengka yawa kwesimec?”

<sup>26</sup> Inguc mibong Yesudi yanguc edocebaawec, “**Foinac, nani pasile maaine babe nganibiyeng, yoglec ailu mi basacnugaing.** Ngenge nosing no-

gebec aibiyyengte ailu basacnugaing, yogo noinebenang edocngebabac. <sup>27</sup> Nosing peleckelu miyac aidaicte, ngenge yoglec boletowa mi badabiyeng. Ngicté Madecti gaga-sanangte nosing ngeledaicte, yoglec boletowa badabiyeng. I yanguete, yele feiwa **Wapong Mamacti yeicne tapili yela lowec.**”

<sup>28</sup> Inguc mime yengi yanguc uwacnoibong, “Wapongte bole banangte milu oma bole babeng madickedaicte?”

<sup>29</sup> Inguc mibong ameine bafaliyu yanguc edocebaawec, “**Wapongte bole yanguc fagac, Wapontgi ngic saleme kwesiwec, ngenge ye hocne ngagesingkening.**”

<sup>30</sup> Inguc mime yengi yanguc miibong, “Nonge ga nganicgulu ngagesing-gunangte gagi oma pasile maaine monic badamecte? Ailu oma bole nalic badamecte? <sup>31</sup> Ngambobofcnonggeng yenge himong kisiwa misaine mikacka mana nosing nolu gaibong, yoglec yanguc kwelengkeicne fagac, ‘Ye honocmengkacni nosing yeleme noibong.’” (*Wah 16:4; Neh 9:15; Mige 78:24*)

<sup>32</sup> Inguc mibong yanguc edocebaawec, “**Foinac, Moses ye yeuctihac honocmengte nosing mi balu ngelewec. Mamacnedi honocmengte nosing noine ngelecaigac, yogo noinebenang edocngebabac.**” <sup>33</sup> Wapongte nosing, yogo ngic ye hocne honocmengkacni walu himontowale ngic-ngigac yengele gaga bafuwayelewec.”

<sup>34</sup> Ye inguc mime yanguc miibong, “Sugucne, ga nosing yogo damengsoc nolelu gadamec.”

<sup>35</sup> Inguc mibong Yesudi yanguc edocebaawec, “**Naneuctihac nosing gagaineholec. Ilec monic ye nala weledaicte, ye nosingte mi homadaicte. Nga monic ye na ngagesingnudaicte, ye misale hatacmac mi aicnodaicte.**”

<sup>36</sup> Na yanguc biyachac edocngebaiba, ngenge na biyachac nganicnuibong, ailu sifu mi ngagesingnucaigaing. <sup>37</sup> Mamacnedi ngic-ngigac nale molewa

locebawec, yenge sasawadi nala kwesibong na mi yebicebadacte, yogo miyac.<sup>38</sup> Naneicne angacne honocmengkacni mi waiba. Salecnuwec yele angac balaibenogale waiba.<sup>39</sup> Aime salecnuwec, yele angac nga ngage-ngage yogo yanguc, ye yeuctihac ngic-ngigac nale molewa locebawec, yengelacni monic mi hegiledacte. Aime gacgu dameng moto-motoina yenge yeucebabe fangkeyackedaingte.<sup>40</sup> Mamacnele ngage-ngage yogo yanguc, ngic-ngigac yenge Madecine nganilu ngagesingkedaingte, yenge sasawadi gaga-sanang badaingte. Aime dameng moto-motoina nani yeucebabe fangkeyackedaingte.”

<sup>41</sup> Aime yedi yanguc biyachac miwec, “Naneuctihac nosing noine ailu honocmengkacni waiba.”

Ilec ailu Yuda ngic-ngigac yenge yowa kwekwe aicnolu<sup>42</sup> yanguc miibong, “Ngic yago Yesu, Ye Yosefele madec. Aime nongileng nenggac-mamackecine ngagecepagabeleng. Aime ye wenucka yanguc migac, ‘Na honocmengkacni waiba.’”

<sup>43</sup> Inguc mibong Yesudi yanguc miwec, “Ngenge yowa kwelu mi minaguning.<sup>44</sup> Mamacnedi ngic monic mi wackelu fuluckedaitcowa, ye nala nalic mi weledaictie. Mamac salecnuwec, yedi ngic-ngigac wacebalu fulucebawec, yogo yenge nani dameng moto-motoina yeucebabe fangkedaingte.

<sup>45</sup> “Siduc-mimi ngic yengele hibiwa yowa yanguc kwelengkeicne fagac, ‘Wapongti ngic-ngigac sasawa weduyeledaictie.’” (Yes 54:13)  
Ilec ailu ngic-ngigac yenge Mamacte yowale hedec lolu yelacni ngage-ngage baibong, yenge sasawa nala weleyackegaing.<sup>46</sup> Monicti Mamac mi nganiwec, miyac. Ngic moniyangti Wapongkolec gawec, yedi sugu Mamac nganiwec.<sup>47</sup> Foinac, monicti ye ngagesingkegac, ye gaga-sanangkolec aigac, yogo noinebenang edocngebabac.

<sup>48</sup> “Naneuctihac gagale nosing.<sup>49</sup> Ngambofocnonggeng yenge himong kisiwa misaine mikacka mana nosing noibong, yenge homayackeibong.<sup>50</sup> Nosing yago hocne honocmengkacni wawec, monic yogo nolu mi homadaictie.<sup>51</sup> Naneuc nosing gagaineholec ailu honocmengkacni waiba. Monic ye nosing yogo nogacka ye gaga-sanang bafuwalu gaginowagac. Nosing yogo soc-biucne. Himongtowale ngic-ngigac yengi gaga bafuwaningte yeledacte.”

<sup>52</sup> Inguc mime Yuda ngic-ngigac yenge yowangineng fec-wac aime yanguc miibong, “Ngic yago ye wenucka soc-biucne noleme nonangte migac?”

<sup>53</sup> Inguc mibong Yesudi yanguc edocebawec, “Foinac, ngenge Ngicte Madecte sac nga soc-biuc mi nogaiangka, gaga ngengela mi fagac, yogo noinebenang edocngebabac.<sup>54-55</sup> I yangucte, nale soc-biuc, yogo nosing noine nga nale sac, yogo misa noine. Ilec ailu monic ye sacne nga soc-biucne nogacka, ye gaga-sanangkolec aigac. Aime nani dameng moto-motoina ye bagboliyebé fangkedaictie.<sup>56</sup> Aime monic ye nale sac nga soc-biuc nogac, ye nale kwele kwelina gagac. Aime nani yele kwele kwelina gagabac.<sup>57</sup> Mamac salecnuwec, yedi gaga fileine. Aime na yele ailu gaga balu gagabac. Aime monic ye soc-biucne nogac, ye nale ailu inguchac gaga balu gadaictie.<sup>58</sup> Nosing yagodi honocmengkacni wawec gagac, yogo ngambofocnonggeng nosing nolu homaibong, ingucne hac miyac. Monicti nosing yago nogac, ye galu gaga-sanang badaictie.”<sup>59</sup> Yesu ye yowa yogo Kapeneam iwa kpakpaduc macka ngic-ngigac edocebalu weduyelewec.

### *Yesu hegilelu hikeibong*

<sup>60</sup> Inguc mime ngagelu mic-tengtengfocine yengelacni bocyacti yanguc mibong, "Yowa edocnubalu wedunolegac, yogo umacnebenang, monicti yogo ngagelu nalic mi balaibedaicte."

<sup>61</sup> Inguc mibong Yesudi edocebalu weduyeleme, mic-tengteng yenge yowa kwekwe aibongte ailu, yeuctihac kweleina ngageyelelu yanguc edocebawec, "Yowa yogodi heesicne aingelegac, me?" <sup>62</sup> Aime Ngicte Madec ye esecne gawecka hatacmac hefaliye feme, ngenge yogo nganilu wenuc aidaingte? <sup>63</sup> Asudi gaga bafuwacaigac. Nga soc-biuc yogo babaficine mikac. Na yowa edocngebabac, yogo asu nga gaga. <sup>64</sup> Aime ngengele hewackacni gocne yengibac yoware mi ngagesingkegaing." I yangucte, ngic-ngigac weni yenge ye mi ngagesingkegaing. Aime ma ngicti Yesu mudockelu balu ngaba yengele molewa lodaicte, Yesu ye yogo biyachac ngagewec. <sup>65</sup> Inguc ailu yanguc taockelu miwec, "Ngic-ngigac gocne ngenge mi ngagesingkegaing. Ilec ailu molickelu yanguc biyachac edocngebaba, Mamacti monic mi bawosaedaicte, ye nala nalic mi weledaicte."

<sup>66</sup> Inguc mime mic-tengtengfocine bocyacti Yesu hegilelu macnginang hikeibong, ailu yeholec hatacmac mi lolickeibong.

<sup>67</sup> Hikebong Yesudi mic-tengtengfocine 12 yanguc uwayelewec, "Ngenge inguchac na hegilecnulu hikenogale aingelegac, me?"

<sup>68</sup> Inguc mime Saimon Pitadi bafalielu yanguc edowec, "Sugucne, ma ngicti hikedabelengte? Gaga-sanangte yowa noine yogo gala fagac. <sup>69</sup> Nonge biyac ngage-motolu ngagesinggugabeleng, ga hocne Wapongte bingec ngic."

<sup>70</sup> Inguc mime Yesudi yanguc miwec, "Na mic-tengtengfocne 12 bawosaec-ngebaiba. Aime ngengelacni monictibac aleng aigac." <sup>71</sup> Ngic yogo mic-tengtengfocine 12 yengelacni. Aime yedi gacgu Yesu mudockeme badaingte, yele ngagelu miwec. Yele wacine Yudas, ye Saimon Iskariot madecine.

## 7

### *Falewa Ngiye-ngiyele Hombangte hikewec*

<sup>1</sup> Yogolec lobeina Yuda ngic-ngigac Yudeya himongka gaibong, yengele micnefocngineng yengi Yesu wehomanogale ngageibong. Ilec ailu ye iwa mi hikelu lolickelu gawec, ye Galili prowinswa sugu lolickelu gawec. <sup>2</sup> Aime Yuda ngic-ngigac yengele Falewa Ngiye-ngiyele Hombang yogo bangkale kwesiwec.\* <sup>3</sup> Aime Yesu gbafocine yengi yanguc edoibong, "Ga himong yago hegilelu Yudeya himongka hikelu, pasigone yogo iwa baengka mic-tengtengfogone yenge nganidaingte. <sup>4</sup> Monic ye habu yengele haicka fikelu yegengkenogale ngagelu, ye sangke-sangke galu bole mi badaic. Ga pasigone yogo baengka himontowale ngic-ngigac yenge pasigone nganimotoningte, yegenia galu badamec." <sup>5</sup> Aime gbafocine yenge inguchac ye mi ngagesingkeibong.

<sup>6</sup> Inguc aibong Yesudi yanguc edocebawec, "Nale dameng mi kwsigachac. Nga ngengele dameng, yogo damengsoc fadaicte. <sup>7</sup> Himontowale ngic-ngigac yenge kweledi nalic mi wicngebadaingte. Nga nanibac aibabangi-neng sowacne mifickeyelebe yegengkecaigacte kweledi wicnucaigaing. <sup>8</sup> Ngenge hombangte hikedaing. Nga nabac biyac mi hikedacte. I yangucte,

<sup>6:64:</sup> Yo 13:11    <sup>6:65:</sup> Yo 6:44    <sup>6:68:</sup> Mat 16:16    <sup>7:1:</sup> Yo 5:18    \* <sup>7:2:</sup> Mosesle damengka Wapongti himong kisiwa misaine mikacka hifa 40 damongebame kpoluc-falengineng balu gaibong. Ilec yenge hombang yogo ngagesilu kpoluc-fale hatac balu hadeng 7ka kpoluc-falewa ngiyecaigaing.

<sup>7:2:</sup> Dep 23:34    <sup>7:5:</sup> Sale 1:14

**nale damengbenang mi aigac.”** <sup>9</sup> Ye inguc milu hegilelu Galili prowinswa ngyiewec.

<sup>10</sup> Ngiyeme gbaocine yenge hombangte hikeibong. Aime ye yengele lobewa inguchac hikelu sangke-sangke gawec. <sup>11</sup> Inguc aime Yuda ngicngigac micnefocngineng yenge hombangka Yesu basackelu uwanaguibong, “Ngic yogo wenuwa?”

<sup>12</sup> Uwanagubong ngic-ngigac habutowa bocyacti yele mingagec ailu gocnedi yanguc miibong, “Ye ngic madicne.”

Inguc mibong, gocne yengi yanguc miibong, “Miyac, ngic yogodi ngicngigac habutowa kwesac aiyelecaigac.” <sup>13</sup> Aime Yuda ngic-ngigac micnefocngineng yengele hangocebame, monicti Yesule yowa yegena mi miwec.

### *Hombangka yowa edocebalu weduyelewec*

<sup>14</sup> Aime hombang yogo biyac hewacina aime, Yesu ye Ibu-macka felu ngic-ngigac yowa edocebalu weduyelewec. <sup>15</sup> Weduyeleme ngagelu, Yuda ngic-ngigac yenge kwattackelu yanguc miibong, “Ngic yogo ye hibi-mac monicka ngage-ngage monic mi bawecti, wenucka Wapongte hibiwa yowa kwelengkeicne fagac, yogo ngage-motogac?”

<sup>16</sup> Inguc mibong Yesudi yanguc edocebawec, “Na yowa wedungelegabac, yogo neicne yowa miyac. Yogo salecnuwec, yele yowa. <sup>17</sup> Na yowa wedungelegabac, yogo Wapontacni me na neicnaci migabac, yogo monicti Wapongte yowa balaibenogale ngagegac, yedi sugu ngage-motodaicte. <sup>18</sup> Monic ye yeicne yowa micaigac, ye yeicne wac feicne bafenogale ngagesilu yogo midaicte. Nga monic ye ngic salewec, yele wac feicne bafenogale bole bacaigac, ye ngic noine, yela pasi dondonne fagac. Yela sowacne monic mi fagac.

<sup>19</sup> “Mosesdi yefe-yowa ngelewec, foinac. Aime ngengelacni monictibac yogo mi balaibecaigac. Ailu ngenge omale wehomacnunogale ngagegaing?”

<sup>20</sup> Inguc mime habutowa yengi bafaliyelu yanguc miibong, “Madi wehomacgunogale migac? Alengti ngage-ngage yogo gelegac hocne.”

<sup>21</sup> Inguc mibong Yesudi yanguc edocebawec, “Na pasi monic babe ngenge yogo nganuibongte, sasawadi medecngebagac. <sup>22</sup> Ngagegaing, Mosesdi ngenge soc tofangineng, yogo helockeningte bole-yowa ngelewec. Moses ye yeuctihac bole yogo mi bafuwawec, yele ngambofocine yengi bafuwaibong. Iléc ailu ngenge pasi yogo balaibelu Sabat damengka bole yogo bacaigaing.

<sup>23</sup> Ailu ngenge Wapongte yefe-yowa Mosesdi kwelengkewec, yogo balaibenogale Sabat damengka ngic yengele soc tofangineng helockecaigaing. Ngenge aibaba ingucne balu gacaigaing. Aime nani Sabat damengka ngic monic socine bucbuchac bamadickebe, ngenge omale ngaba ainelegaing? <sup>24</sup> Ngenge dongenginengti socka nganilu mi wosaelu midaing. Ngenge yowa dondonne ngage-wosaec ailu midaing.”

### *Yesu ye Mesia, me?*

<sup>25</sup> Inguc mime Yerusalem taonkacni ngic-ngigac gocne yenge uwanagulu yanguc miibong, “Ngic yogo wehomanogale mibiyeng, me? <sup>26</sup> Aimebac ngic ye yengele haicka yowa mime, omale yowa ameine monic mi bafaliyegaing? Ngic micne ye Mesia, yogo hocne biyac ngage-motogaing necne. <sup>27</sup> Aime Mesia kwesidaictewa, ye wenuwacni kwesidaicte, yogo ngic monicti mi ngagedaicte. Aime ngic yagobac ye macine, yogo ngageyackegabeleng.”

<sup>28</sup> Inguc mibong Yesu ye Ibu-mac kwelina weduyelelu yogo ngagelu wack-elu yanguc edocebawec, “**Ngenge na wenuwacni kwesiiba, yogo ngagegaing. Naneicne ngage-ngagewa mi kwesiiba.** Salecnuwec ye noine, aime ngenge ye mi ngagegaing.” <sup>29</sup> Aime na salecnuwec, ye ngagegabac. I yangukte, na yelacni hocne kwesiiba.”

<sup>30</sup> Inguc mime yenge balu muc-macka lonogale ngageibong. Aime damengngine mi kwesiwekte ailu monicti ye mi bawec. <sup>31</sup> Aime habutowa yengelacni ngic-ngigac bocyacti ye ngagesingkelu yanguc miibong, “Ngic yagodi pasile maaine bocyaç bacraigac. Aime Mesiadi kwesilu pasile maaine badaicte, yogo yele pasi ewalilu badaicte, me? Yogo miyac.”

<sup>32</sup> Habutowa yenge inguc milu sangicka yowa mingagec aiibong. Aime Farisaio yenge yogo ngagelu depec-baba ngic micnafocngineng yengeholec kpaduckelu Yesu balu muc-macka lonogale lebe-ngic salecebabong leibong.

<sup>33</sup> Inguc aibong Yesudi yanguc miwec, “**Na dameng bangkacnemac ngengeholec gadacte.** Gacgu salecnuwec, yela hatacmac hefaliyelu fedacte.

<sup>34</sup> **Ngenge na basacnulu nalic mi bafuwacnudaingte.** Ailu na hikedacte, iwa ngenge nalic mi fudaingte.”

<sup>35</sup> Inguc mime Yuda ngic yengungtihac mingagec ailu yanguc miibong, “Ngic yago ye wenuwa hikeme basackelu mi nganinangte migac? Ye alingfocnonggeng Grik himongka singsalolong kwelu gagaing, iwa hikelu Grik ngic-ngigac yowa edocebalu weduyeledaicte mecne.” <sup>36</sup> ‘**Ngenge na basacnulu nalic mi bafuwacnudaingte.** Ailu na hikedacte, iwa ngenge nalic mi fudaingte.’ Yowa yogolec fungine mi ngage-motogabeleng.”

<sup>37</sup> Falewa Ngiye-ngiyele Hombang moto-motoine yogolec hadeng sug-ucna, Yesudi domalu wackelu yanguc miwec, “**Monic ye misale homalu, ye nala kwesilu nodaic.** <sup>38</sup> Aime monicti na ngagesingnudaicte, yele hocne Wapongte hibiwa yowa yanguc kwelengkeicne fagac, ‘Yele kwelewacni gagale misa doneine ofelu hikedacte.’” <sup>39</sup> Ngic-ngigac ye ngagesingkelu gagaing, yenge Tili Asu lobewa badaingte, yogolec misa ingucne miwec. Yesu ye dameng iwa honocmengka mi felu wac feicne mi bawecte ailu, Asu yogo mi kwesiwec.

<sup>40</sup> Aime ngic-ngigac habutowa yenge yele yowa yogo ngagelu gocnedi yanguc miibong, “Ngic yago ye hocne siduc-mimi ngicbenang kwesinale miicne.”

<sup>41</sup> Aime gocne yengi miibong, “Ngic yogo ye Mesia.”

Nga gocne yengi miibong, “Miyac, Yesu ye Galili prowinswacni kwesiwec. Aime Mesia ye Galili prowinswacni mi kwesidaicte. <sup>42</sup> Wapongte hibiwa yowa yanguc kwelengkeicne fagac, ‘Mesia ye ngictau Dawidile fikesaweck-acni ailu Betelehem mac-alingka fikedacte, yogo Dawidile macbenang.’” <sup>43</sup> Ngic yenge inguc milu Yesule ailu siyeckeibong. <sup>44</sup> Siyeckelu gocne yengi ye balu muc-macka lonogale miibong. Aime monicti yele socka moledi mi bawec.

### *Yesu mi ngagesingkeibong*

<sup>45</sup> Aime lebe-ngic yenge depec-baba ngic micne nga Farisaio yengela moc hefaliye hikebong yengi yanguc uwayeleibong, “**Ngenge omale Yesu mi balu kwesigaing?**”

**7:28:** Mat 11:27; Yoa 8:55    **7:30:** Yoa 7:44    **7:34:** Yoa 8:21; 13:36    **7:37:** Dep 23:36; Yes 55:1;

Yoa 4:14    **7:38:** Yes 58:11    **7:39:** Yoa 16:7; 20:22; Sale 2:4    **7:40:** Yoa 6:14    **7:41:** Yoa 1:46

**7:42:** Mige 89:3-4; Mika 5:2

**46** Uwayelebong lebe-ngic yengi yanguc miibong, “Monicti esecne yowa ingucne monic mi mime ngageibeng.”

**47** Inguc mibong Farisaio yengi bafaliyelu yanguc miibong, “Ngenge inguchac yele kwesacka wawegaing, me? **48** Ngic micne nga Farisaio non-gele hewackacni monicti ye mi ngagesingkeibong, miyacbenang. **49** Aime habu yogo Yesu balaibegaing, yenge yefe-yowa mi ngage-motogaing, yenge Wapongti biyachac mimoctocebawec.”

**50** Inguc mibong, Farisaio yengelacni monic wacine Nikodemus, ye esecne Yesula hikewec, yedi yanguc miwec, **51** “Yefe-yowanonggengti yanguc migac, ‘Ngic monicte yowa nga aibabane ngani-ngagec aibong motome wosaelu mimoctonoga.’ Aime ye biyac mimoctogabiyeng.”

**52** Inguc mime ameine bafaliyelu yanguc edoibong, “Ga inguchac Galili prowinswacni, me? Wapongte hibiwa yanguc wafelu nganic, siduc-mimi ngic monicti Galili prowinswacni nalic mi fikedaiete.”

**53** [Inguc milu fangkelu macnginangsoc hikeyackebong.

## 8

### *Selo-boic ngigac*

**1** Yesu ye Oliwa kupicka felu ngiyewec. **2** Ngiyeme mac saenogale aime, iwacni walu hatacmac Wapongte Ibu-macte sobengka fewec. Feme ngic-  
ngigac yenge yela kwesiibong. Aime iwa ngiyelu Wapongte yowa weduyelewec. **3** Weduyeleme Wapongte yefe-yowale wewedu ngic, nga Farisaio yenge ngigac monic selo-boic aibaba aime nganilu Yesula bakwesilu  
haicnginang lobong domawec.

**4** Domame Yesu yanguc uwacnoibong, “Wewedu, ngigac yago ye selo-boic  
aibaba aime nganilu balu kwesigabeleng. **5** Aime yefe-yowawa Mosesdi  
ngigac ingucne posadi wickelu holebeng homanale ung-yowa yogo edoc-  
nubawec. Ga yakumac wenuc migic?” **6** Yenge Yesudi yowa monic wenuc  
mume ngagelu yowawa longale milu lokwesacka loibong.\*

Inguc aibong Yesu ye ngosockelu gbongnginedi himongka kwelengkewec.

**7** Kwelengkelu domame yenge uwacnoluhac domabong, yanguc edoce-  
bawec, “**Ngengelacni ngic monic bikicine mikac gagac, yedi molickelu**  
**posa wickeme wickedaeaing.**” **8** Inguc milu hatacmac ngosockelu himongka  
kwelengkewec. **9** Aime yenge Yesule yowa yogo ngagelu hifanganengete  
silicka sugucnedi molickelu Yesu hegilelu hikeyackebong, gocne yenge lobe  
hikeibong. Aime ngigac ye yeicnac domawec.

**10** Domame Yesudi fangke nganilu yanguc uwacnowec, “**Ngigac, ngic yago**  
**yenge wenuwa hikegaing? Ga sowacneholec milu yowawa locgunogale**  
**monic mi domagaing, me?**”

**11** Uwacnome miwec, “Sugucnene, miyac.”

Inguc mime Yesudi yanguc edowec, “**Na inguchac ga sowacne baba milu**  
**mi mimoctogudacte. Ga hikelu bikic hatacmac mi bafuwadamec.**”†

---

**7:46:** Mrk 1:22    **7:48:** Yoa 12:42    **7:51:** Yoa 3:1-2    **7:52:** Yoa 7:41-42    **8:5:** Dep 20:10; Yef 22:22-24    \* **8:6:** Dameng iwa Roma yenge Israel ngic-  
ngigac damongebaibong. Aime Roma yengi sugu ngic sowacne nalic mimoctolu wehomadaingte. Ilec Yesudi mime posadi wickelu  
holedabongka, Roma yenge ngaba aidabong. Aime Yesu ye mime hegiledabongka, Mosesle yefe-yowa  
mi sanangkeme Yuda ngic micne yenge ngaba aidabong.    **8:7:** Yef 17:7    † **8:11:** Hibi esecne  
Yoane kwelengkewec, yogo nganilu iwacni kwelengkebong kwelengkebong ofewec, yengelacni gocne  
7:53-8:11 iwa mi fagac. Ngic-  
ngigac yenge hibi kwelengkeicne yogo wosaelu nganibong Yoanedim  
kwelengkewec necne.    **8:11:** Yoa 5:14

*Yesu yeuctihac fungineine mime yegengkewec*

<sup>12</sup> Aime yogolec lobeina Yesu ye hatacmac yowa taockelu ngic-ngigac yanguc edocebawec, “Na himongtowale ngic-ngigac ngengele angoc. Monic ye na balaibecnudaike, ye kundunge yefe monic mi balaibedaicte. Ye gagale angoc badaicte.”

<sup>13</sup> Inguc mime Farisaio yengi yanguc edoibong, “Gageuctihac funginegone miyengka yegengkegac, yogo yefe mi fagac. Yowagone yogo nalic mi ngagedabelnge.”

<sup>14</sup> Aime Yesudi bafaliyelu yanguc edocebawec, “Naneuctihac funginene mibe yegengkegacka, yogo noine aigac. Na wenuwacni kwesiiba, ailu wenuwa hikedacte, yogo naneuc ngagegabac. Ngenge na wenuwacni kwesiiba nga wenuwa hikedacte, yogo mi ngagegaing. <sup>15</sup> Ngenge himong-nci silicnginang ngic-ngigac aibabangineng wosaelu funginengneng micaigaing. Nga nabac ngic monic wosaelu fungineine mimile bole mi bagabac. <sup>16</sup> Na neicnac bole yogo mi balu gagabac. Mamac salecnuwec, yeholec bole balu gagabelec. Ilec nani mimocto-mimoctole bole bagabacka, yogo noine aigac. <sup>17</sup> Yefe-yowanginang yowa yanguc kwelengkeicne fagac, ‘Ngic yaekangti yowa miminginec moniyanghac aime yowanginec noine aigac.’ <sup>18</sup> Naneuctihac miyegengnagube, Mamacne salecnuwec, yedi inguchac baficnulu miyegengnugac. Ilec ailu nale yowa noine aigac.”

<sup>19</sup> Inguc mime Farisaio yengi yanguc uwacnoibong, “Gale mamac ye wenuwa gagac?”

Mibong Yesudi bafaliyelu yanguc edocebawec, “Ngenge na mi ngagec-nugaing, ailu Mamacne inguchac mi ngagegaing. Ngenge na ngagecnud-abongka midec, ibac Mamacne inguchac ngagedabong.” <sup>20</sup> Yowa yogo, Ibu-macte kuelle monicka ibu katapa ngiyelu gawec, iwa ngic-ngigac edocebalu weduyelewec. Aime ngic monicti balu muc-macka mi lowec. I yangucte, ye inguc aicononingte dameng fawechac.

<sup>21</sup> Aime Yesudi hatacmac yanguc edocebawec, “Na hikebe ngenge basac-nulu bikicnginengkolec galu homadaingte. Nga na hikedacte, iwa ngenge nalic mi fudaingte.”

<sup>22</sup> Inguc mime Yuda ngic-ngigac yengi yanguc miibong, “Na hikedacte, iwa ngenge nalic mi fudaingte.’ Ye omale inguc migac? Yeuctihac we-homanagunale migac, me?”

<sup>23</sup> Inguc mibong yanguc edocebawec, “Ngenge dumeng himongkaci, nga nabac himongkaci miyac, na wilengkaci. <sup>24</sup> Ilec ailu biyac edoc-ngebagabac, ngenge bikicnginengkolec galu homadaingte. Ngenge na gagabachac, \*yogo mi ngagesingkedaingtewa, bikicngineng falu gamehac homadaingte.”

<sup>25</sup> Inguc mime yanguc uwacnoibong, “Aime ga maa?”

Mibong yedi yanguc edocebawec, “Na funginene biyachac edocngebaiba. <sup>26</sup> Na ngengele aibabangineng bocyac ngani-ngagec ailu wosaelu nalic mimoctodacte. Aime salecnuwec, ye yowa noinele fileine, ailu yelacni wiyc ngagegabac, yogo sugu himongtowale ngic-ngigac yengela mibe yegengkedaicte.”

---

**8:12:** Yes 49:6; Yoa 1:4-9; 9:5; 12:46    **8:14:** Yoa 5:31-32; 7:28    **8:15:** Yoa 12:47    **8:16:** Yoa 5:30; 8:29    **8:17:** Yef 19:15    **8:18:** 1Yoa 5:9    **8:20:** Yoa 7:30    **8:21:** Yoa 7:34; 13:33    **8:23:** Yoa 3:31    **\*8:24:** Wahikeicne 3:14 iwa Wapontgi Mosesholec mingagec ailu yeicne waciec wackelu “na gagabachac” miwec.

<sup>27</sup> Yesu ye Mamacinele ngagelu inguc edocebame yenge kauc bai-bong. <sup>28</sup> Kauc babong Yesudi yanguc edocebawec, “*Ngenge Ngicte Madec bafangkebong domadaicte, dameng iwa ngenge ‘na gagabachac,’ yogo ngage-motodaingte.* Naneuctihac wiyac monic mi balu gacaigabac, Mamacnedi wedunelawec, yogo migabac. <sup>29</sup> Salecnuwec, yedi naholec gagac. Na yele angac balaibelu’bole balu gagabac. Ilec ailu ye hegilecnume neicnac mi gadacte.” <sup>30</sup> Yesu ye yowa inguc milu domaemewa ngic-ngigac bocyacti ye ngagesingkeibong.

### *Abrahantacni fikesawec*

<sup>31</sup> Yuda ngic-ngigac yenge Yesu ngagesingkeibong, yenge yanguc edocebawec, “*Ngenge nale yowa balaibelu gagaingka, nale mic-tengtengfocne noine aigaing.* <sup>32</sup> Inguc ailu yowa noine ngage-motodaingte aime yowa noinedi muckacni lukecngebadaitce.”

<sup>33</sup> Inguc mime yowaine bafaliyecnolu yanguc edoibong, “Nonge Abrahamte fikesawecakaci, monicti kwelec kwekwe mi bacnubawec. Aime madi kwelec kwekwe bacnubawecete, gagibac lukecnubanogale migic?”

<sup>34</sup> Inguc mibong Yesudi yanguc miwec, “*Foinac, monic bikic bacaigac, ye bikic yoglec kwelec kwelu gagac, yogo noinebenang edocngebagabac.*

<sup>35</sup> Aime kwelec kwekweine bame gacaigac, ye mac yoglec kwelina mac-fung nalic mi gadaicte. *Madectibac mac yoglec kwelina mac-fung gaginowagac.* <sup>36</sup> Ilec Madecti lukecngebadaitewa, ngenge mucngineng mikac gadaingte, yogo foinac. <sup>37</sup> Ngenge Abraham gbolifocene, yogo ngagegabac. Aimebac nale yowa ngengele kwelewa mi fagacte, wehomacnunogale aigaing. <sup>38</sup> Na Mamacnele emewa galu wiyac ngani-ngagec aiiba, yogo hocne edocngebagabac. Aime ngengebac mamacnengtacni aibaba nga wiyac ngagecaigaing, yogo hocne ailu gagaing.”

<sup>39</sup> Inguc mime yanguc miibong, “Nonge mamacnonggeng Abraham.”

Mibong Yesudi bafaliyelu yanguc edocebawec, “*Ngenge Abraham adumadecfocne aidabongka midec, yele gaga nga aibaba balaibedabong.* <sup>40</sup> Na ngic monicti Wapongtacni yowa noine ngagelu edocngebabce ngenge omale wehomacnunogale aigaing? Abraham ye aibaba ingucne monic mi ailu gawec. <sup>41</sup> Ngenge mamacnengtacni aibaba balaibecaigaing.”

Inguc mime yengi yanguc miibong, “Nonge selo-boic aibaba iwacni monic mi fikeibeng, miyacbenang. Nonge Mamacnonggeng moniyang, yogo Wapong.”

### *Aleng Sugucnenginengte fikesawec*

<sup>42</sup> Inguc mibong Yesudi yanguc miwec, “*Na Wapongtacni kwesiiba, ailu neicne angacnele mi kwesiiba.* Yedi hocne salecnuwec. Ilec ngenge Wapong mamacnengtacni aidecka midec, kweledi nale angac ngagedabong. <sup>43</sup> Aime ngenge omale nale yowa mi ngage-motogaing? Ngenge nale yowa hedec kwelu nalic mi ngagedaingte. <sup>44</sup> Aime Aleng Sugucnengineng, yedi hocne ngengele mamacnengtacni aimage yele angacka aibaba fagac, ngenge yogo anogale aingelegecaigac. Ye esecnebac ngic-wewe gacaigac. Iyangucte, yele ngage-ngaigewa aibaba noine mi fagac, ye kwesac-ngic ailu ye kwe-sacka wawelu gagac. Ilec ailu ye kwesacte mamaclu yowa kwesacine milu gacaigac. <sup>45</sup> Aime na yowa noine edocngebagabacte, ngenge nale yowa mi ngagesingkegaing. <sup>46</sup> Ngengelacni madi nale bikicte umac monic

ngagewecka mifickena? Ailu na yowa noine migabac, aime ngenge omale mi ngagesingnugaing? <sup>47</sup> Wapongte alingfocine yenge yowaine ngagecaigaing. Nga ngengebac Wapongte alingfocine miyac. Ilec ailu yele yowa mi ngagecaigaing.”

### *Abrahamte molic-molic*

<sup>48</sup> Aime Yuda ngic-ngigac yengi bafaliyelu yanguc edoibong, “Ga Samaria ngic hocne, ailu ga alengkolec gagic. Yowa yogo noine migabeleng, me?”

<sup>49</sup> Inguc mibong Yesudi bafaliyelu yanguc edocebawec, “Na aleng mikac. Na Mamacne alang bacnoacaigabac. Nga ngengibac na alang monic mi banelecaigaing. <sup>50</sup> Naneicne wac feicne banogale bole mi bacaigabac. Aime monictibac wosaelu gagac, ye nale wac feicne bafenale bole bacaigac. <sup>51</sup> Foinac, monic ye nale yowa balaibelu gagacka, ye mi homadaicte, yogo noinebenang edocngebagabac.”

<sup>52</sup> Inguc mime Yuda ngic-ngigac yengi yanguc miibong, “Ga alengkolec gagic, nonge yakumac ngagecugabeleng. Abraham ye homawec, aime siduc-mimi ngic yenge inguchac homaibong. Aime gagibac migic, ‘Monic ye nale yowa balaibelu gadaictewa, ye mi homadaicte.’ <sup>53</sup> Aime ga ngambonoggeng Abrahamte feicne aigac, me? Ye homawec, aime siduc-mimi ngic yenge inguchac homaibong. Aime gageicnele ngageng feicne aigac, yogodi nalic aigac, me? Yogo miyac.”

<sup>54</sup> Inguc mibong Yesudi yanguc edocebawec, “Naneuctihac wacne bafedacte, yogodi wiyc omane aidaicte. Aime Mamacne ngengele Waponggineng gagac, ngengi yele inguc micaigaing, yedibac wacne bafegac. <sup>55</sup> Aime ngenge ye mi ngagegaing, naneuc ye ngagegabac. Na ye mi ngagegabac, yogo midacte, ibac ngic kwesacine ailu ngenge ingucne aidaba. Na ngagegabacte ailu yowaine balaibelu gagabac. <sup>56</sup> Ngambongineng Abraham ye nale dameng yogo fikeme nganinogale beliyewec. Fikeme nganilu angac ngagewec.”

<sup>57</sup> Inguc mime Yuda ngic-ngigac yengi yanguc miibong, “Ga hifagone 50 mi aiwecti Abraham nganiling, me? Yogo nalic mi aigac.”

<sup>58</sup> Inguc mibong Yesudi yanguc miwec, “Foinac, Abraham mi fikeemewa ‘naneuctihac inguc gagabachac,’ yogo noinebenang edocngebagabac.”

<sup>59</sup> Inguc mime yenge posa balu holenogale aibong, ye sangkelu Ibu-mac lobina hauwec.

## 9

### *Ngc donge-pisic bamadickejec*

<sup>1</sup> Yesu ye yefewa hikelu ngic monic donge-pisic fikeicne nganiwec. <sup>2</sup> Aime mic-tengtengfocine yengi uwacnoibong, “Wewedu, ngic yogo male bikicte ailu donge-pisic fikewec? Yeicne me nenggac-mamackecine yekele bikicte?”

<sup>3</sup> Inguc mibong Yesudi yanguc edocebawec, “Ngc yeicne me nenggac-mamackecine yeki bikic mi bafuwaiboc, miyac. Yogo Wapongte bole yela fikeme nganiningte ingucne fikewec. <sup>4-5</sup> Nongileng na salecnuwec, yele bole wenacka balu gadabeleng. Na himongka gagabac, dameng iwa himontowale angoc aigabac. Aime mac debolelu kundung kweme monicti bole nalic mi badaicte.”

<sup>6</sup> Inguc milu himongka sofockelu himong yogo balu lalickeme nolac fikeme, ngic donge-pisic yele dongewa hosowec. <sup>7</sup> Hosolu yanguc edowec,

**"Ga Siloam misa lifucka hikelu dongegone suwenong."** (Siloamte fungine yogo "Salebong hikewec.") Inguc mime hikelu dongeine suwelu hilalu hefaliye kwesiwec.

<sup>8</sup> Inguc ailu hefaliye kwesime, macfocene nga ngic-ngigac gocne esecne woc-wiyakte milocebalu game nganiibong, yengi yanguc miibong, "Ngic yagodi ngiyelu woc-wiyakte milocnubalu gawec, me?"

<sup>9</sup> Inguc mibong gocne yengi miibong, "Yogo ye hocne."

Aime gocne yengibac miibong, "Yogo ye miyac, yogo ye ingucne ngic monicti."

Aime yeuctihac yowa milu edocebalu gawec, "Ngic yago na hocne."

<sup>10</sup> Inguc mime uwacnoibong, "Ga wenuc ailu dongegone hilagic?"

<sup>11</sup> Inguc mibong yedi yanguc miwec, "Ngic monic wacine Yesu, yedi nolac lalickelu dongena hosolu salecnulu migac, 'Ga hikelu Siloam lifucka dongeine suwenong.' Inguc mime na hikelu lifucka dongene suwelu hilagabac."

<sup>12</sup> Inguc mime yanguc uwacnoibong, "Aime ngic yogo weni?"

Inguc mibong yedi miwec, "Na mi ngagegabac."

### *Dongeine madickewec, yoglec uwaibong*

<sup>13</sup> Inguc mime yenge ngic esecne donge-pisic gawec, yogo Farisaio yengela mengockelu hikeibong. <sup>14</sup> Aime Yesu ye nolac lalickelu ngic dongeina hosolu bame dongeine hilawec, yogo Sabat damengka inguc aicnowec. <sup>15</sup> Aime Farisaio yengi inguchac ngic yogo nganilu uwacnoibong, "Ga wenuc ailu dongegone hilagamec?"

Mibong miwec, "Ye nolacti dongena hosome dongene suwelu hilagabac."

<sup>16</sup> Inguc mime Farisaio gocne yengi yanguc miibong, "Ngic yogo ye Sabat ngiyecaigabeleng, yoglec yefe mi balaibegac. Ilec ye Wapongtaci miyac."

Inguc mibong gocnedi miibong, "Ngic bikickolecti wenucka pasile maaine ingucne badaicte?"

Inguc milu yengungtihac siyeckeibong. <sup>17</sup> Siyeckelu donge-pisicti dongeine hilawec, ye hatacmac uwacnoibong, "Ga ngic dongegone bame hilagamec, yele wenuc migic?"

Inguc mibong yedi miwec, "Ye siduc-mimi ngic monic."

<sup>18</sup> Inguc mime Yuda ngic yengi ngic yogo donge-pisic gaweckacni dongeine madickeme hilawec, yogo mi ngagesingkeibong. Mi ngagesingkelu nenggac-mamackecine wacepalu <sup>19</sup> yanguc uwayeteibong, "Ngic yago ye ngekele madec, me? Ye dongeine pisickeicne fikewec, inguc migabiyc, me? Aime ye wenucka yakumac dongeine hilagac?"

<sup>20</sup> Inguc mibong nenggac-mamackecine yeki yanguc miiboc, "Ngic yago nokele madec. Ye dongeine pisickeicne fikewec, yogo ngagegabec. <sup>21</sup> Aime wenucka yakumac dongeine hilagac, ailu madi dongeine bamadickegac, yogo noke mi ngagegabec. Ye biyac suguleicne. Ilec yeicne uwacnobong, yeuctihac fungineine edocngebana." <sup>22</sup> Yeke Yuda ngic-ngigac micnefocngi-neng yengele hangocepame inguc miiboc. Yuda ngic-ngigac micnefocngi-neng yenge yowa monic biyachac yanguc milu hefeibong, "Monicti 'Yesu ye Mesia hocne', inguc mime yegengkedaictewa, ye kpakpaduc macka nalic mi fedaicte." <sup>23</sup> Ilec ailu nenggac-mamackecine yeki yanguc miiboc, "Ye biyac suguleicne. Ilec yeicne uwacnoning."

<sup>24</sup> Inguc miboc yenge ngic donge-pisic gawec, ye alecine yaeckang hat-acmac wackelu edoibong, "Ga Wapongte haicka yowa noine minong. Ngic yogo, ye bikickolec, inguc ngagegabeleng."

<sup>25</sup> Inguc mibong, yedi bafaliyelu yanguc edocebawec, “Ngic yogo bikickolec me miyac, yogo na mi ngagegabac. Aime na wiyac moniyang sugengagegabac, na esecne donge-pisic gaibadi, yakumac dongene hilagabac.”

<sup>26</sup> Inguc mime hatacmac yanguc uwacnoibong, “Ye oma wiyac aigelegac? Ailu ye silicine wenucka dongegone bamadickegac?”

<sup>27</sup> Inguc mibong yedi bafaliyelu yanguc edocebawec, “Na yogo biyac edocngebabayackegabac. Aime ngenge nale yowale hedec mi logabiyyeng. Ngenge omale hatacmac ngagenogale aigaing? Ngenge inguchac yele mic-tengtengfocene ainogale ngagesigaing, me?”

<sup>28</sup> Inguc mime yenge misulec aicnolu yanguc miibong, “Ga hocne ngic yogolec mic-tengteng, nga nongebac Mosesle mic-tengtengfocinedi gagabeleng. <sup>29</sup> Waponti Moses edome yowaine miwec, yogo ngagegabeleng. Aime ngic yago ye wenuwacni, yogo nonge mi ngagegabeleng.”

<sup>30</sup> Inguc mibong bafaliyelu yanguc edocebawec, “Ngic yogo dongene bamadickegac. Aime ye wenuwacni kwesiwec, yogo ngenge mi ngagegaing. Na ilec welecnggebabac. <sup>31</sup> Nongileng yanguc ngagegabeleng, Waponti bikic-baba yengele yowa nalic mi ngageyeledaict. Aime ngic monicti ye alang bacnolu yowaine balaibecaigac, Waponti ye sugu ngagegac. <sup>32</sup> Biyachac esecnebenang molickelu gaibengka, ‘Monic donge-pisic fikelu game ngic monicti dongeine bame madickewec,’ siduc monic ingucne mi ngageibeng. <sup>33</sup> Ngic yogo Wapontaci mi kwestidecka, ye bole monic ingucne nalic mi badec.”

<sup>34</sup> Inguc mime bafaliyelu yanguc edoibong, “Ga bikickacni fikelu gaingti yowa wedunolegic, me?” Inguc milu yebiyebong wawec.

### *Ngage-nagengeneng mikac, yenge donge-pisic ingucne*

<sup>35</sup> Aime Yesudi ngic yebiyebong wawec, yele siduc yogo ngagelu basackelu bafuwalu yanguc edowec, “**Ga Ngicte Madec ngagesingkegic, me?**”

<sup>36</sup> Inguc mime ngic yogodi miwec, “Sugucnene, ye maa? Edalicnung nganilu ye ngagesingkebe.”

<sup>37</sup> Inguc mime Yesudi yanguc edowec, “**Ga biyac nganivic. Ngic yogodi hocne gaholec yowa migac.**”

<sup>38</sup> Inguc mime miwec, “Sugucne, na ngagesinggugabac.” Inguc milu ye ketadi holecnolu afeewec.

<sup>39</sup> Aime Yesudi yanguc miwec, “Na aibabangineng wosaenogale himongka waiba. Aime ngic donge-pisicti dongengeneng hiladaingte. Nga dongengeneng hilalu gagaing, yenge donge-pisic aidaingte.”

<sup>40</sup> Yesu ye yowa inguc mime Farisaio gocne yeholec domaibong, yenge yowa yogo ngagelu yanguc miibong, “Nonge inguchac donge-pisic, me?”

<sup>41</sup> Inguc mibong Yesudi yanguc miwec, “**Ngenge donge-pisic midaingka, ibac bikicnginengte umac mikac aidec. Aime ngenge yakumac migaiing, ‘Nonge donge hilalu gagabeleng.’ Ilec ailu ngenge bikicnginengte umac fagachac.**”

## 10

### *Lama-damong madicne*

<sup>1</sup> “**Foinac, ngic monicti lama yengele oda kwelina fenogale milu, oda nuine hegilelu monicka yefe fedaiiecte, ye hise ngic ailu kindololo ngic aidaiecte, yogo noinebenang edocngebabac.** <sup>2</sup> Ngic nuwa yefe fecaigac, ye lama yengele damong. <sup>3</sup> Aime nule damongti yele ailu oda nuine nalic laliyedaict.

Laliyeme lama yenge yowa-malacine ngagebong, yeuctihac lama wacng-inang wacebame kwsesibong molickeyeleme yenge momoc lobeina hau-daingte.

<sup>4</sup> Ye lamafocene menocebame lobeina hauyackebong, molickeyeleme lamafocene yenge yele yowa-malacine ngagegaingte ailu ye balaibedaingte.

<sup>5</sup> Aime yenge ngic fulune nalic mi balaibedaingte. Yenge yele yowa-malac mi ngagegaingte hangoc hikeyackedaingte.” <sup>6</sup> Yesudi nangeng yowa yogo holelu mime yenge yowa yogolec dabiyebong.

<sup>7</sup> Dabiyepong, Yesudi hatacmac yanguc edocebewec, “Foinac, nani lama yengele nu aigabac, yogo noinebenang edocngebabac. <sup>8</sup> Ngic gocne yenge na mi fikeebewa kwsesibong, yenge hise ngic ailu kindololo ngic. Aime lama yengi yengele yowale hedec mi loibong. <sup>9</sup> Naneuctihac odale nu aigabac. Monic ye nala yefe felu oda kwelina fedaictewa, Wapongti ye bikicte ameine bame wasecne aidaicte. Ailu ye nuwa yefe fec-wac ailu nobanosing bafuwadaicte. <sup>10</sup> Hise-baba ngic ye wiyac hise balu wehomacebalu basowalecebanale kwsicaigac. Aime nani hatacmac gaga babong waken-geleme ganingte kwsesiba.

<sup>11</sup> “Naneicne lama-damong madicne. Damong madicnedi lama yengele ailu gagaine hegiledaicte. <sup>12</sup> Aime monic ye monengte ailu bole bagalu ngic monicte lama-damong gagac, ye lama yengele filengineng mi ailu gadaicte. Inguc ailu kate-hoda kwsime nganilu hegilecebalu hikedaicte. Hikeme kate-hodadi lama hilu nocebalu yebicebadaicte. <sup>13</sup> Ngic yogo ye bolele fuli banogale ailu lama yengele ngageboc mi aidaicte. <sup>14-15</sup> Naneuc lama-damong madicne. Mamacne ye na ngagecnugac. Aime nani inguchac Mamac ngagegabac, ingucnehab neuctihac lamafocene ngagecebabac. Aime lamafocene yenge na ngagecnugaing. Na lama yengele ailu gagane hegiledacte.

<sup>16</sup> “Ailu lamafocene gocne gagaing, yenge oda yagowacni miyac. Aime nani yenge menocebabe yowa-malacne ngagedaingte. Aime nale lama habu biyac migabac, yengeholec taocebabe lama habu moniyang aibong yengele damong moniyang sugu nani aidacte. <sup>17</sup> Na gagane hatacmac banogale ailu hegilegabac. Ilec ailu Mamacti nale angac ngagedaicte. <sup>18</sup> Monicti nale gaga nalic mi baickedaicte, naneuctihac gagane hegiledacte. Aime gagane hegilelu hatacmac badacte, yogolec bole-yowa tapiliineholec na neicna fagac. Yogo Mamacnedi inguc aibele ung-yowa edocnuwec.”

<sup>19</sup> Yowa yogolec ailu Yuda ngic-ngigac yenge hatacmac siyeckeibong. <sup>20</sup> Siyeckelu ngic-ngigac bocycac yengi yanguc miibong, “Ye alengkolec gagacte kweleine sifuwegac. Ngenge omale yele yowale hedec logaing?”

<sup>21</sup> Aime ngic-ngigac gocne yengi yanguc miibong, “Yowa ingucne ngic alengkolec yengele yowa miyac. Ngic alengkolecti ngic donge-psic don-gineng nalic bame madickedaingte, me? Yogo miyac.”

### *Yesu mi ngagesingkeibong*

<sup>22</sup> Yerusalem iwa tilo dameng aime, Ibu-mac hatacmac mimoctoibong, yogolec hombangte dameng ngagesiibong.\* <sup>23</sup> Dameng iwa Yesu ye Ibu-

**10:8:** Yer 23:1-2; Esek 34:2-3    **10:11:** Mige 23:1; Miye 7:17    **10:12:** Sale 20:29    **10:14-15:** Mat 11:27; 1Yoa 3:16    **10:16:** Yes 56:8; Esek 34:23    **10:17:** Filp 2:8-9 \* **10:22:** Dameng monicka Grik ngictau ye Wapongte Ibu-mac basowaleme wonongkolec aiwec. Hifa habackang motome Wapongte haicka gbagbacne ainale boleine baibong. Babong motome gbagbacne aiwec. Yogolec hombang ngagesiibong. Gbagbacne aiwec, dameng iwa hifa 134 motome Yesu likewec.

macte sobeng meicina dakec monic fawec, wacine Solomonte Dakec, iwa lec-welec aiwec. <sup>24</sup> Inguc aime Yuda ngic-ngigac yengi hewalingkelu yanguc edoibong, "Ga ma damengka funginegone miyengka yegengkeme ngagelu hatacmac kauc mi badabelengte? Ga Mesia gagamecka yogo miyengka yegengkeme ngagenang."

<sup>25</sup> Inguc mibong Yesudi yanguc miwec, "Yogo biyachac edocngebaiba. Aime ngengebac mi ngagesingnugaing. Na Mamacnele wacka bole balu gagabac, yogodi naneicne fungine bame yegengkecaigac. <sup>26</sup> Aime ngenge nale lama habufocne, yengelacni miyac. Ilec ailu na mi ngagesingnugaing. <sup>27</sup> Lamacne yenge nale yowa ngagecaigaing. Aime na ngageyelebe yenge balaibecnulu gagaing. <sup>28</sup> Balaibecnubong nani gaga-sanang yelebe yengelacni monicti nalic mi homadaicte. Ailu monicti nale molewacni nalic mi bamoctocebadaitce. <sup>29</sup> Mamacnedi yenge nale molewa locebawec, ye wiway sasawa yengele feicne. Ilec Mamacnele molewacni monicti yenge nalic mi bamoctocebadaitce. <sup>30</sup> Na nga Mamac noke moniyang."

<sup>31</sup> Inguc mime Yuda ngic-ngigac yengi posadi holeningte ailu posa hatacmac baibong. <sup>32</sup> Inguc aibong Yesudi yanguc edocebawec, "Mamacnele bole madicne bocyac edalicngebaiba. Aime fungine weni yogolec ngenge ngaba ailu posadi holecnunogale aigaing?"

<sup>33</sup> Inguc mime Yuda ngic-ngigac yengi yanguc edoibong, "Bole madicnele ailu posadi holecgunogale mi aigabeleng. Ga himong ngicti geicnele Wapong milu Wapong fecnogic. Yogolec ailubac posadi holecgunogale aigabeleng."

<sup>34</sup> Inguc mibong Yesudi yanguc miwec, "Yefe-yowanginang yowa yanguc kwelengkeicne fagac, yogo mi ngagegaing, me? Wapong yeuctihac ngic micne bawosaecebawec, yengele yanguc miwec,  
'Na yanguc migabac, ngenge sasawadi wapong.' *(Mige 82:6)*

<sup>35-36</sup> Wapongte yowa yeicne hibiwa kwelengkeicne fagac, yogo hefaliyu silicine monic mi aigac. Aime nani yanguc migabac, 'Na Wapongte Madec.' Aime ngic Wapongte yowa biyachac ngagelu gaibong, yengele Wapongti miwec, 'Ngenge wapong gagaing.' Ilec ngenge omale yanguc migaina, 'Ga Wapong fecnogic?' Wapongti ngic yeicne bingec bawosaelu saleme himongka wawec, yogo na hocne.

<sup>37</sup> "Bole balu gagabac, yogo Mamacnelacni mi aigacka, ngenge mi ngagesingnudabiyeng. <sup>38</sup> Aime Mamacnele bole balu gabe, ngenge mi ngagesingnugaing. Ailu sifu bole tapiliineholec balu gagabac, bole yogo ngagesingkedaing. Inguc ailu Mamacnedi nala gagac nga nani yela gagabac, yogo ngagelu ngage-motodaingte." <sup>39</sup> Inguc mime yenge hatacmac banogale aibong, ye yengele molewacni fotockelu hikewec.

<sup>40</sup> Aime Yesu ye Yodan misa falockelu nebocina Yoane misa-lowacti molickelu bole balu misa lowayelewec, mac iwa hikelu gawec. <sup>41</sup> Iwa gaemewa ngic-ngigac bocyacti yela hikelu yanguc miibong, "Yoane ngagesingkenangte pasile maaine monic mi balu gawec. Aime ye ngic yagolec fungine miwec, yogobac noine aiyackegac." <sup>42</sup> Inguc mibong himong iwa ngic-ngigac bocyacti Yesu ngagesingkeibong.

## 11

### Lasaros homawec

<sup>1</sup> Ngic monic wacine Lasaros, ye Betani mac-alingga hucti bame fawec. Aime Maria nga yemeine Mata yeke mac iwa gaiboc. <sup>2</sup> Aime Maria yedi hocne Sugucnele higewa heloc hoine madicnedi sotiyelu hosocnolu yeicne hodoc-dowecinele susucinedi keleng bacnowec. Aime Maria yele sengngine Lasaros ye hocne hucti bawec.

<sup>3</sup> Huc bame sengkecine yeki Yesula yowa loboc hikeme yanguc miiboc, "Sugucne ngagegic, ngic kwelegonedi angac ngagecnocaigic, ye hucti bame fagac."

<sup>4</sup> Inguc milu yowa loboc hikeme Yesu ye yowa yogo ngagelu yanguc miwec, "Ye homanale huc mi bagac. Huc yogo Wapongte wac feicne yegengkenale fikegac. Fikeme Wapong Madecinele wac feicne inguchac fikelu yegengkedaicte." <sup>5</sup> Aime Yesu ye Mata kwaineholec, ailu Lasaros yengele kweleinedi angackelu gawec.

<sup>6</sup> Aime ye siduc yogo ngagelu hadeng yaeckang himong iwa hatac-mac taockelu gawec. <sup>7</sup> Iwa galu mic-tengtengfocene yanguc edocebawec, "Nongileng Yudeya himongka hatacmac hefaliyelu hikenang."

<sup>8</sup> Inguc mime mic-tengtengfocene yengi yanguc miibong, "Wewedu, Yuda ngic yogowa gagaing, yenge posadi holecgulu wehomacgunogale aiibong. Aime dameng mi daliweme ga hatacmac iwa hikenogale aigic, me?"

<sup>9</sup> Inguc mibong Yesudi yanguc miwec, "Hadeng moniyangte kwelina dameng 12 fagac. Aime ngic monic ye wenacka yefe hikecaigac, ye nalic mi kwopockeme wawedacite. I yangucte, ye himontowale angoc nganidaicte.

<sup>10</sup> Aimebac monic ye kundungka hikecaigac, ye kwopockeme wawedacite. I yangucte, yela angoc monic mi fagac."

<sup>11</sup> Inguc milu yowa hatacmac yanguc taockelu edocebawec, "Nongileng agononggeng Lasaros ye gung fagac, nani yeuckebe fangkenale ailu iwa hikedacte."

<sup>12-13</sup> Yesu ye Lasaros homawecte mime, mic-tengtengfocene yengibac ngagebong ye gungbenang fawec. Yenge inguc ngagelu yanguc miibong, "Sugucne, ye gung fagacka madickelu fangkedaicte."

<sup>14</sup> Ilec ye yegenia mifickelu yanguc edocebawec, "Lasaros ye biyac homagac. <sup>15</sup> Aime ngengi ngagesingkeningte ailu na yeholec iwa mi gaibale kwele-madic ngagegabac. Aime yakumac ngenge welebong yela hikenang."

<sup>16</sup> Inguc mime Tomas wacine monic Didimus\* yedi mic-tengteng ago-focene yanguc edocebawec, "Ye wehomanogale aigaingte nongileng inguchac Yesu bafickelu yeholec homanogale hikenang."

### *Homackacni gholiyelu fangke-fangke*

<sup>17</sup> Yesu ye Betani macka hikelu ngageme yanguc miibong, "Lasaros dongesiwa lobong biyac hadeng 4 inguc aigac." <sup>18</sup> Yerusalem nga Betani hewacnginac 3 kilomita yогоolec soc, eme-eme ngiyeiboc. <sup>19</sup> Ilec Yerusalemkocni Yuda ngic-nigic bocyacti yekele sengnginecte ailu kwele-mogung bafuwayetenogale milu, Mata nga Maria yekela kwesilu ngiyeibong. <sup>20</sup> Ngiyeebongka Yesu kwesigac, inguc mibong Mata ye yogo ngagelu yefewa bafuwanale hikeme, Maria ye macka ngiyewec.

<sup>21</sup> Ngiyeme Mata ye hikelu Yesu yanguc edowec, "Sugucne, ga nongeholec yagowa gadengka, ibac sengne mi homadec. <sup>22</sup> Aime yakumac ga wiycac monicte Wapong uwacnoengka ye nalic geledacite, inguc ngagegabac."

<sup>23</sup> Inguc mime Yesudi yanguc edowec, “**Senggone ye homackacni gboliyelu fangkedaicte.**”

<sup>24</sup> Inguc mime Matadi yanguc miwec, “Ye dameng moto-motoina homackacni gboliyelu fangkedaicte, yogobac ngagegabac.”

<sup>25</sup> Inguc mime Yesudi yanguc edowec, “**Homackacni gboliyelu fangke-fangke nga gaga, yogo na hocne.** Monic ye na ngagesingnudaicte, ye socinedi homadaicte, ailu ye sifu gaga badaicte. <sup>26</sup> Aime monic ye galu ngagesingnugac, ye mi homabenangkedaicte, miyac. Yogo ngagesingkegic me miyac?”

<sup>27</sup> Inguc mime yedi yanguc miwec, “Oc, Sugucne, ga Mesia, Wapongte Madec himongka kwesinale miicne, yogo biyac ngagesinggugabac, yogo ga hocne.”

<sup>28</sup> Inguc milu hefaliye hikelu kwaine Maria wackeme leme sangicka edolu miwec, “Wewedudi kwesi ngyelu gale uwagac.” <sup>29-30</sup> Aime Yesu ye mac-alingga mi kwestu sulumewec, ye Matadi molickelu hike bafuwalu hegile kwesiwec, mac yogowahac domaemewa Maria ye Matale yowa yogo ngagelu biyac fangkelu hikewec. <sup>31</sup> Aime Yuda ngic-ngigac yenge yele macka ngyelu kwele-mogung aiyeteibong, yenge Mariadi dacineholec fangkelu hikeme nganilu ye dongesiwa hiyanale hikegac, inguc milu ye balaibeibong.

<sup>32</sup> Aime Maria ye Yesu domawec, iwa hikelu Yesule higewa wafalu yanguc edowec, “Sugucne, ga yawa gadeng, ibac sengne nalic mi homadec.”

<sup>33</sup> Inguc milu hii-songgong ailu hiyame Yuda ngic-ngigac yeholec kwesibong, yenge momochac hiyaibong. Hiyabong Yesudi yenge nganicebalu kwele-sowackolecti ngage-sowalelu asuine baumaleme ngage-hobelulu <sup>34</sup> miwec, “**Wenuwa haic loibong?**”

Inguc mime miibong, “Sugucne, wele nganic.”

<sup>35</sup> Aime Yesu ye donge misaine wawec.

<sup>36</sup> Wame Yuda ngic-ngigac yengi nganilu miibong, “Nganining, ye Lasarosle kweleinedi angac sugucne hac ngagecaigac.”

<sup>37</sup> Aime yengelacni gocnedi yanguc miibong, “Ye molickelu donge-pisic dongenginang bame hilaibong. Aime Yesu ye ngic yago madicne damongkedeka midec, ye mi homadec.”

### *Lasaros homackacni bagboliyeme fangkewec*

<sup>38</sup> Yesu ye hatacmac ngage-sowalelu dongesiwa hike sulumewec. Dongesi yogo posa henebewa posa monicti yefeine hedickeicne. <sup>39</sup> Fame hike sulumelu yanguc edocebawec, “**Ngenge posa yogo baickening.**”

Inguc mime ngic homawec, yele sengngine Matadi miwec, “Sugucne, ye homame lobeng yakumac hadeng 4 aime biyac hoineholec aigac.”

<sup>40</sup> Inguc mime Yesudi yanguc edowec, “**Ga ngagesingkedamectewa, Wapongte wac feicne nganidamecte, yogo biyac edocgugabac.**”

<sup>41</sup> Inguc mime yenge posa yogo baickebong. Yesu ye donge hilame feme nganilu, yanguc miwec, “Mamac, ga yowane biyac ngagegic. Ilec gale kwele-madic migabac. <sup>42</sup> Ga damengsoc mimilocne ngagecaigic, yogo biyac ngagegabac. Aime ga na salecnuing, yogo ngic-habu yago domagaing, yengi ngagesingkeningte inguc edocgugabac.”

<sup>43</sup> Inguc milu Yesudi sanangnehac wackelu miwec, “**Lasaros, ga fangkelu lobina wanong.**” <sup>44</sup> Inguc mime ngic homaicne hige-moleine nga haicmesuine kpolucti someckelu wabungkeicnedi fangkelu wawec.

Wame Yesudi yanguc edocebawec, “**Ngenge kpoluc lukecnolu hegilebong hikena.**”

*Yesu webong homanale yowa hefeibong*

*Mat 26:1-5; Mrk 14:1-2; Luk 22:1-2*

<sup>45</sup> Yuda ngic-ngigac Maria nganinogale kwesiibong, yenge Yesudi bole bawec, yogo nganilu bocyacti ye ngagesingkeibong. <sup>46</sup> Mariala kwesiibong, yengelacni gocnedibac Farisaio yengela hikelu Yesudi pasi bawec, yoglec siduc edocebaibong.

<sup>47</sup> Edocebabong depec-baba ngic micnefocngineng ailu Farisaio, yenge Tutumangtowale memba wacebabong kwesi kpaduckeibong. Kpaduckelu yanguc miibong, “Ngic yogo, ngic-ngigac yengi ye ngagesingkeningte pasile maaine bocyac bagac. Ilec nongileng wenuc ainang? <sup>48</sup> Ye hegilebeng galu pasi ingucne taockelu badaictewa, ngic-ngigac sasawadi ye ngagesingedaingte. Inguc aime Roma yengele hudu-baba ngic yengi kwestilu Ibu-macnonggeng nga ngic-ngigacfocnonggeng basowalecebadaingte.”

<sup>49</sup> Inguc mibong yengelacni ngic monic wacine Kaifas, ye hifa iwa depec-baba ngic yengele damong sugucne gawec, yedi yanguc edocebawec, “Ngenge wiyac monic mi ngage-motogaing. <sup>50</sup> Ngic-ngigac aling sasawa mi miyac ainingte, ngic moniyangi sugu yengele ailu homamebac yenge gadaingte, yogodi madickedaicte, ngenge yogo mi ngage-motogaing, me?”

<sup>51</sup> Yowa yogo yeicne kweleinle ngagelu mi miwec. Yedi hifa iwa depec-baba ngic yengele damong sugucne gawec. Yoglec ailu siduc-mimi ngic ingucne yowa miwec. Yesudi Yuda ngic-ngigac yengele ailu homanale inguc miwec. <sup>52</sup> Ye yengele sugu homanale mi wawec. Ye Wapongte adu-madecfocine singsalolong kweibong gagaing, yenge kpaducebame aling moniyang ainingte Kaifasdi inguc miwec. <sup>53</sup> Inguc mime hadeng yogowahac Yesu webong homanale molickelu yowa hefeibong.

<sup>54</sup> Inguc hefebong Yesu ye yogo ngagelu Yuda ngic-ngigac yengele hewacka hatacmac yegena mi lolickelu gawec. Aime himong kisiwa misaine mikac, yoglec emeina taon monic wacine Efaraaim iwa fawec. Ye iwa hikelu mic-tengtengfocine yengeholec gawec.

<sup>55</sup> Yuda ngic-ngigac yengele Ewalicebaicnele hombang dameng bangkaleme, ngic-ngigac bocyacti Wapongte haicka suwenagulu gbagbacne ainingte macngineng hegilelu Yerusalem hikeibong. <sup>56</sup> Hikelu Ibu-mac kwelina domalu Yesu basackelu yengungtihac yanguc uwanaguibong, “Ye hombangnonggang kwestidaicte, me wenuc?”

<sup>57</sup> Aime depec-baba ngic micnefocngineng nga Farisaio yengi ngic-ngigac yanguc sanangnehac edocebaibong, “Yesu wenuwa gagac, yogo monicti bafuwalu ngama edocnubabong, hikelu badabeleng.”

## 12

*Yesu heloc hoineholec hosocnowec*

*Mat 26:6-13; Mrk 14:3-9*

<sup>1</sup> Ewalicebaicnele hombang yoglec hadeng 6 faemewa, Yesu ye Lasarosle mac Betani, iwa hikewec. Yesudi ngic ye hocne homackacni bagboliyeme fangkewec. <sup>2</sup> Yenge mac iwa Yesule ailu nosing madicne loibeibong. Aime Matadi nosing yogo lome noibong. Aime ngic Yesuholec ngiyelu nosing noibong, Lasaros yengeholec momoc ngiyelu nowec. <sup>3</sup> Ngiyeebongka,

yogowahac Mariadi socte sanda 1 kilo nebocene efecnemac, umacine yogoletscoc balu Yesule higewa kweme wame hosocnowec. Sanda yogo daling wacie narda, yoglec misainedi baicne ailu yoglec fuline feicnebenang. Hosocnolu hodoc-dowecinele susucinedi higeine keleng bacnowec. Inguc aime heloc yoglec hoinedi fitolu mac yoglec kwelina sawelu fawec.

<sup>4</sup> Aime mic-tengtengfocine yengele hewackacni mic-tengteng monic wacie Yudas Iskariot, yedi hocne lobewa gacgu Yesu mudockeme bidaingte, yedi yanguc miwec, <sup>5</sup> “Nongileng omale sanda yogo hifa moniyangte bolele fuli\* mi salegabeleng? Salelu moneng yogo balu ngic-ngigac waweweine yelebeng madickedec.” <sup>6</sup> Yudas ye ngic-ngigac waweweine yogo yengele ngagesilu mi miwec, miyac. Ye hise-baba ngicte ailu hiye-monengngineng damongkelu moneng hise balu nolu gawec. Ilec ailu inguc miwec.

<sup>7</sup> Inguc mime Yesudi yanguc miwec, “Ga ngigac ye hegilenong. Ye sanda yogo moc lome faemewa gacgu homadacte, dameng iwa moc longnudaingkale ailu, hosonelegac. <sup>8</sup> Ngic-ngigac waweweine yengele damengsoc ngengeholec gagidaingte. Nga nanibac ngengeholec damengsoc mi gadacte. Ilec ngigac ye aibaba madicine aigac.”

<sup>9</sup> Aime Yuda ngic-ngigac bocyacti Yesu ye Betani macka gagac, inguc ngagelu Yesu nganinogale sugu mi hikeibong. Yenge Yesudi Lasaros homackacni bagboliyeme fangkewec, ye momoc nganinogale hikeibong. <sup>10-11</sup> Inguc fikeme Yuda ngic-ngigac bocyacti Lasaros ailu micne yengele yowa hegilelu Yesu ngagesingkeibong. Ilec depec-baba ngic micne yengele Lasaros inguchac webong homanale yowa-hole baibong.

*Yesudi donggi feina Yerusalem hikewec  
Mat 21:1-11; Mrk 11:1-11; Luk 19:28-40*

<sup>12</sup> Mac saeme ngic-ngigac habutowadi hombangte ailu Yerusalem hikeibong. Hikelu ngagebong, Yesu ye biyac Yerusalem bangkalegac, inguc ngagelu ngic-ngigac yengele <sup>13</sup> yoc monic homu hengngine ingucnedi leso badulu yefewa Yesu fuluckeninge hikeibong. Hikelu yanguc wackebong, “Asec, ngic Sugucnele wacka welegac, ye mimi-madicineholec. <sup>(Mige 118:26)</sup>

Yedi Israel nongileng Ngictau.”

<sup>14</sup> Inguc wackebong Yesu ye donggi madecine monic bafuwalu feina felu ngiyewec. Yoglec ailu yanguc kwelengkeicne fagac,

<sup>15</sup> “Sion aduine,<sup>†</sup> ga mi hangocguna. Nganic, ngictaugone donggi madecinele feina ngiyeme welegac.” <sup>(Sek 9:9)</sup>

<sup>16</sup> Pasi fikewec dameng iwa mic-tengtengfocine yengele yoglec fungine mi ngage-motoibong. Gacgu Yesu ye wac feicneholec aiwec<sup>‡</sup>, dameng yowabac aibaba aicnoibong. Nga yowa yele ngagelu kwelengkeicne fagac, yogo ngage-motoibong.

<sup>17</sup> Aime ngic-ngigac habu yengele Yesuholec hikelu Lasaros dongesiwa homackacni wackelu bagboliyeme fangkeme nganilibong, yengi siduc yogo mibong sawewec. <sup>18</sup> Ye pasile maaine yogo bawecte ailu habutowadi ye nganinogale hikeibong. <sup>19</sup> Inguc aibong Farisaio yengele yengilangkac mingagec ailu yanguc miibong, “Ngagegaing, nongilengti wiyc monic ainogale

---

<sup>12:3:</sup> Luk 7:37-38    \* <sup>12:5:</sup> Ye denarius 300 miwec.    <sup>12:8:</sup> Yef 15:11    <sup>12:10-11:</sup> Yoa 11:45    <sup>12:13:</sup> Yoa 1:49    † <sup>12:15:</sup> Sion aduine yogo Yerusalem ngic-ngigac yengele nangeng yowa.  
‡ <sup>12:16:</sup> Yesu yeicne homalu homackacni gboliyelu fangkewec, dameng iwa ye wac feicneholec aime ngage-motoibong.    <sup>12:16:</sup> Yoa 2:22

silic mi aigac. Himongtowa yagolec ngic-ngigac sasawadi ye balaibelu hikeyackegaing."

### *Yesu nganinogale kwesiibong*

<sup>20</sup> Aime ngic-ngigac hombangte Wapong afeenogale Yerusalem hikeibong, yengele hewacka Grik ngic-ngigac gocne momoc Wapong afeenogale hiketibong. <sup>21</sup> Galu Filipta kwestilu miibong, "Ngic sugucne, nonge Yesu nganinogale ngagegabefeng." Aime Filip ye Galili prowinswa taon monic wacine Besaida, iwacni. <sup>22</sup> Inguc mibong Filip ye kwestilu Endru edome, yeke momochac hikelu Yesu edoiboc.

<sup>23</sup> Edoboc Yesudi bafaliyu yanguc edocepwec, "Ngicte Madec ye wac feicneholec ainale damengngine welegac. <sup>24</sup> Foinac, wit hucine monic homalu himongka mi haudaitewa, yogo yeicnakac sugu gadaite, yogo foinache-nang edocngebagabac. Nga homalu himongka haudaitewa, yogobac noine bocyac bafuwadaite. <sup>25</sup> Monic ye socte gagale angac ngagecaigac, ye gagaine sangkecnodaite. Nga himong yagowa socte gagale kweleinedi lobe holecnolu gacaigac, ye gagaine bagacgu gaga-sanang bafuwadaite. <sup>26</sup> Aime monic ye mole-baficne ainogale ngagegacka, ye na balaibecnudaic. Aime na gadacte, iwa ye inguchac naholec gadaite. Nga monic ye nale mole-bafic aidaictewa, Mamacnedi ye mitengkedaite.

<sup>27</sup> "Yakumacbac kwelene umale-benangkeme wenuc midacte? Mamac, ga dameng yagowacni baicnunong, inguc midacte, me? Yogodi nalic mi aigac, na dameng yagolec hocne ailu kwesiiba. <sup>28</sup> Mamac, ga wacgone feicne basugulenong."

Inguc milu domame, honocmengkacni yowa-malac monic yanguc fikewec, "Na wacne feicne biyachac basuguleiba, ailu hatacmac basuguledacte."

<sup>29</sup> Yowa inguc fikeme ngic-ngigac habutowadi yele emewa domaibong, yenge yowa-malac yogo ngagelu yanguc miibong, "Gbululungti holegac."

Aime gocnedi yanguc miibong, "Angelo monicti yeholec yowa migac."

<sup>30</sup> Inguc mibong Yesudi yanguc miwec, "Yowa-malac yogo nale ailu mi fikegac, miyac. Yogo ngenge baficngebanaile ailu fikegac. <sup>31</sup> Yakumacbac Waponti himongtowa yagolec ngic-ngigac mimoctocebadaitce. Ailu himongtowa yagolec ngictau baickedaite. <sup>32</sup> Aime ngic yengi himongkacni bafangnudaingte, dameng iwa, na ngic-ngigac sasawa kpaducebabe nala kwesiackedaingte." <sup>33</sup> Yeicne silicne wenucka homadaite, yagolec mime yegengkenale inguc miwec.

<sup>34</sup> Inguc mime ngic-ngigac habutowadi yele yowa bafaliyu yanguc miibong, "Yefe-yowawa yanguc mibong ngagecaigabeleng, 'Mesia fikelu damengngine moto-motoine mikac gaginowagac.' Aime ga wenukte migic, 'Ngic yenge Ngicte Madec bafangkedaingte.' Aime Ngicte Madec yogo maa?"

<sup>35</sup> Inguc mibong Yesudi yanguc miwec, "Angoc ye dameng bangkacnemac ngengeholec gadaite. Aime kundunge tapilidi somecngebadaickale, ngenge angoc fangeleme angcockolec gadabiyeng. Monic ye kundungka hikedaitce, ye yefe wenuwa hikegac, yogo nalic mi ngage-motodaite. <sup>36</sup> Ilec ailu ngenge angoci ngengeholec fame angoc yogo ngagesingkedaing. Inguc aigacgu angote adu-madecfocine aidaingte." Yesu ye inguc milu yenge hegilecebalu baickelu sangkewec.

### *Yesu mi ngagesingkeibong*

<sup>37</sup> Yesu ye pasile maaine bocyac yengele haicka bame, yengibac ye mi ngagesingkeibong. <sup>38</sup> Aime siduc-mimi ngic Yesaiyale yowa yogo noine fikewec,

"Sugucne, nonge siduc mibeng yegengkewec, ngic weni yengi ngagesingkeibong? Ailu Sugucnele bole sanangne yogo mala fikewec?" (Yes 53:1)

<sup>39</sup> Yogolec ailu yenge nalic mi ngagesingkeibong. Ailu Yesaiyadi yowa monic yanguc taockelu miwec,

<sup>40</sup> "Yenge dongenginengti nganidaingkale ailu, dongengineng bame kundung kwewec. Ailu kwelenginengti ngage-motolu hefaliyeme bmadicebadaickale ailu, kwelengineng basifuwewec." (Yes 6:10)

<sup>41</sup> Yesaiya ye Yesule wac feicne nganiwecte yele ngagelu yowa yago miwec.

<sup>42</sup> Aime ngic micne yengele hewackacni bocyacti Yesu ngagesingkeibong. Aimebac Farisaio yengi gacgu ngic micne kpakpaduc macka mi fedaingkale milu, yenge ngage-ngagesing yogo mi mibong yegengkewec. <sup>43</sup> Ngic micne yenge ngic-ngigac yengi wacngineng bafeningte angac sugucne hac fayelewec, yenge Wapongti wacngineng bafenale mi ngagelu gaibong.

<sup>44</sup> Aime Yesudi dacineholec wackelu yanguc miwec, "Monic na ngagesingnugac, ye na sugu mi ngagesingnugac, miyac. Ye na salecnuwec, ye momochac ngagesingkegac. <sup>45</sup> Ailu monic ye na nganicnugac, ye na salecnuwec ye momochac nganigac. <sup>46</sup> Aime ngic-ngigac ngagesingnugaing, yenge sasawadi kundungka hatacmac mi ganingte, himongka nani angoc waiba.

<sup>47</sup> "Monic ye yowane ngagelu mi balaibedaictewa, nani ye aibabaine mi wosaelu mimoctodacte, miyac. Na himongte ngic-ngigac aibabangineng wosaelu mimoctonogale mi waiba. Nabac ngic-ngigac yengele bikicte ameine babe wasecne ainingte waiba. <sup>48</sup> Aime monic ye na lobe holecnulu yowane mi balaibedaictewa, wiyac monicti yele aibabaine wosaelu mimoctodaite. Yowa migabac, yogodi hocne dameng moto-motoina aibabaine wosaelu mimoctodaite. <sup>49</sup> Naneicne kwelenele yowa mi micaigabac, miyac. Mamac salecnuwec, ye yeuctihac ung-yowaine minogale salecnuwec. <sup>50</sup> Yele ung-yowa yogo gaga-sanangineholec, na yogo ngaggegabac. Ilec ailu Mamac yowaine edocnuwec, yogohac micaigabac."

## 13

### *Mic-tengtengfocene higengineng suwewec*

<sup>1</sup> Ewalicebaicnele hombang bangkaleme deboc moniyang sugu fawec. Fame Yesu ye himontowa yago hegilelu Mamacta hefaliye fenale damengngine bangkalewec, yogo biyac ngagenaguwec. Inguc ngagelu yele ngic-ngigacfocine himontowa yagowa gagaing, yengele kweleinedi angac ngagelu gawec. Gacgu gagainelē damēng motōnōgale aime kweleinedi angac ngagelu aiyelewec. <sup>2</sup> Yenge awelilicte nosing nolu ngiyeibong. Aime Aleng Sugucnenginengti ngage-ngageine Yudas Iskariot, ye Saimon madecine, yele kwelewa yanguc biyac lowec, yedi gacgu Yesu mudockeme ngaba yengi badaing.

<sup>3</sup> Aime Mamacti wiyac sasawa Yesule molewa biyachac lowec. Nga ye Wapongtacni walu hatacmac hefaliye fedaicte, ye yogo biyachac ngagewec.

<sup>4</sup> Ngagelu mac ngiye-ngiyeine hegile fangkelu ngakpi dalicne hemoctolu keleng-baba monic balu hewacina hefewec. <sup>5</sup> Hefelu duwacka misa sot-ingkeme haume, mic-tengtengfocine yengele hige suweyelelu keleng-baba hewacina hefewec, yogodi higengineng bakelengkeyelewec.

<sup>6</sup> Inguc ailu Saimon Pitala leme, Pitadi yanguc uwacnowec, "Sugucnene, ga wenucte higene suwedamecte?"

<sup>7</sup> Inguc mime Yesudi yanguc edowec, "Na pasi aigabac, yogo ga yakumac yoglec fungine mi ngage-motogic. Nga lobewabac yoglec fungine ngage-motodamecte."

<sup>8</sup> Inguc mime Pitadi miwec, "Miyacbenang, ga nale hige mi suwedamecte."

Mime Yesudi bafaliyelu yanguc edowec, "Na higegone mi suwedactewa, ga naholec mi taockelu gadamecte."

<sup>9</sup> Inguc mime Saimon Pitadi miwec, "Sugucne, ga higene sugu mi suwedamecte, hodocne nga molene momoc suwenele."

<sup>10</sup> Inguc mime Yesudi yanguc miwec, "Monic ye misa biyachac lowalu socine bubuchac gbagbackewecka, hatacmac mi lowadaic, higeine sugu suwedaic. Ngenge gbagbacne biyachac aibong, aime yogo sasawa ngengele mi migabac." <sup>11</sup> I yangucte, ma ngicti ye mudockeme badaingte, yogo biyac ngagewec. Ilec ailu yanguc miwec, "Na sasawa ngengele mi migabac."

<sup>12</sup> Yesu ye higengineng suweyackeme motome, ngakpi daleine holelu hatacmac wangiyelu yanguc uwayelewec, "Na ngengela pasi bagabac, yoglec fungine ngage-motogaing, me? <sup>13</sup> Ngenge na Wewedu nga Sugucne wacnucaigaing, yogo nalic micaigaing, na yogo hocne. <sup>14</sup> Na Sugucne nga Wewedunginengti kwelekc kwelekc ingucne ailu higengineng suwegabacte, ngenge ngengungthiac inguchac higengineng suwenagudaing. <sup>15</sup> Na pasi madicne edalicngebalu aingelegabac, silicine ingucne hac bal-aibelu ngengungthiac badabiyyeng. <sup>16</sup> Foinac, kwelekc kwelekc ngic monicti sugucneinele feicne mi aidaicte. Nga ngic yowa bahikegac, yedi ngic ngiyelu saleme hikegac, yele feicne mi aidaicte, yogo noinebenang edocngebababac. <sup>17</sup> Ngenge yogo ngagelu balaibedaingtewa, ngenge kwele-angackolec gadaingte.

*Yudasdi Yesu baningte mime yegengkewec  
Mat 26:20-25; Mrk 14:17-21; Luk 22:21-23*

<sup>18</sup> "Na sasawa ngengele mi migabac. Bawosaecngebaiba, ngenge ngagec-ngebagabac. Ailu yowa Waponge hibiwa kwlengkeicne fagac, yogo noine fikenale yowa yago kwlengkeicne,

'Ngic naholec nosing nogac, ye biyac ngaba ainelenale aigac.' (Mige 41:9)

<sup>19</sup> Aibaba yogo fikedaicte. Aime ngenge 'Na gagabachac,' yogo ngagesingken-tingte ailu, yakumac aibaba yogo mi fikeemewa yoglec silicine edocngebababac. <sup>20</sup> Foinac, nani ngic me ngigac monic salebe kwesime monicti hefolegac, ye na hefolegnugac. Nga monic ye na hefolegnugac, ye Waponge na salecnuwec, ye momochac hefolegac, yogo noinebenang edocngebababac."

<sup>21</sup> Yesu ye yowa yogo mime, kweleine umaleme yowa yanguc milu edoce-bawec, "Foinac, ngengelacni monicti na ngaba yengele molewa locnudaicte, yogo noinebenang edocngebababac."

<sup>22</sup> Inguc mime mic-tengtengfocine yenge yengungthiac dongedi ngani-nagulu miibong, "Yogo male migac?" Inguc milu ngagebong kpungkewec.

<sup>23</sup> Aime mic-tengtengfocine yengele hewackacni Yesudi mic-tengteng monicte kweleinedi angackelu gawec, yedi Yesule emewa ngiyewec.

<sup>24</sup> Inguc ngyiyeme Saimon Pitadi ye hodocti sosoc aicnolu miwec, “Ga uwacnuc, yogo male migac?”

<sup>25</sup> Inguc mime mic-tengteng yogo Yesule mondacka holelu yanguc uwacnowec, “Sugcne, ga yogo male migic?”

<sup>26</sup> Inguc mime Yesudi yanguc miwec, “**Na bret nebocene yago hulungka kpomuluckelu ngic monic lacnodacte, ngic yogo hocne.**” Inguc milu bret balu hulungka kpomuluckelu Yudas Iskariot, Saimon madecine lacnowec.

<sup>27</sup> Bret lacname bame Satang, yedi kweleina hauwec. Haume Yesudi yanguc edowec, “**“Ga bole banogale ngagegic, yogo hikelu biyac badamec.”**

<sup>28</sup> Inguc mime mic-tengtengfocine ngyieibong, yenge ye oma wiyacte migac, yogo mi ngage-motoibong. <sup>29</sup> I yangucte, Yudas ye moneng balu gawecte ailu, hombangte wiyac monic fuli banale micnogac, me ngic-ngigac waweweine wiyac monic yelenale micnogac, inguc ngageibong. <sup>30</sup> Aime Yudas ye bret nebocene balu iwashac fangkelu hauwec. Dameng iwa mac debolewec.

### *Pitadi Yesu bisockedaicte*

*Mat 26:31-35; Mrk 14:27-31; Luk 22:31-34*

<sup>31</sup> Yudas haulu hikeme Yesudi yanguc miwec, “**Yakumacbac Ngicte Madec ye wac feicnepholec yegengkedaicte.**” Yegengkeme ngic-ngigac yenge Ngicte Madecte boleinle ailu Wapongte wac feicne ngagedaingte.

<sup>32</sup> Ngic-ngigac yenge Madec nganilu Wapongte wac feicne ngagedaingtewa, Mamacti yeicnele ailu Madecinele wac feicne yogo ngic-ngigac yengela bayegengkedaicte, yoglec dameng bangkalegac. <sup>33</sup> Adu-madecfocne, na dameng bangkacnemac ngengenpholec galubac hikebe ngenge na basacnudaingte. Aime Yuda ngic-ngigac edocebaiba, yogohac yakumac ngenge edocngebagabac. Na hikedacte, iwa ngenge nalic mi fudaingte, miyac. <sup>34</sup> Ung-yowa gbolicne monic yanguc ngelegabac, ngenge ago ainagulu kwele-angacka gadabiyeng. Na ngenge ago aingelelu kwele-angacka gacaigabac, silicine ingucnehab ngengi kwele-angacka ainagulu gadabiyeng. <sup>35</sup> Ngenge filesoc filesoc ago ainagulu kwele-angacka gadaingtewa, ngic-ngigac sasawadi nganilu ngenge nale mic-tengtengfocne gagaing, yogo ngagedaingte.”

<sup>36</sup> Inguc mime Saimon Pitadi yanguc uwacnowec, “Sugcne, ga wenuwa hikedamecte?”

Inguc mime Yesudi yanguc miwec, “**“Ga yakumac na hikedacte, iwa nalic mi balaibecnulu hikedamecte, gacgu lobewabac balaibecnulu fudamecte.”**”

<sup>37</sup> Inguc mime Pitadi hatacmac uwacnowec, “Sugcne, na omale yakumac nalic mi balaibecgudacte? Na ga baficgunogale nalic gagane hegiledacte.”

<sup>38</sup> Inguc mime Yesudi bafaliyelu yanguc edowec, “**“Ga nalic nale ailu gagagone hegiledamecte, inguc migic, me?**” Foinac, kokolec ngicne mi hiyemewa, gagi na bisocnung alecine habackang aidaicte, yogo noinebenang edocgugabac.”

## 14

### *Mic-tengtengfocine basanangebabawec*

**1** “Ngenge kwelengineng mi umaledaic. Ngenge Wapong ngagesingkelu, na inguchac ngagesingnudabiyyeng. **2** Nale Mamacte macka mac kweline bocayac fagac. Yogo mi fadecka midec, na yanguc mi edocngebababa, ‘Na ngengele mac kweline bamockenogale hikedacte.’ **3** Ailu ngengele mac kweline bamockenogale hikedactewa, hatacmac hefaliye kwsilu mengocngebabacte. Na gadacte, iwahac nongileng momochac ganangte ngagegabac. **4** Ailu yefe wenuwa hikedacte, ngenge yogo biyac ngagegaing.”

### *Honocmengte yefe*

**5** Aime Tomasdi yanguc uwacnowec, “Sugucne, ga wenuwa hikedamecte, yogo mi ngagegabeleng. Yefe yogo wenuc ngage-motodabelengte?”

**6** Uwacnome Yesudi yanguc miwec, “**Na hocne yefe nga yowa noine ailu gaga.** Monicti na mikacka Mamacta hikedacte yoglec yefe monic mi fagac.

**7** Ngenge na ngagecnudaingtewa, Mamaacne inguchac ngagedaingte. Ailu ngenge yakumac ye nganilu ngagegaing.”

**8** Inguc mime Filipdi yanguc miwec, “Sugucne, ga Mamac edalic-nubaengka nganilu ngagebeng andoine aime gadabelengte.”

**9** Inguc mime Yesudi yanguc edowec, “Filip, na dameng dalicne ngengele hewacka gabe ga mi ngagecnugic, me? Monic ye na nganicnugac, ye Mamaacne momoc nganigac. Aime ga wenucte Mamac edalicngebabe nganiningte micig? **10** Na Mamacte kwelewa gagabac nga Mamacti nale kwelewa gagac. Ga yogo mi ngagesingkegic, me? Yowa edocngebacaigabac, yogo neicne kwelele mi micaigabac, miyac. Mamacti nale kwelewa galu bole yogo balu gagac. **11** Ngenge yowane yago ngagesingkening, na Mamacte kwelewa gagabac nga Mamacti nale kwelewa gagac. Inguc mibe ngagebong kpungkeme, bolene bacaigabac, yogo ngagesingkening.”

**12** “Foinac, monic ye na ngagesingnudaicte, ye na bole bacaigabac, ingucne hac badaicte, yogo noinebenang edocngebababac. Ailu na Mamacta hikenogale bole balu gaiba, ye yogo ewalilu hatacmac sugucne hac badaicte.

**13** Madecti Mamacte wac feicne bafuwacionale ailu ngenge wiyc sasawa nale wacka uwacnobong, yogo aidacte. **14** Ailu wiyc monicte nale wacka uwaneledaingtewa, na yogo aidacte.

### *Tili Asu saledaicte*

**15** “Ngenge kwelenginengti nale angac ngagelu gadaingtewa, ung-yowane balaibedaingte. **16** Aime nani Mamac uwacnobe yedi na ingucne hac ngic-hewac monic baficngebale ngeleme yedi ngengeholec damengsoc gagidaicte. **17** Ailu ye yowa noinele Asu. Aime himongtowale ngic-ngigac yenge ye mi nganicaigaing. Ailu ye mi ngagegaingte nalic mi badaingte. Nga ngengibac ye ngagegaing, ye ngengele hewacka gacaigac, ailu kwelenginang hocne gadaicte. **18** Aime na hegilecngebabe ngenge buwenac ingucne mi gadaingte, miyac. Na ngengela kwsidacte. **19** Dameng bangkacnemac motome himongtowa yagolec ngic-ngigac yenge na hatacmac mi nganicnudaingte. Nga ngengibac nganicnudaingte. I yangucte, na gagabacte ailu ngenge gadaingte. **20** Na Mamaacnele kwelewa gagabac. Aime ngenge nale kwelewa gagaing. Nga nani ngengele kwelewa gagabac, ngenge dameng iwa yogo ngage-motodaingte.

**14:3:** Yoa 12:26    **14:6:** Yoa 11:25; Rom 5:1-2    **14:7:** Yoa 8:19    **14:9:** Yoa 12:45; Kol 1:15; Hib 1:3    **14:10:** Yoa 12:49    **14:11:** Yoa 10:38    **14:12:** Mrk 16:19-20    **14:13:** Mat 7:7; Yoa 15:16

**14:15:** Yoa 15:10; 1Yoa 5:3    **14:16:** Yoa 14:26; 15:26; 16:7    **14:17:** Yoa 16:13    **14:20:** Yoa 17:21-23

**21** "Monic ye nale ung-yowa ngagepangkelu balaibecaigac, ye kweleinedi nale angac ngagedaictewe. Aime monic ye kweleinedi nale angac ngagedaictewe, Mamacnedi inguchac yele angac ngagecnodaictewe. Aime nani yele angac ngagelu edalibe yegengkedaictewe."

**22** Inguc mime Yudas Iskariot waseinedi Yesu yanguc uwacnowec, "Sugucne, ga nonge sugu fikenolenogale ngagesigic. Nga himongtowa yagolec ngic-ngigac yengelabac mi fikedamecte, yogo wenukte?"

**23** Inguc mime Yesudi bafaliyelu yanguc edowec, "Monic ye kweleinedi nale angac ngagedaictewe, ye mic-yowane balaibedaictewe. Balaibeme Mamacti yele angac ngagecnome, noke yela kwesilu yeholec gadabelecte. **24** Nga monic ye kweleinedi nale angac mi ngagecaigac, ye mic-yowane mi balaibedaictewe. Aime na yowa mibe ngagecaigaing, yogo nale yowa miyac, yogo Mamac salecnuwec yele yowa hocne.

**25** "Na ngengeholec galu yowa yogo edocngebabac. **26** Aime Mamacti ngic-hewacngineng yogo Tili Asu nale wacka saleme wadaictewe. Walu yedi wiycasasawa wedungelelu yowa edocngebaiba, yogo kwelenginang kwe-fangkeme ngagesidaingte. **27** Na kwele-mogungka locngebalu hikedacte. Aime kwele-mogungne logabac, yogodi ngengela fagidaictewe. Himontowa yagolec ngic-ngigac yengi kwele-mogung yelecaigaing, kwele-mogungne yogo ingucne miyac. Ilec ngenge kwele-umac mi badaing. Ailu hangoc mi aidaing.

**28** "Na Mamacta hikelu hatacmac ngengela hefaliye kwsidacte, inguc mibe ngagegaing. Ailu ngenge kweledi nale angac ngagegaingka, ibac beliyedaingte. I yangucte, Mamac ye hocne nale feicne. **29** Aime hikedacte yagolec noine lobewa fikedacte, wiycasasawa yogo noine mi fikeemewa, ngengi ngagesingkeningte ailu siducine yakumac edocngebabac.

**30** "Himontowa yagolec ngictau kwsigacte na ngengeholec yowa dameng dalicne hatacmac mi midacte. Ngictau yogo yele tapili monic nale kwelewa mi fagac. **31** Aimebac na Mamacte angac ngagecaigabac. Ailu yedi bole-yowa banogale milu edocnuwec, yagolec silicina bole bacai gabac. Himontowa yagolec ngic-ngigac yenge yogo ngage-motoning.

"Fangkebong hikenang."

## 15

### Yesu ye waing muc

**1** "Na waing muc noine. Nga Mamacti waing bole fileine. **2** Muc mangngine gocne nala falu noine mi aibong, ye yogo sasawa welockelu wicebacai gac. Nga mangngine gocne noine aicaigaing, yogo sasawa noine bocyac ainingte, ye yogo bamadicebame madickedaingte. **3** Na mic-yowa edocngebacai gacabate ngenge biyac gbagbacne aiibong gagabi yeng. **4** Ailu ngenge naholec wetackelu gadabiyeng. Inguc aibong nani ngengeholec wetackelu gadacte. Waing muc mangnginedi mucina mi bakatackedaictewe, ye noine nalic mi aidaictewe. Ingucne hac ngenge naholec mi wetackelu gadaingtewe, noine monic mi aidaingte.

**5** "Naneuc waing mucine, aime ngengibac mangngine. Monic ye naholec wetackelu game, nani yeholec inguchac wetackelu gabe, ye noine bocyac aidaictewe. Ngenge na mikac bole monic nalic mi badaingte. **6** Monic ye naholec mi wetackelu gadaictewe, ye ngicti mangngine helockelu wickebong homacaigac, yogo ingucne hac ye helockelu wickedai gac. Aime mangngine

ingucne kpaduckelu dacka wickebong lobedaicte. <sup>7</sup> Ngenge naholec wetackelu gadaingte. Aime nale yowa ngengela wetackelu fadaictewa, wizac monicte aingeleme uwabong, yogo fikengeledaicte. <sup>8</sup> Ailu ngenge noine bocyac bafuwalu mic-tengtengfocne yegengkegaingte Mamacti alibaba yogolec wac feicnehac bagac.

<sup>9</sup> "Mamacti kweleinedi nale angackeme aicaigac, silicine ingucne hac nani kwelenedi ngengele angacnume aicaigabac. Ngenge nale kwele-angac kwelina wetackelu gadabiyeng. <sup>10</sup> Na Mamacnele ung-yowa balaibelu yele kwele-angac kwelina wetackelu gacaigabac. Yogo ingucne hac ngengi nale ung-yowa balaibedaingte, nale kwele-angacte kwelina wetackelu gadaingte. <sup>11</sup> Nale belic-belicti ngengela fagac. Aime kwelengineng sasawa belic-belicti fangelenale yowa yago edocngebabac.

<sup>12</sup> "Nale ung-yowa yanguc, na ngenge ago aingelelu kwele-angacka gacaigabac, silicine ingucne hac ngenge ago ainagulu kwele-angacka gadabiyeng. <sup>13</sup> Monic ye agofocene yengele ailu gagaine hegiledaicte, yele kwele-angac yogo feicnebenang. <sup>14</sup> Aime na ung-yowa ngelecaigabac, yogo balaibegaingka ngenge nale agofocene aigaing.

<sup>15</sup> "Kwelec kwekwe ye sugucneinedi wizac aicaigac, yogo mi ngagedaicte. Ilec ailu na ngengele kwelec kwekwe madec hatacmac mi midacte, miyac. Na ngengele agofocene migabac. I yangucte, na Mamacnelacni yowa ngageiba, yogo sasawa biyachac edocngebabayekiba. <sup>16</sup> Ngengi na mi bawosaecnuibong, miyac. Ngenge noine bafuwaningte ailu nani bawosaecngebala bolewa locngebaiba. Noine bafuwaningte yodogi fafa-sanang faginowagac. Ilec ailu ngenge wizac monicte nale wacka Mamac milockebong, yedi wizac yogo ngeledaicte. <sup>17</sup> Aime na ung-yowa yanguc ngelegabac, ngenge ngengifeng ago ainagulu kwele-angacka gadabiyeng.

### *Mic-tengtengfocine kweledi wicebaibong*

<sup>18</sup> "Himontowa yagolec ngic-ngigac yengi kweledi wicngebagaingka, ngenge yanguc ngagedaing, molickelu na inguchac kweledi wicnuibong. <sup>19</sup> Ngenge himontowa yagolec ngic-ngigac gadabongka, yenge yengeleng ayelecaigac, silicine ingucne hac ngengele angac ngagedabongka. Nga ngengebac himontowa yagowacni miyac, nani ngenge biyachac bawosaecngebala himontowa yagolec ngic-ngigac yengelacni baicngebaiba. Ilec ailu yengi ngenge kweledi wicngebadaingte. <sup>20</sup> Na yowa molickelu edocngebabaiba, yogo mi ngigecngebadaic, kwelec kwekwe ngic monicte sugucneinele feicne mi aidaicte. Ilec ailu ngic-ngigac yengi weyebic aineleibongka, yenge silicine ingucne hac ngenge weyebic aingeledaingte. Aime nale yowa balaibeibongka, ngengele yowa ingucne hac balaibedaingte. <sup>21</sup> Yenge salecnuwec, ye mi ngagegaing. Ilec yenge nale wacte ailu ngenge inguc aingeledaingte.

<sup>22</sup> "Na walu yengela yowane mi midackabac, yenge bikicnginengte umac mikac gadabong. Aime yakumachbac walu mibe bikicnginengte ailu migbedic ainogale yefe monic mi fagac. <sup>23</sup> Monic ye na kweleinedi wicnugac, ibac ye Mamacne inguchac kweleinedi wickegac. <sup>24</sup> Na bole balu gagabac yogo monicte pasi tapiliineholec ingucne biyachac esecne monic mi bawec, pasi ingucne yogo yengele hewacka mi badacka, ibac yenge bikicnginengte umac mikac gadabong. Aime yenge pasine yogo yakumac nganilubac

Mamacneholec noke kwelenginengti wicnupagaing. <sup>25</sup> Aime yowa yanguc fagac,

'Yenge fungine mikacka kwelenginengti mocbenang wicnuibong.' (*Mige 35:19; 69:4*)

Yogo yefe-yowanganang kwelengkeicne fagac. Aime yogo sasawa noine fikenan inguc aibong.

<sup>26</sup> "Ngic-hewacngineng kwsesidaicte, ye Mamactacni salengelebe kwsesidaicte. Ailu yedi hocne yowa noinele Asu. Aime yedi kwsesilu nale mime yegengkedaicte. <sup>27</sup> Aime ngenge molickelu naholec gaibong. Ilec ngengi inguchac nale mibong yegengkedaic."

## 16

<sup>1</sup> "Ngenge ngage-ngagesing yogo mi hegileninge yowa yago biyachac edocngebaiba. <sup>2</sup> Ngic yengi kpakpaduc macte aka holengelelu lobina locngebadaingte. Aime dameng monic kwsesidaicte, iwa yenge wehomacngelbadaingte. Dameng iwa ngagebong aibaba yogolec Wapong afeulu kwelec kwecnodaingte. <sup>3</sup> Yenge Mamac nga na mi ngagecnupagaingte inguc aidaingte. <sup>4</sup> Na molickelu dameng iwa ngengeloholec gaibale ailu yowa yogo mi edocngebaiba. Aime yengele dameng kwsesime basowalecngebadaingte, iwa na yengele yowa edocngebaiba, nale yowa yogo mi ngigecngebadaicte.

### Tili Asule hole

<sup>5</sup> "Na salecnuwec, yela hatacmac hefaliye hikedacte, yogolec dameng bangkale welegac. Aime ngengelacni monicti yanguc mi uwanelegac, 'Ga wenuwa hikedamekte?' <sup>6</sup> Na yowa yago edocngebababe ngenge kwelengineng umalegac. <sup>7</sup> Na yowa noine yanguc edocngebababe, na hikedacte, ibac ngen-gela madickedaicte. Entacka na mi hikedacte, ibac ngic-hewacngineng nalic mi kwsesidaicte. Na hikedactewa, ye salebe ngengela kwsesidaicte. <sup>8</sup> Yedi kwsesilu himontowa yagolec ngic-nigic yengele bikicnginengte umac, nga aibaba dondonne ailu mimocto-mimoctole bole, yogo bayegengkeme ngagebong noine aidaicte. <sup>9</sup> Bikicte fungine yogo yanguc, yenge na mi ngagesingnugaing. <sup>10</sup> Nga aibaba dondonnele fungine yogo yanguc, na Mamacta hikebe ngenge mi nganicnudaingte. <sup>11</sup> Nga mimocto-mimoctole fungine yogo yanguc, himontowa yagolec ngictau ye yowawa biyachac wawewec.

<sup>12</sup> "Aime na ngenge yowa bocyac edocngebanogale aigabac. Aime ngenge yakumachac yowa yogo ngagelu balaibelu gagalesoc mi aigac. <sup>13</sup> Yowa noinele Asu wadaicte, yedibac bacngebalu yowa noina mengcngebame hikedainaingte. Ailu ye yeicne kweleinle yowa mi midaicte. Ye Wapontacni yowa ngagecaigac, yogo midaicte ailu pasi lobewa fikedaicte, yogolec momoc edocngebadaicte. <sup>14</sup> Yedi nale fungine mime yegengkedaicte, ailu wac feicne neledaicte. I yangucte, ye neicne kwelewa yowa fagac, yogo balu mime yegengkedaicte. <sup>15</sup> Mamacta wiyac sasawa fagac, yogolec fileine na. Ilec ailu yanguc migabac, wiyac sasawa Asudi balu mime yegengkeneledaicte, yogo nalaicni. <sup>16</sup> Dameng bangkacnemac fagac, iwa mi nganicnudaingte. Ailu dameng bangkacnemac fagac, yogowabac hatacmac nganicnudaingte."

### Belic-belic

<sup>17</sup> Inguc mime mic-tengtengfocine gocne yengungtihic yanguc uwanaguibong, "Ye omale yanguc migac? 'Dameng bangkacnemac fagac, iwa mi nganicnudaingte. Ailu dameng bangkacnemac fagac, yogowabac hatacmac nganicnudaingte.' Ailu hatacmac yanguc migac, Na Mamacta hikedacte.'"

<sup>18</sup> Aime yenge ngagebong kpungkeme yanguc mingagec aibong, "Dameng bangkacnemac fagac, yogolec fungine wenuc? Nongileng yowa yogolec fungine mi ngagegabeleng."

<sup>19</sup> Mic-tengtengfocine yengi uwacnoningte aibong, Yesudi yengele kwelewa biyac ngageyelelu yanguc edocebawec, "Dameng bangkacnemac fagac, iwa mi nganicnudaingte. Ailu dameng bangkacnemac fagac, yogowabac hatacmac nganicnudaingte. Ngenge yowa yogolec ngengungtihic uwanagugaing, me?" <sup>20</sup> Foinac, ngenge hii-songgong nga kwele-sowac sugucne aiyebongka himongtowa yagolec ngic-ngigac yenge beliyedaingte, yogo noinebenang edocngebagabac. Aime ngenge kwele-sowac aibong kwele-sowacngineng yogodi bafaliyeme ngenge belic-belic hatacmac bafuwadaingte. <sup>21</sup> Ngigac monic ye madec-baba damengngine bangkale weleme, doic sugucne hac ngageme kogoc fikedacte. Ye kogoc himongka biyac fikegac. Yoglec ailu beliyegacte ailu doic yogo ngigeckegac.

<sup>22</sup> Silicine ingucne hac ngenge yakumac kwele-sowackolec gagaing. Aime hatacmac nganicngebadeacte, dameng iwa ngenge naholec kwelenginengti beliyedaingte. Aime monicti aingeleme kwele-sowac nalic mi aidaingte, ngenge belic-belickolec gadaingtehac.

<sup>23</sup> "Aime dameng iwa ngenge wiyc monicte mi uwaneledaingte, miyac. Foinac, ngenge wiyc monicte nale wacka Mamac milockebong, yedi wiyc yogo ngeledaict, yogo noinebenang edocngebagabac." <sup>24</sup> Ngenge esecne nale wacka wiyc monicte mi milockelu gaibong. Aime ngenge kwelengineng belic-belicti wakenale, wiycate milockelu badabiyeng.

<sup>25</sup> "Na nangeng yowawa yowa edocngebalu gaiba. Gabe damengngine kwesime na nangeng yowa ngengela hatacmac mi midacte, miyac. Na Mamacte yegenabenang milu edocngebabae yegengkedaict. <sup>26</sup> Dameng iwa ngenge nale wacka milockedacte. Aime na yanguc mi migabac, nani ngengelu ailu Mamac milockedacte. <sup>27</sup> Ngenge kwelenginengti nale angac ngagelu gagaing. Ailu na Mamactacni kwesiiba, yogo ngagesingkelu gagaing. Ilec Mamac yeuctihac kweleinedi ngengele angac ngagegac. Ilec ailu na inguc mi migabac. <sup>28</sup> Na Mamactacni himongtowa yagowa kwesiiba. Ailu hatacmac himongtowa yago hegilelu Mamacta hefaliy hikedacte."

<sup>29</sup> Inguc mime mic-tengtengfocine yengi yanguc miibong, "Ngagegic, ga yakumac nangeng yowa mi holelu migic, ga yegena migic. <sup>30</sup> Ailu wiyc sasawa ngageyackegic, yogo yakumac ngagegabeleng. Ailu ngic-ngigac yenge ngagelu uwageleningte aibong, ga yengele kwelewa biyac ngagegic. Ilec ailu ga Wapontacni kwesiing, yogo ngagesingkegabeleng."

<sup>31</sup> Inguc mibong Yesudi mic-tengtengfocine yanguc edocebawec, "Ngenge yakumac ngagesingkegaing, me?" <sup>32</sup> Ngagegaing, dameng monic kwesigac ailu biyac bangkale welegac, iwa ngenge na hegilecnulu siyeckelu singsalolong kwelu macnginangsoc hikedait. Aime na neicnac mi gadacte, Mamacti naholec gadaite. <sup>33</sup> Ngenge nala kwele-mogungkolec ganingte yowa yago edocngebagabac. Aime ngenge himongtowa yagowa doic sugucne hac ngagelu gadaingte. Aime nabac himongtowa yagolec tapili biyachac ewaliiba. Ilec ngenge kwelenginengte tapili mi wadaic."

**17***Yesudi yeicnele milockewec*

<sup>1</sup> Yesu ye yowa yogo milu dongeine hilame honocmengka feme yanguc milockewec, "Mamac, dameng biyac welegac. Madecti gale wac feicne yogo bame yegengkenale ga Madecgonele wac feicne yogo baengka yegengkena. <sup>2</sup> Ailu yele ngic-ngigac aling milu lacnoing yogo yenge yedi gaga-sanang yelenale ngic-ngigac sasawa yenge yele bagewa ganingte bole-yowa tapili-inholec ye lacnoing. <sup>3</sup> Aime ga Wapong moniyangti noine gagic. Ailu saleng wawec, yogo Yesu Kristo, yenge inguc nalic ngagecnupagaing, yogo gaga-sanangte fungine. <sup>4</sup> Na bole babele neleing, yogo bamoctoiba. Aime gale wac feicnedi himongka bole yogo bame angoleibong. <sup>5</sup> Mamac, himong nga sawa yeke mi fikeebocka na wac feicneholecti gaholec gaiba, ga wacne feicne gaholec fawec, yogo nelenong.

*Mic-tengtengfocene yengele milockewec*

<sup>6</sup> "Mamac, gageuc himongtowa yagowacni ngicfogcone bawosaecebaing. Yenge gale ngic gabong, gagi yenge nale molewa locebong wacgone bayegengkeyelebe yowagone balaibelu gaibong. <sup>7-8</sup> Ailu mic-yowa neleing, yogo biyac yelebe baibong. Ilec wiycasasawa gagi neleing, yogo galacni, yakumac yenge inguc ngagegaing. Aime galacni kwesiiba, yogo noinebenang ngage-motogaing. Ailu gagi noinebenang salecnung kwesiiba, yogo inguchac ngagesingkegaing.

<sup>9</sup> "Ilec yengele ailu milocgugabac. Himongtowa yagolec ngic-ngigac yengele mi milocgugabac, miyac. Na gagi ngic nale molewa locebaing, yengele ailu milocgugabac, yenge hocne gale aling, <sup>10</sup> aime nale wiycasasawa yogo gale, nga gale yogo nale. Aime na yengele gagawa wac feicne balu gagabac. <sup>11</sup> Himongtowa yagowa gaga damengne motonogale aigac. Aime yenge himongtowa yagowa gaebongka na gala fudacte. Mamac ga gbgbacne, nokilec moniyang, yogo ingucnehab yenge moniyang ainingte gagi wacgone neleing, yogo alingka ngani-damong aidamec. <sup>12</sup> Na yengeholec gaiba, dameng iwa wacgone neleing, wac yogowa damongebalu gabe monicti mi sangkewec, sasawadi wasecne aiibong. Yengelacni moniyang sugudi, dasanangte madec ailu sowalewec. Wapongte hibiwa yowa kwelengkeicne fagac, yowa yogo sasawa noine ainale inguc fikewec.

<sup>13</sup> "Aime nale belic-belicti yengela sawenale ailu yowa sasawa yago himongtowa yagowahac mibe yegengkeme, yakumac gala fudacte. <sup>14</sup> Na mic-yowagone yeleiba. Ailu kwilic kwesilu yagowa gagabacte ailu, himongtowa yagolec ngic-ngigac yenge kweledi wicnuibong. Aime silicine ingucnehab yenge kwilic kwesilu gagaingte ailu himongtowa yagolec ngic-ngigac yengi yenge kweledi wicebaibong. <sup>15</sup> Ga himongkacni baicebacte mi milocgugabac, miyac. Kindololo fileinedi basowalecebadackale ailu, gagi asa bacebadamec. Yoglec ailu milocgugabac. <sup>16</sup> Na himongtowa yagowacni miyac. Aime yenge ingucnehab himongtowa yagowacni miyac. <sup>17</sup> Gale yowa yogo noine, aime yowa yogodi bacebame gale bingec aidaing. <sup>18</sup> Aime gagi na himongtowa yagowa salecnung, ingucnehab nani yenge himongtowa yagowa salecebaiba. <sup>19</sup> Yenge yowa noine iwa galu gale bingec ainingte naueutihac yengele ailu gale bingec aigabac.

*Ngage-ngagesingkolec yengele milockewec*

<sup>20</sup> “Ailu na yengele sugu mi milocgugabac. Yengi mic-yowagone mibong ngic-ngigac yenge yowa yogo ngagelu ngagesingnudaingte, ngic-ngigac yogo yengele momoc milocgugabac. <sup>21</sup> Mamac, ga nale kwelewa gagic. Aime nani gale kwelewa gagabac, silicine ingucnehat yenge sasawa moniyang ainingte ailu nokilec kwelewa ganingte yengele milocgugabac. Ilec ailu gagi salecnung, yogo ngic-ngigac himontowa yagowacni yengi ngagesingkeningte ailu milocgugabac. <sup>22</sup> Nokilec moniyang gagabelec, silicine ingucnehat yenge moniyang ganingte ailu gagi wac feicne neleing, yogo biyachac yeleiba. <sup>23</sup> Yenge moniyangbenang ganingte nani yengele kwelewa gabe, gagi nale kwelewa gadamecte. Inguc fikeme himontowa yagolec ngic-ngigac yenge gagi na salecnung waiba, yogo ngage-motodaingte. Aime ga kwelegonedi nale angac ngagelu ainelegic, silicine ingucnehat kwelegonedi yengele angac ngagelu ayelegic, yogo ngage-motodaingte.”

<sup>24</sup> “Mamac, himong nga sawa mi fikeebocka, ga nale biyachac angacguwec, aime wac feicne neleing. Aime ngic-ngigacfocne nale molewa locebaing, yenge nale wac feicne yogo nganiningte na gadacte, iwhahac nonge momoc ganangte ainelegac. <sup>25</sup> Aibaba dondonnele Mamac, himontowa yagolec ngic-ngigac yenge ga mi ngagecgubong, nani ga biyachac ngagecguba. Aime gagi na salecnung waiba, nale ngic-ngigacfocne yenge yogo ngagegaing. <sup>26</sup> Gagi kwelegonedi nale angac ngagelu aineleing. Kwele-angac yogodi yengele kwelewa fanale ailu na yengele kwelewa ganogale, nani gale wac biyachac mibe yegengkeme ngageibong. Ailu mibe yegengkeme ngagedaingte.”

## 18

### *Yesu baibong*

*Mat 26:47-56; Mrk 14:43-50; Luk 22:47-53*

<sup>1</sup> Milockeme motome, Yesu ye mic-tengtengfocine yengeholec hikelu Kidrong misa falockelu nebocina edi-haic yufu-bole monic fawec, iwa feibong.

<sup>2</sup> Aime Yesu ye mic-tengtengfocine yengeholec dameng bocyac yufu-bole iwa kpatulelu gaibong. Ilec Yudas, Yesu mudockeme badaingte, ye inguchac yufu-bole yogo ngagegac. <sup>3</sup> Ye inguc ngagelu depec-baba ngic micne nga Farisaio yengele lebe-ngic, ailu Roma yengele hudu-baba ngic bacebame kwesiiibong. Yenge hifa nga angoc ailu hudule wiyac gocne momoc balu kwesiiibong.

<sup>4</sup> Aime Yesu ye pasi fikecnodaicte, yogo biyac ngageyackewecte ailu, yengele emewa lelu yanguc uwayelewec, “**Ngenge ma basackegaing?**”

<sup>5</sup> Uwayeleme yengi yanguc miibong, “Yesu Nasaret-hocni, ye basackega-beleng.”

Inguc mibong Yesudi yanguc miwec, “**Yogo na hocne, na gagabachac.**”\* Aime Yudas ye Yesu mudockenale, yengele hewacka domawec. <sup>6</sup> Aime Yesudi miwec, “**Yogo na hocne, na gagabachac,**” dameng iwhahac yenge lobe-lo lu himongka waweibong.

<sup>7</sup> Welu fabong hatacmac uwayelewec, “**Ngenge ma basackegaing?**”

Mime miibong, “Yesu Nasaret-hocni.”

---

**17:22:** Sale 4:32   \* **18:5:** Wahikeicne 3:14 iwa Wapongti Mosesholec mingagec ailu yeicne wacine wackelu “na gagabachac” miwec.

<sup>8</sup> Inguc mibong Yesudi bafaliyelu yanguc edocebwec, “**Na biyac edocngebababac, yogo na hocne, na gagabachac.** Ngenge na basacnugaangka, mic-tengteng yago yenge nalic hegilecebabong hikedaing.” <sup>9</sup> Aime Yesudi yowa monic biyachac yanguc miwec, “**Ga ngic nale molewa locebaing, yengelacni monic mi hegilebe sangkewec.**” (*Yoa 6:39*)

Yogo sasawa noine ainale inguc miwec.

<sup>10</sup> Aime Saimon Pita ye hudule fitec monic macineholec balu gawec, yogo fuluckelu fitec yogodi kwelech kwekwe ngic monic welu hedecine foleinapec wekwackeme wawec. Ngic yogo ye depec-baba ngic yengele damong sugucne, yele kwelech kwekwe ngic, wacine Malakus.

<sup>11</sup> Wekwackeme Yesudi Pita yanguc edowec, “**Ga hudu-babale fitecgone macina loengka hauna. Mamacti doicte aibaba nale milu alingkewec, yogo nelewec, yogo ngageng nalic hegiledacte, me? Miyac, yogo balaibedacte.**”

### *Yesu Annasla bahikeibong*

<sup>12</sup> Aime Roma yengele hudu-baba ngic nga yengele damong sugucne, ailu Yuda ngic micne yengele lebe-ngic yenge Yesu balu moleine hefeibong. <sup>13</sup> Hefelu molickelu Annasla balu hikeibong. Aime Annas ye Kaifas kwegaine ye hifa-dameng iwa depec-baba ngic yengele damong sugucne gawec. <sup>14</sup> Aime “ngic moniyangti ngic-ngigac yengele ailu homamebac yenge gadaingte, yogodi madickedaict,” yogo Kaifasdi Yuda ngic biyachac milu edocebame ngagebong fawec.

### *Yesu bisockewec*

*Mat 26:69-70; Mrk 14:66-68; Luk 22:55-57*

<sup>15</sup> Yenge Yesu balu hikeibong, Saimon Pita nga mic-tengteng agoine monic, yeke Yesu balaibelu hikeiboc. Hikelu depec-baba ngic yengele damong sugucne, yele macka sulumeiboc. Aime mic-tengteng agoine nga depec-baba ngic yengele damong sugucne yeke ngagenagugaict, ye Yesu balaibelu oda kwelina fewec. <sup>16</sup> Feme Pita ye oda nuinele lobina domawec. Domame mic-tengteng agoine nga depec-baba ngic yengele damong sugucne yeke ngagenagugaict ailu, yedi walu ngigac nule damong domawec, ye edolu Pita mengockeme oda kwelina feiboc.

<sup>17</sup> Feboc kwelech kwekwe ngigac nu damong domawec, yedi Pita nganilu yanguc uwacnowec, “**Ga inguchac ngic bawelegabiyeng, yele mic-tengteng, me?**”

Mime Pitadi miwec, “Na miyac.”

<sup>18</sup> Aime mac tiloine aiwecte kwelech kwekwe ngic nga lebe-ngic yenge kwesilu dac kpaduckelu fitobong ubilangkewec. Ubilangkeme socngineng babong dacine aime domaibong. Domaebongka Pita ye inguchac socine bame dacine ainale welelu hewacnginang domawec.

### *Yesu yeicne funginle uwacnowec*

*Mat 26:59-66; Mrk 14:55-64; Luk 22:66-71*

<sup>19</sup> Aime depec-baba ngic yengele damong sugucnedi Yesu mic-tengtengfocene yengele nga yeicne wewedu boleinele mi-uwac aicnowec.

<sup>20</sup> Inguc uwacname Yesudi bafaliyelu yanguc edowec, “**Na damengsoc himongtowa yagolec ngic-ngigac yowane edocebalu gacaigabac.** Galu kpak-paduc macnginang nga Ibu-macnginang milu gaiba. Aime Yuda ngic-ngigac sasawa kpaduckecaigaing, mac iwa yowa sangke-sangke monic mi milu

gaiba. <sup>21</sup> Aime ga omale na uwanelegic? Ngic-ngigac yowa mibe ngageibong, yenge uwayelenong. Na yowa miiba, yogo yengi ngagegaing."

<sup>22</sup> Inguc mime lebe-ngic yengelacni monici yele emewa domawec, yedi Yesu wepatangkelu yanguc edowec, "Ga omale depec-baba ngic yengele damong sugucnele yowa ameine alang mi bacnolu inguc bafaliyecnogic?"

<sup>23</sup> Inguc mime Yesudi bafaliyelu yanguc edowec, "Na yowa sowacne monic migabacka, yogo mifickleengka yegengkena, me noine migabacka omale wecnugic?" <sup>24</sup> Inguc mime Annasdi<sup>†</sup> Yesu mutci hefecicne mucineholec salemre depec-baba ngic yengele damong sugucne Kaifas, yela balu hikiebong.

### *Yesu hatacmac bisockewec*

*Mat 26:71-75; Mrk 14:69-72; Luk 22:58-62*

<sup>25</sup> Aime Saimon Pita ye dacka socine bame dadaweme domaemewa, yengi nganilu uwacnoibong, "Ga mic-tengtengfocine yengele alingkacni monic ga, me?"

Inguc mibong, yedi bisockelu yanguc miwec, "Na miyac."

<sup>26</sup> Inguc mime depec-baba ngic yengele damong sugucnele kwelec kwekwe ngic monic, ye Pitadi hedecine wekwackewec, yele alingkacni ngic monic yedi miwec, "Ga yufu-bolewa yeholec gaengka na nganicgugabac, me?"

<sup>27</sup> Inguc mime Pita ye hatacmac bisockeme, iwashac kokolec ngicne hiyawec.

### *Pailate haicka domawec*

*Mat 27:1-2,11-31; Mrk 15:1-20; Luk 23:1-5,13-25*

<sup>28</sup> Mac saeme ubiyacte, yenge Yesu Kaifasle mackacni bahikelu gawana nga hudu-baba ngic yengele macte oda kwelina gacaigaing, iwa bahikeibong. Aime depec-baba ngic yenge Waponge haicka wonongnginengkolec ailu Ewalicebaicnele hombangte lama madecine mi nodaingkale, milubac yenge oda kwelina mi feibong. <sup>29</sup> Inguc aibong gawana Pailat ye oda lobina walu yanguc uwayelewec, "Ngenge ngic yago fungine omale yowawa loagaing?"

<sup>30</sup> Inguc mime yengi ameine bafaliyelu yanguc edoibong, "Ye aibaba sowacne mi aidecka midec, nonge ye gala nalic mi balu kwesidabeng."

<sup>31</sup> Inguc mibong Pailatdi yanguc edocebabawec, "Inguc aime ngenge bahikelu ngengileng yefe-yowangineng balaibelu aibabaine wosaelu mimootching."

Inguc mime Yuda ngic yengi yanguc mibong, "Nonge ngic monic webeng homadaicte yogolec Roma gamangti kpatalanoleme gagabeleng." <sup>32</sup> Yesu ye esecne yeicne yefe wenuc ailu homanale miwec, yogo sasawa noine ainale aibaba yogo fikewec.<sup>‡</sup>

<sup>33</sup> Aime Pailat ye oda kwelina hatacmac felu Yesu wackelu yanguc uwacnowec, "Ga Yuda ngic-ngigac yengele ngictau, me?"

<sup>† 18:24:</sup> Depec-baba ngic yengele damong sugucne moniyang sugu gacaigaic. Molickelu Annas ye depec-baba ngic yengele damong sugucne gawec. Galu ye bole yogo hegilewec. Hegileme Kaifas yedi bole yogo bawec. Aime sifu dameng gocta yenge Annas damong sugucne wackelu gaibong. Ilec 15 yogowacni 23 iwa Annas ye depec-baba ngic yengele damong sugucne wackelu gaibong. <sup>18:27:</sup> Yoa 13:38    <sup>18:31:</sup> Yoa 19:6-7    <sup>‡ 18:32:</sup> Yuda ngic yenge ngic sowacne wehomanogale posadi holecebabong homalu gaibong. Aime Roma ngic yenge ngic sowacne wehomanogale malicpongka wecebabong homalu gaibong.    <sup>18:32:</sup> Yoa 3:14; 12:33

<sup>34</sup> Inguc mime Yesudi ameine bafaliyelu yanguc edowec, “**Ga yowa yogo gageuc migic, me gocne yengi nale fungine edocgubiyengte migic?**”

<sup>35</sup> Inguc mime Pailatdi ameine yanguc edowec, “Na Yuda ngic, me? Yogo miyac. Gageicne ngic-ngigacfocgone ailu depec-baba ngic micne yengi ga nala molewa locgugabiyeng. Aime ga oma wiyc aimec?”

<sup>36</sup> Inguc mime Yesudi ameine bafaliyelu yanguc miwec, “**Nale nganidamong yogo himongtowa yagowacni miyac.** *Yogo yagowacni aidecka midec, na Yuda ngic yengele molewa nalic mi locnudabong. Aime mic-tengteng yengi nale ailu yengeholec wenagudabong. Ilec nale nganidamong yogo himongtowa yagowacni miyac.*”

<sup>37</sup> Inguc mime Pailatdi miwec, “Foinac, ga ngictau monic, me?”

Inguc mime Yesudi ameine bafaliyelu yanguc miwec, “**Gagi nale ngictau monic migic.** Oc, na fikelu yowa noinele bole balu yoglec mibasanang aiyelelu mibe yegengkenale himongtowa yagowa waiba. Aime ngic-ngigac monic ye yowa noine balaibelu gagac, yedi nale yowa ngagedaite.”

<sup>38</sup> Inguc mime Pailatdi miwec, “Aime yowa noine weni yogodi aigac?” Inguc milu hatacmac Yuda ngic yengela hefaliye haulu yanguc edocebwec, “Na yele sowacne monic mi bafuwagabac. <sup>39</sup> Na ngic moniyang Ewalice-baicnele hombangte muc-mackacni baickebe wacaigac, ngengele aibaba yogo fagacte ngic yago Yuda ngic-ngigac ngengele ngictau lukengelebele ngagegaing, me?”

<sup>40</sup> Inguc mime yengi hatacmac dacineholec aukwelu yanguc miibong, “Ngic ye miyac, Barabasbac loengka wana.” Nga Barabas yebac kindololo ngic.

## 19

### *Yesu malicpongka weningte mimoctowec*

<sup>1</sup> Aime Pailatdi mime hudu-baba ngic yengi muc-hududi Yesu welu socine weloc-kwalloc weibong. <sup>2</sup> Welu ngictaule duu ingucne muc-somang monic patiyelu hingoc ingucne hodocina holecnobong hauwec. Ailu yenge ngictaule ngakpi dalicne ingucne mondo-sasac holecnobong hauwec. <sup>3</sup> Inguc ngagelu emeina welelu midelec aicnolu yanguc milu gaibong, “Ohec, Yuda ngic-ngigac yengele ngictau.” Inguc milu wepatangkelu gaibong.

<sup>4</sup> Aime Pailat ye hatacmac lobina walu yanguc miwec, “Ngagegaing, na ngic yele sowacne monic mi bafuwagabacte ailu, mengockelu wagabac.”

<sup>5</sup> Inguc mime Yesu ye ngakpiine mondo-sasac ailu duuine somagineholec yogo socina holelu walu domame, Pailatdi yanguc miwec, “Ngenge ngic yago nganining.”

<sup>6</sup> Inguc mime depec-baba ngic micne nga lebe-ngic yengi ye nganilu yanguc wackebong, “Malicpongka weng homana! Malicpongka weng homana!”

Inguc mibong Pailatdi yanguc miwec, “Na yele sowacne monic mi bafuwagabacte ailu, ngengung mengocke hikelu malicpongka webong homana.”

<sup>7</sup> Inguc mime Yuda ngic yengi ameine bafaliyelu yanguc miibong, “Ye yeicne socine bafelu na Wapongte Madec miwec. Ilec ailu nonge yefeyowanonggeng fagac, yogo balaibelu ye homanale migabeleng.”

<sup>8</sup> Inguc mibong Pailat ye yowa yogo ngagelu esecne hangockewec, yogo ewalilu hangockebenangkewec. <sup>9</sup> Hangockeme ye oda kwelina hatacmac

felu Yesu uwacnowec, "Ga wenuwacnibenang?" Inguc mime Yesu ye ameine monic mi bafaliyelu edowec.<sup>10</sup> Inguc aime Pailatdi hatacmac uwacnowec, "Ga omale nale yowa ameine mi bafaliyegic? Na nalic mimoctobe hikedamecte. Ailu nalic malicpongka wecgudakte, yogolec bole-yowa nga tapili nala fagac. Ga yogo mi ngagegic, me?"

<sup>11</sup> Inguc mime Yesudi ameine bafaliyelu yanguc edowec, "Ga tapili yogo wilengkacni mi geledecka, ga nale tapili nalic mi bawadeng. Ilec yanguc aigac, na gale molewa locnugac,"<sup>\*</sup> yele bikicte amedi gale bikicte ame ewaligac."

<sup>12</sup> Inguc mime Pailat ye iwahac Yesu wenuc lome hikenale ngagesime Yuda ngic yengi wackebong, "Ga ngic yogo hegileng hikedaitcowa, Sisale ago mi gadamecte. Monic ye yeicne wac bafelu yanguc midaicte, 'Na ngictau,' ye Sisale ngaba."

<sup>13</sup> Inguc mibong Pailat ye yowa yogo ngagelu Yesu wenuc hegileme hikenale yefe basackewec. Basackelu Yesu mengockeme mac lobina walu mac monic wacine Posa-dakec, iwa mimocto-mimocotle mac ngiye-ngiye yogo Posa-dakec feina fawec, iwa felu ngiyewec. Mac yogo, Hibru yowawa wacine Gabata.

<sup>14</sup> Aime Ewalicebaicnele hombang damengte efec-tafec ailu nosing kpak-paducte dameng aiwec. Aime 12 kilok bangkaleme, Pailatdi Yuda ngic-ngigac yanguc edocebawec, "Ngenge ngictaungineng nganining."

<sup>15</sup> Inguc mime yengi aukwelu yanguc wackebong, "Baickenong, baickelu malicpongka weng homana!"

Inguc wackebong yanguc edocebawec, "Na ngictaungineng malicpongka webe homanale ngagegaing, me?"

Inguc mime depec-baba ngic micne yengi bafaliyelu yanguc miibong, "Nongele ngictau monic mi gagac, Sisadi sugu gagac."

### *Yesu malicpongka weibong*

*Mat 27:32-44; Mrk 15:21-32; Luk 23:26-43*

<sup>16</sup> Inguc mibong Pailatdi malicpongka weningte yengele molewa lolu hegileyeleme, Roma yengele hudu-baba ngic yengi baibong.<sup>17</sup> Babong Yesu yeuctihac malicpongngine tengkeme himong bulilicine monic, wacine Hodoc-luwe wackeicne, nga Hibru yowawa Goligata, iwa balu hikeibong.<sup>18</sup> Yogowa hikelu Yesu malicpongka weibong. Aime yeholec ngic yaeckang neboc nga neboc wecepabong domaiboc. Aime Yesudi hewacnginac domawec, inguc wecebaibong.

<sup>19</sup> Aime Pailat ye sowacneine yanguc kwelengkelu malicpongka lome domawec, "Yesu Nasaret-hocni, ye Yuda ngic-ngigac yengele ngictau."<sup>20</sup> Aime Yesu malicpongka weibong, himong-hakic yogo taon emeina fawecte ailu, Yuda ngic-ngigac bocysti kweleng yogo wafeibong. Kweleng yogo Hibru yowawa nga Latin yowawa, ailu Grik yowawa kwelengkeicne domawec.

<sup>21</sup> Inguc kwelengkeicne domame Yuda ngic-ngigac yengele depec-baba ngic micnefocngineng yengi Pailat yanguc edoilbong, "Ye Yuda ngic-ngigac yengele ngictau", inguc mi kwelengkec. 'Ngic yago yeuctihac miwec, na Yuda ngic-ngigac yengele ngictau,' ga inguc kwelengkenong."

<sup>22</sup> Inguc mibong Pailatdi yanguc miwec, "Yowa biyac kwelengkebabac, yogo andoine."

<sup>19:9:</sup> Mat 27:12    \* <sup>19:11:</sup> Gocne yengele yanguc ngagegaing, yogo Kaifasle migac. Nga gocne yengi yanguc ngagegaing, yogo Yuda ngic-ngigac yengele migac.    <sup>19:11:</sup> Yoa 10:18; Sale 2:23; Rom 13:1

<sup>19:12:</sup> Luk 23:2; Sale 17:7

<sup>23</sup> Aime hudu-baba ngic yengi Yesu malicpongka webong domame, ngakpi-kpolucine botoc babong habu 4 aime, sasawadi baibong. Aime ngakpi daleine monic yogo susucine mi gbodoicne, <sup>24</sup> yenge yogo nganilu mingagec ailiu yanguc miibong, "Nongileng yago mi basulackenang. Ngakpi yago madi badaicte, yogolec loling monic ainang."

Wapongte hibiwa yowa yanguc kwelengkeicne fagac,  
"Yenge ngakpi-kpoluc botoc balu ngakpi dalene banogale loling monic aiibong."  
*(Mige 22:18)*

Yogo sasawa noine fikenale hudu-baba ngic yenge inguc aiibong.

<sup>25</sup> Aimebac Yesu nenggackecine, nga Kolopas ngigacine Maria, wacine monic Magadalen, yenge Yesule malicpong emeina lelu domaibong.

<sup>26</sup> Domaebongka Yesudi mic-tengteng angac ngagecnolu gawec, ye nganime nenggaccineholec domame, nenggacine yanguc edowec, "**Nigiac, yogo gale madec aidac.**" <sup>27</sup> Inguc milu mic-tengteng yogo inguchac yanguc milu edowec, "**Nganic, yogo gale nenggac aidac.**" Inguc mime dameng iwahac mic-tengteng ye Yesu nenggacine damongkelu macina gawec.

### *Yesu homawec*

*Mat 27:45-56; Mrk 15:33-41; Luk 23:44-49*

<sup>28</sup> Inguc milu Yesu ye ngageloleine boleine bamoctowec. Inguc ngageme yowa Wapongte hibiwa kwelengkeicne fagac, yogo sasawa noine fikenale yanguc miwec, "**Na misale ainelegac.**" <sup>29</sup> Inguc mime misa bokong monic waing hobecineholecti wakeicne domawec, yenge yogo balu spans monic balu waingka kpomuluckelu hisop yoc mangngina hefelu lobong Yesule micka fewec. <sup>30</sup> Feme Yesu ye waing yogo nolu yanguc miwec, "**Na bolene biyac bamoctogabac.**" Inguc milu ubeine patickeme asuine hegileme ofelu hikeme homawec.

<sup>31</sup> Hadeng yogowa Ewalicebaicnele hombangte efec-tafec dameng aiwec. Aime Yuda ngic-ngigac yenge ngic malicpongka wecebaibong, yengele kponggbong yogo Sabat damengka malicpongka mi domaingte ngageibong. (Sabat dameng yogo hombang sugucnebenang.) Ilec ailiu hudu-baba ngic yenge malicpongka ngic higengineng welockelu bamoctoceanogale Pailat uwacnoibong. <sup>32</sup> Uwacnobong hudu-baba ngic yengi kwesilu ngic Yesuholec malicpongka wecepaibong, molickelu monicte hige weduibong, ailiu monicte inguchac weduibong. <sup>33</sup> Weducepalubac Yesula lelu nganibong, ye biyac homawec, inguc aime higeine mi weduibong. <sup>34</sup> Aime hudu-baba ngic monictibac sangaladi Yesule magocka kweme sac nga misadi inguc yefe waiboc. <sup>35</sup> Ngenge inguchac aibaba fikewec, yogo ngagesingkengtinge ailiu na dongenedi nganiba ailiu yogo milu kwelengkebe yegengkegac. Ailiu na wiyac mibe yegengkegac, yogodi noine aigac, yogo ngagegabac.

<sup>36</sup> "Yenge luweine monic mi wedudaingte." *(Wah 12:46; Him 9:12; Mige 34:20)*

Yowa yogodi Wapongte hibiwa yowa kwelengkeicne fagac, yogo sasawa noine ainale inguc fikewec.

<sup>37</sup> Wapongte hibiwa yowa monic yanguc fagac,  
"Ngic kwembalackeibong, yengi dongenginengti nganidaingte." *(Sek 12:10)*

### *Yesu longkeibong*

*Mat 27:57-61; Mrk 15:42-47; Luk 23:50-56*

<sup>38</sup> Yogo motome ngic monic wacine Yosefe, Arimateahocni, yedi Pailatla hikelu Yesule kponggbong malicpongkacni bamoctonogale uwacnowec. Uwacname Pailatdi mimoctome, Yosefe ye hikelu Yesule kponggbong bamoctowec. Ye Yesule mic-tengteng gawec. Ailu ye Yuda ngic-ngigac micnefocngineng yengele hangockeme yegena mi fikelu gawec. <sup>39</sup> Nga Nikodemus, ye esecne debocka Yesuholec mingagec aiiboc, yedi tokic hoine madicne wacine mira nga heloc gocene wacngineng aloi, yogodi laliceicne, yengele umacine 30 kilo-lesoc, yogo balu kwesiwec. <sup>40</sup> Yeke yogo bakwesilu Yuda ngic-ngigac yengele kponggbong longke-longke aibaba yogo balaibelu Yesule kponggbong balu kpoluc madicnebenangti heloc hoine madicne yogoholec wabungkeiboc. <sup>41</sup> Aime yeke Yesu malicpongka weibong, mac yoglec emeina bole monic fawec, bole yoglec kwelina henebe monic gbolicne ngicti baicne domawec. Aime esecne ngic monic iwa mi loicne, iwa loiboc. <sup>42</sup> Yuda ngic-ngigac yenge dameng iwa hombangte efec-tafec aiibong. Aime dongesi yogo eme-eme fawecte, yeke Yesule kponggbong iwa loiboc.

## 20

*Yesu homackacni gboliyelu fangkewec*

*Mat 28:1-8; Mrk 16:1-8; Luk 24:1-12*

<sup>1</sup> Sonda ubiyactebenang kundung-kundung fame Maria, wacine monic Magadalen, yedi dongesiwa hikelu nganime dongesi nuinele posatowa, yogo baickeicne domawec. <sup>2</sup> Inguc nganilu hatacmac hefaliye hikewec. Hikelu Saimon Pita nga mic-tengteng monic, Yesudi yele kweleinedi angackelu gawec, yeke yanguc edocepwec, "Yenge Sugucne dongesiwacni baickelu wenuwa logabieng, yogo mi ngagegabeleng."

<sup>3</sup> Inguc mime Pita nga mic-tengteng agoine yeke momochac dongesiwa hikenogale gasacke hikelu, <sup>4</sup> yefewa mic-tengteng agoinedi dacineholec gasackelu Pita ewalilu yedi dongesiwa biyac hike sulumewec. <sup>5</sup> Hikelu fakanelu nganime, kpoluc madicnebenang wabungkeibong, yogodi sugu ngiyewec. Ailubac ye kwelina mi fewec. <sup>6</sup> Saimon Pita ye lobe hikelu dongesi kwelina felu nganime, kpoluc yogo ngiyewec. <sup>7</sup> Kpoluc susucine hodocina nga haic-mesuina wabungkeibong, yogo yeicnac ngiyewec. Nga kpoluc tofaine wedulu loicne yogoholec mi ngiyeme nganiwec. <sup>8</sup> Inguc nganilu domame mic-tengteng agoine molickelu dongesiwa hikewec, ye inguchac dongesi kwelina felu nganime Yesu homackacni gboliyelu fangkeme ngagesingkewec. <sup>9</sup> Aime Yesu homackacni gboliyelu fangkedaic, yoglec Wapongte hibiwa kwelengkeicne fagac, yeke yogo molickelu mi ngage-motoiboc, <sup>10</sup> ailu hefaliyelu macnginac hikeiboc.

*Maria Magadala iwacni yedi Yesu nganiwec*

*Mat 28:9-10; Mrk 16:9-11*

<sup>11</sup> Aime Maria ye dongesi lobina domalu hiyawec. Hiyalu fakanelu dongesi kwelina donge hilame feme nganiwec. <sup>12</sup> Nganime angelo yaeckang yeke ngakpinginec dalicnedi kwalac-kwalac nganicewec. Nganicewec Yesule kponggbong fawecka, monicti hodocinape, nga monicti higeinape, inguc ngiyeiboc.

<sup>13</sup> Ngiyelu yanguc uwacnoiboc, "Ngigac, ga omale hiyagic?"

Inguc uwacnoboc Mariadi ameine bafaliyelu yanguc miwec, "Yenge nale Sugucnele kponggbong baickelu wenuwa lobiyengte basackelu hiyagabac."

**14** Inguc milu hefaliye nganime Yesu ye lobeina domawec. Domame Yesudi domagac, yogo mi ngage-motowec.

**15** Aime Yesudi yanguc uwacnowec, “**Ngigac, ga ma basackelu hiyagic?**”

Mime ye yanguc ngagewec, “Bole fileinedi uwanelegac.” Inguc ngagelu yanguc miwec, “Sugucnene, gagi Yesule kponggbong baickelu monicka lomeckabac, edocnung hikelu babe.”

**16** Inguc mime Yesudi yanguc miwec, “**Maria.**”

Inguc mime hefaliyelu “Rabonai” milu bawec. (Hibru yowawa Rabonai, yogolec fungine wewedu.)

**17** Aime Yesudi yanguc edowec, “**Mamacnela biyac mi fegabacka, ga mi bacnunong. Ga hikelu gbafocne yanguc edocebanong, ‘Nale Mamac nga ngengele Mamac, ye nale Wapong nga ngengele Wapong, yela hocne fedacte.’**”

**18** Inguc mime Maria, wacie monic Magadalen, ye mic-tengteng yengela hikelu yanguc miwec, “Na Sugucne nganigabac!” Inguc milu Yesudi yowa edome ngagewec, yogo edocebewec.

### *Mic-tengtengfocene fikeyelewec*

*Mat 28:16-20; Mrk 16:14-18; Luk 24:36-49*

**19** Hadeng yogo Sonda, aime hadeng yogowa mac biyac debolewec. Deboleme Yesu mic-tengtengfocene yenge Yuda ngic-ngigac micnefocngi-neng yengèle hangocebame macngineng nu sanangne holelu ngiyebong. Ngiyeebongka Yesu ye kwesilu hewacnginang domalu yanguc edocebewec, “**Kwele-mogung ngengela fana.**” **20** Ye inguc milu moleine nga magocene edalicebewec. Edalicebame mic-tengtengfocene yenge Sugucne nganilu beliyeibong. **21** Aime Yesudi hatacmac yanguc edocebewec, “**Kwele-mogung ngengela fana. Mamacnedi salecnume kwesilu gagabac. Aime nani ingucne hac ngenge salecngabagabac.**” **22** Ye inguc milu mic asuine fitoyelelu yanguc miwec, “**Ngenge Tili Asu kweledi baning.**” **23** **Ngenge ngic yengele bikic hegilebong yengèle bikic miyac aidaite. Nga ngenge bikicngineng mi hegiledaingtewa, yengele bikic fadaictehac.**”

### *Kwele-yaec mi ainoga*

**24** Mic-tengtengfocene 12 yengele hewackacni monic wacie Tomas, wacie monic Didimus wackebong, ye Yesudi mic-tengtengfocene fikeyelewec, dameng iwa ye mi ngiyewec. **25** Ilec mic-tengteng agofocene yengi yanguc edoibong, “Nonge Sugucne nganigabeleng.”

Mibong Tomasdi yanguc miwec, “Na dongenedi biling maaine weibong, yogo mi nganibac. Ailu gbongnedi biling yefine yele molewa ngiyegac, iwa mi lobac. Ailu magocina molenedi mi lobe feyec. Na inguc mi aigabacka, yogo mi ngagesingkedacte.”

**26** Inguc mime hadeng 8 motome, Yesu mic-tengtengfocene nga agongi-neng Tomas yenge momoc hatacmac felu ngiyebong. Yenge nungineng sanangne holelu ngiyeebongka, Yesu ye hatacmac fikelu hewacnginang domalu yanguc miwec, “**Kwele-mogung ngengela fana.**” **27** Inguc milu Tomasle yanguc miwec, “**Tomas, gbonggone sungkeng molene yefina fena, aime dongegonedi nganic. Ailu molegone sungkeng magocna fena, kwele-yaec hegilelu ngagesingkenong.**”

**28** Inguc mime Tomasdi miwec, “**Ga Sugucnene ailu Wapongne.**”

<sup>29</sup> Inguc mime Yesudi yanguc edowec, “Ga dongedi nganicnulu ngagasingkegic. Aime monic ye dongedi mi nganilu ngagesingkedaicte, ye kwele-angackolec.”

<sup>30</sup> Yesudi mic-tengtengfocene yengele haicka pasile maaine bocyac bawec, aime yogo sasawa hibi yagowa mi kwelengkebabac. <sup>31</sup> Aime Yesu ye Mesia, ailu ye Wapongte Madec, ngenge yogo ngagesingkelu yele wacka gaga baningte hibi yago kwelengkeicne fagac.

## 21

### *Misa-sic bocyac*

<sup>1</sup> Yoglec lobeina Yesu ye Galili lifucka\* mic-tengtengfocene hatacmac fikeyeledaicte. Yogowa yanguc fikewec, <sup>2</sup> Saimon Pita ailu Tomas, wacine monic Didimus wackelu gaibong. Ailu Natanael, ye Kana taonkacni, taon yogo Galili prowinswa fawec. Ailu Sebedi madekcecine, ailu Yesule mic-tengtengfocene 12 yengelacni ngic yaeckang, yenge momoc ngyieibong. <sup>3</sup> Ngiyelu Saimon Pitadi agofocene yanguc edocebawec, “Na misawa sicté hikenogale ngagegabac.”

Inguc edocebame yengi yanguc miibong, “Nonge gaholec momoc hiked-abelengte.” Inguc milu yenge momoc gombawa felu hikelu gaibong. Ailu deboc iwa sic monic mi baibong.

<sup>4</sup> Moc gabong mac saewec, aime Yesu ye lifuc meicina domawec. Domame yenge Yesudi domawec, yogo mi ngani-motoibong.

<sup>5</sup> Aime Yesudi yanguc uwayelewec, “Agofocene, ngenge sic monic bagabiyeng, me miyac?”

Mime yengi “miyac” miibong.

<sup>6</sup> Inguc mibong yedi yanguc edocebawec, “Ngenge ufcngineng gomba foletwapec wickebong haume sic gocne badaingte.” Inguc mime yenge ye miwec, yogo balaibelu ufcngineng wickebong haume misa-sic bocyacbenangti uficka haubong, fuluckenogale aibibiyelu ufickolec hegileibong.

<sup>7</sup> Aime mic-tengteng Yesudi yele kweleinedi angackelu gawec, yedi Pita yanguc edowec, “Yogo Sugucnedi hocne.”

Inguc mime Saimon Pita ye yogo ngagelu soc sugu domawecte ngakpiine holelu gombawacni wintackelu lifucka haulu molickelu dingongka fewec.

<sup>8</sup> Feme mic-tengtengfocene gocne yenge lifucka dingong bangkacne, dalicne miyac, 100 mitalesoc gaibongte, yenge gombawa domalu ufcngineng misa-sickolec fuluckela fuluckela dingongka feibong.

<sup>9</sup> Mecina felu nganibong bret gocne ailu misa-sic dacka faibong. <sup>10</sup> Aime Yesudi yanguc miwec, “Ngenge misa-sic gocne yakumac bagabiyeng, yogo bawelening.”

<sup>11</sup> Aime Saimon Pita ye yeicnac gombawa felu ufc fuluckeme meicina fewec. Uficka misa-sic sugucne sugucnedi wakelu faibong, dzalengineng 153 yoglecsoc aiwec. Ailu sifu ufc mi lokewec. <sup>12</sup> Aime Yesudi yanguc edocebawec, “Ngenge welelu banoning.” Inguc mime mic-tengtengfocene yenge hangcebame yengelacni monicti “Ga ma” milu mi uwacnoibong. Yogo Sugucnedi hocne, yenge inguc biyac ngageibong. <sup>13</sup> Aime Yesu ye dac emeina welelu bret balu yelewec. Ailu misa-sic inguchac balu

---

**20:29:** 1Pi 1:8    **20:31:** Yoa 3:15; Rom 1:17; 1Yoa 5:13    \* **21:1:** Grik yowawa Galili lifuc, yoglec wacine monic Tiberias kwelengkewec.    **21:3:** Luk 5:4-7    **21:7:** Yoa 13:23; Mat 14:29    **21:11:** Luk 5:6

yelewec. <sup>14</sup> Yesu ye homackacni gboliyelu fangkewec, dameng iwa mic-tengtengfocine fikeyeleme, alecine habackang aiwec.

### *Yesudi Pita basanangkewec*

<sup>15</sup> Aime nosing nobong motome, Yesudi Saimon Pita yanguc uwacnowec, “Saimon Yoane madecine, ga nale kwelegonedi angac ngagegic, yogo aling-focgone yago yengele angac ewaligac, me?”

Inguc mime Pitadi miwec, “Oc, Sugucne, na kwelenedi gale angac ngagegabac, yogo biyac ngagegic.”

Inguc mime Yesudi yanguc miwec, “Ga nale lama madecne nosing gumecebadamec.”

<sup>16</sup> Milu Yesu ye hatacmac mime alecine yaeckang aiwec, “Saimon, Yoane madecine, ga kwelegonedi nale angac ngagegic, me?”

Mime Pitadi miwec, “Oc, Sugucne, na kwelenedi gale angac ngagegabac, yogo biyac ngagegic.”

Inguc mime Yesudi yanguc miwec, “Ga lamafocne yengele damong gadamec.”

<sup>17</sup> Milu Yesudi hatacmac uwacnome alecine habackang aiwec, “Saimon, Yoane madecine, ga kwelegonedi nale angac ngagegic, me?”

Yesudi uwacnome alecine habackang aime, Pita ye ngageme umalemebac Yesu yanguc edowec, “Sugucne, ga wiyc sasawa ngageyackegic. Na kwelenedi gale angac ngagegabac, yogo biyac ngagegic.”

Inguc mime Yesudi yanguc edowec, “Ga lamafocne bacebalu nosing gumecebadamec.” <sup>18</sup> Foinac, ga soc-gboli galu geuctihac besac hefelu angac-gone balaibelu hike-kwesic aicaigic. Aime ga hikeceu ngic sugucnebenang aidamecte, dameng iwa molegone bafangkeng, monicti hefegelelu mac mi hikenogale ngagegic, iwa baculu hike locgudaicte, yogo noinebenang edocgugabac.” <sup>19</sup> Pita ye homacina silic wenuc homalu Wapong wacine bafedaicte, Yesudi yogolec ngagelu miwec. Ailu edolu miwec, “Ga wele na balaibecnuc.”

<sup>20</sup> Yesudi inguc mime, Pita ye hefaliyelu nganime, Yesudi mic-tengteng monicte kwieleinedi angackelu gawec, yedi yeke balaibecepawec. Ngic balaibecepawec, yedi hocne molickelu nosing noibong, dameng iwa Yesule mondacka holelu madi mudockeme badaingte yogolec uwacnowec. <sup>21</sup> Aime Pitadi mic-tengteng yogo nganilu Yesu yanguc uwacnowec, “Sugucne, yela wenuc fikedaicte?”

<sup>22</sup> Inguc mime Yesudi yanguc edowec, “Na angacnume ngama ye gaemewa hatacmac hefaliye kwsidacte, yogo gale wiyc miyac. Ga moc welelu balaibecnuc.” <sup>23</sup> Inguc mime ngic hae-gbafocine yengi ngagelu yanguc miibong, “Mic-tengteng yogo ye mi homadaicte.” Aime Yesu ye mi homanale ngagelu mi miwec, miyac. Ye yanguc sugu miwec, “Na angacnume ngama ye gaemewa, hatacmac hefaliye kwsidacte, yogo gale wiyc miyac.”

### *Yowa moto-motoine*

<sup>24</sup> Yesudi mic-tengtenginele kwieleinedi angackelu gawec, yogo na hocne. Na siduc yagolec mibasanang ailu mibe yegengkeme kwelengkeiba. Aime yowane yogo noine, yogo ngagegabeleng. <sup>25</sup> Yesu ye aibaba gocne bocayac aiwec. Aime ngagebe aibaba yogolec yowa sasawa hibiwa kwelengked-abongka, ibac himontowa yagowa hibi yogo lolole sawaine monic mi fadec.

## Lukadi Salecebaicne Yengele Siduc Kwelengkewec

### *Mimi-yegeng yowa*

Luka ye Grik ngic monic, ye dongeinedi Yesu mi nganiwec. Ye salecebaicne uwayeboleme Yesule siduc nga yengele bole weducnolu edoibong. Ailu ye salecebaicne yengeholec lolickelu gaibong. Illec dameng gocta yengeholec gawecte ailu "nonge" kwelengkewec, yogo fengngineng 16-28 iwa fagac.

Molickelu Luka ye Yesule Siduc kwelengkewec. Yesu homalu homackacni gboleyu fangkeme hifa 33 ngama ingucne motome, Lukadi hibi yago kwelengkewec. Hibi yagowa siduc yanguc kwelengkewec. Salecebaicne yenge bole balu lolickelu Yesule Siduc Madicne mibong yegengkewec. Ailu Yesule habu basuguleibong. Ailu Tili Asudi bole balu gawec. Luka ye siduc yogo kwelengkewec.

### *Yowa yago hibi nebocina fagac*

1:1-26 Yesule siduc mibong yegengkenale Yesudi mibasanang aiyelewec  
 2:1-8:3 Yerusalem iwa Yesule habu Siduc Madicne edocebaibong  
 8:4-12:25 Yudeya nga Samaria iwa Yesule habu Siduc Madicne edocebaibong  
 13:1-21:16 Poldi lolickelu Siduc Madicne edocebawec  
 21:17-28:31 Pol balu muc-macka lobong ngiyeme Roma balu hikeibong

### *Yenge Tili Asu badaingte*

<sup>1</sup> O Tiofilus, na esecne yowa kwelengkegeleiba, yogo Yesudi fungkelu bole bawec ailu mic-yowaine wedunolewec. <sup>2</sup> Ye boleine bagacgu damengngine bangkale welewec. Dameng yogowa salecebaicne esecne bawosaecebawec, yenge Tili Asule tapiliwa bole-yowa edocebalu honocmengka\* fewec, yoglec siduc esecne hocne kwelengkegeleiba.

<sup>3</sup> Ye doic sugucne ngagelu homackacni hatacmac gboleye fangkewec. Fangkelu hadeng 40le kwelina yeuctihac fike-sang aiyelelu pasi haicina monicmonic bawec. Balu Wapongte ngani-damongte fungine edocebalu weduyeelu gawec. Inguc aiyeleme yenge pasi yogo nganilu ye foinac gagac, inguc ngage-motoibong. <sup>4</sup> Ailu yengeholec ngiye-fangkec ailu yowa sanangne yanguc edocebawec, "Ngenge Yerusalem biyac mi hegiledaing. Mamacnele mimipang yowa edocngebabe ngageibong, yoglec noine fikene wangec gadabiyeng. <sup>5</sup> I yangucte, Yoane ye misa lowayelewec. Nga ngengibac, dameng mi daliweme Wapongti Tili Asu lowangedaite."

<sup>6</sup> Aime kpaduckelu ngiyeibong, yengi yanguc uwacnoibong, "Sugucne, ga yakumac dameng yagowahac Israel ngic-ngigac hatacmac kpaducnubang nongileng himongte ngictauholec ailu ganoga, me?"<sup>†</sup>

<sup>7</sup> Inguc mibong yanguc edocebawec, "Mamac ye bole-yowa tapiliine-holecti hifa nga wenac ailu dameng haicina monicmonic lowec fagac.

**1:1:** Luk 1:3    \* **1:2:** Honocmeng yogo Wapongte mac.    **1:2:** Mrk 16:19; Luk 24:49-51    **1:3:** Luk 24:36-49; Sale 10:41    **1:4:** Luk 24:49; Yoa 14:16-17; Sale 2:33    **1:5:** Mat 3:11    **1:6:** Luk 24:21

<sup>†</sup> **1:6:** Dameng iwa Israel ngic-ngigac yenge Roma yengele bagewa gaibong. Ngic-ngigac bocayac yenge Roma hegilecebalu yengilangkocni ngic monicti damongebanale ngagelu gaibong. Yenge yowa miibong, yogo Mesiadi bole yogo banale miibong.

Dameng yogo yeuc sugu ngagegac. Yogolec damengte ngage-ngage mi ngeleicne.<sup>8</sup> Ngagegaing, Tili Asudi ngengele kwelewa haulu tapili ngeleme ngenge na widecnuadaingte. Aime ngenge Yerusalem yawa ailu Yudeya<sup>‡</sup> nga Samaria prowins, ailu himong mendengine sasawa hikelu siducne milu gabong saweyackedaicte.”

*Yesu honocmengka fewec  
Mrk 16:19-20; Luk 24:50-53*

<sup>9</sup> Yesu ye inguc edocebame Wapongti ye dongenginang balu fewec. Feme kaguwadi ye hedickeme mi nganibong fewec.

<sup>10</sup> Feme yenge basackelu sawawa nganilu domaibong. Hei, ngic yaekang ngakpinginec kwalac-kwalacbenangti biyac iwashac fikelu domaboc. <sup>11</sup> Domalu yanguc edocebaiboc, “Galili prowinswacni ngic, ngenge omale dongengineng sawawa hilalu domagaing? Wapongti Yesu bame ngenge hegilecngebalu honocmengka fegac. Ailu ye feme nganigaing, ye gacgu silicine ingucne hac hocne kwesidaicte.”

### *Ngic monic Yudasle ame bafuwaibong*

<sup>12</sup> Aime salecebaicne yenge Oliwa kupickacni hefaliye walu Yerusalem hikebong. Yefe yogo ye 1 kilomita ngama ingucne. <sup>13</sup> Yerusalem hikelu mac kweline monic feina ngiye-fangkec ailu gaibong, iwa felu ngiyeibong. Ngiyeibong, yengele wac-aling yanguc:

Pita,  
Yoane,  
Yakobos,  
Endru,  
Filip,  
Tomas,  
Batalomeu,  
Mataio,  
Yakobo Alfaiusle madec,  
Saimon ye Selot wackeibong, nga  
Yudas Yakobole madec.

<sup>14</sup> Ngic yogo yenge hocne kwele-moniyang ailu mimiloc bole damengsoc balu gaibong. Inguc aiyebongka Yesule nenggac Maria, nga ngigac Yesu balaibelu gaibong, ailu Yesu gbafocene, yenge ngic yogo yengeholec momoc galu mimiloc bole balu gaibong.

<sup>15</sup> Hadeng gocna ngic hae-gbafocene 120 ngama ingucnedi kpaduckelu ngiyeebongka, Pitadi hewacnginang domalu yanguc edocebewec, <sup>16</sup> “Ngic hae-gbafocene, ngenge ngagening. Yudasdi ngic mengocebame hikecgu Yesu baibong. Ngic yele hocne Tili Asudi biyachac Dawidile micka yowa lome Wapongte hibiwa kwe lengkewec, yogo noine fikewec, yogolec inguc aiwec. <sup>17</sup> Yudas esecne salecebaicne nongileng aling ailu gawec, ye nongileng momoc Sugucnele bole banangte miwec.” Pitadi inguc miwec.

<sup>18</sup> (Ngic yedi aibaba sowacnele moneng balu bole himong monic fuli bawec, iwa hikelu hehomame hodocti hau kweme gobaine fouckeme hahungngine himongka wayackewec. <sup>19</sup> Aime yogolec siduc Yerusalem

---

**1:7:** Mrk 13:32    <sup>‡</sup> **1:8:** Yerusalem taon yogo Yudeya himong kwelina ngiyegac.    **1:8:** Mat 28:19; Luk 24:48    **1:11:** Mat 26:64; Luk 21:27    **1:12:** Luk 24:50-53    **1:13:** Mat 10:2-4    **1:16:** Mige 41:9    **1:18:** Mat 27:3-8

ngic-ngigac sasawadi ngageibong, himong yogolec wacine yowanginang yefe Akeldama wackeibong, fungine yanguc, Himong sac wawecka.)<sup>§</sup>

<sup>20</sup> Aime Pitadi taockelu yanguc miwec, "Miti Geewa Yudasle yowa yanguc kwelengkeicne fagac,

'Ye mac-himongine kisi ailu fame monicti iwa mi ngiyedaic.' (Mige 69:25)  
Ailu hatacmac yanguc,

'Monicti yele ameine damong bole badaic.' (Mige 109:8)

<sup>21-22</sup> Ilec ngic monic yele ameine bawosaedabeleng. Yoanedi Sugucne Yesu misa lowacnome boleine fungke balu nongilengkolec lec-welec ailu gawec. Gacgu Wapongti bame honocmengka fewec, dameng iwa ngic nongilengkolec gaibong. Ngic yogo yengele hewackacni ngic monic bawosaewec, yedi nongilengkolec momoc galu Yesu homackacni gboliyelu fangkewec, yogolec siduc momoc mime yegengkedaicte."

<sup>23</sup> Pitadi inguc mime ngic yaeckang bafuwacepaibong. Monic wacine Yosefe Basabas wackelu gaibong, ye wacine monic Yastus, ailu agoine Matias. <sup>24</sup> Bafuwacepalu yanguc milu milockeibong, "O, Sugucne kwelewa ngani-ngani fileine, ga ngic yaeckang yago yekelacni weni yogo bawosaelu edalicnubang nganinanang. <sup>25</sup> Nganibeng yedi salecebaicne bole balu Yudasle ameine bole bidaicte. Yudas ye bole yogo hegilelu yeicne yefe monicka hikewec." <sup>26</sup> Inguc milu milockelu bawosaecpanogale wac kwelengkelu lobong, Matiasle wac fikeme salecebaicne 11 yengeholec taockeibong.

## 2

### *Tili Asu wawec*

<sup>1</sup> Pentikos ngiye-ngiye dameng bangkaleme yengung sugu mac monicka kpaduckelu momoc ngiyeibong.\* <sup>2</sup> Ngiyeebongka honocmengkacni uc sugucne monic gbelong sugucne wecaigac, yogolec ucine ingucnedi iwa-hacbenang fikelu wawec. Walu mac ngiyeibong, yogolec kwelina wakeme <sup>3</sup> yenge silicine yanguc nganibong. Dac-ubilang ingucnedi fikelu ngic-ngigac hodocnginangsoc siyeckelu ngiyeyackewec. <sup>4</sup> Aime Tili Asudi kwe-lentinang haulu wakeme yowa haicina monic-monic miibong. Asudi filesoc inguc ainingte aiyeleme yowa miibong.

<sup>5</sup> Aime Yuda ngic-ngigac<sup>†</sup> homacnedi himong monickacni monickacnidii kwasilu Yerusalem taonka ngiyeibong, yenge Wapongte yowa balaibelu gaibong. <sup>6</sup> Nga uc sugucne fikeme habu homacnedi yogo ngagelu kwesi kpaduckelu mimedec aiibong. I yangucte, Tili Asuholec yenge ngic-ngigac yengele yowanginang yefe filesoc filesoc mibong ngageibong. <sup>7</sup> Ngagelu mimedec ailu welecebali yanguc miibong, "Ngagegaing, ngic yago yowa migaina, yenge sasawadi Galili ngic. <sup>8</sup> Aime yenge wenucka nongileng yowanonggangbenang filesoc filesoc mibong ngagegabeleng? <sup>9</sup> Nonge yago Patia ngic nga

<sup>§ 1:19:</sup> Hewacine 18-19 yogowa Pitadi yowa nebocene miwec, me yowa fungine gocne Lukadi taockelu kwelengkewec, yogo mi ngage-motogaing. <sup>1:21-22:</sup> Mat 16:19; Mrk 1:9; Yoa 15:27

\* <sup>2:1:</sup> Ewalicebaicnele hombangka Yesu ye homawec. Hombang yogolec lobeina hadeng 50 motome Pentikos ngiye-ngiye dameng fikecaigac. Yogo Yuda yengele hombang monic aicaigac. Yogolec yagowa kwelengkeicne fagac: Wah 23:16; Dep 23:15-16; 34:22; Him 28:26-31; Yef 16:9-12. <sup>2:3:</sup> Mat 3:11 <sup>2:4:</sup> Sale 4:31; 10:44-46; 19:6; Mrk 16:17 <sup>† 2:5:</sup> Esecne Yuda ngic-ngigac gocne himongne himongne hike galu fikesawec ailu mac-yowa haicina monic-monic ngagelu milu gaibong. Ailu Yuda ngic-ngigac yogo yenge Yerusalem kwesibong.

Midia ngic ailu  
 Elam ngic. Nga  
 Mesopotamia himongkacni nga  
 Yudeya himongkacni ailu  
 Kapadosia himongkacni. Nonge  
 Pontus himongkacni nga  
 Asia prowinswacni. <sup>10</sup> Ailu  
 Frigià himongkacni nga  
 Pamfilia himongkacni ailu  
 Isip himongkacni. Nga  
 Libia himongka Sairini mac haicine monic monic, yogowacni. Ailu  
 Roma taonkacni kwesiicne. <sup>11</sup> Yogo yenge Yuda ngic-ngigac nga Israel yengele alingkacni miyacti Yuda ngic-ngigac yengeholec taockelu gaibong.  
 Ailu  
 Krit ngic nga  
 Arebia ngic.  
 Nongileng inguchac galu yowanonggangsoc Wapong pasitowainele yowa haicine monic-monic mibong ngagegabeleng.” <sup>12</sup> Inguc milu mimedec ailu ngage-bibiyelu mingagec ailu yanguc miibong, “Pasi fikegac, yogo wiyc silicine monichenang, yogo mi ngage-motogabeleng.”  
<sup>13</sup> Gocne yengibac yowa kwekwé ailu yanguc miibong, “Yenge waing misa homacne nolu kwelengineng sifuwegac.”

### *Pitadi Tili Asule fungine edocebawec*

<sup>14</sup> Inguc mibong Pita ye salecebaicne 11 yengeholec domalu sanangnephac wackelu yanguc edocebawec, “Yuda ngic-ngigac ailu ngic-ngigac sasawa Yerusalem gagabiyeng, na pasi yagolec fungine mibe yegengkeneleme ngagening. <sup>15</sup> Ngenge ngic yogo nganicebalu yanguc ngagesigaing, ‘Waing misa nolu kwelengineng sifuwegac.’ Inguc mi ngagedaing. Yakumac ubiyakte 9 kilok aigac, yenge waing misa mi nogaing, miyac. <sup>‡ 16</sup> Nga pasi yagolec hocne Wapongte siduc-mimi ngic Yoeldi yowa yanguc miwec,  
<sup>17</sup> ‘Wapongti yanguc miwec, dameng motonogale aiyemewa na Asune sotiyebé wame ngic-ngigac sasawadi bayackedaingte. Ailu adumadefocngineng yenge siduc-yowa midaingte. Nga soc-gboli madefocngineng gung-didicka wiyc nganidaingte. Ailu ngic sugucne-focngineng gungka wiyc nganidaingte. <sup>18</sup> Ailu dameng iwahac na kwelec kwekwefocne, ngic nga ngigac, yengela Asune sotiyebé wame yenge siduc-yowa midaingte. <sup>19</sup> Ailu mibe wilini sawawa pasi mi ngani-nganiine fikedaicte. Nga himongka dumeng maaine fikedaicte. I yangucte, sac nga dac ailu hasoc sugucne fikedaicte. <sup>20</sup> Wenac-dongeine bafaliyelu kundung kwedaicte. Nga tamacne sac ingucne aidaicte. Yogo motome Sugucnele damengtowa tapiliine nga wacine feicne fikedaicte. <sup>21</sup> Aime ngic-ngigac yenge Sugucnele wac wackebong, yedi bikicte ameine bame yenge sasawa wasecne aidaingte.’ (*Yol 2:28-32*)

<sup>22</sup> “Israel ngic-ngigac, na edocngebabe ngagening. Yesu Nasaret-hocni, ye Wapongti bayegengkelu nenggac ngiyecnome hewacnginang pasi damuine-holec nga pasi mi ngani-nganiine ailu pasile maaine gocne bawec. Yogo biyac ngage-motolu fungine ngani-motodaingte. <sup>23</sup> Yele hocne Wapongti biyachac ngageme fawec, yagolec yefe mimoctolu ngengele molewa lowec.

<sup>‡ 2:15:</sup> Israel ngic-ngigac yenge ubiyakte waing misa mi nocaigaing.

Ngengi sanangnehac milu wackelu, ngic Wapongte yefe-yowa mi ngagegaing, yengele molewa lolu edocebabong yengi ye malicpongka webong homawec.<sup>24</sup> Aime homacte tapilidi ye nalic mi bawecete Wapongti homacte doickacni baickelu homackacni bagboliyeme fangkewec.<sup>25</sup> Dawidi yedi yele mic balu yanguc miwec,

'Na damengsoc dongene Sugucnela hilabe; ye folenapec gagacte kwelene nalic mi wadaicte.<sup>26</sup> Ilec kwelena kwele-madic ngagelu micnedi belic-belic yowa milu socnedi ingucnehac wangec gadacte.<sup>27</sup> Ga kwele-ilucne hegileng Wangec-macka nalic mi gadaicte. Ga ngicgone gbagbacne ye hegileengka mi kpeleckelu howacine aidaicte.<sup>28</sup> Gagi gagale yefe weduneleing. Gale haicka gaebewa belic-belic sugucnebenang aineledamecte.'

(Mige 16:8-11)

Yowa yogo Dawididi mime yegengkewec.

<sup>29</sup> "Ngic hae-gbafocne, ngambononggeng Dawidile fungine hangoc mikac yanguc milu nalic edocngebabe, ye homame longkeibong. Aime dongesiine fawec, yakumac fagac.<sup>30</sup> Ye Wapongte siduc-mimi ngic gawecka yanguc ngagewec.

'Wapongti yele ngambofocine yengele alingkacni madecine monic bawosaeme yedi ngictaule ngiye-ngiyewa lome ngiyenale mimipang sanangne mipangkewec.'

(Mige 132:11)

<sup>31</sup> Yogo nganilu ngageme Mesia homackacni gboliyelu fangkenale yanguc miwec,

'Wapongti hegileme Wangec-macka nalic mi gadaicte. Nga socine mi kp-eleckelu howacine aidaicte.'

(Mige 16:10)

<sup>32</sup> Aime Yesu ye hocne Wapongti homackacni yeuckeme fangkeme nonge dongenonggengti noine nganiibeng.<sup>33</sup> Wapongti bafangkeme felu molefoleina domawec. Nga Mamacinedi esecne Tili Asu lacnonale mipangkewec, ye yogo balu saleme wawec yogo yakumac hocne ngani-ngagec aigaing.<sup>34</sup> Dawidi ye honocmengka Yesu fewec ingucnehac mi fewec, miyac. Yedibac yowa yanguc sugu miwec,

'Sugucnedi nale Sugucne yanguc edowec,<sup>§</sup> "Ga tapiline balu folenapec ngiyeengka<sup>35</sup> ngabafocgone higegonele bageina locebabe gagi yenge damongebadamecte."

(Mige 110:1)

<sup>36</sup> Ilec aihu Israel ngic-ngigac sasawa, ngenge yanguc ngage-benangkedaing. Ngenge Yesu malicpongka weibong, ngic yogo hocne Wapongti Sugucne nga Mesianonggeng lowec gagac."

### *Ngic-ngigac kwelengineng hefaliyeibong*

<sup>37</sup> Pita ye ngic-ngigac yowa inguc edocebame yenge kwelengineng fangkeme hangocebawec. Hangocebame yeicne nga salecebaicne alingfocine yanguc uwayeleibong, "Ngic hae-gbafocnonggeng, nonge wenuc aibeng, bikicnonggeng miyac aidaicte?"

<sup>38</sup> Inguc mibong Pitadi yanguc edocebawec, "Bikicngineng hegilenale ngenge filesoc filesoc Yesu Kristole wacka kwelengineng hefaliyeme

2:29: 1Ngt 2:10    2:30: 2Sm 7:12; Mige 89:3-4; 132:11    2:33: Sale 5:32; 7:55-56    § 2:34: Miti Geewa Hibru yowawa Sugucnele wacyaeckanti fagaic. Molic-molic Hibru yowawa wacine yogo "Yawe" fagac. Nga yogolec lobeina, "Sugucne" inguc fagac. Salecebaicne iwa Grik yowawa Sugucnele wac moniyang sugu bafaliyeicne fagac. "Nale Sugucne" yogo Mesia.    2:36: Sale 5:30-31

misa lowaning. Inguc aibong Wapongti kwele-madicte Tili Asu negeledaigte. <sup>39</sup> Ailu Asu ngelenale mipangkewec, yogo ngengileng nga adu-madecfocngineng gagaing, ailu dalickacni gagaing, yenge Sugucne Wapongnonggengti wacngebala hefolecngebadaicte. Ngenge nga yenge momochac nalic badaingte."

<sup>40</sup> Pita ye sawang-yowa inguc milu yowa homacne taockelu dogbac ailu yanguc miwec, "Ngic-ngigac yakumac galu sowaledaingte, yengeholec sowalelu miyac aidaingkale, ngenge kwelengineng hefaliyedaic. Hefaliyeme Sugucnedi yengelacni baicngebame wasecne aidaingte!" <sup>41</sup> Aime hadeng iwahac ngic-ngigac 3 taosen ngama ingucnedi yenge Pitale yowa ngagesingkelu misa lowalu Yesule habuwa taockeibong.

### *Kwele-moniyang gaibong*

<sup>42</sup> Aime salecebaicne yengi Siduc Madicne weduyelebong yogo ngagelu yengileng yefe basanangkelu gaibong. Ailu kwele-moniyangka momoc galu bret badulu nolu \*\* mimiloc bole balu gaibong. <sup>43</sup> Nga salecebaicne yengela pasi mi ngani-nganiine nga pasile maaine fikeme ngic-ngigac sa-sawadi mimedec aiibong. <sup>44</sup> Aime Yesu ngagesingkeibong, yenge kwele-moniyangka wiyac sasawangineng yogo balu gaibong. <sup>45</sup> Ailu yenge himong nga hiye-mafanganineng salelu moneng balu agofocngineng nosing woc-wiyacte kpungkeibongsoc botoc balu yelelu gaibong. <sup>46</sup> Nga ngic-ngigac hadengsoc Ibu-macka kwele-moniyang ailu kpaduckelu gaibong, yenge kwele-moniyangka macsoc macsoc bret badulu noibong. Nolu nosingning neng yogo kwele-madicka botoc balu yengileng ngageboc mi ailu gaibong. <sup>47</sup> Inguc ailu Wapong mitengkelu gabong ngic-ngigac sasawa habutowadi yenge ngage-madickeyeleibong. Aime Sugucnedi hadengne hadengne ngic-ngigac yengelle bikicte ameine bame wasecne ailu yengileng alingka taockeibong.

## 3

### *Pitadi ngic hige-sowac bamadickewec*

<sup>1</sup> Hadeng monicka mac awelelu 3 kilok aime mimiloc dameng aiwec. Aime Pita nga Yoane yeke Ibu-macka feiboc. <sup>2</sup> Aime ngic monic hige-sowac nenggacte gobe kwelinaci ingucne fikewec, ye Ibu-macte odale nu monic wacine Nusalic, iwa hadengne hadengne tengke felu lobong ngiyelu gawec. Ye ngic-ngigac Ibu-macka fec-wac ailu gaibong, yenge kwele-madicka monengte milocebalu gawec. <sup>3</sup> Ngic yogodi Pita nga Yoane yeke Ibu-macka fenogale abioc nganicepalu kwele-madicka monengte inguchac milocepwec. <sup>4</sup> Milocepame yeke ye ngani-lilickeiboc. Ngani-lilickelu Pitadi yanguc edowec, "Ga nganicnupac!" <sup>5</sup> Inguc mime ngagewec, "Yeke wiyac monic nelenite migabiyeck." Inguc ngagelu donge hilalu nganicepawec.

<sup>6</sup> Nganicepame Pitadi yanguc edowec, "Na monengne mikac. Aime wiyac moniyang fanelegac, yogo sugu baficgube! Yesu Kristo Nasaret-hocni, yele wacka fangkelu hikec." <sup>7</sup> Inguc milu mole-foleine balu bafangkeme iwahac higeine nga dikilikicine sanangkewec. <sup>8</sup> Sanangkeme tapiliineholec wintacke fe-wac domalu yekeholec Ibu-macka momoc feibong. Felu yeuctihac

<sup>2:39:</sup> Yes 57:19    <sup>2:41:</sup> Sale 2:47; 4:4    \*\* <sup>2:42:</sup> Ewalicebaicne hombangte Yesudi salecebaicne yengeholec bret nga waing nowec. Yenge damengsoc socine nga sacine yogo ngagesilu bret badulu nolu gaibong.    <sup>2:42:</sup> Sale 20:7    <sup>2:44:</sup> Sale 4:32-35    <sup>2:47:</sup> Sale 6:7; 11:21    <sup>3:4:</sup> Sale 14:9

<sup>3:6:</sup> Sale 4:10; 16:18

fec-wac nga yefe lec-welec ailu Wapong mitengkewec.<sup>9</sup> Wapong mitengkelu lec-welec aiyemewa ngic-ngigac gocne yengi nganilu miiibong,<sup>10</sup> "Ye hocne Ibu-macte nu wacine Nusalic, iwa monengete milocebalu gacaigac." Inguc milu ngani-motolu kwatackelu medecebawec.

### *Pitadi Yesule fungine edocebawec*

<sup>11</sup> Ngic ye Pita nga Yoane yeke bakatacepawec. Aime ngic-ngigac homacnedi Ibu-macte sobeng meicina dakec monic fawec, wacine Solomonte Dakec, iwa yekela hikelu kpaduckelu mimedec aiibong.<sup>12</sup> Aibong Pitadi nganicebalu ngic-ngigac yanguc edocebawec, "Israel ngic-ngigac, ngenge ngic yago nganilu mimedec mi aidaing. Ailu ngenge noke mi nganicnupadabiyyeng. Pasi yogo nokele tapiliwa mi fikegac. Nga noke yogo Sugucnele haicka madicne gagabelec yogo mi ngagedaing.<sup>13</sup> Yogo miyac, ngambofoc-nonggeng Abraham nga Aisak ailu Yakobo, yengele Wapong ye hocne bolemadecine Yesu wacine bafewec. Ngengebac ye lobe holecnolu Israel yengele alingkacni miyac, yogo yengele molewa loibong. Foinac, Pailatdi yowaine wosaelu lukanogale mimoctowec. Aime ngengibac hegileibong.<sup>14</sup> Ye hocne ngic gbagbacne nga pasi dondonne balu gagac.\* Nga ngengibac ye lobe holecnolibong. Ailu kindololo-ngicti ngic monic weme homawec, ngenge ye hocne lukengelenale sanangne mibong<sup>15</sup> gagale fileine wehomaibong. Aime Wapongti ye homackacni bagboliyeme fangkewec, noke yogo nganibeete migabelec.<sup>16</sup> Nga noke Yesule wac wackelu ngagesingkegabeletecne ngic yago nganigabiyyeng, ye tapiliineholec aigac. Nga Yesule wacka ngage-ngagesingkolec gagabelec. Ilec ailu ye madicke-benangkegac. Ngenge sasawadi pasi yogo nganigabiyyeng.

<sup>17</sup> "Ngic hae-gbafocne, na ngagegabac, ngenge Yesule fungine mi ngage-motolu inguc aiibong. Nga damongfocngineng yenge ingucnehad aii-bong.<sup>18</sup> Foinac, Wapongti Mesia mimoctowec, ye doic sugucne ngagecgu homanale Wapongte siduc-mimi ngic sasawa yengele micka yowa lome mibong. Aime yogo sasawa Wapong miweckasoc fikeyackewec.<sup>19</sup> Ilec ngenge bikicngineng miyac ainale kwelelengineng hefaliyeme Wapongta hikedaing. Inguc aidaingtewa, Sugucnedi kwelelengineng basanangebadaicte.<sup>20</sup> Ailu Mesia biyachac bawosaengelewec, ye salengeledaict, yogo Yesu hocne.<sup>21</sup> Ye honocmengka felu gaemewa, damengine weleme kwestilu wiyc sasawa bamadicebadaicte. Ilec yowa Wapongti esecnebenang siduc-mimile bingec yengele micka lome mibong yegengkewec.<sup>22</sup> Mosesdi yanguc miwec, "Sugucne Wapongnginengti ngengele alingkacni siduc-mimi ngic monic na ingucnehad bafuwangeledaicte. Yedi yowa sasawa midaicte, yogo ngagedabiyyeng.<sup>23</sup> Aime monicti siduc-mimi ngic yogolec yowa ngagelu mi balaibedaictewa, ye yengileng alingkacni baickelu wehomadaicte."

*(Yef 18:15,18)*

<sup>24</sup> "Dameng yagowa wiyc fikegac, yogo Samuellacni Wapongte siduc-mimi ngic sasawa galu ofeibong, yengi biyachac mibong yegengkewec.<sup>25</sup> Wapongtingambofocnonggeng yengeholec dodosic balu Abraham yanguc edowec,

'Ngambogone bole badaicte, yefe iwa himongne himongne ngic-ngigac mimi-madic milu edocebadacte.'

*(Fike 22:18; 26:4)*

---

**3:13:** Wah 3:6,15; Luk 23:13-25; Sale 2:23      \* **3:14:** Yuda ngic-ngigac yenge Mesiale wac monic yogo wackelu gaibong.      **3:17:** Luk 23:34; 1Tim 1:13      **3:19:** Sale 2:38

Israel, ngenge dodoficnonggeng yogo nga Wapongte siduc-mimi ngic yengele yowa miicne yogolec noine ngengileng balu gagaing.<sup>26</sup> Molickelu ngengele hocne ngagesilu Wapongti bole-madecine saleme walu fikewec, yogo ngenge sasawa mimi-madic milu edocngebanale kindololo yefewacni baicngebadaicte."

## 4

### *Pita nga Yoane muc-macka locepaibong*

<sup>1</sup> Pita nga Yoane yeki ngic-ngigac yowa inguc edocebalu domaiboc. Domaebocka, depec-baba ngic ailu Ibu-macte lebe-ngic micne nga Sadyusi yenge momoc yekela lelu iwahac domaibong. <sup>2</sup> Aime Yesu ye homackacni gboliyelu fangkeme homaicne yenge momoc gboliyelu fangkedaingte. Yeke yowa-siduc yogo ngic-ngigac edocebaboc yegengkewecte, micnefocngineng yenge yekele aalic ngagelu ngaba aiyeteibong. <sup>3</sup> Inguc aiyetelu bacepalu mac biyac awelewecte muc-macka locepabong ngyeboc mac saewec. <sup>4</sup> Aime habutowadi Pita yowa mime ngagelbong, yengelaci homacnedi yogo ngagesingkelu Yesule habuwa taockeibong. Aime ngic esecne nga gbolicne dzalengineng 5 taosen ngama ingucne aiwec.

### *Pitadi Yesule fungine mime yegengkewec*

<sup>5</sup> Saeme Yuda ngic-ngigac yengele damong nga micnefocngineng ailu Wapongte yefe-yowale wewedu ngic, yenge Yerusalem iwa kpatuleibong. <sup>6</sup> Kpatulebong depec-baba ngic yengele damong sugucne, wacine Annas, ye iwa momoc gawec. Nga Kaifas ailu Yoane nga Aleksanda, yenge depec-baba ngic micne ailu gocne gaibong, yengele alingfocngineng sasawa yenge momoc kpatulelu gaibong. <sup>7</sup> Galu Pita nga Yoane bacepalu wele haicnginang locepaibong. Locepalu yanguc mi-uwac aiyeteibong, "Ngeke oma tapiliwa nga male wacka pasi yogo babiyec?"

<sup>8</sup> Uwayetebong Pita ye Tili Asudi kweleina wakeme yanguc edocebawec, "Israel damongfocnonggeng nga micnefocnonggeng, mibe ngagening. <sup>9</sup> Ngenge ngic hige-sowac ye wenuc madickeyec, ailu yela pasi madicne wenuc fikeynoyec te uwanotegaing. <sup>10</sup> Ngenge nga Israel ngic-ngigac sasawa ngageningte yowa yanguc mibe, ngenge Yesu Kristo Nasaret-hocni malicpongka webong homame Wapongti ye homackacni bagboliyeme fangkewec gagac. Aime yele wacka ngic yogo madickelu dongenginang domagac.

<sup>11</sup> 'Ye hocne mac-baba ngic yengi posa monic sowacne milu wickeibong. Aime posa yogodi macte posa-bosing ingucne sanangne ailu domagac.\*<sup>118:22</sup> (Mige

<sup>12</sup> Ngic monicta wetackebeng yedi bikicte ame nalic mi bame wasecne ainangte yefe monic mi fagac, miyac. Himongne himongne nongileng Yesule wacka gabeng yedi bikicte ameine bame wasecne aidabelengte."

<sup>13</sup> Aime Pita nga Yoane yeke hibi-mac sugucna monic mi feibocti hangoc mikac yowa miboc yenge yogo ngagelu mimedec aibong. Ailu yeke Yesuholec gaiboc, yogo nganicepaibong. <sup>14</sup> Aime ngic higeine madickewec, yedi yekeholec domame nganilu yowa bafaliyenogale ngagebong kpungkewec.

**15** Kpungkeme Tutumangtowa iwacni aiyetebong sobengka walu domae-bocka yengilangkac yowa mingagec ailu yanguc miibong, **16** “Nongileng ngic yaeckang weninguç aiyetenangte ngagebeng kpungkegac. Yengi ngagesingkeningte yeke pasile maaine baboc Yerusalemkocni ngic-ngigac yengi siducnginec biyac ngageyackeibong, yogolec nalic mi bisockedabelengte. **17** Aime yowa yogo macsoc hikeme ngagedaingkale, yeke Yesule wacka yowa hatacmac mi edocebalu weduyeelenicte kpatalayetenoga.”

**18** Inguc milu wacepalu yanguc mimacepaibong, “Ngeke Yesule wacka ngic-ngigac hatacmac mi edocebalu weduyeledabiyc.”

**19-20** Inguc mibong Pita nga Yoane yeki yowa yanguc bafaliyeyeleiboc, “Wiyac dongenonggengti nganiibeng, ailu hedecnonggengti ngageibeng, yogo nalic mi bisockedabelengte. Ngenge ngengung aibaba weni yogodi dondonne yogo ngagelu wosaeasnaguning, ngengele yowa me Wapongete yowa balaibenoga? Weni yogodu Wapongete haicka madickegac?”

**21** Inguc miboc yenge yowa hatacmac mihangoc-hangocineholec aiyetelu moc locepabong hikeiboc. I yangucte, pasi fikeme ngic-ngigac sasawadi Wapong wacine bafeibong. Ilec salecebaicne wenuc aiyelenoga, yogolec kpungkeibong. **22** Nga ngic pasile maaine higeina fikeme madickewec, ngic ye hifaine 40 ingucne aiicne, aime yenge salecebaicne moc hegilecepabong hikeiboc.

### *Wapongti tapili yelenale milockeibong*

**23** Hikeboc Pita nga Yoane yeke alingfocngineng yengela hefaliye hikeiboc. Hikelu depec-baba ngic micne ailu damongfocngineng yowa mibong, yogolec yowa-siduc edocebaboc ngageibong. **24** Ngagelu yenge kwele-moniyang ailu Wapong wackelu milockelu yanguc miibong, “Tapilitowa fileine Wapong, ga sawa nga himong ailu kiwec nga wiyac sasawa haicine monicmonic fayackegac, yogo bafuwaing. **25** Gagi biyachac Tili Asu edoengka yedi ngambononggeng ailu bole-madecgone Dawidi, yele micka lome yedi yowa yanguc miwec.

Foinac, himongne himongne ngic-ngigac sasawa aalicebawec. Ailu ngicne ngicne yenge aibaba sowacne ainogale yowa mingagec ailu ngageengage bole balu aibibiyelu lonaguibong. **26** Himongte ngictau nga damong yenge kpatulelu sanangnehac domalu Sugucne nga Mesia wenogale ngaba aiyeteibong.’

*(Mige 2:1-2)*

**27** Yowa yogo noine fikewec, yogo ga bole-madecgone gbagbacne, yogo Yesu Kristo hocne Mesia bawosaeing. Aime taon iwa hocne ngictau Herode nga damong Pontius Pailat, yeki Israel yengele alingkacni miyac nga Israel ngic-ngigac yengeholec kpatulelu Yesu ngaba aicnoibong. **28** Ailu esecne geicne tapiliwa nga micgonedi miing, yogolecsoc inguc aicnoyackeibong. **29** O Sugucne, yogo milu yowanganeng ngani-ngagec ailu kwelec kwekwefocgone tapili baficnubalu domaengka yowagone hangoc mikac mibeng yegengkedaic. **30** Mibeng molegone sungkeng socka madickeningte nga ngagesingkeningte pasile maaine ailu pasi mi ngani-nganiine yogo bole-madecgone gbagbacne Yesu, yele wacka fikelu hikedaic.”

**31** Inguc milockebong motome macka kpaduckelu ngiyeibong, mac yowa memeya ingucne bame Tili Asudi kwelenginang wakeme Wapongete yowa hangoc mikac mibong yegengkeyelewec.

### *Yesule habu kwele-moniyangka baficnaguibong*

<sup>32</sup> Yesu ngagesingkeibong, habu yogo yenge kwele-moniyang ailu wiyc fayelewec, yoglec nale gale mi miibong walecngineng balu gaibong. <sup>33</sup> Salecebaicne yenge Sugucne Yesu homackacni gboliyelu fangkewec, siduc yogodi basanangebanale ailu tapiliineholec mibong yegengkeme gaibong. Aime Wapontgi kwele-madic sugucne aiyelewec. <sup>34</sup> Yengele hewacnginang monicti wiyc monicte mi kpungkewec, miyc. Ngic-ngigac sasawa mac-himongningenkolec gaibong, yenge mac-himongning yogo salelu moneng balu <sup>35</sup> salecebaicne yengela lolu gaibong. Lolu gabong, yengi ngic-ngigac nosing woc-wiyacte kpungkeibongsoc botoc balu yelelu gaibong.

<sup>36</sup> Aime ngic monic gawec wacie Yosefe, salecebaicne yengi wacie monic Banabas wackeibong, yoglec fungine yanguc, mibasanang aiyele-nale madec. Ye Liwaile alingkacni Saiparus nucka fikewec. <sup>37</sup> Ngic ye himongngine monic salelu moneng balu salecebaicne yengela bahikelu loyackewec.

## 5

### *Ananaias nga Safaira*

<sup>1</sup> Aime ngic monic yengeholec gawec, wacie Ananaias, ye ngigacine Safaira yeke himongnginec monic nebocene salelu moneng baiboc. <sup>2</sup> Balu moneng nebocene baickelu lome ngiyenale ngigacine edome ngageme kwele-moniyang aiiboc. Ailu nebocene salecebaicne yengela bahikelu lowec.

<sup>3</sup> Lome Pitadi yanguc edowec, "Ananaias ngagegic, Satangti kwelegona haume ga Tili Asu kwesac aicnolu himonggone nebocenele fuli nebocene sangkeengka ngiyegac. <sup>4</sup> Mac-himonggone nebocene fagelenale milu fageledec, me salelu moneng balu yogodi inguc me inguc aibe milu aideng. Ga kwelegonedi kwesacgume inguc aigic, yogo nalic mi aigac. Ngagegic, ga kwesac aigic, yogo ngic nonge mi ainolegic, miyc. Ga Wapong kwesac aicnogic."

<sup>5</sup> Inguc mime Ananaias ye yowa yogo ngagelu iwahac lodingke wawelu homawec. Aime yenge sasawadi pasi fikewec, yoglec siducine ngagelu damuebame hangoc sugucne aiibong. <sup>6</sup> Aime ngic-madec yenge fangkelu kponggbongine ebeckelu tengke hikelu longkeibong.

<sup>7</sup> Longkebong 180 minit ngama ingucne motome ngigacine ye ngaweinela aibaba fikewec, yogo mi ngagelu welewec. <sup>8</sup> Weleme Pitadi yanguc uwac-nowec, "Himong nebocenele moneng babiyc, yogo sugu me?"

Uwacname yedi miwec, "Oc, yogo sugu."

<sup>9</sup> Inguc mime Pitadi yanguc edowec, "Foinac, ngeke Sugucnele Asu lokwesacka lonogale mingagec ailu kwele-moniyang aigabiyc. Ngagegic, ngawegone longkelu wele nu lobina domagaing, yenge ga inguchac tenggulu hike longgudaingte."

<sup>10</sup> Inguc edome ye iwahac higeina lodingke wawelu homawec. Homame ngic-madec yenge mac kwelina felu ye biyac homawec, inguc nganilu kponggbongine tengke hikelu ngawaine fawec, yoglec mechina longkeibong. <sup>11</sup> Aime Yesule habu sasawa nga ngic-ngigac sasawa yenge siducinec ngagelu damuebame hangoc sugucnebenang aiibong.

### *Salecebaicne yengi pasi tapiliineholec baibong*

<sup>12</sup> Salecebaicne yenge ngic-ngigac yengi ngagesingkeningte pasile maaine nga pasi mi ngani-nganiine, yogo homacne ngic-ngigac yengela balu gai-bong. Aime Yesule habu sasawa yenge Ibu-macka Solomonte Daket, iwa kwele-moniyang ailu kpatulelu gaibong. <sup>13</sup> Kpatulebong ngic-ngigac yenge hangoc ailu yengela mi taockeibong. Ailu yenge sifu alang bayelelu gai-bong. <sup>14</sup> Inguc aiibongte ngic-ngigac homacnedi Sugucne ngagesingkelu yengela taockelu gabong Yesule habu sugulewec. <sup>15</sup> Salecebaicne yenge pasi tapiliinheholec babong nganiihbongte ailu yenge huckolec mapicka nga dembengkolec yefewa locebalu gaibong. Inguc ailu yanguc ngageibong, Pita ye lec-welec aime ilucinedi hedicebame hucngineng miyac aidaic. <sup>16</sup> Ailu Yerusalem taon emeina taon gocone falegac, yogowacni ngic-ngigac homacnedi huc-doickolec ailu aleng wonongkolecti basowalecebaincne, yenge baceba hikebong sasawadi madickelu gaibong.

### *Angelodi muc-mackacni baicebawec*

<sup>17</sup> Pasi ingucne fikeme depec-baba ngic yengele damong sugucne nga alingfocene Sadyusi ngic-habu, yenge hasowac aigacgu <sup>18</sup> salecebaicne bace-balumuc-macka locebaibong. <sup>19</sup> Locebabong deboc yogowahac Sugucnele angelo monicti nu laliyelu mengocea walu yanguc edocebawec, <sup>20</sup> “Ngenge Ibu-macka fedomalugaga gblolicnele fungine ngic-ngigac sasawa edocebad-abiyeng.”

<sup>21</sup> Inguc edocebame ngagelu mac sae-saele Ibu-macka felu ngic-ngigac edocebalu weduyeleiibong.

Dameng iwa depec-baba ngic yengele damong sugucnedi alingfocene yengeholec kwesilubong. Kwesilu Yuda ngic-ngigac yengele Tutumangtowa, yogolec memba, nga Israel ngic-ngigac yengele micnefocngineng wacebame kwesilu kpaduckeibong. Kpaduckelu salecebaicne baceba kwesiningte muc-macka yowa lobong hikewec. <sup>22</sup> Hikeme lebe-ngic yenge hike sulumelu muc-macka basacebalu hefaliye welelu yanguc edocebaibong. <sup>23</sup> “Nonge hikelu nu panggala sanangnebenang baincne, yogo nganibeng damong yenge nuwa domagaing. Aime nu laliye felu ngic basacebalubac monic mi nganigabeleng.” <sup>24</sup> Yowa yogo mibong Ibu-macte lebe-ngic micne nga depec-baba ngic micne, yenge pasi fikewec, yogolec ngage-bibiyeibong.

<sup>25</sup> Inguc aibong monicti welelu yanguc edocebawec, “Ngagegaing, ngic muc-macka locebabiyeng, yenge Ibu-macka ngic-ngigac yowa milu weduyelei domagaing.” <sup>26</sup> Inguc mime lebe-ngic micnengineng yedi lebe-ngic bacebame hikeibong. Aime ngic yengi posadi wickelu holecebadaingkale, hangocebame salecebaicne ulucne mengocebalu weleibong.

### *Salecebaicne yenge mi hangocebawec*

<sup>27</sup> Ailu Yuda ngic-ngigac yengele Tutumangtowa, yogolec memba tutumangka locebabong domaibong. Domabong depec-baba ngic yengele damong sugucnedi yowa yanguc uwayelewec, <sup>28</sup> “Ngenge Yesule siduc ngicngigac mi edocebalu weduyeleinengte milu kpatalacngeleibeng. Ngagegaing, ngengebac Yerusalem ngic-ngigac sasawa yengela hatacmac mibong yegengkeyelelegac. Ailu ngic yogolec sacte bikicte ameine, yogo nongele feiwa lonogale migaina.”

<sup>29</sup> Inguc mibong Pita nga salecebaicne yengi bafaliyelu yowa yanguc edocebaibong, “Wapongte yowa hegilelu ngic-yowa balaibenoga, yogo nalic

mi aidabelengte. <sup>30</sup> Ngengi Yesu molenginengti malicpongka welu wehomabong ngambofocnonggeng yengele Waponti ye homackacni bagboliyeme fangkewec. <sup>31</sup> Fangkeme Waponti balu damongnonggeng ailu Asa bacnubame madickenangte gunungkeme mole-folein domagac. Ailu Israel ngic ngenge kwelengineng hefaliyeme bikicngineng hegilenale inguc aiwec. <sup>32</sup> Wapongte yowa balaibebong Tili Asu yelecaigac. Aime Tili Asu nga nonge Yesule siduc yogo nongileng bucnehac nganilu mibeng yegengkegac.”

### *Gamalieli mime salecebaicne hegilecebaibong*

<sup>33</sup> Yowa inguc edocebame kwelenginang bame salecebaicne wehomacebanogale miibong. <sup>34</sup> Inguc mibong Tutumangtowanginang Farisaio ngic monic ngiyewec, wacine Gamaliel, ye Wapongte yefe-yowale wewedu ngic gawec. Ilec ngic-ngigac yenge ye alang bacnoaigaing. Yedi miwec, “Ngenge ngic yago mac-sobengka bacea haulu domaebong.” <sup>35</sup> Inguc mime bacea haubong micne alingfocene yanguc edocebawec, “Israel ngic, ngenge ngic yago funginengineng ngage-motolu aibaba yogo aiyeledaing.” <sup>36</sup> Esecne dameng monicka ngic monic wacine Teudas yeuctihac fikelu miwec, ‘Na ngic sugucne.’ Inguc mime ngic 400 ingucti yeholec wetackeibong. Aime ye yeicne hudu hilu homame alingfocene singsalolong kwebong bolengineng miyac aiwec. <sup>37</sup> Ye miyac aime wac-alng babale dameng fawec, iwa Galili prouinswaci ngic monic wacine Yudas, ye ngic gocne kwelengineng kwefangkeme Roma yengele gamang baickeningte yenge yeholec wetackeibong. Yudas yeicne inguchac webong miyac aime alingfocene siyeckelu hikeibong. <sup>38</sup> Ilec ailu yanguc edocngebabe, ngenge ngic yago hegilecebabong hikening. Yenge bole yogo ngic ngage-ngagewa bagaingka, yogo ngic yekele bole miyac aiwec, inguc miyac aidaicte. <sup>39</sup> Nga Waponti tapili yeleme bagaingka, ngengi nalic mi kpatalayedaingte. Gacgu Wapong aka holecnodaingkale migabac.”

<sup>40</sup> Inguc edocebame ngage-ngagengineng hefaliyeme salecebaicne wacebabong weleibong. Weleibong lebe-ngicti muc-hududi wecebaningte edocebabong. Aime wecebabong motome yenge Yesule wacka yowa hatacmac mi miniting mimacebalu salecebaibong.

<sup>41</sup> Salecebabong Waponti ngageme madickenale yenge Yesule wacte wecebalu game-gameine nalic aiyeleibong. Yogolec belyelü Tutumangtowa iwacni walu hikeibong. <sup>42</sup> Aime yenge hadengne hadengne Ibu-macka nga macne macne, iwa Yesu ye Mesia, yogolec Siduc Madicne mibong yegengkeme weduyelalu gaibong. Ailu bole yogo mi hegileibong.

## 6

### *Salecebaicne yengele babafic ngic bawosaecebaibong*

<sup>1</sup> Dameng iwa mic-tengtengfocene sawelu hikewec. Sawelu hikeemewa Yuda ngic-ngigac Hibru yowa micaigaing, yenge hadengsoc noba-nosing botoc balu gaibong. Ailu Yuda ngic-ngigac Grik yowa micaigaing, yengelacni hosec gocne nosing mi balu gaibongte ailu yowa miibong. <sup>2</sup> Inguc aibong salecebaicne 12 yengi mic-tengteng wacebalu yanguc edocebaibong, “Nonge nosing heuc-heucte bole yogo balu Wapongte yowa mimile bole hegilebeng fame mi madickedaicte. <sup>3</sup> Ngic hae-gbaefocnonggeng, ilec ailu ngenge ngic 7 ngengileng hewackacni bawosaecebaidaing. Ngic Tili Asudi

kwelengineng wakeme ngage-ngage-motoc nga aibabangineng madicne nganicebacigaing, ngic ingucne bawosaebadaing. Aime nonge nosing heuc-heucte bole yogo yelebeng badaingte. <sup>4</sup> Nonge nongungbac bole yogo hegilelu Wapongte yowa mimi sugu ailu mimiloc bole badabelengte.”

<sup>5</sup> Yowa inguc mibong habutowa yenge ngagebong madickewec. Aime ngic yanguc bawosaecebaibong,

Stifen, ye ngage-ngagesingtowaineholec ailu Tili Asu kweleina wakeyack-eicne facnowec. Ailu

Filip nga

Porokorus ailu

Nikanor. Ailu

Timon nga

Pamenaş ailu

Nikolas.\* Nikolas ye Antiok taonkacni ailu ye Israel yengele alingkacni miyacti Yuda ngic-ngigac yengeholec taockewec.

<sup>6</sup> Yenge ngic yogo salecebaicne yengele emewa locebabong domabong, salecebaicne yengi yengele milockelu molengineng socnginang loibong.

<sup>7</sup> Aime Wapongte yowadi Yerusalem iwa sugulelu sawelu hikeme mic-tengtengfocine yengela damengsoc taockelu hikeme sugulewec. Suguleme depec-baba ngic, yengelacni homacnedi Siduc Madicne ngagesingkelu bal-aibeibong.

### *Stifen yowawa loibong*

<sup>8</sup> Stifen ye Wapongte kwele-madic nga tapili yogo homacne facnowec. Ilec ailu yedi ngic-ngigac hewacnginang galu Sugucne ngagesingkeningte pasi mi ngani-nganiine nga pasile maaine homacne balu gawec. <sup>9</sup> Aime Yuda ngic-ngigac yengele kpakpaduc macngineng monic wacine Yengungtihac Damongnagudaingte† wackelu gaibong. Yengelacni ngic gocne yengi fangkelu Stifenkolec yowanginengti fec-wac aiwec. Ngic yogo yenge Sairini nga Aleksandria taonkacni ailu Silisia nga Asia provins sugucnacni. <sup>10</sup> Aime Stifen ye Tili Asule tapiliwa yowa ngage-motolu mime yenge yowa ameine bafaliyenogale aibibiyebong.

<sup>11</sup> Aibibiyelu ngic gocne kpafengebabong, yengi Stifente yanguc miibong, “Ngic ye Moses nga Wapong misulec aiyeteme ngageibeng.”

<sup>12</sup> Inguc mibong ngic-ngigac habutowadi ailu Yuda ngic-ngigac yengele damongfocngineng nga Wapongte yefe-yowale wewedu ngic, yengele kwele kfefangkeibong. Kwfefangkebong yenge Stifen balu hobalu Yuda ngic-ngigac yengele Tutumangtowa iwa bahikeibong. <sup>13-14</sup> Iwa domame kwesac-ngic locebaibong, yengi sanangnehac yanguc miibong, “Ngic yago ye nongileng ailu yefe-yowanonggeng nga Wapongte mac gbagbacnele‡ damengsoc mime sowalecaigac. Yedi yowa yanguc mime ngageibeng, ‘Yesu Nasaret-hocni, yedi mac yago basowalelu yefe-yowa Mosesdi mifickenolewec, yogo hegilelu yowa gblolicne bafuhanolegac.’”

---

\* <sup>6:5:</sup> Wac yogo yenge Grik yowawa wackeicne. Ilec Yuda ngic-ngigac yogo yengi nosingte ngaba aibongte yengelacni gocnedi nosing heuc-heucte bole baibong. <sup>6:7:</sup> Sale 2:41; 16:5 † <sup>6:9:</sup> Kpakpaduc mac yogolec memba yenge esecne umacka gaibong. Yenge ngic sugucne moniyang moniyang yengele kwele kwele gaibong. Gacgu yengungtihac moneng kpatulelu fuli banagubong ngic sugucne yengi yogo hegilecebalu gaibong. <sup>6:10:</sup> Luk 21:15 ‡ <sup>6:13-14:</sup> Ibu-mac Yerusalem iwa ngiyewec yogo mac gbagbacne wackeibong. Yuda ngic-ngigac yengele yefe-yowa yogo Wapongti Moses lacnowec.

**15** Aime Yuda ngic sasawa Tutumangtowanginang ngiyeibong, yengi Stifen ngani-lilickelu nganibong haic-sogeine angelo yengele ngani-ngani ingucne aiwec.

## 7

*Israel ngambofocngineng yengele siduc Stifenti miwec*

**1** Aime depec-baba ngic yengele damong sugucnedi Stifen yanguc uwac-nowec, "Yowa migaina, yogo noine, me?"

**2** Inguc mime Stifenti yanguc miwec, "Mamacfocne nga ngic hae-gbafocne, yowa mibe ngagening. Ngambononggeng Abraham ye Haran taonka mi hikelu Mesopotamia himongka gawec. Gacgume Wapong tapili nga hibi-angoc fileine, yedi fikecnolu yanguc edowec.

**3** 'Ga mac-himonggone nga alingfogcone hegilecebaengka nani himong monic edalicgudacte, iwa hikelu gadamec.' (*Fike 12:1*)

**4** "Aime ye yowa inguc ngagelu Kaldia yengele himong\* hegilelu Haran taonka hikelu gawec. Iwa gacgume mamacie homawec. Homame Wapongti himong yakumac nongileng galu Israel wackegabeleng, Abraham salemie yawa kwesiwec. **5** Mengocke kwsilu himong monic mi hegilecnome bawec, miyacbenang. Ye nga ngambofocine yengele himong baningte mipangkewec, yogo adu-madec mikac gaemewa edowec. **6** Ailu Wapongti yowa monic yanguc miwec,

'Ngesa-ngambofocgone yenge hifa 400 aiyemewa ngic gocne yengele himongka kwilic gadaingte. Ailu yowangineng balaibelu hole doic feina balu ganowagaing. **7** Ngic wenidi Abraham ngambofocine kwelec kweningte bacebadaingte, nani ngic yogo yenge yowawa locebalu ameine yeledacte. Ailu ngambofocine locebaibong, himong yagowahac hefaliye kwsilu afenulu nale kwelec kwekwe gadaingte.' (*Fike 15:13-14*)

**8** Wapongti Abraham dodoftcngoggeng lacnolu soc tofaine helockingte Wapongti Abraham edowec. Inguc edome madecine Aisak kwefickeme fikeme hadeng **8** aiyemewa madecinele soc tofaine helockewec. Aime Aisakti Yakobo inguc aicname Yakobodi ngambofocnonggeng 12 inguc aiyelewec.

**9** "Ngambofocnonggeng yenge gbangineng Yosefe hasowac aicnolu Isip himongka lobong ngic gocne yengi fuli balu bahikeibong. Iwa gaemewa Wapongti yeholec gawecte ailu **10** doickacni baickelu kwele-madicca gaga bafuwacnowec. Yedi Yosefe kwele-madic aicnolu ngage-ngage-motoc lacnowec. Lacname Isip ngictau Faraodi ngage-ngageine yogo nganime madickewec. Madicke yicne mac mafaine nga Isip ngic-ngigacfocine momoc damongebalu ganale ngic sugucne lowec.

**11** "Lome gaemewa Isip nga Kenan himongka loloc fikeme umac sugucne bafuwaiibong. Inguc fikeme ngambofocnonggeng yenge noba-nosingte homalu gaibong. **12** Gacgubong Isip himongka nosing fagac, inguc mibong ngagelu Yakobo ye madecfocine salecebame iwa hikeibong. **13** Gacgu dameng monicka hatacmac hikebong Yosefed ihae-gbafocine yengela

\* **7:2:** Fike 11:31    **7:4:** Kaldia yengele himong yogo Mesopotamia kwelina fagac.    **7:4:** Fike 11:31-12:5    **7:5:** Fike 12:7; 15:18; 17:8; 48:4    **7:6:** Wah 12:40    **7:7:** Wah 3:12    **7:8:** Fike 17:9-14; 21:4    **7:9:** Fike 28:1-3; 37:11; 39:1-3,21-23    **7:10:** Fike 41:37-44    **7:11:** Fike 41:54; 42:1-2

fungineine mime yegengkewec. Yegengkeme Farao ye Yosefe yeicne nga alingfocine yengele fungine ngage-motowec. <sup>14</sup> Inguc aime Yosefedи haefocine edocebame galu mamachnineng Yakobo nga alingfocngineng sasawa biyac wacebame kwesiibong. Aime ngic-ngigac kwesiibong, yengele dzalengineng 75 aiwec. <sup>15</sup> Aime Yakobo ye Isip himongka hikegacgu homawec. Nga madecfocine yenge ngambofocnonggeng, yenge inguchac iwa homayackeibong. <sup>16</sup> Homabong kponggbongngineng Sekem macka bacea kwesiibong. Kwesilu Abrahamti Sekem mackacni ngic monic Hamor yele madecfocine yengelacni himong monic dongesile ailu siliwa moneng gocnedi fuli bawec, iwa locebaibong.

### *Mosesle siduc Stifenti miwec*

<sup>17</sup> “Waponti himong Abraham laconale biyachac mipangkewec, yogo noine fikenale dameng bangkalewec. Bangkaleme Yakobo ngesafocine nga ngambofocine yenge Isip himongka homacne fikesawec aibong. <sup>18</sup> Inguc ailu gacgubong Isiple ngictau gbolicne monic fikewec, ye Yosefele fungine mi ngagewec. <sup>19</sup> Aime ngictau ye hocne ngambofocnonggeng mife-miwa aiyelelu basowalecebawec. Basowalecebalu yanguc edocebawec, ‘Ngenge sabacfocngineng hegilecebabong homayackedaing.’

<sup>20</sup> “Dameng iwa Moses ye fikem Waponti kogoc yogo nganime madickewec. Aime ye mamacinele macka tamacie habackang game damongkeibong. <sup>21</sup> Inguc ailu bahikelu mac lobeina dadalicna lobong fawec. Faemewa Farao aduinedi bafuwelu yeicne madec ingucne balu bagame sugulewec. <sup>22</sup> Suguleme Farao ngicfocine yengi Isip ngic-ngigac yengele aibaba nga ngage-ngage-motoc weducnabong ngage-motolu gawec. Galu wiyc aiwec nga miwec yogo tapiliineholec.

<sup>23</sup> “Game hifaine 40 aime ye Israel ngic hae-gbafocine ngani-ngagec aiye-lenele kweleine efeckeme hikewec. <sup>24</sup> Hikeme Isip ngic monicti Israel ngic monic moc weme Mosesdi nganilu agoine bafickelu ameine bafaliyelu Isip ngic weme homawec. <sup>25</sup> Welu yanguc ngagewec, ‘Na ngic hae-gbafocne Faraole molewacni bamoctoceanogale milu Waponti bole inguc nelewec, yogo ngage-motogaing mecne.’ Ye inguc ngagewec, aime Israel ngic-ngigac yengebac yogo mi ngage-motoibong. <sup>26</sup> Aime mac saeme hatacmac hikelu Israel ngic yaeckang moc wenaguboc bafuwacepalu asa bacepanogale aiyetelu yanguc edocepwec, ‘Ngic yaec hegilenic. Ngeke ngic hae-gbadi wenagugaic, yogo mi madickegac.’

<sup>27</sup> “Inguc mime ngic agoine wewecti Moses wepackelu yanguc miwec, ‘Madi nongele mimocto-mimocto ngic me damong locguwec? <sup>28</sup> Ga awec-nahac Isip ngic monic wehomamec, inguchac na wehomacnunogale aigic, me?’

(Wah 2:14)

<sup>29</sup> Inguc mime Moses ye yowa yogo ngagelu iwahac hangoc Midian himongka kwilic hikelu gawec. Iwa gacgu ngigac balu madec yaeckang kweficepwec.

<sup>30</sup> “Aime hifa 40 Midian himongka game motome Sinai tikiwapec himong kisiwa misaine mikacka hikelu gawec. Gacgume angelo monicti yok-kpisicnele mangngina dac-ubilang kwelina fikeme nganiwec. <sup>31</sup> Nganilu kwatackelu ngani-motonogale leme Sugucnele yowa yanguc fikewec, <sup>32</sup> ‘Na

ngambofocgone yengele Wapong. Na Abraham nga Aisak ailu Yakobo, yengele Wapong gagabachac.' Fikeme Moses ye dengdengkeme nganinogale hangockeme donegine sangkelu ngosockelu domawec.

<sup>33</sup> "Domaemewa Sugucnedi yanguc edowec, 'Himong domagic, yogo naneicne himong gbagbacne. Ilec hige-ebecgone hemoctoc. <sup>34</sup> Na ngic-nigigacfocne Isip himongka sowacne aiyelebong nganicbagabac. Ailu hiyabong ngagegabac. Yogo bacebabe kwsiningte yakumac wagabac. Ilec Isip himongka salecgube biyac hikedamec.'

<sup>35</sup> "Ngic yenge Mosesle yowa hegilelu yanguc miibong, 'Madi nongele mimocto-mimocto ngic me damong locguwec?' (*Wah 2:14*) Wapongti ngic ye hocne Israel ngic yengele damong ailu ngaba yengele molewacni bacebanale miwec. Milu angelo saleme yoc kpisicna dac-ubilang fikeme yoglec kwelina fikecno domalu bole-yowa yogo milu edowec. <sup>36</sup> Inguc ailu Wapongti Moses saleme hikelu baceba kwesiwec. Ye Isip himongka nga Kiwec Sasacna ailu himong kisiwa misaine mikacka pasile maaine nga pasi mi ngani-nganiine homacne balu gacgume hifa 40 aiwec.

<sup>37</sup> "Ailu Mosesdi hocne Israel ngic-nigigac yanguc edocebwec, 'Wapongti alingfoengneng yengele hewackacni siduc-mimi ngic monic na ingucne hac bafuwangeledaict'e' (*Yef 18:15*)

<sup>38</sup> Ailu yedi hocne himong kisiwa misaine mikacka ngambofocnonggeng yengeholec kpatule galu Sinai tikiwa felu angelole mickacni yowa gagaine-holec ngagelu walu edocnubawec.

<sup>39</sup> "Aime ngambofocnonggeng yenge yele yowale takicebame yowaine hegileibong. Hegilelu Isip himongka hefaliye hikenogale kwelengineng salelu <sup>40</sup> Aron yanguc edoibong,

'Ga siduc-gbong gocne banoleengka siduc-gbong yogo yengi molickenoledaingte. Mosesdi Isip himongkacni mengocnubalu kwesiwec, yedi mecene biyac sangkeme miyac aiwec.' (*Wah 32:1*)

<sup>41</sup> Inguc milu dameng iwahac siduc-gbong monic bulumaka madecinele ngani-ngani ingucne balu depec bacnoibong. Yenge molenginengti iluc balu yogo milu afeelu mitengkeibong. <sup>42</sup> Inguc aibong Wapongti lobe holeyelelu sawawa aleng nga iluc afeebalu kwelel kweyeleningte hegilecebawec. Wapongte siduc-mimi ngic yengele hibiwa yowa yoglec yanguc biyachac kwelengkeicne fagac.

'Israel ngic-nigigacfocine, ngenge hifa 40 himong kisiwa misaine mikacka galu siete depec balu me depekte hasoc gocne monic mi lobeneleibong, miyac. <sup>43</sup> Ngenge siduc-gbong Molekte kpoluc-fale tengke-caigaing. Nga siduc-gbong Refan, yele asocmeng ilucine balu gaibong. Wiyac yogo hocne afeepaibongte ailu na himong dalicka Babilon iwa locngebadachte.' (*Amo 5:25-27*)

### *Wapongte kpoluc-fale fungine Stifenti miwec*

<sup>44</sup> "Ngambofocnonggeng yenge himong kisiwa misaine mikacka iwa Wapongte dodofic katapale kpoluc-fale baibong. Aime Wapongti Moses edalilu milockecnowec, yoglec silicina baince. <sup>45</sup> Yosuwadi molickeyeleme ngambofocnonggeng kpoluc-fale yogo hocne bayelelu iwa Israel yengele alingkacni miyac yengele himongka hikelu balu ngiyeibong. Ngijeembongka Wapongti Israel yengele alingkacni miyac yenge gaibong, yogo weyebic aiyelewec. Aiyeleme ngambofocnonggeng yenge himong yogo

balu Wapongte kpoluc-fale himong iwa taockeme taoc balu gabong Dawidi fikewec.<sup>46</sup> Wapongti Dawidi kwele-madic aicnome yedi Yakobole Wapong, yele mac monic banale milockewec.<sup>47</sup> Foinac, yogo yeuctihac mi bawec, Solomonti Ibu-mac yogo bawec.<sup>†</sup><sup>48</sup> Wapong Feicnetowanonggeng yebac ngic yengi mac monic moledi baicne, iwa ngiye-fangkec mi aicaigac. Wapongte siduc-mimi ngic monicti mic-yowa yanguc miwec,

<sup>49</sup> ‘Sugucnedi yanguc migac, “Ngictaule ngiye-ngiyene yogo honocmeng. Nga himong yogo hige ede-edene. Illec ngengi oma mac baneledaingte? Me oma mapicka ngiye-ngagec aidacte? <sup>50</sup> Foinac, na molenedi wiyac sasawa bayackeiba.”’  
(Yes 66:1-2)

<sup>51</sup> “Ngic-ngigac linggangne ngenge kwele-hedecngineng fongkeyackeicne, ngambofocngineng yenge Tili Asu mife-miwa aicnolu gaibong, ngenge yenge ingucne aigaing.<sup>52</sup> Ngambofocngineng yenge Wapongte siduc-mimi ngic sasawa weyebic aiyeleibong. Siduc-mimi yenge pasi dondonnele fileine fikenale siduc-yowa miibong. Aime ngengele ngambofocngineng yenge hocne yengungthac siduc-mimi ngic yogo wecebaibong. Gacgu Ngic Madicne yeicne fikeme ngengi hocne doc balu ye wehomaibong.<sup>53</sup> Ngenge angelole mickacni yefe-yowa baibong. Ailu sifu yogo hegileibong.”

### *Stifen wehomaibong*

<sup>54</sup> Stifenti yowa inguc edocebame ngagebong kwelenginang bame, yenge aalic sugucne ngagelu ye hila nganilu micngineng hisalangkelu dodomangneng sowalewec.<sup>55</sup> Stifen ye Tili Asudi kweleina wakeme honocmengka hilame fewec. Feme Wapong tapili nga hibi-angoceneholec nga Yesu ye Wapongte mole-foleinapet domame nganilu yanguc miwec,<sup>56</sup> “Ngagegaing, na honocmeng angkeme Ngicte Madec ye Wapongte mole-folewapec domame nganigabac.”<sup>57</sup> Inguc mime yenge sasawadi hendolong sugucne ailu hedecngineng kwedickelu yela gbululucke lelu igockela igockela hikeibong.<sup>58</sup> Hikelu taon lobeina haulu posadi wickelu holeibong. Inguc ailu ngic wiycan gani-ngagec ailu miibong, yenge ngakpingineng dalicne hemoctolu ngic-madec monic wacine Sol, yele higewa habuweibong.

<sup>59</sup> Habuwelu Stifen posadi wickelu holeebongka yedi yanguc milu milockewec, “O Sugucne Yesu, ga asune banong.”<sup>60</sup> Inguc milu ketadi holeelu aukwelu wackelu miwec, “Sugucne, ga bikicngineng yogo hegileyelenong.” Inguc milu homawec.

## 8

<sup>1</sup> Homame Sol ye aibaba yogolec ngageme madickewec.

### *Yesule habu weyebic aiyeleibong*

Aime dameng yogowahac Yesule habu Yerusalem iwa gaibong, yenge molickelu weyebic aiyeleibong. Aiyelebong siyeckelu Yudeya nga Samaria himongka hikeyackeibong. Salecebaicne yengi sugu Yerusalem iwa gaibong.<sup>2</sup> Aime ngic gocne Sugucne alang bacnolu gaibong, yengi Stifen balu hisonggong sugucnebenang aicnolu longkeibong.<sup>3</sup> Aime Sol ye Yesule habu weyebic aiyelenale macsoc macsoc felu ngic-ngigac fulucke-bac aiyelelu muc-macka locebalu gawec.

### *Filip Samaria taonka hikewec*

**7:45:** Yos 3:14-17    **7:46:** 2Sm 7:1-16    <sup>†</sup> **7:47:** Ibu-mac fikeme kpoluc-fale yogo miyac aiwec.

**7:47:** 1Ngt 6:1-38    **7:51:** Yes 63:10    **7:52:** Mat 23:31    **7:55:** Mige 110:1    **7:56:** Kol 3:1

**8:1:** Luk 23:34    **8:3:** Sale 9:1,13; 22:4; 26:9-11

<sup>4</sup> Inguc aime yenge siyeckelu hangoc macsoc hike galu ngic-ngigac Wapongte mic-yowa mibong yegengkeme ngagelu gaibong. <sup>5</sup> Inguc aibong Filip ye Samaria ngic yengele taonka hikelu Mesiale yowa-siduc edocebalu weduyelewec. <sup>6</sup> Milu ngagesingkeningte pasile maaine momoc bame nganilu yowainele hedec kwelu ngageibong. <sup>7</sup> I yangucte, ye aleng wonongkolec homacne yebicebame ngic kwelewacni ofelu aukwelu hikelbong. Ailu ye puling haicina monic-monic homacne bamadicebawec. <sup>8</sup> Inguc aime taon iwa ngic-ngigac yenge beliyebenangkeibong.

<sup>9</sup> Aime taon iwa ngic monic gawec, wacine Saimon, ye kpanggec bole balu game Samaria ngic-ngigac yenge ye nganibong damuineholec aiwec. Aime ye yeicnele ngageme feicne aiwec. <sup>10</sup> Aime feicne waicne yenge momoc yele ngagebong feicne aime alang bacnolu yanguc milu gaibong, "Ye hocne Wapongte tapili sugucne." <sup>11</sup> Ye kpanggec bole bame kwatackelu dameng dalicne ye balaibelu hedec kwelu gaibong. <sup>12</sup> Aime Filipdi Wapongte nganidamongte siduc nga Yesu Kristole fungine mime yegengkeme ngic-ngigac sasawadi momoc ngagesingkelu misa lowaibong. <sup>13</sup> Inguc aibong Saimon ye inguchac Yesu ngagesingkelu misa lowalu Filip emeina gawec. Filipdi pasile maaine nga pasi damuineholec bame Saimon ye yogo nganilu kwatackelu ngage-ngage bole homacne bawec.

### *Pita nga Yoane yeke Samaria hikelboc*

<sup>14</sup> Samaria ngic-ngigac yenge Wapongte yowa ngage-angac aibong, yogolec siduc Yerusalem iwa salecebaicne yengela hikeme ngageibong. Ngagelu Pita nga Yoane salecepabong hikelboc. <sup>15-16</sup> Esecne yengela Tili Asu monic mi wawec, yenge Sugucne Yesule wacka sugu misa lowaibong. Ilec ailu yeke hikelu yenge Tili Asu baningte Sugucne milockeiboc. <sup>17</sup> Aime salecebaicne yeke molenginecti socnginang loboc yenge Tili Asuholec aibong.

### *Tili Asu nalic mi fuli banoga*

<sup>18</sup> Salecebaicne yeke ngic yengele socka molenginec loboc Tili Asuholec aibong. Inguc aibong Saimon yogo nganilu moneng yetenale bawelelu <sup>19</sup> yanguc edocepwec, "Ngeke bole-yowa tapiliineholec yogo na momoc nelebo na ingucneha ngic socnginang molene lobe Tili Asuholec aidaing."

<sup>20</sup> Inguc mime Pitadi yanguc edowec, "Wapongti Tili Asu moc gelegac, yogo monengti fuli banogale ngagegic, me? Monenggoneholec ngeke momoc dac-sanangka fedabiyepte! <sup>21</sup> Wapongti kwelegona kwesacgome nganigacte tapili yago monic mi balu mochenang gadamecte. <sup>22</sup> Ga sisipilic aibabagone yogo hegilelu kwelegone hefaliyeme Sugucne milockeng kwelegona angac kwesacine hegilecguna. <sup>23</sup> Na nganibe, ngage-ngage sowacnedi ga basowalecgume bikicti muc ingucne hefecgugac."

<sup>24</sup> Inguc mime Saimonti miwec, "Wiyac migabipec, yogo mi fikeneledaic. Ilec ngeke ngekuhuc nale ailu Sugucne milockenic."

<sup>25</sup> Aime salecebaicne yeke Sugucnele yowa ngic-ngigac yengela miyebocka yegengkeme edocebalu weduyeleiboc. Weduyelelu Yerusalem hefaliye hikenogale milu, Samaria ngic-ngigac yengele mac-alng gocne falegacsoc yogowa Siduc Madicne miboc yegengkeme hikelboc.

### *Filipdi Afrika ngic Siduc Madicne edowec*

<sup>26</sup> Sugucnele angelo monicti Filip yanguc milu edowec, "Ga efeckelu Yerusalemkocni yefe Gasa taonka haugac, iwa hikedamec. Yefe yogo himong kisiwa misaine mikacka fagac." <sup>27</sup> Inguc milu edome Filip efeckelu

hikewec. Hei, Etiopia himongka ngigac-tau monic gawec, wacine Kandasi. Aime ngic sugucne monic\* gawec. Ngigac yele hiye-moneng damongkelu gawec, ye Yerusalem iwa Sugucne afeenale ngagelu hikewec. <sup>28</sup> Afeeme motome hefaliyelu keleta feina ngiyelu Wapongte siduc-mimi ngic Yesaiyale hibi wafelu hikewec. <sup>29</sup> Inguc aime Asudi Filip yanguc edowec, “Ga biyac keleta emeina edi lenong.”<sup>†</sup>

<sup>30</sup> Inguc mime Filip ye yela gasacke lelu ngageme ngic ye Wapongte siduc-mimi ngic Yesaiya, yele hibi wafeme ngagelu yanguc uwacnowec, “Yowa wafegic, yoglec fungine ngage-motogic, me?”

<sup>31</sup> Uwacnome miwec, “Monicti mi mime yegengkeme, naneuc nalic mi ngage-motodacte.” Inguc milu Filip keletawa feme yeke momoc ngiyenictie sanangne micnowec.

<sup>32</sup> Wapongte hibi wafewec, yogo yanguc, “Lama monic weheduc ainogale bahikebong mi hiyacaigac, me lama madecinedi dowec baloc-baloc ngic yela waickelu facaigac. Silicine ingucne hac ngic monic wehomanogale bahikebong yowa monic mi miwec. <sup>33</sup> Yenge yowawa tapiliine bawalu yele yowale noine mi milu himongka gagaine baickeibong. Aime ye ngesa-ngambo mikac. I yangucte, yenge gagaine himongkaci baickeibong.” (*Yes 53:7-8*)

<sup>34</sup> Inguc wafelu ngic sugucnedi Filip yanguc milu uwacnowec, “Wapongte siduc-mimi ngic ye male inguc miwec, ye yeicne me ngic monicte miwec?”

<sup>35</sup> Uwacnome Filipdi ameine bafaliyelu Wapongte hibi yogowacni taockelu Yesule Siduc Madicne yoglec fungine mime yegengkewec.

<sup>36</sup> Inguc ailu hikecgu misa monicka hike sulumelu ngic sugucnedi yanguc miwec, “Nganic, misa yago fagac. Aime omadi yefene hedickeme misa mi lowagabac? Ga nalic misa lowaneledeng, me?”

<sup>37</sup> [Inguc mime Filipdi miwec, “Kwelegone bubuchac ngagesingkeengka nalic aidacte.”

Mime yowaine bafaliyelu yanguc edowec, “Yesu Kristo ye Wapongte madec, yogo ngagesingkegabac.”<sup>‡</sup> <sup>38</sup> Inguc milu keleta hefeme domame Filip nga ngic sugucne yeke momoc misawa haulu Filipdi misa lowacnowec. <sup>39</sup> Aime misawacni ofeebocka Sugucnele Asudi Filip iwahac baickelu hikeme ngic sugucne ye Filip mi nganilu beliyelu hikewec. <sup>40</sup> Aime Asudi Filip Asotus taonka lome gagac inguc nganiwec. Ailu iwacni molickelu maccsoc Siduc Madicne mime yegengkeme hikecgu Sesarea taonka bamoctowec.

## 9

### Sugucnedi Solfikecnowec Sale 22:4-16; 26:9-18

<sup>1</sup> Solle kwelewa kwele-dac sugucne fawecte Sugucnele mic-tengtengfocine ngaba aiyelelu webac aiyelenale milu depec-baba ngic yengele damong sugucne yela hikewec. <sup>2</sup> Hikelu yanguc edowec, “Ngic me ngigac monic Damasko taonka Yesule yefe balaibegaing, yenge bafuwacebalu bacebalu moleginang dodocebadacte. Dodocebalu Yerusalem taonka bacebalu kwe-sibebe Damasko kpakpaduc macte micne, yengele hibi kwelengkelu nelec.”

\* **8:27:** Ngic yogo ye hucine baicne.    † **8:29:** Ga inguchac Yefe-yowa 23:1 nga Yesaiya 56:3-7 wafenong. Esecne ngic ingucne yenge Yuda yengeholec nalic mi wetackelu gaibong.    **8:36:** Sale 10:47    ‡ **8:37:** Hibi esecne Lukadi kwelengkewec, yogo nganilu iwacni kwelengkebong ofewec, yengelacni gocene hewacine 37 iwa mi fagac. Ngic-ngigac yenge hibi kwelengkeicne yogo wosaelu nganibong Lukadi mi kwelengkewec mectne.    **8:40:** Sale 21:8    **9:1:** Sale 8:3

<sup>3</sup> Lacnome ye hikelu Damasko bangkalenale aiyemewa honocmengkacni angoc monicti iwa walu kwenggalangkewec. <sup>4</sup> Kwenggalangkeme ye himongka lodingke wawelu fame, yowa malac monic yanguc fikeme ngagewec, “**Sol, Sol, ga omale weyebic ainelelu gacaigic?**”

<sup>5</sup> Inguc mime Soldi uwacnowec, “Sugucne, ga maa?”

Inguc mime miwec, “**Weyebic ainelecaigic, na hocne Yesu.** <sup>6</sup> **Ilec ga fangkelu taonka hikec!** Iwa gaengka wenuc aidamecte, yogolec yowa edocgudaicte.”

<sup>7</sup> Aime ngic yeholec hikeibong, yenge yowangineng mikac aime moc sugu dagewelu domaibong. I yangucte, yenge yowa sugu ngageibong. Ailu ngic monic mi nganiibong. <sup>8</sup> Aime Sol ye fangkelu donge hilame dongeine kundung kweme ngicfocene yengi moleina balu Damasko bahikeibong. <sup>9</sup> Bahikebong iwa hadeng habackang dongeine kundung kweme nosing misa monic mi nolu ngiyewec.

### *Ananaiasdi Sol bafuwawec*

<sup>10</sup> Damasko taonka mic-tengteng ngic monic gawec, wacine Ananaias, ye Sugucnedi gung-didicka ingucne fikecnolu wackewec, “**Ananaias.**”

Wackeme miwec, “Sugucne, na ya.”

<sup>11</sup> Mime Sugucnedi yanguc edowec, “**Ga fangkelu yefe monic wacine Donne wackecaigaing,** iwa hikelu Yudasle macka felu ngic monic wacine Sol, Tasas taonkacni, ye basackelu bafuwadamec. Ngagegic, ye milockelu ngiyegac. <sup>12</sup> Ye gung-didicka ingucne yanguc nganigac. Ngic monic wacine Ananaias, yedi yela hikelu dongeine hilanale milu moleine socina logac.”

<sup>13</sup> Inguc mime miwec, “Sugucne, ngic yele homacne mibong ngagecaigabac. Ye Jerusalem iwa ngic-ngigac gale bingec webac homacne aiyelecaigac. <sup>14</sup> Nga iwa inguchac wacgone wackelu mitenggucaigabeleng, nonge sasawa witcnubalu bacnubadaicte. Ilec depec-baba ngic micne yengi bole-yowa tapilinginengkolec yogolec hibi lacnobong, balu kwesilu gagac.”

<sup>15</sup> Inguc mime Sugucnedi yanguc edowec, “**Ga hikec.** Na ngic ye hocne bole-ngicne bawosaeiba. Ye Israel yengele alingkacni miyac, ngic-ngigac yogo yenge, nga ngictaufocngineng ailu Israel ngic-ngigacfocene yengela siducne mime suguledaicte. <sup>16</sup> Aime nale wacte ailu ye doic nga umac **haicinc monicte feina gadaicte, yogo edalilu weducnodgeacte.**”

<sup>17</sup> Inguc mime Ananaias ye hikelu mac miwec, iwa felu Solle socka moleine lolu miwec, “Ngic hae-gbane Sol, fangkec. Sugucne Yesudi yefewa fikegelewec, yedi hocne salecnugac. Ga dongegone hilaengka Tili Asu kwelegona wakenale welegabac.” <sup>18</sup> Inguc miyemewa ye iwahac dongeinacni wiyac monic sekec ingucne wame dongeine hilalu fangke misallowac aiwec. <sup>19</sup> Ailu nosing nolu sanangkewec.

### *Soldi Yesule siduc mime yegengkeyelewec*

Sol ye mic-tengtengfocene Damasko gaibong, yengeholec hadeng gocne gawec. <sup>20</sup> Iwahac galu Yuda ngic-ngigac yengele kpakpaduc macka felu Yesule fungine yanguc edocebalu weduyelewec, “Yesu ye Wapongte madec.”

<sup>21</sup> Inguc edocebame yenge ngagelu kwatackelu yanguc miibong, “Ngic yedi hocne Jerusalem taonka Yesule wac yogo alang bacnolu gabong, weyebic aiyelelu gawec. Yawa inguchac witicebalu depec-baba ngic micne yengela bacebalu hikenogale kwesigac. Ngic yogo, me?”

<sup>22</sup> Inguc mibong Sol ye yanguc milu gawec, “Foinac, Yesu ye Mesia.” Ye yogolec fungine mime yegengkeyeleme Yuda ngic-ngigac Damasko gaibong, yenge yowa yogo tapiliineholec ngagelu kwatackelu yowaine ameine mi bafaliyeibong.

<sup>23</sup> Ye hadeng homacne inguc ailu game Yuda ngic-ngigac yenge Sol wenogale yowa hefeibong. <sup>24</sup> Ailu ye weningte milu taonte oda nuina deboc hadeng damong locebabong domaibong. Yele yowa milu hefeibong, yogo yeuctihac biyac ngagewec. <sup>25</sup> Aime Sol mic-tengtengfocene, yengi debocka ye uficka umengkelu taonte oda yefina yefe lobong lobina haulu hikewec.

<sup>26</sup> Hikelu Yerusalem sulumelu mic-tengtengfocene yengeholec taockenale yowaine mime yenge sasawadi hangoc aibong. Aime ye mic-tengteng noine aiwec, yogo mi ngagesingkeibong. <sup>27</sup> Aime Banabasdi Sol balu salecebaicne yengela mengocke hikelu yanguc edocebawec, “Sugucnedi Sol yefewa fikecnolu yowa edowec. Inguc aime ye Damasko taonka hangoc mikac Yesule fungine mime yegengkewec.” <sup>28</sup> Aime Sol ye yengeholec Yerusalem ngyefangkec ailu yowa hangoc mikac Sugucnele wacka edocebalu weduyelelu hike-kwesic aiwec. <sup>29</sup> Ailu Sugucnele wacka sanangnehac domalu ngic Siduc Madicne hangoc mikac edocebawec. Edocebame Yuda ngic-ngigac Griki yowa milu gaibong, yengeholec yowangineng fec-wac aiwec. Aime ngic yogo yenge ye webong homanale aiiibong. <sup>30</sup> Inguc aibong ngic haegbaocngineng yengi yogo ngagelu Sesarea taonka mengocke haulu lobong hikegacgu Tasas taonka hikewec.

<sup>31</sup> Aime Yesule habu Yudeya nga Galili ailu Samaria prowins iwa gaibong, yengela kwele-mogung fikewec. Fikeme gaebongka Yesule habu sugulelu Sugucne alang bacnolu kweledi dofickelu afeibong. Aime Tili Asudi mibasanang aiyelewec.

### *Pitadi ngic puling monic bamadickewec*

<sup>32</sup> Pita ye macne macne falegacsoc, iwa lolickelu hikegacgu Wapongte bingec Lida taonka gaibong, yengela hikewec. <sup>33</sup> Hikelu iwa ngic monic nganiwec, wacine Ainias, ye puling ailu mapicka falu game hifa 8 biyac aiwec. <sup>34</sup> Aime Pitadi yanguc edowec, “Ainias, Yesu Kristodi bamadicgugacte fangkelu mapicgone geuc wedunong.” Mime ye iwahac fangkelu domawec. <sup>35</sup> Inguc aime ngic-ngigac Lida taon nga Saron himongkacni yenge ye nganilu kwelengineng hefaliyeeme Sugucneholec wetackeibong.

### *Pitadi Tabita bagboliywec*

<sup>36</sup> Yopa taonka mic-tengteng ngigac monic gawec, wacine Tabita, Griki yowawa wacine monic Dokas. Ye ago babafictre aibaba madicne ailu waweweine bafacebalu gawec. <sup>37</sup> Aime dameng iwa Tabita ye huc fikecnome homawec. Homame yenge kponggbongine misa lowacnolu mac kweline monic feina bafelul lobong fawec. <sup>38</sup> Aime Pita ye Lida taonka dadalicne ngyiewec, inguc ngagelu mic-tengtengfocene yenge Yopa taonkacni ngic yaekang salecepabong yela hikeloboc. Hikelu yanguc edolu dogbac aicnolu miiboc, “Ga nongela biyac welec!”

<sup>39</sup> Miboc Pita ye ngageme efeckeme yekeholec hikeloboc. Hike sulumelu kponggbong fawecka mengockelu feiboc. Febong ngigac-hosec sasawa yenge lolickelu hii kwele-sowac aiiibong. Ailu Dokas gblolicne galu ngakpi-kpoluc gbodoyelelu gawec, yogo edaliyackeibong.

<sup>40</sup> Aime Pitadi yenge salecebame hauyackebong, ye ketadi holelu milockewec. Milockeme motome kponggbong fawecka hefaliyel yangu edowec, "Tabita, ga fangkec." Mime ye donegine hilalu Pita nganilu fangke ngiyewec. <sup>41</sup> Ngiyeme Pitadi moleina balu bafangkeme fangkelu domawec. Domame Wapongte bingec nga ngigac-hosec yenge Tabita gboliye fangkewec, yogo nganiningte wacebawec. Wacebame welebong Tabita gboliyel fangkewec, yogo edalicebawec. <sup>42</sup> Aime yenge siduc yogo mibong, Yopa taonka sawelu hikeme homacnedi Sugucne ngagesingkeibong. <sup>43</sup> Aime Pita ye ngic monic wacine Saimon, bulumaka socine bacaigac, yele macka dameng dalicne inguc ngiye-fac gawec.

## 10

### *Angelodi Konelius fikecnawec*

<sup>1</sup> Sesarea taonka ngic monic gawec, wacine Konelius. Ye hudu-baba ngic yengele damongte aling tofaine, wacine Itali, yengelacni ngic 100, yengele sugucnengineng gawec. <sup>2</sup> Ye yeicne nga golowacfocine sasawa, yenge kwele-madicka wiycac homacne ngic-ngigac waweweine yelelu gawec. Ailu Wapong hadengsoc milockelu gawec. <sup>3</sup> Hadeng monicka Konelius ye awelilicte 3 kilok ingucne aiyemewa Wapongte angelo monicti gung-didicka ingucne yela fikelu yangu edowec, "Konelius."

<sup>4</sup> Inguc mime kwatackelu hangockeme dongeinedi sanangne nganilu miwec, "Sugucne, oma wiyc?"

Mime yedi miwec, "Mimilocgone nga kwele-madicgonele wiycac ngic-ngigac waweweine yelecaigic, yogo ibu ingucne Wapongta feme ye yogolec ngageme madickecaigac. <sup>5</sup> Ilec ga yakumac Yopa taonka ngic salecebang hikelu ngic monic, wacine Saimon, wacine monic Pita, ye mengocke kwestabiyeng. <sup>6</sup> Ye ngic monic bulumaka socine bacaigac, wacine Saimon, yele macka ngiye-gac. Macine yogo kiwec mecina ngiye-gac."

<sup>7</sup> Angelo yowa yogo edolu hikewec. Hikeme Konelius ye macinele kwele kwekecine nga hudu-baba ngic monic ye Wapong alang bacno-caigac, yenge wacebame welebong yowa edocebawec. <sup>8</sup> Ailu Yopa taonka salecebame hikeibong.

### *Pitadi gung-didicka ingucne nganiwec*

<sup>9</sup> Ngic yenge hikecgu yefewa fabong saeme hatacmac hikedgacgu mac bangkaleibong. Aime Pita ye wenac hewac-hewac milockenale mac feina mac-dakec ingucne fawec, iwa fewec. <sup>10</sup> Felu nosingte homalu mime nosing lobebong ye gung-didicka ingucne yangu nganiwec. <sup>11</sup> Honocmeng angkeme wiycac gocne nganiwec. Yogo kpoluc ingucne mecine nebot nga nebot balu himongka lobong wanale ingucne aiwec. <sup>12</sup> Yogolec kwelina bec-sic sugucne kpisicne ailu hema nango haicne monic-monic fabong nganiwec. <sup>13</sup> Nganime yowa malac monic yangu fikewec, "**Pita, ga fangkelu wecebalu nocebac.**"

<sup>14</sup> Inguc fikeme Pitadi yangu miwec, "Sugucne, yogo nalic mi nocebacte! Na wiycac wonongkolec ailu Sugucnedi aka lowec, yogo monic mi noibawa nalic mi nodacte."

<sup>15</sup> Inguc mime alecine yaekkang aime miwec, "**Wapongti aka yogo baick-egac, yogo wonongkolec mi midamec.**"

<sup>16</sup> Aime yowa mime habackang aime iwahac kpoluckolec fuluckeme honocmengka hatacmac fewec.

<sup>17</sup> Feme Pita ye gung-didicka ingucne nganiwec, yogolec ngage-ngage bole balu ngiyeme Konelius ngicfocene yenge Yopa taonka hikeibong. Hikelu Saimonte macte uwala uwala hikecgú oda nuina domalu <sup>18</sup> wackelu uwaibong, "Saimon wacine monic Pita, ye mac yawa gagac, me?"

<sup>19</sup> Aime Pita ye gung-didicka ingucne nganiwecete ngage-ngage bole balu gaemewa Asudi yanguc edowec, "Ngagegic, ngic habackang yenge kwestilu ga basacgugaing. <sup>20</sup> Ilec ga fangke haulu yengeholec hikenogale milu ngageboc mi aidamec. Ngic yogo yenge nani salecebabe kwsigaing."

<sup>21</sup> Inguc mime Pita yengela haulu miwec, "Ngagegaing, ngic basackegaing, yogo na hocne. Ngenge omale kwsigaing?"

<sup>22</sup> Inguc mime ngic yengi yanguc miibong, "Hudu-baba ngic yengele damong ye Wapong alang bacnolu aibaba dondonne balaibecaigac. Aime Yuda ngic-nigic sasawa yenge yele ngagebong madickecaigac, ye hocne angelo gbagbacne monicti fikecnolu yanguc miyec, 'Ye baengka macgona weleme micinacni yowa ngagecte edodamec.' <sup>23</sup> Inguc mibong Pitadi yenge bacebalu macka aneng ayeleme faibong.

### *Pitadi Koneliusle macka hikewec*

Fabong mac saeme fangkelu ye nga ngic yogo yenge hikenogale aibong ngic hae-gbafoengineng gocne Yopa gaibong, yenge momoc hikeibong. <sup>24</sup> Yenge yefewa deboc monic falu mac saeme fangkelu hikegacgu Sesarea sulumeibong. Konelius ye alingfocene nga agofocene wacebame wangec gabong hike sulumeibong. <sup>25</sup> Hikelu Pita ye macka fenogale aime Koneliusdi wele emeina ketadi holecnolu afeewec. <sup>26</sup> Afeeme Pitadi balu bafangkelu yanguc edowec, "Fangkec, na mi afenuc, na ngic agogone."

<sup>27</sup> Inguc mime mingagec ailu ye mac kwelina felu ngic-ngigac homacne kpaduckelu ngiyeibong, yenge nganicebalu <sup>28</sup> yanguc edocebwec, "Ngenge Yuda ngic nongele aibaba ngagegaing. Nonge Israel yengele alingkacni miyac ngengeholec ago ailu nganinagulu gaga inguc mi ainangte aka-yowa sanangne fagac. Aimebac ngenge ngic wonongkolec miyac, ailu Sugucnedi aka mi lowec, yogolec Wapongti edocnume yegengkenelewec. <sup>29</sup> Yogolec hocne hefolecnumbong welenogale milu mi kpungkebac. Aime biyac hefolec-nugaing, yogolec fungine mibong ngagebe."

<sup>30</sup> Inguc mime Koneliusdi yanguc edowec, "Hadeng 4 motome aweleme 3 kilok ingucne aiymewa milockeiba. Ailu ngic monic ngakpiine angocineholecti nala fikelu <sup>31</sup> yanguc edocnuwec, 'Konelius, ngagec. Wapongti mimiloggonele nga kwele-madicgonele wiyc ngic-ngigac waweweine yelecaigic, yogolec ngage-madickegac. <sup>32</sup> Ilec ga Yopa taonka ngic salecebang hikelu Saimon, wacine monic Pita, ye mengocke kwsidabiyeng. Ye ngic monic bulumaka socine bacaigac, wacine Saimon, yele macka ngiyegac. Macine yogo kiwec mecina ngiyegac.' <sup>33</sup> Yowa inguc mime na yogolec hocne dacineholec salecebabe gala fuibong. Fubong ga yowane ngagelu kwsigicte ngageboc madickegac. Aime Sugucnedi yowa edocguwec, yogo ninic miyengka ngagenogale Wapongte haicka nongileng momoc kpaduckelu ngiyegabeleng."

### *Pitadi Siduc Madicne edocebwec*

<sup>34</sup> Inguc mime Pitadi yanguc milu edocebawec, “Wapongti ngic-ngigac nganicebalu monic ago balu angac ngagecnolu monic mi hegiledaict, yogo foinac ngage-moto-benangkegabac. <sup>35</sup> Ngic himongne himongne alang bacnolu aibaba dondonne aicaigaing, yengele ngageme madickecaigac. <sup>36</sup> Foinac, Wapongti Yesu Kristo moniyang, ngic-ngigac sasawa nongileng Sugcne hocne saleme wawec. Yedi kwele-mogung yowa madicne Israel ngic-ngigac nongela mime yegengkenolewec, yogo ngenge ngagegaing. <sup>37</sup> Ailu Galili prowinswa molickelu wiyac fikeme Yudeya himong sawelu hikewec, yogo ngenge ngagegaing. Yogo yanguc, Yoane ye ngic misa-lowacte yowa edocebawec. <sup>38</sup> Aime Wapongti Yesu Nasaret-hocni tapili nga Tili Asu locnome yedi himongka lolickelu hike-kwesic gawec. Inguc ailu ngic-ngigac bafuwacebalu bamadicebalu gawec. Nga Aleng Sugucnenginente tapilidi ngic-ngigac gagangineng basowaleicne, yogo yenge bamadicebayackewec. Wapongti nenggac ngiyecnome ye bole yogo bawec.

<sup>39</sup> “Aime Yesu ye Yuda ngic-ngigac nongele himongka nga Jerusalem iwa bole bawec, yogo ngani-ngagec aiyackeibeng. Inguc ailu gacgume yengi ye malicpongka webong homawec. <sup>40</sup> Homalu faemewa hadeng habackang aime Wapongti ye bagboliyeme fangkelu ngic-ngigac fikeyeleme nganiibong. <sup>41</sup> Ngic-ngigac sasawa yengela mi fikewec, miyac. Wapongti esecne widec ngic-ngigacfocene bawosaecnubawec, nongela sugu fikewec. Ye homackaci gboliyelu fangkeme nonge hocne nosing misa yeholec noibeng. <sup>42</sup> Aime Wapongti sanangne edocnubame ngic-ngigac weduyelelu yanguc edocebadabeleng, ‘Ngic ye hocne ngic gbolicne nga homaicne aibabanonggeng mimoctonale Wapongti bawosaewec.’ <sup>43</sup> Aime Wapongte siduc-mimi ngic sasawa yenge yowa yanguc mibong yegengkewec, ‘Ye ngagesingkebong, yele wacka bikicnginente ameine hegiledaict.’”

### *Tili Asudi Israel yengele alingkacni miyac yengela wawec*

<sup>44</sup> Pita ye yowa inguc milu domaemewa ngagelu ngiyebong Tili Asudi yengela walu kwelenginang wakewec. <sup>45-46</sup> Wakeme Tili Asudi ngageboc mikac Israel yengele alingkacni miyac yengela wame yowa haicine monicmonic milu Wapong wacine bafelu afeebong. Aime Pitaholec hikeibong, yenge ngic soc tofangineng helockeicnedi Yesu ngagesingkeibong, yenge yogo ngagelu medecebawec.

Inguc aibong Pitadi yanguc miwec, <sup>47</sup> “Nongileng Tili Asuholec aiibeng, pasi yogo ingucnehac ngic yago yengela fikeyeleme misa nalic mi sebileye-lenoga.” <sup>48</sup> Inguc milu yenge Yesu Kristole wacka misa lowaningte milu edocebawec. Ailu yengeholec hadeng gocne ngiyenale uwacnoibong.

## 11

### *Pitadi wiyac sasawa fike-ofewec, yogolec siduc edocebawec*

<sup>1</sup> Salecebaicne nga ngic hae-gbaofcngineng Yudeya himongka gaibong, yengi siduc yanguc ngageibong. Israel yengele alingkacni miyacti Wapongte yowa ngage-angac ailu ngagesingkeibong. <sup>2</sup> Aime Pita ye Jerusalem iwa hefaliye hikeme soc tofangineng helockeicne, yengi miwa-heduc aicnolu <sup>3</sup> yanguc edoibong, “Ga omale soc tofangineng mi helockeicne, yengele macka felu yengeholec nosing nocaigic?”

<sup>4</sup> Inguc mibong Pitadi aibaba funginacnihac fike-ofewec, yogolec yanguc edocebwec, <sup>5</sup> ‘Na Yopa taonka milockelu gabe dongene balockeme gung-didicka ingucne yanguc nganiiba. Wiyac monic kpoluc sugucne ingucnedi mocene nebocknga nebcocka badomalu honocmengkacni nala lobong wawec, ingucne aiwec. <sup>6</sup> Wame yanguc nganiiba, bec-sic sugucne kpisicne nga sic gocne micnginengkolec ailiu hema nango haicine monic-monie fawec.

<sup>7</sup> Inguc nganicebabe nala yowa malac monic yanguc fikewec, ‘**Pita, ga fangkelu wecebalu nocebac.**’

<sup>8</sup> ‘Inguc mime yanguc miiba, ‘Sugucne, yogo nalic mi nocebadacte! Na wiyc wonongkolec nga Sugucnedi aka lowec, yogo micti mi noibawa nalic mi nodacte.’

<sup>9</sup> ‘Inguc mibe honocmengkacni yowa monic fikeme alecine yaeckang aime miwec, ‘**Wapongti aka yogo baickegac, yogo wonongkolec mi midamec.**’ <sup>10</sup> Aime yowa mime habackang aime woc-wiyac yogo kpoluckolec fuluckeme honocmengka hatacmac fewec.

<sup>11</sup> ‘Aime ngagebeng, dameng iwahac Sesarea taonkacni ngic habackang salecebabong nala kwesilu mac ngiyeiba, iwa domaibong. <sup>12</sup> Domabong Asudi yanguc edocnuwec, ‘Ga yengeholec hikenogale milu ngageboc mi aidamec.’ Inguc mime hikebe ngic hae-gbaafocne 6 naholec yago domagaing, yenge balaibecnubong hikelu hudu-baba ngic yengele damong yele macka feibeng. <sup>13</sup> Aime yedi yowa-siduc yanguc milu edocnubawec. ‘Na angelo monicti fikenelelu yanguc edocnuwec, “Ga Yopa macka ngic salecebang hikelu Saimon, wacine monic Pita, ye mengocke kwsidabiyeng. <sup>14</sup> Yedi yowa edocgume ga nga golowacfocgone ngenge yowa yogo ngagelu balaibelu wasecne aidaingte.”’

<sup>15</sup> ‘Inguc mime na Siduc Madicne edocebaebewa molic-molic nongilang Tili Asu walu kwelenonggang wakewec, ingucnehabac yengela wawec. <sup>16</sup> Na yogo nganilu Sugucne Yesudi esecne yowa yanguc miwec, yogo ngagesiiba, ‘**Yoane ye misa lowayelewec. Nga ngengibac, Wapongti Tili Asu lowangeledaице.**’ <sup>17</sup> Ailiu nongileng Sugucne Yesu Kristo ngagesingkebeng, Wapongti ngageboc mikac tapili nolewec. Silicine ingucnehabac yakumac ngageboc mikac yenge tapili yelewekte, na ingucnedi Wapong aka nalic mi holecnodacte.’

<sup>18</sup> Pita ye yowa inguc milu edocebame yenge ngagelu kwelengineng wame Wapong wacine bafelu yanguc miibong, ‘Foinac, Wapongti Israel yengele alingkacni miyac kwelengineng hefaliyeme gaga-sanang baningte inguc hocne aiylegac.’

### *Antiok taonka Grik ngic-ngigac yenge ngagesingkeibong*

<sup>19</sup> Ngic-ngigac yenge Stifen welu Yesule habu gocne yenge momoc weyebic aiyelebong siyeckelu gocnedi Fonisia himongka hikeibong. Nga gocne yengi Saiparus nucka hikeibong. Nga gocne yengi Antiok taonka hikelu galibong. Ailiu yenge Yuda ngic-ngigac sugu Siduc Madicne milu edocebabong yegengkewec. <sup>20</sup> Aime Yesule habu hewacnginang, Saiparus nuckacni nga Sairini himongkacni ngic gaibong, yenge Antiok taonka hikeibong. Hikelu Grik ngic-ngigac yengeholec inguchac mingagec ailiu Sugucne Yesule Siduc Madicne mibong yegengkewec. <sup>21</sup> Mibong Sugucnedi tapili yeleme ngicngigac habu sugucne yenge kwelengineng Sugucnela lolu ngagesingkeibong.

<sup>22</sup> Yogolec yowa-siduc Yerusalem iwa Yesule habu gaibong, yengele hedecka haume yenge yogo ngagelu Banabas salebong Antiok taonka hikewec. <sup>23</sup> Hikelunganime Wapongti moc bamadicebawec, ye yogo nganilu beliyel kwelenginengti Sugucne ngagesingkeningte kwelengineng kwe-fangkewec. <sup>24</sup> Ye ngic madicne ailu ye kweleina Tili Asu nga ngage-ngagesing wakeicne facnowecte ngic-ngigac homacnedi yogo nganilu Sugucnela taock-eibong.

<sup>25</sup> Aime Banabas ye Sol basackelu bafuwanogale Tasas hikewec. <sup>26</sup> Hike bafuwalu mengockeme Antiok taonka kwesilu Yesule habu yengeholec hifa moniyang galu ngic-ngigac homacne Wapongte mic-yowa edocebalu weduyeleiboc. Aime Antiok taonka molickelu ngic-ngigac yengi mic-tengtengfocene, yengele wac Kristole aling wacebaibong.

### *Kwele-madicte moneng lobong bahikeiboc*

<sup>27</sup> Dameng iwahac Wapongte siduc-mimi ngic gocne Yerusalem hegilelu Antiok taonka waibong. <sup>28</sup> Yengelacni agongineng monic wacine Agabus. Asudi edome ye fangkelu himong sasawa loloc fikenale mime yegengkewec. Aime loloc yogo Roma ngictau Sisa Klodius gawec, dameng iwa fikewec. <sup>29</sup> Aime mic-tengtengfocene yenge yowa yogo ngagelu Yudeya himongka ngic hae-gbafofocngineng gaibong, yenge baficebanogale ngageibong. Ilec ailu moneng fayelewesoc kpatulelu yengela lobong hikenale mipangkeibong. <sup>30</sup> Mipangkelu moneng loibong, yogo Banabas nga Sol yetebong yeki bahikelu Yesule habu Yerusalem iwa damongfocngineng gaibong, yenge yeleibong.

## 12

### *Yakobos wehomalu Pita muc-macka loibong*

<sup>1</sup> Dameng iwa ngictau Herodedi Yesule habu gaibong, yengelacni ngic-ngigac gocne wecebalu basowalecebanale ngagelu bacebalu muc-macka locebawec. Inguc aiyelelu, yogolec lobeina yowawa locebawal ngaba aiyelelu wecebanogale ngagewec. <sup>2</sup> Ailu yedi mime Yoane haeine Yakobos hudubaba fitecti welockebong homawec. <sup>3</sup> Inguc ailu nganime Yuda ngic-ngigac yenge yogo nganilu angac ngageibong. Ailu ye bret yis mikacte hombang, dameng iwa mime Pita inguchac hobalu muc-macka loibong. <sup>4</sup> Lolu hudubaba ngic 16 yengelacni ngic aling 4 ingucti habu 4 heucke domalu damongkeibong. Inguc aime ye Ewalicebaicnele hombang motome\* Pita Yuda ngic-ngigac yengele haicka yowawa lonogale ngagesiwec.

<sup>5</sup> Inguc aibong Pita ye muc-macka ngiyemewa Yesule habu yenge Pitale ailu sanangnehac Wapong milockelu gaibong.

### *Angelo monicti Pita lukecnowec*

<sup>6</sup> Aime Herode ye mac saeme Pita yowawa lonogale miwec, dameng yogo bangkaleme deboc iwahac hudu-baba ngic yaeckang yeke Pita nga yekilec momochac sen yaeckangti witicnagulu loboc hewacginac fawec. Faebongka hudu-baba ngic gocne yenge nu lobina damong domaibong. <sup>7</sup> Hei, yenge mac kwelina inguc fabong Sugucnele angelo monicti yogowahac biyac fikelu domame mac kweline yogo angoleyackewec. Angoleme angelodi Pita magocina bauwalu yeuckelu miwec, "Ga biyac fangkec."

Mime iwashac sen Pitale molewacni fotockelu wame <sup>8</sup> angelodi miwec, "Ga umbikagone hefelu hige-ebecgone holeng hauna." Yogo aiyackeme edolu miwec, "Ngakpigone dalicne holeng haume balaibecnuc." <sup>9</sup> Inguc mime Pita fangkelu angelo balaibelu hikewec. Hikelu angelodi pasi yela bawec, yogolec ngageme gung-didicka ingucne aiwec. <sup>10</sup> Aime yeke nu yaeckangte damong domaiboc, yogo ewalicepalu hike aen nu sugucne taonka haic bangkaleboc, yogo yeuctihac angkeme hauiboc. Haulu yefewa hikelu angelo ye iwa aockewec.

<sup>11</sup> Inguc aime Pita ye ngage-ngageine dulungkeme yanguc miwec, "Yaku-mac foinac ngage-motogabac. Sugucnedi angeloine saleme Herodele molewacni nga Yuda ngic-ngigac yenge ngagesiibong, yogowacni baicnugac."

<sup>12</sup> Inguc ngage-motolu Mariale macka hikewec. Maria ye Yoane wacine monic Mareko, yele nenggac. Iwa homacnedi kpaduckelu milockelu ngiyeibong. <sup>13</sup> Ngiyeebongka Pita ye mac odale nuina hike domalu nuwa kpong-kpong holeme kwelec-adu monic, wacine Roda, uc yogo ngagelu wawec. <sup>14</sup> Wame Pitadi yowa mime malacine ngagelu beliyewec. Ailubac ye nu mi laliyecnowec. Ye moc mac kwelina felu miwec, "Pita kwesilu odale nuwa domagac." Inguc milu edocebawec.

<sup>15</sup> Edocebame yenge ngagelu miibong, "Kwelegone sifuwegac, me?"

Mibong, ye sanangnehac miwec, "Foinacbenang, yedi domagac."

Mime yengi miibong, "Yogo angeloine mecne."

<sup>16</sup> Aime Pita ye holeluhac domame yenge nu laliyelu yeicne nganilu kwatackeibong. <sup>17</sup> Kwatackepong ye mole balang baduyeletu mimacebalu Sugucnedi muc-mackacni lukecnome wawec, yogolec yowa-siduc aiyelelu miwec, "Ngenge siducne yago Yakobos nga ngic hae-gbafofnonggeng edoce-badaing." Inguc milu baickelu mac monicka hikewec.

### *Herode ye sowacnele ameine bawec*

<sup>18</sup> Mac saeme hudu-baba ngic yenge Pita basackelu miibong, "Ye wenuc hikegac?" Milu kwatackelu dabiyelbong. <sup>19</sup> Aime Herode ye Pita ba-fuwanningte mime basacke-bibiyeibong. Basackebong mi-uwac aiyeleme miyac aime ye hudu-baba ngic damongkeibong, yenge wehomacebaningte mimoctowec. Ailu yeicne Yudeya himong hegilelu Sesarea haulu gawec.

<sup>20</sup> Herode ye Tair nga Saidon taonte ngic-ngigac yengele aalic ngageyelelu gawec. I yangucte, yenge noba-nosingngineng Herodedi himong damongkelu gawec, iwacni balu gaibong. Iliec ailu yenge kpaduckelu ngaba miyac aime kwele-mogung fikenale yela hikelu uwacnoibong. Yenge molic-molic Herodele bole-ngic monic wacine Blastus, ye Herodele gung-fafa mac damongkelu gawec, ye hikelu nganibong yedi yengeholec inguc ainingte mudockeibong.

<sup>21</sup> Herodedi yowa yogo ngagelu yogolec ameine bafaliyeyelenogale dameng edocebawec. Dameng iwa ye ngictau ngakpiine holelu ngictaule ngiye-ngiyeina wangiyelu yowangineng edocebawec. <sup>22</sup> Edocebame ngic yenge sasawadi aukwelu yanguc miibong, "Yowa yogo ngic-yowa miyac, yogo wapong monicte yowa." <sup>23</sup> Aime Herode ye Wapongte wac mi bafewec, aime dameng yogowahac Sugucnele angelodi ye weme umbengti hilu nome homawec.

<sup>24</sup> Aime Wapongte yowa sugulelu hikewec.

<sup>25</sup> Aime Banabas nga Sol yeke Yerusalem iwa bole yogo bayackeboc motome, hefaliyelu Antiok hikenogale Yoane wacine monic Mareko men-gockeboc yenge momoc hikeibong.

## 13

### *Banabas nga Solyeke Wapongte bolele hikeiboc*

<sup>1</sup> Yesule habu Antiok gaibong, yengele hewacka Wapongte siduc-mimi ngic nga wewedu momoc yangucti gaibong.

Banabas nga

Simeon, wacine monic Niger, ailu

Lukius, ye Sairini mackacni. Nga

Sol ailu

Manain. Manain ye Herodeholec momoc galu suguleiboc.\*

<sup>2</sup> Aime yenge dameng monicka kpaduckelu nosing-sawe galu Sugucne afeelu kwelec kwecnolu gaibong. Gabong Tili Asudi yowa yanguc edo-cebawec, “Banabas nga Sol yeke nale bole banicte wacepalu bole-yowa yeteiba, yeke bole yogo banicte mimoctocepadaing.” <sup>3</sup> Inguc mime yenge nosing-sawe galu molengineng socnginac lolu milockelu locepalu sale-cepabong hikeiboc.

### *Kpanggec ngic monic Elimas*

<sup>4</sup> Tili Asudi inguc milu salecepame yeke Selusia taonka hauiboc. Iwa haulu lac-wagewa felu hikegacgu Saiparus nucka feiboc. <sup>5</sup> Felu Salamis taon iwa hikelu Yuda ngic-ngigac yengele kpakpaduc macngineng ngiyegacsoc, iwa felu Wapongte yowa miboc yegengkewec. Ailu hikeiboc Yoane yekeholec momoc hikelu baificepawec.

<sup>6</sup> Aime nuc yogowa higedi falocke hikegacgu Pafos macka hikeibong. Iwa hike sulumelu Yuda ngic monic kpanggec bole balu gawec, ailu siduc-mimi ngic kwenesacine gawec, wacine Bara-Yesu, ye bafuwaiboc. <sup>7</sup> Ngic yele agoine kiya monic wacine Segius Polus. Kiya yogo ye ngage-ngaage-motockolec ailu Wapongte yowa ngagenogale aicnrome Banabas nga Sol wacepawec. <sup>8</sup> Wacepame kpanggec ngic, Grik yowawa Elimas wackelu gaibong, yedi kiya ye Sugucne ngagesingkedaickale ailu, Elimasdi yekele yowa kpatalayetewec.

<sup>9</sup> Inguc aime Tili Asudi Sol, wacine monic Pol, yele kwelewa wakeme Elimas dongeinedi ngani-lilickelu yanguc edowec, <sup>10</sup> “Aleng Sugucnengenengte madec, ga Sugucnele yefe dondonne fagac, yogolec ngaba sanangne ailu gaengka kwelegona kwesac nga sowacnedi wakeyackeicne. Ga Sugucnele yefe dondonne faemewa basowalecaigc, dameng dalicne inguc gacaigac. Aibaba yogo mi hegiledamekte, me?” <sup>11</sup> Ilec yakumac Sugucnele tapili gala fikeme nganidamec. Dongegone kundung kweme dameng hewac yago wenac angocene mi nganilu gadamekte.”

Inguc mime iwahac wiyac kundung nga kaguwa ingucnedi dongeine ebeckeme dongeine kundung kweme moledi bangang-tangang ailu moleina babong lec-welec ainale miwec. <sup>12</sup> Aime kiya ye pasi yogo fikeme nganilu Sugucnele Siduc Madicne weducnobong ngagelu mimedec ailu ngagesingkewec.

<sup>12:25:</sup> Sale 11:29-30; 15:37      \* <sup>13:1:</sup> Herode nenggac-mamackecine yeke mac-aling monicte damong. Yeki Manain hole-gumec aicnolu bagaboc sugulewec. Herode yogodi Yoane wehomawec. Siducine Luka 9:7-9 iwa fagac.      <sup>13:2:</sup> Sale 9:15      <sup>13:3:</sup> Sale 6:6      <sup>13:5:</sup> Sale 12:12; 15:39

<sup>13:11:</sup> Sale 9:8

*Pisidia nga Antiok taonka Poldi Yesule siduc mime yegengkeyelewec*

<sup>13</sup> Pol nga ngicfocine yenge Pafos taon hegilelu lac-wagewa hatacmac felu hikegacgu Pamfilia himongka Pega taon iwa hike sulseibong. Sulumelu Yoanedi yeke iwa hegilecepalu Yerusalem iwa hefaliye hikewec. <sup>14</sup> Aime yeke Pega hegilelu hikegacgu Pisidia himongka Antiok taon wa-seine, iwa hikeiboc. Iwa gaboc Sabat dameng aime yeke Yuda ngic-ngigac yengele kpakpaduc macka felu ngiyeiboc. <sup>15</sup> Ngiyeboc kpakpaduc macte damong yenge Wapongte yefe-yowa nga Wapongte siduc-mimi ngic yengele hibi nebcine gocne wafeibong. Wafebong motome yanguc edocepaibong, "Ngic hae-gbakecnonggeng, ngeke mibasanang yowa monic ngage-gabiyecka yowa yogo miboc ngagening."

<sup>16</sup> Inguc mibong Pol ye fangke domalu moledihac waicke ngiyen-tingte ariyelelu yanguc edocebewec, "Israel ngic-ngigac, ngenge nga habu gocene Wapong alang bacnoaigaing, ngenge edocngebabe ngagening! <sup>17</sup> Israel ngic-ngigac nongileng Waponti ngambofocnonggeng bawosaec-cebame yenge Isip himongka kwilic gacgubong Waponti baficebame saweibong. Ailu ye tapilitowaineholecti yogowacni mengocebalu kwesilu <sup>18</sup> himong kisiwa misaine mikac dingong suguwa locebalu ngani-damong ariyelewec. Ailu babibiycebalu gacgume hifa 40 motowec. <sup>19</sup> Motome ye Kenan himongka mac-himong 7te ngic-ngigac wendongebal u ngambofoc-nonggeng himong yogo yeleme filesoc ailu gaibong. Yenge inguc lolicke gabong hifanganineng 450 motowec.

<sup>20</sup> "Motome Kenan himongka gacgubong yeuc mimocto-mimocto ngic bafuwacebame damongebame galu ofecgubong Wapongte siduc-mimi ngic Samuel fikewec. <sup>21</sup> Ngictaunonggeng monic fikena mibong, Waponti Benyaminte alingkacni Kis madecine, wacine Sol, ye bafuwayeleme hifa 40 ngictaungineng ailu gawec. <sup>22</sup> Gacgume ye baickelu ngictaungineng Dawidi lowec. Ailu yele fungine yanguc mime yegengkewec, 'Na Dawidi, Yesile madec, ye nganilu kwelene madickeme ye bawosaebac. Yedi hocne nale yowa sasawa badaicte.'

<sup>23</sup> "Aime yowa yanguc miwec fagac, 'Israel ngic-ngigac nongileng Asababa ngic monic yogo Dawidile aling yengelacni fikedaicte.' Waponti yogo mipangkenolewec, yogolec noine yogo Yesu hocne fikewec. <sup>24</sup> Aime mi fikeemewa Yoane ye Israel ngic-ngigac sasawa kwelengineng hefaliyeme misa-lowac ainingte mime yegengkeme edocebewec. <sup>25</sup> Edocebalu boleine bamotocme motonogale aiyemewa yanguc edocebewec, 'Ngenge ngic ngagegaing yogo, na ye miyac. Ngagegaing, nale lobewa kwsigac, na waweweine ingucnedi yele hige-ebechte mucine lukebe nalic mi madickedaicte.'

<sup>26</sup> "Israel ngic hae-gbafocne, ngambononggeng Abraham ailu ngic-ngigac gocene Wapong alang bacnoaigaing, ngenge yowane mibe ngagening. Bikicte ame babale yefe fagac. Ailu wasecne ainogale, yowa yogo nongileng lowec fagac. <sup>27</sup> Nga Yerusalem ngic-ngigac gagaing, ailu damongfocngi-neng, yenge Yesu mi ngani-motolu ye weningte mimoctoibong. Sabat ngiyeaigaingka damengsoc Wapongte siduc-mimi ngic yengele siduc-yowa yanguc wafe-ngagec aicaigabeleng, yowawa lolu mimoctoibong, yogo noine

fikewec. <sup>28</sup> Foinac, yenge Yesu bikicine basackebibiyelu moc osiyelu Pailatle molewa lobong, yedi mimoctome wehomaningte miibong. <sup>29</sup> Aime Wapongte hibiwa yowa-siducine kwelengkeicne fagac, yenge yogo sasawa aicnolu malicpongkacni bamoctolu dongesiwa bahikeibong. Bahikelu henebe ngicti baicne iwa felu lobong fawec. <sup>30</sup> Aime Wapongti homackacni bagboliyeme fangkewec. <sup>31</sup> Fangkeme ngic-ngigac yeholec Galili prawnswaci Yerusalem taonka hikeibong, yenge momoc hadeng homacne fikeleyewec. Fikeme nganilbong, yenge hocne ye wideckelu Israel ngicngigac edocebaibong gagaing.

<sup>32-33</sup> “Aime Wapongti ngambofocnonggeng molickelu wiyc yelenale mipangkeyelewec, yogo yakumac mimipang yogo adu-madecfocngineng nongilang noine fikewec. I yangucte, Yesu bagboliyewec, yogolec mimipangte Siduc Madicne edocngebababeleng. Yogolec hocne Miti Gee fengngine yaekang iwa yowa yanguc kwelengkeicne fagac, ‘Na yakumac mibe yegengkeme edocgugabac, ga nale Madec, nga na gale Mamac.’

(Mige 2:7)

<sup>34</sup> Ye Yesu bagboliyeme fangkewec. Aime ye lobewa homalu kpelec-kpelec yogo yela hatacmac mi fikedaiete. Yowa yogolec Wapongti yanguc miwec, ‘Na Dawidila mimipang sanangne miiba, yogolec noine mimi-madic gbagbacne milu geledakte.’

(Yes 55:3)

<sup>35</sup> Ailu Miti Gee monicka yowa yanguc fagac,  
‘Ga ngicgone gbagbacne ye hegileengka mi kpeleckelu howacine aidaicte.’

(Mige 16:10)

<sup>36</sup> “Dawidle yanguc ngagegabeleng, Wapongti ye bole micnowec, yogo ngicfocine yengela bamoctolu homawec. Homame ngambofocine locebainbong, iwa longkeibong howacine ailu miyac aiwec. <sup>37</sup> Aime Wapongti ngicbagboliyewec, yedibac howacine mikac.

<sup>38</sup> “Ngic hae-gbafocne yanguc edocngebabe ngagening, Yesu ngagesingkebong Wapongti bikicnginengte ameine hegiledaiete, yowa yogodi ngengela kwesiwec. <sup>39</sup> Aime Wapongte yefe-yowa Mosesdi kwelengkewec, yogodi bikicnginengte ameine baickeme nalic mi miyac aidaicte. Yesu ngagesingkebong bikicnginengte ameine baickeme miyac aidaicte, yogo sugu fagac. <sup>40</sup> Wapongte siduc-mimi ngic yengi yowa yanguc miibong, yogo ngengela sanangkenale ung-yowa edocngebabac.

<sup>41</sup> ‘Ngic-ngigac Wapongte yowa midelec aicaigaing, ngenge nganidaing. Na dameng iwa pasi fulune babe, ngenge yogo nganilu kwattack-elu homadaingte. Monicti edocngebame pasi yogo nalic mi ngagesingkedaingte.’”

(Hab 1:5)

<sup>42</sup> Inguc milu Pol nga Banabas yeke kpakpaduc mackacni wanogale aiiboc. Aime ngic-ngigac yenge Sabat dameng monicka yeke yowa yogohac edocebanicte sanangne milu edocepaiibong. <sup>43</sup> Tutumang motome walu Yuda ngicngigac nga Israel yengele alingkacni miyac homacnedi Yuda ngic-ngigac yengeholec taockelu Wapong afeulu gaibong, yenge momochac Pol nga Banabas balaibecepaiibong. Aime yeki Wapongte kwele-madicka ganingte milasanang aiyeleiboc.

<sup>44</sup> Aime Sabat dameng hatacmac aime taon yogolec ngic-ngigac yenge Sugucnele yowa ngageningte homacnedi kwesiibong. <sup>45</sup> Aime Yuda ngic

yenge yogo nganicebalu Pol nga Banabas hasowac aiyetebong Poldi yowa mime yenge yeholec yowangineng fec-wac aime yowaine hegilelu misulec aicnoibong.

### *Poldi Yuda ngic-ngigac hegilecebawec*

<sup>46</sup> Inguc aibong Pol nga Banabas yeke yowa sanangnehac hangoc mikac yanguc edocebaiboc, "Molickelu Yuda ngic-ngigac ngengela Wapongte yowa mibec yegengkenelewe. Aime yakumacbac ngenge ngengung hegilelu gaga-sanang mi banogale ngagesigaingte noke hegilecngebalu Israel yengele alingkacni miyac, yengela hikedabelete. <sup>47</sup> Sugucnedi bole-yowa yanguc milu notewec,

'Israel yengele alingkacni miyac, yengele angoc ingucne nani locgube hole balu himong sasawa bahikelu yanguc milu gadamec, bikicte ameine babe wasecne aidaingte.'"  
(Yes 49:6)

<sup>48</sup> Inguc mibong Israel yengele alingkacni miyac, yenge yogo ngagelu beliyelu Sugucnele yowa bafelu ngage-angac aibong. Ailu aling gaga-sanang baningte Waponti bawosaecebawec, yogo yenge Sugucne ngagesingkeibong.

<sup>49</sup> Aime mac-himong iwa Sugucnele yowadi sawelu hikewec. <sup>50</sup> Taon yogolec ngigac sugucne gocne yenge Yuda ngic-ngigac yengela taockelu Wapong afeulu gaibong. Yuda ngic yengi mac-damong nga ngigac feicne gocne yogo hung-kwefang aiyelelu baceba hikeibong. Hikebong yengi Pol nga Banabas weyebic aiyetelu himongngineng sebilelu yebicepabong hikeiboc. <sup>51</sup> Hikenogale ailu higenginackocni lube weboc wawec. Yogo aiba-bangineng sowacne edalicebanogale ailu hegilecebali Aikoniam taonka hikeiboc. <sup>52</sup> Aime mic-tengtengfocene yengele kwelewa Tili Asudi wakeme beliyeibong.

## 14

### *Pol nga Banabas yeke Aikoniam taonka hikeiboc*

<sup>1</sup> Yeke Aikoniam taonka hikelu iwa inguchac Yuda ngic-ngigac yengele kpakpaduc macka felu Siduc Madicne tapiliineholec miboc yegengkewec. Aime Yuda ngic-ngigac nga Grik ngic-ngigac homacnedi Yesu ngagesingkeibong. <sup>2</sup> Yuda ngic-ngigac gocne yenge yowa yogo hegilelu Israel yengele alingkacni miyac yogo yenge kpafengebaibong. Inguc ailu yengi ngic haegbafoengineng ngage-ngagesingkolec aalic ngageyeleibong. <sup>3</sup> Aime yeke sanangkelu dameng dalicne taon iwa galu hangoc mikac Sugucnele yowa tapiliineholec milu gaiboc. Aime Sugucne yeuctihac kwele-madicinele yowa basanangkenale ailu nenggac ngiyeyeteme yeke ngagesingkeningte pasile maaine nga pasi mi ngani-nganiine homacne balu gaiboc.

<sup>4</sup> Inguc aiboc taon yogolec ngic-ngigac siyeckelu gocne yengi Yuda ngic-ngigac yengeholec domaibong. Nga gocne yengi salecebaicne yekeholec domaibong. <sup>5</sup> Aime Israel yengele alingkacni miyac nga Yuda ngic-ngigac gocne yenge damongfocngineng yengeholec salecebaicne kindololo aiyetelu posadi wickelu holecepanogale yowa hefeibong. <sup>6</sup> Hefebong yeke yogo ngagelu hangoc Likonia himongka hikeiboc. Hikelu iwa Lista nga Debe nga mac-himong gocne bangkacne fahikewecka <sup>7</sup> Siduc Madicne miboc yegengkeme gaiboc.

### *List aonka pasi tapiliineholec baiboc*

<sup>8</sup> Lista taonka ngic monic ngiyewec, ye higekcine yaeckang sowaleicne. Ye nenggacte gobe kwelinacni ingucne fikelu lec-welecine mikac moc ngiyelu gawec. <sup>9</sup> Ngiyeme Poldi Siduc Madicne edocebame ngic ye ngagelu ngiyeme dongeine yela dondonne hila nganilu yanguc ngagewec, “Ngic yogo ye madickenale ngagesingkegac.” <sup>10</sup> Inguc ngagelu yowa tapiliineholec yanguc edowec, “Ga fangkelu hong domac.” Inguc mime ngic ye fangke wintackelu lec-welec aiwec.

<sup>11</sup> Aime ngic-habutowadi yenge Poldi pasi bawec, yogo nganilu Likonia yowanginang yefe sugucne hac wackelu yanguc miibong, “Wapong gocne yenge ngic nongileng ingucne ailu hewacnonggang walu gagaing.” <sup>12</sup> Inguc milu Banabas ye wapong monic wacine Sus wackeibong. Nga Pol ye yowa mimi ngic. Ilec ailu wapong monic wacine Hemes wackeibong. <sup>13</sup> Aime wapong monic Sus ye ibu-macie na emeina ngiyewec. Yele depec-baba ngicti mime yenge bulumaka ngicne gocne nga daling ayangineholec baibong. Balu taon mecenele oda nuina felu ngic yaec alang bayetelu depec bayetenogale aiibong.

<sup>14</sup> Depec bayetenogale aibong salecebaicne yeke yogo ngagelu kwe-lenginec umalewec. Umaleme ngakpinginec balockelu mac hegilelu habu yengele hewacka hikelu yanguc wackeiboc, <sup>15</sup> “Ngic-ngigac yago, ngenge oma wiyc ainqogel aigaing? Noke ngicbenang ngenge ingucne hac. Ngenge siduc-gbongngineng babaficine mikac gagaing, yenge lobe holeyelening. Noke Wapong gagaineholetec Siduc Madicne mibec yegengkenelegac. Yedi sawa nga himong ailu kiwec nga wiyc sasawa haicina monic-monic fayackegac, yogo bafuwawec. <sup>16</sup> Himongne himongne ngic-ngigac esecne gaibong, yenge ngageyeleme angacnginengte gaga haicina monic-monic, yogolec aka mi holeyeleme gaibong. <sup>17</sup> Gaofebong ye kpaoma monic mi aiyelewec, miyc. Ye kwele-madicka gaganginengte ailu mime sawawacni mac nga wenac damengnginect fikecaigac. Ailu ye noba-nosing damengngine mime fikecaigac. Ailu nosingngineng homacne fikengeleme angac feina gagaing.” <sup>18</sup> Ngic yaec yeke inguc milu yowa-bole sugucne hac bagacgu miweloc aiyele-boc depec bayetenogale aiibong, yogo hegileibong.

### *Pol posadi wickelu holeibong*

<sup>19</sup> Aime Yuda ngic Antiok nga Aikoniam taonkacni kwesilu yekele bole basowaleibong. Ailu ngic-ngigac kwelelengineng kwefangkebong, yenge momoc Pol posadi wickelu holeibong. Holelu ngageibong, “Ye biyac homagac.” Inguc milu taon lobina fulucke haulu lobong fawec. <sup>20</sup> Faemewa mic-tengtengfocene yenge kwesilu lolice domabong fangkelu taonka fewec. Aime mac saeme ye Banabasholec Debe taonka hikeiboc.

### *Macsoc lolickelu Antiok taonka hikeiboc*

<sup>21</sup> Hikelu iwa Siduc Madicne miboc yegengkeme ngic-ngigac homacnedi Yesu ngagesingkeibong. Aime yeke hatacmac hikeibocka yefe hefaliyu Lista nga Aikoniam ailu Antiok taon yogo yengela hikeiboc. <sup>22</sup> Hikelu iwa macsoc mic-tengtengfocene kpaducebalu ngage-ngagesingkolec ganingte mibasanang aiyeleiboc. Aiyelelu yanguc sanangne edocebaiboc, “Nongileng Wapongte ngani-damongka fenogale aibeng, doic haicina monic-monic fikenoleme ilec kwelina gadabelengte.” <sup>23</sup> Ailu taon moniyang moniyangka Yesule habu gaibong, yengele damongfocngineng bawosaecibaiboc. Ailu

ngic-ngigac Yesu ngagesingkeibong, yengele ailu nosing-sawe galu milock-elu Sugucnele molewa locebaiboc.

<sup>24</sup> Inguc ailu yeke Pisidia himong falockelu hikegacgu Pamfilia himongka hikeiboc. <sup>25</sup> Iwa hikelu Pega taonka yowa edocebalu Atalia taonka hauboc. <sup>26</sup> Haulu lac-wagewa felu Antiok iwa hefaliye hikeiboc. Taon iwa hocne Yesule habu yengi molickelu Wapongte molewa locepabong bole milu edocepwec, yogo iwa hikelu bamoctoiboc. <sup>27</sup> Iwa kwesi sulumelu Yesule habu kpaducebaboc Wapongti molenginac pasi bame bole baiboc. Aime Israel yengele alingkacni miyac, Wapongti yengele yefe bayeleme Yesu ngagesingkeibong, yogolec siduc edocebayackeiboc. <sup>28</sup> Ailu yeke Antiok iwa dameng dalicnehac mic-tengtengfocene yengele hewacka gaiboc.

## 15

### *Yowale Yerusalem feibong*

<sup>1</sup> Yudeya himongkacni ngic gocne yengi Antiok taonka haulu ngic haebafocngineng yanguc weduyeleibong, "Ngenge Mosesle yowa hegilebong soc tofangineng mi helockedalingtewa, bikicte ameine bame wasecne nalic mi aidaingte." <sup>2</sup> Inguc milu Pol nga Banabas yekeholec yowangineng fec-wac aime kwele-moniyang mi aibong. Inguc aigacgu Yesule habu yengi Pol nga Banabas ailu ngic gocne bawosaecebaibong. Bawosaecbabong Yerusalem iwa hikelu habu yengele damongfocngineng nga salecebaicne yengeholec yowa yogo madickenale miibong. <sup>3</sup> Ailu Yesule habu yenge yefeleya wiyc yelelu salecebabong hikeibong. Hikelu Fonisia nga Samaria prowinswa hike sulumelu ngic hae-gbafocngineng iwa gaibong, yenge yanguc edocebaibong, "Israel yengele alingkacni miyac homacnedi kwele-hefaliye aigaing." Inguc mibong, yenge yogo ngagelu beliyebenangkeibong. <sup>4</sup> Aime yenge hikegacgu Yerusalem sulumebong Yesule habu nga salecebaicne ailu Yerusalem habu yengele damongfocngineng, yengi macka locebaibong. Aime Pol nga Banabas yeke Wapongti molenginac pasi bame bole baboc noine fikewec, yogolec siduc bayeleiboc.

<sup>5</sup> Aime Farisaio yengele alingkacni gocne yengi Yesu ngagesingkeibong, yengi fangkelu yanguc miibong, "Israel yengele alingkacni miyac yenge soc tofangineng helockedaling." Ailu Wapongte yefe-yowa Mosesdi kwelekgewec, yogo balaibedaing."

### *Pitadi ngage-ngagesingte yowa edocebawec*

<sup>6</sup> Inguc mibong salecebaicne nga damong yengi sugu kpaduckelu yowa yogo yengilangkac mingagec aibong. <sup>7</sup> Migacgu Pitadi fangkelu yanguc miwec, "Ngic hae-gbafocne, Israel yengele alingkacni miyac, yenge nale mickacni Siduc Madicne ngagelu ngagesingkeibong. Yogolec Wapongti esecnehac nongileng hewackacni bawosaecnuwec, yogo ngagegaing." <sup>8</sup> Wapong ye kwelewa ngani-nganidi esecne Tili Asu nolewec, yogo ingucnehat Israel yengele alingkacni miyac, yengele angackewecte yelewec. <sup>9</sup> Nongileng ngagesingkeibeng, ingucnehat yenge ngagesingkeibongte Wapongti kwelelengineng suweyackewec. <sup>10</sup> Aime ngenge omale Wapong kwsackelu yefe-yowaine yogo mic-tengtengfocene yengele feiwa lonogale aigaing? Yogo nalic mi aidaingte. Ngambofocnonggeng nga ngesafocnonggeng ailu

nongileng yogo aibibiyelu kpungkeibeng.<sup>11</sup> Ailu yanguc ngagesingkegabellen, 'Sugucne Yesudi kwele-madic ailu Yuda ngic-ngigac nga Israel yengele alingkacni miyac, nongileng momoc bikicte ameine bame wasecne aidabelengte.'

<sup>12</sup> Inguc mime habu sugucne yenge moc sugu ngagelu ngyiебong. Aime Pol nga Banabas yeke Wapongti molenginac pasile maaine nga pasi mi ngani-nganiine bawec, yogolec siduc aiiboc. Israel yengele alingkacni miyac yengi ngagesingkeningte ailu, bole baboc pasi haicine monic-monie fikewec.

### *Yakobosdi umacte yowa edocebawec*

<sup>13</sup> Siduc aiyeleboc motome Yakobosdi yowa yanguc edocebawec, "Ngic hae-gbaфcne, mibe ngagening. <sup>14</sup> Wapongti molickelu Israel yengele alingkacni miyac, yengelacni ngic-ngigac bacebame yele aling ainingte yefe bafuwawec.\* Yowa yogolec Saimonti mime yegengkeme ngageibong.

<sup>15</sup> Aime yele yowadi Wapongte siduc-mimi ngic yengele yowaholec andohac aiiboc. Ngagegaing, Wapongte hibiwa yowa yanguc kwelengkeibong fagac,<sup>16</sup> "Nani lobewa gacgu hefaliyelu Dawidile mac-bala<sup>†</sup> hatacmac bagboliyelu basanangkedacte. <sup>17</sup> Aime ngic gocne yengi Sugucne na wacke-basac ainelelu ngagecnudaingte. Aime Israel yengele alingkacni miyac, yenge inguchac alingfocne aidaingte." <sup>18</sup> Sugucne ye esecnebenang yowaine inguc miwec."

<sup>19</sup> "Ilec ailu yanguc mimoctogabac, Israel yengele alingkacni miyac, yenge kwelengineng hefaliyelu Wapongta lobong, umac mi yelenoga.

<sup>20</sup> Yanguc sugu mipangkelu hibi kwelengkeyelenoga, ngic-ngigac yenge siduc-gbongginengte depec milu sic wecebacaigaing, sic ingucne yogo wonongkolec, hegiledaing. Ailu selo-boic aibaba mi aidaing. Nga bec-sic ubaina mutci fuluckebong asuine kwedickeme homaicne, yogolec biucine mi nodaing. Ailu sac mi nodaing. <sup>21</sup> Yenge Mosesle yowa yogo biyachac ngageibong. Nga yogo esecne biyachac Yuda yenge molickelu taonsoc edocebalu weduyeleibong. Ailu yanguctihac Sabat damengka kpakpaduc macnginangsoc wafe-ngagec aicaigaing."

### *Israel yengele alingkacni miyac, yengele hibi*

<sup>22</sup> Aime salecebaicne nga damongfocngineng ailu Yesule habu sasawa, yenge ngagebong yogo nalic aiwec. Aime ngic hae-gbaфcngineng yengelacni ngic micne yaekang bawosacepaiibong, monic wacine Yudas, yele wacine monic Basabas, ailu Sailas. Bawosacepabong yeke Pol nga Banabas yekeholec momoc Antioh taonka hikenogale salecepaiibong. <sup>23</sup> Ailu hibi monic yanguc milu kwelengkelu yetebong hikeiboc.

Nonge salecebaicne nga ngic hae-gbaфcngineng ngage-  
ngagesingkolec yengele damongfocnginengti hibi yago kwelengkegabeleng. Yogo Israel yengele alingkacni miyac, ngenge Antioh nga Siria ailu Silisia himongka gagaing, agofocnonggeng ngage-  
ngagesingkolec ngengele hibi yago longelegabeleng.

Wenac-madic.

<sup>24</sup> Nongelacni ngic gocne yenge nongi mi salecebabeng ngengela fulu yowa edocngebalo ngage-  
ngagengineng basifuwebong ngageboc aibong, siducngineng ngagelabeleng. <sup>25</sup> Nonge yogo ngagelu kwele-moniyang

<sup>15:10:</sup> Mat 11:30; Gal 3:10    <sup>15:11:</sup> Gal 2:16; Efs 2:5-8    <sup>15:13:</sup> Gal 2:9    \* <sup>15:14:</sup> Yefe yogo Konelius macka molickelu fikewec. † <sup>15:16:</sup> Dawidile mac-bala yogo Dawidi gbolifocene yengele migac.

ailu ngic yaeckang bawosaecipaibeng. Ailu Banabas nga Pol yekele kwe-lonenggengti angac ngagelu, yekeholec salecepabeng fugabiyc. <sup>26</sup> Ngic yeke hocne Sugucnenonggeng Yesu Kristo, yele ailu gaganginecte ngage-boc mi ailu gaiboc. <sup>27</sup> Nonge Yudas nga Sailas bawosaeccepabeng, yeki fullo yowa yogo micnginackocni miboc yegengkeneleme ngagedaing. <sup>28</sup> Tili Asudi nongebolec gagacte ailu umac gocne feinginang mi lono-gale ngagebeng madickegac. Ngenge yefe-yowa yago sugu balaibepong madickedaict. <sup>29</sup> Ngic-ngigac yenge siduc-gbongfocngineng yengel de-pekte sic wecaigaing, ngenge yogo hegiledaing. Ailu bec-sic ubeina multi fuluckebong asuine kwedickeme homaicne, yogolec biucine mi nodaing. Ailu sac mi nodaing. Ailu selo-boic aibaba mi aidaing. Ngenge yogo sasawa hegileyackebong madickedaict.

Ailu ngenge kwele-madicka gadaing.

### *Yudas nga Sailas yeke mibasanang aiyelelu hefaliye hikeiboc*

<sup>30</sup> Aime habu yenge ngic yogo salecebabong Antiok hikeibong. Hike sulumelu Yesule habu Antiok gaibong, yenge kpaducebalu hibi yogo yelei-bong. <sup>31</sup> Yelebong yenge baba-sanang hibi yogo nganilu wafelu beliyebong. <sup>32</sup> Ailu Yudas nga Sailas yeke Wapongte siduc-mimi ngic galu yowa homacne milu ngic hae-gbafocngineng kwelengineng kwefangkelu mibasanang aiyelelu gaiboc. <sup>33</sup> Inguc aigacgu damengnginec motome ngic hae-gbafocngineng yengela hikenogale aiboc kwele-mogung yowa ameine aiyetebong hikeiboc. <sup>34</sup> [Aime Sailasdibac iwa ganogale ngagewec.]‡

### *Pol nga Banabas yeke siyeckeiboc*

<sup>35</sup> Pol nga Banabas yeke Antiok taonka bolenginec hatacmac taock-elu balu gaiboc. Aime ngic homacnedi yeke baficepabong Sugucnele yowa ngic-ngigac edocebalu weduyelelu Siduc Madicnele fungine mibong yegengkewec. <sup>36</sup> Gacgu Poldi Banabas yanguc edowec, “Nokilec hatacmac hefaliye hikelu ngic hae-gbafocnonggec Sugucnele yowa taonka esecne mibec yegengkeme ngagebong, yenge wenuc gagaing, yogo hikelu ngani-ngagec aiyelenac.” <sup>37</sup> Inguc mime Banabas ye Yoane, wacine monic Mareko, ye momoc hikeninge miwec. <sup>38</sup> Mareko ye molic-molic yekeholec Pamfilia himongka hikecgu bole hegilelu hikewelete ailu Poldi yeholec hikeninge ngageme mi madickewec. <sup>39</sup> Inguc ailu Banabasholec yowanginec fec-wac aime hegilelu siyeckeiboc. Banabas ye Mareko bame hikelu lac-wagewa felu Saiparus nucka hikeiboc. <sup>40</sup> Nga Pol ye Sailas bame hikenogale miboc, ngic hae-gbafocngineng yengi “Sugucnele kwele-madicti ngekela fadaic” mibong hikeiboc. <sup>41</sup> Yeke Siria nga Silisia himongka lolickelu Yesule habu mibasanang aiyeleiboc.

## 16

### *Poldi Timoti bame hikeibong*

<sup>1</sup> Pol ye hikecgu Debe nga Lista taonka hikelu sulumewec. Aime Lista iwa mic-tengteng ngic monic gawec, wacine Timoti. Ye nenggacine Yuda ngigacti Yesu ngagesingkelu gawec. Nga mamacine ye Grik ngic. <sup>2</sup> Aime ngic

**15:28:** Mat 23:4   ‡ **15:34:** Hibi esecne Lukadi kwelengkewec, yogo nganilu iwacni kwelengke-bong kwelengkebong ofewec, yengelacni gocne hewacine 34 iwa mi fagac. Ngic-ngigac yenge hibi kwelengkeicne yogo wosaelu nganibong Lukadi mi kwelengkewec mecne.   **15:37:** Sale 12:12,25

**15:38:** Sale 13:13; Kol 4:10   **16:1:** Sale 14:6; 2Tim 1:5

hae-gbafoengineng Lista nga Aikoniam taonka gaibong, yengi Pol yanguc edoibong. "Timoti ye aibabaine madicne." <sup>3</sup> Inguc edobong Poldi yeke momoc hikenicte micname nalic miwec. Aime Yuda ngic-ngigac himong iwa gaibong, yenge Timoti mamaccine ye Grik ngic, yogo ngageyackegaing. Ilec Timoti madicne ngagecnoningte Poldi soc tofaine helockewec. <sup>4</sup> Aime yenge taon sasawa lolickelu hikeibong. Hikelu salecebaicne nga habu yengele damongfocngineng yefe-yowa Yerusalem iwa milu hefeibong, yowa yogo balaibeningte Yesule habu edocebala edocebala hikeibong. <sup>5</sup> Yenge bole inguc babong Yesule habu yengele ngage-ngagesing sugulewec. Aime damengsoc ngic-ngigac yenge habu yengela hikelu taockebong homacne aiibong.

### *Masedonia ngic gung-didicka ingucne nganiwec*

<sup>6</sup> Yenge Asia prowinswa yowa mibong yegengkedaickale, Tili Asudi kpatalayeleme Frigia nga Galata himong mochac falockelu hikeibong. <sup>7</sup> Hikelu Misia himong nga Asia prowins hewacnginac domalu Bitinia himongka hikenogale mibong, Yesule Asudi aka holeyelewec. <sup>8</sup> Ilec yenge Misia himong ewalilu hikegacgu Toas taonka hauibong. <sup>9</sup> Iwa haulu deboc yowahac Poldi yowa gung-didicka ingucne yanguc nganiwec. Masedonia ngic monicti yela fike domacnolu yanguc edolu dogbac aicnogac, "Ga kiwec falockelu Masedonia prowinswa kwestiu baficnubanong." <sup>10</sup> Pol ye wiyc yogo nganilu Wapongti nonge Masedonia prowinswa hikelu Siduc Madicne mibeng yegengkenale wacnubagac. Inguc ngage-motolu Toas hegilelu hikenogale efeckeibeng.

### *Lidia golowacfocine ngagesingkeibong*

<sup>11</sup> Aime nonge lac-wagewa felu Toas hegilelu falocke hikcgu Samotres nucka sulumeibeng. Mac saeme yogowacni hikegacgu Neapolis taonka sulumeibeng. <sup>12</sup> Nonge iwa lac-wagewacni walu hige-yefe hikegacgu Filipai taonka sulumeibeng. Yogo Masedonia prowins sugucne yogolec taon sugucne. Roma ngic<sup>†</sup> yengi esecne himong yogo balu gaibong.

Aime taon iwa hadeng gocne gaebengka <sup>13</sup> Sabat dameng aiwec. Aime taonte odale nu emeina misa monic fawec, iwa yanguc milu hauibeng, "Yuda ngic-ngigac milockeagaing, yengele lamec monic misa mecina fagac me miyac, yogo haulu nganinang." Inguc milu haulu ngigac kpaduckelu gaebongka bafuwacebalu iwa yengeholec wangiyelu yowa-siduc aiibeng. <sup>14</sup> Yengele hewackacni ngigac monic Taiataira taonkacni wacine Lidia, ye kpoluc mondo-sasac ingucne fuli balu salecaigac. Ye Wapong afeecaigac, aime Sugucnedi kweleine bafaliyeme Polle yowa hedec kwelu ngagewec. <sup>15</sup> Ailu yeicne nga golowacfocine yenge momoc misa-lowac aiibong. Ailu yanguc milu edocnubawec, "Ngenge ngagebong na Sugucne foinac ngagasingkegabacka, nale macka ofelu naholec ngyie-fac aining." Inguc milu dogbac aime feibeng.

### *Pol nga Sailas muc-macka locepaibong*

---

\* **16:2:** Filp 2:19-22    **16:3:** Timoti nenggacine ye Yuda ngigac. Ilec Timoti Yuda ngic aigac, yengele aibaba inguc fagac. Yuda ngic monicti soc tofaine mi helockedaitewa, Yuda ngic-ngigac sasawa yele ngage-sowaledaingte.    **16:4:** Sale 15:23-29    **16:6:** Sale 18:23    <sup>†</sup> **16:12:** Roma gamang ye tapiliineholecte ailu himong homacne damongbalu gawec.

<sup>16</sup> Dameng monicka milockelu gaibeng, iwa hatacmac haubeng kwelecadu monicti yefewa bafuwacnubawec. Adu ye alengkolecti galu ngicingigac yengela wiyac lobewa fikeyeledaict, yogo edocebalu gawec. Ye bole yogo inguc balu game sugucnerefocine yenge moneng sugucne bafuwayelelu gawec.<sup>‡</sup> <sup>17</sup> Adu yedi bafuwacnubalu Pol ngama nonge balaibecnubalu wackelalu aukwelu yanguc miwec, “Ngic yago yenge Wapong Cifnetowa, yele kwelecek kwekwe aigaing. Ailu bikicte ameine bame wasecne ainingte miwec, yenge yefe yogo edocngebacaigaing.” <sup>18</sup> Ye aibaba yogo hadengsoc ainolelu game Pol ye yogolec soc sisic aicnome hefaliyelu aleng yanguc edowec, “Na Yesu Kristole wacka sanangne edocgugabac, ga adu yago hegilelu hikec.” Inguc mime ye adulacni ofelu hikewec.

<sup>19</sup> Hikeme adu sugucnerefocine yenge moneng balu gadaingte, yogo ngagebong miyac aiyeledaict. Ilec ailu Pol nga Sailas kiya yengele mac-sobengka yowawa locepanogale fulucepalu hikeibong. <sup>20</sup> Hikelu kiya yengela locepalu yanguc miibong, “Yeke Yuda ngic macnonggang fofouc bafuwalu ngiengnyenonggeng basowalecaigabiyc. <sup>21</sup> Ailu aibaba gocne fulune Roma ngic nongilengti mi ainangte aka-yowa miicne fagac, aibaba yogo hocne balu ganangte edocnubalu gagabiyc.”

<sup>22</sup> Inguc mibong ngic-habu sugucnedi aalic sugucne ngageibong. Ailu kwele-moniyang aiybongka kiya yengi mibong ngakpinginiec dacineholec hemoctoilbong. Hemoctolu hududi wecepaibong. <sup>23</sup> Muc-hududi homacne weloc-kwallocepalu muc-macka locepaibong. Ailu damongti nu sanangne holelu madicnebenang damongepanale sanangne edoibong. <sup>24</sup> Yowa sanangne inguc milu edoibongte ailu ye muc-mac kweline monicka locepalu higenginiec yoc heuckeicna lome hifidacepame ngiyeiboc.

### *Muc-mac damong misa-lowac aiwec*

<sup>25</sup> Debock hewacina Pol nga Sailas yeke gee holelu Wapong milockebioc. Inguc aiboc muc-macka ngic gocne hedec kwelu ngageyeteibong. <sup>26</sup> Ngageyeteebongka, iwashac memeya sugucne tapiliineholecti balu muc-mac yogo kpendaeme nuine angkeyackewec. Ailu ngic-ngigac sasa wa molenginang sen fotockeyackewec. <sup>27</sup> Aime muc-macte damong ye gungkacni kwatacke fangkelu nganime nu angkeyackelu domame yanguc ngagewec, “Muc-macka ngic hikeyackegaing.” Inguc ngagelu hudule fitecine fuluckelu kwenagunale aime, <sup>28</sup> Poldi sugucnephac wackelu miwec, “Ga sogone mi sibilickec, nonge sasawadi ngiyegabeleng.”

<sup>29</sup> Inguc mime damong ye alingfocine edocebame hifa lacnobong balu hangoc-hangocka mac kwelina felu Pol nga Sailas yekele higewa wawelu fawec. <sup>30</sup> Ailu fangkelu mac kwelinaci mengocepia haulu uwayetewec, “Ngic yaec sugucnekecne, na wenuc ailu wasecne aidacte?”

<sup>31</sup> Inguc mime yeki yanguc edoiboc, “Ga nga golowacfocgone ngenge Sugucne Yesu Kristo ngagesingkebong yedi bikicte ameine bame wasecne aidaingte.” <sup>32</sup> Inguc milu Sugucnele yowa yogo ye nga golowacfocine edocebaiboc. <sup>33</sup> Aime deboc yogowahac damong ye macka fangke felu socnginiec welockeibong, yogo suwe-ebec aiyetewec. Dameng yagowahac yeicne nga alingfocine yenge misa-lowac aiyackeibong. <sup>34</sup> Lowabong motome yeicne mac kwelina locepalu mime nosing madicne lobelu yetebong noiboc. Aime

<sup>‡ 16:16:</sup> Ngicti bec-hoda fuli bacaigabeleng ingucne adu yogo fuli baibong. Dameng iwa yengela aibaba ingucne fawec. <sup>16:17:</sup> Mrk 1:24 <sup>16:20:</sup> Mrk 13:9 <sup>16:22:</sup> 2Kor 11:25; 1Tim 2:2

<sup>16:27:</sup> Sale 12:18-19 <sup>16:30:</sup> Sale 2:37

ye nga golowacfocine yenge Wapong ngagesingkeibongte kwelengineng madickeme belic-belic aibong.

### *Muc-mackacni locepabong waiboc*

<sup>35</sup> Mac saeme kiya yengi ngic yaeckang lukeyeteninge muc-mac damong yela lebe-ngic salecebaibong. <sup>36</sup> Salecebabong damonti yowa yogo ngagelu Pol yanguc edowec, “Na locngepabe hikenicte kiya yengi yowa lobong kwasigac. Ilec ngeke wahikelu kwele-mogungkolec gadabiyec.”

<sup>37</sup> Inguc mime Poldi yanguc edowec, “Noke Roma ngic-ngigac yengele alingka taockelu gabec, yenge funginenonggjec mi ngagelu ngic-ngigac haicka moc hududi wecnupalu muc-macka locnupabiyeng. <sup>38</sup> Aime yabac sangke-sangke salecnupaninge ngagegabiyeng, me? Yogo miyachenang! Yenge yengung kwesilu mengocnupabong hikedabelec.”

<sup>38</sup> Aime Pol ye yowa inguc mime lebe-ngic yenge hefaliye hikelu kiya yowa yanguc edocebaibong, “Ngic yeke Roma ngic-ngigac yengele alingkacnidu gagabiyec.” Inguc mibong yenge siduc yogo ngagelu damuebame hangoc aibong. <sup>39</sup> Ailu ngic yaec yekela welelu mibakoloc aiyetelu muc-mackacni menocepa waibong. Walu taon hegile hikenicte sanangnehac edocepaibong. <sup>40</sup> Inguc mibong yeke muc-mackacni walu Lidia yele macka felu ngic hae-gbafocngineng nganicebalu mibasanang aiyelelu hikeiboc.

## 17

### *Tesalonika taonka hikeiboc*

<sup>1</sup> Pol nga Sailas yeke Amfipolis nga Apolonia taon falockelu Tesalonika taonka hikeiboc. Aime iwa Yuda ngic-ngigac yengele kpakpaduc mac monic ngiyewec. <sup>2</sup> Aime Pol ye Sabat damengka aibaba aicaigac, inguc ailu kpakpaduc macnginang felu Sabat dameng habackang yengeholec Wapongte hibiwa yowa fagac, yогоlec mingagec aibong. <sup>3</sup> Inguc ailu Wapongte hibiwa yowa yanguc fagac, yого mime yegengkeme nganibong yanguc miwec, “Mesia ye doic sugucne ngagegacgu homalu hatacmac gboliyelu fangkedaiete, yого Wapongte hibiwa micne fagac. Mesia yого ye Yesu hocne, yого mibe yegengkecaigac.” <sup>4</sup> Ye inguc sanangne mime Yuda ngic-ngigac gocne yenge ngage-motolu Pol nga Sailas yekela taockebong. Aime Grik ngic-ngigac Wapong afeelu gacaigaing, ailu ngigac sugucne yenge homacnedi yekela taockebong.

<sup>5</sup> Aime ngic homacnedi Siduc Madicne ngagebong Yuda ngic yenge hasowac aiyelelu maket sobengka hikelu kindololo ngic wacebaibong. Wacebalu taonka kwele-dac bafuwayelebong hendolong sugucne fikeme Yesonte macka Pol nga Sailas yeke ngiyecaigaic, mac iwa kpaduckeibong. Ailu ngic yaec bacepalu yengele molewa locepanogale miibong. <sup>6</sup> Milu basacepalu Yeson nga ngic hae-gbafocngineng gocne fulucebalu macte ngic micne yengele haicka bacebalu hikeibong. Hikelu yanguc milu aukwela aukwela hikeibong, “Himongne himongne ngic kwele-dac kwefangkeyelelu gagaing, ngic yago hocne nongilang ingucne hac kwasigaing. <sup>7</sup> Aime Yesonti mac holeyeleme ngiyegabiyeng. Yenge Ngictau Sisale yefe-yowa welu ngictau fulune monic wacine Yesu, milu gagabiyeng.” <sup>8</sup> Yenge yowa inguc milu ngic-ngigac ailu ngic micne kwelengineng kwefangkeibong. <sup>9</sup> Inguc aime

§ 16:37: Ngic monic ye Roma ngic gagacka yenge moc welu muc-macka mi lodaingte. Roma yengele yefe yogo fawec.      17:7: Luk 23:2; Yoa 19:12

damong yenge Yeson nga agofocine aiyelebong socnginengte ailu monengti asa balu moneng lobong hegilecebabong hikelbong.

### *Berea taonka hikeiboc*

<sup>10</sup> Mac deboleme ngic hae-gbafoengineng yenge iwahac Pol nga Sailas Berea taonka salecepabong hikeiboc. Hikelu iwa Yuda ngic-ngigac yengele kpakpaduc macka felu Siduc Madicne miiboc. <sup>11</sup> Miboc taon yogowacni Yuda ngic-ngigac yenge aibabangineng nga gagangineng madicne gaibong. Nga Tesalonika yengele aibaba ingucne miyac. Yogolec mic-yowa kwele-efeka homacne hac ngagelu angacebawec. Ailu yowanginec kwesacine me noine milu hadengne hadengne Wapongte hibiwa wafelu ngage-wosaec ailu gaibong. <sup>12</sup> Ilec ailu Yuda ngic-ngigac yengelacni homacnedi Yesu ngagesingkeibong. Aime Grik ngic-ngigac sugucne homacnedi yekela taock-eibong.

<sup>13</sup> Taockebong Poldi Berea taonka Wapongte yowa mime yegengkeme siduc yogodi hikeme Yuda ngic-ngigac yenge Tesalonika iwa galu ngageibong. Ngagelu Berea hikelu habu sugucne yogo misowalecebalu kwe-lengineng kfewangkeibong. <sup>14</sup> Inguc aibong ngic hae-gbafoengineng yenge iwahac Pol dingongka salebong hauwec. Aime Sailas nga Timoti yeke Berea iwa gaiboc. <sup>15</sup> Aime ngic yenge Pol mengocke hikcgu Atens taonka loibong. Lobong ye Sailas nga Timoti yeke biyac kwesinictie edocebame ngic yenge hefaliye hikeibong.

### *Atens taonka Wapongte fungine mime yegengkeyelewec*

<sup>16</sup> Pol ye Atens taonka yekele wangec gawec. Aime siduc-gbongti wakeicne ngyi-legaing, ye yogo nganilu kwele-sowac sugucne ngagewec. <sup>17</sup> Ailu ye Yuda ngic-ngigac yengele kpakpaduc macka fewec. Felu Yuda ngic-ngigac yengileng nga Grik ngic-ngigac gocne Yuda ngic-ngigac yengela taockelu Wapong afeelu gaibong, yogo yenge momoc Siduc Madicne mingagec aii-bong. Aime ye inguchac hadengne hadengne maket sobengka hikelu ngic ngyiibong, yengeholec Siduc Madicne mingagec ailu gawec.

<sup>18</sup> Aime taon iwa gagale fungine ngage-ngage ngic-habu yaeckang gaibong, wacnginec Epikurus nga Stoik.\* Ngic yogo yenge Polholec yowanginengti fec-wac ainaguibong. Aime Pol ye Yesule siduc nga homackacni gboliyelu fangke-fangkele yowa yogo mime yegengkewec. Ilec gocne yengi Polle yanguc miibong, “Ngic yogo ye hocne yeuctihac yowa minogale aicaigac, yogo mi ngagegabeleng.”

Inguc mibong gocne yengi yanguc miibong, “Ye wapong fulune gocne yengele yowa micaigac.” <sup>19</sup> Inguc milu sobeng sugucne monic wacine Areopagus iwa mengocke felu miibong,† “Ga yowa fulune micaigic, yogo nalic edocnubadamecte. <sup>20</sup> Yowa yogo hedecnonggang fulune ngagegabeleng. Ilec ga fungineholec miyengka ngagenangte ainolegac.” <sup>21</sup> Atens macfile ngic-ngigac nga kwilic ngic-ngigac sasawadi, yenge yowa-siduc fulune ngagelu yowa yogo sugu mingagec ailu siduc homacne milu gaibong.

<sup>22</sup> Inguc aime Pol ye Areopagus tutumang hewacnginang fangke domalu ngic yanguc edocebawec, “Atens ngic, na wiyac sasawa nganilu fungineng-neng yanguc ngani-motogabac. Ngenge siduc-gbong haicine monic-monics

---

\* <sup>17:17:</sup> Sale 18:19    <sup>17:18:</sup> Epikurus habu yenge yanguc ngagelu gaibong, gaga fungine i yanguc, angac madicne bafuwalu doic nga hangoc hegiledaing. Stoik habu yenge yanguc ngagelu gaibong, ngic yenge himongte wiyac sasawa fayackegac, yogolec kwele-moniyang ailu yengileng angac bawalu ngage-ngage madicna sanangkelu gadaing. † <sup>17:19:</sup> Areopagus sobeng iwa kpatulelu yowa haicine monic-monics mingagec aii-bong.

homacne alang bacebalu aibaba haicine monic-monie bagagaing.<sup>23</sup> Na taonnginang hikelu siduc-gbongfocngineng nganicebaiba. Yogowa alata monicka hibi yanguc kwelengkeicne domame nganiiiba, 'Wapong monic mi ngagegabeleng, yele alata.' Aime wapong yogo mi ngagelu afeccaigaing, yakumac yele fungine mibe yegengkengeleme ngagening.

<sup>24</sup> "Wapong ye hocne himongtowa himong nga wiycasasawa fayackegac, yogo bayackelu feina loyackewec, yedi himong nga honocmeng yogolec fileine gagac. Ye ibu-mac ngicti moledi baicne, iwa mi gacaigac.<sup>25</sup> Ailu ye wiyc monicte basackeme ngicti bole balu bafickenangte miyac. Ye yeuctihac gaga nga asu ailu wiycasasawa ngic yelecaigac.<sup>26</sup> Ailu ngic moniyang bafuwalu mime yelacni ngic himongne himongne nga habune habune fikesawec ganingte miwec. Ailu dameng nga himong maaine, yogo yedi milu edocebawec.<sup>27</sup> Inguc aime ngic yenge yengung kwelenginengti Wapong yeicne basackelu bafuwaningte, ye yogo ngagesilu inguc aiwec. Foinac, ye dalicka mi gagac, ye ngic nongileng hewacka gagac.<sup>28</sup> Ailu ye hocne gaganonggengte fungine, nongileng yele tapiliwa galu wiycasasawa aicaigabeleng. Aime ngengele ngage-ngage ngic gocne yengi yanguc mibong, 'Nongileng Wapongtaci fikelu adu-madecfocene ailu gagabeleng.'

<sup>29</sup> "Aime nongileng Wapongti bacnubawec. Ilec ailu ngic nongileng Wapong, ye gol nga siliwa nga posadi mole-hibi bacaigabeleng, ingucne aigac, yogo mi ngagedabeleng. Wapong ye tapili sugucne fileine.<sup>30</sup> Ngenge esecne wiyc yogo mi ngage-motoibongte Wapongti nganilu ilec yowa mi miwec. Yakumacbac himongne himongne ngic-ngigac sasawa kwelengineng hefaliyenale sanangne edocebalu gagac.<sup>31</sup> Ye biyachac dameng monic miwec, fagac. Dameng iwa himongne himongne ngic-ngigac funginenonggeng dondonne mimoctolu ameine bafaliyenoledaite. Ailu ngic monic ye bole yogo hocne banale micnowec, Wapong ye ngic yogo edalic-nubanale homackacni bagboliyeme fangkewec. Inguc fangkeme ngagebong noine aiwec."

<sup>32</sup> Aime Pol ye homackacni gboliyelu fangke-fangke, yogolec yowa mime gocne yengi tapili-wawa yowa miibong. Nga gocne yengi miibong, "Yowa yogo dameng monicka hatacmac miyengka ngagedabeleng."<sup>33</sup> Inguc mibong Pol ye hegilecebalu hikewec.<sup>34</sup> Aime ngic gocne yengibac Polholec wetackelu Yesu ngagesingkeibong. Yogo yengelacni mimocto-mimocto ngic sugucne monic wacine Dionisius, ye Areopagusle memba monic. Nga ngigac monic wacine Damaris, ailu ngic-ngigac gocne.

## 18

### Poldi Wapongte yowa Korin taonka miwec

<sup>1</sup> Pol ye boleine bamoctolu Atens hegilelu Korin taonka hikewec.<sup>2</sup> Iwa Yuda ngic monic bafuwawec, wacine Akwila, ye Pontus himongka fikewec. Aime ye ngigacine Prisila yeholec Itali himongka hikelu gaiboc. Gaboc ngictau Sisa Klodiusdi edome Yuda ngic-ngigac Roma taonka gaibong, yenge salecebame Roma hegilelu hikeyackeibong. Ilec yeke Roma hegilelu Korin taonka gbogbolibenang kwesilu gaiboc. Aime Pol yekela hikewec.<sup>3</sup> Pol ye seli-mac baba ngic, nga Akwila ye bole yogohac balu gawecte yele macka ngiye-fac ailu bafickeme yeke momoc moneng banogale bole yogo balu gaiboc.<sup>4</sup> Bagalu Pol ye Sabat damengka Yuda ngic-ngigac yengele

kpakpaduc macka felu Yuda ngic-ngigac nga Grik ngic-ngigac yengeholec yowa mingagec ailu mime yegengkelu gawec.

<sup>5</sup> Aime Sialas nga Timoti yeke Masedonia prowinswacni kwesiboc, Pol ye seli-mac babale bole yogo hegilelu Siduc Madicne sugu sanangnehac milu gawec. Ailu Yuda ngic-ngigac yowa yanguc mime yegengkeme edocebalu gawec, "Yesu ye Mesia hocne." <sup>6</sup> Ye inguc milu game yenge yowaine suleibong. Sulebong ye hegilecebalu ngakpiine weiyangkeme lube wame yanguc edocebawec, "Ngenge ngengileng blkicnginengte ameine yogo nale mi aidaicte, yogo ngengileng aidaicte. Ilec yakumac hegilecngebalu Israel yengele alingkacni miyac, yengela hikedacte."

<sup>7</sup> Pol ye inguc milu Yuda ngic-ngigac yengele kpakpaduc mac hegilelu ngic monic wacine Titius Yastus, yele macka felu ngiye-fac aiwec. Ngic yogo ye Israel yengele alingkacni miyacti Wapong afeelu gawec. Yele mac yogo Yuda ngic-ngigac yengele kpakpaduc mac yogolec mecina ngiyewec. <sup>8</sup> Aime Yuda ngic-ngigac yengele kpakpaduc macte damong wacine Krispus, ye nga golowacfocene yenge Yesu ngagesingkeibong. Aime Korin ngic-ngigac homacnedi Polle yowa ngagelu Sugucne ngagesingkelu misa lowaibong.

<sup>9-10</sup> Aime deboc monicka Sugucnedi Pol gung-didicka ingucne yowa yanguc edowec, "Na damonggudacte. Ilec ga hangocgume micgone mi hidickedamec. Ga sanangke galu mic-yowane midamec. Nale ngic-ngigac habu sugucne taon iwa gagaingte ailu, ngic yengi webac mi aigeledaingte."

<sup>11</sup> Inguc mime Pol ye hifa moniyang nga tamacne <sup>6</sup> Korin taonka iwa galu Wapongte yowa ngic-ngigac edocebalu weduyelewec.

### *Pol kiyala bahikeibong*

<sup>12</sup> Galio ye Akaia prowinswa kiya sugucne gawec. Dameng iwa Yuda ngic yengilangkac kwele-moniyang ailu Pol ngaba aicnolu yowawa loningte bahikeibong. <sup>13</sup> Kiyala bahikelu kpolickelu yanguc miibong, "Ngic yago ye yefe-yowa hegilecaigac. Ye yefe monic balaibelu Wapong afeeningte ngic weduyelecaigac."

<sup>14</sup> Edobong Pol ye micine efeckeme yowa minogale aiyemewa Galiodi Yuda ngic yanguc edocebawec, "O Yuda ngic, ngic ye sowacne umac sugucne me kpisicne gocne bafuwadecka ingucne, yowangineng nalic ngagedacka.

<sup>15</sup> Aime ngengebac ngengileng yowangineng nga wac haicine monic-monice nga yefe-yowangineng yogolec yowanginengti fec-wac aigacte ngengung mimoctodaing. Yowa ingucne nani nalic mi mimoctodacte, yogo nale bole miyac." <sup>16</sup> Inguc milu yowangineng welockelu aiyeleme waibong. <sup>17</sup> Walu yenge kwele-moniyang ailu kpakpaduc macte damong, wacine Sostenes, kiyale haicka webong kiya ye yogo nganilu kpaoma aiwec.

### *Siria prowinswa hikeibong*

<sup>18</sup> Pol ye Korin gacgu ngic hae-gbafoengineng kwele-madic yowa edocebalu Siria prowinswa hikenale Kenkeria taonka hauwec. Haulu Wapongkolec mimipang miwecte hodoc-dowecine balockelu fodewec.\* Aime Prisila nga Akwila yeke momoc hauibong. Fodeme lac-wagewa felu hikeibong. <sup>19</sup> Yenge Efesas taonka hikelu Pol ye Akwila nga Prisila hegilecepawec. Ailu Yuda ngic-ngigac yengele kpakpaduc macka felu

---

<sup>18:5:</sup> Sale 17:14-15    <sup>18:6:</sup> Sale 13:46,51; 20:26    <sup>18:9-10:</sup> Yos 1:9; Yes 41:10    \* <sup>18:18:</sup> Yuda ngic-ngigac yengele yefe-yowa balaibelu Wapongta mipangkewete ailu, hodoc-dowecine mi balockewec. Mimipang balaibeme motome, hodoc-dowecine balockelu fodewec. Aibaba yogolec fungine Himong Kisiwa 6:1-21 iwa fagac.    <sup>18:18:</sup> Him 6:18; Sale 21:24

yengeholec Wapongte mic-yowa mingagec aiibong. <sup>20</sup> Aime Yuda ngic-nigac yenge Pol yengeholec ganale uwacnobong ye hegilewec. Ailu yengeholec yowa yanguc mingagec aiwec. <sup>21</sup> “Entacka Wapontgi hatacmac ngengela kwsibele ngagemebac na hefaliye kwsidacte.” Inguc milu Efesas taon hegilelu lac-wagewa hatacmac felu hikewec. <sup>22</sup> Hikegacgu Sesarea taonka sulumelu Yesule habu Yerusalem iwa gabong yengela felu yengeholec yowa mingagec ailu Antiok taonka hikewec.

<sup>23</sup> Dameng gocna Pol ye Antiok iwa gawec. Gacgu taon yogo hegilelu Galata nga Frigia himongka lolickelu mic-tengtengfocene mibasanang aiyelelu gawec.

### *Apolos ye Efesas nga Korin taonka hikewec*

<sup>24</sup> Dameng iwa Efesas taonka Yuda ngic monic kwesiwec, wacine Apolos. Ye Aleksandia taonka fikelu hibi-mac sugucne bamoctolu Wapongte hibiwa yowa kwelengkeicne fagac, yogolec fungine ngage-motoyackewec. <sup>25</sup> Yengi Sugucnele yefe weducnobong ngagewec. Ailu ye Yoanele misa-lowac, yogo sugu ngagelu gawec. Ailu ye Yesule yefe nebocene sugu dondonne dacine-holec milu weduyelewec. <sup>† 26</sup> Ye Yuda ngic-nigac yengele kpakpaduc macka Siduc Madicne hangoc mikac edocebawec. Ailu iwa Siduc Madicne mime Prisila nga Akwila yeke yowaine ngagelu macka mengocke lelu Wapongte yefe dononnele miboc yegengkecowec.

<sup>27</sup> Aime Apolos ye Akaia prowinswa hikenogale mime ngic haegbafoengneng yengi mibasanang aicnoibong. Aicnolu mic-tengtengfocene Akaia gaibong, yengele hibi yanguc kwelengkeibong, “Ngic yogo ye ngengela fume ngenge mac holecnodaing.” Inguc kwelengkelu lacnobong balu hikewec. Hikelu iwa Wapontgi ngic-nigac kwele-madic aiyeleme Yesu ngagesingkeibong, yengela hikelu homacnehac baficebalu gawec. <sup>28</sup> Ye yowa sugucne dondonnebenang Yuda ngic ameine bafaliyeyelelu yanguc mime yegengkewec, “Yesu ye hocne Mesia.” Wapongte hibiwa yowa yogo milu edalicebame kwelengineng tapili wawec.

## 19

### *Poldi Efesas taonka weduyelewec*

<sup>1</sup> Apolos ye Korin taonka gaemewa Pol ye sifecka-yefe falocke hikegu Efesas taonka sulumelu mic-tengtengfocene gocne bafuwacebalu <sup>2</sup> uwayelewec, “Ngenge Yesu ngagesingkelu Tili Asuholec aiibong, me miyac?”

Inguc mime yengi miibong, “Miyac, Tili Asu gagac, siduc ingucne monic mi ngageibeng.”

<sup>3</sup> Inguc mibong hatacmac uwayelewec, “Aime ngenge oma misa lowai-bong?”

Mime yanguc miibong, “Nonge Yoanele misa-lowac aiibeng.”

<sup>4</sup> Inguc mibong Poldi yanguc edocebawec, “Yoanedi ngic kwelengineng hefaliyeningte misa-lowac aiyelelu yanguc edocebawec, ‘Ngic lobena kwe-silu gagac, ngenge ye ngagesingkedaing.’ Ye yowa yogo Yesule ngagelu miwec.” <sup>5</sup> Ngic yenge yowa yogo ngagelu Sugucne Yesule wacka misa-lowac aiibong. <sup>6</sup> Misa-lowac aibong Poldi moleine socnginang lome Tili Asudi

<sup>† 18:25:</sup> Ngic-nigac yenge Yesule mic-tengteng ainogale Wapong Mamac nga Madec ailu Tili Asu yengele wacka misa-lowac aidaing. Yoanele misa-lowac yogo andoine mi aiwec. Apolos ye yogo mi ngage-motowec. <sup>18:28:</sup> Sale 9:22 <sup>19:1:</sup> 1Kor 3:6 <sup>19:2:</sup> Sale 8:16 <sup>19:4:</sup> Mat 3:11

yengela wawec. Walu kwelengineng wakeme yenge yowa haicine monicmonic nga siduc-yowa miibong.<sup>7</sup> Ngic inguc aiibong, yengele dzalengineng 12 ingucne aiwec.

<sup>8</sup> Pol ye Yuda ngic-ngigac yengele kpakpaduc macka tamacne habackang hangoc mikac felu Siduc Madicne mime yegengkeme edocebalu gawec. Ailu ye Wapongte ngani-damongte fungine yengeholec mingagec ailu edocebawec.<sup>9</sup> Inguc aime ngic gocne yenge kwеле-sanang ailu Yesule yefe madicne yogo ngic-ngigac habu sugucne yengele haicka lobe holecnolu suleibong. Aime Pol ye yenge hegilecebawec. Hegilecebali mic-tengtengfocine sugu kpaducebalu hadengsoc ngic monic wacine Tiranus, yele wewedu macka ngiyelu Siduc Madicne milu weduyelelu gawec.<sup>10</sup> Ye hifa yaekang inguc ailu gacgume Asia prowinswa Yuda ngic-ngigac nga Grik ngic-ngigac sasawadi Sugucne Yesule yowa ngageyackeibong.

<sup>11</sup> Ailu Wapongti Pol moleina pasi haicine monic-monic damuineholec bame fikewec.<sup>12</sup> Pol ye bolele kpolucine nga haicte keleng babaine balu gawec, ngic-ngigac yenge yogo balu huckolec yengela bahikebong yenge yogo bauwalu madickelu gaibong. Aime aleng yenge kwelenginangkocni ofelu hikelu gaibong.

### *Alengti ngic 7 basowalecebawec*

<sup>13</sup> Yuda ngic gocne himong gocna lolickelu aleng yebicebalu gaibong. Yengelacni ngic gocne yengi ngic-ngigac alengkolec yengele socka Sugucne Yesule wacka kwesac ailu wackelu bole baibong. Inguc balu yanguc milu gaibong, "Yesu wacine Poldi edocebalu weduyelecaigac, ga ngic yele wacka hikedamec."<sup>14</sup> Ailu Yuda ngic monic wacine Skewa, ye depec-baba ngic micne gawec. Aime ye madecfocine 7 yenge inguc hocne ailu gaibong.<sup>15</sup> Dameng monicka inguc mibong alengti yowa yanguc bafaliywec, "Yesu ngagegabac. Nga Pol inguchac ngagegabac. Aime ngenge ma?"<sup>16</sup> Inguc milu ngic alengkolecti aalic ngagelu dacineholec fangkewec. Fangkelu madec sasawa hobacebalu ngakpingineng basulackelu wecebalu socngineng balockewec. Balockeme yenge sac lowalu senggang senggang fangkelu mackacni walu hikeibong.

<sup>17</sup> Aime Efesas taonka Yuda ngic-ngigac nga Grik ngic-ngigac yenge ngic alengkolecte siduc ngagelu tapilingineng wame homacnehac hangocabawec. Inguc ailu Sugucne Yesu afeelu mitengkeibong.<sup>18</sup> Mitengkebong ngic-ngigac Yesu ngagesingkeibong, yengelacni homacnedi kwesilu aibabangineng sowacne ailu gaibong, yogo yegenia mifickeyackeibong.<sup>19</sup> Yogo mifickeybong, ngic-ngigac homacnedi esecne dinac-kpanggec aibaba balu gaibong, yogolec hibingineng kpaduckyackelu ngic yengele haicka lobong dacka lobewec. Kpaduckelu lobong lobewec, hibi yogolec fuline, 50 taosen siliwa moneng dzaleine yogolecsoc aiwec.\*<sup>20</sup> Aime yenge inguc aibong Sugucnele yowa-siducti nebock a nebocka sawelu tapiliineholec hikewec.

### *Poldi Yerusalem iwa hikenogale miwec*

<sup>21</sup> Pol ye bole yogo bamoctoyackelu yanguc miwec, "Asudi kwelena ngagegange nelegac. Ilec na Masedonia nga Akaia prowins falockelu Yerusalem iwa hikedacte. Hikelu gabe motome Roma taonka hikedacte."<sup>22</sup> Inguc milu mole-bafickecin Timoti nga Erastus salecepame Masedonia prowinswa

molickelu hikeiboc. Aime yeicnebac Asia prowinswa hatacmac kpisicnemac taockelu gawec.

### *Gbong Atemis*

<sup>23</sup> Dameng iwa Efesas taonka Yesule yefe-yowale ailu hasowac sugucne fikewec. <sup>24</sup> I yangucte, siliwadi mole-hibi baba ngic monic gawec, wacine Demitius. Yedi Atemis siduc-gbong yogolec ibu-macte siduc-gbong kpisic-kpisic siliwadi balu game ngic yengi fuli balu gaibong. Fuli babong ye nga bole-ngic agofocene moneng homacne balu gaibong. <sup>25</sup> Aime Demitiusdi bole-ngic agofocene nga mole-hibi baba ngic sasawa kpaducebalu yanguc edocebawec, "Agofocene, bolenonggeng yagodi moneng-mafa ba-fuwanolectaigac, yogo ngenge ngagegabiyyeng. <sup>26</sup> Aime ngic monic kwesilu gagac, wacine Pol, yele fungine ngagegaing. Ye Efesas taonka nga Asia prowins iwacni ngic homacne kpaducebalu kwele basifuc aiyelegac. Ailu yanguc edocebalu gagac, 'Siduc-gbong ngic-moledi baicne, yogo wiyc noine miyac.' <sup>27</sup> Ye inguc aime bolenonggengte tapiliine wadaicte. Ailu yogo sugu miyac. Gbongnonggeng sugucne Atemis yele ibu-mac yogo wiyc omane aidaicte. Ailu Atemis yeicne siducinele tapiliine wayackedaicte. Aime Asia prowinswacni nga himong neboc nga nebockacni ngic yenge momoc Atemis afeecaigaing. Aime siducine wenuc miyac aidaicte, yogodi kpungke-kpungkeine aigac."

<sup>28</sup> Demitius ye yowa inguc edocebame yenge aalic sugucne ngagelu auk-welu yanguc miibong, "Efesas nongileng Atemis ye feicnetowa!" <sup>29</sup> Inguc mi-bong ngic homacnedi yengela taockelu taon wakelu aalic sugucne ngagelu kpakpaduc sobengka sasawadi kpaduckelu momochac gasacke hikeibong. Ailu Masedonia-hocni ngic yaeckang Polholec gacaigaic, wacnginiec Gaius nga Aristakus, yeke bacepalu fulucepa hikeibong. <sup>30</sup> Aime Pol ye inguc ngagelu ngic kpatulelu sobengka hikeibong, yengeholec hikenogale mime, mic-tengtengfocene yengi sebileibong. <sup>31</sup> Ailu Asia prowinsle ngic sugucne gocne yenge Pol agofocinedi gaibong, yengi inguchac Pol kpakpaduc sobengka mi hikenale kpatalacnolu yowa sanangne lobong hikewec.

<sup>32</sup> Aime kpaduckeibong, iwa ngic-ngigac yenge yowa hendolong homacne aibong yowa sifuweyackewec. Sifuweme ngic gocne homacnedi yanguc ngageibong, "Fungine omale nongileng yawa kwesilu domagabeleng?" Inguc milu ngagebong kpungkewec. <sup>33</sup> Kpungkeme domabong Yuda ngic-ngigac agongineng monic wacine Aleksanda, ye ngic-habu sugucne yengele hewacka fedomawec. Domalu yowa milu edocebanale ailu ngic mole balang baduyelewec. <sup>34</sup> Aime ngic yenge ye Yuda ngic, inguc biyac ngani-motolu yengileng momochac 120 minit ngama, yogolec kwlina aukwelu yanguc miibong, "Efesas nongileng Atemis ye feicnetowa!"

<sup>35</sup> Inguc ailu gaebongka Efesas taonte hibi kwleng-kweleng ngicti kwesilu yanguc edocebawec, "Ngenge waickelu ngiyening! Efesas ngic ngenge ngagening. Atemistowanonggeng ilucine nga ibu-maccine damongkecaigabeleng. Ailu yele iluc sawawacni wawec, yogo himongtowa himongte ngic-ngigac sasawadi ngageyackegaing. <sup>36</sup> Ilec ngenge kwlengineng wana, aibaba kosa mi aining. <sup>37</sup> Aime ngenge ngic yaeckang bacepalu kwesigaing, yeke siduc-gbongnonggengte ibu-mackacni wiyc monic hise mi bagabiyc, me Atemis fecfec ailu mi sulegabiyyec. <sup>38</sup> Entacka Demitiusle bole-ngic agofocene yenge ngic monicte ngagebong sowaleme ye yowawa lodabiyeng. Aime yowawa lolole dameng fagac ailu kiya gagaing. Umacngineng yogo

yengela bahikelu yowawa locebadabiyeng. <sup>39</sup> Me entacka ngengileng yowa monic fagacka damong yengele yowale damengka bahikebong mimoc-todaing. <sup>40</sup> Umacnonggeng yago fagac, ngenge yakumac wiyac aigaing, ailu Roma yengele damong yengi yowawa locnubadaingkale damong balu gadabeleng. Entacka ngic sugucne weledaingtewa ingucne, wiyac fungine minogale kpungkedabelengte.” <sup>41</sup> Hibi kweleng-kweleng ngicti yowa inguc milu salecebame hikeibong.

## 20

### *Poldi Masedonia nga Akaia prowinswa hikewec*

<sup>1</sup> Yowa hendolong miyac aime Pol ye Yesule mic-tengtengfocene hefole-cebame kwestibong. Kwestibong yowa edocebalu mibasanang aiyelelu molenginang balu Masedonia prowinswa hikewec. <sup>2</sup> Hike prowins yogo falockelu Yesule habu ngiye-hikegaingsoc, yengele ngage-ngage hole-gboliyelu mibasanang yowa homacne aiyelela hikewec. Hikegacgu Grik himongka hikelu <sup>3</sup> iwa tamacne habackang gawec. Gacgu kiwecka haulu lac-wagewa yefe Siria prowinswa hikenogale miwec. Mime Yuda ngic-ngigac yengi ngaba aicnolu yowaine hefebong ngagelu ye Masedonia prowinswa yefe hikenale ngagelu hefaliyewec. <sup>4</sup> Aime ngic yangucti yefewa Pol bal-aibeibong.

Pirus madecine Sopate Bereahocni, ailu  
Aristakus nga  
Sekundus yeke Tesalonika taonkacni. Ailu  
Gaius Debe-hocni nga  
Timoti. Ailu  
Tikikus nga

Tofimus, yeke Asia prowins mesuinacni.

<sup>5</sup> Ngic yogo yenge molickelu Toas taonka wangecnonggeng gaibong. <sup>6</sup> Wangec gacgubong nongebac bret yis mikacte hombang, yogolec dameng motome Filipai-hocni lac-wagewa feibeng. Felu hadeng 5 hikegacgu Toas taonka hikelu iwa hadeng 7 gaibeng.

### *Toas taonka Yutikus homame bagboliyewec*

<sup>7</sup> Aime nonge Sondawa bret badulu nonogale kpaduckebeng, Pol ye mac saeme hikenogale ngagelu Wapongte mic-yowa edocebalu gawec. Edocebalu game deboc hewac aime <sup>8</sup> mac kweline monic feina ngiyeibeng, iwa hifa homacne lobewec. <sup>9</sup> Aime Pol ye yowa-dale mime madec monic vacine Yutikus, ye gungte tulic ngiyecgu ngigeckeme gbelong nuwa yefe kpolotockelu falocke himongka haulu wehomame fawec. Aime bafangkelu nganibong homaicne aiwec. Ye mac kweline habackang feina wilini, iwacni wawewec. <sup>10</sup> Waweme Pol ye haulu madec feina famacke falu ngic-ngigac yanguc edocebewec, “Madec ye gbolicne fagacte ngenge mi hiyaning.” <sup>11</sup> Inguc milu mac kwelina felu bret badulu yengeholec momoc noibong. Nobong motome yengeholec Siduc Madicnele mingagec ailu gacgume mac saeme hegilecebalu hikewec. <sup>12</sup> Ngic yengi sugu madec gboliyeme macina mengocke hikelu kwelengineng basanangkeibong.

### *Miletus taonka hikeibong*

<sup>13</sup> Aime gocne nonge Polholec Asos taonka hikenangte salecnubame lac-wagewa felu hikebeng yeicnebac hige-yefe fuwec, ye ngage-ngage inguc ngagewec. <sup>14</sup> Kwesi iwa bafuwacnubalu lac-wagewa ofeme momoc

hikegacgu Mitilini taonka sulumeibeng. <sup>15</sup> Iwacni hikegacgu saeme Dzintacka Kios nucka hikelu kiwec falockelu Mituwacka Samos nucka hikeibeng. Iwacni Lolowingka Miletus taonka hike sulumeibeng. <sup>16</sup> Pol ye Pentikos ngiye-ngiye damengka Yerusalem iwa biyac hike ngiyenale ngagesiwec. Ailu ye Asia prowins mesuina ngiyemewa dameng ewalidaickale, Efesas moc falockelu hikegacgu Miletus hikewec.

*Poldi Efesas ngic yengele sawang-yowa miwec*

<sup>17</sup> Hike iwa domalu yowa lome Efesas hikeme Yesule habu yengele damong yenge kwesiibong. <sup>18</sup> Kwesibong Poldi yowa yanguc edocebwec, "Na Asia prowinswa fulu ngengela bolene wenuc molickelu balu gaiba, yogo funginacnihac ngagegabiyeng. <sup>19</sup> Naneicne bawacnagulu Sugucnele kwelec kwekwe gabe Yuda ngic-ngigac yengi ngaba ainelélu lokwesacka locnubong ngengele kwele-sowac ailu hiyalu gaiba. <sup>20</sup> Ailu yowa minogale mi hangocnume hegilebe fawec. Ailu ngenge madickeningte yowa homacne ngic-ngigac mac-sobengnginang nga macnginangsoc wedungelelu gaiba.

<sup>21</sup> "Na Yuda ngic-ngigac nga Grik ngic-ngigac momochac yanguc mibe yegengkeyelewec. Yenge kwele-hefaliyec ailu Wapongta hikelu Sugucnenonggeng Yesu ngagesingkening. <sup>22</sup> Ngagegaing, yabac Asudi kweleleno dogbac aineleme Yerusalem iwa hikedacte. Hikebe wiyc monic weningucne iwa fikenledaict, yogo mi ngage-motogabac. <sup>23</sup> Na yanguc sugu ngagecaigabac, muc-mac nga doic Yerusalem iwa wangecne fagac. Yogolet macsoc hikebe Tili Asudi mime yegengkegac. <sup>24</sup> Inguc mime naneicne gaganele ngagebe feicme ni aicaigac. Na moc yefe milockeneleme balaibe hikenogale ainelecaigac. Ailu Waponti wiyc moc kwele-madic aicaigacte Siduc Madicne mibe yegengkenale Sugucne Yesudi edocnuwec. Edocnume kwelenedi bole yogo bagacgu bamoctonogale aigac.

<sup>25</sup> "Ailu yanguc mibe ngagening. Na Wapongte ngani-damongte yowasiduc ngic-ngigac hewacnginang edocngebalu wedungelebe ngagelu gai-bong, ngenge lobewa gacgu haic-mesune hatacmac mi nganidaingte. <sup>26-27</sup> Waponti ngage-ngageine sasawa edocnuwec, yogo sasawa yegena edocngebaiba, yogowacni yowa monic hegilelu mi hesongkebe fawec. Ilec yakumac hedec hesulumec aingelebe ngagening, ngengelacni monicti kweleine mi hefaliyedaitcowa, yele bikicte ameine nala mi fadaicte.

<sup>28</sup> "Wapongte habu yeicne sacti fuli bacnubawec. Ailu Tili Asudi habu yengele damong ganingte bawosaecngebabewc. Ilec ailu ngenge ngengileng damongnagulu, lama-damong madicne ingucne Wapongte habu nganidamong aiyeledabiyeng. <sup>29</sup> Na yanguc ngagegabac, ngenge hegilecnge-balau hikebe kate-hoda micineholecti ngengela kthesilu lama basowalecngebanogale aidaingte. <sup>30</sup> Ailu ngengileng hewackacni ngicti fikelu kthesacyowa ailu mic-tengtengfocene gocne biyac bacngebano gale aidaingte. <sup>31</sup> Ngenge yogolet deboc-gboli gadaing. Na hifa habackang deboc hadeng hii kwele-sowackolec galu sawang-yowa filesoc edocngebalu gaiba, yogo hegilebong mi wadaic. Ilec ngenge bolene yogo ngagesilu gadabiyeng.

<sup>32</sup> "Na Wapongte molewa locngebabewc. Ailu kwele-madicinele yowa yogowa locngebabewc. Yogodi tapili baningte basanangngebame ngenge ngic-ngigac gbagbacne gaga baibong gagaing, yogo yengeholec momoc gaga-sanang badaingte. <sup>33</sup> Aime na ngengeholec galu ngakpi-kpoluc me

hiye-monengte andac mi aingleiba. <sup>34</sup> Nga molenedi bole babe moneng fikeme woc-wiyacnonggeng fuli balu naneicne nga ngicfocne baficebaiba, ngenge yogo biyac ngageibong. <sup>35</sup> Bolene sasawa balu gaiba, iwa yanguc wedungeleiba, ngenge waweweine baficebanogale bole sugucne badaing. Sugucne Yesudi yowa yanguc miwec, ‘Ga kwele-madicka agogone wiyac monic lacnodamecte, yogolec kwele-angac sugucne gala fikedaicte. Nga kwele-madicka agogonedi wiyac monic geledaicte, yogolec kwele-angac efecnemac gala fikedaicte.’ Yowa yogo mi ngigecngebadaic.”

<sup>36</sup> Pol ye yowa inguc mimoctolu yengeholec ketadi holelu milockewec. <sup>37</sup> Milockeme motome ngagelu yenge kwele-sowac aihu hiyalu Pol hobalu muduckeibong. <sup>38</sup> Ye esecne yowa monic yanguc edocebawec, “Ngenge haicmesune hatacmac mi nganidaingte.” Ilec aihu yenge kwele-sowac sugucne ngagelu mengocke hikelu lac-wagewa lobong felu hikewec.

## 21

### *Pol lac-wagewa felu Tair taonka hikewec*

<sup>1</sup> Nonge hegilecebalu lac-wagewa felu Kos nucka hikeibeng. Hikebeng saeme Rodes nucka hikelu Patara taonka sulumeibeng. <sup>2</sup> Iwa lac-wage monic Fonisia himongka hikenale efeckeme bafuwalu iwa felu hikeibeng. <sup>3</sup> Hikegacgu Saiparus nuc kanawapec ngiyeme nganilu ewaililu Siria prōwins sugucnapec hikeibeng. Hikelu lac-wagedi Tair taonka mafa iwa lonale hikeibeng. <sup>4</sup> Hikelu lome nonge macka felu mic-tengtengfocne bafuwacebalu yengeholec hadeng 7 gaibeng. Gaebengka Asudi bacebame yenge Poldi Yerusalem iwa mi hikenale sawang-yowa miibong. <sup>5</sup> Aime gabeng damengnonggeng bangkaleme ngic-ngigac adumadecfocnginengkolec yengi mengocnubabong nonge momoc taon yogo hegilelu kiwec mecina haulibeng. Haulu dingongka ketadi holelu milockeibeng. <sup>6</sup> Milockebeng motome molewa babac aihu lac-wagewa feibeng yenge macka hefaliye hikeibong.

### *Agabusdi Polle sawang-yowa miwec*

<sup>7</sup> Tair-hocni hikegacgu Tolemes taonka hikelu lac-wagewacni walu taon iwa gaibeng. Galu ngic hae-gbafofngineng iwa gaibong, yengeholec hadeng moniyang felu ngiyeibeng. <sup>8</sup> Mac saeme lac-wagewa felu hikegacgu Sesarea sulumelu haulu Filip bafuwaibeng. Filip ye mole-bafic ngic 7 locebaibong, yengele hewackacni monic ye hocne. Aihu ye Yesule Siduc madicne milu edocebacaigac. Nonge ye bafuwalu yele macka feibeng. <sup>9</sup> Ye adufocine 4, yenge ngigac-neleweng gaibong, yenge Wapongte siduc-yowa milu gaibong.

<sup>10</sup> Iwa hadeng gocne gaebengka Yudeya himongkacni Wapongte siduc-mimi ngic monic, waccine Agabus, ye nongela kwesiwec. <sup>11</sup> Kwesi sulumelu Polle umbika balu yogodi yeicne hige-moleine hefewec. Hefelu yanguc miwec, “Tili Asudi yanguc migac, ‘Umbika yagolec fileine ye Yerusalem iwa hikeme Yuda ngic yengi yanguc hocne aicnodaingte. Aicnolu Israel yengele alingkacni miyac, yengele molewa lodaingte.’”

<sup>12</sup> Yowa inguc mime nonge nga mac-filefocine nonge sasawadi Pol Yerusalem iwa mi female sanangne milu sebilebeng <sup>13</sup> yedi yanguc miwec, “Ngenge homacne hiyalu hung-kwefang mi ainelening. Na Yerusalem iwa

mucka fedacte, yogo sugu miyac. Na Sugucne Yesule wacka homanogale efeckegabac."

<sup>14</sup> Yowa edobeng mi ngageme hegilelu yanguc miibeng, "Sugucne ngagegac, inguc fikeyackewec."

### *Pol Yerusalem iwa fewec*

<sup>15</sup> Hadeng gocne motome Yerusalem iwa fenogale efeckeibeng. <sup>16</sup> Efeckelu Sesarea-hocni Yesule mic-tengtengfocene gocne yengi mengocnubalu ngic monic, wacine Nason, yele macka locnubaibong. Aime Nason ye Saiparus nucka fikewec. Ailu biyachac molickelu kwele-hefaliyec aiwec.

<sup>17</sup> Aime hikegacgu Yerusalem iwa hike sulumuibeng, iwa ngagegagingkolec ngic hae-ghafocnonggeng yengi ago ainolelu kwele-madic ngageibong. <sup>18</sup> Aime mac saeme Poldi Yakobosle macka mengocnubame feibeng. Felu ngiyebeng micnefocngineng yenge kwesiibong. <sup>19</sup> Kwsiyackebong Poldi yenge molenginang bacebawec. Ailu Wapongti moleina pasi bame Israel yengele alingkacni miyac, yengela bole bame noine sasawa fikeyackewec, yogolec yowa-siduc aiyelleyackewec.

### *Gbagbacne ainogale hasoc holeningte miibong*

<sup>20</sup> Pol ye yowa-siduc aiyeleme Wapong wacine bafebong motome Pol yanguc edoibong, "Ngic hae-gbanonggeng, ga ngagegic, Yuda ngic-ngigac taosen homacne ewaligac, habu sugucnedi Yesu ngagesingkelu gagaing. Ailu yenge sasawadi Wapongte yefe-yowa yogo mamang hidulu sanangne balu gacaigaing. <sup>21</sup> Aime gale yowa-siduc yanguc kwesime ngagecaigaing. Yuda ngicti Israel yengele alingkacni miyac, yengele hewacka gagaing, yenge yanguc milu edocebaicaigc, 'Ngenge Mosesle yowa hegiledaing. Ailu sabacfocngineng yengele soc tofangineng mi helockededaing. Ailu Yuda ngic-ngigac aibabanonggeng hegiledaing.' Yenge yowa inguc edocebaengka ngagecaigaing. <sup>22</sup> Aime ngic yenge gale inguc ngagelu aalicebadaicte, yogolec wenuc aidabelengte. Ga Yerusalem yawa kwesimec, yogolec siduc ngagedaingte.

<sup>23</sup> "Ilec nonge yowa monic edocgubeng balaibedamec. Nongela ngic 4 gagaing, yenge Wapongkolec mimipang milu hodoc-dowecngineng mi balockeicne gagaing. <sup>24</sup> Ga yengela taockelu aibaba gbagbacne fagac, yogo balaibelu yengeholec hasoc hole-holenginengte wiyc fuli bidaingte. Balu hodoc-dowecngineng balockelu fodedaingte. Ga inguc aiyengka nganicgulu gale yanguc ngagedaingte, 'Yowaine kwesime ngageibeng, yogo noine miyac. Ye yeicne Wapongte yefe-yowa balaibecaigac.' Ga inguc aiyengka Yuda ngic-ngigac Yesu ngagesingkegaing, yenge gale ngaba mi aidaingte. <sup>25</sup> Aime Israel yengele alingkacni miyac yogo yengi Yesu ngagesingkegaing, yengele esecne yefe-yowa miibeng, yogolec yowa-siduc hibiwa biyachac yanguc kwelengkelu yeleinie. Ngic-ngigac yenge siduc-gbongfocngineng yengele depekte sic wecaigaing, ngenge yogo hegiledaing. Ailu bec-sic ubaina mucti fuluckebong asuine kwedickeme homaicne, yogolec biucine mi nodaing. Ailu sac mi nodaing. Ailu selo-boic aibaba mi aidaing."

<sup>26</sup> Inguc mibong Pol ye yowangineng ngagelu mac saeme ngic 4 yengela taockelu yenge momoc aibaba gbagbacne molickelu aiibong. Aime Ibumacka felu gbagbacne ainogale dameng motome ibungineng lolu hasoc filesoc holengogale mime yegengkewec.

### *Ibu-macka feme baibong*

<sup>27</sup> Aibaba gbagbacne yogolec hadeng 7 motonogale aiyemewa, Pol ye Ibu-macka felu gawec. Game Asia prowinswacni Yuda ngic-ngigac yengi ye nganilu ngic-ngigac habutowa kwelengineng kwefangkebong Pol ngaba aicnoibong. Aicnolu hobalu <sup>28</sup> aukwelu yanguc wackelu miibong, "Oe Israel ngic-ngigac, ngenge wele baficnubabong banang! Ngic yagodi himongsoc hike galu Yuda ngic-ngigac nongileng nga yefe-yowanonggeng ailu Ibu-macnonggeng, yogolec ngaba ainagole, ngic yagodi edocebalu gagac. Ailu Ibu-macnonggang Grik ngic mengocebame ofelu macnonggeng gbagbacne yago wonong holeibong."\* <sup>29</sup> Aime Pol ye Efesas ngic monic wacine Tofimus yeholec taonka moc hike-kwesic aiboc nganicepalu gaibongte ailu yanguc ngagesilu miibong, "Ye Ibu-macka mengockeme yeke momoc feiboc." Inguc moc ngagesiibong, yeke mi feiboc. <sup>30</sup> Ilec macfocene yenge aukwebong ngagelu fangke gbululuckelu wele kpaduckeibong. Kpaduckelu ngic gocne yengi Pol hobalu Ibu-mackacni fuluckebong wame, iwahac nu holeyackei-bong.

### *Pol ngic yengele molewacni bamoctowec*

<sup>31</sup> Ngaba yengi Pol balu wehomanogale aibong, Roma hudu-baba ngic yengele damong sugucnela yowa yanguc hikeme ngagewec, "Yerusalem ngic-ngigac sasawa yenge yengungthiac ngaba ainagulu hendolong sugucne aigaing." <sup>32</sup> Yowa inguc ngagelu iwahac hudu-baba ngic feicne waicne bacebame gasackelu ngic-ngigac habu yengela hauibong. Haulu nganibong ngic yenge Pol welu gabong hudu-baba ngic nga damongngineng yenge kwesibong, nganicebalu akikic hegileibong.

<sup>33</sup> Aime hudu-baba ngic yengele damong sugucnedi kwesilu mime hudu-baba ngicfocene yenge Pol balu sen yaeckangti hefeibong. Hefebong ngicngigac uwayelewec, "Pol ye ma ngic, ailu ye oma wiyc aiwec?" Yogolec uuwa bole bawec. <sup>34</sup> Aime ngic yenge aunne aunne aibong hendolongka yowa fungine ngagenale aibbiywec. Aibibielyu mime hudu-baba ngic yengi Pol balu yengileng bole-macka hefaliye hikeibong. <sup>35</sup> Aime Pol ye litiwa fenogale aime ngic yengi lolickelu sanangne igockebong hudu-baba ngic yengi Pol bafangkelu feibong. <sup>36</sup> Inguc aibong ngic-habutowadi balaibecebalu aukwela aukwela hikelu yanguc miibong, "Ngic ye webeng homana!"

<sup>37</sup> Inguc milu Pol mac kwelina bafenogale aiyebongka, yedi hudu-baba ngic yengele damong sugucne uwacnowec, "Na nalic yowa edocgudacte, me?"

Mime damongti miwec, "Ga Grik yowa ngagegic, me? <sup>38</sup> Esecne Isip ngic monicti ngaba bafuwanalale ngic sowacne 4 taosen mengocebame himong kisiwa misaine mikacka hikeibong. Ga ngic yogo, me ga ngic monic?"

<sup>39</sup> Uwacnome Poldi yanguc edowec, "Na Yuda ngicbenang, ailu Silisia himongka Tasas taon wacine sugucne fagac, yogowacni. Ga nalic ngageneleengka ngic-ngigac yowa kpisicne edocebabe."

### *Poldi Yuda ngic-ngigac yowa edocebawec*

<sup>40</sup> Inguc mime ngagecnome Pol ye litiwa domalu ngic-ngigac mole balang baduyelewec. Baduyeleme yowa mikac ailu waickelu domabong, Hibru yowanginang yefe yanguc edocebawec,

\* **21:28:** Wapong Ibu-macine wonongkolec nganilu ngaba aidaickale, yenge yowa yogo miibong. Israel yengele alingkacni miyac, yenge iwa mi feningte aka holeyaleicne. **21:29:** Sale 20:4

**21:36:** Luk 23:18    **21:38:** Sale 5:36-37

## 22

<sup>1</sup> “Sugucnafocne nga ngic hae-gbafocne, naneicne fungine edocngebabe ngagening.”

<sup>2</sup> Milu Pol ye Hibru yowawa yefe mime ngagelu uc mikac aiyackeibong.

Aime ye hatac taockelu yangucedocebawec, <sup>3</sup> “Na Yuda ngic, Silisia himongka Tasas taon iwa fikeiba. Ailu Yerusalem yawa galu suguleiba. Wewedu Gamaliel yele bagewa gabe yedi ngambofocnonggeng yengele yefe-yowa sasawa weduneleme ngageyackeiba. Aime ngengele yanguctihac aibaba aigaing, yogo ingucnephac Wapongti ngage-madickenelenale milu yowa yogo mamang hidulu sanangne balu gacaigabac. <sup>4</sup> Ailu ngicngig Yesule yefe balaibeibong, yenge weyebic ayelelu witicebalu mucmacka locebalu gaiba. Ailu wehomacebanogale miiba. <sup>5</sup> Yogo depecbaba ngic yengele damong sugucne nga Yuda ngic-ngigac yengele Tutumangtowale damongfocngineng yenge nale aibaba yoglec fungine yogo edocngebadaingte. Yengi hocne hibi monic ngic hae-gbafocnonggeng Damasko gagaing, yengela bahikenogale kwelengkelu neleibong. Yogo silicine yanguc, ngic-ngigac Yesule yefe balaibeibong nani bafuwacebadacte, yogo witicebalu Yerusalem baceba kwesidacte. Aime ameine weboting ayeledaingte.

<sup>6</sup> “Inguc milu yefe hikegacgu wenac hewac-hewac ingucne Damasko mac bangkalebe, iwashac honocmengkaci angoc sugucnedi biyac walu kwenggalangnuwec. <sup>7</sup> Kwenggalangnume himongka lodingke wawelu fabe, yowa malac monic yanguc fikeme ngageiba, ‘**Sol, Sol, ga omale weyebic ainelelu gacaigic?**’

<sup>8</sup> “Inguc ngagelu yanguc miiba, ‘Sugucne, ga maa?’

“Mibe yanguc edocnuwec, ‘**Weyebic ainelecaigic, na hocne Yesu Nasaret taonkacni.**’ <sup>9</sup> Ngic naholec gaibong, yenge angoc sugucne yogo nganiuibong. Nga yowa edocnuwec, yoglecbac kauc baibong.

<sup>10</sup> “Aime nani uwaiba, ‘Sugucne, oma wiyc ainogale minelegic.’

“Mibe Sugucnedi yanguc edocnuwec, ‘**Ga fangkelu Damasko hikeengka wiyc aicte miiba, yogo monicti edocgudaicte.**’ <sup>11</sup> Aime hibi-angocineholecti dongena kwenggalangkewecte hilabe dongene kundung kwewec. Inguc aibe ngicfocne yengi molena balu Damasko bacnulu hikeibong.

<sup>12</sup> “Iwa ngic monic gawec, wacie Ananaias, ye yefe-yowa ninic balaibelu game Yuda ngic-ngigac taon iwa gaibong, yenge sasawadi yele ngagebong madickelu gawec. <sup>13</sup> Ngic yedi hocne nale emewa kwesi sulumelu yanguc edocnuwec, ‘Ngic hae-gbane Sol, ga dongegone hilanong.’ Inguc mime iwashac dongene hilalu ye nganiiba.

<sup>14</sup> “Inguc milu yowa yanguc edocnuwec, ‘Ngambofocnonggeng yengele Wapong, yedi boleine bacte milu edalicgugac. Aime ga Aibaba Dondonnele Fileine nganiyengka yele mickacni yowa ngagekte bawosaecguwec. <sup>15</sup> Ga ye wideckelu wiyc ngani-ngagec aigic, yoglec siduc himongsoc ngic edocebalu hikedamec. <sup>16</sup> Ngagegic, ga dameng mi wickenong! Fangkelu misalowac ailu Yesule wac wackeengka bikicgone suwena.’

<sup>17</sup> “Inguc mime hefaliyelu Yerusalem iwa Ibu-macka felu milockelu gungdidicka ingucne Sugucne nganiiba. <sup>18</sup> Nganibe yowa yanguc edocnuwec, ‘**Mac yagolet ngic-ngigac yenge gale mickacni nale siduc miyengka ngagelu hegiledaingte. Ilec ailu ga Yerusalem hegilelu biyac hikenong.**’

**19** “Inguc mime yowa yanguc bafaliyeiba, ‘Sugucne, ga ngagesinggubong, nani kpakpaduc macnginangsoc felu witicebalu fuluceba walu hududi wecebalu gaiba, yogo ngagegaing. **20** Ailu widecgone Stifen sackolec webong homanale ailu ngakpingineng dalicne hemoctobong nani damongkebe webong ngagebe madfckewec, yenge yogo ngageyackegaing. Yogolec yowa mibe ngagedaingte.’

**21** “Inguc mibe Sugucnedi yanguc edocnuwec, ‘Miyac, na himong dalicka Israel yengele alingkacni miyac, yengela salecgube hikedamecte. Ilec ga biyac efeckelu hikenong.’”

**22** Ngic yenge hedec kweebongka miwec. Aime Pol ye Sugucnele yowa yogo edocebame yenge dacineholec aukwelu yanguc miibong, “Ngic ingucne yogo gagaine miyac aidaic. Ye game nalic mi aidaicte.” **23** Inguc milu aukwelu aalicebame ngakpingineng dalicne hemoctolu lube filabong feme balu wickeibong.

### *Pol hududi mi wenogale aiibong*

**24** Albong damong sugucnedi mime hudu-baba ngic yenge Pol bole-macnginang balu feibong. Ailu ngic yenge omale homacne aukwegaing, yogolec indingkelu muc-hududi webong sowacneine mifickeme ngagenale mimoctoyelewec. **25** Mime yenge muc-hududi wenogale mucti hige-moleine hefelicekbong. Aime Pol ye hudu-baba ngic yengele damong yanguc milu uwacnowec, “Ngenge ngic monic Roma ngic-ngigac yengele alingka taock-elu game, ye yowawa mi lolu nalic muc-hududi wedaingte, me? Ngic ye yowawa lolubac nalic hududi wedaingte.”

**26** Inguc mime damongnginengti damong sugucnela lelu yanguc edowec, “Wenuc ainoga? Ngic ye Roma ngic-ngigac yengele alingka taockewec gagac.”

**27** Inguc mime damong sugucnedi Pol uwacnonale hikelu miwec, “Minong, ga foinac Roma ngic-ngigac yengele alingka taockeing gacaigic, me?”

Mime Poldi miwec, “Aime foinac, na Roma ngic-ngigac yengele alingkacni.”

**28** Inguc mime yedi miwec, “Na moneng homacne lobe monengti hilocene Roma ngic aiiba.”

Inguc mime Poldi miwec, “Nabac Roma ngic-ngigac yengele alingka fileiba.”

**29** Inguc mime yenge iwashac Pol indingkelu wenogale miibong, yogo hegileibong. Hudu-baba ngic yengele damong sugucne yedibac yanguc ngagewec, “Pol ye Roma ngic. Aime nani ngic edocebabe ye senti witick-egaing, yogo nalic mi aigac!” Ye inguc ngagelu hangockewec.

**30** Mac saeme hudu-baba ngic yengele damong sugucnenginengti Yuda ngic yenge Pol fungine omale yowawa loibong, yogolec funginebenang ngagenogale aiwec. Ilec depec-baba ngic micne nga Yuda ngic Tutumang-towanginengte memba sasawa mime kpaduckeibong. Ailu Pol lukecnolu mengocke walu kpaduckeibong, yengele haicka lowec.

## 23

### *Poldi ngic micne yowa edocebawec*

<sup>1</sup> Poldi Yuda ngic-ngigac yengele Tutumangtowanginengte memba yengela donge hilalu yowa sanangnehac yanguc edocebawec, "Ngic hae-gbafocne, mibe ngagening. Wapongte haicka kwelenedi ngage-wosaec ainagube madicne aime gaofecgu yakumac gagabac."

<sup>2</sup> Inguc mime depec-baba ngic yengele damong sugucne monic wacine Ananaias, yedi Polle emewa ngic domaibong, yenge yanguc milu edocebawec, "Ngenge mesuina wening."

<sup>3</sup> Inguc mime Poldi yanguc edowec, "Wapongti wecgudaicte! Ga haicgone madicne, nga kwelegona aibaba sowacnedi wakeicne. Ga yefe-yowa bal-aibelu yowane wosaelu mimoctcnunogale bole basic. Ailu yogo hegilelu wecnuningte sanangne migic. Inguc ailu yefe-yowa fagac, yogo ewaligic."

<sup>4</sup> Inguc mime ngic domaibong, yengi yanguc edoibong, "Ga Wapongte depec-baba ngic yengele damong sugucne tapiliine bawalu misulec-yowa ingucne mi minong!"

<sup>5</sup> Inguc mibong Poldi yanguc miwec, "Ngic hae-gbafocne, ye depec-baba ngic yengele damong sugucne gagac, yogo mi ngagelu yowa yefeina mi migabac. Wapongte hibiwa yanguc kwelengkeicne fagac,

'Ga micnefogone mi misowalecebadamec.'

(Wah 22:28)

<sup>6</sup> Aime ngic micne gocne yenge Sadyusi alingkacni, nga gocne yenge Farisaio alingkacni ingucti gaibong. Gacgubong Poldi yogo ngagelu kweleine fangkeme Tutumangtowa iwa yanguc edocebawec, "Ngic hae-gbafocne, na Farisaio ngic, ailu yengele alingkacni fikeiba. Aime homackacni gboliyelu fangke-fangke yogo fagac. Ilec wangec gabe, yogolec yowawa locnugabiyeng."

<sup>7</sup> Yowa inguc mime Farisaio ngic nga Sadyusi ngic yenge yengungtihac siyeckelu tutumangnginang fulucnaguibong. <sup>8</sup> Sadyusi ngic yengi yanguc micaigaing, "Homackacni gboliyelu fangke-fangke nga angelo ailu asu, yogo mi fagac." Nga Farisaio ngic yengi yanguc mibong yegengkecaigac, "Yogo foianc fayackegac."

<sup>9</sup> Aime yogolec tutumangnginang hendolong aiibong. Aibong Farisaio yengele alingkacni Wapongte yefe-yowale wewedu ngic gocne yengi fangkelu yowa dacineholec yanguc miibong, "Nonge ngic yagolec bikic basackegabeleng. Angelo me asu monicti yowa edowecka, nonge yogolec yowa monic mi midabelengte."

<sup>10</sup> Milu yowanginengti fulucnagubong hudu-baba ngic yengele damong sugucnedi gacgu Pol fuluckelu socine balockedalingkale, hangockewec. Ailu hudu-baba ngic edocebame yengi haulu Pol ngic hewacnginangkocni fulucke walu bole-macnginang baleibong.

<sup>11</sup> Balebong deboc iwashac Sugucnedi Pol fikecnolu yanguc edowec, "Ga ngageboc mikac sanangne domadamec. Ga Yerusalem yawa nale pasile ailu fungine miyengka yegengkewec, yogo ingucnehac Roma taonka miyengka yegengkedaic."

### *Pol wehomanogale miibong*

<sup>12</sup> Mac saeme Yuda ngic gocne yenge yowa mingagec ailu yengungtihac yanguc miibong, "Nongileng nosing misa mi nono gacgu Pol wehomalubac nosing misa nodabeleng. Nga inguc mi aidabelengtewa, Wapongte aalicte bagewa gadabelengte."

<sup>13</sup> Ngic yenge kwele-moniyang ailu yowa hefeibong,

yengele dzalengineng 40 ewaliwec. <sup>14</sup> Ngaba yogo yenge hocne depec-baba ngic micne nga Yuda ngic-ngigac yengele damongfocngineng yengela hikelu yanguc edocebaibong, "Nonge nosing misa mi nono gacgu Pol we-homalubac nosing misa nodabelengte. Wiyac yogo mi aidabelengtewa, Wapongte aalicte bagewa gadabelengte. <sup>15</sup> Ilec ngengi Tutumangtowale memba yengeholec hudu-baba ngic yengele damong sugucnela yowa yan-guc lobong hikedaic, 'Ga Pol nonge Tutumangtowawa saleengka kwesilu yowaine hatacmac mihomana.' Aime yowangineng ngagelu inguc aime nonge yefewa sangkelu Pol balu webeng homadaicte."

### *Pol bengecinedi yowa ngagelu edowec*

<sup>16</sup> Inguc mibong Pol bengecinedi yowa yogo ngagelu hudu-baba ngic yengele bole-macka felu anicine edowec.

<sup>17</sup> Edome Poldi hudu-baba ngic yengele micne yengelaci monic wackelu yanguc edowec, "Ga madec yago hudu-baba ngic yengele damong sugucnela mengocke lenong. Yedi yowa monic edodaicte."

<sup>18</sup> Inguc mime ngic yedi madec yogo hudu-baba ngic yengele damong sugucnela mengocke lelu yanguc edowec, "Muc-macka ngic Pol yedi wac-nulu edocnume madec yago mengockelu welegabac. Yedi yowa gocne edogudaicte."

<sup>19</sup> Inguc milu edome damong sugucnedi madec moleina balu baicke lelu yekilackac domalu uwacnowec, "Ga oma yowa balu kwsigic, miyengka ngagelaci."

<sup>20</sup> Uwacnome madec yogodi yanguc edowec, "Yuda ngic yenge gala yowa lobong kwsinale mingagec aigaing. Kwsibong gagi Pol Tutumangtowang-inang mengockelu hikeengka yele fungineine ninic ngageningte, uuwa lobong kwsidaicte. <sup>21</sup> Kwsime mi ngagedamec. Ngic dzalengineng 40 ewaligac, yenge yefewa sangkelu Pol wehomanogale yanguc migabiyyeng, 'Nonge nosing misa mi nono gacgu Pol wehomalubac nosing nodabelengte. Nga inguc mi aidabelengtewa, Wapongte aalicte bagewa gadabelengte.' Aime yenge yowa inguc mipangkelu biyac efeckelu gale yowale wangec gagabiyyeng."

<sup>22</sup> Madec ye yowa inguc mime damong sugucnedi yowa yanguc edolu mimackelu salewec, "Ga yowa-siduc yogo kwesilu yegena edocnugic, yogo ngic monic mi edodamec."

### *Pol Sesarea macka bahikeibong*

<sup>23</sup> Aime hudu-baba ngic yengele damong sugucnedi hudu-baba ngic yengele damong yaekang wacepalu yanguc edocepwec, "Ngeke hikelu yanguc aidabiyyec, hudu-baba ngic 200 ingucti yenge higedi yefe hikedaic. Nga becosic feina ngiyecaigaing, yenge 70 ailu sangala-baba 200, ingucti efeckelu debocka 9 kilok aiyemewa Sesarea bahikedaing. <sup>24</sup> Ailu Polle becosic monic bafuwacnolu satel holecnodabiyyeng. Ailu ngenge ye akikic damongkelu gawana Feliksla bahikedaing."

<sup>25</sup> Inguc milu gawanale hibi monic yanguc milu kwelengkewec,

<sup>26</sup> Na Klodius Lisias, nani gawana ngic sugucne Feliks, gale hibi yago kwelengkegabac.

Wenac-madic.

<sup>27</sup> Hudu-baba ngic yengi ngic monic balu fugaing, Yuda ngic yengi balu wehomanogale aigaing. Aime nani ye Roma ngic-ngigac yengele alingkacni, yele inguc ngagelu hudu-baba ngic yengeholec hikelu

ngaba yengele molewacni baibeng. <sup>28</sup> Balu yowawa lobong, yogolec fungine ngagebe milu Yuda ngic-ngigac yengele Tutumangtowangi-nang bahikeiba. <sup>29</sup> Bahikebe yefe-yowangineng balaibelu ganingte ailu yowawa loibong, yogo bafuwaiba. Yogolec ailu yanguc ngageiba, "Ye yowawa loibong, yogo wehomanogale me muc-macka lonogale silicine mi aigac." <sup>30</sup> Ngic gocne yenge wele yefewa sangkelu Pol balu wehomaningte yowa milu hefeibong. Aime ngagelu gala biyac salebe fugac. Ailu Pol yowawa logabiyeng, ngic yogo inguchac salecebabe gala fulu yowaine edocgudabiyeng.

<sup>31</sup> Inguc kwelengkelu yeleme hudu-baba ngic yenge damongnginengte yowa balaibelu Pol debockahac mengocke hikegacgu Antipatris taonka hikelibong. <sup>32</sup> Mac saeme hudu-baba ngic gocne yenge macka hefaliyeibong. Aime becosicka ngiyeibong, yengi sugu Pol mengockelu Sesarea hikelibong. <sup>33</sup> Hikelu gawana hibi lacnolu Pol inguchac yele molewa loibong. <sup>34</sup> Lobong gawanadi hibi wafelu Pol uwacnowec, "Ga himonggone wenuwacni?"

Mime Poldi miwec, "Na Silisia himong sugucnacni."

<sup>35</sup> Inguc mime gawanadi yanguc edowec, "Ga yowawa locguibong, yengi kwesi fikenelebong gale yowa minoga." Ye inguc milu Pol Herodele macka lolu damongkeningte edocebawec.

## 24

### *Polyowawa loibong*

<sup>1</sup> Hadeng 5 motome depec-baba ngic yengele damong sugucne Ananias, nga Yuda ngic-ngigac micnefocngineng gocne yenge Sesarea macka hauibong. Ailu Roma ngic yengele yefe-yowale ngage-ngage ngic monic wacine Tetulus, ye yengeholec hauwec. Haulu gawanalu Polle yowa miningte fikecnobong. <sup>2</sup> Fikecnobong gawanadi Pol micname weleme Tetulusdi yele yowa milu gawana yanguc edowec, "Gawanananonggeng Feliks, ga madicne damongnubaengka kwele-mogungkolec gagabeleng. Ailu gale ngage-ngagele ailu gaganonggeng bafaliyeme madicne gabeng <sup>3</sup> macsoc nongela woc-wiyac sasawa madickelu ofegac. Yogolec gale kwele-madic ngagecaigabeleng. <sup>4</sup> Ailu yowa mibe bole-dameng wickedameckale, bawosaelu ngage-ngagesingnele yowa bangkacnemac sanangne edocgube kwele-ebecka ngagedamec.

<sup>5</sup> "Polle aibaba yanguc nganiibeng, ye mife-miwa ainolecaigac, yogo Yuda ngic-ngigac himongsoc gagabiyeng, yenge sasawa ngaba kosa bafuwayele-caigac. Ailu Nasaret habu monic yengele micne hocne gagac. <sup>6</sup> Ye Ibumac yogo wonong holenogale aime baibeng. [Balu yefe-yowanonggeng iwa wiyc aicnonangte aiibeng. <sup>7</sup> Aibeng hudu-baba ngic yengele damong Lisias, ye nga hudu-baba ngicfocine yenge momoc kwesiibong. Kwesilu dacineholec nongileng molewacni ewalicnubaibong. <sup>8</sup> Ailu yele fungine miibong, ngic yogo yenge gala kwesilu fikeningte edocebawec.]<sup>\*</sup> Aime nonge yele yowa edocgugabeleng, yogo gageuc mi-uwac aicnolu yowawa logabeleng, yogolec fungine sasawa bafuwanodamec."

<sup>9</sup> Yowa inguc mime Yuda ngic yenge bafickelu yowaine basanangkeibong.

**23:27:** Sale 21:30-33; 22:25-27    **23:28:** Sale 22:30    **23:30:** Sale 24:5-8    **24:5:** Sale 17:6    **24:6:**

Sale 21:28-30    \* **24:8:** Hibi esecne Lukadi kwelengkewec, yogo nganilu iwacni kwelengkebong kwelengkebong ofewec, yengelaci gocne hewacine 6b-8a yogowa mi fagac. Ngic-ngigac yenge hibi kwelengkeicne yogo wosaelu nganibong Lukadi mi kwelengkewec mecene.

### *Feliksle haicka yowa miwec*

<sup>10</sup> Aime gawana ye Poldi yowa minale moledihac sosoc aicnome yedi yowa bafaliyelu yanguc edowec, “Ga himong yagowa ngic-ngigac yengele mimocto-mimocto ngic hifa homacne gacaigic, yogo ngagesilu kwele-madicka mibe. <sup>11</sup> Na Yerusalem iwa Wapong afeenogale milu felu gabe hadeng 12 sugu aiwec, ga yowa yogo ngage-motonogale milu ngic uwayeleengka edocguning. <sup>12</sup> Na Ibu-mac kwelina ngic gocne yengeholec yowane fec-wac mi aiwec. Me kpakpaduc mac gocna me mac-sobengka wiyan gocne aibe kpaduckeninge monic mi aiiba. Me aibaba gocne monic aibe mi nganiuibong. <sup>13</sup> Ngic yago yenge kpolicnulu fungine milu edocgu-gaing, yowa yogo noine monic nalic mi bafuwadaingte. <sup>14</sup> Ailu monic mifickgelebe ngagec. Yesule yefe yogo gocne yengi habu monic micaigaing, yogo balaibecaigabac. Yefe yogowa ngambofocnonggeng yengele Wapong, ye hocne afeelu kwelec kwecnocaigabac. Ailu Wapongte yefe-yowa nga siduc-mimi ngic yengi yowa milu kwelengkeibong, yogo ngagesingkecaigabac. <sup>15</sup> Ailu ngic yago yakumac kpolicnugaing, yenge nga na, nonge momoc wangec gagabeleng. I yangucte, Wapongti ngic-ngigac dondonne nga dondonne miyac, yenge homackacni bacebame gboliyelu fangkedaingte, yogolec dameng bangkalegac. <sup>16</sup> Inguc wangec galu Wapongte haicka nga ngic yengele haicka kwelenedi ngage-wosaec ainagube madicne aime ganogale bole sanangne balu gacaigabac.

<sup>17</sup> “Na hifa gocne himong dalicka gacgu ngic alingfocne gocne waweweine kwele-madicka wiyan gocne yelenogale, nga Wapongte ibu lonogale Yerusalem taonka kwesiiba. <sup>18</sup> Aime gbagbacne galu aibaba gbagbacne ailu Ibu-macka felu ibu nga wiyan gocne lolu gabe bafuwacnuibong. Iwa ngic-habu sugucne me hendolongkolec mi gaiba. <sup>19</sup> Asia prowinswacni Yuda ngic-ngigac gocne, yengi sugu hendolong sugucne inguc aibong. Yengi hocne bikickolec wiyan monic balu gagabac milu gala kwesilu nale yowa edocgudabong. <sup>20</sup> Me ngic yago domagaing, na Tutumangtowawa domabe nale sowacne monic bafuwaibongka, mifickening. <sup>21</sup> Na hewacnginang domalu yowa moniyang sugu yanguc aukwelu miiba, ‘Homackacni gboliyelu fangke-fangke yogo fagac.’ Yowa yogolec yakumac gale haicka bacnulu kwesi yowawa locnugabyeng.”

<sup>22</sup> Aime gawana Feliks ye Yesule yefe siduc ngageyackegacte welock-elu yanguc sugu edocebawec, “Hudu-baba ngic yengele damong sugucne Lisiasdri Yerusalemkocni wame yowangineng mimoctodacte.” Inguc milu yowangineng fanale milu salecebawec. <sup>23</sup> Ailu ye hudu-baba ngic yengele damong yanguc edolu miwec, “Ngenge Pol damongkebong lolickedaic. Aime agofocine yenge nalic kwesilu ngani-bafic aicnodaing.”

### *Pol hifa yaeckang muc-macka ngiyewec*

<sup>24</sup> Hadeng gocne gacgu Feliks yeicne nga ngigacine, wacine Drusila, ye Yuda ngigac, yeke momochac kwesiiboc. Kwesilu Feliksdri Pol mic-nome ofelu Kristo Yesule ngage-ngagesingte fungine edocepame ngageiboc. <sup>25</sup> Ngageebcka yanguc edocepwec, “Aibaba dondonne balaibenoga. Ailu kwele nga soc madicne damongkenoga. Ailu mimocto-mimoctole dameng welegac.”

Inguc mime Feliks hangockeme Pol yanguc edolu salewec, “Nalic ga hikec, gacgu dameng monicka sawaine monic fikeneleme hatacmac wacgube

kwesidamec.” <sup>26</sup> Gawana ye hikelu yanguc ngagesiwec, “Pol muc-mackacni hegilebe wanale moneng gocne nelena.” Ye ngage-ungngine inguc fawecte damengsoc wackeme yeholec yowa mingagec ailu gaiboc.

<sup>27</sup> Gaebocka hifa yaekang motome, kiya monic wacine Pokius Festus, yedi kwestiu gawana Feliksle mac balu bole bawec. Aime Feliks ye Yuda ngic-ngigac kwele-madic ngagecnoningte Pol muc-macka ngiyeme hegilelu hikewec.

## 25

### *Polye Sisadi yowaine ngagenale miwec*

<sup>1</sup> Festus ye Yudeya himong iwa hike sulumelu gawana bole molickelu bawec. Bame hadeng habackang motome Sesarea hegilelu Yerusalem fewec. <sup>2</sup> Feme depec-baba ngic micne nga Yuda ngic sugucne yengi yela kwestiu Polle yowa mibong yegengkeme <sup>3</sup> sanangne micronlu yanguc mibong, “Ga nonge baficnubalu yowa loengka hikeme Pol ye Yerusalem iwa kwesidaic.” Yenge yefewa sangke domalu Pol wehomaningte ngagelu inguc mibong.

<sup>4</sup> Edobong Festusdi yanguc edocebawec, “Pol ye Sesarea iwa muc-macka ngiyeme na yawa kpisicnemac ngiyelu hatacmac hefaliye hikedacte. <sup>5</sup> Hikebe ngenge Pol yowawa lonogale milu ngengelacni ngic sugucne gocne yenge naholec haulu bikic monic bafuwawecka ingucne, yengi yele yowa yogo mifickedaing.”

<sup>6</sup> Inguc milu hadeng 8 me 10 ngama ingucne Yerusalem iwa gacgu Sesarea hikewec. Hikelu mac saeme mimocto-mimocto macka fengiyelu yanguc miwec, “Ngenge Pol balu ofening!” Mime balu feibong. <sup>7</sup> Balu feborg Yerusalemkocni Yuda ngic yengi ye hewalingke domalu yowa gocne haicine monic-monic homacne kpolickelu sanangnebac milu domaibong. Ailu yenge yowa yogolec noine bafuwanningte kpungkeibong.

<sup>8</sup> Aime Poldi yowangineng ameine bafaliyelu fungine yanguc miwec, “Na Yuda ngic-ngigac yengele yefe-yowangineng me Ibu-mac me ngictau Sisa, yenge monic mi basowalecebaiba.”

<sup>9</sup> Inguc mime Festus ye Yuda ngic-ngigac yengi kwele-madic ngagecnoningte Pol yanguc uwacnowec, “Ga Yerusalem iwa nalic felu iwa yowagone mimoctodacte, me?”

<sup>10</sup> Inguc mime Poldi bafaliyelu yanguc edowec, “Mac yago domagabac, yago ngictau Sisa yele mimocto-mimoctole mac hocne, ilec nale yowa yagowahac mimoctonoga. Na Yuda ngic-ngigac aibaba sowacne monic mi aiyeleiba, yogo gageuc ngagegic. <sup>11</sup> Na bikitec umactowa monic bafuwadaba ingucne, wehomacnunogale miyengka na socne nalic mi sebicnagudaba. Aime yenge kwasacka kpolickulu fungine migaiing, yogolec monicti yengele molewa nalic mi locnudaicte. Ilec ailu Roma ngictau Sisadi yowane mimoc-tonale migabac.”

<sup>12</sup> Inguc mime Festus yedi mole-baficfocine yengeholec mingagec ailu Pol yanguc edowec, “Ga ngictau Sisala hikenogale migicte yela hikedamec.”

### *Festusdi Polle siduc Agripa edowec*

<sup>13</sup> Hadeng gocne motome ngictau Agripa ye kwaime Benaisiholec Sesarea haulu Festus kwele-angacka nganiiiboc. <sup>14</sup> Ailu yeke hadeng gocne yeholec ngiye-fac aiboc, Festusdi Polle yowa-siduc ngictau Agripa yanguc edowec, “Feliksdi ngic monic muc-macka lome hauwec ngiyegac. <sup>15</sup> Aime Yerusalem

iwa fesulumebe Yuda ngic-ngigac yengele depec-baba ngic micne nga da-mongfocngineng yenge kpaduckelu nala kwesilu ngic ye webong homanale edocnuibong.<sup>16</sup> Edocnubong nani yowa ameine yanguc bafaliyeiba, ‘Ngic monic fungine mikacka weboting aicno-aicnole yefe, yogo Roma ngic non-gela monic mi fagac. Ngic yowaholec nga ngabaine yowawa lodaicte, yeke momoc fangkelu domaebocka yowa noine minoga.’

<sup>17</sup> “Tumaneibong iwa inguc bafaliyebe, iwahac mac saeme na mimocto-mimoctole macka fengiyelu Pol bakwesiningte miiba. <sup>18</sup> Inguc milu Pol yowawa loibong, yengi yele aibaba sowacne monic mifickebong ngagedacte mibe yenge mi miibong. <sup>19</sup> Yengileng habunginengte yefe fagac, yogolec fungine sugu miibong. Milu ngic monic wacine Yesu, yele yanguc miibong, ‘Ye biyac homawec.’ Aime Poldi yanguc mime yegengkewec, ‘Ye gblincne gagac.’ Ye inguc sugu miwec. <sup>20</sup> Aime na yowa yogo ngage-motonogale aibibiyelu yanguc uwacnoiba, ‘Nalic Yerusalem iwa felu gale yowa iwa mimoctonoga, me?’

<sup>21</sup> “Edobe Pol ye ngictau Sisadi yowaine mimoctonale miwec. Inguc mime, Pol ye muc-macka wangec ngiyeme gacgu yefe monic bafuwalubac Roma ngictau Sisala lobe hikenale mimoctoiba.”

<sup>22</sup> Festusdi inguc milu edome Agripadi miwec, “Naneuc ngic yeicne mick-acni yowaine ngagenogale ainelegac.”

Inguc mime Festusdi miwec, “Saeme nalic ngagedamecte.”

### *Agripa nga Benaisi yeke Pol nganiiboc*

<sup>23</sup> Mac saeme Agripa nga Benaisi yeke ngakpi hibine madicne holelu tutumang macka feiboc. Aime hudu-baba ngic yengele damong sugucne nga mac yogolec ngic micne yenge momoc balaibecepalu feibong. Aime Festusdi mime Pol momoc balu feibong. <sup>24</sup> Balu febong Festusdi yanguc edocebewec, “Ngictau Agripa nga ngic-ngigacfocne yakumac naholec ngiyegaing, ngenge edocngebabe ngagening. Ngic yago domagac, yele ailu Yuda ngic-ngigac sasawa yawa nga Yerusalem iwa wacnulu hataenelelu yanguc miibong, ‘Ye nalic mi gadaicte.’ <sup>25</sup> Aime yeuctihac Roma ngictau Sisadi yowaine mimoctonale miwecte yela salebe hikedaicte. Nga nanibac ye homanale bikic monic mi bafuwaiba. <sup>26</sup> Ailu yowa noine basackelu ngictau Sisale hibi kwelengkenogale milu kwelengkedacte. Ilec ailu ngic yago ye ngengela nga ngictau Agripa gala lobe domame ngenge fungineine ngagelu noine bafuwabong hibi kwelengkelu lobe hikedaic. <sup>27</sup> Aime nani ngic monic muc-mackacni bikicinele hibi mi kwelengkelu Roma taonka moc salebe hike-kileke ngagebe nalic mi aigac.”

## 26

### *Polyeuctihac fungineine miwec*

<sup>1</sup> Agripadi Pol yanguc edowec, “Gageuc funginegone miyengka ngage-nang.”

Inguc mime Pol ye moleine bafangkelu yeicne fungineine yanguc edocebewec, <sup>2-3</sup> “Ngictau Agripa, gagi Yuda ngic nongele aibaba nga yowa miminonggeng fagac, yogo ngageyackegic, yogo noine. Ilec kwele-angacka Yuda ngic yengi yowawa locnugabiyyeng, yogolec ameine gala midacte. Ilec ailu ngagenelelu uc mikac ngiyeengka yowane minogale uwagelegabac.”

<sup>4</sup> “Na madecnahac mac-himongnele ngic-ngigac yengeholec gaiba, ailu Yerusalem iwa gaiba. Dameng iwa aibabane ailu gaofeiba, yogolec

fungine Yuda ngic-ngigac yenge ngageyackegaing. <sup>5</sup> Aime Farisaio yefengi-neng dondonne balaibecaigaing, yengelacni monic na hocne esecne gaiba. Ailu fungine ngani-ngagec aiiba, yoglec miyengka nalic edocgudaingte. <sup>6</sup> Wapongti yowa yogo ngambofocnonggeng biyachac mipangkelu edoce-bawec, 'Yowa yogo noine fikedaicte.' Yoglec wangec gacaigabacte yaku-mac yowawa domagabac. <sup>7</sup> Israel habu 12 yenge damengsoc Wapongti wiyc mipangkeyelewec, yogo fikeyackenale wangec galu deboc hadeng Wapong afeelu kwele kwekwe gaibong. Oc, ngictau Agripa, yogo na momoc wangec gabe Yuda ngic yengi yowawa locnugabiyeng. <sup>8</sup> Aime ngegne omale Waponti homaicne bagboliyecebadaicte, yogo ngagebong mi fikedaicte ingucne aicaigac. Na homackacni gboliye fangke-fangke yogo ngagesingkegabac.

<sup>9</sup> "Ailu na esecne Yesu Nasaret-hocni, yele siducine yogo yefe haicina monic-monicka basowalenogale milu inguc aiiba. <sup>10</sup> Aime depec-baba ngic micne yengi bole-hibi neleibong, yogo balu gaiba. Galu Wapongte bingec homacnebenang muc-macka locebabe yowawa domabong wehomace-banogale mibong, na yogo nalic ainingte ngagelu gaiba. Yogo Yerusalem iwa inguc ailu gaiba. <sup>11</sup> Ailu na dameng homacne Yuda ngic-ngigac yengele kpakpaduc macnginangsoc feiba. Felu kwele-hefaliyec weboting aiyelelu Yesu misulec aicnoningte weyebic aiyelelu gaiba. Ailu aalic sugucnebenang ngageyeleiba. Ailu yogo Israel kwelina yawa sugu mi aiiba. Na himong gocne yengele taonka inguchac hikelu weyebic aiyelelu gaiba.

<sup>12</sup> "Inguc aibe depec-baba ngic micne yengi bole-yowa tapiliineholec nelelu mibong Damasko iwa bole inguchac banogale locnubong hikeiba. <sup>13</sup> Oc, ngictaune, na yefewa hikebe dameng 12 kilok aiwec. Dameng iwa honocmengkacni angoc sugucne monicti wenacte angoc ewaligac, ingucnedi wawec. Walu na nga alingfocne kwenggalangnubawec. <sup>14</sup> Kwenggalangnubame nonge himongka lodingke wawelu fabeng, Hibrus yowawa yowa malac monic yanguc fikeme ngageiba, 'Sol, Sol, ga omale weyebic ainelelu gacaigic? Ga kwele-sanang inguc aigacgu yasune micineholec yogo gageuc weengka hicgume doic ngagedamecte.\*'

<sup>15</sup> "Inguc ngagelu yanguc miiba, 'Sugucne, ga maa?'

"Mibe yanguc edocnuwec, 'Weyebic ainelecaigic, na hocne Yesu. <sup>16</sup> Ga fangkelu domac. Yakumac nale bole-madec aidamecte yoglec fikegele-gabac. Ilec wiyc yakumac nganic, nga lobewa edalicgube nganidamecte, yoglec na widecnudamecte. <sup>17</sup> Na yakumac alingfocgone nga Israel yengele alingkacni miyac, yengele molewacni bamoctocgudacte. Ailu nani yengela salecgube hikelu <sup>18</sup> ngic-ngigac dongengineng balockeengka kundung lobe holecnolu angocina gadaingte. Ailu Satangte tapili hegilelu yenge Wapongta hefaliyu hikedainete. Inguc aibong bikicnginengte ameine hegileme na Sugucne inguc ngagesingnubong gaga gbagbacne yeleicne, yengele habuwa locebadaicte.'

<sup>19</sup> "Ngictau Agripa, na gung-didicka ingucne honocmengkacni wame nganiiba, yogo mi hegileiba. <sup>20</sup> Na molickelu Damasko hikeiba. Iwacni hefaliyu Yerusalem nga Yudeya himongka hikeiba. Iwacni Israel yengele

**26:5:** Filp 3:5-6    **26:6:** Sale 23:6; 28:20    **26:9:** Sale 8:3    \* **26:14:** Dameng iwa yenge bulumakangineng oda kwelina locebano gale yasu yogodi kwelu igocebalu gaibong. Poldi Wapongte angac yogo yasu micineholec ingucne welu gawec.    **26:18:** Yes 42:16; Efs 2:2; Kol 1:13

alingkacni miyac, yengela hikelu inguc ailu gaiba. Dameng iwa yenge kwe-lengineng hefaliyelu Wapongta hikelu kwele-hefaliyecete aibaba madicne bafuaningte edocebalu gaiba.

<sup>21</sup> “Na inguc ailu gabe Yuda ngic yengi Ibu-mackacni bacnulu wehomac-nunogale aibong. <sup>22</sup> Aime Wapongti damongnulu game mic-yowaine milu gaiba, ailu yakumac migabac. Na ngic feicne waicne ngenge momoc ngiyeebongka yago domalu mibe yegengkegac. Wapongte siduc-mimi ngic nga Moses yengi wiyan fikenate milu kwelengkeibong, yogo hocne milu gagabac. <sup>23</sup> Mesia ye doic sugucne ngagegacgu homadaicte. Ailu homaicne yenge molickeyelelu gholiyelelu fangkedaicte. Fangkelu Yuda ngic-ngigac nga Israel yengele alingkacni miyac yenge momochac angocte yowa mime yegengkedaicte. Yowa yogo hocne Moses nga Wapongte siduc-mimi ngic yengi kwelengkeibong.”

<sup>24</sup> Pol ye fungineine inguc milu edocebame Festusdi aukwecnolu yanguc miwec, “Ga ngage-ngagetowagonedi kwele-sifuc bafuwageleme kapaine aigic.”

<sup>25</sup> Inguc mime Poldi yowa bafaliyelu yanguc edowec, “Gawana Festus, na kapaine mi aigabac. Na yowa noine nga dondonne migabac. <sup>26</sup> Yowa migabac, yogolec fungine ngictau Agripa ye ngageyackegacte yela efecne migabac. Yowa migabac, yogo sangke-sangke mi fikewec. Ngictau, ga ngage-ngegmonicte mi kpungkeing. <sup>27</sup> Ngictau Agripa, ga Wapongte siduc-mimi ngic yengele yowa ngagesingkegic, me? Na ngagegabac, ga ngagesingkegic.”

<sup>28</sup> Inguc mime Agripadi yanguc edowec, “Uc mikac ngiyebe mi daliweme, na Kristole aling albele edocnugic, me? Yogo miyac.”

<sup>29</sup> Inguc mime Poldi yanguc edowec, “Dameng dalicne me bangkacne, yogo mi midacte. Ga nga ngic gocne yakumac yowa yago mibe ngagegaing, ngenge nale ngage-ngagesinging ingucne hac ainingte Wapong milockegabac. Ailu senti na ingucne hac mi witicngebaningte migabac.”

<sup>30</sup> Inguc mime ngictau Agripa nga Festus ailu Benaisi nga gocne ngiyeibong, yenge fangke <sup>31</sup> lelu mingagec ailu yanguc miibong, “Ngic yogo yedi homadaicte, me muc-macka ngiye-ngiyele yefe monic mi fikegac.”

<sup>32</sup> Aime Agripadi Festus yanguc edowec, “Ngic yago ye ngictau Sisadi yowaine mimoctonale mi midecka ingucne, ga nalic lukecnoengka hikelu gadec.”

## 27

### *Pol Roma taonka hikenogale bahikeibong*

<sup>1</sup> Aime hudu-baba ngic yengele damong monic wacine Julius, ye Sisale habu yogowacni hudu-baba ngic 100 inguc damongebalau gawec. Aime Itali himongka hikenogale dameng bangkalewec. Bangkaleme ngictaudi mime Pol nga muc-macka ngic gocne Julius yele molewa locebaibong. Aime yedi bacebame yenge momoc lac-wagewa feibong. <sup>2</sup> Nga lac-wage yogo Adamantium taonkacni, ailu Asia prowins mesuina balaibelu taon falegackasoc, iwa hikenogale aime feibeng. Ailu Tesalonika taon Masedonia prowins, iwacni ngic monic wacine Aristakus, yeholec nonge momoc hikeibeng.

<sup>3</sup> Mac saeme lac-wage Saidon taonka hike sulumelu iwa domaibeng. Domabeng Juliusdi Pol ago aicnolu ngagecnone taonka hikelu agofocine nganicebame ngani-bafic aicnoibong. <sup>4</sup> Aime lac-wagewa hatacmac felu taon yogo hegileibeng. Hegilebeng gbelongti kwesilu hedicnubame yefe

lilolu Saiparus nuc nga Asia prowins hewacnginac hikeibeng.<sup>5</sup> Hikelu Silisia nga Pamfilia prowins falockelu hikegacgu Lisia himongka Maira taon iwa hike sulumelu hauibeng.<sup>6</sup> Aime iwa Aleksandia taonkacni lac-wage monic domalu Itali himongka hikenogale aiwec. Aime hudu-baba ngic yengele damongti lac-wage yogo nganilu iwa bacnubame feibeng.<sup>7</sup> Felu hadeng gocne uneng-uneng doic-bole bahikecgu Nidus taon ngiyewecka-haic hikeibeng. Hikebeng gbelongti wecnubame Krit nucka-haic hikeibeng. Hikegacgu nuc yogolec mesuine monic wacine Salmone falockeibeng.<sup>8</sup> Falockelu Lasea bangkalelu kiwec madecna monic fawec, wacine Wage Nalic Domadaingte, nonge doic-bole bagacgu iwa hauibeng.

### *Poldi sawang-yowa edocebawec*

<sup>9</sup> Kiwecka dameng dalicne gabong mac-gbelong dameng bangkalewec. Bangkaleme basowalecnubadaickale, Poldi sawang-yowa yanguc miwec,<sup>10</sup> “Ngic, ngenge ngagening, yago nganilu ngagegabac. Entacka hikedabelengtewa, nongileng basowale-benangkebeng woc-wiyac homacnehacbenangti kiwecka hauyackedaingte. Lac-wage nga mafa sugudi mi hau-daingte. Ngic nongileng momoc kiwecka haudabelengte, ingucne aigac.”<sup>11</sup> Inguc edocebame hudu-baba ngic yengele damong yedibac Polle yowa mi ngagesingkewec. Ailu ye wagele damong nga wage fileine yekele yowa ngagelu balaibewec.<sup>12</sup> Ailu kiwec madecna yogo nganibong lac-wagedi iwa mac-gbelongkolec dodomalesoc mi aiwec. Inguc aime yenge yogo hegilelu Krit nucka madecna monic fawec, wacine Finiks, iwa nalic haulu domaebongka mac-gbelong dameng miyac ainale homacnedi miibong. Iwa lai gbelong sanangnedi mi wecaigac, yafaladi sugu efecnemac wecaigac.

### *Lac-wage kiwecka haunogale aiwec*

<sup>13</sup> Aime kiwecka gbelong gbelong madicne weme lac-wage ngic yengi miibong, “Nalic hikedabelengte.” Milu angga fuluckebong ofeme Krit nuc kwegegengkelu hikeibeng.<sup>14</sup> Hikebeng dameng mi daliweme lai gbelong sugucnedi nuc falockelu lac-wage magocina sanangnehac wewec.<sup>15</sup> Welu lac-wage igockeme aibibiyelu hegilebeng gbelongte angacka hikeme hikeibeng.<sup>16</sup> Hikegacgu nuc kpisicne monic wacine Kauda, yogolec siyacina hikebeng dinggi kiwecka haunogale aiwec.<sup>17</sup> Aime doic-bole bagacgu dinggi lac-wage feina fuluckebong ofeme hefebong fawec.

Fame lac-wage siyeckedaickale, mucti basanangkelu wapiyeibong. Wapiyelu hefebong Siriti dingong faticna\* iwa fedabelengkale, hangocebawec. Hangocebame lac-wage gumoinele kpoluc sugucne fuluckebong wame gbelongti fitolingnubame hikeibeng.<sup>18</sup> Hikebeng gbelong tapiliineholec welu fame basowalecnubadaickale, mac saeme mafa gocne kiwecka wickebong hauwec.<sup>19</sup> Haume deboc hadeng habackang aime lac-wagele bolele woc-wiyac wickebong hauwec.<sup>20</sup> Haume deboc hadeng homacne gbelong sugucnedi welu fawec. Fame nonge wenac me asocmeng monic mi fikeme nganilu ngage-ngagesingnonggeng fongkeme wasecne mi gadabelengte, inguc ngageibeng.

### *Ngic mibasanang aiyelewec*

<sup>21</sup> Aime ngic yenge dameng dalicne nosing misa hegilelu gacgubong Poldi lelu hewacnginang domalu yanguc edocebawec, “Ngic, ngenge nale yowa

\* **27:17:** Siriti dingong faticna yogo Afrika himongka fahikegac.

ngagedabong, ibac nongileng Krit nuc mi hegiledabeng. Ailu foinac, lac-wage mi sowaleme mafa nalic mi wicebadabeng.<sup>22</sup> Aime yanguc edocngebabe, nongileng hewackacni monicti mi miyac aidaicte. Ilec kwelengineng mi wadaic. Lac-wagedi sugubac kwosockedaiete.<sup>23</sup> Awecnahac debocka na Wapongne afeelu kwele c kwekwe gagabac, yele angelo monicti nala kwesi domalu<sup>24</sup> yanguc edocnuyec, 'Pol, mi hangocguna. Ga Roma ngictau Sisa yele haicka domadamec, yogo fikedaicte.' Ngagegic, Wapontgi gale mimilote ailu yanguc migac, 'Ngic yago ngenge lac-wagewa gagaing, ngengelacni monicti mi miyac aidaicte.'<sup>25</sup> Ilec ngic yago ngenge kwele lingeneng madickena. Wapontgi yowa edocnugac, inguc fikedaicte, yogo ngagesingkegabac.<sup>26</sup> Aime lac-wagedi sugu nuc monicka feme hegilebeng kwosockedai."

<sup>27</sup> Inguc mime Adaria kiwecka<sup>†</sup> fabeng iyongnubame gaebeengka deboc hadeng 14 aiwec. Aime deboc hewac-hewac lac-wagele ngic yenge himong bangkalegac, inguc ngageibong.<sup>28</sup> Ngagelu dingong sawaine bangkalegac milu maaine wickebong haume mitaine 37 aiwec. Aime hikelu maaine hat-acmac wickebong haume mitaine 27 aiwec.<sup>29</sup> Aime posa feina fedaingkale milu, hangocebame wage haina angga 4 wicebabong haubong mac saenale milockebong.<sup>30</sup> Milockebong lac-wagele bole-ngic yenge wage hegilelu hikenogale ngagesilu wage dinggiine lobong haume kwasac ailu yanguc miibong, "Nonge lac-wage mesuina angga monic wickebeng haudaicte."<sup>31</sup> Inguc mibong Poldi hudu-baba ngic yengele damong nga ngicfocene yanguc edocebawec, "Entacka wagele ngic hikeyackedaingte, ibac ngenge wasecne mi aidaingte."<sup>32</sup> Inguc edocebame hudu-baba ngic yenge dinggile muc helockebong dinggi sugudi kiwecka hauwec.

<sup>33</sup> Haume mac sae-saele Poldi ngic yenge nosing noningte sanangnehac yanguc edocebawec, "Ngenge umacka nosing hegilelu gacgubong, yakumac hadeng 14 aigac.<sup>34</sup> Gobengineng nosingte aime nosing mi nono gacgu homadaingkale, sanangnehac migabac. Ngenge kwele-yaec mi aining, ngenge sasawa wasecne aidaingte."<sup>35</sup> Inguc mime yenge sasawadi nganibong dongenginang bret monic balu Wapong kwele-madic micnolu bauck-elu nowec.<sup>36</sup> Nome yenge yogo nganilu kwelengineng madickeme yenge inguchac nosing noibong.<sup>37</sup> Ngic-ngigac lac-wagewa gaibeng, nonge dzalenonggeng 276.<sup>38</sup> Aime nosing nobong gebecebame lac-wage efeckenale milu wit homacnedi wagewa fawec, yogo kiwecka wickebong haume wage efeckewec.

### Lac-wage sowalewec

<sup>39</sup> Mac saeme himong nganibong. Ailu himong yogo mi ngage-motoibong. Ailu kiwec madecna monic posa mikac dingong sugu fame yenge yogo nganilu wage iwa nalic haunale miibong.<sup>40</sup> Inguc mibong ngic yenge angga mucngineng heloebebong kiwecka hauyackeibong. Haubong dingongka haunale lac-wagele puli mucngineng lukelu kpoluc kpisicne hefelu fuluckebong fewec. Feme gbelongti kpolucka weme kiwec heuckeme dingongka hikeibong.<sup>41</sup> Hikelu kiwec hewacka dingong monic ofelu fawec, iwa felu lac-wage mesuina hifidackeme sanangkewec. Sanangkeme dibong sugucnedi lac-wage haine weme siyeckeyackelu kpisic-kpisic ainogale aiwec.

<sup>42</sup> Lac-wage siyeckeme muc-macte ngic yenge fifiyac balu hikedainkale, hudu-baba ngic yenge muc-macte ngic wehomacebanogale miibong.

<sup>43</sup> Inguc mibong hudu-baba ngic yengele damongnginengti Pol agong holecnonale ngagewec. Inguc ngagelu yenge kpatalayelelu yanguc edocebawec, "Fifiyac babaine ngenge kiwecka molickelu wintacke haulu fifyac balu dingongka fedaing. <sup>44</sup> Aime gocne nonge katapa feina falu ilungkedabelengte, nga gocnedi lac-wage siyeckegacte sindacinele feina falu ilungkedaing." Nonge nongileng momochac inguc aihu sasawadi dingongka feyackebeng. Aime nongelacni monicti mi sowalewec.

## 28

### *Malta nucka feibong*

<sup>1</sup> Nonge kiwec dingongka madicne felu domaibeng. Domalu ngageibeng, nuc yago wacine Malta wackecaigaing. <sup>2</sup> Aime nuc yogolec ngic-ngigac yengi bacnubalu mac-gbelong damengte aihu dac sugucne fitobong lobeme ngiyeibeng. Aihu aibaba madicne gocne ingucne homacnebac ainoleibong. <sup>3</sup> Aime Poldi dac kwiliini kpaduckelu dodocke welelu dacka lome lobewec. Lobeme hema monic socine dacine aime ngagelu dac kwiliini kwelinacni ofelu Pol moleina hilu kpetiyangkelu domawec. <sup>4</sup> Inguc domame nuc yogolec ngic-ngigac yenge yogo nganilu mingagec aihu yanguc miibong, "Ngic yogo ye ngic wehomacebacaigac, ye kiwecka haulu mi homagac, yogo noine. Aihu ye dingongka yawa ofeemewa ameine welecrogac homadaicte." <sup>5</sup> Inguc mibong Pol ye hema wepackeme motolu dacka fewec. Aime socina wiyc monic mi fikewec. <sup>6</sup> Yenge yogo nganilu yanguc miibong, "Hema micine higacka iwa suguledaicte, me ye wawelu homadaicte." Inguc milu wangee domabong socina umac monic mi fikeme yenge yogo ngani-ngagac aihu yanguc miibong, "Ngic ye wapong monic."

### *Poldi huckolec bamadicebawec*

<sup>7</sup> Nuc yogolec ngic sugucne monic wacine Publius, ye mac-himongngine eme-eme fawec. Ilec yedi mac holonolelu locnubame hadeng habackang yeholec ngiye-fac aiibeng. <sup>8</sup> Aime Publius mamacline ye macka soc-dac huc, nga haa wicwic aincname fawec. Fame Poldi macina felu moleine socina lolu milockelu ngic bamadickewec. <sup>9</sup> Bamadickeme madickeme nuc yogolec ngic-ngigac yenge siduc yogo ngagelu huckolec yenge homacnebac kwestiyackebong inguchac bamadicebawec. <sup>10</sup> Bamadicebame ngic-ngigac yenge kwele-madictowa ngagenolelu hike-hikele dameng bangkalewec. Bangkaleme yefele noba-nosing nga moneng-mafa baficnubalu nolelu lac-wagewa locnubaibong.

### *Pol Roma taonka hike sulumewec*

<sup>11</sup> Lac-wage monic mac-gbelong damengte iwa domalu gawec. Aime tamacne habackang motome nonge wagewa felu hikeibeng. Lac-wage yogo Aleksandria taonkacni, aime mesuina siduc-gbong monic domawec, wacine Kasto nga Polukis. Kasto nga Polukis yeke fucsengeng. <sup>12</sup> Hikecgu Sirakus taonka hike sulumeibeng. Aihu iwa haulu hadeng habackang gaiibeng. <sup>13</sup> Aihu hatacmac lac-wagewa felu taon yogo hegilelu Regium taonka hikelu ngiyeibeng. Yogowa ngiyeibeng saeme lobenonggang yefe yafala gbelong weme hadeng monic motowec. Motome Puteoli taonka hikeibeng. <sup>14</sup> Hike sulumelu iwa haulu ngic hae-gbafoconngeng gocne bafuwacebabeng sanangne sebicnubabong hadeng 7 yengeholec ngiye-fac aiibeng. Aihu iwacni hige-yefe Roma hikenogale hikeibeng. <sup>15</sup> Hikebeng

ngic hae-gbafocnonggeng Roma taonka gaibong, yenge siducnonggeng biyac ngageibongte ailu, gocne yengi kwesicgu Apius yengele kpakpaduc sobengka bafuwacnubaibong. Nga gocne yengi mac monic wacine Yowamac Habackang, iwa bafuwacnubaibong. Bafuwacnubabong Poldi yenge nganicebalu Wapong kwele-madic micnolu angac ngagelu tapiliholec aiwec.

### *Poldi Yuda ngic-ngigac yowa edocebawec*

<sup>16</sup> Roma taonka hike sulumebeng Pol muc-macka mi loibong. Ye mac monicka ngiyenale nalic micnoibong. Ye iwa ngiyelu gacgu hikedackale, hudu-baba ngic monicti ye damongkelu gawec. <sup>17</sup> Ye inguc ngiyeme hadeng habackang aime Yuda ngic-ngigac yengele damongfocnonggeng wacebawec. Wacebame kwesilu yeholec momoc ngiyebong yowa yanguc edocebawec, "Ngic hae-gbafocne, na Yuda ngic-ngigacfocnonggeng yengele wacngineng mi bawaiba. Me ngambofocnonggeng yengele yefe-yowa nga aibabangi-nengte mife-miwa mi aiiba, yogo foinac. Aime yenge Yerusalem iwa moc bacnulu Roma ngic yengele molewa locnuibong. <sup>18</sup> Locnubong Roma ngic yengi fungine mi-uwac ainelelu fungine mikacka wehomacnunogale miibong. Ailu bikicnele umac basackelu lukanelenogale miibong. <sup>19</sup> Inguc milu Yuda ngic yengi yowa yogolec gulung bacnubong welockyelelu ngictau Sisadi yowane mimoctonale miiba. Nani Yuda ngic-ngigac yengele yowa monic yawa bakwesilu minogale mi kwesiiba. <sup>20</sup> Na yogo hocne ngagelu ngengeholec mingagec ainangte wacngebabe kwesigaing. Israel ngic-ngigac nongileng Wapong mimipangnginele noine fikedaicte, yogolec wangec ganangte ailu, sen yago moleña witicnubong gagabac."

<sup>21</sup> Inguc mime yanguc miibong, "Yudeya himongkacni gale hibi monic mi lobong kwesime nganiibeng. Me ngic hae-gba monic salebong kwesilu gale bikicte yowa monic mi edocnubame ngageibeng. <sup>22</sup> Ilec wiyc ngagegic, yogo gageuc miyengka ngagebeng nalic aigac. Ga habu monic migic, yogo macsoc lobe-yowa alibong ngagelu gagabeleng."

<sup>23</sup> Inguc milu tutumangte dameng monic miibong, dameng yogo weleme Yuda ngic-ngigac homacnedi Pol mac ngiyewecka tumaneibong. Tumanebong, yedi Wapongte ngani-damongte fungine mime yegengkeyelewec. Ailu ye Wapongte yefe-yowa Mosesdi kwelengkewec, nga Wapongte siduc-mimi ngic yengele yowa, yogo wafeme yenge yengileng ngage-ngagengineng hegilelu Yesu ngagesingkeningte milu edocebame yegengkelu gawec. Ye ubiyactehac molickelu inguc milu gacgume mac debolewec. <sup>24</sup> Ngic gocne yenge yogo ngage-motolu yeholec kwelemoniyang aiibong. Nga gocne yengi mi ngagesingkeibong. <sup>25</sup> Aime Yuda ngic-ngigac yenge yengungtihac yowanginengti fec-wac aime, Poldi yowa moniyang sugu yanguc edocebawec, "Tili Asudi Wapongte siduc-mimi ngic Yesaiyale micka lome ngambofocnonggeng yengele yowa yanguc miwec.

<sup>26</sup> 'Ngic-ngigac hedecti ngagecaigaing, yenge yogo ngagelu nalic mi ngage-motodaingte.

Ailu dongedi nganicaigaing, yenge yogo nganilu nalic mi ngani-motodaingte.

<sup>27</sup> Ngic-ngigac aling yago yenge kwelengineng fongkecaigac. Nga hedecngi-nengti yowa ngageningte hedecngineng fongkecaigac. Ailu dongengi-nengti wiyc nganinogale kundung kwecaigac.

Yenge dongenginengti wiyc monic nganidaingkale, nga hedecnginengti ngagedaingkale ailu, ngage-ngagenginengti wiyc monic ngage-motodaingkale,

Ilec yogo yenge kwelengineng wenucka hefaliyeme bamadicebadaba.' (Yes 6:9-10)

Yesaiyadi ngambofocnonggeng inguc edocebawec, ngenge yenge ingucne-hac. <sup>28</sup> Ilec edocngebabé ngagening, Waponti bikicte ameine babale yefe bafuwawec, yogo Israel yengele alingkacni miyac, ngic-ngigac yogo yengele aling hocne aigac. Yengi yowane ngagelu wasecne aidaingte." <sup>29</sup> [Pol ye inguc mime ngagelu yenge hegilelu hikeibong. Hikelu yefewa Yuda ngic-nigac yengungtihac yowanginengti fec-wac ainagume hikeibong.]\*

### *Roma taonka hifa yaeckang gawec*

<sup>30</sup> Pol yeuctihac mac kwilic fuli balu hifa yaeckang iwa game ngic-nigac yenge yela hike-kwesic ailu gaibong, yogo yenge macka locebalu gawec. <sup>31</sup> Locebalu hangoc mikacbenang galu Wapongte ngani-damongte edoce-balú weduyelewec. Ye Sugucne Yesu Kristole fungine weduyelelu game monicti boleine monic mi welockecnowec.

Salecebaicne yengele siduc yogo sugu motogac.

---

\* **28:29:** Hibi esecne Lukadi kwelengkewec, yogo nganilu iwacni kwelengkebong kwelengkebong ofewec, yengelacni gocne hewacne 29 iwa mi fagac. Ngic-nigac yenge hibi kwelengkeicne yogo wosaelu nganibong Lukadi mi kwelengkewec mecene.

## Poldi Roma **Habu Yengele Hibi Kwelengkewec**

### *Mimi-yegeng yowa*

Yesu homackacni gboliyelu honocmenga feme hifa 25 ngama ingucne motome, Pol ye Korin taonka gawec. Dameng iwa Pol ye Roma taonka mi hikeluhac hibi yago kwelengkewec.

Roma yogo taon sugucnebenang Itali himongka ngyiegac, ngic-ngigac himong bocayac yengelaci iwa hike-kwesic gaibong. Roma gamang ye himong gocne damongkelu gawec, Roma iwa damong sugucnengineng Sisa wackebong gawec.

Aime ngic-ngigac gocnedi Yesu ngagesingkelu Roma iwa gaibong. Gocne yenge Yuda ngic-ngigac, wacngineng monic Israel ngic-ngigac. Nga gocne yenge Grik ngic-ngigac, ailu ngic-ngigac gocne himong gocnacni. Poldi hibi yago kwelengkelu ngigac monic wacine Fobe, ye lacnome bahikelu ngic-ngigac yogo yelewec.

### *Yowa yago hibi nebocina fagac*

1:1–17 Mimi-madic yowa nga hibile fungine

1:18–3:20 Ngic-ngigac sasawa sowacnebenang ailu bolengineng madic-nele yefe balaibegaing, yenge gaga-sanang mi badaingte

3:21–4:25 Kristo ngagesingkegaing, yogo yengi sugu Wapongte haicka dononne aigaing

5:1–8:39 Yesuholec wetackelu gagaing, yengi gaga gbolicne balaibegaing

9:1–11:36 Israel ngic-ngigac yenge Wapong hegileibong. Lobewa wace-bame hefaliyelu ngagesingkedaingte

12:1–15:13 Ngic-ngigac ngage-ngagesingkolec yenge yefe gbolicne bal-abedaingte

15:14–16:27 Yowa moto-motoine nga wenac-madic yowa

### *Hibile molic-molic yowa*

<sup>1</sup> Na Poldi hibi yago kwelengkebabac. Na Kristo Yesule kwelec kwekwe ngic. Wapongti bawosaecnulu wacnume na salecebaicne bole balu yeicne Siduc Madicne mibe yegengkedaic. <sup>2</sup> Yedi Siduc Madicne yogo hocne esecne siduc-mimi ngic yengeholec yowa hefelu kwesinale mime yenge yowa yogo Wapong yeicne hibiwa sugu kwelengkeibong fagac. <sup>3</sup> Siduc yogo yanguc, Wapongte Madec, ye soctepecka Dawidile fikesaweckacni ngic fikewec. <sup>4</sup> Aime asu gbagbacnelepecka yele yanguc mime yegengkewec, ye hocne homackacni gboliyelu fangkewec. Yogodi yanguc edallicnubagac, ye Wapongte Madec tapiliholecbenang. Yogo Sugucnenonggeng Yesu Kristole Siduc Madicne. <sup>5</sup> Wapongti kwele-madic moc ainolelu salecebaicne bole nolewec. Noleme nonge Kristole wac sugulenale Israel yengele alingkacni miyac, yengele hewacka yowaine mibeng yegengkewec. Aime yenge yele yowa ngagesingkelu balaibedaingte. Ilec nonge bole yogo balu gagabeleng. <sup>6</sup> Aime Wapontgi ngenge inguchac wacngebame Yesu Kristole aling aigaing.

<sup>7</sup> Wapong alingfocene kwele-angacine Roma taonka ngenge wacngebame yele bingec gagaing, ngengele kwe lengkenegelegabac. Aime Mamac-nonggeng Wapong nga Sugucnenonggeng Yesu Kristo, yekele kwele-madic nga kwele-mogungtowadi ngengela fadaic.

### *Poldiyugucebawec*

<sup>8</sup> Molickelu ngic-ngigacfocine ngengele ngagesilu Yesu Kristole wacka Wapongne milockelu kwele-madic edolu gagabac. I yangucte, ngengele ngage-ngagesingte yowa-siduc yogo himongne himongne ngic-ngigac yengela hikeme edonagulu ngageibongte inguc milockecaigabac. <sup>9-10</sup> Na milockecaigabac, iwa damengsoc ngengele ngagesilu milockecaigabac. Wapong ye yogo ngagecaigac. Aime afeelu kwelec kwecnolu yeicne Madecinele Siduc Madicne mibe yegengkecaigac. Ailu na damengsoc asunedi Wapong milockecaigabac. Ilec ailu ye ngageme nalic aime naneicne ngengela biyac fudacte.

<sup>11</sup> Fudacte dameng iwa ngengeholec momoc galu asule kwele-madicte wiyc yogo ngengi sanangkeningte ngengela bayackedacte, yogolec homacne ainelegac. <sup>12</sup> Na yanguc ngagelu yogo migabac, na ngengela fube nongileng ngage-ngagesingnonggeng sanangnehac domame nongileng momochac basanang-nagudabeleng. <sup>13</sup> Ngic hae-gbafocone, yanguc ngageningte ainelegac. Na Wapongte bolele noine yogo Israel yengèle alingkacni miyac, yengèle hewackacni bacebacaigabac. Silicne ingucnehac ngengela fudacte, iwa Wapongte bolele noine gocne bacebadacte. Ailu yogolec dameng homacne funogale aibe wiyc gocnedi hefcnulu gagac.

<sup>14</sup> Na Grik ngic-ngigac nga himong monickacni ngic-ngigac, yenge Siduc Madicne milu edocebabe yegengkedaicte. Ailu ngic ngage-ngageholec nga ngage-ngagengineng mikac, yengela Siduc Madicne mamang hidulu mibe yegengkeme bolene yogodi ameine baduyeledaicte. <sup>15</sup> Ilec ailu Roma taonka ngic-ngigac gagaing, ngengela inguchac Siduc Madicne mibe yegengkenale kwelene efeckecaigac.

### *Ngage-ngagesingte yefewa dondonne gaga*

<sup>16</sup> Siduc Madicne yogo Wapongte tapili. Yogodi ngic-ngigac sasawa ngagesingkecaigaing, yenge bikite ameine bame wasecne aidaingte. Ilec ailu na Siduc Madicnele ngagebe gameineholec mi ainelecaigac. Yowa yogo Yuda ngic-ngigac yengela molickelu hikegacgu Grik\* yengèle alingka momochikewec. <sup>17</sup> Siduc Madicne iwa yanguc fikelu yegengkecaigac, Wapongti ngic-ngigac dondonne wacebacaigac, yogo ngage-ngagesingka sugu. Ailu yowa yanguc biyachac kwelengkeicne fagac,  
“Monic ye ngage-ngagesingkolec, Wapongti dondonne wackeme gaga-sanang gadaicte.”

(Hab 2:4)

### *Wapongte aalic honocmengkacni wadaicte*

<sup>18</sup> Ngic-ngigac yenge Wapongte pasi nga yowa lobe holecnolu yefe ewalicaigaing. Ailu sowacnenginengti yowa noine hedickecaigac. Ngic-ngigac yogo yengèle ameine Wapongti aalicineholec honocmengkacni baduyelecaigac, yogo momoc fikelu yegengkegac. <sup>19</sup> Wapong yeuctihac wiyc sa-sawaine iwa fungineine ngic-ngigac yogo yengèle hewacka bawec, aime

---

<sup>1:7:</sup> Him 6:25-26    <sup>1:9-10:</sup> Sale 19:21; Rom 15:23    <sup>1:13:</sup> Sale 19:21    \* <sup>1:16:</sup> Dameng gocna Israel yengèle alingkacni miyac yogo yenge “Grik ngic-ngigac” wacebalu gaibong.    <sup>1:16:</sup> Mrk 8:38; 1Kor 1:18-24; Sale 13:46    <sup>1:17:</sup> Rom 3:21-22

yegengkeme nganicaigaing. <sup>20</sup> Ailu molickelu himongtowa bafuwaweweck-acnihac ofegacgu yanguctihac gagabeleng, iwa yeicne mole-hibile silicine fikeyeleme nganicaigaing. Yeicne dongedi mi nganicne, yogo tapili fileine moto-motoine mikac gawecti gaginiwagac. Ailu ye Wapong silicine, yenge yogo ngani-motolu gacaigaing. Ilec monicti yowa monic migbedic ailu yanguc nalic mi midaicte, "Wapong mi ngage-motogabac."

<sup>21</sup> Yenge Wapong ngagegaing, ailu wacine mi bafechaigaing. Ailu ye Wapong yogo ngagegaing, ailubac yenge ye kwele-madic mi micaigaing. Yengebac ngage-ngagengineng kwesacine, yogodi pasi bame donge-pisic ailu kwelengineng fongkeme, kundungti kwele ngage-ngagengineng someckecaigaing. <sup>22</sup> Yenge inguc galu yanguc micaigaing, "Nonge ngage-ngage-motockolec." Inguc milu soge-kpekpeng ailu dabiyelu gacaigaing. <sup>23</sup> Ailu yenge Wapong homacine mikac gagaineholec, yele wac feicne hegileibong. Hegilelu ngic homacaigaing, yengele ngani-ngani ingucne moledi balu nango nga bec-sic ailu hema yengele ngani-ngani ingucne gocne momoc moledi bacaigaing. Yogodi Wapongte silic ingucne aime balu lobong domame alang bacebacigaing.

<sup>24</sup> Inguc aicaigabiyengte ailu Wapontgi hegilecebame yengileng kwelengi-nengte angacka yenge gaga kosaine aigacgu aibaba gameineholec socngi-nengti ainagucaigaing.

<sup>25</sup> Wapontgi wiycasasawa mime fikeibong, yela mimitengt mimiteng fafegidaic, yogo foinac. Aime yengebac Wapongte yowa noine hegilelu kwesac-yowa balaibecaigaing. Aime wiycasasawa mime fikeibong, ngic-nigic yenge ye alang bacno-bacno pasi yogo hegilelu yele bagewa mi gacaigaing. Yedi mime wiycasasawa fikeibong, yenge wiycasasawa yogo afeebalu yengele kwele kwecaigaing. <sup>26</sup> Ilec ailu Wapontgi hegilecebame yenge kwele fangke-fangke aibaba gocne gameineholec aicaigaing. I yangucte, ngigac ngickolec yengi aibong ngagecaigabeleng, yenge yefe yogo hegilelu aibaba gocne ngigactihac mi aicaigaing, yogo yenge ngigac yengungtihac inguc ailu gacaigaing. <sup>27</sup> Aime ngic yenge yefe yogo-hac ngigackolec gaga gabong ngagecaigabeleng, yenge yogo hegilelu ngicti ngic agofocngineng gocne yengeholec selo-boic aibaba gameineholec ainogale kwelengineng kwefangkeme inguc ailu gacaigaing. Ngic-nigic inguc aicaigaing, yenge yengungtihac aibabangineng gameineholec ailu gabong, yoglecsoc ameine gaganginang aibaba dondonne balaibelu baduy-elecaigac.

<sup>28</sup> Ngic-nigic yenge Wapongte ngagebong wiycasasawa omane aime, ye lobe holecnolu hegilecaigaing. Ilec ailu Wapontgi inguchac hegilecebacaigac. Hegilecebame yenge yengileng angacngineng balaibelu aibaba ngicti mi aicaigaing, yenge yogo ailu gacaigaing. <sup>29</sup> Aime yengele kwelewa aibaba sowacne haicina monic monicti wakeyackeicne fagac. I yangucte, yenge ngic-nigic dondonne miyac. Yenge ngabaholec galu hane nga sisipilic aibaba ailu gacaigaing. Yenge hasowac ailu ngic wecebabong homacaigaing. Ailu ngabawa yuwenac aicaigaing. Ailu yenge kwesacka nga ngabawa ngic basowalecebacaigaing. Ailu lobe-yowa kwecaigaing. <sup>30</sup> Ailu yenge micka lolo nga Wapongte takicebabenangkeme kweledi wickelu gacaigaing. Ailu yengungtihac ngagebong feicne aime galu soc bafele aibaba nga yowadi yengileng feicne milu gacaigaing. Ailu aibaba sowacne gblonicne bafuwalu nenggac-mamacfocngineng yengele yowa welu gacaigaing. <sup>31</sup> Ailu yenge

ngage-ngagengineng mikac galu yengileng yowangineng hegilecaigaing. Yenge ngic-ngigac agofocngineng yengele angac monic mi ngagecaigaing. Ailu ngic-ngigac yengele kwele-sowac monic mi ngagecaigaing.

<sup>32</sup> Ngic-ngigac aibaba sowacne ingucne aicaigaing, yenge homadaingte hocne. Wapongti yefe dondonne inguc migac, yogo ngagegaing. Ailubac sifu aibaba ingucne aicaigaing. Ailu yogo sugu miyac, gocne yengi aibaba sowacne ingucne ailu gabong, yenge yogo nganicebalu madicne micaigaing.

## 2

### *Madicne nga sowacnele wowosae*

<sup>1</sup> Ilec ailu, ngic me ngigac, ga ngagegic. Ga ngic-ngigac gocne yengele aibabangineng wosaelu yenge bikicnginengkolec inguc midamecte, dameng iwa gageicne yenge ingucnehad bikicgoneholec aigic, yogo mificnagudamecte. Ailu yenge ngani-wosaec aiyelelu, "Ngenge bikicnginengkolec," inguc migicte, gageicne inguchac mificnagugic. I yangucte, gageicne aibabagone yogo yenge aicaigaing, silicine ingucnehad aicaigic. <sup>2</sup> Aime ngic-ngigac aibabangineng ingucne aicaigaing, yenge Wapongti yefe noine iwa wosaecebalu bikicnginengte ameine yeledaict, yogo ngagegabeleng. <sup>3</sup> Aime ngic me ngigac, ga wenuc ngagesigic? Ngic-ngigac gocne aibaba ingucne ailu gacaigaing, ga yengele aibaba wosaelu bikicnginengkolec aigaing micaigic. Aime gageicnebac aibaba ingucnehad ailu gaengka Wapongte wowosae damengka migbedic yowa gocne milu hikenogale ngagegic, me? Yogo miyachenang. <sup>4</sup> Me Wapongti babafic ulucnebenang aigelelu tatakic mikac wangecgone dameng dalicne gacaigac, yogo lobe holecnogic, me? Yogo mi madickegac. Aime kwelegone hefaliyenale Wapongti madicneholec baficgucaigac, ga yogo mi ngage-motogic, me? <sup>5</sup> Aime ga kwelegone fongkelu mi hefaliyeme gagicte bikicgone bakpaduc ailu Wapongte aalic badamecte. Aime aalicine badu-badule damengtowa kwesime ameine dondonne badugeledaict. <sup>6</sup> I yangucte,

"Wapongti ngic-ngigac filesoc filesoc aibabangineng ngani-ngagec aiyelelu ameine baduyeledaict."

(Mige 62:12; Ynn 24:12)

<sup>7</sup> Monic ye mamang hidulu aibaba madicne bagacgu wac feicne nga alang-baba ailu gaga-sanang banogale aicname bole sugucne balu gagac, Wapongti ye gaga moto-motoine mikac lacnodaict. <sup>8</sup> Aimebac monic ye yeicnele sugu ngagelu yowa noine mi balaibecaigac. Ailu yefe dondonne hegilelu sowacne balaibecaigac, Wapongti yele aalickeme bikicte ameine lacnodaict. <sup>9</sup> Aime ngic-ngigac aibaba sowacne ailu gacaigaing, yenge sasawadi doic nga kwele-umac bafuwadaingte. Yogo Yuda ngic-ngigac yengi molickelu bafuwabong, Grik ngic-ngigac yenge momoc ingucnehad bafuwadaingte. <sup>10</sup> Ngic-ngigac aibaba madicne ailu gacaigaing, yengebac sasawadi wac feicne nga alang-baba ailu kwele-mogung bafuwadaingte. Yogo Yuda ngic-ngigac yengi molickelu bafuwabong, Grik ngic-ngigac yenge momoc ingucnehad bafuwadaingte. <sup>11</sup> Aime Wapongta feicne waicne monic mi fagac.

### *Silic moniyang ainagucaigaing*

<sup>12</sup> Ngic-ngigac Wapongte yefe-yowa yengela mi loicne fagac, yenge bikic bafuwabong, Wapongti yefe-yowa mikac yenge sasawa sowacnele aling mimoctocebame homadaingte. Aime ngic-ngigac yefe-yowale bagewa

galu bikic bafuwagaing, yenge yefe-yowadi yowawa locebayackeme bikicnginengkolec gacgu homadaingte. <sup>13</sup> Aime ngic-ngigac aibabanginengti yefe-yowa balaibedaingte, yenge Waponti nganicebalu dondonne wacebadaicte. Nga ngic-ngigac yefe-yowa hedecti sugu ngagecaigaing, yenge dondonne mi wacebadaicte, miyac.

<sup>14</sup> Aime Israel yengele alingkacni miyac, gocne yenge yefe-yowa kwe-lengkeicne fagac, yogo mi balu gagaingti sifu yowaine ngage-ngagenginang fagac, yenge yowa yogo balaibelu yefe-yowa balaibecaigaing. Yenge yengungtihac yefe-yowadi fileine aicaigaing. <sup>15</sup> Aime yefe-yowadi wiyc aino-gale migac, yogo ngic-ngigac kwelenginang biyachac kwelengkeicne fagac, yogo edalicebacaigac. Ailu kwele ngage-ngagengineng yogodi basanangkecaigac. Kwelengineng nga ngage-ngagengineng yeke momochac wosaec-nagulu yowawa aibabangineng bafuwayeletu madicnegineng me sowac-negineng mifickeyelecaigac. <sup>16</sup> Yogo Wapongte wowosae damengka fikelu yegengkeme nganidaingte. Na Siduc Madicne Yesu Kristodi nelewec, yogo yanguc mibe yegengkecaigac. Aime Waponti dameng moto-motoina ngic-ngigac yengele ngage-ngage sangkeicne fawec nga fagac, yogo wosaelu mimoctodaicte.

#### *Nalic ngage-motodamecte*

<sup>17</sup> Ga Yuda ngic milu yanguc micaigic, "Na Yuda ngic, yefe-yowadi da-mongnume gacaigabac." Ailu ga Wapong ngagegeic yele ngageng feicne aicaigac. <sup>18</sup> Aime yefe-yowadi yefe wedgeleme ga Wapongte ngage-ngage nga angac biyachac ngagelu aibaba wenidi madicne, yogo wosaelu nalic ngage-motodamecte. <sup>19</sup> Ailu yanguc ngagepangkecaigic, "Ngic-ngigac donge-pisic yenge yefe edalicebanogale ngic yogo na. Ailu kundung kwelina hikecaigaing, yengele angoc, yogo na." <sup>20</sup> Aime yefe-yowawa ngage-ngage nga yowale noine sasawa fagacte ga ngage-ngagengineng kpungkecaigaing, yengele yanguc ngagecaigic, "Na yengele yefe madicnele wewedu ngic." Ailu ngic-ngigac kwelengineng kogoc kwеле ingucne balu gagaing, yengele yanguc ngagecaigic, "Na yengele wewedu."

<sup>21</sup> Ga inguc ailu gocne edocebalu weduyeletu, geicne mi wedunagucaigic, me? Ailu "hise mi banoga," inguc edocebacaiigic, ailu gageicnebac hise bacaigic, me? <sup>22</sup> Ailu "selo-boic aibaba mi ainoga," inguc milu gageicne selo-boic aibaba aicaigic, me? Aime ga siduc-gbong lobe holeyelecaigic. Ailu gageicnebac siduc-gbong macnginang felu yengele wiyc hise bacaigic, me? <sup>23</sup> Ailu Wapongte yefe-yowa bagalu gageicnele ngageng feicne aime, ga hocne yefe-yowa welu Wapong gamewa locaigic, me? <sup>24</sup> Wapongte hibiwa yowa yanguc kwelengkeicne fagac,

"Ngenge inguc ainagulu gagaingte, Israel yengele alingkacni miyac, yenge Wapongte wac milu sulecaigaing."

(Yes 52:5; Esek 36:22)

#### *Soc tofanganeng heloc-helocte yowa*

<sup>25</sup> Ga yefe-yowa balaibedamectewa, socgone tofaine helockeicne, yogo nalic baficgudaicte. Nga yefe-yowa hegiledamectewabac, socgone tofaine helockeicnedi sifu socgone tofaine mi helockeicne ingucne aidamecte.

<sup>26</sup> Aime ngic monic ye soc tofaine mi helockeicne, ye aibabainedi yefeyowale yefe dondonne balaibecaigac. Yele Waponti yanguc ngagesigac, ye socine tofaine helockeicne silic ingucne aigac. <sup>27</sup> Aime ga socgone tofaine helockeicnedi galu yefe-yowale hibi bagacgu yefe-yowa hegilelu

gagc. Inguc gaengka, ngic monic ye soc tofaine mi helockeicne ye yefeyowa balaibelu aibabagone wosaelu “ga bikicgoneholec” midaicte.<sup>28</sup> Ngic ingucne ye sockapac Yuda ngic aigac, ye Yuda ngic noine mi aigac, miyac. Aime soc tofaine helockeicne yogo socka sugu mi aigac, miyac.<sup>29</sup> Monic ye kwele ngage-ngageina Yuda ngic aigac, yedi Yuda ngicbenang. Wapongte Asudi kweleina soc tofaine heloc-helocete bole bame Wapongti ngic-ngigac aling ingucne yenge mitengebacaigac, yogo ngicte bole miyac. Aime yefeyowale hibidi ngage-ngageina soc tofaine heloc-helocete bole, yogo nalic mi badaicte.

## 3

### *Yowawa locebadaicte*

<sup>1</sup> Ilec wenuc minoga, Yuda ngic-ngigac gagaing yogodi madickebac, me? Ailu soc tofangineng helockeicne gaebongka, aibaba yogodi baficebacaigac, me?<sup>2</sup> Oc, yenge bucbuchac baficebacaigac. Molic-molic yogo Wapongti yengele ngageme madickeme, yeicne yowa damongkeningte yengele hewacka lowec fagac.<sup>3</sup> Wapong ye yowa mimiine balaibecaigac. Aime gocne yenge ngage-ngagesingngineng mikac gaibong, yogodi Wapongte pasi mimipangineholec baickedaicte, me?<sup>4</sup> Yogo miyacbenang. Yowa yanguc kwe lengkeicne fagac,

“Gagi yowa migic, yogo dondonne fikelu yegengkedaicte. Ailu ga ngic funginengneng wosaelu yowangineng dondonne mimoctodamecte.”

(Mige 51:4)

Yowa yanguc mibeng sanangne fadaic, “Wapong ye noine. Nga ngic-ngigac sasawa nongilengtibac kwesacnonggengkolec.”

<sup>5</sup> Ilec ailu ngic-ngigac gocne yanguc micaigaing, “Aibabanonggeng sowacnedi bole madicne aigac, yogo Wapongte pasi dondonne bayegengkedaicte. Ilec Wapongti sowacnenonggengte aalicine wedunoleme, yogodi dondonne mi aidaicte, me?” Yowa yogo noine mi aigac, yogo miyacbenang. Na ngic ngage-ngage balaibelu yowane inguc migabac.<sup>6</sup> Entacka Wapongte pasidi dondonne mi aidecka midec, himontowa yagolec ngic-ngigac nalic mi wosaecebalu mimoctocebadec, yogo noine hocne.

<sup>7</sup> Aime gocne yenge yanguc micaigaing, “Nale kwesac-yowadi Wapongte yowa noine bayegengkeme yeicne wacine feicne aigacka, omale ye bikickolec wacnudaicte?”<sup>8</sup> Aime gocne yengi yanguc micaigaing, “Wiyac madicne fikenale nongileng aibaba sowacne aidabeleng.” Aime gocne yengi micka lolo ainolelu nongileng yanguc micaigaing, “I hocne wedunolecaigaing.” Ngic-ngigac yowa ingucne micaigaing, yenge Wapongti bikicnginengte ameinele silicka yeledaicte, yogodi dondonne aigac.

### *Ngic dondonne*

<sup>9</sup> Ilec wenuc minoga, Yuda ngic-ngigac nongilengtibac Grik ngic-ngigac ewalicebagabeleng, me? Yogo miyacbenang. Yuda ngic-ngigac nga Grik ngic-ngigac nongileng yowa yanguc biyac migabac, “Nongileng momochac sasawadi bikicte bagewa gagabeleng.”<sup>10</sup> Ilec yanguc kwelekeicne fagac, “Monicti dondonne mi gagac, yogo miyacbenang.

<sup>11</sup> Ailu monicti ngage-ngage-motockolec mi gagac.

Nga monicti Wapong mi basackecaigac, miyac.

<sup>12</sup> Yenge sasawadihic Wapongte yefe madicne lobe holecnolu yengileng momochac sowaleicne.

Monicti aibaba madicne monic mi aicaigac, yogo miyacbenang." *(Mige 14:1-3; 53:1-3; Ngag 7:20)*

13 "Yenge mic-malacngineng yogo dongesi angkeicne ingucne." *(Mige 5:9)*  
"Ailu yenge micnginengti kwesac aicaigaing."

Ailu micnginang hemale marasing balu gagaing." *(Mige 140:3)*

14 "Yenge micti sawec-yowa mibong, ngage-sowac kwelenginangkocni dac lobelu ofecaigac." *(Mige 10:7)*

15 "Ailu yenge ngic-ngigac wecebabong sacngineng wanale biyac hikcaigaing.

16 Ailu yenge yefe hikecaigaing, iwa mac-himong basowalelu ngic-ngigac umacka locebacaigaing.

17 Ngic-ngigac yogo yenge kwele-mogungkolec gagale yefe mi ngagegaing, miyac." *(Yes 59:7-8)*

18 "Ailu yenge Wapongte haicka domalu hangocebame alang bacnoningte monic mi ngagesicaigaing." *(Mige 36:1)*

19 Nongileng yanguc ngagegabeleng, yefe-yowa yogodi ngic-ngigac yefe-yowale bagewa gagaing, yenge sowacnengineng edalicebame nganimotoagaing. Ilec ailu micngineng wedickeme migbedic mi aidaing. Aime himongtowa yagolec ngic-ngigac sasawa nongileng Wapongte haicka sowacnemholec aigabelengte ailu yowaine migac.

20 Monic ye yefe-yowa balaibelu Wapongta kwsidaicte, ye Wapongti yanguc nalic mi micnodaicte, "Ngic yogo ye dondonne." Yefe-yowa yogodi bikicnonggeng mime yegengkenoleme ngagegabeleng.

### *Dondonne wacnubadaicte*

21 Aime yanguctihac Wapongti ngic-ngigac dondonne wacnubacaigac, ye yefe yogo yegena lome nganicaigabeleng. Yefe yogo yefe-yowa nga sidumimi ngic yengi mibasanang aicaigaing. Ailu yogodi yefe-yowale yefewa mi aigac, miyac. Yogo yefe gbolinic ailu silicine monicbenang. *22* Wapongti Yesu Kristo nolewec. Aime ngic-ngigac ye ngagesingkegaing, yenge sasawa dondone wacebagac. Aime ngic-ngigac nongileng ngani-nganinonggeng haicine monic-monice mi aigac, *23* nongileng sasawadi bikickolekte ailu Wapongta wac feicne facaigac, yagolec maaine banangte lilolu gagabeleng. *24* Lilobeng Wapongti kwele-madic ainolenale ailu Kristo Yesule yefewa bikicte muckacni lukecnubalu dondone wacnubagac. Inguc fikenolenale nongungtihac hole monic mi baibeng. *25* Wapong yeicne kwelewa ngagelu Yesule sac ngani-motolu ngic-ngigac nongileng Yesu ngagesingkebeng, bikicnonggengte ameine badu-badule fuli yedi aiwec. Yefe iwa Wapong ye yeicne dondone, yogo edalicnubanale ngageme madickewec. I yangucte, ye esecne ngic-ngigac pasi ulucne aiyelelu bikicnginengte ameine biyac mi baduyelewec, *26* ye dameng dalicne tatakic mikac wangecngineng gawec. Ye dameng yagolec ngic-ngigac Yesu ngagesingkelu gagabeleng, nongileng dondone wacnubagac. Ye yeicne dondone, yogo edalicnubanale ngagesilu Yesule bolele ailu dondone wacnubagac.

*27-28* Ilec wenuc ailu socnonggeng bafedabelengte? Yefe monic mi fagac, miyac. Nongileng yefe-yowa wenuc balaibebebeng ye dondone wacnubadaicte? Yogo bolele yefe-yowa, me? Yogo miyac. Nongileng yanguc ngagelu sanangne badabeleng, Wapongti ngic-ngigac dondonne wacnubagac, yogo ngage-ngagesingnonggengte ailu wacnubagac, yogo yefe-yowale bole miyac. *29* Aime Wapong ye Yuda ngic-ngigac yengele Wapong sugu,

me? Yogo miyac, ye Israel yengele alingkacni miyac, yengele Wapong momochac gagac, yogo foinac. <sup>30</sup> Wapong moniyangti hocne gagac. Ailu ye soc tofangineng helockeicne, yenge ngage-ngagesingnginengte ailu dondonne wacebadaicte. Ailu soc tofangineng mi helockeicne, yenge inguchac ngage-ngagesingnginengte ailu dondonne wacebadaicte. <sup>31</sup> Ilec ailu ngage-ngagesingnonggengti yefe-yowa baickegabeleng, me? Yogo miyacbenang. Nongileng ngage-ngagesingti yefe-yowa basanangkegabeleng.

## 4

### *Abrahamte fungine*

<sup>1</sup> Ilec wenuc minoga? Abraham ye soctepecka ngambononggeng, ye fungineine dondonne wenucka bafuwawec? <sup>2</sup> Gocne yengi yele yanguc micaigaing, "Wapong ye aibabainele ailu ye ngic dondonne wackewec." Yogo noine miyac. Aime yogodi noine aidecka, ye socine nalic bafedec. Nga Wapongte haickbac yogo miyac.

<sup>3</sup> Nongileng Wapongte hibiwa yanguc wafecaigabeleng, "Abraham ye Wapong ngagesingkewecte ailu, ye ngic dondonne wackewec."

(Fike 15:6)

<sup>4</sup> Ngic monic ye bole bacaigac, yele bolele fuli yogodi kwele-madicte wiyac mi aigac, yogo bole bawec yogolec ameine aigac. <sup>5</sup> Aime ngic monic ye bolele yefe hegilelu Wapong ngagesingkegac, yele yanguc fikegac. Wapongti ngic-nigic sowacne dondonne wacebacaigac, ye ngic yogo ngage-ngagesingte ailu boleine mikac kwele-madicka ngic dondonne wackegac. <sup>6</sup> Aime Wapongti ye ngic dondonne wackegac, yogo aibabainele miyac. Ngic ingucne ye kweleina angackegac. Yengele Dawididi biyachac yogolec yanguc miwec,

<sup>7</sup> "Ngic-nigic gocne yenge yefe-yowa welu gacgubong Wapongti sowacnengineng hegileyelelu bikicngineng baickewecka, yenge kwele-angackolec. <sup>8</sup> Aime entacka Sugucnedi ngic monicte bikicte ameine mi lacnodaictewa, ngic yogo ye kwele-angackolec." (Mige 32:1-2)

### *Soc tofangineng helockeicne*

<sup>9</sup> Abraham yebac ngagesingkewecte ailu Wapongti ngic dondonne wackewec, nongileng inguc hocne ngagelu migabeleng. Ilec kwele-angac yowa yanguc ngagening, yogo ngic soc tofangineng helockeicne me ngic soc tofangineng mi helockeicne yengele miicne? <sup>10</sup> Abraham ye soc tofaine helockemebac Wapongti ye ngic dondonne wackewec, me? Yogo miyac, ye soc tofaine mi helockemewa Wapongti ye ngic dondonne wackewec.

<sup>11</sup> Abraham ye ngagesingkeme Wapongti yanguc wackewec, "Ngic yogo ye ngic dondonne." Inguc milu soc tofaine heloc-helocete maa yogo mimipangte maa Abraham lacnowec. Ye socine mi helockelu biyachac ngagesingkewec. Ilec ailu ngic sasawa soc tofangineng mi helockelu ngagesingkecaigaing, Wapongti yengele ngic dondonne wacebanogale yenge Abraham gbolifocene, inguc wacebawec. <sup>12</sup> Aime Abraham ye ngic soc tofangineng helockeibong, yengele ngambongineng aigac. Ailu Abrahamte ngage-ngagesingte hige-yefe balaibelu Sugucne ngagesingkecaigaing, Abraham ye inguchac yengele ngambongineng aigac. Ngage-ngagesingka ngambongineng Abraham, ye molickelu soc tofaine mi helockeluhac biyachac ngagesingkewec, ye ingucnehab aigaing.

### *Wapongti yowa milu mipangkewec*

<sup>13</sup> Wapongti Abraham nga ngambofocine yengeholec yowa yanguc milu mipangkewec, "Himong sasawa yago ngengele mole-damoc ainale ngeledacte." Aime yogo Abrahamti yefe-yowa balaibeweete mi miwec, miyac. Yenge ngagesingkeibongte ailu Wapongti ngageyelelu donne wacebawec, yogolec feina yowa milu mipangkewec. <sup>14</sup> Aime ngic-ngigac yenge yefe-yowa balaibelu mole-damocngineng badabongka ingucne, ngage-ngagesingkolec gaga yogo tapiliine mikac aidec. Aime Wapongti wiyc yelenale mipangkewec, yogo inguchac noine mikac aidec. <sup>15</sup> Yefe-yowadi bikite aalic bafuwadaicte. Nga yefe-yowa monic mi fadaictewa, yefe-yowa wewe yogo mi fikedaicte.

<sup>16</sup> Abraham ye Yuda ngic-ngigac yefe-yowa balaibecaigaing, yengele mamacneng. Ailu ngic-ngigac ngage-ngagesingngineng yele ingucne fayelegac, ye ngic ingucne yengele mamac. Ilec ailu Abraham ngambofocine sasawa yenge yowa milu mipangkeicne yogo kwele-madicte bagewa fame badaingte. Yogo ngage-ngagesingnginengte ailu nalic noinebenang badaingte. <sup>17</sup> Aime Abrahamte ngagesilu yanguc kwelengkeicne fagac, "Na locgube ga himong homacne ngic-ngigac yengele mamacneng aidamecte."

Aime Wapongti ngic homaicne bagboliyecebacaigac. Aime wiyc monic mi fagac, ye wiyc yogo waccine milu wackeme fikecaigac.

Ilec ailu Wapongte haicka nga ngage-ngagesingte yefewa, Abraham ye nongileng mamacnonggeng. <sup>18</sup> Ye gboliholec ainale silicka mi gawec, miyac. Ye Wapong ngagesingkewecte ailu wangec galu himong homacne ngic-ngigac yengele ngambongineng aiwec. Ilec hocne yowa yanguc biyachac miicne fawec,

"Ngesa-ngambofogone yenge dzalengineng bocyacbenang fikedaingte."\*

(Fike 15:5)

<sup>19</sup> Abraham ye hifaine 100 ingucne aime socine dokongkelu fuluckeme homanogale ailu ngagewec. Aime ngigacine Sara ye hifa bocyac ewalime, kogoc nalic babale silic mi aiwec. Aime sifu Abraham ye ngage-ngagesingngine sanangne fawecte, ye tapiliine monic mi wawec. <sup>20</sup> Ye Wapongti wiyc lacnonale mipangkewec, yogolec ngageboc monic mi aiwec. Ailu sifu sanangne ngagesingkelu Wapong waccine bafelu gawec. <sup>21</sup> Aime Wapongti yowa mipangkecnowec yogo banogale tapili yogo andoine facnowec, Abraham ye inguc ngage-motolu ngagepangkewec. <sup>22</sup> Ilec ailu yanguc fagac, "Wapongti ye ngagesilu ngic dondonne wackewec."

<sup>23</sup> Aime yowa yogo Abrahamte sugu ngagelu mi kwelengkeicne fagac, miyac. <sup>24</sup> Yogo nongilengte momochac kwelengkeicne fagac. Wapongti Sugucnenonggeng Yesu homackacni bagboliywec, yogo nongilengte ailu bole yogo bawec. Ye ngagesingkebeng yedi inguchac dondonne wacnubadaicte. <sup>25</sup> Aime nongileng bikite ailu ngic-ngigac yenge Yesu webong homawec. Aime Wapongti dondonne wacnubanale Yesu homackacni hatacmac bagboliyeme fangkewec.

### 5

### *Wapongta kwele-mogung fagac*

**4:13:** Fike 17:4-6; 22:17-18; Gal 3:29      **4:14:** Gal 3:18      **4:15:** Rom 3:20; 5:13      **4:16:** Gal 3:7

\* **4:18:** Asocmeng yengele dzalengineng ingucne fikedaingte.      **4:19:** Fike 17:17      **4:22:** Fike 15:6      **4:25:** Yes 53:4-5

<sup>1</sup> Inguc ailu Wapongti ngage-ngagesingnonggeng nganilu dondonne wacnubame, Sugucnenonggeng Yesu Kristole madicte ailu yeholec kwele-mogungka gagabeleng. <sup>2</sup> Yedi yefe bafuwanoleme Wapongte kwele-madic kwelina yanguctihac gagabeleng. Aime Wapongte tapili nga hibi-angoceneholec lobewa fikenoledaicte, yogo wiyac feicne, inguc ngagelu wangec galu beliyelu gagabeleng. <sup>3</sup> Ailu yogo sugu miyac, nongileng inguchac doic feina galu yogolec ngagebeng feicne aime beliyelu gagabeleng. Doic ngagecaigabeleng yogodi kwelenonggeng basanangkecaigac. <sup>4</sup> Basanangkeme tatakic mikac galu sanangne domacaigabeleng. Domalu tapili hibi-angoceneholec noine fikenale wangec gagabeleng. <sup>5</sup> Wangec inguc galu mi gamenubacaigac. I yangucte, Wapongti Tili Asu nolelu kwele-angacine kwelenonggang sotiyewec fagac.

### *Kristodi kwele-angacka bacnubawec*

<sup>6</sup> Nongileng kosa gaebengka Wapongti dameng bawosaewec, iwa Kristo kwestu nongileng ameine yedi balu homawec. Nongileng waweweine gaebengka, yedi inguc ainolewec. <sup>7</sup> Monicti ngic dondonne monic bafickelu homanale ngagesidaicte, siduc ingucne mi ngagecaigabeleng. Aime monic ye aibabaine madicne aidaicte. Aime monicti ye hangoc mikac nalic bafickelu homadaicte mecne. <sup>8</sup> Aime sifu Wapongti kwele-angacine edal-icnubalu Kristole mime, yedi ngic-ngigac nongileng bikickolec gaebengka nongilengte ailu hocne homawec. <sup>9</sup> Aime yele sacte ailu Wapongti ngic-ngigac dondonne wacnubame yanguctihac gagabeleng. Ilec ye inguchac aalic badu-badule damengka yowanonggeng mime wasecne aidabelengte yogo ngagepangkelu gagabeleng. <sup>10</sup> Aime nongileng Wapongte ngaba gaebengka Madecinele homacti ngaba yogo baickeme Wapongkolec kwele-moniyang fikenolewec. Ailu yogo sugu miyac. Kwele-moniyang fikenoleme nongileng Madecinele gagale ailu inguchac wasecne aidabelengte, yogo hocne ngagepangkelu gagabeleng. <sup>11</sup> Ailu yogo sugu miyac. Sugucnenonggeng Yesu Kristodi bikicnonggeng baickelu Wapongkolec kwele-moniyang bafuwanolegac. Ailu nongileng yanguctihac Wapongte ngagebeng wiyac feicne aime beliyelu gagabeleng.

### *Adamti homac bafuwame Yesudi gaga bafuwawec*

<sup>12</sup> Yogo yanguc fikewec, ngic moniyangte sugu ailu bikicti himongtowa yagowa fikelu homac bafuwawec. Aime ngic-ngigac sasawa bikic bafuwaibongte ailu homacti ngic-ngigac sasawa bacebawec. <sup>13</sup> Yefe-yowa himongtowa yagowa mi fikewec, dameng iwa bikicti biyachac kwesiwec. Aime sifu yefe-yowa monic mi fawecte ailu, Wapongti bikicngineng mi ngagesiwec. <sup>14</sup> Aime Adamtaaci ofegacgu Mosesle damengka homacti ngic-ngigac aling sasawa damongebawec. Adam ye Wapongte yowa hegilelu bikic bafuwawec. Aime gocne yenge ye bikic bafuwawec ingucne mi bafuwaibong, aime homacti sifu yenge bacebawec. Adam ye ngic monic kwesinale miicne, yele silic ingucnehac.

<sup>15</sup> Ngic moniyangti sugu bikicka wawewecte, ngic-ngigac bocyac yenge homayackebong. Aime Wapongti ngageboc mikac ailu kwele-madicte wiyac ngic-ngigac moc yelecaigac, yogo ngic-ngigac bocyachenang yenge umacnebenang yelewec. Yogo ngic moniyangte sugu, Yesu Kristole kwele-madicte ailu inguc fikelu fawec. Ilec yefe lilo-lilole bikic yogo silicine monic aigac. Nga kwele-madicte wiyac moc yelelegac, yogo silicine monic, yogo

foinac. <sup>16</sup> Ngic moniyangti sugu molickelu bikic bafuwawec. Aime Wapongti yogolec ailu ngageboc mikac ngic-ngigac homacne wiyac yelecaigac, wiyac yogo yeke silicnginec moniyang inguc mi ngagedabeleng, miyac. Ngic moniyang sugudi bikic molickelu bafuwame, Wapongti ame badu-badule pasi molickelu bawec. Bame ngic-ngigac bocyac yenge yefe lilolu bikickolec aibong. Aibong Wapongti inguc nganilu kwele-madicte wiyac yogo bikicngineng bocyac yogolec ameine baickelu dondonne wacebawec.

<sup>17</sup> Ngic moniyangti sugu molickelu yefe lilome yele bikicte ailu homacti ngic-ngigac damongebawec. Ilec ailu Wapongti ngic-ngigac kwele-madic ayelelu kwele-madicca dondonne wacebagac. Wacebame yenge ngic moniyang ailu Yesu Kristoholec momochac gagale alingka galu wiyac bocyac damongkedaingte. Wapongte kwele-madicte wiyac yogodi homac ewali-benangkegac.

<sup>18</sup> Inguc aime ngic moniyangti sugu yefe lilome, Wapongti ngic-ngigac sasawa bikicngineng mimoctowec. Aime ngic moniyangti sugu inguchac aibaba dondonne aiwecte, ngic-ngigac sasawa bikicnginengte ameine baickewec. Baickeme Wapongti ngic-ngigac dondonne wacebame yogodi gaga-sanang bafuwayelewec. <sup>19</sup> Aime ngic moniyangti sugu yowa madicne hegileme, ngic-ngigac bocyac yenge bikicnginengkolec aiyackeibong. Aime ingucnehac ngic moniyangti sugu yowa madicne balaibewecte ailu, Wapongti ngic-ngigac bocyac yenge dondonne wacebadaitce.

<sup>20</sup> Aime yefe-yowa kwesiwec, yogo bikicngineng sugucnehac ainale kweisiwec. Aime bikicngineng sugucnebenang aime yele kwele-madictowadi bikicngineng ewali-benangkelu fikelu fawec. <sup>21</sup> I yangucte, bikicti damongbalu homac bafuwawec, ingucnehac kwele-madicinedi damongnonggeng aime, Wapongti Sugucnenonggeng Yesu Kristole ailu dondonne wacnubalu gaga moto-motoine mikac noledaite.

## 6

### *Kristole fangke-fangkewa taockeicne*

<sup>1</sup> Ilec wenuc minoga? Wapongte kwele-madicti sugulenale nongileng bikicka hatacmac taockelu gadabeleng, me? <sup>2</sup> Yogo miyachbenang. Ailu bikickacni biyachac homaibeng, inguc ngagelu nongileng hatacmac iwa mi taockelu gadabeleng. <sup>3</sup> Nongileng Kristo Yesuholec wetackeibengte misa lowanoleibong. Lowanolebong Yesule homacka momoc wetackeibeng, ngenge yogo mi ngagegaing, me? <sup>4</sup> Ilec misa lowalu Kristoholec homabeng, Wapongti yeholec longnubawec. Mamac ye tapili nga hibi-angoctowainedi Yesu homackacni bagboliyeme gaga gbolicna fewec. Aime nongileng inguchac gaga gbolicna felu ganangte yeholec taocnubawec.

### *Yesuholec wetackelu gaga*

<sup>5</sup> Yesu ye homawec, yogolec silicina yeholec taockelu homaibeng. Aime ye homackacni gboliyelu fangkewec, nongileng inguchac yeholec taockeibengte gboliyelu fangkedabelengte, yogo ngagepangkegabeleng. <sup>6</sup> Bikicte tapilidi soc-kwelenonggang bole balu gagac, yogo miyac ainale kwelelenggeng esecne malicpongka Yesuholec weicne, yogo ngagegabeleng. Bikicti filenonggeng ingucne hatacmac mi ganale inguc aiwec. <sup>7</sup> I yangucte, ngic homadaite, ye bikicti hatacmac mi hefedaite.

<sup>8</sup> Aime nongileng Kristoholec biyachac homaibeng milu yeholec inguchac gadabelengte, yogo ngagesingkegabeleng. <sup>9</sup> Aime Wapongti Kristo homackaci bagboliyeme fangkewec. Aime ye fangkewec yogo hatacmac mi homadaicte, inguc hocne ngageregabeleng. Ye hatacmac homacte tapilile bagewa mi gagac. <sup>10</sup> Yele homacti ngic-nigigac bikicnonggengte ailu alecine moniyang sugu homame motowec. Ailu gaga yanguctihac gagac, yogo Wapongte ailu angacka gagac. <sup>11</sup> Ilec ngenge ngengileng momoc yanguc ngagedaing, bikickacni biyachac homaicne, aime yogolec bagewa hatacmac mi gagaing. Aime yanguctihac Kristo Yesuholec wetackelu Wapongte ailu angacka gagaing.

### *Bikictie angac*

<sup>12</sup> Ilec ailu bikicti fulucngebame socte angac haicine monic monicti bacngebadaickale, ngenge bikic aibaba kwele esecna facaigac, yogo hegiledaing ailu mi balaibedaing. <sup>13</sup> Ailu hodoc, donge-hedec nga hige-molengineng yogodi aibaba sowacne ailu bikictie kwele kwekwe mi aidaic, miyac. Ngenge molickelu homacka gaibong, yakumacbac ngenge gaga noina gagaing. Ilec ngengungtihac efeckelu Wapongkolec wetackelu hodoc, donge-hedec nga hige-molengineng mimoctobong yogo yengi yele kwele kwele aibaba donne aidaing. <sup>14</sup> Ngenge yefe-yowale bagewa gaga, yogo biyachac hegilelu Wapongte kwele-madicte bagewa gagaing. Ilec ailu bikicti sugucnengineng mi aidaic.

### *Wapong kwele kwelefocine*

<sup>15</sup> Ilec wenuc ngagenoga? Nongileng yefe-yowale bagewa mi galu kwele-madicte bagewa gagabeleng. Ilec bikic bafuwadabeleng, me? Yogo miyacbenang! <sup>16</sup> Ngenge ngengung ngic monicte bagewa kwele kwekwe aling ganingte, ngenge yele kwele kwekwe aling galu yele yowa balaibedabieng, yogo ngagegaing. Inguc ailu ngenge bikictie kwele kwekwe aling galu yowaine balaibedaingtewa, homac bafuwadaingte. Me Wapongte yowa balaibelu yele kwele kwekwe gadaingtewa, gaga dondonne bafuwadaingte.

<sup>17-18</sup> Aime ngenge molickelu bikictie kwele kwekwe aling gaibong, yogo biyachac hegilebong motowec. Aime Wapongti wewedu-yowainele emewa locngebame kwele kwekwe aling gaibong. Aime bikictie muckacni biyachac lukecngebame yakumac dondonne gagale kwele kwekwe aling ailu gagaing. Inguc aibong Wapong mitengkelu kwele-madic micnogabac.

<sup>19</sup> Ngenge socte ngage-ngagenginengti yegena mi aidaickale ailu, kwele kwekwele nangeng yowa migabac. Ngenge molickelu hodoc, donge-hedec nga hige-molengineng mimoctobong kwele wonongkolec gaga, nga yefeyowa wewe bagewa kwele kwekwe aling gaibong. Inguc galu yefeyowa hegilelu aibaba ingucna sugulelu gaibong. Ngenge silicine ingucne hac yakumac hodoc, donge-hedec nga hige-molengineng mimoctobong gaga dononnele bagewa kwele kwekwe aling gadabieng. Galu gaga gbagbacna sugulelu sanangkedabieng.

<sup>20</sup> Ailu ngenge bikictie kwele kwekwe aling gaebongka, dondonne gagale yowadi mi damongngebawec, miyac. <sup>21</sup> Ngenge iwa bikictie noine balu gaibong yogodi gagangineng basowalewec. Aime ngenge yanguctihac yogo ngagelu gamengebacaiagac. Aibabangineng ingucnedi homac bafuwadaicte. <sup>22</sup> Ngenge yakumacbac bikictie muckacni lukecngebacne. Aime Wapongte kwele kwekwe aling gagaing, yogolec noine bagaing. Balu ngenge gaga

gbagbacne galu sugulelu sanangkelu gadaingte. Ilec ailu gaga-sanang bidaingte.<sup>23</sup> I yangute, bikicte fuli yogo homac banoga. Nga Wapongte kwele-madicte wiycac yogobac Sugucnenonggeng Kristo Yesule ailu gaga-sanang fuline mikac moc noledaictce.

## 7

*Yefe-yowa nga Asule bolewa*

<sup>1</sup> Ngic hae-gbafocne, ngenge yefe-yowa ngagegaing, yogo ngagegabac. Ngic-ngigac mi homalu gaebongka yefe-yowadi sugucnengineng ailu da-mongebacaigac, yogo mi ngagegaing, me? <sup>2</sup> I yanguc, ngigac monic ye ngaweineholec gaemewa, ngic ye ngigacti yeholec gagacte yeke dofic-nagulu gadabiyete. Yefe-yowale yefewa inguc fagac. Gacgu ngaweine homadaictewa, yefe-yowadi ngigac ngickolec witicepame gaiboc, yogo miyac aidaicte. <sup>3</sup> Aime ye ngaweine gblolicne gaemewa ngigac ye ngic monickolec gadaictewa, ye selo-boic ngigac wackedaingte. Nga ngaweine homadaictewabac ngigac yogo ye yefe-yowadi hatacmac mi witickedaictce. Ye dameng iwa ngic monicte ngigac aidaictewabac ye selo-boic ngigac mi aidaicte. <sup>4</sup> Ngic hae-gbafocne, silicine ingucnehac ngenge Kristole soc-biuckolec homaibong. Ilec ngenge yefe-yowale bagewa hatacmac mi gagaing. Ngenge ngic homackacni gboliyelu fangkewec, yeholec taockelu ganingte ailu, nongileng Wapongte bolele noine ainangte ye inguc aiwec.

<sup>5</sup> Nongileng molickelu kwele esecna gaechengka yefe-yowadi bikicte angac sowacne kwelenonggang kwefangkeme homacte noine bafuwalu gaibeng. <sup>6</sup> Aime yefe-yowadi bacnubame iwacni biyachac homaibeng. Ailu yan-guctihac lukecnubaicne gagabeleng. Inguc ailu yefe-yowa iwacni homalu bole esecne kwelec mi kwecnolu Asule gaga gblolicna felu kwelec kwelu domagabeleng.

*Bikic edalicnubadaicte*

<sup>7</sup> Ilec wenuc minoga? Yefe-yowa yeuctihac bikic aigac, me? Yogo miyache-nang! Aime yefe-yowadibac bikicte silicine edalicnume ngage-motogabac. "Ga ngani-angac mi aidamec."  
*(Wah 20:17; Yef 5:21)*

Yefe-yowadi inguc mi midecka, na ngani-angacte silicine nalic mi ngage-motodacka. Aime sifu yefe-yowadi inguc mime ngani-angac bafuwaiba.

<sup>8</sup> Aime bikic ye ung-yowawa yefeine bafuwalu ngani-angac haicina monic-monik kwelene kwelina kwefangkeme bikic bafuwaiba. Nga yefe-yowa mi fadecka, bikic ye homaicne aidec. <sup>9</sup> Na \* molickelu Wapongte yefe-yowa mikac gaiba. Galu ung-yowaine kwsime ngageiba, yogowabac bikic ye gagagineholec ailu bole bame <sup>10</sup> homaiba. Iwa yanguc nganiiba, ung-yowa ye gaga bafuwanaale loicne fagac, yogodi hocne homac bafuwanelewec.

<sup>11</sup> Bikicti ung-yowawa yefe bafuwalu kwsacka mengocnulu wehomac-nuwec. <sup>12</sup> Ilec yanguc fagac, yefe-yowa yogo yeicne gbagbacne. Aime ung-yowa yogo inguchac gbagbacne nga dondonne ailu madicne.

<sup>13</sup> Aime wiycac madicne yogodi homacka locnuwec, me? Yogo miyache-nang! Bikicte fungine fikelu yegengkenale bikictibac homacka locnuwec. Aime bikic ye wiycac madicne balu yogodi nala homac bafuwawec. Inguc

<sup>6:23:</sup> Rom 5:12,15    <sup>7:4:</sup> Rom 6:2,11    <sup>7:6:</sup> Rom 8:2; 6:4    \* <sup>7:9:</sup> Poldi ngic-ngigac gocne yengele ngagelu "na" miwec.    <sup>7:11:</sup> Fike 3:13    <sup>7:12:</sup> 1Tim 1:8

aime ung-yowadi bikic bafuwame bikic ye wiycac sowacnebenang, yogo fikelu yegengkewec.

### *Kwele esecne nga gboldicne wenagucaigaic*

**14** Yefe-yowa yogo Asulacni, yogo ngagegabeleng. Aime nabac kwele esecna gabe bikicti kwelec kwekwe bacnume, bikicte bagewa gacaigabac. **15** Aime aibaba ailu gacaigabac, yogo wenucte ailu gacaigabac, yogo mi ngage-motogabac. Na wiycac monic ainogale ngagesicaigabac, yogo mi ailu gacaigabac. Aime aibaba kwele nediri mi ainogalebenang ngagecaigabac, yogobac ailu gacaigabac. **16** Aime aibaba gocne mi angacnuciaigac. Aime sifu aicaigabac, yogo mi angacnudaictewa, yogodi yanguc edalicnudaict, yefe-yowa yogo madicne, aime yefe-yowaholec kwele-moniyang aigabac. **17** Inguc aime naneuctihac aibaba yogo mi ailu gacaigabac, miyac. Bikic nale kwele kwelina fagac, yogodi aibaba yogo aicaigac. **18** Nale kwelewa wiycac madicne monic mi fagac, inguc ngagegabac, yogo kwele esecnele migabac. I yanguc, na aibaba madicne ainogale ngagecaigabac. Ailubac aibaba madicne ainogale ngagebe kpungkecaigac. **19** Foinac, aibaba madicne ainogale ngagecaigabac, yogobac ailu gacaigabac. Aime aibaba sowacne hegilenogale ngagecaigabac, yogobac ailu gacaigabac. **20** Na aibaba gocne mi ainogale ainelecaigac, yogo aicaigabacka, naneuctihac aibaba yogo mi aigabac, miyac. Bikic nale kwelewa fagac, yogodi aibaba yogo bafuwame aicaigabac.

**21** Aibaba madicne ainogale ngagebe, aibaba sowacnedibac kwelena biyac facaigac, yogo bikicte yefe-yowa yogo nganicaigabac. **22** Ailu ngage-ngagena Wapongte yefe-yowale kwele-madic ngagecaigabac. **23** Aime angac monicte yefe-yowadibac socna fikeme nganicaigabac, yogodi ngage-ngagena yefe-yowa fagac, yeholec wenagulu gagabiye. Wenaguboc bikicte yefe-yowadi socne witickelu bolein balu gagac.

**24** Na ngic waweweine kwele-sowackolec galu socneholec homacte bagewa gabe, madi iwacni baicnudaict? **25** Yesu Kristo Sugucnenonggeng yedi bamoctocnudaict. Ilec Wapong mitengkelu kwele-madic micnogabac. Naneicne ngage-ngagenedi Wapongte yefe-yowale bagewa galu kwelec kwecnolu gagabac. Aime kwele esecnabac bikicte yefe-yowale kwelec kwecnolu gagabac.

## 8

### *Asuwa gaga*

**1** Aime yanguctihac ngic-ngigac Kristo Yesuholec wetackelu gagaing, yenge bikicte ameine mi badaingte. **2** Ga Kristo Yesuholec wetackelu gaengka, Asu gagaineholecte\* yefe-yowadi bikic nga homacte yefe-yowale muckacni lukecguwec. **3** Kwele esecne ye yefe-yowale tapili bawanogale aime yefe-yowa ye wiycac ainogale kpungkewec. Kpungkeme Wapongti bikicte bole yogo yanguc bawec, ye Madecbenangngine saleme nongileng bikicte soc yogolec silic ingucne ailu himongka wawec. Aime Wapongti yele socka bikicnonggeng mimoctolu baickeme miyac aiwec. **4** Ilec ailu yefe-yowale aibaba dondonne gaganonggang fikelu yegengkecaigac. Nongileng kwele esecnele yefewa gaga yogo hegilelu Tili Asuholec wetackelu gacaiga-beleng.

<sup>5</sup> Aime ngic-ngigac kwele esecnele angac nga ngage-ngage balaibecaigaing, yenge ngage-ngagengineng kwele esecnele wiyacka locaigaing. Nga ngic-ngigac Asule angac nga ngage-ngage balaibecaigaing, yenge ngage-ngagengineng Asule wiyacka locaigaing. <sup>6</sup> Aime kwele esecnele ngage-ngage yogo homaccineholec. Nga Asule ngage-ngage yogo gagaineholec ailu kwele-mogungkolec. <sup>7</sup> Ngic kwele esecna ngage-ngageinedi Wapong ngaba aicnocaigac. Ailu Wapongte yefe-yowa mi balaibecaigac. Ailu yefe-yowa balaibenogale ngageme kpungkecaigac. <sup>8</sup> Aime ngic-ngigac kwele esecnele angac nga ngage-ngage balaibecaigaing, yenge Wapongte kwele-angac bafuanogale kpungkelu gagaing.

<sup>9</sup> Aime Wapongte Asudi ngengele kwelewa gagacte ngenge Asu balaibecaigaing, yogo kwele esecna miyac. Nga monic ye Kristole Asu mi balu gagacka, ye Kristole alingkacni miyac. <sup>10</sup> Aime Kristodi ngengele kwelewa gagacka, socngineng yogo bikicnginengte ailu homawec. Nga asunginengtibac dondonne gagale ailu gagaineholec aiwec. <sup>11</sup> Wapong ye Yesu homackacni bagboliywec. Aime Wapongte Asudi ngengele kwelewa gagacka, yedi socngineng homacte bagewa gagac, yogo inguchac Asuinedi bagboliyedaikte.

### *Wapong adu-madecfocene*

<sup>12</sup> Ngic hae-gbafocne, ngagegaing, nongileng ameinenonggengkolec gagabeng aime yogo kwele esecna miyac. Asudi biyachac bagboliyec-nubawec. Ilec ailu kwele esecna ganangte ameine monic mi fanolegac. <sup>13</sup> Ngenge kwele esecnele angac nga ngage-ngage balaibelu gadaingtewa, homadaingte. Nga Asule tapiliwa kwele esecnele aibaba wehomadaingte-wabac, gaga-sanang gadaingte. <sup>14</sup> Wapongte Asudi ngic-ngigac aling mengoebacaigac, yenge sasawadi Wapong adu-madecfocene. <sup>15</sup> Gaga monicti kwelec kwekwe bacngebame hangocka hatacmac ganingte ailu gaga ingucue mi ngelewec, miyac. Ngengileng gaga silicine monic gabong Wapongti hole-gumec aingeleme adu-madecfocene aibong. Aime Asu yodigi baficnubame Wapongte yanguc wackelu milu gagabeleng, "Mamacne, Mamacne." <sup>16</sup> Nongileng Wapong adu-madecfocene gagabeleng, yogo hocne Wapongte Asu yeuctihac asunonggengkolec wideckelu miboc yegengkeme gagabeleng. <sup>17</sup> Aime yele adu-madecfocene gagabelengte, yele mole-damoc babale aling momoc ailu Kristoholec aling moniyang galu mole-damoc badabelengte. Nongileng yeholec doic ngagegabelengte tapili nga hibiangocineholec aidabelengte.

### *Wiyac madicne fikenale wangec gagabeleng*

<sup>18</sup> I yanguc ngagesigabac, tapili nga hibi-angocineholec lobewa nongilang fikelu yegengkedaikte, yogo wiyc feicnebenang. Nga yanguctihac umac fikenolelu gagac, yogo wiyc kpisicne. <sup>19</sup> Wapongti mime wiyc sasawa fikeyackeibong, yogo Wapongte adu-madecfocene nongileng yeuctihac mime yegengkenangte wiyc yogo yenge sasawadi mamang hidulu wangec gagaing.

<sup>20</sup> Aime Wapongti wiyc mime fikeyackeibong, yogo yengungtihic bole babong madickenale mi aigaing. Yogo yengele wiyc miyac. Ilec yenge umac baibong. Wapong yeuctihac lobewa madickenale inguc lome wangec gagaing. <sup>21-22</sup> Ailu yanguc ngagegabeleng, Waponti mime wiyc sasawa

fikeyackeibong, iwacnihic ofegacgu yakumac gagabeleng. Aime yenge inguchac gado hicebame homalau howacine aigaing, yogolec muc hemocoltu Wapong adu-madecfocene yengela taockeningte aiyeledaictie. Dameng iwa gaga mucine mikac, ailu yogo tapili nga hibi-angocineholec.

<sup>23</sup> Aime yogo sugu miyac. Wapongti molickelu Asu nolewec. Inguc noleme nongileng inguchac socnonggengkolec himong yago hegilelu, adu-madecfocene nongileng soc gbolicne nolegac. Noleme mac ngiye-ningyenonggang biyac fenangte gobenonggeng hime damengnginele wangec gagabeleng. <sup>24</sup> Ailu wasecne aibeng, dameng iwa nongileng wiyc noine fikenale ngagepangkelu wangec gagabeleng. Monic ye noine biyac fikeme nganiwec, yogo ngagepangkelu wangec mi gacaigac. Aime madi wiyc biyac nganiwecete wangec gacaigac? Monicti inguc mi aiwec. <sup>25</sup> Aime wiyc mi ngani-nganiine yogo banogale ngagecaigabeleng, inguc ngagepangkelu wangec gadabelengtewa, tatakic mikac mamang hidulu wangec gadabeleng.

### *Mimiloc bole banoga*

<sup>26</sup> Inguc gaebengka tapilinonggeng waicnele ailu Asudi kwesilu bafic-nubagac. Inguc me inguc milockebeng madickeadaictie, yogo mi ngage-motogabeleng. Ilec ailu Tili Asudi nongileng ailu yowa mikac malac sugu milockeme Wapongta fecaigac. <sup>27</sup> Feme ngic-ngigac kwelenonggeng nganicaigac. Ailu ye Tili Asule ngage-ngage inguchac ngagecaigac. Asu ye Wapongte ngage-ngage balaibelu Wapongte bingec nongilengte ailu mimiloc bole balu gacaigac.

### *Boleine nongilang balu gagac*

<sup>28</sup> Aime yanguc ngagegabeleng, Wapongti alingka lolu ngic-ngigac ngageyelelu wacebame yenge yele alingfocene gagaing. Ngic-ngigac kweledi yele angac ngagecaigaing, yenge gaganginang wiyc sasawa fikelu baficebame madicke-benangkecaigaing. <sup>29</sup> I yangucte, Wapongti ngic-ngigac ye ngagesingkedaingte, yenge biyachac ngageyelewec. Ngageyelelu bawosaecebame suguelu sanangkebong yeicne Madecine ingucne ainingte mimoctocebawec. Madecinedi kwa-gbafocene bocyac yengele molic-molic haengineng ainale inguc alingkewec. <sup>30</sup> Alingkelu ngic-ngigac molic-molic biyachac bawosaecbawec, yenge inguchac wacebawec. Aime yenge wacebalu ngic-ngigac dondonne wacebawec. Aime yenge dondonne wacebalu wacngineng inguchac bafewec.

### *Sugucnele angacka gaga*

<sup>31</sup> Ilec ailu yogolec wenuc minoga? Wapongti nongilengkolec gagacka, madi yefenonggeng nalic hedickelu bacnuba wadaictie? Wiyc monicti nalic mi bacnuba wadaictie. <sup>32</sup> Wapong ye Madecbenangngine nongilengte ailu mi sebilewec, ye nongileng sasawale ailu ngaba yengele molewa lolu hegilewec. Aime nongileng hegilewecte ailu, ye kwele-madicinele wiyc sasawa inguchac Madecineholec taockelu noledaictie. <sup>33</sup> Wapongti bawosaecnubawec, nongileng madi yowawa locnubadaictie? Yogo monicti mi locnubadaictie. Wapongti nongileng yowa milu ngic-ngigac dondonne wacnubadaictie. <sup>34</sup> Aime bawosaecnubawec, nongileng madi bikcnonggengkolec midaictie? Yogo monicti mi midaictie. Kristo Yesu ye hocne homawec. Homame Wapongti ye homackacni inguchac bagboliyem

fangkewec. Fangkelu Wapongta fewec foleinapec ngiyelu nongilengte ailu milockelu gagac.

<sup>35</sup> Kristo ye kweleinedi nongileng angacka ainolecaigac. Ilec madi Kristole angackacni nalic baicnubadaicte? Doic, me kwele-umac, me weyebic ainoledaicte. Me noba-nosingte nobe homabé, me ngakpi-kpoluc mikac senggang ganoga. Me sowalenogale aidabelengte, me hudule fitecti wehomacnubadaicte. Wiyac ingucne monicti nongileng nalic baicnubadaicte, me? Yogo miyacbenang. <sup>36</sup> Wapongte hibiwa yowa yanguc biyachac kwelengkeicne fagac,

“Gale aling aigabelengte ailu, yenge ubiyactehac gacgu aweleme homacka locnubacaigaing.

Yenge nonge nganicnubabong lama wehomacaigaing, yenge ingucne aigabeleng.”

(Mige 44:22)

<sup>37</sup> Yogo sasawa fikenoleme sifu Kristo ye kweledi angacka ainoleme nongileng yeholec galu yogo ewali-benangkelu gbelong ailu gagabeng. <sup>38-39</sup> Aime Wapong ye kweledi angacka ainoleme nongileng Sugucnenonggeng Kristo Yesuholec wetackelu gaebengka wiyac monicti nalic mi baicnubadaicte, yogo ngagepangke-benangkegabac. Yogo homac me gaga, me angelo me aleng, me wiycac gocne yakumac fagaing me wiycac lobewa fikedaingte. Me wiycac gocne tapilinginengkolec wilengkacni me wiycac gocne tapilinginengkolec dumengkacni. Me wiycac gocne Wapongti mime fikeibong, yenge sasawadi yele angackacni nalic mi baicnubadaicte.

## 9

### Poldi Yuda ngic-ngigac yengele kwele-sowac ngagewec

<sup>1</sup> Na Kristoholec wetackelu yowa noine migabac, kjesac mi aigabac. Aime Tili Asudi kwele ngage-ngagene yeuckeme, yogodi damongnume yowa noine yanguc migabac. <sup>2</sup> Na damengsoc alingfocne yengele ailu kwele-sowac sugucnehab ailu kwele-umac ngagelu gagabac. <sup>3</sup> Aime nani yengele ame balu Wapongte aalicté bagewa gabe, Kristolacni baicnume dac-sanangka haulu gabe yenge wasec ainingte, ngagegabac. Ngic haegbaocne, yenge nale sac-tofaocne aigaing. <sup>4</sup> Ailu yenge Israel ngic-ngigac, yenge Mamacte adu-madecbenang aigaing. Aime tapili nga hibi-angocine edalicebalu gagac. Yenge dodefic nga yefe-yowaholec galu Wapongte Ibumacka felu afeelu kwelec kwencnoaigaing. Ailu Wapongti mimipangngine edocebewec, yogo yengela fagachac. <sup>5</sup> Aime yenge ngambofocngineng ngagecebagaing. Aime Kristo ye soctepecka yengele fikesaweckacni ngic silic ailu fikewec. Kristo yedi Wapong hocne, wiycac sasawale feicne. Yela mimitengti mimitengt fagidaic, yogo foinac.

### Wapong adu-madecfocine

<sup>6</sup> Wapong yowainele mimipang mi fikedaicte, ngenge inguc mi ngagedaing. I yangucte, Israel ngic-ngigac yenge ngic wacine Israel yele fikesaweckacni, yengelacni gocnebac Israelbenang mi aigaing. <sup>7</sup> Aime Abraham ngambofocine gocne yenge ngambofocinebenang mi aigaing. Ilec yanguc kwelengkeicne fagac,

“Aisakte fikesaweckacni yengi gale ngesa-ngambofocgonebenang aidaingte.”

(Fike 21:12)

<sup>8</sup> Socte alingka fikegaing, yenge Wapong adu-madecfocine, inguc mi migac. Yowa milu mipangkeicnele bagewa fikecaigaing, yengi Abraham ngambofocinebenang aigaing, \* Wapongti inguc ngagesigac. <sup>9</sup> Ye Abraham nga Sara yekeholec yowa yanguc milu mipangkewec,  
“Na dameng miiba hifa moniyang iwa kwesibe, Sara yela madec monic fikedaicte.”

(Fike 18:10,14)

### *Angacinele alingka bawosaecnubadaicte*

<sup>10</sup> Aime yogo sugu miyac, Rebeka ye ngambononggeng Aisak yeholec falu fucsengeng gobeeepawec. <sup>11-12</sup> Aime madec yeke mi fikelu gaebocka yeke aibabaginec madicne me sowacne monic mi fikewec. Dameng iwa Wapongti yekele ailu Rebeka yanguc biyachac edowec,

“Haedi gbale kwelec kwedaicte.”

(Fike 25:23)

Wapong ye ngic monic boleinale ailu mi bawosaedaicte, ye angacine nga ngage-ngageinele ailu ngic-ngigac wacebacaigac, yogo sanangnerah do-manale ye inguc aiwec. <sup>13</sup> Ilec yanguc kwelengkeicne fagac,  
“Na Yakobole angacnugac. Nga Esaulebac takicnugac.”

(Mal 1:2-3)

<sup>14</sup> Ilec ailu wenuc minoga? Wapong ye yefe dondonne liloicaigac, me? Yogo miyacbenang. Ye yowaine madicne micaigac. <sup>15</sup> Yedi Moses yanguc edowec, “Na monicte kwele-sowac aicnonogale ngagelu, ye kwele-sowac aicnodacte.

Nga monicte umac bafickenogale ngagelu, ye bafickedacte.”

(Wah 33:19)

<sup>16</sup> Inguc aime Wapong ye yeicne kwele-sowacinele ailu ngic bawosaedaicte, yogo ngic ye yeuctihac angac bafuwanaale me boletowa bawecte ailu inguc mi fikedaicte. <sup>17</sup> Wapongte hibiwa yowa yanguc kwelengkeicne fagac, yowa yogodi Isip yengele ngictau Farao yanguc edowec,

“Na tapiline gala lobe himongne himongne ngic-ngigac yenge nale tapili nganidaingte. Ailu wacne mibong yegengkelu hikeme ngageyacken-ingte ailu, ga ngictau locgube nganicgudaingte.”

(Wah 9:16)

<sup>18</sup> I yangucte, Wapong ye ngic monic kwele-sowac aicnonogale ngagegacka, ye yogo aicnodacte. Ailu ngic monicte kweleine hefeme kwele-sanang ainogale ngagegacka, ye yogo kweleine hefeme kwele-sanang aidaicte.

### *Hebec-baba ngic*

<sup>19</sup> Ilec ga nale yowa yogo ngagelu yanguc midamecte mecne, “Wapongte angac nga ngage-ngage hegilenogale yefe mi fagac. Aime yefe ingucne mi fadecka midec, yedi nongileng omale bikickolec wacnubacaigac?”

<sup>20</sup> Himong-ngic, ga ngagegeic, ga ngic sugu, inguc milu Wapongte yowa ameine omale bafaliyecnodamecte? Mole-hibi fileinedi wiyc monic bame wiyc moledi baicne, yogodi fileine nalic yanguc uwacnodaicte, me?

“Ga omale na inguc bacnugic?”

(Yes 29:16; 45:9)

Yowa inguc mi uwacnodaicte.

<sup>21</sup> Me hebec kudi-baba ngic ye angacinele bole nalic badaicte, ye himong gbakitac balu yogodi hebec monic bole madicnele badaicte. Nga hebec monic bole gocnele nalic badaicte, me? Oc, ye nalic badaicte.

<sup>22-23</sup> Hebec gocne yenge tapili nga hibi-angocnginengkolec ainingte Wapongti molickelu kwele-sowac aiyelelu bamadicebawec. Ngic-ngigac

\* **9:8:** Abraham ye ngigac monickolec game kogoc fikewec, wacne Ismael. Aisak sugudi Wapongte mimipangka fikewec. Yogolec lobeina ngigac monic balu adu-madec gocne kweficebawec. Ilec ailu Ismael nga adu-madec gocne yenge ngambofocinebenang mi aigaing. **9:8:** Gal 4:23    **9:16:** Efs 2:8    **9:21:** Yer 18:6

yenge yele tapili nga hibi-angoceneholec nganiningte, ye angacinele inguc aiwec. Ye pasiine aalicka ngic-ngigac edalicebadaitce. Aime yenge yele tapili nganiningte hebec gocne yenge hesocebame dangkeningte alingka biyachac locebaincne domagaing. Aime yengele ailu tatakic mikac dameng dale wangeengineng gacaigac, ye nalic angacine balaibelu inguc hocne aidaicte. <sup>24</sup> Yogo nongileng hocne yele tapili hibi-angoceneholec nganiningte wacnubawec. Yogo Yuda ngic-ngigac sugu miyac, ye Israel yengele alingkacni miyac nongileng momoc wacnubawec. <sup>25</sup> Ye siduc-mimi ngic Hoseale hibiwa inguchac yanguc migac,

"Ngic-ngigac aling gocne yenge molickelu nale ngic-ngigac mi gaibong, yenge nale ngic-ngigac, inguc wacebadacte. Aime ngic-ngigac gocne yengele mi angacnuwec, na ngic-ngigac yogo yengele angacnudaicte." *(Hos 2:23)*

<sup>26</sup> "Aime Waponti yengele yanguc miwec, 'Ngenge nale ngic-ngigac miyac.' Ailu himong iwahac yanguc wacebadaitce, 'Ngenge Wapong gagaine-holec yele adu-madecfocine.' " *(Hos 1:10)*

<sup>27</sup> Yesaiyadi Israel yengele ngagelu yanguc wackelu miwec, "Israel ngic-ngigac yenge dzalengineng sugucnehabenang yogo kiwecte dingong ingucne aidaictewa, na sifu yengelacni nebocene efecnemac olocebabe wasecne aidaingte. <sup>28</sup> Sugucnedi himongka ngic-ngigac yowanganeng biyacbenang wosaelu mimoctolu boleine bamocdaicte." *(Yes 10:22-23)*

<sup>29</sup> Aime Yesaiyadi wiyc lobewa fikenale yowa yanguc biyachac miwec, "Sugucne Tapilitowa Fileine, yedi ngesa-ngambofocnonggeng nebocene gocne olocebame wasecne mi aidabongka midec, nongileng Sodom nga Gomora yenge ingucne miyac aidabeng." *(Yes 1:9)*

### *Ngage-ngagesingngineng hegileibong*

<sup>30</sup> Ilec wenuc minoga? Israel yengele alingkacni miyac, yenge dondonne ganingte bole sanangne monic mi baibong. Ailu gacgu gaga dondonne bafuwaibong. Yenge ngagesingkeibong. Ilec ailu Waponti dondonne wacebawec. <sup>31</sup> Aime Israel ngic-ngigac yengebac yefe-yowadi gaga dondonna locebanale bole sanangne balu gaibong. Bagalu yefe-yowawa yefe gaga dondonne mi bafuwaibong. <sup>32</sup> Omale mi bafuwaibong? Yenge aibabanginengte ngagesilu ngage-ngagesingte noine yogobac hegileibong. Yenge posa kwopocebame wawcebawec, yogo Kristole silic ingucne. <sup>33</sup> Ilec Kristole yanguc kwelengkeicne fagac,

"Ngagegaing, na Sion kupicka<sup>†</sup> posa monic lobe ngiyeme yenge iwa edebong kwopocebame wawelu ngage-sowac bafuwadaingte. Aime monic ye ngagesingkedaitcwe, ye mi gameedaicte." *(Yes 8:14; 28:16)*

## 10

### *Kwele-madicte yefe lowec*

<sup>1</sup> Ngic hae-gbafoce, Waponti Yuda ngic-ngigacfocne bikicte ameine bame wasecne aidaingte, yogolec kwele-angacka ngagepangkelu ye milock-egabac. <sup>2</sup> Aime na yengele mibasanang ailu yanguc migabac, yenge Wapongte kwelec kwenogale dogbac sanangnehabac aicaigaing. Aime ye kwelec wenuc kwecnodaingte, yogolec ngage-ngage-motoc mi fayelelagac.

<sup>†</sup> 9:33: Sion kropic yogo Yerusalem iwa domagac. Ilec ailu dameng gocna Yerusalem ngic-ngigac yengele ngagelu Sion kwelengkeibong.

<sup>3</sup> Ailu yenge yengungti hac yefe dondonne bafuwanogale bolein bacaigaing. Aime Wapongti yefe monic bafuwalu ngic-ngigac dondonne wacebacaigac, yefe yogo mi ngagegaing. Inguc ailu yenge Wapontacni gaga dondonne fagac, yogolec bagewa ganingte hegilecaigaing. <sup>4</sup> Kristo ye yefe-yowale bolein bamoctowec. Ilec ailu ngic-ngigac ye ngagesingkecaigaing, yenge sasawadi gaga dondonne bafuwadaingte.

### *Kristo ye madicnenonggeng*

<sup>5</sup> Mosesdi yefe-yowale yefe dondonne gaga yogolec yanguc kwelengkewec fagac,

“Monic ye yefe-yowa sasawa balaibedaicte, ye yefe iwa gagaineholec ailu gadaicte.” *(Dep 18:5)*

<sup>6</sup> Aimebac Wapongti ngage-ngagesingnonggengte ailu dondonne wacnubadaicte, yefe yogodi yanguc migac,

“Gageuctihac kwelegonedi yanguc mi uwanagudamec, madi honocmengka fedaicte?” *(Yef 30:12)*

Yogo Kristo honocmengkacni bawanogale ngagelu migac. <sup>7</sup> Me yanguc,

“Madi long sugucnebenang iwa haudaicte?” *(Yef 30:13)*

Yogo Kristo homackacni balu ofenogale ngagegac. Inguc monic mi ngagedaing.

<sup>8</sup> Ilec gale yowa yanguc miicne fagac,

“Waponkte yowa yogo emenginang, nga micnginang, ailu kwelenginang fagac.” *(Yef 30:14)*

Aime ngage-ngagesingte yowa yogo hocne edocebalu weduyelecaigabeleng. <sup>9</sup> I yangukte, ga micgonedi Yesu ye Sugucne, yogo miyengka yegengkedaitewa, nga Wapongti Yesu homackacni bagboliywec, yogo kwelewa ngagesingkedamectewa, Wapongti bikicte ameine bame wasecne aidamecte. <sup>10</sup> Nongileng kwelenonggengti ye ngagesingkebeng, yedi dondonne wacnubadaicte. Ailu micnonggengti yele mileng yegengkeme, yedi bikicte ameine bame wasecne aidabelengte. <sup>11</sup> Waponkte hibidi yogolec yanguc migac,

“Monicti ye ngagesingkedaitewa, ye mi gameedaicte.” *(Yes 28:16)*

<sup>12</sup> Aime Yuda ngic-ngigac nga Grik ngic-ngigac yeke silicnginec monic-monice mi aigac. Sugucne ye sasawa nongileng Sugucnenonggeng. Aime ngicngigac yenge yedi bafacebanale wackecaigaing, yenge kwele-madicka wiyc haicne monic-monice nalic yeledaicte. <sup>13</sup> Aime

“Ngic-ngigac yenge Sugucnele wac wackebong, yedi bikicte ameine bame yenge sasawa wasecne aidaingte.” *(Yol 2:32)*

<sup>14-15</sup> Monic saleibongka yedi Waponkte yowa nalic edocebalu weduyeledaicte. Aime Waponkte yowa edocebalu weduyelewecka nalic ngagedaingte. Aime ngageibongka nalic ngagesingkedaitingte. Aime ngagesingkeibongka yenge Sugucnele wac nalic wackelu wasecne aidaingte. Ilec yanguc kwelengkeicne fagac,

“Ngic yogo yenge Siduc Madicne balu kwesibong, ngic-ngigac yengi yengele hige ucine kwele-madicka ngagedaingte.” *(Yes 52:7)*

### *Israel yenge Siduc Madicne ngagelu hegileibong*

<sup>16</sup> Aime Israel ngic-ngigac yenge Siduc Madicne ngageibong, yengelacni bocyacti mi balaibeibong. Yesaiyadi yanguc miwec,

"Sugucne, nonge siduc mibeng yegengkewec, ngic weni yenge ngagesingkeibong? Yengelacni efecnedi sugu ngagesingkeibong." *(Yes 53:1)*

**17** Inguc ailu Kristole yowa mibeng yegengkeme, yenge yowaine ngagecaigaing. Ailu yowa yogo ngagelu ngagesingkedaingte.

**18** Aime Israel yengebac yowaine hedecnginengti mi ngageibong, me? Inguc miyac, yenge biyachac ngageibong. Wapongte yowa yanguc kwelelengkeicne fagac,

"Yowa-malacine yogo himongka hikeyackewec. Yenge yowanginengti himongtowa yagowa neboc nga neboc moto-motoina hikeyackewec." *(Mige 19:4)*

**19** Ilec ailu hatacmac mibe, Israel ngic-ngigac yenge yowaine kwelenginengti ngage-motoibong, me? Mosesdi Wapongte mic balu yoglec yanguc miwec, "Na ngengela pasi babe ngenge ngic-ngigac aling monic himong monickacni yengele hasowac aidaingte. Ailu aling monic ngage-ngage-motocngineng mikac, ngenge yengele aalic ngagedaingte." *(Yes 32:21)*

**20** Yesaiyadi Wapongte mic balu hangoc mikac yoglec taockelu himongne himongne ngic-ngigac yengele yowa yanguc miwec,

"Ngic-ngigac yenge na mi basacnulu moc bafuwacnuibong. Ailu nale mi uwalu gaibong, yengela fikeiba." *(Yes 65:1)*

**21** Aime hatac Wapongte mic balu Israel ngic-ngigac yengelebac yanguc miwec,

"Ngic-ngigac aling monic yowane mi balaibecaigaing, ailu yowa kwekwe gacaigaing, yenge nala kwesiningte ailu, hadengsoc molene sungkecaigabac." *(Yes 65:2)*

## 11

### *Wapongti Israel bacebadaicte*

**1** Ilec ailu yanguc ngagelu uwagabac, Wapongti Israel ngic-ngigacfocene biyachac hegilecebawec, me? Yogo miyac! Naneicne Israel ngic Benyaminte alingkacni, ailu ngambononggeng Abraham yelacni. **2** Wapong ye ngicngigacfocene biyachac bawosaecebalu mi hegilecebawec, miyac. Aime Elaiya ye Israel ngic-ngigac amengineng badunale Wapongte haicka yanguc milu milockewec, yogo Wapongte hibiwa kwelengkeicne fagac,

**3** "Sugucne, yenge gale siduc-mimi ngicfocgone wehomaceaibong. Ailu gale alatagone hembalackeibong. Aime na moniyangti sugu gabe wecnubong homabele ngagegaing." *(1Ngt 19:10,14)*

**4** Ye inguc milu milockeme Wapongti ameine bafaliyelu yanguc edowec, "Na ngicfocne 7 taosen biyachac sebicebalu bacebaiba gagaing. Ailu yenge siduc-gbong wacine Bael ye ketadi monic mi holecnoibong." *(1Ngt 19:18)*

**5** Silicine ingucnehabac Wapongti dameng yagowa Israel yengelacni nebocene kwele-madic aiyelelu bawosaecebame yeicne habu-hakic monic ailu gagaing. **6** Yedi bawosaecebalu kwele-madicine yelewec, yogo yengileng aibabangineng madicnele ailu mi bawosaecbawec, miyac. Ye yengileng aibabangineng madicnele ailu bawosaecbadecka, ibac kwele-madicine yogo kwele-madic noine mi aidec.

<sup>7</sup> Ilec ailu yanguc fagac, Israel yenge wiyc banogale boletowa bagacu yogolec noine monic mi bafuwaibong. Aime Wapongti ngic-ngigac yengele hewackacni bawosaecebawec, yengi sugu wiyc yogo bafuwaibong. Aime Israel nebocene yenge kwele-sanang nga kwele-fong ailu gaibong. <sup>8</sup> Yengele yowa monic yanguc kwelengkeicne fagac,

“Wapongti pasi bame yenge asungineng gung kwomocbenang fagac ingucne gaibong. Ailu dongenginengti wiyc monic mi nganiibong. Nga hedecenginengti wiyc monic mi ngageibong. Yenge ingucne gaibongti yakumac gagainghac.” *(Yef 29:4; Yes 29:10)*

<sup>9</sup> Aime Dawididi yanguc miwec,

“Nosing nonogale aibabangineng aicaigaing, yogodi suba nga ufc ingucne bacebame bikicnginengte ameine aidaic. <sup>10</sup> Wiyc monic mi nganinge yenge dongengineng pisickedaic. Ga damengsoc aiyeleengka lobengineng ngosockeicne gadabiyeng.” *(Mige 69:22-23)*

<sup>11</sup> Na yanguc taockelu uwagabac, Israel yenge wawelu sowaleibong, me miyac? Yogo miyachenang. Yenge Wapongte yowa hegileibongte ailu Wapongti Israel yengele alingkacni miyac, yenge bikicte ameine bame wasecne aiibong. Aime Israel ngic-ngigac yenge nganicebalu hasowac ainingte inguc aiwec. <sup>12</sup> Aime Israel yenge Wapongte yowa hegileibong, aibaba yogodi kwele-madicte wiyc bocyac bafuwame himongne himongne ngic-ngigac yengela hikeyackewec. Aime Israel yenge Wapongte yefe hegilelu waweibong, yogodi Israel yengele alingkacni miyac, yenge wiyc madicte bocyachenang bafuwayelewec. Gacgu, Israel ngic-ngigac homacnedi ngagesingkedaingte, dameng iwa kwele-madicte wiyc feicnebenang fikedaicte.

### *Israel yengele alingkacni miyac*

<sup>13-14</sup> Aime Israel yengele alingkacni miyac gagaing, ngengele yanguc mi-gabac, naneicne socte alingfocne Israel yenge ngengele hasowac aidaingte. Ailu gocne yenge yefe iwa ngenge ingucne bikicte muckacni lukecebamne wasecne aidaingte. Inguc fikenale ngagelu nani ngengele salecebaicne aiiba. Ailu bole balu gagabac, yogolec ngagebe feicnebenang aigac. <sup>15</sup> Wapong ye Israel lobe holecebalu hegilecebawec, yogolec himong sa-sawa ngic-ngigac yenge Wapongkolec kwele-moniyang bafuwaibong. Inguc fadaictewa, Wapongti Israel hatacmac bacebame, homaicne yenge gboliyelu gaga badaingte.

### *Oliwa yoc*

<sup>16</sup> Ngenge nosing molickelu nebocene balu Wapong lacnodaingtewa, nosing sasawa fagac yogo momochac yele bingec aidaicte.\* Ailu yoc godocine yele bingec aidaicte, mangngine sasawa yenge inguchac yele bingec aidaingte.

<sup>17</sup> Wapongti oliwa noinele mangngine gocne welockelu baickewec yogo Israel ngic-ngigac nebocene. Yogolec macina, ga kate oliwa mangnginebenang aigamec, yogo Israel yengele alingkacni miyac ingucne. Aime mangngine kpisicne monic welocgulu oliwa noina taocguwec. Aime ga mangngine noine yengeholec gagicka yanguc aidaicte, ga yoc godocineholec taockegalu helocgone iwacni fuluckelu gadamekte. <sup>18</sup> Inguc aigacte, ga soc bafefe

---

\* **11:11:** Sale 13:46    **11:16:** Ye bretle migac. Yogolec yowa yagowa fagac, Himong kisiwa 15:17-21. Nosing fuli balu Wapongte ibulonoga, yogolec yowa yagowa fagac: Wahikeicne 23:19; 34:22; Depec-baba 2:12,14; 23:10,17,20; Himong kisiwa 18:12; 28:26; Yefe-yowa 26:2,10.    **11:17:** Efs 2:11-19

ailu mangngine nebocene yengele yanguc mi ngagedamec, "Nani yenge ewalicebagabac." Ga soc bafefe aidamectewa, yanguc ngagedamec, ga yoc mangngine sugu, gagi yoc godocine mi ailu domagamec, yoc godocinedi domame ga domagic.<sup>19</sup> Inguc mibe gagi yanguc midamete mecne, "Ye na hocne yocka taocnunogale mangngine gocne welockewec."<sup>20</sup> Entacka yanguc midamete, "Yenge mi ngagesingkeibongte ailu weloebebawec." Aime ga ngagesingkeigicte ailu sanangne domacaigichac. Ilec ngage-ngagegonia soc bafefe mi aidamec. Ailu hangocgume gadamec.<sup>21</sup> Wapongti yoc noinele mangngine mi olocebawecka, ga inguchac nalic mi olcgudaicte.

<sup>22</sup> Ga Wapongte pasi madicne nga pasi dacine sanangnehac fagac, yogo momochac ngani-motodamec. Ye ngic-ngigac ngage-ngagesingngineng mikakte waweibong, yenge dacineholec sanangnehac aiyelewec. Nga gabac pasi madicne aigelewec. Ga yele pasi madicnele bagewa mi gadamectewa, ga inguchac welocgudaicte.<sup>23</sup> Aime mangngine tofaine ngage-ngagesingngineng mikac, yenge hefaliyelu ngage-ngagesingkolec andaingtewa, ye yocka hatacmac taocebadaitc. Yogo yanguc, Wapong ye yocka hatacmac taocebanale nalic mi kpungkedaicte.<sup>24</sup> Ga katele oliwa mangngine kpisicne, yogo helocgulu oliwi yoc noine monic gale aling mi aigac, yeholec taocgunale mi umaledaicte. Ilec ailu oliwa yoc noine yeicne mangngine hatacmac taockenale bole yogo wiyc efecnebenang aidaicte.<sup>†</sup>

### *Wasec aidaingte*

<sup>25</sup> Ngic hae-gbafocone, ngenge ngengileng ngagebong feicne aidaickale ailu, yowa monic sangke-sangke fagac, yogo ngageningte ngagegabac. I yanguc, Israel nebocene yengele kwele ngage-ngagengineng yogo fongkelu faemewa, Israel yengele alingkacni miyac, ngenge dzalengineng miwec yogo fecgu bafuwadaingte. Dzale yogo aimebac, Israel ngic-ngigac tofaine inguchac felu taockedainigte.<sup>26</sup> Inguc aime Sugucnedi Israel sasawa yenge bikicte muckacni lukecebame wasecne aidaingte. Ilec yowa yanguc kwe-lengkeicne fagac,  
"Asa-baba ngic ye Sionkocni wame, Yakobole aling sasawa yenge Wapong lobe holecnocaigaing, yengele aibaba sowacne sasawa yogo baickedaitc."

<sup>27</sup> "Aime nale dodoxic yengeholec fagac. I yanguchte, nani bikicngineng baickedacte."  
*(Yes 59:20-21; 27:9; Yer 31:33,34)*

<sup>28</sup> Siduc madicne kwesime Israel yenge Wapongkolec ngaba ailu gagaingte ngenge yefe bafuwaibong. Aime Wapongti yenge bawosaebalubac Abraham ngambofocine yengele mipangkewecete ailu kwele-angac aiyelulu gagac.<sup>29</sup> Wapongti ngic-ngigac wacebalu kwele-madicte wiyc yelelu, hatacmac mi ewalicebacaigac, ye pasi yogo mi facnogac, miyac.<sup>30</sup> Ailu Israel yengele alingkacni miyac, ngenge molickelu Wapongte yowa wewe gaibong. Aime yakumacbac Israel yengi yele yowa wewe gaibongte ailu, Wapongte kwele-sowac ngengela fikewec fagac.<sup>31</sup> Yenge molickelu Wapongte yowa weibongte ngenge Wapongte kwele-sowac baibong. Aime Wapongti yanguc lowec, ngenge kwele-sowac yogo baebongka yenge inguchac yogo baadingte.

<sup>32</sup> Wapongti lobewa ngic-ngigac sasawa kwele-sowac aiyelenale ngic-ngigac sasawa yowa wewengineng yogolec mucka locebayaickewec.

### *Wapongte wac mitengkedabeleng*

**11:22:** Yoa 15:2,4      <sup>†</sup> **11:24:** Yoc noine hucineholec yogo didimang yengi yefe iwa balu taockecaigaing.

**33** Oc, Wapongte aibaba madicne lifuc ingucne fagac. Aime ngage-ngage-motocene nga ngage-ngageine yogo sugucnehab ailu gbolongne.

Aime yele mimocto-mimocotle fungine nga pasiine yogo nongileng ngage-ngage ewaligac.

**34** "I yangucte, madi Sugucnele ngage-ngage ngagewec?

Ilec monicti ye ngage-ngage nalic mi lacnodaicte."

(Yes 40:13)

**35** "Ailu monicti molickelu Wapong wiyc monic lacnowecka, ye yogolec ameine baducnodaicte, me?"

Yogo miyacbenang."

(Yop 41:11)

**36** Wapong ye yeuctihac wiyc sasawa bafuwayackewec.

Yogo yeicne tapiliwa fayackegac, ailu yeicne angacka fikenale loicne.

Yela wac feicne nga mimi-madic yogo inguc fafegidaic, yogo foinac.

## 12

### *Asule bole balu ganoga*

**1** Inguc aime ngic hae-gbafoce, Wapongti kwele-sowac sugucnehab aingelewete mibe yegengkeme yowa sanangne yanguc edocngebabac. Ngenge Wapong haicina afeelu kwelec kwecnolu socnginengti depec ingucne lodabiyeng, yogodi gagaineholec Wapongte bingec aime ye ngageme madickedaicte. **2** Ngenge dameng yogolec ngic-ngigac yengeholec momochac ababangineng silicinc moniyang mi aidaic. Wapongti kwele ngage-ngagengineng hole-gboliyengeleme ngenge Wapongte angac ngage-wosaec aidaing. Ailu yedi wiyc dondonne buchuchac nga madicnebenang yogo ngageme madickegac, yogolec silicina nalic ngage-motodaing.

### *Kwele-madicka wiyc aiyeledaing*

**3** Wapongti kwele-madic aineleme, na yogolec silicina ngenge sasawa moniyang moniyang yowa yanguc edocngebabac. Gageicne wosaec-nagulu gocne ewalicebacete mi ngagedamec. Ailubac gageicne dondonne wosaecnagudamec. Wapongti ngage-ngagesingte maaine gelewec, yogolec silicina balaibedamec.

**4** Soc ye buchuchac moniyang aigac, yogolec kwelina hodoc donge-hedec, nga hige-molenonggeng fagaing. Ailu yenge bolengineng moniyang sugu mi bacaigaing, miyac. **5** Silicinc ingucnehab nongileng bocyac ailu Kristoholec wetackelu soc moniyang aiyackegabeleng. Ailu nongileng sasawadi filesoc filesoc ngic-ngigac yengele agofocngineng aigabeleng.

**6** Wapongti kwele-madicne nolewec, yogolec silicina kwele-madicte wiyc silicinc monic-monie nolewec, yogo fanlegac. Wapongti kwele-madicinele ailu monic Wapongte siduc-yowa minogale lacnowecka, ye ngage-ngagesing facnogac, yogolec silicina balaibelu midaic. **7** Aime Wapongti ngic me ngigac monic baficebanale kwele-madicte wiyc lacnowecka, ye babaficte bole hocne badaic. Nga monic ye kwele-madicte wiyc wewedu bole facnogacka, ye yogolec silicina ngic-ngigac weduyeledaic. **8** Monic ye ngage-ngagengineng kwefangkelu mibasanang aiyelenale kwele-madicte wiyc facnogacka, ye boleine yogolec silicina balu gadaic. Nga monic ye kwele-madicte ngic-ngigac wiyc haicina monic-monie moc ye lecaigacka, ye wiyc yogo umacnehab yeledaic. Nga ngic-ngigac micne galu bole yogo bacaigacka, ye sanangkelu boleine yogo badaic.

Nga kwele-sowac ngagelu ngic-ngigac waweweine baficebanale bole ba-caigacka, ye kwele-madicka nga angacka ngic-ngigac baficebadaic.

### *Aibaba madicne aiyeledabieng*

<sup>9</sup> Ngenge kweledi angac ngagenagubabieng, yogo kwesac mi ainagudabieng. Ngenge aibaba sowacne kweledi wickelu lobe holecnolu aibaba madicne sanangkelu ailu gadaing. <sup>10</sup> Aime ngenge ngic hae-gbafoengneng yengele kwelenginengti angac ngageyelebong yenge ngengele feicne ainingte ngagelu alang bayeledabieng. <sup>11</sup> Ailu ngenge tatakic mikac bole sanangne banogale gabong Asudi kwelengineng kwefangkeme, ngenge Sugucnele kwelec kwelu gadabiyeng. <sup>12</sup> Aime Wapongti wiyc fikengelenale miwec, yogo fikengeledaicte, ngenge inguc ngagelu beliyelu wangec gadaing. Aime doicte damengka galu sanangne domalu damengsoc mamang hidulu milockelu gadabiyeng. <sup>13</sup> Ailu Wapongte bingec yenge wiyc monicte kpungkebong, ngenge umacngineng ngagelu wiyc yeledabieng. Nga mac monickacni ngic-ngigac gocone yengi kwesibong, ngenge hefolecebalu macka locebalu damongebanogale aingeledaic.

<sup>14</sup> Ailu ngic-ngigac yengi weyebic aingelebong, ngenge yenge mimi-madic milu edocebadabiyeng! Ngenge mimi-madic milu edocebalu monic mi sawecebadabiyeng. <sup>15</sup> Ngic-ngigac beliyelu gacaigaing, ngenge yengeholec beliyedabieng. Ailu ngic-ngigac hiyacaigaing, ngenge yengeholec hiyadabiyeng.

<sup>16</sup> Ngenge kwele-moniyang gadaing. Ailu ngage-ngagengeneng feicne ainale mi aingeledaic. Ngenge ngic-ngigac waweweine yengeholec gadabiyeng. Ngenge ngengileng ngage-ngagetowanginengkolec inguc mi ngagenagudabiyeng. <sup>17</sup> Ailu ngic-ngigac sowacne aingelebong, ngenge sowacne ameine mi baduyeledaing. Ngenge ngic-ngigac sasawa yengele hewacka aibaba madicne aiyeleningte ngagelu gadabiyeng. <sup>18</sup> Ngenge kwele-mogungkolec gagale tapili fangelegac yogo monicti mi hedicngebagacka, kwele-mogungte yefewa ngic-ngigac sasawa yengeholec gadabiyeng. <sup>19</sup> Agofocne kwelenedi ngengele angac ngagegabac, aibaba sowacne aingelebong, yoglec ameine mi baduyeledabieng. Aime Wapongti alalicne baduyelenle sawaine loebongka, yeuctihac sowacnele ameine baduyeledaic. Ilec yanguc kwelengkeicne fagac, “Sowacnele ameine badu-badu, yogo nale bole,” Sugucnedi inguc migac.”

(Yef 32:35)

<sup>20</sup> Ngengebac yanguc aidabiyeng,

“Ngabagone nosingte homame gagi nosing lacnodamec. Ailu misale aic nome gagi misa gumedamec. Ga inguc aiyengka, ye aibabaine sowacnele gameedaicte.”

(Ynn 25:21-22)

<sup>21</sup> Ga gacgu sowacnedi bacgu wadaickale, sawaine mi locnodamec, ga aibaba madicne aiyengka, sowacnele tapili wadaic.

## 13

### *Gamangte bole*

<sup>1</sup> Gamangfocnonggeng nga sugucnefocnonggeng gagaing, nongileng sawaine yengele bagewa galu yowangineng ngagelu gadabeleng. Bole-yowa

tapiliineholec sasawa yogo Wapong yeuctihac yelecaigac, yenge yengungti-hac mi fikeibong. <sup>2</sup> Ilec monic ye gamangfocnonggeng yengele yowa hegile-gac, ye Wapongti yowa alingkelu lowec, yogo inguchac hegilegac. Aime ngic-ngigac yowa hegilecaigaing, ingucne yenge yengungti-hac aibabanginengte ameine umac badaingte. <sup>3</sup> Aime gamangte bole-ngic yenge ngic-ngigac aibaba madicne aicaigaing, yenge hangoc mi bafuwayelecaigaing, miyac. Ngic-ngigac aibaba sowacne aicaigaing, yenge sugu hangoc bafuwayele-caigaing. Aime ga gamangte bole-ngic yengele hangoc mikac ganogale ngagegicka, aibaba madicne aiyengka, gamangte bole-ngic yengi ga miteng-gudaingte.

<sup>4</sup> Ga madicne gacte ailu yenge Wapongte bole-ngic gagaing. Ailu yenge hudule fitec moc mi balu gagaing, ga aibaba sowacne aidamectewa, hang-ocgudaic. Yenge Wapongte mole-bafic ngicfocene galu Wapongte aalic bikic-baba yengela baduyeledaingte. <sup>5</sup> Aime aalic badu-badule bole yogo sugu miyac. Ngengungti-hac kwelenginengti ngage-wosaec ainagubong gbag-bacne aime yengele bagewa gadabiyeng. <sup>6</sup> Gamangfocnonggeng yenge Wapongte bagewa gamangte bole yogo hocne balu gacaigaing. Aime ngenge yogolec hocne takes lobong bacaigaing. <sup>7</sup> Ngenge takes-baba yenge takes yeledabiyeng. Ailu moneng-mafale takes mibong yogo yeledabiyeng. Ailu sugucnefocngineng yengele alang sugucnehac bacebalu micnefocngineng yenge alang bacebadabiyeng. Aime tofagonele ameine me alang-baba aiyelenogale miicne fagac, yogo sasawa aiyackedabiyeng!

### *Yefe-yowa sasawa*

<sup>8</sup> Aime ngenge amengineng monic fagacka, yogo biyac badudabiyeng. Ngenge kweledi ago ainagulu angac ngagenagulu gadabiyeng, aibaba yogolet ameinebac moto-motoine mikac fagidaicte. Monic ye ngic-ngigac monicte kweleinedi ago aicnolu angac ngagecnolu gadaicte, ye yefe-yowa sasawa kpatulelu balaibedaicte. <sup>9</sup> Ung-yowa gocne yanguc fagac, “Ga selo-boic mi aidamec.

Ngic-ngigac mi wehomacebadamec.

Hise mi badamec.

Ngani-angac mi aidamec.”

(Wah 20:13-15,17; Yef5:17-19,21)

Ung-yowa yogo nga yefe-yowa gocne tofaine, yogo yowa moniyangte kwelina yanguc kpatuleicne fagac,

“Gageicne aigelecaigac, silicine ingucnehac ngic-ngigac gale emewa gagaing, yengele kwelegonedi ago aiyelelu angac ngageyelelu gadamec.”

(Dep 19:18)

<sup>10</sup> Aime monic ye ngic-ngigac monic kweleinedi ago aicnolu angac ngagecnolu gadaictewa, ye nalic mi basowaledaicte. Inguc ailu kwele-angacka gaga yogodi yefe-yowa sasawa kpatulelu balaibedaicte.

### *Damengtowa bangkalegac*

<sup>11</sup> Ngenge aibaba yogo bagalu dameng yagolec ngagelu efeckelu gadabiyeng! I yangucte, nonge molickelu Sugucne ngagesingkelu gaibeng, yogowa ngagesingkebeng dameng dalicne ingucne fawec. Yakumachac wasecne aidabelengte, yogolec dameng bangkalegacte ngenge gungkacni gbuliyelu fangkedabiyeng. <sup>12</sup> Deboç biyac miyac ainala aigac, aime mac saenale aigac. Ilec nongileng kundungte aibaba hegilelu angocte maleku holelu gadabeleng. <sup>13</sup> Ailu wiyac wenacka aiaiine madicne, yogo bal-

aibedabeleng. Nongileng misa sanangne nolu kwelenonggeng sifuweme gee wecaigabeleng, yogo mi aidabeleng. Nga selo-boic aibaba aila aibaba kosaine haicine monic-monic, yogo mi aidabeleng. Ailu yuwenac nga hasowac ainagulu gaga yogo hegileyackedabeleng. <sup>14</sup> Kwele esecnele angacti ngengela fangkedaickale, ngenge socnginengte angac mi balaibedabiyeng. Ngenge Sugucnenonggeng Yesu Kristo maleku ingucne holelu gadabiyeng.

## 14

### *Ngage-ngage yaeckangka ganogale yowa*

<sup>1</sup> Monic ye ngage-ngagesingkolec galu aibaba gocne wenuc ainale kwele-yaec ngagecaigac. Ngenge ngic yeicne ngage-ngage wosaelu mi mimoc-todaing, miyac. Ngenge ye hefsolebong hewacnginang game yele angac-ngebadaic. <sup>2</sup> Gocne yenge Sugucne ngagesingkelu nalic nosing sasawa nocaigaing. Nga gocnedibac Sugucne ngagesingkelu kwele-yaec aila yenge bole-kpiliwacni nosing sugu nocaigaing. <sup>3</sup> Ngic monic ye wiycasasawa nocaigac, yedi monic nosing gocne mi nocaigacte aila, ye ngage-sowac mi aicnodaic. Ailu monic ye nosing gocne mi nocaigac, yedi monic wiycasasawa nocaigacte aila, yogolec wosaelu mi mimoctodaic. Wapongti ye biyachac hefoleme angackewec. <sup>4</sup> Gagi ngic monicte kwele kwekwe ngic yele aibaba wosaelu mimoctoete tapili geleicne, me? Yogo miyac. Ye aibabainedi wosaeme wawedaiete, me sanangne domadaicte yogo sugucneinedibac nalic wosaedaicte. Ailu ngic yogo ye Wapongte kwele kwekwe ngic sanangne domaemewa, Sugucnedi yogolec tapili lacionale mi kpungkedaicte.

<sup>5</sup> Monic ye hadeng sasawa yengelaci hadeng monicte ngageme feicne aicaigac. Aime monictibac hadeng sasawa yogolec ngageme silicne moniyang aicaigac. Ngic-ngigac sasawa yenge filesoc filesoc yenge yengileng kwelenginengti ngage-motolu weni yogodi nalic aigac, yogo ngagepangkelu gadaingte. <sup>6</sup> Monicti hadeng monicte ngageme feicne aicaigac, ye Sugucne ngagesilu inguc aicaigac. Nga monic ye nosing sasawa nocaigac, ye Sugucne ngagesilu Wapong kwele-madic edolu nosing nocaigac. Aime monicti nosing gocne hegilecaigac, ye inguchac Sugucne ngagesilu Wapong kwele-madic edolu aicaigac. <sup>7</sup> Nongilangkoci monicti yeicne gagainele ngageme yogo yeicne bingec aigac, inguc mi fagac. Aime monicti yeicnele aila homadaicte, yogo monic mi fagac. <sup>8</sup> Nongileng gblolicne gadabelengtewa, yogo Sugucnele aila ganoga. Nga homadabelengtewa, yogo Sugucnele aila homanoga. Homadabelengte me gblolicne gadabelengte, yogo Sugucne yeicne aling gadabelengte. <sup>9</sup> Kristo ye gblolicne gagabeleng nga homaibong, sasawa nongileng Sugucne ganogale aila homalu hatacmac gboliyelu gaga bawec.

<sup>10</sup> Ga omale ngic hae-gbagone aibabaine wosaelu mimoctodamecte? Me ga omale ngic hae-gbagone ngage-sowac aicnolu tapiliine bawadamecte? Yogodi nalic mi aigac. I yangucte, nongileng sasawa Wapongti yowawa locnubame domadabelengte. <sup>11</sup> Wapongte hibiwa yowa yanguc biyachac kwelengkeicne fagac,

"Sugucnedi yanguc migac, 'Na gaga fileine. Ilec ngic-ngigac sasawa yenge nale haicka ketadi holeneledaingte. Ailu sasawadi Wapong gagac, yogo micti mibong yegengkedaicte.' "

(Yes 45:23)

**12** Inguc aime nongileng sasawadi domalu aibabanonggeng himongka aibeng, yogolec siduc filesoc Wapong milu edodabelengte. **13** Ilec ailu nongileng ngic hae-gbafofnonggeng yengele aibaba wosaelu mi mimoctodabeleng. Ailu nongileng ngic hae-gbafofnonggeng kwopocebame ngagegesingka wawedaikale, gagale yefewa aibaba yogo yoc me okac ingucne monic mi lodabeleng, nongileng yogo wosaelu ngagedabeleng.

### *Ngic hae-gbafofnonggeng yengele angacngebadaic*

**14** Aime Sugucne Yesuholec wetacke galu ngagepangke-benangkelu yan-guc ngagegabac, nosing me wiyc monic yogo yeuctihac wonongkolec mi aigac. Aime sifu monicti wiyc monicte ngageme wonongkolec aigac, inguc ngagesidaictewa, ngic yela nosing me wiyc yogo wonongkolec aigac.

**15** Aime gagi nosing monic noengka, ngic hae-gbagone monicti yogolec kwele-umac bafuwagacka, ga kwelegonedi angac yefeine mi balaibegic. Kristo ye ngic hae-gbagone yele ailu homawec, ye ga nosing nocaigic. Ilec ailu wawelu sowaledaickale, ga nosing yogo hegiledamec. **16** Ilec ailu ngenge Wapongte wiyc noine yogo madicne damongkelu gadaingtewa, gocne yengi ngengele wiyc madicne fagac, yogo yowa milu mi suledaingte. **17** Iyangucte, nosing misa yogodi Wapongte ngani-damongte noine mi aigac. Kwele-mogung, nga gaga dondonne, ailu belic-belic Tili Asudi nolecaigac, yogodibac Wapongte ngani-damongte noine aigac.

### *Kwele-moniyangka ganoga*

**18** Aime monic ye Wapongte ngani-damongte yefe yogo balaibelu Kristole kwelec kwecaigac, ye Wapongti ngagecnome madickedaicte. Aime ngic-nigic yengi inguchac ye nganilu ngagebong nalic aidaicte. **19** Ilec nongileng kwele-mogung aibabawa baficnagulu basugulebeng sanangkenale bafic-nagudabeleng. **20** Ilec ga nosingte ailu Wapongte bole mi heuckedamec. Nosing nga wiyc sasawa yogo gbagbacne, yogo noine. Ailu nosing-nono aibabagone ingucnedi ngic hae-gbagone aicnong wawegacte ailu, ga aibaba sowacne aigic. **21** Ga sic me waing misa nocaigic yogodi ngic hae-gbagone kweleine basowaleme wawedaickale ailu, yogo hegilelu gaengka madickedaicte. Me aibabagonedi monic kweleine basowaleme wawedaickale ailu, ga aibaba yogo hegileng madickedaicte.

**22** Ailu ga wiyc gocne ngage-ngaagegona ngageengka nalic aime, yogo ga geicnac Wapongte haicka ngageengka nalic aidaic. Aime ngic monic ye yeicne wosaecnagulu mi mimoctocnagugac, ye kwele-angackolec. **23** Ngic monic ye kwele-yaec ailu sifu nodaicte, ye yeicne wosaecnagulu mimoctocnagudaicte. I yangucte, ye nosing gocne ngage-ngaageina ngageme nalic mi aidaicte. Aibaba gocne ngage-ngaageina ngageme nalic mi aicaigac, yogo sasawa bikickolec.

## 15

### *Kwele-moniyangka Wapong mitengkedabeleng*

**1** Ngic-nigic Sugucne ngagesingkelu sanangne gagabeleng, nongileng ngic-nigic kwele-yaec gagaing, yengele umac sanangkelu tengkedabeleng. Nongileng sugu madickenangte angac yogo mi ngagelu gadabeleng.

**2** Ailu ngic-nigic nongileng emewa gagaing, yengele madickelu Sugucne

ngagesingkelu sanangne ganingte yengele angac balaibelu bamadicebad-abeleng. <sup>3</sup> Kristo ye inguchac yeicne angacine balaibelu madickenale bole mi bawec, miyac. Ye pasi aiwec yogolec yanguc kwelengkeicne fagac,

"Hasowac aling yengi Wapong ga misulec aigeleibong, yogodi nale feiwa fewec."

(Mige 69:9)

**4** Wapongte hibiwa molickelu wiycasasawa kwelengkeyackebong, yogo nongileng edocnubalu wedunolenigte kwelengkeicne fagac. Yowa ngagebeng yogodi tatakic mikac basanangnubame domalu, wiycafikenoledaicte, yogo ngagepangkelu wangec gagabeleng. <sup>5</sup> Ailu Wapong ye tatakic mikac ngenge sanangkelu mibasanang aingelecaigac, yedi baficngebame Kristo Yesule ngage-ngage balaibebebong ngage-ngagengineng moniyang aidaic. <sup>6</sup> Inguc ailu ngenge kwele-moniyangka ngengileng mic-walecka Sugucnenonggeng Yesu Kristole Wapong, nga Mamac wacine bafedaingte. <sup>7</sup> Aime Kristodi ngenge hefolecngebalu angackewecte ngenge inguchac hefolecnagulu angacngebadaic. Inguc aibong Wapong wac feicne badaiete.

**8** Na yanguc edocngebabac, Wapongti molickelu ngambofocnonggeng yengeholec yowa mipangkelu miwec. Aime Kristodi Wapongte yowa noine basanangkenogale soc tofangineng helockeicne yengele mole-bafic ngic aiwec gagac.

**9** Ailu Israel yengele alingkacni miyac, yenge Wapong kwele-sowacinele ailu wacine bafenogale Kristodi Israel yengele bole-ngic aiwec gagac. Ilec yowa yanguc kwelengkeicne fagac,

"Ilec na Israel yengele alingkacni miyac, yengele hewacka mitenggulu, geewa wacgone afeelu holedacte."

(2Sm 22:50; Mige 18:49)

**10** Ailu hatacmac yanguc migac,

"Israel yengele alingkacni miyac, ngenge yele ngic-ngigac alingfocene yengeholec momochac kpatulelu beliyedabieng."

(Yef 32:43)

**11** Ailu yowa monic hatac yanguc,

"Israel yengele alingkacni miyac, ngenge sasawadi Sugucne fendongkelu mitengkedabieng. Ngic-ngigac sasawa ngenge Sugucne afeedabieng."

(Mige 117:1)

**12** Aime Yesaiyadi taockelu yanguc miwec,

"Yesile fikesaweckacnidi gidec monicti fikedaicte. Fikelu Israel yengele alingkacni miyac, yengele ngictaungineng ailu damongebame yenge ye ngagesingkelu wangec gadaingte."

(Yes 11:10)

**13** Na yanguc milockegabac, Wapongti gaga-sanangte mimipang lowec, ye ngagesingkebong yele belic-belic nga kwele-mogung buchuchac bawakengeledaic. Yogo bawakengeleme Tili Asule tapilidi basanangngebame gaga-sanangte mimipangti kwele ngage-ngagenginang saweyackeme wangec gadaing.

### Boleinle fungine

<sup>14</sup> Ngic hae-gbafoene, ngenge ngengungtihac aibaba madicne nga ngage-  
ngage sasawa yogodi wakengeleme ngengileng sawang-yowa nalic ngic-  
ngigac weduyelegaing. Aibabangineng inguc fagac, yogo ngagepangke-  
benangkegabac. <sup>15</sup> Na inguc ngagelu hangoc mikac galu kwelenginang kwe-  
fangkebe yowa biyachac ngageibong, yogo gocene kwelengkegabac, yogo  
Wapongti kwele-madic nelewete kwelengkegabac. <sup>16</sup> Inguc ailu Kristo  
Yesule bole-ngic gagac. Galu Israel yengele alingkacni miyac yengele  
hewacka Wapong yeicne bole balu yele Siduc Madicne mibe yegengkegac.  
Ilec ailu Tili Asudi Israel yengele alingkacni miyac yengele Wapongte bingec  
aibong depec ingucne fikeme yengele ngageme madickegac.

<sup>17</sup> Na Wapongte haicka Kristo Yesuholec wetackelu bole balu gagabac,  
yogo ngagebe feicnebenang aime migabac. <sup>18</sup> Kristodi bole neleme nani  
Israel yengele alingkacni miyac, yengela hikelu yele yowa milu boleine babe  
yowaine balaibeibong, yogo sugu mibe yegengkeyelegac. <sup>19</sup> Yogo Wapongte  
Asu yele tapiliwa fikewec, yele tapiliwa pasile maaine nga pasi mi ngani-  
nganiine nganilu yowaine balaibeibong. Na pasi ingucne Yerusalem nga  
Ilirikum prowins hewacnginac Kristole Siduc Madicne bahikelu lolickelu  
mibe yegengkelu saweyackewec.

<sup>20</sup> Monicti bosing biyachac wickewec, yogolec feina bole banogale mi  
ainelegac. Ilec ailu mac-himong gocna Kristole siduc mi ngageibong, yen-  
gela Siduc Madicne mime yegengkeme gaiba, yogolec ngagebe madickegac.  
<sup>21</sup> Ilec yowa biyachac yanguc kwelengkeicne fagac,

“Yele siduc monic mi mibong yegengkewec, aling yogo yenge ngani-  
motodaingte. Ailu ngic-ngigac hedecnginengti yele siduc mi ngagei-  
bong, yenge ngage-motodaingte.” (Yes  
52:15)

### Roma ngic nganicebadaicte

<sup>22</sup> Ilec ailu dameng bocyac bole yogodi yefena aka holeme ngengela mi  
fuba. <sup>23</sup> Aime yakumacbac mac-himong neboc nga neboc iwa bolene  
biyachac bamoctobe motowec. Ailu hifa bocyac ngengela funogale biy-  
achac angacnuwec. <sup>24</sup> Ilec Sepein himongka hikenogale fudacte, dameng  
iwa nganicnganobagle ngagesilu gagabac. Ailu ngenge nganicngebalu  
ngengeholec iwa angacka gadabelengte. Motome iwacni Sepein himongka  
hikenogale mibe, ngengi na baficnuningte ngagelu gagabac.

<sup>25</sup> Aime dameng yakumacbac Yerusalem hikelu Wapongte bingec iwa  
gagaing, yenge baficebalu wiyc yelenogale aigabac. <sup>26</sup> Wapongte bingec  
Yerusalem iwa gagaing, yengelacni gocene waweweine gagaing. Aime  
Masedonia nga Akaia habu yengi yengele kwele-sowac ngagelu kwele-  
moniyangte wiyc gocene baficebanogale kpaduckelu lonogale miibong.  
<sup>27</sup> Yenge inguc ainingte aiyelewec. Yerusalem habu yenge Asule wiyc  
madicne Israel yengele alingkacni miyac, yengela botoc balu yeleibong.  
Aime yengele ame yogo fagachac. Ilec ailu yenge yengileng socte babafic,  
yogo baficebadaingte. <sup>28</sup> Inguc aime kwele-madicnginengte moneng yogo  
Yerusalem iwa bahikelu yelelu yefe yogo basanangkedacte. Yogo motome  
ngengela yefe fulu Sepein himongka hikedacte. <sup>29</sup> Aime ngengela fudacte,  
dameng iwa Kristole mimi-madic bubuchac nala fame, yogoholec ngengela  
fudacte, yogo ngagepangkegabac.

### *Yele milockeningte edocebawec*

<sup>30</sup> Ngic hae-gbafocne, nonge Sugucnenonggeng Yesu Kristoholec wetackebeng Asudi kwele-angacka gaga bafuwanolecaigac. Ilec ailu yanguc sanangne edocngebabac, ngenge sanangnehac baficnulu Wapong yan-guc milockededaing. <sup>31</sup> Yudeya himongka aling gocne Yesu mi ngagesingke-caigaing, yengele molewacni yedi na olocnunale milockededaing. Ailu na yenge bafacebanogale wiyac gocne balu hikebe, Wapongte bingec Yerusalem iwa gagaing, yenge yogo nganilu kwelengineng madickedaiete, yoglec momochac milockededaing. <sup>32</sup> Inguc aibong Waponti ngageme madickeme ngengela kwesi sulumelu belic-belicka ngiye-ngagelu nongileng momochac basanang-nagudabelengte.

<sup>33</sup> Wapong kwele-mogung fileinedi sasawa ngengeholec gadaic, yogo foinac.

## 16

### *Fobe*

<sup>1</sup> Yeme-kwanonggeng Fobe, ye ngigac madicne yele yowa gocne migabac. Ye Yesule habu Kenkeria taonka gagaing, yengele mole-bafic aigac. <sup>2</sup> Ngenge Wapongte bingec aibabanonggeng balaibelu Sugucneholec wetackeningte ye hefolelu mac holecnodaing. Ailu yedi wiyac monicte kpungkeme, ngenge yogo bafuwalu lacnodaing. Ye ngic-ngigac bocyac bafacebalu na inguchac baficnuwec.

### *Wenac-madic yowa*

<sup>3</sup> Prisila nga Akwila yeke naholec nonge Kristo Yesule bole momochac bacaigabeleng. Nale wenac-madic yogo yekela lobe fume edocepad-abiyeng. <sup>4</sup> Gocne yengi na wehomacnudaingkale aibong, yeke na baficnulu gagaginekte ngageboc mi aiiboc. Na kwele-madicne yekela logabac, yogo nani sugu miyac. Yesule habu sasawa Israel yengele alingkaci miyac gagaing, yenge inguchac kwele-madicngineng loaing.

<sup>5</sup> Aime Yesule habu yekele macka kpaduckecaigaing, yengela inguchac nale wenac-madic yogo lobe fume edocebadabiyeng.

Aime kwelenedi Epenetus yele angac ngagegabac, ye inguchac nale wenac-madic lobe fume edodabiyeng. Yedi Asia prowinswa molickelu Kristoholec wetackewec.

<sup>6</sup> Ailu nale wenac-madic Mariala lobe fume edodabiyeng. Ye ngengele ailu bole sugucneholec balu gawec.

<sup>7</sup> Aime ngic-ngigac yaeckang, Andronikus nga Yunias, yeke nonge himongnonggeng moniyang, yekela nale wenac-madic lobe fume edopepadabiyeng. Yeke na inguchac muc-macka locepaibong. Aime salecebaicne hewacnginang gaboc yenge ngagebong yeke wacnginec feicne aime gagaing. Aime na Kristoholec mi wetackeiba, dameng iwa yeki yeholec biyachac wetackeiboc.

<sup>8</sup> Aime Ampliatus kwelenedi yele angac ngagegabac, ye Sugucneholec wetackegac, yela nale wenac-madic lobe fume edodabiyeng.

<sup>9</sup> Ailu Ubanus ye nongeholec Kristole bole bawec. Ailu Satakus kwelenedi yele angac ngagegabac, yekela nale wenac-madic lobe fume edopepadabiyeng.

<sup>10</sup> Aime Apelles ye Kristole ngic noine inguc yegengkewec, yela nale wenac-madic lobe fume edodabiyeng.

Ailu Aristobulus golowacfocine yengela nale wenac-madic lobe fume edocebadabiyeng.

**11** Ailu Herodion ye noke himongnonggec moniyang.

Ailu Nakisus golowacfocine Sugucneholec wetackelu gagaing, yengela nale wenac-madic lobe fume edocebadabiyeng.

**12** Ailu Trifaena nga Trifosa, ngigac yeke Sugucnebole bole balu gagabiyc, yekela nale wenac-madic lobe fume edocepadabiyeng.

Ailu Pesis kwelenedi yele angac ngagegabac, ngigac ye Sugucnebole homacne bacaigac. Nale wenac-madic yela lobe fume edodabiyeng.

**13** Ailu Rufus ye Sugucnedi ngic yogo bawosaewec, ailu ye nenggacine momochac, yekela nale wenac-madic lobe fume edocepadabiyeng. Ailu yele nenggacti na nenggac ingucne ainelewec.

**14** Ailu Asingkitus nga Felegon ailu Heremes nga Patobas, nga Heremas ailu ngic hae-gbafoconngeng gocne yengeholec kpaducebalu gacaigaing, yengela nale wenac-madic lobe fume edocebadabiyeng.

**15** Ailu Filologus nga Yulia ailu Nereus nga sengngine ngigac, ailu Olimpas nga Wapongte bingec sasawa yengeholec kpaducebalu gacaigaing, yengela nale wenac-madic lobe fume edocebadabiyeng.

**16** Ngenge sasawadi gbagbacne gagawa muducnagulu wenac-madic minagudaing.

Kristole habu sasawa, yenge wenac-madicngineng lobong ngengela fugac.

### *Sawang-yowa*

**17** Ngic hae-gbafofocne, ngic gocne yenge gulu-bauc ailu okac ingucne locaigaing, ngenge ingucne yengele damong balu gadaing. Ailu ngenge wewedu-yowa biyachac baibong, yogo yengi gacgu basowaledaingkale, yengeholec mi gadabiyeng. Yogo sanangnehac milu edocngebabac.

**18** Aling ingucne yenge Sugucnenonggeng Kristole kwelec monic mi kwecaigaing. Yenge socte angac nga ngage-angacngineng fikenale ngic-ngigac gocne ngage-wosaec mikac kwsacebagaina. I yangucte, yenge kwelengineng basifuwelu yowa madicne milu mic-heloc aiyelegaing. **19** Aime ngenge yowa balaibelu gagaing, ngic-ngigac sasawa yengi yogo biyachac ngagengeleibongte beliyegabac. Aime ngenge aibabangineng madicne ngage-motioningte ailu, alibaba sowacne mikac gbagbacne ganingte ainelecaigac.

**20** Wapong, ye kwele-mogung fileine, yedi dameng mi daliweme, Satang bawalu higengineng bageina lome edesockedaiingte. Sugucnenonggeng Yesule kwele-madicti ngengeholec fadaic.

### *Wenac-madic yowa*

**21** Timoti, nale bole moniyangti wenac-madicine ngengela lome fugac. Aime Lukius nga Yasong ailu Sosipate yenge himong moniyangfocne, yengi inguchac wenac-madicngineng ngengela lobong fugac.

**22** Na Tetius, nani hibi yagowa Polle yowa kwelengkegabac. Na Sugucneholec wetacke gacaigabacti ngengela wenac-madic lobe fugac.

**23** Gaiusdi Yesule habu sasawa nga na Pol, nonge momochac macina loc-nubacaigac, yedi ngengele wenac-madic inguchac lome fugac. Ailu taonte moneng-damong Erastus, nga ngic hae-gbanonggeng Kwatus, yeke inguchac kwele-madicnginec loboc fugac.

<sup>24</sup> [Sugucnenonggeng Yesu Kristole kwele-madicti sasawa ngengeholec fadaic. Yogo foinac.]\*

*Ngage-ngage-motoc fileine*

<sup>25</sup> Nongileng sasawadi Wapong wac feicne lacnodabelengte. Wapongti iwa hocne basanangngebame sanangne domaningte yela tapili ingucne facnogac. Na Yesu Kristole Siduc Madicne mibe yegengkeme edocebalu gagabac. Aime Siduc yogo molickelu esecnehac sangke-sangke falu gawec.

<sup>26</sup> Falu game, himongne himongne ngic-ngigac sasawa, yenge ye ngagesingkelu yowaine balaibening. Ilec ailu Wapong gaga-sanang fileinedi yeicne Siduc yogo milu siduc-mimi ngicfocene yeleme Wapongte hibiwa kwelengkeibong, Siduc yogo mibong yegengkewec. Yegengkeme yenge sasawa yowaine nalic ngage-motodaingte. <sup>27</sup> Wapong moniyangti ngage-ngage-motoc fileine. Aime nongileng Yesu Kristoholec wetackelu mimiteng nga wac feicne Wapongta lobeng fagidaic, yogo foinac.

---

\* **16:24:** Hibi esecne Poldi kwelengkewec, yogo nganilu iwacni kwelengkebong kwelengkebong ofewec, yengelacni gocne 16:24 iwa mi fagac. Ngic-ngigac yenge hibi kwelengkeicne yogo wosaelu nganibong Poldi mi kwelengkewec mecne.   **16:25:** Efs 1:9; 3:5,9; Kol 1:26; Rom 1:5

## Poldi Korin **Habu Yengele Molic-molic Hibi Kwelengkewec**

### *Mimi-yegeng yowa*

Korin yogo taon sugucne monic wacineholec fawec. Taon yogo himong monic wacine Akaia nga Grik iwa fawec. Roma ngic-ngigac homacne nga Yuda ngic-ngigac gocne iwa gaibong. Ngic-ngigac bocyacti lec-welec ailu lanac-ganac ailu gaibong.

Molickelu Poldi Korin iwa Yesule Siduc Madicne mime yegengkeme ngic-ngigac gocne yenge Yesu ngagesingkeibong. Ye hifa moniyang nga nebocene inguc edocebalu weduyelewec (Salecebaicne 18:1-17). Yogolec lobeina lolickelu Efesas iwa hikelu gawec. Galu Pol ye ngageme Korin ngic-ngigac Yesu ngagesingkeibong, yenge ngaba ainagulu gocne socte ngani-angac balaibeibong. Ilec ailu Poldi hibi yago kwelengkewec. Yesu homackacni gboliyelu honocmenga feme hifa 26 ngama ingucne motome, hibi yago kwelengkewec.

### *Yowa yago hibi nebocina fagac*

1:1-9 Molic-molic yowa

1:10-4:21 Ngaba ainaguibongte kwelengkewec

5:1-6:20 Himongte aibaba sowacne ngagelu aiibong

7:1-40 Ngawe-ngigacte yowa

8:1-11:1 Ngage-yaec mi ailu Kristo sugu ngagesingkedaing

11:2-14:40 Ngic-ngigac ngage-ngagesingkolec yengele aibaba madicne

15:1-58 Kristo homackacni gboliyelu fangkewecte fungine

16:1-24 Yerusalemte ibu kpaduckenoga nga yowa moto-motoine

### *Hibile molic-molic yowa*

<sup>1</sup> Wapongti na Pol ngagenelelu Kristo Yesule salecebaicne wacnuwec, aime ngic hae-gbanonggeng Sostenes, noki ngengele hibi yago lobec fugac.

<sup>2</sup> Wapongti Korin taonka yeicne habu gagaing, ngenge Kristo Yesule ailu wacngebali yeicne bingec bacngebame gagaing, Wapongte bingec ngengele hibi yago kwelengkelu longelegabelec. Ailu ngic-ngigac himong sasawa gagaing, yenge Sugucnenonggeng Kristo Yesule wac wackecaigaing, yenge momoc Wapongti yeicne bingec bacebawec. Yesu ye yenge nga nonge momochac Sugucnenonggeng aigac. <sup>3</sup> Mamacnonggeng Wapong nga Sugucnenonggeng Yesu Kristo, yekele kwele-madic nga kwele-mogungtowadi ngengela fadaic.

### *Wapongte kwele-madic*

<sup>4</sup> Wapongti Kristo Yesule ailu kwele-madic aingelewec. Yogolec ailu na damengsoc ngengele ngagelu Wapongne kwele-madic edolu gagabac.

<sup>5</sup> Ngenge yeholec wetackelu gaebongka yedi wiyc sasawa bubuchac nelelewec. Yowa mimi nga ngage-ngage-motoc gbolongne, yogo sasawadi fangelegac. <sup>6</sup> Kristole siduc mibeng yegengkeme edocngebaibeng, yogolec noine gaganginang fikeme nganilu gaibong. <sup>7</sup> Ilec ailu ngenge Sugucnenonggeng Yesu Kristo yegenia fikelu yegengkenale wangec galu, kwele-madicte wiyc sasawa, yogolec monic mi kpungkecaigaing. <sup>8</sup> Ye yeuctihac basananggebame gaga dalicne gagaing. Gaebongka dameng motome, ngenge Sugucnenonggeng Yesu Kristole damengka kpokpolic mikac

domabong yowawa nalic mi locngebadaicte. <sup>9</sup> Wapongti Madecine Sugucnenonggeng Yesu Kristoholec kwele-moniyangka momochac taocngebanale wacngebawec. Ailu ye yowa mimiine balaibegac.

### *Habu siyeckeibong*

<sup>10</sup> Ngic hae-gbafocne, na Sugucnenonggeng Yesu Kristole wacka ngagengingeneng sanangne yanguc edocngebagabac, ngenge sasawadi ngagengingeneng hole-ngagec ailu kwele-moniyang galu habu mi siyeckedaing. <sup>11</sup> Ngic hae-gbafocne, Kaloele mackacni yengi ngengele yanguc edocnubong ngagebe yegengkewec, "Yenge hewacnginang siyeckelu yowanganengti fena wana ainagulu gagaing." <sup>12</sup> I yanguete, ngengelacni ngic gocne yengi yanguc micaigaing, "Na Polle ngic." Nga gocnedi yanguc micaigaing, "Na Apolosle ngic." Nga gocnedibac yanguc micaigaing, "Na Pitale\* ngic." Nga gocnedibac yanguc micaigaing, "Na Kristole ngic." Ngenge filesoc inguc micaigaing.

<sup>13</sup> Kristo heuckebong yaeckang aiwec, me? Yogo miyac! Yengi ngengele ailu Pol malicpongka weibong, me Polle wacka misa monic lowangeleibong, me? Yogo miyacbenang. <sup>14</sup> Na ngengelacni monic misa mi lowacnoiba. Ilec ailu Wapong kwele-madic micnogabac. Krispus, nga Gaius yeke sugu lowayeteiba. <sup>15</sup> Ilec ailu monicti yanguc mi midaic, "Na Polle wacka misa lowaiba." <sup>16</sup> (Stefanas nga golowacfocine yengebac misa noine lowayeleiba. Ailu taockelu gocne lowayeleiba me miyac, yogo monic mi ngagegabac.) <sup>17</sup> Kristodi misa lowayelenogale mi salecnuwec, miyac. Yebac ngic-ngigac Siduc Madicne mime yegengkeme weduyelenogale salecnume kwestiba. Ailu Kristole malicpongte yowa yogo tapili-wawa aidaickale, yowa yogo ngicte tapiliwa me ngic ngage-ngeage-motocka mi midacte.

### *Kristo ye Wapongte tapili nga ngage-ngeage-motoc*

<sup>18</sup> Ngic-ngigac dac-sanangte yefewa hikegaing, yenge malicpongte yowa yogo ngagel midelec yowa aicaigaing. Ailu Wapongti bikicte ameine bame wasecne aidabelengte, yogolebac nongileng yanguc ngagesilu gagabeleng, malicpongte yowa yogo Wapongte tapili. <sup>19</sup> Wapongte yowa yanguc kwe lengkeicne fagachac,

"Na ngic ngage-ngeage-motocnginengkolec yengele ngage-ngeage-motoc yogo welockebe miyac aidaicte. Ailu ngic ngage-ngeageholec yengele ngage-ngeage baickedacte." (Yes 29:14)

<sup>20</sup> Ngic ngage-ngeage-motocine miyac aiwecte ye oma wiyac aidaicte? Nga yefe-yowale wewedu ngic yele ngage-ngeage miyac aiwecte ye oma wiyac aidaicte? Ailu ngic ye dameng yagolecte yowa bafac-tafalic balu micaigac, ye oma wiyac aidaicte? Wapongti himong yagolecte ngage-ngeage-motoc bafaliyelu kwele-sifucine bame yegengkewec. Ilec ngic ingucne yenge yowanganeng mikac aigaing. <sup>21</sup> Aime Wapongte ngage-ngeage-motocete ailu ngic-ngigac yenge himongte ngage-ngeage-motockolec galu Wapong ngagecnoningte aibibiyeibong. Aibibiyeelu Siduc Madicne misowalelu yowa yogolec kwele-sifuc yowa micaigaing. Wapongti ngic-ngigac ngage-ngeasesingkolec yengele bikicte ameine bame wasecne ainingte miwec, yowa yogolec kwele-sifuc yowa miibong, ye pasi yogolec ngageme madickewec.

---

**1:8:** 1Tim 3:13; 5:23    **1:9:** 1Yoa 1:3; 1Tim 5:24    **1:10:** Filp 2:2    \* **1:12:** Grik yowawa Pita wacine monic Kefas fagac.    **1:12:** 1Kor 3:4; Sale 18:24-28    **1:14:** Sale 18:8; Rom 16:23    **1:16:** 1Kor 16:15    **1:18:** Rom 1:16    **1:20:** Yes 19:12; 33:18; 44:25; Yop 12:17    **1:21:** Mat 11:25

<sup>22</sup> Yuda ngic-ngigac yenge pasile maainele uwacnolu gagaing. Aime Grik ngic-ngigac yenge ngage-ngage-motoc gbolongne bafuanogale aiyeleme gagaing. <sup>23</sup> Aime nongileng Kristo malicpongka webong homawec, yowa yogo edocebalu weduyellegabeleng. Aime Yuda ngic-ngigac yenge yogo ngagebong kwelenginang mi holeme okac ingucne kwopocebame wawecaigaing. Aime Grik ngic-ngigac yengi ngagebong yogo kwele-sifuc yowa aicaigac. <sup>24</sup> Aime Wapongti Yuda ngic-ngigac nga Grik ngic-ngigac wacebagac, yengelabac Kristo ye Wapongte tapili nga ngage-ngage-motockolec gagac. <sup>25</sup> Wapongte kwele-sifuc yowa ingucnedi ngic-ngigac yengele ngage-ngage-motoc ewalilu ngage-ngagetowaholec aigac. Nga Wapongte tapili-wawaine ingucnedi ngic-ngigac yengele tapilingineng ewalilu tapilitowaineholec aigac.

### *Ngic-ngigac wacebaicne yogo bawosaecebawec*

<sup>26</sup> Ngic hae-gbafocne, ngenge silicine weningucne gacgubong, Wapongti wacngebawec, ngenge yoglec silicine ngagesidaing. Ngengelaci ngic sock-apèc ngage-ngage-motocnginengkolec yogo bocyac miyac. Ailu ngic-ngigac feicne yogo bocyac miyac. Ailu aling wac bingecnginengkolec yogo bocyac miyac. <sup>27</sup> Ngic-ngigac ngage-ngage-motocnginengkolec ngagenagugaing, yenge Wapongti gamewa locebanogale ngagewec. Inguc ngagelu ngic-ngigac yengele haicka himonge wiyac kwele-sifucineholec aiyelecaigac, ngic-ngigac yogo bawosaecebawec. Ailu ngic-ngigac tapilinginengkolec ngagenagugaing, yenge Wapongti gamewa locebanogale ngagewec. Inguc ngagelu ngic-ngigac yengele haicka himonge wiyac tapili-wawa aiyelecaigac, ngic-ngigac yogo bawosaecebawec. <sup>28</sup> Aime wiyac gocne feicne aigac micaigabeleng, yogo miyac ainale ye yanguc bawosaecebawec. Ngic-ngigac yengele haicka himongte wiyac wawaine aicaigac, nga wiyac yafoine micaigabeleng, ailu wiyac mikac monic mi fagac micaigabeleng, Wapongti yogo hocne bawosaecebawec.

<sup>29</sup> Aime monicti Wapongte haicka domalu yeicnele mime feicne aidaickale, ye inguc aiwec. <sup>30</sup> Wapongti ngagengelelu ngenge Kristo Yesuholec wetacngebame gagaing. Yedi Yesu saleme Wapongte ngage-ngage-motoc hewacnonggang balu kwesiwec. Balu kwesime nongileng Wapongte haicka dondonne nga yeicne bingec ainangte ye bikicte muckacni lukecnubawec. <sup>31</sup> Yoglec yowa yanguc kwelengkeicne fagac, "Monic ye mime feicne aidaicte, ye Sugucnele mime feicne aidaic." (Yer 9:24)

## 2

### *Yesu Kristole siduc mime yegengkeyelewec*

<sup>1</sup> Ngic hae-gbafocne, naneicne ngengela fulu Wapongte ngage-ngage-motoc sangke-sangke fagac, yogo mibe yegengkenelewe. Inguc milu yowa mimine bafelu me ngage-ngagetowaholete silicka yowa monic mi edocngebalu wedungeleiba, miyac. <sup>2</sup> Na ngengeholec galu yanguc sugu ngagesilu mibe sanangkewec, "Korin taonka galu Yesu Kristole siduc mibe yegengkedaicte, ailu ye wenucka malicpongka webong homawec, yogo sugu mibe yegengkedaicte." <sup>3</sup> Na ngengela gaiba, iwa tapiline wame hangocene dengdengnuwec. <sup>4-5</sup> Ngengele ngage-ngagesing yogo ngic ngage-ngage-motockaci lobong fame mi madickedaicte. Wapongte tapilidi sugu

ngage-ngagesingnginang lobong fadaic. Ilec ailu Wapongte yowa mibe yegengkeme yowane angacineholec me ngage-ngage-motockolecti mi ewal-icngebawec, miyac. Tili Asule pasile tapilidi yowane basanangkeme ngenge yogo nganilu ngageibong.

### *Wapongte ngage-ngage-motoc*

<sup>6</sup> Ilec ailu gocene ngenge biyachac sugule-sanang aiibong, ngenge yowa ngage-ngage-motockolec edocngebaibeng. Aime yowa mibeng, yogo dameng yagolec ngage-ngage-motoc miyac, me dameng yagolec micne yengele ngage-ngage-motoc miyac. I yangucte, lobewa yogo gacgu miyac aiyackedaingte. <sup>7</sup> Aime Wapong ye himong mi fikeemewa ngage-ngage-motocine sangke-sangke yogo biyachac lome fawec. Fame ngage-ngage-motoc yogo nongele wac feicne bawosaewec, yogo hocne mibeng yegengkegac. <sup>8</sup> Dameng yagolec micne yengelacni monicti yele ngage-ngage-motocine yogo mi ngageibong, miyac. Yenge yogo ngagedabongka midec, yenge wac feicnele Sugucne, ye malicpongka nalic mi wedabong.

<sup>9</sup> Yagolec yanguc kwelelengkeicne fagac,

"Wapontgi wiyac dongedi mi ngani-nganiine, nga hedecti mi ngage-ngageine, ailu ngic kwelewa mi ngage-ngageine, yogo alingkewec. Ailu ngic-nigic weni yengi yele kwelenginengti angac ngagegaing, wiyac yogo yengele bamockewec."

(Yes 64:4)

<sup>10</sup> Wapontgi wiyac yagolec hocne ngagesilu Asuine saleme nongilang mime yegengkenoleme ngageibeng. Yedi wiyac sasawa ngani-ngagec ailu Wapongte ngage-ngage gbolongne momoc ngani-ngagec aicaigac. <sup>11</sup> Gagi ngic monicte ngage-ngageina nalic mi ngagedamekte, miyac. Ngic yeicne asudi sugu yogo ngagedaicte. Silicine ingucnehad monicti Wapongte ngage-ngagewa nalic mi ngagedaicte, miyac. Wapong yeicne Asudi sugu wiyac yogo ngagelu gagac. <sup>12</sup> Wapontgi wiyac haicne monic-monic kwele-madicka nolewec. Aime nongileng yogo ngage-motonangte Asuine noleme baibeng. Himong yagolec gaga monic mi baibeng, miyac. <sup>13</sup> Aime Wapong wiyac nolewec, yogo hocne mibeng yegengkecaigac. Yowa yogo ngic ngage-ngage-motockacni mi milu gacaigabeleng, yogo Asule ngage-ngagewacni hocne balaibelu migabeleng. Nonge Asule yowa yogo Asule tapiliwa mibeng yegengkedaicte.

<sup>14</sup> Wapongte Asulacni Asule wiyac, yogo ngic monic ye himongte gagawa galu nalic mi badaicte. Yogo yedibac ngageme kwele-sifuc aibaba aigac. Asule wiyac yogoasuwa ngani-ngagec aigabeleng. Ilec ailu himongte gagawa gagac, ye Asule wiyac yogo nalic mi ngagedaicte. <sup>15</sup> Ngic monic Wapongte Asuholec gagac, ye wiyac sasawa ngani-wosaec aigac. Aime ngic monicti ngic yogo nalic mi ngani-wosaec aicnodaicte.

<sup>16</sup> Yowa yanguc kwelelengkeicne fagac,  
"Madi Sugucne ngage-ngage ngagewecte ailu Sugucne weducnodaicte?"

(Yes 40:13)

Aimebac nongileng Kristole ngage-ngageholec gagabeleng.

## 3

### *Kwele esecnele gaga*

<sup>1</sup> Ngic hae-gbafocne, molickelu ngengela kwesiiba, iwa ngic Tili Asuholec gagaing, yenge yowa edocebachaigabac, ngenge yowa ingucne nalic mi edocngebaiba. Ngenge Kristoholec wetackelu dameng dalicne inguc gagaing. Aime sifu kogoc yengele silic ingucne gaebongka ngic-nigic

kwele esecne balaibebong edocebacaigabac, silicine ingucne hac ngenge yowa edocngebaiba. <sup>2</sup> Ngenge dameng iwa nosing sanangne nonolesoc mi aibongte, amuc sugu gumecngebaiba. Aime ngenge yakumac nosing sanangne nonolesoc mi aigainghac. <sup>3</sup> Ngenge kwele esecne silicka gagainghac. I yangucte, ngenge hasowac ainagulu yowanginengti ngaba silicka yowa kwekwe ainagucaigaing. Ngenge inguc ailu kwele esecna galu ngicbenang yengele silicka gagaing, me? <sup>4</sup> Monicti yanguc midaicte, “Na Polle ngic.” Aime monicti midaicte, “Na Apolosle ngic.” Ngenge inguc mibong ngagebe ngenge ngic yengele aibaba balaibegaing, me?

### *Apolos nga Pol*

<sup>5</sup> Apolos ye maa? Nga Pol ye maa? Noke mole-bafic sugu aigabelec. Sugucnedi hole noteme noke yogolec silicka bole balu gagabelec. Balu gabec ngenge yowanonggec balaibelu ye ngagesingkeibong. <sup>6</sup> Nani wasec duwebe, Apolosdi wasec feina misa lowacnowec. Aime Wapongti bole yogo balu basugulewec. <sup>7</sup> Ngic nosing duwecaigac, ye ngic omane. Nga nosing feina misa lowacnocaigac, ye inguchac ngic omane. Wapongti wiyc basugulecaigac, yeuc sugu feicne aigac. <sup>8</sup> Aime ngic wiyc duwecaigac nga ngic misa feina lowacnocaigac, yeke bolenginecte fungine moniyang aigac. Lobewa gagcu yeke bolenginecte fuli filesoc badabiyece.

<sup>9</sup> Noke Wapongkolec bole balu gagabelec. Aime ngenge Wapongte nosingbole ailu yele mac aigaing. <sup>10</sup> Wapongti kwele-madic ainelelu mac-babale ngage-ngage neleme yogolec ngic aiiba. Inguc ailu na yogolec silicina simeng-bosing alingkelu wickebe hauwec. Aime yogolec feina ngic gocone yengi taockelu mac bacaigaing. Ailu mac-baba ngic yenge bolengineng wenuc bagalu simeng feina mac taockelu bacaigaing, yogo filesoc filesoc wosaelu badaing. <sup>11</sup> Wapongti Yesu Kristo biyachac gunungkeme simeng-bosing ingucne domagac. Aime monicti yele mecina bosing monic wickeme haunale yefefeine monic mi fagac.

<sup>12</sup> Aime monicti simeng yogolec feina taockelu Wapongte bole balu gadaicte, ye gol me siliwa me posa basufaleicne silicine madicne, me yoc me gimpodi, me langtedi badaicte. <sup>13</sup> Inguc badaictewa boleinle fungine yogo Sugucnele damengtowa iwa yegengkedaiete. Dameng iwa dacti bolenonggengte fungine filesoc esickelu bame yegengkenoledaiete. <sup>14</sup> Monic ye mac bame dacti boleinle yogo mi lobeme sanangne domadaictewa, ye bole yogolec fuli badaicte. <sup>15</sup> Nga monicte bole lobedaiictewa, wiycine yogo lokelu miyac aidaicte. Aime yeicnebac Wapongti dackacni baickeme wasecne aidaicte.

### *Wapongte ibu-mac yogo yeicne bingec*

<sup>16</sup> Ngenge yanguc mi ngagegaing, me? Ngenge Wapongte ibu-mac, aime Wapongte Asudi ngengele kwele kwelina gagac. <sup>17</sup> Aime monicti Wapongte ibu-mac basowaleme, Wapongti ye inguchac basowaledaiete. Wapongte ibu-mac yogo yeicne bingec, aime ibu-mac yogo ngene hocne.

<sup>18</sup> Monic yeuctihac mi kwesacnagudaic. Ngengele hewackacni monicti yeicnele ngagesilu dameng yagolecte ngage-ngage-motoc balu gadaictewa, ye himongte ngic yengele haicka kwele-sifucineholec aidaic. Inguc ailubac

ngage-ngage-motoc noine bafuwadaicte. <sup>19</sup> Himong yagolec ngage-ngage-motoc yogo Wapongte haicka kwele-sifucineholec. Yogolec yowa yanguc kwelengkeicne fagac,

“Wapong ye ngic ngage-ngage-motocngineng bafaliyeme yenge yengileng yowadijac hefecedabadaicte.” *(Yop 5:13)*

<sup>20</sup> Ailu monic yanguc,

“Ngic-nigic ngagebong ngage-ngage-motockolec gagabeleng, Sugucnedi yengele kwelewa ngage-wosaec yogo ngageyackegac. Ailu ngageme yengele ngage-ngage yogo boleine mikac aigac.” *(Mige 94:11)*

### *Kristole ngic-nigic*

<sup>21</sup> Ilec ngenge ngic monicte wac wackelu yeholec taockelu soc bafefe mi aidaing. I yangucte, wiyc sasawa yogo ngengele biyachac aiwec. <sup>22</sup> Yogo Pol me Apolos me Pita\* me himongtowa, me gaga, me homac, me wiyc monic biyachac loicne fagac, me lobewa fikedaiete, yogo sasawa ngengele babafilet wiyc. <sup>23</sup> Ailu ngenge ngengileng Kristole ngic-nigic. Nga Kristo ye Wapongte ngic.

## 4

### *Haicine monic-monic bayegengkedaicte*

<sup>1</sup> Nongileng Kristole bole-madecfocene. Aime yedi Wapongte ngage-ngage sangkeicne, yogo damongkenogale bole-yowa noleme bole yogo balu gaga-beleng, ngic-nigic yenge inguc ngagesidaing. <sup>2</sup> Monic ye damong bole balu gagac, ye bole-yowa balaibelu yefe mi liloadaicte.

<sup>3</sup> Aime naneicne yanguc mibe, ngensi me ngic gocne yengi yowawa locnulu yowane wosaedaingte, yogolec ngagebe wiyc feicne mi aigac. Aime naneuc inguchac nalic mi wosaecnagulu noine midacte. <sup>4</sup> Kwele ngage-ngagena bikic basackelu noine monic mi bafuwagabac. Aime na bikicne mikac, yogo nalic mi midacte. Sugucnedi funginene ngani-ngagec ailu yowane wosaedaicte. <sup>5</sup> Ilec ailu wowosae dameng mi fikeemewahac ngenge ngic monicte yowa mi wosaedaing. Sugucne yeuctihac kwesilu wiyc kundungka sangkelu fagac, yogo bayegengkelu ngic-nigic ngage-ngagengengete fungine lome yegengkedaicte. Ailu Wapong ye dameng iwa ngic-nigic filesoc madicnengineng edocebame ngagedaingte.

### *Soc bafecaigaing*

<sup>6</sup> Ngic hae-gbafocne, ngenge yowane ngage-motoningte yagowahac ngen-gele ailu neicne nga Apolos nokilac soc holelu edocngebabe ngagedaing. Ngenge ngage-ngage yago banogale ngagegaing. Ngenge ngic monicte soc bafelu monicte soc bawadaingkale, yowa Wapongte hibiwa kwelengkeicne fagac, ngenge yogo mi ewalidaing. <sup>7</sup> Ga monicte feicne aigic, me? Yogo miyc. Ailu ga wiyc sasawa balu gagic, iwacni monic mi geleicne balu gagic, me? Aime Wapongti wiyc yogo moc gelewec. Ilec ailu socgone mi bafedamec.

### *Kristole ailu bawacnagulu gaga*

<sup>8</sup> Ngenge ngagebong mafatowanginengkolec biyachac ailu gebecngebame gagaing. Ailu nonge mi baficngebabeng ngenge ngictau aigaing, me? Aime

\* **3:22:** Grik yowawa Pita wacine monic Kefas fagac.    **4:2:** Luk 12:42    **4:5:** 1Kor 3:8    **4:6:** Rom 12:3    **4:7:** Rom 12:6

noinebenang, ngenge ngictau noine aidabongka ingucne, angacne sugucne-hac aidecka. Aime ngenge ngictau aidabongka ingucne, nonge ngengeholec momochac galu ngictau aidabeng.

<sup>9</sup> Na yanguc ngagegabac, Wapongti salecebaicne locnubame ngic-ngigac yengele aling moto-motoina domagabeleng. Yenge kpakpaduc sobengka kindololo ngic wehomacebaningte mimoctowec, silicine ingucne locnubame nganicnubagaing. Aime himongtowa sasawale ngic-ngigac nga angelo momochac yengele haicka gameineholec nganicnubabong gagabeleng. <sup>10</sup> Nonge Kristole ailu bawacnagulu kwele-sifuc ingucne aibeng, ngengibac socngineng bafelu migaiing, "Nonge Kristoholec wetackelu fitilelu gagabeleng." Inguc micaigaing, me? Aime nonge tapili-wawa gaebengka ngenge tapilinginengkolec gagaing, me? Aime ngic-ngigac yengi ngenge alang bacngebalu nongebac sowacne milu hegilecnubacaigaing, me? <sup>11</sup> Aime nonge dameng yanguctihac inguchac nosingte homalu misale ainoleme ngakpi-kpoluc lokeicne holelu gabeng, ngic-ngigac yengi wecnubacaigaing. Ailu macnonggeng madicne miyac, kwilic ingucne galu <sup>12</sup> nongungtihac molenonggengti boletowa bacaigaileng. Ngic yengi sulecnbabong nongi yenge mimi-madic milu edocebacaigaileng. Ailu weyebic ainolebong kwelenonggeng mi wacaigac, sanangnehac gacaigaileng. <sup>13</sup> Aime ngic-ngigac yengi misulec ainolebong yenge yowa milu mibasanang aiyelecaigaileng. Nonge yanguctihac himongka yafo ingucne aibeng ngic-ngigac yengi wicnubabong gagabeleng.

### *Kristoholec wetackelu gaga*

<sup>14</sup> Yowa gameineholec edocngebanogale yowa yago mi kwelengkengel-egabac, miyac. Na adu-madecfocne kwelenedi ngengele angac ngagelu sawang-yowa yago kwelengkenglegegabac. <sup>15</sup> Ngenge Kristoholec wetackelu gaebongka, damongfocngineng 10 taosen, yengi yowa madicne edocngeba-caigaing. Aime ngenge sifu mamachnineng moniyang sugu gagac. Nani hocne mamachnineng fikelu Siduc Madicne edocngebababe Kristo Yesuholec wetackeibong. <sup>16</sup> Inguc ailu ngage-ngagengeneng kwefangkelu edocngebagabac, ngenge na wenuc aibe nganilu balaibecnulu aigabac ingucnehab aidaing. <sup>17</sup> Ilec ailu yakumac Timoti salebe ngengela fudaikte. Madecne kwelenedi yele angac ngagegabac, aime Sugucneholec wetackelu ye yowa balaibelu monic mi lilodaicte. Na Kristo Yesuholec wetackelu wenuc gacaigabac, yowa yogo Yesule habu sasawa fagaing, yenge edocebalu we-duyelecaigabac. Aime Timoti ye ngengela fulu yowa yogo hocne hatacmac edocngebadaitce.

<sup>18</sup> Ngengelacni ngic gocne yengi nale ngagelu yanguc micaigaing, "Ye non-gela mi kwsidaicte." Yenge inguc ngagelu socngineng bafecaigaing. <sup>19</sup> Aime Sugucnedi ngageme madickedaictewa, dameng mi daliweme na ngengela fudacte. Ailu soc bafefe aling yenge yowangineng sugu mi ngagedacte. Fulu tapilingineng wenuc fagac, tapili yogo ngani-ngagec aidacte. <sup>20</sup> Wapongte ngani-damong yogo yowawa yepe mi yegengkedaitce, miyac. Yogo Tili Asule tapiliwa fikelu yegengkedaitce. <sup>21</sup> Aime ngenge nale wenuc aingelegac, yogo edocnuning. Yasu-huduholec funogale aingelegac, me kwele-angacka nga kwele-ulucka funogale aingelegac?

## 5

*Habu kwelina aibaba sowacne*

<sup>1</sup> Ngengela selo-boic aibaba fagac, yowa inguc mibong ngageiba. Selo-boic aibaba monic ngic-ngigac Wapong mi ngagegaing, yengele hewacka mi fagachac, yogo hocne ngengele hewacka fagac. I yangucte, ngic monicti mamacinele ngigackolec facaigabiye. <sup>2</sup> Aibaba ingucne fame, ngengebac socngineng bafecaigaing, yogodi madicne mi aigac. Ngenge yogolec kwelesowac ngagelu ngic aibaba yogo aicaigac, ye habu hewacnginangkocni baickedaingte, yogodibac madickedaite. <sup>3</sup> Na socnedibac dalicka gagabac, yogo noine. Nga asunedibac ngengeholec gagabac. Na ngengeholec socklecti gagabac silicine ingucne galu ngic yele aibabaine wosaelu sowacneine biyac mimoctobac. <sup>4</sup> Ngenge nga na, nongilengasuwa Sugucnenonggeng Yesule wacka kpaduckelu gaebungka, Sugucnenonggeng Yesule tapilidi nongilengkolec fame, <sup>5</sup> nongileng ngic yogo Satangte molewa lodabeleng. Inguc aime socinedi sowaleme asuinedibac Sugucnele damengka wasecne aidaic.

*Suwe-suwele bole*

<sup>6</sup> Soc bafebe ababangineng yogodi mi madickegac. Ngenge yis kpisic-nemacti bretka lobong bret sasawa bame sugulecaigac, ababangineng yogo yis ingucne, ngenge yogo mi ngagegaing, me? <sup>7</sup> Aime Kristo ye Ewalicebaicnele hombangte lama madecine, yengi depec yogo biyac webong homalu suwecnubawec. Ilec ngenge bret gbolicne yis mikac ainingte bret esece yisholec baickeyackedaing. <sup>8</sup> Ilec ailu nongileng bret esece yisholec, yogolec sisipilicte yowa nga aibaba sowacne hegiledabeleng. Ailu aibaba gbagbacne, nga yowa noineholecte, bret yis mikac yogo balu hombang yogo ngagedabeleng.

<sup>9</sup> Ngic-ngigac selo-boic aibaba aicaigaing, ngenge ngic-ngigac yogo yengeholec wetackelu mi gadabiyeng. Ilec ailu hibiwa biyachac kwelengkengeleiba. <sup>10</sup> Aimebac himongka ngic-ngigac Yesu mi ngagegaing, yengele ngagelu mi migabac. Ngic-ngigac Yesu mi ngagegaing, yenge selo-boic ababanginengkolec me hane aibaba, me ngic kwesac aiyelelu ngic-ngigac yengele woc-wiyacngineng ewalicebacaigaing. Me siduc-gbong alang bayelecaigaing, ngenge yenge sasawa hegilecebaningte mi edocngebabac, yogo miyac. Ngenge yogo aidaiingtewa, ngenge himongtowa yago hegilelu hikedaingte. <sup>11</sup> Ngenge ngic hae-gbafoengineng wacebacaigaing, yengele ngagelu yanguc kwelengkeiba. Ngic hae-gbafoengineng yenge selo-boic aibaba aicaigaing, me hane aibaba, me siduc-gbong alang bayelecaigaing. Me ngic-ngigac gocne yowa kwekwe aiyelecaigaing, me misa sanangne nolu kwele-sifuc aicaigaing, me ngic-ngigac kwesac aiyelelu wiyacngineng ewalicebacaigaing. Aibaba ingucne aicaigaingka, ngenge ngic-ngigac yogo yengeholec wetackelu mi gadabiyeng. Ailu ngenge yengeholec nosing inguchac mi nodaing.

<sup>12</sup> Ngic-ngigac Yesule habuwa mi gagaing, yenge ngage-wosaec aiyeledakte, me? Yogo nale bole miyac. Ngenge Yesule habu hewacnginang gagaing, yenge sugu ngani-wosaec aiyelelu sowacnengineng mimoctodaing.

<sup>13</sup> Aime Waponti ngic-ngigac yele habuwa mi gagaing, yengele ababangineng wosaelu sowacnengineng mimoctodaite.

"Ngenge ngic sowacnebenang ngengele hewacka gagac, ye baickedabiyeng."

(Yef 17:7; 24:7)

## 6

*Yowawa mi locebadiiyeng*

<sup>1</sup> Ngengelacni ngic monicti agoine ngaba aicnolu ngic dondonne miyac, yengela hangoc mikac hikelu agoine yowawa locaigac, ailubac ngic-ngigac Wapongte bingec yengela hikeme mi wosaecaigaing. Aibabangineng yogo mi madickedaicte. <sup>2</sup> Wapongte bingec ngenge galu himongtowale ngic-ngigac ngage-wosaec aiyeledaingte. Ngenge yogo mi ngagegaing, me? Ngenge ngengungtihac himongtowale ngic-ngigac wosaecbadaingtewa, ngengung yanguctihac wiyc kpisicnemac inguchac wosaecnagudaing. Yogodibac madickegac. <sup>3</sup> Ailu ngenge lobewa angelo ngage-wosaec aiyeledaingte, ngenge yogo mi ngagegaing, me? Ingucnele ailu ngenge aibaba gocne hewacnginang fagac, yogo nalic wosaedaingte. <sup>4</sup> Yakumacbac yowa monic hewacnginang fikeme ngenge yefe lilolu Yesule habu ngagebong ngic gocne wawaine gagaing, yenge bawosaebalu yowangineng mimoctonogale locebacaigaing. <sup>5</sup> Ngenge gamengebanale ngagelu yowa yogo migabac. Aime ngengele hewackacni ngic monicti ngage-motolu galu ngic hae-gbafochine yengele umacte yowa wosaelu mime madickedaicte, ngic ingucne mi gagac, me? Yedi sugu galu nalic aidaicte. <sup>6</sup> Aime yanguctihac ngengebac inguc mi aicaigaing. Ngenge ngic hae-gbafochnineng bacea hikelu ngage-ngagesingngineng mikac, yogo yengele haicka yowawa locebacaigaing!

<sup>7</sup> Ngenge yowawa locebacaigaing, aibaba iwa ngenge wawebennangkegaing. Aime ngic hae-gbafochnineng yenge sowacne aingeletu, me woc-wiyacngineng ewalicebacaigaing, ngenge yogo moc hegilebong fame madickedaicte. <sup>8</sup> Aime ngengebac ngic hae-gbafochnineng sowacne aiyelelu woc-wiyacngineng ewalicebacaigaing.

<sup>9</sup> Ngic-ngigac dondonne miyac, yenge Wapongte ngani-damongte mole-damoc nalic mi bidaingte, ngenge yogo mi ngagegaing, me? Ngenge kwesac mi ainagudabiyyeng. Selo-boic aibaba aicaigaing, me siduc-gbong alang bayelecaigaing, me yefe-ngigac yengeholec gacaigaing. Me ngic gocne yenge ngic alingfocngineng yengeholec falu ngigackolec gaga ingucne gacaigaing, ailu ngic agoineholec fanogale aka monic mi holecaigac. <sup>10</sup> Me hise-baba, me hane aibaba, me misa sanangne nolu kwele-sifuc aicaigaing. Me yowa kwekwe aicaigaing, me kwesac ailu hiye-moneng ewalicebacaigaing. Aling ingucne yenge sasawadi Wapongte ngani-damongte mole-damoc nalic mi bidaingte. <sup>11</sup> Aime ngengelacni ngic-ngigac gocnedi esecne inguc ailu gaibong. Inguc gacgubong Sugucne Yesu Kristodi yeicne wacka, nga Wapongnonggengte Asu yele tapiliwa suwecngebalu dondonne wacngebalu Wapongte bingec locngebawec.

*Selo-boic aibaba mi ainoga*

<sup>12</sup> Gocne yengi yanguc micaigaing, "Na aibaba haicine monic-monicsasawa nalic aidacte, yogolec aka monic mi fagac." Aime nanibac yanguc migabac, "Wiyac sasawa gocne yogo babaficine mikac. Wiyc sasawa nalic aidacte, noine. Aime wiyc monicti damongnunale aime yogo hegilelu mi balaibedacte." <sup>13</sup> Nosing yogo gobenonggengte ailu fagac. Nga gobenonggengti nosingte ailu fagac. Aime gacgu Wapongti baicepame miyac aidabiyete. Socnonggengti Sugucnele ailu fagac, yogo selo-boic aibaba ainogale ailu mi fagac. Nga Sugucne ye socnonggeng damongkegac.

**14** Aime Wapong tapilitowainedi Sugucne bagboliyeme fangkewec, gacgu ye nongileng ingucnehad bagboliyecnubame fangkedabelengte.

**15** Aime socngineng yogo Kristole socte tofaine aigac, ngenge yogo mi ngagegaing, me? Ilec na Kristole socte tofaine yefe-ngigackolec kpatulebe, me? Yogo miyacbenang! **16** Me ngic monicti yefe-ngigackolec fadaictewa, ye yeholec soc moniyang aigaic, ngenge yogo mi ngagegaing, me?

“Ngic-ngigac yaeckang yeke soc moniyang aidabiyete.” (*Fike 2:24*)

Yowa yogo miicne fagac. **17** Aime monic ye Sugucneholec wetackelu gagac, ye yeholec asu moniyang aigabiye.

**18** Ngenge selo-boic aibaba yoglec hangoc hikedaing! Nga monic ye bikic gocne aicaigac, yogo yeicne socte lobina ailu gagac. Nga monic ye selo-boic aicaigac, yebac yeicne socinele bikic bafuwacnolu basowalecnagugac. **19** Wapongti Tili Asu ngeleme balu gagaing, ye kwelenginang gagacte, socngineng yogo yele ibu-mac. Ilec ngenge ngengungnihac soc-kwelenginengte fileine mi aigaing, yogo mi ngagegaing, me? **20** Ngenge fulingineng baicne, aime Sugucnedi fuli yoglecsoc lowec. Ilec ngenge socnginengti Wapong wac feicne lacnodaing.

## 7

### *Ngawe-ngigacteyowa*

**1** Ngenge hibiningang yanguc uwanelegaing, “Ngic monic ye ngigackolec fadaict, yogo madicne me miyac.” Ilec yanguc mibe ngagening, **2** selo-boic aibaba sugulegacte ailu ngic monic ye yeicne ngigacineholec aidaic. Nga ngigac monic ye yeicne ngawaineholec aidaic. **3** Aime ngic ye socine yogo ngigacinele angac balaibelu ameine lacnodaic. Nga ngigacti ingucnehad socine ngawainele angac balaibelu ameine lacnodaic. **4** Ailu ngigac ye yeuctihac socinele fileine mi aigac, miyac, ngawinedi yele socte fileine aigac. Aime ingucnehad ngawaine ye yeuctihac socinele fileine mi aigac, miyac. Ngigacinedibac yele socte fileine aigac. **5** Ilec ngawe-ngigac ngeke ngekuctihac socnginect mi sebicnagudabiyec. Ngeke dameng gocna sugu mimiloc bole banogale kwele-moniyang ailu dameng milu nalic sebicnagudabiyete. Aime ngekuctihac socnginect damongkenicte tapili mi fangeteme, Satangti lokwesacka locnepadaikale, ngeke dameng kpisicnemac moc galu hatacmac wetacnagudabiyec. **6** Aime yogodi ung-yowa monic mi aigac. Ngeke wenuc nalic aidabiyete yoglec migabac. **7** Naneicne angacbac yanguc, ngic-ngigac ngenge na ngigac mikac gagabac ingucnehad gabong madickedaiete. Aime Wapongti ngageboc mikac kwele-madicte wiyc nolecaigac, yogo ngic-ngigac filesoc filesoc noleme balu gagabeleng. Ye ngic monic tapili monic lacnodaicte, ailu monic ye tapili monic lacnodaicte.

### *Moc ganoga me ngawe-ngigackolec ainoga*

**8** Ngic gocne ngenge ngigac mi balu moc gagaing, ailu ngigac-hosec ngengele yanguc mibe ngagening. Ngenge na ingucne moc ganingte ngagebe madickegac. **9** Ngenge ngengungnihac damongnaguningte tapili mi fangeleme, ngawe-ngigacte angacti kwelenginang ofeme sowaledaingkale, ngawe-ngigackolec aibong madickedaiete.

### *Ngawe-ngigac gocne hegilecnagucaigaing*

**10** Aime ngawe-ngigac ngengele yowa yago sanangne edocngebabe bal-abedaing. Ngigac monicti ngawaine mi hegiledaic. Yogo nale yowa miyac, yogo Sugucnele yowa. **11** Aimebac ngigac monic ye ngawaine hegilelu hikedaitcwe, yanguc aidaic, ye moc gadaic, me ngawaine esecne gawec, yela hatacmac hikelu yeholec kwele-moniyang bafuwalu ngawe-ngigac hat-acmac aidabiyec. Aime ngic ye ngigacine mi hegileme hikedaic.

**12** Ailu ngic-ngigac nebocene ngengele yowa yanguc migabac, yogo Sugucnele mickacni mi baiba. Ngic hae-gba monicte ngigacti Yesu mi ngagesingkelu ngawaineholec ganogale ngagegacka, ngic ye ngigacine mi hegiledaic. **13** Me ngigac monicte ngawinedi Yesu mi ngagesingkelu ngigacineholec ganogale ngagegacka, ngigac ye ngawaine mi hegiledaic. **14** Ngigac monic ye ngawaine ngage-ngagesing mikac gagac, ye ngawaine bame Wapongte bingec ingucne gagac. Nga ngic monic ye ngigacine ngage-ngagesing mikac gagac, ye ngigacine bame Wapongte bingec ingucne gagac. Yogodi noine mi aidecka midec, adu-madecfocnginec yenge ngawenigigac momochac mi ngagesingkegaic, yekele adu-madec ingucne gad-abong. Aime adu-madec yengebac yangutihac Wapongte bingec ingucne gagaing. **15** Aime monicti Yesu mi ngagesingkegac, ye ngawe me ngigacine ngage-ngagesingkolec hegilenale ngagesime aka mi holecnodaic. Wiyac ingucnedi ngic me ngigac ngage-ngagesingkolec ye nalic mi hefedaicte. I yangucte, Wapongti kwele-mogungkolec ganangte wacnubawec. **16** Ngigac, gagi ngawegone bafickeng Wapongti bikicte ameine bame wasecne aidaicte mecne, yogo mi ngagegeic, me? Ingucnehac, ngic, gagi ngigacgone bafickeng Wapongti bikicte ameine bame wasecne aidaicte mecne, ga yogo mi ngagegeic, me?

### *Wapongti wacngebawec, gaga yogowa gadabiyeng*

**17** Sugucnedi ngic-ngigac gaganginengte silicina moniyang moniyang botoc bame yogowa Wapongti wacngebalu hefolecngebame, ngenge gaga yogolec silicina gadabiyeng. Aime Yesule habu sasawa ngenge aibaba yogo balaibeninge edocngebacaigabac. **18** I yangucte, ngic monic ye soc tofaine helockeicnele alingka gacgume, Wapongti ye wackelu hefoleemewa, ye ngage-ngage yogo balu soc tofaine hatacmac taockenale bole mi badaic. Aime ngic monic ye soc tofaine mi helockeicnedi gaemewa Wapongti wackedaictewa, ye soc tofaine mi helockedai. **19** Soc tofaine helockeicne, me mi helockeicne, yogodi wiyc feicne mi aigac. Nga Wapongte ung-yowa balaibenoga, yogodi sugu wiyc noinebenang aigac. **20** Aime ngic moniyang moniyang ngenge gaga silicine wenuc gaebongka Wapongti wacngebalu hefolecngebawec, ngenge gaga silicine ingucnehac gadabiyeng.

**21** Ga ngic sugucnegonele kwelec kwekwe gaengka Wapongti wacguwecka, yoglec ngageboc monic mi aidamec. Aime ga kwelec kwekwele muc lukanogale yefe fikegeleme, yogo balaibedamec. **22** Monic ye kwelec kwekwe gaemewa, Sugucnedi wackelu hefolewecka, ye dameng iwa sifu Sugucnele ngic-ngigac mucine mikac aigac. Aime monic ye mucine mikac gaemewa wackeme, ye yefe yogowa Kristole kwelec kwekwe aime Kristodi yele sugucneine aigac. **23** Sugucnedi fulgingineng biyachac bawec. Ilec ngenge ngic yengele bagewa kwelec kwekwe aling mi aidabiyeng. **24** Ngic hae-gbafoce, ngenge domacaigaing silicine ingucnehac domaebongka Sugucnedi moniyang moniyang

wacngebalu hefolecngebawec, ngenge silicine ingucne hac Wapongte haicka gadabiyeng.

### *Ngawe-ngigac gagadi sowacne mi aigac*

<sup>25</sup> Ngigac gocne ngenge ngic mikac moc gagaing, ngengele ngagelu Sugucneciung-yowa monic mi fanelegac. Aime Sugucnedi kwele-sowac ainelewec, yogolec silicina yowa noine mibe ngenge ngageboc mikac galu yowane ngagedaing. <sup>26</sup> Dameng yagowa umac sugucne fikelu fagacte ailu, ngenge yanguctihac gagaingka, gagangineng ingucne hac ngawe mikac moc gabong madickedaite, inguc ngagegabac. <sup>27</sup> Ga ngigacgoneholec biyachac hefecngepaicne, aime hegilenogale mi ngagesidamec. Aime ngic monic ga ngigac mikac galu ngigac banogale mi aidamec. <sup>28</sup> Ailu ga sifu ngigac monic badamectewa, bikic mi bafuwagic. Aime ngigac monic ye moc galu ngic badaictewa, ye inguchac bikic mi bafuwagac. Ngawe-ngigac aicaigaing, yengele gagawa umac haicine monic-monice fikecaigac, na ingucne mi fikenale ngagegabac.

### *Himongte wiyacti mi hefecngebadaic*

<sup>29</sup> Ngic hae-gbafocne, dameng bangkacnemac fagac, inguc migabac. Ilec ailu ngic ngigackolec gagaing, ngenge ngigacfoengineng mikac, ingucne gadaing.\* <sup>30</sup> Nga ngic-ngigac hiyalu gagaing, ngenge mi hiyagaing ingucne gadaing. Nga ngic-ngigac belic-belicka gagaing, ngenge mi beliyegaing ingucne gadaing. Ailu woc-wiyac fuli bacaigaing, ngenge woc-wiyacngineng mikac ingucne gadaing. <sup>31</sup> Ailu ngic-ngigac himongtowa yagolec wiyacte bole balu gagaing, ngenge wiyacngineng efecnemac fangelegac, ingucne gadaing. Aime himongtowa yago yakumac fagac, yogo miyac ainowagac.

<sup>32</sup> Himongte umacti mi fikengelenale angacnugac. Ngic ngigac mi bawec, ye Sugucnele wiyacte ngage-ngageleine sugucne hac facnocaigac. Ailu ye wenuc aime Sugucnedi ngagecnome madickenale bole bagac. <sup>33</sup> Aimebac ngic monic ye ngigac biyachac bawec, yedibac himongte wiyacte ngage-  
ngageleine sugucne hac facnogac. Ailu ye ngigacne aibaba wenuc aicnome ngigacinedi ngagecnome madickedaite. <sup>34</sup> Inguc ailu ngage-  
ngageleine siyeckelu yaeckang ailu gagac. Aime ngigac-adu, me ngigac ngic mikac ye Sugucnele wiyacte ngage-  
ngageleine sugucne hac facnogac, ye yanguc ngage-  
gac, “Na wenuc gabe socne nga asune Wapongte bingec aidacite.” Aimebac ngigac monic ye ngic biyachac bawec, ye himongte wiyacte ngage-  
ngageleine sugucne hac facnogac, ye ngaweine aibaba wenuc aicnome ngawinedi ngagecnome madickenale bole momochac bagac.

<sup>35</sup> Ngenge baficngebaganole ailu yowa yago migabac, yogo ngenge aka mi holengelenogale migabac. Ngenge gaga silicina galu Sugucnele bole damengsoc balu gabong himongte wiyacti ngage-  
ngagengineng mi basifwedaic, inguc ngagegabac.

### *Ngic monicte adu*

<sup>36</sup> Ngigac monic ye ngickolec gagale damengngine ewalime, sifu ngic banogale aicnome mamacinedi molickelu welockecnodeitaite. Ailu lobein-abac ngageboc ailu nalic midaicte, ye bikic mi bafuwagac. Aime aduine nalic ngic bidaicte. <sup>37</sup> Nga mama monic ye ngageboc mi ailu, aduine nalic damongkeme macina ngiyedaic, yogo ngage-  
ngageleine damongkelu

\* **7:29:** Ngic ngigac mikac, ye Wapongte bole homacne hac nalic bidaicte. Ilec ngic ngigackolec aigac, ye silicina ingucne hac aidaic.   **7:31:** 1Yoa 2:17

kweleina biyac ngagepangkelu ye aibabaine madicne aigac. <sup>38</sup> Ilec ailu ngic monic ye aduine ngicka logac, ye aibabaine madicne aigac. Me ngic ye aduine ngicka mi logac, ye aibabaine madicnebenang aigac.<sup>†</sup>

### *Ngigac-hosec*

<sup>39</sup> Ngigac monic ye ngaweine gblolicne gagac, ye ngaweine gaemewa yeholec wetackelu gadabiyec. Gacgu ngaweine homame ye umacine mikac ailu ngic monic banogale milu angac ngagelu nalic badaict. Ailu ye ngic Sugucne ngagesingkegac ye sugu badaict. <sup>40</sup> Aime ye ngic mi balu moc ganogale ngagegacka, yele kwele-angac yogo sugucnehac. Nale ngage-ngage inguc ngelegabac. Aime na inguchac Wapongte Asuholec gagabac, yogo ngagesilu migabac.

## 8

### *Siduc-gbong yengele depec*

<sup>1</sup> Ngic-ngigac yenge sic welu siduc-gbong yengele depec lolu nocaigaing, yogolec fungine minogale ngagegabac. Nongileng sasawadi ngage-  
ngageholec gagabeleng, yogo ngagegabeleng. Ailu yanguc ngagegabeleng,  
“Ngage-ngagedi nongileng socnonggeng bafegac.” Aimebac kweledi  
angacka ngagenaguicaigaing, gaga yogodi ngic-ngigac kwelenginang  
kwefangkeme sanangnehac domagaing. <sup>2</sup> Entacka monicti yanguc ngagelu  
gadaict, “Na ngage-  
ngageneholec,” ye ngage-  
ngage-motoc mikac gagac.  
<sup>3</sup> Aime monic ye kweleinedi Wapongte angackeme, Wapongti ye ngagecnolu  
gagac.

<sup>4</sup> Ilec ailu siduc-gbongte depec yogo nonoga me miyac, yogolec yanguc  
biyac ngage-motogabeleng. Wapong moniyangi sugu gagac. Nga himong-  
towa yagowa siduc-gbong yogo yenge wiyac noine miyac. <sup>5</sup> Ngic-ngigac  
yenge siduc-gbongfocngineng sawawa me himongka gagaing, yengele wac-  
ngineng wapong wacebacaigaing. Sugucne nga wapong ingucne bocyc  
gagaing. <sup>6</sup> Inguc gaebongka nongele ailu Wapong ye moniyang sugu hocne,  
ye Mamac, yelacni wiyac sasawa fikeyackewec, nongileng yele ailu gagabe-  
leng. Sugucne moniyang, yogo Yesu Kristo, aime yele feiwa wiyac sasawa  
nga nongileng gagabeleng.

<sup>7</sup> Siduc-gbong yenge noine miyac, ngage-  
ngage yogo ngic-  
ngigac ngage-  
ngagesingkolec gocne yengele kwelewa mi fagac. Yenge siduc-gbongte  
ngagelu wiyac noine micaigaing. Ilec yengele depec nocaigaing, iwa kwele-  
ngage-  
ngagenginengte tapili wame yafoineholec aicaigac. <sup>8</sup> Aime nosing-  
nono yogodi Wapongte emewa mi locnubadaict, miyac. Nosing nodabe-  
lengtewa, ingucne, yogodi yele haicka feicne mi aigac. Nga mi nonogawa  
ingucne yogodi yele haicka feicne mi aigachac.

<sup>9</sup> Gocne ngengebac ngagebong depekte nosing nalic nocaigaing. Inguc  
ngagebong efeckeme nobong, alingfocngineng tapili-wawa gagaing, yenge  
nosinge ailu lokwesacka locebabong wawedaingkale, ngenge damong balu  
gadabiyeng. <sup>10</sup> Ga ngage-  
ngage-motocgoneholec. Ailu gagi siduc-gbongte  
ibu-macka ngiyelu nosing nodamectewa, agogone monic ye kwele ngage-  
ngageinele tapili waicnedi iwa gadaict. Inguc galu aibabagone nganilu

<sup>†</sup> **7:38:** Hewacine 36-38 yogowa Wapongte yowale ngage-  
ngage ngic yenge Grik yowawa wafelu  
yogolec funginele kwele-yaec ailu gagaing. Ilec bafaliyenogale yefe yaeckang balaibeibong. Buk  
Baibel nga Miti gocne iwa yefe monic bafaliyeicne yanguc fagac, yogo mamacte mi bafaliyeicne. Yogo  
ngicti ngigac-bingecine badaict me miyac.   **7:39:** Rom 7:2-3   **8:1:** Sale 15:29   **8:2:** Gal 6:3

**8:4:** Gal 4:8; Yef 4:39; 6:4

**8:6:** Efs 4:5,6

**8:9:** Rom 14:13-15; Gal 5:13

kweleine kwefangkeme ye siduc-gbongte depec inguchac nolu kwele-yaec bafuwadaicte. <sup>11</sup> Ga inguc aigacgu ngage-ngage-motocgonedi ngic hae-gbagone ngage-ngagesingngine waicne ye basowalecnodamecte. Aime Kristo ye ngic hae-gbagone yele momochac homawec. <sup>12</sup> Ailu ngenge ngic hae-gbafoengineng yengele kwele ngage-ngagengineng basowalelu yengela bikic bafuwadaingtewa, Kristola inguchac bikic bafuwadaingt. <sup>13</sup> Ilec ailu yanguc migabac, na nosing nolu ngic hae-gbane umacka lobe wawedaickale, sic hatacmac mi nodacte. Ngic hae-gbane aicnobe bikic bafuwame mi madickedaicte.

## 9

### *Bole ngic-ngigac wiyac yelenoga*

<sup>1</sup> Na ngic monicti aka mi holenelegac, me? Ailu na salecebaicne, me? Sugucnenonggeng Yesu dongedi nganiiba, me? Na bole balu gabe, ngenge bole yogolec noine kwelenginang fikeme Sugucneholec wetackegaing, me? <sup>2</sup> Foinac, ngic-ngigac gocne yengi nale yanguc ngagegaing, "Ye salecebaicne miyac." Inguc ngagebong na sifu salecebaicne bole bagabac, ngengi inguc ngagegaing. Ailu Sugucnele salecebaicne gagabac, ngengi hocne Yesu ngagesingkeibong yogolec maaine aigaing.

<sup>3</sup> Gocne yenge nale lobe-yowa milu gacaigaing, yogolec ameine bafaliyelu yanguc edocebagabac, <sup>4</sup> Habu yengi salecebaicne nonge nosing nolabong nalic nodabelengte, yogolec yefe madicne aigac, me? <sup>5</sup> Ailu nonge ngigacfocnonggeng inguchac ngage-ngagesingkolec gagabiyeng, yenge yefewa nalic bacebalu kwestabelengte, yogo madicne aigac, me? Salecebaicne gocne nga Sugucnele gbafocine ailu Pita,\* yenge ngigacfocnonggengkolec hike-kwesic aicaigaing. <sup>6</sup> Ailu salecebaicne gocne yenge bole mi babong baficebacaigaing. Aimebac Banabasholec noki sugu gaganonggecte wiyac fikenale bole molenonggecti balu gagabelec, ngenge inguc ngagesicaigaing, me? <sup>7</sup> Hudu-baba ngic monicti hudu bole balu yeuctihac boleinale fuli moneng nalic mi lanagudaicte. Nga monic ye waing duweme noine aime yeuctihac noine balu nodaicte. Aime monicti lama-bulumaka yengele damong gacaigac, ye yengelacni amuc balu nocaigac.

<sup>8</sup> Na ngic yengele ngage-ngage balu yowa yago mi migabac, miyac. Yefeyowadi yogolec inguchac migac, me? <sup>9</sup> Mosesdi yefe-yowawa yanguc kwe lengkewec fagac,

"Ngicti wit socine litonogale ngagelu bulumaka bole sugucnehad lacnome wit feina edelu lolickecaigac. Ilec mesuine mi hefebong ye bole bagacte fuline nodaic." *(Yef 25:4)*

Wapongti bulumaka yengele ngagelu inguc mi miwec, miyac. <sup>10</sup> Foinac, ye ngic-ngigac nongilengte ngagelu inguc miwec. Yogo nongileng ngagelu ngic ye boleinale noine bame madickegac, inguc kwelengkeicne fagac. Ngic himong holelu gagac nga ngic wit socine litolu gagac, yeke noinele dameng kwesime bole yogolec noine nebocene banicte ngagesilu bole balu gagaic.

### *Aka holeibeng*

<sup>11</sup> Aime Wapongte Asule noine ngengela wickeibengte ailu ngengelacni inguchac socte babafic badabelengte, yogo wiyac umacne, me? Babafic

**8:11:** Rom 14:15,20      **8:13:** Rom 14:21      **9:1:** Sale 22:17-18; 26:16; 1Kor 15:8-9      **9:2:** 2Kor

3:2-3      **9:4:** Luk 10:8      \* **9:5:** Grik yowawa Pita wacine monic Kefas fagac.      **9:9:** 1Tim 5:18

**9:10:** 2Tim 2:6

yogo nalic badabelengte. <sup>12</sup> Aime ngic gocne yenge ngengelacni wiyac gocne nalic badaingtewa, nongi yogo taockelu hatacmac badabelengte, me? Aime nalic badabelengte. Aime sifu nonge Kristole Siduc Madicnele aka holedabelengkale, ngengelacni wiyac nalic banogale ngagecaigabeleng, yogo ngengelacni mi bacaigabeleng. Nonge wiyac banogale socte umac haicine monicmonic balu gagabeleng.

<sup>13</sup> Ngic Wapongte Ibu-macka bole bacaigaing, yenge nosingngineng Ibu-macka bafuwalu nocaigaing. Nga alatawa kwelec bole bacaigaing, yenge alatale ibuwacni tofaine bacaigaing, ngenge yogo mi ngagegaing, me? <sup>14</sup> Aime silicine ingucne hac gocne yenge Siduc Madicne bayegengkecaigaing, yenge yefe yogowacni gaganginengte nosing yeledaing, Sugucnedi yefe yogo lowec.

<sup>15</sup> Naneicnebac babafic ingucne monic mi balu gaiba. Ailu ngengi wiyac monic neleningte ngagelu hibi yago mi kwelengkegabac, miyac. Naneuctihac nosing bafuwadacte, yoglec ngagelu wacne bafebe madickedaicte. Aime monicti nosing bafcnudaictewa, na wacne bafebe nalic mi madickedaicte. Inguc fikeme wacne nalic mi bafedacte, yogodi nale homac ewaligac. <sup>16</sup> Wapongti igocnulu kpafengnume Siduc Madicne ngic-ngigac edocebalu weduyelelu gagabac. Ailu Siduc Madicne mi mibe yegengkedecka, ibac na medecnume gadaba. Ilec naneuc bole madicne balu gagabac milu wacne nalic mi bafedacte. <sup>17</sup> Ailu neicne angac balaibelu bole banogale uwabe nalic mibong bole yago badacka, yengi bole ameine nelebong badaba. Aime Sugucne yeuctihac bole yago banogale nelewec, yogo yele angac balaibelu damong bole balu gagabac. <sup>18</sup> Aime ameinele silicine yanguc aigac, na Siduc Madicne mibe yegengkeme wiyac banogale miicne, yogo hegilelu moc sugu nalic mibe yegengkedaicte.

### *Ngic-ngigac yengele bagewa gaga*

<sup>19</sup> Ngic monicti nale aka mi lowec, miyac. Aime nabac ngic-ngigac bocyac kpaducebabe Kristoholec wetackeningte ngagelu, yengele bagewa nalic kwelec kwekwe ngicngineng ailu gacaigabac. <sup>20</sup> Na Yuda ngic-ngigac kpaducebabe Kristoholec wetackeningte ailu yengeholec galu Yuda ngicngigac yengele silic ingucne ailu gacaigabac. Naneicnebac Yuda yengele yefe-yowale bagewa mi gacaigabac, yogo noine. Aime ngic-ngigac yefe-yowale bagewa gacaigaing, yenge kpaducebanogale yengeholec galu yenge ingucne yefe-yowale bagewa gacaigabac. <sup>21</sup> Aime ngic-ngigac gocne yenge yefe-yowale bagewa mi gacaigaing, yenge kpaducebabe Kristoholec wetackeningte yengeholec galu yefe-yowa mikac yenge ingucne gacaigabac. Aime naneuc Wapongte yefe-yowa lobe holecnolu mi gacaigabac, nabac Kristole yefe-yowaholec gacaigabac. <sup>22</sup> Galu ngic-ngigac tapilingineng waicne kpaducebabe Kristoholec wetackeningte yenge ingucne yengeholec tapiline waicne ingucne ailu gacaigabac. Ailu ngic-ngigac haicine monicmonic gacaigaing, yengelacni gocne bikicte ameine bame wasecne ainingte yengeholec gacaigabac. Galu gaga haicine monicmonic balaibelu yenge ingucne hac gacaigabac. <sup>23</sup> Na Siduc Madicnele ailu bolene sasawa bacaigabac, gacgu neicne yoglec noinele ameine nebocene banogale ngagesilu gagabac.

### *Gbelong ainogale yefe*

<sup>24</sup> Gagasacte ngic lolingte sobengka kucte ainogale gasackecaigaing, yenge sasawadi gasackebong moniyangti sugu gbelongte kap badalcte, ngenge

**9:11:** Rom 15:27    **9:12:** Sale 20:34; 2Kor 11:9    **9:13:** Yef 18:1-3    **9:14:** Mat 10:10; Luk 10:7;

Gal 6:6    **9:16:** Yer 20:9    **9:20:** Sale 21:20-26    **9:22:** 2Kor 11:29

yogo mi ngagegaing, me? Ngenge ngengileng kapngineng banogale ga-sackedaing.<sup>25</sup> Ngic lolingka wacngineng locaigaing, yenge sasawadi socngineng bucbuchac efeckenale doic-bole balu alingkecaigaing. Ngic yenge gbelongte maaine lobewa miyac aidaicte, yogo ubeeyeleningte inguc aidaingte. Aime nongileng gbelongte maaine fafegidaicte, yogo ubeenolenogale, doic-bole balu damongnagugabeleng.<sup>26</sup> Na kosa mi gasackecaigabac. Ailu hudu banogale molene sawaina moc mi wickecaigabac.<sup>27</sup> Nabac yanguc aicaigabac, ngic-ngigac tofaine yengela Siduc Madicne edocebalu deduyelelu gabe, ngani-wosae damengka wawedackale, socne welu gagabac. Na socnedi yowane balaibelu kwelec kwenogale inguc ailu gagabac.

## 10

### *Yuda ngesa-ngambofocngineng yengele siduc ngagelu sawang-yowa ngagesidaing*

<sup>1</sup> Ngic hae-gbafocne, ngenge Yuda ngambofocnonggeng yengele yowa-siduc ngage-motoningte ngagegabac. Yenge Isip hegile hikelu kaguwadi somecebame yenge sasawadi yogolec bagewa hikeibong. Hikegacgu yenge sasawadi kiwec falockeibong.<sup>2</sup> Kaguwa nga kiwec yeki misa-lowac ingucne aiboc, yenge sasawadi Mosesholec taockenogale misa lowaibong.<sup>3</sup> Ailu yenge sasawadi Asule nosing silicine moniyang nolu hikeibong.\*<sup>4</sup> Aime Asule fapacladeng yogowacni misa wame yenge sasawadi Asule misa silicine moniyang nolu hikeibong. Aime fapacladeng yogo Kristo hocne, yedi balaibecebewec.<sup>5</sup> Aime Wapongti ngesa-nambofocnonggeng yengele hewackacni bocyac yengele aibabanginente ailu kweleine mi madickewec. Mi madickerne yenge homayackeibong, aime kponggbongngineng himong kisiwa misaine mikacka kosa singsalolong kwelu fayackeibong.

<sup>6</sup> Yenge aibaba sowacnele angacebame ailu gaibong, yogo nongilang ingucne mi fikenale siduc yogo nongilengte ailu loicne fagac.<sup>7</sup> Ailu hatacmac yanguc mibe, ngenge yenge ingucne hac siduc-gbong alang mi bayeled-abiyeng. Yenge inguc aibong siduc yanguc kwelengkeicne fagac, "Ngic-ngigac yenge ngiyelu nosing misa nolubac fangkelu gee welu gai-bong."  
*(Wah 32:6)*

<sup>8</sup> Ailu nongileng selo-boic aibaba mi aidabeleng. Yengelaci ngic-ngigac gocne yenge selo-boic aibaba ailu gaibongte, Yuda ngic-ngigac 23 taosen yenge hadeng moniyangte kwelina homayackeibong.<sup>9</sup> Ailu gocne yenge Sugucne lokwesacka lobong, hema yengi hicebabong homayackeibong. Aime nongileng inguchac Kristo lokwesacka mi lodabeleng.<sup>10</sup> Aime ngic-ngigac gocne yenge lobe-yowa aibong, ngic-wewe angelodi kwesilu we-cebame homayackeibong. Nongileng silicine ingucne hac lobe-yowa mi aidabeleng.<sup>11</sup> Aibaba yengela fikewec, yogodi nongileng edalicnubame akanonggeng aidaic. Nongileng yanguctihac dameng moto-motoina gagabeleng, nongileng ailu yowa yogo Wapongte hibiwa kwelengkeicne fagac.<sup>12</sup> Ilec monicti yanguc midaicte, "Na sanangne domagabac." Ye gacgu wawedaickale, damongnagudaic.<sup>13</sup> Aime lokwesacti ngic-ngigac sasawa yengela fikecaigac, silicine ingucne hac ngengela fikengelecaigac. Aime

**9:25:** Filip 3:14; 2Tim 4:7-8; 2:4-5    **9:27:** Rom 8:13; 13:14    **10:1:** Wah 13:21-22; 14:22-29

\* **10:3:** Wahikeicne 16:35 siduc iwa fagac. Wapongti nosing monic wacine mana yeleme nolu gaibong. **10:4:** Wah 17:6; Him 20:11    **10:5:** Him 14:29-30    **10:6:** 1Kor 10:11; Him 11:4,34

**10:8:** Him 25:1-9    **10:9:** Him 21:5-6    **10:10:** Him 16:41-49

Wapong ye yowaine milu balaibegac. Lokwesac fikengeleme ngenge umac yogo nalic tengkelu gagaing. Aime umac yogodi tapilingineng mi ewalinale Wapongti lokwesac sugucne hac yogo aka holecnogac. Lokwesac fikengeleme yedi yogowacni wenuc hikeningte yefe bafuwangeleme lokwesacti tapilingineng mi bawame domadaingte.

### *Sugucnele tiwa nga siduc-gbong yengele tiwa nono*

<sup>14</sup> Agofocne kwelenedi ngengele angac ngagegabac, ngenge siduc-gbong yenge alang mi bayeledabiyyeng. Baickelu hikedabiyyeng. <sup>15</sup> Ngenge ngic-ngigac ngage-ngage-motocnginengkolec. Ilec ailu ngengele yanguc mibe, ngenge ngengungtihac yowane ngagelu wosaedabiyyeng. <sup>16</sup> Kap kwele-madicineholec yogo kwele-madic micaigabeleng, nongileng yogo nolu Kristo yeicne sacineholec wetackelu yeholec sac moniyang aigabeleng, me? Nga bret baducaigabeleng, yogo nolu Kristo yeicne sockolec taockelu yeholec soc moniyang aigabeleng, me? <sup>17</sup> Bret yogo ebec moniyang. Yenge ebec moniyang sugu yogo balu yogowacni botoc balu nolecaigabiyyeng. Nolebong nongileng sasawadi yogo nocaigabelengte, nongileng ngic-ngigac bocyacti galu soc moniyang aigabeleng.

<sup>18</sup> Ngenge Israel ngic-ngigac nganicebalu ngagesidaing. Ngic-ngigac Wapongte depekte wiyc lobelu nebocene nocaigaing, yenge Wapongte alataholec kpatulecaigaing, me? Aime, yenge kpatulecaigaing. <sup>19</sup> Ilec wenuc migabac? Siduc-gbongte depec yogodi wiyc feicne aigac, me? Ailu siduc-gbong yeicne inguchac wiyc feicne aigac, me? Yogo miyac! <sup>20</sup> Aime ngic-ngigac Wapong mi ngagegaing, yenge depec yoglec wiyc locaigaing, yogo Wapongte mi locaigaing. Yengebac aleng yengele depec lobelu kpatulecaigaing. Aime ngenge aleng yengeholec kpatulebong mi madickedaicte. <sup>21</sup> Ngenge Sugucnele kap nga aleng yengele kap momochac bacpalu nodaingte, yogo nalic mi aidaicte. Aime ngenge Sugucnele nosing nga aleng yengele nosing momochac kpatulecepadaingte, yogo nalic mi aidaicte. <sup>22</sup> Ailu nongileng tapilidi Sugucnele tapili ewaligac, me? Nongileng Sugucnele kwelewa aalic bafuwadabelengkale, inguc mi aidabeleng.

### *Kwelenonggengti yele angacnubadaic*

<sup>23</sup> Gocne yengi yanguc micaigaing, "Nosing nga wiyc haicine monic-monie sasawa ainangte aka monic mi fagac."

Aime nanibac yanguc migabac, "Aibaba gocne yogodi alingfocgone yenge mi baficebadaicte. Wiyc sasawa ainangte aka monic mi fagac, yogo noine. Ailu aibaba gocnedibac mi bacnubame sanangkedabelengte." <sup>24</sup> Monic ye madicne yeicna fikenale ngagelu aibabaine madicne mi aidaic, miyac. Ngenge ngic-ngigac yengela madicne fikenale ngagesilu aibabangineng madicne aidaing.

<sup>25-26</sup> "Himongtowa nga wiyc sasawa himongka fagac, yogo Sugucnele."

### *(Mige 24:1)*

Ilec ngic-ngigac yenge sic maketka salebong, ngenge kwelenginengti yoglec depekte fungine ngage-wosaec ainogale mi uwadabiyyeng, ngenge yogo moc sugu fuli balu nodabiyyeng.

<sup>27</sup> Aime ngic-ngigac Sugucne mi ngagesingkecaigaing, yengelacni monicti macina hikeningte wacngebame ngenge yanguc aidaing. Ngenge yele macka fenogale ngagebong nalic aime yele macka hikedaing. Hikelu febong

ye nosing ngeleme ngenge kwelenginengti yogolec fungine ngage-wosaec ainogale mi uwadaing, yogo nalic moc nowackedaing. <sup>28-29</sup> Aime entacka monicti yanguc milu edocngebadaicte, "Yago siduc-gbong yengele depekte sic nebocene." Yogowabac nosing yogo mi nodaing. Aime gale ngage-  
ngagegonele mi migabac, miyac. Yogo agogone kweleinedi ngage-wosaec aime mi madickedaickale, nga ngic nosingte edocgugac, yele ngage-  
ngagele ailu nosing yogo hegiledaing. Na aka mikac gagabac, yogo noine. Aimebac  
ngic monicte kweleinedi ngage-wosaec aicnome mi madickegac. <sup>30</sup> Aime  
na ngic-  
ngigac yengeholec nosing nolu Sugucnele kwele-madic midactewa,  
yengele woc-wiyacte biyac kwele-madic migabac, yogolec misulec ainele-  
bong mi madickegac.

<sup>31</sup> Ilec ngenge nosing misa nocaigaing me wiyc monic aicaigaingka,  
ngenge Wapong ngagesibong wac feicne badaic. <sup>32</sup> Yuda ngic-  
ngigac nga Grik ngic-  
ngigac ailu Wapongte habu wosaecngebadaingkale, aibabangi-  
neng damongkedaing. <sup>33</sup> Aime ngic-  
ngigac bocyc acikite ameine bame  
wasecne aibong yengela madicne fikenale ailu bole yogo balu gagabac. Na  
neicna madicne fikenale mi balu gagabac.

## 11

<sup>1</sup> Na Kristole aibaba balaibecaigabac. Aime ngenge silicine yogohac  
nale aibaba nganilu balaibecnudabyeng. <sup>2</sup> Nga ngenge nale wiyc sasawa  
ngagesigaing. Ailu yowa edocngebalu ngeleiba, yogo bacaigaing, yogolec  
mitenggebabac.

### *Hodocnonggengte maa*

<sup>3</sup> Ngic moniyang moniyang sasawa yengele hodocngineng yogo Kris-  
todi aigac. Nga ngigac moniyang moniyang yengele hodocngineng yogo  
ngicti aigac. Aime Kristole hodoc yogo Waponti aigac, ngenge yogo  
ngage-motoninge ngagegabac. <sup>4</sup> Aime ngic monic ye hodocine someck-  
elu milockedaitewa, me Wapongte siduc-yowa midaictewa, ye yeicne  
hodocine gamewa lodaicte. <sup>5</sup> Aime ngigac monicti hodocine mi someck-  
elu milockedaitewa, me Wapongte siduc-yowa midaictewa, ye yeicne  
hodocine gamewa lodaicte. Yogo ngigac monicti hodocine fodeme kpandec  
aigac ingucne. <sup>6</sup> Ailu ngigac monic ye hodocine mi someckedaictewa, ye  
hodoc-dowecine balockeme bangkacne aidaic. Aime ngigac ye hodocine  
inguc balockedaitewa me fodedaicte, aibaba yogodi gameineholec aigacka, ye  
hodocine someckelu gadaic.

<sup>7</sup> Ngic ye Wapongte silic ingucne. Ailu yele wac feicne bayegengkegac.  
Ilec ailu ye hodocina wiyc monic mi lolu someckedaic. Ngigactibac ngicte  
wac feicne bayegengkegac. <sup>8</sup> I yangucte, Waponti ngic ngigackacni mi  
bafuwawec, yebac ngigac ngickacni bafuwawec. <sup>9</sup> Ailu ngic ye ngigacte ailu  
mi bafuwawec, ngigactibac ngicte ailu bafuwawec. <sup>10</sup> Ilec ngigac ye monicti  
tapilile bagewa gagac, yogolec maa ingucne wiyc monicti hodocina holelu  
someckedaic. Ye angelo yengele ailu inguc aidaic.\*

---

**10:28-29:** 1Kor 8:7    **10:30:** 1Tim 4:4    **10:31:** Kol 3:17    **10:32:** Rom 14:13    **10:33:** 1Kor  
9:20-22    **11:1:** 1Kor 4:16    **11:2:** 1Kor 1:10-12    **11:3:** Fike 3:16; Efs 5:23    **11:7:** Fike  
1:26-27    **11:8:** Fike 2:18-23    \* **11:10:** Angelo yenge Wapongte bagewa galu yele yowa balaibelu  
gagaing. Ilec yenge nganibong ngigac monic ye Wapong milockedogale yeicne hodocinele yowa mi  
balaibegacte ailu, yenge ngagebong mi madickegac.

<sup>11</sup> Ngigac ye yeicnac gaga yogo mi fagac. Nga ngic ye inguchac yeicnac gaga yogo mi fagac. Ngic nga ngigac ngenge kwele-moniyang gadabiyeng, Sugucnele gaga inguc fagac. <sup>12</sup> Ngigac ye ngickacni bafuwaicne, ingucnehac ngic ye ngigackacni fikeicne, aime wiyac sasawa yogo Wapongtaci fikecaigac.

<sup>13</sup> Ngenge ngengungtihic aibaba yogo wosaedaing. Ngigac monicti hodocene mi someckelu Wapong milockedaicte, yogo madickedaicte, me? <sup>14</sup> Aime ngic monic ye hodoc-sabaine sugucnehac balu gadaicte, me hodoc-dowecine hedefdaicte, aibaba yogodi alang-baba mi aidaicte. Ngic nongileng aibabanonggengti yogo wedunoledaicte, me? <sup>15</sup> Aime ngigac monic ye hodoc-dowecine sugucnehac facnodaictewa, yogo yele nganignaniine madicne aidaicte. Yogo nalic aihu madicne, I yangucte, ye hodoc-sabainedi hodoc-luweine someckenale yogo balu gadaicte. <sup>16</sup> Monicti yowa yagolet mife-miwa ainala ngagegacka, ye yanguc ngagedaic. Nongela someckeicnele aibaba ingucne monic mi fagac. Nga Wapongte habu yengele hewacka aibaba monic ingucnehac mi fagac.

### Sugucnele tiwa

Mat 26:26-29; Mrk 14:22-25; Luk 22:14-20

<sup>17</sup> Yowa taockelu yanguc sanangne edocngebabé, yogo mimi-madic yowa mi migabac. Ngenge tutumangngineng madicne mi aihu ngengungtihic basowalecaigaing. <sup>18</sup> Aime molickelu yowa yagolet migabac, Yesule habu ngenge kpaducke ngyielyu yowanginengti fena wana aime siyeckecaigaing, yogo ngageiba. Yowa yagolet ngagebe noine ingucne aigac mecne. <sup>19</sup> Aime Wapongti ngic-ngigac weni yenge aibabangineng noine nganilu hewacngi-nang gadaicte, yogo dondonne yegengkeningte siyeckegaing mecne. <sup>20</sup> Ilec ngenge kpaduckelu Sugucnele tiwa nonogale mic-walec nosing noacaigaing, yogodi Sugucnele tiwa noine mi aicaigac. <sup>21</sup> Aihu ngenge nosing bak-wesilu nosing-nono damengka ngic-ngigac ngengungtihic nosingngineng filesoc filesoc nowackebong, gocnedibac nosingte homacaigaing. Nga gocne ngengibac misa bocyacbenang nolu kwelengineng sifuwecaigac. <sup>22</sup> Ngenge macnginang ngyielyu nosingngineng mikac aigaing, me? Ngenge Wapongte habu lobe holeyelecaigaing. Aihu alingfoengineng gocne woc-wiyacngineng mikac gagaing, yenge game-gameine aiyelecaigaing, me? Ngenge macngi-nangsoc nodaing. Inguc aicaigabiyengte wenuc mibe? Mitengngebadaite, me? Yogodi kpungke-kpungkeine aigac.

<sup>23</sup> Sugucnedi yowa yago edocnume ngageiba. Aime yowa yogo esecne biyachac edocngebaiba. I yangucte, Yudasdi Yesu doc bawec, deboc yogowahac yanguc fikewec, Yesudi bret monic balu <sup>24</sup> Wapong kwele-madic micnolu bret yogo bauckelu yanguc milu yelewec, “Yago soc-biucne, yogo ngengele aihu loicne. Ngenge yogo nolu nale ngagesilu inguc nolu gadaing.” <sup>25</sup> Nosing nobong motome, silicine ingucnehac ye kap balu yanguc miwec, “Kap yago sacnele dodoxifc gblolicne. Ngenge yogo nodaingtesoc nale ngagesilu inguc nolu gadaing.” <sup>26</sup> Ngenge bret nga kap yago nodaingtesoc, dameng iwa Sugucnele homacinele mibong yegengkedaicte. Damengsoc inguc mibong yegengkeme gaebongka ye kwsidaicte.

<sup>27</sup> Ilec monic ye Sugucnele bret nga kapka moc nodaictewa, yedi Sugucnele sac nga biucka bikicte ameine bafuwadaicte. <sup>28</sup> Inguc aime ngic-ngigac filesoc filesoc ngenge ngengungtihic wosaechnagulu, bret nga kap yogowa nodaing. <sup>29</sup> Monic ye Sugucnele sac-biucine mi ngagesilu moc sugu nodaicte, yogowa ye bikicte ameine bafuwacnodaicte. <sup>30</sup> Aibabangineng ingucne aihu

hewacnginang ngic-ngigac bocyac yenge tapili-wawa nga hucnginengkolec aigaing. Ailu gocne yenge biyachac hegilecngebalu homaibong. <sup>31</sup> Aime nongileng filesoc filesoc funginenongengte aibaba noine ngani-wosaec aidabelengtewa, bikicte ameine nongilang mi weledaict. <sup>32</sup> Wapongti lobewa himongtowa mimoctolu basowalelu baickedaict, gacgu nongileng himongkolec momoc sowaledabelengkale, Sugucne ye wosaelu batngnubagac.

<sup>33</sup> Ngic hae-gbafocne, ilec ailu yanguc aidaing, ngenge Sugucnele tiwa noningte kpatulelu weledaingte, dameng iwa ngic-ngigac agofocngineng yengi molickelu baningte wangec aidaing. <sup>34</sup> Aime Wapongti tutumangnginang bikicte amengineng mimoctodaickale, ngic monic nosingte homadaictewa, ye macina ngiyelu nosing nolubac kwsidaic. Ailu yowane tofaine fagac, yogo ngengela fulubac taockelu edocngebadacte.

## 12

### *Tili Asule bole*

<sup>1</sup> Ngic hae-gbafocne, Asule bole fagac, ngenge yogolec wiyac ngagenigte ngagegabac. <sup>2</sup> Ngenge Wapong mi ngagesingkelu gaibong, dameng iwa gocne yengi siduc-gbong yowangineng mikac, yengela mengocngebalu hikeibong. Hikebong ngenge moc sugu balaibecebalu hikeibong, ngenge yogobac ngagegaing. <sup>3</sup> Ilec ailu yanguc mibe ngagedaing, Wapongte Asudi ngic monic bame ye yanguc monic mi midaict, "Yesu ye Wapongte aalicte bagewa gadaic." Aime Tili Asudi ngic monic bame yedi "Yesu ye Sugucne" inguc nalic midaict. Nga Tili Asudi yela bole mi badaictewa, ye inguc minogale kpungkedaict.

<sup>4</sup> Asudi kwele-madicte wiyac haicine monic-monic nolecaigac, yogo sasawa Asu moniyang, yelacni kwesicaigac. <sup>5</sup> Aime Sugucnedi bole haicine monic-monic nolecaigac, yogo sasawa Sugucne moniyang, yelacni kwesicaigac. <sup>6</sup> Ailu Wapongti yefe haicine monic-monic iwa tapiliine botoc balu nolecaigac, yogo sasawa Wapong moniyang, yelacni kwesicaigac.

<sup>7</sup> Asudi ngic-ngigac baficnubanale alingfocene filesoc filesoc bacnubalu gaganonggang tapiliine bayegengkegac. <sup>8</sup> Ailu Asudi ngic-ngigac bacnubame monicti yowa ngage-ngage-motockolec migac. Nga monicti yowa gholongne migac. Aime Asu moniyangti nongela bole yogo bagac. <sup>9</sup> Monicti Asu yogowacni ngage-ngagesing sanangne bagac. Nga monicti kwele-madicte tapili yogo huc bole haicine monic-monic bagac, yogo Asu moniyang iwacni. <sup>10</sup> Asu yogowacnihac monic ye pasi haicine monic-monic damuineholec banale ngage-ngage lacnogac. Nga monic ye siduc-yowa minogale ngage-ngage lacnogac. Ailu monic ye asu haicine monic-monic wosaecebanale ngage-ngage lacnogac. Nga monic ye yowa gocne haicine monic-monic minogale ngage-ngage lacnogac. Ailu monic ye yowa yogolec fungine bafaliyenogale ngage-ngage lacnogac. <sup>11</sup> Asu ye moniyang. Ailu ye hocne bole sasawa bagalu ngage-ngageine nga angacine balaibelu tapiliine yogo alingfocene filesoc filesoc botoc balu yelegac.

### *Soc moniyangte nebocene bocyac*

<sup>12</sup> Socnonggeng yogo moniyang, aime yogolec nebocene bocyac fagac. Nebocene yogo sasawa kpatulebong, soc moniyang aigac. Aime Kristola silicine ingucnehab fagac. <sup>13</sup> Asu moniyangti kpatulecnubalu misa-lowac

ingucne bacnubame soc moniyang aibeng. Nongileng Yuda ngic-ngigac, me Grik ngic-ngigac, me kwelec kwekwe aling, me mucnonggeng mikac gagabeleng, nongileng sasawadi Asu moniyang balu misa ingucne noibeng.

<sup>14</sup> Socnonggeng yogolec nebocene bocyac fagac, yogo wiyac haicine monic-monnic fagaing. <sup>15</sup> Aime entacka higedi yanguc midaicte, "Na mole miyac. Ilec ailu soc nebocene monic mi aigabac." Inguc midaictewa, ye sifu soc nebocene mi aidaicte, me? <sup>16</sup> Aime entacka hedecti yanguc midaicte, "Na donge miyac. Ilec soc nebocene monic mi aigabac." Inguc midaictewa, ye sifu soc nebocene mi aidaicte, me? <sup>17</sup> Aime soc ye bucbuchac donge sugu aidecka midec, ye yowa wenuc ngagedaicte? Ye aibibiyedaicte. Me soc bucbuchac hedec sugu aidecka midec, ye wiyac hoine wenuc ngagedaicte? Ye aibibiyedaicte. <sup>18</sup> Yakumacbac yanguc aigac, Wapongti ngage-ngageine nga angacine balaibelu soc nebocene sasawa filesoc filesoc soc moniyangka alingkelu taocebawec. <sup>19</sup> Aime soc nebocene sasawadi silicine moniyang sugu aidabongka midec, yenge kpatulelu soc moniyang bucbuchac wenuc aidaigte? <sup>20</sup> I yangucte, soc ye moniyang nga soc nebocene bocyac yogo nongileng.

<sup>21</sup> Aime dongedi molele yanguc nalic mi midaicte, "Na gale miyac, na neic-nac nalic gadacte." Aime hodocti higele inguchac yanguc nalic mi midaicte, "Na ngekele miyac, na neicnac nalic gadacte." <sup>22</sup> Yogo miyac, soc nebocene gocene tapilingineng waicne micaigabeleng, yengi hocne socnonggang boletowabenang bacaigaing. <sup>23</sup> Aime soc nebocene gocene yenge ngagebeng alang-babaine mikac, yenge alang bacebalu hafacmac bisocebacaigabeleng. Ailu soc nebocene gocene nganicebanogale ngagebeng gameineholec aicaigac, yogo aibaba madicne balaibelu bisocebacaigabeleng. <sup>24-25</sup> Ailu socnonggeng nebocene gameine mikac aigaing, yenge biscebanangte mi ngagecaigabeleng. Ailu socnonggeng nebocene gocene yengungtihac baficnaguningte, Wapongti socnonggeng alingkewec. Aime socnonggeng nebocene gocene yengele ngagebeng waicne aicaigac, yengebac alang bayelewec. Aime soc yengungtihac damongnaguningte inguc aiwec. <sup>26</sup> Aime soc nebocene monicti doic ngagedaictewa, socine nebocene gocene yenge sasawa momochac bafickelu doic ngagegaing. Nga soc nebocene monic wac feicne badaictewa, soc nebocene sasawa yenge momochac belyegaing.

<sup>27</sup> Aime ngengibac yanguctihac Kristole soc ailu filesoc filesoc soc nebocene aigaing. <sup>28</sup> Aime Wapongti habuwa ngic-ngigac gocene yanguc locebawec.

Molic-molic salecebaicne locebawec.

Nga yengele lobeina siduc-mimi ngic locebawec.

Ailu yengele lobeina wewedu locebawec.

Inguc locebame, gocene yenge pasi damuineholec baningte locebawec.

Nga ngic-ngigac gocene yenge huc bole haicine monic-monnic baningte Asudi yogolec kwele-madicte tapili yelewec.

Ailu aling gocene yenge ngic-ngigac baficebaningte locebawec.

Ailu ngic-ngigac gocene yenge wiyac damongkeningte locebawec.

Nga gocene yenge yowa haicine monic-monnic miningte locebawec.

<sup>29</sup> Aime nongileng sasawadi salecebaicne aigabeleng, me? Me sasawadi siduc-mimi ngic aigabeleng, me? Yogo miyac. Ailu sasawadi wewedu aigabeleng, me? Me sasawadi pasi damuineholec banangte ngage-ngage balu gagabeleng, me? <sup>30</sup> Ailu huc bole haicine monic-monnic banangte Asudi yogolec kwele-madicte tapili nongileng sasawa nolewec, me? Nga sasawadi

yowa gocne haicine monic-monie migabeleng, me? Ailu sasawadi yowa yogolec fungine bafaliyegabeleng, me? Yogo miyac.

<sup>31</sup> Aime ngenge Asudi kwele-madicte wiyc nolecaigac, yogolec madic-neinebenang banogale sanangkelu balu gadabiyeng. Ailu yefe monic taock-elu edalicngbedacte, yogodi kwele-madicte wiyc sasawa ewalicebagac.

## 13

### *Ago bacebalu yengele kwelenginengti angacka aiyeledabieng*

<sup>1</sup> Na Asule tapiliwa ngic-ngigac nga angelo yengele yowa haicine monic-monie midacte, ailu ngic-ngigac yengele kwelenedi mi angac-nudaictewa, yogowabac na gonggong ingucne aukwedacte, me tambaling ingucne ucine sugu ailu gadacte. <sup>2</sup> Ailu siduc-mimile yowa milu gadactewa, me ngage-ngage sangkeicne sasawa ngage-motodacte. Ailu ngage-ngageneholec gadacte, me kupic baickenogale ngage-ngagesingne yogolecsoc faneledaicte. Ailu ngic-ngigac yengele kwelenedi mi angac-nudaictewabac, na ngic omane aidacte. <sup>3</sup> Nga hiye-monengne sasawa botoc balu ngic-ngigac yeledactewa, me socne bafel<sup>\*</sup> homacka lodacte, ailu ngic-  
ngigac yengele kwelenedi mi angacnudaictewabac, na noine monic mi bafuwadacte, miyac.

### *Kweledi ngic- ngigac yengele angac ngagelu gagac, yogodi wiyc sasawa ewalicebagac*

<sup>4</sup> Kweledi angac ngageyelelu gaga, aibaba yogo monicti agoine monicte mi takickegac, yela aibaba madicne aigac. Ailu ye hasowacine mikac galu yeicne aibabainele yowa bocyc mi migac. Ailu soc bafe mi aigac. <sup>5</sup> Ye pepecne mi ailu yeicne sugu mi ngagesicnagugac. Ye aalic biyac mi ngagelu sowacnele ameine ngage-  
ngageina mi logac. <sup>6</sup> Ye aibaba sowacnele ailu mi beliyegac, miyac. Ye aibaba noinelebac beliyegac. <sup>7</sup> Ailu ye wiyc sasawa mibasanang aiyelegac. Ailu wiyc sasawale Wapong ngagesingkegac. Ailu wiyc sasawa fikenale ngagesilu wangec gagac, yogolec tapili-wawa mi aigac. Ailu wiyc haicine monic-monie fikecnome sanangne domagac.

<sup>8</sup> Kweledi angac ngageyelelu gaga, yogo nalic mi miyac aidacte. Wapongte siduc-yowanonggeng yogobac miyac aidacte. Ailu yowa monicka yefe mimi yogo miyac aidacte. Nga ngage-  
ngagenonggeng gbolongne, yogo inguchac miyac aiyackedaict. <sup>9</sup> Ngage-  
ngagenonggeng ailu Wapongte siduc-yowanonggeng yogo wiyc nebocene sugu noleicne. <sup>10</sup> Nga wiyc bucbuchac fagac, yogo Wapongtaci kwesimebac wiyc nebocene noleicne, yogo miyac aiyackedaict. <sup>11</sup> Na madec galu madec kpisicnele aibaba yogolec silicka ngagesilu yowa milu gaiba. Ailu madec kpisicnele silicka ngage-  
ngagene wosaelu alingkelu gaiba. Gacgu ngic aibe adu-madec gaga baickeme, sug-  
ucne aibabale yefewa gacaigabac.

<sup>12</sup> Aime yanguctihac wiyc nganicaigabeleng, yogo wiyc kaguwa ingucnedi hedickeme nganicaigabeleng. Lobewa gacgu yegena haicti haic nganidabelengte. Yanguctihac wiyc nebocene ngagecaigabac. Wapongti bucbuchac ngagenelewec, na yogo ingucne hac dameng iwa, wiyc bucbuchac ngageyackedacte. <sup>13</sup> Aime wiyc habackangti faginowagac,

yogo ngage-ngagesing, nga wangeckelu gaga, ailu kwele-angacka gaga. Aime wiycab habackang yengelacni wiycab moniyangti sugu feicne aigac, yogo kweledi angac ngagelu aiyelelu gaga.

## 14

### *Wapongte siduc-yowa nga yowa monicka yefe mimi*

<sup>1</sup> Ngenge kweledi angac ngageyelelu gagale gagasac bole badabiyeng. Ailu ngenge Asule bole banogale angac sugucnebac ngagedaing. Ailu ngenge Wapongte siduc-yowa banogale ngagebong feicnebenang aidaic. <sup>2</sup> Monic ye yowa monicka yefe migac, ye ngic nongilengkolec yowa mi migac, miyac. Ye Asudi yowa sangkeicne bafickeme Wapong edome, monicti yogo nalic mi ngage-motodaite. <sup>3</sup> Aime monic ye Wapongte siduc-yowa migac, ye ngic-nigac kwelengineng yeuckelu basanangebalu bakolocebame domagaing. <sup>4</sup> Aime ngic yowa monicka yefe migac, ye yeicne baba-sanang ainagugac. Nga Wapongte siduc-yowa migac, yedibac Yesule habu basanangebagac. <sup>5</sup> Aime ngenge sasawadi yowa monicka yefe mininge ngagebe madickebac. Ailu ngenge siduc-yowa mininge angacne sugucnebac aigac. Monicti yowa monicka yefe milu yowaine mi bafaliyedactewa, ye ngic siduc-yowa migac, yele wamicne aigac. Nga Yesule habu basanangebanogale, ibac ye yowa monicka yefe bafaliyedaic.

<sup>6</sup> Ngic hae-gbaocne, ngengela fulu yowa sangkeicne mibe yegengkedec, me yowa gbolongne gocne edocngebabada, me siduc-yowa midaba, me wewedu-yowa gocne midaba midec, yogodi baficngebadec. Na ngengela fulu yowa monicka yefe sugu midaba midec, yogo babaficne mikac aidec.

<sup>7</sup> Yogo inguchac noine yanguc aigac, kpeng nga gita yeke gaganginec mikac, ailu yeke sifu ucngineckolec. Ga kpeng yogo moc kosa fitolu gita weng ucine silicine madicne mi fikedaictewa, ngic-nigic yenge kpeng me gita yoglec hiinele kpungkedaingte. <sup>8</sup> Ailu hudu-babale kpeng yogodi ucine madicne mi fikeme, ngic yenge huddle nalic efekedaingte, me? <sup>9</sup> Ga inguchac yanguc ngagedamec, kwelegona yowa dondonne midamectewa, ngic-nigic yenge yowagone nalic ngage-motodaingte. Ga kosa nga hendolongkolec midamectewa, yenge yowagone ngage-motodaingte, me? Yenge kpungkebong, yowagone sawawa moc midamecte.

<sup>10</sup> Yowa haicne monic-monic himontowa yagowa fagac. Nga yowa monic fungine mikac, yogo mi fagac. <sup>11</sup> Na ngic monicte yowa silicine madicne mi ngage-motodactewa, yedi yowa mime yele haicka kwilic-ngic aigabac. Aime ye inguchac nale haicka kwilic-ngic aigac. <sup>12</sup> Ngenge Asule bole banogale bocyac aingelegecaigacte, ngenge Asule boledi Yesule habu basanangebacaigac, yogo banogale inguchac mamang hidabiyyeng.

<sup>13</sup> Ilec monic ye yowa monicka yefe migac, ye yowa yogo nalic bafaliyenogale Wapong milockedai. <sup>14</sup> Na yowa monicka yefe milockegabacka, asune ye milockegac, yogo noine. Nga ngage-ngagenedibac noine monic mi bafuwagac.

### *Yowa monicka yefe alingkolec minoga*

<sup>15</sup> Inguc aime wenuc ainoga? O, na asunedi mitengkedacte, ailu ngage-ngagenedi inguchac mitengkedacte. Na asunedi mimiteng gee holedacte, ailu ngage-ngagenedi inguchac mimiteng gee holedacte. <sup>16</sup> Aime asugone sugudi yowa monicka yefe Wapong mitengkegacka ngicbenang yenge gale

mimiteng taockelu, "yogo noine" minogale kpungkegaing. Yenge yowag-one monic mi ngage-motogaing. <sup>17</sup> Aime gageuctihac Wapong mitengkeng yogo madickegac. Ailu yowagonedibac ngic agofocgone mi basanange-bagac. <sup>18</sup> Na yowa monicka yefe bocyacbenang milu ewalicnggebabac. Ilec Wapong kwele-madic micnogabac. <sup>19</sup> Naneicne angacte migabac, ailu Yesule habu yengele hewacka weduyelebele yowane 5 yegena midacte, yogodi yowane monicka yefe 10 taosen ewaligac, yogo ngagegabac. <sup>20</sup> Ngic hae-gbafocne, ngenge ngage-ngagenginengti adu-madec ingucne mi gad-abiyeng. Ngenge sisipilic aibaba gegecne ingucne gadabiyeng. Nga ngage-nagenginang sugucne ingucne gadabiyeng.

### *Wapongte siduc-yowa nga yowa monicka yefe mimile bole*

<sup>21</sup> Yefe-yowawa yowa yanguc kwelengkeicne fagac, "Sugucnedi yanguc migac, Kwllic ngic-ngigac yowangineng silicine monic micaigaing, nale yowa yengele micka lobe Israel ngic-ngigac yengela midaingte. Aime yefe yowawa ngic-ngigac yenge nale yowale hedec mi kvedaingte." (*Yes 28:11-12; Yef 28:49*)

<sup>22</sup> Yowa monicka yefe yowawa Wapongte maa monic, ailu ngic-ngigac ngage-nagesing mikac gagaing, yengele ailu loicne fagac. Ngic-ngigac ngage-nagesingkolec gagaing, yengele ailu mi loicne fagac. Aime Wapongte siduc-yowa yogo ngic-ngigac ngage-nagesingkolec yengi ainingte loicne fagac. Yogo ngic-ngigac mi ngagesingkegaing, yengele miyac. <sup>23</sup> Ilec ailu Yesule habu sasawa kpaducke ngiyelu yowa monicka yefe mibong, gocne ngage-ngage-motocngineng mikac me gocne ngage-nagesingngineng mikacti ngengele hewacka ofelu yogo nganicngebaingte. Nganicngebalu yanguc midaingte, "Ngenge kwelengineng sifuwegac." Yenge inguc midaingte, me? <sup>24</sup> Ailu ngenge sasawadi Wapongte siduc-yowa milu ngyeebongka monic ngage-ngage-motocine mikac, me monic ngage-nagesing mikacti ngengela ofedaicte. Ofeme yowanginengti ye kweleina bame yeicne bikicine nganime yogodi yowawa lodaicte. <sup>25</sup> Lome ye kwele ngage-ngageina ngage-ngage sangkelu fagac, yogo dondonne yegengkedaicte. Inguc fikelu yegengkeme, ye wafalu haic-mesuine sangkelu Wapong afeelu yanguc edodaicte, "Foinac, Waponti ngengele hewacka gagac!"

### *Alingka mitengkenoga*

<sup>26</sup> Ngic hae-gbafocne, yanguc nalic ainoga. Ngenge kpaduckelu ngyedaingte, dameng iwa yanguc aidaing. Monicti Wapongte gee monic holedaic. Nga monicti yowa edocngebalu wedungeledaic. Ailu monicti yowa sangkeicne mime yegengkedaic. Nga monicti yowa monicka yefe midaic, aime monicti yogo bafaliyedaic. Ngenge yowa sasawa yogo Yesule habu basanangebanogale midaing. <sup>27</sup> Ailu gocnedi yowa monicka yefe minogale, yaeckang me habackangti sugu midaing. Ailu yogo alingka mibong, monicti yowa fungine yogo bafaliyedaic. <sup>28</sup> Aime yowa monicka yefe yogolec bafaliye-bafaliye ngic monic iwa mi ngyedaictewa, yowa monicka yefe mimi ngic yogo, ye tutumangnginang waicke ngyelu yeicne kweleina sugu Wapongkolec mingagec aidaic.

<sup>29</sup> Aime Wapongte siduc-mimi ngic yaeckang me habackangti sugu siduc-yowa midaing. Inguc mibong gocne yenge ngengele siduc-yowa ngagelu wosaedaing. <sup>30</sup> Aime monicti molickelu yowa mime, yowa sangkeicne

monicti ngic waickelu ngiyegac yela kwsidaictewa, ngic molickelu yowa migac, ye waickeme agoinedi midaic. <sup>31</sup> Wapongte siduc-yowa ngenge sasawadi nalic midaing. Ailu minogale milu, moniyang moniyangti alingka yowa yogo midaing. Inguc aibong ngic-nigigac sasawa yenge ngage-ngage badaingte. Ailu kwelengineng yeuckelu basanangkedaingte. <sup>32</sup> Siduc-mimi ngicte ngage-ngage yogo asuine damongkeme micaigac. <sup>33</sup> Wapong ye wiycak kosainele Wapong miyac, ye boleine alingka bame kwele-mogung bafuwacaigaing.

Yesule habu sasawa Wapongte bingec, yoglec kwelina <sup>34</sup> ngigac yenge yowa mikac waickelu ngiyecaigaing, silicine yogo ingucnehae ngengela aidabiyeng. Ngigac yenge yowa mikac waicke ngiyelu, Yesule habu yengele ngage-ngage balaibedabiyeng. Yefe-yowadi yoglec inguc migac. <sup>35</sup> Yenge wiycak monicte fungine ngagenogale aiyeleme, macnginang hikelu ngawefocngineng uwayeledabiyeng. Ngigac monicti Yesule habu yengele hewacka yowa midaicte, yogo aibaba gameineholec.

<sup>36</sup> Wapongte yowa yogo ngengelacni molickelu fikewec, me? Me yogo ngengela sugu fagac, me? Yogo miyac! <sup>37</sup> Ngengelacni monicti yeicne yanguc ngagegac, "Na siduc-mimi ngic, ailu na Asule ngage-ngageholec gagabac." Ye inguc ngagelu nani hibi kwelengkecaigabac, yogo ngani-ngagec ailu yogo Sugucnele ung-yowa, inguc biyac ngage-motodaic. <sup>38</sup> Aime monic ye yowa yago wafelu hegileme ngenge ye inguchac hegiledaing.

<sup>39</sup> Ilec ngic hae-gbafocne, ngenge Wapongte siduc-yowa miningte bocyac aingeledaic. Ailu yowa monicka yefe mimi yogo mi hedickedaing. <sup>40</sup> Aime ngenge wiycak sasawa alingka nga silicina aidabiyeng.

## 15

### *Kristo ye homalu fangkewec*

<sup>1</sup> Ngic hae-gbafocne, na Siduc Madicne mibe yegengkengemele ngenge yogo ngagelu ngagepangkelu sanangne baibong gagaing. Ailu yogo hat-acmac kwelengineng hole-gboliyengelenogale ngagesigabac. <sup>2</sup> Aime yowa mibe yegengkengemele ngagelu ngage-ngagesingngineng sanangne iwa fadaictewa, yogodi bikicte ameine bame wasecne aigaing. Ailu ngenge yogo hegiledaingtewa, ngage-ngagesingngineng yogo boleine mikac aidaicte. <sup>3</sup> Na molickelu Sugucnelacni yowa feicne yanguc balu ngeleiba, Kristodi nongileng bikicnonggengte ailu homawec. Wapongte hibiwa biyachac kwelengkeicne fawec, yogo fikewec. <sup>4</sup> Homame longkebong hadeng habackang aime, Wapongti bagboliyeme fangkewec. Wapongte hibiwa biyachac kwelengkeicne fawec, yogo fikewec. <sup>5</sup> Ailu ye Pita<sup>\*</sup> fikecnolu lobeina mic-tengtengfocine 12 fikeyelewec.

<sup>6</sup> Yoglec lobeina ngic hae-gbafocnonggeng dzalengineng 500 ewali-gac, yenge momoc ngiyeebongka ye yengele haicka fikeme nganiibong. Aime yengelacni gocine biyachac homaibong. Nga bocyacti yanguctihac gagainghac. <sup>7</sup> Ye yoglec lobeina Yakobos fikecnolu salecebaicne sasawa fikeyelewec. <sup>8</sup> Ailu yoglec lobeina na fikeneleme motowec. Sabac monicti fike-fike damengine faemewa hewacina fikedaicte, na silicine ingucne aigacgube yedi sifu fikenelewec. <sup>9</sup> Aime na Wapongte habu weyebic aiyelelu gaibale ailu, na salecebaicne aiailesoc miyac. Ailu nabac salecebaicne

<sup>14:34:</sup> 1Kor 11:3; 1Tim 2:12; Fike 3:16

<sup>14:37:</sup> 1Yoa 4:6

<sup>15:3:</sup> Yes 53:5-12

<sup>15:4:</sup> Mat

12:40; Sale 2:24-32      \* <sup>15:5:</sup> Grik yowawa Pita wacine monic Kefas fagac.      <sup>15:5:</sup> Luk 24:34; Mat 28:16-17      <sup>15:7:</sup> Luk 24:50      <sup>15:8:</sup> Sale 9:3-6

yengele wamicne ailu gagabac. <sup>10</sup> Aime Wapongte kwele-madicte ailu ye wenucka locnume na ingucnedi yakumac gagabac. Gaebewa kwele-madicine moc mi fawec. Na yenge sasawa ewalicebalu bole bocayac baiba. Aime yogo neicne tapiliwa miyac, Wapongte kwele-madicti naholec fawec, yogodi bole yogo bawec. <sup>11</sup> Ilec ailu na me yenge, nonge yogo hocne edocngebalu wedungelecaigabeleng. Aime ngenge yogo balaibelu ngagesingkeibong.

### *Kristo fangkewec, yogo fungineholec*

<sup>12</sup> Wapongti Kristo bagboliyeme homackacni fangkewec gagac, yogo edocngebalu wedungelecaigabeleng. Inguc aime ngengelacni gocnedibac omale yanguc micaigainga, "Homackacni gboliyelu fangke-fangke yogo mi fagac." <sup>13</sup> Homackacni gboliyelu fangke-fangke monic mi fadecka midec, Kristo ye inguchac homackacni nalic mi gboliyelu fangkedec. <sup>14</sup> Aime Wapongti Kristo mi bagboliyeme fangkedecka midec, nonge yowa edocngebalu wedungelecaigabeleng, yogo boleine mikac aidec. Aime ngengele ngagesingngineng yogo inguchac boleine mikac aidec. <sup>15</sup> Homackacni gboliyelu fangke-fangke mi fadecka midec, Wapongti Kristo mi bagboliyedec. Aime "Wapongti Kristo bagboliywec," yogo kwesacka mibeng sanangkedecka, ibac Wapong wideckelu kwesac-ngic aidabeng.

<sup>16</sup> Na hatacmac mibe, homackacni gboliyelu fangke-fangke mi fadecka midec, Kristo ye homackacni nalic mi gboliyelu fangkedec. <sup>17</sup> Aime Kristodi homackacni mi gboliyelu fangkedecka midec, ngengele ngagesing yogo boleine mikac aidec, aime ngenge bikicnginengkolec gadabong. <sup>18</sup> Aime ngic-ngigac gocne yenge Kristoholec wetacke galu biyachac homaibong, yenge biyac sangkelu miyac aidabong. <sup>19</sup> Aime nongileng yakumac galu Kristole ailu himongte gaga sugu moc ngagesilu wangec galu gaganang mi badabengka, ngic-ngigac yenge nongileng kwele-sowac nalic ngagedabongka. Aime nongileng kwele-sowacti ngic-ngigac sasawa yenge ewalicebalu gadabeng.

### *Kristole ailu gboliyenoga*

<sup>20</sup> Foinac, Kristo ye homackacni gboliyelu fangkewec gagac. Ye homackacni gboliyelu fangke-fangke yogolec noine ngic-ngigac homaicne yenge molickeyelou homackacni gboliyelu fangkewec. <sup>21</sup> Ngic moniyangti homacte yefe bawecte homac fikewec. Silicine ingucnehab ngic moniyangti yefe bame homaicne yenge homackacni gboliyelu fangkedaingte. <sup>22</sup> Ngic-ngigac sasawadi Adamte ailu homaibong, yenge sasawadi ingucnehab Kristole ailu gboliyedaingte. <sup>23</sup> Aime ngic-ngigac nongileng filesoc filesoc alingka fangkedabelengte. Yogolec noine Kristodi molickelu fangkewec. Ailu ye gacgu hatacmac kwesidaicte, dameng iwa yele alingfocene yenge gboliyelu fangkedaingte. <sup>24</sup> Inguc fikeemewa dameng motodaicte. Ye dameng iwa, gamang nga wiyac sasawa bole-yowa tapilinginengkolec himongka nga sawawa gagaing, yenge baicebame miyac aibong, nganidamongngine Wapong Mamacte molewa lodaicte. <sup>25</sup> Sugucne ye ngictau gaemewa Wapongti ngabafocine sasawa yele higeinele bagewa locebadaic.

<sup>26</sup> Inguc locebalu dameng moto-motoinele ngaba homac, yogo baickeme miyac aidaicte. <sup>27</sup> Aime

"Wapongti wiyac sasawa yele higeinele bagewa loyackewec." (Mige 8:6)

Ailu "wiyac sasawa" yogo yele higeinele bagewa lowec, yogo mime nongileng yanguc ngage-motonang, Wapong ye yeicne Kristole bagewa mi gagac.<sup>28</sup> Yedi wiyc sasawa Madecinele bagewa lome, Madecti Mamacte bagewa lonagulu gadaicte. Aime Mamacti wiyc sasawa Madecinele bagewa loyackewec. Ilec ailu Wapong yeuctihac galu wiyc sasawa yengele hodocngineng aidaicte.

### *Sanangkelu ganoga*

<sup>29</sup> Gocne yenge ngic-nigigac biyac homaicne ngagesicebalu baficebanogale yengele mac balu misa lowacaigaing. Homackacni gboliyelu fangke-fangke monic mi fadecka midec, yenge pasi yogo omale aicaigaing?<sup>30</sup> Bolenonggengte ailu ngic yenge damengsoc wecnubanogale aicaigaing. Aime homackacni gboliyelu fangke-fangke yogo mi fadecka midec, bolenonggeng omale umacineholec balu gagabeleng?<sup>31</sup> Sugucnenonggeng Kristo Yesule ailu hadengsoc ngagebe wehomacnunogale ainelecaigaing, yogo noine. Ailu Kristole ailu ngic hae-gbafocne ngengele wac bafelu micaigabac, yogo noine.<sup>32</sup> Na socte gagawa Efesas taonka ngic kate-sic ingucne yengeholec wenaguibeng, iwa babaficine wenucka bafuwadacka? Homackacni gboliyelu fangke-fangke yogo mi fadaictewa, socte angac balaibedabelengka. Yoglec yanguc kwelengkeicne fagac, "Saeme homanangte ailu yakumac noba-nosing nga waing misa nodabeleng."<sup>33</sup>

*(Yes 22:13)*

<sup>33</sup> Ngic yengi kwesacngebadaingkale, ngenge ngani-motolu gadabiyeng. Sowacne baba ngic ngengeholec gagaingka, yogodi aibabangineng madicne basowaledaingte.<sup>34</sup> Ngenge kwele-sifuc ngage-ngage hegilelu yefe donne balaibelu bikic monic mi bafuwadabiyeng. Ngengelacni gocnedi Wapong mi ngagegaing, yogo gameineholec aime edocngebagabac.

### *Wiyac gbolicnedi ofedaicte*

<sup>35</sup> Monicti yanguc uwadaicte mecn, "Homaicne yenge wenuc gboliyelu fangkedaingte? Ailu soc weningucne balu fangkedaingte?"

<sup>36</sup> Ga kwele-sifuc ngicbenang. Wiyc kelengkeicne mi duwecaic, yogo mi kwodulu ofedaicte, miyac. Wasec homaciecne duweicne yogodi kwacine kwodulu ofelu gagaineholec aidaicte.<sup>37</sup> Ailu wiyc duwecaic, yogo nosing noine mi duwecaic. Yogo wit wasec me wasec gocne duwecaic.

<sup>38</sup> Aime Wapongti angacine balaibelu wasec moniyang moniyangte silicina balaibelu soc ngani-nganiningineng haicne monic-monic bacaigac.<sup>39</sup> Soc sasawadi ngani-nganiine moniyang mi aigaing, miyac. Ngic nongileng socnonggeng yogo ngani-nganiine monic, nga sic sasawa yengele soc yogo ngani-nganiine monic. Ailu nango yengele soc yogo ngani-nganiine monic, nga kiwec-sic yengele soc yogo ngani-nganiine monic.<sup>40</sup> Aime honocmenkte soc nga himongte soc, yeke ngani-nganininginec monic-monic aigaic. Honocmenkte soc yogo yeicnac ngani-nganiine madicne, nga himongte soc yogo yeicnac ngani-nganiine madicne monic. Aime asocmeng yengele angoc madicne yogo ngani-nganiine monic. Ailu asocmeng yengele angoc madicne yogo ngani-nganiningineng monic aigaing. Ailu asocmeng yengele angocngineng yogo ngani-nganiine monic filesoc aigaing.

<sup>42</sup> Homackacni gboliyelu fangke-fangke, yoglec silicina inguc hocne fagac. Ngic socngineng himongka locaigabeleng, yogo peleckelu dangkelu

miyac aidaicte. Aime Wapongti yogo hatacmac bagboliyeaigac, yogodibac fafa-sanang faginowagac.<sup>43</sup> Soc ye howacine ailu hoine fitome himongka longkegabeleng, yogodi silicine madicne ailu gboliyelu fangkecaigac. Wiyac tapili mikac aime himongka longkeicne, yogodi tapiliholec gboliyelu fangkecaigac.<sup>44</sup> Ngic socngineng longkecaigabeleng, yogo himongte soc. Aime Wapongti socngineng bagboliyeaigac, yogo honocmengte soc. Himongte soc fagacka, honocmengte soc ye inguchac fagac.<sup>45</sup> Yoglec yowa yanguc kwelengkeicne fagac,

*"Adam molic-molic, ye kwele-ilucineholec ailu gagaineholec fikewec."* (*Fike 2:7*)

Fikeme Adam monic lobeina<sup>†</sup> fikewec, yedibac asu gagaineholec nolewec.<sup>46</sup> Honocmengte soc ye molickelu mi kwesiwec, miyac. Himongte soc yogodibac molickelu kwesimebac, honocmengte soc ye lobeina kwesiwec.<sup>47</sup> Ngic molickelu kwesiwec, ye himong lubedi baicnele himongkacni fikewec. Aime yele lobewa kwesiwec, yebac honocmengkacni kwesiwec.<sup>48</sup> Ngic himong lubedi baicnele, himongte ngic-ngigac ye ingucne hac gagaing. Aime ngic honocmengkacni kwesiwec, honocmengte ngic-ngigac ye ingucne hac gagaing.<sup>49</sup> Nongileng himong lubedi ngic baicne yele silic baibeng, silicine ingucne hac honocmengkacni ngic yele silic balu gadabengte.

### *Honocmengte silic ailu honocmengka ganoga*

<sup>50</sup> Ngic hae-gbafocne, soc sac-biuckolecti Wapongte ngani-damongte mole-damoc nalic mi badaicte, miyac. Wiyac peleckelu dangkedaicte, yogodi wiyan fafa-sanang faginowagacte mole-damoc inguchac nalic mi badaicte, inguc hocne edocngebabac.<sup>51</sup> Yowa monic sangke-sangke fagac, yogo mibe yegengkeme ngagening. Nongilangkocni gocne yenge mi homae-bongkahac, Sugucnedi nongileng ngic-ngigac homaicne yengeholec momochac bafaliyecubame silicine monic aiyackedabelengte.<sup>52</sup> I yangucte, dameng moto-motoina kpeng monicti hiyame wiyan sasawa biyachenang pilatac bacaiagac, me donge-balang baducaigabeleng, silicine yogo ingucne fikedaicte. Yedi ngic-ngigac biyachac homaibong, yenge bagboliyecebame yenge fangkelu gaga dongke-dongkeine mikac badaingte. Inguc fikeme nongileng inguchac bafaliyecubame silic monic aidabelengte.<sup>53</sup> Wapongti wiyan howacine ailu homaicne ye gaga dongke-dongkeine mikac ngakpi ingucne holecnodaic.<sup>54</sup> Aime Wapongti wiyan howacine nga homaicne gaga dongke-dongkeine mikac ngakpi ingucne holecnodaicte. Yowa yago Wapongte hibiwa kwelengkeicne fagac, yogo noine fikedaicte,  
"Gagadi gbelong ailu homac gbokeme miyac aiwec."<sup>55</sup> (*Yes 25:8*)

<sup>55</sup> "Homac, ga gbelong aidamekte, me? Yogo miyac! Sangalagone yogo weni?" (*Hos 13:14*)

### *Yesuholec wetackelu gbelong aidabelengte*

<sup>56</sup> Homacte sangala yogo bikic. Aime Wapongte yefe-yowa ngagelu mi balaibegabiengtewa, bikic yogo tapili lacnogac.<sup>57</sup> Aimebac Wapongti yefe bafuwanooleme nongileng Sugucnenonggeng Yesu Kristole ailu gbelong aicaigabeleng. Ilec nongileng Wapong kwele-madic micnogabeleng.<sup>58</sup> Ngic hae-gbafocne kwelenedi ngengele angac ngagegabac, ngenge Sugucnebole bacaigaing, yogo noineholec aicaigac, ngenge yogo ngagegaing. Ilec

ngenge mi tulickedabiyeng, ngenge damengsoc sanangne domalu Sugunele bole basuguledabiyeng.

## 16

### *Wapongte bingec yengele babafic*

<sup>1</sup> Wapongte bingec Yerusalem gagaing, yengele ailu hiye-moneng yanguctihac kpaduckegabeleng, yogolec yowa yanguc mibe, na Galata habu yowa edocebalu weduyeleiba, ngenge yogohac aidaing. <sup>2</sup> Ngenge Sondasoc monengngineng filesoc filesoc bacaiangaing, yogowacni tofaine heuckelu macngi-nang lobong ngyedaaic. Inguc aibong na fudacte, dameng iwa kpakpaducte boletowa mi banoga. <sup>3</sup> Ngenge inguchac ngic gocne bawosaecebaadaing. Aime nani fulu hibi kwelengkelu kwele-madicte moneng momoc yeleluselecebabe Yerusalem iwa hikedaintge. <sup>4</sup> Aime na ngagebe nalic yengeholec hikenogale silic aidaictewa, na momochac hikedacte.

### *Sugucnedi ngageme nani fudacte me Timotidi fudaicte*

<sup>5</sup> Na Masedonia yefe hikenogale ngagelu Masedonia falockelubac ngen-gela fudacte. <sup>6</sup> Fulu ngengeholec ngyibe motome, baficnubong nebocka me nebocka hikedacte. Aime ngengeholec dameng dalicne gadacte mecne. Entacka gadacte ingucne, ibac tilo-gbelong damengka ngengeholec gadacte. <sup>7</sup> Na yanguctihac ngengela yefe moc falockelu hikenogale mi ainelegac. Sugucnedi ngageneledaictewa, ingucne, iwa fulu dameng dalicne ngenge-holec ganogale ngagesigabac. <sup>8</sup> Ailu Efesas himongka gabe Pentikos dameng motome hatacmac hefaliyelu hikedacte. <sup>9</sup> Yanguctihac bole sugucnebenang noineholec banogale yefe fikelu fagac. Aime yanguctihac ngabafocne bo-cyac gagaing.

<sup>10</sup> Timoti ye ngengela fudaictewa, ngengileng hewacka lobong galu hangoc mi aidaic. Ye na ingucnehab Sugucnele bole balu gagac. <sup>11</sup> Ngengelacni monicti ye lobe mi holecnodaic. Ye hatacmac nala hefaliyekwesinale mime, ngenge yefeine bafuwalu kwele-mogungka salebong kwesidaic. Na ye nga ngic hae-gbafocongngeng gocne yengele wangec gagabac.

<sup>12</sup> Ngic hae-gbanonggeng Apolos funale nani bocyac kpafengkelu yanguc ngageiba, yedi ngic hae-gba yengeholec ngengela fudaicte. Aime ye biyac funale mi aicnowec. Ye galu sawaine monic fikeme nalic fudaicte, Yele inguc migabac.

### *Mibasanang yowa*

<sup>13</sup> Ngenge deboc-gboli galu damongnagulu efeckelu ngagesingkelu sanangne domadaing. Ngenge hangoc mikac galu sanangne gadabiyeng.

<sup>14</sup> Ailu ngenge wiycasasawa ainogale kweledi angac ngagenagulu aidabiyeng.

<sup>15</sup> Stefanas nga golowacfocene yenge Akaia himongka\* molickelu bole yogolec noine kwele-hefaliyec aiibong. Yenge kwele-hefaliyec ailu molickelu Wapongte bingec bafacebabong, ngenge ngic-ngigac yogo ngagecebaibong. Ngic hae-gbafocong, kpafengngebalu yanguc migabac, <sup>16</sup> Ngic-ngigac ingucne nga gocne yengeholec galu boletowa balu gacaigaing, ngenge yengele yowa

**16:1:** Rom 15:25-26; 2Kor 8:1-9    **16:5:** Sale 19:21    **16:6:** Rom 15:24    **16:9:** Sale 19:8-10;

2Kor 2:12    **16:10:** 1Kor 4:17    **16:11:** 1Tim 4:12    **16:12:** 1Kor 3:6    \* **16:15:** Akaia himong yogo Roma prowins monic, nga Korin taon, yogo Akaia himong yogolec kapital.

balaibedaing. <sup>17</sup> Stefanas nga Fotunatus ailu Akaikus, ngic yogo yengi ngengele ameine nala kwesiibongte ailu beliyegabac. <sup>18</sup> Ailu yenge nale asu nga ngengele asungineng momochac yeuckebong madickeibeng. Ilec ngengele ingucne yengele madicnengineng yogolec mibong yegengkedaic.

<sup>19</sup> Asia prowins kwelina Yesule habu gagaing, yenge wenac-madicngineng lobong ngengela fugac. Ailu Akwila nga Prisila, nga ngic-ngigac yekele macka Yesule habu kpaduckecaigaing, yenge Sugucnele wacka wenac-madicngineng lobong ngengela fugac. <sup>20</sup> Ailu ngic hae-gbafofnonggeng sasawadi wenac-madicngineng lobong ngengela fugac. Ngenge Wapongte bingec gagaingte aibabaine balaibelu molewa babac ainagulu<sup>†</sup> wenac-madic minagudaing.

<sup>21</sup> Na Poldi wenac-madic yowa yago neicne molenedi kwelengkebabac.<sup>‡</sup>  
<sup>22</sup> Monic ye Sugucnele kweleinedi mi angackedaictewa, ye Wapongte aalicte bagewa gadaic. O Sugucne, ga welec.

<sup>23</sup> Sugucnenonggeng Yesule kwele-madicti ngengeholec fadaic. <sup>24</sup> Ngic-ngigac Kristo Yesuholec wetackelu gagaing, nale kwele-angacti sasawa ngengela fadaic.

Yogo foinac.

---

**16:16:** 1Kor 1:16    **16:19:** Sale 18:2,18,26    <sup>†</sup> **16:20:** Polle damengka yenge molewa babac ainogale ngagelu bafaliyelu yanguc kwelengkewec, “muducnagudaing.”    <sup>‡</sup> **16:21:** Poldi hibi kwelengkenogale mime ngic monicti yele yowa ngagelu kwelengkelu gawec. Aime moto-motoine sugu yeuctihac kwelengkeme ngic-ngigac yenge ngagebong hibi yago noine Poldi kwelengkewec ingucne aiwec.    **16:22:** Gal 1:8-9

## Poldi Korin

### Habu Yengele Hibi Monic Hatacmac Kwelengkewec

#### *Mimi-yegeng yowa*

Korin yogo taon sugucne monic wacineholec fawec. Taon yogo himong monic wacine Akaia me Grik iwa fawec. Roma ngic-ngigac homacne nga Yuda ngic-ngigac gocne iwa gaibong. Ngic-ngigac bocyacti lec-welec ailu lanac-ganac ailu gaibong.

Molickelu Poldi Korin iwa Yesule Siduc Madicne mime yegengkeme ngicngigac gocne yenge Yesu ngagesingkeibong. Ngagesingkelu yoglec lobaina aibaba sowacne aiibongte, Poldi hibi sanangne monic kwelengkeyelelu saleme hikewec. Hikeme balu wafeibong. Ailu gocne kwelengineng hefaliyeibong. Nga gocne yenge yele yowale takicebawec. Ilec ailu hibi yago kwelengkeyelewec. Yesu homackacni gboliye fangkelu honocmengka feme hifa 27 ngama ingucne motome, hibi yago kwelengkewec.

Dameng gocna Poldi bole-moniyangfocene yengeholecte ngagelu "nongele" milu kwelengkewec. Nga dameng gocna yeicnele sugu ngagelu yowa ingucne "nongele" milu kwelengkewec. Ailu dameng gocna yeicne nga Korin ngic-ngigac yengeholecte ngagelu yowa ingucne "nongele" milu kwelengkewec.

#### *Yowa yago hibi nebocina fagac*

1:1–11 Wenac-madic yowa nga mimitengte yowa

1:12–2:13 Korin ngic-ngigac yengi aiibongte ailu Pol ye kwele-umackolec aiwec. Ailu sifu Poldi yengeholec kwele-moniyang ainogale ngagewec

2:14–6:10 Polle bole noine yogo yanguc, Wapongti dodoxic gblonicne ngicngigac yengeholec bawec, yogo mime yegengkewec

6:11–7:16 Poldi Korin ngic-ngigac yengele wenuc ngagewec, yogo mime yegengkewec

8:1–9:15 Ibu lonogale bamockedaing

10:1–12:21 Salecebaicne noine yenge bolengineng maaineholec bagaing, yogo mime yegengkewec

13:1–13 Poldi ngage-ngageine nga yowaine sanangne milu wenac-madicne edocebewec

#### *Molic-molic yowa*

<sup>1</sup> Na Pol, Wapongti bawosaecnume Kristo Yesule salecebaicne aigabac. Na nga ngic hae-gbanonggeng Timoti, noki hibi yago Wapongte habu Korin taonka gagabiyyeng, ailu Wapongte bingec sasawa Akaia prowin-swa gagaing, ngengela logablec. <sup>2</sup> Mamacnonggeng Wapong nga Sugucnenonggeng Yesu Kristo, yekele kwele-madic nga kwele-mogungtowadi ngengela fadaic.

#### *Wapong ye baba-sanangte fileine*

<sup>3</sup> Sugucnenonggeng Yesu Kristo yele Mamac Wapong, ye mimitengine-holec. Yedi Mamacnonggeng ailu ye nongileng kweleine sowalecaigac. Ailu ye Wapongnonggeng ailu baba-sanang sasawa, yoglec fileine. <sup>4</sup> Nonge umackolec gabeng yedi basanangnubacaigac. Yogodi basanangnubame nonge yele baba-sanang balu ngic-ngigac umacnginengkolec yengela hikelu

nalic basanangebadabelengte. <sup>5</sup> Kristo ye doic ngagewec, nonge doic silicine ingucne umacnehac ngagecaigabeleng. Ilec Wapongti Kristole ailu umacnehac basanangnubagac. <sup>6</sup> Doic ngagecaigabeleng, yefe iwa ngenge basananggebame wasecne aigaing. Ailu Wapongti basanangnubacaigac, yefe iwa ngenge basananggebababeleng. Inguc basanangnonggeng bagabeleng ngenge doicka sanangne domagaing. Ngengele doic nga nongele doic, yogo silicnginec moniyang aigaic. <sup>7</sup> Nongileng momochac doic ngagecaigabeleng, ingucne hac baba-sanangnonggeng bagabeleng. Yogo noine ngagepangkegabeleng.

### *Homacte alingkacni bamoctocnubawec*

<sup>8</sup> Ngic hae-gbafocne, Asia prowinswa nongela umac fikeme doic ngageibeng, ngenge yogolec mi kpungkeningte ngagelu edocngebagabeleng. Umactowadi tapilinonggeng welu bawame nalic mi domalu kwelenonggang yanguc ngageibeng, "Nonge homadabelengte hocne." <sup>9</sup> Aime Wapongti ngic-ngigac homackacni bagboliyecebacaigac, ye ngagepangkenangte yedi homacte alingkacni baicnubawec. Nonge tapili yogo andoine miyac, ye yogo edalicnubanale inguc aiwec. <sup>10</sup> Wiyac gocnedi wehomacnubanogale aibong yedi baicnubawec. Ailu ye lobewa gacgu ingucne hac homackacni baicnubadaicte. Ailu baicnubanowagac, nonge yele inguc ngagesingkelu wangec gagabeleng. <sup>11</sup> Ailu yogo fikenale ngenge mimilocka baficnubadabiyeng. Aime Wapongti kwele-madicte wiycaine noledaicte, yogo fikeme ngic-ngigac bocyacti yenge yogo nganilu nongele ngagelu Wapong mitengkedaingte.

### *Polle fungine*

<sup>12</sup> Ngic-ngigac yengele haicka nga ngengele haicka momochac Wapongte aibaba madicne nga gaga gbagbacne gagabeleng. Ailu kwele ngage-ngenagenonggeng mime yegengkeme himong yagowa inguc galu ngagebe feicne aicaigac. Aime kwele esecnele ngage-ngage-motoc balaibelu ngengele hewacka mi gagabeleng, miyac. Wapongte kwele-madicti yefe edalicnubame balaibelu gagabeleng. <sup>13-14</sup> Yowa kwelengkecaigabeleng, ngenge yogo sasawa wafelu ngage-motogaing. Wiyac kpungke-kpungkeine monic mi kwelengkecaigabeleng. Yanguctihac ngenge nebeyang ngagecnubabong. Aime na ngagebe lobewa ngengi bucbuchac ngage-motodaingte. I yangucte, ngenge nongele ailu nalic ngagesilu wacnonggeng bafegaing. Aime Suguchenononggeng Yesule damengka nongi ingucne hac ngengele ngagesilu wacngineng bafedabelengte.

### *Yesule habu Korin iwa mi yugucebawec*

<sup>15-16</sup> Na molickelu yogo ngagesilu yanguc ngageiba, na ngengela yefe fulu falockelu Masedonia prowinswa hikedacte. Hikelu hatacmac ngengela hefaliyu kwsidacte. Kwsibé ngengi baficnulu Yudeya himongka salecnudaingte. Na inguc aidactewa, molickelu ngengela fulu hatacmac hefaliyebe, ngengi nale ailu alecine yaeckang kwele-madic ngagedaingte. Aime sifu inguc mi aiba.

<sup>17</sup> Na yogo molickelu alingkelu lobeina moc kosa hegileiba, me? Ailu na kwele esecna yefe bolene damongkelu "oc, oc," milu hefaliyu "miyac, miyac," yogo dameng moniyangkahac micaigabac, me? Yogo miyac!

<sup>18</sup> Foinac, Wapong ye yowa mimiine balaibecaigac. Aime nonge inguc-  
nemac yowa edocngebacaigabeleng, iwa "oc" nga "miyac" nalic mi kpat-  
ulecepababelengte. <sup>19</sup> Ailu na nga Sailas ailu Timoti, nonge Yesu Kristo  
Wapong yeicne Madecine yogo edocngebalu wedungeleibeng, ye "oc" nga  
"miyac" mi kpatulewec, miyac. Yela "oc" yowa sugu fagac. <sup>20</sup> Wapongti  
wiyc nolenale mipangkewec, ye Madecinele ngagesilu "oc" miwec. Inguc  
mimic Madecinele ailu mimipangngine noine fikewec, ailu fikelu hikedaiete.  
Fikelu hikeme "yogo foinac" mitengkebeng Wapongti wac feicnehac bagac.  
<sup>21</sup> Wapong yeuc ngenge nga nonge momochac bawosaecnubalu Kristola  
wetacnubame domagabeleng. <sup>22</sup> I yangukte, yele ainangte Tili Asu kwe-  
lenoggang lowec. Aime yogodi Wapongte maa aigac.

<sup>23</sup> Aime Korin taonka mi fuiba, yoglec fungine yanguc, na ngengele  
hewacka yowa sanangnehac midackale ailu, hegilelu mi fuiba. Yowane  
yogo Wapong yeuctihac widecnubaigac. Na kwesac aigabacka wecnudaic.  
<sup>24</sup> Aime ngenge wenuc ngagesingkegaing, yogo mi milu yoingngebalu gaga-  
beleng, miyac. Ngenge Sugucne ngagesingkelu sanangne domalu gagaing.  
Inguc domalu belyeningte ngenge nga nonge momochac bole balu gagabe-  
leng.

## 2

<sup>1</sup> Ilec ngage-ngagenedi yanguc ngagesigabac, na hatacmac kwele-umac  
bafuwangeledackale ailu, mi fudacte. <sup>2</sup> Na molickelu kwele-umac ba-  
fuwangeledactewa, ngengelacni madi belic-belic bafuwaneledaite? Kwele-  
umackolec ngengi sugu belic-belic bafuwaneledaingte. <sup>3</sup> Aime ngengela  
fube gocne ngengi belic-belic bafuwanelecaigaing, yoglec ngagebe madick-  
egac. Ngenge kwele-umac bafuwangeledackale ailu, hibi monic kwe-  
lengkengeleiba. Na ngengele yanguc ngage-benangkegabac, belic-belic  
nala fadaictewa, ngenge sasawadi belyedaingte. <sup>4</sup> Na kwelenedi ngengele  
aineleme kwele-umac sugucne balu hiyalu hibingineng kwelengkengeleiba,  
yogodi umac ngelenogale mi kwelengkeiba, miyac. Na kwelenedi ngengele  
homacnehac angacnugac, yogo ngageningte hibi yogo kwelengkeiba.

### *Monicte bikic hegilenoga*

<sup>5</sup> Ngic kwele-umac bafuwawec, ye kwele-umac na sugu mi  
bafuwanelewec, miyac. Ye ngenge sasawadi kwele-umac bafuwangelewiec.  
Yogolec bocyac mi midacte, yogo efecnemac migabac. <sup>6</sup> Aime ngenge  
bocyacti ngic yogo bikicinele ailu mibating biyac aicnoibong, yogo sugu  
andoine. Aime yanguctihac ingucne hatacmac mi aicnodabieng. <sup>7</sup> Ye  
kwele-umacine sugucnebenang yogoholec galu umacti baumaledaickale,  
ngenge bikicine hegilelu mibasanang aicnodabieng. <sup>8</sup> Inguc ailu  
kwele-angacngineng edalilu basanangkedabieng, yogo sanangne milu  
edocngebagabac. <sup>9</sup> Ngenge sasawadi yowane balaibecaigaing me miyac,  
yogo ngagenogale hibine kwelengkengeleiba. <sup>10</sup> Ailu ngenge ngic monicte  
bikic hegiledaingtewa, nani inguchac yele bikic hegiledacte. Nga nani bikic  
monic hegileiba, yogo Kristole haicka ngengele ailu yele bikic hegileiba.  
<sup>11</sup> Aime Satangti kwesacnubame wawedabelengkale, inguc aidabeleng. Ye  
ngage-ngaigeine alingkecaigac, yogo ngagababeleng.

<sup>12</sup> Aime Toas taonka fuiba, dameng iwa Kristole Siduc Madicne edocebalu weduyelenogale Sugucnedi yefeine biyac bafuwaneleyec. <sup>13</sup> Fulu ngic haebane Titus basackelu asunedi kwele-mogung mi bafuwame wenac-madic milu locebalu Masedonia prowinswa hikelba.

### *Salecebaicne yengele bole hoine madicne*

<sup>14</sup> Aime Wapongti hudu ewalime nonge Kristoholec wetackelu gabeng bacnubame damengsoc yeicne alingka mengocnubame nganibong yogodi feicne aigac. Inguc aime macsoc hikebeng, Yesule siduc yogo hoine madicne ailu yogodi bolenonggang fikelu hikecaigac. Ilec Wapongte kwele-madic micnogabeleng! <sup>15-16</sup> Kristoholec wetackelu gabeng hoinonggeng madicne Wapongta fecaigac. Ngic-ngigac wasecne aidaingte, yengele hewacka yegodi hoine madicne gagaineholec ailu gaga yelegac. Nga dac-sanangte yefe balaibecaigaing, yogo yengele hewacka howac hoine fitolu yogodi homac yelegac. Ma ngicti bole yogo nalic badaicte? Ngic Kristoholec wetackelu gagac, yedi sugu nalic badaicte.

<sup>17</sup> Ngic homacne yenge hiye-monengtowa bafuwanningte ngagelu Wapongte yowa micaigaing. Nonge yenge ingucne mi aicaigabeleng, miyac. Wapongti salecnubame Kristoholec wetackelu gabeng kwelenonggeng dondonne faemewa Wapongte haicka yele yowa mibeng yegengkecaigac.

## 3

### *Poldi bolele fungine miwec*

<sup>1</sup> Nonge wacnonggeng hatacmac bafegabeleng, me? Me ngic-ngigac gocne yenge nonge fungine kwelengkebong balu ngelenoga, me hibi ingucne ngengelacni banoga, me? Yogo miyac! <sup>2</sup> Ngenge ngengungtihic nonge hibi aigaing. Aime Kristodi hibi yogo kwelenonggeng kwelina biyachac kwelengkewec. Aime ngic-ngigac sasawa yenge hibi yogo wafe-ngagec ailu gacaigaing. <sup>3</sup> Aime nonge ngengela bole babeng ngensi Kristole hibi aigaing, yogo yegenia biyachac fikewec. Ailu hibi yogo pen-misainedi mi kwelengkeicne, miyac. Wapong gagaineholec yele Asudi hibi yogo kwelengkewec. Ailu ye tafe posadi baicne, iwa mi kwelengkewec, miyac. Yogo tafe ingucne ngic-ngigac kwelenginang kwelengkeicne fagac.

### *Dodofic gblolicne*

<sup>4</sup> Kristoholec wetacke galu yanguc ngagesigabeleng, Wapongti boleina locnubalu yogo damongkedaicte. <sup>5</sup> Ailu nonge yogo ngagelu yanguc nalic mi midabelengte, "Nonge nalic nongungtihic bole yogo banogalesoc aigabeleng." Miyac. Bole banangte tapili, yogo Wapongtacni kwesicaigac. <sup>6</sup> Yedi baficnubame dodofic gblolicne mole-bafic gagabeleng. Dodofic yogo posawa kwelengkewec, yogo ingucne miyac. Asudi dodofic yogo kwelenonggang kwelengkewec. Aime yowa yogo posawa kwelengkeicnedi dondonne nalic mi balaibebong homacka locebagac. Aime Asudibac bag-boliyecnubagac.

<sup>7</sup> Wapongti yowa yogolec hibi posawa kwelengkewec, yowa yogodi homac bafuwayelewec. Aime yowa yogo wac feicne angocineholec kwesi-wec. Mosesle haic-mesudi angoleme Israel ngic-ngigac yenge haic-mesuina donge hilaningte aibibiyebong. Yogolec lobeinabac angoc tapiliine wawec.

<sup>8</sup> Mosesle bole yogo wac feicne angoceneholecti molickeweckacni tapiliine wawec. Aime Tili Asule bolele wac feicne angoceneholecti wiyac yogo hatacmac ewaligac. <sup>9</sup> Mosesle boledi yowawa locnubalu sowacnenonggeng mimoctocaigac, yogodi wac feicne angoceneholec aiwec. Ailubac Asule bolele yefe bafuwanoleme dondonne aigabeleng, yogolec wac feicne angoceneholecti hatacmac feicnehac ailu ewaligac. <sup>10</sup> Inguc aime wac feicne angoceneholec gblolicne yogodi, wac feicne angoceneholec esecne fawec yele wac bawagac. <sup>11</sup> Wiyac wac feicne angoceneholec esecne kwesiwec, yogolec angocene biyachac wame miyac aiwec, noine. Aime wiyac fafeginowagac, yogolec wac feicne angoceneholecti wiyac esecne ingucne hatacmac ewaligac.

### *Sugucnele tapili nga wac feicne*

<sup>12</sup> Aime wiyac fafeginowagac, yogo ngagesilu hangoc mikac bole balu wangec gagabeleng. <sup>13</sup> Moses haic-mesuinele angocene, yogolec tapiliine waemewa, ye yanguc ngagewec, "Israel ngic-ngigac yenge pasi yogo mi nganidaing." Ilec haic-mesuine kpolucti someckewec. Aime nongibac inguc mi aicaigabeleng, miyac. <sup>14</sup> Yengele ngage-ngage fongkewec. Aime yanguctihac wewedufocngineng dodoxifc esecnele yowa wafeyelecaigaing, dameng iwa wiyac kpoluc ingucne sanangne domalu ngage-ngagengineng hedickelu gagac. Aime ngic-ngigac yenge Kristoholec wetackegaingka, wiyac yogo baickeme gagaing. <sup>15</sup> Oc, yanguctihac wewedufocngineng yenge Mosesle yowa wafeyelebong, wiyac kpoluc ingucne yogodi kwelengineng hedickelu gagac. <sup>16</sup> Aime monic ye kwele-hefaliyec ailu Sugucneholec wetackegacka, wiyac kpoluc ingucne yogo baickeme miyac aigac. <sup>17</sup> Sugucne ye Asu, ailu Sugucnele Asudi ngic monickolec game ngic ye mucine mikac gagac. <sup>18</sup> Aime nongileng sasawa haic-mesunonggeng mi someckelu gabeng, Sugucnele wac feicne angoceneholecti dongenonggang iluc nganicka nganicaigabeleng. Silicine ingucne kwelu bafaliyeme ye ingucne hac aicaigabeleng. Aime yele wac feicnedi gaganonggang sugulelu sawegac. Sugucne ye Asu, aime Asudi boleine bame pasi yogo fikegac.

## 4

### *Kristo yegena mibong yegengkedaicte*

<sup>1</sup> Wapongti kwele-sowac ailu Asule bole yogo nolewec. Ilec ailu tapiliwawa mi aicaigabeleng. <sup>2</sup> Nonge aibaba sangkeicne gameineholec sa-sawa biyachac hegileibeng, yogo mic-heloc nalic mi aingeledabelengte. Ailu Wapongte yowa bafac-tafalic ailu nalic mi edocngebadabelengte, miyac. Yowa noine ailu dondonne fikelu yegengkenale, nonge Wapongte haicka yowaine mibeng ngic-ngigac sasawadi wosaecnubalu kwele ngage-ngagenginang nalic ngage-motogaing. <sup>3</sup> Aime Siduc Madicne micaigabeleng, yogo ngagebong ngage-ngagengineng hedickegacka, yenge dac-sanangte yefewa gagaingte, yengela inguc hedickegac. <sup>4</sup> Aime dameng yagolec wapong, yogo Aleng Sugucnengineng, yedi ngic-ngigac bacebame ngage-ngagesingngineng mikac gagaing. Ailu yenge Kristole wac feicnele Siduc Madicnedi bacebame yegengkecaigaing, yogo mi nganiningte ngage-ngagengineng hedickecaigac. Ailu Kristo ye Wapong edalicnubagac. <sup>5</sup> Aime yowa yanguc edocebalu weduyelecaigabeleng, Yesu Kristo ye Sugucne.

Nonge nongileng siduc mi micaigabeleng, miyac. Yesule ailu ngengele kwelec kwekwe ailu gagabeleng.<sup>6</sup> Wapongti yanguc miwec,

“Kundungkacni angoc fikena.”

(Fike 1:3)

Wapong ye hocne kwelenonggeng bame angolelu gagac. Ailu Kristo ye Wapongte wac feicne angoceneholec yogo ngage-motonoga. Ngage-ngagemotoc yogodi yele haic-mesuwacni kwesilu kwelenonggeng bame angole-gac.

### *Tapilitowa feicne iwa fedabeleng*

<sup>7</sup> Nongileng sanangne miyac, yogo hebec ingucne gagabeleng. Aime Wapongte wac feicne yogolec tapili feicnebenang. Ailu yogo moneng-mafa ingucne kwelenonggang loicne fagac. Tapilitowa yogo yelacni kwesicaigac, yogo nongelacni miyac. Aime ngic-ngigac yengi yogo ngage-motoninge yedi yogo kwelenonggang lowec.<sup>8</sup> I yangucte, umac haicina monic-monicti nebockacni kwesilu fikenolecaigac, yogodi mi hefecnuba-caigac. Aime ngage-yaec aigabeleng, aimebac tapilinonggeng mi wawebenangkegac.<sup>9</sup> Ngic yengi welu yebicnubabong, Sugucnedi mi hegilecnuba-caigac. Yenge wecnubabong wawelu sifu mi miyac aicaigabeleng.<sup>10</sup> Yesule gagadi socnonggang fikelu yegengkenale ailu, Yesu homawecte doic yogo socnonggang ingucne hac fikeme gagabeleng.<sup>11</sup> Yesule gagadi himong-socnonggang fikelu yegengkenale ngic-ngigac yenge damengsoc Yesule ailu nonge gblolicne gaebengka socnonggeng homacka logaing.<sup>12</sup> Ilec ailu homac ye nongela bole inguc balu game, gagadi ngengela inguchac bolein balu gagac.

<sup>13</sup> Yowa monic yanguc kwelengkeicne fagac,

“Na ngage-ngagesingkolec gaibale ailu miiba.”

(Mige 116:10)

Aime nonge inguchac kwelenonggang ngage-ngagesingkolec galu ngagesingkelu yowa milu gagabeleng.<sup>14</sup> Wapongti Sugucne Yesu homackacni bagboliywec. Aime yedi hocne homackacni bagboliyecnubalu Yesuholec taocnubame nonge ngengeholec momochac bacnubadaicte. Ailu yeicne emewa locnubame domadabelengte, yogo ngagegabeleng.<sup>15</sup> Umac sa-sawa yogo bafignebanogale ailu fikecaigac. I yangucte, Wapongte kwele-madicti taockeme taoc ngic-ngigac yengela kwesime ngic-ngigac bocyac yenge kwele-madic sugucne hac ngagelu Wapong mitengkebong wac feicne badaicte.

### *Homalubac gagawa hikenoga*

<sup>16</sup> Ilec nongileng kwelenonggeng mi wagac. Socnonggenti tapili-wawa ailu miyac ainogale aiyemewa, Wapongti sifu hadengsoc kwelenonggeng bame gbloliyelu gagac.<sup>17</sup> Aime umac nga doic ngagecaigabeleng, yogo dameng bangkacnemac fadaicte, yogodi wiyac sugucne mi aigac. Yogi yefenonggeng bame gaga-sanangte tapili nga wac feicne sugucne-hac ewalime balu gagabeleng.<sup>18</sup> Wiyac dongedi nganicaigabeleng, yogo damengngine kwesime miyac ainowagac. Aime wiyac dongedi mi ngani-nganiine, yogodi fafa-sanang fadaicte. Ilec wiyac dongedi mi ngani-nganiine, nongileng dungenonggeng yogowa hilalu gagabeleng. Nga wiyac dongedi nganicaigabeleng yogo hegilegabeleng.

## 5

*Honocmengte soc holenoledaictie*

<sup>1</sup> Aime nonge yanguc ngagegabeleng, himongte soc yogo fale ingucne. Fale yago heliyelu musungkeme, Wapongti socnonggeng gbolicne, yogo mac ingucne monic moledi mi baicne honocmengka biyachac lowec fanolegac. Mac ygodibac fafa-sanang faginowagac. <sup>2</sup> Inguc aime nongileng yan-guctihac falewa malacnonggeng gogoweme gaebengka, angacnonggengti honocmengte mac holenoleme haunangte ainolegac. <sup>3</sup> Foinac, yedi yogo holenoleme haudaictewa, asunonggeng someckeme senggang mi domad-abelengte. <sup>4</sup> Aime nongileng fale yagowahac malacnonggeng gogoweme gabeng, umac ainoleme fale yogo baickelu moc ganogale mi ainolegac. Gagadi homac gbokenale ngagelu, ye mac gbolicne feina holeme haunale ainolegac. <sup>5</sup> Wapong yeuctihac soc yogo banangte bacnubame madick-eibeng, yedi hocne Tili Asu nolewec, aime yogodi mimipangte noine aigac.

<sup>6</sup> Ilec ailu socti macnonggeng aime iwa kwilic galu Sugucnele macka mi gagabeleng, nongileng inguc ngagelu ngagebocka mi gagabeleng. <sup>7</sup> Nongileng yanguctihac ngage-ngagesingte yefe balaibelu wiyc dongedi ngani-nganiine mi balaibecaigabeleng. <sup>8</sup> Inguc galu ngageboc mikac gagabeleng. Aime yefeine monic fadecka midec, nonge himong-socnonggeng yago nalic hegilelu Sugucnela hikelu macnonggeng gbolicna gadabeng. <sup>9</sup> Yoglec yanguc sanangne ngagegabeleng, yagowa me honocmengka yeholec gabeng kweleine madickenale nongileng boleine balu gagabeleng. <sup>10</sup> Nongileng sasawa Kristole wowosaele damengka fedabelengte. Febeng yedi dameng iwa aibabanonggeng madicne nga sowacne ailu gaibeng, yoglec ameine filesoc badunoledaictie.

*Sugucnele habuwa gaga*

<sup>11</sup> Sugucne ye damuineholec, nonge yogo ngagegabelengte hangocnubame alang bacnocaigabeleng. Ilec ailu ngic-ngigac ngagesingkegaing, yogowa kpafengebanogale bole balu gagabeleng. Aime Wapontibac funginenonggeng dondonne biyac nganilu ngagegac. Aime na ngagebe ngenge inguchac kwele ngage-ngagenginang funginenonggeng ngage-motolu gagaing. <sup>12</sup> Nonge wacnonggeng hatacmac mi bafegabeleng, miyc. Gocene yengi kwesilu wiyc dongedi nganicaigaing, yoglec socngineng bafecaigaing. Nga kwelenginengte noinebac mi bafecaigaing. Ngic ingucne yengi kwesilu wacnonggeng bawabong nalic yanguc edocebadaitng, "Nonge Pol nga bole-moniyangfocine yengele ngagebeng feicte aigaing." <sup>13</sup> Nonge ngic haicka kwele-sifuc aigabelengka, yogo Wapongte ngagelu aigabeleng. Nga ngage-ngage-motockolec gagabelengka, yogo ngengele ngagelu, ailu gagabeleng.

<sup>14</sup> Ngic moniyangti ngic-ngigac sasawa yengele ame balu homawec. Aime yefe yogowahac sasawadi homayackebong, inguc wosaelu ngagegabeleng. Ilec ailu Kristo ye kweleinedi angac ngagegac, yogo bacnubayackeme bole balu gagabeleng. <sup>15</sup> Kristodi ngic-ngigac sasawa yengele ailu homawec. Aime ngic-ngigac gbolicne gagaing, yengileng gagale ngagelu hatacmac mi gadaing, miyc. Yenge Sugucnele ngagelu gadaing. I yangucte, yedi yengele ailu homame Wapongti ye hatacmac bagboliyeme fangkewec.

*Kwele-moniyang bafuwanolewec*

<sup>16</sup> Ilec ailu yanguctihac doma felu kwele esecnele aibaba balaibelu ngicngigac mi wosaecaigabeleng. Ailu esecne molickelu kwele esecna ngagengage ingucna Kristo wosaeibeng. Nga yanguctihacbac miyac. <sup>17</sup> Ilec ailu monic ye Kristoholec wetackelu gagacka, Wapongti ye bafickeme gabolicne fikelu gagac. Gaga esecnele wiyac yogo biyachac miyac aiwec. Hei, gaga gabolicne yogodi fikelu fagac hocne. <sup>18</sup> Yogo sasawa Wapongtaci kwsicaigac. Kristodi amenonggeng badume, yefe yogowa Wapongti nongilengkolec kwele-moniyang bafuwawec. Bafuwame kwelemoniyangte yowa mibeng yegengkenale bole noleme gagabeleng. <sup>19</sup> I yan-gucte, Wapongti Kristoholec game himongtowa yagolec ngic-ngigac yeholec kwele-moniyang ainingte aibaba inguc aiwec. Aime ye ngic-ngigac yengele bikic hegilelu hatacmac mi ngagesiwec. Hegileme ngic-ngigac yeholec kwele-moniyang ainingte, kwelelenggang yowa yogo hocne lome mibeng yegengkecaigac.

<sup>20</sup> Ilec nonge Kristole mic-yowa babeng, Wapongti micnonggeng basanangkeme Kristole ailu ngic-ngigac yanguc edocebaigabeleng, “Ngenge Wapongkolec kwele-moniyang aining.” <sup>21</sup> Kristo ye bikic mikac. Aime Wapongti nongileng bikic lacnome bikicte ameine yogowa fewec. Feme nongileng yeholec wetackelu Wapongte ngic-ngigac dondonne ailu nalic gagabeleng.

## 6

### *Bolele umac nga kwele-madic*

<sup>1</sup> Nonge Wapongkolec momoc bole balu ganangte yanguc sanangne edocngebagabeleng, ngenge Wapongte kwele-madic baibong, yogo moc wickedaiungkale ailu, edocngebagabeleng. <sup>2</sup> Wapongti yagolec yanguc miwec,

“Dameng madicne aime na hedec kwelu mimilocgone ngageiba. Ailu na bikicte ameine baiba, dameng iwa baficguiba.” <sup>(Yes 49:8)</sup>

Ngagegaing, yakumac dameng madicne aigac, aime ye yanguctihac bikicte ameine bame wasecne aigabeleng.

<sup>3</sup> Aime ye bole noleme ngic-ngigac yenge yogo mibong sowaleme kwelenginengti hegiledaingkale ailu, nonge yengele yefewa okac mi lo-caigabeleng. <sup>4</sup> Ailu Wapongte mole-baficfocene gagabeleng, yogo aibabanonggeng sasawa ngic-ngigac edalicebalu fangkelu feina sanangnehac gagabeleng. Nonge doicka sanangke-benangkelu umac haicine monicmonic bafuwabeng, umacti hefecnubame gacaigabeleng. <sup>5</sup> Ngic yengi hududi wecnubacaigaing, ailu muc-macka locnubacaigaing, ailu nongele ailu aalic hendolongkolec bafuwacaigaing. Nonge boletowa balu debocgboli galu nosing-sawe aicaigabeleng. <sup>6</sup> Nonge gbagbacne domalu ngage-~~ngage-~~-motockolec galu, ulucne ailu ngic-ngigac baficebagabeleng. Ailu Tili Asuholec wetackebeng kwelenonggengti angac kwsacine mikac ngagelu gagabeleng. <sup>7</sup> Ailu yowa noine milu Wapongte tapili balu gagabeleng. Gaga dondonne yogodi hudule wiyac ingucne, yogo mole-folenonggeng nga kananonggenti\* balu damongkecaigabeleng.

---

**5:17:** Rom 8:1; Gal 6:15    **5:18:** Rom 5:10    **5:19:** Rom 3:23-25    **5:21:** Hib 4:15    **6:5:**

2Kor 11:23-27    **6:6:** 1Tim 4:12    \* **6:7:** Folenonggeng, yagolec yanguc ngagecaigabeleng, yogodi tapiliholec wenagunoga. Kananonggeng, yagolec yanguc ngagecaigabeleng, yogo hudule wiyac damongkebeng asa-baba ingucne ailu bole badaitc.

<sup>8</sup> Gocne yengi wac feicne nolecaigaing. Nga gocne yengi nongele sowacne micaigaing. Ailu gocne yengi lobe-yowa ainolecaigaing. Nga gocne yengi mitengnubacaigaing. Nga gocne yengi nongele yowale kwasac-yowa micaigaing. Aime sifu nonge yowa noine migabeleng. <sup>9</sup> Bocyacti nonge ngic omane wacnubacaigaing. Ailu sifu bocyacti ngagecnubagaing. Nonge homanogale ailu sifu gbolicne gagabeleng. Ngic yengi hududi wecnubabong sifu mi homacaigabeleng. <sup>10</sup> Ailu ube-hobec ngagelu sifu damengsoc beliyelu gagabeleng. Nonge waweweine galu sifu ngic-ngigac bficebabeng yenge kwelele wiyac madicnolec aigaing. Wiyacnonggeng mikachenang gagabeleng. Ailu sifu Wapongte wiyac sasawa fanolegac. Silic ingucne gabeng ngic-ngigac yenge funginenonggeng nalic ngage-motodaingte.

### *Kweledi angac ngagenagulu ganoga*

<sup>11</sup> Ngic-ngigac Korin taonka gagaing, ngengele ngagelu yowa yegena migaibeleng. Ailu nonge ngengele kwelenonggengti angac sugucne hacbenang ngagegabeleng. <sup>12</sup> Aime ngenge nongele ngagelu kwelengineng hefegaing. Nga nongibac ngengele ailu sifu kwelenonggeng mi hefegabeleng, miyac. <sup>13</sup> Adu-madecfocne, na yakumac ngengele yanguc migabac, nongi ngengele aicaigabeleng, silicne ingucne hac ngengi hefaliyelu kwelenginengti non-gele angac sugucne hacbenang aingeledaic.

### *Kundung nga angoc*

<sup>14</sup> Ngenge ngic-ngigac gocne ngage-ngagesing mikac, yengeholec mi wetackedabieng. Gaga dondonne nga yefe-yowa wewe yeke yowa nalic hefed-abiyete, me? Yogo miyac! Nga angoc nga kundung yeke kwele-moniyang nalic aidabiyete, me? <sup>15</sup> Kristodi Aleng Sugucnengineng<sup>†</sup> yeholec kwele-moniyang nalic aidaicte, me? Nga ngic-ngigac ngage-ngagesing kolec yenge ngic-ngigac ngage-ngagesing mikac, yengeholec ngage-ngagengineng moniyang nalic aidaingte, me? <sup>16</sup> Ailu Wapongte ibu-mac nga siduc-gbong yekele hewacka yowa nalic hefenoga, me? Yogo miyac! I yangucte, nongilengti Wapong gagaineholec, yele ibu-mac. Ilec ngenge ngic-ngigac gocne ngage-ngagesing mikac, yengeholec mi wetackedabieng. Wapongti yogolec yanguc miwec,

“Na macne yengela balu yengeholec galu hewacnginang lec-welec aidacte. Galu yengele Wapong aibe yengi ngic-ngigacfocne aidaingte.” (*Dep 26:12; Yer 32:38; Esek 37:27*)

<sup>17</sup> Ailu Sugucnedi yanguc migac, “Ngenge yengele hewacka galu wiyac monic wonongkolec bakpaduc mi aidabiyeng, ngenge yenge hegilecebalu baickelu ngengilangkac hikelu gadabiyeng. Ngenge inguc aidaingtewa, na ngengele angacnume bacngebadachte.” (*Yes 52:11; Esek 20:24,41*)

<sup>18</sup> “Ailu na ngengele Mamacngineng aibe, ngengi nale adu-madecfocne aidaingte, Sugucne Tapilitowa Fileinedi inguc migac.” (*2Sm 7:14*)

## 7

<sup>1</sup> Agofocne kwelenedi ngengele angac ngagegabac, Wapongti inguc mi pangkewec. Ilec nongileng wiyac sasawadi asunonggeng nga socnonggeng

**6:9:** 2Kor 4:10    **6:13:** 1Kor 4:14    **6:14:** Efs 5:11    <sup>†</sup> **6:15:** Grik yowawa Aleng Sugucnengineng wacine monic Belial kwelengkeicne. Wac yogolec fungine yogo “wiyac omane” me “basowalecaigac”.

**6:16:** 1Kor 3:16    **6:17:** Miye 18:4    **6:18:** Yer 31:9

hedickeme wonongkolec aicaigac, yogo suweyackelu gbagbacne aidabeleng. Ailu Wapongte hangocnubame alang bacnogabelengte ailu angacnubame molickelu Wapongte bingec ganangte, yogo bamoctoyackelu sugulel sanangkedabeleng.

### *Kwele-madic yowa*

<sup>2</sup> Ngenge kwelengineng basugulelu angac ngagenoledabiyeng. Nonge ngic me ngigac monic aibaba sowacne mi aicnoibeng. Ailu monic mi basowaleibeng. Ailu kwesacka wiycngineng monic mi ewalicebaibeng. <sup>3</sup> Ngengele yowa mimoctonogale mi midacte, miyac. Ngenge nongele kwele kwelina gagaing, yogo biyachac edocngebaiba. Ailu homadabelengte me gadabelengte, yogo ngenge nga nonge momochac aiyackedabelengte. <sup>4</sup> Na hangoc mikac yowa edocngebalu ngengele ngagebe feicne aime mica gabac. Ailu nonge umac haicine monic-monicta feina gaebengka ngengi nonge basanangnubaibong. Ilec belic-belic sugucnehac ngagegabac.

### *Titusdi siduc balu kwesiwec*

<sup>5</sup> Foinac, nonge Masedonia prowinswa hike sulumebeng, umac haicine monic-monicti fikenoleme ngiye-domacnonggeng madicne monic mi fikewec. Ngic-ngigac yengi weyebic ainoleibong, aime kwelenonggengti hangocnubame gaibeng. <sup>6</sup> Aime Wapong ye ngic-ngigac kwele-umackolec gabong basanangebacaiagac, yeuctihac Titus saleme nongela kwesiwec, yogodi basanangnubawec. <sup>7</sup> Ailu Titus kwesiwec, yogo sugu miyac, ngengi wenucka mibasanang aicnoibong, ye yowa yogo edocnulu basanangnume ngageiba. Ailu ngenge nganicnunogale angac ngageibong. Aime umac yogolec ailu ubengineng hobeleme kwele-sowac ngageibong. Ailu ngenge wenucka nale angac sugucnehac ngageibong, ye yogo momochac edocnume beliyeiba.

### *Syeckelu gaibong*

<sup>8</sup> Hibine kwelengkeiba, yogodi kwele-sowac bafuwangelewec. Na yogo ngagelu dameng bangkacnemac ngageboc aiiba. Nga yanguctihacbac ngageboc mi aigabac. <sup>9</sup> Na ngengele kwele-madic ngagelu belyegabac. I yangucte, ngenge kwele-sowac sugu ngagedabong yogo mi belyedaba. Ngenge kwele-sowac ngagelu kwele-hefaliyec aiibong. Ngenge Wapongte angac nga ngage-ngage balaibebong kwele-sowac bafuwangelewec. Inguc ainingte yanguctihac molickelu nongele hibile ailu umacngineng fikewec, yogo biyachac miyac aiwec. <sup>10</sup> I yangucte, Wapongti kwele-sowac bafuwangeleme kwele-hefaliyec ailu wasecne aidaingte, yogo kwelenginengti ngageboc mi aigaing. Himongte kwele-sowac, yogodibac homac bafuwanganedaida.

<sup>11</sup> Ngagegaing, Wapongti kwele-sowac ingucne bafuwangeleme yogodi ngengela noine yanguc fikengelewec, ngenge tatakic mikac aigaing. Ailu aibaba bikicinaholecte hangocngebame, yogowacni baickegaing. Ailu yenge bikic yogolec aibong ngenge aalicngebagac. Ailu mibating ainge leningte mimedec aigaing. Ailu nganicnunogale aingelegecaigac. Ailu nale dogbac aicaigaing. Ailu ngicti bikic aiwec, ye mibating aicnoibong. I yangucte, gagangineng yogodi bucbuchac gbagbacne fikeme nganicaigabeleng. <sup>12</sup> Ilec na molickelu hibi kwelengkeneleiba, yogo ngic monicti agoine basowalewec, Ngic yogo me agoine, yekele ailu hibi yogo mi kwelengkeiba,

miyac. Ngenge Wapongte haicka nongele kwelenginengti angac ngagecaigaing, yogo fikelu yegegkeme ngengungtihac yogo ngani-motoningte ailu inguc kwelengkeneleiba. <sup>13</sup> Yogodi basanangnubame gagabeleng.

### *Titus hefoleibong*

Galu taockelu yanguc ngageibeng, ngenge sasawadi Titusle kwele nga asuine yogo bamogungkelu tapili gblolicne bafuwacnoibong. Nonge yogo ngagelu belic-belic sugucnehab ngagebeng yogodi basanangnubawec. <sup>14</sup> Na Titusle haicka ngenge mitengngebala yanguc edoiba, ye ngengela fulu nganicngabame na mi gamenuwec. Nonge ngengela fulu yowanonggeng sasawa yogo noine miibeng, silicine ingucnehab Titusle haicka mitengngebabeng noine fikewec. <sup>15</sup> Ye ngengele ngagelu kweleinedi angac sugucnehab ngagegac. Ye ngengela fume ngengi mac holecnolu hangoc ailu dengdengngabame yowaine ngageibong, ye yogo mi ngigeckewec. <sup>16</sup> Ngenge sanangne gagaingte na ngageboc mikac belyegabac.

## 8

### *Yerusalem yengele babafic*

<sup>1</sup> Ngic hae-gbafoce, Wapongti Masedonia habu gagaing, yenge kwele-madic wenucka aiyeleme gagaing, yogo edocngebanogale ngagegabeleng. <sup>2</sup> I yangucte, yenge umac feina doic ngagelu waweweinebenang galu sifu belic-belic homacnehab ngagelu ibu umacnehab loibong.\* <sup>3</sup> Yenge wiyc fayelewecsoc yogo loibong. Aime loibong, yogo sugu miyac, yenge wiyc sugucnehab ewalilu loibong. Inguc nganilu mibe yegegkegac. Aime nani aibe yenge mi loibong. Yenge yengungtihac inguc ngagelu loibong. <sup>4</sup> Yenge sanangne mikpafeng ainolelu yanguc edocnubaibong, “Nonge inguchac yengeholec kwele-madicte aibaba taockelu Wapongte bingec yenge bafacebanogale ngagegabeleng.” <sup>5</sup> Inguc mibong yanguc ngageibeng, yenge molickelu moneng ngagesilu lodaingte. Aimebac yenge molickelu Wapongte ngage-ngage nga angac balaibelu yengileng Sugucnele molewa lonaguibong. Silicine ingucnehab nongela taockelu inguchac ainoleibong.

<sup>6</sup> Inguc aibong, Titus ye kwele-madicte ibule bole yogo lonogale ngengela fungkewec, ye bole yogo bamoctonale mipangkelu sanangne edoibeng. <sup>7</sup> Ngengela wiyc sasawa umacnehab fagac. I yangucte, ngage-ngagesingnga yowa madicne mimingineng fangelegac. Ailu ngage-ngage-motoc nga bolele angac ailu nongele kwele-angacngineng fangelegac. Inguc fagacte ngenge inguchac kwele-madicte wiyc sugucnehab lodaing.

<sup>8</sup> Na yowa yago ung-yowa mi edocngebabac, miyac. Masedonia habu yenge bole yogo banogale angacngineng fagac. Aime yenge ingucne ngenge ngic-ngigac yengele kwelenginengti angac noine ngagegaing me miyac, yogolec lokwesacka locngebagabac. <sup>9</sup> Ngenge Sugucnenonggeng Yesu Kristo yele kwele-madic ngagegaing. Ye honocmengka wactowaineholec galu ngengilengte ailu macine hegilelu waweweinebenang ailu gawec. Ye waweweine aiwekte ngengileng kwelele wiycactowanganengkolec aibong.

<sup>10</sup> Ngenge hifa bageina bole yogo sugu molickelu mi baibong, miyac. Ngenge molickelu angac biyachac ngagelu mipangkeibong. Ilec ngenge ibu loningte nale ngage-ngage taockebe yogodi baficngebadaic. <sup>11</sup> Ngenge

---

\* **8:1:** Rom 15:26; 2Kor 9:1-2      \* **8:2:** 1 Korin 16:1 iwa Poldi ibu yogolec kwelengkewec. Yesule habu Yerusalem iwa umackolec gaibong. Ilec ibu yogo yenge yeledaite.      **8:7:** 1Kor 16:1-2      **8:9:** Mat 8:20; Filp 2:6-7

molickelu efeckelu bole yogo kwele-angacka baibong, ingucne hac man mang hidulu yanguctihac bolengineng nalic aime yogo bamoctodaing. <sup>12</sup> Aime ngenge efeckelu wiya cngineng fangelegacsoc ibu lodaingte, yogo Wapongte haicka madicke gac. Nga wiya cngineng mi fangeledaictewa, yogo lec yowaine mikac. <sup>13</sup> Ngic-ngigac gocne yenge umacngineng mikac gadaingte. Nga ngengibac baficebanogale ibu lolu umackolec gadaingte. Aibaba ingucnedi mi madicke gac, miyac. Ngenge gagangineng silicine moniyang ailu ganingte migabac. <sup>14</sup> I yangucte, dameng yanguctihac ngen gela wiya c bocyac fagac, wiya c yogo lec nebocene ngic-ngigac wiya c monicti kpungkecaigaing, yenge baficebadaingte. Aime lobewa gacgu ngenge wiya c monicti kpungkedaingtewa, iwa yengela wiya c bocyac fadaicte, yogo di ngenge inguchac baficngebadaingte. Ngenge inguc ailu gagangineng silicine moniyang gadaingte. <sup>15</sup> Yogo lec Wapongte hibiwa yanguc kwe lengkeicne fagac,

"Ngic nosing bocyac bawec, yele nosing andoine aicnowec. Nga efec nemac bawec, yebac ingucne hac nosing andoine aicnowec." (*Wah 16:18*)

### *Hiye-moneng madicne damongkenoga*

<sup>16</sup> Aime nonge ngengela kwele-madicke bole bacaigabeleng, silicine ingucne hac Wapongti Titusle kwele kwefangkeme ye ngengela bole ine kwele-madicke balu gawec. Yogo lec Wapong mitengke gabac. <sup>17</sup> Ye ngengela bole banale mikpafeng aicnobeng kwele ine biyachac lolu yeicne mibasanang ainagulu angac sugucne hac ngagelu efeckelu ngengela fudaicte.

<sup>18</sup> Aime ngic hae-gbanonggeng monic, ye Siduc Madicne mime Yesule habu sasawa gagaing, yenge yele mibong madicke caigac, ye salebeng Titus-holec momoc fudabi yecte. <sup>19</sup> Sugucnedi wac feicne hac banale ailu baficebanogale edalicebalu nonge kwele-madicte ibu kpaduckelu gagabeleng. Yesule habu yengi ngic yogo bawosaeibong, ye nongeholec momochac ibu yogo balu hikenoga. <sup>20</sup> Aime ibu sugucne yogo wenuc damongkelu gagabeleng, monicti yogo lec lobe-yowa midaikale, nongileng momochac balu hikenangte angacnubagac. <sup>21</sup> Sugucnele haicka sugu miyac, ngic-ngigac yengele haicka momochac aibaba madicne aibeng madicke gac. <sup>22</sup> Ailu nonge ngic hae-gbanonggeng monic salebeng yekeholec fudaingte. Ngic yogo ye bole haicne monic-monicti angacine sugucne hac ngagecaigac, nonge dameng bocyac yogo nganilu kwele nonggeng madicke wec. Ailu ye ngengele ngageme feicne aigac.

<sup>23</sup> Aime ngic yogo nga ngic hae-gbanonggeng monic yeke Yesule habu yengele salecebaicne galu bolenginac Kristole wac bafecaigabi yec. Aime na Titusle yanguc mibe ngageibong, ye bole agone aime noke momoc ngengela fulu bole bacaigabele. <sup>24</sup> Ilec ngenge Yesule habu yengele haicka angacngineng edalicebalu kwele nonggengti yengele angacngebadaic. Aime nonge ngengele ngagelu yowa madicne miibeng, yogo di kwesac mi aidaic.

## 9

### *Ibule yowa*

<sup>1-2</sup> Aime na Wapongte bingec yenge baficebanogale kwele nonggeng gabac. Ngenge bole yogo banogale biyachac efeckeibong yogo ngagegabac, hibi yagowa yowa yogo nalic hegiledackalesoc. Aime Masedonia yengele haicka ngengele yanguc mitengngebacaigabac, "Ngic hae-gba focnonggeng

Akaia gagaing, yenge bole yogo banogale hifa bageina biyachac efekkeibong.\* Ailu ngengi wiyac yeleningte kwele-efec bafuwaibong, homacne yenge ngengele siduc yogo ngagelu kwelengineng fangkeme yenge inguchac ainogale ngagesiibong.

<sup>3</sup> Aime nongi mitengngebaibeng, yogodi noine mikac aidaickale, ngic hae-gbafocnonggeng yogo salecebabeng fugabiyeng. Ailu yowa biyachac mibeng, ngenge yogo ingucnehab Wapongte bingec baficebanogale efeckelu gadabiyeng. <sup>4</sup> Aime gacgu funogale mibe, Masedonia ngic gocne yenge naholec fulu nganicngbabong ngenge ibule bole yogowa mi efeckedaingtewa, ibac nonge nga ngenge momochac gamenubadaicte. <sup>5</sup> Ilec ailu nani ngic hae-gbafocnonggeng sanangne edocebabe yenge molickelu ngengela fungtinge ngagegabac. Yenge fulu baficngbabong ngenge kwele-madicte wiyac lobong hikenogale biyachac mipangkeibong, yogo bamockelu kpaduckelu lolu gadabiyeng. Aime ngenge kwele-umacka ibu lodaingkale ailu, ibungineng kwele-madicka lonogale ngic hae-gbafocnonggeng salecebabeng fugabiyeng.

### *Kwele-madicka wiyac yelenoga*

<sup>6</sup> Monic ye nosing efecnemac bolewa duwedaicte, ye noine efecnemac badaicte. Nga monic ye nosing bocyac duwedaicte, ye noine umacnehab badaicte, ngenge yogo ngagesidaing. <sup>7</sup> Silicine ingucnehab monic ye kwele-madicka ngic-ngigac wiyac yeleme, Wapongti yele kwele-angac ngagecnodaicte. Ilec ngenge ngagebocka me ngic-ngigac gocne yengi kpafengngebabong ngic-ngigac wiyac yeledaingte, yogodi mi madickedaicte. Ngenge kwelenginang filesoc wiyac monic biyac ngagepangkeibong, yogo yeledaing. <sup>8</sup> Inguc aibong Wapongti kwele-madicka nalic baficngebalu game wiyac fangeledaicte, aime ngenge damengsoc woc-wiyacte mi kpungkedaingte. Inguc ailu ngenge bole madicne balu nalic baficebadaingte. <sup>9</sup> Yogolec yanguc kwelengkeicne fagac,  
“Ye angacine balaibelu wiyac homacnehab botoc balu ngic-ngigac waweweine yelegac. Yele pasi dondonne, yogo damengsoc faginowagac.” *(Mige 11:9)*

<sup>10</sup> Wapongti wasecne bafuwame bole fileinedi wasec yogo duwegac. Ailu nosingngine inguc bafuwacaigac, ye ngengele wasec ingucnehab bafuwalu noba-nosingngineng bocyac bame sawedaicte. Aime ngenge aibabangineng dondonne, yogolec noine bocyac taockeme taoc ailu hikedaicte.

### *Yesule habu yengele babafic*

<sup>11</sup> Ngenge kwele-madicka baficebalu wiyac yelenogale aibong ngengela wiyacngineng bocyac fikedaicte. Inguc aime nonge kwele-madicte wiyac yogo ngic-ngigac yelebeng yenge Wapong kwele-madic micnodaingte. <sup>12</sup> Ngenge babafic bole balu, yogodi Wapongte bingec yenge wiyac monicte kpungkecaigaing, yogo baficebadaingte. Yogodi socngineng sugu mi baficebadaingte, miyac. Yogo Wapongta inguchac kwele-madic homacnehab micnodaingte. <sup>13</sup> Ngenge yowa balaibelu ngic-ngigac babaficte bole yogo bacaigaing, yenge yogo nganidaingte. Inguc nganibong ngenge Kristole Siduc Madicne mibong yegengkeme, yenge nga ngic-ngigac sasawa mochac baficebacaigaing, yogo ngagelu Wapongte wac bafedaingte. <sup>14</sup> Aime

\* **9:1-2:** Korin taon yogo Akaia prowins iwa fawec.   **9:1-2:** 2Kor 8:1-7   **9:6:** Ynn 11:24-25  
**9:10:** Yes 55:10   **9:11:** 2Kor 1:11; 4:15

Wapongte kwele-madic sugucne hac ngengela fagacte yenge ngengele angecabeame ngengele milockedaiingte. <sup>15</sup> Wapongti kwele-madic ka wiyc nolewec, yogo Yesu hocne. Yele funginele yowa wenuc minogale kpungkegabeng. Yoglec mitengkenang.

## 10

### *Salecebaicne aibabangineng*

<sup>1</sup> Ngic-ngigac gocne yengi nale yanguc micaigaing, "Pol ye nongilengkolec yawa galu hangocka yowa ulucne micaigac. Nga dalicka hikelu yowa sanangne hangoc mikac kwelengkelu lome hikecaigac." Kristo ye ulucne. Ailu ye kwele-efecka yefe yogo balaibegac. Ilec na aibaba ingucne kpafengebanogale aineleme <sup>2</sup> foloineholec edocngebanogale. Na ngengela fulu hangoc mikac yowa sanangne edocngebanogale mi ainelegac. Ilec aibabangineng aidaingtewa, yowa sanangne mibele mi aidaing. Aimebac na ngengela fube ngic gocne yengi nale yanguc micaigaing, "Pol ye kwele esecnele aibaba balaibelu boleinu balu gagac," yenge yowa sanangne yogo hangoc mikac nalic edocebadacte.

<sup>3</sup> Nonge sochtepecka gagabeleng, yogo noine. Aimebac hudu yuwenac yogo kwele esecnele aibaba mi balaibegabeleng, miyac. <sup>4</sup> Lebe-maleku nga hudule wiyc balu gagabeleng, yogo sockacni miyac. Yogo Wapontacni ailu yogo tapiliineholec. Aime nonge yogo balu sowacnedi oda ingucne aigac yogo hemballackelu kwesac ngage-ngage baickegabeleng. <sup>5</sup> Aibaba nga ngage-ngage feicne sasawa yogodi Wapongte ngage-ngage gbolongne yogo wecaigac, nonge yogo momochac baickegabeleng. Baickelu ngage-ngage yogo Kristole yowa balaibeningte hefelu bageina logabeleng. <sup>6</sup> Aime ngenge nongele yowa balaibebong yegengkegac, dameng iwa gocne yowa kwekwe aigaing, yoglec ameine sasawa badunangte efeckelu gagabeleng.

<sup>7</sup> Aime monicti yanguc ngagedaict, "Na Kristole ngic gagabac." Ye yeuctihac inguc ngagepangkedaictewa, nonge Kristole ngic ye ingucne hac gagabeleng. Yogo inguchac yeuctihac ngagesidaic. Ngenge inguc ngagesibong, ye nga nonge aibabanonggengti ngengela fikelu yegengkedaic. <sup>8</sup> Sugucnedi bole-yowa tapiliineholec nolewec, yogo ngenge basowalecngebanogale mi nolewec, miyac. Ye ngenge basanangnebanogale tapili nolewec. Na tapiline yoglecsoc fagac, ailu yogo ngagebe feicne aigac. Inguc taockelu migabacte ailu, yoglec mi gamenudaict. <sup>9</sup> Ailu hibi kwelengkecaigabac, yogodi hangoc sugucne fikengelenale mi ngagesicaigabac. <sup>10</sup> Aime gocne yengi yanguc micaigaing, "Polle hibi yogo yowa dacine nga umacineholec. Aimebac ye kwesilu nongilengkolec galu sockapet tapili-wawa galu yowa mime, ngic-ngigac yenge yowa omene milu hegilegaing." <sup>11</sup> Ngic-ngigac inguc micaigaing, yenge yanguc ngagesidaing, nonge dalicka galu yowa dacineholec hibiwa kwelengkecaigabeleng. Aime iwa fulu ngengeholec galu aibabanonggeng aicaigabeleng. Nga hibiwa kwelengkeicne yogo silicne moniyang aiboc gagabeleng.

### *Bole-yowa silicina balaibenoga*

<sup>12</sup> Gocne yengibac yanguc micaigaing, "Nani nongileng hewacka sugucne gagabac." Yenge yogo mingagec ailu wosaenagucaigaing. Ngic ingucne yenge yengileng sugu wosaecnagulu maaine locaigaing, yenge wiyc monic mi ngage-motolu yefe lilogaing. Aime nonge domalu madi nongileng feicne

gagac, yogo nalic mi midabelengte. <sup>13</sup> Wapongti bawosaecnubalu boleyowa noleme nonge yogo balaibelu ngengela inguchac fuibeng. Aime nonge Wapongte maa yogo sugu balaibelu bafelu midabelengte. Maa yogo ewalilu socnonggeng nalic mi bafelu midabelengte. <sup>14</sup> Nonge molickelu ngengela fulu Kristole Siduc Madicne edocngebaibeng, yogo Wapongte maa mi ewaliwec. Nga ngengela mi fudabengka, bolenonggengte yowa-siduc yogodi maaine ewalime soc bafefe aidecka. <sup>15</sup> Aime gocne yenge bole biyachac baibong, nonge iwahac hikelu nongi molic-molic aili feicne ainangte milu monic mi bacraigabeleng, miyac. Nonge yanguc ngagelu wangec gagabeleng, ngengele ngage-ngagesingti sugulelu sanangkeemewa, nongele bole yogo ngengela inguchac sugulelu sanangkedaicte.

<sup>16</sup> Aime ngenge ngage-ngagesingka sugulelu sanangkebong, nonge ngengele lobewa mac-himong gocne falegac, iwa inguchac hikelu Siduc Madicne mibe yegengkeyledaicte. Inguc aili iwa ngic monicte bolele molic-molic aili feicne aigabeleng mi midabelengte. <sup>17</sup> Aime

“Monic ye mime feicne aidaicte, ye Sugucnele mime feicne aidaic.” *(Yer 9:24)*

<sup>18</sup> Sugucnedi ngic monic bafegac, yele ngageme ngic madicne aigac. Nga monic ye yeuctihac socine bafegac, yedibac ngic madicne mi aigac.

## 11

### *Salecebaicne kwesacine*

<sup>1</sup> Ngenge ngageebongka na kwele-sifuc yowa monic mibe tatakic mikac ngageningte aigabac. <sup>2</sup> Wapongti wiyc yeicne sugu ainale bocyac aincnoaigac, silicine ingucne hac nani ngengele bocyac ainelecaigac. I yangucte, ngigac monic ye ngic bingecine biyachac micnoibong gacaigac, nani silicine ingucne hac Kristola ngenge ngigac-bingecne gbagbacne locngebabe ganingte ngagesigabac. <sup>3</sup> Ngenge Kristo ngagepangkelu gbagbacne galu kweledi yele sugu angac ngagegaing. Aime hemadi Ewa kwasackelu lokwesacka lowec. Silicine ingucne hac monicti gagacka, gaganganeng gbagbacne nga Kristole angac sugu ngagecaigaing, yoglec ngage-ngage ewalincge-badaikale, hangcnugac. <sup>4</sup> Na aibabangineng monic nganicaiagabac, yogo nalic mi aigac. Nongi Yesule siduc milu edocngebalu wedungeleibeng. Aime monicti kwesilu yogo hegilelu Yesu silicine monicte siduc milu edocngebalu wedungelecaigac. Me ngenge yele yowa mi wosaelu moc sugu kwele-madicka ngagecaigaing. Aili ngenge Asu biyachac baibong, yogo hegilelu asu silicine monic ngic yengelacni kwele-madicka bacaigaing. Me nonge Siduc Madicne milu edocngebalu wedungeleibeng. Aili yogo hegilelu siduc madicne silicine monic mime, ngenge yogo inguchac mi wosaelu moc sugu kwele-madicka ngagecaigaing.

<sup>5</sup> Naneuc yanguc ngagesigabac, ngic yenge salecebaicne feicnebenang wacebagaing, na yengele bagewa mi gagabac, miyac. <sup>6</sup> Yowa mimile tapili yenge ingucne nala bocyac mi fagac, yogo noine. Aimebac ngage-ngage-motoc yogo andoinebenang fanelegac. Nonge ngage-ngage-motoc yogo yefe haicne monic-monicka ngengela biyachac bafuwabeng nganiiibong.

<sup>7</sup> Ngengi feicne ainigte bawacnaguiba. Na hiye-monengte ailu Wapong yeicne Siduc Madicne mi mibe yegengkengeleme gaiba.\* Ilec ngagebong na bikickolec aigabac, me? Yogo miyac! <sup>8</sup> Aime na ngengela bole bablele Yesule habu gocne yengi hiye-moneng neleibong. Neleibong yenge mi baficebalu hise ngic ingucne balu ngenge baficngebaiba, yogo noine. <sup>9</sup> Ailu na ngengeholec galu wiyc gocnele kpungkeiba. Kpungkelu umacne yogo ngengelacni ngic monic mi lacnoiba, miyac. Ngic hae-gbafofnonggeng Masedonia prowins iwacni kwsuibong, yengibac woc-wiyacte kpungkeiba, yogo sasawa baficnuyackeibong. Inguc aibong na umac monic mi ngeleiba. Ailu monic mi ngeledacte. <sup>10</sup> Aime ngic-ngigac Akaia prowinswa gagaing, yengelacni wiyc monic mi balu naneicne aibaba feicnele mibe yogo nalic mi hedickedaingte. Foinac, Kristole yowa noine nala fagacte yowa noine migabac. <sup>11</sup> Na omale babafic monic neleningte mi ainelegac? Na kwelenedi ngengele angac mi ngagegabac, ngenge inguc ngagegaing, me? Na kwelenedi ngengele angacnugac, yogo Wapongti ngagegac. <sup>12</sup> Ngenge ngic gocne wiyc yelebong, yenge nongeholec soc moniyang ainigte ailu socngineng inguchac bafenogale aidaingte. Yenge inguc midaingkale, na aka yogo holelu hiye-monengte aibaba weni yogo aicaigabac, yogohac ailu gadacte.

<sup>13</sup> Aime ngic ingucne yenge kwsac ailu salecebaicne ingucne aicaigaing. Ailu bole noine monic mi balu silicnginengti hefaliyeme Kristole salecebaicne yengele silic ingucne ailu gacaigaing. <sup>14</sup> Aibaba ingucne aibong ngenge mi kwatackedaing. Satang ye ingucne hac yeicne silicne bafaliyeme angoc te angelo, yogo ingucne aicaigac. <sup>15</sup> Ye inguc aime, yele mole-baficfocine yenge inguchac silicngineng bafaliyebong aibaba dondon-nele mole-bafic, ingucne hac aicaigaing. Aime yogo wiyc efecne aigac. Ailu yenge gacgu dameng moto-motoina aibabangineng yogolec ameine badingte.

### Kwele-sifuc yowa ingucne

<sup>16</sup> Aime monic ye nale yanguc mi ngagedaic, "Ye kweleine sifuwegac." Yogo hatacmac edocngebagabac. Ailu ngenge nale inguc ngagegaingka, ngenge kwele-sifuc ngic bacebagaing, ingucne hac na bacnubong ngic ingucne ailu mibe ngagedaing. Inguc aime na inguchac neicne wacne bafelu yowa kpisicnemac midacte. <sup>17</sup> Ailu yowa yago migabac, yogo Sugucnele mic balaibelu mi migabac, yogo kwele-sifuc yowa ingucne naneuc milu wacne bafelu migabac. <sup>18</sup> Ngic bocyac yenge socte ngage-ngage balaibelu yengileng wacngineng bafeningte yowa micaigaing. Ilec ailu na inguchac neicne wacne bafelu yowa gocne minogale ngagegabac. <sup>19</sup> Aime ngenge ngengungthiac ngage-ngage-motockolec gagabeleng inguc ngagegaing. Ailu ngenge kwele-sifuc yowale aka monic mi holelu angacka ngagecaigaing, aibabangineng yogobac nganilu gagabac. <sup>20</sup> Ngic gocne yengi kwele baficebaningte kwesacngebagaing, me wacngineng bafegaing, me we-wepatang aingelegaing. Yenge inguc aibong ngenge yogo nganilu ngengi aka monic mi holeylecaigaing, miyac. <sup>21</sup> Nonge aibaba ingucne ainogale tapilinonggeng mi fagac, na yowa ingucne minogale gamenugac.

### Polle fungine

---

\* **11:7:** Ngic ye hiye-monengte ailu bole bacaigac, yele bole yogo wiyc feicne aigac, Korin ngic-ngigac yenge inguc ngagelu gaibong. Ilec gocne yenge ngagebong Polle bole yogo wiyc omane aiwec.   **11:7:** 1Kor 9:18   **11:8:** Filp 4:15-16; 2Kor 12:13

Aime ngic gocne yenge hangocngineng mikac galu wacngineng bafe-caigaing, na ingucnehab hangoc mikac kwele-sifuc yowa milu wacne bafebe ngagegaing. <sup>22</sup> Yenge Hibru ngic, me? Oc, na inguchac Hibru ngic. Yenge Israel ngic, me? Oc, na inguchac Israel ngic. Yenge Abraham ngambobocine, me? Oc, na inguchac yele ngambo hocne aigabac. <sup>23</sup> Aime yenge Kristole mole-baficfocine aigaing, me? Na yengefe feicne aigabac. Ailu hatacmac kwele-sifuc yowa ingucne taockelu migabac. Na Kristole bole ewalicebalu balu gagabac. I yangucte, ngaba yengi dameng bocyac muc-macka loc-nubong ngiyeiba. Ngiyebe yenge dameng bocyac muc-hududi umacnehab wecnuibong. Aime dameng bocyac homanogale ailu gaiba.

<sup>24</sup> I yangucte, alec 5 Yuda ngic yengi umbikadi wecnuibong. Aime 5 yogolec kwelina moniyang moniyang hibe alecine 39 aiwec. <sup>†</sup> <sup>25</sup> Ailu dameng habackang Roma yengele hudu-baba ngic yengi hududi wecnuibong. Ailu dameng moniyang posadi holecnuibong. Nga dameng habackang lac-wagewa hikebe lac-wage kiwecka haume hauiba. Haulu dameng monicka deboc moniyang nga hadeng moniyang kiwec feina faiba. <sup>26</sup> Na dameng bocyac himongne himongne lolicke hikelu misa sugucne falockebe wecnume sowalenogale aiiba. Aime kindololo ngic yengi yefewa basowalecnunogale aiibong. Ailu neicne alingfocne yengi basowalecnunogale aiibong. Ailu Israel yengele alingkacni miyac, yengi basowalecnunogale aiibong. Nga taon gocna ngic yengi basowalecnunogale aiibong. Ailu himong kisiwa misaine mikacka, nga kiwecka galu umac bafuwaiiba. Aime ngic hae-gba ingucne kwesacnulu basowalecnunogale aiibong.

<sup>27</sup> Inguc ainelebong sifu bole sugucnehab doickolec balu gaiba. Bagacu dameng bocyac gung-gboli galu nosing nga misale homalu gaiba. Ailu nosing-sawe gaiba. Aime dameng bocyac ngakpi-kpolucte basackelu aibibiyelu tilodi homacne bacnume gaiba. <sup>28</sup> Ailu umac yogo sugu miyac, na hadengsoc Yesule habu sasawa damongebanogale ngagelu ngageboc ailu bole umacnehab balu gagabac. <sup>29</sup> Habu yengelacni monicti tapili mikac aime, na yogolec inguchac tapiline wacaigac. Aime yengelacni monicti agoine monic fuluckeme bikic bafuwame, yele umac yogo nganibe kwelena dac ingucne lobecaigac.

<sup>30</sup> Na soc bafefele mi ainelegac. Aimebac wacne bafenogale mibe, wiyc gocnedi tapiline bawawecete ngagelu bafelu midacte. <sup>31</sup> Na yowa kwesacine mi migabac, yogo Sugucnenonggeng Yesu Kristo yele Mamac nga Wapong, yedi ngagegac. Yela mimitengti mimiteng fagidaicte. <sup>32</sup> Na Damasko taonka gabe ngictau Aretasle gawanadi na bacnuningte taonte odale nuina damongfocine locebawec. <sup>33</sup> Locebame alingfocne yengi na baficnulu uficka umengnulu taonte odale gbelong nuwa yefe locnubong oda lobina haulu yele molewacni hangoc hikeiba.

## 12

### *Poldi wiyc nganiwec*

<sup>1</sup> Funginene gocne taockelu wacne bafebe, yogodi ngenge nalic mi baficngebadaicte. Ailu sifu yogo migabachac. Sugucnedi gung-didicka edalicnulu yowa sangkeicne milu edocnuwec, yogo minogale aigabac.

---

**11:21:** Filp 3:5    **11:23:** Sale 16:23    <sup>†</sup> **11:24:** Grik yowawa yowa yanguc fagac, “40 yogowacni moniyang sugu hegileibong.” Aibaba yogolec fungine Yefe-yowa 25:2-3 iwa migac, hudu 40 nalic wedaingte. Aime Yuda ngic yenge yefe-yowa mi hegiledaingkale ngagelu moniyang hegilelu 39 sugu wecebalu gaibong.    **11:25:** Sale 16:22; 14:19    **11:26:** Sale 9:23; 14:5    **11:32:** Sale 9:23-25

<sup>2</sup> Ngic monic Kristoholec wetackelu gagac, ye ngagegabac, ye honocmeng habackang.\* Wapongti iwa fuluckeme fewec. Aime yakumac gabeng hifaine 14 aigac. Ailu ye sockolec fewec me socine hegilelu fewec, yogo mi ngagegabac, Wapontibac yogo ngagegac. <sup>3</sup> Na ngic yogo ngagegabac. Ailu ye sockolec me socine mikac fewec, yogo mi ngagegabac, Wapongti ngagegac. <sup>4</sup> Ngic yogo ye fuluckeme felu Wapongte mac madicnebenang iwa galu yowa gocne ngicti mimilesoc miyac. Ailu mi minogale aka-yowaineholec fagac, yogo ngagewec. <sup>5</sup> Na ngic yogolec wacine bafedacte. Naneicne wacne mi bafedacte, miyac. Na tapiline waicne. Ilec ailu funginene bafelu migabac.

<sup>6</sup> Naneicne soc bafenogale angacne fadecka, yogo kwele-sifuc yowa mi aidec, yowa noine midacte.<sup>†</sup> Ailu ngic yenge yogo ngagelu mimiteng ainelelu socne bafedaingkale, hegilegabac. Ngic-nigigac nganicnucaigaing, me siducne ngagecaigaing, yefe yogowa sugu nale fungine ngagesicaigaing.

### *Wiyac monic*

<sup>7</sup> Wiyac feicne sangkebenangkeicne milu edocnuwec. Yogolec ailu socne bafebele Wapongti mi ngagewec. Ilec na wiyac monic somang ingucne socna fikewec fagac, yogo Satangte bolele aleng monicti doic nelecaigac. <sup>8</sup> Neleme wiyac yogo socnacni baickenale Sugucne sanangne milockebe alecine habackang biyachac aiwec. <sup>9</sup> Aime Sugucnedi yanguc edocnuwec, "Nale kwele-madicti ga andocgulu fadaicte. I yangucte, nale tapilidi tapili-wawa yogolec gagawa bucbuchac yegengkegac." Inguc miwecte yanguc ngagegabac, Kristole tapilidi somecnunale tapiline waicne yogo bafelu midacte. <sup>10</sup> Ilec ailu na tapili-wawa nga umacka gabe midelec ainelelu weyebic ainelebong kwele-umac ngagecaigabac. Inguc ainelebong Kristole ailu umac yogolec angacnugac. I yangucte, na tapiline waicne galu yogowahac tapiliholec aicaigabac.

### *Poly salecebaicne noine*

<sup>11</sup> Ngengi kpafengnuibongte ailu kwele-sifuc ngic ingucne aigabac. Ngenge ngengungnihac nale bole edalicebabong madickedeck. I yangucte, na ngic omane gaibawa, sifu salecebaicne ngic feicnetowa wacebaibong, yogo yengele wamicne monic mi gacaigabac. <sup>12</sup> Na ngengele hewacka bolene umackolec balu sanangne gaiba. Yogo ngengi ngagesingkeningte pasile maaine haicine monic-monic, nga pasi mi ngani-nganiine ailu pasi damuineholec fikengelewec. Salecebaicne yengele bolele maa yogo babe fikelu yegengkeme nganiibong. <sup>13</sup> Ailu Yesule habu gocne yengele hewacka bole baiba, yogo ngengeholec galu silicine monic baiba, ngenge inguc ngagegaing, me? Wiyac moniyang sugu fagac, na moneng-mafale ailu umac monic mi bafuwangeleiba. Yogo nganibong sowacne aiibawa, ngenge nale sowacne yogo hegiledaing.

### *Hikenogale efeckeicne*

<sup>14</sup> Ngagegaing, ngengela hatacmac funogale efeckegebac, fube alecine habackang aidaicte. Fulu socte babaficte umac mi ngeledacte. Adu-madec yengi nenggac-mamac yengele wiyac mi bakpaduc aidaingte, miyac.

\* **12:2:** Polle damengka ngic gocne yengi ngagelu yanguc milu gaibong, honocmeng habackang fagac. Monic yogo sawawa kaguwa nga nango gagaing. Nga monic yogo sawawabenang asocmeng nga tamacne gagaing. Nga monic yogo Wapongte mac ngiye-ngiye fagac. Ilec honocmeng habackang wackelu gaibong. † **12:6:** Yowa noine, yogo Pol yeicnele ngagelu ngic monic miwec. **12:7:** Yop 2:6   **12:9:** Filp 4:11-13   **12:11:** 2Kor 11:5   **12:12:** Rom 15:19   **12:13:** 2Kor 11:9

Nenggac-mamac yengibac adu-madecfocngineng yengele wiyac bakpaduc aidaingte. Ilec na woc-wiyacngineng banogale mi fudacte, miyac. Na ngengele ailu fudacte. <sup>15</sup> Ailu ngengi gagangineng madickenale ailu na moneng-mafa fanelegac, yogo kwele-madiccka nalic baficngebalu longeledacte. Ailu yogo sugu miyac, naneicne gaga inguchac bucbuchac ngengele kwele-ilucte ailu nalic hegiledacte. Na ngengele kwelenedi ago bacngebalu angac sugucne ngagegabacka, ngenge omale nale angac kpisicnemac ngagegaing?

<sup>16</sup> Na umac monic mi bafuwangeleiba, ngenge yogo yakumac hocne ngagegaing. Aime na kwesac-ngic, mic-heloc ailu wiyacngineng ewalicngebaiba, ngenge inguc ngagegaing, me? <sup>17</sup> Ailu ngic salecebabe fuibong, yengi nale ngagesilu wiyac monic ewalicngebaibong, me? Yogo miyac. <sup>18</sup> Ailu nani Titus ngengela finale sanangne edobe ngic hae-gbanonggeng monic yeholec momoc salecepabe fuiboc. Fulu Titusdi inguchac wiyac monic ewalicngebawec, me? Yogo miyac. Noke asu moniyang balaibelu gagabelec, me? Oc, noke aibaba moniyang balaibebeb.

### *Ngagebochte yowa*

<sup>19</sup> Nonge funginenonggeng mibeng madickenale migaining, ngenge inguc ngagesigaing, me? Yogo miyac. Agofocne kwelenedi ngengele angac ngagegabac, nongebac Kristoholec wetacke galu Wapongte haicka yowa migabeleng. Ailu ngenge locngebabeng sugulelu sanangkeningte bole sasawa bagabeleng. <sup>20</sup> Na ngengela fulu ngagebe ngenge nale angac mi balaibedaingte. Ailu ngenge inguchac nale mi angacngebadaicte. Ilec ailu hangocnugac. Ngenge yowangineng mife-miwa nga hasowac ailu, aalic ngagelu bonec nono galu, sulecebalu, gube kwelu, socngineng bafelu, kwelemoniyang mi gabong, ngenge silicneng ingucne nganicngebadackale, hangocnugac. <sup>21</sup> Aime fulu ngengelacni ngic-ngigac bocyac yenge bikic bafuwalu aibaba wonongkolec, nga selo-boic aibaba ailu gaibong. Ailu gaga kosa gaibong, aibaba sasawa yogo mi hegileibong. Yogo yenge nganicebalu hii kwele-sowackolec aibe, Waponti ngengele haicka bacnu wadaickale, hangocnugac.

## 13

### *Kristo ye tapiliineholec gagac*

<sup>1</sup> Na hatacmac ngengela funogale ngagegabac, iwa fube dameng habackang aidaicte. Yowa yanguc kwelengkeicne gagac, "Ngic yaeckang me habackang yenge yowanginengti moniyang aidaictewa, ngenge bikic-baba ngicte yowa nalic wosaelu noine midaingte." (*Yef 19:15*)

<sup>2</sup> Inguc aime na fube alecine yaeckang aiwec, iwa bikic-baba nga Yesule habutowa ngenge sawang-yowa milu yowa edocngebaiba. Aime yakumac yowa yogo dalicka galu hatacmac kwelengkenelegabac. Ilec ailu na hat-acmac ngengela hefaliye fudacte, dameng iwa ngic-ngigac gocne ngenge bikickacni kwele-hefaliyec mi aibong, ngenge mibating sanangnehac aingeledacte. <sup>3</sup> Kristole bole yogo ngengela tapiliine mi wacaigac, miyac, ye bole tapiliineholec bacaigac. Aime micna yowaine noine micaigabac me miyac, yogolec ngengi uwaibong. Na ngengela hefaliye fulu yowa mibating aingelebe yele tapiliwa yowaine micaigabac, yogo ngage-motodaingte. <sup>4</sup> Aime ye socine tapili mikac ingucne aime, malicpongka webong homawec. Homame Waponti ye bafangkeme fangkelu yakumac yele tapiliwa gagac.

Nonge ye ingucnehac yeholec wetackelu tapili-wawa gagabeleng. Aime yeholec wetackebeng, Wapongti locnubame yele tapiliwa, ngengela bole balu gbolicne gadabelengte.

### *Gagangineng ngani-wosaec aidabiyeng*

<sup>5</sup> Aime ngenge ngage-ngagesingkolec gagaing me miyac, yogolec ngen-gungtihic filesoc filesoc wosaecnagulu lokwesacka lonagudaing. Aime Kristo Yesu ye kwelegona gagac, yogo mi ngage-motogic, me? Ga lok-wesacka wawedengka, ibac ngage-motodeng. <sup>6</sup> Inguc aibong nonge momochac lokwesacka mi wawegabeleng, ngenge yogo bafuwaningte ngage-sigabac. <sup>7</sup> Ngenge aibaba sowacne monic mi aidaingte. Nonge yogolec ailu Wapong milockelu gagabeleng. Nonge lokwesacka sanangne domaga-beleng, ngic-ngigac yogo nganiningte ailu mi ngagegabeleng. I yangucte, nonge lokwesacka wawegabeleng, gocne yengi inguc ngagegaingka, yogo nalic aigac. Aimebac ngenge aibaba madicne ailu gagaing, yogodi feicne aigac. <sup>8</sup> Nonge yowa nga aibaba noine nalic mi hekecnodabelengte, nonge yowa nga aibaba noine bafickegabeleng. <sup>9</sup> Nonge tapili-wawa gaebengka ngenge tapilinginengkolec gabong belyegabeleng. Ailu ngenge Kristoholec wetackelu sugulelu sanangkeningte inguchac milockelu gagabeleng. <sup>10</sup> Sugucnedi bole-yowa yago neleme na ngic-ngigac ngage-ngagesingkolec sugulelu sanangkeningte bole-yowa tapiliineholec yago balu gagabac. Nga ngenge basowalecngebanogale monic mi miwec, miyac. Ilec na dalicka galu ngengele hibi yago kwelengkegabac. Gacgu ngengela fudacte, dameng iwabac sugule-sanang aidabiyengtewa, mibating yowa sanangne nalic mi midacte.

### *Yowa moto-motoine*

<sup>11</sup> Ngic hae-gbafocone, na yowa mimoctolu yanguc migabac, ngenge behiyelu Kristoholec wetackelu sugule-sanangkedabiyeng. Ailu kwelengineng basanangkelu ngage-ngage moniyangka galu kwele-mogung bafuwad-abiyeng. Inguc aibong Wapong, kwele-angac nga kwele-mogung fileinedi, ngengeholec gadaicte. <sup>12</sup> Ngenge Wapongte bingec gagaingte aibaba madicne balaibelu molewa babac ainagulu\* wenac-madic minagudaing. Wapongte bingec sasawa yenge wenac-madicngineng salebong ngengela fugac. <sup>13</sup> Sugucnenonggeng Yesu Kristole kwele-madic, nga Wapongte kwele-angac, ailu Tili Asule kwele-moniyang, yogodi ngic-ngigac sasawa ngengela fagidaic.

Yogo foinac.

---

**13:4:** Filp 2:7-8    **13:5:** 1Kor 11:28    **13:10:** 2Kor 10:8    \* **13:12:** Polle damengka yenge molewa babac ainogale bafaliyelu yanguc kwelengkewec, "muducnagudaing."

## Poldi Galata **Habu Yengele Hibi Kwelengkeyelewec**

### *Mimi-yegengyowa*

Galata yogo prowins monic. Poldi lolickelu taon bocyac iwa Yesule siduc edocebame ngagesingkebong Yesule habu gocne fikeibong. Pol lolickelu hikeme lobeina wewedu gocne lolickelu yowa yanguc taockelu edocebaibong, "Wapongte gaga banogale Yesu sugu ngagesingkebong andoine mi aigac. Ngage-ngagesing yogo yanguc taockedaiung, Yuda ngic-ngigac yengele yefe-yowa nga aibaba momoc balaibedaing." Poldi kwsac-yowa ingucne fikewecte ngagelu ung-yowa yago kwelengkeyelewec. Yesu homalu homackacni gholiyelu fangkeme hifa 16 ngama ingucne motome, Poldi hibi yago kwelengkewec.

### *Yowa yago hibi nebocina fagac*

1:1-5 Wenac-madic yowa

1:6-2:21 Ngenge wewedu kwesacine yengele yowa mi ngagedaing

3:1-4:31 Ngage-ngagesingte yefewa sugu Wapongte gaga badaingte, aibabale yefewa miyac

5:1-6:10 Kristodi baficngebame Tili Asule yowa ngagelu gaga gbolicne gadaingte

6:11-18 Yowa moto-motoine

### *Kwele-madic yowa*

<sup>1</sup> Na Salecebaicne Pol. Ngic yengi bole-yowa yago mi neleibong. Me ngic monicti bole yagolec yefe mi bafuwanelewec, miyac. Yogo Wapong Mamacti, Kristo homackacni bagboliywec, ye nga Yesu Kristo yeki yefe yago bafuwaneleibocte bole yago balu gagabac. <sup>2</sup> Na nga ngic hae-gbafocne momoc gagabeleng, nongi Yesule habu Galata prowinswa gagaing, ngengele hibi yago longelegabeleng.

<sup>3</sup> Mamacnonggeng Wapong nga Sugucnenonggeng Yesu Kristo, yekele kwele-madic nga kwele-mogungtowadi ngengela fadaic. <sup>4</sup> Ye Mamacnonggeng Wapongte ngage-ngage nga angacine balaibelu nongileng bikicte ailu yeicne gagaine hegilewec. Inguc ailu kindololo dameng yanguctihac gagabeleng, yogowacni baicnubanale gagaine hegilewec. <sup>5</sup> Ilec ailu yela wac feicne moto-motoine mikac safegidaic, yogo foinac.

### *Kristole Siduc Madicne sugufagac*

<sup>6</sup> Kristodi kwele-madic aingeleme ngenge balaibeningte Wapongti wacngebawec. Aimebac ngenge ye biyacbenang hegilelu hikegacgu Siduc Madicne yogo silicine monicte hedec lolu balaibecaigaing, yogo nganibe wiycac sowacnebenang aime kwatackegabac. <sup>7</sup> Ilec ailu siduc yogo Siduc Madicne miyac. Ngenge Kristole Siduc Madicnele yefe balaibeningte aingeleme, ngic gocnedibac ngenge kwele basifuc aingelelu Kristole siduc taockelu basowalecaigaing. <sup>8</sup> Ailu Siduc Madicne nonge biyachac edocngebalu wedungeleibeng, yogobac nonge me honocmengkacni angelo monicti, yogo basifuwelu silicine monic mime yegengkeneledaictewa, ye Wapongte

aalicte bagewa gadaic. <sup>9</sup> Aime yowa biyachac miibeng, ailu yogohac hatac-mac migabac. Ngenge Siduc Madicne biyachac ngagelu angacngebaweka, monicti yogo basifuwelu silicine monic mime yegengkeneleidaictewa, ye Wapongte aalicte bagewa gadaic.

<sup>10</sup> Aime na yakumac yowa migabac, yogo ngic-ngigac yengi na ngage-madickenelingte mi migabac. Yogo Wapongti ngage madickenale ailu migabac. Na ngic-ngigac yengi nale ngagebong madickenale bole badaba midec, Kristole kwelecia kwekwe nalic mi gadaba.

### *Polle bolele fungine*

<sup>11</sup> Ngic hae-gbafofne, Siduc Madicne mibe yegengkecaigac, ngage-ngage yogo ngic mimiwacni miyac, yogo edocngebabe ngagegaing. <sup>12</sup> Ngic monicti mi mime ngageiba, me monicti mi wedunelewec, yogo miyachenang. Yesu Kristo yeuctihac hocne yogo bayegengkelu wedunelewec. <sup>13</sup> Na esecne Yuda ngic-ngigac yengele ngage-ngagewa galu aibaba aiiba, ngenge yogobac ngagegaing. Na Wapongte habu homacne hac weyebic aiyelelu basowalecebaiba. <sup>14</sup> Ailu Yuda ngic-ngigac nongele yefe-yowa nga ababawa ngage-ngagenedi sugulegacgu Yuda ngic-ngigac agofocne yenge homacne ewalicebaiba. Ailu ngesa-ngambofocne yengele yefe balaibelu mamang hidulu gaiba.

<sup>15</sup> Nenggacte gobe kwelina ngiyeebewa Wapong yeuctihac kwele-madic moc ainelelu bawosaecnulu ngageboc mikac wacnuwec. <sup>16</sup> Ailu yeicne angacine balaibelu yeuctihac madecine edalicnume nganilu Madecinele siduc yogo Israel yengele alingkacni miyac, yengela mibe yegengkenale inguc ainelewec. Aime na dameng yogowahac gacgu wenuc ainogale ngic gocne mi-uwac monic mi aiyeleiba. <sup>17</sup> Ailu ngic molickelu salecebaicne aiibong, yenge nganicbanogale Yerusalem iwa mi hikeiba, miyac. Nabac Arebia himongka sugu hike galu hatacmac Damasko hefaliye kwesiiba.

<sup>18</sup> Iwa gabe hifa habackang motome, Pita<sup>\*</sup> nganinogale Yerusalem hikelu hadeng 15 yeholec gaiba. <sup>19</sup> Aime iwa gacgu salecebaicne monic mi nganicebaiba. Na Sugucne Yesule gbande Yakobos sugu nganiiba. <sup>20</sup> Ngagegaing, yowa kwelengkebabac, yogo kwesac miyac, yogo Wapongte haicka foinac migabac.

<sup>21</sup> Aime yogolec lobeina Siria nga Silisia prowins iwa hikelu lolickeiba.

<sup>22</sup> Aime Yudeya himongka Kristole habu gaibong, yengi na monic mi nganicnuibong. <sup>23</sup> Yenge nale yowa-siduc yanguc sugu ngagelu gaibong, "Ngic yedi esecne weyebic ainolewec, ye ngage-ngagesingte Siduc Madicne basowalewec, yogo yakumac ngic-ngigac milu edocebame yegengkecaigac."

<sup>24</sup> Yenge inguc ngagelu nale ailu Wapong wacine bafeibong.

## 2

### *Kwele-moniyang aiibong*

<sup>1-2</sup> Aime hifa 14 motome Wapongti mime yegengkeme salecnume na hatacmac Yerusalem iwa hikeiba. Dameng iwa Banabasholec noke Titus mengockebec nonge momoc hikeibeng. Iwa hikebeng ngic micne gaibong, yenge Siduc Madicne Israel yengele alingkacni miyac, yenge edocebalu wedyelelu gaiba, yogolec siduc yenge filesoc filesoc mibe yegengkeyelewec. Na esecne miiba, nga yakumac milu gagabac, bolene yogodi sifuwelu

**1:8:** 1Kor 16:22      **1:10:** 1Tim 2:4      **1:11:** Mat 16:17      **1:13:** Sale 8:3      **1:14:** Sale 22:3

**1:15:** Yes 49:1; Gal 2:7      \* **1:18:** Grik yowawa Pita wacine monic Kefas fagac.      **1:18:** Sale 9:26

**1:21:** Sale 9:30      **2:1-2:** Sale 15:2

noine mikac aidaickale, yowa yogo mibe yegengkeyelewec.\* <sup>3</sup> Aime kwelemoniyang aibong Titus ye Grik ngicti naholec kwesiwec, ye soc tofaine helockingte Yesule habu yengele micnefocngineng yengi monic mi miibong. <sup>4</sup> Ngic gocne yenge nongileng agofocnonggeng ingucne kwesac ailu gai-bong, yengi sugu Titusle soc tofaine helockingte inguc miibong. Kwesac-ningc yogo yengi akikic kwesilu hewacnonggang galu Kristo Yesudi yefeyowale muckacni bacnubawec, yogolec nganibiyecnubaibong. Inguc ailu Yuda ngic-ngigac yengele yefe-yowadi hefecnubanogale aibong. <sup>5</sup> Yogolec Siduc Madicnele yowa noine ngengela sanangne fanale nonge damengmac bangkacne kwesac-ningc ingucne yengele yowale bagewa monic mi gaibeng, miyac.

<sup>6</sup> Ailu bole balu ganogale milu ngic micne yengi iwa wiyc monic taockelu ainogale mi edocnuibong, miyac. Ailu yenge esecne wenuc gaibong, yogo nalic mi ngagesidakte. <sup>7</sup> Yengebac yanguc nganiibong, Waponti Pita ngic soc tofangineng helockeicne yengela Siduc Madicne mime yegengkenale bole-yowa lacname damongkewec. Ingucne hac na ngic soc tofangineng mi helockeicne, yengela Siduc Madicne mibe yegengkenale bole-yowa neleme damongkegabac. <sup>8</sup> Waponti Pita bole tapiliineholec banale ailu saleme ye ngic soc tofangineng helockeicne, yengele hewacka salecebaicne bole bawec. Nga na ingucne hac bole tapiliineholec banogale salecnume Israel yengele alingkacni miyac, yengele hewacka salecebaicne bole balu gagabac.

<sup>9</sup> Aime Yesule habu yengi ngic sugucnefocngineng ngani-motocebaibong, yogo Yakobos nga Pita<sup>†</sup> ailu Yoane. Yenge Waponti kwele-madicti nala fawecte, yogo ngani-motolu yenge na nga Banabas nokeholec kwelemoniyang ailu molenonggac baibong. Balu yanguc miibong, "Ngeke Israel yengele alingkacni miyac, yengela Siduc Madicne miboc yegengkeyeledaic. Nga nongibac ngic soc tofangineng helockeicne, yengela Siduc Madicne mibeng yegengkedaic." <sup>10</sup> Inguc milu yowa moniyang sugu yanguc taockelu mibong, "Ngeke ngic-ngigac waweweine, yengele umac nganilu baficebadabiye." Inguc miibongte na yogo hocne ngagelu mamang hidulu bole sanangne balu gaiba.

### Pitale yowa

<sup>11</sup> Aime Pita ye Antioik iwa kwesilu sowacne ailu yefe lilowec. Ilec ailu nani domalu sowacne aiwec, yogo mifickelu edoiba. <sup>12</sup> Yakobosle aling yenge mi kwesiyebongka ye Israel yengele alingkacni miyac yengeholec nosing nolu gawec. Aime Yakobosle alingkacni ngic soc tofangineng helockeicne gocnedi kwesiibong. Dameng yogowabac Pitadi yengele hangockeme Israel yengele alingkacni miyac yengeholec hatacmac mi ngyielu gawec. <sup>13</sup> Sowacne inguc aiwecte Yuda ngic-ngigac nebocene yenge inguchac yeholec kwesac-aibaba aiibong. Aime Banabas ye inguchac kwesac-aibabangineng yogo balaibelu yefe lilowec. <sup>14</sup> Aime nganicbabé, yenge Siduc Madicnele yowa noine yogolec aibaba mi balaibeibong. Inguc ailu na ngic-ngigac sasawa yengele haicka Pita yanguc edoiba, "Ga Yuda ngic hocne. Ailu Israel yengele

---

\* **2:1-2:** Grik yowawa, Poldi gasac-gasacte nangeng yowa miwec.      **2:4:** Gal 1:7; 5:1,13      **2:7:**  
Sale 22:21      † **2:9:** Grik yowawa Pita wacine monic Kefas fagac.      **2:10:** Sale 11:29-30      **2:12:**  
Sale 11:3

alingkacni miyac, yengele aibaba balaibecaigic. Aime Israel yengele alingkacni miyac yenge omale aiyeleengka Yuda ngic-ngigac aibabanonggeng balaibeningte aigaing? Inguc aiyengka mi madickebac.

### *Yesu ngagesingkelu wasecne ainoga*

<sup>15</sup> Nonge Yuda ngic, nonge Yuda ngic-ngigackacni fikeibeng. Nonge Israel yengele alingkacni miyac, bikic-baba aling yengelacni mi fikeibeng. <sup>16</sup> Ngic monic ye Kristo Yesu ngagesingkeme Wapongti ye ngic dondonne wackedaite, yogo ngagegabeleng. Nga monic ye yefe-yowa balaibelu gagacka, Wapongti ye ngic dondonne mi wackedaite, miyac. Aime Wapongti ngage-ngagesingnonggengte ailu ngic dondonne wacnubanale nongileng yefe-yowa hegilelu Yesu ngagesingkelu gagabeleng. I yangucte, ngic-ngigac yefe-yowa balaibecaigaing, Wapongti yenge ngic-ngigac dondonne nalic mi wacebadaite, miyac. Ye ngic-ngigac Yesu ngagesingkelu gagabiyeng, yenge sugu dondonne wacebadaite.

<sup>17</sup> Gocene yengi nongileng yanguc micaigaing, "Yenge Kristole ngage-  
ngage dondonne bafuwansonale ailu bikickolec aigaing." Inguc fadecka  
midec, Kristodi bikicte yefe bafickedec ingucne aidecka, yogo miyacbenang!  
<sup>18</sup> Na yefe-yowa yogo biyachac hegilelu baickeiba, yogo hatacmac aidacte,  
ibac bikic bafuwadacte. Ilec ailu na hatacmac aibaba esecne mi aidacte,  
miyac. <sup>19</sup> Aime yefe-yowadi bikicne edalicnume Wapongkolec ganogale  
ailu homalu yefe-yowa yogo hegileiba. Na Kristoholec malicpongka momoc  
weccupabong domaibec.

<sup>20</sup> Ilec ailu naneutihac hatacmac gaga yago mi gagabac. Kristodi nale  
kwele kwelina gagac. Ilec yanguctihac sockolec galu Wapongte Madec ngage-  
singkebe yedi gagana aibaba madicne bame wakeneledaite. Yedi hocne  
kwele-angacka ago ainelelu nale ailu yeicne gagaine hegilewec. <sup>21</sup> Wapongte  
kwele-madic kwelena mi hegiledacte. Monic ye yefe-yowa balaibecaigac,  
Wapongti ye ngic dondonne yogo nalic mi wackedaite, miyac. Yogolec ailu  
Kristo ye malicpongka homawec. Aime yefe-yowadi tapiliineholec fadecka  
Kristole homac yogo wiyac omane aidec.

## 3

### *Ngagesingkelu noine bafuwansonoga*

<sup>1</sup> Galata ngic-ngigac, ngenge ngage-  
ngage-motocngineng mikacbenang.  
Yesu Kristo malicpongka webong domawec, ngenge yogo ngage-motoninge  
haienginang yowa andoine wedungeleibeng. Aime ma ngicti kwesacnge-  
balu ngage-  
ngagengineng basifuweme ngenge inguchac gagaing? <sup>2</sup> Wiyac  
moniyang sugu uwangelebe bafaliyening, ngenge oma yefewa Asu baibong?  
Yefe-yowa balaibeibongka, me Siduc Madicne ngagelu ngagesingkeibongte  
ailu Asu baibong? Ngagegaing, ngenge ngage-  
ngagesingka Asu baibong.  
<sup>3</sup> Ngenge Asuholec gaganganengti molickeweckacni yakumacbac socngi-  
nengte gagawa hatacmac gagaing, me? Ngenge aibaba kapainebenang ailu  
gagainghac, me? <sup>4</sup> Ngenge esecne Yesule ailu doic moc ngageibong, me?  
Aime yakumacbac yogolec noine akikic hegilegaing. <sup>5</sup> Wapongti Asuine  
ngelelu pasi damuineholec hewacnginang balu gagac. Aime yefe-yowa balu  
gabong, me Siduc Madicne ngagelu ngagesingkeibong pasi yogo fikegac?  
Ngagegaing, ngenge ngagesingkegaingte ailu pasile maaine balu gagac.

<sup>‡ 2:14:</sup> Poldi Pitale yowa mime motowec, yogo ngic gocene yenge kwele-yaec ailu yanguc ngage-  
caigaing. Aling 14 me 17 me 21 yogowa Pitale yowa motowec. <sup>2:16:</sup> Sale 15:10-11; Rom 3:20-28;  
Gal 3:11 <sup>2:20:</sup> Gal 1:4

### *Ngage-ngagesingte yowa*

<sup>6</sup> Yogo yanguc fikewec,  
“Abraham ye Wapong ngagesingkewecte ailu, ye ngic dondonne wackewec.”  
(*Fike 15:6*)

<sup>7</sup> Ilec ailu ngic-ngigac Wapong ngagesingkelu gagabeleng, nongileng Abraham gbolifocene aigabeleng, ngenge yogo ngage-motodaing. <sup>8</sup> Ailu Wapongti Israel yengele alingkacni miyac, yenge ngage-ngagesingte ailu ngic-ngigac dondonne wacebadaicte. Ye Siduc Madicne yogo lobewa fikenale esecne hac Abraham edowec. Aime yogo Wapongte hibiwa yanguc kwelengkeicne fagac,

“Himongka ngic-ngigac habutowa gagaing, yenge sasawa gale madicte aimadickeyedacte.” (*Fike 12:3; 18:18; 22:18*)

<sup>9</sup> Abraham ye Wapongte yowa ngagesingkewec, ingucne hac ngic-ngigac yenge Wapongte yowa ngagesingkedaingte, yenge Abraham kolec momoc mimi-madic milu edocebadaicte.

<sup>10</sup> Ngic-ngigac yenge Wapongte yefe-yowa balaibecaigaing, yenge sasawi Wapongte aalicte bagewa gagaing. Wapongte hibiwa yogolec yowa monic yanguc kwelengkeicne fagac,

“Ngic-ngigac yenge Wapongte yefe-yowawa yowa kwelengkeicne fagac, yogo sasawa balaibelu yogowaci monic hegiledaingte, yenge Wapongte aalicte bagewa gagaing.” (*Yef 27:26*)

<sup>11</sup> Wapongte hibidi inguchac yanguc migac,

“Monic ye ngage-ngagesingkolec, Wapongti dondonne wackeme gaganang gadaicte.” (*Hab 2:4*)

Aime wackedaicte, iwacni monic ye Wapongte yefe-yowa balaibecaigaic, Wapongti yele dondonne mi wackedaicte, miyac. <sup>12</sup> Wapongte yefe-yowadi ngage-ngagesingte yowa mi bayegengkedaicte. Aime yowa monic yanguc sugu mimiine fagac,

“Monic ye yefe-yowa sasawa balaibedaicte, ye yefe iwa gagaineholec ailu gadaicte.” (*Dep 18:5*)

<sup>13</sup> Nonge yefe-yowa sasawa mi balaibelu Wapongte aalicte bagewa gabeng Yesudi amenonggeng balu fuli bacnubawec. Ailu yowa yanguc kwelengkeicne fagac,

“Ngic-ngigac sasawa yocka gbedicebabong domacaigaing, yenge Wapongte aalicte bagewa gagaing.” (*Yef 21:23*)

Kristodi malicpongka Wapongte aalicte bagewa gawecte yefe-yowale umackacni bacnubawec. <sup>14</sup> Wapongti Abraham mimi-madic milu lacnowec, yogodi Yesule ailu Israel yengele alingkacni miyac, yengela hikeyackenale Kristo Yesudi fuli bacnubawec. Inguc aime Wapongti yowa mipangkewec, yogo balaibelu nongileng Yesu ngagesingkebeng Asu nolewec.

### *Wiyac moc noledaicte*

<sup>15</sup> Ngic hae-gbafofne, na ngic aibabanonggeng fagac, yogolec silicina edocngebabe ngagegaing. Monicti dodofticte yowa mime monicti yogo nalic mi hegiledaicte, me yowa monic yogolec feina mi taockedaidaicte. <sup>16</sup> Wapongti Abraham nga ngamboine yeke wiyc gocne yetenale yowa mipangkewec, yogo ye ngambofocene homacne yengele mi miwec. Ye ngic moniyangte sugu yanguc miwec, “Ngambogone.” Ngic ye hocne Kristo.

**17** Na ilec ailu yanguc migabac, Wapongti Abrahamkolec dodofic balu mipangkewec, yogo gacgu hifa 430 motome, hatacmac Mosesholec yefeyowa miwec, yogodi mimipang esecne nalic mi ewalidaicte me baickedaicte. **18** Aime yefe-yowa balaibegacte Wapongti gagale wiyac nalic mi lacnodaicte, Wapongte mimipangka sugu gagale wiyac nalic badaicte. Aime Wapongti Abraham moc bamadickelu mipangkelu gagale wiyac lacnowec, yogodi mimipang mipangkeicnele gagale wiyac bawec aigac. Ye yefe-yowawa nalic mi badaicte.

**19** Inguc fikedecka midec, omalebac yefe-yowa loicne fagac? Yogo aibaba sowacne aibong yefe-yowadi edalicebadaicte. Wapongte yefe-yowa fame-hac gacgu Abrahamte gbolile mipangkewec, ye fikewec.

Aime kwele-moniyang fikenale angelo yengi yefe-yowa balu ngic hewacngineng Moses lacnoibong. **20** Ngic hewacine yedi aling moniyangte yowa mi midaicte. Aime Wapong ye moniyang ailu yeicne mimipang yowa sugu midaicte.\*

**21** Wapongti Abrahamta yowa mipangkewec, yogo yefe-yowadi welock-egac, me? Yogo miyacbenang. Wapongti yefe-yowa nolewec, yogodi gagasanang nalic mi noledaicte, miyac. Ilec ailu ye yefe-yowale ailu ngicngigac dondonne nalic mi wacnubadaicte, miyac. **22** Ngic-ngigac Yesu Kristo ngagesingkebong Abrahamte yowa mipangkewec, yogo yeledaicte. Inguc fikenale Wapongte yefe-yowale hibidi yanguc edalcnubawec, ngic-ngigac sasawa nongileng bikiti witicnubame bageina gaibeng.

**23** Ngage-ngagesing mi fikeemewa nongileng muc-macka ngiyebeng yefe-yowadi damongnubawec. Aime ngage-ngagesing fikeme umac yogo miyac aiwec. **24** Aime yefe-yowadi damongnubalu wedunoleme gacgu Wapongti ngage-ngagesingte ailu dondonne wacnubanale Kristo lome fikewec. **25** Aime dameng yagowa ngage-ngagesingte yefe dononna gaga yogo biyac fikewec. Ilec ailu yefe-yowale bagewa hatacmac mi wedunoleme gagabeleng.

**26** Ngenge sasawadi ngage-ngagesingka Kristo Yesuholec wetackelu Wapongte adu-madecfocine aigaing. **27** Nga ngic-ngigac Kristoholec misa-lowac aiibong, ngenge sasawa silicngineng yanguc, Kristodi ngakpi-kpolucngineng ingucne aime ngenge ye socnginang holebong hauwec. **28** Yogo Yuda ngic-ngigac me Grik ngic-ngigac, me kwele kwekwe me damongngine, me ngic me ngigac, ngenge aling monic-monie mi aigaing. Ngenge sasawadi Kristo Yesuholec wetackelu aling moniyang aigaing. **29** Aime Kristoholec wetackegaing, ngenge Abraham ngambofocine galu Wapongte mimipang bagaing.

## 4

### *Wapong adu-madecfocine*

**1** Na yanguc ngagelu migabac, madec monicti mamaccine homawecte mole-damocine yeicne ainale ngagedaicte. Ailu ye madec hakite ailu yoglec wangec gagac, ye wacine mikac galu kwele kwekwe ingucne gadaicte. **2** Ye yeicne hole-gumec mamaccine nga ngic mole-damoc moc damongkegac, yekele bagewa gaemewa mamacinedi dameng miwec, dameng yogo kwesime mafaine bame yeicne aidaicte. **3** Nongileng ingucbac inguc gaibeng.

---

**3:17:** Wah 12:40    **3:18:** Rom 4:14    **3:19:** Rom 5:20; Sale 7:38    \* **3:20:** Ilec ailu Wapongti Abrahamta mipangkewec, yogodi Mosesle yowa ewaligac.    **3:21:** Rom 8:2-4    **3:23:** Gal 4:3    **3:24:** Rom 10:4    **3:26:** Yoa 1:12    **3:27:** Rom 6:3    **3:28:** Rom 10:12    **3:29:** Rom 4:13

Adu-madec gaebengka himongte aleng yengi kwelec kwekwe bacnubabong yengele bagewa gaibeng. <sup>4</sup> Gaebengka dameng miicne, yogo kwesime Wapongti yeicne Madecine saleme wawec. Ye yefe-yowale bagewa ngigacta fikewec. <sup>5</sup> Fikelu ngic-ngigac yefe-yowale bagewa gagabeleng, nongileng iwancri fuli bacnuba ofelu yeicne madecine ingucne hole-gumec ainolenale lowec.

<sup>6</sup> Ngenge adu-madecfocine aigaing, yogolec ailu Wapongti Madecinele Asu saleme kweleonggang galu nongeholec yanguc aukwelu hiyalu gagac, "O Mamacne." <sup>7</sup> Ilec ailu, ga hatacmac kwelec kwekwe mi aidamecte. Ga Wapongte madecte mac ngiye-ngiye baengka yedi mimipangine miwec, yogo geledaicte.

### *Poldi Galata yengele ngageboc aiwec*

<sup>8</sup> Aime ngenge esecne Wapong mi ngageebongka siduc-gbong nga aleng yengi kwelec kwekwe bacngebaibong. Aime yogo yenge Wapongte silic ingucne miyac. <sup>9-10</sup> Ngenge yanguctihac ngage-motolu Wapong ngagegaining, me yanguc nalic mibe, Wapongti ngenge biyachac ngagecngebawec gagaing. Allu ngenge hadeng gocna nga tamacne gocna ailu gungka dameng nganicaigaing. Nganilu hifale dameng silicine haicina monic monicte ngagebong noine aime yogo balaibelu gacaigaing. Inguc ailu ngenge omale hatacmac hefaliyelu himongte aleng waweweine nga tapilingineng mikac, yengela hatacmac hikelu yengele kwelec kwekwe aling ainingte ngagegaining? Aibabangineng yogodi kpungke-kpungkeine aigac. <sup>11</sup> Na boletowa ngengela baiba, yogo noine mikac aidaickale ailu, ngageboc aigabac.

### *Wiyac fikeyeledaicte*

<sup>12</sup> Ngic hae-gbafocne, na ngenge ingucne gaiba. Ilec ngenge na ingucne hac ainingte dogbac ailu edocngebabac.\* Na ngengi monic mi basowalecnuibong. <sup>13</sup> Socnedi huckolec aiwecte dameng iwa molickelu Siduc Madicne mibe yegengkengelewec, yogobac ngagegaing. <sup>14</sup> Ailu socne huckolete ailu ngenge umac ngelieiba. Aime ngenge mi ngage-sowalenelelu hegilecnuibong, miyac. Ngenge Wapongte angelo monic, me Kristo Yesudi kwesime damongkedabongtesoc na ekongnulu damongnuibong. <sup>15</sup> Aime yakumachac kwele-angacngineng yogo wenuwa fagac? Ngenge molickelu angac homacne ngagelu donge-hucngineng bamoctolu nelenogale silic aibong, ngengele aibaba madicne yogo mibasanang ailu mibe yegengkegac. <sup>16</sup> Na ung-yowa noine edocngebabacte ngenge ngaba aigaing, me? Na yogolec ngagebe kpungke-kpungkeine aigac.

<sup>17</sup> Ngic yenge mudocngebanoale aicaigaing, ngenge yengeholec taock-elu domaninge dacineholechenang micaigaing. Ailu yenge ngengele madicne monic mi ngagesicaigaing, miyac. Ngengi yengele yowale angac ngagelu hegilecnubalu yengela taockeningte, yenge yogolec sugu aiyelegac. <sup>18</sup> Ngenge aibaba madicne balaibeningte bole bagaing, yogo madicne. Aime nani ngengeholec gagabac, yogowa sugu miyac. Aibabá madicne balaibeningte, bole yogo damengsoc sanangkelu balu gadaing. <sup>19</sup> Adu-madecfocne, na ngengele ailu hatacmac doic gado ingucne hicnulu gagac, inguc ailu gabe Kristole aibabadi ngengele kwelewa fike-benangkedaic. <sup>20</sup> Na ngengele ngagelu wenuc aidacte, yogo kpungke-benangkelu ngage-ngage bole balu

\* 4:3: Kol 2:20    4:4: Yoa 1:14; Rom 1:3    4:6: Rom 8:15-17    4:9-10: Rom 14:5; Kol 2:16    \* 4:12: Galata ngic-ngigac yenge Israel yengele alingkacni miyac. Ilec ailu esecne Yuda yengele yefe-yowa mi balaibeibong. Pol ye inguchac Yuda yengele yefe-yowa mi balaibewec.

gagabac. Ailu ngengeholec yanguctihac gadaba midec, sawang-yowane sanangne nalic hegilelu yowa ulucne mibe ngenge yogo balaibedabong.

### *Dodofic yaeckang*

<sup>21</sup> Aime yefe-yowale bagewa ganogale angacngebacaigacte, ailu ngenge hedec lolu yefe-yowa ngagecaigaing, me? <sup>22</sup> Abraham ye madeckecine yaeckang, yowa inguc yefe-yowawa kwelengkeicne fagac. Aime madec monicti ngigacinebenang, yelacni nga monicbac kwelec kwekwe ngigac yelacni. <sup>23</sup> Aime kwelec kwekwe ngigac yelacni madecine ye socte gagale alingkacni fikewec. Nga ngigacbenangngine yelacni fikewec, ye Wapongti Abraham nga Sara mipangkeyetewec, yogowacni fikewec.

<sup>24</sup> Na nangeng yowa monic yanguc holelu migabac. Ngigac yaeckang yeke dodofic yaeckangte sosocene aigaic. Dodofic monic yogo Arebia himong iwa Sinai tikiwa yefe-yowa milu hefeicne yoglec adu-madecfocine yenge kwelec kwekwe gagale bagewa fikelu gacaigaing, yogo Hagadi aigac. <sup>25</sup> Ailu Haga ye Sinai tiki ingucne aigac. Nga Yerusalem yakumac fagac, yogo Hagale sosoc aigac. Yerusalem ye yakumac yeicne nga adu-madecfocine yengeholec kwelec kwekwe mucineholec ailu gagabiyeng. <sup>26</sup> Aime Yerusalem monic honocmengka wilini mucine mikac, Sara yogo nongileng nenggac-nonggengbenang. Ailu Sara nongilengkolec mucine mikac. <sup>27</sup> Aime yele yowa yanguc kwelengkeicne fagac,

"Ngigac hufing kogocgone mikac, ga belic-belicka ganong. Nga ngigac gado monic mi hicguwec, ga tapiliholec beliyelu aukwenong. Ngigac hufing gale adu-madecfocgone yenge homacne hac sawedaingte. Ailu ngigac ngaweineholec yele adu-madecfocine ewalicebagaing." (*Yes 54:1*)

<sup>28</sup> Ngic hae-gbafocne, Wapongti Abrahamkolec yowa mipangkeme Aisak fikewec, ingucne hac Wapongti Yesule ailu yowa mipangkeme yeicne adu-madecfocine fikeibeng. <sup>29</sup> Madec socte aibabale alingkacni fikewec, yedi dameng iwa madec Asule aibabale alingkacni fikewec, ye weyebic aic-nowec, silic ingucnedi yakumac fagac.<sup>†</sup> <sup>30</sup> Aime Wapongte hibidi yoglec ngagesilu yanguc migac,

"Ga kwelec kwekwe ngigac madecineholec welu yebicepaengka hiked-abiyec. I yangucte, kwelec kwekwe ngigac yele madecti ngigacbenangngine yele madeckolec mole-damoc nalic mi badabiyepte, miyac."

(*Fike 21:10*)

<sup>31</sup> Ngic hae-gbafocne, ilec nongileng kwelec kwekwe ngigac yelacni miyac, nongileng ngigacbenangngine yelacni.

## 5

### *Kristodi lukecnubawec*

<sup>1</sup> Nongileng muc mikac ganangte Kristodi yefe-yowale muckacni lukecnubawec. Ilec ngenge sanangkelu domadabiyeng. Ngenge hatacmac yefe-yowale kwelec kwekwe locngebabong gadaingkale, ngani-motolu gadabiyeng.

<sup>2</sup> Ngagegaing, ngenge soc tofangineng helockedainste, ibac Kristolacni babafic monic mi badaingte, na Poldi inguc edocngebabac. <sup>3</sup> Ngic soc

**4:22:** Fike 16:15; 21:2    **4:23:** Rom 9:7-9    **4:26:** Hib 12:22; Miye 21:2,10    **4:28:** Rom 9:7

**4:29:** Yoa 8:35    <sup>†</sup> **4:29:** Dameng iwa Yuda ngic yenge yefe-yowa balaibelu gaibong, yenge yanguc müibong, "Ngic-ngigac Yesu ngagesingkegaing, yenge yefe-yowa inguchac balaibedabiyeng."

tofanganineng helockededaingte, yenge Wapongte yefe-yowa sasawa ngagelu balaibeyackedaing, yogo sanangnehac hatacmac edocngebabac.<sup>4</sup> Nga ngic Wapongte haicka dondonne domalu yefe-yowa balaibeningte ngage-gaing, ngenge Kristolacni hatacmac baicngebabong Wapongte kwele-madic hegilelu lobina gagaing.<sup>5</sup> Aime Asudi bacnubame nongileng ngage-ngagesingka gabeng Wapongti dondonne wacnubadaicte, yoglec wangec gagabeleng.<sup>6</sup> Nongileng Kristo Yesuholec wetackelu gadabelengte, ibac soc tofanganineng helockeicne me mi helockeicne, yoglec ngagebeng wiyc feicne mi aidaicte. Ngage-ngagesingnonggeng balaibelu kwele-angacka ago aiyelelu balu gadabelengte, yogodi sugu feicne aigac.

### *Sawang-yowa*

<sup>7</sup> Ailu ngenge Yesule ngage-ngagesingte yefewa gasackebong ma ngicti yefengineng hedickeme yowa noine hegilelu gagaing?<sup>8</sup> Ngic yogo yengele yowadi Wapong wacngebawec, yelacni mi welegac.<sup>9</sup> Yis kapucine kpisicnemacti sawecaigac, ingucnehac ngic yengele kwasacti sawecaigac.<sup>10</sup> Na Sugucneholec wetackelu ngengele ngagesilu yanguc ngagelu gagabac, ngenge nale ngage-ngage yogo balaibe galu ngage-ngage gocne hegiledaingte. Aime monic ye ngageboc bafuwangelelu gagac, ye bikicte ameine badaicte.<sup>11</sup> Ngic hae-gbafocne, soc tofanganineng helockeicnele yefe yogo mi edocebalu weduyelegabac, yefe yogo biyachac hegileiba. Malicpongte yowa mibe ngic yengi weyebic ainelelu gagaing. Ngic yogo yenge soc tofanganineng helockeningte weduyeledaba midec, ngic-ngigac yenge malicpongte yowale ngaba mi aidabong.<sup>12</sup> Aime ngic gocnedi yowanonggeng kwelu ngengele ngage-ngage basifuwelu gagaing, na yengele kwele-dac ngagegabac. Ailu ngagebe ngic yogo yenge socngineng bucbuchac helockelu baickebong madickedaicte.

### *Asu nga socte gaga*

<sup>13</sup> Ngic hae-gbafocne, ngenge yefe-yowale mucngineng mikac ganingte Wapongti wacngebawec. Ngenge muc mikac gaga yogo gagaingte migbedic yowa milu socnginengte gaga balaibebong mi madickedaicte. Yogo mi fikenale ngenge angacka kweledi dofcnagulu kwelec kwekwe ngic ingucne kwelec kwedabiyeng.<sup>14</sup> I yangucte, yefe-yowadi yoglec momoc kpatuleicne yanguc fagac,

"Gageicne aigelecaigac, silicine ingucnehac ngic-ngigac gale emewa gagaing, yengele kwelegonedi ago aiyelelu angac ngageyelulu gadamec."  
*(Dep 19:18)*

<sup>15</sup> Aime ngenge ngengileng, gocnedi micti minagulu ngaba ainagulu basowalecnagudaingkale, damongngineng balu gadaing.

<sup>16</sup> Na yanguc migabac, ngenge Tili Asudi molickeme hikedaing. Inguc ailubac ngenge socnginengte gagale angac yogo hegiledaingte, ailu mi balaibedaingte.<sup>17</sup> Socnginengte gagadi Asule gaga wecaigac. Nga Asudi socnginengte gaga wecaigac. Yeke ngaba ainagucaigabiyc. Ilec ngenge wiyc madicne ainogale ngagecaigaing, yogo hegilecaigaing.<sup>18</sup> Nga Asudi molickeme hikedaingtewa, yefe-yowale bagewa mi gadaingte.

<sup>19</sup> Aime socnginengte gagale aibaba yogo yanguc yegengkedaicte, selobioic aibaba nga aibaba wonongkolec ailu kosa gagadi wakeicne.<sup>20</sup> Siducgbong alang bacnolu gaga nga hefec-dinac aibaba. Ailu ngabaholec gaga

nga ngenge yowanginengti ngaba silic aicaigaing. Nga hasowac ailu aalicka wiyc ainaoga. Nga bonec nono aibaba, gulu-kwouc ailu habu kwesacine haicine monic-monice fagac.<sup>21</sup> Ailu hasowac nga misa sanangne nobong kwele basifuc aiyelecaigac, ailu aibaba gocne ingucne. Esecne edocngebaiba, ailu yakumac hatacmac ung-yowa milu edocngebabac. Ngicngigac aibaba ingucne balaibecaigaing, yenge Wapongte ngani-damongte gaga nalic mi badaingte.

<sup>22</sup> Asule gaga noine yanguc ainoga. Kwele-angacka dodoxic ailu ganoga, nga belic-belic, ailu kwele-mogungkolec. Nga aibaba ulucne, nga babafic ainagulu, nga aibaba madicne. Ailu ngage-ngagesingkolec,<sup>23</sup> nga uluwelu gaga, ailu aibaba damongkenoga. Yefe-yowadi aibaba ingucne sasawale aka monic mi holegac.<sup>24</sup> Aime Kristo Yesule ngic-ngigac yenge socngi-nengte gaga yogolec kwele fangke-fangke nga angac-heloc, yogo biyachac malicpongka webong homawec.

<sup>25</sup> Asudi gaganonggeng bafuwанolelu, damongkenoleme nongileng ye balaibedabeleng.<sup>26</sup> Balaibelu soc bafele me kwele kwefang ainagulu me hasowac ainagulu mi aidabeleng.

## 6

### *Sanangne domalu baficebanoga*

<sup>1</sup> Ngic hae-gbafocne, ngengelacni monicti bikic bafuwame ngic Asuholec gagaing, ngengi ngic yogo ingucne kwele-ulucka bafickelu edo-bamadic aincnodaing. Ailu ngengileng ingucne hac lokwesacka wawedaingkale, damongnagulu gadabiyeng.<sup>2</sup> Ngenge hewacnginang ngic-ngigac umacngi-nengkolec ngani-bafic aiyelelu gadabiyeng. Inguc ailu Kristole yefe-yowa balaibedaingte.<sup>3</sup> Monic ye feicne mi ailu yeicnele ngageme feicne aidaicte, yebac yeuctihac kwesac ainagudaicte.<sup>4</sup> Ngenge filesoc filesoc aibabangi-neng ngani-wosaec aidaing. Aime monic ye nganime yeicne aibabaine nalic aime, yogolec kwele-madic yeicna fadaic. Inguc facnodaictewa, gocne yengele aibaba yogo nganilu mi wosaedaicte.<sup>5</sup> Ngic yenge bolengineng filesoc filesoc bidaingte.

<sup>6</sup> Wewedufocngineng Wapongte yowa wedungelecaigaing, ngenge yengele ngagesilu wiycngineng madicne heuckelu wewedufocngineng nebocene yeledaing.

<sup>7</sup> Aime gageuctihac kwesacnagulu yanguc mi ngagedamec, "Na Wapong kwesackegabac." Ga Wapong nalic mi kwsackedamecte. Yogolec ngic monic ye nosing monic duwedaicte, ye nosing noine silicne ingucne hac fuluckedaicte.<sup>8</sup> Monic ye socte gagawa wiyc duwecaigac, ye socte gagawacni noine fuluckeme sowaledaicte. Nga monic ye Asule gagawa wiyc duwecaigac, ye yogolec noine, gaga-sanang bidaicte.<sup>9</sup> Ilec ailu aibaba madicnele tapili-wawa mi aidabeleng. Nongileng tatakic mikac galu aibaba madicne ailu gaebengka damengtowa kwesime nosing noine madicne badabelengte.<sup>10</sup> Nongileng damengnonggeng fagachac, iwa ngic-ngigac sasawa aibaba madicne aiyeledabeleng. Ailu agofocngineng yenge Sugucnenonggeng ngagingkelu gagabiyeng, yenge madicne homacne hac aiyeledabeleng.

### *Kwele-efec nga mimi-madic yowa*

<sup>11</sup> Nganining, naneuc molenedi kweleng sugucnebenang kwelengkebabac.\* <sup>12</sup> Ngic sasawa yengi soc tofangineng helockeningte kpafengngebalu micaigaing, yenge socnginengte gagale silicka feicne ainingte ailu inguc micaigaing. Ailu yenge Kristole malicpongte ailu weyebic aiyeledaingkale, inguc aingelegecaigaing. <sup>13</sup> Ngic soc tofangineng biyac helockeibong, yenge yengileng yefe-yowa mi balaibecaigaing. Nga yengebac ngengele ngagelu yengileng wac bafeningte ailu ngengele soc tofangineng helockeningte homacnebac aiyeledaict. <sup>14</sup> Aime nani wiyc monicte ngagelu wacne mi bafedacte, miyacbenang. Sugucnenonggeng Yesu Kristole malicpongte wac sugu bafedacte. Yogolet ailu himongte gaga yogo webong nala homame naneicne himongte gagawa wecnubong homaiba, ingucne ngagegabac.

<sup>15</sup> Ngic soc tofangineng helockeicne me mi helockeicne, yogodi wiyc feicne mi aigac. Wapongti mime ngic-ngigac gbolicne fikeibong, yogodi sugu feicne aigac. <sup>16</sup> Aime ngic-ngigac yefe yogo gaganginang balaibecaigaing, yenge Wapongti yengela kwele-mogung nga kwele-sowac lodaict, yogo yengi Wapongte aling gbolicne aigaing.

<sup>17</sup> Ailu yanguc mimoctogabac, Yesule bole babe wecnubong yele lofoc socna balu gagabacte, monicti na kwele-umac hatacmac mi neledaic.

<sup>18</sup> Ngic hae-gbafocone, Sugucnenonggeng Yesu Kristole kwele-madicti asunginang fadaic. Yogo foinac.

---

\* **6:11:** Poldi hibi kwelengkenogale mime ngic monicti yele yowa ngagelu kwelengkelu gawec. Ilec ailu Galata hibi yago 1:1-6:10 Poldi mime ngic monicti ngagelu kwelengkeme motowec. Motome 6:11-18 ibac Pol yeuctihac kwelengkewec. Ilec ailu Galata ngic-ngigac nganilu yanguc ngageibong, ngic monicti hibi yogo mi saleme baibong. Poldi sugu kwelengkelu saleme baibong.   **6:15:** Gal 5:6; 2Kor 5:17   **6:17:** 2Kor 4:10

## **Poldi Efesas Habu Yengele Hibi Kwelengkewec**

### *Mimi-yegeng yowa*

Pol ye Yesule siduc mac nga taon fagacsoc minogale mac lolickelu gawec. Efesas yogo taon sugucne monic Asia prowins iwa fagac. Ye alecine yaekang Efesas iwa hikewec. Hikelu dameng bangkacnemac galu Yesule yowa weduyelewec (Salecebaicne 18:19-21). Iwacni Yerusalem hatac hikewec. Gacgu alecine habackang aime Efesas taonka hatac hikelu hifa habackang iwa galu weduyelewec (Salecebaicne 19-20). Galu iwacni hefaliyelu Yerusalem kwesiwec. Yerusalem game Roma ngic yengi muc-macka loibong. Dameng iwa Roma gamang yenge Roma taon nga Israel himong fagaingsoc damongebawec. Ye Roma bahikebong iwa muc-macka ngiyewec (Salecebaicne 21, 28). Muc-macka ngiyelu hibi yago kwelengkelu Tikikus lacname bahikelu Yesule habu Efesas iwa gaibong yenge yelewec.

Pol ye Israel alingkacni. Israel ngic-ngigac yenge Abraham madecine Asik, yele fikesaweckacni. Yenge Wapongte yefe-yowa balaibelu gaibong. Efesas ngic-ngigac homacne yenge Israel yengele alingkacni miyac.

### *Yowa yago hibi nebocina fagac*

1:1-2 Mimi-madic yowa

1:3-3:21 Wapongti wacnubame Kristo ngagesingkebeng habu moniyang kpaducnubame Yesule habu gbagbacne gagabeleng

4:1-6:9 Gaga gbolicnele aibaba balaibelu ganoga

6:10-20 Nongileng Kristole tapiliwa sowacne ewalidabelengte

6:21-24 Poldi wenac-madic nga kwele-madic yowa kwelengkelu edoc-nubawec

### *Mimi-madic yowa*

<sup>1</sup> Na Pol, Wapongti bawosaecnume Kristo Yesule salecebaicne aigabac. Ngic-ngigac Wapongte bingec Efesas taonka Kristo Yesu ngagesingkecaigaing, ngengele hibi yago longelegabac. <sup>2</sup> Mamacnonggeng Wapong nga Sugucnenonggeng Yesu Kristo, yekele kwele-madic nga kwele-mogungtowadi ngengela fadaic.

### *Kristole kwelele wiyc madicne sasawa nolewec*

<sup>3</sup> Wapong ye Sugucnenonggeng Yesu Kristo yele Mamac, ye mimitengineholec. Ye aling gbagbacne nongileng Kristoholec wetackelu ganangte aili yedi kwele-ilucte mimi-madic sawawa fayackegac, yogo sasawa nolewec.

<sup>4</sup> Mimi-madic yogo yanguc, ye hocne biyachachenang molickelu himong nga sawa yeke mi fikeebocka, yele haicka gbagbacne nga sowacne mikac ganangte Kristole aili bawosaecnubawec. <sup>5</sup> Aili yeicne adu-madecfocine bacnubanale ye angacine nga ngage-ngageine balaibelu Yesu Kristole aili esecnehab ngage-motocnubawec. <sup>6</sup> Aili ye angac Madecine nga yeicne wac feicnele aili kwele-madic ainolewec. Ilec nongileng ye mitengkabeleng.

### *Yesule sancti suwecnubawec*

<sup>7</sup> Wapongte kwele-madic yogo wakelu fagacte Kristole sacti fuli bacnubalu bikicte muckacni lukecnubalu bikicnonggeng hegilewec. <sup>8</sup> Ilec ngage-ngage-motoc nga ngage-ngage noine sasawa yogo momochac homac-nebenang bamadickenolewec. <sup>9</sup> Wapongte kwelewa ngage-ngage angacine sangke-sangke fagac, yogo Kristole ailu mipangkelu yanguc mime yegengkenolewec, <sup>10</sup> "Na Kristo salebe himongka walu wiyc sasawa himongka nga honocmengka fagaing, yogo kpatulecebalu yogo damongebadaite. Ailu ngage-ngage bole balu alingkeiba ailu damengtowaine ngageiba, iwa noine fikedaite."

<sup>11</sup> Wapong ye esecnehab ngage-ngageine alingkelu ngagesilu ngage-motowecte Kristole ailu ngage-wosaec ainolelu bacnubawec. Ye wiyc sasawa kweleina alingkelu ngageme fawec, yogo noine inguc fikenale aiwec. <sup>12</sup> Ilec Israel ngic-ngigac nongilengti molickelu Kristo ngagesingkelu wangec gagabeleng. Aime Wapongte wac feicnedi hikelu game mitengkelu afeed-abelengte. <sup>13</sup> Israel yengele alingkacni miyac, ngenge inguchac yowa noine ngagebong bikicte ameine bame wasecne ainingte Yesule Siduc Madicne balu ngagesingkeibong. Ngagesingkebong ngenge yele ainingte ailu Tili Asu ngelenale miwec, ye yogo kwelenginang lolu mipangkelu ngelewec. <sup>14</sup> Mole-damocnonggeng fagac, yogo nongileng noledaite. Mole-damocne mimipangine yogo Tili Asu nolewec. Yogo balu gadabelengtewa, Wapongti bikicte muckacni lukecnubalu bacnubadaite. Ilec Wapongte wac feicne mitengkegabeleng.

### *Siduc Madicnedi sawelu fanoledaic*

<sup>15</sup> Aime ngenge Sugucne Yesu ngagesingkecaigaing. Ailu ngic-ngigac Wapongte bingec sasawa yenge kweledi angac ngageyelebong yowa-siduc yogo ngageiba. <sup>16</sup> Ilec ailu damengsoc ngengele ngagesilu Sugucne milockelu kwele-madic edocaigabac. <sup>17</sup> Milu yanguc milockecaigabac, Sugucnenonggeng Yesu Kristo yele Wapong, ye wac feicnetowaholecti Mamac gagac. Ailu ye ngage-ngage-motoc nga wiyc sangke-sangke fagac yogo bame fikelu yegengkenale Asu ngeleme, Wapong kweledi buchuchac ngagedaingte. <sup>18</sup> Aime yedi kwelenginang angoleme wiyc honocmengka ngengele wangec fagac, yogo ngage-motodaingte. Wapongti ngenge yogo baningte wacngebawec. Wiyc yogo tapili nga wac feicneholecti wakey-ackiecin fagac. Ye ngic-ngigacfocene Wapongte bingec mole-damocine yogo ngelenale lowec fagac. <sup>19</sup> Ailu ngage-ngagesingkolec, nongileng yele tapilitowa feicnedi bole balu gagac, yogolec fungine inguchac ngage-motodabelengte.

<sup>20</sup> Aime yeicne tapiliine feicne, yogodi Kristola bole bame homackacni gboliye fangkelu sawawa feme foleinapec lowec ngiyegac. <sup>21</sup> Ailu sawa hewacka damong nga aling bole-yowa tapilinginengkolec ailu tapili haicina monic-monik nga sugucne-aling gocne gagaing, ailu wac sasawa wackecaigaing. Yogo yengele feicnetowangineng lowec ngiyegac, yogo dameng yagolet sugu miyac, yogo ingucfafeginowagac. <sup>22</sup> Inguc ailu Yesule habu baficebanale Wapongti wiyc sasawa yele bagewa kpaducebawec. Kpaducebame hodocngineng ailu wiyc sasawa yogolec sugucnengineng aiwec

gagac. <sup>23</sup> Aime habu yenge Kristole noi-hewacine nga hige-moleine aibong, yedi habu nga wiycasasawa bafuwayelelu bame wakeyelegac.

## 2

### *Esecne sowacneholec gaibeng*

<sup>1</sup> Ngenge esecne Wapongte yefe ewalilu bikickolec galu homaicne ailu, <sup>2</sup> himongte gagawa nga aleng yengele ngictau tapiliineholec balaibeibong. Ailu yakumac yowa wewe ngic gagaing, yengele ngictau yogolec bole balu gagaing. <sup>3</sup> Ngenge nga nonge momochac nongileng esecne yengele alingka galu socnonggengte gagale angac nga ngage-ngage sasawa balaibelu gaibeng. Aime nongileng yenge ingucne Wapongte aalicti feinonggang fewec.

### *Wapongti bagboliyecnubalu ngage-ngagesingka locnubawec*

<sup>4-5</sup> Nongileng Wapongte yefe ewalilu gabeng asunonggeng homaicne gaibeng. Aime Wapongti sifu kwele-sowac sugucnehat ainolelu kwele-angactowa ngagenolewecete nongileng momoc Kristoholec bacnubalu bagboliyecnubawec. Aime Waponti kwele-madic aingelewec, yogodi bikicte ameine bame wasecne aidaingte. <sup>6-7</sup> Ye Kristo Yesule madicnele ailu kwele-madic ailu yeholec taocnubawec. Yogolec dameng lobewa fikeme babamadictowaine mime yegengkenale Kristo Yesuholec bagboliyecnubalu honocmengka locnubawec. <sup>8</sup> I yangucte, ngenge Yesu ngagesingkeibongte yedi kwele-madic aingelewec, yogodi bikicte ameine bame wasecne aiibong. Aime Wapong ye ngageboc mi ailu ngage-ngagesingngineng yogo ngelewec, yogo ngengelacni miyac. <sup>9</sup> Wasecne aiibong, yogo ngengileng aibabale miyac. Ilec monicti yeicne ngageme wiyc feicne mi aidaic. <sup>10</sup> Nongileng Wapongte mole-hibi ailu Kristo Yesuholec wetackelu gabeng, Wapongti aibaba madicne esecnehat alingkelu milockenolewec. Ailu yedi aibaba yogo balaibelu ganangte bacnubawec.

### *Yesule emewa wetackelu ganoga*

<sup>11</sup> Ilec ngenge wiyc yago ngagebong fadaic. Ngenge esecne Israel yengele alingkacni miyac galu himong-soete alingka gaibong. Inguc gaebongka, Israel ngic yengi soc tofangineng helockeibongte ngengele yanguc miibong, "Ngenge soc tofangineng mi helockeicne ailu Wapongte alingkacni miyac." Soc tofaine heloc-heloc yogo ngicti socka moc aiicne. <sup>12</sup> Dameng iwa ngenge Kristo mikac galu Israel ngic yengele alingka taockenogale kpatalangelebong gaibong. Aime Wapongti mimipang sanangnele yowa hefelu Israel ngic-ngigac weduyelewec, yogolec lobeina gaibong. Ngenge himong yagowa Wapong mikac gaibong, aime gaga madicne monic fikengeledaite, yogo mi ngagelu wangec gaibong. <sup>13</sup> Ngenge esecne inguc dalicka gaibong. Ailu yanguctihac Kristo Yesuholec kpatulelu gagabiyeng. Aime Kristole sacti soitiyeme Wapongte emewa kwsilu gagabiyeng.

### *Yesudi ngaba baickeme aling moniyang sugu aiibeng*

<sup>14</sup> Kristo ye yeuctihac kwele-moniyang ainolewec. Nonge Israel ngicngigac nga ngenge Israel alingkacni miyac, hewacnonggang ngabadi aka fawec, yogo yedi heuckelu baickeme miyac aiwec. Ailu ye yeicneholec kpatulecnubame habu moniyang aiibeng. <sup>15</sup> Yesudi himong-socine

homacka lowec, yogodi Wapongte yefe-yowale kwelina ung-yowa fagac, yogo noine mikac aiwec. Inguc aime ngenge nga nonge momochac ngic gboldicne moniyang fikebeng kwele-moniyang fikewec.<sup>16</sup> Ye habu yaeckang ngabaholec siyeckelu gaebengka malicpongka homalu domawec, yogodi nongileng kpatulecnubame ngaba miyac aime soc moniyang aibibeng. Aibeng Wapongta kpatulecnubalu locnubame yeholec kwele-moniyang aibibeng.<sup>17</sup> Yedi kwesilu ngenge dalicka nga nonge bangkacka momochac emeina ganangte kwele-moniyangte yowa madicne mime yegengkenoleme ngageibeng.<sup>18</sup> Asu moniyangti bacnubame ngenge nga nonge kpatulelu Mamacte emewa nalic hikelu domanoga.

### *Wapongte mac*

<sup>19</sup> Ilec dameng yanguctihac Israel yengele alingkacni miyac, ngenge kwilic mi gagaing. Ngenge ngic-ngigac Wapongte bingec yengeholec kpatulelu mac fileine aibibeng. Ailu yanguctihac Wapongte alingfocine gagaing.<sup>20</sup> Ngenge nongeholec Wapongte mac bacngebacne. Kristo Yesu yeuctihac posabosing sanangne aigac. Aime salecebaicne nga Wapongte siduc-mimi ngic yenge mac yogo bosing ingucne kwesingkelu Yesuholec domagaing.<sup>21</sup> Yele ailu nongileng sasawadi yele feiwa mac yogo taockeme taoc felu Sugucnele ibu-mac gbagbacne fikelu sugulegabeleng.<sup>22</sup> Ngenge inguchac yela basugulecngebalu taocngebame ngenge Wapongte mac fikebong Asudi kwelenginang gagac.

## 3

### *Poldi yowa sangkeicne mime yegengkewec*

<sup>1</sup> Ilec ailu na Poldi hocne ngengele ailu Israel yengele alingkacni miyac, ngengela Kristo Yesule bole babe muc-macka locnubong ngiyegabac.

<sup>2</sup> Ngenge nale fungine biyac ngagegaing. Wapongti kwele-madicne ngengela balu hikenogale bole-yowa milu nelewec.<sup>3</sup> Nelelu ngage-ngage sangkeicne dondonne edocnume yegengkewec, yowa yogo hocne bangkacne kwelengkegabac.<sup>4</sup> Kristole yowa sangkeicne fungine biyac ngageiba, yogo wafelu ngage-motodaingte.<sup>5</sup> Yowa sangkeicne yogo Asudi salecebaicne nga siduc-mimi ngicfocine Wapongte bingec gagaing, yengela mime yegengkewec. Esecne ngic gaofebong, yengela ingucne monic mi miwec.<sup>6</sup> Yowa sangkeicne yogo yanguc, Israel ngic nongileng Kristo Yesuholec wetackelu gagabeleng. Ailu Wapongti biyachac nongilengte ailu yowa mipangkewec. Israel yengele alingkacni miyac nga nongileng mole-damoc yogo momochac banangte Siduc Madicne yogodi milu edocebame soc moniyang aigabeleng. Yowa sangkeicne yogo mibe yegengkegac.<sup>7</sup> Na Siduc Madicne yoglec mole-bafic ngic ganogale Wapongti ngageboc mikac bole nga pasi damuineholec ailu kwele-madicne nelewec, yogo yeicne tapiliwa nelewec.

<sup>8</sup> Wapongti kwele-madic aineleme Kristole wiyac madicnebenang fafasanang fagac, yoglec siducine Israel yengele alingkacni miyac, yengela mibe yegengkenale bole yogo naneicne milu nelewec. Na ngic-ngigac Wapongte bingec sasawa yengelacni waweweinemac, aime yedi sifu inguc ainelewec.<sup>9</sup> Aime yowa sangkeicne mibe yegengkenale yowa yanguc milu nelewec. Wapongti wiyac sasawa mime fikeibong, ye ngage-ngage

sangkeicne yeicne kweleina esecnehac fungkelu ngagelu gawec. <sup>10-11</sup> Ye Wapongte ngage-ngagetowa yogolec fungine yogo esecnehac Kristo Yesu Sugucnenonggeng yela alingkewete, yakumac yogo noine aigac. Yesule habu yengi Wapongte ngage-ngage-motoc mibong yegengkeme, bole-yowa tapiliholec haicine monic-monik nga sawawa Sugucnele aling gagaing, yenge yogo ngage-motodaingte. <sup>12</sup> Aime Kristodi yefe bafuwanooleme ye ngagesingkelu hangoc nga kwele-yaec mikac Wapongte emewa nalic fikelu gadabelengte. <sup>13</sup> Ilec yanguc edocngebabe ngagening, na ngengele ailu doicka gagabac, ilec ngenge kwelengineng mi wadaic, miyac. Na inguc aibe ngenge wac feicne badaingte.

### *Efesas ngicyengele milockewec*

<sup>14</sup> Ilec ailu Mamacnonggeng ketadi holecnolu milockegabac. <sup>15</sup> Yedi habufocine sasawa himongka nga honocmengka gagaing, nongileng momochac gaga noleme gagabeleng. Ngengele ngagelu yela yanguc milockegabac,

<sup>16</sup> Wapong, ga tapili nga wacgone feicnedi Asugonele tapili yogodi baficebaengka kwele-ilucnginengti sanangkedaic. <sup>17</sup> Aime yenge Kristo ngagesingkebong Kristodi yengele kwelewa gadaic. Ailu kweleangacka gaga-sanangne ganingte basanangebadamec. <sup>18</sup> Inguc aiyengka yenge ngic-ngigac sasawa gbagbacne gagaing, yengeholec Kristole kwele-angacine fungine yogo wileng fegac, nga ediwa hikeyackegac, ailu neboc nga nebocka hikeyackegac, ailu dumengka hauyackegac, yogolec efeckelu ngage-motodaing. <sup>19</sup> Ailu Kristo ye kweleinedi nongileng angackecaigac, yogo ngic ngage-ngage sasawa ewaliyackelu fagac, yogo inguchac ngageningte milocgugabac. Inguc aiyengka Wapong gala kwelele nosing wakeyackeicne, ingucnehabc wakeyelen.

### *Kwele-madic yowa*

<sup>20</sup> Wapong tapilitowainedi nongilang bole balu gagac, ye hocne bole haicine monic-monik feicnebenang banogale tapili facnogac. Ailu yele boledi mimilocnonggeng, nga ngage-ngagenonggeng homacnehac ewaliyackegac, ailu yogo moto-motoine mikac. <sup>21</sup> Kristo Yesu nga habufocine yengele hewacka Wapongte wac feicne moto-motoine mikac fafegidaic, yogo foinac.

## 4

### *Yesu noi-hewacine nongileng kwele-moniyang ganang*

<sup>1</sup> Ilec na Sugucnele ailu muc-mac ngicti yowa sanangne milu yanguc edocngebabe, ye gaga silicne monicka wacngebawec, yogolec silicka gadabiyeng. <sup>2</sup> Gaga yogolec silicne yanguc, ngenge bawacnagulu ulucne galu ngic-ngigac yengele mi takicngebadaic. Ailu kwele-madicca wangec galu kwele-angacka baficnagulu gadabiyeng. <sup>3</sup> Aime kwele-mogungti muc ingucne dodochngebame Asule kwele-moniyang aibong. Aime ngenge yogo helockedainkale, sanangke-benangkelu gadabiyeng. <sup>4</sup> Noi-hewacine\* nongileng moniyang. Nga Asu ye moniyang. Ingucnehabc Wapongti wacngebame wiyc madicne silicne moniyang fikengelenale wangec gagaing.

**3:12:** Yoa 14:6; Rom 5:2    **3:17:** Yoa 14:23; Kol 1:23; 2:7    **4:1:** Kol 1:10    **4:2:** Kol 3:12-13

**4:3:** Kol 3:14-15    \* **4:4:** Yesule habu yenge noi-hewacine ingucne aigaing. Efesas 1:23 iwa ingucniwec.

**5** Sugucne ye moniyang. Nga ngage-ngagesing yogo moniyang. Ailu misallowac yogo moniyang. **6** Wapong moniyang, ye Mamac walecnonggeng moniyang ailu feicnetowanonggeng. Ailu ye ngic-ngigac sasawa hewacnonggang nga kwelenonggang gagac.

**7** Aime Kristo yeuctihac baba-madictowaine, yogo heuckelu kwele-madicte wiyc filesoc filesoc nolewec, yogo balu gagabeleng. **8** Ilec ailu yowa monic yanguc kwelengkeicne gagac,

"Ye wilinibenang felu bikite mucti hefecaibne yogo bacebame yeicne alingka hikieibong. Aime ye ngic-ngigac kwele-madicka wiycine yelewec."

(Mige 68:18)

**9** Ye wilini fewec. Yogo moc mi miicne, ye molickelu himongka wawec-acni fewec. **10** Ngic wawec, ye mac sasawa yeuctihac sawelu ganogale hefaliyelu honocmengka fewec. **11** Ailu ye hocne bole yanguc nolewec. Gocne yenge salecebaicne aidaingte. Nga gocne yenge Wapongte siduc-mimic aidaingte. Nga gocne yenge Siduc Madicne milu edocebadaingte.<sup>†</sup> Nga gocne yenge Yesule habu yengele damong nga wewedu aidaingte, bole filesoc inguc nolewec. **12** Ngic-ngigac Wapongte bingec nongileng baficnagunogale bole balu Kristole hige-moleine nga noi-hewacine basugulebeng sanangkenale bole yogo nolewec. **13** Noleme Wapong madecinele fungine ngagesingkenangte kwele-moniyang ailu gadabelengte. Ailu sugule-sanangkelu Kristo ingucne aidabelengte.

**14** Ilec ailu nongileng kogoc gaga hatacmac mi gadabeleng, miyac. Kogoc yenge yanguc aicaigaing, kwsac-ngic yengi kwsac-yowawa yefe lilolu socka lolole-yowa haicine monicmonic weduyeleborg lekwe wele-kwe aicaigaing. **15** Aime nongileng kwele-angacka damongnagulu yowa noine midabeleng. Inguc aibeng aibabanonggeng sasawa Kristo ingucne fikeme sugulebeng hodocnonggeng Kristoholec wetackelu noine badabelengte. **16** Ye kwelenonggang filesoc filesoc babeng, hige-mole nga wiyc sasawa taockeme domalu noi-hewacine moniyang fikelu suguledabelengte. Yogo kweledi angac ngagenagubeng aibabanonggang fikedaiete.

### Kwele-iluc gboldicne

**17** Na Sugucnele haicka sawang-yowa milu edocngebabe ngagening, ngenge, Israel yengele alingkacni miyac, yenge ingucne hatacmac mi gadabiyeng. Yenge ngage-ngagengineng sifuweme gagaing. **18** Ailu yenge ngage-ngage-motocngineng mi fagacte kundung kwelina kwele-sanang sowacne-holec gagaing. Galu Wapongte gaga mi gabong ngage-ngagenginengthiac aka ingucne domame gagaing. **19** Yenge aibaba madicne lobe holecnolu game mikac selo-boic aibaba nga gaga kosaine balaibelu kwelengineng wonongkolec taockeme taoc gacaigaing.

**20** Aime ngenge gaga ingucne galu Kristole yefe monic mi ngagegaing, miyac. **21** Yesule yowa noine ngagel wedungeleibong, yogo ngagegaing. **22** Yanguc wedungeleibong, ngani-angacngineng sowacnedi soc-kwelengineng esecne basowalewec. Ngenge aibaba ingucne esecne balaibelu gaibong, yogo hegiledaing. **23** Wapongti kwele ngage-ngagengineng

**4:6:** 1Kor 12:6    **4:7:** Rom 12:3,6    **4:9:** Yoa 3:13    <sup>†</sup> **4:11:** Salecebaicne yenge Kristole bole-yowa babong salecebame hikieibong. Wapong ye siduc-mimic ngic yengela yowa yeleme ngic-ngigac milu edocebaibong. Nga gocne yenge Siduc Madicne mibong yegengkeme ngic-ngigac kwelenginang holome kwele-hefaliyec aibong. **4:11:** 1Kor 12:28    **4:14:** Kol 1:28    **4:15:** Kol 1:18; 2:19    **4:17:** 1Pi 1:14; Rom 1:21    **4:22:** Rom 8:13; Kol 3:9

bagboliyengeledaic. <sup>24</sup> Ailu soc-kwelengineng gbolicne bafuwangeleme Wapong yeicne ingucne noine dondone nga gbagbacnebenang gagaing, ngenge ngakpi ingucne yogo holebong haudaic.

### *Aibaba madicne aidabeleng*

<sup>25</sup> Ilec ailu nongileng soc moniyangte donge-hedec nga hige-moleine galu baficebalu ganangte, ngenge sasawa aibaba kwesacine hegiledabiyyeng.

“Ailu yowa noine ngic-ngigac emewa gagaing, yengeholec mingagec ailu gadabiyeng.” <sup>(Sek 8:16)</sup>

<sup>26</sup> “Ngenge kwelenginang aalic ngagedaingte, dameng iwa bikic mi bafuwadabiyeng.” <sup>(Mige 4:4)</sup>

Ailu ngenge aalic ngagelu gabong wenac-dongeine mi haudaic. <sup>27</sup> Ngenge Aleng Sugucnengineng mac mi locnodaing. <sup>28</sup> Hise-baba ngic ye hise hegilelu moleinedi bole balu boleinle nosing madicne bafuwalu ngic gocne soctepecka waweweine gagaing baficebadaic.

<sup>29</sup> Ngenge micnginangkocni yowa sowacne monic mi ofedaic, miyac. Yowa madicne micnginangkocni ofeme ngic-ngigac yenge yowangineng ngagelu umacnginengsoc baficebame sugulelu sanangkeningte basanangebadabiyeng. <sup>30</sup> Wapongti bikictre muckacni lukecngebanale dameng lowec, iwa domaningte mimipangine Tili Asu longelewec. Ilec ngenge Wapongte Tili Asu kwele-umac mi lacnodaing. <sup>31</sup> Hewacnginang kwele-hobec mi ngagedaing. Ailu ngenge aibaba dacineholec nga aalic hegiledaing. Ailu ngenge misulec-yowa nga lobe-yowa mi aidaing. Ngenge agofocngineng sipilicebanogale ngage-ngage ingucne sasawa hegileyackedaing. <sup>32</sup> Ngenge aibaba madicne ainagulu kwele-sowac ngagelu baficnagulu gadaing. Wapongti Kristole aiilu bikicngineng hegilewec, ingucne hac ngenge ngengileng sowacnengineng hegiledabiyyeng.

## 5

### *Kwele-angacka gaga*

<sup>1</sup> Ilec ailu Wapongti adu-madecfocine ngengele ailu kweleinedi angac ngagegac. Ilec ngenge ye ingucne hac ailu yele aibaba balaibelu gadabiyeng.

<sup>2</sup> Kristo ye inguchac kweleinedi ngengele angac ngagelu ago aingeelu yeicne socine nongileng ailu mimoctolu depec yogo Wapongta bahikelu homawec. Ibu yogodi depekte hoine madicne ailu Wapongta fewec. Aime ngenge ye aiwec ingucne hac balaibelu kweledi angac ngagenagulu baficnagudabiyyeng.

<sup>3</sup> Aime ngengileng hewacka selo-boic aibaba, ailu gaga kosaine wonongkolec silicinc haicinc monic-moninc, ailu hane aibaba, ngenge aibaba yogo sasawa hegilelu mibenang aidaing, miyac. Ngic-ngigac ngenge Wapongte bingec gagaingte, aibaba ingucne ngengela aiaiine mi aigac. <sup>4</sup> Ngenge yowa sowacne gameineholec nga yowa kosaine ailu delec gameineholec, yowa ingucne micnginangkocni ofeme mi madickedaicte. Ngenge yogo hegilelu kwele-madic yowa mibong madickedaicte. <sup>5</sup> Aime selo-boic ngic-ngigac nga ngic-ngigac gaga kosaine wonongkolec gacaigaing. Nga ngic-ngigac hane ailu wiyac badaingte, aibaba yogo siduc-gbong ingucne alang badaingte. Ngic-ngigac yogo yenge Kristo nga Wapongte

ngani-damongka nalic mi gadaingte. Ailu yekele wiyc monic nalic mi bidaingte. Ngenge yogo ngage-moto-benangkedaing.

### *Angoche aibaba*

<sup>6</sup> Monicti yowa kwesacine edocngebame ngenge yogo ngagebong noine mi aidaic. Yowa wewe ngic ingucne yengele bikicte ameine Wapongti aalicine-holec baduyeledaicte. <sup>7</sup> Ilec ailu ngenge yengeholec mi wetackedaing. <sup>8</sup> Ngenge molickelu kundungte alingka gaibong. Nga yakumacbac Suguc-neholec wetackelu angocenele alingka gagaing. Ilec angoche adu-madec ingucne gadaing. <sup>9</sup> Aime angoche aibaba noine yanguc fagac, aibaba madicne nga gaga dondonne, ailu yowa noine inguc fagac. <sup>10</sup> Sugucnedi aibaba ngageme madickecaigac, yogo wosaelu aidabiyeng. <sup>11</sup> Ngic-ngigac aling gocne yenge kundungte aibaba aibong aibabangineng noine mikac aicaigac, ngenge yogo yengeholec mi wetackedaing, miyac. Ailu ngenge aibabangineng yegena nga angocina bayegengkebong funginengineng nganimotodaing. <sup>12</sup> I yangucte, yenge sowacnenginengte aibaba sangke-sangke aicaigaing, yogo ngengi mibong gameineholec aidaicte. <sup>13</sup> Ailu aibaba ingucne sasawa yegena lobong angohti kweme yegengkedaicte.

<sup>14</sup> Yogolec silicinc yangu, wiyc sasawa angohti kweme yegengkedaicte. Ilec ailu yanguc miicne,  
“O, ngic gung falu gagic, ga gboliyelu homackacni fangkec. Inguc aiyengka Kristole angohti bacgume yegengkedamecte.”

### *Gaga madicne gadabeleng*

<sup>15</sup> Ilec ngenge aibaba madicnele yefengineng ngani-motolu hikedaing. Ailu ngenge ngage-ngagengineng mikac ingucne mi gadabiyeng, miyac. Ngenge ngage-ngage-motockolec ailu gadabiyeng. <sup>16</sup> Yanguctihac aibaba sowacnedi sawelu fagacte, ngenge damengngineng nalic wickedaing. <sup>17</sup> Ngenge ngic-ngigac ngage-ngage mikac ingucne mi gadabiyeng, miyac. Ailu Sugucnedi ngageme wiyc madicne aigac, ngenge yogo ngage-motolu gadabiyeng. <sup>18</sup> Ngenge waing misa homacne nolu kwele-sifuc mi aidabiyeng. Yogodi gagangineng basowaledaicte. Asudi kwelenginang wakedaic. <sup>19</sup> Wakeme miti geewa gee fagac nga malac fuluna gee ailu Tili Asudi gee bafuwangeledaicte, ngenge gee yogo hole-ngagec aidabiyeng. Ailu ngenge gee holelu kpeng nga yoming silicinc haicinc monic-moninc welu fitolu Sugucne kweledi mitengkedabiyeng. <sup>20</sup> Ailu ngenge Sugucnenonggeng Yesu Kristo, yele wacka damengsoc Wapong Mamac wiyc sasawale kwele-madic edodabiyeng.

### *Ngawe-ngigacte yowa*

<sup>21</sup> Ngenge Kristo alang bacnolu yele ailu ngengileng bawacnagulu agofocngineng yengele yowa ngagelu gadabiyeng.

<sup>22</sup> Ngigac ngawegoneholec, ga Sugucnela bawacnagulu yele yowa ngagelu gagic, inguchac ngawegonela bawacnagulu yele yowa ngagelu gadamec. <sup>23</sup> I yangucte, Kristodi habule hodocine aigac, ingucnehab ngawedi ngigacinele hodocine aigac. Kristodi habu nongileng hodoc aigac, aime nongilengti yele hige-moleine nga noi-hewacine aigabeleng. Ailu yedi Asa-baba ngic-nonggeng aigacte ailu yedi bikicte ameine bagac. <sup>24</sup> Yesule habudi Kristola

**5:5:** 1Kor 6:9-10; Kol 3:5    **5:6:** Kol 2:4,8; Rom 1:18    **5:8:** Efs 2:13; Kol 1:13; 1Pi 2:9; Yoa 12:36

**5:13:** Yoa 3:20-21    **5:14:** Yes 26:19; Rom 13:11    **5:15:** Kol 4:5    **5:18:** Luk 21:34    **5:19:**

Kol 3:16    **5:20:** Kol 3:17    **5:21:** 1Pi 5:5    **5:22:** Kol 3:18; 1Pi 3:1    **5:23:** 1Kor 11:3; Efs 1:22

bawacnagulu yele yowa ngagelu gagaing, ingucne hac ngigac ga ngawegonela bawacnagulu gadamec.

**25-27** Kristodi habufocine nongileng kwele-angacka ago ainolelu nongileng ailu yeicne gagaine hegilewec. Hegilelu nongileng Wapongte bingec ainangte ye yeicne yowale tapiliwa misadi lowacnubalu suwecnubawec. Suwecnubalu bacnubame nongileng Yesule haicka habufocine fikelu gadabelengte. Nongileng madicne nga gbagbacne sowacnenonggeng mikac galu, tapili nga hibi-kwelengngineholec yele haicka fikenangte ngagewec. Kristodi kwele-angacka yeicne gagaine hegilewec, ingucne hac mamaç, ga ngigacgone ye kwele-angacka ago aicnodamec. **28** Mamaç, ga yefe yogo balaibelu ngigacgone yele kweledi angac ngagecnodamec. Gageicne socte aigelecaigac, silicine ingucne hac, ngigacgone yele angacgudaic. Ngic monic ye kweledi ngigacinele angac ngagecaigac, ye yeicne angac ngagenagugac ingucne aigac. **29** Aime monic yeuctihac socinele ngaba nalic mi aidaicte, yogo miyachenang. Ye socine ngani-damong aicnolu noba-nosing madicne lacnolu gadaicte. Kristodi habufocine nongilang inguc hocne aicaigac. **30** Nongileng Kristole hige-mole nga donge-hedec moniyang ailu gagabeleng. **31** Yowa monic yanguc kwelengkeicne fagac,

"Ilec ngic monic ye nenggac-mamackecine hegilecepalu ngigacineholec wetackeme, yeke soc nga kwele-moniyang ailu gadabiyecte." (*Fike 2:24*)

**32** Aime ngage-ngage sangkeicne yogo gbolongne ailu suguledaicte. Yogo Kristo ye ngawe ingucne nga habufocine ngenge ngigac ingucne aigaingte yengele inguc ngagelu migabac. **33** Ilec ngic ngenge filesoc filesoc ngengileng kweledi angac ngagenagucaigaing, silicine ingucne hac ngigacfocngineng kweledi angac ngageyeledaing. Nga ngigac ngenge inguchac ngawefocngineng alang bayeledaing.

## 6

### *Nenggac-mamac nga adu-madec*

**1** Adu-madec, ngenge ngengileng Sugucnele ailu nenggac-mamackecine yengele yowa balaibelu gadabiyeng, yefe yogodi dondonne aigac. **2-3** Ung-yowa yanguc kwelengkeicne, "Ga nenggac-mamackecone alang bayetedamec. Ga inguc aiyengka wiycasasawa nalic fikegeleme himongka dameng dalicne gahomadamecete." (*Wah 20:12; Yef 5:16*)

Ung-yowa yogodi molic-molic mimipang yowa aigac.

**4** Mamaç, ngenge adu-madec yengele aalic mi bafuwayeledabiyeng, miyac. Ngenge Sugucnele yowa edocebalu bamadicebabong yenge sugulelu sanangkedabiyeng.

### *Kwelec kwekwe nga bolele damong*

**5** Kwelec kwekwe, ngenge Kristole yowa balaibecaigaing, silicine ingucne hac himongka bolele damongfocngineng yengele yowa balaibelu ngageboc mikac domalu hangoc ailu dengdenggebame kwesac mi aidabiyeng.

**6** Ngenge Kristole kwelec kwekwe ganogale Wapongte yowa kwele-madicka ngagelu damengsoc bolengineng madicne angacka badabiyeng. Inguc ailu bolele damongfocngineng yenge nganicngebaigaing me mi nganicngebaigaing, aime sifu ngenge bole madicne sugu badabiyeng. **7** Ngenge ngic

yengele bole bacaigabiyeng, dameng iwa Sugucne ngagesilu yele bole inguc-nehar yogo kwele-madicka badabiyeng, bole yogo ngicte bole miyac. <sup>8</sup> Aime yanguc ngagegaing, ngenge bolele damong me kwelec kwekwe gagaingka, ngenge bole madicne balu gabong Sugucnedi yogolec ameine sockahac badungeledaictie.

<sup>9</sup> Bolele damong gagaing, ngenge ingucnehar kwelec kwekwefocngineng hangoc mi bafuwayeledaing, kwele-ulucka aiyeledaing. Ngenge yanguc ngegedaing, honocmengka yenge nga ngenge Sugucnengineng moniyang gagac. Yela feicne waicne monic mi gagaing.

### *Lokwesacka sanangkelu domadaing*

<sup>10</sup> Yowa mimoctonogale mibe, ngenge Sugucnela hole-sanangkebong tapilitowainedi ngengela falockelu fame tapiliholec gadabiyeng. <sup>11</sup> Ngenge Aleng Sugucnenginengti kwsacka ngaba aingealme ngenge sanangkelu domaningte hudule wiycasawa Wapontacni holebong haudaic. <sup>12</sup> I yangucte, nongilengti ngic himong-sockolec yengeholec hudu mi wedabel-lengte, miyac. Nongileng aleng micne nga wiycachaicine monic-monice gocne tapilinginengkolec gagaing, yengeholec hudu welu gagabeleng. Aleng yogo yenge kundungte tapili sugucne nga feicne ailu damong galu himongka nga sawawa bolengineng bacaigaing. <sup>13</sup> Ilec Wapontacni hudule wiycasawa holebong haume kindololo damengka ngaba yengi tapilingineng nalic mi bawadaingte. Aime ngenge sanangke domadaingte.

<sup>14</sup> Ngenge ilec yanguc aidabiyeng, wiycasawa noinedi umbika ingucne aime ngenge yogo hewacnginang hefedabiyeng. Hefelu gaga don-donnedi maleku ingucne aime somecnagudaing. <sup>15</sup> Kwelengineng baefecke-bong aibaba yogo hige-ebec ingucne aime ngenge yogo holebong haume sanangke galu Siduc Madicne ngagesingkelu kwele-mogung aidaing. <sup>16</sup> Ailu ngenge wiycasawa yogo balu gadaing. Ailu ngage-ngagesingnginengti sukuku ingucne hefedabing. Ngenge yogo damengsoc hefelu domabong Kin-dololo fileinedi lebe-madecine dac-ubilangngineholec balockeme welelu sukukuwa kwelu mogungkedaic. <sup>17</sup> Ailu asa bacngebame wasecne aigaingte aen duu ingucne holebong haudaic. Aime Tili Asulacni hudule fitec wacine Wapongte yowa. Ngenge yogo balu gadaing. <sup>18</sup> Asudi damengsoc baficng-bame Wapong wacke-wasic aicnolu milockelu gadaing. Ngenge deboc-gboli galu ngic-nigigac Wapongte bingec sasawa yengele ngagesilu sanangnehar Wapong milockedaaing.

<sup>19</sup> Ailu micne efeckeme hangoc mikac galu Wapongti yowa neleme Siduc Madicnele ngage-ngage sangkeicne yogo milu edocebadacte. Ngenge nale yogolec Wapong milockedaaing. <sup>20</sup> Ailu na yogolec siduc mibe muc-macka locnubong ngyegabac. Ilec na hangoc mikac yowa madicne edocebadacte yogolec milockedaaing.

### *Yowa moto-motoine*

<sup>21</sup> Tikikusdi fulu gaganele fungine nga bole bacaigabac, yogolec edoc-ngebayackedaictie. Ngic yogo ngic hae-gbanonggeng, ailu kwellenonggengti yele angac ngagegabeleng. Ye tatakic mikac Sugucnele mic-yowa balaibelu baficebacaigac. <sup>22</sup> Yedi nongele yowa-siduc edocngebame ngagebong ngen-gele kwele basanangkenogale salebe fudaictie.

<sup>23</sup> Wapong Mamac nga Sugucnenonggeng Yesu Kristo yeki ngic haebafoce ngenge kwele-mogungkolec galu kweledi angac ngagenaguningte ngage-ngagesingngineng basanangkedabiye. <sup>24</sup> Ngic-ngigac Sugucnenonggeng Yesu Kristo kwelenginengtiyele angac ngagecaigaing, ngengela kwele-madic nga angactowa moto-motoine mikac yogodi fagidaic.

Yogo foinac.

## Poldi Filipai

### Habu Yengele Hibi Kwelengkewec

#### *Mimi-yegengyowa*

Filipai yogo taon sugucne monic Masedonia prowins iwa fagac. Pol ye Yesule siduc mac nga taon fagacsoc minogale mac lolickelu gawec. Ye alecine yaeckang Filipai iwa hikewec (Salecebaicne 16:12-40). Hikelu Yesule siduc milu edocebame iwa Yesule habu fikeibong. Hegile hikelu yogolec lobeina alecine habackang Filipai iwa hatacmac hikelu ngiye-fac aiwec. Ailu Yerusalem hikewec (Salecebaicne 20:6). Yerusalem hikelu game Roma ngic yengi muc-macka loibong. Dameng iwa Roma gamang ye Roma taon nga Israel himong fagaingsoc damongkewec. Ye Roma iwa bahikebong muc-macka iwa ngiyewec (Salecebaicne 21, 28). Muc-macka ngiyelu Timothiolec hibi yago kwelengkelu Epafodaitus lacnoboc bahikelu Yesule habu Filipai gaibong yenge yelewec.

Soc tofaine helockeicnele aibaba yogolec fungine yanguc, Wapong ye Abraham yanguc milu edowec, "soc tofangineng helockedaaing." Aibaba yogo socte maa yegengkeme Wapongte aling gacaigaing. Ilec ailu Israel aling yenge Abrahamte fikesaweckacni, yenge Wapongte yowa balaibenogale aibaba yogo balaibecaigaing. Yesule damengka Israel ngic-ngigac gocne yenge ngagebong soc tofangineng mi helockeicne yenge Wapongte aling nalic mi gadaingte. Poldi ngage-ngage yogo Filipai 3:2-5 iwa kwelengkewec fagac.

#### *Yowa yago hibi nebocina fagac*

1:1-11 Kwele-madic yowa

1:12-30 Polle aibaba yogo yanguc, ye umackolec game Kristodi bafickeme beliyelu gawec

2:1-30 Nongileng Kristo ingucne aidabeleng

3:1-21 Sawang-yowa gocne miwec

4:1-23 Wapongte yowa weduyelewec

#### *Hibile molic-molic yowa*

<sup>1</sup> Na Kristo Yesule kwele kwekwe ngic Pol, na nga Timoti, noki ngengele hibi yago logabelec. Ngic-ngigac Wapongte bingec Filipai taonka Kristo Yesuholec wetackelu gacaigaing, gocne yengele damongfocngineng, nga gocne yengele mole-baficfocngineng, sasawa ngengela hibi yago logabelec.

<sup>2</sup> Mamacnonggeng Wapong nga Sugucnenonggeng Yesu Kristo yekele kwele-madic, nga kwele-mogungtowadi ngengela fadaic.

#### *Kwele-madic yowa*

<sup>3</sup> Na ngengele ngagesicaigabac, dameng iwa Wapongne kwele-madic edo-caigabac. <sup>4-5</sup> Siduc Madicnele bole molickelu baofecgubeng yakumac aigac, ngenge naholec bolele aling moniyang ailu gaibeng. Ilec ailu ngengele ngagesilu belic-belicca milockecaigabac. <sup>6</sup> Ailu yanguc ngagepangkecagaigabac, Wapongti bole madicne kwelenginang biyachac molickelu bawec, yogo taockelu balu gagac. Bagacgu Kristo Yesule damengtowa kwesime, iwa bolein yogo bamoctoyackedaicte. <sup>7</sup> Na ngengele inguc ngagelu kwelenedi

angacnume gabe dondongkegac. Na muc-macka gagabac, me Siduc Madicnele fungine mibe yegengkegac, me Siduc Madicne basanangkegabac, iwa ngenge sasawadi naholec Wapongte kwele-madiccka aling moniyang gagabeleng.

**8** Wapongti yogo foinac widecnume yowa yanguc migabac, Kristo Yesule kwele-sowacti molickeme ngengeholec ganogale angacnugac.

**9-10** Aime aibaba weni yogodi madicne aigac, ngenge yogo nalic wosaen-tinge yanguc milockecaigabac, ngenge kwele-angacka damongnagulu gadabiyeng. Aime angac yogodi sugulelu ngengele ngage-ngagewa bafickelu kweme haulu gbolongne aime, Wapongte yefe ngage-motodaingte, inguc milockecaigabac. Ngenge inguc ngage-motolu Kristole damengtowa kwesime, gbagbacne nga bikicngineng mikac domadaingte. **11** Domaebongka gaga dondonnele noine Yesu Kristole wacka bame wakengeledaicte. Yogodi Wapongte wac feicne nga mimi-madic bafuwadaicte.

### *Muc-macka ngiyeme Kristole siduc sugulewec*

**12-13** Aime lebe-ngic ngictaule oda kwelina gaibong, ailu ngic-ngigac sasa yawa gaibong, yenge sasawadi yanguc biyac ngani-motoibong, ngic yogo ye Kristole ailu muc-macka gagac. Gabe nala pasi fikewete Siduc Madicnele bole hatacmac basanangkeme sugulewec. Ngic hae-gbafofocne, ngenge yogo ngageningte angacnugac.\* **14** Muc-macka ngiyegabacte ngic hae-gbafofocnonggeng bocyac yenge ngage-ngagengineng Sugucnela lobong sanangkewec. Sanangkeme Wapongte yowa hangoc mikac milu gagaing.

**15-17** Na sanangne domalu Kristole Siduc Madicne edocebalu weduye- lenogale Wapongti locnuwec, yenge yogo ngagelu yefe dondonna Kristole siduc kwele-angacka mibong yegengkelu fagac. Habu tofaine yengibac soc bafebe nga ngaba ngage-ngagewa galu Kristole siduc mibong yegengkelu fagac. Milu nale yanguc ngagesigaing, ye muc-macka game Kristole siduc mibeng umac haicine monic-monice bafuwadaicte. **18** Ailu ngage-ngage kwesacine me ngage-ngage noine Kristole siduc mibong yegengkelu facaigac, yogo ngagebe madickegac. I yangucte, yenge Kristole siduc mibong yegengkegac, yogodi wiyc ac feicne aigac. Inguc ngagelu yanguctihac belyiegabac. Ailu hatacmac belyiedactehac. **19** Inguc aibong ngengele mimiloc nga Yesu Kristole Asudi bafuwacnugac. Ilec yanguc ngagesigabac, umacne baickeme wasecne aidacte. **20** Aime angacne yanguc fame wangec gagabac, wiyc monicte me monicte ngagebe gameineholec mi aidacte. Na gadacte me homadacte, socnedi wiyc aidacte yogo Kristo wac sugucne lacnolu gadacte. Ilec mi hangocnugac.

**21** Naneicne gagane yogo Kristo wac feicne lacnolu gagabac, yogo ngagebe madickegac. Aime homadacte iwa yeholec wetackelu gadacte, yogo ngagebe madicke-benangkegac. **22** Aime sockolec galu bole babe noine bocyac fikedaicte. Ilec wenuc midacte, gagane me homacne, yogo mi ngage-motogabac. **23** Angac yaeckang ingucnedi fulucnume gagabac. Homalu Kristoholec ganogale bocyac ainelegac, yogodibac wiyc sasawa ewaliyackedaicte. **24** Aimebac ngengele madicnele ailu gagane hatacmac taockelu gadacte. **25** Yogo yanguc ngagepangkegabac, na ngengeholec galu baficngabac, ngage-ngagesingngineng sugulelu sanangkeme belyelu gadaingte.

---

**1:9-10:** 1Tim 5:23      \* **1:12-13:** Ngictau yele oda kwelina yeicne macine fawec. Ailu ofis haicine monic-monic nga muc-mac, ailu bole alingte mac fayackewec.    **1:12-13:** Sale 28:30    **1:19:** 2Kor 1:11    **1:21:** Gal 2:20    **1:23:** 2Kor 5:8

**26** Aime ngengeholec hatacmac ganogale fube Kristo Yesule ailu belic-belic sugucnehac aidaingte.

### *Weyebic aingeledaingte*

**27-28** Na fulu nganicngebadacte, me dalicka galu ngengele yowa-siduc yanguc ngagedacte. Ngenge asungineng moniyang, nga kwelengineng moniyang galu, ngabafocngineng yengele mi hangocngebadaic. Ailu ngenge sanangne domalu yengi Siduc Madicne ngagesingkeningte, bole yogo doicinéholec bacaigaing. Inguc fikenale ngenge Kristole Siduc Madicne yogolec silicka gadabiyeng. Aibaba yogodi ngabafocngineng yanguc edal-icebadaict, yenge sowalelu miyac aidaingte. Aimebac ngengele bikicte ameine bame wasecne aidaingte. Wapontgi inguc aidaict. **29** Ilec ngenge Kristole ailu wiywac yanguc ngelewec, ngenge Kristo ngagesingkeibong ingucnehac, yele ailu ngaba nga doicka locngubaibong, ingucnehac ngelewec. **30** Molickelu doickolec gagale boletowa balu gaiba, yogo dongedi nganii-bong. Ailu yakumac balu gagabac yogo ngagegaing, silicine ingucnehac ngenge yakumac balu gagaing.

## 2

### *Dongengineng Kristola hiladaing*

**1** Ngenge Kristoholec wetackeibong, yogodi basanangngebame Kristole kwele-angacti bakolocngebalu gagac. Ailu Tili Asuholec kpatulecngebalu kwele-mogung aingeletu kwele-sowac ngagengelegac. **2** Ilec ailu hewacng-inang ngage-ngage moniyang nga kwele-moniyangka kweledi angac ngage-nagudaing. Inguc aibong na beliyelu ngagebe motodaict. **3** Ngenge wac sugucne banogale mi aidaing. Ailu soc bafe mi gadabiyeng. Ngenge aibaba yogo hegilelu socngineng bawacnagulu, ngic-ngigac agofocngineng yengele wac bafelu ngengileng wac bawalu gadabiyeng. **4** Gageicne woc-wiyac sugu mi damongkedamec, agofocgone yengele woc-wiyac momochac baficebalu damongkedamec.

**5** Kristo Yesule pasi nga ngage-ngage fagac, ngenge silicine yanguc ngaged-abiyeng.

**6** Kristo ye Waponghac gawec.

Ailu ye Wapongkolec angasoc ganogale mi ngagewec.

**7** Ye yeicne gaga hegilelu kwelec kwekwe ngic aiwec.

Ailu ye ngic soc balu ngic silic fikeme nganiibong.

**8** Ye ngic fikelu yeuctihac socine bawalu Wapongte yowa balaibelu gacgu homawec.

Homacie yogo malicpongka homawec.

**9** Ilec ailu Wapongti ye bafelu wac feicnehac lacnolu gunungkewec, wac yogo wac sasawa ewaliyackegac.

**10** Ye inguc aime honocmengka gagaing, nga himongka gagaing, ailu wiywac sasawa gagaing, yenge Yesule wacka socngineng bawacnagulu ketadi holecnoyackening.

**11** Ailu ngic-ngigac sasawadi Yesu Kristo ye Sugucne, inguc mibong yegengkedaic.

Inguc aibong wac feicne yogodi Wapong Mamacte ainowagac.

### *Himongka angoc ingucne ganoga*

<sup>12</sup> Ilec agofocne kwelenedi ngengele angac ngagegabac, ngenge esecne damengsoc yowane balaibelu gaibong. Yogo ngengele emewa gabe yowane balaibeibong. Ingucne hac yakumac dalicka gabe ngenge yowane balaibelu hangoc ailu dengdengngebame boletowa balu gadabiyeng. Gacgubong damengngine kthesime wasecne aidaingte. <sup>13</sup> Wapong ye bole aling madicne fikenale kwelenginang bole balu gagac. Inguc balu game ngagengenengti ye balaibedaingte. Ailu bole yogo baningte tapili ngelelu gagac.

<sup>14</sup> Ilec bole sasawa badabiyengtewa, ngenge tatakic yowa nga yowadi fec-wac mi ainagudabiyeng. <sup>15</sup> Inguc aidaingtewa, yanguc edalidaingte, Wapongte adu-madec gagaing, ngenge sowacnengineng mikac galu gbagnacne nga dondonne domadabiyeng. Ngenge, ngic-ngigac sowacnebe-nang nga yefe lilolu gagaing, yengele hewacniginang domalu Wapongte yowa gagaineholec bagalu angoc ingucne himontowa yagowa kwebong angoledaict. <sup>16</sup> Ngenge inguc aibong, Kristole damengtowa kthesime, ngengele ngagebe wiyac feicne aidaicte. Aime yanguc midacte, na moc mi gasackeiba, me bolene baiba yogo noine mikac monic mi aiwec. <sup>17</sup> Ngenge ngage-ngagesingte bole yogo depekte hasoc ingucne balu gagaing. Aime ngabafocne yengi wehomacnulu yogolec feina nale sac sotinkedaingtewa, na sifu yogolec angac ngagelu ngengeholec beliyegabac.\* <sup>18</sup> Aime ngenge yefe iwashac angac ngagelu naholec momoc beliyedabeleng.

### *Timoti naga Epafodaitus*

<sup>19</sup> Sugucne Yesudi ngageme nalic aime, dameng mi daliweme Timoti salebe fudaicte. Ailu ye hefaliyelu ngenge wenuc gagaing, yogolec siduc edocnume kwelene madickedaicte. <sup>20</sup> Iyangucte, ngic monic Timoti ingucne naholec mi gagac, miyac. Ye moniyangti sugu kweleinedi sugucne hac ngengele aicaigac. <sup>21</sup> Aime ngic-ngigac naholec gagaing, yenge yengileng wiyacte sugu ngagecaigaing. Ailu Yesu Kristole wiyacte monic mi ngagecaigaing. <sup>22</sup> Aime Timoti ye aibabaine madicne, ngenge yogo ngagegaing. Ye madecti mamaccineholec bole balu gagac, silicine ingucne hac, naholec Siduc Madicnele bole baficnume balu gagabelec. <sup>23</sup> Aime nala yefe wenuc fikedaicte, yogo ngage-motolubac ye biyac salebe funale ngagesigabac. <sup>24</sup> Ailu Sugucne ngagepangkelu yanguc ngagegabac, naneuc dameng mi daliweme ngengela inguchac fudacte.

<sup>25</sup> Aime ngengi salecebaicnengineng Epafodaitus salebong kwesi domalu kwesingnume, wiyac monicte mi kpungkegabac. Ye naholec bole balu gagac. Ailu naholec galu Sugucnele hudu-baba ngic, ye gbane ingucne ailu gagac. Aime ye salebe ngengela hatacmac finale ngagebe fudaicte. <sup>26</sup> Ye huc aicname siducine ngageibong. Ilec ailu ye ngengele ngageboc ailu kweleinedi ngengele aicnolu gagac. <sup>27</sup> Aime foinac, ye huc aicname homanogale aiwec. Entacka ye homadecka, na kwele-umac sugucne feina taockeneleme ngagedacka. Ailu ye sugu miyac, Wapongti na momoc kwelesowac ngagenotelu baficnupawec. <sup>28</sup> Aime ngengi ye nganilu beliyedaingte. Aime na kwele-sowac mikac ganogale ye salebe ngengela fudaicte, yogo sanangnehac ngagesigabac. <sup>29</sup> Aime ngenge Sugucneholec wetackeningte

\* **2:15:** Dan 12:3; Filp 1:10; 2Tim 2:19      \* **2:17:** Waponti angac ngagenale, Yuda yenge depeckngineng madicne feina waing misa sotiyebong haulu gawec. Polle sac silicine ingucne hac sotiyedaicte, ilec beliyewec. Himong kisiwa 15:3-10 iwa wafedaing.      **2:18:** Filp 3:1; 4:4      **2:21:** 2Tim 4:10      **2:25:** Filp 4:18

ailu, ye kwelenginengti angac ngagecnolu mac holecnolu ye nga ngic ingucne gocne gagaing, yenge alang bayeledaing.<sup>30</sup> Ailu ngengi baficnuningte kpungkeebongka, yedi kwesilu baficnume Yesu Kristole bolele ailu socine basowalelu homanogale aiwec.

### 3

#### *Kristoholec gaga*

<sup>1</sup> Ilec yanguc taockelu migabac, ngic hae-gbafocne, ngenge Sugucne holec wetackelu belic-beliccka gadabiyeng. Na yowa molickelu kwelengkengeleiba, yogo hatacmac kwelengkengelenogale mi takicnugac, miyac. Ngenge yowa yogodi asa bacngebadaicte.

<sup>2</sup> Ngic aibabangineng hoda ingucne wonongkolec gagaing,\* yenge aibaba sowacne aicaigaing, ngenge ngic yogo yengele ngani-motolu gadabiyeng. Ngic yogo yenge kwesacngebali yanguc edocngebabacaigaing, "Ngenge soc tofangineng helockedabiyeng." Ilec ngani-motolu gadabiyeng. <sup>3</sup> Wapongte Asudi pasi nongilang bame afeelu kwelec kwegabeleng, nongilengti hocne soc tofangineng helockeicne ingucne hac kwelenonggang ngagesilu aicaigabeleng. Nongileng Kristo Yesule ngagebeng feicne aigac. Ailu soc-nongengte maale monic mi ngagepangkegabeleng.

<sup>4</sup> Aime ngage-ngagene yogo aibabana lobe fanale ngagedacka. Aime ngic gocne yenge aibabanginang ngage-ngagengineng lobong facaigac, ingucne-hac lobe fadecka midec, na silicine ingucne hac ewalicebalu aidacte. <sup>5</sup> Aime fikebe hadeng 8 aiyemewa soc tofane helockeibong. Na Israel alingkacni ng Benyaminte fikesaweckacni. Na Hibru ngicbenang ailu Hibru alingkacni. Ailu Farisaio yengeholec Wapongte yefe-yowa balaibeiba. <sup>6</sup> Ailu na yefe-yowa monic mi hegilelu ngic dondonne gaiba. Ailu na Wapongte yefe-yowa banangkenogale dogbac ailu Yesule habu weyebic ayelelu gaiba.

<sup>7</sup> Ailu molickelu wiyc bagalu ngagebe yogodi baficnudaicte ingucne aiwec, yogo hocne yakumac Kristole ailu ngagebe wiyc sasawa yogo babaficine mikac aigac. <sup>8</sup> Na Sugucnene Kristo Yesule babafic yogo ngagebe feicnetowa aigac. Ilec ailu esecne galu wiyc sasawa aiiba, yогоlec ngagebe babaficine mikac aicaigac. Gagana Kristo banogale ailu, wiyc sasawa ngagebe yafoine aiyackewec, yogo biyac hegileyackeiba. <sup>9</sup> Wapongte yefe-yowa balaibelu neicne tapiliwa ngic dondonne nalic mi aidacte. Wapongti ngage-ngagesingte yefe yanguc lowec, monic ye Kristo ngagesingkedaiete, ye ngic dondonne aidacte. Ingucne ailu Kristoholec wetackebe Wapongti ngic dondonne wacnume madickebabac. <sup>10</sup> Ailu Kristo yeicne nga Wapongte tapili yeuctihac Kristo bagboliyeme homackacni fangkewec, yogo homacne hac ngagenogale ainelegac. Ailu yeholec galu doic ngagelu ye homawec, ingucne hac galu homanogale ngagebabac. <sup>11</sup> Inguc aigacgu homackacni gboliyelu fangkenogale ngagesigabac.

#### *Gbelong ainogale gasackedamec*

<sup>12</sup> Na gagasac bole yogo biyachac bamoctoiba, me biyac ewalilu gbelong aiiba, na inguc mi migabac, miyac. Kristo Yesudi bacnuwec. Ilec ailu yogo banogale gagasac bole balu gagabachac. <sup>13</sup> Ngic hae-gbafocne, na gbelong

\* **3:2:** Israel ngic-ngigac yenge aling gocne bawacebaningte hoda wacebalu gaibong. Siduc yawa Poldi Israel ngic-ngigac gocne hoda wacebawec. **3:3:** Rom 2:29   **3:4:** 2Kor 11:18   **3:5:** Luk 1:59; 2Kor 11:22; Sale 23:6   **3:6:** Sale 8:3   **3:7:** Mat 13:44,46   **3:9:** Rom 3:21-22   **3:10:** Rom 6:3-5; 8:17   **3:12:** 1Tim 6:12,19

ailu wiyc biyachac baiba, inguc mi ngagesigabac. Ailu bole moniyang yanguc balu gagabac, wiyc biyachac aiiba, yogo hatacmac mi ngagesilu gagabac. Ailu wiyc lobewa fikedaicte, yogo banogale bole sanangne balu gagabac.<sup>14</sup> Ailu na biyachenang maawa<sup>†</sup> hikelu gbelong ailu wiyc banogale gasackegabac. Yoglec hocne Wapongti wacnuwecte Kristo Yesuholec wetackelu honocmengka gadacte.

<sup>15</sup> Aime ngage-ngagesingka biyachac sugulelu sanangkeibeng, nongileng sasawadi inguc gasackenogale ngagesidabeleng. Aime ngage-ngagengineng fulucnagudaingtewa, Wapongti ngage-ngagengineng yogo inguchac bame yegengkeneledaicte. <sup>16</sup> Ailu yowa biyachac ngagelu gaibeng, yogohac balaibelu hikedabeleng.

### *Ngage-ngage madicne*

<sup>17</sup> Ngic hae-gbafocke, nani molickengelebe ngenge yogo nganilu silicine ingucnehab balaibecnudabieng. Ailu ngic nongele silic balaibecaigaing, ngenge dongengineng yenge nganicebalu balaibedaing. <sup>18</sup> Molickelu dameng bocyac yowa edocngebalu gaiba, yogo yakumac hiyalu dongemisane wame hatacmac edocngebagabac. Ngic bocyac yengi Kristole malicpongte ngaba ailu gagaing. <sup>19</sup> Wapongngineng kwesacine, yogodi nosingte gobe ingucne aicaigac. Aime aibabangineng gameineholec, yogodi yengele kwelewa madickecaigac, ailu yengele ngage-ngage yogo himongte gagawa fagac. Ngic ingucne yenge homaebongka gagangineng sowaledaicte.

<sup>20</sup> Aime nongileng wacnonggeng honocmengka fagacte honocmengte aling gagabeleng. Ailu Asa-baba ngicnonggeng Sugucne Yesu Kristo honocmengkaci kwesidaicte, yele wangec gagabeleng. <sup>21</sup> Ye wiyc sasawa yeicne bagewa lonale tapili facnogac. Ailu yele tapili yogodi himongsocnonggeng waweweine yogo bafaliyeme yeicne soc ingucne tapili nga hibi-angoctowaineholec aidaicte.

## 4

### *Polle mimi-madic*

<sup>1</sup> Ilec ailu, ngic hae-gbafocke, kwelenedi ngengele angacnume nganicngabanogale ainelegac. Ngengi belic-belic bafuwanelebong angacnugac. Ailu agofocene kwele-angackolec, ngenge yoglec ailu Sugucneholec wetackelu sanangne gadabieng.

<sup>2</sup> Yuodia nga Sintike, ngeke Sugucneholec wetacke galu kwele-moniyang ainagunicte, mimiloc yowa sanangne edocngepagabac. <sup>3</sup> Aime agone, ga naholec bole bacaigicte yanguc edocgugabac, ngigac yaeckang yogo baficepadamec. I yangucte, yeke nga Kelemente, ailu ngic-ngigac nebocene gocne yenge naholec galu Siduc Madicnele bole balu gagaing, yengele wac Gagale hibiwa fagac.

### *Belic-belicka gaga*

<sup>4</sup> Ngenge damengsoc Sugucneholec wetacke galu belic-belicka gadabieng. Ailu hatacmac migabac, ngenge belic-belicka gadabieng.

<sup>5</sup> Sugucne emenonggang gagac. Ngic-ngigac sasawadi nganicngbabong ngenge gaga ulucne ailu gadaing. <sup>6</sup> Ngenge wiyc monicte mi medecngebadaic. Ailu ngenge wiyc sasawale aingelete, Wapong kwele-madicka

<sup>†</sup> **3:14:** Maa yogo Kristo ingucne ainogale migac.    **3:14:** 1Kor 9:24    **3:15:** 1Kor 2:6    **3:17:** 1Kor 4:16    **3:19:** Rom 16:18    **3:20:** Efs 2:6,19    **3:21:** 1Kor 15:28,43-53    **4:1:** 2Tim 2:19-20  
**4:3:** Miye 20:15; Luk 10:20    **4:5:** Hib 10:25; Yak 5:8-9

wackelu uwacnolu milockedaina. <sup>7</sup> Inguc aiyepongka Wapongte kwele-mogungti ngage-ngage-motoc sasawa ewaligac, yogodi kwelelengineng nga ngage-nagenginengte asa bame, Kristo Yesuholec wetackelu gadaingte.

### *Aibaba gbagbacne*

<sup>8</sup> Ngic hae-gbafofne, yowa monic yanguc minogale ngagesigabac. Aibaba noine nga alang-babaholec, nga dondonne ailu gbagbacne, aibaba weni yogodi nganibong angacine aicaigac. Ailu ngagebong madicne aicaigac, ailu aibabangineng madicne, nga mitenggebanogale silic aicaigac, aibaba sasawa ingucnedi ngage-ngagengineng bame wakeyackedaic. <sup>9</sup> Aime nani ngage-ngage wedungelebe ngageibong, ailu yowa nalacni hedecnginengti ngageibong, ailu dongenginengti nale aibaba nganibong, ngenge bole yogo bayackedabiyyeng. Ngenge inguc aibong kwele-mogungte Wapong ye ngengeholec gadaicte.

### *Filipai yengele kwele-madic yowa*

<sup>10</sup> Ngenge hatacmac nale ngagesilu aibabangineng hole-gboliyel wiyac gocne baficnuningte loneleibong. Ilec Sugucne mitengkelu beliyegabac. Ngenge biyachac molickelu nale ngagesiibong, yogo noine. Ailu baficnuningte yefe monic mi fawecte kpungkelu hegileibong. <sup>11</sup> Na wiyac gocnele kpungkegabac me balu gagabac, na yogolec mi edocngebacaigabac. Woc-wiyacne fanelegac, yogo sugu balu ngagebe nalic aime gacaigabac. Inguc ganogale ngage-ngage biyachac baiba. <sup>12</sup> Ailu dameng gocna waweweine gaga, nga dameng gocna moneng-mafaholec gaga, yogo biyachac gaiba. Ailu dameng gocna nosing nogebec ailu gaga, nga dameng gocna nosing homacka gaga, nga wiyac bocyackolec gaga me woc-wiyac mikac gaga, yogo sasawa biyachac galu nganiiba. Gaga ingucne galu ngagebe nalic aime gacaigabac.

<sup>13</sup> Kristodi tapili nelegacte, wiyac sasawa yogo nalic aiyackedacte. <sup>14</sup> Umacka gaebewa ngengi baficnuibong, aibaba yogolec ngagebe madick-egac. <sup>15</sup> Siduc Madicne molickelu edocngebaiba. Ailu Masedonia hegilelu hikieiba, dameng iwa Filipai habu ngengi sugu hiye-moneng baficnuibong, yogo ngagegaing. <sup>16</sup> Aime Tesalonika iwa galu wiyac gocnele heic aibe, ngenge ngagelu dameng gocna inguchac baficnulu lolu gaibong. <sup>17</sup> Inguc mibe ngengi hatacmac wiyac neleningte milocnubagac, inguc mi ngagedaing. Na ngagebe ngenge ameine madicne lobewa badaingte.

<sup>18</sup> Epafodaitusdi wiyac gocne ngengelacni balu kwesilu nelewec. Aime wiyac monicte mi kpungkelu gagabac, wiyacne bocyac fame gagabac. Aime wiyac neleicne yogodi depec hoine madicne ingucne angacine aigac, Wapongti yogo nganime madickegac. <sup>19</sup> Wapongne ye woc-wiyacine wac feicneholec. Ailu yedi ngenge woc-wiyacte kpungkecaigaing, yogo Kristo Yesule ailu nalic ngeleyackedaicte. <sup>20</sup> Wapong Mamacnonggeng Yela wac feicne moto-motoine mikac safegidaic, yogo foinac.

### *Yowa moto-motoine*

<sup>21</sup> Ngic-ngigac Wapongte bingec sasawadi Kristo Yesuholec wetackelu gagaing, nongele wenac-madic yogo yengela fugac yogo ngengi edoce-badaing. Ngic hae-gbafofneonggeng yawa naholec gagabeleng, yengele wenac-madic inguchac ngengela fugac. <sup>22</sup> Aime ngic-ngigac Wapongte bingec sasawa yawa gagaing, yengele wenac-madic inguchac ngengela

lobong fugac. Ailu aling yogo gocne Sisale macka gagaing, yenge wenac-madicngineng sugucnehad ngengela lobong fugac.

<sup>23</sup> Sugucnenonggeng Yesu Kristole kwele-madicti asunginang fadaic. Yogo foinac.

## **Poldi Kolosi Habu Yengele Hibi Kwelengkewec**

### *Mimi-yegeng yowa*

Kolosi yogo taon monic, yogo Asia prowins iwa fawec. Taon iwa Yuda ngic-ngigac gocne nga Israel yengele alingkacni miyac yenge homacnedi gaibong. Molickelu Poldi Epafas saleme Kolosi iwa hikelu Yesule siduc edocebame gocne yenge ngagesingkeibong. Ngagesingkeibong Yesule habu iwa fikeibong. Pol yeicne iwa mi hikewec. Aime wewedu gocne yenge yowa kwesacine yanguc edocebaibong, "Ngenge angelo nga wiycatapilingi-nengkolec alang bacebadaing. Ailu Yesu ye Wapongte madec noine miyac, ye angelo ingucne. Ailu yele yefe-yowa gocne balaibedaing." Yenge yowa kwesacine ingucne bocayac milu weduyevelu gaibong.

Dameng iwa Poldi Yesule siduc edocebawecete muc-macka lobong ngyewec. Ngiyeme Epafasdi welelu Yesule habu Kolosi gaibong, yengele siduc edome Poldi hibi yago kwelengkelu saleme hikewec. Yesu homackacni gboliyelu honocmengka feme hifa 32 ngama ingucne motome, hibi yago kwelengkewec.

### *Yowa yago hibi nebocina fagac*

1:1–8 Poldi wenac-madic nga kwele-madic yowa kwelengkeyelewec

1:9–2:19 Kristole fungine nga aibaba ainolecaigac, yogo Poldi we-duyelewec

2:20–4:6 Gaga gbolicne ingucne balaibedabeleng

4:7–4:18 Yowa moto-motoine yogo kwelengkeyelewec

### *Hibile molic-molic yowa*

<sup>1</sup> Na Pol, Wapongti bawosaecnume Kristo Yesule salecebaicne aigabac. Nga Timoti ye ngic hae-gbanonggeng. <sup>2</sup> Noki Wapongte bingec ngic hae-gba ngenge Kristoholec wetackelu ye ngagesingkelu Kolosi taonka gagaing, ngengela hibi yago lobec fugac. Ailu Wapong Mamacnonggeng yele kwele-madic nga kwele-mogungtowadi ngengela fadaic.

### *Kwele-madic yowa*

<sup>3</sup> Noke ngengele ailu mimiloc bole bacaigabelec, Wapong ye Sugucnenonggeng Yesu Kristo yele Mamac, yela kwele-madic damengsoc edo-caigabelec. <sup>4-5</sup> I yangucte, ye wiycatapilingi-nengkolec alang bacebadaing. Ilec ailu ngenge Kristo Yesuholec wetackelu ye ngagesingkelu gagaing. Ailu Wapongte bingec sasawa yenge kweledi angac ngageyelecaigaing, ngic yengi yogo biyachac edocnupabong ngageibec. Aime yowa noine, yogo Siduc Madicne, yogo ngengefa biyachac kwesime ngageibong. Yowa yogo kwelina wiycatapilingi-nengkolec alang bacebadaing. Aime ngenge Wapongte kwele-madicte silicine ngani-motolu Siduc Madicne ngageibong, iwacni ofegacgu yakumac ingucnehabc ngengela sawelu fagac.

**7:8** Asudi ngengela bole bame kweledi angac ngagenaguibong, kwele-angackolec agononggeng Epafasdi siduc yogo edocnupawec. Epafas ye Siduc Madicne wedungelewec, ailu ye ngagepangkebeng ye yanguctihac basicngebalu Kristole kwelec kwekwe ailu ye nokeholec gagac.

### *Wapongte aling*

**9** Aime molickelu ngengele kwele-angac ngageibec, iwacni ngengela fikewecte ailu milockelu yanguc uwacaigabelec. Wapongti wiyc ac ngageme madickegac, ngage-ngage yogodi kwelelenginang bame wakengeleme, Asu yeuctihac ngage-ngage madicne nga ngage-ngage-motoc ngeledaic.

**10** Inguc fikeme ngenge Sugucnele yowa sasawa balaibepong, ye yogo nganilu ngageme madickedaic. Aime ngengele bole nga aibabanginengte noine madicne bafuwayackeme, Wapongte ngage-ngagewa suguelu sanangkedaing. **11** Ailu yeicne tapili nga hibi-angoctowaine yogodi basanangngebadaic. Inguc aime ngenge tapili sasawa balu belic-belicka tatakic mikac sanangnebenang gadaing. **12** Wapongte bingec yengele wiyc angote ngani-damongka loicne fagac, yogo baningte Wapong Mamacti bamadicngebaawec. Aime ngenge belic-belicka kwele-madic edolu gadabiyeng. Noke ngengele ailu inguc hocne milockecaigabelec.

### *Wapong Madecine*

**13** I yangute, kundungti damongnubadaickale, Mamacti yoglec tapili-wacni baicnubalubac Madecine kweleinedi angackecaigac, yele ngani-damongka locnubawec. Aime nongileng yanguctihac inguc gagabeleng.

**14** Wapong Madecinele ailu ye bikicte muckacni lukecnubalu bikicnonggeng hegilewec.

**15** Wapong mi nganicaigaing. Ailu Madec ye yele silicine ingucnehab nganibong gawec ailu gagac. Ye wiyc sasawa fikeibong, yoglec molic-molic haenonggeng feicne ailu gagac. **16** Aime Wapongti wiyc sasawa fikenale ngagelu Madecine bole-yowa milu edome wiyc sasawa himong nga sawa kwelina fayackegac, yogo bafuwayackewec. Yengele aling yanguc, wiyc dongedi ngani-nganiine, nga mi ngani-nganiine, yogo sawa hewacka ngictau nga sugucre-aling gocne gagaing. Ailu damong nga aling tapiling-nengkolec gagaing. Wapong Madecineholec yeki wiyc sasawa yogo bafuwayackeboc. Ilec ailu wiyc sasawa yenge Madec mitengkedabiyeng.

**17** Ailu wiyc sasawa mi fikeemewa ye biyachac gawec. Ailu Wapongti bole-yowa micname wiyc sasawale fungine basanangkeme gagaing.

**18** Madec ye yeicne habule hodocine, nga habudi yele noi-hewacine. Ailu ye wiyc sasawale feicne ainale molickenolelu homackacni gboliye fangkelu fikewec. Fikelu habu molickenolelu gagac. **19** Wapongti yanguc ngagesime madickevec, Wapongte kwele ngage-ngageine bucbuchac Madecinele fagac. **20** Ye Madecinele inguc ngagelu wiyc sasawa himongka nga hon-ocmengka fagaing, yogo Wapongkolec kwele-moniyang ainale ngagewec. Inguc ngagewecte Madecinele sac malicpongka wame homawec, yogodi balu wiyc sasawa bamadickele kwele-mogung fikewec.

**21** Aime ngenge esecne kwele ngage-ngagenginengti Wapongta kwilic galu ye ngabafocine ailu aibabangineng sowacneholec gaibong. **22** Inguc galu sifu Wapongte bingec nga sowacne mikac ailu kpokpolic mikac ainale, yedi

bacngebalu Wapongte haicka locngebame domaningte ngagewec. Yogo noine fikenale ye homawec, dameng iwahac yeicne soc-biucine ngengele bikicte ameine badume kwele-moniyang fikewec. <sup>23</sup> Ngic yenge esecne Siduc Madicne yogo edocebalu weduyebebong, ngenge nga wiycasasawa Wapongti mime fikeibong, yenge yowa yogo sasawadi ngageibong. Aime ngenge Siduc Madicnele noine iwa ede-sanangke domalu ngagesingkelu wangec galu mi hegilegaingka, ngenge yele haicka domagainga. Aime Pol nani Siduc Madicne yogolec mole-bafic ganogale Wapongti bafuwacnuwec.

### *Boleinle fungine*

<sup>24-25</sup> Nani Wapongte yowa sasawa ngengela mibe yegengkenale bole aling yogo na nelewec. Neleme yowa yogolec mole-bafic ngic aiiba. Aime ngengibac Kristo yeicne habule noi-hewacine. Ngenge yele ailu doic ngageibong. Aime nani baficngebalu ngengele ailu neicne socnedi doic ngagelu Kristo ingucne gagabac. Inguc ngagelu beliyegabac. <sup>26</sup> Ailu Siduc Madicne micaigabac, yogo esecne ngic-ngigac aling sasawa gaofebong, yengela sangke-sangke fawec. Damengsoc inguc fame yanguctihac Wapongte bingec gagainga, ngengela yegengkewec.

<sup>27</sup> Wapongti yowa sangkeme fawec, yogo Wapongte bingec ngengela mime yegengkenale ngagewec. Yowa sangkeicne yangucti fawec, yedi Israel yengele alingkacni miyac, yengela tapili nga hibi-angocine bocycac edalicebadaitce. I yangucte, Kristodi kwelenginang gagabac. Aime yele bolele ailu Wapongti honocmengka ngengele tapili nga hibi-angoc lome wangecningineng fagac. <sup>28</sup> Aime ngic-ngigac yenge filesoc filesoc Wapongte haicka Kristoholec wetackelu sugule-sanangkelu domaningte nonge yele mibeng yegengkeyelegac. Ailu ngic-ngigac sasawa filesoc filesoc sawang-yowa milu, ngage-ngage-motockolebenang yenge yowa edocebalu weduyebelelul gagabeleng. <sup>29</sup> Yowa ingucne mibe Kristo yeicne tapilitowadi basanangnulu baficnume, boletowa umacne hac balu gagabac.

## 2

<sup>1</sup> Kolosi ngic-ngigac ngenge, nga Laodisea taonte ngic-ngigac, ailu ngic-ngigac gocne sasawadi haic-mesune mi ngagegainga, ngengele nga yengele ailu doic ngagelu boletowa balu gagabac, ngenge yogo ngageningte ngagegabac. <sup>2</sup> Yesule habu kweledi angac ngagenagulu kwele-moniyang ainagulu gadabiyeng. Ailu ngengele kwelewa mibasanang ainogale boletowa balu gagabac. Inguc aibe ngage-ngage-motoc sasawa sanangne bidaingte, yogodi madicnengineng ingucne fangeleme, Wapongte yowa sangkeicne ngage-moto-benangkedaing. Aime yele yowa sangkeicne, yogo Kristo hocne. <sup>3</sup> Yela hocne ngage-ngage-motoc nga ngage-ngage madicne sasawa sangkeicne fagac, yogo ngage-motodaing. <sup>4</sup> Aime monicti kwesacyowa monic milu kwesacngebalu kwele basifuc aingeledaickale, hibi yago kwelengkenelegabac. <sup>5</sup> Na socti ngengeholec mi gagabac, yogo noine. Aime iluc-asunedibac ngengeholec galu yanguc ngagegabac, ngenge Kristoholec wetackelu ye sanangne ngagesingkelu gagargineng madicne alingkelu gagabiyeng. Inguc nganicngebalu beliyegabac.

### *Misa-lowac*

**6** Ilec ailu ngenge Kristo Yesu babong Sugucnengineng aime kweleng-inang lolu angacngebawec, yogolec silicka ngenge ye balaibelu gad-abiyeng. **7** I yangucte, ngenge yela godocngineng sanangne bame sugule-samangkedabieng. Ailu yowa edocngebawec wedungelewec, yogodi ngage-ngagesingngineng basanangkeme domadaing. Aime ngengela kwele-madic yowa ingucne hac wakelu fagidaic.

**8** Monicti ngic yengileng ngage-ngagewa milu kwsacka mengocngebalu hefecngebadaickale, ngenge ngani-motolu gadaing. Ngage-ngage ingucne, yogo Kristolacni miyac. Yogo ngesa-ngambofocngineng yengele yefe-yowa, nga himongtowa yagolec alengkolec bafuwaibong. **9** I yangucte, Kristo yeicne socka Wapong yeicne gagaine buchbuchac fagac. **10** Aime ngenge Kristoholec wetackebong yedi bame wakengeleme gagaing. Kristo ye sawawa nga himongka damong nga aling tapilinginengkolec gagaing, yengele hodoc-ngineng. **11** Aime ngenge yeholec wetackelu gabong ngengela soc tofaine helockelu baickeicnele aibaba silic ingucne fikewec.\* Aibaba yogo monicti moledi mi bawec, miyac. Kristodi soc tofaine helockelu baickeicnele ailu aibaba yogo bawecete, ngengileng kwele esecnele gaga helockelu baickewec. **12** Ailu ngenge misa lowaibong, iwa Kristoholec longngebawec ingucne. Aime Wapongti Kristo homackacni bagboliywec. Wapongti bole tapiliine-holec bacaigac, ngenge yogo ngagesingkeibongte, yefe iwa ngenge inguchac misa lowaibong, iwa yedi Kristoholec bagboliyecngebawec ingucne.

### *Kristoholec gbelong aiibeng*

**13** I yangucte, ngenge esecne bikickolec galu homaicne ailu kwele esec-nele gaga mi helockeibong. Homaicne ingucne gabong yedi Kristoholec bagboliyecngebawec bikicngineng sasawa hegilengelelu hatacmac mi ngagesiwc. **14** Bikicte hibi monic kwelengkeicne fagac, yogodi amengineng bafuwangelewec. Aime Kristodi hibi yogo hocne bilingti malicpongka weme domawec. Ye inguc aime yowa hibiwa kwelengkeicne fagac, yogo baickeyackewec. **15** Ailu ye yeuctihac malicpongka domawec, yogowahac aleng yogo yengele damong nga wiyac gocne bole-yowa tapilinginengkolec gaibong, yogo yengele hudule wiyacngineng hemolongkeyackewec. Aime tapili mikac yegena domalu gamenginengkolec aiibong.

### *Kristodi lukecngebawec*

**16-17** Ilec ailu nosing-misanganengete yefe, ailu hombang dameng me Sabat dameng, me tamacne gblolicne weledaict, wiyc acngebawec, wiyc acngebawec. Nga Kristodibac wiyc noine aigac. Ilec ailu wiyc ilucinele mi ngagesidaing. Entacka monicti yanguc midaicte, "Dameng iwa ngagedaing," ye nalic mi wosaecngebalu misowalecnge-badaic. **18** Ailu gocne yengi gung haicine monic-monic nganilu kwsacka bawacnagulu angelo mitengembagaing. Ngic ingucne yenge kwelengineng esecnele ngage-ngage sisifucine moc balaibelu, yengileng ngagebong wiyc feicne aicaigac. Ilec yengi inguc aidaing mibong, ngenge ngic ingucne mi ngagecebadaing. Aime yenge mi mimoctocngebadaing. **19** Aling ingucne yenge Kristo hegilelu gacaigaing. Kristo ye yeicne habule hodocine. Ailu yelacni luwe nga ginong wabong ye socine kpatulecnubame domacaigabe-leng. Inguc aime Wapongti basugulecnubame gagabeleng.

---

**2:7:** Efs 3:17    **2:9:** Yoa 1:14,16    **2:10:** Efs 1:21-22    \* **2:11:** Yuda yenge soc tofangineng lolic-lolic helockelu baickelu gaibong. Poldi aibaba yogolec ngagesilu nangeng yowa miwec.    **2:11:** Rom 2:29    **2:12:** Rom 6:4    **2:13:** Efs 2:1,4-5    **2:14:** Efs 2:14-16; 1Pi 2:24    **2:16-17:** Rom 14:1-12; Hib 8:5    **2:19:** Efs 2:21; 4:16

<sup>20</sup> Aime ngenge Kristoholec homabong himongte aleng tapilingineng biyachac baicebame hegileibong ingucne aigaingka, ngenge omale yengele yefele bagewa gagaing? <sup>21</sup> Ngic-ngigac yenge himongte yefe yogo balaibelu yanguc micaigaing, "Ga yogo mi badamec." Nga "Ga yogo nonganic mi aidamec." Ailu "yogo mi bauwadamec." Yenge inguc mibong ngenge yogo aibong mi madickedaicte. <sup>22</sup> Yogo ngic mimiwa nga ngic weweduwa sugu. Ailu wiyc yogo ngengi banoc ailu balu gabong miyac ainale loicne. <sup>23</sup> Aime ngic ingucne yenge yengung yanguc micaigaing, "Yefe-yowanonggeng yogo ngage-ngage-motockolec." Yenge inguc milu yengung gee nga mimilocte yefe balaibelu, aibaba kwesacina bawacnagucaigaing. Aime Wapongti ngageyeleme madickenale socnginengte wiyc hegilecaigaing. Ngagegaing, ngic ngage-ngagewa aibaba ingucnedi madicne aigac. Aimebac noine monic mi bafuwayeledaicte, me yogodi kwele esecnele angac monic mi bawadaicte, miyac.

### 3

#### *Homackacni gboliyelu fangkeibeng*

<sup>1</sup>Ilec ailu ngenge Yesuholec homackacni momoc gboliyelu fangkeibongka, wiyc wilini fagac, yoglec angacngebadaic. Kristo ye Wapongte foleinapec iwa ngiyegac. <sup>2-4</sup> Ngenge biyac Kristoholec homaibong. Ailu gagangineng yeholec Wapongte emewa gagaing. Ailu gaga yogo sangkeme ngic-ngigac yenge mi nganicaigaing. Kristo ye gaganginengte fungine. Yedi fikelu yegengkeme, dameng iwa ngenge yeholec yele wac feicne iwa momochac fikelu yegengkedaingte. Ilec ngenge wiyc wilini fagac, yogobac ngagesilu gadaing. Nga himongka wiyc fagac, yogo mi ngagesidaing.

#### *Wiyac esecne miyac aiwec*

<sup>5</sup> Ilec ngenge himongte angac haicine monic-monicti kwelenginang fan-gelegac, yogo hegilebong homadaic. Aibaba yangucne yogo, selo-boic nga gaga kosaine, ailu kwele fangke-fangke aibaba, nga aibaba sowacne, ailu hane aibaba. Hane aibaba yogo hocne siduc-gbong alang bayelecaigaing ingucne aigac. <sup>6</sup> Ngic-ngigac yenge aibaba ingucne bagacu Wapongte yowa hegilebong yedi yoglec ameine aalicineholec baduyeledaicte. <sup>7</sup> Aime esecne ngenge ngengileng mi ngagesingkeibong, dameng iwa yengeholec galu aibaba ingucne bocyac ailu gaibong. <sup>8</sup> Ailu ngenge yakumac aalic nga aibaba dacineholec, ailu sisipilic yowa yogo hegiledaing. Ailu misulec-yowa nga yowa sowacne yogo micnginangkocni mi ofenale damongkedaing.

<sup>9</sup> Ngenge kwesac mi aiyeledaing. I yangukte, ngenge soc-kwelengineng esecne aibabaineholec biyac hemoctolu hegileibong. <sup>10</sup> Ngenge yogo hegilelu soc-kwelengineng gblolicne balu holelu gagaing. Aime Wapongti soc-kwelengineng gblolicne bafuwalu hatacmac hole-gboliyecaigac. Ailu yefe yogowa yele ngage-ngage-motoc noine longelegac, yogodi yeicne silic ingucne aidaicte. <sup>11</sup> Inguc hole-gboliyecngebame ngenge Grik ngic-ngigac me Yuda ngic-ngigac aigaing, mimi ingucne yogo miyac aigac. Aime ngenge soc tofangineng helockeicne me soc tofangineng mi helockeicne, me ngenge Grik ngic-ngigac alingka mi taockeicne, me himong dalickacni\* ingucnebenang gagaing. Me ngenge kwelec kwekwe ngic-ngigac gagaing, me ngic

**2:20:** Gal 4:3,9; 1Tim 4:3    **2:22:** Mat 15:9    **3:1:** Mrk 12:36; 16:19; Efs 1:20    **3:2-4:** Mat 6:33

**3:5:** Rom 6:6,11; Efs 4:19; 5:3-6    **3:8:** Efs 4:25-29; 5:4    **3:9:** Efs 4:22,25    **3:10:** Efs 4:24

\* **3:11:** Grik yowawa himong monic wacine Sikitia kwelengkeicne.

monicte bagewa mi gagaing, ye yowa sasawa ingucnele mi aicnocaigac. Kristodi ngic-ngigac ngengele kwelewa bucbuchac gadaictewa, yedibac wiycac sugucnebenang aigac.

### *Gaga gbolicne*

<sup>12</sup> Wapong ye kweledi angac ngagengelelu bawosaecngebame yeicne bingec gagaing. Ilec ailu ngenge kwelenginengti ngic-ngigac yengele kwelesowac ngagelu baficebalu gadaing. Ailu bawacnagulu ulucne galu ngicngigac yengele mi takicngebadaic. Ngenge aibaba yogo sasawa ngakpi ingucne holebong haume balu gadaing. <sup>13</sup> Ailu ngenge wiyc ailu mi kpatalacnagudaing. Ailu monicti yowa kwekwe aigacka, ngenge yogo hegiledabieng. Sugucnedi ngengele bikic yogo biyachac hegilegelewec, silicinc ingucneheac ainagudaing.

<sup>14</sup> Aime ngenge yogo sasawa aigacgu angacngineng feicne yogo kweledi angac ngagenagulu gadabiyeng. Inguc gabong kwele-angacti muc ingucne ailu hefecngebame ngenge sasawadi moniyang ailu gadaingte. <sup>15</sup> Inguc gae-bongka Kristole kwele-moniyangti kwelengineng damongkedaic. Ngenge soc moniyang inguc ainingte yedi biyachac wacngebawec. Ailu Wapong kwele-madic micnolu gadabiyeng.

<sup>16</sup> Kristole yowadi kwelenginang wakedaic. I yangucte, ngage-ngage-motockolec edonagulu wedunagulu sawang-yowa midabiyeng. Ailu Miti geewa gee fagac, nga malac fuluna gee, ailu Tili Asudi gee bañuwangelelu gagac, ngenge yogo kwelenginang kwele-madicka Wapong holecnodaing.

<sup>17</sup> Ngenge wiyc sasawa midaingte me aidaingte, ngenge yogo Sugucne Yesule wacka aidaing. Ailu ngenge ye ngagesilu Wapong Mamac kwele-madic edodabiyeng.

### *Golowacte gaga*

<sup>18</sup> Ngigac ngawegoneholec, ga ngawegonela bawacnagulu yele yowa ngagelu Sugucneholec wetackelu gagamecka aibaba yogodi nalic aidaicte.

<sup>19</sup> Ngawe, ga ngigacgone kwele-angacka ago aicnodamec. Ailu tatakic me ngaba monic mi aicnodamec. <sup>20</sup> Adu-madec, ngenge wiyc sasawa ngagelu nenggac-mamacfocngineng yengele yowa balaibelu gadabiyeng. Sugucnedi aibaba ingucnele ngageme madickegac. <sup>21</sup> Adu-madec yenge kwele-umac badaingkale, mamac ngenge hungka baba mi aiyeledaing.

<sup>22</sup> Kwelec kwekwe ngic-ngigac gagaing, ngenge himongte sugucnefocngineng yengi wiyc monicte yogo me yogo mibong, ngenge yengele yowa sasawa ngagelu balaibedaing. Yengi ngengele madicne ngageningte yengele haicka sugu yowa balaibelu mi aidaing. Yenge mi nganicngebaebongkahac ngenge yengele yowa balaibedaing. Ngenge bolewa kwelengineng salelu Sugucne alang bacnolu bolengineng badabiyeng. <sup>23</sup> Ailu bole yogo me yogo bagaing, iwa kwelengineng saledabiyeng. Ngenge yogo ngic yengele ngagelu mi badaing, miyc. Ngenge Sugucnele ngagelu bolengineng badabiyeng. <sup>24</sup> Aime ngic yengele bole hocne bagaing, yogo Sugucne Kristole bole ingucne ngagelu balu gagaing. Inguc ailu Sugucnedi ameine badungelenale mole-damocine ngeledaicte, yogo ngagegabiyeng. <sup>25</sup> Sugucnela feicne waicne mi fagac. Ilec monicti aibabaine sowacne balu game Sugucnedi yogolec silicina ameine lacnodaicte.

**4**

<sup>1</sup> Ngic ngenge kwelec kwekwe aling yengele sugucne gagaing, ngenge yan-guc yogo biyac ngagegaing, ngengele Sugucne wilini honocmengka gagac. Ilec ngenge kwelec kwelefocngineng aibaba dondonnele silicina aiyelelu gadaing.

***Mimiloc nga Wapongte aibaba***

<sup>2</sup> Ngenge mimiloc bolewa sanangkelu deboc-gboli galu kwele-madic edodabiyyeng. <sup>3</sup> Ngenge nongele ngagelu inguchac yanguc milockedadaing, Wapongti yowale yefe banoleme Kristole ngage-ngage sangkeicne fagac, yogo mibeng yegengkenale ngagedaing. Yowa yogolec hocne muc-macka ngiyegabac. <sup>4</sup> Yowa yogo dondonne neleme yowa silicina mibe yegengkenale milockedadaing.

<sup>5</sup> Ngenge ngic-ngigac lobina gagaing, yengele hewacka ngage-ngage-motockolec galu, Sugucnele yefe edalicebaningte ngenge damengngineng nalic wickedadaing. <sup>6</sup> Ailu ngenge damengsoc ngic-ngigac yengele yowa ameine filesoc filesoc wenuc bafaliybeng ngageningte ailu, yowanginengti kwele-madicineholec kiwecti angacie aicaigac, ingucnehaic aidaic.

***Wenac-madic yowa***

<sup>7</sup> Aime nale yowa-siduc sasawa yogo ngic hae-gbanonggeng Tikikusdi edo-cebadaiete. Na kwelenedi yele angac ngagelu gagabac. Ailu ye tatakic mikac Sugucnele mic-yowa balaibelu mole-bafic gagac. Ailu ye nongilengkolec momoc Sugucneholec wetackelu yele kwelec kwekwe aling ailu momoc gagabeleng. <sup>8</sup> Ye hocne nonge momoc gagabeleng yogolec silicine edocngebadaite. Ailu ngengele kwele basanangkenogale salebe fudaicte. <sup>9</sup> Aime ngengele ngic hae-gbanganeng monic, wacine Onesimus, ye salebe Tikikus-holec fudaicte. Onesimus ye Sugucnele yowa balaibegac, yele ailu kweledi angac ngagelu gagabeleng. Aime yeki aibaba yawa fikewec, yogolec siduc edocngebabaiyete.

<sup>10</sup> Aime Aristakus ye naholec muc-macka ngiyeibec, yedi ngengele wenac-madic lome fugac. Ailu Mareko, Banabas nefine, yedi inguchac wenac-madic lome fugac. Ngenge yele yowa biyac baibong, yedi ngengela fudaiete, hefoledaing. <sup>11</sup> Ailu Yustus, yele wacine monic Yesu yedi wenac-madic lome fugac. Aristakus nga Mareko ailu Yustus yengi sugu Yuda ngic soc tofangineng helockeicne nongileng alingnonggang baficnubacaigaing. Ailu Wapongte ngani-damongte bole nongileng momochac balu gagabeleng. Yengi basanangnulu gagaing.

<sup>12</sup> Kristo Yesulec kwelec kwekwe Epafas, ye ngengele alingkacnidi, wenac-madicine ngengela lome fugac. Aime ngenge sugule-sanangkelu doman-ingte nga Wapongte ngage-ngage nga angac sasawa ngage-motolu iwa bucbuchac ganingte, ye inguc ngagegac. Ilec ngengele ailu damengsoc mimiloc bole umacnehaic balu gagac. <sup>13</sup> I yangucte, ye ngengele nga Laodisea ngic-ngigac, ailu Hirapolis ngic-ngigac ngengele ailu boletowa balu gagac, yogolec mibasanang ailu edocngebabac. <sup>14</sup> Aime Luka, ye dota, yele kwelenonggengti angac ngagecnogabeleng, ye nga Demas, yeke wenac-madicnginec inguchac loboc ngengela fugac.

<sup>15</sup> Nimpɑ, nga Yesule habu yele macka kpaduckecaigaing, nga Laodisea taonkacni ngic hae-gbafocne yengela nale wenac-madic lobong hikena.

<sup>16</sup> Aime ngenge hibi yago wafebong motome, lobong Laodisea habu, yengela hikeme yenge nganilu wafedabiyeng. Ailu nale hibi monic Laodisea salebe hikewec, iwacni kwesidaicte, silicine yogo ingucnephac wafedabiyeng. <sup>17</sup> Aime Arkipus yanguc edodabiyeng, “Sugucnedi bole biyachac gelewec, ga bole yogo sasawa balaibelu balu gaengka bolegone motodaic.”

<sup>18</sup> Aime Pol nani wenac-madic yago neicne moledi kwelengkegabac. Aime muc-macka ngiyeebewa nale ngagesidaing. Sugucnele kwele-madicti ngen-gela fadaic. Yogo foinac.

## Poldi Tesalonika **Habu Yengele Molic-molic Hibi Kwelengkewec**

### *Mimi-yegeng yowa*

Tesalonika yogo taon sugucne monic Masedonia himongka kiwec mecina fawec. Poldi Tesalonika hikelu Yesule Siduc edocebalu weduyelewec. Weduyeleme Yuda ngic-ngigac gocne nga Israel yengele alingkacni miyac, yengelacni homacnedi yowaine ngagesingkeibong. Aime Yuda ngic-ngigac micne gocne yengi hasowac ailu welu yebiебong hikewec (Salecebaicne 17:1-14).

Hikelu lolickelu Korin taonka hikelu gawec. Galu Timoti saleme Tesalonika hikelu iwacni hefaliyelu siducngineng edowec. Yesu homackacni gboliyelu honocmengka feme hifa 20 ngama ingucne motome, hibi yago kwelengkewec. Hibi yagowa Poldi basanangebalu Yesule kwesi-kwesi damengte fungine mime yegengkewec.

### *Yowa yago hibi nebocina fagac*

1:1 Wenac-madic yowa

1:2-10 Yengele aibaba nga ngage-ngagesingte mitengebawec

2:1-3:13 Pol nga bole-ngic yengele aibaba nga ngage-ngage

4:1-12 Ngic-ngigac ngagesingkegaing, yenge aibaba madicne balaibedaing

4:13-5:11 Yesule kwesi-kwesi damengte siduc weduyelewec

5:12-28 Yowa basanangkelu wenac-madic milu kwelengkeyelewec

### *Hibile molic-molic yowa*

<sup>1</sup> Yesule habu Tesalonika taonka galu Wapong Mamac nga Sugucne Yesu Kristoholec wetackelu gagaing, ngengele hibi yago Pol, Sailas nga Timoti, nongi logabeleng. Kwele-madic nga kwele-mogungtowadi ngengela fadaic.

### *Tapiliholec nga Tili Asuholec*

<sup>2-3</sup> Ngenge ngagesingkelu aibaba madicne bafuwalu ngic-ngigac agofocngineng yengele kwelenginengti angacngebanaale bole sugucne hac ba-caigaing. Ailu ngenge tatakic mikac galu Sugucnenonggeng Yesu Kristole ailu wangec gagaing. Yogo ngagesilu damengsoc Wapong Mamac nonggengte haicka kwele-madic micronlu ngenge mimilocka locngebacaaigabeleng.

<sup>4</sup> Ngic hae-gbafocnonggeng, Wapongte kweledi ngengele angackeme ba-wosaecngebawec, yogo ngagegabeleng. <sup>5</sup> Yogolec fungine yanguc, nonge ngengela Siduc Madicne balu kwesibeng, yogo yowa sugu monic mi ngeleibeng, miyac. Nonge tapiliholec nga Tili Asuholec, aime noine sanangnehac ngagegacgu bakwesilu ngeleibeng. Ngengeholec gaibeng, iwa ngengele aling aibeng ailu baficngebaiibeng, ngenge yogolec silibac ngagegaing. <sup>6</sup> Ngenge aibabanonggeng balaibelu Sugucnele pasi inguchac balaibelu gagaing. Iyangukte, ngenge doic sugucne bocyac ngagelu gaibong. Ailu sifu Wapongte yowa ngagelu angacngebawec. Angacngebame Tili Asudi baefecngebame belic-belicka gaibong.

<sup>7</sup> Ilec Masedonia nga Akaia ngic-ngigac ngage-ngagesingkolec gagaing, yengi ngengele aibabangineng madicne ingucne yogo nganilu inguchac balaibecaigaing. <sup>8</sup> Sugucnele yowadi ngengelacni molickelu Masedonia nga Akaia himongka mibong sawelu hikeme ngageibong. Aime ngenge Wapong ngagesingkeibong, yowa-siduc yogodi inguchac himong neboc nga nebocka sawelu hikewec. Inguc aime nongi bole yengela taockelu balu hike-hikeine yogo ngengi baefeweibong. <sup>9</sup> Yenge yengungtihic Tesalonika ngengele siduc yanguc mibong yegengkelu hikegac, "Pol agokecineholec ngengela kwesibong ngengi mac holeyelelu bacebaibong. Ailu ngenge Wapong gagaineholec nga yowaine noineholec yele kwelec kwekwe aling ainingte, siduc-gbongfocngineng haicine monic-monic hegilecebalu Wapongta taock-eibong. <sup>10</sup> Ailu yanguctihac Madecine honocmengkacni wanale wangec gagaing." Yenge siduc inguc mibong hikegac. Wapongti Madecine bag-boliyeme homackacni gboliyelu fangkewec. Ailu ameine aalicineholec badu-badule damengine kwsidaicte. Ailu Yesudi hocne umac yogowacni baicnubame wasecne aigabeleng. Ngenge yogo ngagesingkegaing.

## 2

### Tesalonika taonka

<sup>1</sup> Ngic hae-gbafocne, nonge ngengeholec gaibeng, yogo noineholec ai-wec, yogo ngenge ngagegaing. <sup>2</sup> Nonge Filipai himongka molicke hikelu gaebengka, yengi doicka locnubalu misulec ainoleibong. Iwacni Tesalonika hikebeng ngic-ngigac gocne yengi inguchac yowa mife-miya bocyac ainoleibong. Inguc ainolebong nonge Wapongti molickenoleme hangoc mikac galu Wapongte Siduc Madicne mibeng yegengkenelewec, ngenge yogo ngagegaing. <sup>3</sup> Nonge yowa kosa monic mi mibeng yegengkewec, miyac. Ailu wiyc ac monic kwasacka ewalincgebanogale mi aiibeng. Ailu kosa ganangte aibaba sowacne monic mi aiibeng. <sup>4</sup> Aime Wapongti wosaechnubalu ngageme nalic aime Siduc Madicne noleme damongkelu mibeng yegengkedaicte. Ngic yengi ngagebong madickenale yowa monic mi edocngebalu gaibeng, miyac. Wapong kwelewa ngani-ngani fileine, yedi angac ngagenolenale yele yowa milu gagabeleng.

<sup>5</sup> Ailu nonge mic-heloc yowa monic mi edocngebaibeng. Nga hane aibaba ingucne monic mi aiibeng, miyac. Yogo Wapongti widecnubagac, yogo ngagegaing. <sup>6</sup> Aime ngic yengelacni wac feicne banogale monic mi ainolegac. Yogo ngengelacni nga ngic gocne yengelacni inguchac banogale monic mi ainolecaigac. <sup>7</sup> Nonge hewacka Kristole salecebaicne gagabeleng, yogo nalic mibeng baficnubadaingte. Aime sifu bawacnagulu ulucne gaibeng. Nenggac monicti yeicne kogocene amuc gumelu damongkecaigac, silicne yogolecsoc damongngebaibeng. <sup>8</sup> Ailu nonge ngengeholec galu kwelenonggengti ngengele angac ngagelu angacka Wapongte Siduc Madicne wedungeleibeng. Ailu yogo sugu miyac, nonge ngengele inguc ailu gaganonggeng hegilenogale ngageibeng.

<sup>9</sup> Wapongte Siduc Madicne edocngebalu wedungeleibeng, dameng iwa ngengeholec galu soctepecka wiyacte umac monic mi bafuwangelenangte ngageibeng. Ilec ailu deboc hadeng bole sugucnehab doic feina balu gaibeng. Ngic hae-gbafocne, yogo ngengung ngagegaing. <sup>10</sup> Nonge gbagnacne nga condonne ailu bikic mikac aibaba ingucne balu gaibeng. Ngenge

ngage-ngagesingkolec yogo nganilu ngagebong, Wapongti inguchac widec-nubawec. <sup>11-12</sup> Ngenge Wapongte ngani-damong nga wac feicne iwa ganigte yedi hefolecngebawec. Ngenge yele ngage-ngage nga angac balaiben-ingte ailu mamac monicti yeicne adu-madecfocine bacebacaiagac, nongi silicine ingucnehac dogbac aingelelu mibakoloc aingeleibeng, yogo ngage-gabiyeng.

### *Ngaba fikewec*

<sup>13</sup> Aime ngengela kwesilu Wapongte yowa mibeng yegengkeme ngagelu yanguc miibong, "Yogo foinac, yogo Wapongte yowa, yogo ngic yengele yowa miyac." Inguc milu yele yowale angacnggebame baibong. Ilec ailu nonge damengsoc Wapong kwele-madic edolu gagabeleng. Wapongte yowa miibeng, yogodi ngage-ngagesingkolec, ngengele kwelenginang bole balu gagac. <sup>14</sup> Ngic hae-gbafocne, Wapongte habu Yudeya himongka Kristo Yesuholec wetackelu gagaing, yengela doic fikewec, silicine ingucnehac ngengela inguchac fikeme, ngenge yenge ingucnehac aiibong. Aling gocne ngengele himongkacnidi umac yogo bafuwangeleibong. Silicine ingucnehac Yuda ngic-ngigac yengelacni alingfocngineng yenge umac bafuwaibong. <sup>15-16</sup> Yengi hocne Sugucne Yesu nga Wapongte siduc-mimi ngic whomace-baibong. Israel yengele alingkacni miyac yengi wasecne ainingte nonge Wapongte yowa edocebacaigabeleng. Aime yenge yogo mi ainingte Yuda ngic-ngigac yengi bole nonggeng welockelu weyebic ainolelu ngic-ngigac sa-sawa lobe holecebacaigaing. Wapong ye yogo nganilu ngageme mi madick-ecaigac, yenge damengsoc bikicngineng taockeme taoc gagaing. Yuda ngic-ngigac yenge inguc aiibong Wapongti yoglec ameine aalicineholec dameng iwahac baduyeledaite.

### *Hatacmac nganicebadaite*

<sup>17</sup> Ngic hae-gbafocne, ngengeholec gabeng yebicnubabong hikeibeng, dameng iwa socti sugu hegilecngebaibeng. Nga kwelenonggengtibac miyac. Ilec ailu ngenge hatacmac nganicngebanaangte bocyac ainolegac. <sup>18</sup> I yan-gucte, nonge ngengela hatacmac funogale ngagesilu gaibeng, yogo foinac. Aime naneicne biyachac ngengela funogale dameng bocyac ainelewec. Aime Satangti yefenonggeng hedickeme kpungkeibeng. <sup>19</sup> Sugucne Yesudi kwesilu nongele bolele ailu ngenge nganicngebalu madicne mime wac feicne badabelengte. Nonge gbelong ailu ngenge sil ingucne bacngebagabeleng. Nonge inguc ngagesilu beliyelu wangec gagabeleng. <sup>20</sup> Nonge ngengele ngagesilu wac feicne nga belic-belickolec aigabeleng.

## 3

<sup>1-2</sup> Ilec ailu nonge kwelenonggengti ngengele angacnubawec, aime nalic mi fudabelengte. Ilec medecnubame ngengele ngagesilu yanguc miibeng, "Nonge sugu Atens taonka ngiyelu, nalic ngic hae-gbanonggeng Timoti salebeng fudaicte." Inguc milu salebeng fuwec. Timoti ye Wapongte bole-nigci nongeholec momoc bole balu Kristole Siduc Madicne mime yegengke-caigac. Yedi ngengela fulu ngage-ngagesingka basanangngebalu mibakoloc aingelenale milu salebeng fuwec. <sup>3</sup> Umac haicine monic-monik ingucnedi ngengela fikeme, ngic-ngigac gocne kwelenginengti wawedaickale ailu,

Wapongti umac ingucne tengkenangte ngagenolewec, ngenge yogo ngagegaing. <sup>4</sup> Ngic yengi weyebic ainoledaingte, yogo biyachac ngengeholec galu edocngebaibeng. Aime yogo biyachac fikewec, ngenge yogo ngagegaing. <sup>5</sup> Ilec ailu na inguc gabe kwelenele tapili wame, ngengele ngage-ngagesingte silicine ngagenogale Timoti salebe ngengela fuwec. Aime boletowa ngen-gela baibeng, yogo Lokwesac Ngicti kwesacngebame noine mikac aidaickale ailu, ngagenogale Timoti salebe ngengela fuwec.

### *Haic-mesuningin nganinoga*

<sup>6</sup> Aime Timoti ye ngengelacni hefaliyelu siducngineng madicne yanguc mime yegengkenolewec, ngenge ngage-ngagesingkolec galukwelenginengti angac ngagenagucaigaing. Ailu ngenge damengsoc nongele ngagesilu kwele-efec ailu gacaigaing. Aime nonge ngengele haic nganinogale aingelecaigac, inguc hocne edocnubawec. <sup>7</sup> Ngic hae-gbafocnonggeng, nonge kwele-umac nga doic sugucne ngageebengka ngengele ngage-ngagesingte yowasiducti nongele kwele basanangkewec. <sup>8</sup> I yangucte, ngenge Sugucneholec wetackelu gagangineng sanangne gagaingte ailu nonge gaga gbolincne gagabeleng. <sup>9</sup> Aime nonge ngengele ailu Wapongnonggeng hatacmac mitengkenogale ngagegabeleng. Aime ngengele ailu yele haicka belicbelicka galu beliyebeng madickegac. <sup>10</sup> Aime nonge ngengele haic nganinangte deboc hadengsoc sanangnehac milockelu gagabeleng. Inguc nganilu ngage-ngagesingineng taockelu sanangkenale baficngebababelengte.

### *Wiyac madicne*

<sup>11</sup> Aime Wapong Mamacnonggeng nga Sugucnenonggeng Yesu yeki yefe bafuwanoleboc nonge ngengela fudabeleng. <sup>12</sup> Aime kwelenonggengti angac ngagengelecaigabeleng, silicine yogo lecsoc Sugucne Yesu yeuctihac kwele-angacngineng hatacmac taockelu bame sugulengeledaic. Aime kwele-lenginengti angac ngagenagulu ngic-nigic nebocene momoc kwelenginengti angac ngageyelelu gadabiyeng. <sup>13</sup> Inguc aibong ye kwelengineng basanangkelu gadaic. Aime Sugucnenonggeng Yesu ye ngic-nigicacfocene yeicne bingec yengeholec kwsidaicte, dameng iwa ngenge gbagbacne nga sowacnengineng mikac galu Wapong Mamacnonggeng yele haicka domadaingte.

## 4

### *Gaga gbagbacne*

<sup>1</sup> Ngic hae-gbafocnonggeng, nonge Sugucne Yesuholec wetackelu yowa yanguc biyac edocngebaibeng, Wapongti nganicngebame madickeningte ngenge yele yefe balaibedabieng. Inguc edocngebaibengte, ngenge yogo yanguctihac inguc gagaing. Aime yogodi ngengele hewacka sugulelu sanangkenale ngage-ngagengineng basanangkenogale ung-yowa hatacmac taockelu edocngebababeleng. <sup>2</sup> Nonge ung-yowa sasawa Sugucne Yesulacni ngagelu edocngebaibeng, yogo ngagegaing. <sup>3</sup> I yangucte, Wapongte ngage-ngage nga angac yogo yanguc fagac, ngenge gaga gbagbacnebenang gadaing. I yangucte, ngenge selo-boic aibaba hegilelu <sup>4</sup> socngineng filesoc filesoc madicne damongkelu gbagbacne nga alang-babaholec gadaing. <sup>5</sup> Israel yengele alingkacni miyac, yenge Wapong mi ngagelu gaga kosaine

yogolec angac sugucne hac ngagelu balaibelu gagaing, ngenge yenge ingucne hac mi aidaing. <sup>6</sup> Ngenge bikickolec ailu ngic hae-gbafo cngineng yengele ngawe me ngigac ewalice badaingkale, socte angac te ailu yengeholec selo boic aibaba mi aidaing. Sugucne ye bikic ingucnele ngagelu ameine ingucne hac ye ledai cte, nonge yogolec sawang-yowa sanangne biyachac milu edocn gebaibeng. <sup>7</sup> Wapongti gaga gbabcne ganangte wacnubawec. Gaga kosaine ganangte mi wacnubawec, miyac. <sup>8</sup> Ilec yanguc aigac, ngengelacni monicti yowa yago milu hegilegac, ye ngic yengele yowa mi hegilegac, ye Wapongti Tili Asuine ngelewec, yele yowa hegilegac.

### *Kweledi dofincnagulu angacnubadaic*

<sup>9</sup> Ngenge kweledi angac ngagenaguningte Wapongti yefe yogo biyachac edocn gebalu wedungelewec. Ilec ngenge ngic hae-gbafo cngineng yengele kweledi angac ngageyelingte yowa, yogolec monic mi kpungkegaing. Aime nonge yowa yogo hatac mac mi kwlengkedabelengte. <sup>10</sup> Foinac, ngengi Masedonia prowins nebock a ngic hae-gbafo cnonggeng Yesule habu sasawa gagaing, ngenge kwelenginengti yengele angac ngagelu gagaing. Aime aibaba yogodi ngengele hewacka sugulelu yegengkenale sanangne migabeleng. <sup>11</sup> Aime ngenge ulucne galu bolengineng damongkelu ngengungtihac molenginengti bole balu ganin te ngage ngagengineng sanangne fadaic. Molic kelu aibaba ingucnele edocn gebaibeng. <sup>12</sup> Bole inguc babong ngic-ngigac lobeina gagaing, yengele haicka aibabangineng dondonnedi yengele kwelewa kwefangkeme alang ban geledaingte. Aime molenginengti bole inguc babong ngenge wiyac monic te nalic mi kpungkedaingte.

### *Kristoholec sasawadi fedabelengte*

<sup>13</sup> Ngic-ngigac yenge honocmengte wangec gaga yogo mi ngagelu, yenge homac-damengka hii-songgong sugucne hac aicaigaing. Ngic hae-gbafo cnonggeng, ngenge kwele-sowac ingucne hac mi aidaing. Ngenge homabong yengela oma wiyac fikedai cte, yogolec fungine ngage motoningte angacnubame ngagelu migabeleng. <sup>14</sup> I yangucte, Yesu ye homalu gboliyelu fangkewec, yogo noinebenang ngagesingkegabeleng. Ilec ailu ngic-ngigac yenge biyachac Yesu ngagesingkelu homaibong, yenge Wapongti mengocebame Yesuholec kwesidaingte, yogo ngagesingkegabeleng. <sup>15</sup> I yangucte, Sugucnele kwesi-kwesi damengka ngic-ngigac gbllicne gagabeleng, nongilengti ngic-ngigac ngage-ngagesingkolec homaibong, yenge nalic mi molickeyedabelengte. Yogo Sugucnedi yowa monic inguc miwec yogo balaibelu edocn gebagabeleng. <sup>16</sup> Sugucne ye dameng iwa yowa tapiliineholec mime, angelo yengele damong monic t wackedai cte. Aime dameng iwahac Wapongte kpeng hiyadaicte. Hiyame Sugucne yeicne honocmengkacni sawawa kwesidaicte. Kwesime ngic-ngigac Kristoholec wetackelu homaibong, yenge molickelu gboliyelu fangkedaingte. <sup>17</sup> Fangkebong ngic-ngigac gbllicne gagabeleng, nongileng yengeholec inguchac kaguwa kwelina fulucnubame, nongileng sasawadi momochac Sugucne holec fedabelengte. Yogolec ailu Sugucne holec gaga sanang gadabelengte. <sup>18</sup> Ilec ailu ngenge yowa yago edonagulu mibasanang ainagulu gadabiyeng.

## 5

*Kwele-gboli ganoga*

<sup>1-2</sup> Ngic hae-gbafofnonggeng, hise-baba ngic yenge debocka kwesilu hise babong nongileng kwesi-kwesi damengngineng mi ngagecaigabeleng, silicine ingucne hac Sugucnele damengtowa yogo kwsidaicte. Ngenge ngengungti hac yogo biyac ngagegaing. Yogo ma damengka me ma hadengka fikedaiete, yogolec hibiwa hatacmac nalic mi kwelengkelu neled-abelengte. <sup>3</sup> Aime ngic-ngigac yenge yanguc midaingte, "Kwele-mogung nga damongkolec gagabeleng." Inguc mibong, dameng iwahac umacti basowalecebanale fikeyeledaicte. Umac yogo ngigac gobeholecti madec banogale dameng mi ngageemewa gado hicaigac, silicine ingucne hac biyabenang fikeyeledaicte. Fikeyeleme hangoc nalic mi hikedaiingte.

<sup>4</sup> Aime ngic hae-gbafofne, hise-baba ngic kwesime ngenge kwattack-ecaigaing, silicine ingucne hac dameng yogo kwesime nalic mi kwat-ackedaingte. I yanguete, ngenge kundungka mi gagaing, miyac. <sup>5</sup> Ngenge sasawadi wenac nga angote adu-madefocene, aime nongileng deboc me kundungte aling miyac. <sup>6</sup> Ilec gocne gung facaigaing, silicine ingucne hac gung mi fadaing. Nongileng ngage-ngage damongkelu deboc-gboli galu damongnagudabeleng. <sup>7</sup> Aime gung-fafa ngic yenge debocka gung facaigaing. Nga misa sanangne nono yenge debocka misa nolu kwelengineng sifuwe-caigac.

<sup>8</sup> Aimebac nongileng wenac agofocene. Ilec ailu ngagenagulu damongnagudabeleng. I yanguete, ngage-ngagesing nga kweledi angac ngagenagulu gaga, yogodi malekunonggeng ingucne holebeng haudaic. Aime wangec galu wasecne ainangte ngagesigabeleng, yogodi aen duunonggeng ingucne aime holelui domadabeleng. <sup>9</sup> I yanguete, Wapongti mimocto-mimocotle damengka ameine aalicineholec badunale mi edocnubawec. Ye Sugucnenonggeng Yesu Kristodi bikicte ameine bame wasecne ainangte edocnubawec. <sup>10</sup> Kwesi-kwesi damengina, gocne gbolicne gadabelengte nga gocne biyac homadabelengte, nongileng sasawadi yeholec gbolicne ganangte yedi hocne nongilengte ailu homawec. <sup>11</sup> Ilec ailu ngenge yanguetihac yowa edonagulu basanangnagulu baficnagulu gacaigaing, ingucne hac hatacmac taockelu aidaing.

*Damongfocngineng nga ngic hae-gbafofnonggeng*

<sup>12</sup> Ngic hae-gbafofnonggeng, ngenge yanguc edocngebagabeleng, bole ngic-ngigac yenge ngengele hewacka boletowa balu gagaing, ngenge yenge alang bacebadabiyeng. Yenge Sugucneholec wetackelu damongngebalu sawang-yowa milu gacaigaing. <sup>13</sup> Yenge bole inguc balu gagaingte ailu kwelenginengti yengele angacngabeame ngenge yogolec ngagebong feicne aidaic. Ailu ngengileng hewacka kwele-moniyang ainagudabiyeng.

<sup>14</sup> Ngic hae-gbafofnonggeng, nonge sawang-yowa milu yanguc edocngebagabeleng, ngic-ngigac oyong gacaigaing, ngenge yenge sawang-yowa edoccebadabiyeng. Ailu kwelengineng wawaiae gacaigaing, yenge basanangebadabiyeng. Ailu ngic-ngigac gocne sockapec tapili-wawa gacaigaing, yenge baficebadabiyeng. Ailu ngic-ngigac sasawa yengele tatakic mikac ulucne gadabiyeng. <sup>15</sup> Sowacnele ameine sowacne hac badungeledaickale, ngenge damongnagulu gadabiyeng. Aime ngenge damengsoc ngengileng hewacka

ngic-ngigac sasawa yengeholec aibaba madicne ainogale bole sanangnehac balu gadabiyeng.

### *Mimi-madic yowa*

<sup>16</sup> Ngenge damengsoc belic-belicka gadabiyeng. <sup>17</sup> Ailu ngenge damengsoc milockelu gadabiyeng. <sup>18</sup> Aime ngengela wiyac sasawa fikengeledaite, yogolec Wapong kwele-madic edodabiyeng. Ngenge Kristo Yesuholec wetackegaing. Ilec ailu Wapong ye aibaba yogolec ngageme angacine aicaigac.

<sup>19</sup> Ngenge Tili Asule dac mi hepisickedabiyeng. <sup>20</sup> I yangucte, Wapongte siduc-mimi ngic yengele yowa edocngebabong, ngenge yowa yogo ngagebong sowaleme mi hegiledabiyeng. <sup>21</sup> Ngenge yowa yogo sasawa ngagelu ngage-wosae ailu madicne sugu badabiyeng. <sup>22</sup> Ailu ngenge sowacne haicine monic-monic yogo nganilu lobe holedabiyeng.

### *Sugucnenonggeng kwesidaite*

<sup>23</sup> Wapong ye kwele-mogung fileine. Ye gbagbacne gagale pasi bame sугуелу wakengeledaic. I yangucte, Sugucnenonggeng Yesu Kristo kwesidaictewa, asufocngineng nga ilucfocngineng ailu socngineng bucbuchac dondonne nga bikicngineng miyac aingelenale bacngebame gadaing. <sup>24</sup> Wapontgi wacngebalu bacngebawec, ye yowaine miwec yogo balaibecaigac. Ilec boleine bagacgu bamoctongeledaite.

<sup>25</sup> Ngic hae-gbafocnonggeng, ngenge nongele inguchac ngagesilu milockelu gadabiyeng.

<sup>26</sup> Ngenge Wapongte bingec ailu gagaingte aibabaine balaibelu ngic hae-gbafocnonggeng sasawa molewa babac ainagulu\* wenac-madic minagu-daing. <sup>27</sup> Ailu ngenge hibi yago ngic hae-gbafocnonggeng sasawa wafeyeledabiyeng, yogo Sugucnele wacka edocngebabac.

<sup>28</sup> Sugucnenonggeng Yesu Kristole kwele-madicti ngengeholec fadaic. Yogo foinac.

# Poldi Tesalonika **Habu Yengele Hibi Monic Hatacmac Kwelengkewec**

## *Mimi-yegeng yowa*

Tesalonika yogo taon sugucne monic Masedonia himongka kiwec mecina fawec. Poldi Tesalonika hikelu Yesule Siduc edocebalu weduyelewec. Weduyeleme Yuda ngic-ngigac gocne nga Israel yengele alingkacni miyac, yengelacni homackneci yowaine ngagesingkeibong. Aime Yuda ngic-ngigac micne gocne yengi hasowac ailu welu yebiyebong hikewec (Salecebaicne 17:1-14).

Hikelu lolickelu Korin taonka hikelu gawec. Pol ye ngageme Tesalonika ngic-ngigac gocne yenge ngage-ngage kwesacine yanguc ngageibong, Yesu biyac kwesidaicte, inguc milu hangocebawec. Ilec ailu yenge bole mi balu moc ngyiela gaibong. Yesu homackacni gboliyelu honocmengka feme hifa 20 ngama ingucne motome, Poldi hibi yago kwelengkelu saleme hikewec. Gocne yengi yanguc ngagegaing, hibi yago Tesalonika yengela kwelengkeme alecine yaeckang aiwec. Nga gocne yengi yanguc ngagegaing, hibi yago molickelu lome hikewec.

## *Yowa yago hibi nebocina fagac*

1:1-2 Wenac-madic yowa

1:3-12 Sugucnele ailu doicka fegaing, yogodi madicne aigac

2:1-17 Wapongte ngaba ngic nga Yesule kwesi-kwesi dameng

3:1-15 Ngic-ngigac ngage-ngagesingkolec, yenge aibaba madicne aidaing

3:16-18 Wenac-madic yowa nga yowa moto-motoine

## *Hibile molic-molic yowa*

<sup>1</sup> Yesule habu Tesalonika taonka galu Wapong Mamacnonggeng nga Sugucne Yesu Kristoholec wetackelu gagaing, ngengele hibi yago Pol, Sailas nga Timoti, nongi logabeleng.

<sup>2</sup> Wapong Mamac nga Sugucne Yesu Kristo, yekele kwele-madic nga kwele-mogungutowadi ngengela fadaic.

## *Yesule habu yengele milockedaina*

<sup>3</sup> Ngic hae-gbafofnonggeng, ngenge sasawadi ngic hae-gbafofngineng yenge kweledi filesoc angac ngageyelelu gagaing, aibaba yogodi ngengele hewacka sugulelu sanangkegac. Ailu ngenge ngage-ngagesingngineng sugulegac. Ilec ailu nonge ngengele ailu damengsoc Wapong kwele-madic edodabeleng. Aime mimiloc yogodi madickegac. <sup>4</sup> Ngabafocngineng yengi weyebic aingelebong, ngenge doic ngagelu ulucne galu ngage-ngagesingngineng mi wickebong wawec. Yogo nganilu ngengele ngagebeng feicne aigac. Ilec ailu Wapongte habu falegaing, yengela siduc yogo edocebalu wacngineng bafegabeleng.

## *Damengtowa*

<sup>5</sup> Ngenge Wapongte ngani-damongte ailu doic ngagecaigaing. Wapongti doicngineng yogo nganilu kweleine madickeme ngenge Wapongte ngani-damongte aling wacngebadaicte. Nga ngabafocngineng yenge sowac-nengineng mimoctodaicte, yogodi hocne yele pasi dondonne edalicnubagac. <sup>6</sup> Wapong ye pasi dondonnele fileine. Ilec ngic doicka locngebacaigaing, yenge yedi ameine baduyelelu doicka ingucne hac loce-badaicte. <sup>7</sup> Aime ngenge nga nonge momochac doicka gagabeleng, iwa doicnonggeng bame mogungkedaicte. Aime Sugucne Yesu ye angelofocene tapilinginengkolec, yengeholec honocmengkacni kwesilu yegengkedaingte, dameng iwa inguc fikedaicte. <sup>8</sup> Ye dac-ubilangineholecti kwesilu ngic Wapong mi ngagecaigaing, nga Sugucnenonggeng Yesule Siduc Madicnele yowa mi balaibecaigaing, yenge bikicnginengte ameine baduyeledaicte. <sup>9</sup> Baduyeledaicte yogo yenge Sugucnele haickacni nga tapiliine ailu hibi-angocene iwacni baicebalu doic moto-motoine mikac iwa basowalece-badaicte. <sup>10</sup> Kwesi-kwesi dameng iwahac ngic-ngigacfocene Wapongte bingec gagaing, yenge wacine bafedaingte. Ailu ngic-ngigac ngagesingkolec yenge sasawadi ye nganilu mitengkedaingte. Aime ngenge edocngebalu mibeng yegengkeme ngagesingkeibongte ailu, ngenge yogo hocne aidaitngte.

<sup>11</sup> Ilec ailu nonge ngengele ngagesilu damengsoc yanguc milockelu gagabeleng, Wapongnonggengti wacngebawec, ye nganicngebalu kweleine madickedaicte. Aime ngenge ye ngagesingkelu boleinele angac bafuwalu aibaba madicne balu bolengineng tapiliineholec bagacgubong motodaic. <sup>12</sup> Ngenge inguc aibong ngic-ngigac yengi ngengele ailu Sugucnenonggeng Yesu wacine bafedaing, aime yedi ngenge inguchac wacngineng bafedaic. Yogo Wapongnonggeng nga Sugucne Yesu Kristo yekel kwele-madicte ailu inguc fikedaicte.

## 2

### Yesule kwesi-kwesi dameng

<sup>1</sup> Ngic hae-gbafocongngeng, Sugucnenonggeng Yesu Kristole kwesi-kwesi damengka yeholec ganangte kpaducnubadaicte, yogolec yowa monic yan-guc edocngebabeng ngagening. <sup>2</sup> Ngic gocne yenge Sugucnele kwesi-kwesi dameng yogo biyac kwesiwec micaigaing. Aime gocne yengi nongele micka lolu yanguc micaigaing, "Yowa monic nongilang kwesigac, me hibi monic nongilang kwesigac, me monicti Asulacni yowa balu migac." Ngenge yowa ingucne ngagedaigterwa, kwatackelu tapilingineng mi wadaic.

<sup>3</sup> Monicti lokwesacka yowa haicine monic-monic ingucne edocngebame ngenge yele yowa mi ngagedaing. I yangucte, Sugucnele dameng yogo mi kwesidaicte iwa ngic-ngigac yenge Wapong lobe holecnolu ngaba aic-nodaingte. Inguc aibong yefe-yowa wewe ngic monicti yegena fikelu yegengkedaicte. Inguc yegengkeme lobewa Sugucne kwesidaicte. Aime Wapongti lobewa ngic yogo dac-sanangka wickedaicte. <sup>4</sup> Ailu Sugucne mi kwesiymewa ngic yedi Wapong nga siduc-gbong ailu oma wiyac ngic-ngigac yengi alang bayelelu milockeyelecaigaing, yogo sasawa baicebalu yeuctihac feicne aiyeledaicte. Inguc ailu ye Wapongte Ibu-macka felu iwa ngiyelu yeicnele yanguc midaicte, "Na hocne Wapong." <sup>5</sup> Na ngengeholec galu yogo biyachac edocngebaiba. Ngenge yogo biyachac ngigecngebawec,

me? <sup>6</sup> Dameng yanguctihac ngic yogo mi fikelu yegengkenale aka fagac, ngenge yogo ngagegaing. Ilec ailu ye damengngina kwesilu yegena domadaicte.

<sup>7</sup> Aime yefe-yowa weweles ngage-ngaing sangkeicnele aibaba, yogodi bolein biyac balu gagac. Aime monic ye yogo fikenale aka holelu gagac, ye baickemebac, <sup>8</sup> yefe-yowa weweles ngic yegena fikedaicte. Fikelu yegengkeme, Sugucne Yesudi kwesilu mic-asuinedi basowalelu tapili angocinedi baickeme miyac aidaicte. <sup>9</sup> Ngic yogo ye Satangti bafuwame gadaicte. Ye ngic-ngaigac kwesac aiyelenale tapiliine sasawa nga pasile maaine ailu pasi mi ngani-nganiine kwesacineholec edalicebadaicte. <sup>10</sup> Ailu kwesac-aibaba sowacne sasawa yogo holec ngic-ngaigac dac-sanangte yefewa haugaing, yenge mengocebalu kwesacebadaicte. Yenge yowa noine yogolec kweidi mi angacebadaicte. Ilec ailu wasecne nalic mi aidaingte.

<sup>11</sup> Ilec ailu Wapongti kwele basifucte tapili yengela lome kwesac yogo ngagesingkedaingte. <sup>12</sup> Ngic-ngaigac sasawa yogo yenge yowa noine mi ngagesingkelu angacka aibaba kosaine balaibelu gacaigaing. Inguc gabong Wapongti bikicte ameine mime motoyeledaicte.

### *Sugucnedi bwosaecngebawec*

<sup>13</sup> Sugucnele kwele-angac alingfocine nga ngic hae-gbafochnonggeng, Tili Asuinedi gbagbacne gagawa basugulecngebame, ngenge yowa noine ngagesingkeibong. Yefe yogowa Wapongti bamadicngebame wasecne ainingte wiycasasawa mi fikeemewa biyac bawosaecngebawec. Ilec ailu nonge ngengele ailu damengsoc Wapong kwele-madic edodabeleng. <sup>14</sup> Aime nonge Siduc Madicne edocngebabeng ngenge yogo ngagelu yowa noine balu wasecne ainingte Wapongti wacngebawec. Inguc ailu ngenge Sugucnenonggeng Yesu Kristole wac feicne badaingte.

<sup>15</sup> Ngic hae-gbafochnonggeng, ilec ailu yanguc aigac, nonge yowa micka nga hibiwa edocngebabeng wedungeleibeng, ngenge yefe iwa sanangne balu domadabiyyeng. <sup>16-17</sup> Wapong Mamacnonggeng yedi hocne kwele-angacka kwele-madicnele ailu madicneinele wangec gaibong, yogo nolelu kwele-nonggeng moto-motoine mikac basanangkenolelu gagac. Ye nga Sugucnenonggeng Yesu Kristo yeki yowa madicne nga bolenginec sasawa yogolec kwelina ngage-ngaigengineng yeuckelu kwelelengineng basanangkedabiye.

## 3

### *Sugucnele yowa-siduc sugulelu hikedaic*

<sup>1</sup> Ngic hae-gbafochnonggeng, yanguc taockelu mibeng ngagening. Ngenge nongele ailu yanguc milockedaaing, nonge Sugucnele yowa mibeng sawelu biyac sugulelu hikeyackedaaic. Aime ngic-ngaigac aling gocne yenge yowa yogo ngagelu Sugucne bafelu gadaing. Ngengela fikewec, silicinc inguc-nehar ngic-ngaigac gocne yengela fikelu hikedaic. <sup>2</sup> Ngic-ngaigac bocayac yenge ngage-ngaigesingngineng mikac, inguc gagabiyeng. Ilec ngic-ngaigac sowacngebame nga bikickolec yengi mi basowalecnubabong Wapongti yengele molewacni baicnubadaic, ngenge yogolec milockedaaing. <sup>3</sup> Aime Sugucne ye yowaine micaigac yogo balaibelu basanangngebame Kindololo fileinedi mi basowalecngebanaale asa bacngebacaigac. <sup>4</sup> Nonge Sugucnele ailu ngengele yanguc ngagepangkegabeleng. Nonge yowa milu edocngebabeng, ngenge yogo balaibelu gagaing, ailu gadaingte.

**5** Gaebongka Sugucnedi kwelenginang pasi bame Wapongte kwele-angacti somecnegbame Kristo ingucnehab sanangkelu gadabiyeng.

*Deboc hadeng bole baibeng*

**6** Ngic hae-gbafofnonggeng, ngic hae-gba gocne yenge oyong gabong yefe weduyeelibeng, yogo mi balaibegabiyeng. Ngenge ngic hae-gba ingucne yengele emewa mi gadabiyeng. Nonge yogo Sugucnenonggeng Yesu Kristole wacka edocngebala basanangngebagabeleng. **7** Aime nonge gaibeng, ngenge silicine yogohac ganingte ngagebeg madickegac, ngenge ngen-gung yogo ngagegaing. Aime ngengeholec gaibeng, iwa oyong monic mi gaibeng, miyac. **8** Nonge ngengele hewacka galu ngic monictacni nosing fuline mikac moc balu mi nolu gaibeng. Nonge umac gocne ngeledabek-lengkale, molenonggengti deboc hadeng sochtepecka doic-bole sugucnehab balu gaibeng. **9** Nonge Wapongte bolele fuli nalic babeng madickedekkale-soc, aime yogo hegilelu aibaba aiibeng, yogo ngengi nganilu balaibeningte aiibeng. **10** Aime ngengeholec gaibeng, iwa yefe-yowa yanguc edocngebai-beng, “Ngic monic ye bole mi badaictewa, ye nosingka bafickenogale mi ngagedaing.” **11** Nonge inguc milu dameng monickabac siduc monic yanguc ngageibeng, ngengelacni ngic gocne yenge bole mi balu oyong gacaigaing. Ailu monicte bole fengka haulu moc domalu nganicebacaigaing. **12** Nonge Sugucne Yesu Kristole wacka ngic ingucne yenge mibasanang aiyelelu yowa sanangne yanguc edocebadabelengte, “Ngenge gagangineng bafuhanogale madicne ngiyelu socte bole badabiyeng.”

**13** Ngic hae-gbafofnonggeng, ngenge aibaba madicne ainogale kweleng-nengti mi takicngebadaic. **14** Aime nonge yowa yago hibiwa kwelengken-gelebageleng, monicti yowa yogo mi balaibedaictewa, ngenge yeholec mi gadabiyeng. Inguc aibong ye gameedaite. **15** Ailu ngengi ngic monic ingucne ngaba mi aicnodabiyeng, miyac. Ye agong holecnobong ngengele ngic hae-gba aidaic.

*Mimi-madic yowa*

**16** Sugucne kwele-mogung fileine ye yeuctihac damengsoc yefe haicina monic-monicka kwele-mogung ngeledaic. Ye sasawa ngengeholec gadaic.

**17** Na Pol, naneuctihac molenedi wenac-madic hibine kwelengkengelen-gabac. Ngic-ngigac sasawadi nale mole hibile maaine nganilu noine ngagen-ingte inguc kwelengkecaigabac.

**18** Sugucnenonggeng Yesu Kristole kwele-madicti ngengeholec fadaic. Yogo foinac.

## Poldi Timotile **Molic-molic Hibi Kwelengkewec**

### *Mimi-yegeng yowa*

Timoti ye Asia prowins iwacni. Mamacine ye Grik ngic, nga nenggacine ye Yuda ngigac. Poldi Yesule siduc edocebawec. Edocebame Timoti ye ngagelu ngagesingkelu gawec. Dameng iwa Pol ye Timotile mamac ingucne fikelu damongkeme yeholec Yesule bole balu gaiboc.

Pol ye molickelu Roma iwa muc-macka ngiyegacgu hegile haulu hikewec. Yogolet lobeina Timoti ye Yesule habu Efesas iwa gaibong, yenge bafice-banale saleme hikewec. Yesu homackacni gboliyelu honocmengka feme hifa 33 ngama ingucne motome, Poldi hibi yago Timotile kwelengkelu lome fuwec. Wewedu kwesacine gocne yengele sawang-yowa micnowec. Ailu Yesule habu yengele damong nga Timoti yeicne yengele aibaba madicne yogolet kwelengkeyelewec.

### *Yowa yago hibi nebocina fagac*

1:1-2 Wenac-madic yowa

1:3-20 Wapongte yowa nga yowa noine sugu weduyeledaic

2:1-15 Yefe wenucka Wapong mitengkedaing

3:1-16 Yefe wenucka Yesule habu yengele damong bawosaedaic

4:1-16 Aibabaine nga wewedule yowaine damongkedaic

5:1-6:21 Yefe wenucka bole balu Yesule habu damongkedaic

### *Hibile molic-molic yowa*

<sup>1</sup> Kristo Yesule wangec gagabeleng, ye nga Asa-baba ngicnonggeng Wapong yeki na Pol yowa milu edocnuboc, Kristo Yesule salecebaicne aiba. <sup>2</sup> Ga ngage-ngagesinggonele ailu madecnebenang aigic, Timoti, gale hibi yago kwelengkegelegabac. Wapong Mamacnonggeng nga Suguc-nenonggeng Kristo Yesu, yekele kwele-madic nga kwele-sowac ailu kwele-mogungtowadi gala fadaic.

### *Sawang-yowa*

<sup>3-4</sup> Na Masedonia prowins iwa hikenogale ailu yowa sanangne miiba, yogo hatacmac edocgugabac, ga Efesas mi hegiledamec. I yangucte, ngic gocne yenge Yesule habu kwelina kwesac-yowa gocne silicine monic weduyelecaigaing. Ailu yenge siduc esecne nga ngesa-ngambo esecne gaofei-bong, yenge fikesawecte fung kwenogale ailu yowanginengti fec-wac aicaigac. Inguc aime Wapongte yowa gocne balaibeningte ailu ngage-ngagesingnginengte yefe hegilecaigaing. Ilec yenge sanangne hac edocebalu kpatalayeledamec. <sup>5</sup> Gagi yowa milockelu edocebaengka noine fikedaicte, yogo kweledi angac ngagenagudaingte. Fagung-fagung aiyeleme Wapongte haicka kwelengineng gbagbacne ailu game mikac ngage-ngagesing noine kwesac mikac kwelenginang wakeme iwacni kwele-angac fikeyeledaicte. <sup>6</sup> Gocne yenge aibaba ingucne mi fikenale ngagesilu yowa kosa micaigaing. <sup>7</sup> I yangucte, yenge Wapongte yefe-yowa edocebalu weduyeleningte bocyac aiyelecaigac. Aime sifu yenge yengungtiac yowa sanangne micaigaing, yowa yogolet fungine mi ngage-motogaing.

### *Wapongte yefe-yowale bole*

<sup>8</sup> Monicti Wapongte yefe-yowale yefe dondonne balu gadaictewa, yogodi noine madicne bafuwacnodaicte, yogo ngagegabeleng. <sup>9</sup> Aime yanguc ngagedabeleng, yefe-yowa yogo ngic dondonne gagaing, yengele ngagelu mi loicne. Yogobac aling yangucne yengele ailu loicne, ngic-ngigac yefeyowa welu mansanang ailu Wapong lobe holecnolu gagaing. Yenge bikic bafuwalu gbagbacne gaga mi ngagesilu angacngineng himongte wiyacte aicaigac. Ailu yenge nenggac-mamacfocngineng weyebic aiyelelu ngic-ngigac gocne wecebabong homacaigaing. <sup>10</sup> Ailu yenge selo-boic nga ngicti ngickolec selo-boic bole bacaigaing. Yenge ngic-ngigac hise bacebalu hatacmac salecebacaigaing. Ailu yenge yowawa domalu yowa noine mipangkelubac kwesac-yowa micaigaing. Ailu yenge ngic kwesacine gagaing. Aime ngage-ngage dondonne wedungeleibeng, yogo ngic-ngigac gocne yenge hegilecaigaing. Yefe-yowa yogo ngic-ngigac ingucne yengele ngagelu loicne fagac. <sup>11</sup> Wapong ye kwele-angacte fileine, ye tapili nga hibi-angoceneholec. Yedi Siduc Madicne naneicne neleme yogo damongkelu wedungelelu gagabac.

### *Siduc Madicnele noine*

<sup>12-13</sup> Ailu na molickelu Yesu sulelu habufocine weyebic aiyelelu kindololo ngic gaiba. I yangucte, na aibaba noine mi ngage-motolotu Yesu mi ngagesingkelu kosa gaiba. Ilec ailubac Sugucnenonggeng Kristo Yesudi kwele-sowac ainelewec. Ye nale ngageme yowaine balaibecaigabacte ailu, tapili nga boleine neleme balu gagabac. Ilec yele kwele-madic micaigabac. <sup>14</sup> Inguc gaebewa Sugucnenonggengte kwele-madic nga kwele-angac suguc-nehabbenang, yogo ngage-ngagesingkolec Kristo Yesulacni nala kwesiwec. <sup>15</sup> Kristo Yesudi himontowawa bikic-baba ngic bamadicnubame wasecne ainangte wawec. Yowa yogo nalic ngagepangkedabeleng. Ailu ngic-ngigac sasawadi yogo ngagelu sebilebong madickedaicte. Ailu naneicnebac bikic-baba sasawa ewalcebalu ngic sowacnebenang aiiba. <sup>16</sup> Inguc gaebewa, sifu Kristo Yesu ye tatakic mikac pasiine yogo yegena fikelu yegengkenale kwele-sowac ainelewec. Inguc aineleme ngic yenge ye ngagesingkelu gaga-sanang baningte naneuctihac sosocine ailu molickeyeleiba. <sup>17</sup> Ngictau homacine mikac gaginiowagac ailu mi nganiicne ye moniyangti Wapong gagac. Yela alang-baba nga wac feicne moto-motoine mikacfafegidaic, yogo foinac.

### *Kwele-ngage-ngage gbagbacne*

<sup>18</sup> Madecne Timoti, ga hudu-baba ngic ingucne ailu Wapongte bole balu gadamec. Inguc ainqogale yenge Wapongte siduc-yowa gala mibong ngageing, yogo balaibecte edocgugabac. <sup>19</sup> Ga ngage-ngagesingkolec galu kwele ngage-ngagegone madicne damongkelu gadamec. Ngic gocne yenge aibaba yogo hegilelu ngage-ngagesingngineng wickebong wawelu sowaleicne. <sup>20</sup> Aime yengelacni Himenaus nga Aleksanda, yeke Satangte molewa locepabia. Inguc locepabie yeke Wapongte wac hatacmac misulec mi ainicte umacka felu ngage-motodabiyecte.

<sup>1</sup> Nongileng Wapongti ngic-ngigac sasawa baficebanale yengele ailu Wapong milockelu kwele-madic edolu gadabeleng. Yogodi bole sugucne aigac. Ilec yowa sanangne migabac. <sup>2</sup> Ngic-ngigac ulucne nga kwele-ebeckolec galu Wapongte ngage-ngage balaibelu aibaba dondonne aicaigaing, yengele gaga madicne. Aime ingucne ganangte ngictau nga damong sasawa yengele ailu milockedabiyeng. <sup>3</sup> Mimilocnonggeng ingucne yogo madicne. Aime Wapongti bikicte ameine Asa bacnubawec, yedi mimiloc yogo ngageme madickegac. <sup>4</sup> Ailu ye ngic-ngigac sasawa yenge wasecne ailu yowaine noine ngage-motoningte aicnolu gagac. <sup>5</sup> I yangucte, Wapong moniyangti gagac. Aime Wapong nga ngic-ngigac nongileng hewacka ngaba fagacte ngic hewacine moniyangti sugu gagac, ngic yogo wacine Kristo Yesu. <sup>6</sup> Ye yeuctihac ngic-ngigac sasawa amenonggeng banogale gagaine hegilewec. Yowa yogolec damengbenangine kwesiwec, yogo mime yegengkeme ngagegaing. <sup>7</sup> Na yowa yogo mibe yegengkenale Wapongti naneicne bawosaecnulu salecebaicne locnuwec. Locnume Israel yengele alingkacni miyac, yenge yowa noine ngage-ngagesingkolec edocebalu weduyeleiba. Yogo noinebenang, kwasac mi aigabac.

### *Ngic nga ngigac Yesule habuwa gagaing, yengele yowa*

<sup>8</sup> Ilec ailu nale ngage-ngage nga angac yogo ngic yengele yanguc migabac, ngic mac-alung neboc nga nebocka gagaing, yenge aalic nga yowangineng mife-miwa mikac molengineng gbagbacne bafangkelu milockededaing.

<sup>9</sup> Na ngigac yengele inguchac yanguc migabac, ngigac yenge aibaba madicnele ngakpi-kpoluc wosaelu ngani-nganiline madicne holebong haudaic. Ailu yenge hibi keleng bafuwangale kwanang fuline sugucnehac mi holedabiyeng, me hodocngineng mi mideckedabiyeng. Ailu yenge wiyc haicine monic-monik goldi baicne mi holedabiyeng. Ailu ngakpi fuline sugucnehac mi holedabiyeng. <sup>10</sup> Ngigac monic ye Wapongte ngage-ngage balaibecaigac, yogolec mime yegengkeme aibaba madicne aicaigac, aibaba yogodi hibi kelengngine aidaic. <sup>11</sup> Ailu ngigac yenge aibaba ulucne ailu wewedu-yowa yogo ngagelu yowa balaibelu gadabiyeng. <sup>12</sup> Ailu ngigac yengi ngic yengele damong ailu yowa edocebalu weduyeleningte mi mimoctogabac. Ngigac yenge hendolong hegilelu ulucne gadabiyeng. <sup>13</sup> I yangucte, Wapong ye molickelu Adam bafuwalu Ewa lobe bawec. <sup>14</sup> Aleng Sugucnenginengti Adam mi kwsackewec. Ye ngigac kwsackeme yefe-yowa hegilelu sowacne bafuwawec. <sup>15</sup> Ngigac monic ye Yesu ngagesingkelu gbagbacne galu ngic-ngigac yengele kweleinedi angackeme gagaine wosaedaictewa, ye kogoc babale ailu wasecne aidaic.\*

## 3

### *Yesule habu damong*

<sup>1</sup> Ngic monic ye Yesule habu yengele damong bole banogale aigacka ye bole yogo madicnele aicnogac, yowa yogo nalic ngagepangkedabeleng. <sup>2</sup> Ilec ailu Yesule habu yengele damong ye kpokpolic mikac gadaic. I yangucte, ye ngigacine moniyang sugu gadaic. Ailu ye damongnagulu gagaine madicne damongkedaic. Ye alang bacnobong galu ngic-ngigac macina hefolec-badaic. Ailu wewedu bole yogolec silicine ngagedaic. <sup>3</sup> Ye waing misa

**2:6:** Rom 3:29-30; Gal 1:4    **2:7:** Sale 9:15; Gal 2:7-8; 2Tim 1:11    **2:9:** 1Pi 3:3-5    **2:10:** 1Tim \*

**5:10**    **2:12:** 1Kor 14:34    **2:13:** Fike 2:7,21-22; 1Kor 11:8-9    **2:14:** 2Kor 11:3    **2:15:** Ye oma wiyc ngagesilu kogoc babale yowa kwelengkewec, Wapongte bole-ngic yenge yogolec funginele kwele-moniyang mi aigaing.    **3:1:** Sale 20:28    **3:2:** Tit 1:6-9

nolu kwele-sifuc ngic mi gadaic. Ailu ye ngic-ngigac weyebic mi aiyeledaic. Ye ngic ulucne ailu kwele-mogungkolec gadaic. Ailu ngage-ngageine hiemonengte angacne sugucnehad mi fadaic. <sup>4</sup> Ye yeicne golowacfocine madicine damongebadaic. Ailu yeicne adu-madecfocine yenge yowaine balaibelu alang bacnoningte damongebadaic. <sup>5</sup> I yangucte, ngic monic ye golowacfocine damongebanale yefe mi ngagegacka, ye Wapongte habu damongebanogale yefe wenucka damongebadaicte? <sup>6</sup> Aleng Sugucnengineng ye soc bafele ailu yowawa wawelu ameine bawec. Aime damong ye silicine ingucnehad soc bafele ailu yowawa wawelu ameine badaickale, ye kwele-hefaliyec gblolicnedi Yesule habu yengele damong mi aidaic. <sup>7</sup> Ailu ngic-ngigac yengele haicka gameedaickale, nga Aleng Sugucnenginengte subadi wedaickale ailu, ngic-ngigac lobeina gagaing, yenge inguchac ye alang bacnobong madickedaicte.

### *Mole-bafic ngic-ngigac*

<sup>8</sup> Yesule habu yengele mole-bafic ngic yenge inguchac aibabangineng silicine madicine aidabiyeng. Yenge belungineng yaekangkolec mi gadaing. Ailu waing misale angac sugucnehad mi ngagedaing. Ailu hasowacka hiye-moneng banogale mi gadabiyeng. <sup>9</sup> Yenge kwelenginengti ngage-wosaec ainagulu gbagbacne galu ngage-ngagesingte yowa sangke-sangke fawecti yegengkegac, yogo balu gadabiyeng. <sup>10</sup> Ngic habu yengele mole-bafic ngic ainogale aiyeleme, ngenge ngic ingucne yengele funginengineng ngani-wosaec aidaing. Inguc aibong yenge kpokpolic mikac aime, ibac Yesule habu yengele mole-baficte bole yogo nalic badabiyeng. <sup>11</sup> Ailu mole-bafic ngic yengele ngigacfocngineng yenge inguchac aibabangineng silicine madicine balu gadaing. Yenge ngic me ngigac monicte kwesacyowa mi midaing. Yenge damongnagulu yowa sasawa madicine milu yogo balaibedaing. <sup>12</sup> Ailu mole-bafic ngic ye ngigacine moniyang sugu gadaic. Ye yeicne adu-madecfocine nga golowacfocine yenge madicine damongebadaic. <sup>13</sup> I yangucte, mole-bafic ngic yenge bole madicine balu gabong, habu yengi alang bayelebong, yenge Kristo Yesu ngagesingkegaing, yefe yogowa sanangne domadaingte.

### *Kristolefungine*

<sup>14</sup> Na gale ngagesilu hibi yago kwelengkelu gala biyac funogale ainelegac. <sup>15</sup> Aimebac boledi hefecnume biyac mi fudactewa, Yesule habu yenge yefe wenuc gadabiyengte, yogo ngagedamec. Ilec ailu hibi yago kwelengkegabac. Yesule habu yenge Wapong gagaineholec, yele golowac nga yowa noinele bosing sanangne ingucne. <sup>16</sup> Wapongte ngage-ngage fungine yogo sangke-sangke fawec, yogo sugucnehad ailu feicnebenang. I yangucte, Ye socka fikelu yegengkewec.

Aime Asudi fungineine dondonne yogo yegena bame angolewec.

Aime angelo yenge ye nganiibong.

Ngic-ngigac yenge yele siduc Israel yengele alingkacni miyac, yenge edoce-balu weduyelebong

Himongtowa neboc nga nebocka hikeme ngagesingkeibong.

Ye Wapontgi tapili nga hibi-angocka hatacmac bame fewec iwa gagac.

**1** Tili Asudi yowa yegena yanguc milu gagac, yakuc dameng motoina\* ngic gocne yenge ngage-ngagesingngineng wickebong wadaicte. Ailu yenge aleng yengele yowa ngagebong, asu haicine monic-monic yengi kwsac-yowa aiyelelu bacebadaingte. **2** I yangucte, kwesac-ngic yenge kwele ngage-ngagengineng kundung kwelu sowaleicne, yenge ngic-ngigac kwesac aiyelelu **3** yanguc micaigaing, "Ngic-ngigac mi banagunoga." Nga "Nosing gocne mi nonoga." Yenge inguc milu aka holeyelelu edoceba-gaing. Aimebac ngic-ngigac yenge Wapongte yowa noine ngagelou Yesu ngagesingkelu gagaing, yenge nosingngineng yogo kwele-madicca bantingte Wapongti nosingngineng bafuwayelewec. **4** Wapongti wiyc sasawa mime fikeyackewec, yogo madicne. Ilec wiyc yogo kwele-madicca balu gadaingtewa, yogo nalic nodaingte. Monic lobe nalic mi holecnodaingte. **5** Yogo Wapongte yowa nga mimilocti bame gbagbacne aidaicte.

### *Wapongte wewedu-yowa*

**6** Ga ngic hae-gbafocnonggeng yowa yago edocebalu weduyelegic, dameng iwa Kristo Yesule mole-bafic ngic madicne aidamecte. Mole-bafic ngic ingucne gadamectewa, ngage-ngagesingte yowa madicne wedugelebong balaibeing, yogodi ngage-ngagegogene basanangkedaicte. **7** Ga himongte yowa-siduc haicine monic-monic gagaine nga babaficine mikac yogo lobe holecnolu geicne gagawa Wapongte pasi nga yefe yogo basanangkedamec. **8** Ngic loling ainogale socngineng baefekcekaigaing, yogodi babaficine efecnemac aigac. Ngic-ngigac yenge Wapongte pasi nga yefe basanangkecaigaing, yogodi gaganganeng bucbuchac bafuwadaicte. Yogo yakumacte gaga basanangkegac, ailu gaga lobewa kwsidaicte yogo inguchac basanangkedamec. Wapongti inguc mipangkelu gagac. **9** Yowa yogo nalic ngagepangkedabeleng. Ailu kwelenonggeng iwa nalic lobeng fame ngagesingkedabelengte. **10** Wapong gagaineholec, yeholec wetackelu wangec gagabeleng, yedi ngic-ngigac sasawa bikicte ameine Asa bacebalu gagac. Ailu ngagesingkegabeleng, ye nongelebenang hocne. Wapongti inguc aime boletowa doicinoholec balu gagabeleng. **11** Aime ngic-ngigac yenge yowa yogo balaibeningte sanangne edocebalu weduyedamec.

### *Timotile aibaba*

**12** Ga ngic soc-gboli gagicte gocne yengi gale ngagebong waicne mi aidaic. Aime yowa mimigone nga aibabagone, ailu ngic-ngigac kwelegonedi yengele angacgucaigac, nga ngage-ngagesingggone ailu aibabagone gbagbacne, ngic-ngigac ngage-ngagesingkolec yenge aibabagone yogo nganilu balaibed-abiyeng. **13** Aime ngic-ngigac yengeholec Wapongte hibi wafe-ngagec ailu kwelengineng kwefangkelu edocebalu weduyelevu gaengka fudacte. **14** Aime Yesule habu yengele damong yenge molenginengti feigona lolu siduc-yowa mibong, Tili Asule kwele-madicte tapili monic baing, yogo mi ngigecgudaicte. Ga tapili yogoholec bole balu gadamec. **15** Aime ga sugulelu sanangkegic, ngic-ngigac yenge yogo nganiningte ngage-ngagegogene bolegona loengka sanangnehac fame yogo balaibelu balu gadamec. **16** Bagalu geicne damongnagulu yowa edocebalu weduyelevaigic, yogo inguchac damongkedamec. Inguc aidamectewa, ga nga ngic-ngigac yowagone ngagecaigaing, ngenge momochac wasecne aidaingte.

\* **4:1:** Hibi gocna "dameng moto-motoina" kwelengkelu yanguc ngageibong, Yesu homackacni gboliyelu fangkewec, dameng moto-motoine fungkewec. Ailu ye hatac kwsidaicte, dameng iwa dameng moto-motoine motodaicte. **4:3:** Fike 9:3; Rom 14:6; 1Kor 10:30-31 **4:7:** 1Tim 1:4

## 5

*Wapongte habuwa gaga*

<sup>1</sup> Ga ngic sugucne monic yowa edonogale milu tapiliholec ailu dacineholec mi aicnodamec, ga kweleine yeuckelu mamacgone yowa edocaigic, silicine ingucnehad ye yowa edodamec. Ailu ngic hae-gbafocgone yengele kwele yeuckenogale aicaigic, silicine ingucnehad ngic soc-gboli aiyeledamec. <sup>2</sup> Ailu nenggacgone aicnocaigic, silicine ingucnehad ngigac sugucne yenge aiyeledamec. Nga sengfocgone yengele aicaigic, silicine ingucnehad ngigac soc-gboli yengele kwelegone gbagbacne faemewa aiyeledamec.

*Ngigac-hosec*

<sup>3</sup> Ngigac-hosec babaficngineng mikac gagaing, Yesule habu ngenge yenge alang bayelelu baficebadabiyeng. <sup>4</sup> Aimebac ngigac-hosec monic ye adu-madecfocene me ata-ngesafocine yengeholec gadaictewa, yengungtilac molickelu hosecngineng ngani-damong aicnoningte hole badabiyeng. Yogo Yesule habu yengele bole miyac. Yenge inguc ailu nenggac-mamacfocngineng yengele ame baduyeledabiyeng. Aibaba yogodi Wapongte haicka madickedaicte. <sup>5</sup> Aime ngigac-hosec monic ye ngawaine homadaicte, aime yeicnac babaficne mikac galu Wapongti bafickenale ngagepangkelu deboc hadeng milockecaigac. <sup>6</sup> Aime ngigac-hosec monic ye socte angac balaibecaigac, ye sockapete sugu gacaigac. Nga kwelewapec-abac ye homaicne gacaigac. <sup>7</sup> Ngigac-hosec yengele yowa yogo ngic-ngigac sanangnehad edocebadamectewa, gocne yengi yengela kpokpolic nalic mi aidaingte. <sup>8</sup> Monic ye sac-tofafocine ngani-damong mi aiyeledaicte. Ailu yeicne golowac inguchac mi damongbedaictewa, ye ngage-ngagesingngine biyac hegilelu aibaba sowacne aidaicte. Ailu yele sowacnedi ngic-ngigac Wapong mi ngagesingkegaing, yengele sowacne ewalidaicte.

*Hosec yengele bole aling*

<sup>9-10</sup> Aime ngigac-hosec monic ye hifaine 60 inguc biyachac ewaliwec, ailu ngic moniyangte ngigac sugu gawec. Ailu aibabaine madicne fawec nga fagac, yogo ngic-ngigac sasawadi biyachac ngani-ngagec aicnolu gai-bong. Iyanguc, ye adu-madecfocene madicne ngani-damong aiyelelu gawec. Nga ngic-ngigac hefolecebalu gawec. Ailu Wapongte bingec higengineng suweyelelu gawec.\* Ailu ye ngic-ngigac umacka gaibong yenge basanange-baluu gawec. Ailu ngic-ngigac baficebanale dameng monic mi wickelu gawec. Ngigac-hosec ingucne yele wac sugu ngigac-hosec yengele babaficte wacalingka kwelelengkenoga.

<sup>11</sup> Ngigac-hosec hifanganineng waicne gagaing, ga yengele wac-alingbac iwa mi kwelengkedamec. Yenge Kristole bolele takicebame ngicte angac hatacmac ngagelu ngickolec ganingte aidaingte. <sup>12</sup> Yogo yenge molickelu Kristole bolele yowa hefeibong, yogo hegilelu yowawa felu ameine umac bafuwadaingte. <sup>13</sup> Ailu yenge oyong galu mac-boneng lolickecaigaing. Ailu yogo sugu miyac, yenge gube yowa milu monicte bole fengka haucaigaing. Ailu gocne yengele wiyacte yowa nongilengti mimilesoc miyac, yogo sifu midaingte. <sup>14</sup> Ilec ailu ngigac-hosec hifanganineng waicne gagaingha yengele ngagelu yanguc lobe balaibedabiyeng. Yenge ngic hatacmac balu

\* **5:9-10:** Yengele damengka kwelec kwekwe yenge bole yogo balu gaibong. Yoane 13:1-17 iwa Yesudi aibaba ingucne balu bawacnagulu silicine ingucne balaibenangte aiwec.

kogoc bafuwalu macngineng damongkedabiyeng. Yenge inguc aibong ngabanonggeng gagac, yedi yengele misulec-yowa nalic mi midaicte.

<sup>15</sup> Ngigac-hosec gocne yenge yefe biyachac lilolu Satang balaibeibong.

<sup>16</sup> Aime ngage-ngagesingkolec ngigac gagaing, yengele macka ngigac-hosec gocne gagaingka, yenge ngani-bafic aiyelebong Yesule habu yengela umac mi fikedaic. Inguc ailu habu yenge ngigac-hosec waweweine babaficngi-neng mikacobenang gagaing, yenge sugu ngani-bafic nalic aiyeledabiyeng.

### *Bolele fuli yelenoga*

<sup>17</sup> Yesule habu damong yenge habu madicne ngani-damong aiyelelu bolengineng bacaigaing, yenge alang bayeletu bolele fuli yelenoga. Yengelacni gocnedi yowa mibong yegengkeme edocebalu weduyelelu bole sugucnehat balu gagaing, yenge alang sugucnehat bayeledaing. <sup>18</sup> Yogolec Wapongte hibidi yanguc migac,

"Ngicti wit socine litonogale ngagelu bulumaka bole sugucnehat lacname wit feina edelu lolickecaigac. Ilec mesuine mi hefebong ye bole bagacte fuline nodaic."† (Yef 25:4)

Aime

**"Bole-ngic yenge bolenginengte bole-fulingineng bafuwadaingte, yogodi madickedaicte."** (Luk 10:7)

<sup>19</sup> Aime ngic moniyangti sugu Yesule habu damong monic yowawa lonogale mime, ngenge yowa yogo mi ngagedaing. Ngic yaekang me habackangti yowa yogo milu edocngebabong, iwabac ngenge yowa yogo ngagedaing.

<sup>20</sup> Damong gocne yenge bikic bafuwacaigaingka, gagi ngic-ngigac yengele haicka mibating aiyeleengka, ngic-ngigac yenge inguc nganilu yengungtihac hangocebame gaganganeng wosaedaingte. <sup>21</sup> Aime na Wapong nga Kristo Yesu ailu angelo bawosaecebaicte, yengele haicka mibatingte yowa yogo balaibecte sanangne edocgugabac. Ga inguchac moc ngageung ailu nebeyang sugu domalu yowa kosa mi midamec, ngage-wosaec ailu midamec. <sup>22</sup> Aime ga damong bawosaenogale molegone yengele feiwa biyac mi lodamec. Ga inguc aidamectewa, yengele bikicka taockedamecte. Ga gabgacne gadamec.

<sup>23</sup> Gobe hii-hii nga huc bocyac aigelecaigac. Ilec misabenang sugu mi nodamec. Ga gobegonele ailu waing kpisicnemac inguchac nodamec.

### *Ngic-ngigac aibabanginengti balaibecebadaitce*

<sup>24</sup> Ngic gocne yengele bikic biyac fikelu yegengkelu fagac, yenge yowawa biyac fedaingte. Nga gocne yengele bikic sangke-sangke fagac, yenge lobewa yowawa fedaingte hocne. <sup>25</sup> Silicine ingucnehat aibaba madicne gocne yakumac yegena fagac. Aime aibaba madicne gocne yakumac yegena mi fagac, yogo gacgu nalic mi sangkelu fadaicte.

## 6

### *Kwelec aling*

<sup>1</sup> Wapongte wac nga yowaine weduyeleibeng, yogo ngic-ngigac yengi milu suledaingkale, kwelec kwekwe ngic gagaingti sugucnefocngineng alang bayelebong madickedaicte. Inguc ngagesilu aidaing. <sup>2</sup> Aime kwelec kwekwe aling gocne yengele sugucnefocngineng ngage-ngagesingkolec gagaing. Yenge ngic hae-gbafocnonggeng aigaingte ailu ngageyelebong

waicne mi aidaic. Sugucnecfocngineng yenge Yesu ngagesingkebong kw-elec kwekwefocngineng yenge kweledi angac ngageyelelu gagaing. Illec ailu angacka kwelec kwekwe alingte silicka taockelu sugucnecfocngineng kwelec kweyoledabiyyeng. Ga aibaba yogo weduyelelu kwelengineng kwe-fangkedamec.

### *Wewedu kwesacie*

<sup>3</sup> Sugucnenonggeng Yesu Kristole yowa ngagebeng dondonne aime Wapongte pasi nga yefe wedungeleibeng. Aime monic ye yowa yogo lobe holecnolu yefe monic wedungelelu gacaigac, <sup>4</sup> ngic ingucne ye kweleina soc bafefe aibaba yogo fagac. Ailu ye wiyac monic mi ngage-motogac. Yele angac yogo sowacneholec gagac. Nga ngic yengeholec yowanginengti yowa nebocenele fungine mibong fena wana, nga ngage-ngage haicine monic-monice docebachaigac. Yowa ingucnedi hasowac nga ngaba silic ailu misulec-yowa nga ngageung bafuwadaite. <sup>5</sup> Ngic-ngigac ingucne yenge ngage-ngagengineng fongkeme ngaba moto-motoine mikac aiyelecaigaing. Yowa noine yogo kwelenginang mi fagac, biyac baickeicne. Yenge Wapongte pasi nga yefe balaibelu moneng-mafa bafuwaningte ngagesicaigaing.

<sup>6</sup> Aimebac monic ye woc-wiyacine balu gagac, yogo andoine ngagelu Wapongte pasi nga yefe balaibecaigac, ye yefe yogowa kwelele wiyac madicne bocyac bafuwadaite. <sup>7</sup> I yangucte, himongtowa yagowa mocbenang fikeibeng. Aime himong yago hegilelu hikenogale inguchac mocbenang hikedabelengte. <sup>8</sup> Nosing nga ngakpi-kpolucnonggeng fanoledaictewa, yogo andoino gadabeleng.

<sup>9</sup> Ngic-ngigac moneng-mafatowaholec airingte ngagelu gacaigaing, yenge lokwesacka feborg socte angac yogodi suba ingucne bacebame aibabangineng kapaine aime gagangineng basowaledaingte. Alibaba ingucnedi basowalecebame miyac aidaingte. <sup>10</sup> I yangucte, hiye-monente angac, yogodi sowacne sasawa yengele fungine. Ngic-ngigac gocne yenge hiye-monente angac sugucnehac ngagelu gacaigaing, yogodi ngage-ngagesingngineng madicnele yefe lilolu kwele-umac sugucnehac bafuwayelewec.

### *Timotile ung-yowa*

<sup>11</sup> Aimebac Wapongte ngic, ga aibaba yogo nganilu lobe holecnolu hikedamec. Gaga dondonne balaibelu Wapongte pasi nga yefe yogodi gagagona sanangkenale mamang hidudamec. Ailu Yesu ngagesingkelu Wapong nga ngic-ngigac yengele kwelegonedi angac ngageyeledamec. Ailu tatakic mikac galu gaga ulucne balu gadamec. <sup>12</sup> Ngage-ngagesingte ailu hudu madicne welu gasackedamec. Ailu bole sugucnehac balu gasackelu gagasanangka hike sulomedamekte. Yogo banogale Wapontgi wacguwec. Ailu yefe madicne yogo balaibenogale aigic, yogo molickelu ngic-ngigac yengele haicka miyengka yegengkeme basanangguwec.

<sup>13</sup> Aime Wapontgi wiyac sasawa gaganginengkolec lowec. Ailu Kristo Yesu yedi Pontius Pailatle haicka fungine madicne mime yegengkewec. Na Wapong nga Yesu yekeli haicka yanguc sanangne edocgugabac. <sup>14</sup> Ung-yowa ngagegeic, yogo balaibelu bikic mikac gala kpokpolic mi aicaigaing, yogo balu gaengka Sugucnenonggeng Yesu Kristole kwesi-kwesi dameng

yogo fikelu yegengkedaic. <sup>15</sup> Aime Wapong yeuctihac damengngine ngagegac, yogo fikedaict. Wapong ye kwele-angackolec, yedi sugu damong yengele Damong, ailu ye ngictau yengele Ngictau nga sugucine yengele Sugucne. <sup>16</sup> Ye moniyangti sugu dongke-dongkeine mikacti angocene kwelina gagac. Aime angoc yogolec kwelina monicti nalic mi fedaicte, miyac. Ailu ye monicti mi nganiwec ailu nalic mi nganidaict. Yela alang-baba nga tapili moto-motoine mikacfafeginowagac. Yogo foinac.

### *Ngic moneng-mafatowanngengkolec*

<sup>17</sup> Ngic-nigigac dameng yagowa moneng-mafanganengkolec gagaing, yenge soc bafe mi ainingte yowa sanangne edocebadamec. Moneng yogo miyac aidaict mecne. Ilec yogo mi ngagepangkedaing. Wapontibac wiyacongeng haicine monic-monie angacka banangte bafuwanoolelu gagac, yeicne sugu ngagepangkedaing, inguc edocebadamec. <sup>18</sup> Yenge bole madicne balu gabong aibabangineng madicnedi moneng-mafanganeng aidaic. Ailu yenge woc-wiyanngineng balu gagaing, yogo kwelengineng efeckeme yogo botoc balu ngic-nigigac waweweine yeleningte yowa milu edocebalu basanangebadamec. <sup>19</sup> Yenge inguc bagacgu gagangineng lobewa kwesidaict, iwa wiyanngineng madicne luwangka mac ngiye-nyiye madicne bamadickedaingte. Bamadickelu gaga noina fedaiingte.

### *Yowa moto-motoine*

<sup>20</sup> Oc, Timoti, Waponti wiya damongkecte gelewec, yogo madicne damongkelu gadamec. Ailu himongte siduc nga yowa kosa haicine monic-monie, yogo lobe holeyeledamec. Ngic gocne yengi yanguc micaigaing, "Nonge yowa ngage-ngage-motockolec balu gagabeleng." Aime yowangineng yogodi yowa kwesacine aigac. Ga yogo ngagelu hegiledamec. <sup>21</sup> Aime ngic gocne yenge ngage-ngage iwa wetackelu ngage-ngagesingte yefe liloibong.

Wapongte kwele-madictowadi ngengeholec fadaic. Yogo foinac.

## **Poldi Timotile Hibi Monic Hatacmac Kwelengkewec**

### *Mimi-yegengyowa*

Timoti ye Asia prowins iwacni. Mamacine ye Grik ngic, nga nenggacine ye Yuda ngigac. Pol ye Yesule siduc edocebame Timoti ye yogo ngagelu ngagesingkewec. Ngagesingkeme, Pol ye Timoti mamacine ingucne ailu damongkeme yeholec Yesule bole balu gaiboc.

Pol ye molickelu Roma iwa muc-macka ngiyegacgu hegile haulu hikewec. Timoti Yesule habu Efesas iwa gaibong, yenge baficebanale saleme hikewec. Inguc gacgume Poldi Yesule siduc hatacmac edocebame ngageibong. Inguc mime hatacmac balu Roma iwa muc-macka lobong alecine yaeckang iwa ngiyewec. Ngiyelu yanguc ngagewec, "Yenge wehomacnudaingte mecene." Ilec Poldi Timoti basanangkeme doicka sanangne domanale hibi yago kwelengkewec. Yesu homackacni gboliyelu honocmengka feme hifa 35 ngama ingucne motome, Poldi hibi yago alecine yaeckang kwelengkelu Timotile lome fuwec.

### *Yowa yago hibi nebocina fagac*

1:1-2 Wenac-madic yowa

1:3-7 Poldi Timoti ngagesingkewecte kwele-madic yowa edowec

1:8-2:13 Timoti sanangne domalu bole doicinoholec bame madickedaicte

2:14-26 Kristole bole-ngic noine, yengele maa

3:1-9 Dameng moto-motoina bikicngineng sugulebenangkedaicte

3:10-4:5 Timoti boleinle sawang-yowa miwec

4:6-18 Pol yele angac nga ngage-ngage

4:19-22 Yowa moto-motoine nga wenac-madic yowa

### *Hibile molic-molic yowa*

<sup>1</sup> Na Pol, Wapongti ngageneleme Kristo Yesule salecebaicne aiiba. Aime ngic-ngigac yenge Kristo Yesuholec wetackelu yelacni gaga badaingte, mimipang yowa yogo mibe yegengkeyelenale salecnuwec. <sup>2</sup> Timoti madecne, na kwelenedi gale angac ngagelu hibi yago logelegabac. Wapong Mamac nga Sugucnenonggeng Kristo Yesu, yekele kwele-madic nga kwele-sowac ailu kwele-mogungtowadi gala fadaic.

### *Timotile ung-yowa*

<sup>3</sup> Ngesa-ngambofocne yenge Wapong afeelu kwelec kwecnoibong, inguc-ne hac na kwele ngage-nga gene gbagbacne galu alang bacnolu kwele-madic micnogabac. Inguc milu deboc nga hadengsoc gale ngagelu milockelu gagabac. <sup>4</sup> Donge-misagone wame nganiba, yogo ngagesibe kwelenedi gale aineleme hatacmac nganicgunogale ainelegac. Ailu nganicgulu belic-belic sugucne hac bafuhanogale ngagesigabac. <sup>5</sup> Ngage-nga genesinggone kwesacine mikac fagac, yogo ngagesibe kwelene madickegac. Ngage-nga genesing yogo hocne molickelu atagone Lois nga nenggacgcone Yunis, yekela fawec. Ngage-nga genesing yogo hocne yanguctihac gala fagac, yogo ngage-benangkebabac.

<sup>6</sup> Ilec ailu yanguc edocgugabac, na molickelu molene feigona loiba iwa Wapongti kwele-madicinele tapili monic gelewec, yogo hatacmac hole-gboliyete ngagesigabac. <sup>7</sup> I yangucte, Wapongti Asu nolewec, yogodi tapili-wawa mi bafuwanolewec, miyac. Ye tapiliholec ganangte ailu kwe-lenonggengti ngic-ngigac angac ngageyelenangte nga aibaba madicne da-mongkenangte ailu bafuwanolewec. <sup>8</sup> Ilec ga game mikac galu Sugucnele yowa-siduc miyengka yegengkeme suguledaic. Aime na yele ailu muc-macka ngiyeibale nale ngageengka gameineholec mi aidaic. Ga inguchac Wapongte tapiliwa Siduc Madicnele ailu na ingucnehac doic ngagedamec.

<sup>9</sup> Aime wasecne ainangte ngagelu bikicte ameine bame Wapongte bingec ganangte Wapongti wacnubawec. Nongilengti aibaba madicne aibeng inguc mi aiwec, miyac. Ye yeuctihac alingkelu ngageme fawec, yogo biyachacbenang himong nga sawa mi fikeebcka Kristo Yesule madicnele ailu kwele-madic ainolewec. <sup>10</sup> Inguc faemewa yakumac hocne Asa-baba ngicnonggeng Yesu Kristodi kwesime Wapongte kwele-madic yogo fikelu yegengkewec. Yegengkeme yedi homac baickelu gaga dangke-dangekeine mikac, yogo balu kwesime yegengkeme nganiibeng. Yedi Siduc Madicne noleme gaga-sanangte aibaba ngani-motoibeng.

<sup>11</sup> Ilec Siduc Madicnele ailu yogo mibe yegengkeme ngic-ngigac weduyeletu salecebaicne aibele wacnuwec. <sup>12</sup> Yogolec ailu doic feina gagabac. I yangucte, na ye ngagesingkelu gagabac, ye ngagegabacte nalic mi gamenudaicte. Aime ngage-ngagesingne sanangne yanguc fagac, ye tapiliineholecte gagane yela lobe fagac, yedi yogo damongkelu gaemewa damengngine kwesidaicte. <sup>13</sup> Na Wapongte yowa ngic-ngigac silicina weduyeletaigabac, gageuc yogo ngagegic. Aime yogolec silicina edocebalu weduyeledamec. Aime Kristo Yesuholec wetackelu ngage-ngagesing nga kwele-angacka galu Wapongte yowa yogo sebilelu balaibedamec. <sup>14</sup> Tili Asu nongileng kwelewa gagac, yedi nenggac ngiyegeleme Wapongti wiyc madicne balu gelewec, yogo damongkeengka fadaic.

### *Babafic aling*

<sup>15</sup> Ngic Asia prowins iwa gagaing, yenge sasawadi nale takicebame biyachac hegilecnuibong, yogo ngagegic. Figelus nga Hemogenes yeke inguchac hegilecnuiboc. <sup>16-17</sup> Aime sifu muc-macka ngiyebewa Onesiforus ye Roma taonka kwesilu sanangne basacnulu gacgu bafuwanuwec. Ailu senti hefecnuibong, yogolec mi gameeme dameng bocyac basanangnume madicne gaiba. Ilec Sugucnedi Onesiforus golowacfocene kwele-sowac aiyeledaic. <sup>18</sup> Aime Efesas taonka molickelu gaibawa, yedi socne damongkelu bole sugucnebenang bawec, yogo gageuctihac nganilu biyac ngagegic. Ilec Sugucnedi ngagecnolu damengtowaina kwele-sowac aicnodaic.

## 2

### *Sugucnele bole-ngic*

<sup>1</sup> Ilec ailu madecne, Kristo Yesule kwele-madicti basananggume tapili-holec gadamec. <sup>2</sup> Ga nga widec ngic-ngigac bocyac ngenge momochac yowane ngageibong. Yowa yogo ngic yefe mi lilocaigaing, edocebaengka damongkedabieng. Damongkelu yengi ngic-ngigac nebocine taockelu edocebalu weduyeledaingte. <sup>3</sup> Aime Kristo Yesule hudu-baba ngic madicne ailu

naholec doicka galu mi takicgudaic. <sup>4</sup> Hudu-baba ngic bole balu gagaing, yenge hudu-baba sugu ngagegaing. Lobeina bole haicine monic-monice fagac, yogo monic mi badaingte, miyac. Ngic ingucne ye damongngine yeholec yowa milu hefeicne, damong ye ngageme madickenale yele yowa yogo balaibelu bole balu gadaicte. <sup>5</sup> Aime loling ngic monic ye lolingka gasackelu gbelong aigac. Aimebac lolingte yefe-yowa lilogacte lolingte maaine sil yogo nalic mi badaicte. <sup>6</sup> Aime monic ye sanangkelu bole hole-duwec aicaigac, ye molickelu nosingngine badaicte, yogodibac madickedaicte. <sup>7</sup> Na yowa migabac, yogo ngage-ngagegona lolu balu gadamec. Aime ngage-motoc te wiyac sasawa Sugucnedi bafuwageledaicte.

<sup>8</sup> Yesu Kristo, Dawidle fikesaweckacni, ye homackacni gboliyelu fangkewec, ye ngagesilu gadamec. Yele Siduc Madicne hocne milu edocebalu gagabac. <sup>9</sup> Na yogo milu edocebalu gagabac. Ilec ailu doic ngagelu balu gabe, ngic yengi kindololo ngic muc-macka locebalu hefecraiging, silicine yogo ingucne hac muc-macka locnulu hefecnuibong. Aime sifu Wapongte yowa yogo muc-macka nalic mi hefedaiingte, miyac. <sup>10</sup> Kristo Yesudi ngic-ngigacfocene bawosaecebaicne bikicte ameine bame, yenge inguchac wasecne ailu gaga-sanangte hibi-angoc badaing. Ilec ailu na doic sasawa nalic ngagelu sanangne domalu umac yogo bagabac.

<sup>11</sup> Yowa monic yago nalic ngagepangkedabeleng, yogo yanguc fagac, Yeholec homaibeng. Ilec nongileng momoc yeholec inguchac gaga gadabelengte.

<sup>12</sup> Ailu umac balu sanangne gadabelengtewa, yeholec ngictau aidabelengte. Nga ye lobe holecnodabelengtewabac, ye inguchac lobe holecnubadaicte.

<sup>13</sup> Ailu yowaine mi balaibedabelengtewa, ye sifu yowaine balaibelu gadaicte.

I yangucte, yogo yeicne fungine, aime ye yeicne lobe nalic mi holenagudaiicte.

### *Yowangineng fec-wac mi aidaic*

<sup>14</sup> Ga yowa kwelengkegabac, yago ngic yogo yenge hole-gboliyelu edocebanong. Aime yenge yowa gocne ngagelu yowanginengti yowa nebocinele funginele mibong fec-wac aidaickale, sawang-yowa yogo sanangne hac Wapongte haicka edocebanong. Yowa fec-wackolec mimi, yogo babaficine mikac. Ngic-ngigac yenge yogo ngagebong yowa yogodi bocyacbenang basowalecebadaicte. <sup>15</sup> Wapongte kwelewa madickenale sanangne hac galu bolegone badamec. Ailu yowa noinele fungine dondonne midamec. Inguc ailu Wapongte haicka bole-ngic ganogale mi gamegudaicte. <sup>16</sup> Aime ngic-ngigac himongte siduc nga yowa kosaine micaigaing, yogo lobe holeyelelu gadamec. Ngic-ngigac yowa ingucne mibong yogodi mengocebame Wapong alang mi bacnolu dalicka taockeme taoc hikedaingte. <sup>17</sup> Ailu yenge yowangineng mibong suguleme yogodi waic sanangne ingucne hatamac sugulelu hikedaicte. Himenaus nga Filetus yeke ngic ingucne yengelacni. <sup>18</sup> Yeke yowa noine hegilelu yefe lilolu micaigaic, "Ngic-ngigac yenge homackacni gboliyelu fangkedaingte, yogo biyachac fikewec." Inguc milu ngic-ngigac gocne yengele ngage-ngaingbasowalegabiyc.

### *Bolele yowa*

**2:3:** 2Tim 1:8    **2:5:** 2Tim 4:7-8    **2:6:** 1Kor 9:7    **2:8:** 1Kor 15:4; Rom 1:3    **2:9:** Efs 3:1,13;

Filp 1:12-14    **2:11:** 2Kor 4:11    **2:12:** Mat 10:33    **2:13:** Rom 3:3-4; Tit 1:2    **2:14:** 1Tim 6:4;

Tit 3:9    **2:15:** 1Tim 4:6    **2:16:** 1Tim 4:7    **2:17:** 1Tim 1:20

<sup>19</sup> Aime sifu Wapongti bosing sanangne lome hauwec domagac, yogo ululung nalic mi aidaicte. Yogowa yowa yanguc kwelengkeicne fagac, "Sugucnedi ngic-ngigacfocine ngagecebagan." *(Him 16:5)*

Ailu monic yanguc,

"Ngic-ngigac Sugucnele wac wackecaigaing, yenge aibabangineng sowacne, yogo sasawa hegilelu lobe holecnolu gadabieng."

<sup>20</sup> Aime ngic woc-wiyactowaineholec yele macka hebec-kudi haicine monic-monic ngiyegaing. Gocne gol nga siliwadi baicne yogo bolengineng alang-babaineholec aigac. Nga gocne yoc nga gbakitacti baicne yogo bolengineng yafoineholec aigac. <sup>21</sup> Inguc aime ngic monic ye yeicne wizac yafoineholec yogowacni suwenagudaicte, ye hebec-kudi alang-babaineholec, yogo ingucne. Ye Wapongte bingec aime Fileinedi bame bole madicne banogale silic aigac.

### *Gaga ulucne*

<sup>22</sup> Himongka socte angac soc-gboli yengela facaigac, yogowacni hangoc baicke hikelu dalicka gadamec. Ngic gocne yenge kwelengineng gbagbacne galu Sugucnele wac wackecaigaing. Aime yengeholec bole sanangne balu yefe dondonne balaibelu ngage-ngagesingkolec gadamec. Ailu kwelegonedi ngic-ngigac yengele angac ngageyelelu kwele-mogungkolec gadamec. <sup>23</sup> Ga yowa kosaine nga babaficine mikac, yogo hegiledamec. Aibaba yododi hocne ngaba bafuwame yuwenac fikecaigac, yogo ngagegic. <sup>24</sup> Sugucnele kwelec kwekwae ngic ye yuwenacka mi gadaic. Ye ngic-ngigac sasawa yengeholec ulucne galu wewedru bolele fungine ngagelu ngic-ngigac yengele tatakic mikac gadaic. <sup>25-26</sup> Aime Aleng Sugucnenginengti suba ingucne ngic-ngigac gocne bacebame, yele angac nga ngage-nngage balaibecaigaing. Yenge Sugucnele kwelec kwekwae ngic yele yowa hedickecaigaing, inguc aibong yedi yengeholec ulucne galu edocebalu weduyeledaic. Inguc aiyeleme Wapongti kwelengineng hefaliyeningte tapili yeledaicte mecne. Inguc aiyeledaictewabac, yenge kwelengineng ileckeme yowa noine ngagemotolu, Aleng Sugucnenginengt molewacni fotockelu hikeyackedaingte.

## 3

### *Dameng moto-motoine*

<sup>1</sup> Dameng moto-motoina\* umac haicine monic-monic fikedaicte, yogo ngageng fadaic. <sup>2</sup> I yangucte, dameng iwa ngic-ngigac yenge yengileng angac nga hiye-monengte angac bocyac ngagedaingte. Yenge yengileng wiyaete mibong feicne aime, socngineng bafelu misulec ailu nenggamacfocngineng yengele yowa kwedaingte. Ailu ngic-ngigac wiyaete yele daingte, yengele kwele-madic monic mi ngagedaingte. Aime gaga gbagbacne yogo yengela mi fadaicte. <sup>3</sup> Aime yenge ngic-ngigac agofocngineng yengele mi angacebadaitce. Ailu ngic-ngigac yengele bikic mi hegiledaingte. Yenge gocne yengele kwsac-yowa milu aibabangineng mi damongkelu wecebalu doic sugucnebenang yelelu aibaba madicne kwelenginengti hegiledaingte. <sup>4</sup> Yenge mic-heloc aiyelelu mi ngage-motolu aibabangineng moc aidaingte. Ailu socngineng bafelu fefeyac aidaingte. Socte angacti yengele gaganganang suguleme Wapongte angacboc hegiledaingte.

---

<sup>2:19:</sup> Yoa 10:14; 1Kor 8:3      <sup>2:22:</sup> 1Tim 6:11      <sup>2:23:</sup> 1Tim 4:7      \* <sup>3:1:</sup> Hibi gocna "dameng moto-motoina" kwelengkelu yanguc ngageibong, Yesu homackacni gholiyu fangkewec, dameng moto-motoine fungkewec. Ailu ye hatac kwsidaicte, dameng iwa dameng moto-motoine motodaicte.      <sup>3:1:</sup> 1Tim 4:1

**5** Ailu yenge socti sugu Wapongte gagale silic ingucne gadaingte. Ailu Wapongte tapili nga pasi yogo hegilelu lobe holecnodaingte. Ilec ga yenge-holéc wetackelu mi gadamec.

**6-7** Ngigac gocne yenge mic-heloc aibabangineng ailu angacngineng sowacne haicine monic-monie balaibelu gabong bikicngineng umalecaigac. Ailu yenge wewedu-yowa ngagelu gagaing. Nga yowa noinebac nalic mi ngage-motodaingte. Ilec ailu ngic yogo yenge madicne silic ingucne galu mac-boneng hikelu ngigac yogo yowawa mic-heloc aiyelecaigaing.

**8** Aime esecne Yanes nga Yamberes yeke Mosesle yowa hedickeiboc, ingucnehab ngic migabac, yenge ngage-ngage kwesacineholec galu yowa noine hedickecaigaing. Ailu ngage-ngagesingte yefe lilogaing. **9** Yanes nga Yamberes yekele aibaba kosaine yogo yegena fikeme ngic-ngigac sasawadi yogo nganibong. Ingucnehab sasawadi ngic yogo yengele aibabangineng kosaine yogo ngani-motodaingte. Aime kwesac-yowangineng yogo hatac-mac mi suguledaicte.

### *Salecebainc yengele silicka ganoga*

**10** Aime Timoti, gabac na wiyac wedugeleiba, yogo ngagelu balaibelu gagic. Ailu na aibaba aiiba, nga gaganele yefe loiba, yogo ngagegic. Ailu tatakic mikac ngage-ngagesingkolec galu kwelenedi ngic-ngigac yengele angac ngageyelelu sanangnehab gaiba. **11** Ailu na Antiok nga Aikoniam ailu Lista taonka gabe weyebic aineleibong, aime umacka nga doicka gaiba. Inguc gaebewa Suguncnedi umac sasawa yogowacni baficnulu gawec, yogo ngagegic. **12** Aime ngic-ngigac sasawa Kristo Yesuholec wetackelu Wapong alang bacnolu ganingte ngagegaing, yenge inguchac weyebic aiyeledaingte. **13** Aime bikic-baba ngic nga kwesac-ngic yenge ngic-ngigac lokwesacka locebacaigaing, yenge sowacnengineng hatacmac sugulelu sanangkeme sowale-benangkedaingte. Ailu yenge yengungtihac kwesac ainagulu gocne inguchac kwesacebabong wawedaingte.

### *Yowa babaficinéholec*

**14-15** Ngic-ngigac gocne madicne ngageyelecaigic, yenge ga gegecne gaing, dameng iwa Wapong yeicne hibi kwelengkeicne fagac, yogo wedugeleibong. Wedugelebong yowa yogo ngageng ngage-ngagegonge bae-feckeme Kristo Yesu ngagesingkeng bikicte ameine bame wasecne aining. Ga yogo ngagepangkelu gadamec. Inguc gaengka yododi gagagone basanangkedaicte. **16** Aime yowa Wapongte hibiwa kwelengkeicne fagac, yogo sasawa Wapongti asuine fitome ngicte ngage-ngagewa haume kwellengkeibong. Hibi yododi yanguc baficnubagac, Wapongte mic-yowadi ngelengnubalu wedunolegac. Ailu bamadicnubalu yefe dondonne bal-abenangte damongnubagac. **17** Inguc aime Wapongte ngic-ngigac yenge bolele ngage-ngage nga tapili yogolec silicina bálu bole madicne haicine monic-monie baningte hibi yogo yelewec.

## 4

### *Bole sanangne banoga*

**1** Kristo Yesu ye ngani-damongngina fikelu domadaicte, iwa gbolicne nga homaicne wosaecebalu mimoctocebadaicte. Na Yesu nga Wapong yekele haicka sanangnehab edocgugabac. **2** Ga dameng madicna, me miyac, iwa sifu efeckelu Wapongte yowa milu ngic-ngigac edocebalu mibating

aiyeledamec. Ailu tatakic mikac wiyac sasawa ngelengebalu edocebalu weduyelelu basanangebadamec. <sup>3</sup>Dameng monic kwesidaicte, iwa ngic-ngigac yenge wewedu-yowa dondonne ngagenogale takicebadaicte. Yengebac yengileng angac balaibelu wewedu ngic bocyac kpaducebadaingte. Kpaducebabong yengi ngic-ngigac yengele hedecka yowa angacine aigac, yogo weduyeledaingte. <sup>4</sup>Ailu yenge yowa noine hegilelu lobe holecnodaingte. Ailu siduc esecne nga siduc noine mikac, iwa wetackelu yefe lilodaingte. <sup>5</sup>Aime gageuc wiyac sasawa damongebaengka umac fikegeleme tatakic mikac sanangne domadamec. Inguc domalu Wapongte Siduc Madicne edocebalu Wapongti bole-yowa gelewec, yogo sasawa balaibelu gadamec.

### *Poldi homanale miwec*

<sup>6</sup>Aime homac-damengne biyac welegacte ngic yenge waing Wapongte ibu locaigaing, silicine ingucne hac sacne sotingkeme gaganedu ibu ingucne aidaicte. <sup>7</sup>Hudu madicne biyac welu bamoctoiba gagabac. Ailu ngic gbelong ainingte gasackecaigaing, silicine ingucne hac sanangne hac gasackelu biyac bamoctoiba gagabac. Ailu ngage-ngagesingne sanangne balu gaiba. Ailu mi wickebe wawec. <sup>8</sup>Yakumacbac gaga dondonnele duu nale wangec loicne fagac. Ailu Sugucne ye pasi dondonnele wowosae-ngic, yedi dameng iwa duu yogo neledaicte. Aime yogo na sugu mi neledaicte, miyac. Ngic-ngigac sasawa yenge ye kwesi-kwesi damengngina fikelu yegengkenale kwelenginengti angac ngagegaing, yedi yogo yenge inguchac yefedaicte.

### *Bole-yowa gocone*

<sup>9</sup>Ga kwesinogale sanangkelu nala biyachenang kwesidamec. <sup>10</sup>I yan-gucte, Demas ye dameng yagolecte gagale angac ngagelu biyachac hegilec-nulu Tesalonika taonka hikewec. Aime Keresken ye Sugucnele hole hanale Galata prowins iwa hikewec. Aime Titus ye inguchac Damatia prowins iwa hikeme <sup>11</sup>Lukadi sugu naholec gagac. Mareko ye bole baficnucaigacte ailu gagie ye bafuwalu mengockeng gaholec kwesidabiye. <sup>12</sup>Tikikus ye Efesas salebe hikewec. <sup>13</sup>Aime funogale milu ngakpine dalicne Toas taonka Kapusle macka hegilebe ngiyewec, yogo nga nale hibi kpadiweicne sasawa iwa locebabe faibong, yogo momoc bacebalu kwesidamec. Ailu hibine lama socina kwelengkeicne fagac, yogo ngagebe wiyac feicne aigacte yogo momoc balu kwesidamec.\*

### *Damongnagulu ganoga*

<sup>14</sup>Aleksanda ye aen dacka lobelu woc-wiyac bacaigac, yedi umac bocyac bafuwanelewec. Aime Sugucnedi aibabainele ameine baducnodaicte. <sup>15</sup>Ye dacine inguc ailu yowanonggeng bocyac mife-miwa ailu gawec. Ilec ga ngic yele damong balu gadamec.

### *Polyowawa loibong*

<sup>16</sup>Aime na molickelu Roma iwa yowawa domalu funginene miiba, dameng iwa monicti naholec mi domawec, sasawadi hegilecnuyackebong. Aime inguc aiibongte yogodi mi baumalecebadaic. <sup>17</sup>Na Siduc Madicne Israel yengele alingkacni miyac, yengela mibe yegengkenale Sugucnedi sifu naholec domalu tapili nelewec. Ailu nale agong holelu nale homac yogo

**4:3:** 1Tim 4:1    **4:6:** Filp 2:17    **4:7:** 1Tim 6:12    **4:8:** 1Kor 9:24-25    **4:10:** 2Kor 8:23;

Sale 15:37-39; Kol 4:14    \* **4:13:** Hibi bocyac yogo papirushekengnginedi baicne iwa kwelengkelu gaibong. Papirushekengngine yogo siminghekengngine ingucne sugucne hac. Hibbingineng gocone yogo yenge lama me noning socina kwelengkelu gaibong. Socine yogo fuline sugucne hac. **4:13:**

Sale 20:6    **4:14:** 1Tim 1:20; Mige 62:12; Rom 2:6

laionte mickacni ingucne baicnuwec. <sup>18</sup> Ngic yengi umac haicine monicmonic ainelenogale ngagegaing. Aime Sugucnedi yogowacni inguchac baficnume wasecne aibe honocmeng ngani-damongngina locnudaicte. Yela wac feicne moto-motoine mikac fafegidaic, yogo foinac.

*Wenac-madic*

<sup>19</sup> Nale wenac-madic Prisila nga Akwila ailu Onesiforus golowacfocene yengela loengka hikedaic. <sup>20</sup> Erastus ye Korin iwa gagachac. Nga Tofimus yebac hucti bawecte Miletus taonka hegilebe ngiyewec. <sup>21</sup> Aime tilo-gbelong dameng aidaickale, sanangkelu biyac kwsidamec. Yubulusdi wenac-madic gala lome fugac. Ailu Pudens nga Linus ailu Kalaudia nga ngic hae-gbafocnonggeng sasawa, yenge inguchac wenac-madicngineng gala lobong fugac.

<sup>22</sup> Sugucnedi gale asuholec gadaic. Aime kwele-madicinedi ngengela fadaic. Yogo foinac.

## Poldi Titusle Hibi Kwelengkewec

### *Mimi-yegeng yowa*

Titus ye Grik ngic. Poldi Yesule Siduc Madicne edome ngagesingkeme yeholec lolickelu bole balu gaiboc. Pol ye Titus saleme alecine yaeckang Korin taonka hikelu bole bawec (2 Korin 7:6-7; 8:6,16). Yogolec lobeina Krit nucka lome hikelu Yesule Habu iwa damongebalu gawec.

Pol ye molickelu Roma iwa muc-macka ngyegacgu hegile haulu hikewec. Yesu homackacni gboliyelu honocmengka feme hifa 34 ngama ingucne motome, Poldi hibi yago Titusle kwelengkelu lome fuwec. Wewedu kwesacine gocne yengele sawang-yowa edowec. Ailu Yesule habu wenuc madicne damongebalu damongfocngineng bawosaecebame yengele aibaba madick-enale kwelengkeyelewec.

### *Yowa yago hibi nebocina fagac*

1:1-4 Wenac-madic yowa

1:5-16 Yesule habu damong yengele aibaba

2:1-3:11 Yesule habu kwelina habu gocne yengele aibaba madicne

3:2-15 Yowa moto-motoine

### *Hibile molic-molic yowa*

<sup>1</sup> Na Pol, Wapongte kwelec kwekwe ngic nga Yesu Kristole salecebaicne. Wapongte ngic-ngigac bawosaecebaicne yengi yele pasi nga yefe noine ngagesingkelu ngage-motioningte locnuwec. <sup>2</sup> Yowa yogodi gaga-sanang bafuwadaike, yogolec wangec gagabeleng. I yangucte, Wapongta kwe-sac monic mi fagac. Molickelu wiyc sasawa mi fikeibongkacnihac yedi gaga-sanang banangte yowa mipangkewec. <sup>3</sup> Aime yeicne damengngine kwesime yowaine dondonne ngic-ngigac yeleme mibong yegengkewec. Yogo minogale Wapongti bikicte ameine Asa bacnubawec, yedi edocnul neleme damongkegabac. <sup>4</sup> Titus, ga naholec ngage-ngagesing moniyang ngagesingkelu madecnebenang aigic, na hibi yago gala logabac. Wapong Mamac nga Asa-baba ngicnonggeng Kristo Yesu, yekele kwele-madic nga kwele-mogungtowadi gaholec fadaic.

### *Bole-yowa*

<sup>5</sup> Bole nebocene fawec, yogo bamoctoce ngagelu Krit nucka hegilecgube ngiyeing. Ailu bole aling edallicguiba, yogo balaibelu taon falegacsoc, iwa hikelu Yesule habu damong bawosaecebalu bole-yowa yeledamec.

<sup>6</sup> Ngic monic ye kpokpolis mikac gacaigac, ailu ngigacine moniyang sugu gagac. Ailu ye adu-madecfocine ngage-ngagesingkolec gagaing. Ailu adu-madecfocine yenge aibaba kosaine me mansanang gaga, yowa-siducngineng ingucne monic mi fikecaigac. Ngic ingucne ye damong nalic aidaicte. <sup>7</sup> I yangucte, Yesule habu damong ye Wapongte wiyc damongkedaike. Ilec kpokpolis mikac gadaic. Ailu ye yeicnele ngageme feicne mi aidaic. Ailu ye ngic dacine mi aidaic. Ye waing misa nolu kweleine mi sifuwedaic. Ye kindololoine mikac ailu ye hasowacka hiye-moneng banogale mi gadaic. <sup>8</sup> Yebac ngic-ngigac macka hefolecebadaic. Ailu aibaba

madicne yogolec angac ngagedaic. Gagaine madicne damongkedaic. Ailu dondonne nga gbagbacne galu aibabaine nga angacine damongnagudaic.

<sup>9</sup> Aime yowa ngage-ngagepangkolec edocebalu weduyeelibeng, yowa yogo sanangne balu gadaic. Ngic ingucne ye yanguc nalic aidaic, ngic-ngigac yefe dondonne weduyelelu kwelengineng kwefangkedaic. Aime gocne yengi yowanonggeng kwecaigaing, yenge ngelengebalu edocebadaic.

### *We wedu kwesacie*

<sup>10</sup> I yangucte, mansanang ngic-ngigac bocyacti gagaing. Yenge yowa babaficine mikac moc micaigaing. Ailu ngic-ngigac kwsac aiyelecaigaing. Aime Yuda ngic soc tofangineng helockeicne, yengi hocne aibaba ingucne ailu gacaigaing. <sup>11</sup> Yenge moneng-mafatona kwsacka bafwanogale yowa mimi-sifucineholec edocebalu weduyelegaing. Inguc aiyelebong golowac gocne sasawadi siyeckelu sowalegaing. Ilec ailu ngic ingucne yengele mic-yowangineng kpatalayeledabieng. <sup>12</sup> Krit ngic yengilangkocni yengele siduc-mimi ngic monicti yengileng yanguc miwec, "Krit ngic yenge dameng-soc damengsoc kwsac aicaigaing. Ailu nosing nolu gebecebarne oyong galu kate-sic sowacne ingucne gagaing." <sup>13</sup> Yele yowa yogo noine. Ilec yenge ngage-ngagesingngineng bamadickeng madickenale ung-yowa sanangne ngelengkelu edocebadamec. <sup>14</sup> Ailu Yuda ngic-ngigac yenge siduc esecne gocne milu ung-yowa ngickacni basanangkelu yowa noine hegilelu lobe holecnocaigaing. Yenge yowa ingucne mi ngagesiningte, yogo sanangnehac ngelengkelu edocebadamec.

<sup>15</sup> I yangucte, ngic-ngigac gbagbacne gagaing, yengele gagawa nosing nga woc-wiyacngineng gbagbacne fagac. Aime ngic-ngigac gocne biyachac wonongkolec ailu ngage-ngagesingngineng mikac gagaing, yengele ngage-  
ngage-motoc nga kwele ngage-  
ngagengineng momochac wonongkolec aigac. Ailu wiyacngineng gbagbacne monic mi fagac.\* <sup>16</sup> Yenge Wapong ngagegabeleng, yogo micnginengti sugu mibong yegengkecaigac. Nga aibabanginengtibac ye lobe holecnogaing. Aibabangineng sowacne yogo memenguine aigac. Aling yogo yenge yowa wegaing. Ailu aibaba madicne monic nalic mi aidaingte.

## 2

### *Ngic- ngigac yengele yowa*

<sup>1</sup> Aime gageicne Wapongte yowa madicne nga dondonne fagac, yogo balaibelu weduyeledamec. <sup>2</sup> I yangucte, mamac yenge mogungne galu damongnagulu aibabanginengti alang-baba ailu gadabiyeng. Ailu yenge ngage-  
ngagesingngineng damongkelu ngic-  
ngigac yengele kwelenginengti angac ngageyelelu tatakic mikac sanangne gadabiyeng.

<sup>3</sup> Aime nenggac yenge inguchac ngic-  
ngigac Wapongte ngage-  
ngage balaibecaigaing, yengele silic ingucne aibabanginengte alingka gadabiyeng. Ailu yenge ngic-  
ngigac gocne kwsac-yowa mi edocebadabiyeng. Ailu waing misa bocyac nolu, yogolec umacka mi gadabiyeng. Wiyac madicne fagac, yenge yogo ngic-  
ngigac weduyeledabiyeng. Aibaba ingucne yogo weduyeledamec. <sup>4</sup> Ilec nenggac yengi ngigac-adu ngawefocnginengkolec yenge yanguc weduyeledabiyeng. Yenge

<sup>1:11:</sup> 1Pi5:2; 2Tim 3:5-6    <sup>1:13:</sup> 2Tim 4:2    <sup>1:14:</sup> 1Tim 4:7    \* <sup>1:15:</sup> Poldi yanguc miwec, nosing nonole aka monic mi fagac. Aime gocne yengibac yanguc miibong, nosing gocne yogo akaineholec. Mareko 7:19, Roma 14, nga Depec-baba 11-15 yogolec fungine nga ngage-  
ngage iwa kwelengkeicne fagac.    <sup>1:16:</sup> 1Yoa 1:6; 2:4    <sup>2:3:</sup> 1Tim 3:11

ngawefocngineng nga adu-madecfocngineng yenge kwelenginengti angac ngageyelelu<sup>5</sup> damongnagulu gbagbacne gadabiyeng. Ailu yenge mac-bolengineng balu madicne galu ngawefocngineng yengele yowa ngagedabiyeng. Inguc aibong monicti Wapongte yowa nalic mi milu suledaichte.

<sup>6</sup> Ga soc-gboli ngic inguchac damongnaguningte ngage-ngagengineng kwefangkelu edocebadamec. <sup>7</sup> Ailu wiyac sasawa yogowa, gageuc galu aibabagone silicine madicne aiyengka balaibecgudabiyeng. Ga weweduyowagone yogo alang-babaineholec ailu yowa noineholec weduyelenong. <sup>8</sup> Aime ngabafogone yenge gale yowa sowacne monic nalic mi miningte ailu gameebanale, ngic-ngigac yowa noine babaficinaholec edocebalu gadamec. Nonge yowa kwekwe ingucne nalic mi aidaingte.

### *Kwelec kwekwe ngic*

<sup>9</sup> Kwelec kwekwe ngic-ngigac sugucnefocngineng yengeholec gagaing, yenge sugucnefocngineng yengele yowa sasawa balaibedabiyeng. I yangucte, sugucnefocngineng yengi ngageyelebong madickenale bolengineng balu sugucnefocngineng yengele yowa ameine mi bafaliyedaing. <sup>10</sup> Yenge sugucnefocngineng yengelacni wiyac monic hise mi badaing, miyac. Yenge bole sasawa bagacgu yowa balaibe-balaibe ngic-ngigac madicne aidaing. Ga inguc weduyeledamec. Ailu yenge aibaba ingucne aibong, Wapongti bikicte ameine Asa bacnubawec, yele wewedu-yowa yogo ngic-ngigac yenge yowa madicneineholec ngagedaingte.

### *Kristole wangec gagabeleng*

<sup>11</sup> I yangucte, Wapongte kwele-madicti ngic-ngigac sasawa yengela fikelu yegengkeme bikickacni wasecne ainingte kwele-madic bafuwayelewec. <sup>12-13</sup> Yesu Kristo, ye Wapong feicnetowa nga Asa-baba ngicnonggeng, yedi tapili nga hibi-angocka kwesilu fikelu yegengkedaichte. Ilec ailu wangec galu kwele-angacka gagabeleng. Inguc gaechengka Wapongte kwele-madicti yefe wedunoleme yanguctihac himontowa yagolec aibaba nga angac lobe holecnodabeleng. Inguc ailu gaganonggeng damongnagulu yefe dondonne balaibelu Wapong alang bacnolu gadabeleng. <sup>14</sup> Aime Yesu Kristodi yefeyowa wewe muckacni lukecnubanale, yeuctihac ngabafocine yengele molewa longauwec. Ailu suwecnubame nongileng yeicne ngic-ngigac ailu bole madicne mamang hidulu banangte aibaba yogo ainolewec.

<sup>15</sup> Ga yowane yogo balu kwelengineng kwefangkelu ngelengkelu edocebadamec. Ga yowa sasawa yogo tapili geleicne, yagolec silicina edocebadamec. Aime monicti gale ngageme wawaine mi aidaic.

## 3

### *Ung-yowa*

<sup>1</sup> Ga yowa yanguc hole-gboliyelu edocebadamec, ngic-ngigac yenge gamangfocngineng nga damongfocngineng yengele yowa ngagelu balaibelu bole madicne banogale damengsoc efeckelu gadabiyeng. <sup>2</sup> Ailu yenge monic misulec mi aicnodaing. Yenge kwele-mogungkolec ulucne galu ngic-ngigac sasawa yengele umac ngage-motolu kwele-madic aibaba aiyeledabiyeng. <sup>3</sup> I yangucte, nongileng inguchac molickelu ngage-ngage-motoc mikac galu yowa kwebeng gocne yengi kwasacka mengocnubabong yefe liloibeng.

Aime sisipilic aibaba nga angac haicine monic-monic yogodi hefecnubawec. Nongileng kwele-dacka gocne yengele hasowac ngagelu gaibeng. Ailu kweledi wiCNubabong ingucnehac wicebaibeng.<sup>4</sup> Aime sifu Wapong Asababa ngicnonggeng, yele baba-madicine nga aibaba madicne yegenia fikelu yegengkewec.<sup>5</sup> Dameng iwa yedi suwecnubame Tili Asudi bole bame fike-fike gbolicne fikeibeng. Ye nongilengti bole dondonne baibengte ailu mi bamadicnubawec. Ye nongileng kwele-sowac ngagelu bamadicnubame wascne aibeng.<sup>6</sup> Aime yedi Asa-baba ngicnonggeng Yesu Kristo yele ailu Tili Asu umacnehac sotingkenolewec.<sup>7</sup> Sotingkenolelu kwele-madicinele ailu dondonne wacnubame gagabeleng. Inguc galu mole-damocnonggeng yogo gaga moto-motoine mikac, yogo banangte ngagesilu wangec gagabeleng.<sup>8</sup> Yowa yogo nalic ngagepangkegabeleng.

Ilec yowa yogo tapiliineholec edocebalu weduyeselecte ngagegabac. Inguc aiyengka ngic-ngigac Wapong ngagesingkelu gagaing, yenge aibaba madicne yogo wosaelu ainingte bocyac aiyedelaic. Bole ingucne yogo madicne ailu ngic-ngigac yengele babaficngineng aigac.<sup>9</sup> Aimebac ngicngigac gocne yenge yowa silicine madicne miyac yowanganengti fecwacineholec micaigaing. Ailu ngesa-ngambo yengele fikesawecete fung kwelu yefe-yowale yowa gocne fagac, yolec yowanganengti fec-wac aime ngaba aicaigaing. Ga yowa ingucne ngagelu lobe holecnolu hegiledamec. Yowa ingucne yogo babaficne mikac nga yogodi noine monic mi bafuwadaicte.<sup>10</sup> Gulu-kwouc ngic monicti kwesime dameng moniyang ungyowa edoengka mi ngageme, edong alecine yaeckang aidaic. Aime yowagone mi ngagemebac hegiledeng yeicnac gadaic.<sup>11</sup> Ngic ingucne ye yefe lilolu bikic bafuwalu yeuctihac yowawa lonagulu mimoctocnagugac.

### *Yowa moto-motoine*

<sup>12</sup> Na Atemas me Tikikus gala salebe fume ga nala Nikopolis taonka sanangkelu biyac kwestidamec. Na tilo-gbelong damengka iwa ganogale biyachac ngagesiiba. <sup>13</sup> Apolos nga gamangte yefe-yowale ngic wacine Senas, yeke yefele wiyc monicte mi kpungkenicte, ga babafic sanangne-hac aiyetelu salecepang hikedabiye. <sup>14</sup> Aime ngic-ngigacfocnonggeng socte gagale noine mi bafuwadaingkale, yenge inguchac ngic-ngigac umacngineng nganilu aibaba madicne ailu baficebaningte yefe weduyeleng ngagedaing.<sup>15</sup> Ngic-ngigac naholec gagabeleng, yengi wenac-madicngineng gala lobong fugac. Aime ngic-ngigac Wapong ngagesingkelu nongele kwele-angac ngagegaing, yenge nongele wenac-madicnonggeng edocebanong.

Kwele-madicti sasawa ngengela fadaic. Yogo foinac.

## Poldi Filemon Yele Hibi Kwelengkewec

### *Mimi-yegeng yowa*

Filemon ye ngic monic woc-wiyacine homacneholecti Kolosi taonka gawec. Ye Yesu ngagesingkeme Yesule habu yenge yele macka kpaduckeibong. Ailu ye Pol agoine gawec. Filemon yele kwelec kwekweine monic, wacine Onesimus, ye Filemon hegile hikelu Pol bafuwawec. Bafuwame Poldi Yesule siduc edome ngagesingkelu ye bafickewec.

Filemon nga Onesimus yeke ngaba ingucne gaiboc. Inguc gaboc Poldi baficepanogale hibi yago kwelengkewec. Yesu homackacni gboliyelu hon-ocmengka feme hifa 32 ngama ingucne motome, hibi yago kwelengkewec.

### *Hibile molic-molic yowa*

<sup>1</sup> Na Poldi Kristo Yesule siduc mibe yegengkeme muc-macka locnubong ngiyegebac. Ailu ngic hae-gbanoggeng Timoti, noki hibi yago lobec Filemon gala fugac. Ga bole moniyangnonggecti aime kwelenonggecti gale angac ngagelu gagabelec. <sup>2</sup> Sengnonggeng Afia nga Sugucnele bole-baba ngic agononggecti Arkipus, ye nga Yesule habu Filemonte macka kpaduckeigaing, hibi yago ngengele momoc logabelec. <sup>3</sup> Mamacnonggeng Wapong nga Sugucnenonggeng Yesu Kristo, yekele kwele-madic nga kwele-mogungtowadi ngengela fadaic.

### *Kwele-madic yowa*

<sup>4-5</sup> Filemon, ga Sugucne Yesu ngagesingkelu Wapongte bingec sasawa yen-gele kwelegonedi angac ngageyelecaigic, gale siduc inguc ngagecaigabac. Ilec ailu mimilocna gale ngagelu damengsoc Wapong kwele-madic edolu gagabac. <sup>6</sup> Ga ngage-ngagesingka nongeholec momoc taockelu Kristoholec wetackelu gagabeleng. Ilec Kristole wiyc madicne sasawa bagabeleng, yogo sasawa gagi ngage-motocte milockecaigabac. <sup>7</sup> Ngic hae-gbane, kwelegonedi Wapongte bingec yenge ago bacebalu angac ngageyelelu kwelengi-neng hole-gboliyecaigamec. Yengela inguc nganiihale aibabagone yogodi basanangnume homacnehac beliyebac.

### *Onesimus*

<sup>8</sup> Ilec ailu Kristoholec wetacke galu bole geleicne yogo badamecte, na ngagelu ung-yowa yogo nalic edocgudacte. <sup>9</sup> Aime sifu kweledi angac ngagegelelo aibaba madicna domalu yowa ulucnedi sanangne milocgudacte. Aime na Pol, ngic dandangngine yanguctihac Kristo Yesule ailu muc-macka gagabac. <sup>10</sup> Na madecne monic yele yowale sanangne milocgudacte. Na muc-macka galu Yesule siduc micnobe ngagesingkeme mamacinele silic ingucne fikelu gaiba, wacine Onesimus.\* <sup>11</sup> Ye esecne molickelu gaholec gawec, iwa mi baficgulu gawec. Nga yakumacbac ga nga na nokilec momochac baficnupalu gadaicte. <sup>12</sup> Naneicne kwelene salegabac ingucne ye salebe gala hefaliyelu fudaicte. <sup>13</sup> Siduc Madicnele ailu muc-macka gaebewa, yedi gale mac balu naholec yawa galu baficnudecka ingucne, yogo nalic aidec inguc ngageiba. <sup>14</sup> Aime gagi mi miyengka nani ye kwelenele

**1:2:** Kol 4:17; 2Tim 2:3

**1:7:** 2Kor 7:4

\* **1:10:** Onesimus wacine fungine yogo babaficinoholec.

**1:10:** Kol 4:9; 1Kor 4:15

sebilebe hegiledameckale ailu, hegileiba. Aime nale angacte miyac, geicne angac balaibelu aibaba madicne ainelecte salebe fudaicte.

### *Kwelec kwekwe ngic*

<sup>15</sup> Onesimus ye ngage-ngagesingkolec agogone gaholec mac-fung ganogale mecne molickelu hegilecgulu. <sup>16</sup> Hegilecgulu kwelec kwekwe ngic silicka hatacmac mi kwsidaicte, miyac. Ye yakumac ngic hae-gbanonggeng kwele-angacka gacaigac. Na yele ingucbenang ngagegabac. Aime yedi gale kwelec kwekwe aigac. Nga ngage-ngagesingka Sugucnele ailu ye momochac ngic hae-gbagone aigac, aibaba yogo wiyac feicne. <sup>17</sup> Ilec ailu ga ngageng nokilec ago-ago aigabelecka, Onesimus fudaicte, ye inguchac nani fube na aineledameckalesoc silicine ingucne hac yele angacgume badamec. <sup>18</sup> Aime yedi yefe ewalilu wiyacgone monic basowalewecka, me yele tofa monic gala fagacka, yogo sasawa hegileng nale wacka fadaic. <sup>19</sup> Na Pol neicne molenedi hibi yago kwelengkelegabac. Na tofa yogo ameine badugeledacte. Aime na Yesule siduc milu edocgube ngagesingkeing. Ilec geicne gagale amegone nala fagac, yogolec yowabac mi migabac.

### *Bole aling nga wenac-madic*

<sup>20</sup> Ga foinac ngic hae-gbane, Sugucnenonggeng Kristole ailu na baficnung kwelene hole-gboliyedaic. <sup>21</sup> Aime yowa ngagelu balaibedamecte yogo fagac, yogo ngagepangkelu hibi yago kwelengkegelegabac. Aime Onesimusle migabac, yogo gagi taockelu hatacmac aidamecte, yogo ngagegabac.

<sup>22</sup> Ailu monic yanguc ngagesilu wangec gagabac, ngengele mimilocngi-nengte ailu muc-mackacni bamoctocnubong ngengela fudacte. Ilec nale mac kweline monic bamockedamec.

<sup>23</sup> Na Epafasholec noke momoc Kristo Yesule ailu muc-macka gagabelec, yedi gale wenac-madic lome fugac. <sup>24</sup> Ngic naholec galu bole momochac bacaigabeleng Mareko, Aristakus, Demas nga Luka, yenge inguchac wenac-madicngineng lobong fugac. <sup>25</sup> Sugucnenonggeng Yesu Kristole kwele-madicti asunginang fadaic. Yogo foinac.

## Hibru Yengele Hibi

### *Mimi-yegeng yowa*

Hibi yago Yuda ngic-ngigac yengele kwelengkeyelewec. Yuda ngic-ngigac yengele yowa wacine nga wacngineng esecne yogo Hibru wackeibong. Ngic kwelengkewec, wacine mi ngagababeleng. Ye Yuda ngic monic Yesu ngagesingkewec.

Dameng iwa Yuda ngic-ngigac gocne yenge Yesu ngagesingkeibong. Ngagesingkelu doic ngagebong weyebic aiyelelu basowalecebaibong. Basowalecebabong Yesule gaga yogo hegilelu yefe-yowa esecne hatac balabenogale ngagesiibong. Inguc ngagesibong ye Yesule fungine kwelengkeyelelu kwelengineng basanangkeyelewec.

### *Yowa yago hibi nebocina fagac*

- 1:1–3 Kristodi Wapongte yowa mime yegengkegac
- 1:4–2:18 Kristodi angelo ewaligac
- 3:1–4:13 Kristodi Moses nga Yosuwa ewalicepagac
- 4:14–7:28 Kristodi depec-baba ngic ewaligac
- 8:1–9:28 Kristole dodothic gboldicnedi dodothic esecne ewaligac
- 10:1–39 Kristole depecti depec esecne ewaligac
- 11:1–12:29 Ngage-ngagesinti sugu bamadicebalu gagac
- 13:1–25 Aibaba madicne nga wenac-madic yowa

### *Madec ye wiyc sasawale Sugucne*

<sup>1</sup> Esecnebenang Wapongti yowaine siduc-mimi ngicfocine yengele micka lowec. Yogo dameng bocayac yefe haicine monic-monicka weduyelewec. Yowa yogo yengi ngambofocnonggeng yenge edocebalu gaibong. <sup>2</sup> Aime yanguctihac dameng moto-motoina gagabelengka, ye yowaine Madecinele micka lome yedi yowa edocnubawec. Himongka nga sawawa ailu honocmengka wiyc sasawa fagac, yogo Wapong Madecinele molewa lome yeholec bafuwboc. Aime mole-damocinele wiyc sasawa yogo Madecinedi banale micnowec. <sup>3</sup> Aime Madec ye yeuctihac Wapongte tapili nga hibi-angoc. Ailu yeke silicginec moniyang aigaic. Aime Madec ye yowaine tapiliineholec ailu yowa yogodi wiyc sasawa himongka nga sawawa ailu honocmengka fayackegac, yogo bafuwayackewec fagac. Ailu ye ngic-ngigac sasawa nongileng bikic suweyackelu bole bamoctolu honocmengka Ngictau tapiliineholec yele foleinapac iwa fewec ngiyegac.

### *Angelo yengele Sugucnengineng*

<sup>4</sup> Madec ye angelo sasawa yengele sugucnengineng. Ailu ye wac sugucnehac mole-damocte alingka bawec, wacine yogodi angelo yengele wac sasawa ewalicebagac. <sup>5</sup> Aime Wapongti angelo monic yanguc mi edocebaawec, “Na yakumac mibe yegengkeme edocgugabac, ga nale Madec nga na gale Mamac.”

*(Mige 2:7)*

Ailu ye angelo monicte ngagelu yanguc mi miwec, “Na yele Mamac, aime yedi nale Madec aidaicte.” *(2Sm 7:14; 1Ngt 17:13)*

<sup>6</sup> Ailu ye molic-molic Madecine himontowa yagowa ganale mengockelu kwesiwec, dameng iwa yanguc miwec,

"Wapongte angelo sasawa yenge ketadi holecnolu afeedabiyeng." (Yef  
32:43)

<sup>7</sup> Ailu angelo yengelebac yanguc miwec,

"Ye angelofocine bole-yowa edocebalu gbelong ingucne salecebame yengi  
dac-ubilang ingucne yowaine balu hikelu ye kwelec kwecnodaingte." (Mige 104:4)

<sup>8</sup> Ailu Madecinele ngagelu yanguc miwec,

"Wapong, gale ngictau bole yogo moto-motoine mikac fafeginowagac. Ailu  
ngictau tapilgonene wacine yogo pasi dondone.

<sup>9</sup> Ga ngic-ngigac yengele gaga dondonnele angacgucaigac. Nga yefe-yowa  
wecaigaing, yogobac kwelegonedi hegilecaigic. Ilec ailu na Wapong-  
gonedi, gale Wapong milu ga bawosaecgugac. Ailu belic-belicte he-  
locti hosogume gale belic-belic yogodi agofogone yengele ewaligac." (Mige 45:6-7)

<sup>10</sup> Ailu Wapong Mamac ye hatacmac Madecinele yanguc miwec,

"Oc, Sugucne, molickelu himongte kwesing loing. Ailu sawawa wiyc  
fayackegac, ga yogo sasawa molegonedi bafuwayackeing.

<sup>11</sup> Yenge miyac aiyackedaingte nga gabac gagidamecte. Yenge sasawadi  
ngakpi ingucne lokeyackelu miyac aidaingte.

<sup>12</sup> Gagi honocmengka wiyc fagaing, yenge ngakpi ingucne weduce-  
badamecte. Ailu ngic-ngigac yengi ngakpi-kpoluc baickelu gbol-  
icne holecaigaing, ga yogo ingucne hac esecne baicebalu gbolicne  
lodamecte. Ailu ga damengsoc silic moniyang ingucne hac gadamecte.  
Aime gale hifa-dameng yogo moto-motoine mikac." (Mige 102:25-27)

<sup>13</sup> Aime Waponti angelo monic yanguc mi edowec,

"Ga folenapec ngiyieengka ngabafogone yenge higegone bageina locebabe  
ngiyedaingte." (Mige 110:1)

<sup>14</sup> Angelo sasawa yenge asu ailu bole balu gagaing. Aime ngic-ngigac bikicte  
ameine bame mole-damocine baningte wangec gagaing, angelo yengi yogo  
yengele kwelec kwenogale Waponti salecebacaigac.

## 2

### *Wapongte yowa lobe mi holenoga*

<sup>1</sup> Ilec ailu yefe lilolu gadabelengtewa, yowa sasawa yogo ngage-motolu  
balu gadabeleng. <sup>2</sup> Mosesle damengka angelodi ye yowa edoibong, yogo  
sanangnehac loicne fawec. Inguc fame Israel ngic-ngigac yenge yowa  
yogo hegileibong ailu mi balaibebong, yenge bikicnginengte silicina ameine  
dondonne baibong. <sup>3-4</sup> Aime Sugucnedi hatacmac bikicte ameine banale  
tapiliine feicnebenang edocebwec. Yedi molickeme yowaine ngageibong,  
yengi yogolec yowa mibasanang ailu edocnubaibong. Aime Wapong yeucti-  
hac yowaine basanangkeme ngagesingkeringte pasidamuineholec nga pasi  
mi ngani-nganiine ailu pasi bibiineholec bawec. Balu angacine balaibelu  
Tili Asule kwele-eiecte tapili nolelu gawec. Ye inguc aiwecte nongileng  
bikicte ameine banale yowa hegiledabelengtewa, wiyc yogolec ameinele  
hangoc nalic mi hikedabelengte.

### *Yesu ye feicnetowanonganngeng*

<sup>5</sup> Himongtowa himong gbolicne fikenale yowaine micaigabeleng, yogo angelo yengele bagewa mi loicne. <sup>6</sup> Aime hibiwa yowa monic yanguc biyachac miwec,

“Gagi himongka ngic-ngigacfocgone gabong ngagesicebacaigic. Aime yenge waweweine gabong sifu madicne damongebacaigic. <sup>7</sup> Dameng bangkacnemac angelo yengele wamicne ainogale gagi loceaengka gaibong. Ailu yenge alang-baba nga wac feicnepholec gagale duu ingucne holeyeleing. <sup>8</sup> Aime Waponti wiycasasawa yele higeinele bagewa loyackewec.” *(Mige 8:4-6)*

Yedi wiycasasawa yogo yele higeinele bagewa bucbuchac lome damongebaibong. Aime yanguctihac wiycac ngani-damongte pasi yogo mi fikeme nganigabeleng. <sup>9</sup> Aime nongileng Yesu nganilu yanguc ngagegabeleng, Waponti pasi bame Yesu ye dameng bangkacnemac angelo yengele wamicne gawec. Game Waponti kwele-madic ainolewecete Yesu ye ngicngigac sasawa nongileng amenonggeng balu doic ngagelu homawec. Ilec ye tapili nga wac feicne ailu alang balu gacaigac. <sup>10</sup> Waponti wiycasasawa bafuwayackewec aime ye yogolec fileine. Ailu ye adu-madecfocene bocyac mengocebame wac feicnepholec ainingte bikicte ameine banale molic-molic ngic doicka lowec. Lome ye yeicne socti doic ngagelu boleine bamoc-tome gagaine bucbuchac madicne aiwec. Yedi inguc aiwecte Wapong adu-madecfocene yenge wac feicne yogowa nalic gadaingte. <sup>11</sup> Yesudi gbagbacne gagale suwe-suwe bole balu gagac. Aime ngic-ngigac gbagbacne gagale suwecebame gagaing, ye nga yengileng gbagbacne ailu aling moniyang gagaing. Ilec ailu ye yeicne kwa-gbafoce minogale mi gameedaicte. <sup>12</sup> Ye yanguc migac,

“Na gale wac sugu ngic hae-gbafoce edocebalu mibe yegengkeyeledaicte. Ailu habu hewacnginang domalu mitenggudacte.” *(Mige 22:22)*

<sup>13</sup> Ailu hatacmac yanguc migac,

“Na yele yowa balaibedacte.” *(Yes 8:17)*

Ailu hatacmac migac,

“Ngagegaing, Waponti adu-madec nelewec, yenge naholec yagowa gagabelleng.” *(Yes 8:18)*

<sup>14</sup> Aime Aleng Sugucnengineng ye homacte tapili bacaigac. Aime Yesudi ye nga homac basowalecepanale homawec. Wapong adu-madecfocene nongileng soc-biucnonggengkolec, aime ye silic ingucnebacnubacaigac. Inguc aiwecte ailu Aleng Sugucnengineng basowalewec. <sup>15</sup> Aime nongileng gaganonggeng bucbuchac homacte hangocnubame muc ingucnebacnubacaigac. Aime ye soc-biuckolec aiwecte ailu nongileng homacte hangoc yoglec muckacni lukecnubawec. <sup>16</sup> Foinacbenang, ye Abraham ngambofocene nongileng baficnubalu gagac. Ye angelo inguc mi baficebacaigac, miyac. <sup>17</sup> Ye bikicte amenonggeng banogale ailu wiycasasawa ngageme gbafoce nongileng silicbenang ailu monic mi lilowec. Ye inguc ailu ngic-ngigac nongileng kwele-sowac aiwec. Ailu bole-yowa balaibelu Wapontge haicka ngic-ngigac nongileng depec-baba ngic yengele damong sugucne aiwec domagac. <sup>18</sup> Ye yeicne lokwesacka felu doic ngagewec. Ilec ye ngic-ngigac lokwesacka fecaigaing, yenge baficebanogale aicaigac.

## 3

*Madecti Moses ewaligac*

<sup>1</sup> Ngic-ngigac Wapongte bingec, ngenge ngic hae-gbafocne, ngenge honocmenge wawacti ngengela inguchac kwesiwec. Ilec ngenge ngagengeneng Yesula lodabiyeng. Yedi hocne salecebaicne nga depecbaba ngic yengele damong sugucne aigac. Aime nongileng yele wac mibeng yegengkeme gagabeleng. <sup>2</sup> Moses ye Wapongte bole-yowa balaibelu Wapongte macka yowaine ngagelu gawec. Aime Wapongti Yesu bole-yowa lacname yedi Mosesle silic ingucne aihu bole-yowa yogo balaibelu gawec. <sup>3</sup> Mac-baba ngicti mac sugucnehab bacaiagac. Ailu yeicne wacti mac wacine ewaligac. Silicine ingucnehab Yesudi Moses ewalime nongileng yele alang bagabeleng. <sup>4</sup> Machbenang sasawa yogo ngicti baicne nga Wapontibac wiycasasawa bafuwayackewec. <sup>5</sup> Moses ye Wapongte macka kwelekwekwe galu Wapongte bole-yowa balaibelu gawec. Inguc gawecte aihu yowa lobewa fikenale miwec, yogo mime yegengkewec. <sup>6</sup> Aime Kristo ye Wapongte Madec galu bole-yowa balaibelu yele mac-damong gagac. Aime nongileng hangoc mikac honocmenge wiycabadabelengte, yogo wiyc feicne inguc ngagelu sanangnehab balu wangec gadabelengtewa, Wapongte mac hocne aigabeleng.

*Ngage-ngagesing mi hegilenoga*

<sup>7</sup> Ilec aihu Tili Asudi yanguc migac,  
“Entacka ngenge yakumac yele yowa ngagegaingka, <sup>8</sup> kwelengineng mi hefedraig. Ngambofocnonggeng yenge molickelu himong kisiwa misaine mikacka yowa kwekwe ainelelu kwesacnuibong, yogo ingucnehab hatacmac mi aidabiyeng. <sup>9</sup> Yenge nani hifa 40le kwelina bole balu gaiba, yogo nganilu na kwesacnulu gaibong. <sup>10</sup> Aime ngicngigac dameng iwa gaibong, yengele aalic ngagelu yanguc miiba, ‘Yenge kwelenginengti damengsoc yefe lilolu gacaigaing aihu nale yefe fagac, yogo balaibeningte mi aiyelecaigac.’ <sup>11</sup> Ilec na aalic ngagelu mipangkelu yanguc miiba, ‘Yenge nale ngiye-ngagec gagawa nalic mi fedaingte.’” (*Mige 95:7-11*)

<sup>12</sup> Ngic hae-gbafocne, ngengelacni monicti kwele ngage-ngageina ngage-  
ngage sowacne ofeme ngage-  
ngagesing hegilelu Wapong gaga fileine lobe holecnodaikale, ngenge ngani-motolu gadabiyeng. <sup>13</sup> Wapongte hibidi “yakumac” inguc migacte ngenge hadengsoc kwelengineng kwefang-nagudabiyeng. Bikicti ngengelacni gocne kwesac aiyeleme kwelengineng hefedraigkale, ngenge inguc aidabiyeng. <sup>14</sup> Nongileng molic-molic momoc galu Kristo sanangnehab ngagesingkelu gaibeng. Aime silicine yogo balu gabeng dameng moto-motoine fikeme sanangnehab domadabelengtewa, Kristoholec wetackelu domadabelengte. <sup>15</sup> Aime hatacmac yowa yanguc miicne fagac,

“Entacka ngenge yakumac yele yowa ngagegaingka, kwelengineng mi hefedraig. Ngambofocnonggeng yenge molickelu yowa kwekwe aineleibong, ingucnehab hatacmac mi aidabiyeng.” (*Mige 95:7-8*)

<sup>16</sup> Ngagegaing, Mosesdi Isip himongkacni ngic-  
ngigac mengocebame hikieibong. Hikelu yenge sasawadi Wapongte yowa ngagelu hegileibong. Ailu aibaba haicne monic-monice aibong. <sup>17</sup> Ailu yenge yowaine kwelu bikic

bafuwaibongte, yedi hifa 40le kwelina ngaba aiyeleme himong kisiwa mis-aine mikacka iwa homayackebong fagaing. <sup>18</sup> Ailu ye ngic-ngigac yele yowa hegileibong, yenge sugu ngiye-ngagecete gagawa mi feningte mipangkewec. <sup>19</sup> Aime yanguc ngani-motogabeleng, yenge mi ngagesingkeibong. Ilec ailu yenge himong miwec, iwa mi fedaingte.

## 4

### *Ngiye-ngagec bafuwanoledaict*

<sup>1</sup> Waponti ngiye-ngagecete gagawa fenangte mipangkewec, yogo fagac. Aime gacgu ngengelacni gocnedi fenogale kpungkedaingkale, ngenge damong balu gadabiyeng. <sup>2</sup> Esecne Yuda ngic-ngigac yenge Siduc Madicne ngagebong yegengkeyelewec, nongileng ingucnehab yogo ngagebeng yegengkenolewec. Aime yenge yogo ngagelu mi ngagesingkeibongte mi baficebawec. <sup>3</sup> Aime ngic-ngigac ngagesingkelu gagabeleng, nongilengtibac ngiye-ngagec gaga yogolec aling aigabeleng. Waponti himong nga sawa yeke bacepame motome, wiycasasawa bamoctoyackelu ngiye-ngagec gaga yogo lowec.

Ye inguc lolu sifu yanguc miwec,

“Ilec na yengele aalic ngagelubac yanguc mipangkeiba, ‘Yenge nale ngiye-  
ngagec gagawa nalic mi fedaingte.’” *(Mige 95:11)*

<sup>4</sup> Hadeng 6 motome hadeng 7te yowa fagac, yogolec yowa monic yanguc kwelengkeicne fagac,

“Hadeng 6 motome Wapong ye boleine sasawa loyackelu 7ka ngiye-  
ngagewec.” *(Fike  
2:2)*

<sup>5</sup> Aime iwahac yowa yogolec nebocina yanguc miwec,

“Yenge nale ngiye-ngagec gagawa nalic mi fedaingte.” *(Mige 95:11)*

<sup>6</sup> Ngic-ngigac gocne yenge ngiye-ngagec gagawa nalic fedaingte. Aime gocne yenge molickelu Siduc Madicne ngagebong yegengkewec, yenge yowa mi balaibeibong. Ilec ngiye-ngagec gagawa mi fedaingte. <sup>7</sup> Ilec ailu dameng dalicnehab aime Waponti hatacmac dameng monic wacine “yakumac” inguc mipangkelu yowa Dawidi lacnome yedi hocne yanguc miwec, “Entacka ngenge yakumac yele yowa ngagegaingka, kwelengneng mi hefedraig.” *(Mige 95:7-8)*

<sup>8</sup> Yosuwadi ngiye-ngagec himongka mengocngebalu fedeckabac, Wapongti lobewa ngiye-ngagec dameng monicte nalic mi midec. <sup>9</sup> Ilec yanguc ngagegabeleng, Wapongte ngic-ngigac yengele hombangte ngiye-ngagec dameng yogo fagachac. <sup>10</sup> Aime Wapongti boleine lolu ngiye-ngagewec, silicine ingucnehab monic ye Wapongte ngiye-ngagecete gagawa felu boleine lolu ngiye-ngagedaict. <sup>11</sup> Aime Mosesle damengka molickelu aling gocne yenge waweibong, nongilangkocni monicti yenge ingucne yowa wewe aidaingkale, nongileng ngiye-ngagec gaga iwa fenangte ngagelu bole sanangnehab balu gadabeleng.

### *Wapongte yowa gagaineholec*

<sup>12</sup> Wapongte yowa yogo gagaineholec ailu boleine damengsoc balu gagac hocne. Yogo hudule fitec sasawa micine neboc nga neboc yogo ewal-icebalu mictetecinebenang aigac. Yogodi wiycasasawa nganime dulungkelu nebocka huke sulumecaigac. Yogo asu nga kwele-ilucnonggeng

heucepalu luwe gbongtoc nga luwe kwelina helocene nganicepacraigac. Ailu kwelenoggang ngage-ngage nga aibaba sangkelu balu gagabeleng, yogo wosaelu noine bame yegengkenolecaigac. <sup>13</sup> Aime Wapongti wiyac sasawa mime fikeyackewec, yogolec wiyac monicti yele haicka sangke-sangke mi fagac. Wiyac sasawa yogo yegenia fikelu yele donge feina fayackegac. Ailu yela hocne gaganonggengte siduc babeng yogo wosaeyackedaite.

### *Yesu ye depec-baba ngic yengele damong sugucne*

<sup>14</sup> Aime depec-baba ngic yengele damong sugucnedi honocmengka fewec gagac, yogo Yesu hocne, Wapongte Madec, ye nongileng. Ye inguc gagacte ngage-ngagesingnonggeng mibeng yegengkecaigac, yogo ngagelu sanangnehabal gadabeleng. <sup>15</sup> Lokwesac fikenolecaigac, silicine inguc-nehab depec-baba ngic yengele damong sugucne ye ingucnehab fikecnoy-ackewec. Ailu ye bikic monic mi bafuwawec. Ilec nongileng tapilinonggeng wame ye ngani-ngagec aiyackelu nongilengte kwele-sowac ngagelu gagac. <sup>16</sup> Ilec nongileng hangoc nga ngageboc mikac galu Wapong emeina hiked-abeleng. Inguc aime babafic damengbenang kwesime yele kwele-sowac bafuwabeng yedi kwele-madicine noleme baficnubadaite.

## 5

<sup>1</sup> Wapongti Israel yengele depec-baba ngic yengele damong sugucne ngickacni bawosaelu mimoctocaigaic. Mimoctome, yedi ngic-ngigac yengele ailu Wapongte haicka domalu boleinbalu kwele-madicte ibu nga bikicte hasoete depec locaigac. <sup>2</sup> Ailu depec-baba ngic ye yeicne tapiliine mikac gacaigac. Ilec ngic-ngigac ngage-ngage-motocngineng mikac yefe liloaigaing, yenge nalic madicne aiyeledaite. <sup>3</sup> Ye tapiliine mikacte ailu yeicne nga ngic-ngigac yengele bikicte hasoete depec momoc bacaigac, yogo ngic-ngigac yengele sugu miyac. <sup>4</sup> Ailu ngic monicti depec-baba ngicte damong sugucnele mac ngyie-ngiye yogo yeicne kweleinele nalic mi badaite. Wapongti Aron wackelu depec-babale damong sugucne boleyowa lacnowec. Silicine ingucnehab Wapongti depec-babale damong sugucne sasawa wacebalu boleyowa yelecaigac. <sup>5</sup> Aime Kristo ye inguchac yeuctihac depec-baba ngic yengele damong sugucne ainogale ailu wactowaine mi bafewec, miyac. Wapongti yele yanguc miwec, “Na yakumac mibe yegengkeme edocgugabac, ga nale Madec, nga na gale Mamac.”

(Mige 2:7)

<sup>6</sup> Ailu monicka yanguc kwelengkeicne fagac, “Gagi Melikisidek yele silic ingucne depec-baba ngic moto-motoine mikac gaginiowagic.”

(Mige 11:4)

<sup>7</sup> Yesu ye himong-sockolec galu yanguc milockewec, “Gagi sugu homack-acni nalic bagboliyecnudamecte. Ilec baficnudamec.” Inguc wacke-wasic aicnolu sugucnehab aukwelu hiyalu milockewec. Ailu ye Wapong alang bacnolu yowaine balaibelu gawecte Wapongti mimilocine ngagewec. <sup>8</sup> Yesu ye Madecinebenang. Ailu ye sifu doic ngagewecte yowaine balaibelu gagale pasi bawec. <sup>9</sup> Ailu ye doic ngagewecte madickewec. Yedi inguc aime ngic-ngigac yenge Yesule yowa ngagelu balaibeibongte ailu Yesudi aiyeleme wasecne ailu gaga moto-motoine mikac gaginiowagaing. <sup>10</sup> Inguc aime Wapongti yele yanguc miwec, “Gagi Melikisidek yele silic ingucne depec-baba ngic yengele damong sugucne gaginiowagic.”

### *Kogoc ingucne mi ganoga*

<sup>11</sup> Melikisidek yele yowa bocyac fanolegac. Aime ngenge yowa ngageningte kwelengineng fongkecaigac. Ilec edocngebali wedungelenogale ngagebeng kpungkegac. <sup>12</sup> Ngenge dameng dalicne biyachac ngagesingkolec galu wewedu bole biyachac babong madickedec. Aime sifu yanguctihac monicti ngengela kwesilu Wapongte yowa funginacnihac hat-acmac edocngebali wedungelenogalesoc aigac. Ngenge nosing sanangne nonolesoc mi aigaing, ngenge amucte suga aingelegac. <sup>13</sup> Aime ngic monic ngage-ngagesingkolec gagac, ye kogoc amuckacni gagaing, yenge ingucne gagac. Ye gaga dondonnele yowa mi ngage-motogac. <sup>14</sup> Nosing sanangne yogo ngic-ngigac biyachac sugulelu sanangkeicne yengele. Aime ngic-ngigac ingucne yenge ngage-ngagengineng dameng dalicne biyachac yeuck-elu aibaba wenidi madicne me sowacne, yogo wosaelu ileckelu gagaing.

## 6

### *Nongileng sugulelu sanangkedabeleng*

<sup>1-2</sup> Ngenge molickelu Kristole yowa fungke-fungkeine yanguc wedun-geleibeng, kwele-hefaliye ailu homacte aibaba hegilenoga ailu Wapong ngagesingkenoga. Ailu misa-lowacte wewedu haicine monic-monic, nga moledi ngic feina lolole bole. Ailu homackacni gboliyelu fangke-fangke nga dac-sanangka doic moto-motoine mikac ngagenoga. Yowa fungke-fungkeine yogo hatacmac mi minoga. Yowa yogo macte bosing ingucne hatacmac wickebeng haume yogo mi madickedaiete. Yogolec feina gbolicne kpatulelu minoga. <sup>3</sup> Ilec Wapongti ngageme nalic aidaictewa, inguc aidabengle.

<sup>4</sup> I yangucte, ngic-ngigac gocne yenge angoc biyachac yeleicne. Aime honocmenge kwele-madicte nosing nganilu Tili Asuholec biyachac aibong. <sup>5</sup> Ailu yenge Wapongte yowa esoickebong angacine aiyemewa lobewa Wapongte tapili fikedaictte, dameng yogo inguchac nganiiibong. <sup>6</sup> Aime ngic-ngigac yogo nganilu wawelu lobe holedaingtewa, yenge hatacmac kwele-hefaliyekte nalic mi bacebadaictte. Yacobac yenge Wapongte Madec yegena misulec aicnolu malicpongka hatacmac wecaigaing.

<sup>7</sup> Himong monicka macti dameng bocyac kweme bolewa misa fikeme ngic-ngigac yenge iwa nosing duwebong noine fikeyeleme yanguc midaingte, himong yogowa Wapongte liwe fagac. <sup>8</sup> Aime himong monicka muc somangineholec nga tembang-haseng fikedaictewa, himong yogo boleine mikac aime hole-duwec mi ainoga. Aime dameng bangkaleme dacti lobeme miyac aidaicte.

### *Ngenge mole-damocngineng badabiyeng*

<sup>9</sup> Agofocne kwelenedi ngengele angac ngagegabac, ngenge ngic-ngigac ingucnedi wasecne aigaing, wiyc madicneholec aigaing, yogo hocne ngagepangkelu gagabeleng. Inguc ngagepangkelu sifu ung-yowa migabeleng. <sup>10</sup> Wapongti yefe dononna yowa nga aibabangineng wosaedaictte. Ngenge bole bacaigaing ailu kweledi yele wacte angacngebacaigac, ye yogo nalic mi ngigeckedaictte. Ailu ngic-ngigac Wapongte bingec yogo ngengi ngani-bafic aiyeleibong. Ailu taockelu aiyelelu gagainghac, ye yogo ingucnehal nalic mi ngigeckedaictte. <sup>11</sup> Aime ngenge ngageboc mikac galu wiyc fikengelenale ngagesingkelu wangec gagaing. Ailu ngenge yogo

filesoc filesoc banogale mamang hidulu bole balu gabong dameng moto-motoine kwesidaicte. Ngenge inguc ganingte ainolegac. <sup>12</sup>Ilec ngenge oyong mi gadabiyeng. Ngic-ngigac ngage-ngagesing sanangnehad tatakic mikac balu gacaigaing, yenge mole-damocngineng Wapongti molickelu baningte mipangkewec, yogo badaingte. Ngenge inguc ailu yengele silic ingucnehad balaibedabieng.

### Noine fikedaicte

<sup>13</sup> Wapongti mipangkelu Abraham wiyc wacine wackeme inguc milu mi-pangkewec,

<sup>14</sup> “Foinacbenang, na mimi-madic milu edocgudacte, aime fikesawecgone sawedaicte.” (Fike 22:16-17)

<sup>15</sup> Aime Abraham ye dameng dalicnehad wangec gawec. Ailu kweleinele tapili mi wame galu Wapongti wiya lacnonale mipangkewec, yogolec noine fikeme nganiwec.

<sup>16</sup> Aime ngic-ngigac yenge yowangineng mibong sanangkenale sugucnengineng wackelu yowangineng mibong sanangkecaigac. Yenge inguc aidaingtewa, yowa mife-miwa aibabangineng yogo motoyackedaicte.

<sup>17</sup> Aime Wapongti inguchac yowaine mipangkeme sanangkewec. Ailu Abraham ngambofocene yengela yowaine monic-mi monic-mi mi aiwec. Yenge yogo ngagelu dodoxic tapiliine momochac ngage-motoyackeningte inguc miwec. <sup>18</sup> Ye inguc milu yowa sanangnehad yaekang bafuwolanolewec. Wapong ye yowaine kwesac nalic mi aidaicte. Aime yowa yaekang yogo mimipang nga yeicne wacine wackeme inguc fawec.\* Aibabaine ingucne ngagebeng yogodi umacnehad basanangnubame himongte wiyc nalic hegilelu mimipang lobewa banangte miwec, yogo sanangnehad balu wangec gagabeleng. <sup>19</sup> Aime Wapongti mimipang banangte edocnubawec, yowa yogodi kwelenonggengte angga ingucne aigac. Mimipang yogodi ye mac gbagbacne iwa felu kpoluctowa luluwackelu kweline gbagbacnebenang iwa sanangnehad fagac. <sup>20</sup> Aime Yesu ye nongileng ailu yogolec kwelina molickenolelu fewec. Ye Melikisidek yele silic ingucne depec-baba ngic yengele damong sugucne moto-motoine mikac gaginiwagac.

## 7

### Melikisidek yele fungine

<sup>1</sup> Melikisidek ye Salem taonte ngictau. Ailu Wapong feicnetowa yele depec-baba ngic gawec. Aime Abraham ye ngictau gocne yengeholec wenagulu wehomacebawecakni hefaliyelu kwesime, yedi Abraham yefewa bafuwalu mimi-madic milu edowec. <sup>2</sup> Edome Abrahamti woc-wiyacine sasawa huduwalu bawec, iwacni 10kacni moniyang heuckelu Melikisidek lacnowec. Aime Melikisidek yele wacinele fungine yogo yanguc, “Gaga dondonnele ngictau.” Ailu hatacmac “Salem taonte ngictau” yogolec fungine “kwele-mogungte ngictau.” <sup>3</sup> Ailu ye nenggac-mamac nga ngesangambofocene yengele wac-alingsgineng monic mi kwelengkeicne fagac. Nga ye fike-fike damengngine mikac ailu ye homac damengngine mikachac,

\* **6:14:** Fike 12:1-3; 13:14-18; 15:1-21; 17:1-27; 18:1-15; 22:1-18      **6:18:** Fike-fike 12:7; 13:15; 15:1-21, iwa Wapongti Abrahamkolec yowa milu hefewec. Ailu Fike-fike 22:16-17 iwa ye yowaine mipangkewec. Ilec yowa sanangnehad yaekang kwelengkeicne fagac.      **6:18:** Him 23:19      **6:19:** Dep 16:2-3      **7:1:** Fike 14:17-20

ye Wapongte Madecte silic ingucne hac ailu depec-baba ngic damengsoc gaginowagac.

<sup>4</sup> Aime ngambononggeng Abraham ye yeicne wiycine huduwasni bawec, yogo 10kacni heuckelu moniyang lacnowec. Ilec ngenge nganimotodabiyyeng, Melikisidek ye ngic feicnetowa. <sup>5</sup> Aime Liwai nga ngic haegbafocine yenge Abraham ngambofocine. Liwai ngambofocine yenge fikesawec ailu depec-babale bole balu ganingte Wapongte ung-yowa baibong. I yangucte, Liwai ngambofocine yenge 10kacni moniyang yogo Liwai haegbafocine yengele ngambofocineng yengelacni bakpaduc aidabiyyeng, yefe-yowadi inguc migac. Aime ngic-ngigac yogo yenge Abraham ngambofocine. Ailu sac-tofaocngineng galu sifu yengelacni 10kacni moniyang balu gaibong. <sup>6</sup> Aime Melikisidek ye yengele alingkacni mi fikewec, miyac. Ailu ye sifu Abrahamtacni 10kacni moniyang balu mimi-madic milu edowec. Abrahamti hocne Wapongte mimipang balu gawec. <sup>7</sup> Aime ngic mimi-madic milu edowec, yedi mimi-madic bawec, ye ewaligac. Monicti yowa yogo kewesac mi midaicte.

<sup>8</sup> Ailu monic yanguc, depec-baba ngic homacte bagewa gagaing, yenge 10kacni moniyang kpaduckelu balu gaibong. Nga Abrahamtibac 10kacni moniyang yogo Melikisidek lacname bawec, yedibac gagachac hocne, inguc yegengkegac. <sup>9-10</sup> Aime yowa yanguc nalic midabelengte, Melikisidek ye Abrahamti yefewa wiycac lacnowec, dameng iwa Liwai ye ngamboinele kwelewa biyachac ngiyewec. Liwai ngambofocine yenge 10kacni moniyang babale ngic, aime Abrahamti 10kacni moniyang yogo biyachac balu Melikisidek lacnowec, yogo Liwai ngambofocine yengungtihic lacnoibong ingucne aigac.

### *Depec-baba ngic noine*

<sup>11</sup> Aime Israel ngic-ngigac yenge yefe-yowa baibong, iwa yanguc fawec, Liwaile aling yenge depec-babale bole badabiyeng. Aime yenge depec-babale bole babong wiycac sasawa madickedecka, Wapongti depec-baba ngic gbolicne monic hatacmac fikenale monic mi midec. Aime yanguc fikedaic, depec-baba ngic gbolicne Melikisidek gawec, silicine ingucne hac fikedaic. Ailu ye Liwai ngamboine Aronte alingkacni fikeibong ingucne miyac. <sup>12</sup> Aime depec-babale bole aling gbolicne fikedaictewa, yefe-yowa gbolicne inguchac fikedaic, yefe monic mi fagac. <sup>13-14</sup> Sugucnenonggeng ye Yudale fikesaweckacni fikewec, yogo ngagegabeleng. Aime Yudale aling, yengelacni monicti depec-baba ngic ainale, Mosesdi monic mi miwec, miyac. Aime Yudale fikesaweckacni monicti alata mi ngani-damong ailu gawec.

### *Melikisidek yele silic*

<sup>15</sup> Aime Sugucnenonggeng ye Yudale fikesaweckacni fikelu gawec. Aime Melikisidek ye depec-baba ngic gawec, silicine ingucne hac ye depec-baba ngic aiwec. Yogodi hatacmac mime yegengkegac, Liwaile aling yengele depec-babale bole yogo andoine miyac. <sup>16</sup> Depec-baba ngic ye sac aling moniyangte kwelina balaibelu fikedaic, yefe-yowadi yogo migac. Aime Sugucnenonggeng ye gaga moto-motoine mikac yogolec tapiliwa depec-baba ngic aiwec. <sup>17</sup> Yele ngagelu yowa yanguc mime yegengkeicne fagac, "Gagi Melikisidek yele silic ingucne depec-baba ngic moto-motoine mikac gaginowagic."

(Mige 11:4)

**18** Ung-yowa tapiliine waicne nga babafigine mikac yogo molickelu kwesi-wec. Ailu yowa yogodi pasi molickelu bawec, yogo baickeme moc fawec. **19** Yefe-yowadi baba-madic bole bucbuchac madicne monic mi bawec, miyac. Aime Wapongti yanguctihac yefe madicne monic bafuwanolewec, yogodi molickelu yefe fawec, yogo ewaligac. Aime nongileng yefe yogo balaibelu Wapongte emewa hikelu gadabelengte.

**20** Wapong ye yowaine basanangkelu Yesudi depec-baba ngic ainale mi-pangkewec. **21** Depec-baba ngic Liwaile alingkacni yengele baba-sanang yowa ingucne monic mi fawec. Ye yogo Yesu micronlu yanguc edowec, "Sugucne ye yowaine basanangkelu yanguc miwec, 'Ga depec-baba ngic moto-motoine mikac gaginowagic.' Ye yowaine inguc mime sanangkewec, yogo nalic mi hegiledaichte." *(Mige 11:4)*

**22** Wapongti Yesule inguc mime sanangkewec. Ilec ailu Yesudi dodosic gblincne yoglec nenggac ngiyegac. Inguc ngiyeme dodosic gblincnedi esecnele tapili ewaligac.

**23** Depec-baba ngic Liwaile alingkacni yenge ngic bocyac. Aime homacaigaingtii bole yogo balu ganingte homacti depec-babale bole yoglec aka aiwec. Ilec ailu monic homame monicti depec-babale bole yogo taockeme taoc balu gaibong. Ailu yakumac bacraiging. **24** Aime Yesudibac moto-motoine mikac gaginowagac. Ilec depec-babale bole yeholec moto-motoine mikac ailu faginowagac. **25** Ye gaga-sanang galu Wapongkolec mingagec ailu baficnubame ganogale ngic-ngigac yela yefe Wapongta hikedabelengte. Nongileng sasawa bikicte ameine banale nalic mi kpungkedaichte.

**26** Aime depec-baba ngic yengele damong sugucne yedi hocne nalic baficnubadaichte. Ye gbagbacne nga bikicine mikac, ailu wonong mikac. Wapongti ye ngic bikic-baba yengele hewackacni baickeme ye wiyac sawawa fagac, yogo ewalicebalu wileng gagac. **27** Aime depec-baba ngic yengele damong sugucne Liwaile alingkacni yenge hadengsoc yengileng bikicte depec lolubac ngic-ngigac yengele bikicte lobe lolu gaibong. Aime Yesudibac aibaba yoglec bagewa mi gawec, miyac. Yebac depec milu yeicne lonaguwec. Ailu ye yogo dameng moniyang sugu bame motowec. **28** Foinac, Wapongte yefe-yowadi ngic tapilingineng waicne bole-yowale wacebalu gagac. Ailu depec-baba ngic yengele damong sugucne ailu gacaigaing. Aime yowa sanangne fikewec, yogodi Madec bole-yowa micronme ye mac ngiye-ngiyeine balu tapili-wawa mikac nga madicne moto-motoine mikac safeginowagac iwa gagac.

## 8

### *Depec-baba ngic yengele damong sugucne bole balu gagac*

**1** Ilec ailu yanguc fagac, depec-baba ngic yengele damong sugucne honocmenge Ngictau ngiye-ngiye, yoglec foleinapac mac ngiye-ngiyeine balu ngiyegac, ye nongileng. **2** Ailu ye mac gbagbacne, yogo kpoluc-fale\* noine honocmengka domagac, iwa bole balu gagac. Kpoluc-fale yogo ngicti mi baicne, miyac. Sugucne yeuctihac yogo balu lowec.

**3** Wapongti depec-baba ngic yengele damong sugucne yenge bole-yowale wacebame kwele-madicte ibu nga bikicte hasoete depec locaigaing. Ilec

**7:19:** Hib 9:9    **7:21:** Hib 5:6    **7:22:** Hib 8:6; 12:24    **7:25:** Rom 8:34    **7:27:** Hib

5:3 \* **8:2:** Esecne himongka Mosesdi kpoluc-fale bafangkewec. Yoglec lobeina Solomonti Ibu-mac bame kpoluc-fale mi aiwec.

ailu Yesu Kristodi inguchac depec monic lodaicte. <sup>4</sup> Depec-baba ngic yenge Wapongte yefe-yowa balaibelu Wapong ibu lacnoningte bole yogo biyachac balu gaibong. Ilec ye himong yagowa gadecka depec-baba ngic nalic mi aidec. <sup>5</sup> Mosesdi kpoluc-fale balu bafangkenogale aime, Wapongti sawang-yowa yanguc milu edowec,

“Na tikiwa sosocene edaligguiba, ga silicine yogobenang balaibelu wiyan-sasawa banogale ngani-motolu badamec.” (Wah 25:40)

Aime ngic yakumac mac gbagnbacna afeelu kwelec kwecaigaing, yenge Moses ingucne ailu honocmenge sosocene balaibelu kwelec kwecaigaing.

### *Dodofic gblolicne*

<sup>6</sup> Yesu ye dodofic gblolicnele ngic hewacine, dodofic yogo yowa mipangke-icne tapiliineholec balu gagac. I yangucte, dodofic gblolicnedi dodofic esecne ewaligac. Ailu yele depec-babale bole, yogodi himongte depec-babale bole inguchac ewalidaicte. <sup>7</sup> Dodofic esecne umacine mikac aidecka midec, dodofic gblolicne monicti yele mac nalic mi badec. <sup>8</sup> Aime Sugucne Wapongti ngic-ngigacfocine nganicebamé bikicnginengkolec aiibongte ailu yanguc miwec,

“Ngagegaing, gacgu dameng monic kwesidaicte, iwa na Israel nga Yuda ngic-ngigac yengeholec dodofic gblolicne monic badacte. <sup>9</sup> Dodofic yogo molickelu ngambofofngineng yengeholec baiba, ingucnehad miyac. Dameng iwa nani molenginang balu Isip himongkacni mengocebalu kwesiiba. Yenge dodofic baiba, yogo hegilelu gaibongte nani inguchac yenge hegilecebalu lobe holeyeleiba.”

Ye hatacmac inguc taockelu miwec,

<sup>10</sup> “Na lobewa dodofic gblolicne Israel ngic-ngigac yengeholec badacte, yogo-olec silicine yanguc. Yefe-yowane yogo ngic-ngigac yengele ngage-nga-gewa lolu hibine yogo kwelenginangbenang kwelengkedacte. Ailu nani Wapongngineng gabe yenge ngic-ngigacfocne gadaingte.

<sup>11</sup> Aime dameng iwa ngic-ngigac kpisicnacni ofecgu sugucna motodaicte, yenge sasawadi ngagecnudaingte. Ilec ailu monicti agoine me ngic hae-gbaine monic ‘ga Sugucne ngagesinong’ inguc mi edolu weducnodaicte. <sup>12</sup> Na kwele-sowac aiyeladacte. Aime yenge aibaba sowacne nga bikic bafuwagaing, yogo sasawa hegilelu hatacmac mi ngagesidacte.” (Yer 31:31-34)

<sup>13</sup> Ye dodofic gblolicne monicte miwec, iwa dodofic molickelu bawec, yogo esecne aigac, inguc mime yegengkewec. Aime wiyan ngic biyachac hegile-icne yogo esecne aigac, yogo dameng kpisicnemac falu miyac aidaicte.

## 9

### *Kpoluc-fale kweline*

<sup>1</sup> Dodofic molickelu kwesiwe, yogolec afec-afec yowaine nga yefe-yowaine fawec. Aime kpoluc-fale gbagnbacne himongka yawa fawechac.

<sup>2</sup> Aime kpoluc-fale kweline molic-molic fawec, yogolec wacine Kweline Gbagbacne. Aime kweline molic-molic iwa hifa higeineholec domalu gawec. Ailu tebo monic domawecka bret Wapongte bingec feina loicne ngiyelu gawec. <sup>3</sup> Aime kpoluc monic hewacina domawec, nebocina kweline monic fawec, kweline yogo wacine Gbagbacnebenang. <sup>4</sup> Iwa hasoc hoine madicne

lobe-lolele alata goldi baicne nga dodoficte katapa domaiboc. Dodoficte katapa yogo goldi lolu bakatackeicne. Ailu yogolec kwelina hebec goldi baicne mana nosingkolec lobong ngiyelu gawec. Aronte yasu gidecine weicne nga dodoficte posa-tafe iwa inguchac lobong ngiyelu gawec. <sup>5</sup> Katapa yogolec feina angelo ilucine ingucne wiyac monic yeke Wapongte tapili nga hibiangoc edaliboc. Ailu kwenggelengnginecti tapaina hedickelu someckelu domalu gaiboc. Wapongti iwa hocne bikicnginengte ameine hegilelu gawec. Aime kpoluc-fale nga wiyac sasawa kwelina fagac yogolec yakumac yowa homacne yanguctihac mi midacte.

<sup>6</sup> Yenge kpoluc-fale ngani-nganiine inguc balu gabong depec-baba ngic yenge mac kweline molic-molic iwa felu afeelu kwelec kwecnolu gaibong. <sup>7</sup> Aime depec-baba ngic yengele damong sugucne yedi sugu mac kweline monic iwa hifasoc alecine moniyang sugu felu gawec. Ailu ye moc mi felu gawec, miyac. Ye damengsoc sac balu felu yeicne bikic nga ngic-ngigac yenge bikic fungine mi ngagelu moc kosa balu gaibong. Yogolec ailu ibu lonogale bafelu gaibong. <sup>8</sup> Aime dameng iwa Tili Asudi yanguc edalic-nubagac. Kpoluc-falele aibabaine faemewa Kweline Gbagbacnebenang iwa ngic-ngigac yengi feningte yefeine monic mi fikelu yegengkedaite. <sup>9</sup> Ngic-ngigac yanguctihac afeelu kwelec kwekwe gagaing, yenge yogolec sosocene ingucne aigac. Yenge Wapongte kwele-madicte ibu nga bikicte hasoete depec bafelu locaigaing. Aime yogodi yengele kwele ngage-ngagengineng sasawa bucbuchac nalic mi suweyeledaite. <sup>10</sup> Aime bole yogo nosing misa nolu nga suwe-suwele aibaba haicine monic-monik yogo socte bole sugu bacaigaing. Wapongti yefe-yowa yogo yeleme, yenge yogo balaibelu gacgubung gaga gbolicne monicte dameng kwesiwec.

### *Kristo ye depec-baba ngic yengele damong sugucne*

<sup>11</sup> Aime Kristo ye biyachac kwesilu wiyac sasawa madicne yawa fagac, yogolec depec-baba ngic yengele damong sugucne aiwec. Inguc ailu kpoluc-fale monic madicnebenang moledi mi baicne ailu himongkacni wiyac monicti mi baicnedi domawec. Yogo sugucne nga madicne ailu esecne ewalibenangkegac. <sup>12</sup> Kristo ye noning ngicne me bulumaka madecinele sac balu mi fewec, miyac. Ye yeicne sancti dameng moniyang sugu ibu balu Kweline Gbagbacnebenang, iwa fewec. Felu yeicne sancti fulinonggeng bawec, sac yogodi fafa-sanang faginowagac. <sup>13</sup> Ngic-ngigac yenge Wapongte haicka wonongkolec aibong depec-baba ngic yengi noning me bulumaka ngicne yengele sac nga bulumaka ngigacne madec mi baicne dacti lobecebame defe ailu gaibong. Aime sac nga defe yogo balu ngic-ngigac wonongnginengkolec yengele feinginang wickebong kpaluwacebalu gawec. Kpaluwacebame motome ngic-ngigac yenge Wapongte haicka sockapec gbagbacne ailu gaibong. Ilec ailu yanguc ngagedaing, <sup>14</sup> Kristo ye gaga-sanangte Tili Asuholec domalu yeicne dondonne ailu gagaine depec ingucne Wapongta loyackewec. Yele sancti bulumaka nga sic sacngineng sasawa ewaligac. Yogodi kwele ngage-ngagenonggeng suweyackeme homacte aibabanonggeng sowacne miyac aime Wapong gagaineholec afeelu kwelec kwecnodabelengte.

<sup>15</sup> Kristo yeicne gagaine loyackelu homalu fulinonggeng balu dodofic esecne yogo bagewacni baicnubawec. Baicnubame nongileng dodofic esecne yogolec yefe-yowa hegileibeng. Kristo ye dodofic gbolicne ngic

9:4: Wah 16:33; 25:10-16; 30:1-6; Him 17:8-11; Yef 10:3-5    9:5: Wah 25:18-22    9:6: Him 18:2-6

9:7: Dep 16:2-34    9:9: Hib 10:1-2    9:13: Dep 16:15-16; Hib 10:4; Him 19:9,17-19    9:14: 1Pi

nga Wapong nongileng ngic hewacnonggeng aiwec. Wapongti mipangkeme ngic-ngigac wacnubalu gagac, nongileng gaga-sanangte mole-damoc yogo banangte Kristodi inguc aiwec. <sup>16</sup> Mole-damocte hibi monic fadaictewa, yanguc ainoga, fileine ye homame yogo mibong yegengkedaicte. <sup>17</sup> Fileine ye gbloncne gaemewa mole-damocte hibi kwelengkeicne yogo moc fadaicte. Nga fileinedi homadaictewabac, mole-damocte hibi yogo sanangkedaicte.

<sup>18</sup> Ilec ailu dodoftic esecne yogo sacti basanangkewec. <sup>19</sup> Aime Mosesdi ung-yowa yefe-yowawa fagac, yogo sasawa ngic-ngigac milu edocebamé motome, bulumaka madecine nga noning ngicne sacngineng balu misaholec lalickewec. Lalickelu lama dowecine sasacne hisop yoc hekengineholec\* balu sacka kpomuluckewec. Kpomuluckelu yogodi hibi kpadidiweicne ailu ngic-ngigac sasawa feinginang wickeme kpaluwacebalu gawec. <sup>20</sup> Kpaluwacebame yanguc edocebawec,

"Sac yago dodoftic sac. Ailu ngenge dodoftic kwelina ganingte Wapongti ung-yowa edocngebawec." <sup>(Wah 24:8)</sup>

<sup>21</sup> Aime Moses ye kpoluc-fale feina nga kwelina ailu hasocte depec lolole wiyc haicine monic-monie ngiyewec, yogo inguchac sacti sotiyeme sasawa lowacebayackewec. <sup>22</sup> Inguc aime yefe-yowale aibabawa sacti wiyc bame gbagbacne aidaicte. Nga sac monic mi wadaictewa, bikic hegile-hegile monic mi fikedaicte.

### *Kristo ye depec noine*

<sup>23</sup> Himongka kpoluc-falewa wiyc fagac, yogodi mac gbagbacne honocmengka fagac, yoglec sosocene aigac. Aime yogodi Wapongte haicka gbagbacne ainogale depekte sacti suwelu gaibong. Aime wiyc noine honocmengka fagac, yogo gbagbacne ainale depekte sac madicne nga feicnebenangti fagac. <sup>24</sup> Kristo ye kpoluc-fale gbagbacne moledi baicne ailu wiyc noine fagac yoglec sosocene aigac, mac iwa mi fewec, miyac. Yedi nongilengte ailu Wapongte haicka domanale honocmeng noina fewec. <sup>25</sup> Aime depec-baba ngic yengele damong sugucne ye hifasoc sic sacine balu Kweline Gbagbacnebenang, iwa felu gawec. Aime ye ailu gawec, Kristo ye yogo ingucne hac mi aiwec. Ye dameng bocyac depec banagulu fenogale mi fewec.

<sup>26</sup> Kristodi inguc ganogale midecka, ye himong nga sawawa wiyc sasawa molickelu fikeibockacnihaç dameng bocyac sacine wame doic ngagedec. Ailu ye inguc mi aiwec, miyac. Ye dameng motonogale aiyemewa himongtowa yagowa dameng moniyang sugu fikewec. Fikelu ngic-ngigac bikicnonggeng baickenale Wapongta yeicne socine mimoctolu lome depekte boleine bayackewec. <sup>27</sup> Aime ngic-ngigac sasawa dameng moniyang sugu homanangte miwec. Ailu lobewa gacgu yowawa domadabelengte. <sup>28</sup> Yogo ingucne hac Kristodi dameng moniyang sugu ngic-ngigac sasawa nongileng bikicte ameine banogale ailu depecnonggeng aiwec. Ailu lobewa kwesidaicte, iwa bikicte ame banale mi kwesidaicte. Dameng iwa ngicngigac Kristole wangec gagaing, yengela fikeme wasecne aidaingte.

## 10

### *Tapiliine faginowagac*

---

\* **9:19:** Hisop yogo yoc monic hekengngine sanangnedi lucmefiyangkolec. Hisop yogo sifecka yoc hekengngina fagac. **9:21:** Dep 8:15,19    **9:22:** Dep 17:11    **9:23:** Hib 8:5; 10:1    **9:26:** Hib 10:10

<sup>1</sup> Wiyac madicne lobewa kwsidaicte, Wapongte yefe-yowa yogo wiyc yoglec sosocene aigac, yogodi wiyc noine mi aigac. Inguc aime ngic yenge hifane hifane Wapong afeelu kwelec kweningte yele emewa kwsilu depecngineng silicine moniyang sugu lolu gaibong. Aime yogodi yefe-yowale tapiliwa yenge sasawa nalic mi bamadicebadaicte. <sup>2</sup> Yefe-yowadi yenge sasawa bamadicebadecka midec, yengele depec lolo yogo biyachac miyac aidecka. Ailu bikicngineng biyachac miyac aime yenge kwele ngagenggining gbagbacne galu bikicnginengte umacte ailu hatacmac mi gameebadec. <sup>3-4</sup> I yangucte, bulumaka ngicne nga noning ngicnele sacti bikic baic-baictesoc mi aigac, miyachenang. Yoglec ailu depekte hasoc hole-holele aibaba yogodi hifasoc bikicngineng hole-gboliyeme ngagesilu gaibong.

<sup>5</sup> Ilec ailu Kristodi himongka walu yoglec ngagesilu Wapong yanguc edowec,

“Ga kwele-madicte ibu nga bikicte depec haicine monic-monie, yoglec mi aigelelu gawec. Gabac himong-soc monic bamockelu noleing. <sup>6</sup> Aime ngic-ngigac yenge lama-bulumaka bucbuchac bikicnginengte depec balu dacka lobong lobecaigac, depec yogo yekele mi angacgudaicte.

<sup>7</sup> Inguc aime yanguc miiba, ‘Wapong, ngagegic, na gale angac balaibenogale kwsiiiba ailu hibi kpadiidiweicnele kwelina nale ababale kwelengkeicne fagac.’” (*Mige 40:6-8*)

<sup>8</sup> Hasocte depec sasawa yogo Wapongte yefe-yowa balaibelu locaigaing. Aime Sugucnedibac yowa yanguc miwec, “Kwele-madicte ibu nga bikicte depec haicine monic-monie nga lama-bulumaka bucbuchac bikicnginengte ailu dacka lobecaigac, yoglec mi aigeledaicte. Ailu yoglec mi angacgudaicte.” <sup>9</sup> Inguc milu yanguc miwec, “Ngagegic, na gale angac balaibenogale kwsiiiba.” Inguc milu yedi yefe gblolicne basanangkenogale yefe esecne yogo baickeme moc fawec. <sup>10</sup> Yesu Kristodi nongilengte ngagelu angac yogo balaibelu socine bahikelu dameng moniyang sugu depec lome yefe iwa gbagbacne aibeng gagabeleng. <sup>11</sup> Depec-baba ngic yenge hadengsoc domalu depec-babale bolengineng bacaigaing. Ailu yenge depekte silicine yogohac damengsoc damengsoc bacaigaing, yogodi ngic-ngigac bikicngineng baic-baictesoc mi aigac. <sup>12</sup> Aime depec-baba ngicnonggeng Kristodi bikic baickenale depec moniyang sugu tapiliine moto-motoine mikac, yogo Wapongte foleinapec lome ngiyegac. <sup>13</sup> Aime Waponti ngabafocine yele higeinele bagewa locebadacte, ye yoglec wangec ngiyegac. <sup>14</sup> Yedi depec moniyang sugu lome ngic-ngigac sasawa bamadicebame yenge gaga gbagbacne moto-motoine mikac bame gaginowagaing.

<sup>15</sup> Aime Tili Asudi inguchac mibasanang ailu yanguc edocnubawec,

<sup>16</sup> “Sugucnedi yanguc migac, ‘Na lobewa dodoxic gblolicne ngic-ngigacfocne yengeholec badacte, yoglec silicine yanguc. Yefe-yowane yogo ngic-ngigac yengele ngage-ngagewa lolu, hibine yogo kwelenginangbeneng yego sasawa hegiledacte. Ailu hatacmac mi ngagesidacte.’” (*Yer 31:33-34*)

<sup>18</sup> Aime Sugucnedi bikicnonggeng hegileme miyac aiwecte, bikic baic-baictes depekte bole yogo hatacmac mi banoga.

### *Ngage-ngagesingkolec nalic fenoga*

**19-20** Ngic hae-gbafofnonggeng, Yesu yeicne sacte tapiliwa nongileng hangoc mikac galu kpoluc nu falockelu Kwelne Gbagbacnebenang iwa nalic fedabelengte. Yedi yefe gbolicne nga gagaineholec laliyenolewec. Ilec ailu kpoluc nuwa yefe hikegabeleng, yogo yeicne socti yefe yogo hocne nolewec. **21** Depec-baba ngic feicnetowanginengti Wapong golowacfocene damongnubalu gagac. **22** Aime nongileng molickelu kwele ngagengagenonggeng gameineholec ailu mi madickecaigac. Aime yedi yogo wickeme kpaluwacnubame gbagbacne fagac. Aime socnonggeng misa gbagbacnedeni suweme gbagbacne aibeng. Ilec ailu nongileng kwelenonggeng noine yogodi gaganonggeng wosae-benangkeme ye bucbuchac ngagesingkelu Wapongte emewa hikedabeleng. **23** Sugucne mole-damoc nolenale yowa mipangkewec, ye yowaine yogo balaibedaict. Aime yogo nongilang fikenale wangec galu mibeng yegengkegac, yogo sanangne balu gadabeleng. **24** Aime kwele-angac nga aibaba madicne ainangte nongileng ngani-damong aiyelelu basanangebalu gadabeleng. **25** Ngic-ngigac gocne yenge kpaduck-eningte hegilecaigaing, yogo mi aidaing. Damengtowa bangkalegac, ngenge yogo biyac ngagegaingte basanangebalu gadabeleng.

### *Sugucne hegiledaingkale damongnagudabiyyeng*

**26** Nongileng yowa noinele ngage-ngage balu ngage-motolubac bikicte aibaba hatacmac angacnubame balu gadabelengte, me? Entacka inguc aidabelengtewa, nongileng bikicte ailu depec monic hatacmac nalic mi lodaict. **27** Umactowanonggeng hangocineholec yogo Wapongte ngabale wowosae damengka dactowa monicti lobelu basowalenale wangec-nonggeng fagac.

**28** Monicti Wapongte yefe-yowa Mosesdi kwelengkewec, yogo weme, ngic yaekang me habackang yenge yogo nganilu yowawa lobong, ye kwelesowac mikac wehomalu gaibong. **29** Aime dodoficte sacti ngic monic biyachac suweme gbagbacne aiwec, ye lobewa sac yogo ngageme wiyc omane aiwec. Aime Wapongte Madecte feiwa nolac edelu kwele-madicte Asu misowaledaicte, yela ameine efecne mi fikecnodaict, yogo ngagegaing.

**30** Aime

“Sowacnele ameine badu-badu, yogo nale bole. Aime na ngic-ngigac bikicnginen te ameine baduyeledacte.” *(Yef 32:35)*

Sugucnedi yowa inguc miwec, yogo ngagegabeleng. Ailu ye hatacmac yanguc miwec,

“Sugucnedi ngic-ngigacfocene wosaecebalu yowangineng midaict.” *(Yef 32:36; Mige 135:14)*

**31** Wapong gagaineholecte molewa fenoga, yogo hangocineholec nga umacineholecbenang.

### *Sanangkelu gadabeleng*

**32** Ngenge molickelu Yesule angoc baibong, dameng iwa Siduc Madicnele ailu boletowa balu doic ngageibong, yogo mi ngigecngebadaic. **33** Ailu ngic yengi dameng gocna ngic-ngigac yengele haicka locngebalu midelec nga yowa gameineholec ailu weyebic aingeleibong. Aime dameng gocna ngaba yengi ngengele agofocngineng inguc aiyelebong, ngengi ago aiyelelu yengeholec domaibong. **34** Ngenge muc-macka ngic yengeholec momochac doic

ngageibong. Aime ngic yengi gocne ngengelacni muc-macka locebaibong. Ailu ngaba gocne yengi ngengelacni moneng-mafanganeng hise baibong. Inguc aibong ngenge belyelu yanguc ngageibong, moneng-mafanonggeng faginowagac yogodi himontowa yagolec moneng-mafa ewaliyackegac.  
<sup>35</sup> Ilec ngenge hangoc mikac gadabiyeng. Gacgu aibaba yagolec fuline sugucnephac bafuwadaingte.  
<sup>36</sup> Ngenge tatakic mikac gadaingtewabac, madickedaicte. Yogodi baficngebame ngenge Wapongte yowa balaibelu mole-damocngineng mipangkewec, yogo badaingte.

<sup>37</sup> Aime dameng bangkacnemac fagac, yogo motome, “Ngic kwesinale miwec, ye dameng monic mi wickedaidaite, miyac. Ye biyachenang kwesidaicte.  
<sup>38</sup> Ngic-ngigacfocene dondonne gagaing, ngenge ngage-ngagesingkolec gaginowagaing. Aime ngengelacni monicti lobe holecnudaictewa, nani yele ngagebe mi madickedaicte.”  
*(Hab 2:3-4)*

<sup>39</sup> Nongileng ye lobe holecnolu sowalenangte aling miyac. Ngage-ngagesingkolec galu gbelong ailu asunonggengkolec gaga-sanangka fedabelengte.

## 11

### *Ngage-ngagesingte fungine*

<sup>1</sup> Wiyac monic fikenolenale sanangnephac ngagesilu gagabeleng, yogo dongedi mi nganilu sifu ngagebeng noine aigac, aibabanonggeng yogolec wacie ngage-ngagesing. <sup>2</sup> Ngic-ngigac esecne gaibong, yenge ngage-ngagesingkolec gaibongte ailu Wapongti mibasanang aiyelelu madicne wacebawec.

<sup>3</sup> Wiyac dongedi nganicaigabeleng, yogo wiyc ac dongedi mi nganinacni fikeibong. Wapong ye yowa mime himong nga sawa yago fagaic, yogo fikeiboc, yogo ngagesingkeibengte ngage-motogabeleng.

### *Ngage-ngagesingkolec ngic-ngigac*

<sup>4</sup> Abel ye ngagesingkewecte Wapongte depec lobewec, yogodi Keinte ibu ewaliwec. Ewalime Wapongti yele depec nganilu ngageme madickeme ngic dondonne wackewec. Abel ye biyachac homawec. Ailu sifu yele ngage-ngagesingte yowaine miwec yogo fagachac.

<sup>5</sup> Enok ye ngagesingkewecte monic mi homawec. Aime Wapongti ye moc sugu baickeme fewec. Ye mi feemewa Wapongti yele yanguc miwec, “Na yele ngagebe madickeegac.” Inguc milu Wapongti ye baickeme ngic-ngigac yenge ye basackeibong, ailu monic mi bafuwaibong.

<sup>6</sup> Aime monic ye Wapongte emewa hikenogale ngagegacka, ye yan-guc ngagesingkelu hikedaic, Wapong ye gagac hocne aime ngic-ngigac ye wackelu basackecaigaing, yenge ameine madicne yeledaicte. Nga monic ye ngage-ngagesingngine mikac gacaigacka, Wapongti yele ngageme mi madickedaicte, miyabenang.

<sup>7</sup> Ngic-ngigac yenge misa sugucne kwesinale umacine fikewec yogo mi ngani-motoibong, Wapongti Noa sawang-yowa inguc edowec. Edome Noa ye yowaine ngagesingkewecte alang bacnolu wage monic bawec. Inguc bame yeicne nga golowacfocene umackacni olocebame wasecne gaibong. Ye ngagesingkewecte himongte ngic-ngigac yengele aibaba sowacne bame

yegengkeme, Wapongti sowacnenginengte ailu yowawa locebawec. Ye ngagesingkewete ngic dondonne yengele mole-damoc bawec.

<sup>8</sup> Wapongti Abraham wackeme yele yowa ngagesingkewete ye balaibelu yeicne himongngine hegilelu himong monicka hikenogale ngageme mi kpungkewec. Himong Wapongti lacnonale miwec, yogodi mole-damocine aiwec. <sup>9</sup> Wapongti himong lacnonale yowa mipangkewec, ye Wapongte yowa ngagesingkewete hikelu kwilic-ngic ingucne gawec. Galu kpoluc-faleine bame domawec. Aime Aisak nga Yakobo yeke aibaba yogohac ailu gaiboc. Yeke Abraham kolec dodoficte himong yogo balu gabong yogodi mole-damocngineng aiwec.\* <sup>10</sup> Wapong yeuctihac taon sanangne esecne molickelu bafuwawec, yogofafeginowagac. Aime Abraham ye kwilic galu taon yoglec wangee gawec.

<sup>11</sup> Ailu ye ngic dandangngine aiwete gibli nalic mi bafuwadaicte. Aime Sara ye inguchac ata dandang kogoc-baba damengngine biyachac miyac aiwec. Abraham ye Wapongte yowa ngagesingkelu gawete madec monic kwefickewec.<sup>†</sup> Wapong ye yowaine mipangkelu yogo balaibedaicte hocne, ye inguc ngagesiwc. <sup>12</sup> Ilec ailu ngic ye homanogale aiwec. Aime kogoc nalic mi bafuwadaicte, yelacni sifu ngambofocine bocyac fikelu saweibong. Ngambofocine yogo yenge sawawale assomeng nga kiwecka dingong ingucne aibong, yogo ngicti dzalengineng nalic mi wafenoga.

<sup>13</sup> Ngage-ngagesingkolec ngic-ngigac molickelu gaibong, yenge hocne Wapongte yowa ngagesingkelu homaibong. Aime Wapongti himong yago-hac yengele himong mipangkewec, yogo monic mi bafuwayelewec. Yenge wiycalidickahac fame fulucke nganibong angacineholec aime yanguc mibong yegengkewec,

“Nonge himongka yawa dameng kpisicnemac kwilic gagabeleng.” (Fike 23:4)

<sup>14</sup> Aime ngic-ngigac yowa silicine ingucne micaigaing, yenge yengileng himong bafuwanogale babasac bole bagabong yegengkegac. <sup>15</sup> Ailu yenge himongngineng esecne molickelu gaibong ailu hegileibong, yogo ngagesid-abongka midec, yenge nalic hatacmac hefaliyu hikedabong. <sup>16</sup> Aime himong monicti himong esecne ewaligac, wacine honocmeng, yenge himong yoglec aiyelewec. Ilec ailu “Wapong ye Wapongnonggeng,” yenge inguc mibong, ye mi gameewec. I yangucte, yedi yengele ngagelu taon monic biyachac bamadickeewec.

<sup>17-18</sup> Wapongti Abraham lokwesacka lome, ye yowaine ngagesingkelu madecine depec ingucne lobenogale aiwec. Aime Wapongti madec yele esecne molickelu yanguc mipangkewec,

“Aisakte fikesaweckacni yengi gale ngesa-ngambofogonebenang aidaingte.” (Fike 21:12)

Madecine moniyang yogo hocne ye dodoficte aling gawec, aime sifu ye balu depecine ainale miwec. <sup>19</sup> Aime ye yanguc ngagesilu gawec, “Wapongti ye homackacni inguchac nalic bagboliyedaicte.” Ilec nangeng yowa yanguc holelu migabeleng, “Wapongti Aisak homackacni bawec.”

<sup>20</sup> Aisak ye dodoficte yowa ngagesingkelu wiycalidickahac fikedaicte, yogo ngagesilu Yakobo nga Esau mimi-madic milu edocepwec.

**11:7:** Fike 6:13-22; 7:1    **11:8:** Fike 12:1-5    \* **11:9:** Yoglec fungine Fike-fike 15:1-21 iwa fagac.    **11:9:** Fike 35:12    † **11:11:** Hibru yowawa fungine yegenia mi aigac. Ilec ailu gocne yanguc bafaliyecaigaing, Sara ye inguchac Wapongte yowa ngagesingkelu gawec.    **11:11:** Fike 18:11-14; 21:2; Rom 4:19    **11:12:** Fike 15:5; 22:17    **11:13:** Mige 39:12; 1Pi 2:11    **11:17-18:** Fike 22:1-14    **11:19:** Rom 4:17    **11:20:** Fike 27:27-29,39-40

<sup>21</sup> Aime Yakobo ye Wapong ngagesingkelu gawecete homanogale ailu yele wacka Yosefe madeckecine filesoc mimi-madic milu edocepawec. Edocepalu yasuinedi kwesingnagu domalu Wapong afeewec.

<sup>22</sup> Yosefe ye Wapongte tapili ngagesilu dodoefite yowaine ngagesingkelu Israel ngic-ngigac Isip himongkacni hefaliye hikeninge yowa miwec. Ilec ailu yeicne luwe balu hikeninge ngagesilu milockelu edocebewec.

### *Mosesle siduc*

<sup>23</sup> Moses fikewec, dameng iwa madec fikebong wehomacebanogale, ngictaudi inguc mime fawec. Aime nenggac-mamackecine yeki ye silicine madicne nganilu ngictaule mi hangocepame mimipang yowaine hegileboc. Hegilelu Wapong ngagesingkelu tamacne habackang madecnginc balu sangkeboc fawec. <sup>24</sup> Aime Moses ye sugulelu ngagesingkewecete Farao aduinele madec, yele inguc miningte takickewec. <sup>25</sup> Ye bikicte kwele-madic ngagelu dameng bangkacnemac ganale mi aicnowec. Ye Wapongte ngic-ngigac yengeholec umac balu ganale ngageme madickewec. <sup>26</sup> Ailu ye Isip himongte moneng-mafa yogolec ngageme wiyac omane aiwec. Kristole ailu game banogale ngageme wiyac feicne aiwec, yogodi Isip himongte moneng-mafa ewaligac. Ye yogo ngagesilu Wapontacni fuliine madicne banogale donge hilawec. <sup>27</sup> Ye Wapongte yowa ngagesingkewecete Isip himongte ngictau yele aalicinle mi hangockewec. Ailu Isip himong hegilewec. Ye Wapong mi nganicne yogo, ye dongedi mi nganiwec ailu nganilu gagac ingucne doic ngagecgu kweleine mi wawec. <sup>28</sup> Ngic-wewe angelodi Israel ngic-ngigac yengele molic-molic madecfocngineng wehomacebadaickale, ye Wapong ngagesingkewec. Ngagesingkelu Ewalicebaicnele Hombangte lama madecine welu sacinedi nunginangsoc hosoyackewec.

<sup>29</sup> Aime Israel ngic-ngigac yenge ngagesingkeibongte Kiwec Sasacnedi siyeckelu yefe ingucne kelengkelu fame falockebong. Isip ngic yenge inguchac falockenang milu lebong kiwec hatacmacfafaina fanale ailu banagume yenge kiwec nolu homayackebong.

### *Ngagesingkelu gabong wiyac fikewec*

<sup>30</sup> Israel yenge Wapongte yowa ngagesingkeibongte Yeriko taonte odatowa posadi baicne, yogo lolickeybong hadeng 7 aiyemewa heliyelu wayackewec. <sup>31</sup> Oda mi heliyewec, dameng iwa ngic yaeckang yeke sangkelu Yeriko taon ngani-ngagac ainogale hikeboc yefe-ngigac Rahap ye Wapong ngagesingkewecete ailu kwele-mogungka hefolecepawec. Ilec ailu Yeriko ngic-ngigac ngage-ngagesingngineng mikac yenge sowaleibong inguc ye mi sowalewec.

<sup>32</sup> Aime na Gideon nga Barak ailu Samson nga Yefata ailu Dawidi nga Samuel ailu siduc-mimi ngic sasawa, yengele siduc inguchac nalic midacka. Aime nale dameng monic mi fagac. <sup>33</sup> Yenge ngagesingkeibongte ailu ngictau bocyac yengele hudu-baba ngicfocngineng tapilingineng bawalu ngictaufocngineng aibong. Ailu laion micngineng badickeibong. Aime yefeyowa fawec yogo dondonne damongkelu Wapongti wiyac mipangkewec yogo baibong. <sup>34</sup> Yenge dac sugucne babong pisickewec. Aime ngabafocngineng yengi hudu-baba fitecti wehomacebanogale aiyelebong hikeibong.

Yenge tapili-wawa gabong Wapongti tapili yelewec. Yenge hudu tapili-inheolek welu kwilic-ngic yengele hudu-baba ngic bocyac yebicebaibong.  
**35** Ngigac gocne yenge ngagesingkelu gabong Wapongti alingfoengineng bagboliyecebame homackacni fangkebong yengela hatacmac locebawec.

Ngictau gocne yenge ngage-ngagesingkolekte aihu hududi weba-doic aiyelelu Wapongte yowa hegileningte milu edocebaibong. Aime ngage-  
 ngagesingkolec yenge homackacni gboliyelu fangke-fangke, yogolec gaga  
 madicne ngagesilu muc-mackacni ngictau yengele yowa hegilelu mi hikei-  
 bong. **36** Aime gocne yenge ngic haicka mife-miwa aibong. Nga gocne  
 yenge midelec aiyelelu muc-hududi wecebaibong. Ailu gocne yenge senti  
 witicebalu muc-macka locebaibong. **37** Aime gocne yenge posadi holece-  
 baibong. Nga gocne segedi socngineng balockeibong. Nga gocne hudu-  
 babale fitecti wehomacebaibong. Nga gocne yenge ngakpi-kpolucnginengti  
 miyac aime lama nga noning socine holelu gaibong. Ailu socte wiyacte  
 kpungkelu gaibong. Inguc aibong ngic-ngigac yengi weyebic aiyelebong  
 umac feina gaibong. **38** Galu yenge himong kisiwa misaine mikacka nga  
 himong sifecina, aihu henebewa nga himong yefina lolickelu gaibong. Yenge  
 madicnengineng bakwesilu ngic-ngigac sowacne mac-himongnginengkolec  
 yengele hewacka gaibong. Aime ngic-ngigac yogo yenge himongte ngic-  
 ngigac yengeholec gagalesoc mi aiwec.

**39** Aime ngic-ngigac yogo yenge ngage-ngagesingkolec gaibongte  
 Wapongti nganicebame madickewec. Ailu yenge dodoficte wiyac baningte  
 yowa mipangkeicne, yogo himongka galu monic mi baibong. **40** Wapongti  
 nongileng wiyac feicne lonogale ngagewec. Ailu yenge nongilengkolec  
 momochac bamadicnubanale ngagesiwec.

## 12

### *Yesule ngagelu gasackedabeleng*

**1** Ngic-ngigac ngage-ngagesingkolec siducngineng alingkelu inguc  
 kwelengkebabac, yenge homacnedi lolicke domalu nganicnubalu ngage-  
 ngagesingngineng wideckeaga. Ilec aihu wiyac sasawa baumalecnubagac,  
 yogo baickeyackenoga. Aime bikicti bacnubalu witicnubalu gagac,  
 yogo helockeyackelu baickeyackenoga, yefe edalicnubalu fagac, yogo  
 sanangnehab balaibelu gasackelu hikedabeleng. **2** Hikelu dongenonggeng  
 Yesula hiladabeleng. Yedi ngage-ngagesingnonggeng filesoc filesoc  
 bamadickelu gadaicte. Ailu ye hocne ngage-ngagesing yogolec fungine.  
 Ye belic-belic lobewa kwesidaicte, yogo ngagesilu malicpongte doicka felu  
 wiyac gameineholec yogo balaibelu ngageme efecne aiwec. Inguc aihu  
 Wapongte mac ngiye-ngiye foleinapec yogowa fewec yakumac ngiyegac  
 hocne. **3** Aime Yesudi molickelu doic ngageme bikic-baba ngic yenge ye  
 yowa kwekwae aicnoibong. Aime ngenge tapili-wawa aihu kwelengineng  
 wadaickale, Yesu ngagesilu gadabiyeng.

### *Mamac ye pasi alingka ainoledaicte*

**4** Aime ngenge bikic hegileninge hudu wecaigaing. Ailu sacngi-  
 neng wanale gagawa mi felu gagaing. **5** Aime Wapongti madecfocine  
 basanangngebanale yanguc edocngebagac, ngenge yogo mi ngigecnge-  
 badaic.

“Madecne, Sugucnedi webating aigeleme ga ngageengka wiyac omane mi aidaic. Nga yedi yowa sanangne mime kwelegone mi wadaic.

**6** Sugucne ye ngic-ngigac monicte angackedaictewa, ye gagaine batinckaigac. Ailu madecine ingucne ailu angac ngagecnodaictewa, yogo ye webating aicnocaigac.” *(Ynn 3:11-12)*

**7** Ngenge Wapong madecfocene. Aime mamac sasawadi madecfocngineng batincaigaing, silicine ingucne hac Waponti doicka locngebalu bamadicngebadaicte. **8** Ailu yedi madecfocene sasawa aibabanginengte ba-bating bole badaicte. Aime ngenge inguc mi aingeledaictewa, yele adu-madecfocenebenang mi aidaingte. Ngenge kosa galu kweficebaibong yenge ingucne aidaingte. **9** Ailu himongka mamacfocnonggeng yengi batinchnubabong nongileng yengele aibaba yogo ngagesilu alang bacebacaiga-beleng. Aime asu yengele Mamacti batinchnubame yele yowa balaibelu gaganang badabeleng. **10** Mamacfocnonggeng yenge ngage-ngaengineng fagac, yoglec silicina dameng bangkacnemac sugu batinchnubacaigaing. Nga Waponti batinchnubacaigaic, yogodibac babaficineholecbenang aigac. Nongileng yele gaga ghagbacne iwa taockelu ganangte inguc aicaigac. **11** Aime ba-bating yogo yanguctihac kwele-sowac doicinoholec bafuwanoole-caigac, yogodi belic-belic mi aidaicte, miyac. Aime ngic-ngigac yenge ba-batingka sugule-sanangkelu gagaing, yengela aibaba yogodi lobewa nganime aibaba dondonne nga kwele-mogungka gaga yoglec noine bafuwadaicte.

### *Sanangkelu ganoga*

**12** Ilec ailu ngenge molengineng tapiliine wadaicte, me higengineng sowacne yogo basanangkedabiyyeng. **13** Ailu ngic-ngigac hige-sowac higengineng patickedaickale,

“Ngenge yefengineng holelu someckedaing.”

*(Ynn 4:26)*

Ngenge inguc aibong higengineng madickedaic.

### *Wapongte kwele-mogung mi wickenoga*

**14** Ngenge gaga ghagbacne mi gadaingtewa, Sugucne nalic mi nganidaingte. Ilec ngenge ngic-ngigac sasawa yengeholec kwele-mogung nga ghagbacne ganingte bole sanangne badabiyeng. **15** Ngengelacni monicte Wapongte kwele-madickacni wawedaickale, ngani-motolu gadabiyeng. Aime ngengele hewackacni wiyac aalic nga kwele-umac yogodi aingeledaickale, ngani-motolu gadabiyeng. Ailu yogodi umac bafuwangeleme kwele-sowacti bocay basowalecngebadaicte. **16** Ailu ngengele hewackacni monicte selo-boic aibaba aidaickale, me Esau ingucne Wapongte kpaoma aidaickale, ngenge ngani-motolu gadabiyeng. Esau ye molic-molic madecte mole-damoc bidaicte. Aimebac ye nosing moniyang yoglec mole-damoc gbaineholec lanac-ganac aiiboc. **17** Ailu ngagegaing, ye lobewa mamacinelacni mimi-madic yogo banogale milockelu hiyame mamacinedi hegilewec. Aime kwele-hefaliyekte yefe monic mi fikecnowec.

### *Honocmenge Yerusalem*

**18** Israel ngic-ngigac yenge Mosesholec Sinai tiki bangkalelu nganibong dac-ubilang lobeme hasocine kundung kwelu badicke-benangkewec. Aime gbelong weme **19** kpeng monic sugucnedi hiyame yowa-malac monicte yowa

mime hangocebame mi ngageningte uwacnoibong. <sup>20</sup> Inguc mibong, yowa yogodi umac sugucnehabafuwayelewec,

"Ngic me sic monicti tiki iwa feme ngenge yogo posadi holebong homadaic."

(Wah 19:12-13)

<sup>21</sup> Aime wizacnganibong yoglec bocyachenang hangocebame, Mosesdi inguchac yanguc miwec,

"Na hangocnume dengdengnugac."

(Yef9:19)

<sup>22</sup> Ngenge Sinai tiki ingucne iwa monic mi kwesibong, miyac. Ngenge Sion kuplic, yogo Wapong gagaineholec yele taon aili honocmenge Yerusalem, iwa belic-belice tutumangka kwesibong. Aime angelo habu taosenkacni fegac, yoglecsoc tutumang iwa tumaneibong. <sup>23</sup> Aime ngic-ngigac sasawa yengele Wapong, ye mimocto-mimocto ngicngineng, ailiu ngic-ngigac Wapongti filesoc filesoc bamadicebalu yenge dondonne wacebawec, yengele asungineng. Aime honocmenge hibiwa wacngineng kwelengkeicne fagac, yogo yenge molic-molic adu-madec ingucne gagaing, yenge honocmenge habu aigaing. Yenge sasawadi momoc kpatulelu iwa gagaing.

<sup>24</sup> Aime ngenge Yesula kwesibong yedi dodoxic gholicnele ngic hewacine aigac hocne. Aime ye sacine wickewec, yogodi Abelle sancti yowa miwec, yogo ewalilu tapiliineholecbenang midaicte.

<sup>25</sup> Ilec Wapongti ngenge yowa edocngebala gagac, ye lobe holecnodaingkale, damongngineng balu ganingte migac. I yangucte, Mosesdi himongka galu ngic-ngigac ung-yowa sanangne edocebame, yenge yele yowa ngagenogale takicebame hegile galu bikicte ameine baibong. Aime Wapongti honocmenge iwacni ung-yowa edocnubame yowaine lobe holedabelengtewabac bikicte ameine iwacni inguchac nalic mi hikedabelengte.

<sup>26</sup> Mosesle damengka Wapongte yowa-malacti himong igockeme uc aiwec. Nga yanguctihacbac yanguc mipangkelu edocnubalu gagac,

"Dameng monicka hatacmac himong igockebe uc aidaicte, iwabac himong sugu miyac, honocmenge momochac igockebe uc aidaicte." (Hag 2:6)

<sup>27</sup> Aime "dameng monicka hatacmac" yowa yogodi yanguc mime yegengkeme edocnubagac, wizac molic-molicina mime fikeyackewec, ye yogo igockeme miyac aiyackedaicte. Aime wizac sasawa mi fikeemewa fawec, ye yogo momoc igockeme sanangnehac domalu fafa-sanang fadaicte.

<sup>28</sup> Aime ngani-damong monic noleme balu gagabeleng, yogo igockedaiete dameng iwa nalic mi sowaledaicte. Ilec aili nongileng Wapong kwele-madic ngagecnobeng ye ngageme madickedaicte, yefe iwa yele bagewa galu alang bacnolu afeelu kwelec kwedabeleng.

<sup>29</sup> "Foinac, Wapongnonggeng ye dac-ubilang ingucne ailu wizac sasawa lobeme miyac aiyackedaicte."

(Yef4:24)

## 13

### Mac holeyeledabeleng

<sup>1</sup> Ngic hae-gbafocne, ngenge ngengungthiac kwelenginengti angac ngagenagulu ago ainagulu gadabiyeng. <sup>2</sup> Ngic-ngigac haic fulune ngengela kwesibong ngenge yenge macnginang locebanogale mi hegiledaing. Ngic-ngigac gocne yenge inguc aiibong, yenge ngicbenang macka locebagabeleng milu angelo gocne macka locebaibong. <sup>3</sup> Aime ngic-ngigac mucmacka ngiyebong ngenge yengeholec momochac ngiyegaing, silicine yogo

ingucne hac ngengi yengele ngagesilu baficebadabiyeng. Nga ngic-ngigac gocne wecebacaigaing, yogo ngengele soc momochac wegaing, silicine yogo ingucne hac ngengi yengele ngagesilu baficebadabiyeng.

<sup>4</sup> Aime ngawe-ngigac banagucgaing aibaba yogo alang bacnodabiyeng. Aime ngawe-ngigac yeke momochac mapicnginec alang bacnolu selo-boic aibaba mi aiboc wonong mikac fadaic. I yangucute, Wapongti selo-boic ngicngigac funginengineng wosaelu ameine yeledabacte hocne. <sup>5</sup> Aime ngenge hiye-monengte angac sugucne hac mi ngagedabiyeng, ngenge inguc ngagelu gadabiyeng. Wapong yeuctihac yanguc biyachac miwec,  
“Na ngenge mi hegilecngebadacte. Ailu wiycngineng lilolu nalic mi lobe holengeledacte, yogo miyacbenang.” *(Yef31:6)*

<sup>6</sup> Ilec sanangkelu hangoc mikac galu yanguc nalic midabelengte, “Sugucne ye nongileng babaficnonggeng, aime ngic monicti wiyc monic ainoleme ilec nalic mi hangocnubadaicte.” *(Mige 118:6-7)*

### *Ngage-ngagesingnonggeng balaibenoga*

<sup>7</sup> Ngenge micnefocngineng Wapongte yowa edocngebalu wedungelelu gaibong ailu noine wenuc bafuwaibong, yogo ngagesilu gadabiyeng. Ngenge domalu ngage-ngagesingngineng ngani-motolu yengele silic balabedabiyeng. <sup>8</sup> Yesu Kristo ye awecnahac nga yakumac ailu damengsoc silicine moniyang gaginowagac.

<sup>9</sup> Wapongte kwele-madicti kwele ngage-ngagengineng basanangkeme sanangne domadaingte, yogodi wiyc madicne. Aime noba-nosingte yefe-yowa haicine monic-monic yogodi kwelengineng nalic mi basanangkedaicte. Ilec ngenge yowa kwsesacine gbolicne haicine monic-monic wedungelebong yowa ingucnedi mi mudocngebadaic. <sup>10</sup> Aime nongileng Yesudi alatanonggeng ingucne aime gagabeleng. Aime depec-baba ngic yengele kpoluc-falewa afeulu kwelec kwelu gagaing, yenge Yesudi alata aigac, iwacni nosing monic nalic mi balu nodaingte. <sup>11</sup> Depec-baba ngic yengele damong sugucnedi sic yengele sac balu Ibu-mac Kweline Gbagbacnebenang, iwa bafeli bikic baic-baicte ibu lolu gaibong. Ailu sic noinebac ngiye-domac aicaigaing mac yogolec lobeina lobong lobelu defeine sugu ailu gawec. <sup>12</sup> Ilec Yesudi inguchac yeicne sacti ngic-ngigac gbagbacne bacebanale taon nuinele lobina doic ngagewec. <sup>13</sup> Ilec ngiye-domac aicaigabeleng, yogolec lobeina yela hikelu yeholec momochac ye game bawec ingucne hac badabeleng. <sup>14</sup> Himong yagowa nongileng taon sanangne monic mi fagac. Ilec nongileng taonnonggeng lobewa kwsesinale donge hilalu gagabeleng.

### *Mimi-madicte ibu*

<sup>15</sup> Ilec nongileng Yesule wacka Wapong damengsoc mitengkedabeleng, yogodi ibu noine aidai. Micnonggenti waccine mileng yegengkeme noine bafuwadabeleng. <sup>16</sup> Aime ngic-ngigac gocne ngani-bafic aiyeledabiyeng. Ailu wiycngineng fagac, yogo heuckelu yeledabiyeng, aibaba yogo mi hegiledaing. Wapongti ibu ingucnele hocne ngageme madickedaicte.

### *Yowangineng balaibenoga*

<sup>17</sup> Ngenge micnefocngineng yenge alang bacebalu yowangineng balaibed-abiyeng. I yangucte, yenge deboc-gboli galu kwele-asungineng damongkelu bolenginengte yowa-siduc Wapongta minogale damengngineng loicne fagac. Yogawa yengele bole yogo belic-beliceholec aidaic. Ngenge kwele-umacka bole yogo badaingtewa, na ngagebe ngenge nalic mi baficnge-badaicte.

### *Wenac-madic*

<sup>18</sup> Ngenge nongele milockedadaing. Nonge kwele ngage-ngagenonggeng gbagbacne, inguc ngagepangkelu gagabeleng. Aime aibabanonggeng sasawa madicne fanale ainolegac. <sup>19</sup> Ngenge hatacmac mimilockabenang baficnubadaing, yogo kpafengngebagabac. I yangucte, na dameng mi wickedacte. Ailu ngengela biyacbenang hefaliye funogale ngagesigabac.

<sup>20</sup> Sugucnenonggeng Yesu ye lama-damongtowa ingucne damongnubagac. Aime Kwele-mogungte Wapongti Yesu homackacni bagboliyeme fangkewecte Yesule sacka dodosic sanangnefafeginowagac. <sup>21</sup> Wapongti hocne Yesu Kristole ailu bole madicne sasawa banogale tapili bame wakengeleme yeicne angac nga ngage-ngage balaibedaingte. Ye inguc ainolelu ngageme madickedaike, aibaba yogodi nongela fikedaic. Aime yela wac feicne moto-motoine mikac fafegidaic, yogo foinac.

<sup>22</sup> Ngic hae-gbafocne, na hibi yago kwelengkegabac, yogo dalicne miyac. Ilec ngenge yowa yago tatakic mikac galu ngageningte kwelengineng kwe-fangngebalu migabac. <sup>23</sup> Ailu monic yanguc edocngebabne ngagening, yenge ngic hae-gbanonggeng Timoti muc-mackacni lukecnoibong. Ilec ye nala biyac kwesidaictewa, noke momochac ngengela biyac fulu nganicngebad-abelecte.

<sup>24</sup> Nongele wenac-madicti damongfocngineng ailu ngic-ngigac Wapongte bingec sasawa ngengela fugac. Ailu alingfocnonggeng Itali himongkacni yenge inguchac wenac-madicneng ngengela logaing.

<sup>25</sup> Wapongte kwele-madicti ngic-ngigac sasawa ngengela fadaic.  
Yogo foinac.

## Yakobos Yedi Hibi Kwelengkewec

### *Mimi-yegeng yowa*

Yakobos, ye Yesule gbaine, ye Yesule habu Yerusalem iwa gaibong, yengele micne monic. Yesu homalu homackacni gboliyelu fangkeme hifa 20 ngama ingucne motome, yedi hibi yago kwelengkelu Yesule habu gocne yengela saleme hikewec. Ngic-ngigac ngage-ngagesingkolec, yenge aibaba wenuc aicaigaing, yogolec kwelengkeylewec.

### *Yowa yago hibi nebocina fagac*

1:1 Wenac-madic yowa

1:2-18 Umac haicine monic-monic

1:19-27 Wapongte yowa sugu ngagebeng mi madickegac, yogo balaibed-abeleng

2:1-13 Ngic-ngigac nganicebalu aibaba silicine moniyang aiyeledabeleng

2:14-26 Aibaba yogodi ngage-ngagesing edaligac

3:1-18 Micnonggeng damongkelu yowa madicne sugu midabeleng

4:1-5:6 Yefe sowacne ewalilu Wapongte aibaba balaibedabeleng

5:7-20 Aibaba madicna sanangkelu domadabeleng

### *Wenac-madic yowa*

<sup>1</sup> Na Yakobos, Wapong nga Sugucne Yesu Kristo yekele kwelec kwekwe gagabac. Na hibi yago kwelengkelu Israel ngesa-ngambofocngineng 12 himongne himongne ngic-ngigac sasawa singsalolong kwelu gagaing, nale wenac-madic ngengela lobe fugac.

### *Umac haicine monic-monic*

<sup>2</sup> Ngic hae-gbafoce, lokwesac nga umac haicine monic-monic fikengeledaicte, wiycac yogo sasawa belic-beliceholec, ngenge inguc ngagedaing. <sup>3</sup> Ngenge yanguc ngagegaing, ngage-ngagesingngineng lokwesacka lobong yogodi basanangngebame ngic-ngigac sanangne aidaingte. <sup>4</sup> Ailu ngenge tatakic mikac sanangne galu bolengineng bucbuchac badaingte. Bamoctolu sugule-benangkelu, wiycac monicte kauc nalic mi bidaingte.

### *Wapontacni ngage-ngage-motoc*

<sup>5</sup> Wapong ye pakeng-yowa mi micaigac. Ye angacka galu ngic-ngigac ngage-ngage bocyac yelecaigac. Ilec ngengele hewackacni ngic me ngic monicti ngage-ngage-motocine lome songtoleme, ye Wapong milockelu uwacnome lacnodaicte. <sup>6</sup> Aime ye uwacnolu milockenogale milu, iwabac ngageboc mikac ngagesingkelu milockedaiing. Monic ye ngageboc aidaicte, ye kiwekte dibong ingucne, gbelonti yogo ewalilu lec-welec aime kosa wecaigac. <sup>7</sup> Ngic-ngigac ingucne yenge, Sugucnelacni wiycac monic nalic badabelengte, inguc mi ngagesidaing. <sup>8</sup> Ngic-ngigac ingucne yenge himongte gaga nga Wapongte gaga momochac balaibelu yengileng yefe sasawa yogo ngagebockolec gagaing.

### *Ngic feicne waicne*

<sup>9</sup> Ngic hae-gbanonggeng monic ye waweweine gacaigac, Wapongti yele ngageme feicne aigac, ye yogolec angac ngagedaic. <sup>10</sup> Aime ngic monic moneng-mafaineholec, Wapongti yele ngageme waweweine aigacte ye angac ngagedaic. Daling alfinedi kpinding kwelina siyeckelu molongkelu miyac aicaigac, ngic yogo ye ingucnehad miyac aidaicte. <sup>11</sup> Aime ubiyacte wenac dacineholecti ofelu kpinding kweme sokuwelu aliine silicine madicne molongkeme miyac aidaicte. Nga ngic moneng-mafaholecti wiyac bafuwanale boletowa bacaigac, ye silicine ingucnehad molongkelu miyac aidaicte.

<sup>12</sup> Monic lokwesacka sanangne domalu umac badaicte, ye kweleangackolec. Aime ngic-ngigac Wapong kwelenginengti angac ngagelu aicnocaigaing, yenge gaga-sanang yelenale mipangkewec. Monic ye lokwesacka sanangkelu gagac, ye yogo hocne badaicte. <sup>13</sup> Bikicte lokwesacti ngic monic fikecnome, ye yanguc mi midaic, "Wapongti lokwesacka locnugac."

I yangucte, wiyac sowacnedi Wapong nalic mi fuluckedaitc. Nga Wapongti ngic monic bikicte lokwesacka inguchac mi lodaicte, miyac. <sup>14</sup> Ngic yengileng angacti lokwesacka filesoc locebadaicte. Ailu yengileng angacti bacebame kwasac ngage-ngage ngagelu aibaba haicine monic-monice ainogale angac ngagedaingte. <sup>15</sup> Aime angac sowacnedi gobeelu madec monic badaicte, ye wacine bikic. Aime bikicti sugulelu homac bafuwadaitc.

<sup>16</sup> Ngic hae-gbafocne kwelenedi ngengele angac ngagegabac, ngenge kwesacngebabong yanguc mi ngagedaing, Wapongti bikicte lokwesacka locnubagac. <sup>17</sup> Wapong ye angoc sawawa fagac yogolec Mamac. Ailu yela kundung monic mi fagac, miyac. Yela angoc fawecti fagac, nga faginowagac. Aime wilengkaci wiyac madicne nga dondonne sasawa salenoleme wacaigaing, yogo kwele-medicineholec inguc nolelu gagac. <sup>18</sup> Wapong ye angacinele ailu yowa noina gobeelu bacnubame yele adu-madefcocene fikeibeng gagabeleng. Yedi mime wiyac sasawa himongka fikeyackewec, yogolec hodocene hole-hole ainangte inguc ainolewec.\*

### *Yowa ngagelu balaibenoga*

<sup>19</sup> Ngic hae-gbafocne kwelenedi ngengele angac ngagegabac, ngenge yanguc ngagening, yowa monic mibong kwesime ngenge biyac hedec lodabiyyeng. Lolu yowa yogolec ameine biyac mi midabiyeng, me aalic biyac mi ngagedaing. <sup>20</sup> Wapongte haicka ngicte aalicti aibaba dondonne mi kwefickedaicte, miyac. <sup>21</sup> Ilec ailu ngenge aibaba wonongkolec nga sisipilic aibaba ingucne bocyac fagac, yogo sasawa baickeyackedaing. Ailu ngenge ulucne gacgubong yowa kwelenginang duweicne, yogolec tapilidi kwele-asungineng bikicte ameine bame wasecne aidaingte. Yowa yogo hefoledaing.

<sup>22</sup> Ngenge Wapongte yowa hedecti sugu mi ngagedaing. Ngenge yowaine ngagelu balaibedaingte, yogodibac madickedaicte. Inguc mi aidaingtewa, ngenge ngengileng kwesac ainagulu ngagebong ngic madicne gagabeleng ingucne aidaicte. <sup>23</sup> Monic ye Wapongte yowa moc sugu ngagelu yogo mi balaibedaictewa, ye ngicti yeicne haic-mesuine iluc nganicka nganicaiac, yogo ingucne. <sup>24</sup> Ye ilucine nganilu gacgu iwashac yeicne ngani-ganiine weningucne, yogo biyac ngigeckedaicte. <sup>25</sup> Wapongte yefe-yowa

---

<sup>1:10:</sup> Yes 40:6-7      \* <sup>1:18:</sup> Noba-nosing gblolcnacni hodocene holecaigabeleng, yogo ingucnehad ainangte edocnubawec.    <sup>1:18:</sup> Yoa 1:13    <sup>1:20:</sup> Ngag 7:9    <sup>1:21:</sup> Kol 3:8; 1Pi 2:1    <sup>1:22:</sup> Mat 7:26; Rom 2:13

dondonne, yogodi muckacni lukecnubacaigac. Aime monicti yefe-yowa yogo ngani-ngagec aigacgu mi ngigeckeme aibabaine balu gadaicte, ye kwele-angackolec aidaicte.

### *Alang-baba noine*

<sup>26</sup> Monic ye yeuctihac yanguc ngagedaicte, Na Wapong alang bacnolu gagabac, inguc milu beluine mi damongkedaictewa, yele alang-baba yegodi yefe lilome babaficine mi aidaicte. Ye yeicne kweleina kwesac aidaicte hocne. <sup>27</sup> Aime Wapong Mamacnonggeng yele haicka alang-babale aibaba gbagbacne, nga wonong mikac, yoglec silicine yanguc. Himontowa yagolec angac lobe holecnolu, wonong mikac galu buwenac nga ngigac-hosec umacka gagaing, yenge ngani-damong aiyeledabeleng. Yogodi Wapongte alang-baba madicne.

## 2

### *Aibaba silicine moniyang*

<sup>1</sup> Ngic hae-gbafocne, Sugucnenonggeng Yesu Kristo ye tapili nga wac feicneholec gagac. Ailu ye ngagesingkegaing, ngenge ngic feicne waicne nganicebalu aibabanginengte silicka mi aiyeledaingte. <sup>2</sup> I yangucte, ngic monicti ngengele kpakpaduc macka fedaicte. Ye ling goldi baicne, ailu ngakpi hibine madicne holelu kwsidaicte. Aime dameng iwahac ngic monic waweweine ye inguchac ngakpiine esecne wonongkolec holelu kwsidaicte. <sup>3</sup> Inguc kwsiboc ngenge ngic ngakpiine hibine madicne holegac, ye nganilu yele midaingte, "Agone, ga yawa wele ngiye-ngiye madicna ngiye." Inguc milu ngic waweweine yelebac yanguc midaingte, "Ga edi hikelu domac," me "Ga emena hige ede-edena wangiyenong." <sup>4</sup> Inguc aidaingtewa, ngenge ngengileng silicngineng ngani-motolu yefe sowacna ngic-ngigac agofocngi-neng wosaecebadaingte, me? Yogo mi madickedaicte.

<sup>5</sup> Ngic hae-gbafocne ngengele angac ngagegabac, ngenge ngagening. Ngic-nigic himontowa yagowa waweweine gagaing, yenge ngage-ngagesing feicneholec aidaingte. Ailu ngani-damongte mole-damoc badaingte. Wapongti inguc ngagelu bawosaebawec, me? Oc. Ngic-nigic kweledi Wapongte angac ngagelu aicnocaigaing, yogo yengi ainingte mipangkewec.

<sup>6</sup> Nga ngengebac ngic-nigic waweweine game bafuwayelecaigaing. Aime ngic mafatowanginengkolec yengi hocne basowalecngebalu yowawa locngebacaigaing, me? Oc, aime omale yenge sugu alang bacebacaigaing?

<sup>7</sup> Yesule wac madicne molickelu feinginang fewec. Aime moneng-mafanginengkolec yengi hocne wac yogo milu sulecaigaing, me? Oc, yenge inguc aicaigaing.

### *Ngageboc mikac gaga*

<sup>8</sup> Aime Wapongte hibiwa yefe-yowa yanguc kwelengkeicne fagac, "Gageicne aigelecaigac, silicine ingucne hac ngic-nigic gale emewa gagaing, yengele kwelegonedi ago aiyelalu angac ngageyelelu gadamec." *(Dep 19:18)*

Ngenge ngani-damongte yefe-yowa yogo foinac balaibecaigaingka, aibaba madicne aigaing. <sup>9</sup> Ailu ngenge ngic feicne waicne nganicebalu aibabanginengte silicka aigelecaigaingka bikic bafuwadaingte. Aime yefe-yowadi bikicngineng mime yegengkeme yefe-yowa wewe ngic, inguc wacngebadaicte. <sup>10</sup> I yangucte, monic ye yefe-yowa sasawa balaibeyackelu,

hewacine moniyang sugu hegiledaicte, ye hewacine sasawa yogolec ameine badaicte. <sup>11</sup> I yanguc, Wapongti yanguc miwec fagac,  
“Ga selo-boic mi aidamec.”

Ailu hatacmac yanguc,

“Ga ngic-ngigac mi wehomacebadamec.” (Wah 20:13-14; Yef 5:17-18)

Aime selo-boic mi ailu ngic wehomadamectewa, yefe-yowa wewe ngic biyac ailu gagic. <sup>12</sup> Wapongte yefe-yowadi muckacni lukecnubagac. Ailu yedi yefe-yowa yogo balaibelu aibabanonggeng wosaedaicte. Ilec ngenge inguchac yefe-yowa yogo yowanganinang nga aibabanginang balaibedaing. <sup>13</sup> Monic ye ngic-ngigac kwele-sowac mi aiyelecaigac, ye yowawa lobong dameng iwa kwele-sowac mikac mimoctodaicte. Aime monic ye kwele-sowackolec gacaigacti yowawa domalu gbelong aidaicte.

### *Ngage-ngagesingkolec gaga*

<sup>14</sup> Ngic hae-gbafocke, ngic monicti midaicte, “Na ngage-ngagesingkolec gagabac.” Inguc milu aibabaine madicne mi facnogacka, ngage-ngagesingngine yogolec noine mi bafuwadaicte. Aime ngage-ngagesing ingucnedi umackacni nalic bamoctodaicte, me? Yogo miyac. Ilec ailu ye wasecne mi aidaicte. <sup>15</sup> Ngic hae-gba me adu-seng yengelacni monic, ye gagaina oma ngakpi-kpoluc holedaicte? Ailu hadengsoc nosing nonogale kpungkeme, <sup>16</sup> ngengelacni monicti yele yanguc midaicte, “Ga kwelemogungkolec galu gbelong ngakpigone holelu nosing nogebec aidamec.” Ye micti sugu inguc milu socte wiyacka kpungkegac, yogo mi lacnodaicte, wiyac madicne noine fikedaicte, me? Yogo miyac. <sup>17</sup> Inguc aime ngage-ngagesingine aibabaine mikac fagac, yogo noine mikac, homaicne.

<sup>18</sup> Aime monicti yanguc midaicte, “Ga ngage-ngagesinggoneholec gagic. Nga nabac aibabane madicne balu gagabac.” Ngage-ngagesinggone aibabaine mikac, yogo edalicnungka nganilubac, aibabane edalicube ngage-ngagesingne nalic nganidamecte. <sup>19</sup> Wapong ye moniyang sugu gagac, yogo biyac ngagesingkedamecte, yogodi madicne. Aimebac yogo sugu nalic mi aigac. Aleng yenge inguchac yogo ngagesingkelu hangocbame dengdengebacaigac.\* <sup>20</sup> Nga gabac ngage-ngagesingkolec galu aibabagone mikac gagic, yogo noine monic mi bafuwadamecte, miyac. Ga ngic ngage-ngagegonge mikac ingucne, yogolec silicine ngage-motodamec.

<sup>21</sup> Molickelu nongileng ngambononggeng Abraham ye madecine Aisak depec hocne milu alatawa lome, Wapongti yele ngage-ngagesing yogo aibabaineholec nganilu ngic dondonne wackewec. <sup>22</sup> Aime yele ngage-ngagesing nga aibabaine, yeke baficnagulu yekilec momochac bole baiboc. Aime aibabainedi ngage-ngagesinginele bole bamoctome sugulewec, yogo ngani-motogic. <sup>23</sup> Aime yogodi noine aigac. Nga Wapongte hibidi edalic-nubalu yanguc migac,

“Abraham ye Wapong ngagesingkewecte ailu, ye ngic dondonne wackewec.”

*(Fike 15:6)*

Ailu yele yanguc migac, “Ye Wapong agoine.” <sup>24</sup> Ilec ailu Wapongti ngic monic aibabainele ailu ye ngic dondonne wackedaicte, yogo ngage-ngagesingka sugu miyac, ngenge yogo ngani-motogaing.

**2:10:** Mat 5:19    **2:11:** Rom 13:9    **2:12:** Gal 6:2; Yak 1:25; 1Pi 2:16    **2:13:** Mat 5:7; 18:32-35

**2:15:** 1Yoa 3:17    **2:18:** Gal 5:6    \* **2:19:** Aleng yenge moc ngagesingkecaigaing, aibabangineng madicne monic mi fagac. Ilec ngage-ngagesingngineng yogo noine mikac.    **2:21:** Fike 22:9-12

**2:22:** Hib 11:17-18    **2:23:** 2Ngsi 20:7; Yes 41:8

<sup>25</sup> Aime silicine ingucne hac Wapongti yefe-ngigac Rahap aibabainele ailu dondonne wackewec, me? Oc, yedi ngic salecepabong kwesiboc macka locepawec. Locepalu monicka yefe salecepame hikeiboc. <sup>26</sup> Soc asuine mikac, yogo homaicne. Aime silicine ingucne hac ngage-ngagesing aibabaine mikac, yogo ingucne hac homaicne.

### 3

#### *Mic-yowanonggeng*

<sup>1</sup> Ngic hae-gbafocne, ngengelacni bocyacti Wapongte yowale wewedu ainingte mi ngagesidaing. Wapongti ngic-ngigac yowawa locebadaicte, dameng iwa wewedu bolenonggengte funginenonggeng sugucne hac wosaelu yowanonggeng mimoctodaicte. <sup>2</sup> Nongileng sasawadi dameng bocyac bikicka wawegabeleng. Aime monic ye yeicne yowa damongkelu bikic mi bafuwadaitewa, ye sugule-benangkelu socine ingucne hac damongkenale mi kpungkedaicte. <sup>3</sup> Aime becosic yenge yowanonggeng ngagelu balaibeningte, micnginang aen kpisicne lobeng aente ailu socngineng bucbuchac ngage-ngagengineng balaibedaicte. <sup>4</sup> Ailu lac-wage kiwecka gagaing, yogo inguchac ngagegaing. Yenge wiyc sugucnebenang, aime gbelong sanangnedi bacebame lac-wage damong ye puli hakincinedi weme lac-wagetowa yogo yele mole balaibedaicte.

<sup>5</sup> Aime belu ye inguchac socnonggang wiyc kpisicne aigac. Ailu sifu yowatowa milu socnonggang bafedaicte. Aime ngagegaing, dac kpisicne hakicti molickelu lobeme yoc-kate sugucnebenang lobecaigac. <sup>6</sup> Belunonggeng yogo dac ingucne, yogodi hocne socnonggente wiyc sasawa ewalice-balu sowacnele nenggacine aicaigac. Aime dac-sanangti belunonggeng lome lobeme, belunonggenti socnonggang sasawa bame wonong aime gaganonggeng sasawa yogo dacka lome lobedaicte. <sup>7</sup> Bec-sic nga nango, ailu hemu nga kiwecka sic haicina monic-monic fayackegaing, yenge esecne nga yakumac yowa weduyeelu damongebagabeleng. <sup>8</sup> Aime sifu monic ye beluine nalic mi damongkecaigac, belu yogo ngiye-ngagecine mikac sowacne balu game homacte marasingti yela wakecaigac.

<sup>9</sup> Nongileng belunonggenti Sugucne Mamacnonggeng mitengkecaigabeleng, aime belunonggeng yogodi hocne ngic-ngigac Wapongte silic bacebacie, yenge sawecebacaigabeleng. <sup>10</sup> Mic-sabang moniyang yogowacni mimi-madic yowa nga sawec-yowa momochac wacaigac. Ngic hae-gbafocne, yogodi mi madickegac. <sup>11</sup> Misa dongeine moniyang iwacnihaic, misa sawecne nga hobecine momochac nalic wadabiyeete, me? Yogo miyac. <sup>12</sup> Ngic hae-gbafocne, fik yociti oliwa hucine nalic badaicte, me waing mucka fik hucine nalic fikedaiete, me? Yogo miyac. Silicine ingucne hac kiweckolec misa nalic mi filanoga.

#### *Ngage-ngage-motoc noine*

<sup>13</sup> Ngengelacni monicti ngage-ngage-motoc nga ngage-ngageine ileckeicne balu gadaictewa, ye ngage-ngage-motoc iwacni ulucne galu aibabaine madicne edalicngebadaicte. <sup>14</sup> Aimebac ngenge kwelenginang hasowac ngabaholec ailu ngengileng sugu doficnagudaingtewa, ngengileng socngineng bafelu kwesacka galu yowa noinele yowa kwekwe mi aidaing. <sup>15</sup> Ngage-ngage-motoc kwesacine ingucne yogolec fungine honocmengkacni miyac, yogobac himongkacni, ailu kwele esecne nga aleng yengele bole.

**16** Ngenge kwelenginang hasowac ngabaholec ailu ngengileng sugu dofic-nagudaingtewa, ngenge yuwenackolec ingucnerah galu, aibaba sowacne haicine monic-monic aigacgu siyeckelu gadaingte. **17** Ngage-ngage-motoc wilengkacni wacaigac, yogodi molickelu ngage-ngage gbagbacne lolu, hat-acmac kwele-mogung nga aibaba ulucne bafuwagac. Ailu kwelewa bawagac, ailu kwele-sowackolec, nga noine madicne, ailu angasosoc aigac, ailu kwesac-yowa mi fagac. **18** Ngic-ngigac kwele-mogung gagale bole ba-caigaing, yenge kwele-mogung wasecne duwebong gaga dononnele noine filkeyeledaicte.

## 4

### *Ngenge kwelengineng hefaliyedaing*

**1** Hewacnginang hudu nga ngaba yogo wenuwacni kwesilu kpafengngebagac? Ngani-angac fagac, yogo kwelenginangkocni, me? Oc, iwacni kwelenginang yuwenac aicaigaing. **2** Ngenge andac ailu wiyc mi bacaigaing. Ilec ailu ngic wehomalu hasowac ngagelu wiyc nalic mi babong fikedaicte. Ailu ngenge ngelec-ngelec nga yuwenac aicaigaing. Ailu ngenge mimiloc-ningineng mikac gagaingte wiyc madicne nalic mi badaingte. **3** Ngengebac wiyc banogale milockelu yanguc ngagesicaigaing, Socte ngani-angacka moneng-mafanonggeng nalic wickedabelengte. Inguc ngagelu ngenge kosa milockelu yogolec noine monic mi badaingte.

**4** Ngic-ngigac selo-boic ingucne aicaigaing, ngenge yanguc mi ngagegaing, me? Monic ye himongtowa yagolec gaga yagolec agoine aicaigac, ye Wapong lobe holecnodaicte. Ilec monic ye himongtowa yagolec gagale ago ainogale aigac, ye Wapongte ngabale aling aigac. **5** Wapongte hibiwa yowa yanguc fagac, Ye asunonggeng nongileng kwelewa lome ngiyegac. Ilec nongileng yele aling ganangte bocyac aicnolu gagac. Ngenge yele aalic bafuwadaingkale, ye mi hegiledaing.\* Yowa yogo moc mi kwelengkeicne fagac, yogo ngagegaing, me? **6** Aimebac ye kwele-madic sugucne ewalilu ainolegac, yogolec hocne Wapongte hibidi yanguc migac,

"Wapongti ngic soc bafele gagaing, yengele takickeme ngaba aigac. Nga soc-kwelengineng bawalu gagaing, yenge kwele-madic aiyelelu gagac."

(Ynn 3:34)

**7** Ilec ngenge Wapongte bagewa gadaing. Ilec ailu Aleng Sugucneng-nengte yowa kwele lobe holecnodaing. Inguc aiyebongka ye hegilecngebalu hikedaicte. **8** Ailu ngenge Wapongte emewa ledaing. Inguc leebongka ye inguchac ngengele emewa weledaicte. Bikic-baba ngic, ngenge molengineng suwedaing. Nga ngic-ngigac kwele-yaecckolec gagaing, ngenge kwelengineng suwe-bamadic aibong gbagbacne aina. **9** Ngenge ube-hobec nga kwele-sowac ngagelu hii-songgong aidaing. Ailu gougooholec gagaing, ngenge hefaliyelu maguc-maguc aidaing. Nga belic-belicka gagaing, ngenge hefaliyelu kwele-umackolec aidaing. **10** Ngenge Sugucnele haicka bawac-nagudaing. Inguc aibong yedi wacngineng bafedaicte.

### *Ngenge ngengung mi wosaecnagudaing*

**11** Ngic hae-gbafocne, ngenge ngengung mi misowalecnagudaing. Monic ye ngic hae-gbaine misowaledaicte, me aibabaine wosaelu

---

**3:18:** Mat 5:9; Hib 12:11    **4:1:** Rom 7:23    **4:4:** Rom 8:7; 1Yoa 2:15    \* **4:5:** Wapongte hibile ngage-ngage ngic yenge yogolec yowa yanguc ngagegaing, Yakobos ye Wapongte hibiwiacni yowa gocne yago ingucne kpatulecebalu migac, Wahikeicne 20:5; 34:14; Sekariya 8:2    **4:6:** 1Pi 5:5    **4:7:** Efs 6:12    **4:8:** Sek 1:3; Mal 3:7; Yes 1:16    **4:10:** Yop 5:11; 1Pi 5:6

misowaledaictewa, ye yefe-yowa misowalelu wosaegac. Ailu yefe-yowa wosaelu bawagicka, ga yefe-yowa mi balaibecaigic, miyac. Gagibac yefe-yowale wowosae-ngic ailu gagic. <sup>12</sup> Yefe-yowale wowosae-ngic, ye yefe-yowa kwelengkewec, ye moniyangti sugu gagac. Ailu yedi hocne nalic bikicte ameine bame wasecné aidaingte, me basowalecngebame miyac aidaingte, ye yogolec tapili facnogac. Ga monic emegona gagac, ye wosaecte tapili yogo madi gelewec? Monic mi geleicne, miyac.

### *Soc bafefē ngic*

<sup>13</sup> Gocne yenge yanguc migaing, “Nonge yakumac me saeme taon iwa me taon monicka hikelu hifa moniyangte kwelina iwa galu woc-wiyac fuli balu salelu hiye-monengnonggeng hatacmac bafuwadabelengte.” Ngic-ningigac bole ingucne nalic bacaigaing. Aime sifu ngengele yanguc mibe ngagening. <sup>14</sup> “Ngenge saemele gaganginengte silic wenuc aidaicte, yogo monic mi ngagegaing. Gagangineng yogo hasoc ingucne, dameng kpisic-nemac ofelu miyac aidaicte.” <sup>15</sup> Ngenge yanguc mibong madickedaicte, “Sugucnedi ngageme madickedaictewa, nonge gacgu bole yogo me yogo badabelengte.” <sup>16</sup> Aime ngenge ngage-ngagengineng yogo feicne ngagelu socngineng bafelu micaigaing. Yowa ingucne yogo aibaba sowacnebenang aigac. <sup>17</sup> Ilec ngagegaing, monic ye aibabaine madicne ainale ngage-ngagemotoc facnogac. Ailu yogo sifu hegiledaicte, ye bikickolec aidaicte.

## 5

### *Ngc-ngigac moneng-mafanganengkolec*

<sup>1</sup> Ngic-ngigac moneng-mafanganengkolec, ngenge ngagening, umac sugucnedi ngengela fikelu basowalecngebadaicte. Ilec ailu, ngenge aukwelu hiyaning. <sup>2</sup> Ngenge woc-wiyacngineng musungkelu miyac aidaicte. Ailu ngakpi-kpolucngineng yogo une-kwadacdangti nome miyac aidaicte. <sup>3</sup> Hufengti gol nga siliwangineng badaicte. Ailu hufeng yogodi siduc-mimi ngic ailu funginengineng mime yegengkedaiicte. Aime woc-wiyacnginengti socnginang dac ingucne lobecngebadaicte. Ngenge dameng moto-motoina hocne moneng-mafanganeng bakpaduc aibong, yogodi inguc fikengeledaicte. <sup>4</sup> Ngagegaing, bole-ncicfocngineng yenge nosing ngengileng bolenginangkocni noine fuluckelu ngeleibong. Ngeleibong ngenge bole-fuli mi yeleibong. Aime fuli yogodi hiyalu gagac. Aime bole-ngic yenge nosing noine kpaduckeibong, yenge inguchac hiyabong Sugucne Tapilitowa Fileine, yele hedecka biyac haume ngagewec. <sup>5</sup> Ngenge himongka galu socte angac balaibeibong. Balaibeibong moneng-mafanganengti gaganginang wakewec. Aime Wapongti ngic-ngigac wehomacebanale damengngine bangkaleemewa, ngengebac nogebec ailu gagainghac. <sup>6</sup> Ngenge ngic dondonne yowawa lolu mimoctolu webong homawec. Aimebac ye ngaba monic mi balu gawec.

### *Yesu kwasidaicte*

<sup>7</sup> Ngic hae-gbafocne, ngenge ilec tatakic mikac wangec gaebongka Sugucne kwasidaic. Aime ngagegaing, nosing-hole filefocine yengi nosingngineng duwebong mac kweme yengi nosingngineng himongkacni sugulenale tatakic mikac noinele damengte wangec gacaigaing. <sup>8</sup> Aime Sugucne

kwesi-kwesi dameng biyac bangkale welegacte ailu, ngenge inguchac kwe-lengineng basanangkelu tatakic mikac wangec gadabiyeng.

<sup>9</sup> Ngic hae-gbafocne, ngagegaing. Wowosae-ngic ye nu lobina biyac kwesi flu domagac. Ngenge yowawa wawedaingkale, ngengungtihac yowa kwekwe mi ainagudaing. <sup>10</sup> Siduc-mimi ngic molickelu Sugucnele wacka yowa milu gaibong, yenge tatakic mikac umac balu ulucne gaibong. Ngic hae-gbafocne, ngenge yengele silic ingucne hac balaibelu inguc aidaing. <sup>11</sup> Ngagegaing, ngic-nigigac tatakic mikac gaibong, yengele ngagebeng kwele-angackolec aiwec. Aime ngenge Yople yowa-siduc biyac ngageibong. Ye umacka sanangne tatakic mikac gawecte ailu, Sugucnedi yela pasi madicne bawec. Sugucnedi kwele-sowac sugucne hac, nga ngageboc mikac aibabaine ingucne aicaigac.

### *Yowa sanangkenale mi minoga*

<sup>12</sup> Aime ngic hae-gbafocne, yowa noine monic yanguc, ngenge yowangi-neng sanangkenale wiyac monic wackelu mi mibong sanangkedaic. Ngenge honocmeng me himong wackelu yowangineng mibong mi sanangkedaic. Ailu wiyac sugucne monic wackelu inguchac mi mibong sanangkedaic. Ngenge galu yowawa wawedaingkale, “foinac” yogo foinac. Nga “miyac” yogo miyac, inguc sugu midaing.

### *Ngage-ngagesingkolec milockenoga*

<sup>13</sup> Ngengelacni ngic me ngigac monicti umac gocne fikecnodaictewa, ye milockedai. Ailu monicti belic-belicka gadaictewa, ye mimiteng gee holedaic. <sup>14</sup> Aime ngengelacni monicti huc aicnodaictewa, Yesule habu damong wacebame yengi yele ailu Sugucnele wacka helocti hosocnolu milockedai. <sup>15</sup> Inguc aibong mimiloc ngage-ngagesingkolec, yogodi huckolec ye bamadickedaicte. Ailu Sugucnedi bafickeme fangakedaicte. Aime ye bikickolec aigacka, Sugucnedi bikicine hegileme miyac aiyackedaicte. <sup>16</sup> Ilec ailu ngenge madickenogale bikicngineng ngengungtihac mifickeyackelu mimilocti baficnagudaing. Monic ye dondonnedi milockedai, yogodi wiyac tapiliineholec ailu babaficinaholec aidaicte. <sup>17</sup> Elaiya ye ngicbenang nongileng ingucnedi mac mi kwenale milockeme mac mi kweme hifa habackang nga nebocene aiwec. <sup>18</sup> Ailu ye hatacmac milockeme sawawacni mac kweme himongti nosing hatacmac kweficke fikewec.

### *Yefe lilonoga*

<sup>19</sup> Ngic hae-gbafocne, ngengelacni monicti yowa noinele yefe lilolu kosa hikedaiictewa, monicti ye bafickeme ye hatacmac hefaliyedaicte. <sup>20</sup> Ailu ye yanguc ngagedai, ye ngic bikickolec bafickeme sowacnele yefewacni hefaliyegac, ye ngic yele kwele-asuine homackacni bamoctocnome, bikicine bocycac miyac aidaicte.

## Pita Yedi Molic-molic Hibi Kwelengkewec

### *Mimi-yegeng yowa*

Pita, ye Yesule mic-tengteng monic. Yedi Yesu homalu homackacni gboliyelu fangkeme hifa 34 ngama ingucne motome, hibi yago kwelengkelu Yesule habu gocne yengela saleme hikewec. Dameng iwa ye Roma iwa gawec. Yesule habu yogo yenge Asia prowins nebocina kiwec Saecne fawec, emeina mac-alung faibong, yenge mac-alung iwa gaibong.

Ngic-ngigac Yesu ngagesingkeibong, yengele ngabadi umac yeleibong. Ilec ailu yenge Yesu hegiledaingkale, Pitadi baficebanale hibi yago kwe-lengkeyelewec.

### *Yowa yago hibi nebocina fagac*

1:1-2 Molic-molic yowa

1:3-2:10 Kristoholec gagale fungine

2:11-4:11 Habu gocne yengeholec madicne gadaing

4:11-5:12 Ngaba yengi umac yelebong umackolec gaibong

5:12-14 Yowa moto-motoine nga wenac-madic yowa

### *Hibile molic-molic yowa*

<sup>1</sup> Na Pita, Yesu Kristole salecebaicne gagabac. Wapongti bawosaecnge-bame Pontus nga Galata ailu Kapadosia nga Asia ailu Bitinia himongka gagaing, ngic-ngigac ngenge himontowa yagowa kwilic kwesilu singsalolong kwelu gagaing, ngengele hibi yago kwelengkenelegabac. <sup>2</sup> Wapong Mamacti biyachac ngageme fawecte, yedi bawosaecngebalu yanguc mimoc-towec, Tili Asudi ngengela bole bame ngenge sugule-sanangkelu Wapongte bingec aidaingte. Inguc ailu ngenge Yesu Kristole yowa balaibebong, yele sacti wickeme suwenggebawec gagaing. Yele kwele-madic nga kwele-mogungtwadi ngengela sawelu fadaic.

### *Gaga-sanangte wangec gagaing*

<sup>3</sup> Wapong ye Sugucnenonggeng Yesu Kristo yele Mamac, ye mimitengine-holec. Yedi kwele-sowactowa ngagenolelu Yesu Kristo bagboliyeme homackacni fangkewec. Yefe iwa nongileng gaga bafuwanoleme fike-fike gblolicne fikeibeng. Inguc fikelu wangec gagabeleng. <sup>4</sup> Ye inguc aime mole-damocngineng honocmengka felu baningte biyachac lowec fagac. Aime wiyc yogo mi miyac aidaicte. Ailu yogo nalic mi dangedaicte, yogo ghagbacne faginowagac. <sup>5</sup> Ngenge ngage-ngagesingkolec gaebungka Wapong ye tapiliinheolecti damongngebame dameng moto-motoina wasecne aidaingte. Inguc fikenale efeckelu fagac.

<sup>6</sup> Aime dameng kpisicnemac yagowa umac nga lokwesac haicine monic-monik fikengeleme, ngenge sifu wiyc lobewa kwesidaicte, yogolec ngagelu mamang hidulu beliyelu gagaing. <sup>7</sup> Gol silicine ngagegabeleng. Ngic yengi yogo esoickelu silicine ngani-motonogale dacka lobong lobeme wosae-caigaing. Aime gol noine yogo fikedaicte. Ailu yogo sifu lobewa miyac aidaicte. Aime umac nga lokwesacti ngage-ngagesingngineng esoicke-bong noine yegengkegac, yogo gol ewalilu wiyc feicne aigac. Yesu Kristodi fikelu yegengkedaicte, dameng iwa ngage-ngagesingngineng yogodi

mimi-madicneholec nga wac feicnecoholec ailu alang-babaineholec aidaicte. <sup>8-9</sup> Ngenge ye dongenginengti mi nganiibong. Ailu sifu kwelenginengti yele angac ngagegaing. Ailu yanguctihac ye mi nganicaigaing. Ailu sifu ngenge ye ngagesingkegaing. Ailu ngenge ye ngagesingkebong, yedi kwele-asunginang bikicte ameine bame, ngenge wasecne aigaing. Ngenge yogo ngagesilu belic-belic sugucnehad nga wac feicnecoholec ailu gagaing.

### *Wapongti wiyac baningte aling lowec*

<sup>10</sup> Siduc-mimi ngic yenge ngengi Wapongte kwele-madic banogale siduc-yowa miibong. Ailu ngenge wasecne aidaingte. Aime yengileng yefe yogo ngage-motoninge boletowa balu gaibong. <sup>11</sup> Inguc aibong Kristole Asudi yengele kwelewa game, Kristo ye doic ngagelu lobewa wac feicnecoholec banowagac, yogo Kristole Asudi kwelenginang gawecte gungka biyachac edalicebame mibong yegengkewec. Ailu yogo male yowa, nga ma damenkfa fikeme nganinogale donge hilalu gaibong. <sup>12</sup> Donge hilalu yengileng nganiningte miyac, yogo ngenge baficngebanogale yowaine mibong yegengken-gelewec. Aime Wapongti yogo edalicebame yenge ngage-motoibong. Aime Wapongti Tili Asu honocmengkacni himongka saleme walu tapili yeleme, gocne yenge Siduc Madicne yogo balu ngengela mibong yegengkeme ngageibong. Aime angelo yenge inguchac yogo nganinogale aiyelecaigac.

### *Gaga gbolicne*

<sup>13</sup> Ilec ailu kwele ngage-ngagegome wosaelu aibabagone ailu gageicne damongnagulu Yesu Kristole kwesi-kwesi damenkfa fikelu yegengkedaicte, iwa kwele-madicne balu kwsidaicte. Ga ngage-ngagegome bucbuchac yele kwele-madicka sanangne loengka fame wangec gadamec. <sup>14</sup> Ngenge esecne Siduc Madicnele yowa mi ngage-motolu socte angac balaibelbong. Ailu ngenge adu-madec ingucne yowa balaibelu gadabiyeng. Aime socte angacti hatacmac mi damongngebadaic. <sup>15</sup> Wapongti wacngebawec, ye gbagbacne, aime ngenge ingucnehad hadengsoc aibabangineng gbagbacne aidaing. <sup>16</sup> Ilec yanguc kwelengkeicne fagac, "Na gbagbacne. Ilec ailu ngenge gbagbacnehad gadabiyeng." (*Dep 11:44-45; 19:2; 20:7*)

### *Kristole sacti fuli bacnubawec*

<sup>17</sup> Wapong ye lemi-welemi mi facnogac. Ailu ye ngic-ngigac filesoc filesoc aibabanginengte silicka yowangineng mimoctogac. Aime ngenge ye "Mamac" wackedaingtewa, ngenge yakumac kwilic gagaing, dameng yagowa yele hangocngebame alang bacnolu gadabiyeng. <sup>18</sup> Ngenge esecne ngam-bofocngineng yengele gagawa moc gaebongka, Wapongti fulingineng balu bikicte muckacni lukecnubawec, yogo siliwa me goldi mi fuli bacngebawec. I yangucte, siliwa nga gol yeke miyac aidabiyecte. <sup>19</sup> Yebac Kristole sacti fuli bacngebawec. Aime Kristole sac yogo wiyac feicnebenang, ye lama madecine monic puling, me sowacneine mikacti depekte lama ingucne wehomawec.

<sup>20</sup> Himong nga sawa mi fikeebocka, Wapongti Kristo biyachac bawosaewec. Bawosaeme ye yakumac dameng moto-motoina ngengele ailu fikelu yegengkewec. <sup>21</sup> Fikelu yefe bafuwangleme, yanguctihac Wapong ngagesingkelu gagabiyeng. Ye Madecine homackacni bagboliyeme fangkeme

**1:7:** Ynn 17:3; Sek 13:9; Mal 3:3; Yak 1:3    **1:8-9:** Yoa 20:29; 2Kor 5:7    **1:10:** Mat 13:16-17

**1:11:** Mige 22; Yes 53; Luk 24:26-27    **1:14:** Rom 12:2; Efs 2:3; 4:17-18    **1:16:** Mat 5:48    **1:17:**

Rom 2:11; Miye 2:23    **1:19:** Wah 12:5; 29:1; Dep 22:17-25; Sale 20:28; Hib 9:12-14    **1:20:** Efs 1:4

wac feicne lacnowec gagac. Ilec ailu ngengileng Wapong ngagesingkelu yela ngage-ngagengineng lolu wangec gagabiyeng.

### *Wapongte yowa faginowagac*

<sup>22</sup> Ngenge yowa noine balaibebong yogodi kwelenginang suweme, kwe-lenginengti angac sugucne hac ngagelu aigabiyeng. Ilec ngenge ngic hae-gbafoengineng yengele kwelengineng gbagbacnedi angac kwesac mikac ngagelu damengsoc aiyeledabiyeng. <sup>23</sup> Wapongte yowa yogo gagaine-holec ailu sanangne domagac. Yowa yogodi bagboliyecngebame fike-fike gabolicne fikeibong. Yogo socte wasec hucine dongke-dongkeineholec ingucne miyac. Yogo dongke-dongkeine mikac, yogodi kwodu ofelu gaga-sanangkolec aidaicte.

<sup>24</sup> Ilec yowa yanguc kwelengkeicne fagac, “Ngic-ngigac sasawa himongka gagaing, yenge kpinding ingucne. Ailu wac-ningeng feicne yogo daling aliline ingucne. Yenge kpinding nga daling aliline dangkecaigaing, yogo ingucne hac molongkelu dangkedaingte.

<sup>25</sup> Sugucnele yowadibac fafa-sanang fagidaicte.” *(Yes 40:6-8)*

Yogodi Siduc Madicne aigac. Aime ngic yenge yogo mibong yegengken-geleme ngageibong.

## 2

### *Asule amuc*

<sup>1</sup> Ilec ailu ngenge sisipilic haicine monic-monic nga kwesac-aibaba ailu hasowac aibaba hegiledaing. Ailu ngic-ngigac mi sulecebadabiyeng.

<sup>2-3</sup> Sugucne ye madicne, ngenge yogo biyachac nonganiibong. *(Mige 34:8)* Ilec ngenge kogoc gabolicnedi amucte aincnoaigac, silicine ingucne hac Wapongte yowa yogo asule amuc gbagbacne yogo lec aingeledaic. Ngenge yogo nolu sugulebong yedi bikicte ameine bame wasecne aidaingte.

### *Depec-baba ngic gbagbacne*

<sup>4</sup> Sugucne ye posatowa gagaineholec ingucne, ngenge yela kwesilu gagabiyeng. Ngic yenge posa yogo lec posa sowacne milu baickeibong. Aime Wapontibac posa yogo lec ngageme feicne aime yogo hocne bawosaewec.

<sup>5</sup> Aime ngenge inguchac posa gagaineholec yele silic aigaing. Aime Waponti ngenge posa ingucne bacngebali asule ibu-macine bacngebacaigac. Bac-ngebame ngenge yeicne depec-babale bingec ailu Asule yefewa mimitengti depec ingucne logaing, yogo Yesu Kristole ailu Waponti nganime madick-eac. <sup>6</sup> Ilec Wapongte hibiwa yowa yanguc kwelengkeicne fagac,

“Ngagegaing, na posa-bosing silicine monic feicne yogo bawosaelu Sion iwa gunungkegabac. Monicti ye ngagesingkedaictewa, ye nalic mi gameedaicte.” *(Yes 28:16)*

<sup>7</sup> Ngic-ngigac ye ngagesingkelu gagaing, ngengela posa yogodi silicine monic alang-babaineholec aigac. Nga mi ngagesingkegaing, yengele yanguc fikedaicte,

“Mac-baba ngic yengi posa monic sowacne milu wickeibong. Aime posa yogodi macte posa-bosing ailu sanangne domadaicte.” *(Mige 118:22)*

<sup>8</sup> “Aime yenge posa yogodi edebong kwopocebame wawelu ngage-sowac bafuwadaingte.” *(Yes 8:14)*

Yenge Wapongte yowa wecaigaingte inguc aidaingte, yowa yogo biyachac yengele milu loicne.

**9** Wapongti hocne ngenge ngengung kundungkacni kwesiningte wacngebala angocina hefolecngebalu yeicne angocene feicne, iwa locngebawec.

"Aime ngenge Wapongte pasi tapiliineholec mibong yegengkenale, yedi ngenge alingfocine bawosaecngebawec. Aime ngictaule depec-baba ngic bacngebame gagaing. Ngenge yeicne bingecte aling bacngebame ngic-ngigacfocine gagaing." (*Wah 19:5-6; Yes 43:20*)

**10** Ngenge esecne Wapongte habu moniyang mi gaibong, miyac. Aime yaku-macbac Wapongte ngic-ngigacfocine ailu yele habu gagaing. Ngenge esecne Wapongte kwele-sowac monic mi nganilu gaibong. Aime yanguctihac yele kwele-sowac nganilu gagaing.

### *Ngage-ngagesingngineng mikac yengeholec galu baficebanoga*

**11** Agofocne kwelenedi ngengele angac ngagegabac, ngenge himong yagowa kwilic gagaing.\* Ilec ngenge kwele esecnele angac haicina monic-monicti kwele-asunginang hudu wecaigac. Aime ngenge yogo hegilelu ganingte sanangne migabac. **12** Ngenge ngic-ngigac Wapong mi ngagegaing, yengele hewacka aibabangineng madicne ailu gadaing. Yengi ngenge yanguc misowalecngebagaing, "Ngenge yefe-yowa hegilecaigaing." Inguc milubac aibabangineng madicne nganibong Wapongti yengela kwsidaicte, dameng iwa yenge wacine bafedaingte.

### *Micne yenge alang bacebadaing*

**13** Ngenge Sugucnele ailu kiya gamang nga ngic sugucne, yengele bagewa galu yowangineng ngagelu gadabiyeng. Yogo ngictaudi tapili feicne balu gagac, **14** aime yele bagewa gawana sasawa gagaing. Ngictaudi boleyowa yeleme yenge ngic-ngigac aibabangineng sowacne aicaigaing, yenge ameine baduyelecaigac. Nga aibaba madicne aicaigaing, yenge mitengeba-caigac. **15** Ngic ngage-wosaecnjineng mikac yenge wiyc monic mi ngage-motogaing, yogo yenge ngengi aibabangineng madicne aibong nganilu yowa mi midaing, yogodi Wapongte angac aigac. **16** Ngenge muti mi witicngebaincne. Aime muc mikac gaga yogo gagaingte ailu sisipilic aibabanonggeng nalic aidabelengte milu mi ngagedaing, miyac. Ngenge Wapongte kwelel kwekwe aling gadabiyeng. **17** Ailu ngenge ngic-ngigac sasawa alang bayelelu ngage-ngagesingkolec ngic hae-gbafocnjineng kwe-lenginengti angac ngageyefelu aidabiyeng. Ailu Wapongte hangocngebame alang bacnolu ngictau alang bacnodbabyeng.

### *Doicka sanangne gadaing*

**18** Kwelec kwekwe ngic gagaing, ngenge sugucnefocnjineng alang bace-balu yengele bagewa galu yowangineng ngagelu gadabiyeng. Sugucnefocnjineng ulucne nga madicne gagaing, yengele sugu miyac. Ngenge sugucne sowacne momochac inguc aiyeledabiyeng. **19** Monic ye Wapongte yowa kwele ngage-ngageina fame yogo balaibelu game nganilu, sifu ye umacka lobong doic ngagedaicte. Ailu aibaba iwa ye sanangkelu domagacte aibaba yogodi kwele-madicineholec aigac. **20** Aime ngic yengi bikicnjinengte ailu wecngebabong ngenge doicka felu yogolec bagewa sanangne gadaingtewa, yogolec wiyc monic madicne mi fagac, miyac. Ngenge aibabangineng madicne aibong doicka locngebabong yogolec bagewa sanangne gadaingte, yogodi Wapongta kwele-madicineholec aigac.

**2:9:** Yef 7:6; 14:2; Yes 9:2; Tit 2:14; Sale 26:18; Efs 5:8      **2:10:** Hos 2:23      \* **2:11:** Macnjineng noine yogo honocmeng.      **2:11:** Gal 5:17,24      **2:12:** Mat 5:16      **2:13:** Tit 3:1      **2:15:** 1Pi 3:16

**2:17:** Rom 12:10      **2:18:** Efs 6:5      **2:20:** 1Pi 3:14,17

### *Kristole hige-yefe*

<sup>21</sup> Ngenge inguc ainingte Wapongti wacngebawec. Ailu ngenge Kristole hige-yefe balaibeningte ye ngengele ailu doic ngagelu yefe yogo edalicngewec.

<sup>22</sup> "Ye bikic monic mi bafuwawec. Ailu yele mickacni kwesac-yowa monic mi ngageibong." (Yes 53:9)

<sup>23</sup> Aime yenge misulec aicnobong ye yowangineng ameine monic mi bafaliyelu miwec. Ailu ye doic ngagelu yenge basowalecebanogale monic mi aiwec, miyac. Ye umacine yogo Wapongti yowa dononna wosaelu micronale, yele molewa lowec. <sup>24</sup> Ye yeicne socinedi nongileng bikic atickelu malicpongka domawec. Domame nongileng bikickacni homalu yefe dondonne balaibenangte inguc aiwec. Aime ye weibong, doic yogodi ngengele kwelele huc-doic yogo bamadickenale baficngebawec. <sup>25</sup> Ngenge esecne lama ingucne yefe lilolu singsalolong kwelu gaibong. Aime yanguc-tihac Lama-damong yela biyachac hefaliye kwesibong, yedi hocne kwele-asungineng ngani-damong aingelecaigac.

## 3

### *Ngawe-ngigac gaga*

<sup>1-2</sup> Aime ngigac, ga kwelec kwekwe aicaigaing, yefe yogohac ngawegone yele bagewa galu yowaine ngagelu gadamec. Aime ngic monicti Wapongte yowa mi ngagesingkedaictewa, ngigacine, ga yowa mikac aibabagonedi madicne aicaigic. Aime ngawegone ye aibaba yogo nganime aibabagonedi Sugucnele yefewa nalic fuluckeme hikedaitce. <sup>3</sup> Ngigac ngenge hodoc-dowecngineng mideckecaigaing. Nga kwanang goldi baicne socnginang locaigaing. Ailu ngakpi-kpoluc ngani-nganiine madicne holecaigaing. Aibaba yogodi aibabangineng madicne mi bafuwadaicte. <sup>4</sup> Aime asungineng ulucne nga kwele-mogungkolecti kwelengineng kwelina sangke-sangke fagac, yogodi ngani-ngani madicne bafuwadaicte. Yogolec hibile tapiliine mi wacaigac ailu faginowagac. I yangucte, Wapongte haicka yogodi wiyc feicne aigac. <sup>5</sup> Ngigac esecne Wapongte bingec gaibong, yenge silicine ingucnehab hibingineng bawalu ngawefocngineng yengele yowa ngagelu Wapongta ngage-ngagengineng lolu wangec gaibong. <sup>6</sup> Yogo Sara ingucne, ye ngaweine Abrahamte yowa balaibelu "sugucnene" milu gawec. Ngenge aibaba madicne aigacgu ngic me wiyc monicte mi hangocngebagacka, ngenge Sara adufocine ailu gagaing.

<sup>7</sup> Ngigacte tapili, yogo ngictesoc miyac. Ngic ngigackolec, ga yogo ngagesilu yogolec silicka yeholec gadamec. Aime ga gagale kwele-madic yogolec mole-damoc yogo yeholec momochac badabiyete. Aime wiyc monicti gale mimilocte aka holedaickale ailu, ngigacgone alang bacnolu gadamec.

### *Kwele-angacka dofincnagudabeleng*

<sup>8</sup> Yowa kpatulelu mibe, ngenge sasawadi kwele ngage-ngagengineng moniyang fadaic. Ngenge kwele-sowac aiyelelu kweledi angac ngagelu aiyelelu kwele-sowacka baficebalu ngengileng bawacnagulu gadabiyeng.

<sup>9</sup> Ngic-ngigac yenge sowacne aingelebong, ngenge sowacne ameine mi aiyeledabiyyeng. Ailu yenge misofoc aingelebong, ngenge ameine misofok-olechac mi aiyeledabiyyeng, miyac. Mimi-madic yogo ngengele mole-damoc

ainale wacngebaince. Ilec ailu ngengi yenge inguchac mimi-madic milu edocebadabiyeng.

<sup>10</sup> I yangucte,

“Monic ye gagale angac ngagelu gagac, ailu dameng madicne nganinogale aicnolu gagac, ye yowa sowacne nga kwesac-yowa midaickale, micine damongkedaic.

<sup>11</sup> Ye aibaba sowacne lobe holecnolu aibaba madicne ailu gadaic.

Ailu ye kwele-mogungete yefe bafuwanale bole sanangne badaic.

<sup>12</sup> Sugucnedi ngic-ngigac dondonne yengela donge hilalu mimilocnginengte hedec locaigac.

Nga sowacne aicaigaing, yengebac lobe holecebalu hegilecebacaigac.” (*Mige 34:12-16*)

### *Doickolec gaga*

<sup>13</sup> Ga aibaba madicne ainogale mamang hidulu aidamectewa, weni yengi basowalecgudaingte? Yenge nalic mi basowalecgudaingte. <sup>14</sup> Aime sifu ngenge dondonne gaganginengte ailu, yengi ngenge doicka locngebadaingtewa, yogo ngenge kwele-angackolec.

“Ngenge yengele damungebame hangoc mi aidaing.”

(*Yes 8:12*)

<sup>15-16</sup> Aimebac ngenge Kristo kwelenginang lobong Sugucnengineng aime balu gadaing. Ailu madicnengineng yogolec wangec gabong lobewa kwesidaicte, yogolec fungine sasawadi uwangelebong ameine bafaliyelu edocebaningte damengsoc efeckelu gadabiyeng. Ngenge ameine uwanogale ngageboc mikac, ulucne nga alang babaineholec ailu kwele ngagengeneng gbagbacne galu ameine bafaliyelu edocebadaing. Ngenge inguc aidaingtewa, Kristole ailu aibabangineng madicne aicaigaing. Yogolec ailu ngic mimi-soling aingeletaigaing, yenge gameebadaicte. <sup>17</sup> Monic ye aibabaine madicnele ailu Wapongti ngagecnogacka doicka lodaingte, yogodi madickedaicte. Aime monic ye aibabaine sowacnele ailu doicka lodaingte, ye mi mitengkedaing.

### *Kristo doicka loibong*

<sup>18</sup> Kristodi Wapongte emewa locngebanale alecine moniyang bikicte amengineng bame doicka loibong. Ngic dondonnedi ngic-ngigac nongileng dondonne miyac, nongilengte ailu inguc aiwec. Ye sockapet webong homawec, aime asuwapeckabac bagboliyeme gagac. <sup>19</sup> Galu aleng gocne muc-macka gagaing, yengela hikelu yowa edocebalu weduyelewec. <sup>20</sup> Noa ye wageine baemewa aleng yenge Wapongte yowa hegileibong, yogo yengela hikewec.

Noale damengka Wapongti ngic-ngigac yengele tatakic mikac wangecneng gawec. Aime Noa ye wageine badickeme, dameng iwa Wapongti ngic-ngigac efecnemac, 8 sugu misawacni baicebame wasecne aiibong.

<sup>21</sup> Misa yogodi Misa-lowacti umackacni bamoctocngebagac, yogolec ilucine aigac. Misa-lowac yogo sokte wonong monic mi suweyackedaicte, miyac. I yangucte, Yesu Kristodi homackacni gboliyelu fangkewecte ailu, kwele ngage-ngagengineng madicne aigacte, misa-lowac yogodi Wapongte haicka inguc yegengkedaicte. <sup>22</sup> Yesu ye biyachac honocmengka fewec. Ailu ye Wapongfoleinapecka gagac. Aime angelo nga wiyac gocne wac sugucne baicne, ailu wiyac gocne bole-yowa tapilinginengkolec, yogo yenge yele bagewa biyachac locebaicne gagaing.

**4***Wapongte yowa balaibenoga*

<sup>1</sup> Kristo ye sockolec doicka loibong. Aime ye doic ngagewec, silicine ingucne hac ngenge nalic ngagedaingte, ngage-ngage yogodi malekungineng ingucne aidaic. Monic ye sockolec game doicka loibongka, ye bikicte yefe biyachac hegilewec. <sup>2</sup> Ilec ailu yanguctihac sockapec domalu ye ngic-ngigac yengele angac haicine monic-monic hatacmac mi balaibedaicte. Yebac Wapongte ngage-ngage nga angac sugu balaibedaicte. <sup>3</sup> Ngic-ngigac Wapong mi ngagegaing, yengele socte gagale angac yogolec aibaba yanguc fagac. Selo-boic aibaba nga ngani-angac aicaigaing. Ailu misa sanangne aling-focngineng yengeholec nolu kwelengineng sifuweme gee wecaigabiyyeng. Ailu yefe lilolu siduc-gbong haicine monic-monic balaibecebalu alang bac-bacaigaing. Ngenge esecne aibaba ingucne ailu gaibong, aibaba yogolec dameng biyac miyac aigac. <sup>4</sup> Yenge aibabangineng silicine haicine monic-monic kosabenang homacne hac aibong, ngenge yengeholec hatacmac mi taockelu gagaing. Aime yenge yogo nganilu ngagegbong silicine monic aime misulec aingelegaing. <sup>5</sup> Aime Wapong ye ngic gbolicne nga homaicne aibabangineng mimoctonale efeckelu gagac, yenge yela funginengineng midaing. <sup>6</sup> Ngic-ngigac yenge Siduc Madicne mime yegengkeme ngagelu homaibong, yenge esecne sockapec gaga gaibong, yogolec ameine homaibong. Ailu sifu asuwabac Wapong gagac ingucne hac nalic gadaingte.

*Bole haicine monic-monic ngelewec*

<sup>7</sup> Wiyac sasawa yogo miyac ainingte dameng biyac bangkalegac. Ilec ngenge mimiloc bole baningte kwele basifuc mi ailu damongnagulu gadabiyeng. <sup>8</sup> Kweledi angac ngagelu ainagulu gaga yogodi yengele bikic haicine monic-monic bocyac someckeyackegac. Ilec ngenge mamang hidulu kweledi angac ngagelu ainagulu gadabiyeng, yogodi wiyc feicne aigac. <sup>9</sup> Ngenge tatakic nga lobe-yowa mikac galu kwele-madicke hefolecnagulu macka lonagulu damongnagudabiyeng. <sup>10</sup> Waponti ngageboc mikac kwele-madicinele tapili haicine monic-monic botoc balu ngelewec. Ilec ngenge Wapongte kwele-madicke galu filesoc filesoc baficnagulu wiyc yogo madicne damongkelu gadabiyeng. <sup>11</sup> Monic ye yowa noine ngic-ngigac yengela mime yegengkegacka, ye Wapongte yowa balaibelu fungine mime yegengkedaic. Nga monic ye baficebalu gacaigacka, ye Waponti tapili lacnoaigac, yogolec silicina babafic bole badaic. Inguc aibong ngic-ngigac yenge aibaba sasawa yogo nganilu, Yesu Kristole ngagelu Wapong wacine bafedaingte. Yela wac feicne nga tapili moto-motoine mikac fafeginowagac, yogo foinac.

*Doicka galu belyedabiyeng*

<sup>12</sup> Agofocne kwelenedi ngengele angac ngagegabac, lokwesac doickolec fikengeledaicte, yogolec mi kwatackedaing. Aime yogo fikengeledaicte, yogodi aibaba fulune mi aigac. <sup>13</sup> Aime inguc fikengeledaicte iwa, ngenge Kristoholec taockelu doic ngagelu yogolec silicina belyedaing. Inguc aibong ye gacgu wac feicne fikelu yegengkedaicte, dameng iwa ngengele belic-belic sugucne hac fikedaicte. <sup>14</sup> Aime ngic-ngigac yengi Kristole wacte ailu yowa kwelu midelec aingeledaingtewa, ngenge kwele-angackolec. I yangucte,

yenge inguc aingelebong, Wapongte Asu wac feicnemholec, ye ngengele kwelewa gagac. <sup>15-16</sup> Aime monic ye wacine, "Kristole aling," inguc miningte doic ngagedaictewa, ye yogolec mi gameedaic. Ye wac yogolec ailu Wapong wacine bafedaic. Aime ngengelacni monicti ngic-wewe, me woc-wiyac hisebaba, me kindololo ngic gacaigac, me ngic-ngigac gocne yengele wiyacte andac ailu kwelina haucaigac, ye abbabaine ingucnele ailu doic ngagelu gameedaicte. Ilec ngenge aibaba ingucne mi ailu gadaing.

<sup>17</sup> I yangucte, Wapong ye molickelu yeicne golowacfocine yengela aibabangineng wosaelu mimoctonale damengngine bangkalegac. Aime ye nongilang boleine yogo molickelu badaictewa, aling gocne yenge Siduc Madicnele yowa kwecaigaing, yogo yengela boleine ingucne hac taockelu aibabanginengte ameine umacne hac yeledaict. <sup>18</sup> Aime,

"Ngic-ngigac dondonne gacaigaing, yenge wasecne aidaingte, yogo efecne miyac, umacineholec. Aibaba ingucne fikeyeledaictewa, bikicbaba ngic nga Wapong lobe holecnocaigaing, yengela wenuc fikedaict? Wapongti amengineng umacnebenang yeleme doictowa ngagedaingte."

(Ynn 11:31)

<sup>19</sup> Ilec ailu ngic-ngigac gocne Wapongti ngageyelewecte doic ngagecaigaing, yenge aibabangineng madicne aidaing. Ailu kwele-asungineng bucbuchac Wapongti himong nga sawa bafuwawec, yele molewa lodaing. I yangucte, ye mic-yowaine balaibelu gagac.

## 5

### *Ngic micne*

<sup>1</sup> Kristo ye doic ngagewec, yogo dongenedi nganiiba. Aime yogolec mibasanang ailu gagabac. Ailu yele wac feicne fikedaict, iwa nongileng momochac gadabelengte. Yesule habu damong, na ngengeholec inguchac bole yogo balu gagabac. Ilec ailu sanangne milu yanguc edocngebagabac, <sup>2</sup> Lama-damong ye lamafocine madicne damongebacaigac, silicine ingucne hac ngenge Wapongte habudi ngengele hewacka gagaing, yenge madicne damongebadabiyeng. Bole yogo kwele-umacka mi badabiyeng, ngenge kwele-madiccka bole yogo babong Wapongti ngageme madickedaict. Ailu ngenge ngage-ngagenginang hiye-monengkolec ainingte bole yogo mi badabiyeng. Ngenge bolengineng yogo mamang hidulu badabiyeng. <sup>3</sup> Wapongti habu ngelewec, yogo ngengi yengele feicne ingucne mi gadabiyeng. Ngenge aibaba madicne ngic-ngigac habu yogo edalicebabong, yenge yogo nganilu balaibedaing. <sup>4</sup> Inguc gaebongka Damong Sugucnedi lama-damong ingucne fikelu yegengkedaitc, dameng iwa yedi wac feicne dangke-dangkeine mikac ngeledaict.

### *Ulucne gaga*

<sup>5</sup> Soc-gboli ngenge inguchac damongfocngineng yengele bagewa galu yowangineng ngagelu gadabiyeng. Ailu ngenge sasawadi bawacnagudabiyeng, yogodi ngakpi-kpoluc ingucne holebong haudaic. I yangucte, "Wapongti ngic soc bafefe gagaing, yengele takickeme ngaba aigac. Nga soc-kwelengineng bawalu gagaing, yenge kwele-madic aiyelelu gagac." (Ynn 3:34)

<sup>6</sup> Ilec ngenge Wapongte mole sanangne yogolec bagewa bawacnagudaing. Inguc gaebongka Wapongti yeicne damengka wacngineng bafedaict. <sup>7</sup> Ye

yeuctihac ngani-damong aingelelu gagacte, ngenge kwele-umacngineng sasawa yela lodabiyeng.

### *Sanangne domadaing*

<sup>8</sup> Ngabangineng Aleng Sugucnengineng, ye laion ingucne aukwelu lolickelu ngic-ngigac gbocebanale basacebalu boletowa balu gagac. Ilec ngenge sanangne domalu deboc-gboli galu damongnagulu <sup>9</sup> ngage-ngagesingnginengti Aleng Sugucnenginengte yowa wepackedaing. Wepackelu yanguc ngagedaing, ngage-ngagesingkolec ngic hae-gbafofngineng himongne himongne gagaing, yenge doic ingucnehac ngagelu gagaing.

<sup>10</sup> Wapong kwele-madic fileine, yele wac feicnedi fafa-sanang fagac, iwa ngengi Yesu Kristoholec ganingte yedi wacngebawec. Ailu ngenge doicka dameng bangkacnemac gaebongka, Wapong yeuctihac bamadicngebalu nenggac ngiyegeleme sanangkelu domadaingte. <sup>11</sup> Ye Tapili fileinedi gaganang gaginiowagac, yogo foinac.

### *Wenac-madic yowa*

<sup>12</sup> Sailas ye ngage-ngagesingkolec ngic hae-gbanonggeng yele yanguc ngagelu migabac, ye bolewa sanangne domalu baficnume hibi bangkacne yago kwelengkenelegabac. Na Wapongte kwele-madic noine yogolec mibasanang ailu mibe yegengkegac, ngenge yogolec hewacka sanangne gadabiyeng. <sup>13</sup> Aime Babilon \* taonka Yesule habu gagaing, Wapongti yenge nga ngenge momochac bawosaecngebawec, yenge nga madecne Mareko, yenge wenac-madic yowa ngengela lobong fugac. <sup>14</sup> Ngenge wenac-madic milu kwele-angacka molewa babac ainagudaing.<sup>†</sup> Ngic-ngigac sasawa Kris-toholec wetackelu gagaing, kwele-mogungti ngengung fadaic.

---

**5:7:** Mat 6:25-30    **5:8:** 1Tim 5:6    **5:9:** Efs 6:11-13; Yak 4:7    **5:12:** Sale 15:22,37-40;  
12:2,25; 13:13    \* **5:13:** Babilon, yogo Roma taonte nangeng yowa monic, yedi kwelengkewec.  
**5:13:** 2Tim 4:11    † **5:14:** Pitale damengka yenge aibabanginengte ailu yanguc kwelengkewec,  
“kwele-angackolec muducnagudaing.”

## Pita Yedi Hibi Monic Hatacmac Kwelengkewec

### *Mimi-yegeng yowa*

Pita, ye Yesule mic-tengteng monic. Yedi Yesu homalu homackacni gboliyelu fangkeme hifa 36 ngama ingucne motome, hibi yago kwelengkelu Yesule habu gocne yengela saleme hikewec. Wewedu gocne yengi kwesac-yowa milu weduyeleibong. Ilec ailu Yesule yowa noine sanangne balu domaninge kwelengkeylelewec.

### *Yowa yago hibi nebocina fagac*

1:1-2 Wénac-madic yowa

1:3-21 Ngage-ngagesingte gaga

2:1-22 Kwesac-yowale sawang-yowa miwec

3:1-18 Yesu hatac kwesidaicte

### *Hibile molic-molic yowa*

<sup>1</sup> Na Saimon Pita, Yesu Kristole kwelec kwekwe ngic nga salecebaicnedi hibi yago kwelengkenelegabac. Yesu Kristo ye Wapong nga Asa-baba ngic-nonggeng, ye dondonne. Ilec ailu nongileng ngage-ngagesingte fengngine moniyang bafuwolanolewec. Yogo wiyac feicnebenang. Ngic-ngigac inguc ngagesingkegaing, ngengele kwelengkenelegabac. <sup>2</sup> Aime ngenge Wapong nga Sugucnenonggeng Yesu yeke momochac ngagecepabong, yekele kwele-madic nga kwele-mogungtowadi ngengela sawelu fadaic.

### *Yeicne ingucne hac gaga*

<sup>3</sup> Wapongti yeicneholec ganangte madicnebenangine nga yeicne wac feicne yogowa wacnubawec. Nongileng Wapong ye noine inguc ngagebeng, yeuctihac kwesilu yeicne gaga nga yefe balaibenangte tapili sasawa nolawec.

### *Ngage-ngagesingkolec gaga*

<sup>4</sup> Aime yefe yogowa Kristodi mimipangine madicne nga feicne yogo nolelu locnubame gagabeleng. Inguc aime ngenge Wapongte gagawa taockelu himongte angac yogo hegilelu nalic gagaing. <sup>5</sup> Ngenge gaga yogolec ailu efeckelu sanangne domalu ngage-ngagesingnginengti aibaba madicne bafuwadaing. Aime aibabangineng madicnedi ngage-ngage-motoc bafuwadaing. <sup>6</sup> Aime ngage-ngage-motocnginengti damongngebame gaga bafuwadaing. Bafuwame gaga yogodi sanangne gaga bafuwadaing. Aime sanangne gagadi Wapongte yowa balaibelu bafuwadaing. <sup>7</sup> Wapongte yowa balaibe-balaibedi ngic hae-gba kweledi angac ngagenagulu gaga bafuwadaing, yogodi ago aiyelelu kweledi angac ngagelu aiyelebong gaga bafuwadaing.

<sup>8</sup> Aibaba sasawa yogodi ngengela sugulelu sanangne fayackegacka, ibac ngenge Sugucnenonggeng Yesu Kristo ye ngage-motolu gagaing. Gabong gaga yogolec noine madicne bocyac fikengeledaicte. Ilec monic mi kpungkedaingte. <sup>9</sup> Aime monic ye gaga yogo mi facnogacka, ye dongepisic ingucne ailu wiyac dalicka yefe nalic mi ngani-motodaicte, silicine yogolecsoc. Ye bikicine esecne suweicne, yogo biyachac ngigekewec.

**10** Ngic hae-gbafofne, ngenge Wapongti biyachac wacngebalu bawosaecngebabewc. Ilec ngenge mamang hidulu sanangne domaning. Inguc aidaingtewa, nalic mi wawedaingte. **11** Inguc aibong yedi kwele-madictowa aingelelu, Sugucne nga Asa-baba ngicnonggeng Yesu Kristo yele gagasanangte ngani-damongka bacngebalu fedaicte.

### *Pitadiyeicne homanale yowa hatac edocebawec*

**12** Ngenge yowa noine biyachac ngagelu balu gaibong, yogo ngagegabac. Ailu sifu damengsoc yowa yogo hatacmac edocngebanogale ngagegabac. **13-14** Ailu socne yago hegilenogale damengngine bangkalegac, Sugucnenonggeng Yesu Kristodi yogo biyachac mime yegengkeme ngageiba. Ilec sockolec gagabac, iwa yowa gocne hatacmac edocngebanogale ngagebe dondongkegac. **15** Aime na bole yogo damengsoc mamang hidulu balu gagabac. Bagacu homabe, yowa yogo mi ngigecngebadaicte.

### *Sugucne dongenonggengti nganiibeng*

**16** Nonge Sugucnenonggeng Yesu Kristole tapili nga kwesi-kwesile miibeng, yogo siduc esecne kwesacineholec taockebeng angacine ainale mi miibeng. Nonge yele tapili nga wac feicne dongenonggengti nganilu ngageibengte ailu yowa yanguc migabac. **17** Wapong Mamac, ye Tapili nga Wac feicnetowaholec, yedi Yesu alang bacno-bacno nga wac feicne lacnome yowa-malacinedi fikelu yanguc miwec, “Yogo nale Madec, kwelenedi yele angac ngagegabac. Na ye ngani-angac aicnogabac.” (*Mat 17:5; Mrk 9:7; Luk 9:35*)

**18** Nonge Wapong yeicne tikiwa yeholec momochac domabeng yowa-malac yogodi honocmengkacni fikeme ngageibeng.

### *Siduc-mimi yengeleyowa*

**19** Inguc ngageibengte siduc-mimi ngic yengi yowa esecne kwelengkeibong, yogo nongilang sanangne fagac. Yowa yogo hifa monic ingucne ailu, mac-himong kundung fagac, iwa kweme angolegac. Yowa yogo ngagesidaing. Ngagesigacgu ubiyacte asocmengti kwelenginang angolelu bacngebame yegengkedaingte, yogo Yesule kwesi-kwesi dameng ingucne aigac. **20** Aime siduc-mimi ngic yengele yowa sasawa Wapongte hibiwa kwelengkeicne fagac, yogo yenge yengileng kwelenginengte yowa monic mi miibong, miyac. Ngenge yogo ngage-motodaing. **21** I yangucte, siduc-yowa yogo ngic angacka fikeme mi miibong, yogo Tili Asudi bacebame Wapontacni yowa kwesime miibong.

## 2

### *Siduc-mimi kwesacine*

#### *Yud 4-13*

**1** Esecne Israel ngic-ngigac yengele hewacka siduc-mimi ngic kwesacine gaibong, ingucnehabc ngengele hewacka wewedu kwesacine inguchac gadaingte. Yenge mimi-sifuc yowa gocne kwesacine milu ngengela bakwesilu ngage-ngagesingneng basowaledaingte. Aime Sugucnedi biyachac fuli bacebawec, yenge ye inguchac bisockelu yengungtihac umac yengileng feiwa lobong, yogodi basowalecadaicte. **2** Wewedu kwesacine yenge aibaba sowacne haicine monic-monice gameineholec aibong, ngic-ngigac bocyacti yogo balaibedaingte. Aime ngic-ngigac gocne yengi aibaba yogo

nganilu yowa noinele yefe yogolec misulec aidaingte. <sup>3</sup> Aime wewedu yogo yenge ngengele woc-wiyacte hane aibaba ailu kwesac-yowa milu ewalicingbedaingte. Aime Wapongti pasi ingucnele esecne hac mimoctowec. Ailu yenge yowawa locebalu basowalecebadaicte.

### *Ameine baduyeledaicte*

<sup>4</sup> Angelo yenge bikic bafuwabong, Wapongti mi olocebawec, yenge dac-sanangka wicebame hauibong. Haubong yedi kundung sanangnele long iwa witicebawec. Witicebame mimocto-mimoctole damengte wangec gagaing. <sup>5</sup> Aime Noale damengka ngic-ngigac habu sugucnedi Wapongte yowa mi ngagebong mi olocebawec, miyac. Ye mime misa-lumongti ofelu yenge somecebame homaibong. Aime Noa ye aibaba dondonnele edoce-bawec, ye nga yeholec ngic-ngigac 7, yenge sugu olocebawec. <sup>6</sup> Aime Sodom nga Gomora taon, yeke mimoctocepalu basowalecepame dac defenginec sugu fawec. Aime ngic-ngigac Wapongte yefe lilolu gagaing, yengela gacu pasi ingucne hac fikenale edalicebalu inguc aiwec. <sup>7</sup> Yenge selo-boic aibaba, nga sowacne haicine monic-monie ailu Wapongte yowa weibong. Aime Loti ye ngic dondonnedi aibabangineng ingucne nganilu kweleine umaleme Wapongti olockewec. <sup>8</sup> Ye ngic dondonnedi yengele hewacka gawecte, hadengsoc yefe-yowa welu gaibong, yogo nganilu kweleinedi yengele aibaba sowacnele ailu umac balu takickeme gawec.

<sup>9</sup> Ngenge yogo nganilu Sugucnele yefe yanguc ngagedaingte, ngic-ngigac Wapong alang bacnolu yele yowa balaibecaigaing, yengela lokwesac fikeyeleme, Sugucnedi yenge olocebadaicte yogolec tapili facnogac. Nga ngic-ngigac dondonne mi gacaigaing, yenge muc-macka locebame ngiy-eebongka, yowawa locebadaitc yogolec dameng kwsidaicte. <sup>10</sup> Ngic-ngigac yenge kwele esecnele angac balaibelu aibaba sowacne wonongkolec aicaigaing, yedi yengela inguc hocne aicaigac. Yenge sugucnengineng lobe holecnolu yowainele mife-miwa aicnolu yengileng angac balaibelu hangoc mikac sawawale angelo wac feicneholec sulecebadaingte. <sup>11</sup> Aime angelo tapilingineng feicnebenang yenge sifu Sugucnele haicka yenge mi wosaelu sulecebacaigaing.

### *Wewedu kwesacine*

<sup>12</sup> Sic yenge ngage-ngaengeneng mikac angacngineng balaibecaigaing, yenge sebuwa muti bacebame wecebaningte fikecaigaing. Aime wewedu kwesacine yenge sic ingucne moc angacngineng balaibecaigaing. Ailu wiyc gocne mi ngagegaing, yogo yowa milu sulecebacaigaing. Ailu yenge aibabangineng sowacne balaibebong yogodi basowalecebadaicte. <sup>13</sup> Yenge aibaba sowacne ailu yogolec ameine badingte. Yenge mic-heloc ailu wenac hewac-hewacka nosing nga misa sanangne bocyac nolu lolic holeningte aiyelecaigac. Aime yenge ngengeholec nosing mic-walec momoc noicaigaing, iwa yenge aibaba wonongkolec nga gameineholec ailu beliyelu gacaigaing. <sup>14</sup> Inguc galu aibaba sowacne bocyac ailu selo-boic ngigac yengele angac ngagelu heloc ailu bikic bafuwacaigaing. Ailu ngic-ngigac ngage-ngaengesingka mi sanangkeicne, yenge aibaba sowacna yowa heloc aiyelecaigaing. Ailu hane aibaba ainogale wedunagucaigaing. Aling ingucne yenge Wapongte aalicte bagewa gagaing.

<sup>15-16</sup> Balam Beor madecine, ye moneng-mafale angac ngagelu Wapongte yefe lilolu hiye-monengte bole bawec. Bame donggi yowa mi micaigacti,

ngic-malac ingucne yowa milu haneckewec. I yangucte, Wapongte siduc-mimi ngicti yefe lilolu aibaba kapaine aidaickale, aka holecnowec. Aime wewedu kwesacine, yenge Balamte yefe balaibelu yefe dondonne hegilelu yefe lilolu gagaing. <sup>17</sup> Misa dongeine dike-dikeine, nga lai-yafala gbelong yeki mac mikac kaguwa moc welu igockecaigaic, wewedu kwesacine yenge silicne ingucne, yowa mipangkecaigaing, yogo noine mi fikecaigac. Waponti yengele mac ngiye-ngiye yogo kundung saecnebenang iwa ganinge loyelewec.

<sup>18</sup> Ngic-ngigac yefe liloaigaing, yengelacni gocnedi baickelu yefe donna hikebong, wewedu kwesacine yengi yengela yowa heloc aiyele-gaing. Ailu yowa sugucne noine mikac yogo milu selo-boicte yefe nga kwele esecnele angacka hatacmac bacebacaigaing. <sup>19</sup> Aibaba sowacnele yefedi wewedu kwesacine witicebame, yenge yanguc mipangkecaigaing, "Ngic-ngigac yowanonggeng ngagedaingte, ngenge wiyac monicti mi witicngebadaicte." Inguc milu yefe liloaigaing. I yangucte, ga wiyac monicti witicgudaictewa, yele kwelec kwecnodamecte. <sup>20</sup> Aime yenge Sugucnenonggeng nga Asa-baba ngicnonggeng Yesu Kristo ngage-motolu himongte aibaba wonongkolec biyachac heggleibong. Ailu yenge hatacmac bikickolec aidaingtewa, umactowanginengkolec aidaingte. Aime umac yogodi esecne umackolec gaibong, yogo ewaligac.

<sup>21</sup> Monic ye Sugucnele ung-yowa gbagbacne balu yefe dondonne ngagelu gagac, ye iwacni hatacmac hefaliyelu umac sugucnehat bafuwadaicte. Entacka ye molickelu yefe dondonne mi ngagedecka umac efecne aidec. <sup>22</sup> Aime yowa monic yanguc milu kwelengkeicne fagac, "Hoda ye mengulu memenguine yogo hatacmac hefaliyelu nocaigac." (Ynn 26:11)

Nga

"Bec ye misa lowalubac hatacmac nolac lowadaicte."

Yowa yogolec noine yengele gagawa fikelu gagac.

### 3

#### *Kristo kwesidaicte*

<sup>1</sup> Agofocne kwelenedi ngengele angac ngagegabac, ngengele hibi alecine yaekang yago kwelengkenelegabac. Hibi yaekang yagodi kwele ngagengagengineng hole-gboliyeme ngage-motolu gbagbacne gadabiyyeng. <sup>2</sup> Wapongte siduc-mimile bingec, yenge wiyac lobewa fikenale yowa yogo biyachac kwelengkeibong. Aime Sugucne Asa-baba ngicnonggengti ung-yowa salecebaicne yeleme, yengi ngengela kwesilu yogo edocngebaibong. Aime yogo ngagebong fawecte hatacmac hole-gboliyengelegabac.

<sup>3</sup> Ngenge yanguc ngage-motodaing, dameng moto-motoina mimi-soling ngic-ngigac gocne yenge fikedaitingte. Fikelu yengileng aibaba sowacne bal-aibelu kwele fangke-fangke nga mimi-soling aingeletu <sup>4</sup> yanguc midaingte, "Ngic kwesinalte mipangkewec, ye weni yogo gagac? Waponti molickelu wiyac sasawa mime fikeibong. Aime ngesa-mamacfocnonggeng homai-bongkacni doma ofegacgu yakumac gagabeleng, iwa wiyac sasawa esecnehat fikelu fawec, ingucnehat yakumac fikelu fagac. Ilec Yesu mi kwesidaicte."

<sup>5</sup> Yenge inguc milu siduc yanguc fagac, yogo hegilegaing. Wapongti esecnebenang yowa mime sawa fikewec, aime himong misawacni fikelu ofe yegengkelu misaholec fawec. <sup>6</sup> Aime ye gacgu hatacmac misa edome sugulelu himongka wiyac sasawa fawec, yogo someckeme sowalelu miyac aiyackewec. Yenge siduc esecne yogo hegilegaing. <sup>7</sup> Aime Wapong ye hatacmac yowa mime, himong yago nga wiyac sasawa yanguctihac sawawa fayackegac, yogo dacte wangec locebame fagaing. Gacgu ngic-ngigac Wapong lobe holecnolu gagaing, yenge yele yowawa ameine balu sowaledaingte, dameng iwa himong nga wiyac sasawa fayackegac, yogo dacti lobeyackedaichte.

<sup>8</sup> Agofocne kwelenedi ngengele angac ngagegabac, ngenge wiyac moniyang yagolec mi ngigecngebadaic, Sugucnele ngage-ngagewa hadeng moniyang yogo hifa 1 taosen ingucne aigac. Aime hifa 1 taosen, yogo hadeng moniyang ingucne aigac.

<sup>9</sup> Sugucne ye kthesinale mipangkewec, dameng yogo igockeme uneng hikelu gagac, ngic gocne yengi inguc micaigaing. Aime inguc miyac. I yanguchte, ngic-ngigac dac-sanangka hauningte takicebacaiagac. Ngic-ngigac sasawadi kwele-hefaliyec ainingte aicnogac, yogolecbac ye tatakic mikac wangecngineng gagac. <sup>10</sup> Aime hise-baba ngic yengele kwesi-kwesi dameng mi ngagecaigabeleng, silicine ingucnehat Sugucnele damengtowa yogo kthesidaichte. Dameng iwa sasawa wiyac sasawa fayackegac, yogo dacti lobeyackedaichte. Aime sasawa yogo uctowaineholec aockeme miyac aiyackedaichte. Aime himong nga wiyac sasawa moledi baicne feina fayackegac, yogo hatacmac mi fadaingte.

<sup>11-12</sup> Inguc aihu wiyac sasawa sasawa fayackegac, yogo dacti lobocebay-ackeme miyac aiyackedaichte. Ilec aihu ngenge gagangineng damongkelu gbagbacne galu Wapongte yowa seibilelu alang bacnolu gadabiyeng. Inguc galu Wapongte damengtowa kwesidaichte, yogolec hataecnolu wangec gadabiyeng. <sup>13</sup> Aime himong nga sasawa gbolicne iwa wiyac dondonnedi sugu fadaichte, yogo lobewa fikenale mipangkewec, nongileng yogolec wangec gagabeleng.

### *Damongnagulu gadabeleng*

<sup>14</sup> Ilec aihu agofocne kwelenedi ngengele angac ngagegabac, ngenge wiyac yogolec wangec galu Yesule haicka domabong yanguc bafuwadaic, ngenge kwele-moniyang galu gbagbacne nga wonong mikac gagabiyeng. Inguc fikenale filesoc mamang hidulu gadabiyeng. <sup>15</sup> Aime ngenge wasecne ainingte Sugucnenonggengti tatakic mikac boleine balu gagac, ngenge yogo ngagesidaing. Aime ngic hae-gbanonggeng Pol kwelenedi yele angac ngagegabac, Wapongti ngage-ngage-motoc lacname, ye yogo balaibelu yowa yogo hocne ngagesilu hibiwa kwelengkeneleme wafeibong. <sup>16</sup> Aime ye hibi sasawa kwelengkewec, yowa yogohac yago kwelengkenelegabac, yogo momochac mime yegengkegac. Aime ye yowa kwelengkenelewe, yogo Wapongte hibi. Yowa gocnedi yegenia mi aigac. Ilec aihu ngic-ngigac gocne ngage-ngage-motocngineng mikac gagaing, yenge yowa yogo bafaliyebong yefe monicka hikecaigac. Aihu Wapongte hibi gocna yowa fagac, iwa inguchac aicaigaing. Ngic-ngigac yogo yenge yengung basowalecnagudaingte.

<sup>17</sup> Agofocne kwelenedi ngengele angac ngagegabac, ngenge yogo biyachac ngageibong. Ilec yefe-yowa wecaigaing, yengi mengocngebabong ede-sufalelu yefe sanangne iwacni wawedaingkale, ngenge damongnagulu

sanangne gadabiyeng. **18** Aime Yesu Kristo ye Sugucnenonggeng nga Asababa ngicnonggeng, ngenge yele kwele-madic nga ngage-ngagetowa iwa sugulelu sanangkedabiyeng. Ye yakumac nga damengngine moto-motoine mikac wacine bafedabeleng, yogo foinac.

## Yoane Yedi Molic-molic Hibi Kwelengkewec

### *Mimi-yegeng yowa*

Yesu homalu homackacni gboliyelu fangkeme hifa 60 ngama ingucne motome, Yoane, ye Yesule mic-tengteng monic, yedi hibi yago kwelengkelu Yesule habu gocne yengela saleme hikewec.

Ngc gocne yengi kwesac-yowa yanguc miibong, “Soc-biuc yogo wiycac sowacne suga aigac. Ilec Yesu ye soc-biuckolec noine mi aiwec. Aime Yesu ye Wapongte Madec noine miyac. Ailu Yesu ye hatacmac mi kwesidaicte.” Yenge kwasac-yowa inguc mibong ngageibongte ailu sawang-yowa kwelengkeyeletu yowa noine nga kwele-angacte aibaba basanangkewec.

### *Yowa yago hibi nebocina fagac*

1:1–4 Hibile yowa noinele fungine

1:5–2:17 Angoche yefe nga kundungte yefe

2:18–2:27 Kristole ngaba

2:28–3:24 Wapongte adu-madecfocine noine

4:1–5:4 Kwele-angacte fungine

5:5–21 Wiyac noine ngage-motogabeleng

### *Yowadi gagaholec aigac*

<sup>1</sup> Ngic esecnebenang molickelu gawec, yele siduc kwelengkenelegabebeng. Nonge ye hedecnonggengti ngagelu, dongenonggengti ngani-nganiine nga aibabaiñe nganilu, molenonggengti bauwaibeng. Yowadi gagaholec aigac, ngic yele hocne mibeng yegengkegac. <sup>2</sup> Gaga-sanang fileine ye hocne fikeme nganilu, yele ailu mibasanang aingeletu mibeng yegengkeme edocngebacaigabeleng. Ye esecne Mamackolec gawecti nongilang fikewec. <sup>3</sup> Nonge wiycac ngani-ngagec aibeng, yogo ngenge nongeholec gaga walec ganangte mibeng yegengkegac. Aime gaga walec, yogo Mamac nga Madecine Yesu Kristo, yekeholec momochac walec gagabeleng. <sup>4</sup> Nongileng sasawa belic-belicti wakenolenale yowa yago kwelengkenelegabebeng.

### *Angocka gagac*

<sup>5</sup> Nonge yelacni yowa yago ngagelu ngengela yanguc mibeng yegengkegac, Wapong ye angoc, aime yela kundung monic mi fagac, miyac.

<sup>6</sup> Aime yeholec momoc walec ganangte milu sifu kundungte aibabawa gadabelengtewa, nongileng kwesac ailu aibaba noine mi balaibedabelengte.

<sup>7</sup> Ye angocka gagac. Aime nongileng ingucnehab angocka gagabelengka, gaga walec moniyang gagabeleng. Inguc gaebengka madecine Yesule sacti bikicnonggeng sasawa suwenoleyackegac.

<sup>8</sup> Aime bikic mikac gagabeleng midabelengtewa, nongileng kwesac aibeng yowa noinedi kwelenonggang mi fadaicte. <sup>9</sup> Aime bikicnonggeng mifickebeng, Wapong pasi dondonne balu yeicne yowa balaibelu gacaigacti, bikicnonggeng hegilenolelu sowacnenonggeng sasawa suweyackedaicte.

<sup>10</sup> Aime nongileng bikic monic mi bafuwaibeng midabelengtewa, Wapong ye kwesac-ngic ingucne mibeng yele yowadi kwelenonggang monic mi fadaicte.

## 2

<sup>1</sup> Adu-madecfocne, ngenge bikic mi baningte hibi yago kwelengkegabac. Aime monicti bikic bafuwadaictewa, nongileng ngic-hewacnonggeng monic gagac, yogo Yesu Kristo. Ye ngic dondonnedi Mamacte dongewa pasi dondonne bacaigac. <sup>2</sup> Ye nongileng bikipte aili yeuctihac bikipte ameine badu-badule fuli biyachac bawec. Aili nongileng sugu miyac, himongtowa yagolec ngic-ngigac sasawa, yengele momochac bawec.

<sup>3</sup> Aime nongileng Wapongte ung-yowa fagaing yogo balaibegabelengka, ye ngage-motolu gagabeleng, inguc ngagegabeleng. <sup>4</sup> Monic ye Wapong ngagegabac milu yele ung-yowa mi balaibecaigac, ye kwasac-ngic aili yele kwelewa yowa noine monic mi fagac. <sup>5</sup> Aime monic ye Wapongte yowa ngagelu balaibedaicte, ye kwele ngage-ngaigeinedi Wapongte angac ngagec-name yagolec noine bamadickedaicte. Yefe iwa hocne Wapongte kwelewa gagabeleng, yogo ngage-motogabeleng. <sup>6</sup> Aime monic ye Wapongte kwelewa gagabac micaigac, ye Yesudi gaga gawec, ingucnehaic gadaic.

<sup>7</sup> Agofocne kweledenedi ngengele angac ngagegabac, na ung-yowa gbolicne monic mi kwelengkegabac, miyac. Ngenge yowa esecne molickelu balu ngagelu gaibong, yogohac hatacmac kwelengkegabac. Ngenge yowa esecne ngageibong, yogodi ung-yowa esecne aigac. <sup>8</sup> Kundung baickeemewa angoc noinedi biyac fikelu angolegacte aili ung-yowa yago gbolicne hatacmac kwelengkegabac. Yogodi Sugucnela nga ngengela noine aigac.

<sup>9</sup> Aime monic ye angocka gagabac milu ngic hae-gbaine kweledi wickedaiete, ye kundungka gagac hocne. <sup>10</sup> Aime monic ye ngic hae-gbaine ago aicnolu kweleinedi yele angac ngagecnolu aicnoaigac, ye angocka game kweleina wiyac monicti okac ingucne mi aicnodaicte. <sup>11</sup> Nga monic ye ngic hae-gbaine kweledi wickedaiete, ye kundung kwelina lolickedaicte. Aime kundungti dongeine bame kundung kweme, ye yefe wenuwa hikiegac, yogo mi ngagedaicte.

<sup>12</sup> Adu-madecfocne, Wapongti Yesule wacte aili bikicngineng hegilewec. Yogolet aili hibi yago kwelengkenelegabac.

<sup>13</sup> Mamac, ngenge ngic esecne fungina molickelu gawec, aili gagac, ngenge ye biyachac ngageibongte aili hibi yago kwelengkenelegabac. Aili soc-gboli ngic, ngenge Kindololo fileine biyachac ewalibongte aili, hibi yago kwelengkenelegabac.

<sup>14</sup> Adu-madec, ngenge Wapong Mamac biyachac ngagecnoibongte aili, hibi yago kwelengkenelebac.

Mamac, ngic esecnahac molickelu gawec, aili gagachac, ngenge ye biyachac ngagecnoibongte aili, hibi yago kwelengkenelebac.

Soc-gboli ngic, ngenge tapilinginengkolec aili Wapongte yowadi ngengela fame, Kindololo fileine biyachac ewalibongte aili hibi yago kwelengkenelebac.

### Himongte angac

<sup>15-16</sup> Ngenge himongtowa yagolec gaga nga himongtowa yagolec wiyac sasawa fagac, yogolet angac mi ngagedaing. I yangucte, himongtowa yagolec wiyac sasawale angac yogo yanguc fagac. Socti angackolec gaga, nga donge-helockolec gaga, aili himongtowa yagolec moneng-mafale aili wac sugucneholec gaga, yogo Mamactacni miyac. Yogo himongtowa yagowacni. Aime monic ye himongtowa yagolec angac ngagelu gadaicte, yele kwelewa

Mamacte angac mi fagac. <sup>17</sup> Aime himongtowa nga aibabaine angacine, yogo gacgu miyac aiyackedaidaite. Aime monic ye Wapongte yowa bal-aibecaigac, ye gagaine moto-motoine mikac gaginowagac.

### *Kristole ngaba*

<sup>18</sup> Adu-madecfocne, dameng yago motonogale aigac. Aime Kristole ngaba kwesinale mibong ngageibong, ngaba ingucne bocyacbenangti biyachac fikelu yegegkelu gagaingte ailiu dameng motonogale aigac, yogo ngage-motogabeleng. <sup>19</sup> Yenge nongilengkolec gaibong. Ailiu sifu nongileng alingkacni miyacte hegilecnubaibong. Nongileng alingkacni aidabongka midec yenge nongilengkolec gadabong. Yenge sasawa nongileng alingkacni miyac, yogo yegena fikelu yegegkenale, inguc fikewec.

<sup>20</sup> Aime Kristo ye gbagbacne, yedi Asu ngeleme ngenge sasawadi yowa noine ngageyackegaing. <sup>21</sup> Ngenge yowa noine mi ngagegaing milu ngengele hibi yago mi kwelengkegabac, miyac. Ngenge yowa noine ngagegaing. Aime yowa noinacni kwesac monic mi kwesicaigac, yogo ngage-motogaingte ailiu hibi yago kwelengkenelegabac.

<sup>22</sup> Yesu ye Mesia gagac, monicti yogo bisockedaidaite, ye kwersac-ngic aidaite. Aime monic ye Mamac nga Madec yeke bisopepadaidaite, ye hocne Kristole ngababenang aidaite. <sup>23</sup> Monic ye Madec bisockedaidaite, ye Mamackolec mi wetackelu gadaite. Nga monicti Madecte mime yegegkeme ngagesingkedaite, ye Mamackolec inguchac wetackelu gadaite.

<sup>24</sup> Ngenge ngengileng yowa molickelu ngageibong, yogodi ngengele kwelewa fagidaic. Ngenge inguc aidaingtewa, Madec nga Mamac yekeholec wetackelu gadabiyengte. <sup>25</sup> Madec ye yeuctihac gaga-sanang nolenale mipangkelu edocnubawec. <sup>26</sup> Ngic gocne yengi kwsacka mengocnge-badaingkale, hibi yago kwelengkenelegabac.

<sup>27</sup> Ngic ingucne yengi wedungelegenogalesoc mi aigac. Yesudi esecne Asu ngeleme baibong, yogodi kwelenginang falu wiycsasawa wedungeledeidaite. Ailiu Asudi yowa wedungeledeidaite, yogo noinebenang, yogo kwsac miyac. Ngenge yefe iwa yeholec wetackelu gadabiyeng.

### *Wapongte adu-madec*

<sup>28</sup> Adu-madecfocne ngagening, Yesu ye fikelu yegegkenale nongileng yele kwesi-kwesi damengka yele haicka game mikac sanangne domanangte ngenge yeholec wetackelu gadabiyeng. <sup>29</sup> Yesu ye dondonne, ngenge inguc ngagegaingka, ngenge inguchac yanguc ngagegaing, monic ye aibaba donne aicaigac, ye Sugucnele ngic fikewec gagac.

## 3

<sup>1</sup> Ngagegaing, Mamac ye yeicne adu-madecfocine wacnubanale kweleangac sugucnebenang nolewec. Aime nongilengti hocne yele adu-madecfocine gagabeleng. Aime himongtowa yagolec ngic-ngigac yenge Yesu mi ngageibongte ailiu nongileng inguchac mi ngagecubagaing. <sup>2</sup> Agofocne kwelenedi ngengele angac ngagegabac, nongileng yakumac Wapong adu-madecfocine gagabeleng. Gacgu wenuc aidabelengte, yogo mi mime yegegkenoleme ngagegabeleng. Gacgu ye fikelu yegegkeme nganinoga, yogowabac yeicne silic ingucne aidabelengte, yogo ngagegabeleng. <sup>3</sup> Ngic-ngigac Yesuholec wetackelu madicne yogo fikenale ngagesingkelu wangec

**2:15-16:** Rom 8:7; 13:14    **2:17:** Mat 7:21    **2:18:** Mat 24:5,24; 2Yoa 7    **2:19:** Sale 20:30

**2:20:** 1Kor 2:15    **2:22:** 1Yoa 4:3; 2Yoa 7    **2:23:** Yoa 5:23; 1Yoa 4:15; 5:1    **2:27:** Yoa 16:13

**2:29:** 1Yoa 3:10    **3:1:** Yoa 1:12-13; 16:3    **3:2:** 2Kor 3:18

gagaing, yenge sasawadi gagangineng suweyackelu ye gbagbacne gagac, silincine ingucne hac gbagbacne aidaingte.

<sup>4</sup> Aime ngic-ngigac bikic bafuwalu gagaing, yenge yefe-yowa welu gagaing. I yangucte, bikicti yefe-yowa baickegac. <sup>5</sup> Yesudi bikicnonggeng baickenale fikewec. Aime yela bikic monic mi fagac, ngenge yogo ngagegaing. <sup>6</sup> Aime ngic-ngigac yeholec wetackelu gagaing, yenge bikic mi bafuwalu gagaing. Aime ngic-ngigac bikickolec gagaing, yengi ye mi nganii-bong ailu ye mi ngageibong gagaing.

<sup>7</sup> Adu-madecfocne, monicti bikic nalic aidaingte milu kwsacka men-gocngebame ngenge ye mi balaibedabiyyeng. Monic ye aibaba dondonne aicaigac, ye Yesu ingucne ngic dondonne gagac. <sup>8</sup> Aleng Sugucnengenngti molickelu bikic bafuwawecete, monic ye bikicti aibaba aicaigac, ye hocne Aleng Sugucnengenngti ngic. Aime Wapongte Madecti Aleng Sugucnengenngti bole basowaleme miyac ainale ailu fikewec. <sup>9</sup> Ngic-nigic Wapongtacni fikeibong, yenge bikic monic mi bafuwacaigaing, miyac. Wapongte gaga yogodi yengele kwelewa fagacte bikic bafuwanganole kpungkedaingte. <sup>10</sup> Aime ngic-nigic aibaba dondonne mi aicaigaing, me ngic hae-gbafoengineng yengele kwelengenngti angac mi ngagelu aiyele-caigaing, yenge sasawa Wapongtacni miyac. Aibaba yogowa hocne weni yogodi Wapongte adu-madec nga weni yogodi Aleng Sugucnengenngte adu-madec, yogo yegengkedaicte.

### *Angac ngagenagudabeleng*

<sup>11</sup> Ngenge esecne molickelu yowa yanguc ngageibong, nongileng ago ainagulu kwelenonggengti angac ngagelu ainagudabeleng. <sup>12</sup> Ngenge Kein ingucne mi aidabiyeng. Ye Kindololo fileine balaibelu gbaine wehomawec. Omale wehomawec? I yangucte, ye yeicne aibabaine sowacne facnowec. Nga gbainele aibabadi nganime dondonne aiwecete ailu gbaine wehomawec. <sup>13</sup> Ngic hae-gbafoeng, himontowa yagolec ngic-nigic yengi kweledi wicngebadaingte. Aime ngenge wiyac yogo aibaba gbolicne fikegac inguc mi ngagedaing. <sup>14</sup> Nongileng ngic hae-gbafoengnonggeng yengele kweledi angac ngageyelelu aiyelecaigabelengte ailu homac hegilelu gagawa felu gagabeleng, yogo ngagegabeleng. Aime monic ye kweleinedi yengele angac mi ngageyelelu aiyelecaigac, ye homacka gacaigac. <sup>15</sup> Aime ngic-nigic ngic hae-gbafoengineng yengele kweledi wicebacaigaing, yenge sasawadi ngic-wewe ailu gagaing. Aime ngic-nigic ingucne yengele kwelewa gagasanang mi fagac, yogo ngagegaing.

<sup>16</sup> Yesu Kristo ye nongilengte ailu gagaine hegilewec. Aime pasi yogo nganilu kwele-angacte aibaba ngagelu gagabeleng. Ilec nongileng inguchac ngic hae-gbafoengnonggeng yenge baficebalu gaganonggeng hegilenogale efeckelu gadabeleng. <sup>17</sup> Monicti himontowa yagolec wiyackolec galu ngic hae-gbaine monic nganime sokte moneng-mafawa waweweine gagac. Inguc nganilu kweleina kwele-sowac mi ngagelu mi bafickedaictewa, Wapongte kwele-angacti yele kwelewa mi fagac.

<sup>18</sup> Adu-madecfocne, "Nongileng kweledi angac ngageyelelu aiyeledabeleng." Yogo micti me yowadi sugu mi midabeleng, miyac. Nongileng aibaba yogo noineholebenang aidabeleng. <sup>19-20</sup> Inguc ailu yowa noinele alingka gagabeleng, yogo ngagedabelengte. Aime kwelenonggengti wiyac monictie

yowawa locnubame, Wapongte haicka kwele-mogung gadabelengte. I yan-gucte, Wapong ye feicnetowanonggeng ailu ye nongileng kwelewa wiyac sasawa fagac, yogo ngageyackegac. Ailu Wapongti nongileng kwelewa ngage-ngage fagac yogo ewaligac.

<sup>21</sup> Agofocne kwelenedi ngengele angac ngagegabac, kwelenonggengti yowawa mi locnubadaictewa, Wapongta ngageboc mikac hikedabelengte. <sup>22</sup> Nongileng inguc galu ung-yowaine balaibelu yele angacka fagac, yogo ainogale, wiyac monicte Wapong uwacnolu bacaigabeleng. <sup>23</sup> Aime ung-yowaine yanguc fagac, nongileng Madecine Yesu Kristo ngagesingkedabeleng. Ailu kweledi angac ngagenagulu ainagudabeleng. Yedi ung-yowa yogo hocne nolewec. <sup>24</sup> Monic ye ung-yowaine balaibecaigac, ye Wapongte kwelewa game Wapongti yele kwelewa gagac. Ailu Wapongti Asuine nolewec kwelenonggang gagac. Ilec ailu Wapongti kwelenonggang gagac, yogo ngage-motogabeleng.

## 4

### *Siduc-mimi ngicte yowa ngani-wosaec ainoga*

<sup>1</sup> Agofocne kwelenedi ngengele angac ngagegabac, siduc-mimi ngic kwesacine bocyacti himongtowa yagowa lolickelu gagaingte ailu, ngenge yowangineng sasawa mi ngagesingkedaing. Ngenge ngani-wosaec ailu yengele asu yogo Wapongtaci me miyac, yogo ngani-motodaing. <sup>2</sup> Ngenge Wapongte Asu silicine yangucka ngani-motodaingte, ngic-ngigac sasawadi Yesu Kristo ye ngic soc-biuckolec fikewec gagac, yogo mibong yegengkedaicte, yenge Wapongtaci. <sup>3</sup> Aime ngic-ngigac sasawadi Yesule inguc mi mibong yegengkedaicte, yenge hocne Wapongtaci miyac. Ngic yogo yengi Yesu Kristole ngaba yele tapili bagaing. Ngaba ye esecne kwsinale mibong ngageibong, yele tapili hocne himongtowa yagowa biyac fame balu gagaing.

<sup>4</sup> Adu-madecfocne, ngenge Wapongtaci. I yangukte, ye ngengele kwelewa ngiyegac, yele tapilidi Kindololo fileine himongtowa yagowa gagac, yele tapili ewaligac. Ilec ailu ngenge siduc-mimi ngic kwesacine biyachac ewalicebalu gagaing. <sup>5</sup> Yenge himongtowa yagowacni. Ilec yenge himongtowa yagolet ngage-ngage bagalu yowa mibong, himongtowa yagolet ngic-ngigac yengi yengele yowale hedec logaing. <sup>6</sup> Nongileng Wapongtaci. Ilec ngic-ngigac Wapong ngagegaing, yenge nongileng yowa hedec kwelu ngagecaigaing. Aime monic ye Wapongtaci miyac, yedibac nongileng yowa mi ngagecaigac. Aibaba iwa hocne nongileng yowa noinele Asu nga asu kwesacine ngani-motodabelengte.

### *Wapongte kwele-angac*

<sup>7</sup> Agofocne ngengele angac ngagegabac, kwele-angacte aibaba, yogo Wapongtaci. Ilec nongileng ago ainagulu kwelenonggengti angac ngagelu ainagudabeleng. Aime ngic-ngigac kweledi angac ngagelu aicaigaing, yenge Wapongtaci fikeibong. Ailu yenge Wapong ngagegaing. <sup>8</sup> Wapongti kwele-angacka gagale fungine aigac. Ilec monic ye kweleina angac mi ngagelu aicaigac, ye Wapong mi ngagegac. <sup>9</sup> Aime Wapong ye Madecine moniyang sugu, yela gaga-sanang banangte saleme himongtowa yagowa wawec. Yefe iwa hocne Wapongti nongileng kweleinedi angac ngagelu ainolegac, yogo

yegengkegac. <sup>10</sup> Nongilengti molickelu Wapongte kwelenonggengti angac ngagelu mi aibeng, miyac. Yedi nongileng ailu kweleinedi angackeme Madecine yogo nongileng bikicte ailu yeuctihac bikicte ameine badu-badule fuli banale saleme wawec. Yogodi kwele-angacte fungine aigac. <sup>11</sup> Agofocne kwelenedi ngengele angac ngagegabac, Wapongti kweleinedi inguc angackeme ainolewecete, nongilengti inguchac kwelenonggengti angacnubame ainagudabeleng. <sup>12</sup> Monicti Wapong mi nganiwec. Aime nongileng kwelenonggengti angac ngagenagulu ainagugabelengka, Wapongti nongileng kwelewa game yele kwele-angacka gaga yogodi nongilang suguleme ngani-gaing.

<sup>13</sup> Aime ye yeicne Asuine nolewechte ailu yanguc ngagegabeleng, nongileng yele kwele kwelina gabeng, yedi nongileng kwele kwelina inguchac gagac. <sup>14</sup> Mamacti ngic-ngigac himongtowa yagolec bikicte amengineng banale Madecine lome wawec. Nongileng yogo nganilu mibeng yegengkeme gagabeleng. <sup>15</sup> Monic ye yanguc mime yegengkedaicte, "Yesu ye Wapongte Madec," Wapongti yele kwelewa game, yedi Wapongte kwelewa gagac. <sup>16</sup> Aime Wapongti kweleinedi angackeme ainolecaigac, yogo ngage-motolu ngagesingkelu gagabeleng.

Wapong ye kwele-angacka gagale fungine aigac. Aime monic ye kwele-angacka gaga gacaigac, ye Wapongte kwelewa game Wapongti yele kwelewa gagac. <sup>17</sup> Inguc gaebengka kwele-angacka gagadi nongilang sawelu sugulegac. Suguleme mimocto-mimocto damengka nongileng ngageboc mikac sanangkelu domadabelengte. Aime nongileng himongtowa yagowa Yesu ingucnehad ailu gagabeleng. <sup>18</sup> Hangockolec gaga, yogo ba-batingngineholec. Aime monic hangocka gagacka, kwele-angacka gaga yogo yela mi sugulelu gagac. I yangucte, kwele-angacka gaga yogodi hangoc mikac aigac. Illec ailu kwele-angacka gagadi sugucnehad fagac, yogodi hangoc baickedaicte.

<sup>19</sup> Wapongti molickelu kweleinedi angackeme ainolewecete kwelenonggengti angac ngagelu aigabeleng. <sup>20</sup> Aime monic ye "Wapongte kweleenedi angacnume aigabac" milubac ngic hae-gbaine ye kweledi wickedaicte, ye kwasac-ngic. Monic ye ngic hae-gbaine dongedi nganicaigac, yele kweleinedi mi angackeme aidaictewa, ye Wapong dongedi mi nganiicne, yele kweleinedi nalic mi angackeme aidaicte. <sup>21</sup> Sugucniedi ung-yowa yanguc nolewec, monic ye Wapongte kweleinedi angackeme aicaigac, ye ngic hae-gbafocene yengele inguchac kweleinedi angackeme aidaicte.

## 5

### *Madec ngagesingkenoga*

<sup>1</sup> Yesu ye Mesia gagac, ngic-ngigac inguc ngagesingkegaing, yenge Wapongtaci fikeibong. Aime monic ye mamac monicte kweleinedi angac ngagecnolu aicnogac, ye adu-madecinele inguchac kweleinedi angac ngagecnolu aicnogac. <sup>2</sup> Yagolec silicina nongileng Wapongte kwelenonggengti angac ngagelu aicnolu ung-yowaine balaibegabeleng. Inguc aigabelengka, yanguc ngagegabeleng, Wapong adu-madecfocene yengele kwelenonggengti angac ngageyelelu aiyelegabeleng. <sup>3</sup> Nongileng Wapongte kwelenonggengti angac ngagecnolu aigabeleng, yogo yanguc, ung-yowaine balaibegabeleng. Aime yele ung-yowa balaibelu gabeng umac mi nolegac.

**4** Ngic-ngigac Wapongtacni fikeibong, yenge sasawadi gbelong ailu himontowa yagolec tapili ewaligaing. Aime nongileng ngagesingkolecti gbelong ailu himontowa yagolec tapili sasawa ewalinoga. **5** Madi gbelong ailu himontowa yagolec tapili ewaligac? Yesu ye Wapongte Madec. Aime monic ye yogo ngagesingkedaicte, yedi sugu himontowa yagolec tapili ewaligac.

**6** Ye misawa nga sacka kwesiwec, yogo Yesu Kristo hocne.\* Ye misawa sugu mi kwesiwec, miyac. Ye misawa nga sacka momochac kwesiwec. Aime Asu ye yowa noinele Asu. Ilec ailu yedi Yesule mime yegengkegac. **7-8** Wiyac habackang, yogo Asu nga misa ailu sac, yenge Yesule mibong Wapongte Madec yegengkeme kwele-moniyang ailu gacaigaing. **9** Ngic yengi yowa mibong yegengkeme yowangineng ngagesingkecaigabeleng. Inguc aidabellentewa, yanguc ngagedabeleng, Wapongti yowa mime yegengkedaicte, yogodi feicne aigac. Ailu ye Madecinele yowa mime yegengkecaigac, yogo ngagesingkedabeleng. **10** Monic ye Madecine ngagesingkegac, ye kweleinedi yanguc mime yegengkegac, "Yesu ye Wapongte Madec." Nga monic ye Wapong Madecinele yowa mime yegengkewec, yogo mi ngagesingkegacka, yedi Wapong kwasac aicnogac, inguc micnogac. **11** Aime yowa yogodi yanguc edocnubame yegengkegac, Wapongti gaga moto-motoine mikac nolewec. Aime gaga yogodi Madecinela fagac. **12** Monic ye Madeckolec wetackelu gagac, ye gaga noineholec gagac. Nga monic ye Wapongte Madeckolec mi wetackelu gagac, yele gaga noine mikac aigac.

### *Hibi moto-motoine*

**13** Ngic-ngigac Wapong Madecine ngagesingkegaing, yenge gaganangkolec gagaing, ngenge yogo ngage-motoningte hibi yago kwelengkenelegabac. **14** Aime nongileng yanguc ngage-motolu ngagepangkegabeleng, wiyc monicte milockenogale milu yeicne angac balaibelu uwacnobeng, ye ngagenoledaicte. **15** Aime mimilocnongeng ngagenoleme, wiyc yogo noine biyac badabelengte, inguc hocne ngagabeleng.

**16** Monicti bikic monic bafuwadaicte, aime bikic yogodi gaga-sanang mi hedickecnogac. Aime monicti ngic hae-gba monicte bikic yogo nganilu yele ailu milockedaitewa, Wapongti bikickolec ngic ye gaga lacnodaicte. Bikic yogodi gaga-sanang mi hedickecnogac, inguc migabac. Aime bikicti gaganang hedickegac,<sup>†</sup> bikic ingucnele milockingte mi migabac. **17** Sowacne sasawa yogo bikic, nga bikic gocne yogodi gaga-sanang mi hedickegac.

**18** Nongileng yanguc ngagegabeleng, ngic-ngigac Wapongtacni fikeibong, yenge sasawadi bikic mi balu gagaing. Aime yeicne Madecinedi bacebame, Kindololo fileinedi nalic mi basowalecebadaicte. **19** Aime nongileng Wapongte adu-madecfocene gagabeleng, yogo ngage-motogabeleng. Aime himontowa yago nga ngic-ngigac ngage-ngagesing mikac yenge Kindololo fileinele tapilile bagewa fagaing. **20** Aime nongileng yowa noinele Fileine ngagenangte, Madecinedi walu ngage-ngage-motoc nolewec, yogo ngagegabeleng. Aime Wapong yowa noinele fileine, yele kwele kwelina nga Madecine Yesu Kristo, yele kwele kwelina momochac gagabeleng. Yesudi

---

\* **5:6:** Misa yogo Yesudi misa lowawec, dameng iwa nangeng yowa kwelengkewec. Nga sac yogo Yesu homawec, dameng iwa nangeng yowa kwelengkewec. **5:6:** Yoa 1:29-34   **5:7-8:** Yoa 15:26   **5:9:** Yoa 5:32-37   **5:10:** Gal 4:6   **5:12:** Yoa 3:36   **5:13:** Yoa 20:31   **5:14:** Yoa 14:13; 1Yoa 3:21-22   † **5:16:** Monic ye Yesu lobe holecnogac, ye gaga-sanang nalic mi badaicte.   **5:16:** Mat 12:31   **5:18:** 1Yoa 3:9

hocne Wapong noine ailu gaga-sanang. <sup>21</sup> Adu-madecfocne, ngenge siduc-gbong yengele emewa mi hikeningte damong balu gadabiyeng.

Yogo foinac.

## Yoane Yedi Hibi Monic Hatacmac Kwelengkewec

### *Mimi-yegeng yowa*

Yesu homalu homackacni gboliyelu fangkeme hifa 60 ngama ingucne motome, hibi yago kwelengkewec. Ngic kwelengkewec, ye ngaba yengele ngagelu wacine yegenia mi lowec mecne. Aime ngagegaing ngic wacine Yoane, ye Yesule mic-tengteng monic.

Hibi badaingte, yogo yengele ngagelu "nenggac nga adu-madecfogone" kwelengkewec. Ngic gocne yenge ngagebong ye Yesule habu monicte ngagelu nangeng yowa "nenggac" inguc milu kwelengkewec. Ailu motomotoina yowa ingucne yogo Yesule habu monic yengele ngagelu "senggone" kwelengkewec.

Yesule Siduc Madicne iwa "yowa noine" kwelengkewec. Ailu kwele-angacte aibaba basanangkelu ngic gocne kwesac-yowa weduyelecaigaing, yengele sawang-yowa milu kwelengkewec.

### *Kwele-madic yowa*

<sup>1</sup> Na Yesule habu damongngineng. Nenggac bawosaecguicne, ga nga adu-madecfogone ngengela hibi yago kwelengkenegelegabac. Na yowa noinele ailu ago aingelelu kwelenedi angac ngagengelelu gagabac. Ailu na sugu miyac, ngic-ngigac sasawa yowa noine ngagegaing, yenge inguchac ngenge ago aingelelu kwelenginengti angac ngagengelelu gagaing. <sup>2</sup> Aime yowa noinedi nongileng kwelewa fagacte inguc aigabeleng. Ailu damengsoc nongilengkolec faginowagac.

<sup>3</sup> Nongileng yowa noine nga kwele-angacka gaga gagabeleng, nongilang Wapong Mamac, nga Madecbenangngine Yesu Kristo, yekele kwele-madic nga kwele-sowac ailu kwele-moguntowa yogodi fanoledaict.

### *Ung-yowa*

<sup>4</sup> Adu-madecfogone gocne yenge yowa noine Mamacti mime ngageibeng, ung-yowa yogo balaibelu gagaing, na yowa yogo ngagelu belyegabac.

<sup>5</sup> Aime nenggac, na ung-yowa yanguc milockengelebe balaibedaing, Nongileng ago ainagulu kwelenonggengti angac ngagenagulu gadabeleng, yogo ung-yowa gbolicne mi kwelengkenegelegabac, miyac. Yogo hocne molickelu balaibelu gaibeng. <sup>6</sup> Aime Wapongte ung-yowafoce balaibelu gagabiyeng, yogodi kwele-angacte fungine. Aime ngenge kwele-angacte ung-yowa yogo molickelu ngageibong, yogo balaibelu gadaing.

<sup>7</sup> Aime kwele basifuc ngic bocyacti himontowa yagowa lolickelu gacaigaing. Yenge Yesu Kristo ye ngic soc-biuckolec fikelu gagac, yogo mi ngagesingkelu ye bisockelu gagaing. Ngic ingucne yenge Kristole ngababenang ailu kwele basifuc ngic. <sup>8</sup> Ngenge yogolec bulongineng madicne balu damongnagulu gadaing. Wiyac banogale boletowa baibeng, yogo hegiledaingkale, damong balu fulingineng bucbuchac badabiyeng.

<sup>9</sup> Ngic gocne yenge galu Kristole wewedu-yowa hegilelu yowa gocne taockelu gagaing, yenge Wapong mikac gagaing. Aime monic ye weweduyowaine sanangne balu game, Mamac nga Madec yeke momochac yeholec gagabiyec. <sup>10</sup> Nga monic ye wewedu-yowaine silicine ingucne hac mi balu kwesidaictewa, ngenge yeholec molewa babac mi aidaing. Ailu ngenge

ye macnginang mi mengockelu fedaing. <sup>11</sup> Monic ye ngic ingucne yeholec molewa babac aidaictewa, ye ngic yogo bafickeme, yele bole sowacne, yogo badabiyete.

*Yowa moto-motoine*

<sup>12</sup> Nani yowa bocycac kwelengkengelenogale ainelegac. Aimebac yogo hibiwa kwelengkenogale mi ainelegac. Yogolec ailu belic-belincnonggeng sugucnehad fikenale naneuc ngengela fube haicti nganinagulu yowa mingagec ainangte ngagesigabac.

<sup>13</sup> Senggone bawosaeicne, yele adu-madecfocine yenge wenac-madicngineng ngengela lobong fugac.

## Yoane Yedi Hibi Kwelengkeme Alecine Habackang Aiwec

### *Mimi-yegeng yowa*

Yesu homalu homackacni gboliyelu fangkeme hifa 60 ngama ingucne motome, Yoane ye hibi yago kwelengkelu ngic monic wacine Gaius yela lome hikewec. Ngic kwelengkewec, ye wacine yegena mi lowec. Aime ngic wacine Yoane, ye Yesule mic-tengteng monic, inguc ngagegaing.

Yesule Siduc Madicne iwa "yowa noine" kwelengkewec. Demitius ye aibaba madicne aiwekte mitengkewec. Ailu Dioterefes yele sawang-yowa kwelengkewec.

### *Kwele-madic yowa*

<sup>1</sup> Na Yesule habu damongngineng. Gaius agone gale angac ngagegabac, na yowa noinele ailu kwelenedi angac ngagegelelu hibi yago kwelengkegel-egabac.

<sup>2</sup> Agone kwelenedi gale angac ngagegabac, ga kwelegona ilugcone umacie mikac. Aime wiayacgone sasawa ingucnerah nalic ainale nga hucine mikac ainale milockegabac. <sup>3</sup> Ga aibaba noine nga yowa noine madicne balaibelu balu gacaigic, gale yowa-siduc yogo ngic hae-gbafocnonggoc gocne yengi kwesilu mibong beliyebeangkeiba. <sup>4</sup> Adumadecfocne yenge yowa noina gagaing, yogo ngagebe belic-belic yogodi wiycasasawa ewalicaigac.

### *Mimi-madic yowa*

<sup>5</sup> Agone kwelenedi gale angac ngagegabac, ababagone madicne yogo mi hegileing. Ailu nongileng ngic hae-gbafocnonggeng dalickacni kwesi-caigaing, yenge momochac baficebacaigic. <sup>6</sup> Ailu ga yengele kwelegonedi angac ngagelu aiyelelu baficebacaigic, ngic yengi mimi-madicgone yogo Yesule habu yengele haicka mibong ngageibeng. Ailu yenge hatacmac hikeninge aibong, gagii Wapong angacinele silicka wiyc aciyelelu yefele babafic wiyc gocne yelelu salecebang madickedaicte. <sup>7</sup> Yenge Yesule wacte ailu bole balu hikeibong, iwa ngic-ngigac Wapong mi ngagegaing, yengelacni babafic monic mi baibong. <sup>8</sup> Ilec yowa noinele bole nongileng mo-mochac banangte, yefe yogo fikenale ngic ingucne kwele-madicte babafic yeledabeleng.

<sup>9</sup> Na Yesule habu yengela hibi monic kwelengkeyeleiba. Aime Dioterefes ye yeuctihac micne ganogale aicnome, ye nonge hegilecnubacaigac. <sup>10</sup> Aime nani gacgu ngengela fudakte, ibac ye aibaba aicaigac, yogo dondonne miuwac aicnodacte. Ailu ye nongele kwsac-yowa kosa milu aibaba sowacne ingucne aicaigac. Ailu yogo sugu miyac, ngic hae-gbafocnonggeng inguchac mac mi holeyelecaigac. Aime gocne yengi ngic hae-gbafocnonggeng mac holeyelenogale mibong, yedi welockelu habu lobina locebacaigac, yogo hocne mibe yegengkedaicte.

<sup>11</sup> Agone kwelenedi gale angac ngagegabac, gagibac aibaba sowacne ingucne mi balaibedamec, miyac. Ga aibaba madicne balaibedamec. Aime monic ye aibaba madicne aicaigac, ye Wapongtacni, nga monic ye aibaba sowacne aicaigac, yebac Wapong monic mi ngagelu gagac. <sup>12</sup> Ngic-ngigac

sasawa yenge Demitiusle aibaba yogo madicne micaigaing. Aime yowa noinedi inguchac yele mime yegengkecaigac. Nonge inguchac yele mibeng yegengkeme mitengkecaigabeleng. Aime nongileng mimi yogodi noine aigac, yogo ngagegic.

*Yowa moto-motoine*

<sup>13</sup> Na yowa bocbac kwelengkegelenogale ainelegac. Aimebac yogo hibiwa kwelengkegelenogale mi ainelegac. <sup>14</sup> Na gala bangkacnemac fulu gaholec haiti nganinagulu yowa mingagec ainacte ngagesigabac. <sup>15</sup> Kwelemogungti gaholec fadaic. Agofocnonggeng yawa gagaing, yengi gala wenac-madic yowa logelegaing. Aime nale wenac-madic lobe fume gagi agofoc-nonggeng wacnginangsoc yenge edocebadamec.

## Yude Yedi Hibi Kwelengkewec

### *Mimi-yegeng yowa*

Yesu homalu homackacni gboliyelu fangkeme hifa 40 ngama ingucne motome, Yude ye hibi yago kwelengkelu Yesule habu monic yengela lome hikewec. Yude ye Yesu nga Yakobos yekele gbangingec (Mataio 13:55, Mareko 6:3). Ngic gocne yengi kwesac-yowa weduyeleibongte ailu hibi yago kwelengkelu sawang-yowa milu yowa noine basanangkewec.

### *Mimi-madic yowa*

**1** Na Yude, Yesu Kristole kwelec kwekwe ngic ailu Yakobos gbaime. Wapong Mamacti ngic-ngigac wacngebalu ngengele kweleinedi angac ngagengelelu aingelecaigac, ngenge sanangne domaningte Yesu Kristodi damongngebalu gagac, ngengela hibi yago logabac. **2** Wapongte kwele-sowac nga kwele-mogung, ailu kwele-angacka gaga yogodi ngengela sawelu fadaic.

### *Wewedu kwesacine*

*2Pi 2:1-18*

**3-4** Agofocne kwelenedi ngengele angac ngagegabac, Wapongti nongileng momoc wasecne ainangte bamadicnubawec, yogolec hibiwa yowa kwelengkengelenogale efekkebenangkeiba. Aime yowa yogo hegilelu ngic gocne hewacnginang sangke-sangke biyac ofeibong gagainghac, yengele ailu yowa monic kwelengkenogale ngagegabac. Yowa yogo yanguc, ngenge yefe wenucka Wapong ngagesingkenangte yedi esecne yeicne bingec nongileng ngage-ngagesing noleyackeme damongkeibeng, yogolec hudu sanangne-hac wedabelengte. Ailu ngenge yogo mi hegilenigte sanangne migabac. Wapongte hibiwa ngic yogo yengele ngagelu esecnehac yowa yanguc kwelengkeicne fagac, "Wapong ye aibabangineng wosaelu mimoctome bikicte ameine fikeyeledaict." Ngic yogo yenge himongte aibaba balaibeibong Wapongnonggengti kwele-madicte pasi bame yenge bafaliyelu mibong socnginengte gagale angac ngagelu sowacnele aka monic mi holecaigaing. Ailu yenge Filenonggeng nga Sugucnenonggeng Yesu Kristole ngagebong ngic waince aime bisockecaigaing.

**5** Ailu ngenge yago biyachac ngageibong. Aime hatacmac holegboliyengelenogale ngagegabac. Sugucnedi molickelu ngic-ngigacfocine lisip himongka umackacni bamoctocebame kwsuibong. Aime yogolec lobeinabac ngic-ngigac yogo yenge mi ngagesingkeibong, yenge wecebame homayackebong. **6** Aime angelo gocne yenge Sugucnedi bole tapiliineholec yelewec, yogolec ngagebong feicne mi aime, macbenangngineng hegilelu waibong. Aime Wapongti sen sanangne moto-motoine mikac, yogodi witicebalu kundung sanangne kwelina locebawec. Locebame mimocto-mimoctole damengtowa yogolec wangec gagaing. **7** Yenge esecne Sodom nga Gomora ngic-ngigac, ailu taon aling gocne yekele emewa faibong, yenge angelo yengi aibaba aiibong, yogo ingucnehab aiibong. Yenge selo-boic aibaba, ailu socnginengte angac kosa balaibeibong. Sodom nga Gomora ngic-ngigac yenge dacka lobecebawec, yenge dac moto-motoine mikac

yogo ingucne hac aigaing. Ailu iwa gacgu bikicnginengte ameine balu gagainghac.

<sup>8</sup> Aime kwesac-ngic yengele hewacka gagaing, yenge gung kosaine ngagecaigaing, yenge yogo ngagelubac socngineng basowalebong wonongkolec aicaigac. Yenge kwelenginengti tapili feicne yogo hegilelu angelo wac feicneholec gagaing, yenge pepecne aiyelelu misulec aiyelecaigaing. <sup>9</sup> Aime Maikel ye angelo yengele micne monic gagac, ye aibaba ingucne mi aiwec. Ye Aleng Sugucnenginengkolec Mosesle kponggbongte ailu yowanginecti fefesisilic aiwec. Aime ye Aleng Sugucnengineng misulec aicnolu umacka lonogale yowa monic nalic mi miwec, miyac. Ye yanguc sugu miwec, "Sugucnedi ngelengkelu gale yowa mimoctodaic." <sup>10</sup> Aime ngic migabac yogo, yenge bec-sic ingucne ngage-ngagengineng mikac galu wiyc monicte fungine mi ngagegaing. Yenge angelo feicne yengele silicngineng mi ngagemotolu misulec aiyelecaigaing. Ailu wiyc socnginengti ngagegaing, yogo balaibelu yengileng basowalecnagugaing.

<sup>11</sup> Mee, yenge medecebadaic. Yenge Keinte yefe balaibelu gaibong. Ailu hiye-monengngineng banogale Balamte aibaba kosaine ingucne hac yogodi mengocebame yenge yefe iwa hikeibong. Aime Koradi yowa kwekwae aiwec, silicine yogo ingucne hac yenge yowa kwekwae biyachac aibong, yogodi umacne hac basowalecebawec. <sup>12</sup> Yenge game mikac ngengeholec nosing kwele-angacka walec nocaigaing. Ailu yafo holecaigaing, yenge lama-damong ingucne lama focngineng nosing mi gumecebalu yengileng nocaigaing. Ailu yenge kaguwa mac mikac gbelongti fitolingkeme moc hikecaigaing,\* yogo ingucne hac aigaing. Ailu yenge yoc gocne noine damengka noine mikac ailu homame fuluckelu wickedaingte, yogo ingucne hac aigaing. Ngic yogo yenge homac yaeckang biyachac homaibong. <sup>13</sup> Aime dibong sugucne hac welu sofololoc yafoineholec balu kwesicaigac, yenge gamengineng yogo ingucne hac fikedaicte. Yenge asocmeng yefe lilogaing, yogo ingucne hac gagaing. Aime yengele mac yogo kundung saecnebenang moto-motoine mikac iwa loicne fagac.

<sup>14</sup> Aime Enok ye Adamte fikesawec yengelacni alecine 7ka fikewec, yedi yengele Wapongte siduc-yowa yanguc miwec, "Nganining, Sugucnedi ye icne angelofocine habu taosenkacni fegac, yenge bacebame kwsidaingte. <sup>15</sup> Kwsilu ngic-ngigac sasawa aibabanginengte silicina wosaecebalu mi-moctobadaicte. Aime ngic-ngigac sasawa himonge aibaba haicinc monic-moninc bagal bikic bafuwalu Wapongte ngaba-yowa milu yowa kwekwae gaibong, yenge yogolec ameine badaingte."† <sup>16</sup> Yenge yowa bocyac wafelu yowa kwecaigaing. Ailu ubekwe nga socnginengte angac balaibelu soc bafefe gacaigaing. Aime ngic-ngigac yengi yengele angac balaibeningte yowa heloc madicne aiyelecaigaing.

### *Salecebaicnele yowa balu ganoga*

<sup>17</sup> Agofocne kwelenedi ngengele angac ngagegabac, Sugucnenonggeng Yesu Kristole salecebaicne yenge wiyc fikenale esecne miibong, ngenge yowa yogo ngagesidaing. <sup>18</sup> Yowa yanguc edocngebalu gaibong, "Dameng

**1:7:** Fike 18:16-19:29; Dep 18:22-23; Rom 1:24-28; 2Pi 2:6,10      **1:9:** Dan 10:13,21; 12:1; 2Pi 2:11;

Myie 12:7; Sek 3:2      **1:10:** 2Pi 2:12      **1:11:** Fike 4:7-8; 1Yoa 3:12; 2Pi 2:15; Him 16:1-35      \* **1:12:** Himong iwa misa homacne mi faibong. Ilec ailu kaguwa mackolec yogo wiyc madicne. Nga kaguwa mac mikac, yogo noine mikac, yenge inguc ngagelu gaibong.      **1:12:** 2Pi 2:13,17      **1:14:** Fike 5:18,21-24      † **1:15:** Yowa yogo Enok 1:9 yogowacni. Hibi yogo Wapongte hibiwa mi fagac. Ngic yele siduc yogo Fike-fike 5:19-24 iwa fagac.

moto-motoina ngic gocnedi misulec aidaingte, yenge himongte wiyc  
sugu ngagesilu yengileng socnginengte angac balaibedaingte.”<sup>19</sup> Yenge  
hocne kwele esecnedi damongebame habu heucebabong Tili Asuholec mi  
gacaigaing.

<sup>20</sup> Aime agofocne kwelenedi ngengele angac ngagegabac, ngenge ngage-  
ngagesingngineng gbagbacnebenang aigaing, yogo sugulelu sanangken-  
tinge ngagelu domadabiyyeng. Aime Tili Asudi ngengela bole bame ngenge  
mimiloc bole badabiyyeng. <sup>21</sup> Ailu Wapongte kwele-angacka ganingte bole  
badabiyyeng. Aime inguc gaebongka Sugucnenonggeng Yesu Kristodi kwele-  
sowac aingelelu gaga moto-motoine mikac ngelenale wangec gadabiyyeng.

### *Yefe lilonoga*

<sup>22</sup> Ngic-ningigac ngagebockolec aicaigaing, ngenge yengele kwele-  
sowackolec bafacebalu <sup>23</sup> gocne dackacni baicebadabiyyeng. Ailu yenge  
kwele esecnedi ngakpi-kpolucngineng bame wonongkolec aicaigac,  
yenge inguchac kwele-sowackolec bafacebadaing. Inguc ailu ngenge  
yengele bikicte hangocngebame, kwele esecnele ngakpi-kpolucngineng  
wonongkolec yogo lobeyackedabiyyeng.

### *Wapongte mimi-madic yowa*

<sup>24</sup> Wapong yeuctihac nalic damongngebame mi wawedaingte. Yedi  
ngenge mengocngebalo yeicne tapili nga hibi-angoceneholecte dongewa  
locngebame ngenge sowacnengineng mikac iwa belic-belicnginengkolec  
domadaingte. <sup>25</sup> Asa-baba ngicnonggeng Wapong moniyangi sugu gagac.  
Yedi Sugucnenonggeng Yesu Kristole yefewa Asa bacnubagac. Ye wac  
feicneholecti ailu feicnetowanonggeng nga tapili fileine ailu wiyc sasawa  
fagac, yogolec hodocene aigac. Ye wiyc sasawa mi fikeemewa ye biyachac  
gawec, nga yakumac gagac, ailu gaginiwagac, yogo foinac.

## Yesule Miyegegkeicne Yoanedi Kwelengkewec

### *Mimi-yegengyowa*

Yoane ye Yesule siduc edocebame Roma gamangti balu Patmos nucka lobong muc-macka ingucne gawec. Ngic-ngigac gocne wosaelu yanguc ngagegaing, Yoane yogo ye Yesule mic-tengteng. Dameng iwa Roma gamangti Yesule habu ngaba aiyelelu doicka locebaibong.

Yesu homackacni gboliyu honocmenga feme hifa 65 ngama ingucne motome, Yoane Patmos nucka gaemewa Yesudi gungka ingucne fikecnolu yowa edolu wiyac lobewa fikedaicte, yogolec soc holelu mime yegengkewec. Nga wiyac lobewa fikedaicte, yogo yele dongewa biyachac fikeme nganiwec. Ilec yowa gocne ye biyac fikeicne ingucne kwelengkewec. Aime wiyac fikebong nganicebawec, yogo damengngineng alingka mi balaibegaing meecne. Wiyac ngani-ngagec ailiu hibi yagowa kwelengkewec. I yangucte, Yesule habu basanangebame Yesuholec taocke-galu umacka mi wawedaingkale, hibi yago kwelengkewec. Umac monic, yogo gamangti mime damongngi-neng ye wapong ingucne afeedabiyyeng, ye sawang yowa inguc kwe-lengkewec. Aime Yesu ye wac feicne bidaicte. Ailiu Wapongti yele ngaba nga Satang ewalicebame sowalebong yeicne aling bamadicebame yeholec gadaingte, siduc yogo kwelengkewec.

Aime noine, Wapongte siduc-mimi ngic yenge wiyac lobewa fikedaicte, yogolec yowa kwelengkeibong, dameng iwa wafebong nebocenele fungine yegenabenang mi fikegac. Aime siducngineng noine fikedaicte, dameng yowabac yegenabenang aidaicte. Ailiu hibi yagowa wiyac homacne yengele dzaleine 7 me dzaleine 12 fagac. I yangucte, dzaleine 7 nga 12te fungine yogo soc holelu wiyac bucbuchac fagac me wiyac moto-motoine motogac.

Yowa homacnele fungine yogo Wapongte Hibi Esecne iwa yowa kwe-lengkeicne fagachac. Yogolec bageina hibi wacngineng nga fengngine fagac.

### *Yowa yago hibi nebocina fagac*

1:1-8 Molic-molic yowa

1:9-20 Yesudi gungka ingucne Yoane fikecnotec

2:1-3:22 Yesule habu 7 yengele yowa

4:1-5:14 Wiyac honocmenga nganiwec

6:1-8:1 Umac 7 hibiwa fagac, yogo himongka fikedaingte

8:2-11:19 Angelo 7 yenge kpeng 7 fitobong himongka nga sawawa umac fikedaingte

12:1-13:18 Satang nga yele bole-ngic yaeckang yenge himongka yegena fikelu gadaingte

14:1-15:8 Wiyac haicine monic-monik nganilu ngagewec

16:1-21 Angelo 7 yenge pele 7 sotingkebong Wapongte aalicte ameine himongka fikedaicte

17:1-18:24 Wapongti Babilon basowaledaicte

19:1-20:15 Yesudi kwesilu ngabaine Satangkolec wenagulu dac kiwec ingucne iwa lodaicte

21:1-22:5 Honocmeng nga himong ailiu Yerusalem gblolicne

22:6-21 Yesu nga Yoane yekele baba-sanangte yowa nga sawang-yowa

### *Yoanedi wiyac nganiwec yogo miwec*

<sup>1</sup> Yowa yago Yesu Kristodi mime yegengkegac. Yele kwelec kwekwe ngicngigacfocine yenge wiyac biyac fikenale edalicebadaicte, yogo Wapongti Yesu lacnowec. Ailu angeloine monic saleme yedi yowa maaineholec mime yegengkeme kwelec kwekwe ngicine Yoane, na hocne yowa yogo edocnuwec. <sup>2</sup> Edocnulu Wapongte yowa nga Yesu Kristole siduc mime yegengkeme nani wiyac naneuc dongenedi ngani-ngagec aiiba, yogo sasawa mibe yegengkegac. <sup>3</sup> Dameng bangkalegacte monicti Wapongte siduc-yowa yago wafe-ngagec aiyellegac, ye kwele-angackolec aigac. Aime ngic-ngigac yenge yowa yagowa kwelengkeicne fagac, yogo ngagelu balaibegaing, yenge inguchac kwele-angackolec aigaing.

### *Yesule habu yengele yowa*

<sup>4</sup> Na Yoanedi Asia prowins kwelina Yesule habu 7 gagaing, ngengele hibi yago kwelengkebabac. Wapong gawec nga gagac ailu gacgu kwesinowagac, ye ngictaule ngiye-ngiyewa ngiyegac. Nga asu 7\* yenge yele emewa gagaing, yengelacni kwele-madic nga kwele-mogungtowadi ngengeholec fadaic. <sup>5</sup> Aime Yesu Kristo yelacni inguchac fadaic. Ye yowa balaibe-balaibele widec ngic noine. Ye molickenolelu homackacni gboliyelu fangkelu fikewec. Ailu himongte ngictau yengele damongngineng. Ailu ye nongileng kweleinedi angac ngagelu sacinedi bikickacni bamoctocnubawec. <sup>6</sup> Bamoctocnubalu ngani-damongte habu bacnubalu yeicnbolec alingnubawec. Alingnubame nongileng yele Wapong Mamacinele depec-baba ngic ingucne ailu mimiteng bole balu gagabeleng, yogolec inguc aiwec. Yela wac feicne nga tapili yogo moto-motoine mikac fafegidaic, yogo foinac.

<sup>7</sup> Nganining, ye kaguwa kwelina kwesime ngic-ngigac sasawa yenge dongengenengti nganidaingte. Aime socina sangaladi kwembalackeibong, ngic yogo yenge dongengenengti ye inguchac nganidaingte. Aime himong fengnginang fengnginangsoc ngic-ngigac sasawa yenge ye ngagesilu kwele-sowac sugucnehab ailu hiyadaingte. Oc, yogo fikedaicte, yogo foinac.

<sup>8</sup> Sugucne Wapongti yanguc migac, “Ye gawec nga gagac ailu gacgu kwesinowagac, yogo naneuctihac. Na Tapilitowa Fileine, na ‘A’ nga ‘Y’, yogo molic-molicine iwacni moto-motoine.”†

### *Kristo nganiwec*

<sup>9</sup> Na Yoanedi Wapongte yowale nga Yesule mibe yegengkewecte ailu Patmos nucka gaiba. Na ngengele ngic hae-gbanganeng, ngenge nga na nongileng momoc Yesuholec wetackelu doic nga Wapongte ngani-damong bagacgu tatakic mikac sanangne gagabeleng. <sup>10</sup> Sugucnele hadeng‡ monicka Asudi nala bole bame, lobena yowa-malac monic sugucnehab kpeng ucine ingucne ngagebe <sup>11</sup> yedi yanguc miwec, **“Ga wiyac nganic, yogo hibiwa kwelengkec. Kwelengkelu Yesule habu yenge taon 7, yogo Efesas nga Simina**

**1:1:** Dan 2:28-30,45-47; Miye 22:6      **1:3:** Miye 22:7,10      **\* 1:4:** Ngic gocene yengi yanguc ngagegaing, asu 7 yogo Tili Aisa wacine monic. Nga ngic gocene yengi yanguc ngagegaing, asu 7 yogo Angelo me angelo ingucne wiyac gocene.      **1:4:** Dan 7:9-14; Wah 3:14-15; Miye 3:1; 4:5      **1:5:** Kol 1:18; Mige 89:27,37      **1:6:** Dan 7:18; Wah 19:6; 1Pi 2:9; Miye 5:10; 20:6      **1:7:** Dan 7:13; Sek 12:10; Mat 24:30; Yoa 19:34-37; 1Tes 4:17      **† 1:8:** Grik yowawa ye yanguc miwec, “Naneuctihac Alfa nga Omega.” Alfa yogo Grik yowa nenggacinele hibi molic-molicine nga Omega yogo moto-motoine. “A” yogo migabac yowa nenggacinele molic-molicine nga “Y” yogo moto-motoine.      **1:8:** Miye 21:6; 22:13      **‡ 1:10:** Sonda wacine monic yogo Sugucnele hadeng. Gocene yengi ngagebong, yogo Sugucnele hadeng monic lobewa fikedaicte.      **1:10:** Wah 19:16

**ailu Pegamum nga Taiataira ailu Sadis nga Filadelfia ailu Laodisea, ga hibi yogo yengela loengka hikeme nganibong lolickena."**

<sup>12</sup> Inguc mime yowa-malac yogo ngagelu nganinogale hefaliyeiba. Hefaliyelu nganibe hifa yenge higengineng 7 edelu domaibong. Hige 7 yogo goldi baicne ingucnedi domabong nganiiba. <sup>13</sup> Nganicebabe yengele hewackacni monicti Ngicte Madecte silic ingucne domawec. Ye ngakpiine dalicne holeme susucnedi higeine somekeicne, nga mondacina umbika goldi baicne yogodi hefeicne fawec. <sup>14</sup> Ye hodoc-luweine nga hodoc-dowecine kwalac-kwalac yogo lama dowecine suweicne nga kaguwa wenacti kweme kwalackegac ingucne\*\* ailu dongeine yogo dac-ubilang ingucne. <sup>15</sup> Aime aer sasacne dacka lobepong latac-latacineholec aicaigac, ye higeine yogo ingucne aiwec. Aime yowa-malacine yogo misa dundung bocycac yengele ucngineng ingucne aiwec. <sup>16</sup> Ye mole-foleinapcti asocmeng 7 bacebalu domawec. Aime micinacni hudu-babale fitec micine nga lobeine yogo micineholectihac ofelu wawec. Haic-mesuine yogo wenac-dongeine tapiliineholec ofecaigac, yogo ingucne aiwec.

<sup>17</sup> Aime ye nganilu higeine emeina wawelu homaicne ingucne fabe, yedi mole-foleinedi nale feiwa lolu yanguc miwec, "Ga mi hangocguna, na molic-molicine nga moto-motoine. <sup>18</sup> Nganigic, na gaganeholec gagabac. Na homaiba ailu hatacmac gblonicne gagabac. Ailu ngagegic, na moto-motoine mikac gaibadi gagabachac, homac nga Wangec-mac yekele ki balu gagabac.

<sup>19</sup> "Ilec ga wiyc nganigic yogo kwelengkec. Yogo wiyc yakumac fagac ailu lobewa fikedaiete, yoglec kwelengkec. <sup>20</sup> Asocmeng 7 mole-foleinedi bacebagabac. Ailu hifa higengineng 7 goldi baicne nganigic, yoglec ngage-nage sangkeicne yanguc fagac. Asocmeng 7 yenge Yesule habu 7, yengele angelo.†† Nga hifa higengineng 7 yenge Yesule habu 7 aigaing."

## 2

### *Efesas habu*

<sup>1</sup> "Ga Yesule habu Efesas iwa gagaing, yengele angelola yowa yago kwelengkec."

"Ngic asocmeng 7 mole-foleinedi bacaigac. Ailu hifa higengineng kolec 7 goldi baicne yengele hewacka lolickecaigac, yedi Efesas iwa ngengele\* yanguc migac, <sup>2</sup> 'Na ngengele aibabangineng nga doic-bolengineng ailu sanangne domacaigabieng, yogo ngageyackegabac. Ailu ngenge ngic-ngigac sowacne yengele mi aingelegeigac, yogo ngagegabac. Ngic gocne yenge yengileng salecebaicne micaigaing. Ailubac yenge salecebaicne mi aigaing, ngenge yenge lokwesac aiyellobongka yenge kwsac-ngic, yogo

---

**1:11:** Dan 7:10    **1:12:** Sek 4:2,10    **§ 1:13:** Depec-baba ngic yenge ngakpi ingucne holelu gaibong.    **1:13:** Dan 7:13; 10:5    \*\* **1:14:** Grik yowawa "Mac tilowa wiyc kwalac-kwalac kaguwa kwelinaci mac ingucne wacaigac," inguc kwelengkeicne fagac.    **1:14:** Esek 43:2; Dan 7:9; 10:6; Miye 2:18; 19:12; 14:2    **1:16:** Dan 12:3; Yes 11:4; 49:2; Hib 4:12; Miye 2:12; 19:15    **1:17:** Dan 7:15; 10:9-12; Yes 44:6; 48:12; Miye 2:8; 22:13    †† **1:20:** Grik yowawa angelo yoglec fungine yaeckang heuckeicne, yogo angelo me salecebaicne. Angelo yago fagac, yogo angelo monicti me ngic monicti yogo mi mime yegengkeicne.    **1:20:** Dan 2:28-30; 12:1-3    \* **2:1:** Yesule habu 7, yengele angelola kwelengkeyelewec. Gocne yengi yanguc ngagegaing, angelo yogo ngichenang yengele damong. Ailu ye damongte ngagelu Grik yowawa "ga" milu kwelengkewec. Aimebac yowa sasawa yogo Yesule habu yengele aibaba nga yowa, yogo damongte yowa sugu miyac. Ilec ailu Grik yowawa "ga" bafaliyu "ngenge" kwelengkegabeleng.    **2:1:** Miye 1:16

biyac yegengkeibong. <sup>3</sup> Ngenge tatakic mikac sanangne domacaigabiyeng. Aime nale wacte ailu umac bocycal balu tapilingineng mi wawec.”

<sup>4</sup> “Aime molickelu kwele-angacnginengte aibaba yogo hegileibong, yolec ngagebe mi madickebac. <sup>5</sup> Ngenge esecne gagangineng wenucka hegilelu wawaibong, yolec ngagebe mi badabiyeng. Ailu kwe-lengineng hefaliyeme aibabangineng molickelu wenuc ailu gaibong, yogo aidabiyeng. Inguc mi ailu kwelengineng mi hefaliyedabiyengtewa, na ngengela kwsilu hifangineng higineholec macinacni baikdedacte. <sup>6</sup> Ngenge aibabangineng madicnebac yanguc, ngenge Nikolas habu<sup>†</sup> yengele aibaba yogo kwelenginengti hegilecaigaing, na inguchac yogo kweledi hegilecaigabac.”

<sup>7</sup> “Monic hedeckolec ye Asudi Yesule habufocine yowa edocebagac, yogo aneng ngagedaic. Nga monic ye hudu welu gbelong aidaicte, ye gagale yoc Wapongte mac madicnebenang iwa domagac, yogowacni noine nalic lacnobe nodaicte.”

### *Simina habu*

<sup>8</sup> “Ga Yesule habu Simina iwa gagaing, yengele angelola yowa yago kwe-lengke.”

“Ngic molic-molic nga moto-motoine, ye homalu gboliyewec gagac, yedi Simina iwa ngengele yanguc migac, <sup>9</sup> Ngenge doic ngagelu socte wiwicka waweweine gagabiyeng, yogo ngageyackegabac. Ailu sifu kwelele wiwicka wakegabiyeng. Ngic misulec aigelecaigaing, yenge yengileng Yuda ngic-ngigac milubac Yuda ngic-ngigac noine mi ailu Satangte kpakpaduc mac aigaing, na yogo inguchac ngagegabac. <sup>10</sup> Ngenge doic ngagenogale mi hangocngebadaic. Aleng Sugucnengineng ye lokwesacka locngebanale ngageme, ngengelacni gocne muc-macka locngebabong, ngenge hadeng 10te kwelina doickolec gadaingte. Aime ngenge nale yowa balaibelu sanangne galu homaebongka, gagale maaine sil ingucne neledeacte.”

<sup>11</sup> “Monic hedeckolec ye Asudi Yesule habufocine yowa edocebagac, yogo aneng ngagedaic. Nga monic ye hudu welu gbelong aidaicte, ye homac alecine yaekangti nalic mi basowaledaicte.”

### *Pegamum habu*

<sup>12</sup> “Ga Yesule habu Pegamum iwa gagaing, yengele angelola yowa yago kwe-lengke.”

“Ngic hudu-babale fitec micine nga lobeine yogo micineholechac balu domagac, yedi Pegamum iwa ngengele yanguc migac, <sup>13</sup> ‘Satangti ngic-taule ngiye-ngiyewa ngiyegac, ngenge taon iwa gagabiyeng, yogo ngagegabac. Ailu Satangti gagac, iwa Antipas ye nale yowa sanangne mime yegengkeme balaibelu game, ye wehomaibong. Aime ngengele hewack-acni Antipas wehomaibong. Aime ngenge sifu ngagesingnulu nale wac sanangne balu gaibong. Ailu wacne mi bisockebong.’”

<sup>14</sup> “Alibaba gocne ngengela fagac, yolec ngagebe mi madickebac. Ngic-ngigac gocne ngengeholec gacaigaing, yenge Balamte weweduy-wowa balaibecaigaing. Yedi Israel alingfocine okac ingucne lome waweningte Balak weducnowec. I yanguete, yenge siduc-gbongte depekte sic nolu

**2:2:** 1Yoa 4:1    **2:5:** Miye 3:3    <sup>†</sup> **2:6:** Nikolas nga ngic-ngigac yele yowa balaibelu yanguc ngageibong, siduc-gbong alang bacnoicaigaing, nga selo-boic aibaba aicaigaing, aibaba ingucne umacne mikac nalic ainoga.    **2:7:** Yes 6:9-10; Esek 3:27; Fike 2:9; Miye 22:2,19    **2:9:** 2Kor 11:14-15; Miye 3:9    **2:10:** Dan 1:12-15; 2Tim 4:8; Yak 1:12    **2:11:** Miye 20:14; 21:8    **2:13:** Mige 89:37; Yes 43:10-12

selo-boic bole‡ banogale inguc aiwec. <sup>15</sup> Ingucne gocne yenge Nikolas habule wewedu-yowa balaibecaigaing, yenge inguchac ngengeholec gagaing. <sup>16</sup> Ilec ailu kwelengineng hefaliyena. Inguc mi aidabiyengtewa, na ngengela biyachebang fudacte ailu hudu-babale fitec micna fagac yogodi wecebadacte.”

<sup>17</sup> “Monic hedeckolec ye Asudi Yesule habufocene yowa edocebagac, yogo aneng ngagedaic. Nga monic ye hudu welu gbelong aidaicte, ye nani mana nosing sangkeicne yogo lacnodacte. Ailu posa monic kwalack-kwalacka wac gbolicne monic kwelengkeicne fagac, yogo lacnodacte. Wac yogo monicti mi ngagedaicte, ngic posa nalacni badaicte, yedi sugu ngagedaicte.”

### Taiataira habu

<sup>18</sup> “Ga Yesule habu Taiataira iwa gagaing, yengele angelola yowa yago kwelengkec.”

“Wapongte Madec ye dongeine dac-ubilang ingucne. Ailu aen sasacne dacka lobebong latac-latacine aicaigac, higeine yogo ingucne, yedi Taiataira iwa ngengele yanguc migac. <sup>19</sup> Na aibabangineng nga kwelenginengt ngic-ngigac yengele angacngebacaigaic, yogo ngagegabac. Aime ngage-ngagesingngineng sanangkeme galu tatakic mikac bolewa bafice-bacaigabieng, yogo ngageyackegabac. Ailu aibabangineng yakumacti esecne molickelu aibaba ailu gaibong yogo ewaligac.”

<sup>20</sup> “Aime sifu ngigac wacie Yesebel, ye yeicne siduc-mimi ngigac micaigac. Ye wewedu bole kwesacine bagacgu selo-boic aibaba nga siduc-gbongte depekte sic nolu, yefe iwa nale kwelec kwelece ngic-ngigacfocene bacebalu gawec. Aime ngenge yogo mi kpatalacnolu gacaigabiengte ngagebe mi madickegac. <sup>§</sup> <sup>21</sup> Ye nani kweleine hefaliyene dameng lacnoiba. Aime ye kweleine hefaliyeme selo-boic aibabaine hegilenale mi aicnogac.”

<sup>22</sup> “Ngagegaing, ngigac ye huc aicnome mapicina fanale lodacte. Aime ngic-ngigac weni yengi yeholec wetackelu selo-boic aibaba aicaigaing, yenge yele aibaba yogo hegilelu kwelengineng mi hefaliyedaingtewa, doic umacnehabenang ngagedaingte. <sup>23</sup> Aime na yele adu-madecfocene hucti wecebabe homadaingte. Inguc aibe Yesule habu sasawadi yanguc ngagemotodaingte, na ngage-ngageba nga kwelewa ngani-wosaec ngic. Na ngenge filesoc filesoc aibabanginente silicka ameine badungeledacte. <sup>24-25</sup> Aime Taiataira habuwa ngic-ngigac tofaine gagaing, ngenge Yesebelle wewedu nga Satangte ngage-ngage gbolongne migain, yogo mi baibong. Ngenge yanguc edocngebagabac, wiyan fangelegac, ngenge yogo sanangne balu gadaing. Aime yoglec feiwa umac monic mi taockedacte. Aime yogo balu gabong na fudacte.”

<sup>26-27</sup> “Monic ye hudu welu gbelong aidaicte ailu nale aibaba sanangne balu game dameng motodaicte, yele yanguc migabac, Na Mamacnelacni bole-yowa tapiliineholec balu himongne himongne yengele Sugucne

‡ **2:14:** Dameng gocna, yogo ngic-ngigac yenge selo-boic aibaba aigaing. Nga dameng gocna yogo Wapong nga siduc-gbong me wapong kwsacine yeke momoc alang bacepagaing, yogo selo-boic aibabale silic ingucne. **2:14:** Him 22:5-25:3; 31:16; 2Pi 2:15    **2:16:** Him 31:8; Yos 13:22; Miye 3:11

**2:17:** Wah 16:4,14-15,33-34; Yoa 6:48-50; Yes 62:2    **2:18:** Dan 3:23-25; 10:6; Miye 1:14-15    § **2:20:** Ngigac siduc-yowa miwec, yele aibaba yogo ngictau Ahab ngigacine Yesebelle aibaba ingucne aiwec. Yedi siduc-gbong nga hefec-dinaq aibaba gocne bakwesilu Israel ngic-ngigac bacebame siduc-gbong afeelu gaibong. **2:20:** 1Ngt 16:31; 2Ngt 9:22    **2:23:** Mige 7:9; Yer 17:10; Miye 20:12-13    **2:24-25:** Miye 3:11

gagabac. Aime silicine ingucnephac ngic gbelong aidaictewa, himongne himongne yengele sugucne ganogale bolele hibi nga tapili lacnodiacte. 'Aime ye nictaule yasu aenti baicne yogo balu damongebal u gadaicte. Ailu ngicti hebec kwouckecaigaing, silicine ingucnephac gocne kwoucebadaitce.' (Mige 2:9)

<sup>28</sup> Ailu na ubiyakte asocmeng yogo inguchac lacnodiacte. <sup>29</sup> Monic hedeckolec ye Asudi Yesule habufocine yowa edocebagac, yogo aneng ngagedaic."

### 3

#### Sadis habu

<sup>1</sup> "Ga Yesule habu Sadis iwa gagaing, yengele angelola yowa yago kweleengkec."

"Ngic Wapongte asu 7 nga asocmeng 7 balu domagac, yedi Sadis iwa ngengele yanguc migac, 'Na aibabangineng ngageyackegabac. Ngenge gagaholec gagabieng edocngebacaigaing. Ailu sifu ngenge homaicne silic gagabieng. <sup>2</sup> Illec ailu ngenge yeucnagulu deboc-gboli gadaing! Aibabangineng tofaine homanogale ailu fagac, yogo bamadicke lu basanangkening. I yangucte, ngenge aibabangineng ngani-motogabac. Aimebac Wapongnele ngani-nganiwa nalic mi aigac. <sup>3</sup> Yowa molickelu ngengela kwesime ngagelu baibong, yogo ngagesilu balaibedabieng. Ailu kwelengineng hefaliyedabieng. Inguc ailu ngenge deboc-gboli mi gadaingtewa, na hise-baba ngic ingucne ngengela fudacte. Ailu ma damengka fulu webating aingeledacte, yogo nalic mi ngagedaingte.'

<sup>4</sup> "Aime ngengele alingkacni ngic-ngigac efecnemacti sugu aibabanginengti ngakpi-kpoluc ingucne babong wonongkolec mi aiwec. Na nganibe andoine aigaingte yenge ngakpi-kpoluc kwalacne holelu naholec momoc hike-kwesic aidabelengte. <sup>5</sup> Inguc ailu monic ye hudu welu gbelong aidaict, ye ngakpi-kpoluc kwalacne holedaict. Aime na yele wac Gagale hibiwacni nalic mi baickedadacte. Ailu yele wac yogo Mamacne nga angelofocine yengele haicka mibe yegengkedaict. <sup>6</sup> Monic hedeckolec ye Asudi Yesule habufocine yowa edocebagac, yogo aneng ngagedaic."

#### Filadelfia habu

<sup>7</sup> "Ga Yesule habu Filadelfia iwa gagaing, yengele angelola yowa yago kweleengkec."

"Bgbacne nga yowa noinele fileine, yedi Dawidile ki balu gagac. Ye nu laliyeme monicti nalic mi holedaict. Ailu nu holeme monicti nalic mi laliyedaict. Aime yedi Filadelfia iwa ngengele yanguc migac, <sup>8</sup> 'Na aibabangineng ngageyackegabac. I yangucte, ngenge tapili-wawa gaibong ailu sifu nale yowa balaibelu wacne mi hegileibong. Illec ngagegaing, nu monic ngengele haicka laliyengelebe, monicti yogo nalic mi holedaict.'

<sup>9</sup> "Aime ngagegaing, ngic gocne yenge Satangte kpakpaduc mackacni, yenge yengileng kwsac ailu Yuda ngic-ngigac micaigaing. Ailu yenge Yuda ngic-ngigac noine mi aigaing, miyac. Aime na kwelenedi ngengele angac ngagegabac, yogo yengi ngage-motoningte aiyelebe, yenge ngengele higewa fulu ketadi holelu alang bangeledaingte. <sup>10</sup> Ngenge tatakic mikac sanangne ganingte edocngebaiba, yogo noine balu gaibongte ailu

lokwesac damengka mi febong na bacngebabe wasecne aidaingte. Lokwesac yogo himontowa yagowa bucbuchac ngic-ngigac yengela fikenale miicne fagac.”

**11** “Na biyac fudacte. Ilec ngenge sil badabiyengte, yogo monicti mi banale wiyac fangelegac, ngenge yogo sanangne balu gadaing. **12** Monic ye hudu welu gbelong aidaicte, ye nani gunungkebe Wapongnele Ibu-mac kwelinele bosing sanangne aidaicte. Ailu ye Ibu-mac yogo hatacmac mi hegiledaicte. Aime na Wapongnele wac ailu Wapongnele taon sugucnele wacine, nga neicne wacne gbolicne, wac habackang yogo yele feiwa kwelengkedacte. Taon sugucnele yogo Wapongnele taon, yogo Yerusalem gbolicne ailu yogo honocmengkacni nale Wapongtacni wadaicte.”

**13** “Monic hedeckolec ye Asudi Yesule habufocene yowa edocebagac, yogo aneng ngagedaicte.”

### *Laodisea habu*

**14** “Ga Yesule habu Laodisea iwa gagaing, yengele angelola yowa yago kwlengkec.”

“Ngic wacine Noine, ye Wapongte yowa balaibecaigac. Ailu yowa noine yogolec widec aigac. Ye Wapongti wiyac sasawa mime fikeibong, yogolec fungine gagac, yedi hocne yowa yago Laodisea iwa ngengele yanguc migac, **15** ‘Na aibabangineng ngageyackegabac. Ngenge dacine me mogungne mi gagabiyeng. Ngenge dacine sugu me mogungne sugu gaebongkabac angac ngagedaba. **16** Aime ngengebac dacine me mogungne mi gagabiyeng. Ngenge hewacnginac dac-dacine gagaingte ailu micnacni mengucngebano gale aigabac.\* **17** Nonge moneng-mafatowanonggengkolec ailu wiyac monicte mi kpungkelu gagabeleng, ngengilengte inguc milu sifu kwele-umactowaholec gagabiyeng. Ailu ngic-ngigac yenge ngengele kwele-sowac ngagegaing. Ailu waweweine nga donge-pisic ailu senggang gagabiyeng, yogo mi ngagegabiyeng. **18** Ilec yanguc edocngebababac, kwelele mafatowaholec ainogale nalaclni gol dacti lobecne fuli badabiyeng.† Ailu senggang gameineholec mi ganingte ngakpi-kpoluc kwalac-kwalac balu ngakpi-kpoluckolec aidabiyeng. Ailu dongengineng hilanogale donge suwe-suwele helocti dongengineng suwenogale nalaclni fuli badabiyeng.”

**19** “Na ngic-ngigac weni yengele kwelenedi angac ngageyelecaigabac, yenge ngelengebalu edocebalu webating aiyelecaigabac. Ilec sanangkelu kweleengineng hefaliyenya. **20** Ngagegaing, na nuwa domalu kpong-kpong holelu gagabac. Holelu gabe monicti nale yowa-malacnele hedec lolu ngagelu nu laliyeneleme, na yela febe noke momoc ngiyelu nosing momoc nodabelecte.”

**21** “Na hudu welu gbelong ailu febe Mamacneholec yele ngictaule ngiye-ngiyewa ngiyeaigabelec. Silicine ingucne hac monicti hudu welu gbelong

**3:10:** Luk 21:19; 2Tim 2:12    **3:12:** Yes 62:2; 65:15; Esek 48:35; Miye 14:1; 21:2    **3:14:** Yes

43:10-12; 65:16    **3:15:** Rom 12:11    \* **3:16:** Taon iwa misa dongeine faibong. Misa gocne yenge dacine aime ngic-ngigac hikelu lowalu madickeibong. Nga misa gocne yenge mogungne aime ngic-ngigac hikelu balu nolu sanangkeibong. Ilec ailu dacine nga mogungne yekе momoc madicne aigac. Nga wiyac dac-dacine yogo madicneine mi fagac.    **3:17:** Hos 12:8; 1Kor 4:8; Luk 12:21

† **3:18:** Dacti gol yafoine lobeyackeme wosaeme gol noine sugu badamekte. Gol yogo kwelele wiyac madicnebenang yogolec soc holeicne.    **3:18:** Yes 55:1; Miye 4:4    **3:19:** Ynn 3:11-12; 1Kor 11:32; Hib 12:6; Miye 2:5    **3:20:** Yoa 14:23

aidaitce, ye nani ngictaule ngiye-ngiyene lacnobe noke momoc ngiyedab-electe.<sup>22</sup> Monic hedeckolec ye Asudi Yesule habufocine yowa edocebagac, yogo aneng ngagedaic."

## 4

### *Honocmenkte mimi-madic*

<sup>1</sup> Inguc mime na honocmengka nu monic laliyeicne nganiiba. Hei, yowa esecne kpeng ucine ingucne yowa-malac monic edocnume ngageiba, yedi yanguc miwec, "Ga yawa ofenong. Yagolec lobeina ma pasi fikedaite, yogo edalicgudacte."<sup>2</sup> Hei, inguc mime iwahac Asudi nala bole bame nganibe honocmengka ngictaule ngiye-ngiye loicne iwa monicti yagolec feina ngiyewec.<sup>3</sup> Yele angoc yogo posa basufaleicne, yogo posa sasacne nga posa hunga, yeke ingucne. Ailu hulilic monic posa hedonggboli ingucne, yogodi ngictaule ngiye-ngiyewa lolickelu fawec.\*

<sup>4</sup> Ailu ngictaule ngiye-ngiye ngiyeeme ngictaule ngiye-ngiye gocne, dza-lengineng 24, yenge ngictaule mac ngiye-ngiye yogo lolickelu ngiyeckaing. Ngiye-ngiye yagolec feina damong 24 ingucti ngiyeckaing. Damong yenge ngakpingineng kwalac-kwalac holelu hodocngineng feina ngictaule duu goldi baicne holelu ngiyeckaing.<sup>5</sup> Inguc nganicebabe pilatac bame gbululung ucine sugucnehahti ngictaule ngiye-ngiyewacni fikewec. Ngictaule ngiye-ngiyele haicka hifa 7 lobecaigaing, yogo Wapongte asu 7.<sup>6</sup> Aime ngictaule ngiye-ngiyele haicka wiyac monic kiwec sugucne ingucne galasdi baicne, galas yogo wonongngine mikac nganiiba.

Aime ngictaule ngiye-ngiyewa neboc nga neboc 4, iwa wiyac gaganginengkolec 4 yengi hewalingkelu domacalgaing. Yenge emengineng nga lobengineng sasawa yogo dongedi wakeyackeicne.<sup>7</sup> Wiyac gagaineholec molic-molic, yele ngani-nganiine laion ingucne. Aime yele lobeina, wiyac gagaineholec monic ye bulumaka ngicne tapiliineholec ingucne. Aime yele lobeina wiyac gagaineholec monic, ye haic-mesuine ngani-nganiine ngic ingucne. Aime moto-motoina wiyac gagaineholec monic, ye hikic sugucnedi filalangkecaigac, ingucne aiwec.<sup>8</sup> Wiyac gaganginengkolec 4 yenge filesoc filesoc kwenggelengngineng 6. Ailu socngineng sasawa yogo dongedi saweyackeicne. Ailu kwenggelengngineng bageina yogo inguchac dongeholec. Ailu yenge hadeng nga debocsoc ngiye-ngagec mikac yanguc milu gacaigaing.

"Sugucne Wapong Tapilitowa Fileine,  
Ye gbagbacnedi, gbagbacne, ailu gbagbacne.  
Ye gawec nga gagac ailu gacgu kwesinowagac."

<sup>9</sup> Aime ngictaule mac ngiye-ngiyeina ngiyeckaigac, ye gaga-sanang gaginiowagac. Aime wiyac gaganginengkolec yenge yele wac bafelu alang bacnolu kwele-madic micaigaing. Inguc micaigaingka,<sup>10</sup> ye ngictaule ngiye-ngiyeina ngiyeckaigac, ailu gaga-sanang gaginiowagac, damong 24 yenge yele higewa ketadi holecaigaing. Holelu ye afeelu ngictaule duungineng bamoctolu ngictaule ngiye-ngiyeinele emeina wickebong wame yanguc migaina,

<sup>11</sup> "Ga Sugucne ailu Wapongnonggeng.

Gagi wiyac sasawa miyengka fikeyackelu gaganginengkolec fagaing.

**4:1:** Dan 2:28-29; 7:9; Wah 19:16-19; Miye 1:1,10      **4:2:** Yes 6:1      **4:3:** Esek 1:26,28      **4:3:** Posa waengineng yogo yanguc, yaspa, kanelian, nga emeral.      **4:4:** Dan 7:10; Miye 3:18      **4:5:** Esek 1:13; Sek 4:2; Miye 1:4; 8:5; 11:19; 16:18      **4:6:** Dan 7:2-3; Esek 1:5-10,22; 10:14      **4:8:** Yes 6:2,3; Esek 1:18; 10:12      **4:9:** Dan 4:34; 12:7      **4:10:** Miye 7:10,15; 19:4

Gageuc ngagelu inguc bafuwayackeingte, ga andoine. Ilec ailu wac feicne nga alang-baba ailu tapili sasawa badamecte."

## 5

### *Hibi kpadidiweicne*

<sup>1</sup> Wapong ngictaule ngiye-ngiyeina ngiyecaigac, ye hibi kpadidiweicne monic mole-foleina balu ngiyegac. Aime hibi yogo kwelina nga lobina kweleng kwelengkeicne fagac. Aime iwa yoc sopiyaine 7 ingucnedi bakat-ackelu kpakpatalac aka loicne nganiiba. <sup>2</sup> Na angelo monic tapiliine-holec nganiibe yedi malac sugucnecac yanguc aukwelu wackewec, "Hi-biya yoc sopiyainedi aka lolu bakatackeicne yogo madi nalic baickelu bafilamenale silicine ngagegac?" <sup>3</sup> Wackeme basackebong honocmengka me himongka me himong bageina monicti hibi kpadidiweicne yogo nalic mi bafilamedaicte, me kweleng yogo ngani-nganilesoc mi fagac. <sup>4</sup> Aime monicti hibi yogo bafilamelu nganinogalesoc nalic mi aiwecte ailu, kwelene sowaleme hiyaiba. <sup>5</sup> Hiyabe damongfocngineng yengelacni monicti yanguc edocnuwec, "Ngagegic, ga mi hiyanong! Yuda yengelacni laion yogo, ye Dawidi ngambofocine yengele fikesaweckacni gidec, yedi gbelong aiwec. Ilec ailu ye hibi kpadidiweicne yele aka 7 bakatackeicne, yogo nalic baickelu bafilamedaicte."

### *Lama madecine*

<sup>6</sup> Inguc mime yanguc nganiiba. Ngictaule ngiye-ngiye nga wiyc gagangi-nengkolec 4, ailu damong 24 yengele hewacka Lama madecine monic domawec, ailu ye webong homaicne ingucne aiwec gagac. Lama madecine yogo ye begince 7 ailu donegeine 7. Donegeine yogo Wapongte asu 7, yenge Wapongti himongka salecebame gagaing. <sup>7</sup> Yedi hocne lelu ngictaule ngiye-nyiye, yele mole-foleinacni hibi kpadidiweicne yogo bawec. <sup>8</sup> Hibi yogo balu domame, wiyc gaganginengkolec 4 nga damong 24 yenge yele haicka ketadi holeibong. Damong sasawadi gita mucine homacne, ailu pele goldi baicne yogo filesoc balu domaibong. Pele yogowa marasing hoine madicne fawec. Fame marasing hasockolec pelewacni ofewec, yogo Wapongte bingec yengele mimilocngineng, yogodi pelengineng wakeyacke-icnedi ofelu fawec.

### *Lama madecine afeeibong*

<sup>9</sup> Aime yenge gee monic gbolicne yanguc holeibong.  
"Gagi hibi kpadidiweicne yogo nalic balu aka bakatackeicne yogo baickedamecte.  
I yangucte, ngic yengi wecgubong gagi sacgonedi ngic-ngigacfocgone fuli bacebaing.  
Ailu ga himong fengnginang fengnginangsoc ngic-ngigac, nga yowane yowane, ailu soc haicne monic-monic, nga himongne himongne ngic-ngigac sasawa, yengelacni moniyang moniyang fuli bacebang Wapongte aling ailu gagaing.  
<sup>10</sup> Fuli bacebang Wapongte ngani-damongte alingka gadaingte.

Ailu yenge depec-baba ngic ingucne ailu Wapong kwelec kwecnodaingte.  
Aling yogo yengi himongne himongne yengele damong aidaingte."

<sup>11</sup> Na dongene lokeme nganibe angelo bocyac yengele dzalengineng yogo 100 milion ewaligac. Ailu taosen nga taosen hatacmac feina taockegaing. Yengi ngictaule ngkiye-ngkiye nga wiyac gaganginengkolec, ailu damong 24 hewalingebabong, yowa-malacngineng ngageiba. <sup>12</sup> Yengi sanangne wack-elu aukwelu yanguc miibong,  
“Lama madecine wehomaicne,  
Yedi damongte tapili nga woc-wiyactowa ailu ngage-ngage-motoc, nga tapili ailu alang-baba, nga wac feicne ailu mimi-madic yogo nalic lacnobong badaicte.”

<sup>13</sup> Aime wiyac sasawa Wapongti mime fikeyackeibong, yenge honocmengka nga himongka ailu himong bageina nga kiwecka, yengele kweliwa wiyac sasawa gagaing, yenge yowa yanguc mibong ngageiba.  
“Ye ngictaule mac ngkiye-ngkiyeina ngiyegac nga Lama madecine,  
Yekela mimi-madic nga alang-baba, ailu wac feicne nga tapili moto-motoine mikac fafegidaic.”

<sup>14</sup> Inguc mibong wiyac gaganginengkolec 4 yengi “yogo foinac” miibong. Aime damong 24 yenge ketadi holecnolu yeke afeecepaibong.

## 6

### *Yoc sopiyainedi aka bakatackeicne baickewec*

<sup>1</sup> Na nganibe Lama madecinedi kpakpatalac aka 7 bakatackeicne fawec, yogo molic-molic moniyang hibiwacni baickewec. Aime wiyac gaganginengkolec 4 yengelaci monicti yowa-malacine gbululung ucine ingucnedi wackelu aukwelu yanguc mime ngageiba, “Ga welec!” <sup>2</sup> Hei, inguc mime na hilalu becosic kwalac-kwalac monic nganiiba. Aime yele feiwa wiyac monicti lebeineholec ngiyewec. Monicti ngictaule duu monic lacnowec. Aime ye holelu becosicka hikelu huduwa ewalicebalu gbelong ainogale aiwec.

<sup>3</sup> Aime Lama madecinedi aka bakatackeicne monic hatacmac baickewec, iwa ngagebe wiyac gagaineholec monicti yanguc miwec, “Ga welec!” <sup>4</sup> Inguc mime becosic monic sasacnedi kwesiwec. Yele feiwa wiyac monic ngiyewec, monicti wiyac gocne lacnowec. Ye kwele-mogung baic-baице tapili ailu himongne himongne ngic-ngigac yengungtihac wehomacnaguningte tapili yogo lacnowec. Ailu monicti hudu-babale fitec sugcne monic lacnowec.

<sup>5</sup> Aime Lama madecinedi aka bakatackeicne monic baickeme alecine habackang aiwec. Baickeme wiyac gagaineholec 3 yedi yanguc mime ngageiba, “Ga welec!” Hei, inguc mime becosic saec-saec monic nganiiba. Aime wiyac monic yele feiwa ngiyewec, ye sigel monic moleina balu ngiyewec. <sup>6</sup> Aime wiyac gaganginengkolec 4, yengele hewackacni yowa-malac ingucne monicti yanguc mime ngageiba, “Nosing lolocte dameng aime wit lita moniyangte fuli, yogo sugucnehad hadeng moniyangte bole-fuli aigac. Nga bali lita habackang, yogo hadeng moniyangte bole-fuli aigac. Aime ga heloc nga waing mi basowaledamec.”\*

<sup>7</sup> Lama madecinedi aka bakatackeicne monic baickeme alecine 4 aiwec. Baickeme ngagebe wiyac gagaineholec 4 yedi yanguc miwec, “Ga welec!”

<sup>8</sup> Hei, inguc mime becosic dagec-dagec monic nganiiba. Aime wiyac yele feiwa ngiyewec, wacine Homac. Ye wiyac monic wacine Wangec-mac, ye

**5:11:** Dan 7:10; Hib 12:22    **5:12:** 1Ngsi 29:11-12    **5:14:** Dan 7:27    **6:1:** Miye 4:6; 5:1

**6:2:** Sek 1:8; 6:1-6    **6:4:** Esek 21:9-15    \* **6:6:** Grik yowawa moneng monic wacine denarius kwelengkeicne. Yoanele damengka moneng yogo moniyangti hadeng moniyangte fuli aiwec. Bali yogo padi ingucne nosing monic.

mengockeme kwesiiboc. Kwesilu yeki himongtowa habu 4 iwacni heuckelu iwa nebocene yogo yeki hudu-babale fitec nga loloc ailu huc nga himongte kate-sic bacebaboc kwesidaingte. Kwesilu wiyc yogo yengi ngic-ngigac wecebabong homadaingte, yogolec tapili yeke yeteicne.

<sup>9</sup> Aime Lama madecinedi aka bakatackeicne monic baickeme alecine 5 aiwec. Baickeme iwa yanguc nganiiba. Ngic-ngigac Wapongte yowa bagalu mibong yegengkeme wecebabong homaibong, yengele ilucfocngineng alata bageina ngiyeibong. <sup>10</sup> Yenge iwa ngiyelu daccineholec aukwelu yanguc wackebong, “Oc, Sugucnenonggeng, ga gbagbacne gaga nga yowa noinele fileine. Ga ameine badu-badule dameng badaliwelu sacnonggengte bikic yogolec ngagelu ngic himongka galu wecnubaibong, yenge ma damengka mimoctocebalo bikicnginengte ameine yeledamekte?”

<sup>11</sup> Inguc mibong ngakpi dalicne kwalacne filesoc yelelu yanguc edoce-bawec, “Gocne yengi ngenge wecngebabong homaibong, silicine ingucne-hac kwelec kwekwae agofocngineng, yenge ngic hae-ghafocngineng aigaing, yenge momochac wecebabong homadaingte. Homabong dzalengineng nageibawa feholeme motodaicte. Ilec ngenge kpisicnemac hatacmac ngiye-nagagedaing.”

<sup>12</sup> Aime ye aka bakatackeicne monic baickeme alecine 6 aiwec. Baickeme nganibe memeya sugucne-hac bame wenac-dongeine saeckewec, yogo kwele-sowacte ngakpi saecne ingucne aiwec. Aime tamacne ye buchuchac sac ingucne aiwec. <sup>13</sup> Aime gbelong sugucnedi welu fik yoc hucine mang-gangne yockacni wemolongkeme wacaigaing, silicine ingucne-hac asoc-meng sawawa fagaing, yenge himongka molongkelu waibong. <sup>14</sup> Wabong ngicti hibi kpadiwecaigaing, silicine ingucne-hac sawa ye kpadiiwelu miyac aiwec. Miyac aime tiki nga nuc sasawadi mac ngiye-ngiyengineng hegleyackeibong.

<sup>15</sup> Inguc aime himongte ngictau nga ngic sugucne ailu hudu-baba ngic yengele damong. Nga ngic mafatowanginengkolec ailu ngic sanangne, nga kwelec kwekwae aling sugucne-focngineng yengele bagewa gaibong, ailu ngic-ngigac ngic monicta bagewa mi gaibong. Yenge sasawadi hikelu henebe kwelina, nga posa sugucne sugucne bagenginang sangkeyackeibong. <sup>16</sup> Sangkelu yengi tiki nga posa yanguc edocebaibong, “Ngenge feinonggang walu Wapongti ngictaule ngiye-ngiyewa ngiyegac, yele haicka nga Lama madecinele aalicta ameine iwacni somecnubadabyeng. <sup>17</sup> I yangukte, yekete aalicta amenginecte damengtowa biyac kwesigacte, madi sanangkelu domadaicte? Monicti nalic mi domadaicte!”

## 7

### Ngic dzalengineng 144 taosen

<sup>1</sup> Inguc nganibe motome angelo 4 nganicebaiba. Yenge himongtowa yagolec unggulucine 4, iwa domaibong. Aime nganicebabe yenge himongte gbelong 4 balu sebilelu domaibong, gbelong yogo yenge himongka me kivecka me yocka nalic mi wedaingte.

<sup>2</sup> Aime angelo 4 yenge himong nga kiwec basowalecepaningte tapili yeleicne. Aime na angelo monic nganiiba. Ye Wapong gagaineholec yele akale maa bagalu wenac ofe-ofeinacni kwesiwec. Yedi angelo 4 yenge

**6:8:** Yer 15:1-3; Esek 5:12,17; 14:21    **6:10:** Dan 8:13; Mige 78:10    **6:11:** Miye 7:9,13; 19:14

**6:12:** Yes 13:10-13; Esek 32:6-8; Mat 24:29; Sale 2:20; Miye 8:12; 11:13; 16:18    **6:13:** Yes 34:4

**6:14:** Miye 16:20    **6:15:** Yes 2:10,19,21; 34:12    **6:16:** Luk 23:30    **6:17:** Yol 2:11; Mal 3:2

**7:1:** Yer 49:36; Dan 7:2

wacebalu yanguc miwec,<sup>3</sup> “Ngenge himong me kiwec me yoc biyac mi basowalecebadiyeng. Nonge Wapongnonggengte kwelec kwekwefocine yengele meiwa akale maa loyelebeng wasecne aibong ibac ngenge wiycasawa basowalecebadiyeng.”<sup>4</sup> Aime ngic yengele meiwa akale maaholec, yengele dzalengineng 144 taosen mibong ngageiba. Akale maaholec yogo yenge Israel madecfocine 12 yengele habuwacni.<sup>5</sup> Yengele meiwa akale maaholec yengele dzalengineng yanguc,

Yudale fikesaweckacni 12 taosen,  
Rubente fikesaweckacni 12 taosen,  
Gatle fikesaweckacni 12 taosen.

<sup>6</sup> Asele fikesaweckacni 12 taosen,  
Nafatalile fikesaweckacni 12 taosen,  
Manasele fikesaweckacni 12 taosen.

<sup>7</sup> Simeonte fikesaweckacni 12 taosen,  
Liwaile fikesaweckacni 12 taosen,  
Isakale fikesaweckacni 12 taosen.

<sup>8</sup> Sebulunte fikesaweckacni 12 taosen,  
Yosefele fikesaweckacni 12 taosen, nga  
Benyaminte fikesaweckacni 12 taosen.

### *Habu sugucnedi Wapong afeeibong*

<sup>9</sup> Hei, inguc nganibe motome habutowabenang nganicebaiba. Aime yengele dzalengineng yogo monicti nalic mi wafedaite. Ngic-ngigac nganicebaiba, yenge himongne himongne yogowacni, nga himong fengnginang fengnginangsoc ngic-ngigac aili soc haicina monic-monic, nga yowane yowane, yengelacni. Aili yenge ngakpingineng dalicne kwalac-kwalac holelu molenginang kpongeng leso balu ngictaule ngiye-ngiyewa nga Lama madecinele haicka domaibong.<sup>10</sup> Domalu yanguc milu sugucne hacaukewlu wackebong,

“Wapongnonggeng ngictaule ngiye-ngiyewa ngiye-gac, aili Lama madecine, ngekele tapiliwa baficnubaboc wasecne gagabeleng.”

<sup>11</sup> Inguc mibong angelo sasawadi domalu ngictaule ngiye-ngiye nga damong 24 aili wiycag gaganginengkolec 4 hewalingebaibong. Angelo yenge ngictaule ngiye-ngiyele haicka wafalu ketadi holecnolu haicngineng heluluckelu Wapong afeeibong.<sup>12</sup> Afeelu yanguc miibong,

“Foinac, mimi-madic nga wac feicne, aili ngage-ngage-motoc nga kwele-madic aili alang-baba nga damongte tapili aili tapilitowa yogo sasa-wa Wapongnonggengte aigac.

Yogo damengsoc damengsoc damengngine moto-motoine mikacfafegidaic, yogo foinac.”

### *Doic sugucnebenang motowec*

<sup>13</sup> Inguc mibong, damong yengelacni monicti yanguc uwanelewec, “Ngicngigac ngakpingineng dalicnedi kwalac-kwalac yago, yenge weni yengi aili yenge wenuwacni kwesigaing?”

<sup>14</sup> Uwaneleme ameine yanguc edoiba, “Sugucnene, gageuc ngagegic.”

Inguc mibe yedi yanguc edocnuwec, “Ngic-ngigac yago yenge doic sugucnebenang yogowacni kwesilu ngakpingineng dalicne Lama madecinele sacti suwebong kwalac-kwalac aigac.<sup>15</sup> Ilec aili yenge deboc hadeng Wapongte Ibu-mac kwelina ngictaule ngiye-ngiyele haicka domalu ye afeelu

kwelec kwecnolu gagaing. Babong Sugucne ngictaule ngiye-ngiyewa ngiye-gac, ye yengeholec galu kpoluc-faleine yengele feiwa lome ngiyedaicte. <sup>16</sup> Aime yenge nosingte hatacmac mi homadaingte. Ailu misale mi aiyeledaicte. Ailu wenac me wiycac gocnedi socngineng hatacmac mi kweme malawedaingte. <sup>17</sup> I yangucte, Lama madecine ngictaule ngiye-ngiyele hewacka domagac, yedi damongebalu gagale misa dongeina mengocebalu hikeme nodaaingte. Aime Wapongti donge-misangineng sasawa suwey-ackedaicte."

## 8

### *Aka bakatackeicne moto-motoine baickewec*

<sup>1</sup> Lama madecinedi aka bakatackeicne moto-motoine baickeme alecine 7 aiwec. Baickeme iwa honocmenga 30 minit ngama ingucne hendolong mikac ningbenang kwelu fawec.

<sup>2</sup> Ning kweme angelo 7 Wapongte haicka domacaigaing, monicti yenge kpeng <sup>7</sup> yeleme nganicebaiba.

<sup>3</sup> Aime angelo monicti pele goldi baicne yogo bakwesilu alata emeina lelu domawec. Domame monicti marasing hoine madicne bocyac lacnowec. Lacname yogodi Wapongte bingec sasawa yengele mimilockolec kpatulelu alata goldi baicne ngictaule ngiye-ngiye emeina domawec, iwa lolu hasoc holewec. <sup>4</sup> Ye inguc aime yele molewacni hasoc hoine madicnedi Wapongte bingec yengele mimilockolec kpatulelu Wapongta fewec. <sup>5</sup> Feme angelo ye alatawacni dac balu peleina kweme haulu wakeme himongka wickeme sotingkelu wawec. Wame gbululung holeme uc sugucne hac fikewec. Ailu pilatac bame memeya bawec.

### *Angelo 4 yenge kpengnginengkolec*

<sup>6</sup> Bame angelo 7 kpengnginengkolec yenge kpeng fitonogale efeckeibong. <sup>7</sup> Efeckeibong angelo molic-molic yedi kpeng fitome mac hucine sanangkeicne\* nga dac sackolec kpatulelu himongka wickeme sotingkelu wawec. Wame himongtowa habu sugucne yogowacni habackang heuckelu iwacni nebocene lobewec. Ailu yoc sasawa himongtowa yoglec feina domagaing, yenge habu sugucne yengelacni habackang yogowacni heuckelu iwacni nebocene lobewec. Ailu kpinding sasawa dacti lobeyackewec.

<sup>8</sup> Aime yele lobeina angelo 2 yedi kpeng fitome monicti tiki sugucne dacineholec ingucnedi kiwecka wickeme wame kiwec habu sugucne yogowacni habackang heuckelu iwacni nebocene sac aiwec. <sup>9</sup> Aime kiwecka sic gaganganengkolec gagaing, habu sugucne yogowacni habackang heuckelu iwacni nebocene homayackebong. Ailu wage aling sugucne yogowacni habackang heuckelu iwacni nebocene sowalelu miyac aiibong.

<sup>10</sup> Aime yele lobeina angelo 3 yedi kpeng fitome sawawacni asocmeng sugucne monic hifa ingucne lobelu motolu wawec. Wame misa sugucne nga misa dongeine yenge habu sugucne yogowacni habackang heuckelu iwacni nebocene feina holewec. <sup>11</sup> Asocmeng yogo wacine Hobecine. Aime misa habu sugucne yogowacni habackang heuckelu iwacni nebocene yogo hobecine aiwec. Aime misa hobecine aiwecte ailu ngic-ngigac bocyacti nolu homaibong.

---

**7:15:** Wah 19:6,10; Esek 37:26-28    **7:16:** Yes 49:10    **7:17:** Mige 23:1-2; Yes 25:8; Miye 21:4    **8:1:** Hab 2:20; Sek 2:13; Sef 1:7    **8:3:** Miye 5:8; 6:9-11; Wah 30:1-3    **8:5:** Dep 16:12; Wah 19:16-19; Miye 11:19; 16:18    \* **8:7:** Himong mogungna mac hucine sawawa mogungkelu posa ingucne sanangkelu wacaigaing.    **8:7:** Wah 9:23-26; Esek 5:2; 38:22; Yol 2:30    **8:11:** Wah 7:20-25; Yer 9:15

<sup>12</sup> Aime angelo 4 yedi kpeng fitowec. Fitome wenac nga tamacne ailu asocmeng yengele angote tapili yogo aling habackang heuckelu iwacni nebocene kundung kwenale baickewec. Baickeme hadengte dameng yogowacni habackang heuckelu iwacni nebocinedi mi angoleibong. Aime deboc ye inguchac aiwec.

<sup>13</sup> Aime nganibe hikic monic sawa hewacka wileng filalangkeme yowamalacine ngageiba. Yowa yogo sugucnehad wackelu yanguc miwec, "Mee, mee, mee, angelo habackang yenge kpeng fitobong ucngineng sugucnehad hiyabong yowale umac habackang ngagedaingte. Ilec ngic-ngigachimongka gagaing, ngenge medecngebadaaic."

## 9

### *Angelo 5 yedi kpeng fitowec*

<sup>1</sup> Angelo 5 yedi kpeng fitome na asocmeng monic honocmengkacni walu himongka holewec yogo nganiiba. Nganibe monicti long sugucnebenang hauyackeicne, yoglec yefeinele ki asocmeng lacnowec. <sup>2</sup> Lacname yedi ki yogo balu long sugucnebenang yogo bamoctowec. Bamoctome dacti bole lobeme hasoc sugucnehad fecaigac, hasoc silicine ingucnedi longkacni ofewec. Long iwanacni hasoc ofelu wenac nga sawa hedicepame kundung kweiboc. <sup>3</sup> Aime hasockacni ipowa ofelu himongka waibong. Wabong monicti himongte wame-wame yengele tapili ingucne yenge yelelu <sup>4</sup> yanguc edocebawec, "Ngenge kpinding nga wiyac sasawa hekengngineng sabaine-holec fagaing, ailu yoc mi basowalecebadabiyeng. Ngenge ngic-ngigac Wapongte akale maa yengele meiwa mi balu gagaing, yenge sugu basowalecebadabiyeng. <sup>5</sup> Ngenge tamacne 5 iwa doic sugu yeledaing. Ailubac yenge mi homadaing." Aime wame-wamedi hicebame doic ngagecaigaing, doic ingucne aidaitce. <sup>6</sup> Dameng iwa ngic-ngigac yenge homanogale homac basackelu aibibiyedaingte. Ailu homanogale aiyeledaite. Aimebac homacti yenge hegilecebadaicte.

<sup>7</sup> Aime ipowa yenge ngani-nganiningineng hudu-babale becosic yenge ingucne. Hodocnginang duu goldi baicne ingucne ngiyewec. Nga haic-mesungineng yogo ngic-ngigac yengele haic-mesu ingucne. <sup>8</sup> Aime hodoc-dowecngineng yogo ngigac yengele ingucne. Ailu mic-luwengineng yogo laion yengele mic-luwe ingucne. <sup>9</sup> Ailu maleku holeibong, yogo aenti ngakpi ingucne baicne. Aime kwenggelengngineng ucine yogo becosic bocyaicti hudule gasackelu keleta fuluckelu ucineholec hikecaigaing ingucne. <sup>10</sup> Ailu gicngineng micineholec yogo wame-wame gicngineng ingucne aiwec. Aime yenge ngic-ngigac basowalecebanogale tapilingineng yogo tamacne 5 yoglecsoc fadaicte. Aime tapilingineng yogo gicnginang ngiyewec. <sup>11</sup> Long sugucnebenang, yoglec angelodi\* yengele ngictaungineng gawec. Yele wacie yogo Hibru yowawa Abadon, nga Grik yowawa Apolion.<sup>†</sup>

<sup>12</sup> Mee, yowale umac molic-molic yogo motogac. Ngagegaing, yoglec lobeina, yowale umac yaeckangti kwesidabiyete.

### *Angelo 6 yedi kpeng fitowec*

---

**8:12:** Wah 10:21-23; Esek 32:7; Miye 6:12-13    **8:13:** Miye 9:12; 11:14    **9:1:** Luk 10:18; Miye 20:1    **9:2:** Fike 19:28; Yol 2:2,10; Wah 10:12-15    **9:4:** Miye 7:3    **9:6:** Yop 3:21; Yer 8:3    **9:7:** Yol 2:4    **9:8:** Yol 1:6    **9:9:** Yol 2:5    \* **9:11:** Satang ye angelo monic. Ilec ye angelo yogo mecne. Ailu 9:1 iwa asocmeng monic wawec, yogo ye mecne.    † **9:11:** Apolion wac yoglec fungine yogo, ye kindololo ngic.    **9:11:** Wah 12:23

<sup>13</sup> Aime angelo 6 yedi kpeng fitome Wapongte haicka alata goldi baicne, yoglec unggulucina begic 4, yengelacni mic-yowa monic ngageiba.

<sup>14</sup> Ngagebe yedi angelo 6 kpengineholec yanguc edowec, "Angelo 4 Yufretis misa sugucne mecina witicebabong domagaing, yenge lukecebanong."

<sup>15</sup> Angelo 4 yenge ngic-ngigac habu sugucne yogowacni habackang heuckelu iwacni nebocene whomacebanogale efeckeibong. Efeckeibong dameng nga hadeng ailu tamacne nga hifa-dameng yoglec efeckelu gabong yedi lukecebawec. <sup>16</sup> Aime yengeholec hudu-baba ngic becosic feina ngiyeibong, yengele dzalengineng 200 milion mibong ngageiba.

<sup>17</sup> Aime gungka ingucne dongene lokeme nganibe hudu-baba ngic becosic-ninginkolec yengele silicngineng yanguc nganiiba. Yenge ngakpingineng aenti baicne yogo hibine sasacne dac ingucne ailu sowac-sowac nga dagec-dagec, yogo posa wacie salfa ingucne. Nga becosicte hodoc yogo laion ingucne. Aime micnginangkocni dac nga hasoc ailu salfa-posadi ofelu hukeibong. <sup>18</sup> Doic habackang, dac nga hasoc ailu salfa-posa ubilangineholec, yenge becosic micnginangkocni ofelu ngic-ngigac habu sugucne yogowacni habackang heuckelu iwacni nebocene whomacebaibong. <sup>19</sup> Tapili yogo becosic micnginang nga gicnginang ngiyewec. Aime gicngineng yogo yenge hemi ingucne hodocnginengkolec. Ailu yenge yogodi wiyac haicne monic-monik basowalecaigaing.

<sup>20</sup> Aime ngic-ngigac nebocene doic yogodi mi whomacebaibong, yenge moledi aibaba gocne balu gaibong, aibabangineng yoglec kwelengineng mi hefaliyeibong. I yangukte, yenge aleng nga siduc-gbong yogo gol, siliwa, kopa, nga posa, ailu yociti baicne alang bayeletu afeebaninge aibaba yogo mi hegileibong. Siduc-gbong yogo molenginengti baicne. Ailu siduc-gbong ingucne yenge wiyac monic mi nganidaingte. Nga hedecnginengti yowa monic mi ngagedaingte. Ailu higenginengti nalic mi edelu hikedaingte. <sup>21</sup> Aime ngic-ngigac yogo yengi ngic-ngigac gocne wecebabong homaibong. Ailu hefec nga mosoc aibaba, ailu selo-boic aibaba nga hise aibaba, yogo sasawa bagalu kwele-hefaliyec monic mi aiibong.

## 10

### *Angelo monic nga hibi kpadiweiicne*

<sup>1</sup> Aime na angelo tapiliineholec monic nganibe honocmengkacni wawec. Ye kaguwadi ebeckeicne. Aime hodocina hulilic ngiyewec. Nga haic-mesuine yogo wenac-dongeine ingucne ailu higekecine yeke bosing ingucne dac-ubilangkolec. <sup>2</sup> Ailu ye hibi kpasicne monic kpadiweiicne yogo biyac bafilameicne moleina balu domawec. Domalu hige soleine yogo kiwecka nga kanaine yogo himongka lowec. <sup>3</sup> Lolu laionti aukwecaigac, silicine ingucne hac daccineholec aukwewec.

Aukweme gbululung 7 yenge mic ucnginengkolec yowa mibong. <sup>4</sup> Inguc mibong kwelelengkenogale aibe, honocmengkacni mic-yowa monicti yanguc milu edocnume ngageiba, "Gbululung 7 yowa migaina yogo mi kwelengkec. Yogo ngage-ngagegona loengka fadaic."

<sup>5</sup> Inguc mime angelo biyachac nganiiba, yedi kiwecka nga himongka domalu mole-soleine honocmengka haic bafangkewec. <sup>6</sup> Bafangkelu mimipang sanangne yanguc miwec, "Sugucne gagac nga gaginowagac, yedi mime sawa nga himong ailu kiwec nga yengele kwelinginang wiyac sasawa

fagaing, yogo fikeyackeibong. Na yele wac wackelu yowane basanangkelu yanguc migabac, ‘Ye wangec hatacmac mi aidaicte.’ <sup>7</sup> Wapongti kwelec kwekwefocene, yenge siduc-mimi ngicfocine gagaing, yenge yeicne ngage-ngage sangkeicne yogo biyachac mime yegengkeyelewec. Aime angelo <sup>7</sup> yedi kpeng fitonogale aidaicte, dameng yogowa ngage-ngage sangkeicne yogo noine fikeme motodaicte.”

<sup>8</sup> Aime molickelu mic-yowa honocmengkacni ngageiba, yedi hatacmac milu yanguc edocnuwec, “Ga lelu angelo kiwecka nga himongka domagac, yele molewacni hibi baflameicne, yogo badamec.” <sup>9</sup> Inguc mime na an-gelola lelu hibi kpisicne baflameicne yogo nelenale edoiba.

Edobe yedi yanguc miwec, “Ga balu noc. Aime yogodi micgona begec misaine ingucne angacine aidaicte. Nga gobegona haumebac gobe hihi aigeledaicte.”

<sup>10</sup> Inguc mime na angelole molewacni hibi kpisicne baflameicne yogo balu nobe micnabac begec misaine ingucne angacine aiwec. Nga gobena haumebac gobe hihi aineleme <sup>11</sup> yanguc edocnuibong, “Ga ngic-ngigac soc haicine monicmonic, nga himongne himongne, ailu yowane yowane, nga ngictau bocay yengela wiyc fikedaicte, yogolec Wapongte siduc-yowa\* hatacmac midamec.”

## 11

### *Ngic yaeckang yeki yowa miboc yegengkewec*

<sup>1</sup> Aime monicti kpetele maa monic yogo kumicnang muc ingucne nelelu yanguc edocnuwec, “Ga fangkelu Wapongte Ibu-mac nga alatale maa balu ngic-ngigac yogowa Wapong afeecaigaing, yengele dzalengineng momoc badamec. <sup>2</sup> Ailu Ibu-macte sobeng odaineholec fagac, yogo Israel yengele alingkacni miyac yenge yeleicne. Ilec ailu ga sobeng yogolec maaine mi badamec. Yengi tamacne 42le kwelina taon gbagbacne\* yogo edesockelu basowaledaingte. <sup>3</sup> Dameng iwashac na wideckecke tapili yetebe yeki kwelesowacte ngakpi holelu hadeng 1 taosen 260le<sup>†</sup> kwelina nale siduc-yowa midabiyeete.” <sup>4</sup> Yeke oliwa yoc yaeckang, nga Sugucne himongtowa ba-fuwawec, yele haicka hifa higeineholec yaeckang ingucne domagabiye. <sup>5</sup> Ngic gocne yengi yeke basowalecepanogale ngagedaingtewa, dacti yekele mickacni ofelu ngabafocnginec lobecebam homadaingte. Ailu hatacmac mibe, monicti yeke basowalecepanogale ngagedaictewa, ye inguc hocne homadaic. <sup>6</sup> Wideckecke yeke yowa-siduc milu gaboc sawawa wileng hedickeme mac monic mi kwedaicte, yeke bole-yowa yogo tapiliineholec balu gagaic. Ailu yeke yekuhuctihac miboc misadi hefaliyelu sac ainale bole-yowa tapiliineholec balu gagaic. Ailu yeke yekilec angacite doic haicine monicmonic himongka loyelenicte bole-yowa tapiliineholec ingucne hac balu gagaic.

<sup>7</sup> Aime yeke fungine miboc yegengkeme edocebayackeboc motome, hudu-baba-sicti long sugucnebenang, yogolec kwelinacni ofelu yekeholec wenagulu yeke huduwa ewalicepalu wehomacepadaicte. <sup>8</sup> Wehomacepalu

**10:7:** Amo 3:7    **10:9:** Esek 2:8-3:3    \* **10:11:** Wapongte siduc-yowa yogo hibi kpisicne baflameicne iwa fawec. Yowa yogo angacine nga gobe hihiineholec momoc aidaicte.    **11:1:** Esek 40:3; Sek 2:1-2    \* **11:2:** Ibu-mac Yerusalem iwa domawecte taon gbagbacne wackeibong.    **11:2:** Luk 21:24; Miye 13:5    † **11:3:** Hadeng 1 taosen 260 yogo tamacne 42 aigac. Nga tamacne 42 yogo hifa habackang nga nebocene aigac.    **11:4:** Sek 4:2-3,11-14; Miye 1:20; Yef 19:15    **11:5:** 2Sm 22:9; Mige 97:3    **11:6:** 1Ngt 17:1; Wah 7:17-20; 1Sm 4:8    **11:7:** Dan 7:7,21; Miye 12:17; 13:7; 17:8

kponggbongnginec yogo taon yefeina locepame fadabiyecte. Taon sugucne yogolec wacine nangeng yowa holelu Sodom nga Isip micaigaing. Aime mac iwa hocne Sugucnenonggeng malicpongka webong homawec.

<sup>9</sup> Aime hadeng habackang nga hadeng monic nebocene yogowa ngicngigac soc haicine monic-monic, nga himong fengnginang fengnginangsoc ngic-ngigac. Ailu yowane yowane nga himongne himongne ngic-ngigac yenge yekel kponggbong nganilu longepadaingkale, kpatalayeledaingte.

<sup>10</sup> Kpatalayelebong ngic-ngigac himongte wiyacka wetackelu gagaing, yenge sasawadi angac nga kwele-madic ngagelu kwele-madicte woc-wiyac gocne lanagudaingte. Siduc-mimi ngic yaeckang yeke ngic-ngigac yogo doicka locebaiboc te inguc aiyetedaingte.

<sup>11</sup> Aime hadeng habackang nga hadeng monic nebocene motome, gagale asudi Wapongtacni kwesilu yekela haume yeke hatacmac fangkelu domaiboc. Domaboc nganicpalu yenge damuebame hangoc sugucne hacaiibong. <sup>12</sup> Aime honocmengkacni yowa-malac monic yanguc edocepame ngageiboc, "Ngeke yawa ofen!" Inguc mime ngabaocnginec yenge yeke nganicpabong kaguwa kwelina honocmengka feiboc.

<sup>13</sup> Feiboc dameng iwahac memeya sugucne hac bame taon yogolec nebocene 10 iwasni nebocene moniyang siyeckewec. Memeya sugucne bawec, yogolec kwelinaenci ngic-ngigac dzalengineng 7 taosen yenge homai-bong. Homabong ngic-ngigac nebocene yenge hangocebame Wapong honocmengka gagac, yele wac bafeibong. <sup>14</sup> Mee, yowale umac alecine yaeckang yogo motogac. Yanguc ngagedaing, yogolec lobeina, yowale umac moniyangti sugu fagac, yogo biyac fikedaicte.

### *Angelo 7 yedi kpeng fitowec*

<sup>15</sup> Aime angelo 7 yedi kpeng fitome honocmengkacni yowa-malac sugucne yanguc miibong,

"Yakumac Sugucnenonggeng nga Kristo bawosaeicne, yeki himontowale ngani-damong yogo balu damongkelu gagaic.

Ailu Sugucnenonggengti ngictau gagac ailu gaginowagac."

<sup>16</sup> Inguc mibong damong 24 Wapongte emewa ngictaule ngiye-ngiyenginang ngiyeckaigaing, yenge ketadi holecnolu haicngineng heluluckelu Wapong afeebong. <sup>17</sup> Afeelu yanguc miibong,

"Sugucne Wapong Tapilitowa Filene, nonge kwele-madic edocgugabeleng. Ga biyachac gaing, ailu ga yakumac gagichac.

Gageicne tapilitowa balu yakumac ngictau bole balu gagic.

<sup>18</sup> Ngic-ngigac himongne himongne gagaing, yenge aalic ngagebong, gale aalicte ameinele damengtibac yanguctihac kwesilu gagac.

Gagi ngic-ngigac homaibong yenge wosacebalo mimoctocebadamekte.

Ailu kwelec kwekwefocgone yenge gale siduc-mimi ngic, gageicne bingec ngic-ngigacfocgone, sugucne nga kpisicnedi gale wacgone alang bag-elecaigaing, yenge aibabanginengte ameine yeledamekte.

Aime ngic-ngigac gocne yengi himontowale ngic-ngigac nga wiyac sasawa basowalecaigaing, gagi yenge basowalecebadamekte."

<sup>19</sup> Aime honocmengka Wapongte Ibu-mac nuine laliyeibong. Ailu yele dodoftice katapa dongenginengti nganibong. Nganibong pilatac bame

gbululung nga uc sugucnehac holeibong. Aime memeya bame mac hucine sanangkeicne yogo sugucnehac waibong.<sup>‡</sup>

## 12

### *Ngigac nga hematowa*

<sup>1</sup> Aime maa monic sugucnehac sawawa yanguc fikewec. Ngigac monic ngiyewec, ye wenacti ngakpi ingucne aicnowec. Nga higeinele bagewa tamacne ngiyewec. Aime hodocina asocmeng 12 yengi ngictaule duu ingucne ngiyeibong. <sup>2</sup> Ye gobeholec, aime kogoc fikenale gado hime aukwewec.

<sup>3</sup> Aime maa monic sawawa fikewec. Hei, hematowa sasacne ingucne monic sugucnebenang ngiyewec. Ye hodocine 7 nga begicine 10. Ailu ye hodocina ngictaule duu 7 holelu ngiyewec. <sup>4</sup> Ngiyelu ye gicinedi sawawale asocmeng habu sugucne yogowacni habackang heuckelu iwasacne nebacine pelengkelu himongka wicebawec. Aime ngigac yogo kogoc banale aime hematowa ye kogoc yogo gbokenale ngagelus ngigac yele haicka domawec.

<sup>5</sup> Domame ngigac ye madec monic bawec. Bame yele gboli yogo biyache-nang Wapongta balu feibong. Bafelu yele ngictaule ngiye-ngiyewa lobong fawec. Aime madec yogo, ye himongne himongne ngic-ngigac aen yasudi damongebadaite. <sup>6</sup> Aime ngigac ye himong kisiwa misaine mikacka hangoc likewec. Hikeme yengi ye hadeng 1 taosen 260le kwelina noba-nosing lacnolu ngani-damong aicnodaingte. Wapongti yele mac ngiye-ngiye iwa biyachac hamockewec.

### *Maikel nga hematowa*

<sup>7</sup> Aime honocmengka hudu sugucne fikewec. Iwa yanguc fikewec, Maikel nga angelofocine yenge hematowa yeholec wenagulu hematowa nga angelofocine yenge hudu ameine bafaliyeibong. <sup>8</sup> Ailu tapilingineng mikac aime yengi hatacmac honocmengka gagale sawaine monic mi fawec.\*

<sup>9</sup> Aime hematowa ye hema esecne, yele wac monic Aleng Sugucnengineng nga Satang, ye nga angelofocine wicebabong himongka waibong. Yedi himontowawa ngic-ngigac sasawa kwasacka mengocebame yenge ye bal-aibecaigaing. <sup>10</sup> Aime yowa-malac sugucne monic honocmengka yanguc mime ngageiba,

“Wasecne ainogale dameng nga tapili ailu ngani-damong yoglec fileine Wapong, yogo yakumac noine fikegac.

Aime Kristo bawosaewec, yedi yakumac yoglec bole-yowa tapiliineholec balu gagac.

Ngic hae-gbafoconngeng yowawa locebacaigac, yedi Wapongnonggengte haicka deboc hadeng yowawa locebalu game ye biyachac honocmengkacni wickebong wawec.

<sup>11</sup> Ngic hae-gbafoconngeng yenge Lama madecinele sac nga Sugucnele yowa mibong yegengkewecte gbelong ailu Aleng Sugucnengineng huduwa ewaliibong.

Ailu yengileng kwelenginengti gaganginengte ngagebong feicne mi aime homacte mi hangocebawec.

<sup>‡</sup> **11:19:** Himong mogungna mac hucine sawawa mogungkelu posa ingucne sanangkelu wacaigaing.

**11:19:** Hib 9:4; Miye 8:5; 15:5; 16:21    **12:1:** Fike 37:9-11    **12:2:** Mika 4:10    **12:3:** Dan 7:7; Esek 29:3    **12:4:** Dan 8:10    **12:5:** Yes 7:14; 66:7; Mige 2:9; Miye 19:15    **12:7:** Yud 9; Dan 12:1

\* **12:8:** Dan 2:35    **12:9:** Fike 3:1,14; Luk 10:18; 22:31; Miye 20:2    **12:10:** Yop 1:11; Sek 3:1

**12** Honocmeng nga aling honocmengka gacaigaing, ngenge wiyc honocmengka fikewewe ailu beliyedaing.

Aimebac, mee, himongka nga kiwecka gagaing, ngenge medecngebadaic. I yanguc, Aleng Sugucnengineng ye ngengela kwesigac.

Ailu damengngine bangkaleme ngagegacte ailu kwele-dackolec aalickegac.”

**13** Yenge hematowa himongka wickebong wawec, ye yogo ngani-motolu ngigac kogoc gobeeelu madec bawec, ye yebiyewec. **14** Yebiyeme ngigac ye hemale haickacni hangoc hikelu himong kisiwa misaine mikacka hikenale aime, monicti ngigac yogo hikictowa kwegecine lacname filalangkelu hikewec. Mac yogo yele mac ngiye-ngiye iwa biyachac bamockewec, yogowa hikewec. Ye iwa hifa 3 nga hifa monic nebocene dameng inguc ngiyeme yengi ye ngani-damong aicnolu nosing lacnodaingte. **15** Lacnobong hemadi ye yebiyelu lumong ingucne banale micinacni misa mengume misa ingucne walu hikewec. **16** Hikeme himongti ngigac bafickelu micine angkeme, hematowadi misa micinacni mengume wame, himongti misa yogo gbokewec. **17** Gbokeme hematowa ye ngigac yele aalic ngagewec. Ngagelu hike ngigac yele adu-madecfocene Wapongte ung-yowa balaibelu gacaigaing, ailu Yesu Kristole siduc yogo mibong yegengkeme balaibecaigaing, yenge hudu sugucnedi wecebanale hikewec.

**18** Ailu ye kiwec mecina dingongka domawec.

## 13

### *Hudu-baba-sic monic kiweckacni ofewec*

**1** Aime nganibe kiweckacni hudu-baba-sic monic ofewec. Ye begicine 10 nga hodocine 7, aime begicine yoglec feina ngictaule duu 10 ngiyeibong. Aime hodoc yogo yengele feinginang Wapong fecnogac, yoglec wac haicine monic-monics kwelengkeicne fawec. **2** Aime sic yoglec socine yogo kategnyaungtowale soc ingucne aiwec. Nga micine yogo laionte mic ingucne. Ailu higeine yogo beya ingucne fingacine dalicne.

Aime hematowa ye bole-yowa tapiliineholec ailu ngictaule ngiye-ngiyeine yogo ngic-ngigac bocyac damongebanale hudu-baba-sic bole-hibi yogo lacnowec. **3** Aime hudu-baba-sic yogo hodocine monic lofocineholec nganiba. Hodocine yogo webong waictowaineholec ailu homaicne ingucne aiwec. Ailubac yogo wisiyewec. Aime himongne himongne ngic-ngigac bocyacti hudu-baba-sic yogo nganilu kwatackelu ye balaibeibong. **4** Balaibeibong hematowa ye hudu-baba-sicti ngic-ngigac damongebanale bole-yowa tapiliineholec lacnowecte ailu hematowa afeebibong. Ailu yenge hudu-baba-sic momoc afeelu yanguc miibong, “Madi ye ingucne aidaicte? Ailu madi yeholec hudu nalic wedaicte?”

**5** Tapili lacname ye kosa aukwelu Wapong misulec aicnowec. Aime tapili yogo lacname, ye tamacne 42le kwelina Wapong ye ngagecno-ngiyeme ngic-ngigac damongebanale bole-yowa nga tapili balu gawec. **6** Ailu ye micine angkelu Wapong misulec aicnolu Wapong wacine nga macine ailu aling honocmengka gagaing, yenge misulec aiyelewec. **7** Inguc aiyeleme Wapongti ngagecno-ngiyeme ye Wapongte bingec yengela hudu welu yenge huduwa ewalicebalu gbelong aidaicte. Ailu ye himong fengnginang fengnginangsoc ngic-ngigac, nga soc haicine monic-monics, ailu yowane yowane,

nga himongne himongne ngic-ngigac, yenge damongebanale bole-yowa tapiliineholec lacnowec. <sup>8</sup> Inguc lacname ngic-ngigac himongka gagaing, yengele wacngineng Gagale hibiwa mi fagac, yenge sasawa hudu-babasic afeedaingte. Gagale hibi yogo Lama madecine webong homawec, yele hibi. Ailu himong bafuwawec, dameng yogowa ngic-ngigacfocine wacngineng kwelengkeicne fawec. <sup>9</sup> Monic hedeckolec gagacti yowa yago aneng ngagedaic.

**10** Monic balu muc-macka lonogale mibong, ye muc-macka hikedaic.

Monic hudu-babale fitecti wehomanogale milu, ye webong homadaic.

Ilec Wapongte bingec yenge tatakic mikac doickolec wangec galu ngagegesingkolec gadabiyeng.

### *Hudu-baba-sic monic ye himongkacni ofewec*

**11** Inguc aime nganibe hudu-baba-sic monic himongkacni ofewec. Ye begicine yaekang, yogo lamale ingucne. Ailu hematowale yowa ingucne miwec. **12** Inguc milu yedi hudu-baba-sic kiweckacni molickelu ofewec, ye bafickenale yele bole-yowa tapiliineholec sasawa balu gawec. Ailu himongka ngic-ngigac gagaing, yenge aiyeleme hudu-baba-sic kiweckacni ofewec, ye afeeibong. Ye biyac homawec, inguc ngageibong. Aimebac waicina biyachac wisiyewec. **13** Aime hudu-baba-sic himongkacni ofewec, yedi pasile maaine sugucnephac balu gawec. Monic yanguc fikewec, ngicngigac yengele haicka sawawacni dac himongka wawec. **14** Ailu kiweckacni ofewec, ye bafickelu pasile maaine bawecete ailu ngic-ngigac himongka gagaing, yenge kwesacka mengocebame ye balaibelu gaibong. Ailu ngicngigac himongka gagaing, yenge edocebame hudu-baba-sic ye hudu-babale fitecti esecne biyachac webong homaicne ingucne gawec, yele iluc monic balu alang bacnoningte edocebawec.

**15** Babong hudu-baba-sic himongkacni ofewec, yedi hudu-baba-sic kiweckacni yele ilucine yogo asu lacnonale tapili lacnowec. Lacname iluc yogodi yowa mimi aiwec. Aime ngic-ngigac sasawa yenge iluc yogo mi afeedaingte, yogo yenge wehomacebanale tapili balu gawec. **16** Balu game hudu-baba-sic himongkacni ofewec, yedi ngic-ngigac sasawa sugucne nga kpisticne, mafaholec nga mafa mikac, kwelec kwekwe ngic sugucnefocngi-neng yengele bagewa gagaing. Nga ngic-ngigac ngic monicti bagewa mi gagaing, yenge sasawadi maa monic mole-folenginang me meinginang balu ganingte yoingebalu yelewec. **17** Inguc aime ngic monicti hudu-baba-sic kiweckacni ofewec, yele wacine me dzalewa wacine, yogolec maaine mi balu gagacka, ye wiyac monic fuli nalic mi badaicte, me mi saledaicte. **18** Hudu-baba-sicte dzale yogo ngic monicti dzale, yogo 666. Aime monic ngage-ngageheholecti wacinele dzale yogo wafelu maainele fungine ngage-motodaic.

## 14

### *Lama madecine nga ngicfocine 144 taosen*

<sup>1</sup> Hei, na Lama madecine nganibe ye Sion tikiwa ngic 144 taosen yengeholec domawec. Ngic domaibong, yenge Lama madecinele wac nga Macchinele wac yengele meiwa kwelengkeicnedi domaibong. <sup>2</sup> Aime honocmengkaci uc monic misa dundung sugucne yele uc ingucne aiwec. Yogo gbululung sugucneholec holecaigacte uc ingucne ngageiba. Ailu yogo gita wewe ngic yengi gita mucngineng homacne webong ucine fikecaigac, yogo ingucne ngageiba. <sup>3</sup> Aime ngictaule ngkiye-ngiyewa nga wiyac gaganginengkolec 4 ailu damong yengele haicka domalu gee gblolicne monic holeibong. Holebong ngic 144 taosen himongkaci biyachac fuli bacebaicne, yenge sugudi gee yogo nalic ngagelu holedaingte. <sup>4</sup> Ngic yogo yenge ngigac yengeholec monic mi faicne. Ailu wonongngineng mikac gbagbacnebenang gaibong. Yenge Lama madecinedi mac wenuwa hikecaigac, iwa ye balaibeccaigaing. Lama madecinedi himongte ngic-ngigac yengele hewackacni fuli bacebame yenge Wapong nga yeicne molic-molic alingfocine aiibong. <sup>5</sup> Ailu yenge micnginengti yowa kwesacine monic mi miibong, yenge gbagbacne nga sowacnengineng mikac gaibong.

### *Angelo habackang*

<sup>6</sup> Na angelo monic nganiiba, ye sawa hewacka falockelu hikewec. Hikelu Siduc Madicnefafeginowagac, yogo ngic-ngigac himongka gagaing, yenge milu edocebame yegengkenale balu gagac. Bagalu himongne himongne ngic-ngigac, nga himong fengnginang fengnginangsoc ngic-ngigac, ailu yowane yowane, nga soc haicina monic-monic, yengela <sup>7</sup> yowa sugucneholec wackelu edocebalu yanguc miwec, "Ngenge Wapongte hangocngebame alang bacnolu wacine bafedabiyeng. Wapong ye ngengele aibaba wosaelu mimoctodaicte, yogolec dameng biyac bangkale welegacte ngenge sawa nga himong ailu kiwec nga misa dongeine bafuwacebawec, ye afeedaing."

<sup>8</sup> Inguc mime angelo 2 yedi ye balaiibe welelu yanguc miwec, "Babilon taontowa\* ye waweicne hocne, Babilon yogo biyac waweicne fagac. Yedi hocne selo-boic aibabaine angacineholec, yogo waing misa ingucne himongne himongne ngic-ngigac sasawa gumecebamew nowackeibong."

<sup>9</sup> Inguc mime angelo 3 yedi yeke balaibecepalu kwesilu yowa-malac sugucneholec yanguc miwec, "Monic ye hudu-baba-sic nga ilucine afeecaigac, ailu yele maa yeicne meiwa me moleina balu gagacka, <sup>10</sup> ye yeicne Wapongte kwele-dacte waing misa nodaicte. Waing yogo sanangnebenang misaholec mi lalikciecne, ye aalicte kwenoche kap iwa sotinkeme hauicne ngiyegac. Aime Wapong yeicne angelofocine ailu Lama madecine, yengele haicka dac nga salfa-posa ubilangineholec yogolec kwelina doictowa ngagedaicte.

<sup>11</sup> Aime ngic-ngigac hudu-baba-sic nga ilucine ketadi holecnolu afeeli gai-bong. Ailu yele wacte maa baibong. Ngic-ngigac yogo yenge dacka doictowa ngagebong yogolec hasoicti damengsoc moto-motoine mikac ofelu hasoebalu game yenge deboc hadeng kwele-mogung monic mi bafuwadaingte."

<sup>12</sup> Inguc aime Wapongte bingec yenge Wapongte ung-yowa balaibelu Yesu ngagesingkelu gagaing, yenge tatakic mikac sanangne gadabiyeng.

<sup>13</sup> Aime honocmengkaci yowa-malac monic yanguc fikelu edocnuwec, "Ga hibiwa yanguc kwelengkec, 'Yakumacbac molickelu ngic-ngigac Sugucneholec wetackelu homagaing, yenge kwele-angackolec.'

<sup>14:2:</sup> Miye 1:15; 19:6    <sup>14:3:</sup> Yes 35:10; 42:10; Miye 5:9; 7:4    \* <sup>14:8:</sup> Taon yogolec ngic-ngigac yenge habu moniyang gaibongte ailu ngigac monic ingucne "ye" kwelengkewec.    <sup>14:8:</sup> Yes 21:9; Dan 4:30; Yer 51:7,8; Miye 17:2; 18:2,3    <sup>14:9:</sup> Miye 13:12-17    <sup>14:10:</sup> Fike 19:24; Mige 75:8; Yes 51:17,22; Yer 25:15-16; Esek 38:22; Miye 16:19; 20:10; 21:8    <sup>14:11:</sup> Yes 34:10    <sup>14:12:</sup> Miye 13:10

Inguc mime Asudi yanguc miwec, "Oc, aibabangineng madicne ngagesilu bacebame yenge doic-bolewatn ci ngyie-nagedaingte."

### *Himongtowawa noine babale dameng*

<sup>14</sup> Hei, na kaguwa monic kwalac-kwalac nganiiba. Nganibe yogolec feina ngic monic silicine ngicte madec ingucne ngyiewec. Ye hodocina ngictaule duu monic goldi baicne holelu moleina noine-weweles fitec monic micineholec balu ngyiewec. <sup>15</sup> Balu ngyieme angelo monicti Ibu-mackacni walu ngic kaguwa feina ngyiewec, ye sugucnehae wackelu yanguc edowec, "Himongte nosing noine houweme weweles dameng biyac kwesigacte aili, ga noine-weweles fitecgonedi balu noine welu banong." <sup>16</sup> Inguc mime ngic kaguwa feina ngyiewec, yedi noine-weweles fitecinedi himongka ngosockelu himongte nosing noine welu bawec.

<sup>17</sup> Weme angelo monic honocmenge Ibu-mackacni wawec, ye inguchac noine-weweles fitec monic micineholec balu ngyiewec. <sup>18</sup> Aime angelo monic ye dac damongkenale bole-yowa nga tapili balu gawec, yedi alatawacni kwesiwe. Kwasilu yowa-malac sugucnehae wackelu angelo monic noine-weweles fitec micineholec balu ngyiewec, ye yanguc edowec, "Himongka waing noine biyac houweyackegac. Ilec ga noine-weweles fitecgone micineholecti waing noine welockelu kpaduckeyackec."

<sup>19</sup> Wackeme angelo yogodi noine-weweles fitecinedi himongka ngosockelu himongte waing noine helockelu kpaducebalu Wapongte kwele-dacte waing hesoc-hesoce posatowa sugucna wicebame faibong. <sup>20</sup> Fabong waing hesoc-hesoce posatowa taon lobina domawecti hesocebawec. Aime waing hesoc-hesoce posatowa iwacni sac walu sugulelu fangkewec, yogo becosic yengele ubo oiyalu fame himong 300 kilomitalessoc hikelu wakewec.<sup>†</sup>

## 15

### *Angelo 7 peleholec*

<sup>1</sup> Na honocmengka maa monic feicne damuineholec fikeme nganiiba. Nganibe angelo 7 yenge doic 7 moto-motoine balu domaibong. Doic 7 yogo fikeemewa Wapongte kwele-dac moyotackedaite. <sup>2</sup> Na wiyc monic kiwec ingucne galasdi baicne dackolec lalickiecinne ingucne nganiiba. Nganibe ngic-ngigac yenge hudu-baba-sic nga ilucine aili dzalewa wacine alang mi bacnolu huduwa ewalicebalu gbelong aibong, yenge nganicebaiba. Yenge Wapongti gita mucine homacne biyachac yelewec, yogo kiwec feina balu domaibong. <sup>3</sup> Aili yenge Wapongte kwele kwekwe ngic Moses nga Lama madecine, yekele gee yanguc milu holeibong, "Sugucne Wapong Tapilitowa Fileine, aibabagone yogo feicne nga damuine-holec.

Aili ga himongne himongne yengele ngictau. Gale yefe yogo dondonne nga noine.

<sup>4</sup> Sugucne ga sugu gbagbacne. Ilec aili madi mi hangockeme wacgome mi bafedaite?

Aili gale pasi dondonne yogo yegenia fikewecte aili, himongne himongne ngic-ngigac sasawa yenge kwasilu gale haicka ketadi holelu afegudaingte."

**14:14:** Dan 7:13    **14:18:** Yol 3:13    <sup>†</sup> **14:20:** 300 kilomita yogo Finschhafenkoci hikegacgu Goroka, dalicne yogolecsoc. Ye stadia 1 taosen 600 kwelengkewec. Stadia moniyang yogo 185 mita ingucne aigac.    **14:20:** Yes 63:2-3; Miye 19:15    **15:3:** Yef 32:4; Wah 15:1; Mige 139:14; 145:17

**15:4:** Yer 10:6-7; Mige 86:9-10; 98:2

<sup>5</sup> Inguc holebong motome nganibe honocmengka Wapongte Ibu-macka dodofic katapale kpoluc-fale yogolec nuine laliyeibong. <sup>6</sup> Laliyebong angelo 7 yenge doic 7 balu domaibong, yenge ngakpi-kpoluc kwalacne kpoluc madicnebenang yogo angoceneholec holelu umbika goldi baicne yogodi mondacngineng hefeli Ibu-mackacni waibong. <sup>7</sup> Wabong wiyc gagangi-nengkolec 4 yengelaci monicti angelo 7 yenge pele 7 yelewec. Pele yogo goldi baicne ailu Wapong gagac nga gaginiwagac, yele kwele-dacti iwa wakeicne fawec. <sup>8</sup> Fame Wapongte hibi-angoc nga tapili, yogolec hasoicti Ibu-mac kweline wakewec. Dameng iwa monicti Ibu-mac yogolec kwelina nalic mi fedaicte. Aime angelo 7 yengele doic 7 yogo sasawa motoyackeme Ibu-macka hatacmac fedaingte.

## 16

### *Wapong kwele-dacinele pele*

<sup>1</sup> Na Ibu-mackacni yowa-malac monic sugucne hac ngagebe yedi angelo 7 yanguc edocebawec, “Ngenge hikelu Wapongte kwele-dacti pele 7 wakeicne yogo himongka sotingkebong hauna.” <sup>2</sup> Inguc mime angelo molic-molic yedi hikelu pele yogo sotingkeme himongka hauwec. Haume ngic-ngigac hudubaba-sicte maaine balu gaibong, nga ilucine afeelu gaibong, yenge waic-sanang sowacne doicineneholecti fikeyelewec.

<sup>3</sup> Aime angelo 2 yedi pele sotingkeme kiwecka hauwec. Haume kiwec hefaliyelu ngic homaicnele sac ingucne aiwec. Aime wiyc sasawa gagangi-nengkolec kiwecka gaibong, yogo homayackebong.

<sup>4</sup> Homabong angelo 3 yedi pele sotingkeme misa sugucna nga misa dongeina haume misa yogo sasawadi sac aiyackebong. <sup>5</sup> Aime angelo 3 ye misa fileine aigac, yedi ngagebe yanguc miwec,  
“Sugucne gbagbacne fileine, ga biyachac gaing ailu yakumac gagic.  
Ga pasigone yogo dondonne.

Ailu wiyc sasawa yago yowawa locebaing.

<sup>6</sup> I yangucte, wiyc yogo yengi geicne bingec ngic-ngigacfocgone nga siduc-mimi ngic wecebabong yengele sac sotingkelu wawec.  
Ilec ailu gagi sac misawacni noningte gumecebaengka nobong amengineng yogo dondonne aigac.”

<sup>7</sup> Inguc mime ngagebe alatadi yanguc miwec,  
“Oc, Sugucne Wapong Tapilitowa Fileine, ga ngic-ngigac wosaecebalu yefe dondonna nga noina balaibelu aibabangineng mimoctocaigic.”

<sup>8</sup> Aime angelo 4 yedi pele sotingkeme wenacte feiwa haume wenac ye dacineholec ailu ngic-ngigac lobcebanale tapili bawec. <sup>9</sup> Balu dacine sugucne hacbenang ailu lobcebabawec. Aime sifu ngic-ngigac yenge kwelengineng mi hefaliyebong. Yenge doic 7 yogolec fileine Wapong, yele wac feicne mi bafelu misulec aicnoibong.

<sup>10</sup> Aime angelo 5 yedi pele sotingkeme hudu-baba-sicte mac ngictaule ngiye-ngiyewa haume yele ngani-damong yogo kundung kwewec. Ailu ngic-ngigac yenge doic sugucne hac ngageibongte ailu mamang hiduibong.

<sup>11</sup> Ailu yenge doic nga waic socnginang fikewec. Yogolec ailu honocmengte

**15:5:** Wah 38:21    **15:7:** Yes 51:17,22    **15:8:** Esek 10:2-4; 1Ngt 8:10-11; 2Ngsi 5:13-14; Yes 6:4

**16:1:** Yes 66:6; Yer 10:25; Esek 14:19    **16:2:** Wah 9:10; Miye 13:12-17    **16:3:** Wah 7:17-21

**16:6:** Yes 49:26; Mige 79:3    **16:7:** Yef 32:4; Mige 19:9; Miye 15:3    **16:9:** Miye 9:20-21    **16:10:**

Wah 10:22; Yes 8:21-22; Mige 79:5,10

Wapong misulec aicnoibong. Ailu aibabangineng yogolec kwelengineng mi hefaliyeibong.

<sup>12</sup> Aime angelo 6 yedi pele sotingkeme Yufretis misa sugucna hauwec. Haume ngictau wenac ofe-ofeinacni yengele yefe fikenale misa yogo dikewec. <sup>13</sup> Dikeme nganibe hematowa nga hudu-baba-sic ailu siduc-mimi ngic kwesacine,\* yengele mickacniasu habackang silicngineng wabolac ingucne wonongginengkolecti ofelu waibong.

<sup>14</sup> Asu yogo yenge aleng sowacnebenang. Ailu pasile maaine bacaigaing. Wapong Tapilitowa Fileine, yedi ngic-ngigac wosacebanale bole badaicte. Dameng yogolec ailu aleng yenge himong sasawale ngictau yengela hikelu Wapongkolec hudu wenigte kpaducebaibong.

<sup>15</sup> Aime monicti miwec,

**“Ngagegaing, na hise-baba ngic ingucne kwesidacte. Kwesibe monic ye deboc-gboli galu ngakpi-kpolucine damongkelu game ngic-ngigac yengi senggangngine mi nganidaingte. Aime mi gameedaicte, ngic ingucne ye kwele-angackolec.”**

<sup>16</sup> Aime aleng yengi himong monic Hibru yowawa wacine Amagedon, iwa ngictau kpaducebaibong.

<sup>17</sup> Kpaducebabong angelo 7 yedi pele sotingkeme sawawa haume Ibumackacni yowa-malac sugucnehab ngictaule ngiye-ngiyewacni welelu miwec, “Wapongte kwele-dac biyac miyac aigac.” <sup>18</sup> Inguc mime pilatac bame gbululung holeme uc fikewec, aime memeya sugucnehab bawec. Aime ngic-ngigac himongka esecne gaibong, dameng iwa memeya sugucnehab nga feicnebenang ingucne monic mi bawec. <sup>19</sup> Memeya balu Babilon taon sugucne bauckeme habackang aiwec. Ailu himongne himongne ngic-ngigac yengele taon bocyac sowaleibong. Sowalebong Wapongti Babilon taonte ngic-ngigac yengele ngagesilu kwenocte kap iwa kwele-dacte waing aalicineholec yogo yelewec. <sup>20</sup> Aime nuc sasawa yenge hikelu sangkeyackebong. Aime ngic-ngigac yenge tiki basackelu monic mi nganiibong. <sup>21</sup> Aime sawawacni mac hucine sanangkeicnedi walu ngic-ngigac feinginang holeme yenge doic sugucnehab ngageibong. Mac hucine moniyang moniyangte umacine yogo 40 kilo-lesoc aiwec. Aime ngic-ngigac yenge doic sugucnebenang ngagelu Wapong misulec aicnoibong.

## 17

### *Yefe-ngigacti ameine bawec*

<sup>1</sup> Angelo 7 yenge pele 7 balu gaibong, yengelacni monicti nala kwesilu naholec yowa mingagec ailu yanguc miwec, “Yefe-ngigac sugucne ye misa bocyac yengele feinginang ngiyegac, Wapongti aibabainele ameine lacnodaicte. Ga weleng yogo edalicgudacte. <sup>2</sup> Himongte ngictau yenge yeholec selo-boic aibaba aibong. Aime yele selo-boic aibabale waing misadi ngicngigac himongka gagaing, yengele kwele nga ngage-ngage bame sifuweicne.”

---

**16:12:** Fike 15:18; Yes 11:15      \* **16:13:** Hudu-baba-sic himongkacni ofewec, yele siduc yogo Miyegengkeicne 13:11-15 iwa fagac. Yedi hocne siduc-mimi ngic kwesacine aigac. Miyegengkeicne 19:20 iwa yegenia aidaiete. Yehudu-baba-sic molickelu kiweckacni ofewec, ye bafickecaigac. **16:13:** Wah 8:3-7; Sek 12:3-4      **16:14:** Miye 19:19      **16:15:** Mat 24:43-44; Miye 3:3      **16:16:** Sek 12:11      **16:18:** Wah 19:16-18; Dan 12:1-2; Miye 4:5; 8:5      **16:19:** Miye 14:10      **16:20:** Miye 6:14      **16:21:** Wah 9:23-24; Esek 38:19-22; Miye 11:19      **17:1:** Yer 51:12-13      **17:2:** Yes 23:17; Yer 51:7; Miye 14:8

<sup>3</sup> Aime angelodi Asule tapiliwa bacnume himong kisiwa misaine mikacka hikeiba. Hikelu nganibe ngigac ye hudu-baba-sic monic sasacne, yele feiwa ngiyewec. Aime hudu-baba-sic ye hodocene 7 nga begicine 10. Ailu ye socine sasawa yogo Wapong fecnogac, wac ingucnedi wakeyackeicne.

<sup>4</sup> Ngigac yogo ye ngakpi-kpolucine mondo-sasac nga giweng, ailu gol nga posa basufaleicne, ailu kwanang fuline sugucnebac latac-latacine holelu ngiyewec. Ailu ye kwenoete kap monic goldi baicne, iwa selo-boic aibabaine wonongkolec nga wiyac sowacnebenang memenguinedi wakeyackeicne yogo moleina balu ngiyewec. <sup>5</sup> Ailu yele meiwa wac monic sangkeicne yogo kwelengkeicne fawec. Wac yogo yanguc, Babilon taon sugucne yogo wiyac sowacnebenang memenguinedi fikelu himongte yefe-ngigac yengele nenggacngineng aigac.

<sup>6</sup> Aime ngigac nganiiba, yedi Wapongte bingec yenge Yesule yowa-siduc mibong yegengkewec, yenge wehomacebaibong, yengele sac nolu kweleine sifuwewec. Aime na ye nganilu kwatatacke-benangkeiba. <sup>7</sup> Kwatackebe angelodi yanguc edocnuwec, “Ga omale kwatackegic? Na ngigac nga hudu-baba-sic hodocene 7 ailu begicine 10 yedi ngigac yogo attickelu gacaigac, yekelie ngage-ngage sangkeicne fungine yogo edocgudacte. <sup>8</sup> Ga hudu-baba-sic nganigic ye biyachac gawec nga yakumac mi gagac. Ye long sugucnebenang iwacni ofedaicte. Ailu ye sowalenale hikedaicte. Aime ngic-ngigac himongka gagaing, yengele wacngineng Gagale hibiwa mi kwelengkeicne fawec, yogo Wapongti himong bafuwawec, iwacni fike-ofewec. Yenge hudu-baba-sic esecne biyachac gawec, nga yakumac mi gagac, ailu kwestilu gadaicte, aimebac yenge nganilu kwatackedaicte.

<sup>9</sup> “Ngage-ngage-motoc nga ngage-ngage ileckeicne yanguc balu ganoga. Hodoc 7 yogo tiki 7 aigac. Aime ngigac yedi tiki yogo yengele feinginang ngiyegac. <sup>10</sup> Aime hodoc yogo yenge inguchac ngictau 7. Yengelacni 5 yenge biyachac waweibong. Aime moniyangtibac ngiyegac. Nga monic yebac mi kwestigachac. Ye kwestilubac dameng kpisicnemac ngiyedaicte. <sup>11</sup> Hudu-baba-sic biyachac gawec nga yakumac mi gagac, ye inguchac ngictau yogo yengela taockeme dzalengineng 8 aigaing. Ailu agongineng monic ye hocne 7 yengela taockelu sowalenale hikedaicte.

<sup>12</sup> “Begicine 10 nganigic, yogo ngictau 10 himongte ngani-damongngineng mi baibonghac, yengebac dameng moniyangtesoc inguc hudu-baba-sickolec ngictau bole banogale bole-yowa tapiliineholec badaingte. <sup>13</sup> Yenge ngage-ngage moniyang sugu bagalu bole-yowa tapilinginengkolec yogo hudu-baba-sic lacnobong yedi tapili yogo balu gadaicte. <sup>14</sup> Aime yenge Lama madecineholec wenagulu yedi huduwa ewalicebalu gbelong aidaicte. I yangucte, Lama madecine ye sugucne yengele Suguene, nga ngictau yengele Ngictau. Aime ngic-ngigac biyachac bawosaecebalu wacebawec, yenge Lama madecinele yowa balaibecaigaing, yenge yeholec gadaingte.”

<sup>15</sup> Aime angelodi yanguc edocnuwec, “Ngic-ngigac soc haicne monicmonic, nga habutowa, ailu himongne himongne ngic-ngigac, nga yowane yowane ngic-ngigac, yenge misa bocyac ingucne. Yogo nganime yefe-nigacti yengele feinginang ngiyewec. <sup>16</sup> Ga hudu-baba-sicte begic 10 nganicing, yogo yenge hudu-baba-sickolec wetackelu yefe-ngigac lobe holecnolu wiyacine badaingte. Aime ye mocbenang senggang ngiyedaicte. Ngiyeme yenge ngigac yele biuc nolu yeicne wickebong dacti lobedaicte. <sup>17</sup> Wapongti

kwelenginang ngage-ngage yogo yelewecte, yenge ngage-ngage moniyang ailu ngictau bolele tapilingineng yogo hudu-baba-sic lacnodaingte. Lacnolu yenge hudu-baba-sicte yowa balaibe galu Wapongti yowa biyachac ngageme fawekasoc balaibelu bole aling sasawa bagacgubong Wapongte ngage-ngage fawec, yogo motodaicte. <sup>18</sup> Aime ngigac nganiing yogo, ye taontowa sugucnele soc holeibong. Taon yogo himongte ngictau yengele damong ailu ye ngictau bolele tapili balu gagac."

## 18

### *Babilon sugucne*

<sup>1</sup> Yogolec lobeina nganibe angelo monic bole-yowa tapilitowaineholec balu ngiyewec, ye honocmengkacni wame yele hibi-angocti himong bame angolewec. <sup>2</sup> Angoleme yowa-malactowaine tapiliineholecti yanguc wackewec,

"Babilon\* taontowa ye waweicne hocne, Babilon yogo biyac waweicne fagac.

Waweme aleng yengele mac-himong nga aleng wonongnginengkolec sasa wa ailu nango sic sasawa sowacnebenang wonongnginengkolec, yengele mac-himong aiwec fagac.

<sup>3</sup> Yele selo-boic aibabaine yogo angacineholec waing misa ingucne himongne himongne ngic-ngigac sasawa yengi noibong.

Himongte ngictau yenge yeholec selo-boic aibaba aiibong.

Ailu Babilon yele tapili nga mafatowainele angacte ailu himongte ngicngigac yenge woc-wiyac salecaigaing, yenge mafatowanginengkolec aiibong."

<sup>4</sup> Aime ngagebe honocmengkacni yowa-malac monic yanguc miwec, "Ngic-ngigacfocene, ngenge yeholec bikickolec mi ainingte, nga bikicte ameinele doic yeholec mi ngageningte ngenge ye hegilelu hikening.

<sup>5</sup> Ye bikic yogo balu kpaduckelu hole feme honocmenga fegac. Aime Wapong ye aibaba sowacne yogo ngagesilu gagac.

<sup>6</sup> Aime yedi aibabaine sowacne aingelewec, yogolec ameine inguchac bafaliyecnolu aibabaine aingelewec ingucne hac feicnehac ailu lacnodaing.

Aime ye pele kwelina misa kweme haume lalickelu yelewec, iwa oma wiyacti ngiyewec, yogo ngagelu ngengi feicnehac lalickecnolu lacnodaing.

<sup>7</sup> Inguc aime ye yeicne socine bafelu mafa nga gaga angacineholec balu gawec, yogolec silicina doic nga kwele-sowac lacnodaing.

I yangucte, ye kweleina yanguc ngagecaigac, 'Na hosec miyac, na ngigac-tau. Ilec kwele-sowac nalic mi ngagedakte.'

<sup>8</sup> Ilec ailu hadeng moniyangte kwelina homac nga kwele-sowac ailu nosingte lolocci molickecnome yele feiwa doic ingucne fikeme ngigac ye dacti lobedaicte.

I yangucte, Sugucne Wapong ye tapiliineholecti, yele pasi wosaelu sowacnele ameine mimoctodaicte."

**18:1:** Esek 43:2    \* **18:2:** Fengngine iwa Babilonte siduc fagac. Ilec taon yogolec ngic-ngigac yenge habu moniyang gaibongte ailu ngigac ingucne "ye" nga "ga" kwelengkewec.    **18:2:** Miye 14:8; Yes 13:21; 21:9; 34:10-14; Yer 50:39; 51:9    **18:4:** Yes 48:20; Yer 50:8; 51:6,45; 2Kor 6:17    **18:5:** Fike 11:5-9; 18:20-21; Yer 51:9    **18:6:** Mige 137:8; Yer 50:15,29; 2Tim 1:6    **18:7:** Yes 47:7-9    **18:8:** Miye 17:16

**9** “Aime himongte ngictau yenge ngigac yeholec selo-boic aibaba aiibong. Ailu mafa nga gaga angacineholec balu gaibong. Ngictau yogo yenge dac yogolec hasocene nganilu yele hisonggong nga kwele-sowac ngagedaingte. **10** Yenge yele doicte hangocebame dalickabenang domalu yanguc midaingte,

‘Ga dameng bangkacnele kwelina molickelu yowawa locguwecete ameine biyac welegac.

Ilec ailu, Babilon, ga taon sugucne nga tapiligoneholec, gale kwele-sowac sugucnehac aigelegabeleng.’

**11** Aime himongte ngic-ngigac yenge woc-wiyac salecaigaing, yogo monicti mafanganeng hatacmac fuli mi badaicte. Ilec yele ailu hisonggong nga kwele-sowac ngagedaingte. **12** Mafa gocne, yogo gol nga siliwa ailu posa basufaleicne, ailu kwanang fuline sugucnehac. Ailu kpoluc hodocine-holec madicnebenang hibine mondo-sasac nga giweng, ailu siliga ingucne madicne. Aime yoc sasawa hoine madicne ailu wiycasasawa elefante begicti baicne, ailu wiycasaine monic-monics yoc sanangne fuline sugucnehacti baicne. Ailu kopadi nga aenti baicne, ailu posa basufaleicne ailu hibine madicne wiycasasawa yogodi baicne. **13** Yogo wiycasaine monic mosoi yoc ingucne nga gime-aniyang wiycasaine ailu wiycasasawa madicneholec nga tokic hoine madicne. Nga yoc misainedi baicne yogo hasoc hoine madicne, ailu waing misa nga oliwa helocine, ailu flawa madicne nga wit hucine.<sup>†</sup> Bulumaka nga lama ailu becosic nga keleta. Aime ngic-ngigac bacebabong kwelekwetra gaibong, yenge yogo mafa ingucne salecebanogale bacebaibong.

**14** “Ilec ailu ngic-ngigac woc-wiyac salecaigaing, yenge yanguc midaingte, ‘Gale soc-kwelegonedi wiycasaine aicnolu gawec, yogo hegilecgwec. Aime wiycasasawa madicne hibi-angocineholec, yogo galacni biyac hikey-ackewec. Aime wiycasaine ingucnehac hatacmac mi bafuwadamecte.’

**15** “Inguc aime ngic-ngigac yenge woc-wiyac salecaigaing, yenge yefengigacti baficebalu wiycasasawa yago yelacni fuli balu mafatowangi-nengkolec aiibong. Yenge yele doicte hangocebame dalickabenang domalu hisonggong nga kwele-sowac ngagedaingte. **16** Ailu yanguc midaingte, ‘Taontowa, gale kwele-sowac sugucnehac aigelegabeleng.

Ga ngakpi-kpoluc madicnebenang mondo-sasac nga giweng, ailu gol nga posa basufaleicne fuline sugucnehac, ailu kwanang fuline sugucnehac, yogodi loicne inguc fawec.

**17** Yogo dameng bangkacnele kwelina mafatowa sasawa dacti lobeyackeme miyac aiyackewec.’

Ailu wage bacaigaing damong sasawa nga yengele bagewa galu wagewa bole bacaigaing, ailu kiwecka hike-kwesic aicaigaing. Ailu ngic-ngigac sasawa kiwecka sic bacaigaing, yenge sasawa dalicka domadaingte.

**18** Domabong ye dacti lobeme hasocene nganilu yanguc milu wackedaingte, ‘Taon esecne nga yakumac fagac, taontowa ingucne monic mi fagac, yogo miyac.’ **19** Yenge hodocnginang lube wickelu hisonggong ailu wackelu kwele-sowac ngagelu yanguc midaingte,

‘Ye dameng bangkacnele kwelina dacti lobeyackeme miyac aiwec.

**18:9:** Esek 26:16-18; 27:30-35    **18:11:** Esek 27:36    **18:12:** Esek 27:12,13,22    <sup>†</sup> **18:13:** Mosoi yoc ingucne yogo wacine sinamon, yogo nosing gocna lobong angacineholec aidaicte. Tokic wacine yogo mira, nga yoc misaine wacine yogo frankinsens.    **18:15:** Esek 27:31,36    **18:16:** Miye 17:4

**18:17:** Yes 23:14; Esek 27:27-29    **18:18:** Esek 27:32

Ilec taontowa, gale kwele-sowac sugucne hac aigelegabeleng. Aime ngic-nigigac sasawa wagenginengkolec kiwecka hikecaigaing, yenge yelaci mafatowanginengkolec aibong."

**20** Wapongte ngengele ameine yele feiwa lowecte ailu, honocmengka gagaing, nga Wapongte bingec ailu salecebaicne nga Wapongte siduc-mimic, ngenge yele ameine ailu beliyedaing."

**21** Aime angelo tapiliineholec monic, yedi balinga sugucne monic balu wickeme kiwecka haume yanguc miwec, "Yenge Babilon taontowa dacineholec inguc wickebong haume hatacmac nalic mi bafuwadaingte.

**22** Wickebong gita mucine homacne wewe, nga gee hole-hole ailu muluc fito-fito, nga kpeng fito-fito, yogo yenge gale kweliwa hatacmac nalic mi ngagedaingte.

Ailu mole-hibi haicina monic-monice yogolec bole-ngic, yenge gale kweliwa hatacmac nalic mi gadaingte.

Aime posadi flawa wesockecaigaing, yogolec ucine gale kweliwa hatacmac nalic mi ngagedaingte.

**23** Gale kweliwa hifa angocene hatacmac nalic mi kweme angoledaictie.

Aime ngic-nigigac banagunogale aiboc, yekele kwele-madicte aukwecaigaing, ucine ingucne gale kweliwa hatacmac nalic mi ngagedaingte.

I yangukte, gale ngic-nigigac yenge woc-wiyac salecaigaing, yenge himongte ngic-nigigac sugucne gaibong.

Nga ga mosoc aibabagone sowacnedi himongne himongne yogolec ngic-nigigac sasawa kwele basifuc aiyeleing.

**24** Ailu taontowa yogolec kwelina Wapongte siduc-mimi ngic nga Wapongte bingec ailu ngic-nigigac sasawa himongka wecebabong homaibong, yengele sacngineng bafuwai'bong."

## 19

### *Haleluya, Wapong mitengkegabiyeng*

**1** Yogolec lobeina honocmengka aling sugucnebenangti yowa-malac ingucne ngagebe yanguc miibong,

"Haleluya," bikicte ameine bam'e wasecne aigabeleng.

Ilec bole nga wac feicne ailu tapili, yogodi Wapongnonggengte aigac.

**2** I yangukte, ye ngic-nigigac yowanganeng wosaelu yefe dondonna nga noina balaibelu aibabangineng mimoctocaigac.

Ailu ye yefe-ngigac sugucne selo-boic aibabainedi himontowa basowalewec, yele aibaba wosaelu Wapongte kwelec kwekwefocine wehomacebaibongte ailu yengele sacnginengte ameine ye lacnowec."

**3** Ailu yenge hatacmac yanguc miibong,

"Haleluya, yefe-ngigacte hasoc yogo moto-motoine mikacfafeginowagac."

**4** Inguc mibong damong 24 nga wiyc gaganganengkolec 4, yenge ketadi holecnolu Wapong ngictaule ngiye-ngiyewa ngiyegac, ye afeelu yanguc miibong,

"Yogo foinac, haleluya."

**5** Inguc mibong yowa-malac monic ngictaule ngiye-ngiyewacni yanguc miwec,  
“Wapong kwelec kwekwefocine, wac feicnepholec nga waweweine gagaing,  
ngenge alang bacnoaigaing, ngenge Wapong mitengkening.”

### *Lama madecinele baba-tumang*

**6** Inguc mime yowa-malac monic ngageiba, yogo ngic-ngigac aling suguc  
nenac yengele yowa-malac ingucne aiwec. Yogo misa dundung sugucne yele  
ucine, nga gbululung sugucnele ucine ingucnedi yanguc miibong,  
“Haleluya, Sugucne Wapongnonggeng Tapilitowa Fileinedi ngictau ailu da-  
mongnubagac.

**7** Lama madecinele baba-tumang dameng kwesime ngigacinedi† biyac  
efeckegacte ailu, yele kwele-madic ngagelu beliyelu Lama  
madecinele wac bafedabeleng.

**8** Inguc ailu ngigacine ngakpi-kpolucine madicnebenang gbagbacne nga  
hibi-angocineholec holenale Waponti lacnowec.”  
Ngakpi-kpolucine madicnebenang yogo Wapongte bingec yengele aibaba  
dondonne.

**9** Inguc mime angelodi yanguc edocnuwec, “Ga hibiwa yanguc kwe-  
lengkec, Lama madecinele baba-tumangte fatawa wacebaicne, yenge  
kwele-angackolec.” Inguc milu yanguc miwec, “Yowa yago Wapongte yowa  
noine.”

**10** Inguc mime na angelo yele higewa ketadi holecnolu afeenogale ariba.  
Aime yedi yanguc edocnuwec, “Inguc mi ainong! Na ga nga ngic ha-  
gbafogone Yesule yowa yogo mibong yegengkeme balu gagaing, ngengele  
kwelec kwekwe ngic agongineng. Siduc-mimi yengele yowale kwele-nga-  
nage yogo Yesule yowa miyegegkeicne hocne. Illec ailu ga Wapong  
afeenong.”

### *Becosic lalacne*

**11** Inguc mime honocmeng angkeme nganiiba. Hei, na nganibe ngic  
monic becosic monic lalacnele feiwa ngiyewec. Aime ngic ngiyewec, yele  
wacine yanguc, Yowaine Balaibecaigac, ailu Yowa Noine micaigac. Ailu  
ye pasi dondonne yogowa ngic-ngigac yowawa locebalu huduwa weceba-  
caigac. **12** Ye dongeine yogo dac-ubilang ingucne, nga hodocina ngictaule  
duu bocayac holewec. Ailu socina wacine monic kwelengkeicne, yogo mon-  
icti nalic mi ngagedaict, yeuc sugu ngagegac. **13** Ailu ye ngakpi dalicne  
monic sacka kpomuluckeicne holewec. Ngic yele wacine yogo Wapongte  
Yowa. **14** Aime honocmengte hudu-baba ngic aling yenge ye balaibeibong,  
yengele becosicngineng yogo lalacne. Ailu ngakpingineng ngani-nganiine  
madicnebenangti lalacne nga gbagbacne. **15** Aime micinacni hudu-baba  
fitec monic micineholec ofelu wawec, ye yogodi himongne himongne ngic-  
ngigac wecebadaict. Ailu ye ngictaule aen yasudi ngic-ngigac sanangne  
damongebadaict. Ailu Wapong Tapilitowa Fileine yele kwele-dac aalicine-  
holec, yogo waing noine hesoc-hesoce aibaba ingucne. Aime ngic yogo yedi  
waing noine hesocebadaict. **16** Kpolucina nga ponggaina wac monic yan-  
guc kwelengkeicne fawec, “Ngictau yengele Ngictau, nga sugucne yengele  
Sugucne.”

---

**19:6:** Mige 95:10; Yes 52:7; Miye 14:2      † **19:7:** “Ngigac” yogo Yesule habu yengele milu  
kwelengkewec. Monic 2 Korin 11:2 yogowa kwelengkeicne. **19:7:** Yes 61:10; Miye 21:2      **19:9:**  
Mat 22:2-3      **19:10:** Sale 10:25,26; Miye 22:8-9      **19:11:** Miye 1:5; 6:2; Mige 96:13; Yes 11:4      **19:12:**  
Dan 10:6; Miye 1:14; 2:17      **19:13:** Yes 63:1-3; Yoa 1:1,14      **19:15:** Yes 11:4; 49:2; Mige 2:9; Miye  
1:16; 14:20      **19:16:** Miye 17:14

**17** Aime nganibe angelo monicti wenac feina domalu yowa-malacine sugucne hac wackelu nango sasawa sawa hewacka filalangkecaigaing, yenge yanguc edocebawec, "Welening! Ngenge kpaduckelu Wapongte nosingtowa sugucna kwesining. **18** Kwesilu ngictau nga hudu-baba ngic yengele damong, ailu ngic tapilinginengkolec, ailu becosic nga ngic-ngigac yengele feiwa ngiyegaing. Ailu ngic-ngigac ngic monicte bagewa mi gagaing, nga kwelec kwekwe sugucnefocngineng yengele bagewa gagaing, ailu wac feicne nga waweweine, yengele soc-biucngineng nocebaning."

**19** Aime na hudu-baba-sic nga himongte ngictau yenge hudu-baba ngicfocnginengkolec nganicebaiba. Nganicebabe yenge ngic becosic feina ngiyewec, ye nga hudu-baba alingfocine yengeholec hudu wenaguningte kpaduckeibong. **20** Aime siduc-mimi ngic kwesacinedi hudu-baba-sicte haicka pasile maaine balu gawec. Ailu ngic-ngigac hudu-baba-sicte maa bayackeibong. Ailu yele ilucine afeelu gaibong, yenge yedi kwele basifuc aiyelewec. Aime ngic becosicka ngiyewec nga alingfocine yengi hudu-baba-sic nga siduc-mimi ngic kwesacine yeke bacepalu, dac nga salfadi lobelu kiwec ingucne ailu fagac, yogolec kwelina gbolicne wicepabong hauiboc. **21** Aime becosic feina ngiyewec, yele mickacni hudu-babale fitec ofelu wawec, yogodi himongte ngictaule hudu-baba ngic sasawa wecebame homaibong. Homabong nango sasawa yengi kwesilu soc-biucngineng nolu gebecebawec.

## 20

### *Aleng Sugucnening muc-macka loibong*

**1** Aime angelo monic nganiiba. Nganibe ye long sugucnebenang, yogolec ki nga sentowa monic moleina balu honocmengkacni wawec. **2** Walu hematowa, ye hema esecne, wacine monic Aleng Sugucnening, ailu Satang, ye balu hifa 1 taosentesoc ngiyenale senti hefewec. **3** Aime himongne himongne ngic-ngigac hatacmac mi kwesacebanale hefelu long sugucnebenang, iwa wickeme haume nu holecnolu aka lowec. Aime ye hifa 1 taosen game motome, ye hatacmac lukecnome dameng bangkacnemac mucine mikac gadaite.

**4** Aime na ngictaule ngiye-ngiye bocyac nganiiba. Aime ngictaule ngiye-ngiye yogolec feina ngic-ngigac ngiyeibong, yenge ngic-ngigac yowawa locebanigte bole-yowa yeleicne. Ailu habu monic yengela yanguc nganiiba, hudu-baba-sic nga ilucine mi afeelu gaibong. Ailu yele maa yengele meiwa nga molenginang mi baibong. Yenge Yesu ngagesingkelu siducine milu gaibong. Ailu Wapongte yowa mibong yegengkewec. Inguc ailu gabong ngic yengi ubengineng welockeibong, yengele ilucfocngineng nganicebaiba. Nganicebabe yenge sasawadi gboliyelu hifa 1 taosentesoc Kristoholec galu ngic-ngigac damongebaibong. **5** Yogodi homackacni gboliyelu fangke-fangke yogolec molic-molicine aigac. Aime gocne homaibong, yenge mi gboliyelu fangkebong hifa 1 taosen motome fangkedaingte.

**6** Aime Sugucnedi ngic-ngigac molic-molic homackacni gboliyelu fangke-fangke iwa balu taocebadaicte, yenge Wapongte bingec nga kweleangackolec. Aime homac alecine yaeckangti yenge nalic mi bacebadaicte,

yenge Wapong nga Kristole depec-baba ngic ingucne mimiteng bole bagalu hifa 1 taosen yeholec ngic-ngigac damongeba daingte.

### *Aleng Sugucnengineng basowale-benangkeibong*

<sup>7</sup> Aime hifa 1 taosen motome Satang muc-mackacni lukecnodaicte. <sup>8</sup> Lukecnome, ye hikelu himongne himongne ngic-ngigac kwesacka men gocebame ngic-ngigac himontowa yogolec mecin 4 iwa gagaing. Himong yogo wacnginec Gok nga Magok, yogowacni ngic-ngigac yenge hudu wenigte kpatulecebadacite. Yogo yengele dzalengineng kiwec mecin dingong fagac ingucne. <sup>9</sup> Kpatulecebame yenge himongne himongne hikelu Wapongte bingec yenge taonka gagaing, yengele kweleinedi angackecaigac, taon iwa hikelu hewalingkelu domaibong. Domabong honocmengkacni dacti walu hudu-baba ngic lobecebayackewec. <sup>10</sup> Lobecebayackeme Aleng Sugucnengineng ye ngic-ngigac kwesacebawec, ye dac nga salfadi lobelu kiwec ingucne ailu fagac, yogowa wickebong hauwec. Aime hudu-baba-sic nga siduc-mimi ngic kwesacine, yeke iwa momochac galu deboc hadeng doic nagedaingte ailu ngagenowagaing, yogo moto-motoine mikac.

### *Wowosae dameng fikedaicte*

<sup>11</sup> Aime ngictaule ngiye-ngiyetowa kwalac-kwalac monic sugucne hac nganiiba. Aime ye mac ngiye-ngiye yogolec feina ngiyewec, ye momoc nganiiba. Yele haicka himong nga sawa yeke hikeboc miyac aime macnginec sawaine sugu fawec. <sup>12</sup> Aime ngic-ngigac feicne nga waweweine biyachac homaibong yenge nganicebaiba. Nganicebabe yenge Wapongte haicka domabong ye hibi gocene bacebalu baflamewec. Ailu hibi monic wacine Gagale hibi yogo momoc balu baflamewec. Aime hibi gocene iwa ngic- ngigac homaibong yengele aibabanginengte kwelengkeicne fagac. Aime ye iwa nganilu aibabangineng mimoctowec. <sup>13</sup> Aime kiwecka homalu hauibong gagaing, yenge kiwecti hegilecebame ofeibong. Yenge homac nga Wangec-macka homaibong gagaing, yeke inguchac yenge hegilecebaboc ofeibong. Inguc ailu ngic-ngigac filesoc filesoc aibabanginengtesocka mimoctebawec. <sup>14</sup> Mimocteobalu homac nga Wangec-mac yeke nga ngic- ngigac focnginec momochac dac lobelu kiwec ingucne ailu fagac, yogowa wicebame hauibong. Yogodi homac alecine yaeckang aigac. <sup>15</sup> Ailu ngic- ngigac wacngineng Gagale hibiwa mi kwelengkeicne fagac, yenge dac lobelu kiwec ingucne ailu fagac, yogowa wicebame hauibong.

## 21

### *Himong nga sawa gbolicne*

<sup>1</sup> Aime na sawa nga himong gbolicne nganicepaiba. Aime himong nga sawa esecne faiboc, yeke miyac aiboc. Aime kiwec ye hatacmac mi fadaicte. <sup>2</sup> Na taon gbagbacne, yogo Yerusalem gbolicne nganibe Wapongtaci honocmengkacni wawec. Wame ngigacti ngaweineholec molewa babac aino- gale efeckecaigac, ngani-nganiine yogo ingucne ngawe-bingecinele ailu leso babong ngani-nganine madicnebenang ailu ngiyewec.

---

**20:6:** Miye 1:6    **20:8:** Esek 38:2,9,15-16    **20:9:** 2Ngt 1:10    **20:10:** Mige 11:6; Miye 19:20; 21:8    **20:12:** Dan 7:9-10; Mat 25:31-46; Sale 17:31; 2Kor 5:10; Miye 13:8    **20:13:** Rom 2:6; 1Pi 1:17; Miye 2:23; 22:12    **20:15:** Dan 12:1-2    **21:1:** Yes 65:17; 2Pi 3:13    **21:2:** Yes 52:1; 61:10; Hib 11:16; 12:22; Miye 3:12

<sup>3</sup> Ngiyeme na yowa-malac monic ngictaule ngiye-ngiyewacni ngagebe yanguc miwec, "Ngagegaing, Wapongte kpoluc-faledi ngic-ngigac yengeholec game yenge yele aling aidaicte. Ailu Wapong yeuctihac yengeholec galu Wapongngineng gadaicte. <sup>4</sup> Ailu yedi donege-misangineng sasawa dongenginangkoci suweyackedaicte. Aime homac nga kwele-sowacte hisonggong, ailu doic yenge hatacmac mi fadaingte. Wiyac esecne faibong, yogo biyac miyac aiyakeibong."

<sup>5</sup> Aime Sugucne ngictaule ngiye-ngiyewa ngiyewec, yedi yanguc miwec, "Ngagegaing, na wiycac sasawa babe gbolicne fikeyackegac." Inguc milu edocnuwec, "Ga yowa yogo kwelengkec. I yangucte, yowa yago noine, aime ngic-ngigac yenge yogo nalic ngagepangkegaing." <sup>6</sup> Milu hatacmac yanguc edocnuwec, "Yogo biyac motogac. Na 'A' nga 'Y', yogo molic-molicine iwacni moto-motoine. Ngic-ngigac monicti misale aicname, ye misa dongeinacni gagale misa moc nonale lacnodakte. <sup>7</sup> Monicti hudu welu gbelong aidaicte, ye wiycac sasawa yago mole-damoc bame, nani yele Wapong aibe yedi madecne aidaicte. <sup>8</sup> Aime ngic-ngigac hangoceba-caigac, nga ngage-ngagesingngineng mikac. Ailu aibabangineng sowacne wonongkolec nga ngic-wewe. Ailu selo-boic ngic, nga hefec nga mosoc bacaigaing. Ailu siduc-gbong alang bacnoicaigaing, nga kwesac ngic-ngigac. Ngic-ngigac sasawa ingucne yengebac dac nga salfadi lobelu kiwec ingucne ailu fagac, yogowa hauyackedaingte. Yogo homac alecine yaekang aigac."

### *Jerusalem gbolicne*

<sup>9</sup> Aime angelo 7 yenge pele 7 yogo doic 7 moto-motoinedi wakeyackeicne yogo balu domaibong, yengelacni monicti nala welelu yanguc miwec, "Ga welec. Aime nani Lama madecinele ngigac-bingecine edalicgudakte, ye yele ngigac." <sup>10</sup> Inguc mime Asule tapiliwa bacnume tiki sugucne nga dalicne, yogoolec feina felu Wapontacni taon gbagbacne Jerusalem, honocmengkacni wame edalicnuwec. <sup>11</sup> Taon yogo ye Wapongte tapili nga hibi-angockolec. Yogo posa basufaleicne fuline sugucnehab posa sasacne ingucne wonong mikac, ailu latac-latacineholec. <sup>12</sup> Ailu odaine posadi baicne, yogo sugucnedi dalicne bafeicne. Ailu nuine 12 domagaing, aime nuina angelo 12 domagaing. Ailu nuina Israel fikesawekacni 12 yengele wacngineng inguchac kwelengkeicne domagaing. <sup>13</sup> Aime wenac ofecaigacka haic nu habackang, notka haic nu habackang, nga sautka haic nu habackang, ailu wenac haucraigacka haic nu habackang domagaing. <sup>14</sup> Taon sugucnele oda yogo posa yogoolec fungine 12. Aime fungine 12 iwa Lama madecinele salecebaicne 12 yengele wacngineng kwelengkeicne domagac.

<sup>15</sup> Aime angelo naholec mingagec aiibec, yedi taontowa sugucne nga nuine ailu oda posadi baicne, yogoolec maaine banogale kpetele maa monic yasu goldi baicne balu domawec. <sup>16</sup> Badomame taontowa sugucne yogoolec fungine 4. Ailu mecinne sasawa yengele maangineng andohac aiibong. Aime angelodi maa babale yasudi maaine bame maaine yogo 12 taosen stadia\* aiwec. Nga mecinne ailu finale dalicnele maaine yogo moniyang aiiboc.

**21:3:** Dep 26:11-12; Esek 37:27; Sek 2:10-11; 2Kor 6:16      **21:4:** Yes 25:8; 35:10; 65:19; Miye 7:17

**21:5:** 2Kor 5:17      **21:6:** Yes 49:10; 55:1; Yer 2:13; Yoa 7:37; Miye 1:8,17; 22:17      **21:7:** 2Sm 7:14; Mige 89:26-27      **21:8:** Mat 25:41; Hib 10:38-39; Miye 20:15; 22:15      **21:10:** Esek 40:2      **21:11:** Yes 58:8; 60:1-2,19      **21:12:** Esek 48:30-35      **21:15:** Esek 40:3; Miye 11:1      \* **21:16:** 12 taosen stadia yogo Vanimohocni hikegacgu Honiara yogoolecscoc, yogo 2 taosen 220 kilomita ngama ingucne. Stadia moniyang yogo mita 185 ingucne aigac.

**17** Ye oda adecne yogolec bangkacnele maaine yogo bame 144 kubit aiwec.<sup>†</sup> Maa yogo ngic-ngigac yengi bacaiagaing, aime angelo yengele maa yogohac aigac. **18** Oda yogo posa sasacnedi baicne. Nga taontowa sugucne yogo golbenangti baicne, yogo galas ingucne latac-latacine aigac. **19** Aime taon sugucnele oda fungina posa basufaleicnedi loyackeicne, posa yogo sasawa fuline sugucnehad, ingucnedi lesoine loicne. Fungine molic-molic iwa posa sasacnedi loicne, lobeina, iwa posa sowac-sowacti loicne, 3 iwa posa kwalacne, nga 4 iwa posa hedonggboli. **20** Ailu 5 iwa posa hibine medeng-medeng nga kwalac-kwalac ingucne, 6 iwa posa sasacne monic, 7 iwa posa dagec-dagec, 8 iwa posa hedonggboli ingucne monic, nga 9 iwa posa dagec-dagec ingucne monic. Ailu 10 iwa posa hedonggboli haicne monic, 11 iwa posa sowac-sowacti dagecne pung-pung kweicne, nga 12 iwa posa mondo-sasac.

Posa hibine ingucnedi locebaicne domagaing.<sup>‡</sup> **21** Yogowa kwanang hucine sugucnehad 12 ingucti nu 12 iwa domagaing. Aime nu filesoc filesocka hucine moniyang moniyangti baicne. Ailu taon sugucnele yefe yogo golbenangti baicne, yogo galas ingucne bageina nalic nganinoga.

**22** Aime taon yogolec kwelina Ibu-mac monic mi nganiiba. I yangucte, Sugucne Wapong Tapilitowa Fileine nga Lama madecine yeki sugu Ibu-mac aigaic. **23** Aime Wapongtapili nga hibi-angocti taontowa sugucne yogo bame angolegac, aime Lama madecinedi hifaine aigac. Ilec taontowa iwa wenac nga tamacne yekele angoc mi ngagesigaing. **24-25** Aime kundung ye iwa mi fadaicte, ilec hadengsoc taon nuine nalic mi holedaingte. Aime himongne himongne ngic-ngigac yenge taonte angocka lec-welec aidaingte. Aime himongne ngictau yenge wiyanngineng wac feicneholec balu felu iwa ibu ingucne lodaingte. **26** Lobong himongne himongne ngic-ngigac yenge wiyanngineng alang-babaineholec nga wac feicneholec balu yogolec kwelina fedaingte. **27** Ailu wiyc monic wonongkolec nga ngic-ngigac aibabangineng sowacnebenang memenguine, ailu kwesacnginengkolec, yenge taontowa yogolec kwelina nalic mi fedaingte, miyc. Ngic-ngigac waengneng Lama madecinele Gagale hibiwa kwelengkeicne fagac, yengi sugu fedaingte.

## 22

### Gagale misa

**1** Aime angelodi misa monic gagaineholec edalicnuwec. Misa yogo latac-latacine ailu Wapong nga Lama madecine yekele ngictauye ngiye-nyiye-wacni ofelu **2** taontowale yefe sugucnele hewacka hikelu fagac. Fame mecine neboc nga neboc iwa gagale yoc domagaic, yeke hifasoc noine aiboc alecine 12 aicaigac. Yeke tamacnesoc noineholec aicaigac. Ailu yoc

---

<sup>†</sup> **21:17:** 144 kubit yogo 65 mita ngama ingucne. 12 taims 12 yogo 144 aigac. **21:18:** Yes 54:11-12    <sup>‡</sup> **21:20:** Posa waengneng yogo yanguc, 1-yaspia, 2-safaya, 3-kalsedoni, 4-emeral, 5-sadoniks, 6-kanelian, 7-krisolait, 8-beril, 9-topas, 10-krisopres, 11-yasint, 12-ametist. Ilucngineng yogo hafac 481 yogowa fagac. **21:23:** Yes 60:19-20; Miye 22:5    **21:24-25:** Yes 60:3,5,11    **21:27:** Yes 52:1; Esek 44:9; 1Kor 6:9-10    **22:1:** Esek 47:1

yekele hekengnginecti himongne himongne ngic-ngigac bamadicebanoga.

<sup>3</sup> Aime monicti Wapongte aalictie bagewa hatacmac mi gadaicte, miyac. Wapong nga Lama madecine yekele ngictaule ngiye-ngiye sugudi taon iwa ngiyeme kwelec kwekwefocine yenge ye afeelu kwelec kwecnodaingte. <sup>4</sup> Yenge yele haic-mesuine nganidaingte, aime ye wacine yengele meiwa kwelengkeme fadaicte. <sup>5</sup> Iwa kundung hatacmac mi aidaicte, nga hifa me wenacte angoc yogo mi ngagesidaingte. I yangucte, Sugucne Wapongte angocti angoledaicte. Aime ngic-ngigac yenge ngictaule bole badaingte, yogo dameng moto-motoine mikac balu gadaingte.

<sup>6</sup> Aime yanguc edocnuwec, “Yowa yago noine, aime ngic-ngigac yenge yogo nalic ngagepangkegaing. Aime Sugucne ye siduc-mimi ngic yengele kwele-ngage-ngagenginengte Wapong, ye kwelec kwekwefocine wiyc biyac fikedaicte, yogo nganiningte ailu angeloine salewec.”

### Yesu kwsidaicte

<sup>7</sup> “Ngagegaing, na biyac kwsidaicte! Monic ye siduc-mimi ngic yele yowa hibi yagowa kwelengkeicne fagac, yogo balu madicne balaibelu gadaicte, ye kwele-angackolec.”

<sup>8</sup> Na Yoanedi wiyc yogo ngani-ngagec aiiba. Aime nganibe motome angelo wiyc edallicnuwec, yele higewa ketadi holecnolu afeenogale aibe <sup>9</sup> yedi yanguc edocnuwec, “Inguc mi ainong. Na ga nga siduc-mimi ngic hae-gbafocone, yenge ailu ngic-ngigac hibi yagolec yowa madicne balu balaibelu gacaigaing, ngengele kwelec kwekwe agongineng. Ga Wapong afeenong!

<sup>10</sup> “Dameng bangkalegacte ailu ga hibi yagolec siduc-yowa yogo aka mi lulu hegileng fadaic, miyac. Ga miyengka yegengkedaic. <sup>11</sup> Monic ye aibaba sowacne aicaigac, ye aibaba yogohac balu gadaic. Nga wonongkolec gagac, ye ingucnehab gadaic.\* Aime aibaba dondonne aicaigac, ye dondonnehab aidaic. Ailu Wapongte bingec gagac, ye Wapongte bingec gadaic.”

<sup>12-13</sup> “Ngagegaing, na ‘A’ nga ‘Y’, molic-molic nga lobe, ailu molic-molicine iwacni moto-motoine. Na biyac kwesilu ngic-ngigac filesoc filesoc aibabanginengte ameine yelenogale balu kwsidaicte. <sup>14</sup> Balu kwsibe ngic-ngigac ngakpingineng dalicne suweicne, yenge kwele-angackolec. I yangucte, yenge gagale yoc noine noningte tapili yeleicne, ailu taon nuina yefe nalic fedaingte. <sup>15</sup> Aime ngic-ngigac hoda ingucne aibabangineng wonongkolec gagaing, nga hefec nga mosoc bacaigaing, ailu selo-boic aling nga ngic wecebacaigaing. Nga siduc-gbong alang bayelecaigaing, ailu sasawadi kwesac-aibabale angac ngagelu kwesac aicaigaing, yengebac taon lobina gadaingte. <sup>16</sup> Na Yesudi angelone salebe yedi yowa yago nale habufocne ngengela mime yegengkengelenale kwsiwec. Na Dawidilacni gidec, nga ngamboine, ailu ubiyacte asocmeng hibi-angocineholec, na yogo hocne.”

<sup>17</sup> Asu nga Lama madecinele ngigac-bingecine yeki “Ga welec” migabiyc. Ailu monic ye yowa yogo ngagedaicte, ye “Ga welec” midaic. Aime monic ye misale aicnocaigac, ye kwesilu gagale misa fuline mikac moc balu nodaic.

**22:2:** Fike 2:9; Esek 47:12; Yol 3:18; Sek 14:8      **22:3:** Sek 14:11      **22:4:** Mat 5:8; Miye 3:12

**22:5:** Dan 7:18,27; Miye 5:10; 20:6; 21:23,25      **22:6:** Miye 1:1      **22:7:** Miye 1:3      **22:8:** Miye

19:10      **22:10:** Dan 12:4      \* **22:11:** Aibaba sowacne ingucnedi mi madickegac. Aimebac monicti kwele-hefaliyecete mi aigac, ye aibaba ingucne bagacgu dacka haudaicte.      **22:11:** Dan 12:10; Esek 3:27      **22:12-13:** Yes 40:10; 44:6; Yer 17:10; Miye 1:8,17; 21:6; 2:23      **22:14:** Fike 2:9; 3:22      **22:16:** Him 24:17; Yes 11:1,10; Rom 1:3; Miye 2:28; 5:5      **22:17:** Yes 55:1; Miye 21:6

*Yowa moto-motoine*

<sup>18</sup> Aime ngic-ngigac hibi yagolec siduc-yowa ngagegaing, ngengele swawang-yowa milu yanguc migabac, “Monicti yowa yago fagac, iwahac yowa monic taockedaitewa, Wapongti hibi yagowa doicte kwelengkeicne fagac, ye iwa taockedaitce. <sup>19</sup> Ailu monicti siduc-yowa yago fagac, iwacni yowa monic baickedaitewa, Wapongti gagale yockacni noine nebocene ye mi lacnodaicte. Ailu taon gbagbacnele hibi yagowa kwelengkeicne fagac, iwa nalic mi fedaicte.” <sup>20</sup> Aime wiyac yagolec mime yegengkenelegac, yedi yanguc migac, “**Noine, na biyac kwesidacte.**”

Yogo foinac. Oc, Sugucne Yesu, ga welec.

<sup>21</sup> Sugucnenonggeng Yesule kwele-madicti Wapongte bingec sasawa ngen-gela fadaic. Yogo foinac.